


Nuevo Testamento en  
mixteco de Yosondúa



New Testament in Mixtec, Yosondúa (MX:mpm:Mixtec, Yosondúa)

# **Nuevo Testamento en mixteco de Yosondúa New Testament in Mixtec, Yosondúa (MX:mpm:Mixtec, Yosondúa)**

copyright © 1988 Wycliffe Bible Translators, Inc.

Language: Mixtec, Yosondúa

Translation by: Wycliffe Bible Translators, Inc.

Mixteco, Yosondúa [mpm], Mexico

## **Copyright Information**

© 1988, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

## **The New Testament**

in Mixtec, Yosondúa

© 1988, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 11 Nov 2022 from source files dated 29 Jan 2022

28a989a2-bd36-59ff-b10d-452e0cb74797

## Contents

Mateo . . . . .	1
Marcos . . . . .	63
Lucas . . . . .	101
Juan . . . . .	166
Hechos . . . . .	219
Romanos . . . . .	276
1 Corintios . . . . .	305
2 Corintios . . . . .	331
Gálatas . . . . .	348
Efesios . . . . .	359
Filipenses . . . . .	368
Colosenses . . . . .	375
1 Tesalonicenses . . . . .	382
2 Tesalonicenses . . . . .	388
1 Timoteo . . . . .	392
2 Timoteo . . . . .	401
Tito . . . . .	407
Filemón . . . . .	411
Hebreos . . . . .	413
Santiago . . . . .	433
1 Pedro . . . . .	440
2 Pedro . . . . .	448
1 Juan . . . . .	453
2 Juan . . . . .	460
3 Juan . . . . .	461
Judas . . . . .	462
Apocalipsis . . . . .	465

## Jnu'un Yandios ni chaa Mateo

*Sívi yívi ni ka kuu jna'an Jito'yo Cristo Jesúz  
(Lc. 3.23-38)*

<sup>1</sup> Ja'a kuu iin lista taka yívi ni kikoyo nuu ñuyívi na jana'an jiin Cristo Jesúz, ja ni kuu ya jna'an David jiin Abraham. <sup>2</sup> Abraham ni kuu tata Isaac, ti Isaac ni kuu tata Jacob. Jacob ni kuu tata Judá jiin uu ga ñani da. <sup>3</sup> Judá ni kuu tata Fares jiin Zara, ti nana da ni kuu Tamar. Fares ni kuu tata Esrom, ti Esrom ni kuu tata Aram. <sup>4</sup> Aram ni kuu tata Aminadab, Aminadab ni kuu tata Naasón, Naasón ni kuu tata Salmón. <sup>5</sup> Salmón ni kuu tata Booz, ti nana da ni kuu Rahab. Booz ni kuu tata Obed, ti nana da ni kuu Rut. Obed ni kuu tata Isaí. <sup>6</sup> Isaí ni kuu tata rey David, ti rey nación Israel ja ni nani David jiin ñasí'i Urías, ni ka kuu tata Salomón, ko ja ni ji'i Urías sa ni kaku Salomón.

<sup>7</sup> Salomón ni kuu tata Roboam, Roboam ni kuu tata Abías, Abías ni kuu tata Asa. <sup>8</sup> Asa ni kuu tata Josafat, Josafat ni kuu tata Joram, Joram ni kuu tata Uzías. <sup>9</sup> Uzías ni kuu tata Jotam, ja ni kuu tata Acaz, ti Acaz ni kuu tata Ezequías. <sup>10</sup> Ezequías ni kuu tata Manasés ja ni kuu tata Amón, ti Amón ni kuu tata Josías. <sup>11</sup> Josías ni kuu tata Jeconías jiin uu ga ñani da. Ti kuiya yukan ni ka'iin yívi ñuu Israel presu nuu yívi ñuu Babilonia.

<sup>12</sup> Yukan na ti Jeconías ni kuu tata Salatiel, Salatiel ni kuu tata Zorobabel, <sup>13</sup> Zorobabel ni kuu tata Abiud, Abiud ni kuu tata Eliaquim, ti Eliaquim ni kuu tata Azor. <sup>14</sup> Azor ni kuu tata Sadoc, Sadoc ni kuu tata Aquim, Aquim ni kuu tata Eliud. <sup>15</sup> Eliud ni kuu tata Eleazar, Eleazar ni kuu tata Matán, ja ni kuu tata Jacob. <sup>16</sup> Jacob ni kuu tata José, chaa ni kuu yi María. Ti María ni kuu nana Jesúz ja nani Cristo, ni taji Yandios ja ndiso ya jniñu ña'nú.

<sup>17</sup> Ja yukan kuu ja undi uxi kuun yívi ni ka kuu ja ni keja'a undi Abraham ti ni jaa undi David, ti uxi kuun ga tuku ja ni keja'a jaan David, ti undi kuiya ni ka ja'an yívi Israel presu nuu yívi ñuu Babilonia. Ti uxi kuun ga tuku ja undi kuiya yukan, ti ni jaa kuiya ni kaku Cristo, ja ni taji Yandios ya, ndiso jniñu ña'nú.

*Ni kaku Cristo Jesúz  
(Lc. 2.1-7)*

<sup>18</sup> Sia'an ni kuu na ni kaku Cristo Jesúz. Nana ya María, iyo tratu ña ja nanda'a ña jiin José. Na ti najna'an ga ña jiin José, ti ja ni jaku'un se'e ña. Ti maa Espíritu Santo ni sa'a ja na jaku'un se'e ña. <sup>19</sup> ñin chaa va'a ni kuu José, ti tu ni kuni da ja stuu da maa da nuu yívi ja xndoo da ña, chi ni ndo'o ini da ja xndoo xe'e da ña. <sup>20</sup> Ni ndo'o ini da sia'an, ti ni kenda iin ángel ja junukuachi nuu Yandios. Ti ni ka'an ángel un jiin da nuu ñujani, ti ni kachi:

—José, ro'o ja kuu ra jna'an rey David na jana'an, koto yu'u ra ja ki'in ra María ja kuu ñasí'i ra, chi se'e ñu'un chii ña un vaji nuu maa Espíritu Santo. <sup>21</sup> Ti nu na kaku suchi lulu un, ti skonani ra i Jesúz. Sia'an konani suchi lulu un chi maa i kuu ja nama siki kua'a ñanijna'an i, yívi ka iyo kuachi —ni kachi ángel Yandios un.

<sup>22</sup> Taka un ni kuu nava na kundaa taka jnu'un ni kachi profeta Isaías na jana'an, na ni ka'an da jnu'un Yandios:

<sup>23</sup> Jaku'un se'e iin ña'an lulu un, ti kuu i iin suchi yi. Ti suchi lulu un konani i Emanuel,

ja kuni ka'an: "Kancha Yandios jiin yo."

<sup>24</sup> Nu ni ndoto José, ti ni sa'a da nava ni ta'u ángel Yandios un jniñu. Ti ni jaka da María ja na kuu ña ñasi'i da. <sup>25</sup> Ko tu ni ka najna'an da, chi ni ndatu da undi ni kaku se'e ña. Ti ni ka skonani da i Jesús.

### *Ka jande'e chaa tu'va nuu Jesús*

## 2

<sup>1</sup> Jesús ni kaku ya iin ñuu lulu nani Belén, ja kuu iin ndañuu Judea. Ti kuiya yukán ni kuu Herodes rey ja ta'u jniñu nuu ñuu yukan. Ti ni jakoyo uni chaa ñuu ka'iin ichi nuu kaña ndikandii ñuu Jerusalén, ti chaa un ka kuu da chaa tu'va. <sup>2</sup> Ti ka nduku jnu'un da:

—¿Nanu kande rey yivi ñuu Judea ja ni kaku un? Chi nuu andiví ichi nuu sa'u ndikandii ni ka jini ri iin luceru ja'a seña ja, ja ni kaku i. Ti ja yukan kuu ja vekeyo ri ja'a ja na chiñu'un ri i naa ri —ni ka kachi da.

<sup>3</sup> Nu ni jini rey Herodes jnu'un un, ti ni keja'a kaña ii ini da, ti suni kua'a yivi ñuu Jerusalén. <sup>4</sup> Ti yukan na ti ni nastutu rey un taka sutu ka kuña'nu jiin taka ga chaa ka xna'an ley Israel un, ti ni ka jikajnu'un da nau ñuu ni kaku Cristo. <sup>5</sup> Ti ni ka kachi chaa un:

—Ñuu Belén, iin ndañuu Judea, chi sia'an ni chaa profeta nuu tutu ja ni kachi da:

<sup>6</sup> Ti ro'o yivi ñuu Belén, ja kanchuku ra ñuu Judá, tu nda'u xaan kendo ra ja kuu nuu taka ga ñuu ka iyo nuu ñuyivi, chi ja'a kuu nuu kaña iin chaa kuña'nu, ja koto ñuu ri Israel. Kachi tutu.

Sia'an ni ka kachi chaa un nuu rey Herodes.

<sup>7</sup> Yukan na ti ni kana xe'e Herodes chaa tu'va un, ti ni jikajnu'un ndaa da NASA ja ni kuu ja ni kenda luceru un, na ni ka jini da. <sup>8</sup> Yukan na ti ni taji da chaa un kuankoyo da ñuu Belén, ti ni kachi da:

—Kuankoyo naa ra ti nduku jnu'un ndaa ra nanu kancha suchi lulu un. Nu ni ka nani'in ra nuu kancha i, ti chakoyo ra ti kasjnu'un ra nuu ri nava suni na ki'in tu ru'u, kin chiñu'un ri i —ni kachi da.

<sup>9</sup> Sia'an ni xndaku rey un nuu chaa tu'va un, ti kuankoyo da. Ti luceru ja'a seña ja ni ka jini da ichi nuu kaña ndikandii un, yoxnuu tuku nuu da naa da undi ni jaa nuu kancha suchi lulu un sa ni jakuiñi. <sup>10</sup> Nu ni ka jini chaa tu'va un ja ni jakuiñi luceru un, ti ni ka kusii xaan tonto ini da naa da. <sup>11</sup> Nu ni ka kivi da ini ve'e un, ti ni ka jini da suchi lulu un kancha i, yijni nana i María suchi. Ni ka jakunjiti da, ti ni ka nakua'a da ja yiñu'un suchi lulu un. Yukan na ti ni ka jiña da kaja da, ti ni ka ja'a da oro, suxia kutu vixi jiin inga nuu suxia (ja nani mirra), ni kuta'u i.

<sup>12</sup> Yukan na ti ni kasjnu'un iin ñujani nuu da naa da ja tukaa ga nandeokuñi da nuu kancha rey Herodes. Ti ni ka nandeokuñi da inga ichi kuan nukoyo da ñuu da naa da.

### *Kuankoyo José jiin María ichi ñuu Egipto*

<sup>13</sup> Nu ni ka ya'a chaa tu'va un kuankoyo da, ti ni ka'an tuku iin ángel Yandios jiin José nuu ñujani, ti ni kachi:

—Ki'in suchi lulu jña jiin nana i, ti kuankoyo ichi ñuu Egipto naa ra. Ti yukan kunchuku ra naa ra undi na kachi maa ri tuku, chi kuni nanduku rey Herodes suchi lulu jña ja ka'ní da i —ni kachi ángel ya.

<sup>14</sup> Yukan na ti ni ki'in José suchi lulu un jiin nana i, ti ni ka kee da jakuua un kuankoyo da ichi ñuu Egipto. <sup>15</sup> Ti yukan ni ka'iin da undi ni ji'i rey Herodes.

Yukan ni kundaa nava ni kachi Yandios ja ni kachi profeta na jana'an un: "Undi Egipto ni kana ri se'e ri."

### *Ni ta'u Herodes jniñu ja na kuū taka suchi yii kuachi*

**16** Nu ni jini Herodes ja ni ka kuu ichi ini chaa tu'va un maa da. Ti ni kitii xaan tonto ini da, ti ni ta'u da jniñu ja na kuū taka suchi kuachi iin uu kuiya, jiin taka suchi yii kuachi ga ja kanchuku ñuu Belén, jiin taka ga ñuu ka'iin yajni un. Sia'an ni sa'a da, chi ja ni ni'in va'a da jnu'un nuu chaa tu'va un, chi ni ka kachi chaa un nasa ja ni kuu ja ni kaku Jesús. **17** Yukan ni kundaa nava ni chaa profeta Jeremías nuu tutu ja ni kachi da:

**18** Ni ka nde'e xaan yivi ñuu Ramá,

ti iyo xaan jnu'un kui'ya ini.

Raquel kuu ña'an nde'e xaan ja'a se'e ña,  
ti tu kuni ndusii ini ña, chi ja ni ndi'i i ni ka ji'i.

Kachi tutu.

**19** Nu ni ji'i rey Herodes, ti ni ka'an tuku iin ángel Yandios jiin José nuu iin ñujani nuu kande da ñuu Egipto un, ti ni kachi:

**20** —Ki'in suchi lulu jña jiin nana i, ti nandeokuñi ñuu Israel, chi ja ni ji'i chaa kuni ka'nii maa i un —ni kachi ángel Yandios un.

**21** Yukan na ti ni ki'in José suchi lulu un jiin nana i, ti kuano'on da ñuu Israel. **22** Ko nu ni jini José ja Arquelao ni nukuiñi da nuu tata da Herodes ti ta'u da jniñu nuu ñuu Judea, ti ni yu'u da ki'in da yukan, chi ja ni iyo iin ñujani nuu da, ti kua'an da ichi ñuu Galilea. **23** Nu ni ka jakoyo da yukan, ti kuankoyo da ñuu Nazaret. Yukan ni kunchuku da. Ti ni kundaa taka jnu'un ni ka ka'an profeta ja Jesús konani ya, "chaa ñuu Nazaret."

### *Jnu'un Juan, chaa ni skuanducha (Mr. 1.1-8; Lc. 3.1-9, 15-17; Jn. 1.19-28)*

## 3

**1** Yukan ti ni kii Juan, chaa skuanducha un, nuu ñu'un te'e ñuu Judea, ti ka'an da nuu yivi, **2** ti ni kachi da:

—Nakani ini naa ra, chi ja kuan kuyajni kivi ta'u maa Yandios jniñu nuu ra naa ra —ni kachi da. **3** Ti siki Juan ja'a kuu ja ni ka'an profeta Isaías na ni chaa da iin tutu sia'an:

Kin ka'an iin chaa, kin ka'an undi nuu ñu'un te'e un, ti kachi da:

"Koo tu'va ra naa ra, chi ja yajni chaa Jito'yo.

Ti kuni ja na kaka ndaa ra naa ra."

Sia'an ni chaa profeta Isaías nuu tutu na jana'an.

**4** Sa'ma Juan ni kuu jiin ixi camellu. Ni yivi iin sanchi ñii chii da. Ni yaji da ndikua'yí jiin nduxi ñuñu yuku. **5** Ni ka kii yivi ñuu Jerusalén, jiin yivi ndañuu Judea, jiin yivi ñuu ka'lín yajni yucha Jordán un, ti ni ka ñuso'o i jnu'un ka'an da. **6** Ti nu ni ka kachi i ja, ja ni ka nakani ini i naa i nuu kuachi i, ti ni skuanducha Juan i ini yucha Jordán.

**7** Suni ni ka jakoyo kua'a chaa fariseo, ja ni ka kuu da chaa ka jito va'a nuu ley Israel, jiin kua'a chaa saduceo (chaa un ni ka kuu da inga partido ja suni ka xna'an da siki nasa kuni ka'an ley Israel). Ni ka kii uu grupo un nuu skuanducha Juan, ti ni jini Juan ja nde kua'a chaa un ni jakoyo. Ti ni nduxaan da nuu chaa un naa da, ti ni kachi da:

—Ro'o ka kuu ra nanu koo xaan jiin se'e ti, chi ndevara'a xaan ka sa'a ra. ¿Xi ka jani ini ra ja nama ra maa ra nuu nundo'o ja kuan kuu yajni nuu ra naa ra nu? **8** Na kachi ri ja kava yiñu'un ra naa ra nava na kuni ndaa yo ja, ja ni ka

nakani ini ra nuu kuachi ra naa ra. Ti nava sia'an na nduu ra nanu iin yujnu vixi ja ja'a nde'e va'a, chi ka sa'a ra ja jniñu va'a. Ti sia'an ka stuu ra ja, ja ni ka nakani ndixia ini ra, ti ni ka xndoo ra kuachi ra. <sup>9</sup> Ti tu kondo'o vixi ini ra naa ra ja ka'an ra: "Maa yo naa yo ka kuu yo jna'an Abraham." Tu ka'an ra sia'an, chi na kachi ri ja vasu undi yuü ja'a, ti kuu sa'a Yandios iin jniñu ña'nu ja na kuu i jna'an Abraham, nu kuni ya. <sup>10</sup> Ti nuu yivi ja tu ka kuni nakani ini i nuu kuachi un, ja iyo tu'va Yandios ja kua'a ya nundo'o nuu i. Ti nundo'o ja kua'a Yandios un kuu nanu iin chaa ja iyo tu'va da ja kin sandoo da nuu huerta da, ti ka'ncha da yujnu ja tukaa ja'a nde'e va'a, ti ski'in nuu ñu'un ja na kayu. Suni sia'an kutu'va Yandios kua'a ya nundo'o nuu yivi un.

<sup>11</sup> Jandaan kuu ja ru'u chi skuanducha ri ro'o naa ra jiin nducha, ko kuan kuu yajni kivi kenda iin chaa kuu ña'nu ga ja kuu ru'u. Ti nanu ja skuanducha da ro'o naa ra ja kua'a da Espíritu Santo ja kuncha ya jiin ra. Ti sia'an nanu sandoo iin ñu'un nuu kayu, suni sia'an sandoo Espíritu Santo undi ini ra naa ra. Ti chaa kuu ña'nu un, tu kuu kandu ri nuu da, chi kuu ña'nu ga da ja kuu ru'u. <sup>12</sup> Ti sasiin da yivi nanu iin chaa yijni pala da ja xndeche da triu da, ti kendo da paja, sava'a da triu da ini ve'e da, ti ka'ma da paja un. Ti chaa un, chi kua'a da nundo'o yivi jiin iin ñu'un ja tu nda'va kuiti —sia'an ni kachi Juan nuu chaa fariseo jiin chaa saduceo un.

### *Ni janducha Jesús (Mr. 1.9-11; Lc. 3.21-22)*

<sup>13</sup> Yukan ti ni kee Jesús ñuu Galilea, ti vaji ya ichi yucha Jordán nuu kande Juan ja na skuanducha da ya. <sup>14</sup> Ko tu kuni Juan ni kuu, ti ni kachi da jini Jesús:

—Maa ni kuu ja skuanducha saña, ti ansu ja maa ni vaji nuu na —ni kachi Juan.

<sup>15</sup> Ti ni kachi Jesús:

—Na koo sia'an vijna, chi kanuu ja na siuku yo taká jniñu ni ta'u Yandios —ni kachi ya.

Yukan ti sa ni janta'u Juan. <sup>16</sup> Nu ni janducha Jesús, ni kee ya ini nducha un, ti yukan ni nuña andiví nuu kancha Yandios, ti ni jini Jesús ja vaji Espíritu Yandios, ti ni jinu xini ya, nanu iin sata. <sup>17</sup> Yukan ti ichi andiví ni ka'an Yandios jiin Jesús:

—Ja'a kuu se'e ri ja kunda'u xaan ini ri. Ti kusii xaan ini ri jiin ya —ni kachi Yandios jiin se'e ya.

### *Kuni ska'an ja'u'u un Jesús (Mr. 1.12-13; Lc. 4.1-13)*

## 4

<sup>1</sup> Yukan ti ni yinda'a Espíritu un Jesús kua'an ya undi nuu ñu'un te'e un, ja kuni ja'u'u un kue'e ya ja na sa'a ni'in ini ya. <sup>2</sup> Ti sia'an ni kundee ya uu xiko nduu kivi, ti uu xiko jakuaa, ni iyo ndicha ini ya. Yukan ti sa ni chaa iin soko ini ya. <sup>3</sup> Yukan ti ni tu'va ja'u'u un nuu Jesús ja kuni ke'e ya, ti ni kachi:

—Nu ndixia ra ja Se'e Yandios kuu ra, sa'a ja taká yuü ja'a na nduu staa kai yo —kachi ja'u'u un.

<sup>4</sup> Ti ni kachi Jesús:

—Kachi nuu tutu Yandios: "Ansú jiin nini staa kuchaku yivi naa i, chi suni kuu kuchaku i jiin taká jnu'un ka'an Yandios", —ni kachi Jesús.

<sup>5</sup> Yukan ti kua'an tuku ja'u'u un jiin ya ichi ñuu Jerusalén, ja kuu maa ñuu ii, ti ni kaa ya xini veñu'un ka'nu Israel, <sup>6</sup> ti ni kachi tuku ja'u'u un jiin ya:

—Nu ndixia ra ja Se'e Yandios kuu ra, ti skanakava maa ra undi nuu ñuu'un un, chi sia'an yoso nuu tutu:

Na ta'u Yandios jniñu nuu ángel ya ja na koto ya ro'o.

Ti nakinda'a ya ro'o jiin nda'a ya,  
nava tu tuji si'in ra nuu ni iin yuu.

Kachi tutu, ni kachi ja'u'un un.

<sup>7</sup> Ti ni kachi tuku Jesús:

—Tuu, chi su'va yoso nuu tutu Yandios: “Koto maa ke'e ga ra maa jito'o ra Yandios”, kachi tutu —ni kachi Jesús.

<sup>8</sup> Yukan ti kua'an tuku ja'u'un jiin Jesús xini iin yuku sukun xaan, ti yukan ni xna'an nuu ya taká ñuu ka iyo nuu ñuyiví jiin taka ndajniñu vii ja iyo nuu,  
<sup>9</sup> ti ni kachi:

—Taka ja'a kua'a ri nuu ra nu na jakunjiti ra ti chiñu'un ra ru'u —ni kachi ja'u'un un.

<sup>10</sup> Yukan na ti ni kachi Jesús:

—Kuxio nuu ri ro'o ja'u'un, chi su'va kachi nuu tutu Yandios: “Chiñu'un nuu maa iin ni ya kunukuachi ra nuu”, kachi tutu —ni kachi Jesús.

<sup>11</sup> Yukan ti ni kuxio ja'u'un un nuu Jesús ti kua'an. Ti sa ni ka chakoyo ángel Yandios, ti ni ka chindee i maa ya.

*Ni keja'a Jesús jiin jniñu ya ñuu Galilea  
(Mr. 1.14-15; Lc. 4.14-15)*

<sup>12</sup> Ti yukan ni ni'in Jesús jnu'un Juan, chaa skuanducha un, ja kande da vekaa. Ti nu ni jini ya jnu'un un, ni kee ya ti kua'an ya ichi ñuu Galilea. <sup>13</sup> Ko tu ni kendo ya ñuu Nazaret, chi kua'an ya undi ñuu Capernaum, iin ñuu kande yajni yu'u mar Galilea, ja kendo nuu ñu'un ñuu Zabulón jiin ñu'un Neftalí, ti yukan ni kuncha ya. <sup>14</sup> Ti yukan ni kundaa nava ni chaa profeta Isaías nuu tutu na jana'an:

<sup>15</sup> Ñuu Zabulón jiin ñuu Neftalí, ja kuu iin ichi kua'an yajni yu'u mar, ichi nuu kaña ndikandii yucha Jordán,  
ti ñuu Galilea nuu kanchuku yiví ja tu ka kuu yiví Israel.

<sup>16</sup> Yiví ka iyo kuachi kanchuku ñuu un, kanchuku i nanu nuu ñuñaa kuiti, chi tu ka jini i jnu'un Yandios.

Ti yiví kanchuku nanu ndati ñuji'l, ni ndinchaa iin ñu'un nuu i.

Chi nu na nakuni ndaa i jnu'un ya, ti kuu i nanu ja ni ka ndundijin nduchi i. Sia'an ni kachi profeta Isaías.

<sup>17</sup> Undi kivi un ni keja'a Jesús xndaku ya, ti kachi ya:

—Nakanini nuu kuachi ra naa ra, chi ja ni jaa kivi ja ta'u Yandios jniñu nuu ni tu'u ñuyiví —ni kachi ya.

*Ni kana Jesús xini kuun chaa ka jni cháká  
(Mr. 1.16-20; Lc. 5.1-11)*

<sup>18</sup> Kua'an Jesús yu'u mar Galilea, ti ni jini ya uu chaa ka'iin un, iin da kuu Simón ja suni nani da Pedro, ti inga da kuu Andrés, ñani da. Ka'iin da ka jni cháká, ti ja ni ka chunde da ñunu da ini nducha, <sup>19</sup> ti ni kachi Jesús jiin da:

—Kundikun ru'u naa ra, na cho'o. Ja ni ka jni cháká, ko vijnra ru'u, na xna'an ri ro'o nasa nastutu ra yiví. Ti xna'an ra yiví un maa jnu'un Yandios ja na kandixia i ru'u —ni kachi Jesús.

<sup>20</sup> Ti luego ni, ni ka xndoo da ñunu da ti kuankoyo da jiin Jesús.

<sup>21</sup> Ni jika ya ti'lí ga, ti ni jini ya ka'iin uu ga da, Jacobo jiin ñani da Juan, se'e yií Zebedeo. Ka'iin da ini iin barco jiin tata da, ka nachaa da ñunu da, ti ni

kana Jesús xini da. <sup>22</sup> Yachi ni, ni ka xndoo da barco un jiin tata da, ti ni ka ndikun da ya.

*Xna'an Jesús nuu yivi kua'a  
(Lc. 6.17-19)*

<sup>23</sup> Kua'an Jesús ni ñuu Galilea, kua'an ya xna'an ya nuu yivi ini taka veñu'un yivi Israel ja na kutu'va yivi un jnu'un Yandios. Xna'an ya nuu yivi nava ta'u Yandios jniñu, ti suni kenchaa ya taka nuu kue'e ka jna'an yivi. <sup>24</sup> Taka yivi ñuu Siria ni ka ni'in i jnu'un Jesús, ti ni ka janchaka i taka yivi ka jna'an taka nuu kue'e nuu ya, jiin taka yivi ka jna'an tachi xaan, jiin yivi ka jna'an kue'e jiy'i, jiin yivi tikuku un. Ti ni sa'a Jesús tajna i. <sup>25</sup> Kua'a yivi ñuu Galilea ni ka ndikun ya, yivi ñuu Decápolis, yivi ñuu Jerusalén, jiin ñuu Judea, jiin yivi taka ñuu ka kendo ichi nuu kaña ndikandii yucha Jordán.

*Ka'an Jesús nuu yivi xini iin yuku*

**5**

<sup>1</sup> Nu ni jini Jesús yivi kua'a un, ti kua'an ya xini iin yuku, ti yukan ni nukoo ya. Ti yukan ni ka ndututu yivi ka skua'a jiin ya. <sup>2</sup> Yukan ti ni keja'a Jesús ni xna'an ya nuu i naa i.

*Nau yivi kuu ja iyo ta'u nuu Yandios  
(Lc. 6.20-23)*

<sup>3</sup> Ti ni kachi Jesús:

—Na kachi ri ja kandichi Yandios jiin yivi ka iyo jnu'un kui'ya ini siki ja ni ka nakani ini i. Ni ka nakani ini i ja tu ni iyo ni iin jniñu va'a i nuu Yandios. Ti siki yivi un chi jandaa kuu ja kivi i nda'a Yandios ja na ta'u ya jniñu nuu i. Ti jandaa kuu ja kivi i ñuu nuu ta'u Yandios jniñu.

<sup>4</sup> Kachi ri ja kandichi Yandios jiin yivi ja ka iyo jnu'un kui'ya ini siki kuachi i, ti kua'a Yandios jnu'un ndee ini nuu i.

<sup>5</sup> Kachi ri ja kandichi Yandios jiin yivi vita ini, ti ni'in i ñuu'un ni chisojnu'un Yandios.

<sup>6</sup> Kachi ri ja kandichi Yandios jiin yivi ka ñukuu ini maa ya ti ka jandatu i jniñu ta'u ya, ti ka sa'a i taka nava kuni ya, chi maa ya chindee i ja na siuku i.

<sup>7</sup> Kachi ri ja kandichi Yandios jiin yivi ka kunda'u ini jna'an, ti suni kunda'u ini Yandios maa i.

<sup>8</sup> Kachi ri ja kandichi Yandios jiin yivi ka iyo ndoo aña, ti kua'a ya ta'u i ja kunchuku i jiin ya.

<sup>9</sup> Kachi ri ja kandichi Yandios jiin yivi sa'a ja na kukuee kunchuku yivi naa i, chi nakinse'e Yandios maa i.

<sup>10</sup> Suni kachi ri ja kandichi Yandios jiin yivi ka jito u'u yivi maa i siki ja ka jika ndaa i ichi Yandios. Kandichi Yandios jiin yivi ya un, ti jandaa kuu ja kivi i ñuu nuu ta'u maa ya jniñu.

<sup>11</sup> Ti kachi ri ja kandichi Yandios jiin ro'o naa ra ja nu na ka'an ndeva'a yivi nuu ra, ka'an i siki ra ti kundio ini i ro'o ja kua'a i tau ra naa ra, ti chakuachi i ro'o sava'a ni ga jnu'un ja siki ru'u. <sup>12</sup> Ti siii xaan na koo ini ra naa ra, chi na ni'in ra ta'u nuu Yandios. Suni sia'an ni ka sa'a yivi jiin profeta ni taji ya ja ni kikoyo undi nuu. Suni ni ka ndiyo ini yivi maa da, sia'an nanu ka ndiyo ini yivi ro'o vijnna naa ra —kachi ya.

*Ñii jiin nduva ñu'un ja kuu nuu ñuyivi  
(Mr. 9.50; Lc. 14.34-35; 11.33)*

<sup>13</sup> Siin Jesús ka'an ya, ti ni kachi ya:

—Ro'o naa ra, ka kuu ra nanu ñii ja sa'a asun ndeyu, chi kanchuku ndaa ra nuu ñuyivi ja'a. Ti nanu ja kanchuku ra sia'an, ka kuu ra nanu ñii ja kuu nuu ndeyu. Chi nu naa xiko u'ua ñii un, ti tukaa kuajniñu yo, chi su'va kacha yo ki'in, ja na kuañu ni'nu yivi siki naa i. Ti suni sia'an kuu jiin ro'o, chi nu tu kanchuku ndaa ra nuu yivi ñuyivi ja'a, ti suni sia'an tukaa kuajniñu ro'o ja kuu nuu Yandios.

<sup>14</sup> Ro'o naa ra, suni ka kuu ra nanu nduva ñu'un ja kuu nuu ñuyivi ja'a. Nu ñuu na kundee xini ñin yuku, ti tu kuu jankisa'yí. <sup>15</sup> Ni tu kuu skuikun yo ñin yiti, ti chunde yo chii ñin cajón. Chi su'va chuxndee yo ñu'un un nuu sukun nava na kundijin nuu taka yivi kanchuku ini ve'e. <sup>16</sup> Suni sia'an kuni ya jiin ro'o naa ra, ti sa'a ra ja na ndundijin nuu taka yivi, ti nava na nakuni i takajniñu va'ka sa'a ra. Ti na nakuanta'u i nuu Tata ra Yandios, ya kancha undi andivi. Nakuanta'u i nuu ya vanua sia'an chinddee ya ro'o naa ra, ti vii vii kunchuku ra naa ra nuu ñuyivi.

### *Xna'an Jesú斯 nasa ka'an ley Moisés*

<sup>17</sup> Koto kondo'o ini ra naa ra ja ni chaa ri xnaa ri ley Moisés, xi jnu'un ni ka xna'an taka profeta. Tu xnaa ri jnu'un un, chi su'va vaji ri ja na siuku ri taka jnu'un un. <sup>18</sup> Na kachi ndaa ri nuu ra naa ra ja ni iyo ga andivi jiin ñuyivi, ni tu kuu kencha ri ni ñin letra nuu ñin jnu'un Yandios, undi na kuu taka nava kuni maa ya. <sup>19</sup> Ja yukan kuu yivi tu ka jandatu nuu taka ley ni ja'a Yandios, vasu ñin jniñu lulu, ja na xna'an i nuu inga yivi ja na sa'a i, ti na kachi ndaa ri ja yivi un, tu kuu kivi i ini ñuu nuu ta'u Yandios jniñu. Ko yivi jandatu ti xna'an i nuu inga yivi ja na kuandatu i, ti yivi yukan ndixia chi najaa i nuu ta'u Yandios jniñu ti yukan nduña'n u i. <sup>20</sup> Ti na kachi ri nuu ra ja nu na kunchuku ra naanu kanchuku chaa ka xna'an ley Moisés jiin chaa fariseo yukan, yukan na ti tu kuñukun ini ra ja kivi ra ñuu nuu ta'u Yandios jniñu.

### *Xndaku Jesú斯 siki jnu'un kití ini (Lc. 12.57-59)*

<sup>21</sup> Ka jini ra naa ra ñin jnu'un ni ka ka'an jna'an ra na jana'an ja kachi: "Tu ka'ni ra ndiyi, chi nu ñin yivi na ka'ni ndiyi ti ki'in yí nuu juez ja na xndichi da i." <sup>22</sup> Ko ru'u na kachi ri nuu ra ja nu ñin yivi na kití ini i nuu ñani jna'an i, ti suni kunda'a da yivi un nuu juez. Nu na sa'a ndeva'a i nuu ñani jna'an i, ti ki'in i nuu junta ka'nú Israel ja na xndichi da maa i. Ti nuu nau yivi na kachi ja kaku'u xi ja tu iyo ndi'i ini ñani jna'an i, na kuñukuu ini i ja ki'in i nuu infiernu.

<sup>23</sup> Ja yukan kuu ja nu na kin soko ra nuu altar Yandios, ti nu ja ni jaa ra yukan, ti nuku'un ini ra ja kití ini ñani ra nuu ra, <sup>24</sup> xndoo ja yinda'a ra yukan nuu altar un, ti nandeokuñi ra, ti kin nundaka ta'u ra nuu da. Yukan na ti sa kuu nandeokuñi ra, ti soko ra ja yinda'a ra nuu altar Yandios. <sup>25</sup> Nu ñin yivi na kankuachi ja'a ra ja tau ra xu'un nuu da, ti ki'in da jiin ra undi ve'e juzgado. Xnakan ndaka ta'u ra nuu da ichi kuankoyo ra naáva tu xndichi da ro'o nuu juez, chi nakua'a juez un ro'o nuu policia, ti chaa un chunde da ro'o veekaa. <sup>26</sup> Ti na kachi ndaa ri nuu ra naa ra, ja sia'an ni kundee ra veekaa un undi na chunaa ndi'i ra ja tau ra nuu chaa un, ti sa kee ra ki'in ra.

### *Xndaku Jesú斯 siki jnu'un ka yisikinchaa jna'an*

<sup>27</sup> Ka jini ra nava ni ka ka'an yivi jana'an: "Koto kusikinchaa jna'an ra jiin inga ñasi'i." <sup>28</sup> Chi na kachi ri nuu ra ja nu ñin chaa na kuni da ñin ñasi'i ti kuu ini da nde'e da ña, ti chaa un ja ni chakuachi da maa da jiin ña undi aña da.

<sup>29</sup> Ti nu nduchi kua'a ra kuu ja ni nde'e un, tava na ki'in. Chi va'a ga ja nu ñin ni nduchi ra na naa, ti ansu ja ki'in ra na jiin yiki kuñu ra nuu infiernu. <sup>30</sup> Ti

nu nda'a kua'a ra kuu ja ni sa'a iin kuachi, ka'ncha na ki'in, chi va'a ga ja nu iin ni nda'a ra un na naa, ti ansu ja ki'in ra ni jiin yiki kuñu ra nuu infiernu.

*Xndaku Jesúsi siki yivi ka xndoo jna'an  
(Mt. 19.3-9; Mr. 10.11-12; Lc. 16.18)*

<sup>31</sup> Suni sia'an ni ka ka'an yivi jana'an: "Nu iin chaa na xndoo da ñasi'i da, ti nuu kuu ja na ndokani da iin tutu ja ni ka xndoo jna'an da." <sup>32</sup> Ko ru'u na kachi ri nuu ra ja nu iin chaa na xndoo da ñasi'i da, ti nu tu naa kuachi ni sa'a ña, ja kinikava ña jiin inga chaa, ti chaa un chakuachi da maa ña. Ko nu inga chaa na nanda'a ja iin iin ña'an ni kendo un, ti suni chakuachi da maa da.

*Xndaku Jesúsi siki jnu'un ka chisojnu'un*

<sup>33</sup> Suni sia'an ni ka ka'an yivi jana'an: "Koto naa ini ra, ti tu siuku ra taka jnu'un ni chisojnu'un ra nuu Yandios, ja maa Yandios kuu ya kua'a jandaa ja'a ra." <sup>34</sup> Ko na kachi ri nuu ra naa ra ja tu chisojnu'un ra sia'an, chi nu na chisojnu'un ra ja andivi kuu ja kua'a jandaa ja'a ra, ti yukan kuu nuu kancha maa Yandios. <sup>35</sup> Ni tu kachi ra ja ñuyivi kuu ja kua'a jandaa ja'a ra, chi ja'a kuu nuu jañu ya jiin ja'a ya, chi maa ya xiin. Ni ja kuu ñuu Jerusalén, ja yukan tu kua'a jandaa ja'a ra, chi yukan kuu ñuu chaa kuu Rey kuña'nu ga ja ta'u jniñu. <sup>36</sup> Ni tu chisojnu'un ra ja kuu ixi xini ra. Sandau tu siuku ra, ti NASA kuu sama ra color ixi xini ra ti maa ya ni ja'a. <sup>37</sup> So nini kuu ja kachi ra naa ra ja "kuu" xi "tu kuu", chi tu nijníñu inga jnu'un un, yasu iin jnu'un kanuu ga kuu ja chisojnu'un ra un, chi taka ga jnu'un un vaji nuu ja'u'un.

*Xndaku Jesúsi siki yivi ka ndiyo ini nuu jna'an  
(Lc. 6.29-30)*

<sup>38</sup> Suni ka jini ra ja ni ka ka'an yivi jana'an: "Nu ni stuji yivi nduchi ra, ti suni stuji nduchi maa i. Ti nu ni tava i jnu'un yoso ra, ti suni tava ra jnu'un yoso maa i." <sup>39</sup> Ko ru'u na kachi ri: Koto kinjna'an ra jiin yivi kani ro'o, chi su'va nu ni kani i iin nuu nuu ra, kua'a inga nuu ra na kani tukui. <sup>40</sup> Nu iin yivi na kankuachi ja kuni kuisonchaa i camisa ra, suni kua'a jnu'un ja na kunda'a i chamarra ra. <sup>41</sup> Nu iin yivi na chayika ro'o ja kin nchaka ra ndajniñu i sava ichi, ti va'a ga na kinchaka ra i undi nuu ki'in yi. <sup>42</sup> Ti nu sava'a ni ga yivi na kakan nuu i iin ndajniñu nuu ra, kua'a ndajniñu kuni i, ti koto siokani ra sia'an ni yivi un ki'in.

*Na kunda'u ini yo yivi jito u'u yo'o  
(Lc. 6.27-28, 32-36)*

<sup>43</sup> Ka jini ra ja suni sia'an ni ka ka'an yivi jana'an: "Kunda'u ini nuu yivi kunda'u ini ro'o, ti koto u'u nuu yivi jito u'u ro'o." <sup>44</sup> Ko ru'u na kachi ri nuu ra naa ra ja na kunda'u imi ra nuu yivi jito u'u ro'o. Kakanta'u nuu maa Yandios ja kuu yivi ka ka'an ndevara'nuu ra ti ka ka'an i siki ra, ti chindee yivi un vasu na kani i ro'o. <sup>45</sup> Chi sia'an ti sa stuu ra maa ra ja yi'i ra jiin maa Tata ra Yandios, ya kancha andivi. Chi maa ya kuu ja sa'a ja ndii siki yivi va'a jiin yivi kue'e, ti suni ja'a ya sau ja kuu taka yivi un, ti yivi un suni kuu i jna'an ra nuu ñuyivi ja'a. <sup>46</sup> Ko nu ro'o na kunda'u ini ra nuu nini yivi ka kunda'u ini maa ra, ¿ti nau ta'u ra iyo ja nu sia'an naa sa'a ra nusa? Ti suni undi chaa ka jikan ya'u nuu puestu un ka sa'a da sia'an. <sup>47</sup> Ti suni nu na kanxia'u ra jiin nini yivi mani ra jiin, ti tu va'a nu na sa'a ra sia'an, chi undi yivi ja tu ka kandixia Yandios, suni sia'an ka sa'a i. <sup>48</sup> Ja yukan kuu ja koo ndaa ini ra jiin taka ni yivi. Ti sia'an kunchuku ndaa ra, chi Tata yo Yandios, ya kancha andivi, nini iyo ndaa ini ya jiin yo'o naa yo —ni kachi Jesús.

*Xndaku Jesúsi nasa koto nda'u yo ñani jna'an yo*

**6**

<sup>1</sup> Siin Jesús xndaku ya nuu yivi ka skua'a jiin ya, ti ni kachi ya:

—Koto stuu ra iin jniñu ja ka sa'a ra nuu yivi ja na nde'e i ro'o. Chi nu sia'an na sa'a ra, ti Tata yo Yandios ja kancha andivi, tu kua'a ya ta'u ra. <sup>2</sup> Nu ka kuni chindee ra yivi nda'u naa i, koto stuu ra nuu ni ñuu, nanu ka sa'a yivi ja ka ka'an vixi i, ka jika i ichi, xi ini veñu'un Israel, ja jiin jnu'un i ka stuu i ja tu ka chiñu'un i jnu'un Yandios. Sia'an ka ka'an i nava na nakua'a yivi ja yivi un i nuu i maa i naa i. Ko jandaa na kachi ri nuu ra naa ra ja yukan ni kuu ndi'i ta'u i. <sup>3</sup> Ti ro'o nu ka kuni ra chindee ra yivi nda'u, ko kua'a xe'e ra un nava tu kuni ni iin yivi. <sup>4</sup> Sia'an sa'a ra nava maa iin ni Yandios na kuni jniñu un, chi maa ya kuu ja kua'a ta'u ra.

*Xna'an Jesús NASA kakanta'u yo*

<sup>5</sup> Nu ka kuni kakanta'u ra naa ra, koto sa'a ra nanu ka sa'a yivi ja ka nu kuijin i ini veñu'un, xi jiki calle ja na kuni yivi nuu i, ja jiin jnu'un i ka stuu i ja tu ka chiñu'un i jnu'un Yandios. Ko na kachi ndaa ri ja jiin yukan ni, ti ja ka iyo ta'u i. <sup>6</sup> Ko ro'o nu kuni kakanta'u ra, ndiv i ini ve'e ra, kasi yuxe'e ra, ti kakanta'u nuu Yandios nuu kande maa iin ni ya jiin ra. Ti jini ya jnu'un ka'an ra, ti maa ya na kua'a ta'u jikan ra nuu ya. <sup>7</sup> Nu jikanta'u ra, ti tu ndaku ni'in nuu nuu ra iin jnu'un ka'an ra, nanu ka sa'a yivi tu ka nakuni nau kuu maa Yandios. Chi ka ndo'o ini i ja kuniso'o Yandios jnu'un ka ka'an i, ja sia'an nu nuu nuu ka ndaku ni'in i jnu'un ka ka'an i. <sup>8</sup> Koto ma sa'a ra sia'an naa ra, chi xnaka Yandios jini taka ja ka nandi'i ra naa ra, ti sa ka jikan ra nuu ya.

<sup>9</sup> Ja yukan kuu ja sia'an kakanta'u ra naa ra:

Tata yo Yandios, ja kancha ni andivi, kava yifñu'un yo nuu sivi ni, ti maa ni kuu ja kuñal'nu ga.

<sup>10</sup> Jika na nuu ni ja yachi na kiji kivi ta'u ni jniñu nuu ni tu'u ñuyivi yo.

<sup>11</sup> Ti kua'a ni staa nakaji yo vijnna ja kuu ja ndendajnu yo iin kivi iin kivi.

<sup>12</sup> Kuan ka'nu ini ni nuu kuachi ka sa'a na, nanu ka jan ka'nu ini na nuu ñanijna'an na nuu taka ja ka sa'a i jiin na.

<sup>13</sup> Koto maa kua'a ni jnu'un ja kotojnuni ja'u'u un saña, ti su'va nama ni saña nuu nundo'o un.

Chi maa ni xiin nuu ta'u jniñu, ti maa ni kuu ja ndiso jniñu ña'nú un.

Ti ña'nú ga na koo sivi ni siki yo ja kuu saa ni. Ti sia'an na koo.

Kachi ra naa ra.

<sup>14</sup> Ti iin jnu'un kanuu ja kakanta'u ra un kuu ja saka'nu ini ra nuu yivi jito u'u ro'o. Chi nu sia'an na sa'a ra, ti suni maa Yandios, ya kancha andivi, saka'nu ini ya nuu kuachi ra. <sup>15</sup> Ko nu tu saka'nu ini ra nuu yivi ka jito u'u ro'o naa ra, suni sia'an maa Yandios tu saka'nu ini ya nuu kuachi ra naa ra —ni kachi ya.

*Xndaku Jesús NASA koo ndicha ini yo*

<sup>16</sup> Siin Jesús xndaku ya ti ni kachi ya:

—Nu ka kuni ra koo ndicha ini ra, koto sakui'ya ini ra naa ra nanu ka sa'a yivi ja xndoo jnu'un Yandios jiin jnu'un i. Ka sakui'ya i nuu i ko so ja na kuni yivi ja ka iyo ndicha i. Na kachi ri nuu ra ja jiin yukan, ti ja ni ka ni'in ta'u i. Ti yukan ni kuu ndi'i ja ni'in i. <sup>17</sup> Ko ro'o naa ra, nu ka kuni koo ndicha ini ra, nakacha nuu ra, ti nachu'un ra kuka xini ra. <sup>18</sup> Nava sia'an tu kani ini yivi naa i ja iyo ndicha ini ra, chi maa iin ni Yandios, ya kancha jiin ra kuu ja jini ya, ti nava na kua'a ya ta'u ra —ni kachi ya.

*Nanu kuu nu skaya yo yaji yo*

<sup>19</sup> Siin Jesús xndaku ya, ti ni kachi ya:

—Koto skaya ra ja kuñava'a ra nuu ñuyiví ja'a, chi nde iyo tikixin ti nde kua'a jniñu ka stivi ti, ti suni kuu kivi ñakui'na ti sakui'na i. <sup>20</sup> Va'a ga ja nu na skaya ra jniñu va'a kuni maa Yandios, ya kancha andivi, chi yukan tu iyo tikixin ti tundo xnaa yo, ti ni ñakui'na tu kuu kivi ja sakui'na. <sup>21</sup> Ja yukan kuu ja nu ndiyo xaan ini ra ja na nakaya yaji ra nuu ñuyiví ja'a, ti xnaa ndi'i ra yaji ra nuu Yandios nuu kancha ya andivi —kachi ya.

### *In ñu'un ja kuu yiki kuñu yo*

<sup>22</sup> Siin Jesús xndaku ya ti ni kachi ya:

—Nduva yiti kuu nduchi ra ja kuu nuu ni tu'u yiki kuñu ra. Nu ka iyo va'a nduchi ra, ti suni sia'an iyo va'a ni yiki kuñu ra. <sup>23</sup> Ko nu tu ndijin nduchi ra, ¿ti nasa kundijin ichi ki'in ra nusa? Ti ñuñaa kua'an ra nu sia'an. Chi nu na nda'va yiti un, ti nduva ra ti tuji ra. Ti tu kuu nasa ndoko ra, chi iyo xaan kaa ichi ñuñaa kua'an ra un.

### *Tu xndi'i ini yo siki ja kuchaku yo*

<sup>24</sup> Ni iiñ yivi tu kuu kunukuachi nuu uu jito'o, chi kendo va'a i jiin iiñ da, ti kendo kui'ya i jiin inga da. Ni tu kuu kunukuachi i nuu Yandios, ti ja kundio ini i xu'un, jiin ñu'un. Chi nini nuu maa ni ya kuu nu na kondo'o ini i, ti ansu ja kundio ini i xu'un —ni kachi ya.

### *Jito Yandios Se'e ya*

<sup>25</sup> Siin Jesús xndaku ya, ti ni kachi ya:

—Na kachi ri nuu ra naa ra, ja koto ma xndi'i ra ini ra ja kuu ja kaji ra xi ja ko'o ra, ja na kuchaku ra, xi ja kuu sa'ma ku'un ra naa ra. Chi maa Yandios ni sa'a ja chaku ra jiin yiki kuñu ra. Ti maa ya kuu ja kua'a ja kaji ra jiin sa'ma ku'un ra. <sup>26</sup> Nde'e naa ra, kití ka ndava nuu tachi un, tu naa jniñu ka sa'a ti ja nastutu ti, ti sava'a ti ku'iin, ko Tata ra Yandios, ya kancha ya andivi, ja'a ya ja ka yee ti. Ko na kachi ri ja kanuu ga ro'o naa ra ja kuu kití ka ndava un. <sup>27</sup> Ti ni tundo ni'in ra naa ra vasu na xndi'i xaan ini ra jiin ja kuchaku ra, xi jiin ja kundio ini ra ja kusukun ga ra. ¿Va nu ja ndi'i xaan ini ra jiin un, ti ni'in ra kuu ra nu?

<sup>28</sup> ¿Xi va'a ka sa'a ra ja ka xndi'i xaan ini ra ja kuu sa'ma ra nu? Nde'e naa ra nasa ka ja'nú ita rosa un, ti tu jini yo nasa ja'nu, ko vii xaan kanda. <sup>29</sup> Ko na kachi ri ja ni Salomón, chaa ni kuu rey Israel na jana'an, tu ni suku da nanu ita un, vasu vii xaan ni kaa sa'ma da. <sup>30</sup> Ti maa Yandios skua'nu ya ita un, ti vii xaan na skutu ya i. Ko vasu vii xaan ni kanda vijná ti ijña ja ni ka ichi, ti tukaa ga kuni yo. Chi su've kayu nuu ñu'un. Ja yukan kuu ja nu sia'an sa'a Yandios ja jito va'a ya ita un, ¿ti ansu kanuu ga ro'o naa ra ja na koto va'a ya nu? ¿Ndoo xaan ka ndi'i ini ra nusa? <sup>31</sup> Ja yukan kuu ja koto kachi ra naa ra: “¿Ndoo kaji yo vijná? ¿Ti nasa ko'o yo vijná?” Xi kachi ra naa ra: “¿Nasa ku'un yo naa yo vijná?” <sup>32</sup> Chi taka un ka ka'an yivi, ja tu ka nakuni i nau kuu Yandios. Ko ro'o naa ra, iyo iiñ Tata ra ja kuu Yandios kancha andivi, ti ja jini ya ja taka un ka nandi'i ra naa ra. <sup>33</sup> Ja yukan kuu ja kuñukuu ini maa Yandios naa ra, ti kuandatu ni ini ra jniñu ta'u ya, nava na kua'a ya taka ja ka nandi'i ra naa ra. <sup>34</sup> Ti sia'an tu xndi'i xaan ini ra naa ra ja nasa koo ra ijña, chi taka ni kivi vaji nundo'o un, ti suni sia'an kua'a ja ka nandi'i yo vaji iiñ kivi —ni kachi Jesús.

### *Koto kuu ichi ini yo nuu yivi*

(Lc. 6.37-38)

—Koto kuu ichi ini ra nuu yivi ja ka'an ndoo ra, nava suni Yandios tu ske ichi ya ro'o, ja suni sia'an kaa tu maa ra. <sup>2</sup> Chi suni nanu ka ka'an ndeva'a ra nuu ñanijna'an ra, suni sia'an xndichi Yandios ro'o, ti sa'a ya jiin ra nanu ka sa'a maa ra jiin ñanijna'an ra. <sup>3</sup> Nu sia'an na sa'a Yandios, ¿ti nasa kuu ka'an ndoo ra ja kuu ichi ini ra nde'e ra nuu ñanijna'an ra, nu iyo iin kuachi i, vasu jakuu ga kaa tu maa ra jiin kuachi ra xino? <sup>4</sup> Ko nu ja kuu ga kaa maa ra jiin kuachi ra, ¿ti ndoo ka'an vixi ra nuu ñanijna'an ra ja iyo ndoo ra nusa? nde'e na kaa jniñu sa'a ra, ti suni yuji xaan ra jiin kuachi ra. <sup>5</sup> Ko na kachi ri ja ka kuu ra nanu ja xndoo jnu'un Yandios jiin jnu'un, yivi ja tu jimi ra ja xnakan nde'e va'a ra nasa kancha maa ra jiin kuachi ra, ti sa kuu kotonchaa ra iin kuachi lulu ka sa'a ñanijna'an ra.

<sup>6</sup> Koto xna'an ra jnu'un Yandios nuu yivi kanchuku nanu ina, chi tu kuanta'u i jnu'un ka'an ra. Su'va ske ichi i jnu'un un, chi ka kuu i nanu ina xaan ja ka jniñi iin ti yo'o. Ni koto xna'an ra jnu'un Yandios nuu yivi kanchuku nanu kití, chi ske xiko i jnu'un un, ti kuañu ni'nu i. Nde'e ra kití un nu ni chitu chii ti ti tuxijni ti, chi nuni un ti jañu ni'nu ti siki —ni kachi Jesús.

### *Nasa kakanta'u yo nuu Yandios* (Lc. 11.9-13; 6.31)

<sup>7</sup> Siin Jesús xndaku ya, ti ni kachi da:

—Koto xndi'i ra in i ra, ja kakanta'u ra nuu Yandios. Siin kakanta'u ra nuu ya nanu ja kana ra xini iin yivi nu nandi'i ra iin ndajniñu. Ti sia'an na kuniso'o ya ti kua'a ya nau ja nandi'i ra. <sup>8</sup> Chi nu siin yo jikanta'u yo, ti kua'a ya nuu yo. Chi nu nduku yo ti nani'in yo. Ti nu na kana yo ti kuniso'o ya. <sup>9</sup> ¿Xi ka iyo iin iin ra ja tava ini ra kua'a ra iin yuñu nuu se'e ra, nu ka jikan i staa nuu ra nu? <sup>10</sup> ¿Xi nu ka jikan i chāká, ti kua'a ra iin koo nuu i nu? <sup>11</sup> Ro'o naa ra, vasu ka nchakuachi ra, ko suni iyo jniñu va'a ka sa'a ra ja ka nduku ra ja va'a ja kuu se'e ra. Ti suni sia'an Tata ra Yandios, ya kancha andivi, kua'a ya taka ja va'a nu na kakan ra nuu ya naa ra.

<sup>12</sup> Ja yukan kuu ja kava yiñu'un ra jiin yivi naa i, nava suni sia'an na nakua'a i ja yiñu'un ro'o naa ra, chi sia'an ta'u ley Moisés jniñu jiin taka ga tutu ni ka chaa profeta na jana'an—ni kachi Jesús.

### *Iyo uu ichi* (Lc. 13.24)

<sup>13</sup> Siin Jesús xndaku ya, ti ni kachi ya:

—Na kachi ri ja iyo uu ichi nani'in ra, iin kuu ichi va'a ti inga kuu ichi nundo'o. Ti ichi nundo'o un tu yii ki'in ra, chi jicha xaan, ti nuña ja sa'a ra nava kuni maa ra. Yukan iyo jnu'un ndichi ini, kuu siin ra jiin taka jnu'un ra, ko sandi'i ni ga ichi un kande nuu jna'nun ndatu ra, ti kua'a yivi kuankoyo i ichi un, ko sandi'i ni ga ichi un ti naa yivi un naa i. <sup>14</sup> Ti ichi va'a ja kuu ichi Yandios, vi'i nchaa ni kaa, ti nde kua'a yivi tu ka nanduku i ichi un, chi jaku ni yivi kuu ja ka nani'in ichi un, ti yukan kundikun i kuankoyo i jiin. Ti nuu ndi'i ichi un, kuu nuu najaa i nuu Yandios. Ti yukan nanita'u i ja na kuncha i jiin ya ja kuu saa ni—ni kachi Jesús.

### *Jiin nde'e yujnu sa nakuni yo nuu yujnu va'a xi yujnu kue'e kuu* (Mt. 12.33-37; Lc. 6.43-44)

<sup>15</sup> Koto maa ra naa ra jiin yivi ka xnda'u ña'an, ja ka ka'an ja ka kuu i profeta ka ka'an jnu'un Yandios un. Chi yiñu'un vekoyo i nuu ra naa ra, ko anñu i kuu nanu kití xaan, chi ka ñu'un kui'na ini i. <sup>16</sup> Ti ro'o naa ra tu ka jini ra ndoo ka ndo'o ini yivi un, nu ka ndo'o va'a ini i xi tuu. Ko jiin jniñu sa'a i un ti kuni ra naa yivi ka kuu i. Chi na kachi ri ja tu kuu kuni'in yo nde'e tika'ya xini

iiñ nu'líñu, xi kuni'in yo tichi vixi xini iiñ nu'líñu xaan. <sup>17</sup> Ja yukan kuu ja tako yujnu va'a kua'a nde'e vixi. Ti taka yujnu ka ja'a nde'e kue'e tu kaji yo. Sia'an kuu yivi va'a, chi ndo'o ini i sa'a i iiñ jniñu va'a. Ti yivi sa'a ndeva'a un, mani jniñu kue'e ndo'o ini i. <sup>18</sup> Ti yujnu va'a un tu kuu kua'a nde'e kue'e, ni yujnu kue'e un, tu kuu kua'a nde'e va'a. Yukan kuu ja iiñ yivi va'a tu sa'a ndeva'a i, ti yivi kue'e un nini ka sa'a ndeva'a i. <sup>19</sup> Ti taka yujnu kue'e ja tu kee nde'e va'a xini un, ka'ncha yo ti na kayu nuu ñu'un. Ti nu sa'a yo sia'an jiin yujnu un, va jandaa ndixia kuu ja kua'a Yandios iiñ nundo'o xaan nuu yivi kue'e un. <sup>20</sup> Ja sia'an kuu ja jiin jniñu ka sa'a i un, nakuni yo naa yivi ka kuu i, ja tu ka'an ndaa i jnu'un Yandios.

(Lc. 13.25-27)

<sup>21</sup> Ansu tendi'i yivi ndakuni'in sivi ri najaa i andivi nuu ta'u Yandios jniñu, vasu na kachi i: "Ni'in kuu jito'o na, ti saña kuu se'e ni." Yivi yukan tuu, chi nini yivi siuku jniñu ta'u Tata ri Yandios, ya kancha andivi. Yivi yukan ni kuu ja najakoyo. <sup>22</sup> Nu na jaa kivi sandi'i ni ga un, ti nde kua'a yivi ndakuni'in sivi ri, ti kachi: "Ni'in kuu jito'o na, ti saña kuu se'e ni. Saña kuu ja ni ndiso jniñu nuu ni na ni ka'an na jnu'un ni. Ti jiin sivi ni ni ka keni'in na tachi xaan un kuankoyo, ti suni jiin sivi ni ni ka sa'a na kua'a ga jniñu ña'nu", kachi. <sup>23</sup> Ko yukan na ti kachi ri jini yivi un: "Jankivi ni nakuni ri ro'o ja kuu ra se'e ri. Kuxio nuu ri naa ra, ti kuankoyo ro'o, yivi ndeva'a", kachi ri —ni kachi Jesús.

### Xndaku Jesús siki uu ve'e

(Lc. 6.47-49; Mr. 1.22)

<sup>24</sup> Siin Jesús xndaku ya, ti ni kachi ya:

—Ja yukan kuu ja yivi kuni chunso'o, na chunso'o i, ti na sa'a i jniñu ta'u ri. Ti yivi un kuu i nanu iiñ chaa yukun ini, ja konu'un xaan ni sa'a da ve'e da, ti kunuu teyyi ni skee da yuu ka ndiso nama ve'e un. <sup>25</sup> Ni kii iiñ sau xaan, ni ndaa nducha ti ni kani iiñ tachi xaan jika ve'e un, ko tu ni nduva ve'e un, chi kunu xaan ka yindiyi yuu ka ndiso nama ve'e un. <sup>26</sup> Ko yivi ni jiniso'o ti tu ni siuku i taka jnu'un ka'an ri, kuu i nanu iiñ chaa ñaa ja ni janí da ve'e da nuu ñu'un ta'ya. <sup>27</sup> Ni ja'a iiñ sau xaan, ni ndaa yucha, ti ni nandoyo ñu'un un, ni kee iiñ tachi xaan, ti ni nduva ve'e un kua'an, ti ni naa ii —kachi Jesús.

<sup>28</sup> Nu ni ndi'i ni ka'an Jesús jnu'un un, ti so ni ka naa ini yivi ni ka ñuso'o jnu'un ni ka'an ya, <sup>29</sup> chi ndichi xaan ni xndaku ya jnu'un un, ja ni iiñ chaa ka xna'an ley Israel un, tu ka xndaku da sia'an.

### Ni sa'a Jesús tajna iiñ chaa jna'an kue'e ndi'yí te'yu

(Mr. 1.40-45; Lc. 5.12-16)

## 8

<sup>1</sup> Nu ni nandeokuñi Jesús ja'a yuku un, ti chitu xaan yivi ni ka nandikun tuku i ya. <sup>2</sup> Ti ni tu'va iiñ chaa jna'an kue'e ndi'yí te'yu. Ni jakunjiti da nuu ya, ti ni kanda'u da jiin ya:

—Jito'yó Jesús, nu kuni ni ti sandoo ni saña jiin kue'e na ja'a —kachi da.

<sup>3</sup> Yukan na ti ni skaa ya nda'a ya, ni ke'e ya siki da, ti ni kachi ya jiin da:

—Kuni ri, na ndundoo ra vijna —ni kachi ya.

Nu ni ka'an ya sia'an, ti ni nduva'a ni chaa ku'u un. <sup>4</sup> Ti ni xndaku ya nuu da:

—Kua'an, ti koto kani ra jnu'un nuu ni iiñ yivi ja, ja ni nduva'a ra. Xnakan, kua'an ti ki'in ra nuu sutu un, na kuni da ja, ja ni nduva'a ra. Ti kunda'a nau ja soko ra nuu Yandios, sia'an nava kachi ley Moisés, nava na kuni yivi ja, ja ni kenchaa ndi'yí un ro'o —ni kachi ya.

*Sa'a Jesú斯 tajna iin muzu capitán romano  
(Lc. 7.1-10)*

<sup>5-6</sup> Nu ni jaa Jesú斯 ñuu Capernaum, ti ni kenda iin chaa kuu capitán, ja kuu chaa yinda'a iin ciento soldado, ka yí'i jiin ejército ñuu Roma, ti ni kanda'u da jiin Jesú斯:

—Jito'yo, kancha iin muzu na ve'e na, katuu i jito, ni kuu tikuku i, ti u'u xaan tonto i—kachi da.

<sup>7</sup> Ti ni kachi Jesú斯:

—Maa ri na kin sa'a tajna i—ni kachi Jesú斯.

<sup>8</sup> Ti ni kachi chaa un jiin ya:

—Jito'yo, kuña'nú ga ni ja kuu saña, ti tu kuu kejna'an na jiin ni. Ja yukan kuu ja tu kuni na ja ki'in ni undi ve'e na, chi so kuni na ja na ta'u ni jniñu, ti na nduva'a muzu na. <sup>9</sup> Chi saña, suni iyo iin chaa kuña'nú ta'u jniñu nuu na. Ti suni maa na, yinda'a na soldado na. Ti nu na kachi na jiin iin da: “Kua'an”, ti ki'in da. Ti kachi na jiin inga: “Ña'an ja'a”, ti kii da. Ti ta'u na jniñu nuu muzu na ja sa'a i iin jniñu un, ti sa'a i—kachi da.

<sup>10</sup> Nu ni jiniso'o Jesú斯 jnu'un un, so ni naa ini ya, ti ni kachi ya jiin yívi kua'a kuankoyo jiin ya un:

—Jandaa na kachi ri nuu ra naa ra ja ni tu'u ñuu Israel, tu iyo ni iin yívi kandixia ru'u nanu ni kandixia chaa ja'a. <sup>11</sup> Ko na kachi ri nuu ra naa ra ja nde kua'a yívi kikoyo i ichi nuu kaña jiin ichi nuu kee ndikandii, ti kívikoyo i ñuu nuu ta'u Yandios jniñu, ti nukoo i xiin Abraham, Isaac, jiin Jacob. <sup>12</sup> Ko kua'a yívi Israel ja ka kuni kunchuku ñuu nuu ta'u Yandios jniñu un, keni'in ya maa i kinkoyo i ichi fuera ñuu un, ti koo i nundo'o kunchuku i. Yukan ti nde'e i ja jnu'un kui'ya ini, ku'yu yu'u i, ti nakey'i'i jnu'un i ja xaan nakani ini i—kachi Jesú斯.

<sup>13</sup> Yukan na ti ni kachi ya jini chaa kuu capitán un:

—Kuano'on ve'e ra, ti na kuu sia'an nava ni kandixia ndaa ra—ni kachi ya.

Ti un, ni nduva'a ni muzu chaa un.

*Sa'a Jesú斯 tajna nana chiso Pedro  
(Mr. 1.19-31; Lc. 4.38-39)*

<sup>14</sup> Yukan ti ni ja'an Jesú斯 ve'e Pedro. Ni jini ya ja katuu nana chiso Pedro nuu jito, ku'u ña jiin kue'e kiji xaan. <sup>15</sup> Ni jniñi ya nda'a ña, ti ni kenchaa ni kiji un maa ña. Yukan ti ni ndoko ña, ni sa'a ña ndeyu, ni ka yee da jiin ya.

*Sa'a Jesú斯 tajna yívi kua'a  
(Mr. 1.32-34; Lc. 4.40-41)*

<sup>16</sup> Nu ni kuaa, ti ni ka chakoyo yívi nuu Jesú斯 jiin tijni xaan yívi ka jna'an tachi xaan, ti jiin iin ni jnu'un ni ka'an ya, ni keni'in ya tachi xaan un kuankoyo. Ti suni ni ka nduva'a ni tako ga yívi ka ku'u un. <sup>17</sup> Yukan ni kundaa jnu'un Yandios nava ni ka'an profeta Isaías na jana'an, ja ni kachi da: “Maa ya ni kunda'u ini yo'o jiin kue'e ka jna'an yo, ti ni kenchaa ya kua'an”, kachi Isaías.

*Uu chaa ka kuni ki'in jiin Jesú斯  
(Lc. 9.57-62)*

<sup>18</sup> Nu ni jini Jesú斯 ja nde kua'a yívi ni ka ndututu jiin ya, ti ni ta'u ya jniñu nuu ndaja'a ya ja na kin ya'a da jiin ya undi inga nuu yuu lago un. <sup>19</sup> Ti iin chaa ka xna'an ley Israel un ni tu'va nuu ya, ti ni kachi:

—Maestro, kuni ki'in na jiin ni vasu sava'a ni ga na ichi na ki'in ni, ti ki'in yo—ni kachi da.

<sup>20</sup> Ti ni kachi Jesú斯 jiin da:

—Ñukuii un chi ka iyo yau kava ka yi'i ti. Ti saa un suni ka iyo taka ti nuu ka ndetatu ti. Ko ru'u, ja kuu ri maa Se'e Yivi Ñuyivi, va sa nanu iyo nuu ndetatu ti'lì xini ri —kachi Jesús.

<sup>21</sup> Ti inga chaa kuu ndaja'a ya un ni kachi:

—Jito'yo, kundatu ni na kin chunduji na tata na xnakan, ti sa chaa na, na cho'o —ni kachi da.

<sup>22</sup> Ti ni kachi Jesús jiin da:

—Jini ra ja ka iyo yivi kanchuku nanu ndiyi, chi tu ka chunso'o i jnu'un Yandios. Ti sia yivi un na chunduji jna'an maa i, ti ña'an na cho'o —kachi ya jiin da.

*Ni sa'a Jesús ja na jakuiñi tachi sau xaan un jiin nducha lago  
(Mr. 4.35-41; Lc. 8.22-25)*

<sup>23</sup> Yukan ti ni kivi Jesús ini barco, ti yivi ka skua'a jiin ya, ni ka ndikun i ya kuankoyo i jiin ya. <sup>24</sup> Yukan ti ni ndonda iin tachi sau xaan tonto nuu lago un, ni keja'a kava nuu mani ga nducha un nuu barco un. Ko Jesús chi kixi kixi ni ya. <sup>25</sup> Ti ni ka xndoto ndaja'a un ya, ti ni ka kachi da:

—Jito'yo, nama ni, yo'o chi naa yo. Ka kuni keka'nú yo chii nducha ja'a! —ni ka kachi da.

<sup>26</sup> Ko ni kachi ya jiin da:

—Ndoo xaan ka yu'u ra. ¿Xi ka jani ini ra ja tu chindee Yandios ro'o naa ra nu? —ni kachi ya.

Yukan ti ni ndokuiñi ya, ti ni ta'u ya jniñu nuu tachi sau xaan un jiin lago un, ti na'in kuiti ni kuu.

<sup>27</sup> Ti so ni ka naa ini chaa un, ti ka nndajnu'un da:

—¡Naa chaa kuu ja'a ja undi tachi sau xaan un, jiin lago un ka jandatu nuu da! —kachi da naa da.

*Chaa ka jna'an tachi xaan ñuu Gadara  
(Mr. 5.1-20; Lc. 8.26-39)*

<sup>28</sup> Nu ni ya'a Jesús inga nuu yu'u lago un, nuu kuu yu'u ñuu Gadara. Ti undi staa stilateón nuu ka ñunduji ndiyi un ni ka kendakoyo uu chaa ka jna'an tachi xaan, ti ni ka chakoyo da nuu Jesús. Ti ndinduu da ka jna'an tachi xaan un, ti kua'an xaan ni ka nduu da ja ni iin yivi tukaa ga kuu ya'a i ichi un. <sup>29</sup> Ti ni ka jakunchaa da ka kana ko'o da:

—¡Ni'in Jesús, Se'e Yandios! ¿Ndoo kivi nduu ni jiin na naa na, xi vaji ni ja kua'a ni nundo'o saña nu? Vasu ti jaa ga kivi kii juicio —ni ka kachi da naa da.

<sup>30</sup> Ti yajni yukan ka jikonuu kua'a xaan kini ka yaji ti. <sup>31</sup> Yukan ti ni ka kanda'u tachi xaan un jiin Jesús, ti ni ka kachi:

—Nu kuni keni'in ni saña naa na, ko kua'a ni jnu'un ja na nandikun na kini un naa na —ni ka kachi.

<sup>32</sup> Yukan ti ni kachi Jesús jini tachi xaan un:

—Kua'an naa ra —ni kachi ya.

Yukan ti ni ka xndoo tachi xaan un chaa un naa da, ti ni ka kekoyo kua'an, ti ni ka najna'an jiin kini un. Ni ndi'i kini un ni ka ja'a ti corri, ti ni ka nukoyo ti iin xa'va, ti ni ka kivi ti nuu nducha lago un, ti ni ka kancha ti nducha un, ti ni ka ji'i ti. <sup>33</sup> Ti chaa ka ndito kini un ni ka yu'u xaan da, ni ka ja'a da corri, ti ni ka jan kasjnu'un da nuu yivi ñuu un nava ni ka jna'an kini da, jiin ja ni ka jna'an chaa ka jna'an tachi xaan un. <sup>34</sup> Yukan na ti tendi'i yivi ñuu un ni ka ja'an nuu kande Jesús. Nu ni ka jakoyo yivi un nuu Jesús, ti ni ka kachi i jiin ya ja na kee ya, ti na ki'in ya ñuu.

*Ni sa'a Jesús tajna iin chaa tikuku  
(Mr. 2.1-12; Lc. 5.17-26)*

**9**

<sup>1</sup> Yukan ti ni ndivi Jesús ini barco, ni naya'a tuku ya inga nuu yu'u lago un. Ti ni najaa ya fiuu maa ya. <sup>2</sup> Ti yukan ni ka jakoyo yivi jiin iin chaa ni kuu tikuku, katuu da nuu jito yuu. Ti nu ni jini Jesús ja ni ini da ni ka kandixia da ya ja kuu sa'a ya tajna chaa ku'u un, ti ni kachi ya jiin chaa ku'u un:

—Nda'u se'e ri, ndee sa'a ni ra, chi ja iyo jnu ka'nun ini nuu kuachi ra —kachi ya jiin da.

<sup>3</sup> Ti yukan ka'iin tijni chaa ka xna'an ley Israel. Ti nu ni ka jiniso'o da jnu'un ni ka'an Jesús jiin chaa tikuku un, ti ni ka keja'a ka ndo'o ini da: “¿Xi ndaa ja ndo'o ini chaa un ja kuu da Yandios, ja sia'an ka'an da siki ya?” kachi da naa da.

<sup>4</sup> Ti ja ni jini Jesús ja sia'an ka ndo'o ini da, ti ni kachi ya:

—¿Ndoo ka ndo'o ini ra sia'an naa ra? <sup>5-6</sup> Chi na kachi ri ja maa ri kuu Se'e Yivi Ñuyivi, ti ndisojniuu ri ja kuanka'nu ini ri nuu kuachi yivi naa i. Vijnna ti na stuu ri iin jniñu sa'a ri ja'a —ni kachi ya.

Yukan na ti ni kachi ya jiin chaa tikuku un:

—Ndoko, nastuu yuu ra, ti kuano'on ve'e ra —ni kachi ya.

<sup>7</sup> Ti ni ndoko chaa tikuku un, ti kuano'on da ve'e da. <sup>8</sup> Nu ni ka jini yivi un, ti ni ka naa ini i ja sia'an ni sa'a ya. Ti ni ka kucaa i ni ka nakanaaja i Yandios ja sia'an ni ja'a ya jniñu ña'nun un nuu iin chaa.

*Kana Jesús xini Mateo ja na kuu da ndaja'a ya  
(Mr. 2.13-17; Lc. 5.27-32)*

<sup>9</sup> Ni kee Jesús yukan ti kua'an ya, ti ni jini ya iin chaa nani Mateo, nukoo da nuu kinya'u da puestu, ti ni kachi ya jiin da:

—Ña'an na cho'o, ti kundikun ra ru'u —ni kachi ya.

Yukan ti ni ndokuiñi ni chaa un, ti kua'an da jiin ya.

<sup>10</sup> Ti nu ni jaa Jesús ve'e Mateo yukan ni yee ya staa. Ti kua'a xaan chaa ka kinya'u puestu ni ku'iin un, jiin tijni chaa tu ka siuku ley Israel. Kanchuku da jiin ya nuu mesa ka yee da staa, jiin taka ndaja'a ya. <sup>11</sup> Ko nu ni ka jini chaa fariseo yukan, ti ni ka jikajnu'un da ndaja'a ya, ti ni ka kachi da:

—¿Ndoo kuu ja yaji maestro ra staa jiin chaa ka kinya'u puestu un jiin taka chaa tu ka siuku ley Israel yukan? —ni ka kachi da.

<sup>12</sup> Ni jiniso'o Jesús ja sia'an ni ka ka'an chaa un, ti ni kachi ya jiin da:

—Yivi ka iyo ndendajnu tu ka nandi'i i chaa tajna, chi yivi ka ku'u kuu ja ka nandi'i iin médico. <sup>13</sup> Kuano'on naa ra ti skua'a ra nasa kuni ka'an jnu'un ja'a: “Ru'u kuni ri ja na kuanka'nu ini nuu jna'an ra naa ra, ti ansu ja soko ra kitii naa ra.” Chi ansu vaji ri ja ka'an ri jnu'un Yandios nuu yivi ka janii ini ja iyo ndoo jiin kuachi i. Chi su'va ni chaa ri ja na ka'an ri jnu'un Yandios nuu yivi ka nakuni ja ka iyo kuachi i, nava na nakani ini i nuu Yandios —kachi Jesús.

*Ka jikajnu'un da Jesús sikjnu'un ndicha ini  
(Mr. 2.18-22; Lc. 5.33-39)*

<sup>14</sup> Yukan ti ni ka chakoyo ndaja'a Juan, chaa skuanducha un, nuu Jesús, ti ni ka jikajnu'un da ya:

—¿Ndoo saña naa na jiin chaa fariseo, xaan tijni jinu ka kendo ndicha ini na, ti ndoo ndaja'a ni, ndoo tu ka kuu koo ndicha ini da naa da? —ni ka kachi da.

<sup>15</sup> Yukan ti ni kachi Jesús:

—¿Va nu kuu koo ndicha ini yo nu iyo iin viko nanda'a, ti tu kusii ini yo nu kancha novio un jiin yo nu? Ko nu na jaa kivi ja kuxio novio un ki'in da, yukan na ti sa kuu koo ndicha ini yivi un naa i. Suni sia'an kuu ja nu ni kancha ri ti tu kuu koo ndicha ini chaa ka skua'a jiin ri. Ko jaa iin kivi nu na kuxio ri ki'in ri, yukan na ti sa na koo ndicha ini da naa da —ni kachi ya.

<sup>16</sup> Siin Jesús xndaku ya ja tu kejna'an jnu'un jaa ja xna'an ya, jiin jnu'un jana'an, ti ni kachi ya:

—Tu kuu nachaa yo sa'ma tu'u jiin iin sa'ma jaa, chi ndiyi sa'ma jaa un ti ka'ncha sa'ma tu'u un, ti su'va kuu jicha ga te'nde ki'in. <sup>17</sup> Ni tu kuu chu'un yo vino jaa chii iin ñii tu'u, chi vino jaa un ndata ñii tu'u un, ti xnaa yo ndinduu. Ja yukan kuu ja na chu'un yo vino jaa chii ñii jaa un, ti sia'an ni iin ni iin tu xnaa yo —ni kachi ya.

### *Se'e si'i Jairo jiin ña'an ni kue'e sa'ma Jesús*

(*Mr. 5.21-43; Lc. 8.40-56*)

<sup>18</sup> Ni ka'an ga Jesús jnu'un un, ti ni jaa iin chaa kuña'nu ini iin veñu'un Israel un, ni jakunjiti da nuu Jesús, ti ni kachi da:

—Ja ni ji'i se'e si'i na, ko nu na ki'in yo, ti chuxndee ni nda'a ni siki i, ti va nadoto tuku i —ni kachi da.

<sup>19</sup> Ni ndokuiñi Jesús ti kua'an ya jiin chaa un jiin ndaja'a ya. <sup>20</sup> Ti yukan kua'an iin ñasi'i ja ja ni kuu uxi uu kuiya jna'an ña kue'e niñi. Ni tu'va ña ichi jata Jesús ti ni kue'e ña sa'ma ya, <sup>21</sup> chi ni ndo'o ini ña: “Nu na kundee ri kue'e ri vasu sa'ma ya, ti va nduva'a ri”, sia'an ni ndo'o ini ña. <sup>22</sup> Ko ni ndeokoto Jesús, ni nde'e ya nuu ña, ti ni kachi ya:

—Ndee sa'ní ra hija, ja ni nduva'a ra chi ni kandixia ra ru'u, ja kuu sa'a ri tajna maa ra —ni kachi ya.

Ti yukan un ni nduva'a ni ña'an un.

<sup>23</sup> Nu ni jaa Jesús ve'e Jairo, chaa kuña'nu un, ti ni jini ya ja, ja ka iyo tu'va música ja kin chunduji da ndiyi lulu un, ti yivi ka'iin un ka kanajiin ko'o i ja ka nde'e xaan i, <sup>24</sup> ti ni kachi ya:

—Kuan kee naa ra fuera un, chi tu ni ji'i suchi lulu ja'a, chi so kixi i —kachi ya.

Ti yivi ka'iin un so ni ka jaku i ja sia'an ni ka'an Jesús. <sup>25</sup> Ko ni keni'in Jesús maa ni kuankoyo i ichi fuera, ti ni kivi ya ini ve'e un, ni jniñi ya nda'a ña'an lulu un, ti ni ndoko i. <sup>26</sup> Yukan na ti ni tu'u ñuu un ni jichanuu jnu'un Jesús ja sia'an ni kuu un.

### *Ni sa'a Jesús tajna uu chaa kuaa*

<sup>27</sup> Nu ni kee Jesús yukan ti kua'an ya, ti ni ka ndikun uu chaa kuaa jata ya, ti ka kanajiin da kuajakoyo da:

—jKunda'u ini ni saña naa na, ni'in ja kuu se'e David, chaa ni kuu rey Israel undi na jana'an! —ni ka kachi da.

<sup>28</sup> Ti nu ni jakuiñi Jesús iin ve'e, ni ka tu'va chaa kuaa un nuu ya, ti ni jikajnu'un ya maa da naa da, ti ni kachi ya:

—¿Kandixia ra naa ra ja kuu sa'a ri jniñu ja'a nu? —kachi ya.

Ti ni ka kachi da:

—Jito'yo, ka kandixia na —kachi da naa da.

<sup>29</sup> Yukan ti ni kue'e Jesús nduchi da naa da, ti ni kachi ya:

—Na kuu nava ni ka kandixia ra naa ra —kachi ya.

<sup>30</sup> Ti ni ka nduva'a ni nduchi chaa un naa da. Yukan na ti ni'in xaan ni ta'u ya jniñu nuu da naa da, ja tu kani kuti da jnu'un nuu yivi naa i.

<sup>31</sup> Ko ji'i ni ni ka kee da kua'an da, ti ni ka jani ni da jnu'un nuu taká yivi ñuu un jniñu ni sa'a Jesús.

### *Ni sa'a Jesú斯 tajna iin chaa ñi'in*

<sup>32</sup> San ni ka kee chaa un kuankoyo da, ti ni ka chakoyo tuku uu ga da jiin iin chaa ñi'in, ti chaa un suni jna'an da tachi xaan. <sup>33</sup> Nu ni keni'in Jesú斯 tachi xaan un kua'an, ti ni keja'a ka'an chaa ñi'in un, so ni ka naa ini yivi ka'iin un, ti ni ka kachi:

—Jankiví ka jini yo iin jniñu sia'an, ja kuu nuu ni ñuu Israel —kachi naa.

<sup>34</sup> Ko ni ka kachi chaa fariseo un:

—Keni'in chaa ja'a tachi xaan un kua'an, ko jiin sivi maa ja'u'u un sa'a da kachi naa.

### *Ni kunda'u ini Jesú斯 yivi naa i*

<sup>35</sup> Ni jikonuu Jesú斯 taka fiuu jiin taka ranchu xna'an ya ini veñu'un Israel jiin taka fiuu, xndaku ya ja nasa kuu kivi yivi nda'a Yandios, ti ta'u ya jniñu nuu i. Ti kenchaa ya taka nuu kue'e ja ka jna'an yivi. <sup>36</sup> Ni nde'e ya nuu yivi un ti ni kunda'u ini ya naa i, chi nde nda'u ka sa'a i, ja ka kuu kui'ya ini i. Chi ka kuu i nanu riñi ka jichanuu, ti ni ka sana ti nanu ja ni ka skuita ti jito'o ti.

<sup>37</sup> Yukan na ti ni kachi ya jiin ndaja'a ya:

—Jniñu Yandios kuu nanu kivi ka nastutu yo triu, chi jandaa ndixia kuu ja, ja ni kuu te'nde triu un ko jaku ni muzu ka iyo ja sajniñu un. Sia'an kuu yivi ja'a naa i, chi nda'u ka sa'a i ja tundo xndaku nuu i, chi ka kumani chaa xndaku un naa da. <sup>38</sup> Yukan kuu ja ka'an ri ja kakanta'u nuu maa Yandios naa ra, chi maa ya kuu ja xiin jniñu un, ti na chu'un ya muzu na nastutu jniñu un —kachi ya.

### *Ni nakaji Jesú斯 ndi uxi uu ndaja'a ya (Mr. 3.13-19; Lc. 6.13-16)*

## 10

<sup>1</sup> Yukan na ti ni nastutu Jesú斯 ndi uxi uu ndaja'a ya ja na kujiin da jiin ya, ti ni ja'a ya jniñu ña'nu nuu da naa da, ja na kuu keni'in da tachi xaan jiin ja na kenchaa da taka nuu kue'e.

<sup>2</sup> Ja'a ka kuu sivi ndi uxi uu ndaja'a Jesú斯. Xnakan ni nakaji ya Simón, ja suni nani da Pedro, jiin ñani da Andrés; Jacobo jiin ñani da Juan, ja ka kuu da se'e yii Zebedeo; <sup>3</sup> Felipe; Bartolomé; Tomás; Mateo ja ni kuu da chaa kinya'u puestu un; Jacobo ja kuu se'e yii Alfeo; Lebeo ja suni nani da Tadeo; <sup>4</sup> Simón, chaa ni yi'i jiin partido Kananista; jiin Judas, iin chaa fiuu Cariote ja kuee ga ti ni nakua'a da Jesú斯 nuu enemigo ya.

### *Taji Jesú斯 ndaja'a ya ja na ka'an da jnu'un Yandios (Mr. 6.7-13; Lc. 9.1-6)*

<sup>5</sup> Ni taji Jesú斯 ndi uxi uu chaa un, ko xnakan ni xndaku ya nuu da, ti ni kachi ya:

—Koto kinkoyo ra fiuu nuu tu kanchuku yivi ka kuu yivi Israel, ni tu kivi ra ni iin ndafuñ Samaria naa ra. <sup>6</sup> Kuankoyo nuu kanchuku yivi nación Israel, chi ka kuu i nanu riñi ka sana, ti sia'an tu ka chaku ini i na ichi kuankoyo i.

<sup>7</sup> Ti kani ra jnu'un nuu yivi un ja, ja ni jaa kivi nuu ta'u Yandios jniñu. <sup>8</sup> Sa'a ra tajna yivi ka ku'u, ti na xndoto ra yivi ni ka ji'i. Suni sa'a ra tajna yivi ka jna'an ndi'yí te'yú nava na ndundoo i. Ti keni'in ra tachi xaan naa ra na kinkoyo. Ti koto maa kinya'u ra nu ni kuu ni ka sa'a ra taka jniñu un.

<sup>9</sup> Ichi kinkoyo ra tu kunda'a ra oro, ni plata, ni cobre naa ra. <sup>10</sup> Ni tu kundiso ra fiunu staa ja kuu ichi ra. Vajnu'un ni camisa kuu ja ku'un ra naa ra, ti tu kunda'a ra ndijña ni yujnu xii. Tu kundiso ra taka un, chi iin chaa sa'a jniñu nini kuu ja ni'in da ja kají da.

<sup>11</sup> Nu ni jakoyo ra iin ñuu xi iin ranchu, nduku iin ve'e nuu kanu ini ra yivi, ti yukan kunchuku ra undi sa kinkoyo ra. <sup>12</sup> Nu ni ka kivi ra ve'e un naa ra, kanxia'u ra jiin yivi un, ja na kukuee kunchuku i. <sup>13</sup> Nu ka iyo va'a ini yivi un, ti kakanta'u ja na kukuee kunchuku i. Ti nu tuu, ti nduku ra inga ve'e nuu kunchuku ra naa ra. <sup>14</sup> Ti taka yivi ja tu ka ja'a ve'e un, ni tu ka chunso'o jnu'un Yandios ka ka'an ra, kekoyo ve'e yivi un jiin ñuu i. Nu ni kekoyo ra ñuu un, ti kisi tikacha ini ndijña ra naa ra, ti yukan na kuu iin seña ja tu ni ka kandixia yivi un jnu'un ni ka ka'an ra naa ra. <sup>15</sup> Chi na kachi ri nuu ra naa ra, ja nu na jaa kivi chaa juicio, ti ka'nu ga nundo'o kii siki yivi ñuu un, ti ansu yivi ñuu Sodoma jiin Gomorra —ni kachi Jesús.

### *Siki ja koto u'u yivi nuu ndaja'a Jesús (Lc. 12.11-12)*

<sup>16</sup> Siin Jesús xndaku ya, ti ni kachi ya:

—Nde'e naa ra, ru'u taji ri ro'o kinkoyo ra nanu rii kuankoyo nuu ka'iin kitii xaan. Kava vivo ra naa ra, ko so ja koto maa iin ja sa'a ra jiin yivi. Kuee kava ini ra naa ra nanu iin sata, ja tu nduxaan ti. Ti sia'an kunchuku ra. <sup>17</sup> Ko nde'e ra naa ra, chi jnii yivi presu ro'o, ti nakua'a ro'o nuu chaa ka kuña'nu un naa ra, ti kua'a chaa un tau ra ini veñu'un Israel un. <sup>18</sup> Ti siki ja ka jika ra jiin ri, ti nakua'a da ro'o vasu undi nuu gobernador xi nuu rey, ko vasu undi nuu chaa un, ti suni kuu ka'an ra jnu'un ri jiin nuu yivi inga nación. <sup>19</sup> Nu ni ka jnii da presu ro'o, ti nakua'a da ro'o nuu chaa ka kuña'nu un, ti koto ma xndi'i ra ini ra naa ra, ja nasa koo jnu'un ka'an ra naa ra, chi nu na jaa nuu ka'an ra, ti maa Yandios na kachi nasa koo jnu'un ka'an ra naa ra. <sup>20</sup> Chi ansu ro'o kuu ja ka'an, chi Espíritu maa Yandios kuu ja kua'a jnu'un ka'an ra naa ra.

<sup>21</sup> Chi yivi tu ka kandixia, chakuachi jna'an i jiin ñani i, ti nakua'a i da ja na kuú da. Ti suni chaa ka kuu tata, chakuachi da se'e da, ti nakua'a da chaa ja na kuú da. Ti suni se'e un, chakuachi i tata i, ti nakua'a i da ja na kuu da. <sup>22</sup> Ja yukan kuu ja nde kua'a yivi koto u'u ro'o siki ja ka yil'i ra jiin ru'u, ko taka yivi ka siuku ndaa, vasu na kuui ja siki ru'u, ko taka nanita'u. <sup>23</sup> Ko nu iin ñuu na koto u'u yivi ro'o naa ra, kuankoyo inga ñuu. Ti na kachi ndaa ri nuu ra naa ra ja ru'u, maa Se'e Yivi Ñuyivi, xnaka ja nchaa ri ti sa ndekava ra kuikonuu ra taka ñuu Israel. <sup>24</sup> Nde'e naa ra, ja ka jini ra ja ni iin ndaja'a tu kuu kuña'nu ga ja kuu chaa yinda'a da, ti ni iin chaa junukuachi tu kuu kuña'nu ga da ja kuu jito'o da. <sup>25</sup> Chi nu na sa'a ndeva'a yivi jiin maa chaa kuña'nu un, ti suni sia'an sa'a i jiin chaa ka kuu taka ndaja'a da. Ti nu ka skonani i ru'u Beelzebú (ja kuni ka'an ja'u'u kuña'nu), ti ndee ga ja nu tu ka'an i siki ro'o naa ra ja ka kuu ra ndaja'a ri —kachi Jesús.

### *Xndaku Jesús nau kuu ja na koyu'u yo (Lc. 12.2-7)*

<sup>26</sup> Siin Jesús xndaku ya, ti ni kachi ya:

—Ja yukan kuu ja koto yu'u ra nde'e ra yivi kanda kua'an un, chi tu iyo ni iin jniñu sa'a xe'e i ja na kendo sa'yí nuu Yandios, chi taka ni kenda nuu ndijin. <sup>27</sup> Ko jnu'un xna'an ri nuu maa ni ra ja'a naa ra, ti ka'an ra taka nuu kanchuku yivi naa i. <sup>28</sup> Ti koto yu'u ra nde'e ra yivi ka ja'ní yiki kuñu, chi tu ni'in i añu ra ja ka'ní i. Ko maa Yandios kuu ja koyu'u ra, chi maa ya kuu ja ja'ní yiki kuñu ni jiin añu nuu infiernu.

<sup>29</sup> Maa Yandios kuu ja na kachi nasa koo jiin maa ra naa ra. Jini ndaa yo yukan, chi undi saa kuachi un, jito va'a ya ti, ja ni iin ti tu kanakava nuu ñu'un nu tu kachi maa Tata ra Yandios. <sup>30</sup> Ti ja ro'o naa ra, chi undi ixi xini ra ni ka'u

ya ndi iin ndi iin. <sup>31</sup> Ja yukan kuu ja koto xndi'i ini ra, chi ya'u ga ka nchaa iin iin ra nuu Yandios ja kuu iin jni saa kuachi un naa ti —kachi Jesús.

*Yivi ka yi'i jiin Cristo Jesús  
(Lc. 12.8-9)*

<sup>32</sup> Siin Jesús xndaku ya, ti ni kachi ya:

—Taka yivi nu na kachi ndaa ja ni ka yi'i i jiin ri, ti suni ru'u nakachi ndaa ri nuu Tata ri, ya kancha ya andivi, ja jini ri maa i. <sup>33</sup> Ko nu na chisa'yí i ru'u nuu yivi, ti suni ru'u kachi ri ja tu jini ri yivi un nuu Tata ri, ja kancha ya andivi —ni kachi Jesús.

*Koto u'u jna'an yivi ja siki Jesús  
(Lc. 12.51-53; 14.26-27)*

<sup>34</sup> Siin Jesús ka'an ya, ti ni kachi ya:

—Tu kani ini ra naa ra ja ni chaa ri ñuyivi ja'a, ti sa'a ri ja na kukuee kunchuku mani yivi naa i. Chi ni chaa ri, ko so ja nu na kandixia i ru'u, ti koto u'u jna'an yivi naa i. <sup>35</sup> Koto u'u iin se'e yii nuu tata da, ti suni iin se'e si'i koto u'u ña nuu nana ña, ti se'e janu un koto u'u ña nuu nana chiso ña. <sup>36</sup> Ja sia'an kuu ja nu na kandixia yivi ru'u, ti koto u'u jna'an maa i ini ve'e i naa i.

<sup>37</sup> Nu ñukuu ini ra ru'u, ko nu kunda'u ga ini ra tata ra jiin nana ra, ja sia'an ti tukaa ga yi'i ra jiin ri. Suni nu ka kunda'u ga ini ra se'e si'i ra xi se'e yii ra, ti suni tukaa ga ka yi'i ra nda'a ri naa ra. <sup>38</sup> Ti nu tu ka ñukuu ini ra ru'u ja kundikun ra ru'u, ti vasu na kuü ra, ko tukaa ga ka yi'i ra jiin ri. <sup>39</sup> Chi taka yivi ka kuni nama i maa i nuu ñuyivi ja'a, ti tukaa nanita'u i ja kuu saa ni. Ko nu na nakani ini i tì xndoo i taka un ja na kundikun i ru'u, ti nanita'u i ja kuu saa ni —ni kachi Jesús.

*Nasa ni'in yo ta'u nuu Yandios  
(Mr. 9.41)*

<sup>40</sup> Siin Jesús ka'an ya, ti ni kachi ya:

—Nu iin yivi na kuanta'u jnu'un ri ja ka ka'an ra, ti suni janta'u i maa ri. Ti yivi janta'u ru'u, suni ja ni janta'u i Tata ri, ya ni taji ru'u. <sup>41</sup> Ti iin yivi nu na kuanta'u i jnu'un Yandios ja ka'an iin profeta, ti suni ni'in i ta'u i nanu ni ni'in profeta un. Ti nu iin yivi na kuanta'u i iin chaa va'a ja ni yi'i da jiin ru'u, ja so ja kuu da chaa va'a, suni ni'in da ta'u da nanu ni'in chaa va'a un. <sup>42</sup> Ti vasu sava'a ni ga yivi nu na kua'a i iin vasu nduchá vijin nuu chaa nda'u ja ka ndikun da ru'u, ti na kachi ndaa ri ja suni iyo ta'u yivi un —ni kachi Jesús.

*Chaa ni ka jika jiin Juan, chaa skuanducha  
(Lc. 7.18-35)*

## 11

<sup>1</sup> Nu ni ndi'i ni xndaku Jesús nuu ndi uxi uu ndaja'a ya, ni kee ya kuan xna'an ya nuu yivi ñuu ka'iin yajni un.

<sup>2</sup> Ti Juan, chaa ni skuanducha un, ja kande da yekaa. Ti nu kande da un, ni ni'in da jnu'un taka jniñu sa'a Cristo. Yukan ti ni taji da uu chaa ka jika jiin da un kuankoyo da nuu kande Jesús, <sup>3</sup> ti ni ka jikajnu'un da ya sia'an:

—¿Maa ni kuu Cristo ja ni chisojnu'un Yandios ja kii nu? ¿Xi kundatu yo inga nu? —ni ka kachi da.

<sup>4</sup> Yukan ti ni kachi Jesús:

—Kuankoyo naa ra ti kani jnu'un nuu Juan naa ra taka ja ni ka jini ra jiin taka jnu'un ni ka jiniso'o ra ja'a naa ra. <sup>5</sup> Kani jnu'un nuu da ja ka ndundijin nduchi chaa kuaa un, jiin ja ka ndokaka chaa tikuku un, jiin ja ka ndundoo chaa ka jna'an kue'e ndi'yí te'yu un. Suni chaa so'o un ka ndundijin so'o

da, jiin ja ka nandoto ndiyí naa i, jiin ja kuu nuu yívi nda'u ka'an ri jnu'un Yandios NASA nanita'u i —kachi Jesús.

<sup>6</sup> Ti kachi jiin da ja kandichi Yandios jiin yívi tu ka yu'u i kundikun i ru'u, vasu na koo ndo'o koo nene i ja siki ru'u.

<sup>7</sup> Nu ni ka ya'a chaa un kua'an da, ti ni keja'a Jesús ka'an ya jiin yívi un ja na chaa kuu Juan, ti ni jikajnu'un ya:

—Na ni ka jande'e ra undi nuu ſu'un te'e un, ¿ndoo ka ndo'o ini ra ja sa'a chaa un? Ti tu ni ka jini ra iin chaa un nanu iin yoko icha ja kanda jiin tachi un, ti chaa un tu ni sama nuu nuu da jnu'un ka'an da, chi iin ni jnu'un ni ka'an da. <sup>8</sup> Ti nu ni ka jande'e ra yukan, ¿Xi ni ka jini ra ja ſu'un chaa un sa'ma va'a nu? Chi na kachi ri ja yívi ka ſu'un sa'ma fino kanchuku da ve'e chaa ka kuu rey. <sup>9</sup> ¿Ti ndoo ni ka jande'e ra nusa? ¿Xi ka jani ini ra ja maa da kuu profeta ja ka'an jnu'un Yandios nu? Ti jandaa ndixia kuu ja maa da kuu da iin profeta ja ka'an da jnu'un Yandios. <sup>10</sup> Ti siki Juan kuu ja ka'an nuu tutu ii Yandios sia'an:

Na taji ri tajnu ri ja na koxnuu da jaa da.

Ti na satu'va da yívi naa i sa ki'in ra.

Ni kachi Yandios, kachi tutu.

<sup>11</sup> Jandaa na kachi ri ja tukaa ga iyo ni iin yívi nanu Juan ja kuña'nú ga ja kuu Juan, chaa skuanducha un. Ko yívi ja, ja ni ka janta'u jnu'un siki ja nasa kivi i nda'a Yandios, ti ta'u Yandios jniñu nuu i, vasu tu ka ndiso jniñu i nanu Juan, ko kuni ga yívi un jniñu ſa'nú ga ja sa'a ya ansu maa da. <sup>12</sup> Undi na ni chaa Juan, chaa skuanducha un, ti undi vijnal, u'u xaan sa ka kandixia yívi jnu'un ka'an ri ja na kuu kivi i nda'a Yandios, ti ta'u ya jniñu nuu i. Ti nini yívi ka ſukuu xaan ini, yukan ni kuu ja kuu kivikoyo i nda'a ya, ti ta'u ya jniñu nuu i. <sup>13</sup> Taka profeta, chaa ni ka ka'an jnu'un Yandios jiin jnu'un ka'an ley Moisés un, chaa yukan ni ka ka'an jnu'un siki ſuu nuu ta'u Yandios jniñu, sa ni chaa Juan. <sup>14</sup> Ti nu ka kuni kandixia ra naa ra ja Juan kuu maa profeta ja sa'a jniñu nanu ni sa'a profeta Elías na jana'an, nava yoso nuu tutu Yandios ja kii. <sup>15</sup> Yívi ka kuni chunso'o, na chunso'o i jnu'un ja'a.

<sup>16</sup> Ja'a na kachi ri jiin nau ja skejna'an ri yívi kanchuku kivi vijnal. Chi yívi ka iyo vijnal ka kuu i nanu suchi kuachi nu ni ka nukoo i nuu ya'u ja ka yisíki i, ti ka kana xini jna'an i, <sup>17</sup> "Ka tivi yo xkili, ko tu ni ka jitaja'a i. Ti kuaka xaan ni ka jita yo iin yaa, ko tu ni ka nde'e i", ni ka kachi i. <sup>18</sup> Sia'an kuu kivi vijnal, chi ni kii Juan, ni kuncha da. Tu ni ji'l da ndixi, ti iyo nasa xndondichida da ini da. Ti ro'o ni ka ka'an ra ja ni yi'i da jiin iin tachi xaan. <sup>19</sup> Yukan na ti ni chaa tu ru'u, maa Se'e Yívi Ñuyívi, ja yají ri ti ji'i ri, ti ka chakuachi ra ru'u ja yají xaan ri ti ji'i xaan ri vino, ti kuu ri amigo chaa ka kinya'u puesto. ¿Nusa ti tu ni ka kandixia ra jniñu ni sa'a Juan, ni tu ni ka kandixia ra jniñu ni sa'a tu ru'u nu? Ko tundo sa'a, chi yívi tu'va, ka jini i ja iyo va'a sava'a ni ga jniñu ni ta'u Yandios nuu ri jiin Juan —ni kachi ya.

### *Yívi ſuu ni ka nduni'in ini (Lc. 10.13-15)*

<sup>20</sup> Yukan ti ni keja'a Jesús kankuachi ya siki yívi ſuu nuu ni sa'a ya kua'a jniñu ſa'nú un, chi taka yívi ſuu un, tu ni ka nákaní ini i nuu kuachi i, ti ni kachi ya:

<sup>21</sup> —¡Na xaan ga xnda'u ro'o, yívi ſuu Corazín! ¡Na xaan ga xnda'u ro'o, yívi ſuu Betsaida! Sa ti ſuu Tiro jiin ſuu Sidón ni sa'a ri taka jniñu ſa'nú un nava ni sa'a ri nuu ſuu ra naa ra, va ja ni kuu jna'an ni ka nákaní ini yívi un nuu kuachi i niku. Ti ku'un i sa'ma ndayi, ti nakuchi i yaa ja na kuu seña i ja ni ka nákaní ini i. <sup>22</sup> Ko na kachi ri ja kivi nu na chaa juicio ti ni'in ga kii nundo'o

siki ra naa ra ja kuu yivi ūuu Tiro jiin Sidón. <sup>23</sup> Ti ro'o, yivi ūuu Capernaum, ḷka jani ini ra ja ni nduña'nu ga ūuu ra nu? Tuu, chi su'va ni nukuu ga ūuu ra, ti ndunda'u ga ra ja kuu taka ga ūuu. Sa ti taka jniū ū'a'nu ni sa'a ri ūuu ra ja'a, ni sa'a ri ūuu Sodoma niku, va ni siin ga ūuu un undi vijna niku. <sup>24</sup> Ko na kachi ri ūuu ra naa ra ja kivi nu na chaa juicio, ti ro'o kuu ja ni'in ga kii nundo'o siki ra ja kuu siki yivi ūuu Sodoma —kachi ya.

*Ka'an Jesús ja tu yivi jnu'un tatu ya ūuu yo  
(Lc. 10.21-22)*

<sup>25</sup> Ti kivi jña ni jikanta'u Jesús ūuu Tata ya Yandios, ti ni kachi ya:

—Nakanajaa na ni'in, ni'in ja kuu ni Tata na, ti maa ni yinda'a andiví jiin ūuyivi. Nakata'u na ūuu ni, chi tu ni stuu ni taka jnu'un va'a un ūuu chaa tu'va un, ko ni stuu ni jnu'un un ūuu yivi nda'u ja ni ka nakani ini. <sup>26</sup> Ni kuu sia'an, chi sia'an ni kuu ini maa ni —kachi Jesús.

<sup>27</sup> Ti ni siin Jesús xndaku ya ūuu yivi un, ti ni kachi ya:

—Tata ri, ni nakua'a taka jniū ja'a ūuu ri. Ti maa ni ya kuu ja jini ndaa kuiti nava ndo'o inijnuni ri, ja kuu ri Se'e maa ya. Ti suni ru'u, ja kuu ri Se'e ya, jini ndaa kuiti ri inijnuni maa ya, ja maa ya kuu Tata ri Yandios. Ti maa iin ni ru'u, ja kuu ri Se'e ya, kuu ja xna'an ūuu yivi nasa kaa maa Tata yo Yandios. <sup>28</sup> Ņa'an ūuu ri naa ra ro'o ja ka ndi'i ini, ti ka nduku ra ichi ki'in ra ja na kenchaa kuachi ra, ti ru'u na nama ro'o naa ra, ti tukaa kondo'o ra jiin kuachi ra. <sup>29</sup> Ja'a kuu nanu iin yugo ja chuxndee yo xini yunta nu ka sa'a ti jniū, ti suni sia'an na kua'a ri iin jniū ūuu ra, ti tu yivi jniū un, ja tu kuu sa'a ra. Chi so ja na chunso'o ra jnu'un ka'an ri, ti kuandatru ūuu jnu'un un. Chi ru'u, va'a ini ri jiin ra naa ra, ti ūunda'u ini ri ja nama ri ro'o jiin aňu ūuu naa ra. <sup>30</sup> Iin jniū taya kuu ja kua'a ri ūuu ra, ti tu ni'in iyo —ni kachi Jesús.

*Jniū ni ka sa'a ndaja'a Jesús iin kivi ndetatu  
(Mr. 2.23-28; Lc. 6.1-5)*

## 12

<sup>1</sup> Ti kivi jña kua'an Jesús jiin ndaja'a ya, iin kivi ndetatu, ti ni ya'a ya iin ūu'un ūuu kaa triu. Tí ndaja'a ya, ni ka keja'a da ka jnu'un da yoko triu. Ka skoyo da ti ka yee da triu un, chi ka ji'i da soko. <sup>2</sup> Ti nu ni ka jini chaa fariseo un, ti ni ka kachi da jiin Jesús:

—Nde'e, ḷndo'o ka sa'a ndaja'a ra jniū ja tu iyo va'a ja sa'a yo kivi ndetatu? —ni ka kachi da.

<sup>3</sup> Ti ni kachi ya:

—Xi tu ni ka skua'a ra iin tutu nava ni ka jna'an David iin kivi na ni ka ji'i da soko, jiin ūuu ga jna'an da nu? <sup>4</sup> Jini ra ja ni ka kivi da ini ve'e ii Yandios, ti ni ka yee da staa stila ii un, ja ni maa da jiin ūuu ga jna'an da un, tu kuu kaji da naa da, chi nin ūuu kuu ja ka yee staa stila un niku. <sup>5</sup> ḷxi tu ka skua'a ra ūuu ley Moisés, ūuu kachi ja ni ūuu un, tu ka ndetatu da ja kuu kivi ndetatu, ti ansu suni iin kuachi ūuu un nu? <sup>6</sup> Ko na kachi ri ūuu ra, ja vijna ti iyo iin ja kuña'nu xaan ga ja ūuu ūuu ka kuña'nu ini veñu'un ka'nun un. <sup>7</sup> Ko maa ra naa ra, tu ka chaku ini ra ndoo kuni ka'an jnu'un ja yoso ūuu ūuu ii, ja ni ka'an Yandios: “Ru'u, kuni ri ja na kuanka'nu ini ūuu jna'an ra naa ra, ti ansu ja ka soko ra kiti ūuu Yandios”, ni kachi ya. Sa ti ka chaku ini ra jnu'un un naa ra, ti va tu chakuachi ra yivi naa i ja ka iyo falta i. <sup>8</sup> Chi ru'u, maa Se'e Yivi Ņuyivi, kuña'nu ga ri, ti ta'u ri jniū ūuu kivi ndetatu ja'a —ni kachi ya.

*Ni nduva'a iin chaa ni ichi nda'a  
(Mr. 3.1-6; Lc. 6.6-11)*

<sup>9</sup> Yukan ti na kua'an Jesús, ni jaa ya iin veñu'un Israel un. <sup>10</sup> Ti yukan kande iin chaa ni ichi iin nda'a da. Ko vanuxia chaa fariseo un ka nduku da nasa chakuachi da Jesús, ti ni ka jikajnu'un da ya:

—¿Kuu sa'a yo tajna iin yivi ku'u ja kuu kivi ndetatu nu? —ni ka kachi da.

<sup>11</sup> Ti ni kachi Jesús:

—Nu nau ro'o ka ñava'a iin lélú, ti nu na kinikava ti iin yau ja kuu iin kivi ndetatu, ¿ti tu kin tava ra ti nu? <sup>12</sup> ¿Ti ansu ya'u ga nchaa iin yivi ja kuu lélú un nu? Ja yukan kuu ja na kachi ri ja kuu sa'a yo iin jniñu va'a ja kuu kivi ndetatu —ni kachi Jesús.

<sup>13</sup> Yukan ti ni kachi ya jiin chaa ni ichi nda'a un:

—Skaa nda'a ra —kachi ya.

Ti nu ni skaas chaa un nda'a da, ti ni nduya'a ni nanu kaa nda'a da. <sup>14</sup> Ti ni ka kekoyo chaa fariseo un kua'an da, ti ni ka keja'a ka ndajnu'un da nasa kuu ka'nii da Jesús.

### *Jnu'un ni ka'an Isaías undi na jana'an*

<sup>15</sup> Nu ni jini Jesús nava ka ndo'o ini chaa fariseo un, ni kee ya yukan ti kua'an ya. Ko kua'a xaan yivi kuankoyo jiin ya, ti ni sa'a ya tajna tijni yivi ka ku'u. <sup>16</sup> Ko ni'in xaan ni xndaku ya nuu yivi un ja tu kani da jnu'un nau ja kuu ya. <sup>17</sup> Yukan ti ni kundaa jnu'un ni ka'an profeta Isaías na jana'an, na ni kachi da:

<sup>18</sup> Chaa junukuachi nuu ri ja'a, kuu ja ni nakaji ri.

Chaa ja'a kuu ja kunda'u ga ini ri, ti kusii ini ri jiin da.

Kua'a ri Espíritu ri nuu da, ti xndaku da nuu taka nación

ja nau kuu maa jnu'un ndaa, ti na kuandatu yivi jnu'un un.

<sup>19</sup> Ni tu kava vixi ini maa da, ni tu kachi da nuu ni iin yivi nau ja kuu da.

Ti ni iin yivi tu nakuni i ndusu yu'u ya.

<sup>20</sup> Tu kua'a da nundo'o nuu taka ñuu nda'u, chi su'va kua'a da jnundee ini undi kivi na ki'in da jniñu ña'l'nu da, ti ta'u da jniñu nava iyo.

<sup>21</sup> Ti kivi un sa na kandixia ndaa yivi taka nación maa da.

Sia'an ni kachi profeta Isaías.

### *Ka chakuachi da Jesús ja ndiso jniñu ya nuu ja'u'u*

(Mr. 3.19-30; Lc. 11.14-23; 12.10)

<sup>22</sup> Yukan ti ni ka janchaka da iin chaa kuaa ja suni ñi'in da, ti jna'an da tachi xaan. Ni sa'a Jesús tajna chaa un, ti ni kuu nde'e da, ti ni kuu ka'an da.

<sup>23</sup> Tendi'i yivi un ni ka naa ini, ti ni ka kachi:

—¿Xi ja'a kuu Se'e rey David ja ni ji'i undi na jana'an nu? —ni ka kachi da.

<sup>24</sup> Ko nu ni ka jiniso'o chaa fariseo jnu'un un, ti ni ka kachi da:

—Keni'in chaa ja'a tachi xaan un kuankoyo, ko jiin sivi maa ja'u'u kuña'nu un (ja suni nani Beelzebú), chi yukan kuu ja yinda'a taka tachi xaan un —ni ka kachi da.

<sup>25</sup> Nu ni jini Jesús ja sia'an ka ndo'o ini chaa un, ti ni kachi ya:

—Nu iin gobiernu, na kusiin da jiin yivi da ti keja'a kanaa da naa da, ti gobiernu un tu kuñii, chi naa. Suni sia'an nuu iin ñuu xi iin familia, nu tu ka iyo iin nuu ini, ti familia un, tu kuu kunchuku mani. <sup>26</sup> Ti suni sia'an kuu nu maa ja'u'u un na keni'in tachi xaan un ki'in ja kuu ndaja'a maa. Nu sia'an na sa'a, ti ka sasiin jna'an maa, ¿ti nasa kuñii jiin jniñu ndiso un nusa?

<sup>27</sup> Ti ka ka'an ra ja ru'u keni'in ri tachi xaan un kuankoyo jiin sivi maa ja'u'u kuña'nu un. Ko sa ti sia'an kuu, ti va suni yivi ka skua'a jiin ra naa ra, va suni kuu keni'in i tachi xaan un jiin sivi maa ja'u'u un kinkoyo. Ja yukan na kachi

ri ja maa ni ra ka yuji jiin jnu'un ka ka'an ra un. <sup>28</sup> Ko ru'u keni'in ri tachi xaan un jiin jnu'un Espíritu Yandios. Yukan kuu ja, ja ni chaa jniñu ña'nu Yandios ja kuu nuu ra naa ra. <sup>29</sup> Ja sia'an, ti sa'a yo nanu ja iin ni kuu ja nu kuni yo sakui'na yo ve'e iin chaa ni'in xaan da, ti ku'ni yo chaa un xnakan, ti sa kuu sakui'na yo ja ñava'a da. Ti suni sia'an kuu ja'a chi ni kundee ri jiin chaa u'u un, ti ni keni'in ri ndaja'a da un kua'an.

<sup>30</sup> Ti na kachi ri nuu ra naa ra ja kuu yivi tu ka ka'an va'a ja'a ri, ti yivi un jito u'u i ru'u. Yivi tu kejna'an jiin ri, jachanuu i yivi ka kuni kejna'an jiin ri.

<sup>31</sup> Ja yukan kuu ja na kachi ri nuu ra naa ra ja iyo jnu'un ka'nu ini Yandios ja kuu yivi ka sa'a tako nuu kuachi. Sumi nuu yivi ka ka'an ndeva'a, vatu ni kuanka'nu ini Yandios nuu i. Ko yivi yisikinchaa Espíritu Santo, jankivi kuanka'nu ini Yandios nuu i. <sup>32</sup> Ti sava'a ni ga yivi na ka'an ndeva'a ni ga siki ri, ti kuanka'nu ini ri nuu i. Ko nu nau ja na ka'an ndeva'a siki Espíritu Santo, tukaa ga iyo jnu'un ka'nu ini, ni nuu ñuyivi ja'a ni nuu inga ñuyivi ja kii inga kuya —ni kachi Jesús.

### *Jiin nde'e yujnu un nakuni yo na yujnu kuu (Mt. 7.17-20; Lc. 6.43-45)*

<sup>33</sup> Siin Jesús ka'an ya, ti ni kachi ya:

—Nu iin yujnu va'a, ti kua'a nde'e va'a. Ti nu iin yujnu kue'e kuu, ti suni nde'e kue'e kua'a. Jiin nde'e un, ti sa nakuni yo naa nuu yujnu kuu. <sup>34</sup> Yukan na kachi ri ja ka kuu ra nanu koo xaan jiin se'e ti, chi ndeva'a xaan ka sa'a ra. Ti tu kuu ka'an ra iin jnu'un va'a, chi maa ra tu va'a ini ra naa ra. Ti yu'u ra chi ka ka'an nava ndo'o ini aña ra. <sup>35</sup> Chaa va'a un chi ka'an da iin jnu'un kuajniñu, chi iyo ndoo aña da. Ti chaa ka sa'a ndeva'a un, chi ka'an ndeva'a kuiti da, chi tu iyo ndoo ini aña da. <sup>36</sup> Ti na kachi ri nuu ra ja nu na jaa kivi chaa juicio, ti kivi jña, ti tendi'i yivi nakua'a i jnu'un nuu takaa jnu'un ndeva'a ni kee yu'u i ja ni ka ka'an i un. <sup>37</sup> Ti siki jnu'un ka'an ra, ti kendo va'a ra. Ti suni jiin jnu'un ka'an ra un, jna'nun ndatu ra —ni kachi Jesús.

### *Chaa fariseo ka jikan da iin jniñu ña'nu (Mr. 9.12; Lc. 11.29-32)*

<sup>38</sup> Yukan na ti ni ka kachi uu chaa fariseo jiin chaa ka xna'an ley un nuu Jesús:

—Maestro, ka kuni na ja sa'a ni iin jniñu ña'nu ja na nde'e na —ni ka kachi da.

<sup>39</sup> Ti ni kachi Jesús:

—Taka yivi ja tu ka kuni kuandatu i nuu Yandios, ka kuni i ja na sa'a ri iin jniñu ña'nu nuu i, ko jankivi sa'a ri jniñu ña'nu un, chi niñi jiin vanuxii nundo'o ni jna'an Jonás, chaa ni kuu profeta na jana'an, yukan ni kuu ja xna'an ri. <sup>40</sup> Chi nanu ni kundee profeta Jonás uni nduu ti uni jakuua chii iin cháká ka'nun xaan, ti suni sia'an ru'u, maa Se'e Yivi Ñuyivi, kendo ri chii ñu'un un uni nduu ti uni jakuua. <sup>41</sup> Ti siki ñuu Nínive nuu ni ja'an profeta Jonás, ti yivi ni kunchuku ñuu un, nandoto i kivi na chaa juicio ja xndichi ya yivi kivi vijna, ti naa ini i nde'e i nuu yivi kivi vijna. Chi tendi'i yivi Nínive ni ka nakani ini i na ni ka'an profeta Jonás jnu'un Yandios. Ko ru'u vi'i ga kuña'nu ri ja kuu Jonás, ti ro'o naa ra tu ka chunso'o ra ja nakani ini ra naa ra.

<sup>42</sup> Suni iin ña'an ni kuu reina ja ni ta'u jniñu iin ñuu ichi sur, nandoto ña kivi nu na chaa juicio, kivi nu na xndichi ya yivi kivi vijna. Ti naa ini ña nde'e ña nuu yivi kivi vijna siki ja ni'in ini i, chi maa ña undi jika xaan ni kii ña ja ni ñunso'o ña jnu'un ndichi ni ka'an rey Salomón na jana'an. Ti vijna vi'i

ga kuña'nu ru'u ja ni kuu Salomón, ti ro'o naa ra tu ka chunso'o ra jnu'un xndaku ri nuu ra —kachi ya.

*In tachi xaan ja nandeokuñi  
(Lc. 11.24-26)*

<sup>43</sup> Siin Jesúus ka'an ya, ti ni kachi ya:

—Nu iin tachi xaan un na xndoo iin yivi, kua'an ti jikonuu nuu ñu'un ichi ja nduku nuu ndetatu. Nu tu ni'n in ti ndo'o ini: <sup>44</sup> “Na nandeokuñi ri ve'e nuu ni kundee ri un.” Ko nu ni najaat, ti jiri ja iyo nuña ini chaa un nanu iin ve'e iyo nuña, ja iyo ndoo, ti iyo tu'va. <sup>45</sup> Yukan na ti ki'in tachi un ti kin kuaka uxia ga tachi xaan un ja kanda vi'i ga ja kuu maa. Yukan na ti nchaa ti ndivikoyo kunchuku jiin chaa un. Yukan na ti chaa un vi'i ga nduu da ansu nava ni kaa da undi nuu. Ti suni sia'an vi'i ga koo nundo'o nuu yivi ka sa'a ndeva'a kuiti ja ka iyo kivi vijna —kachi Jesúus.

*Nana Jesúus jiin ñani ya  
(Mr. 3.31-35; Lc. 8.19-21)*

<sup>46</sup> Ni ka'an ga Jesúus jiin yivi un, ti ni jaa nana ya jiin ñani ya, ni ka kendo da fuera ti ka kuni da ka'an da jiin Jesúus. <sup>47</sup> Ni ja'an iin chaa ni jan kaxjnu'un nuu ya, ti ni kachi da:

—Nana ni jiin ñani ni ka'iin da fuera un, ti ka kuni ka'an da jiin ni —ni kachi da.

<sup>48</sup> Ti ni kachi ya jiin chaa un:

—Nau kuu nana ri ti nau ja kuu ñani ri —kachi Jesúus.

<sup>49</sup> Yukan ti ni xna'an ya nda'a ya nuu taka ndaja'a ya, ti ni kachi ya:

—Ja'a ka kuu nana ri jiin ñani ri. <sup>50</sup> Chi vasu sava'a ni ga yivi nu na sa'a i taka jniñu ta'u Tata ri ja kancha ya andivi, ti yukan kuu nana ri, ñani ri jiin kua'a ri —ni kachi ya.

*Jnu'un iin chaa saka triu  
(Mr. 4.1-9; Lc. 9.4-8)*

## 13

<sup>1</sup> Kivi un ni kee Jesúus ve'e un kua'an ya, ti ni nukoo ya yu'u lago Galilea un.

<sup>2</sup> Ti kua'a xaan yivi ni ka kututu nuu ya. Yukan ti ni kivi ya ini iin barco, ni kivi ya ini nducha un, ti tendi'i yivi un ni ka kendo nuu ñiti yu'u nducha un.

<sup>3</sup> Yukan ti ni xna'an ya nuu yivi un sia'an, ni kachi ya:

—In chaa jitu triu ni kenda da kuan saka da triu.

<sup>4</sup> Ti nuu kua'an da jacha da triu un sava triu un ni ka nukoyo ini ichi, ti ni ka chakoyo saa un naa ti, ti ni ka nastutu ti. <sup>5</sup> Uu ga triu un ni ka jinu nuu yuu nuu kanchuku yaxin ñu'un, ti ni jinu triu un, chi ni ni'in kajin. <sup>6</sup> Ti nu ni kaña ndikandii, ti ni kuu ni'n xaan, ti ni ka ichi triu un, chi tu ni ni'in yo'o. <sup>7</sup> Sava ga triu un ni ka jinu nuu yi'i yo'o nu'iñu. Ti nu ni kaña numa nu'iñu un, ti ni ka jasi nuu triu un. <sup>8</sup> Ko sava ga triu un ni ka jinu i nuu yi'i ñu'un va'a, ti ni kaña triu un ti ni ja'nu, ti va'a xaan ni kuu. Sava yoko triu un ni nakua'a iin ciento triu nuu iin triu tata. Uu ga ni ka nakua'a uni xiko triu, ti uu ga oko uxi. <sup>9</sup> Ti nau ro'o na kuni chunso'o, ti chunso'o va'a jnu'un ka'an ri —kachi ya.

*Xndaku Jesúus jnu'un ni ka'an ya un  
(Mr. 4.10-12; Lc. 8.9-10; 10.23-24)*

<sup>10</sup> Yukan ni ka tu'va ndaja'a Jesúus nuu ya, ti ni ka jikajnu'un da:

—¿Ndoo ka'an ni sia'an nuu yivi ja'a, ti ndoo kuni ka'an jnu'un un, nusa? —ni ka kachi da.

**11** Yukan ti ni kachi ya:

—Ja kuu ro'o naa ra, xna'an Yandios nuu ra naa ra nasa kuu jniñu ta'u ya, ko yívi ja'a tu kujnuni ini i nasa kuu jniñu un. **12** Ti yívi na kandixia jnu'un Yandios, ti vi'i ga ni'in jna'an i inijnuni i ja kunukuachi i nuu ya. Ko yívi ja tu kandixia, ti vi'i ga kendo i, jaku ga koo i, ansu nava ni kaa i undi nuu. **13** Ja yukan kuu ja ka'an ri jnu'un ja'a nua yívi naa i, chi vasu ka ñuso'o i jnu'un ka'an ri, ti ka nde'e jniñu sa'a ri, ko tu ka chaku ini i. **14** Ja sia'an ka sa'a i, ti yukan kundaa jnu'un ni ka'an profeta Isaías na ni kachi da:

Ro'o, vasu na kunso'o ra naa ra, ko tu chaku ini ra.

Nde'e ra jiin nduchi ra naa ra ko tu kojnuni ini ra, chi tu kuni ra.

**15** Chi yívi ni'in xaan ini ni ka nduu ini yívi ja'a, ti tu ka chunso'o va'a i.

Ti nanu ja ka ndi'yu nduchi i, chi tu ka nakuni i jandaa.

Chi ni tu ka chunso'o i, ti ni tu ka chaku ini i.

Ni tu ka xndoo i kuachi i ja ndiví i jiin ri,

ti na nama ri i.

Sia'an ni kachi profeta Isaías, kachi tutu Yandios.

**16** Ko kandichi Yandios jiin ro'o naa ra, chi ka nde'e ra jiin nduchi ra, ka jini ra jniñu sa'a ri, ti ka jiniso'o ra jnu'un ka'an ri. **17** Ti jandaa na kachi ri nuu ra naa ra ja kua'a xaan profeta ni ka kikoyo na jana'an, jiin yívi va'a un, ni ka ñukuu ini i ja kuni i taka ja ka jini ra ja'a vijna, ko tu ni ka jini i. Suni ni ka ñukuu ini i ja kunso'o i taka jnu'un ka jiniso'o ra ja'a vijna, ko tu ni ka jiniso'o i —ni kachi Jesús.

### *Xndaku Jesús nasa kuni ka'an jnu'un chaa saka triu un*

(Mr. 4.13-20; Lc. 8.11-15)

**18** Siin Jesús xndaku ya, ti ni kachi ya:

—Kunso'o naa ra nasa kuni ka'an jnu'un chaa saka triu un. **19** Yívi ka ñunso'o nasa kuu jniñu ta'u Yandios ko tu ka chaku ini i, yívi yukan ka kuu nanu triu ni jinu nua yu'u ichi un. Chi chaa ja'u'u un ti kencha taka jnu'un va'a ni chaku ini i. **20** Ti triu ni jinu nua kanchuku yaxin ñu'un nua yu'u, kuu i nanu yívi ni ka jiniso'o jnu'un ka'an ri, ni ka janta'u'i, ti ka kusii ini i jiin. **21** Ko vanuxia changa ga kuuñi ini i jiin jnu'un un, ti nu ni ka keja'a ka jito u'u yívi i ja siki jnu'un un, ti ka nakani ini i ti tukaa ga ka siin i. **22** Ti triu ni ka jinu nua yívi yo'o nu'ñu un, kuu nanu yívi ni ka chunso'o jnu'un un, ko ka ndi'i ga ini i ja kuu taka ga ja iyo nua ñuyívi ja'a, ja na kuu riku i. Ti yukan kuu ja jasi ja tu ka siin jiin jnu'un Yandios, chi tu ka kuni kuandatu i nua jnu'un ya. **23** Ko triu ni ka jinu nua ñu'un va'a un kuu nanu yívi ni ka jiniso'o, ti ni ka chaku ini i nasa kuu jnu'un Yandios, ti ka siuku i jiim. Sava i ka kuu nanu triu ni ka nakua'a iin ciento triu nua ndi iin ndi iin xini, xi uni xiko, xi oko uxi triu nua ndi iin ndi iin xini —ni kachi Jesús.

### *Jnu'un iin yuku kue'e ni kaña ma'ñu triu*

**24** Yukan ti ni ka'an tuku Jesús inga jnu'un ja'a, ti ni kachi ya:

—Nava kuu kívi yívi nda'a Yandios ja na ta'u ya jniñu nua i, kuu nanu iin chaa ni saka triu va'a nua ñu'un da. **25** Ko nua ni naa ma'na da ka kixi da, ti ni jaa iin chaa jito u'u chaa xiin jniñu un, ti ni jacha da ndikin yuku kue'e nua triu chaa un, ti kua'an da. **26** Nu ni ja'nua triu un, ni keja'a kuu yoko. Yukan ti sa ni ka jini da ja iin yuku kue'e un jiin. **27** Yukan ti ni ka ja'an muzu da, ti ni ka kaxjnu'un da nua chaa xiin triu un ja sia'an ni kuu, ti ni ka kachi da: "Taa, ¿Ansu mani triu va'a ni jacha ni nu? ¿Ti nanu ni kii yuku kue'e un nusa?" ni ka kachi da. **28** Yukan ti ni kachi chaa xiin triu un: "Va iin ñakuasun ini ni sa'a", kachi da. Ti ni ka kachi muzu un: "¿Kuni ni ja na ki'in jnu'un na yuku un nu?" ni ka kachi da. **29** Ti ni kachi chaa xiin triu un: "Tuu, chi nu na jnu'un ra yuku

un naa ra ti suni kaña triu un. <sup>30</sup> Sia, na ku'iin maa, ti undi na kua'nu triu un, ti sa na taji ri muzu ja na ki'in ka'ncha da yuku kue'e un xnaka. Ti na ka'ncha da nu'ni ti na ka'ma yo, ti sa na nastutu da triu un, ja na ndiví va'a ini ve'e ri', kachi da —ni kachi Jesús.

*Jnu'un iin ndikin lulu  
(Mr. 4:30-32; Lc. 13.13-19)*

<sup>31</sup> Ti ni siin ka'an Jesús:

—Ka'an ri iin jnu'un nasa kuu kivi yivi kua'a nda'a Yandios, ja na ta'u ya jniñu nuu i. Yukan kuu nanu iin ndikin lulu nu ni xndee yivi ti keja'a ja'nu.

<sup>32</sup> Jandaan kuu ja kuu iin ndikin lulu ga ja kuu taka ga ndikin, ko nu na kua'nu, ti yukan kuu ja kuu ka'nua xaan ga ja kuu taka ga yuku. Ti kuu nanu iin yujnu ka'nu xaan tonto nu ka ja'an saa, ti ka sa'a ti taka ti nuu nda'a yujnu un —kachi ya.

*Jnu'un levadura  
(Lc. 13.20-21)*

<sup>33</sup> Suni ni kachi ya inga jnu'un ja'a:

—Ka'an ri inga jnu'un ja nasa kuu kivi yivi kua'a nda'a Yandios, ja na ta'u ya jniñu nuu i. Yukan kuu nanu levadura ja jajniñu iin ñasi'i ja sakanaa ña jin iin bolsa yuchi, ti ja ti'li levadura un sa'a ja najinu ni tu'u yujña un —kachi Jesús.

*(Mr. 4:33-34)*

<sup>34</sup> Tijni nuu jnu'un ni jajniñu Jesús ni ka'an ya nuu yivi naa i, ti tukaa ga naa jnu'un ni ka'an ya ja kuu jnu'un un. <sup>35</sup> Yukan ni kundaa jnu'un ni ka'an profeta na ni chaa da tutu:

Xndaku ri nuu yivi jin sava'ni ga jniñu.

Sia'an ka'an ri jnu'un ja'a ja ni kendo sa'yí undi kivi ni nukoo ñuyivi.

Ni ka kachi profeta —ni kachi Jesús.

*Xndaku Jesús siki jnu'un yuku kue'e*

<sup>36</sup> Yukan ti ni kanxia'u Jesús jiiin yivi un, ti kua'an ya. Ni najaa ya ve'e. Yukan ni ka ndututu ndaja'a ya jiiin ya, ti ni ka jikajnu'un da:

—Kachi ni nasa kuni ka'an jnu'un siki yuku kue'e ni kaña nuu ñu'un un —ni ka kachi da.

<sup>37</sup> Yukan ti ni kachi Jesús jiiin da:

—Ja saka triu va'a un kuu ru'u, maa Se'e Yivi Ñuyivi, <sup>38</sup> ti ñu'un un kuu ñuyivi. Triu un kuu yivi ja yi'i nuu ta'u Yandios jniñu. Ti nanu yuku kue'e un, ka kuu yivi ja ka yi'i jiiin ja'u'u un. <sup>39</sup> Ti ñakuasun ini ja ni xndee ndikin kue'e un kuu maa ja'u'u. Ti kivi ndututu triu un kuu nanu kivi na ndi'i ñuyivi ja'a. Ti chaa ka nastutu triu un ka kuu maa ángel Yandios ja kikoyo andiví. <sup>40</sup> Ti sia'an nanu kuu jiiin yuku un ja nastutu yo ti ka'ma yo. Ti suni sia'an kuu nu na jaa kivi na naa ñuyivi. <sup>41</sup> Ko maa Se'e Yivi Ñuyivi, taji ya ángel ya kikoyo i undi nuu andiví, ti nastutu ya taka yivi ka sa'a kuachi jiiin taka yivi ndeva'a kuuti. <sup>42</sup> Ti ángel un jnaa da yivi un na kayu i nuu ñu'un. Yukan kondo'o i nundo'o, ti ku'yu yu'u i, ti na kee yi'i i jnu'un i. <sup>43</sup> Yivi na kachi Yandios ja ka kuu i yivi va'a, ti nakuaka ya i ja na kunchuku i ñuu nuu ta'u ya jniñu, ti nduña'nu i nanu ndikandii un, ja ja'a nduva ja kuu ni tu'u ñuyivi yo. Ti nu na chunso'o ra naa ra, ti chunso'o jnu'un ka'an ri ja'a —kachi Jesús.

*Jnu'un iin jajnu xu'un yisa'yí*

<sup>44</sup> Siin Jesús xndaku ya, ti ni kachi ya:

—Ka'an ri inga jnu'un nasa kuu kivi yivi nda'a Yandios ja na ta'u ya jniñu nuu i. Yukan kuu nanu iin jajnu xu'un yisa'yí chii ñu'un. Nu iin chaa na

nani'in jajnu xu'un un nuu ñuu'un inga yivi, ti nachisa'yí tuku da nuu kande un. Ti ja kusii ini da jiin ja kande un, nandeokuñi da ti xiko ndi'i da ja ñava'a da ti ki'in da, ti nakuaan da ñuu'un un —kachi Jesú.

### *Jnu'un iin yuu xiñu ja fino xaan*

**45** Siin Jesú xndaku ya, ti ni kachi ya:

—Ka'an ri inga jnu'un NASA kuu kivi yivi nda'a Yandios ja na ta'u ya jniñu nuu i. Yukan kuu nanu iin chaa yaku da nduku da yuu xiñu fino xaan. **46** Ti nuu ni ni'in da iin yuu fino xaan un ja nchaa ya'u xaan tonto ga, ki'in da ti xiko da taka ja ñava'a da, ti kuaan da yuu fino un—kachi Jesú.

**47** Siin Jesú xndaku ya, ti ni kachi ya:

—Ka'an ri inga jnu'un NASA kuu kivi yivi nda'a Yandios ja na ta'u ya jniñu nuu i. Yukan kuu nanu iin ñunu ja chunde da nuu nducha mar, ti jniñi da taka nuu cháká. **48** Nu ni chitu ñunu un, yukan na ti chaa ka jniñi cháká un tava da ñunu un yu'u mar, ti yukan nukoo da nakaji da cháká un, nasava'a da cháká va'a un ini chika da, ti sukoyo da cháká kue'e un. **49** Ti sia'an kuu jiin yivi na ndi'i ñuyivi ja'a. Chakoyo ángel Yandios ja kii undi andivi, ti sasiñ i yivi kue'e un, ti suni sasiñ i yivi ja na kachi Yandios ja ka kuu i yivi va'a. **50** Ti jnaa i yivi kue'e un ja na kayu i nuu ñuu'un, ti yukan nakani ini yivi un ti nde'e, ti ku'yu yu'u i—ni kachi ya.

### *Ti kuu iin ndajniñu ava jiin ndajniñu jaa*

**51** Yukan na ti ni jikajnu'un Jesú maa da naa da, ti ni kachi ya:

—¿Ka chaku ini ra taka jnu'un ja'a nu? —ni kachi ya.

Ti maa da ni ka kachi da:

—Ka chaku ini na —kachi da naa da.

**52** Ti ni kachi Jesú:

—Nu iin chaa xna'an ley Israel, nu na nakuni ndaa da NASA kuu nuu ta'u Yandios jniñu, ti ni kuu da nanu iin chaa xiin ve'e, ja jini da sasiñ da ndajniñu jaa, ti sasiñ da ndajniñu ava —ni kachi Jesú.

### *Tu ni ka jajnu'un yivi ñuu Nazaretya*

(Mr. 6.1-6; Lc. 4.16-30)

**53** Nu ni ndi'i ni ka'an Jesú taka jnu'un un, ni kee ya kua'an ya. **54** Ti ni najaaya ya ñuu maa ya, ti yukan ni keja'a ya na xna'an ya nuu yivi ini veñu'un Israel ñuu yukan. So ni ka naa ini yivi un, ti ni ka keja'a ka ka'an:

—¿Nanu ni jan skua'a chaa ja'a taka jnu'un un? ¿Nasa kuu ja kuu sa'a da taka jniñu ña'nun un? **55** ¿Ti ansu se'e chaa yokon yujnu un kuu chaa ja'a nu? Ti nana da kuu María. Ti ñani da ka kuu Jacobo, José, Simón jiin Judas. **56** Ti suni ja'a kanchuku kua'a da jiin yo ja'a naa yo. ¿Ko nanu ni jan skua'a chaa ja'a taka jnu'un un nusa? —kachi naa.

**57** Sia'an ni ka ndee'yivi un ya nanu iin chaa ndeva'a ni. Ja yukan kuu ja tu ni ka ndee nuu ya. Ko ni kachi Jesú jiin da:

—Taka ga yivi ka ja'a ja yivi'un iin profeta, ja ka'an da jnu'un Yandios. Ko yivi ñuu maa da, jiin yivi ini ve'e da, tu kuanta'u i maa da —kachi Jesú.

**58** Ti ja yukan kuu ja tu ni sa'a ya tijni jniñu ña'nun ñuu yukan, chi tu ni ka kandixia i ya.

### *Ni jí'lí Juan, chaa ni skuanducha*

(Mr. 6.14-29; Lc. 9.7-9)

## 14

**1** Ti kuiya un ni kuu Herodes gobernador nuu ñuu Galilea. Ti ni ni'in da jnu'un taka jniñu sa'a Jesú. **2** Ti ni kachi da jiin chaa ka kuu ndaja'a da un:

—Va nu suu Juan ja ni skuanducha un kuu, ti va ni nandoto. Ja yukan kuu ja kuu sa'a taka jniñu ña'nun —kachi da.

<sup>3</sup> Vanuxia Herodes ni jniñi da Juan, chaa ni skuanducha un, ni ju'ni da chaa jiin yo'o, ti ni chunde da chaa vekaa ja siki Herodías, ña'an ni kuu ñasi'i ñani da Felipe. <sup>4</sup> Chi Herodías ni jito u'u ña Juan un, vanuxia ni kachi da jiin Herodes:

—Tu va'a ja kuncha ni jiin ña nanu ñasi'i ni —ni kachi da.

<sup>5</sup> Ti kuni Herodes ka'ni da Juan niku, ko yu'u da yivi naa i, chi ka kandixia i ja Juan kuu iin profeta ja ka'an jnu'un Yandios. <sup>6</sup> Ko kivi ni nasa'a Herodes iin viko ja ni sinu tuku da inga kuiya da, ti ni kee se'e si'i Herodías, ni jitaja'a ña nuu yivi ni ka jakoyo ve'e da un, ti yukan ni kusii xaan ini Herodes. <sup>7</sup> Ti ni chisojnu'un da nuu ña'an lulu un ja kua'a da vasu sava'an ga ndoo na kakan ña nuu da. <sup>8</sup> Ti ña'an lulu un ja ni ka ndajnu'un ña jiin nana ña, ti ni kachi ña jiin Herodes:

—Kuni na ja kua'a ni xini Juan, chaa skuanducha un, nuu na ini iin ko'o xita —ni kachi ña.

<sup>9</sup> Yukan ti ni kukui'ya xaan ini rey Herodes, ko vanuxia ja ni chisojnu'un da nuu ña, ti suni ni ka jiniso'o yivi kanchuku jiin da un. <sup>10</sup> Ja yukan kuu ja ni ta'u da jniñu ja na kin ki'in da xini Juan naa da ini vekaa un. <sup>11</sup> Ni ka jan ki'in da xini Juan nuu iin ko'o xita, ni ka ja'a da nuu ña'an lulu un, ti ña'an lulu un ni nakua'a ña nuu nana ña.

<sup>12</sup> Yukan sa ni ka jakoyo chaa ka jikonuu jiin Juan, ni ka naki'in da yiki kuñu da, ti ni ka chunduju da chaa, ti sa ni ka jan kasjnu'un da nuu Jesús.

*Ni ja'a Jesúsj a ni yaji u'un mil yivi  
(Mr. 6.30-44; Lc. 9.10-17; Jn. 6.1-14)*

<sup>13</sup> Nu ni jini Jesús jnu'un nava ni jna'an Juan un, ti ni kendo maa iin ni ya kua'an ya jiin iin barco undi inga nuu ni kunde maa iin ni ga ya. Ko ni ka jini yivi nanu kua'an ya, ti ni ka kee i ñuu nuu kanchuku i, ti ni ka jika ja'a i kuankoyo i. <sup>14</sup> Nu ni kee Jesús ini barco un, ti ni jini ya ja, ja ni ka kututu yivi ka'iin i un, ti ni kunda'u ini ya yivi un, ti ni sa'a ya tajna tijni yivi ka ku'u ni jakoyo un. <sup>15</sup> Ko vanuxia ja kuan kuñaa, ti ni ka tu'va ndaja'a ya, ti ni ka kachi da jiin ya:

—Ja kuan ini, ti va'a ga ja na taji ni yivi ja'a na kinkoyo i ñuu ka'iin yajni ja'a, ti na kuan i ja kaji i naa i —ni ka kachi da.

<sup>16</sup> Yukan ti ni kachi Jesús:

—Tu kinkoyo yivi ja'a. Kua'a ma ra ja na kaji i naa i —ni kachi ya.

<sup>17</sup> Yukan ti ni ka kachi da jiin ya:

—Ko tukaa ga ndoo ka yinda'a na, chi u'un ni ga staa stila jiin uu chāká ni ga ka yinda'a na —ni ka kachi da.

<sup>18</sup> Yukan ti ni kachi Jesús jiin da naa da:

—Kua'a na kii nuu ri ja'a —ni kachi ya.

<sup>19</sup> Yukan ti ni ta'u ya jniñu ja na nukoo i naa i nuu icha un. Ti ni ki'in ya ndi u'un staa stila un jiin uu chāká un, ni ndakoto ya andivi, ni nakuanta'u ya nuu Yandios. Ti ni sa'a kuachi ya staa stila un, ti ni ja'a ya nuu ndaja'a ya ja na tejna'an da nuu yivi un naa i. <sup>20</sup> Tendi'i yivi un ni ka yaji, nasa ni kundee maa i. Ti ni kendoso ga staa stila un ja ni ka nastutu da, uxi uu ga chika jiin pedasu un. <sup>21</sup> Ti yivi ni ka yaji un ni ka iyo yajni u'un mil chaa, ti siin kuu ñasi'i jiin suchi kuachi.

*Jika Jesúsj nuu lago Galilea  
(Mr. 6.45-52; Jn. 6.16-21)*

**22** Yukan na ti ni ka'an Jesús jiin ndaja'a ya ja na kivikoyo da ini barco un, ti na kinkoyo da inga yu'u lago Galilea un, ni kanxia'u ya jiin yivi un naa i. **23** Nu ni ndi'i ni kanxia'u ya jiin yivi un, ti kua'an ya xini iin yuku ja na kakanta'u maa iin ni ya nuu Yandios, ko ni kande maa iin ya yuku un, ti ni kuñaa. **24** Ti barco un ja kua'an, kuu sava nuu nducha un. Yukan ti ni ndonda iin tachi sau nuu nducha un, ti ni keja'a chinda'a barco un ya yukan. **25** Nu ja kuan kuyajni ka uni jaña'an, ti ni kuyajni Jesús nuu kuankoyo ndaja'a ya jiin barco un, jika ya kuaja ya nuu nducha un. **26** Nu ni ka jini da ja jika ya nuu nducha un, ni ka yu'u xaan da, ti ni ka keja'a ka kanajin da:

—jiin ni'na kuu! —kachi da naa da.

**27** Yukan ti ni kachi Jesús jiin da naa da:

—Chunde ini naa ra, koto yu'u ra chi maa ri kuu —ni kachi ya.

**28** Yukan sa ni ka'an Pedro, ti ni kachi da jiin ya:

—Jito'yo, nu maa ni kuu, ti kachi ni ja na kuu kaka na nuu nducha ja'a, ti na jaa na nuu vaji ni —ni kachi da.

**29** Ti ni kachi Jesús:

—Ña'an nusa —ni kachi ya.

Yukan ti ni kuun Pedro nuu barco, ti ni keja'a da jika da nuu nducha un, ti kua'an da nuu vaji Jesús. **30** Ko nu ni jini da ja ni'in ndita tachi, ni yu'u da ti ni keja'a keka'nu da chii nducha un, ti ni kanajin ko'o da:

—Jito'yo, nama ni sañal! —ni kachi da.

**31** Ti ni skaan Jesús nda'a ya, ti ni jni'i ya maa da, ti ni kachi ya jiin da:

—¿Tindoo tu ñukuu ini ra ru'u? ¿Xi tu kandixia ra nusa? —ni kachi ya jiin da.

**32** Ti nu ni ka ndiivi da nuu barco un, ti ni kuna'iin tachi un.

**33** Yukan na ti chaa ka'iin ini barco un, ni ka jakunjiti da nuu Jesús, ti ni ka kachi da:

—Jandaa kuiti kuu, ja Se'e Yandios kuu ni —ni ka kachi da.

### *Sa'a Jesús tajna yivi ñuu Genesaret*

(Mr. 6.53-56)

**34** Nu ni ka jika da nuu lago Galilea un, ti ni ka jakoyo da ñuu Genesaret.

**35** Ni ka nakuni yivi un Jesús, ti ni ka jachanuu i jnu'un ni tu'u ñuu un, ti ni ka yinda'a i taka yivi ka ku'u nuu ya. **36** Ti ni ka kanda'u i jiin ya ja na kua'a ya vasu ti'li sa'ma ya na kue'e i, ti taka yivi ni ka kue'e sa'ma ya ni ka nduva'a i.

### *Nchakuachi yo jiin jnu'un ka'an yo*

(Mr. 7.1-23)

## 15

**1** Yukan ti ni ka tu'va sava chaa fariseo jiin chaa ka xna'an ley ini veñu'un Israel, ja vekoyo da undi ñuu Jerusalén, ti ni ka jikajnu'un da ya:

**2** —¿Ndoó jani ini ra ja tu ka siuku ndaja'a ra jiin jnu'un yivi jana'an, ja tu ka nanda'a da ti ka yee da staa? —kachi da naa da.

**3** Yukan ti ni jikajnu'un Jesús maa da naa da:

—¿Ti suni ndoo ka ndo'o ini ra ja ka xndoo ra jniñu ta'u Yandios, ti ka siin ga ra jiin jnu'un nava vekoyo maa ra naa ra? **4** Chi ni kachi Yandios: “Kuandatu nuu tata ra nuu nana ra.” Ti suni ni kachi ya: “Nu iin yivi na ka'an ndeva'a nuu tata i xi nuu nana i, va'a ga ja na kuñu i.” **5-6** Ti ro'o naa ra, chi ka ka'an ra ja kuu kachi iin yivi jiin tata i xi jiin nana i: “Tukaa kuu chindee na ni'in, chi taka ja ñava'a na ja ni soko na nuu Yandios.” Ti sava'a ni ga yivi na ka'an sia'an jiin nana i xi jiin tata i, chi ndo'o ini i ja tukaa ga kuu chindee ra da naa da. Ja sia'an kuu ja ro'o naa ra, tu ka chiñu'un ra jniñu ta'u Yandios, chi su'va

ni ka siin ra jiin jnu'un maa ra naa ra. <sup>7</sup> Ko jiin jnu'un ra, ka stuu ra ja tu ka chiñu'un ra jnu'un Yandios. Ti ni ka'an ndaa profeta Isaías siki ra na jana'an na ni ka'an da:

<sup>8</sup> Ko yívi ja'a, so jiin yu'u i ka chiñu'un i ru'u,  
ko añu i chi jika ka kuu ini i ka jito i ru'u.

<sup>9</sup> Ti so ka xnda'u i ja ka kandixia ndaa i jnu'un Yandios,  
chi ka siin i jiin jnu'un maa i, ti ka ka'an i ja iin ni kuu jiin jnu'un Yandios.  
Sia'an ni chaa Isaías jnu'un Yandios —ni kachi Jesús.

<sup>10</sup> Yukan na ti ni kana ya xini yívi un, ti ni kachi ya:

—Chunso'o ti chuun ini naa ra. <sup>11</sup> Ansu ja kivi yu'u yívi kuu ja sa'a ja nchakuachi i, chi su'va ja kee yu'u i ja ka'an i un, yukan sa'a ja nchakuachi i —ni kachi Jesús.

<sup>12</sup> Yukan ti ndaja'a ya un ni ka tu'va da nuu ya, ti ni ka kachi da:

—¿Jini ni ja chaa fariseo un ni ka kuu ika ini da, ni ka jiniso'o da jnu'un ni ka'an ni un? —ni ka kachi da.

<sup>13</sup> Ko ni kachi ya:

—Chaa fariseo jiin chaa ka xna'an ley Israel un ka kuu da nanu yukü ja tu ni xndee Tata ri Yandios, ya kancha andivi, ti jnu'un ya ja na ki'in ni jiin yo'o. <sup>14</sup> Sia, koto sa'a r naa ra, chi yívi un ka kuu nanu iin chaa kuaa, chi ka ja'a da ichi ki'in inga chaa kuaa. Chi nu iin chaa kuaa na kua'a da ichi ki'in inga chaa kuaa, ti ndinduu da nukoyo ini iin xa'va —ni kachi Jesús.

<sup>15</sup> Yukan na ti ni kachi Pedro jiin Jesús:

—Xndaku ni nuu yo ndoo kuni ka'an jnu'un un —ni kachi da.

<sup>16</sup> Ti ni kachi Jesús:

—¿Xi suni tu ka chaku ini tu ro'o naa ra nu? <sup>17</sup> Tu ka chaku ini ra ja iin yívi tu nchakuachi i nuu ndeyu yaji i, chi ja yaji i kua'an chii jití i, ti ndenda kua'an. <sup>18</sup> Ko ja kaña yu'u i, ja ka'an i un, chi undi ini añu i vaji, chi undi añu i ni ndo'o ñaa ini i, ti yukan kuu ja nchakuachi ga i jiin. <sup>19</sup> Chi undi añu i kuu nu vaji taka jnu'un kue'e ka ndo'o ini i. Ka kuni i ka'mi iin ndiyi. Ka kuni chaa un kusíkinchaa jna'an da i, xi kusíkinchaa da ñakuachi. Ka kuni sakui'na da, ka kuni xnda'u ña'an da xi chakuachi da yívi. <sup>20</sup> Ti taka jnu'un un kuu ja sa'a ja nchakuachi yívi naa i. Ko nu so ja tu siuku yo jnu'un jana'an ja tu nanda'a yo, ti kee yo staa, tu nchakuachi yo —kachi Jesús.

### *In ña'an sirofencia kanda'u ña jiin Jesús (Mr. 7.24-30)*

<sup>21</sup> Ni kee Jesús yukan, ti kua'an ya ichi ñuu Tiro jiin ñuu Sidón. <sup>22</sup> Ti yukan kancha iin ña'an ñuu Canaán, ni chaa ña nuu Jesús, ti kana ko'o ña ka'an ña:

—Jito'yo, ni'in ja kuu ni se'e rey David na jana'an, kunda'u ini ni saña! Chi se'e si'i na jna'an i iin tachi xaan, ti ndo'o xaan i jiin kue'e un —ni kachi ña.

<sup>23</sup> Ko Jesús, tu ni ka'an kuití ya. Ti ni ka kachi ndaja'a ya jiin ya:

—Ka'an ni jiin ña na ki'in ña, chi kana ko'o ña vaji ña ichi jata yo —ni ka kachi da.

<sup>24</sup> Yukan ti sa ni ka'an Jesús:

—Ni taji Yandios ru'u vaji ri, ja na nama ri yívi nación Israel, ja ni ka sana i ka jika i nanu riñi ni skuita jito'o ti —kachi ya.

<sup>25</sup> Ko ni tu'va ña'an un undi nuu Jesús, ti ni kachi ña:

—Jito'yo, chindee ni saña —ni kachi ña.

<sup>26</sup> Yukan ti ni kachi Jesús:

—Tu va'a ja kenchaa yo staa yu'u se'e yo, ti kua'a yo nuu ina —ni kachi ya.

<sup>27</sup> Ko ni kachi ña'an un:

—Jandaa ka'an ni Jito'yo, ko ina un chi ka nachii ti staa kuachi nukoyo yu'u mesa jito'o ti —ni kachi ña.

**28** Yukan na ti ni kachi Jesús jiin ña:

—Ro'o ja kuu ra ñasi'i, xaan va'a ja ni kandixia ndaa ra ru'u, ti na kuu nava kuni ra —ni kachi ya.

Ti yukan, ni nduva'a ni se'e si'i ña un.

### *Ni sa'a Jesús tajna yivi kajna'an tijni nuu kue'e*

**29** Ni kee Jesús yukan, ti ni ya'a ya yu'u lago Galilea, ti ni kaa ya, kua'an ya yuku un, ti yukan ni nukoo ya. **30** Ti kua'a xaan yivi ni ka jnacoy o nuu kancha ya un, ni ka jakoyo i jiin yivi ni ka jna'an kue'e jiy'i, yivi kuaa, yivi ñi'in, suni yivi ja tu si'in xi tu ndaa'a, jiin tijni ga yivi ka jna'an inga kue'e, ni ka jakoyo i nuu Jesú s. Ti tendi'i yivi un ni sa'a ya tajna i. **31** Yukan ti ni ka naa ini yivi un, chi ja kandoka'an yivi ñi'in, ka ndoo kaka va'a yivi ni ka jna'an kue'e jiy'i, ka ndundijin nduchi yivi kuaa. Ti ka naa ini yivi un ja sia'an ni kuu, ti ni ka keja'a ka nakanajaa i Yandios ja ndito ya yivi nación Israel, ti ni ka ka'an i:

—Va'a xaan ini Tata yo Yandios, chi jito ya yivi nación Israel! —ni ka kachi i.

### *Ni skaji Jesús vi'i ga kuun mil yivi (Mr. 8.1-10)*

**32** Yukan ti ni kana Jesús ndaja'a ya, ti ni kachi ya jiin da naa da:

—Kunda'u ini ri yivi ja'a, chi ja ni kuu uni kivi ka'iin i ja'a jiin ri. Ti tundo kaji yi, ti tu kuni ri ja nataji ri sia'an ni, nukoyo i ve'e i, chi sa sandau kuita i ichi nukoyo i —ni kachi ya.

**33** Yukan ti ni ka kachi ndaja'a ya un:

—¿Ti nanu ni'in yo ja kaji yivi kua'a ja'a ja tu naa ve'e iyo nuu ka'iin yo ja'a? —ni ka kachi da.

**34** Ti ni jikajnu'un Jesús maa da naa da:

—¿Nasa ga staa stila ka ñava'a ra naa ra? —ni kachi ya.

Yukan ti ni ka kachi da:

—Uxia staa stila ti jaku ni ga cháká kuachi —ni ka kachi da naa da.

**35** Yukan na ti ni kachi Jesús ja na nukoo yivi un naa i. **36** Ni ki'in ya ndi uxia staa stila un jiin cháká kuachi un, ti ni nakuenta'u ya nuu Yandios. Ni sakuchi ya staa stila un, ti ni ja'a ya nuu ndaja'a ya, ti chaa un ni ka tejana'an da nuu yivi naa i. **37** Tendi'i yivi un ni ka yee i undi ni ka chitu chii i. Ti ni kendoso ga staa stila un, ti ni ka nastutu tuku da uxia chika na'nú. **38** Ti yivi ni ka yee un ni ka iyo kuun mil chaa, ti siin kuu ñasi'i jiin suchi kuachi. **39** Yukan ti sa ni kanxia'u Jesús jiin yivi un, ti ni ndivi ya nuu barco, ti kua'an ya ichi ndañuu Magdala.

### *Chaa fariseo jiin chaa saduceo ka jikan da iiñjniñu ña'nu (Mr. 8.11-13, Lc. 12.54-56)*

## 16

**1** Yukan ti ni ka ja'an chaa fariseo jiin chaa saduceo ni ka jande'e da Jesús, ja ka nduku da nasa kuu kankuachi'da siki ya. Ti ni ka jikan da nuu ya ja na sa'a ya iiñjniñu ña'nu ja vaji nuu Yandios, ya kancha andivi. **2** Ti ni kachi ya jiin chaa un naa da:

—Ro'o naa ra, chi sia'an ka ka'an ra: “Na ndii ijña chi ni nakuchi kua'a viko”, ka kachi ra. **3** Ti ja kuu jaña'an ka ka'an ra naa ra: “Vijna ti kuun sau chi iña viko kua'a ichi nuu vekaña ndikandii”, ka ka'an ra. Chaa ñaa xini ka kuu ra chi ka jini va'a ra seña ja'a viko nuu andivi un, ko tu ka chaku ini ra nau ja kuu ru'u, ja sa'a ri taka jniñu ña'nu ja'a kivi vijna naa ra. **4** Ja kuu kivi

vijna ka iyo kua'a yivi ka sa'a ndeva'a ja tu ka jandatu i nuu Yandios. Ti ka kuni i ja na sa'a ri iin jniñu ña'nu nuu i, ko jankiví sa'a ri iin jniñu ña'nu un nuu i, chi nini jiin vanuxii nundo'o ni jna'an Jonás, chaa ni kuu profeta na jana'an—ni kachi ya.

Yukan ti ni xndoo ya yivi un, ti kua'an ya.

*Jnu'un ka ka'an chaa fariseo  
(Mr. 8.14-21)*

<sup>5</sup> Ja ni ka ya'a ndaja'a ya inga nuu yu'u lago un, ko ni ka naa ini da kunda'a da staa stila. <sup>6</sup> Yukan ti ni kachi Jesús jiin da naa da:

—Nde'e naa ra, koto ra maa ra jiin jnu'un ka ka'an chaa fariseo jiin jnu'un un ka ka'an chaa saduceo, chi yachi xaan jichanuu nanu keni'no levadura chii yujña staa stila —ni kachi ya.

<sup>7</sup> Yukan ti ni ka keja'a ndaja'a ya un ka ndajnu'un maa da:

—Siki ja tu ni ka yinda'a yo staa stila kuu ja ka'an ya —kachi da naa da.

<sup>8</sup> Ko ja ni jini Jesús ndoo ka ndajnu'un da, ti ni kachi ya:

—¿Ndoo ka ndajnu'un ra ja tu ka ndiso ra staa stila naa ra? ¿Xi tu ka ñukuu ini ra ja ni'in yo staa stila kaji yo nu? <sup>9</sup> ¿Va nu tu ka chaku ini ra, xi tu ka na'an ra na ni tejna'an ri u'un staa stila ni ka yaji vi'i ga u'un mil yivi un nu? ¿Ti nasa ga chika ni ka nastutu ra nusa? <sup>10</sup> ¿Xi ni tu ka na'an ra na ni tejna'an ri uxia staa stila ni ka yaji vi'i ga kuun mil yivi un naa i nu? ¿Ti nasa ga chika ni ka nastutu ra un nu? <sup>11</sup> ¿Ti ndoo tu ni ka chaku ini ra, ja ru'u tu ni ka'an ri siki staa stila na ni kachi ri ja koto ra maa ra naa ra jiin levadura chaa fariseo jiin chaa saduceo yukan nu? —ni kachi ya.

<sup>12</sup> Yukan sa ni ka chaku ini da ja Jesús tu ni ka'an ya siki levadura staa stila un, chi su'va ni ka'an ya siki jnu'un ka xna'an chaa fariseo jiin chaa saduceo yukan.

*Ni kachi ndaa Pedro ja Jesús kuu Cristo  
(Mr. 8.27-30; Lc. 9.18-21)*

<sup>13</sup> Nu ni jaa Jesús ñuu Cesarea ja kuu iin ndañuu Filipo, ti ni jikajnu'un ya ndaja'a ya, ti ni kachi ya:

—¿Ndoo ka ka'an yivi ja nau kuu ru'u, ja kuu ri maa Se'e Yivi Ñuyivi? —sia'an ni kachi ya.

<sup>14</sup> Yukan ti ni ka kachi da:

—Sava yivi ka ka'an ja kuu ni Juan ja ni skuanducha un. Sava ga ka ka'an ja maa ni kuu profeta Elías ni kii na jana'an. Ti sava ka ndaku ni'in ja maa ni kuu Jeremías xi inga profeta ja ka'an jnu'un Yandios —ni ka kachi da.

<sup>15</sup> Yukan ti ni kachi ya jiin da naa da:

—Ti ro'o naa ra, ¿nau ja ka ndo'o ini ra ja kuu ri? —ni kachi ya.

<sup>16</sup> Ti Simón Pedro ni kachi da:

—Maa ni kuu Cristo, ja ni taji Yandios ja ta'u ni jniñu ña'nu. Ti kuu ni Se'e maa Yandios chaku —ni kachi da.

<sup>17</sup> Yukan ti ni kachi Jesús jiin Pedro:

—Ro'o Simón, se'e yii Jonás, kancha Yandios jiin ra chi ni iin yivi tu ni xndaku un nuu ra, chi Tata ri, ya kancha andiví kuu ja ni ka'an inijnuni ra.

<sup>18</sup> Ti ru'u na kachi ri ja maa ra kuu Pedro, ja kuni ka'an “iin yuu”, ti jiin yuu ka'nu ja'a keja'a nastutu ri sava'ani ga yivi taká nación, ja na kandixia i ru'u. Yukan kuu jniñu kin sa'a ri jiin yuu ja'a. Ti ja'u'u un tu kundee kuti jiin jniñu ta'u ri. <sup>19</sup> Chi tatu ri iin jniñu ro'o. Ro'o kuu nanu iin ndakaa ja jajniñu yo ja kuiña yo ti nakaso yo yux'e. Ti jniñu ra kuu ja na kuiña ra yux'e' ñuu nuu ta'u Yandios jniñu. Chi kuiña ra ichi ya ja kuu yivi taká nación, ja na xndaku ra

jnu'un ri nuu i nasa kaa ichi Yandios. Ti yiví kandixia, ti ndiví i nda'a Yandios jin̄ñu nuu nuu ta'u ya jniñu. Ko yiví tu kandixia jnu'un ri, ti kasi ra yux'e' eñuu nuu ta'u Yandios jniñu ja kuu yiví un, chi tu ni ka chu'un ini i. Ti taka jniñu va'a sa'a ra nava na kendo va'a nuu Yandios —ni kachi Jesús jiin Pedro.

<sup>20</sup> Yukan na ti ni kachi Jesús jiin ndaja'a ya ja koto ma kani kutí da jnu'un nuu yiví ja maa ya kuu Cristo, ja ni taji Yandios ja ndiso ya jniñu ña'nú.

*Ka'an Jesús ja kuū ya  
(Mr. 8.31-9.1; Lc. 9.22-27)*

<sup>21</sup> Undi sa ni keja'a Jesús ni xndaku ya nuu ndaja'a ya, ja nini kuu ja ki'in ya Jerusalén, ti chaa ka kuña'nu ka iyo nación Israel, jiin sutu ka kuña'nu, jiin chaa ka xna'an ley ini veñu'un un, tu kuajnu'un da ya, chi su'va kua'a da nundo'o kondo'o ya, ti ka'ni da ya. Ko nu uni kiví ti nandoto ya nuu ñuji'i un.

<sup>22</sup> Yukan ti ni kana siin Pedro ya, ti ni kachi da jiin ya:

—Jito'yo, ¡Koto kua'a Yandios jnu'un ja koto ni nundo'o un! —ni kachi da.

<sup>23</sup> Ni ndeokoto Jesús nuu Pedro, ti ni kachi ya:

—Kuxio ki'in ra, chi ka'an ra nanu chaa u'u un, ja so sakanuu ra ini ri. Chi ro'o tu ndo'o ini ra ja na siuku ri nava kuni maa Yandios, chi ro'o ndo'o ini ra nava ka ndo'o ini yiví ñuyiví ja'a —kachi Jesús.

<sup>24</sup> Yukan na ti ni kachi Jesús jiin ndaja'a ya:

—Nu nau yiví ka kuni kundikun ru'u, ja na siuku jnu'un ka'an ri, ti na xndoo i ja ka ndo'o ini i, ti na tava ini i ja na kondo'o koo nene i vasu na kuu i ja siki ru'u. <sup>25</sup> Chi yiví ka ndiyo ini ja kunchuku va'a i nuu ñuyiví ja'a, ja tu ka kandixia i jnu'un ri, ti xnaa i maa i nuu Yandios. Ko yiví na kondo'o koo nene i ja siki ru'u, ti su'va na ni'in ta'u i ja na kunchuku i andiví ja kuu saa ni.

<sup>26</sup> Chi tundo ni'in kutí iin yiví vasu na kundee i ni'in i taka ja iyo nuu ñuyiví ja'a, ti xnaa i añu i nuu Yandios. ¿Xi ka jani ini ra ja chunaa yiví un nuu añu i nu? <sup>27</sup> Jaa iin kiví ti nchaa tuku ri, ja kuu ri maa Se'e Yiví Ñuyiví. Ti nduña'nu xaan ga jniñu ndiso ri nanu kuu maa Tata ri Yandios, ti nchaa ri jiin ángel ri ja ka janukuachi nuu maa ya. Yukan na ti cha'u ri nuu ndi iin ndi iin yiví nasa kaa jniñu ni ka sa'a maa i. <sup>28</sup> Ti ja kuu kiví yukan, na kachi ndaa ri ja ka iyo sava ro'o ka'iin ja'a kuchaku ga ra, ti kuni ra nchaa ru'u, ja kuu ri maa Se'e Yiví Ñuyiví. Ti nchaa ri jiin iin jniñu ña'nú xaan ga, ja undi vijna tu ka jini ra —ni kachi Jesús.

*Ni nasama Yandios nuu Jesús  
(Mr. 9.2-13; Lc. 9.28-36)*

## 17

<sup>1</sup> Nu iñu kivi ti kua'an Jesús jiin Pedro, Jacobo, jiin Juan ñani Jacobo, ti ni ka kaa da xini iin yuku sukun ga. <sup>2</sup> Ti yukan ni ka jini da ja ni nasama nuu ya. Ti taja ii nuu ya nanu ndikandii, ti sa'ma ya ni ndukiyí xaan nanu nduva ndikandii. <sup>3</sup> Ti yukan ni ka ndenda uu chaa ni ka kuña'nu ga nuu nación Israel na jana'an ni nani Moisés, ti inga chaa un ni kuu profeta Elías, ti ka ndajnu'un da jiin Jesús.

<sup>4</sup> Yukan ti ni kachi Pedro jiin Jesús:

—Jito'yo, xaan va'a ja ka'lín yo ja'a. Nu kuni ni ti na sa'a na uni ve'e kuachi kunchuku yo, iin kuu ni, inga na kuu Moisés, ti inga na kuu Elías —ni kachi da.

<sup>5</sup> Ni ka'an ga Pedro sia'an, ti ni jakava iin viko nu'un xkiyi siki da naa da. Ti nuu viko un ni ka'an iin ndusu sia'an:

—Ja'a kuu Se'e ri ja kunda'u ini ri, ti kusii ini ri jiin. Ti chunso'o jnu'un ka'an ya —kachi.

<sup>6</sup> Nu ni ka jiniso'o ndaja'a ya jnu'un un, ti ni ka jankava ndee da undi nuu ñu'un, chi ni ka yu'u xaan da. <sup>7</sup> Yukan ti ni tu'va Jesúus nuu da naa da, ni skanda ya da, ti ni kachi ya:

—Ndokuñi, koto ma yu'u ra naa ra —ni kachi ya.

<sup>8</sup> Ti ni ka nde'e da, ko tukaa ga ndoo ni ka jini da, ni iin chaa un. Tukaa ga ndoo iyo, chi maa iin ni ga Jesúus kandichi ya.

<sup>9</sup> Ti nu ni ka nandee da xini yuku un kuankoyo da, ni ta'u Jesúus jniñu sia'an nuu da:

—Koto kani ra jnu'un nuu ni iin yivi ja sia'an ni ka jini ra, undi na jaa kivi na nandoto ru'u, ja kuu ri maa Se'e Yivi Ñuyivi —kachi Jesúus.

<sup>10</sup> Yukan na ti ni ka jikajnu'un ndaja'a ya un maa ya, ti ni ka kachi da:

—¿Ti ndoo ka ka'an chaa ka xna'an ley un, ja xnakan Elías chaa nu? —kachi da naa da.

<sup>11</sup> Ti ni kachi Jesúus:

—Jandaa kuu ja xnaka Elías kii, ti satu'va da yivi naa i, <sup>12</sup> ko na kachi ri nuu ra ja, ja ni kii Elías, ko tu ni ka nde'e da nuu da, chi ni ka sa'a da nava ni ka kuu ini da jiin da. Ti ru'u, ja kuu ri maa Se'e Yivi Ñuyivi, suni sia'an kondo'o ri nda'a chaa un naa da —ni kachi Jesúus.

<sup>13</sup> Yukan ti ni ka chaku ini ndaja'a un ja ni ka'an ya jnu'un Juan, chaa ni skuanducha un.

### *Sa'a Jesúus tajna iin chaa lulu ji'i yivi*

(Mr. 9.14-29; Lc. 9.37-43)

<sup>14</sup> Nu ni ka nchakoyo da nuu ka'iin uu ga ndaja'a jiin yivi kua'a un, ti iin chaa un ni tu'va da nuu Jesúus, ni jakunjiti da nuu ya, ti ni kachi da:

<sup>15</sup> —Jito'yo, kunda'u ini ni nuu se'e yi'i na, chi jna'an i kue'e ji'i yi'i xaan tonto. Ti tijni jinu nduva i nuu ñu'un, ti kana kava i ini nducha. <sup>16</sup> Ti ja'a yinda'a na i nuu ndaja'a ni, ko tu ka kujnuni ja sa'a da jiin yi —ni kachi da.

<sup>17</sup> Ti ni kachi Jesúus nuu tendi'i yivi un:

—Xaan ga tu ka kandixia ra jniñu sa'a Yandios. Xaan ga ni'in ini ra naa ra ja tu ka jandatu ra nuu Yandios. ¿Nasa ga ti sa kandixia ra naa ra, ja sia'an ni'in ini ra? Ti ja ni kujna'an ja ndo'o nene ri ja siki ro'o naa ra. Chaan ni chaa lulu jña, na kii da ja'a naa ra —ni kachi Jesúus.

<sup>18</sup> Yukan ti ni nduxaan ni'in ya nuu tachi xaan un, ti yukan ni kendava ni kua'an. Ti yachi ni ni nduva'a chaa lulu un. <sup>19</sup> Ko nu ni kuu nuu ga, ni ka jikajnu'un ndaja'a ya un maa ya:

—¿Ndoo tu ni kuu keni'in na tachi xaan un ki'in naa na? —ni ka kachi da.

<sup>20</sup> Ti ni kachi Jesúus:

—Siki ja tu ka iyo ni ini ra naa ra ja ka kandixia ni ini ra Yandios. Ti na kachi ndaa ri nuu ra naa ra, ja nu na kandixia ra Yandios, vasu iin ti'lli, ku'va iin ndikin lulu, ti nu sia'an na, ti kachi ra jiin yuku ja'a: "Kuxio ja'a ti kua'an undi yukan", kachi ra jiin. Yukan ti kuxio ki'in. Ti nu sia'an na kandixia ra Yandios, ti taká ni ga kuu sa'a ra, chi tu iyo ni iin jniñu ja kendo sia'an ni, nu ni ini yo na sa'a yo. <sup>21</sup> Ko iin tachi xaan nanu sia'an, tu kendava kuti ki'in nu tu kakanta'u yo, ti koo ndicha ini yo —ni kachi ya.

### *Inga kivi ni ka'an tuku Jesúus ja kuü ya*

(Mr. 9.30-32; Lc. 9.43-45)

<sup>22</sup> Ni ka jikonuu Jesúus jiin ndaja'a ya ñuu Galilea, ti kachi ya ja maa ya, ja kuu ya Se'e Yivi Ñuyivi, iyo iin ndaja'a ya ja nakua'a da ya nuu nda'a chaa ka

jito u'u ya. <sup>23</sup> Ti ka'ni yivi un ya, ko nu uni kivi ti nandoto tuku ya. Nu ni ka jiniso'o ndaja'a ya jnu'un un, ti ni ka kukui'ya xaan ini da naa da.

### *Chaa ka kinya'u puesto nuu veñu'un Israel*

<sup>24</sup> Nu ni jaa Jesús jiin ndaja'a ya ñuu Capernaum, ti ni ka ja'an chaa ka kinya'u puesto nuu veñu'un ka'nu Israel un, ti ni ka jikajnu'un da Pedro sia'an:

—¿Tu cha'u maestro ra puesto da ja kuu nuu veñu'un yo nu? —ni ka kachi da.

<sup>25</sup> Yukan ti ni kachi Pedro:

—Kuu —ni kachi da.

Yukan ti nu ni ndivi Pedro ini ve'e. Ti xnakan maa ya ni ka'an, ti ni jikajnu'un da Pedro:

—¿Nasa ndo'o ini ra, ro'o Simón? ¿Nau nuu yivi kinya'u chaa ka kuu rey nuu ñuyivi ja'a, nuu yivi ñuu da xi nuu yivi inga ñuu nu? —ni kachi ya.

<sup>26</sup> Ti ni kachi Pedro:

—Nuu yivi inga ñuu —ni kachi da.

Yukan ti ni kachi Jesús:

—Nusa, ti tu ka cha'u maa yivi ñuu da. <sup>27</sup> Ko ja nava tu kuti ini yivi naa i, kua'an yu'u mar un, ti chunde ra yo'o jiin skanchu ra nuu nducha un, ti tava ra iin chāká ja kenda undi nuu un. Ti ndata yu'u ti, ti yukan ni'in ra iin xu'un, ti cha'u ra nuu da ja kuu nuu maa ri, jiin ja kuu nuu maa ra —ni kachi Jesús.

### *Nau kuu ja kuña'nu ga (Mr. 9.33-37; Lc. 9.46-48)*

## 18

<sup>1</sup> Ti yukan ni ka tu'va ndaja'a Jesús nuu ya, ti ni ka jikajnu'un da ya:

—¿Nau kuu ja kuña'nu ga ja kuu nuu ta'u Yandios jniñu nusa? —ni ka kachi da.

<sup>2</sup> Yukan ti ni kana Jesús iin suchi lulu, ni jani ya suchi un ma'lñu da naa da,

<sup>3</sup> ti ni kachi ya:

—Na kachi ndaa ri ja nu tu nakani ini ra naa ra, ja inijnuni ra na nduu vita ini ra nanu iin suchi lulu ja'a, ni tu ndivi kuiti ra ñuu nuu ta'u Yandios jniñu.

<sup>4</sup> Ja yukan kuu ja yivi ka kuña'nu ga nuu ta'u Yandios jniñu, ka kuu i nanu iin suchi lulu ja'a. <sup>5</sup> Jiin jniñu ndiso ri na kachi ri ja nu na kunda'u ini ra iin suchi lulu sia'an, ti ja ni kuu ra iin yivi ni janta'u ru'u —ni kachi Jesús.

### *Ja sa'a ja kunchakuachiyo (Mr. 9.42-48; Lc. 17.1-2)*

<sup>6</sup> Siin Jesús ndaku ya, ti ni kachi ya:

—In nundo'o ka'nu xaan kundatu yivi nu na xndau'i i iin suchi lulu sia'an, ja tu kandixia i ru'u. Va'a ga nu na kundikun sukun i jiin iin yoso molino, ti na ki'in i chii nducha lago un. <sup>7</sup> Xaan ga nda'u yivi ñuyivi ja'a ja jiin kuachi maa i ka nukoyo uu ga yivi nuu kuachi. Ti sia'an ka sa'a i, ko na nda'u ga yivi ka sa'a sia'an. <sup>8</sup> Ti nu iyo iin ja kuni sa'a ja na kanakava ra nuu kuachi, nu nda'a ra xi ja'a ra kuu ja kuni sa'a un, ka'ncha na ki'in. Chi va'a ga nu ku'l'u ra na najaa ra nuu ta'u Yandios jniñu, ti ansu ja na najaa ndi'i ra jiin ja'a ra jiin nda'a ra, ti ki'in ra nuu infiernu. <sup>9</sup> Ti nu nduchi ra kuu ja sa'a ja na kanakava ra nuu kuachi, tava ti skaña ra na ki'in. Chi va'a ga ja na najaa ra nuu ta'u Yandios jniñu jiin iin ni nduchi ra, ti ansu ja najaa ra jiin ndiinduu nduchi ra, ti ki'in ra nuu infiernu —kachi ya.

*Jnu'un iin ri, kit ni sana  
(Lc. 15.3-7)*

**10** Siin Jesús xndaku ya, ti ni kachi ya:

—Koto skexico ra nuu iin iin suchi kuachi ja'a naa ra. Chi na kachi ri ja ángel maa i, kancha andívi ti ndito i suchi, ti ka'an i ja'a suchi un ja kuu nuu Yandios. **11** Chi na kachi ri ja ru'u, ja kuu ri maa Se'e Yívi Ñuyivi, ni chaa ri ja na nama ri taka yívi ni ka sana i ka jika i nuu ñuyivi ja'a.

**12** Na kachi ri ja nasa ka ndo'o ini ra siki iin jnu'un ja'a. Nu iin chaa ñava'a iin ciento ri, ti skuita da iin ti. ¿Xi tu xndoo da ndí'i kuun xiko xia'an kuun ga kití un, ti ki'in nunduku da kití ni sana un undi yuku un nu? **13** Ti nu ni nani'in da ti, ti jandaa kuu ja kusii xaan ga ini da jiin kití un, ti ansu jiin ndí'i kuun xiko xia'un kuun ga rii un. **14** Ti suni sia'an kuu nuu Tata ra Yandios ja kancha ya andívi, chi tu kuni ya ja na naa ni iin suchi kuachi sia'an —ni kachi Jesús.

*Nasa kuanka'nu ini yo nuu ñanijna'an yo  
(Lc. 17.3-4)*

**15** Siin Jesús ka'an ya, ti ni kachi ya:

—Nu na sa'a ndeva'a ñani ra jiin ra, kua'an maa ni ra ti ndajnu'un ra jiin da siki ja ni sa'a da un. Ti nu ni janta'u da jnu'un ka'an ra ja ni nakuni da falta da, yukan na ti ja ni ndumani ra jiin da. **16** Ko nu tu janta'u da jnu'un ka'an ra, ti kana iin xi uu ga yívi ja na kujiin yi jiin ra, nava jiin jnu'un ka'an uu xi uni ga testigo un, ti na ndundaa jnu'un un. **17** Ti nu tu chu'un so'o da nuu jnu'un ka ka'an testigo un, yukan na ti kasjnu'un nuu taka ga yívi ka kandixia un nu ka ndututu i ka skua'a i. Ti nu suni tu ni janta'u da jnu'un ka ka'an yívi ni ka ndututu un, yukan na ti sia da na ki'in maa da, chi ni kuu da nanu yívi tu kandixia jnu'un Yandios, xi nanu chaa kinya'u nuu puestuo ja ka sa ndeva'a da.

**18** Na kachi ndaa ri ja taka ra ndajnu'un ra siki iin falta sia'an, ti sia'an kendo undi nuu Yandios. **19** Suni na kachi ri ja nu vasu uu ro'o naa ra na ndumani ini, ti kakanta'u ra nuu Tata ri Yandios, ya kancha andívi, ja kuu sava'a ni ga ndajniñu ka nandi'i ra, ti kua'a ya nuu ra. **20** Chi nu ni ka ndututu uu xi uni yívi ka chiñu'un i ru'u, ti ka ndakuni'in yi sivi ri, ti ma'ñu yívi un kancha maa ri —ni kachi Jesús.

**21** Yukan ti ni tu'va Pedro nuu ya, ti ni jikajnu'un da:

—Jito'yo, ¿Nasa jinu kuu ja kuanka'nu imi na nuu ñanijna'an na nu na sa'a ndeva'a da jiin na nusa? ¿Xi undi uxia jinu nu? —ni kachi da.

**22** Ti ni kachi Jesús:

—Tu kachi ri ja uxia jinu, chi undi uni xiko uxi uxia jinu.

**23** Ja sia'an kuu ja nuu ta'u Yandios jniñu kuu nanu iin rey ja ni nanduku jnu'un da taka jniñu ka sa'a muzu da. **24** Ni keja'a sandoo da jniñu un. Ti ni jaa iin chaa tau iin millón pesu nuu da. **25** Ti tu ni kuu chunaa chaa un xu'un kua'a un, chi tundo ñava'a da. Yukan ti ni ta'u jito'o da un jniñu ja na kuya'u da jiin ñasi'i da nii jiin se'e da, jiin taka ja ñava'a da, nava na ndenaa ja tau da un. **26** Ti chaa un ni jakunjiti da nuu jito'o da, ti ni ka'an nda'u da jiin da sia'an: "Ni'in ja kuu ni jito'o na, kunda'u ini ni saña, ti saka'nú ini ni nuu na sa na chunaa ndi'i na xu'un ni", ni kachi da. **27** Ti rey un ni kunda'u ini da, ti ni janka'nú ini nuu muzu da un, ti ni sia da chaa un kua'an da.

**28** Ko sa ni kenda muzu un kua'an da, ti ni ndejna'an da jiin inga jna'an muzu da nuu ka junukuachi da un, ti chaa un tau jaku ni xu'un nuu maa da. Ti ni jniñu da sukun chaa un, ni keja'a skua'ñu da chaa, ti ni kachi da: "¡Chunaa ja tau ra nuu ri!" —kachi da. **29** Ti inga chaa un ni jakunjiti da nuu da, ti ni

ka'an nda'u da jiin da: "Kundatu kuee ti'lì, ti na chunaa ndi'i ri xu'un ra", ni kachi da. <sup>30</sup> Ko maa chaa un tu ni kuni da. Ti ni kankuachi da, ti ni chunde da chaa un vekaa undi ni chunaa ndi'i da ja tau da un.

<sup>31</sup> Ko nu ni ka jini uu ga jna'an muzu un ja sia'an ni kuu, ti ni ka na'nu xaan ini da, ti ni ka ja'an ka kasjnu'un da nuu jito'o da taka nava ni kuu. <sup>32</sup> Yukan ti ni kana jito'o un chaa ni sa'a sia'an un, ti ni kachi da jiin da: "Ro'o, chaa ka kua'an ka vajji kuu ra. Ni janka'nun ini ri nuu ra taka ja tau ra, chi ni kanda'u ra jiin ri. <sup>33</sup> Ti suni sia'an ro'o kuanka'nun ini ra nuu jna'an muzu ra un ni kuu, nanu ni janka'nun ini ri nuu maa ra", ni kachi da. <sup>34</sup> Yukan ti ni kitii xaan ini jito'o da un, ti ni ta'u da jniñu ja na kivi chaa un vekaa undi na chunaa da taka ja tau da un —ni kachi Jesùs.

<sup>35</sup> Ti sandi'i ni ga ni kachi Jesùs:

—Ti suni sia'an sa'a Tata ri Yandios jiin ra naa ra nu tu kuanka'nun ini ra naa ra nuu ñanijna'an ra jiin ni ini ni añu ra, nu sava'a ni ga ja na sa'a da jiin ra —kachi ya.

### *Xndaku Jesùs siki jnu'un ka xndoo jna'an (Mt. 5.32-32; Mr. 10.1-12; Lc. 16.18)*

## 19

<sup>1</sup> Nu ni ndi'i ni ka'an Jesùs jnu'un un, ni kee ya ñuu Galilea, ti kua'an ya ichi ñuu Judea ja kendo ichi nuu kaña ndikandii, nuu yucha Jordán. <sup>2</sup> Kua'a xaan yivi ni ka ja'an jiin Jesùs, ti yukan ni sa'a ya tajna yivi ka ku'u.

<sup>3</sup> Yukan ti ni ka tu'va sava chaa fariseo nuu Jesùs ja ka kuni skanakava da ya jiin iin jnu'un ka'an ya, ti ni ka jikajnu'un da ya:

—¿Kuu xndoo iin chaa ñasi'i da nu sava'ani ga siki ndoo na kuu nu? —ni ka kachi da.

<sup>4</sup> Yukan ti ni kachi Jesùs:

—¿Va tu ka skua'a ra tutu Yandios naa ra, ja undi nuu ni sa'a Yandios iin chaa jiin iin ñasi'i nusa? <sup>5</sup> Suni ni kachi ya: "Ja yukan kuu ja iin chaa nuu na ni'in da ñasi'i da, ti xndoo da tata da jiin nana da, ti ndinduu da ni ka nduu iin ni ga. <sup>6</sup> Ja yukan kuu ja tukaa ga ka kuu da uu yivi, chi ni ka nduu da iin ni ga yivi", kachi ya. Ja yukan kuu ja iin chaa, tu kuu sa'a siin da ja ni chajna'an Yandios —ni kachi Jesùs.

<sup>7</sup> Yukan ti ni ka jikajnu'un tuku da:

—¿Ndoo ni kachi Moisés ja iin chaa, kuu xndoo da ñasi'i da nu na ndokani da iin tutu, ti kua'a da nuu ña ja ni ka kusiin da nusa? —ni ka kachi da.

<sup>8</sup> Ti ni kachi Jesùs:

—Sia'an ni kuu, chi vanuxia ndee ni'in ini ra naa ra. Ja yukan kuu ja ni ja'a Moisés jnu'un ja na xndoo ra ñasi'i ra naa ra, ko undi nuu tu ni iyo sia'an.

<sup>9</sup> Na kachi ri nuu ra naa ra, ja nu iin chaa na xndoo da ñasi'i da, ko nu tu ni kanakava ña jiin inga chaa, ti nanda'a da jiin inga ña, suni ni nchakuachi da, chi ja ni yisikinchaa da ñasi'i da undi nuu. Ti suni nu iin chaa na nanda'a jiin iin ñasi'i ni kendo, suni ni nchakuachi da —kachi Jesùs.

<sup>10</sup> Yukan ti ni ka kachi ndaja'a ya:

—Ti nu sia'an kuu jiin chaa un naa da ja nu na nanda'a da jiin iin ñasi'i, ti iyo va'a ga nu tu nanda'a da —ni ka kachi da.

<sup>11</sup> Ti ni kachi Jesùs tuku:

—Ansü tendi'i yivi ka chaku ini jnu'un un, chi nini yivi ni ja'a Yandios inijnuni, yukan ni kuu ja ka chaku ini. <sup>12</sup> Iyo tijni nuu jnu'un ja jasi ja tu kuu nanda'a iin chaa. Iyo chaa sa vajji da undi chii nana da ja tu kuu kunchaka da ñasi'i. Ti ka iyo sava chaa ja ni ka kuu tajna da nava tu kuu kunchaka da

ñasi'i. Ti ka iyo sava ga chaa ka kendo sia'an ni, siki ja ka ñukuu ini da siuku da nava ta'u Yandios jniñu. Nau ro'o ka kuni kuanta'u jnu'un ja'a, ti kuanta'u ra naa ra —ni kachi Jesús.

*Jesús jiin suchi kuachi  
(Mr. 10.13-16; Lc. 18.15-17)*

<sup>13</sup> Yukan na ti sava yivi un ni ka janchaka i tijni suchi kuachi nuu Jesús ja na chuxndee ya nda'a ya xini i, ti na kakanta'u ya ja kuu suchi kuachi un nuu Yandios. Ko ndaja'a ya ni ka nduxaan da jiin chaa vekoyo jiin suchi kuachi un. <sup>14</sup> Yukan ti ni kachi Jesús:

—Sia naa ra na kikoyo i nuu ri, ti tu kasi ra naa ra. Chi taka yivi ka kuni kivi nda'a Yandios ja na ta'u ya jniñu nuu i, ti kuni ja na kivi i nanu suchi kuachi ja'a —ni kachi ya.

<sup>15</sup> Yukan ti ni chuxndee ya nda'a ya xini suchi kuachi un ja na koto nda'u Yandios maa i naa i. Yukan na ti ni kee ya kua'an ya.

*Nava ni jna'an iin chaa riku  
(Mr. 10.17-31; Lc. 18.18-30)*

<sup>16</sup> Ti yukan ni ja'an iin chaa riku nuu kande Jesús, ni jikajnu'un da ya, ti ni kachi da:

—Chaa va'a kuu ni, maestro. Ti kachi ni, ¿naa jniñu va'a sa'a na ti nava ni'in ta'u na ja na kuchaku na ja kuu saa ni? —kachi da.

<sup>17</sup> Ti ni kachi ya jiin da:

—¿Ndoor ka'an ra ja chaa va'a kuu ri, ti tu ni iin chaa va'a iyo, chi maa iin ni Yandios? Ko nu kuni ra ja na ni'in ta'u ra, ti kuandatu taka jniñu ta'u Yandios —ni kachi ya.

<sup>18</sup> Ti ni kachi chaa un:

—¿Nau ja kuu nusa? —kachi da.

Ti ni kachi Jesús jiin da:

—Tu ka'ní ra ndiyi, tu xnda'u ra ñasi'i, tu sakui'na ra, tu chakuachi ra yivi, <sup>19</sup> kuandatu nuu tata ra nuu nana ra, ti kunda'u ini ñanijna'an ra nanu kunda'u ini ra nuu maa ra —ni kachi ya.

<sup>20</sup> Ti ni kachi chaa un:

—Ja ni ndi'i un ni siuku na undi lulu na, ¿Ti ndoo kumani ga nusa? —ni kachi da.

<sup>21</sup> Ti ni kachi tuku Jesús:

—Nu kuni ra ja na kendo va'a ra, kua'an ti xiko ra taka ja ñava'a ra, ti kua'a nuu yivi nda'u naa i. Yukan na ti na kua'a Yandios ta'u ra iyo andivi. Yukan na ti sa kii ra na cho'o —kachi ya.

<sup>22</sup> Nu ni jiniso'o chaa un ja sia'an ni kachi Jesús, ni kukui'ya xaan ini da ti kua'an da, chi vanuxia chaa riku xaan kuu da.

<sup>23</sup> Yukan na ti ni kachi Jesús jiin ndaja'a ya:

—Jandaa na kachi ri nuu ra naa ra, ja yii xaan kaa ja kuu iin chaa riku ja na xndoo da ichi maa da, ti kivi da nda'a Yandios ja na ta'u ya jniñu nuu da. <sup>24</sup> Na kachi tuku ri ja va yachi ga ya'a iin camellu yau iin yiki tikui, ti ansu ja najaa iin chaa riku nuu ta'u Yandios jniñu. <sup>25</sup> Nu ni ka jiniso'o ndaja'a ya jnu'un un, so ni ka naa ini da, ti ka jikajnu'un jna'an da:

—¿Nau kuu ja nanita'u nusa? —kachi da naa da.

<sup>26</sup> Ni nde'e Jesús nuu da naa da, ti ni kachi ya:

—Ni iin yivi tu kuu sa'a un, ko Yandios, chi faka ni, ja kuu sa'a ya —ni kachi ya.

<sup>27</sup> Yukan ti ni kachi Pedro jiin ya:

—Jito'yo, saña naa na, ni ka xndoo na taka ja ka ñava'a na ti vekoyo na jiin ni, ¿ti ndoo ni'in na nusa? —kachi da.

**28** Ti ni kachi Jesús:

—Jandaa na kachi ri nuu ra naa ra, ja nu na jaa kivi ja ndujaa ñuyivi jiin andivi, ti nduña'nu ro'o naa ra. Ti ru'u, maa Se'e Yivi Ñuyivi, nduña'nu xaan ga ri, ti nukoo ri andivi nuu xndichi ri tendi'i kuiti yivi naa i. Ti taka ro'o ja ka kuu ra ndaja'a ri, suni nduña'nu ra, ti nukoo ra nuu uxi uu teyu ka kuña'nu. Ti yukan xndichi ra nuu ndi uxi uu familia ja ni ka nakaya nuu nación Israel. **29** Ti taka yivi ni ka xndoo ve'e ñani, xi kua'a, tata xi nana, ñasi'i xi se'e da, ja ka kuni kivi i nda'a Yandios ja na ta'u ya jniñu nuu i, ti nani'in i vil'i ga ja kuu taka ja ni ka xndoo i un. Ti nanita'u i nuu Yandios ja na kuchaku i ja kuu saa ni. **30** Ko kua'a yivi ka kunuu un vijna, ti yivi un ndunda'u ga i ñuu nuu ta'u Yandios jniñu. Ti kua'a yivi nda'u ja tu ka kuña'nu vijna, ti yivi un kuu ja nduña'nu ñuu nuu ta'u Yandios jniñu —kachi Jesús.

*Jnu'un chaa ka sa'a jniñu*

## 20

**1** Siin Jesús xndaku ya, ti ni kachi ya:

—Nuu ñuu nuu ta'u Yandios jniñu, nu kua'a ri kuu ta'u yivi ri, kuu nanu iiñ chaa ñava'a kua'a jniñu ja ni kenda da iiñ jaña'an, kuan nduku da muzu ja na ka'ncha nde'e tika'ya. **2** Ni ka ndajnu'un da jiin muzu un, ja cha'u da nava kuu ya'u da nuu iiñ kivi. Ti ni taji da chaa un kuan sa'a da jniñu nuu ñu'un da. **3** Ni kuu ka iiñ jaña'an, ni kenda da kua'an da nuu ya'u, ti yukan ni jini da ka'iin uu ga chaa ka iyo nuña. **4** Ti ni kachi da: “Kuan sa'a jniñu nuu ñu'un ri ti cha'u va'a ri kivi ra”, ni kachi da. Ti chaa un kuankoyo da.

**5** Ni kuu sava nduu, ti ni ja'an tuku da. Suni ni ni'in tuku da uu ga muzu. Ni kuu ka uni ti ni ja'an tuku da, ti ni ni'in da uu ga muzu. **6** Nu kuan kuu ka u'un ja'imi, ni ja'an tuku da nuu ya'u. Yukan ni jini da ka'iin tuku uu ga chaa ka iyo nuña, ti ni kachi da jiin chaa un: “¿Ndoo ka'iin ra sia'an ni ja'a ni nchaka, ndoo tu ka sa'a jniñu ra”? ni kachi da. **7** Ti ni ka kachi chaa un: “Tuu, chi tu kenda ni iiñ chaa nduku muzu”, ni ka kachi da. Ti ni kachi chaa un: “Kuan sa'a jniñu nuu ñu'un ri un naa ra, ti cha'u va'a ri ro'o”, ni kachi da.

**8** Nu ni kuaa, ti ni kachi da jiin chaa yinda'a muzu un: “Kana chaa ka sa'a jniñu un, ti cha'u ra nuu da, ko keja'a cha'u ra nuu chaa ni ka kivi sandi'i ni ga un, ti sandi'i ni ga cha'u ra chaa ni ka kivi undi ña'an un”, ni kachi da.

**9** Yukan ti ni ka jakoyo chaa ni ka kivi ka u'un ja'ini un, ti taka da ni ka kinya'u va'a da nava ka kinya'u da iiñ kivi. **10** Yukan ti nu ni ka jakoyo chaa ni ka kivi undi na ña'an un, ni ka ndo'o ini da ja vil'i ga kinya'u da niku, ko suni iiñ nuu ni ni ka kinya'u da naa da nava kuu ya'u da nuu iiñ kivi. **11** Ni ka ki'in da xu'un ya'u da un, ti ni ka keja'a ka kankuachi da siki chaa xiin jniñu un. **12** Ni ka kachi da: “Chaa ni ka jakoyo sandi'i ni ga ja'a, iiñ hora ni ni ka sa'a da jniñu, ti iiñ nuu ni ni cha'u ni da jiin saña naa na, ja ni ka sa'a jniñu na nchaka nchaa nuu ni'ni xaan un, ti ni'in xaan ni ka sajníñu na”, ni ka kachi da.

**13** Ti ni kachi chaa xiin jniñu un nuu iiñ da: “Nde'e naa kachi ri. Ansu xnda'u ri ro'o ja sa'a ndeva'a ri. ¿Xi ansu ni ka ndajnu'un yo ja cha'u ri nuu ra nava kinya'u ra iiñ kivi nu? **14** Ki'in xu'un ya'u ra ti kuan no'on. Chi ru'u maa ri, kuni ri cha'u ri chaa ni ka kivi sandi'i ni ga ja'a, nanu ni cha'u ri ro'o naa ra. **15** ¿Xi tu iyo ichi ri ja sa'a ri nava kuu ini maa ri jiin xu'un ri nu? ¿Xi kuu kuasun ini ra ja va'a ni cha'u ri nu?” kachi da —ni kachi Jesús.

**16** Ti ja siki jnu'un chaa ni ka sa'a jniñu un, ni kachi Jesús nuu ndaja'a ya:

—Ja sia'an kuu ja kua'a yivi ka kunda'u vijna, nduña'nu i ñuu nuu ta'u Yandios jniñu. Ti kua'a yivi ka kuña'nu vijna ndunda'u i ñuu nuu ta'u Yandios

jniñu ja kuu saa ni, chi kua'a yivi na stutu ya ja ka kivi i ñuu nuu ta'u ya jniñu, ko jaku ni kuu ja ni nakaji ya ja na nduña'nu i, ti tatu ya iin jniñu ña'nu ga nuu i —kachi Jesús.

*Ka'an tuku Jesúis ja kuū ya  
(Mr. 10.32-34; Lc. 18.31-34)*

<sup>17</sup> Nu kua'an Jesús ichi ñuu Jerusalén, ni kana siin ya ndi uxi uu ndaja'a ya un, ti ni kachi ya jiin da:

<sup>18</sup> —Ja ka jini ra naa ra ja, ja kuankoyo yo ichi ñuu Jerusalén. Ti yukan ru'u, ja kuu ri maa Se'e Yivi Ñuyivi, nakua'a yivi ru'u nuu sutu ka kuña'nu jiin nuu chaa ña'nu ja ka xna'an ley un, ti ka'ni da ru'u. <sup>19</sup> Nakua'a chaa un ru'u nuu nda'a yivi inga nación, ti kusiki nchaa yivi un ru'u, kua'a da tau ri, ti kataaka da ru'u nuu nda'a cruz, ja na kuū ri. Ko nu uni kivi ti nandoto tuku ri —ni kachi ya.

*Jnu'un ni ka'an nana Jacobo jiin Juan  
(Mr. 10.35-45)*

<sup>20</sup> Yukan ti nana Jacobo jiin Juan, chaa ka kuu se'e yii Zebedeo, ni ka tu'va da jiin ña nuu Jesús, ni jakunjiti ña nuu ya ja jikan ña iin ta'u. <sup>21</sup> Ni jikajnu'un ya ña'an un, ti ni kachi ya:

—¿Ndoo kuni ra nusa? —ni kachi ya.

Ti ni kachi ña'an un jiin ya:

—Nu na najaan ni ñuu nuu ta'u ni jniñu, ti kua'a ni xiin ni na kunchuku uu ndinduu se'e na ja'a, iin da na kuncha nunda'a kua'a ni, ti inga da na nukoo nunda'a sajni ni —ni kachi ña.

<sup>22</sup> Ti ni kachi Jesús nuu ña jiin se'e ña:

—Ro'o naa ra, tu ka jini ra ndoo ka jikan ra. ¿Xi kuu kondo'o ra jiin ri nuu iin nundo'o kii siki ri nu? —kachi ya.

Ti maa da ni ka kachi da:

—Kuu sa'a na —ni ka kachi da.

<sup>23</sup> Yukan ti ni kachi ya:

—Jandaan kuu ja kuu kondo'o jna'an ra jiin ri jiin nundo'o kii siki ri. Ko ja na nukoo ra nunda'a kua'a ri jiin nunda'a sajni ri, ansu ru'u kuu ja kua'a un, chi maa Tata ri Yandios, kuu ya jini nau yivi ni satu'va ya ja na kunchuku un —kachi ya.

<sup>24</sup> Nu ni ka jiniso'o ndi uxi ga ndaja'a un naa da, ti ni ka kitii xaan ini da nuu ndinduu chaa un. <sup>25</sup> Ko ni kana Jesús chaa un naa da, ti ni kachi ya jiin da:

—Ja ka jini ra naa ra, ja chaa ka ta'u jniñu nuu inga nación, ka ta'u da jniñu nanu iin chaa ta'u jniñu nuu muzu da. Ti chaa ka kuña'nu un, suni ka iyo ja ka ta'u ni'in ga jniñu nuu da. <sup>26</sup> Ko tu kuu sia'an jiin ro'o naa ra, chi nu nau ro'o ka kuni kuña'nu, ti su'va na kunukuachi ra nuu ñanijna'an ra. <sup>27</sup> Ti nu nau ro'o ka kuni kunuu, ti su'va nduu ra muzu nuu taka ga da naa da, <sup>28</sup> sia'an nanu ru'u. Tu ni chaa ri ja kunukuachi yivi nuu ri, chi ni chaa ri ja kunukuachi ri nuu yivi, ti nakua'a ri yiki kuñu ri ja nama ri siki yivi naa i —kachi ya.

*Sa'a Jesús tajna uu chaa kuaa  
(Mr. 10.46-52; Lc. 18.35-43)*

<sup>29</sup> Nu ni ka kee da ñuu Jericó, ti kua'a xaan yivi ni ka ndikun kuankoyo jiin Jesús. <sup>30</sup> Ti yu'u ichi un kanchuku uu chaa kuaa, ti nu ni ka jiniso'o da ja kuan ya'a Jesús, ti ni ka kanajiin da:

—¡Jito'yó, ni'in ja ta'u ni jniñu nanu ni sa'a rey yo David na jana'an, kunda'u ini ni saña naa na! —ni ka kachi da.

**31** Ti yivi kuankoyo un ni ka kanajii nuu da ja na kasi yu'u da, ko maa da vi'i ga ni ka kana ko'o da:

—Jito'yo, ja ta'u ni jniñu nanu ni sa'a rey yo David na jana'an, kunda'u ini ni saña naa na! —kachi da.

**32** Yukan ti ni jakuiñi Jesúś, ni kana ya xini da, ti ni jikajnu'un ya maa da:  
—¿Ndoo ka kuni ra ja sa'a ri jiin ra, nusa? —ni kachi ya.

**33** Ti ni ka kachi da:

—Jito'yo, ja na ndundijiin nduchi na —ni ka kachi da.

**34** Yukan ti ni kunda'u ini Jesúś nuu da naa da. Ni kue'e ya nduchi da, ti ni ka ndundijin ni nduchi da. Ti ni ka ndikun da kuankoyo da jiin ya.

*Ni kivi Jesúś ñuu Jerusalén  
(Mr. 11.1-11; Lc. 19.28-40; Jn. 12.12-19)*

## 21

**1** Nu ni kuyajni Jesúś jiin ndaja'a ya ñuu Jerusalén, ni jaa ya ñuu Betfagé, yajni yuku Olivos, ti ni taji ya uu ndaja'a ya, **2** ti ni kachi ya jiin da:

—Kua'an ranchu kande yajni un naa ra. Ti yukan nani'in ra nuu ndikun iin burrajiin iin burru lulu. Ndaji ti, ti kii ra jiin ti. **3** Ti nu nau yivi ni kenda ka'an, ti kachi ra ja maa jito'o ra jikan ti, ko vinañu'ni kii nunchaka na ti, kachi ra naa ra —ni kachi ya.

**4** Ti sia'an ni kundaa nava ni kachi profeta na ni chaa da nuu tutu:

**5** Kachi jiin ñuu Sion naa ra:  
“Nde'e, xaan nda'u vaji rey ra naa ra, chi vaji ya jiin burra, ti yoso ya siki se'e ti.

Ti se'e ti un kuu iin burru lulu, se'e iin kiti ndiso carga.”

Kachi tutu.

**6** Yukan ti ni ka ja'an ndaja'a ya un nava ni ta'u ya jniñu. **7** Ni ka chakoyo da jiin burra un, ndinduu ti jiin se'e ti. Ni ka chuku da sa'ma da siki ti, ti ni yoso ya ti. **8** Ti yivi kua'a kuankoyo un ni ka chuku i sa'ma i ini ichi un, ti sava i ni ka ja'ncha nda'a yujnu. Ti ni ka chuku i ini ichi un. **9** Ti yivi ka yoxnuu jiin yivi kuankoyo ichí jata, ni ka keja'a ka kucaa i ka kanajaa i Yandios, ti ni ka kachi i:

—¡Ni'in kuu chaa kuña'nu, chi maa ni kuu jna'an rey David na jana'an! Na kuanta'u yo nuu Jito'yo Yandios, chi ni taji ya iin chaa ndiso jniñu ña'nu nuu ya? ¡Na kachi ndaja'a ya undi andivi un ja na kuña'nu Chaa ja'a! ¡Sia'an na kachi ya! —ni ka kachi i.

**10** Nu ni kivi Jesúś ñuu Jerusalén, ti ni ka kucaa yivi ñuu, ti ka jikajnu'un i:

—¿Naa chaa kuu ja'a? —kachi naa.

**11** Ti ni ka kachi yivi un naa i:

—Ja'a kuu Jesúś chaa kuu profeta, kuu da iin chaa ñuu Nazaret, iin ndañuu Galilea —kachi yivi un naa i.

*Ni keni'in Jesúś yivi ka sa'a ya'u ini veñu'un ka'nu Israel  
(Mr. 11.15-19; Lc. 19.45-48; Jn. 2.13-22)*

**12** Nu ni jaa Jesúś nuu yuxe'e veñu'un ka'nu un, ti ni keni'in ya tako yivi ka xiko jiin ja ka jaan un kuankoyo i. Ni skuikokava ya tako mesa nuu kanchuku chaa ka sama xu'un yivi naa i, jiin tako sillaa nuu kanchuku ja ka xiko sata.

**13** Ti ni kachi ya jiin yivi un:

—Sia'an yoso nuu tutu Yandios: “Ve'e ri konani ve'e nuu kakanta'u yivi naa i”, ko ro'o naa ra, ni ka nasa'a ra ve'e ri nuu ka nataka ñakui'na —kachi ya.

**14** Ti nuu yuxe'e veñu'un un ni ka tu'va tijni yivi kuaa jiin yivi ni ka kuu tikuku nuu Jesúś, ti ni sa'a ya tajna yivi un. **15** Ko sutu ka kuña'nu un jiin chaa

ñā'nu ka xna'an ley un, ni ka kiti ini da, chi ni ka jini da jniñu ñā'nu ni sa'a Jesús, jiin ja ni jiniso'o da ja ka kanajii suchi kuachi un ini veñu'un un sia'an: "¡Na kuña'nu ni, chi ni nakaji Yandios ni'in ja na nukuñi ni nuu rey David na jana'an, ti ta'u ni jniñu!" —kachi i naa i.

Yukan ti ni ka kiti ini chaa ka kuña'nu un, <sup>16</sup> ti ni ka kachi da jiin Jesús:

—¿Jiniso'o ra jnu'un ka ka'an suchi kuachi ja'a nu? —ni ka kachi da.

Ti ni kachi Jesús jiin da naa da:

—Ñuso'o ri, ko ¿xi tu ka ka'u ra nuu tutu Yandios ja ka'an ja na nakanajaa i ya nu? Ko sia'an ka'an nuu tutu un:

Ni sa'a ra ja taka suchi kuachi jiin suchi ka yaxin,  
ja va'a na kanajaa i ro'o.

Kachi tutu —ni kachi Jesús.

<sup>17</sup> Yukan na ti ni xndoo ya yivi un, ni kee ya ñuu un, ti kua'an ya ñuu Betania.  
Ti yukan ni kendo ya jakuaa un.

*Ni ja'a Jesús nundo'o iin nutichi vixi  
(Mr. 11.12-14, 20-26)*

<sup>18</sup> Ti nu ni kundijin inga kivi, ni nandeokuñi tuku Jesús ñuu Jerusalén, ti ni keja'a ji'i ya soko. <sup>19</sup> Ni jini ya kandichi iin nutichi vixi yajni yu'u ichi un, ni tu'va ya ja'a, ko tundo ni ni'in ya xini, chi mani nda'a kuu, ti ni kachi ya jiin nutichi un:

—¡Na kachi ri ja jankivi ñuu ga kua'a ra tichi vixi! —ni kachi ya.

Ti hora ni ni ichi nutichi vixi un. <sup>20</sup> Nu ni ka jini ndaja'a ya un, ni ka naa ini da, ti ni ka jikajnu'un da ya:

—¿Nasa kuu ja xaan yachi ni ichi nutichi un? —kachi da naa da.

<sup>21</sup> Ti ni kachi Jesús:

—Jandaa na kachi ri nuu ra naa ra ja nu ka kandixia ni ini ra Yandios, ti tu kondo'o siki ini ra, ti ansu niní ja ni sa'a ri jiin nutichi ja'a kuu sa'a ra. Chi suni kuu kachi ra jiin yuku ja'a: "Kuxio ja'a ti kuan kivi ini lago un", ti sia'an kuu. <sup>22</sup> Ti taka ja na kakanta'u ra nuu Yandios, ko nu na kandixia ni imi ra Yandios, ti ni'in ra —ni kachi Jesús.

*Siki ja naa jniñu ndiso Jesús  
(Mr. 11.27-33; Lc. 20.1-8)*

<sup>23</sup> Yukan ti ni kivi Jesús nuu veñu'un ka'nun un, ti nu xna'an ya nuu yivi un, ni ka tu'va sutu ka kuña'nu un jiin tijni chaa ka kuña'nu ñuu Israel, ti ni ka jikajnu'un da ya:

—¿Nau ja ni ta'u jniñu ja sa'a ra taka jniñu ja'a? ¿Xi nau ja ni ja'a jniñu ñā'nu ja'a nuu ra nusa? —kachi da naa da.

<sup>24</sup> Ti ni kachi Jesús jiin da:

—Suni ru'u, na kajnu'un ri ro'o naa ra iin jnu'un. Ti nu ni ka kachi ndaa ra nuu ri, ti sa na kachi ri nuu ra nau ja ni ja'a jniñu ja'a nuu ri. <sup>25</sup> Kachi nuu ri, ¿nau ja ni tatu jniñu nuu Juan ja ni kii skuanducha da yivi un nusa? ¿iin yivi ni tatu jniñu un nuu da xi maa Yandios nú? —ni kachi ya.

Yukan ti ni ka keja'a ka ndajnu'un maa da naa da, ti kachi da:

—Nu na kachi yo ja Yandios ni taji chaa un, ti kachi da jiin yo: "¿Ndoo tu ni ka kandixia ra jnu'un ni ka'an da nusa"? kachi ya. <sup>26</sup> Ti nu na kachi yo ja yivi ni taji da, ti yu'u yo yivi, chi tendi'i yivi ka kandixia ja Juan ni kuu iin profeta, ja ni ka'an jnu'un Yandios —kachi da ka ndajnu'un da.

<sup>27</sup> Yukan na ti ni ka kachi da jiin Jesús:

—Tu ka jini na —ni ka kachi da.

Yukan na ti ni kachi ya jiin da naa da:

—Vanuxia tu ka kuni kachi ra, ti suni ru'u, tu ra kachi ri nuu ra nau ja ni ja'a jniñu ña'nua ja'a nuu ri —kachi ya.

### *Kuentu uu se'e yii*

**28** Ni kachi ya jiin chaa ña'nua un:

—¿Nasa ka ndo'o ini ra nu na kachi ri iiin jnu'un ja'a nusa? Fin chaa ni iyo uu se'e yii, ni kachi da jiin iiin se'e da un: "Hijo, kuan sa'a jniñu nuu nutika'ya yo vijnna", ni kachi da. **29** Ko ni kachi chaa lulu un: "Tu kuni na ki'in na", ni kachi da. Ko kuee ga ni nakani ini da, ti ni jan sa'a da jniñu un. **30** Yukan na ti ni ka'an tuku tata da un jiin inga se'e yii da, ti suni sia'an ni ta'u tuku da jniñu nuu suchi un, ti chaa lulu un ni kachi da: "Kuu, na ki'in na", ni kachi da. Ko tu ni ja'an da. **31** ¿Nau iiin iiin chaa un ni jandatu nava ni ta'u tata da jniñu un nusa? —ni kachi Jesùs.

—Chaa ni ka'an da jiin undi nuu un —ni ka kachi chaa ka kuña'nua un.

Yukan na ti ni kachi Jesùs jiin da naa da:

—Jandaa na kachi ri nuu ra naa ra, ro'o kuu ra chaa ka kuña'nua. Ja kuu chaa ka kinya'u nuu puesto un jiin ña'an sii ini ja tindi ña chaa, va tu u'u nakani ini yivi un, ti yachi ga kivi i nda'a Yandios ja na ta'u ya jniñu nuu i. Yachi ga kivi yivi un ja kuu ro'o naa ra. **32** Chi ni kii Juan, chaa ni skuanducha un, ti ni xndaku da nava kachi Yandios ja na nakani ini ra naa ra, ko tu ni ka kandixia ra jnu'un ni ka'an da. Ti chaa ka kinya'u puesto jiin ña'an sii ini un naa ña, chi ni ka kandixia ndaa da. Ti ro'o naa ra, vasu ni ka jini ra ja, ja ni ka nakani ini yivi ni ka jika kue'e un, ko tu ni ka nakani kuiti ini ra ja na kandixia ra jnu'un ni ka'an da —ni kachi ya.

### *Nava ni ka sa'a muzu ni ka sa'a ndeva'a (Mr. 12.1-12; Lc. 20.9-19)*

**33** Siin Jesùs xndaku ya sikì muzu ja ni ka sajniñu ndeva'a, ti ni kachi ya:

—Kunso'o inga jnu'un na kachi ri nuu ra naa ra. Fin chaa ni ñava'a kua'a xaan ñu'un ni xndee kua'a da nutika'ya, ti ni chi'i da iiin jaku nii kani yu'u ñu'un da un. Ni sa'a da iiin nundoo ka'nu xaan nuu kaxin da tika'ya un, ti ni jani da iiin ve'e sukun xaan ja na kundijin kotonchaa da nuu ni tu'u jniñu da un. Yukan na ti ni jakanchaa da ñu'un un nuu chaa ka sajniñu un, ti kua'an da iiin viaje.

**34** Nu ni jaa kivi nastutu da tika'ya un, ti ni taji da muzu ja na kin kakan da sava tika'ya ja kuu maa da nuu chaa ka yinda'a un. **35** Ko chaa ka sajniñu un ni ka ja'a da tau iiin chaa ka kuu muzu un, ni ka ja'nii da inga da, ti ni ka stau da yuu sikì inga muzu un. **36** Ti chaa xiin ñu'un un ni taji tuku da tijni ga muzu da ja kuu chaa ni ka ja'an undi nuu, ko chaa ka jito ñu'un, suni sia'an ni ka sa'a tuku da jiin muzu un.

**37** Sandili ni ga, ti ni taji da maa se'e yii da, chi ni ndo'o ini da: "Va kua'a da ja yiñu'un se'e ri", ni ndo'o ini da. **38** Ko nu ni ka jini chaa ka sajniñu un nuu se'e chaa xiin ñu'un un, ti ni ka kachi da: "Chaa ja'a kuu ja xiin ta'u. Va'a ga na ka'ni yo ti na kendo ndili yo jiin yaji ja'a", ni ka kachi da. **39** Ni ka jniñi da chaa un, ni ka keni'in da chaa un fuera nuu ñu'un un, ti ni ka ja'nii da chaa. **40** Ko nu na chaa chāa xiin ñu'un un, ti ¿ndoo sa'a da jiin chaa ka sajniñu un nusa? —kachi Jesùs.

**41** Ti ni ka kachi chaa ka kuña'nua un:

—Naa ii da chaa un, chi ka'ni ndili da chaa, chi tu kunda'u kuiti ini da chaa un naa da. Ti kakanchaa tuku da ñu'un un nuu uu ga chaa ka sajniñu va'a, nava na nakua'a da sava jniñu un nuu da jiin kivi nu ni kaña jniñu —ni ka kachi chaa ka kuña'nua un.

**42** Yukan ti ni kachi Jesùs jiin da naa da:

—Ja ka jini va'a ra nasa ka'an nuu tutu Yandios:  
 Yuū ni ka skaña chaa ni ka sa'a nama un, ja'a kuu yuū kanuu ga ja ndiso teyii  
 ga jiki iin ve'e.

Maa Yandios ni sa'a jniñu un, ti so ka naa ini yo ka nde'e yo.  
 Kachi tutu Yandios.

Ti ro'o naa ra, iin nuu kanda ra jiin chaa ni ka sa'a nama un, chi tu ni ka kandixia ra ru'u. <sup>43</sup> Yukan kuu ja tukaa kua'a Yandios jnu'un ja kivikoyo kua'a ra nda'a ya ja na ta'u ya jniñu nuu ra naa ra. Chi kua'a ya nu nini yivi ni ka nakani ini ti ni ka kandixia i ru'u. <sup>44</sup> Ti sia'an nanu ni ka sa'a chaa ni ka skaña yuū un, vasu ni kuu yuū kanuu ga, suni sia'an ka kuu yivi tu ka janta'u ru'u. Ti sia'an nanu ka tuji yivi ka jiokava siki iin yuū, suni sia'an jna'nu ndatu yivi tu kandixia ru'u. Ko kivi na sa'a ndaa Yandios kuachi i, ti yivi tu ni kandixia ru'u, kondo'o i nanu jna'an iin yivi kanakava iin yuū siki i, ti taxiin i, kukuachi i sa'a —ni kachi ya.

<sup>45</sup> Nu ni ka jiniso'o sutu ka kuña'nu un jiin chaa fariseo un ja sia'an ni ka'an Jesúś, ti ni ka chaku ini da ja siki maa da ni ka'an ya. <sup>46</sup> Yukan na ti ni ka nduku da nasa jnii da ya yukan, ko vanuxia ni ka yu'u da yivi, chi tendi'i yivi ka chiñu'un i ya, ja ni kuu ya iin profeta ja ka'an jnu'un Yandios.

### *Jnu'un iin viko nanda'a*

## 22

<sup>1</sup> Ni keja'a tuku Jesúś ka'an ya nuu yivi un jiin tijni jnu'un, ti ni kachi ya:

<sup>2</sup> —Ti ja na kivi yivi nda'a Yandios ja na ta'u ya jniñu nuu i, kuu nanu iin rey ja ni sa'a da iin viko ni nanda'a se'e da. <sup>3</sup> Ni taji da chaa ka junukuachi nuu da un, ja na kin kana da chaa, ni kaxjnu'un da nuu ja na jakoyo viko un. Ko vanuxia tu ni ka kuni chaa un kinkoyo da. <sup>4</sup> Ni taji tuku da uu ga chaa ka junukuachi nuu da un, ti ni kachi da: “Kachi nuu yivi ni kaxjnu'un ri nuu un ja, ja iyo tu'va ri. Ja ni ja'nii ri xndiki ri, ti suni ja ni ka jil'i taka kitii ni xneñu ri un. Ja ni ndi'i iyo tu'va ti kachi jiin chaa ka kana yo un ja na nduku ndee da, na kikoyo da viko ri, ti koto kukuee da”, ni kachi da. <sup>5</sup> Ko chaa ni ka kana rey un, tu ni ka sa'a da nanu nuu chaa ka junukuachi un. Iin da kua'an rancho kuan sajniñu da. Ingá da kua'an da nuu xiko da. <sup>6</sup> Ti sava da ni ka ki'in da chaa ka junukuachi nuu rey un, ti ni ka ja'a da tau da undi ni ka ja'nii da chaa un. <sup>7</sup> Yukan na ti ni kitii xaan ini rey un, ni taji da soldado da ja na ka'nii da chaa ni ka ja'nii ndiyi un, ti ni ka ja'ma da ñuu da.

<sup>8</sup> Yukan ti ni kachi da jiin chaa ka junukuachi un: “Ja iyo nakoo ja kuu viko nikoo, ko chaa ni kana ri un, tu ni ka kuni kikoyo da. <sup>9</sup> Kuankoyo naa ra taka calle un, ti kana sava'a ni ga yivi na kikoyo i viko nanda'a ja'a”, ni kachi da. <sup>10</sup> Ni kekoyo chaa ka junukuachi un kuankoyo da calle un, ti ni ka stutu da sava'ani ga yivi ni ndejna'an da jiin, kuu yivi va'a ini jiin yivi kua'an kanda, ti ni chitu yivi un ve'e da.

<sup>11</sup> Yukan ti ni kivi rey un kuande'e da yivi ni jakoyo un. Ti ni nde'e da nuu iin chaa nukoo un, ko tu ñu'un da sa'ma ka ñu'un yivi kuu viko nanda'a. <sup>12</sup> Ti ni kachi da jiin da: “Amigo, ¿nasa kuu ja ni kivi ra ja'a ti tu ñu'un ra sa'ma ja kuu viko nanda'a”? ni kachi da. Ti maa chaa un tu ni ka'an kuiti da. <sup>13</sup> Yukan ti ni kachi rey un jiin chaa ka janukuachi nuu mesa un: “Ku'ni si'in da jiin nda'a da naa ra, ti keni'in ra da na ki'in da fuera nuu ñaa un. Ti yukan na ti na nde'e da, ti na ku'yu jnu'un da”, ni kachi rey. <sup>14</sup> Suni sia'an na kachi ri ja kua'a yivi ni kana ri, ko jaku ni kuu ja ni nakají ri ja na ndivii i nda'a Yandios ja na kundiso jniñu i jiin ri —kachi Jesúś.

*Siki jnu'un kinya'u puesto  
(Mr. 12.13-17; Lc. 20.20-26)*

<sup>15</sup> Yukan na ti kuankoyo chaa fariseo un ti ni ka ndajnu'un da nasa nduku da, ja na kankuachi da ja'a Jesús. <sup>16</sup> Yukan ti ni ka taji da sava chaa ka yi'i jiin da, jiin sava chaa ka yi'i jiin Herodes chaa kuña'nun un, ja na ka'an da jiin Jesús, ti ni ka kachi da:

—Maestro, ka jini na ja ka'an ndaa ni, ti xna'an ndaa ni ichi Yandios, ti tu yu'u ni nde'e ni ni iin chaa vasu kuña'nun ga da. <sup>17</sup> Nusa ti kachi ni nuu na nasa ndo'o ini ni: ¿lyo va'a ja na cha'u yo xu'un nuu gobierno Romano xi tuu nu? —ni ka kachi da.

<sup>18</sup> Ko ja jini Jesús ja tu ka ndo'o va'a ini da, ti ni kachi ya:

—Chaa ñaa xini ka kuu ra. ¿Ndo'o ka kuni xnda'u ra ru'u? <sup>19</sup> Xna'an iin xu'un ja ka cha'u ra puesto un nuu ri —ni kachi ya.

Ti ni ka xna'an da iin xu'un plata nuu ya. <sup>20</sup> Ni nde'e ya nuu xu'un un, ti ni kachi ya:

—¿Naa nūū kuu ja nchaa nuu xu'un ja'a, ti naa sivi kuu ja yoso ja'a nusa? —ni kachi ya.

<sup>21</sup> Ti ni ka kachi da:

—Nūū maa rey nación Roma kuu —ni ka kachi da.

Yukan ti ni kachi Jesús:

—Nusa ti kua'a nuu rey nación Roma ja kuu maa da, ti kua'a nuu Yandios ja kuu maa Yandios —ni kachi ya.

<sup>22</sup> Nu ni ka jiniso'o da ja sia'an ni ka'an ya, so ni ka naa ini da. Ni ka xndoo da ya, ti kuankoyo da.

*Jnu'un siki ja ka nandoto ndiyi  
(Mr. 12.18-27; Lc. 20.27-40)*

<sup>23</sup> Suni maa kivi yukan, ni ka ja'an sava chaa saduceo nuu Jesús. Ti chaa saduceo un ka ka'an da ja tukaa ga ka nandoto ndiyi un, ti ni ka kachi da:

<sup>24</sup> —Maestro, ni kachi Moisés ja nu na kuū iin chaa ni iyo ñasi'i, ti nu tu ni iyo se'e da jiin ña, ti kuu nanda'a ñani ndiyi un jiin ña ja na koo se'e ña, ti suchi un nduu nanu se'e maa ndiyi un. <sup>25</sup> Ti nuu kanchuku na ja'a ni ka iyo uxia chaa ni ka kuu ñani naa da. Ti chaa núú un ni nanda'a da, ti ni ji'i da, ko tu ni iyo se'e da. Ti nanda'a tuku ña'an un jiin inga ñani da, chaa kuu uu. <sup>26</sup> Suni sia'an ni jna'an chaa kuu uu un, suni chaa kuu uni, ti sia'an ni ka ndekava ndi uxia da ni ka nanda'a jiin ña, ko ni ndi'i da ni ka ji'i. <sup>27</sup> Yukan na ti sandi'i ni ga, ti ni ji'i ña'an un. <sup>28</sup> Ti nu na nandoto ndiyi un naa da, ¿Nau ndi'i uxia chaa un xiin ñasi'i un, ja sia'an tendi'i da ni ka nanda'a da jiin ña? —ni ka kachi da.

<sup>29</sup> Yukan na ti ni kachi Jesús:

—Ka yuji ra naa ra, chi tu ka chaku ini ra tutu Yandios, ni tu ka chaku ini ra jniñu ña'a ya. <sup>30</sup> Chi nu na nandoto ndiyi un, tukaa kuu nanda'a i, ni tu kua'a i se'e si'i i ja na nanda'a ña, chi nduu i nanu ángel Yandios ja kanchuku nuu andivi un. <sup>31</sup> Ko siki ja nandoto ndiyi un tuku, xi tu ka chaku ini ra nu ni ka ka'u ra tutu, nu ni kachi Yandios jiin Moisés, na ni kachi ya: <sup>32</sup> “Ru'u kuu Yandios ja ni kanajaa Abraham, Isaac jiin Jacob.” Sia'an ni chaa Moisés jnu'un Yandios, ja Yandios tu kuu ya Yandios nuu yiví ni ka ji'i un, chi kuu ya Yandios nuu yiví ka chaku —ni kachi Jesús.

<sup>33</sup> Nu ni ka jiniso'o yiví un jnu'un un, ti so ni ka naa ini i ja sia'an ni xna'an ya.

*In ley kanuu xaan ga  
(Mr. 12.28-34)*

<sup>34</sup> Nu ni ka ni'in chaa fariseo jnu'un ja ni jasi Jesús yu'u chaa saduceo, ni ka ndututu da. <sup>35</sup> Ti iin chaa xna'an ley Israel un ni kuni da xndichi da Jesús, ti ni kachi da:

<sup>36</sup> —Maestro, ¿nau iin jnu'un kuu ja kanuu ga ja kuu nuu ley Yandios nusa? —ni kachi da.

<sup>37</sup> Ti ni kachi Jesús jiin chaa un:

—“Kuu ini nuu Yandios jiin ni ini ni aña ra, ni jiin inijnuni ra.” <sup>38</sup> Jnu'un ja'a kuu ja kanuu ga ja ka'an nuu ley Yandios. <sup>39</sup> Ti ja kuu uu un, suni iin ni ka'an: “Kunda'u ini nuu ñanijna'an ra nanu kunda'u ini ra nuu maa ra”, kachi ley un. <sup>40</sup> Ndinduu jnu'un ja'a ka kuu ja kanuu xaan ga ja ka'an nuu ni tu'u ley Yandios ja ni xna'an Moisés, jiin jnu'un Yandios ni ka xna'an profeta un na jana'an—ni kachi Jesús.

### *Nau se'e kuu Cristo*

(*Mr. 12.35-37; Lc. 20.41-44*)

<sup>41</sup> Ni ka'iin ga chaa fariseo yukan, ti ni jikajnu'un Jesús maa da naa da, ni kachi ya:

<sup>42</sup> —¿Nasa ka ndo'o ini ra nuu Cristo ja ni taji Yandios ja ndiso ya jniñu ña'nu nu? ¿Nau jna'an kuu ya nusa? —ni kachi ya.

Ni ka kachi chaa un:

—Se'e David, chaa ni kuu rey na jana'an, yukan kuu da —ni ka kachi da.

<sup>43</sup> Yukan na ti ni kachi Jesús:

—¿Nasa kuu ja David jiin inijnuni Espíritu Santo ni skonani da ya jito'o da nusa? Ti maa David ni ka'an da, ti ni chaa da nuu tutu:

<sup>44</sup> Yandios ni kachi jiin Jito'yo Cristo:

“Nukoo jiin ri, chi ta'u ra jniñu jiin ri.  
Iyo yivi jito u'u ro'o ko kundee ra jiin,  
chi chindee ri ro'o.”

Kachi Yandios, ni kachi David.

<sup>45</sup> Nu sia'an kuu ja maa David ni skonani da ya jito'o da, ti ¿nasa kuu ja Cristo kuu iin jna'an rey David jana'an? —ni kachi Jesús.

<sup>46</sup> Yukan na ti ni iin yivi tukaa ni kuu xndeokani ni iin jnu'un nuu ya. Ti undi kivi un, ni iin da tukaa ga ni tava ini da kajnu'un ga da Jesús.

### *Ka'an Jesús siki chaa fariseo jiin chaa ka xna'an ley Israel*

(*Mr. 12.38-40; Lc. 11.37-54; 20.45-47*)

## 23

<sup>1</sup> Yukan na ti ni kachi Jesús nuu yivi kua'a un jiin nuu ndaja'a ya:

<sup>2</sup> —Chaa ka xna'an ley Moisés jiin chaa fariseo un, ka kuñ'a'nu da ja ka xna'an da ley. <sup>3</sup> Ja yukan kuu ja kuandatu nuu da naa ra, sa'a taká jniñu ka ta'u da, ko koto ma natejna'an ra nava ka sa'a da, chi tu ka siuku da maa jnu'un ka xna'an da un. <sup>4</sup> Ka xna'an da kua'a jnu'un, ti ta'u da jniñu ja na siuku yivi jnu'un un naa i, ko maa da tu ka jandatu kuítí da jnu'un un.

<sup>5</sup> Ka jajna'an ini da ku'ni da iin tutu lulu yujiña da jiin siki nda'a da, ti nuu tutu lulu un ka chiso da ti'lí jnu'un Yandios. Sia'an ka sa'a da nava na kuni yivi naa i ja ka junukuachi da nuu Yandios. Suni ka jajna'an ini da ku'un da iin manga kani ga ja kuu taká ga yivi. So ka sa'a da taká jniñu un nava na kua'a yivi ja yiñu'un maa da. <sup>6</sup> Ti ka kusii xaan ini da jiin jnu'un yiñu'un jiin nuu nu kunchuku da ja kaji da staa iin viko. Suni ka jajna'an ini da sillá yiñu'un ga nuu kunchuku da ini veñu'un ka'nú Israel un. <sup>7</sup> Ti ka kuni da ja na ka'an yiñu'un yivi jiin da nuu ya'u, ti na ka'an yiñu'un i jiin da, “Maestro, maestro.”

<sup>8</sup> Ko ro'o naa ra ja ka kuu ra ndaja'a ri, koto ma konani ra "maestro", chi tendi'i ra ka kuu ñani nuu jna'an ra naa ra, chi maa iin ni Maestro ra iyo, ya kuu Cristo. <sup>9</sup> Suni tu ka'an ra "tata yo" nuu sava'a ni ga yivi ñuyivi ja'a, chi vajnu'un ni Tata yo iyo, ya kancha andivi, ti ii ya. <sup>10</sup> Suni koto ma kachi ra ja kuña'nu ra, chi maa iin ni Cristo kuu ya kuña'nu nuu ra naa ra. <sup>11</sup> Yivi junukuachi nuu ñanijna'an i, yivi yukan kuu ja kuña'nu ga ja kuu ro'o naa ra. <sup>12</sup> Ti yivi kuni kuña'nu, su'va ndukui'ya ini i. Ko yivi ja kukui'ya ini un, su'va nduña'nu i, chi maa Yandios kuu ja kachi.

<sup>13</sup> ¡Xaan ga nda'u ro'o ja ka xna'an ley! ¡Xaan ga nda'u ro'o, chaa fariseo! ¡Chaa ñaa xini ka kuu ra! Jiiñ jnu'un ra ka jasi ra ichi yivi ja na kivi i nda'a Yandios, ti na ta'u ya jniñu nuu i. Ni tu ka kuni kivi maa ra naa ra, ko ni tu ka kuni ra ja na kivi inga yivi naa i.

<sup>14</sup> ¡Xaan ga nda'u ro'o ja ka xna'an ley! ¡Xaan ga nda'u ro'o, chaa fariseo! Chaa ñaa xini ka kuu ra. Ka jisonchaa ra ve'e ña'an ni ka kendo nda'u. Ti ja na kendo va'a ra, ti na'an xaan ka jikanta'u ra naa ra. Ko jiiñ jniñu ka sa'a ra un, ti vi'i ga jna'nun datdu ra.

<sup>15</sup> ¡Xaan ga nda'u ro'o ja xna'an ley! ¡Xaan ga nda'u ro'o, chaa fariseo! Chaa ñaa xini ka kuu ra. Ka jikonuu ra taka ñuu ja ka xnda'u ra yivi naa i, ja na kandixia i jnu'un ka xndaku ra. Ti nu ni kandixia yivi un, ti ka sa'a ra ja vi'i ga na jna'nun datdu yivi un nuu infiernu ja kuu maa ra naa ra.

<sup>16</sup> ¡Xaan ga nda'u ro'o naa ra! Chi ka kuu ra nanu chaa kuaa tu ka jini na ichi ki'in da, chi ka ka'an ra: "Nu iin yivi na chisojnu'un i siki veñu'un ka'nu Israel, va tundo kuu un. Ko nu na chisojnu'un i siki oro ja iyo ini veñu'un un, ti kanuu kuu ja na siuku i", ka kachi ra. <sup>17</sup> Ko jiiñ jnu'un un jini yo ja ka kuu ra nanu chaa ñaa jiiñ chaa kuaa. Chi tu ka jini ra ja iin ni kuu veñu'un jiiñ oro un ja kancha ini veñu'un un. <sup>18</sup> Ti suni ka ka'an ra naa ra: "Nu iin yivi na chisojnu'un i ja kuu altar ini veñu'un un, va tundo kuu. Ko nu na chisojnu'un i ja kuu ja ka soko i nuu altar un, ti yukan kuu ja na siuku i", ka kachi ra. <sup>19</sup> Suni jiiñ jnu'un un jini yo ja nanu chaa ñáá, chaa kuáá ka kuu ra, chi tu jini ra ja iin ni kuu altar un jiiñ ndajniñu ka soko ra un. <sup>20</sup> Yivi chisojnu'un ja kuu nuu altar, ko ansu nini nuu altar un, chi jiiñ tendi'i ndajniñu kanchuku ja ka soko i un, undi jiiñ yukan ka chisojnu'un da. <sup>21</sup> Ti yivi chisojnu'un siki veñu'un un, suni chiso jnu'un i ja kuu Yandios, chi kancha ya yukan. <sup>22</sup> Ti suni yivi chisojnu'un ja kuu andivi un, suni chisojnu'un i nuu kancha Yandios, jiiñ suni nuu maa ya.

<sup>23</sup> ¡Xaan ga nda'u ro'o naa ra ja ka xna'an ley! ¡Xaan ga nda'u ro'o, chaa fariseo! Chi chaa ñaa xini ka kuu ra. Ro'o ka ja'a ra ti'lí ni nuu tako ja ka ñava'a ra, ja kuu nuu chaa junukuachi nuu Yandios. Ka ja'a ra ti'lí ni nuu tako jaja'an xiko asun, nanu tamino, yuku anís jiiñ yuku comino. Tako un ka sa'a ra, ti ka naa ini ra jnu'un kanuu ga ja kuu nuu ley Yandios, ja na kaka ndaa yo nuu Yandios, ja na kuandatu yo nava ta'u ya jniñu jiiñ jnu'un kunda'u ini, jiiñ ja na kandixia ndaa yo jnu'un maa ya. Yukan kuu ja kanuu ga ja sa'a ra, ti koto naa ini ra ja kua'a ra ti'lí nuu tako ja kaa ñava'a ra.

<sup>24</sup> Nanu chaa kuaa ka kuu ra ja ka xna'an ra jnu'un maa ra nuu yivi naa i. Ka jitu ndi'i ini ra jiiñ sava'n'i ga jniñu kuachi un. Chi ka ndundoo xaan ini ra ja ka sijin ra chukun ndi'i un jiiñ iin tela ja tu ya'a ti nuu nducha. Ko ka naa ini ra koko ra iin camellu.

<sup>25</sup> ¡Xaan ga nda'u ro'o ja ka xna'an ley! ¡Xaan ga nda'u ro'o, chaa fariseo! Chaa ñaa xini ka kuu ra. Ndundoo ko'o ra, ndundoo yajin ra, chi ka ndo'o ini ra ja ka iyo ndoo ra nuu Yandios, ko vasu jaku ga kanda ra. Ka kuu ra nanu yivi ja ka nakacha nini ichi jata ko'o un jiiñ yajin, ko tu ka nakacha i ichi ini, vasu jña'an ga ichi ini. Sia'an ka kuu ra, chi kanda ra nanu yivi va'a, vasu ichi

ini ra ka ñu'un mani jnu'un kui'na jiin taka ga jnu'un kue'e. <sup>26</sup> Nanu chaa kuaa ka kuu ra ro'o chaa fariseo, chi tu ka nakuni ra ja mani jniñu ndeva'a sa'a ra. Xnakan nakani ini nuu kuachi un nava na ndundoo ini añu ra, nava suni sia'an na ndundoo taka jniñu ka sa'a ra ja ka nde'e yivi naa i.

<sup>27</sup> ¡Xaan ga nda'u ro'o ja ka xna'an ley! ¡Xaan ga nda'u ro'o, chaa fariseo! Chaa ñaa xini ka kuu ra, chi ka kuu ra nanu ñaña ndiyi ka'iin panteon, nuu va'a xaan ni ka sa'a da. Ti ni ka naka'yu da jiin kaka, ti jandaa kuu ja vii xaan ni kendo ichi fuera, ko ichi chii ñu'un un, ñu'un chitu mani yiki ndiyi jiin taka ga ja te'yu. <sup>28</sup> Ti sia'an kanda ra naa ra jiin jniñu ka sa'a ra, ti sia'an ka kendo va'a ra nuu yivi naa i, chi ka ndo'o ini i ja ka iyo ndoo ini añu ra ja kuu nuu Yandios. Ko tu ka jini i ja chaa ñaa xini ka kuu ra, chi mani jniñu kue'e un ka ñu'un ini añu ra.

<sup>29</sup> ¡Xaan ga nda'u ro'o ja ka xna'an ley! ¡Xaan ga nda'u ro'o, chaa fariseo! Chaa ñaa xini ka kuu ra. Ka sa'a ra nama nuu ñaña chaa ni ka kuu profeta un, ti niní ka naskutu'ra ñaña chaa va'a un ja ka chiñu'un ra da. <sup>30</sup> Ti ka ka'an ra naa ra: "Sa ti yo'o naa yo, ni ka chaku yo na ni ka chaku yivi jana'an, ti va tu kua'a yo jnu'un ja ka'ní yivi chaa ni ka kuu profeta, ja ni ka'an jnu'un Yandios niku", ka ka'an ra. <sup>31</sup> Jiin jnu'un yukan ni, ti ka xnukoyo jna'an ra ja ka kuu jna'an ra jiin chaa ni ka ja'ní profeta un. <sup>32</sup> Nusa ti kuan siuku naa ra nava ni ka sa'a jna'an ra jana'an, chí iin nuu kanda ra naa ra.

<sup>33</sup> Nanu koo xaan jiin se'e ti ka kuu ro'o naa ra. Chi va'a jito ra, ko ndeva'a kuiti ka sa'a ra. Ja sia'an ti tu kaku kuiti ra naa ra ja tu ki'in ra nuu infiernu. <sup>34</sup> Ja yukan kuu ja na taji ri profeta ka ka'an jnu'un Yandios nuu ra naa ra. Ti taji ri chaa tu'va ja ka jini va'a jnu'un Yandios, suni chaa ka xna'an va'a jnu'un ya. Ko ro'o naa ra, chi ka'ní ra da, xi katakaa ra da nda'a cruz naa ra, ti sava da kua'a ra tau da ini veñu'un ra naa ra. Ti koto u'u ra uu ga da, ti taka ñuu kundikun ra da naa ra. <sup>35</sup> Taka kuachi un nukuncha siki ra. Ti suni nukundiso ra kuachi taka chaa va'a ni ka ja'ní ra un, undi niñi Abel jiin undi niñi Zacarías, se'e yii Berequías, chaa ni ka ja'ní jna'an ra na jana'an un, sava ma'ñu altar ini veñu'un Israel un. <sup>36</sup> Ja'a ti na kachi ndaa ri nuu ra naa ra, ja siki taka jniñu kue'e ni ka sa'a ra un, ja kii iin nundo'o xaan tonto siki ro'o, yivi nación Israel ja kanchuku vijna —ni kachi Jesús jiin yivi un.

### *Ni kuki'ya ini Jesús ja siki yivi Israel (Lc. 13:34-35)*

<sup>37</sup> Ni kachi Jesús siki yivi Israel:

—Ro'o, yivi ñuu Jerusalén, ja ka ja'ní ra profeta, chaa ni ka ka'an jnu'un Yandios, tí ka ja'a ra yuu siki chaa ka'an jnu'un ya veköyo nuu ra naa ra. ¡Nasa jinu ni kunda'u'ni iñi ri ro'o naa ra! Chi ni nakana ri ro'o ja na nama ri siki ra nuu nundo'o, nanu sa'a iin chuuun ja nakana ti se'e kuachi ti, ja na ndututu chii ndijin ti, ko tu ni ka janta'u'ra naa ra. <sup>38</sup> Vijnna na ti na xndoo ii ri ro'o naa ra jiin ñuu ra. <sup>39</sup> Chi na kachi ri jiin ra ja, jankivi ga kuni ra ru'u naa ra, undi na jaa kivi nu kachi ra naa ra: "Ña'nu na koo sivi ya, ti na kanajaa yo yaa ja vají ya nuu maa Yandios" —sia'an ni ka'an Jesús siki ñuu Jerusalén.

### *Ka'an Jesús ja naa veñu'un ka'nu Israel (Mr. 13.1-2; Lc. 21.5-6)*

## 24

<sup>1</sup> Ni kee Jesús veñu'un ka'nu un, ti kua'an ya. Ko ni ka tu'va ndaja'a ya, ti ni ka keja'a ka jitonchaa da veñu'un ka'nu un naa da. <sup>2</sup> Ti ni kachi Jesús jiin da naa da:

—Ndi'i ja'a ka jitonchaa ra naa ra. Ko jandaa na kachi ri nuu ra naa ra ja ni iin yuu tukaa kendo kosojna'an ja'a, chi ndi'i ja'a naa —ni kachi ya.

*Naa seña koo nu kuan kuyajni ndi'i ñuyivi  
(Mr. 13.3-23; Lc. 21.7-24; 17.2-25, 31, 37)*

<sup>3</sup> Yukan na ti kua'an ya jiin ndaja'a ya undi yuku Olivos, ti yukan ni nukoo ya ti nuu nukoo ya un ni ka tu'va ndaja'a ya, chi maa ni ga da ka'iin un jiin ya, ti ni ka jikajnu'un da ya sia'an:

—Ka kuni na ja na kachi ni nuu na naa na, ja nama kundaa taka jnu'un ni ka'an ni un. ¿Ti naa seña koo nu kuan kuyajni nchaa ni, jiin ja na ndi'i ñuyivi nu? —ni ka kachi da.

<sup>4</sup> Yukan na ti ni kachi Jesús jiin da naa da:

—Koto maa ra naa ra. Koto maa xnda'u yivi ro'o. <sup>5</sup> Chi kua'a yivi kikoyo, ti ndaku ni'in yi sivi ri, ti kachi: "Ru'u kuu Cristo ja ni taji Yandios ja sa'a jniñu ña'nu", kachi. Ti sia'an kuu xnda'u i yivi kua'a. <sup>6</sup> Ti kuni jnu'un ra ja ya yukan koo guerra. Ko koto yu'u ra naa ra, chi sia'an ndixia kuu, ko jiin yukan ti changa ga jaa kivi ja ndi'i ñuyivi. <sup>7</sup> Chi kanaa iin nación jiin inga nación, suni iin ñuu jiin inga ñuu. Ti koo jnama xaan. Suni kii kue'e xaan tonto, jiin ñujnaa xaan tonto nuu sava'ni ga nuu ñuyivi. <sup>8</sup> Ti taka un kuu seña ja kuan kuyajni keja'a nundo'o kii nuu ñuyivi.

<sup>9</sup> Yukan na ti ro'o ja ka kandixia ra ru'u, ti jniyivi ro'o naa ra, ti kua'a i tau ra, ti ka'ni i ro'o. Ti tendi'i yivi koto u'u i ro'o naa ra ja siki ru'u. <sup>10</sup> Ti yivi ni ka ka'an ja ka kandixia i ru'u, nandeokava ini i nu na jaa kivi un. Koto u'u jna'an i, ti siukoyo jna'an i nuu stisia.

<sup>11</sup> Ti kenda kua'a yivi ja xndoña'an, ti kachi i ja ka ka'an i jnu'un Yandios, ti xnda'u i yivi naa i. <sup>12</sup> Ndeva'a kuiti ni ga sa'a yivi un naa i ja tukaa ga kunchuku mani i naa i. <sup>13</sup> Ko yivi na kuñii ini jiin jnu'un ri, ti siuku ni ini i undi kivi sandi'i ni ga un, ti keta'u i. <sup>14</sup> Ti jnu'un ka'an ja nasa kivi i nda'a Yandios ja na ta'u ya jniñu nuu i, kuichanuu jnu'un un ki'in nii tu'u ñuyivi ja na nakuni yivi taka nación. Yukan na sa chaa kivi sandi'i ni ga ja naa ñuyivi.

<sup>15</sup> Daniel, chaa ni kuu profeta na jana'an un, ni chaa da nuu tutu ja jaa iin nundo'o xaan nuu ve'e ii un, ti yukan kuu ja sa'a ja nativ'i nii tu'u ve'e ii un. Ti nu na kuni ra nundo'o un naa ra ja, ja ni jaa ve'e ii kande ini veñu'un ka'nun un, yukan sa chaku ini ra nau ja kuu un. <sup>16</sup> Yukan na ti yivi kanchuku ñuu Judea, na kinkoyo i undi yuku un. <sup>17</sup> Yivi ka ndetatu yux'e i, koto ma ki'in i ndajniñu i ini ve'e i, ko na kunu xaan i naa i. <sup>18</sup> Ti yivi ka'iin nuu jniñu, koto maa ndeokuñi i ve'e i ja stutu i sa'ma i.

<sup>19</sup> ¡Na nda'u ña'an ka ñuse'e xi ña'an ka nchaka suchi yikin ja kuu kivi un! <sup>20</sup> Kakanta'u nuu Yandios naa ra ja koto maa kii nundo'o yukan nuu ra kivi vijin xaan, xi ja kuu iin kivi ndetatu. <sup>21</sup> Chi saa kuu ja koo xaan nundo'o, ja jankivi ni iyo undi na ni jankoo ñuyivi, ti ni jankivi ga koo tuku inga. <sup>22</sup> Sa ti tu ni xnuku Yandios kivi un, ti va ni iin yivi tu nanita'u i. Ko ni xnuku ya kivi un ja ni kunda'u ini ya nuu yivi ka kandixia, ja ni nakaji ya un.

<sup>23</sup> Nu ni jaa kivi un, koto ma kandixia ra ka'an yivi jiin ra, chi kachi i: "Nde'e, ja'a kancha Cristo ja ni taji Yandios ja sa'a jniñu ña'nu", xi kachi: "Nde'e, yukan kancha ya." Ti koto ma kandixia ra jnu'un ka'an i. <sup>24</sup> Chi kikoyo yivi ka xndoña'an, ti kachi i ja maa i kuu Cristo, xi ja maa i kuu chaa ka'an jnu'un Yandios, ti sa'a i tijni nuu jniñu ña'nu xaan ja na xnda'u i yivi. Ti kachi i xnda'u i yivi ni nakaji ya ja ka kandixia i ru'u, ko tu kuu. <sup>25-26</sup> Ja yukan kuu ja, ja ni ndi'i jnu'un ja'a ni kachi ri nuu ra naa ra, ti koto kandixia ra nu na kachi yivi un: "Nde'e naa ra, yukan kande Cristo nuu ñu'un te'e un",

ka kachi i. Ti koto maa ki'in ra yukan. Ko xi nu na kachi i: "Nde'e naa ra. Ja kancha ya ini ve'e ja'a", ti koto ma kandixia ra naa ra. <sup>27</sup> Chi kivi nchaa ru'u, maa Se'e Yivi Ñuyivi, ti kuni ndijin ra naa ra nanu sa'a nu janducha, ti ndinchaa ni tu'u undi nuu kaña ndikandii jiin undi nuu kee ndikandii. <sup>28</sup> Chi nde'e ra ja nuu ka kututu tiji un, katuu kiti ni ji'i, ti suni sia'an kuni ndijin ra nu ndenda ru'u, maa Se'e Yivi Ñuyivi —ni kachi Jesús.

(*Mr. 13.24-37; Lc. 21.25-33; 17.26-30, 34-36*)

<sup>29</sup> Nu ni ya'a taka nundo'o un, ti kuu ñaa ndikandii, ti yoo tukaa ga kua'a nduva. Ti nukoyo chuxini nuu andivi un, ti ni'l'in undi andivi. <sup>30</sup> Yukan kuu ñin seña nuu andivi ja nchaa ru'u, maa Se'e Yivi Ñuyivi. Ti taka yivi ñuyivi ja'a, nde'e i ti kuni i ru'u, maa Se'e Yivi Ñuyivi, ndii ri nuu viko un jiin jnu'un ja ni nduña'nu xaan ri nuu ñuyivi. <sup>31</sup> Ti ta'u ri jniñu nuu ángel, Yandios ja kinkoyo ya ndi kuun jiki ñuyivi. Ti nu na tivi ñin ndiki, yukan na ti nastutu i yivi ni nakaji Yandios, ja kanchuku sava'a taka nuu ñuyivi.

<sup>32</sup> Nde'e naa ra ja kuu jiin nutichi vixi un. Nu ni ka nduu yucha numa i ti ni nduu xati nda'a, ti yukan ja ni chaku ini yo ja kuan kuyajni vi ko sau. <sup>33</sup> Ti suni sia'an jiin ro'o naa ra, nu ni ka jini ra ja kuan kundaa taka jnu'un ni ka'an ri un, ti chaku ini ra naa ra ja kuan kuyajni ndaa kuiti ni ga kivi nchaa ri. <sup>34</sup> Ti jandaa na kachi ri ja xnaka taka un kundaa, ti sa kuū yivi ka iyo kivi vijna. <sup>35</sup> Va naa andivi jiin ñuyivi, ko jnu'un ka'an ri, chi jankivi naa, ti kundaa taka un.

<sup>36</sup> Ko kivi yukan, ni ñin yivi tu jini na kivi kuu, xi na hora kuu, ni ángel ja ka junukuachi nuu Yandios, ni maa Se'e Yandios, tu jini na hora kuu. Chi vajnu'un ni maa Tata yo Yandios kuu ja jini na hora kuu. <sup>37</sup> Chi nanu ni iyo kivi ni chaku Noé, ti suni sia'an kuu nu na jaa kivi nchaa ru'u, maa Se'e Yivi Ñuyivi. <sup>38</sup> Kivi na ti kii ga sau xaan un, ni kunchuku vatu yivi naa i, chi ka ndo'o ini ja kukuee nuu i naa i. Ka yaji i, ti ka ji'l'i, ka nanda'a i, ti ka ja'a i se'e si'i i ka nanda'a ñaa naa ñaa, undi ni jaa kivi nu ni kivi Noé ini barco da. <sup>39</sup> Ko tu ni ka chu'un ini taka ga yivi ñuyivi un ja kii ñin sau xaan tonto un. Ko nu ni jinu ndixia sau xaan un, ti ni ka naa i. Ti nava ni ka iyo naa ini yivi kivi un, suni sia'an konaa ini yivi ja kuu kivi na nchaa ru'u, maa Se'e Yivi Ñuyivi. <sup>40</sup> Ti kivi un ku'iin uu chaa nuu jniñu da, ñin da nakuaka ya, ti inga da kendo. <sup>41</sup> Nu uu ñasi'l'i ka ndiko, ti ñin ñaa nakuaka ya, ti inga ñaa kendo.

<sup>42</sup> Kondito ini naa ra, chi tu ka jini ra na kivi nchaa maa jito'o ra. <sup>43</sup> Nde'e naa ra, sa ti ñin chaa ja jini da na hora jaa ñakui'na ve'e da ñin jakuaa, va kondito da, ti tu kua'a da jnu'un kivi ñakui'na ve'e da un, ja na tava ndajiniñu da. <sup>44</sup> Ja yukan kuu ja suni kotu'va ra naa ra, chi jaa ñin kivi, ja iyo naa ini ra, ti nchaa ru'u, maa Se'e Yivi Ñuyivi.

*In muzu va'a jiin inga muzu sa'a ndeva'a*

(*Lc. 12.41-48*)

<sup>45</sup> Chaa kuu muzu va'a ja junukuachi va'a un, ti kanu ini chaa xiin ve'e un ja na kinda'a da uu ga muzu un, ti suni jiin hora na kua'a da ja kaji uu ga muzu un naa da. <sup>46</sup> Ndatu chaa kuu muzu un nu na najaa chaa xiin ve'e un, ti nani'in da chaa sa'a jniñu da, sijku da nava ni ta'u jniñu nuu da. <sup>47</sup> Ti na kachi ndaa ri ja kusii ini chaa xiin ve'e un, ti xndoo da chaa ja na kinda'a da taka ja ñava'a chaa kuu jito'o da un. <sup>48</sup> Ko nu chaa junukuachi un na sa'a ndeva'a da, ja ndo'o ini da ja kukuee ga chaa xiin ve'e un, <sup>49</sup> ti keja'a nduxaan da nuu uu ga muzu un, ti keja'a da kaji da, ko'o da jiin taka chaa jini un naa da. <sup>50</sup> Ti iyo naa kuiti ini da, ja tundo ndo'o ini da ja najaa yachi chaa xiin ve'e

un, ja tu jini da na kivi najaa jito'o da un. <sup>51</sup> Ti kua'a da tau chaa un jiin iin nundo'o ja jna'nun da, nava ka jna'an chaa ñaa xini. Yukan na ti nde'e da nuu nundo'o un, ti ku'yu jnu'un da —kachi ya.

### *Nava ni ka jna'an uxi ña'an kuachi*

## 25

<sup>1</sup> Siin Jesús xndaku ya, ti ni kachi ya:

—Nuu ta'u Yandios jniñu kuu nanu ni ka jna'an uxi ña'an kuachi ja ka yinda'a ña candil ña, ti ni ka ja'an ña iin viko nanda'a ja kundatu ña novio. <sup>2</sup> U'un ñaa kuachi un ka iyo naa ini ña, ti u'un ga ña kuachi un ka iyo ndito ini ña. <sup>3</sup> Ña'an naa ini un, ni ka yinda'a ña candil ña, ti ni ka naa ini ña kunda'a ña aceite olivo ja na nachu'un tuku ña chii candil ña. <sup>4</sup> Ko ña'an ka ñundito ini, ni ka yinda'a ña candil ña, ti ni ka yinda'a siin ña botella aceite olivo ja na naskutu ña candil ña. <sup>5</sup> Ko ni kukuee novio un najaa da, ti ni chaa ma'na nuu ña naa ña, ti ni ndi'i ña ni ka kixi.

<sup>6</sup> Yukan ti yajni kuu ñuu, ti ni ka jiniso'o ña ka kana jiin: “¡Ja vaji novio, kekoyo kii ra naa ra”! —kachi ka ka'an. <sup>7</sup> Tendi'i ña ni ka ndoko ti ni ka keja'a ka satu've ña candil ña. <sup>8</sup> Ti ndi u'un ña'an naa ini un ni ka kachi ña jiin u'un ga ña'an ka ñundito ini un: “Kua'a ti'lí aceite ra nuu ri naa ri, chi kuni nda'va candil ri”, kachi ña naa ña. <sup>9</sup> Ko ña'an ka iyo tu'va un, ni ka kachi ña: “Tuu, chi tu kucaa ja kuu maa ri naa ri. Va'a ga kuankoyo nuu kuya'u un, ti kuaan ra ja kuu maa ra naa ra”, ni ka kachi ña. <sup>10</sup> Ko ni kuankoyo ndi u'un ña'an naa ini un, ja kin kuaan ña aceite ña, ti ja ni najaa novio un. Ti ña'an ka iyo tu'va un ni ka kivi ña viko nanda'a un jiin novio un, ti ni nandi'yu yux'e.

<sup>11</sup> Kuee ga ti ni ka najakoyo u'un ga ña'an kuachi un, ti ni ka kachi ña: “Taa, kuiña ni yux'e le na kivi na”, ni ka kachi ña. <sup>12</sup> Ko ni kachi novio un: “Na kachi ndaa ri ja tukaa ga nuña ve'e ri”, ni kachi da. <sup>13</sup> Ja yukan kuu ja kondito ini ra naa ra, ti kotu've ra, chi tu ka jini ra na kivi, ni na hora kuu ja nchaa ru'u, maa Se'e Yivi Ñuyivi —ni kachi Jesús.

### *Jnu'un chaa ni ka yinda'a xu'un*

<sup>14</sup> Siin Jesús xndaku ya, ti ni kachi ya:

—Nuu ta'u Yandios jniñu kuu nanu iin chaa riku, ja ñu'ichi da ki'in da inga ñuu. Ni kana da muzu da ti ni tatu da nuu ja na koto xu'un da. <sup>15</sup> Nuu iin da ni ja'a da yajni u'un mil xu'un. Nuu inga da ni ja'a da yajni uu mil xu'un, ti nuu inga da ni ja'a da yajni iin mil xu'un. Sia'an ni tejna'an da nuu iin iin muzu da un nasa xini maa da naa da. Yukan na ti ni kee da ti kua'an da. <sup>16</sup> Chaa ni ni'in u'un mil xu'un un, ni sa'a da tratu jiin xu'un un, ti ni nani'in da uu mil ga mil. <sup>17</sup> Suni sia'an ni sa'a chaa ni ki'in uu mil un, ti ni nani'in da uu mil ga xu'un siki. <sup>18</sup> Ko chaa ni ki'in iin mil xu'un un, ni ja'an da ti ni chisa'yí da xu'un un chii ñu'un, ja ni ja'a chaa un nuu da ti ni sava'a da.

<sup>19</sup> Ni ya'a tijni kivi, ti ni najaa chaa xiin xu'un un, ti ni na xndichi da muzu un naa da. <sup>20</sup> Xnaka ni jaa chaa ni ki'in u'un mil un, ti ni nakua'a da u'un ga mil xu'un un, ti ni kachi da: “Taa, ni ja'a ni u'un mil xu'un nuu na, ti ja'a iyo u'un ga mil ja ni ni'in na siki”, ni kachi da. <sup>21</sup> Ti ni kachi chaa xiin xu'un un: “Iyo va'a xaan, ro'o kuu iin muzu va'a ga, chi ni sajniñu ni ini ra jiin, ti vasu ti'lí ni ja'a ri ko ni sajniñu ni ini ra jiin. Vijnna ti nakua'a ri iin jniñu kanuu ga nuu ra ja kinda'a ra. Ko kuan ndivi ini ve'e ri vinañu'ni, chi koo yo iin jnu'un sih ini naa yo”, ni kachi da.

<sup>22</sup> Yukan sa ni jaa chaa ni ki'in uu mil un, ti ni kachi da: “Taa, ni ja'a ni uu mil nuu na, ko ja'a iyo uu ga mil ja ni ni'in na siki”, ni kachi da. <sup>23</sup> Ni kachi

chaa xiin xu'un un: "Iyo va'a nusa. Ro'o kuu muzu va'a ga, chi ni sajniñu ni ini ra jiiñ xu'un ri, ti vasu ti'lí ni ja'a ri, ko ni sajniñu ni ini ra jiiñ. Vijnna ti nakua'a ri iin jniñu kanuu ga nuu ra ja kinda'a ra. Ndivi ini ve'e ri, chi koo yo iin jnu'un sii ini naa yo", ni kachi da.

<sup>24</sup> Ko nu ni jaa chaa ni ki'in iin mil xu'un un, ti ni kachi da jiiñ chaa xiin xu'un un: "Taa, ja jini na ja kuu ni chaa tu ñunda'u ini, chi kua'a ga nandakan ni ti ansu ja ni ja'a ni, ti su'va kuni ga ni. <sup>25</sup> Ja yukan kuu ja ni yu'u na ti ni chisa'yí na xu'un un chii ñu'un, ko ja'a na nakua'a na xu'un ni", ni kachi da. <sup>26</sup> Ti ni kachi chaa xiin xu'un un: "Ro'o kuu iin chaa ndéhé xaan tonto, iin chaa kuxi. Ti ka'an ra ja vi'i ga nandakan ri ansu ja ni ja'a ri, ti suni ka'an ra ja su'va vi'i ga kuni ri. <sup>27</sup> Ti nu sia'an kuu nusa, ¿ndoo tu ni januu ra xu'un ri nuu chaa ka sajniñu siki tratu, nava nu ni nchaa ri ti naki'in ri xu'un ri jiiñ se'e i niku"? ni kachi da. <sup>28</sup> Yukan ti ni kachi da jiiñ uu ga muzu un: "Kuisonchaa iin mil xu'un jña nuu da, ti kua'a nuu chaa yijní uxi mil un naa ra. <sup>29</sup> Chi yivi ka ñava'a, ti su'va kii ga nuu i, ti vi'i ga kuñava'a i. Ko yivi tundo ñava'a, ti vasu ti'lí ja ñava'a i un, kuxio ki'in. <sup>30</sup> Ti muzu ja tu kaxaan ja'a, keni'in da na ki'in da nuu ñuu ñaa fuera un. Ti yukan na nde'e da ja na nakani ini da, ti na ku'yú yu'u da", ni kachi chaa xiin xu'un un —ni kachi Jesús.

### Juicio kii nuu taka nación

<sup>31</sup> Siin Jesús xndaku ya, ti ni kachi ya:

—Ti ru'u, maa Se'e Yivi Ñuyii, kivi na nchaa ri jiiñ jniñu ña'nú xaan, jiiñ tendi'i ángel ka junukuachi nuu Yandios, ti ta'u ri jniñu nuu ni tu'u yivi ñuyivi ja'a, chi maa Tata ri Yandios kua'a jniñu un nuu ri. <sup>32</sup> Ti tendi'i yivi taka nación ndututu nuu ri, ti sasiin ri i nanu sasiin yo ri jiiñ ndixi'yu. <sup>33</sup> Ti yivi va'a sasiin ri i nunda'a kua'a ri. Ti sasiin ri yivi kue'e un nunda'a sajni ri. <sup>34</sup> Yukan na ti kachi ri jiiñ yivi kanchuku nda'a kua'a ri: "Ichi cha'a kikoyo ra, chi ja ni nakaji Tata ri ro'o naa ra. Kivikoyo ra nuu ta'u Yandios jniñu, chi ja iyo tu'va ja kuu ro'o naa ra undi na ni sa'a Yandios ñuyivi. <sup>35</sup> Ni ni'in ta'u ra, chi ni ji'i ri soko, ti ni ka ja'a ra ja ni yee ri. Ni ichi ri nducha, ti ni ka ja'a ra nducha ni ji'i ri. Ni yaku ri nanu chaa ñuu jika, ti ni ka ja'a ra ve'e ni kendo ri. <sup>36</sup> Ni kumani sa'ma ri, ti ni ka ja'a ra naa ra. Ni ku'u ri, ti ni ka jande'e ra ru'u. Ni kunde ri vekaa, ti ni ka jande'e ra ru'u naa ra." Sia'an ka'an ri jiiñ yivi kunchuku nunda'a kua'a ri.

<sup>37</sup> Yukan na ti yivi ni keta'u un kachi i: "Jito'yo, ¿nama ni ji'i ni soko, ti ni ka ja'a na ja ni yee ni? ¿Xi nama ni ichi ni nducha, ti ni ka ja'a na ja ni ji'i ni? <sup>38</sup> ¿Xi nama ni yaku ni nanu chaa ñuu jika, ti ni ka ja'a na ve'e ni kendo ni? ¿Xi nama ni kumani sa'ma ni, ti ni ka ja'a na? <sup>39</sup> ¿Xi nama ni ku'u ni xi ni kundee ni vekaa, ti ni ka jande'e na ni'in?" <sup>40</sup> Yukan na ti ru'u, ja kuñña'nu ga, ti kachi ri: "Jandaa kuiti na kachi ri, ja sia'an ni ka sa'a ra jiiñ iin ñani nda'u ri ja ni kandixia da ru'u, ti sa'a ri ja nuu maa ri ni ka sa'a ra", kachi da.

<sup>41</sup> Yukan na ti suni kachi ri jiiñ yivi kanchuku nda'a sajni ri un: "Kuxio naa ra, ro'o ja ni ka jna'nú ndatu, ti kuankoyo nuu infiernu un, nuu kayu ñu'un ja kuu saa ni, chi ja iyo tu'va infiernu un ja kuu ja'u'u un jiiñ ángel da ja ka kuu ndaja'a da un. <sup>42</sup> Sia'an kondo'o ra, chi ni ji'i ri soko, ti tu ni ka ja'a ra ja kaji ri. Ni ichi ri nducha, ti suni tu ni ka ja'a ra nducha ko'o ri. <sup>43</sup> Ni yaku ri nanu chaa ñuu jika, ti tu ni ka ja'a nuu ra ve'e kendo ri. Ni kumani i sa'ma ri, ko tu ni ka ja'a ra. Ni katuu ri ni ku'u ri, ni kunde ri vekaa, ko tu ni ka kii nde'e kuiti ra ru'u naa ra", kachi ri. <sup>44</sup> Yukan na ti kachi yivi un: "Jito'yo, ¿nama ni ji'i ni soko, xi ni ichi ni nducha, xi ni jikonuu ni nanu chaa ñuu jika, xi ni kumani sa'ma ni, xi ni ku'u ni, xi ni kunde ni vekaa, ti tu ni ka chíndee na ni'in naa

na nu”? ka kachi i. <sup>45</sup> Ti ru'u, chaa kuña'nu kachi ri: “Jandaa kuiti na kachi ri ja tu ni ka sa'a ra sia'an nuu iin yivi nda'u ja'a ja ka kuu i ñani ri, ja kandixia i ru'u, ti sa'a ri ja jiin maa ri ni ka sa'a ra”, kachi ri. <sup>46</sup> Yukan na ti kinkoyo yivi un nuu infiernu naa kondo'o koo nene i ja kuu saa ni. Ti yivi ni sasiin Yandios ja kuu i yivi va'a, nukoyo i nuu kuchaku i ja kuu saa ni—ni kachi Jesús.

*Ka ndajnu'un da nasa jnii da Jesús  
(Mr. 14.1-2; Lc. 22.1-2; Jn. 11.45-53)*

## 26

<sup>1</sup> Nu ni ndi'i ni ka'an Jesús jnu'un un, ti ni kachi ya jiin ndaja'a ya:

<sup>2</sup> —Ja ka jini ra ja uu ni ga kivi, ti jaa yo viko pascua. Ti ru'u, maa Se'e Yivi Ñuyivi, nakua'a yivi ru'u ja na kundaka ri nuu nda'a cruz ja na kuū ri—ni kachi ya.

<sup>3</sup> Ti kivi un ni ka ndututu taka sutu ka kuña'nu un jiin chaa ka xna'an ley ini veñu'un ka'nu un, jiin taka chaa ka kuña'nu ñuu Israel. Ti ni ka ndututu da nuu yux'e el palacio maa sutu kuña'nu ga, ja nani Caifás yukan. <sup>4</sup> Ti yukan ni ka ndajnu'un da nasa jnii xe'e da Jesús, ti ka'ní da ya. <sup>5</sup> Ko kachi da naa da: —Tu sa'a yo ja kuu kivi viko ja'a, chi ndonda yivi siki yo—ni ka kachi da.

*In ña'an ni chu'un perfume xini Jesús  
(Mr. 14.3-9; Jn. 12.1-8)*

<sup>6</sup> Ni kande Jesús ñuu Betania, ti kancha ya ve'e Simón, iin chaa ni ndo'o kue'e ndi'yí te'yí un. <sup>7</sup> Ti nuu yee ya staa, ni tu'va iin ña'an yinda'a ña iin tindo'o lulu alabastro, ti yukan ñu'un chitu aceite perfume ja nchaa ya'u xaan. Ti ni chi'i ña xini Jesús. <sup>8</sup> Nu ni ka jini ndaja'a ya ja sia'an ni sa'a ña'an un, ni ka kiti ini da, ti ni ka keja'a da ka ka'an da:

—¿Ndoo stívi ña'an un aceite perfume un? <sup>9</sup> ¿Ndoo tu ni xiko ña ti ya'u xaan nchaa, ti yukan kenda xu'un ja chindée ña yivi nda'u? —kachi da naa da.

<sup>10</sup> Ni jiniso'o Jesús ja sia'an ka ka'an da, ti ni kachi ya:

—Sia ña, ndoo ka skuiti ra ini ña. Ti iyo va'a iin jniñu ni sa'a ña jiin ri ja'a.

<sup>11</sup> Va yivi nda'u un niní kancha i jiin ra naa ra, ko ru'u, ansu sia'an ni kuncha ri jiin ra naa ra. <sup>12</sup> Jniñu ni sa'a ña ja'a, kuu ja, ja ni chi'i ña aceite perfume siki yikí kuñu ri ja na kotu'va ja kuu kivi jakunduji ri. <sup>13</sup> Ko jandaa kuiti na kachi ri ja sava'ni ga nu nanu na kuichanuu jnu'un ri ja na sketa'u ri yivi, ti suní nuku'un ini yi jniñu ni sa'a ña'an ja'a—ni kachi ya.

*Ni nakua'a Judas Jesús nuu sutu ka kuña'nu  
(Mr. 14.10-11; Lc. 22.3-6)*

<sup>14</sup> Yukan na ti iin ndaja'a Jesús nani Judas, chaa ñuu Cariote, ni jan ka'an da jiin sutu ka kuña'nu un, <sup>15</sup> ti ni kachi da:

—¿Nasa cha'u ni saña nu na nakua'a na Jesús nuu ni naa ni? —ni kachi da.

Yukan ti ni ka cha'u sutu un oko uxi xu'un plata nuu da. <sup>16</sup> Undi kivi un ni keja'a Judas nduku da nasa nakua'a da Jesús nuu nda'a chaa un naa da.

*Ni kuxini Jesús jiin ndaja'a ya  
(Mr. 14.12-25; Lc. 22.7-23; Jn. 13.21-30;  
I Co. 11.23-26)*

<sup>17</sup> Ti maa kivi ni keja'a viko ka yee stila tu yi'i levadura, ti kivi un ni ka tu'va ndaja'a Jesús nuu ya ti ni ka jikajnu'un da ya:

—¿Nanu kuni ni ja sava'a na nuu kuxini yo vijna kivi pascua nusa? —ni ka kachi da.

<sup>18</sup> Ti ni kachi Jesús:

—Kua'an undi nuu ve'e iin chaa un, ti kachi ra jiin da: "Kachi maa Maestro na. Ja ni kuyajni kivi kuū ri, ti ve'e ra kuu nuu sia'a ri viko pascua jiin ndaja'a ri", kachi ra naa ra —ni kachi Jesús jiin ndaja'a ya.

<sup>19</sup> Ni ja'an ndaja'a un, ti ni ka sa'a da nava ni ta'u Jesús jniñu, ti ni ka satu'va da kuxini viko pascua un.

<sup>20</sup> Nu ni kuua ti ni jaa Jesús jiin ndi uxi uu ndaja'a ya, ti ni ka tu'va yu'u mesa ka yee da staa. <sup>21</sup> Ti ni yaji ya staa jiin da naa da, ti ni kachi ya:

—Jandaa na kachi ri, ja iin ro'o ja kanchuku ja'a, kuu ja nakua'a ru'u nuu chaa ka jito u'u ru'u —ni kachi ya.

<sup>22</sup> Yukan ti ni ka kukui'ya xaan ini da naa da ja sia'an ni ka'an ya, ti ni ka keja'a ka jikajnu'un ndi iin ndi iin da ya:

—¿Jito'yo, xi saña kuu nusa? —kachi da naa da.

<sup>23</sup> Ti ni kachi Jesús jiin da naa da:

—Iin ja chuntoo staa stila nuu ko'o ri, yukan kuu ja kin nakua'a ru'u nuu chaa ka jito u'u ru'u. <sup>24</sup> Ti ru'u, maa Se'e Yivi Ñuyivi, ve siuku ndaa ri nava yoso nuu tutu Yandios ja sia'an sa'a yivi jiin ri, ko na nda'u ga chaa kin nakua'a ru'u un. Sa nu tu ni kaku da nikü —ni kachi Jesús.

<sup>25</sup> Yukan na ti ni ka'an Judas, chaa kin nukua'a ya un, ti ni kachi da:

—Maestro, ¿xi saña kuu nusa? —ni kachi da.

Ti ni kachi Jesús:

—Suu ro'o kuu —ni kachi ya.

<sup>26</sup> Ni ka yaji da staa, ni ki'in Jesús iin staa stila, ni nakuanta'u ya nuu Yandios, ti ni sakuachi ya staa stila un, ti ni tejna'an ya nuu ndaja'a ya, ti ni kachi ya:

—Kajii naa ra, chi ja'a kuu nanu yiki kuñu ri —ni kachi ya. <sup>27</sup> Yukan na ti ni ki'in ya iin vasu vino, ni nakuanta'u ya nuu Yandios, ti ni sia'a ya nuu da naa da ja ko'o da ti'li ti'li, ti ni kachi ya:

—Tendi'i ra na ko'o ti'li ti'li ja iñu'un copa ja'a naa ra, <sup>28</sup> chi ja'a kuu nanu niñi ri ja soko ri. Ti niñi ri un stuu ja, ja ni sa'a Tata ri Yandios iin tratu jaa. Ti yukan kuu ja ka'an ndaa kuiti ja nama ri siki kua'a xaan yivi. Chi ja chunaa ri nuu i jiin niñi ri ja katí ri ki'in un. Ti jiin yukan nanita'u kua'a xaan yivi nuu Yandios. Ti kuanka'nú ini ya nuu i, chi ja kenchaa kuachi i naa i. <sup>29</sup> Ko na kachi ndaa ri ja tukaa ga ko'o ri vino ja'a jiin ñanijna'an yo taka jinu ja ka nasa'a i viko ja'a, undi na jaa kivi ko'o yo nuu kancha Tata ri Yandios, chi yukan kuu nuu niñi ri iin jniñu ña'nú ga. Ti yukan ta'u ri jniñu jiin maa ya nuu ni tu'u taka ja iyo. Ti yukan kuu nuu nasa'a jaa yo viko ja'a naa yo —ni kachi Jesús.

*Ni kachi Jesús ja tendi'i ndaja'a ya yu'u  
(Mr. 14.26-31; Lc. 22.31-34; Jn. 13.36-38)*

<sup>30</sup> Nu ni ndi'i ni ka kuxini da, ti ni jita ya iin himno jiin da naa da. Yukan na ti ni kenda ya kua'an ya undi yuku Olivos jiin da naa da, <sup>31</sup> ti yukan ni kachi Jesús jiin da naa da:

—Tendi'i ra yu'u jakuua vijná ja siki ru'u, chi sia'an yoso jnu'un un nuu tutu Yandios: "Kua'a ri jnu'un ja na ka'ní yivi chaa ndito ri un, ti yu'u ri un naa ti, ti kuichanuu ti kinkoyo ti", kachi tutu. <sup>32</sup> Ko nu na nandoto ri, ti kandu ri ki'in ri iñu Galilea, ti sa jakoyo ra naa ra —ni kachi ya.

<sup>33</sup> Yukan ti ni kachi Pedro:

—Vasu tendi'i da na yu'u, ti kunu da kinkoyo da ko saña, chi tu yu'u kuiti na —ni kachi da.

<sup>34</sup> Yukan ti ni kachi Jesús jiin da:

—Jandaa na kachi ri nuu ra ja, jakuaa vijna nu ti kana ga li'i, ti ja ka'an ra uni jinu ja chisa'yí ra ru'u, ti ro'o kachi ra ja tu jini ra ru'u —ni kachi ya.

**35** Ti ni kachi Pedro jiin ya:

—Vasu na kuū na jiin ni, ko tu chisa'yí na ni'in —ni kachi da.

Ti suni sia'an ni ka kachi taka ga ndaja'a ya naa da.

*Ni jikanta'u Jesúsu nuu jardín Getsemaní*  
(*Mr. 14.32-42; Lc. 22.39-46*)

**36** Ni jaa Jesúsu jiin ndaja'a ya iin nuu nani Getsemaní, ti ni kachi ya jiin da naa da:

—Ja'a ni kunchuku ra naa ra, ti ru'u na kin kakanta'u ri yukan —ni kachi ya.

**37** Ni kana ya Pedro jiin ndinduu se'e yíi Zebedeo kua'an ya jiin, ti ni keja'a kukui'ya xaan ini ya, ti ni keja'a ndi'i ini ya. **38** Ti ni kachi ya jiin da naa da:

—Jatu añu ri ja kukui'ya xaan ini ri, chi ja ni kuyajni kuu ri. Ti ja'a ni kundatu ra naa ra ti koto kusu ra —ni kachi ya.

**39** Ti ni jika ya ti'li ga. Ti yukan ni jankunjiti ya undi nuu ñuu'un, ti ni jikanta'u ya nuu Yandios, ni kachi ya:

—Tata na Yandios, nu kuu ti chajijo ni nundo'o kii siki na un ja'a, ti nama ni saña. Ko ansu nava kuni maa na, chi na kuu nava kuni maa ni —kachi ya.

**40** Ni nandeokuñi ya nuu kanchuku ndaja'a ya, ti ni jini ya ja ka kixi da, ti ni ka'an ya jiin Pedro:

—¿Xi tu ni kuu kundito ra ti'li jiin ri vasu ti iin hora nu? **41** Kondito naa ra, ti kakanta'u nuu Yandios nava tu kotojnuni ja'u'u un ro'o, ti chisa'yí ra ru'u. Chi jandaa ndixia ja añu ra, chi iyo ndee ini, ko yiki kuñu ra kuu ja tu iyo ndee ini —ni kachi ya.

**42** Ti kua'an tuku ya jinu kuu uu, ti sia'an ni jikanta'u tuku ya:

—Tata na, ti nu tu kuu kuxio nundo'o ja'a siki na, nusa ti na kuu nava kuni maa ni —ni kachi ya.

**43** Ni nandeokuñi tuku ya nuu kanchuku ndaja'a ya un, ko ja ka kixi tuku da, chi tukaa ga kundee nduchi da jiin ma'na. **44** Ni xndoo ya maa da, ti kua'an tuku ya jinu kuu uni ni jikanta'u tuku ya nuu Yandios, nava ni jikanta'u ya undi nuu. **45** Yukan na ti ni najaa tuku ya nuu kanchuku ndaja'a ya un, ti ni kachi ya:

—Vijna na, ndetatu ti kusu naa ra. Chi ja ni jaa hora ja ru'u, maa Se'e Yivi Ñuyivi, nakua'a yivi ru'u nuu yivi ka nchakuachi. **46** Ndoko naa ra na cho'o, chi ja vaji chaa ni nakua'a ru'u un —ni kachi ya.

*Ni ka jnii da presu Jesúsu*  
(*Mr. 14.43-50; Lc. 22.47-53; Jn. 18.2-11*)

**47** Ti ni ka'an ga ya sia'an jiin da naa da, ti ja ni kenda Judas, iin chaa ni kuu ndaja'a ya un. Ti ka jindandikun kua'a xaan yivi kuaja jiin da, ti ka yinda'a espada jiin yujnu. Ti yivi un ka kuu ja ni ka taji sutu ka kuña'nu jiin taka chaa ka kuña'nu nuu ñuu Israel. **48** Ti Judas ja ni ndajnu'un va'a da jiin chaa un naa da:

—Chaa kanxia'u ri jiin, ti teyu'u ri nuu, yukan kuu ja ka nanduku yo. Ti chaa yukan jnii ra naa ra —ni kachi da.

**49** Yukan ni jaa Judas, ni tu'va da nuu Jesúsu, ti ni kachi da:

—Too ni kuaa, maestro —ni kachi da.

Ti ni teyu'u da nuu Jesúsu.

**50** Yukan ti ni kachi Jesúsu jiin da:

—¿Ti ro'o, naa siki vaji ra nusa? —ni kachi ya.

Yukan ti ni ka tu'va chaa un, ni ka jnii da presu ya, ti kuankoyo da jiin ya.  
**51** Ti iin chaa ka'iin jiin Jesús yukan, ni tava da espada da, ti ni ja'ncha da so'o iin chaa kuu muzu nuu sutu kuña'nu ga un. **52** Yukan ti ni kachi Jesús jiin da:

—Na sava'a espada ra. Chi taka yivi kanaa jiin espada, suni jiin espada un kuu i. **53** ¿Xi tu jini ra ja kuu kakanta'u ri nuu Tata ri, ti vijna ūni taji ya vi'i ga uni xiko uxi uu mil ángel ja ka junukuachi nuu ya, ja na kii nama ya ru'u nu? **54** Ko nu na kii nama ángel un ru'u, ti va tu kuu kundaa nava yoso nuu tutu Yandios ja sia'an kondo'o ri —ni kachi ya.

**55** Yukan na ti ni ka'an Jesús jiin yivi kua'a un:

—¿Va nu iin chaa kui'na kuu ri, xi ni ndonda ri siki gobierno nu? ¿Xi ndoo kuu ja vekoyo ra jiin espada jiin yujnu ja ve jnii ra ru'u nusa? Taka kivi ni kuncha ri jiin ra naa ra ini veñu'un ka'nu un, na ni xndaku ri nuu ra naa ra, ti tu ni ka jnii ra presu ru'u. **56** Ko sia'an kuu nava na kundaa nava yoso nuu tutu ja ni ka chaa profeta najana'an, na ni ka ka'an da jnu'un Yandios —ni kachi Jesús.

Yukan na ti tendi'i ndaja'a ya un ni ka yu'u da, ni ka xndoo da ma'iin ni ga Jesús, ti ka jinu da kuankoyo da.

*Kandichi Jesús nuu chaa ka kuña'nu nación Israel  
 (Mr. 14.53-65; Lc. 22.54-55, 63-71;  
 Jn. 18.12-14, 19-24)*

**57** Ti chaa ni ka jnii presu Jesús, kuankoyo da jiin ya undi nuu sutu kuña'nu ga nani Caifás. Yukan ni ka ndututu taka chaa ka xna'an ley un jiin taka chaa ka kuna'nu ūuu Israel. **58** Ti Pedro jika ni ndikun da kua'an da undi ni jaa da yuxe'e sutu kuña'nu ga un. Yukan ni kivi da, ti ni nukoo da jiin chaa ka kuu policia un, ja na kuni da nasa sa'a chaa un jiin Jesús naa da.

**59** Taka sutu ka kuña'nu un jiin chaa ka kuña'nu nación Israel un, jiin yivi ni ka ndututu nuu junta kuña'nu nación Israel un, ka nduku da iin jnu'un nasa chakuachi da siki Jesús, vasu iin kuachi ūaa, nava na ka'nii da ya. **60** Ko tu ni ka ni'in da na jnu'un chakuachi da siki ya, vasu kua'a yivi ni ka chakuachi ūaa siki ya. Ti sandi'i ni ga ni ka kenda uu chaa ni ka chakuachi siki ya, **61** ti ni ka kachi da:

—Chaa ja'a ni kachi: “Ru'u, kuu xnaa ri veñu'un Yandios, ti nuu uni kivi ti nasa'a jaa tuku ri”, ni kachi da —kachi da naa da.

**62** Yukan na ti ni ndokuiñi sutu kuña'nu ga un, ti ni kachi da jiin Jesús:

—¿Tu ka'an kuiti ra nusa? ¿Naa jnu'un kuu ja ka ka'an kuachi chaa ja'a siki ra nusa? —kachi da.

**63** Ko Jesús tu ni ka'an kuiti ya. Yukan na ti sutu kuña'nu ga un ni kachi jiin ya:

—Jin sivi Yandios chaku, ka'an ndaa kuiti ri jiin ra, ti kachi ndaa kuiti nu maa ra kuu Cristo, Se'e Yandios —ni kachi da.

**64** Yukan na ti ni kachi Jesús:

—Ru'u kuu nava ni ka'an ra un. Ti suni na kachi ri nuu ra naa ra ja ru'u, undi vijna kuni ra naa ra ja maa ri kuu maa Se'e Yivi ūuyivi, kino'on ri andivi, ti yukan nukoo ri nda'a kua'a Yandios ja na kundiso ri iin jniñu ūnu jiin ya, ti kuni ra ru'u naa ra ndii ri nuu viko nuu andivi un —ni kachi ya.

**65** Ti sutu kuña'nu ga un, nu ni jiniso'o da jnu'un ni ka'an ya, ni ndata da sa'ma da ja ni kitii xaan ini da, ti ni kachi da:

—¡Yisikinchaa chaa ja'a Yandios jiin jnu'un ka'an da un! ¿Nau ga inga testigo nandi'i yo nusa? Ti ja ni ka jiniso'o ra taka jnu'un ni ka'an da un. **66** ¿Ti nasa ka ndo'o ini ra naa ra nusa? —ni kachi da.

Ti tendi'i yivi un ni ka kachi:

—Nchakuachi da ja ka'an da sia'an, ti va'a ga ja na kuū da —ni ka kachi.

<sup>67</sup> Yukan na ti ni ka tivi si'i da nuu ya, ti ni ka ja'a da tau ya jiin jiki. Ti sava ga da ni ka katu da nuu ya, <sup>68</sup> ti ka kachi da naa da:

—Nu maa ra kuu Cristo, ti kachi nau ja ni kani ro'o —kachi da naa da.

*Ni kachi Pedro ja tu jini da Jesús*

(*Mr. 14.66-72; Lc. 22.56-62;*

*Jn. 18.15-18, 25-27*)

<sup>69</sup> Ti nu kancha Pedro nuu yux'e un, ni kenda iin ña'an junukuachi un, ni tu'va ña nuu da, ti ni kachi ña:

—Ro'o, suni ni yaku ra jiin Jesús, chaa ñuu Galilea un —ni kachi ña.

<sup>70</sup> Ko Pedro tu ni kachi ndaa kuiti da, ti ni kachi da:

—Tu jini ri naa jnu'un ka'an ra —ni kachi da.

<sup>71</sup> Ni kenda Pedro yux'e un, ti yukan ni jini inga ña'an un nuu da, ti ni kachi ña jiin yivi ka'iin un:

—Chaa ja'a, suni ni jikonuu da jiin Jesús, chaa ñuu Nazaret un —kachi ña.

<sup>72</sup> Ko tu ni kachi ndaa tuku Pedro, ti nanu ja ni ka'an ndaa da, ni kachi da:  
—Tu jini ri naa chaa kuu ja ka'an ra un —ni kachi da.

<sup>73</sup> Ni kuu nuu ga, ti ni ka tu'va chaa ka'iin un nuu Pedro, ti ni ka kachi da:

—Jandaa ndixia kuu ja suni jna'an chaa un kuu ra, chi janyii ni ka'an ra yu'u chaa Galilea —kachi da naa da.

<sup>74</sup> Yukan ti kuan ni'in Pedro ja tu jini da, ti tu jini da, ti ni kachi da:

—Tu jini kuiti ri chaa yukan —ni kachi da.

Ti ni ka'an ga da sia'an, ni kana ni iin li'i. <sup>75</sup> Yukan ti ni nuku'un ini Pedro jnu'un ni ka'an Jesúus jiin da: "Ja nu ti kana ga li'i, ti chisa'yí ra ru'u uni jinu ja tu jini ra ru'u." Ti yukan ni nakani xaan tonto ini da, ni kenda da kua'an da, ti ni nde'e xaan tonto da ja jnu'un kui'ya ini.

*Ni ka nakua'a da Jesús nuu Pilato*

(*Mr. 15.1; Lc. 23.1-2; Jn. 18.28-32*)

## 27

<sup>1</sup> Nu kuan kundijin, ti ni ka ndajnu'un taka sutu ka kuña'nun jin taka chaa ka kuña'nun ñuu Israel naa da, nasa kuu ka'ni da Jesúus. <sup>2</sup> Ni ka ju'ni da ya ti ni ka yinda'a da ya nuu Poncio Pilato, chaa romano ja ni kuu da gobernador.

*Ni jí'i Judas*

(*Hechos 1.16-19*)

<sup>3</sup> Nu ni jini Judas ja kuankoyo da jiin Jesúus ja na ka'ni da ya, ni nakani xaan tonto ini da. Ti ni nakua'a da ndi oko uxi xu'un plata un nuu sutu ka kuña'nun un jiin taka chaa ka kuña'nun ñuu Israel un, <sup>4</sup> ti ni kachi da nuu da:

—Ni chakuachi na maa na, ja ni nakua'a na iin chaa tu ni iyo ni iin kuachi, ja na kuú da —ni kachi Judas.

Yukan ti ni ka kachi chaa un jiin da:

—Ja yukan, tundo ka jitu ini ru'u naa ri. Ti yukan kuu kuachi maa ra —ni ka kachi da jiin Judas.

<sup>5</sup> Yukan ti ni siukoyo Judas ndi oko uxi xu'un plata un ini veñu'un un, ti ni kee da kua'an da. Ti ni skua'ña da maa da.

<sup>6</sup> Sutu ka kuña'nun un ni ka nastutu da xu'un un, ti ni ka kachi da:

—Tu kuu nachu'un yo xu'un ja'a nuu ñu'un xu'un ka soko yivi un naa i, chi xu'un ya'u nuu niñi kuu —ni ka kachi da.

<sup>7</sup> Yukan ti ni ka ndajnu'un da ja kuan da iin ndu'va ñu'un kixin nuu ka sa'a da kisi un. Ti nuu ñu'un yukan kuu nuu chunduji da yivi ñuu jika naa i. <sup>8</sup> Ja

yukan kuu ja undi vijna nani ñu'un un ndu'va niñi. <sup>9</sup> Yukan ni kundaa nava ni ka'an Jeremías, chaa ni kuu profeta, ja ni kachi da: "Ni ka ki'in da ndi oko uxi xu'un plata un, ja ni kuu xu'un ni kuya'u iin chaa va'a ja ni ka xiko maa chaa ka kuña'nu ñuu Israel naa da. <sup>10</sup> Ti jiin xu'un un ni ka nakuan da ndu'va ñu'un kixin un. Ti yukan kuu jnu'un ni xndaku jito'o na Yandios nuu na", ni kachi Jeremías.

*Kandichi Jesús nuu Pilato  
(Mr. 15.2-5; Lc. 23.3-5; Jn. 18.33-38)*

<sup>11</sup> Ni ka yinda'a da Jesús nuu gobernador, ti chaa un ni jikajnu'un da ya:  
—¿Maa ra kuu rey chaa Israel nu? —ni kachi da.

Ti ni kachi Jesús:

—Maa ri kuu, nava ni kachi ra. Kuu —ni kachi ya.

<sup>12</sup> Ti taka sutu ka kuña'nu un jiin chaa ka kuña'nu ñuu Israel ka kankuachi da siki Jesús, ko maa ya tu ni ka'an kuiti ya. <sup>13</sup> Yukan ti ni kachi Pilato jiin ya:  
—¿Ñuso'o ra taka jnu'un ka kankuachi yivi ja'a siki ra nu? —kachi da.

<sup>14</sup> Ko Jesús, tu ni ka'an kuiti ya ni iin jnu'un. Ti chaa kuu gobernador un, so ni naa ini da, ti so ni sa'u ini da, chi tu kujnuni ini da nasa sa'a da.

*Ni kachi Pilato ja na kuū Jesús  
(Mr. 15.6-20; Lc. 23.13-25; Jn. 18.38-19.16)*

<sup>15</sup> Tí ni iyo jnu'un maa chaa kuu gobernador un, ja sia da iin presu ja kuu kivi viko pascua un, nuu nau ja na nakaji yivi ja na sia da. <sup>16</sup> Ti kivi un kande presu iin chaa nani Barrabás, ja ni sasiin da yivi, ti ni ndonda da siki gobierno. <sup>17</sup> Ti nu ni ka ndututu kua'a xaan ga yivi un nuu Pilato, ti Pilato ni jikajnu'un da nuu yivi un:

—¿Nau chaa ka kuni ra naa ra ja na sia ri nusa? ¿Sia ri Barrabás, xi sia ri Jesús ja ka skonani ra Cristo naa ra nu? —ni kachi Pilato.

<sup>18</sup> Sia'an ni ka'an da, chi kuni nama da Jesús, chi ni jini da ja siki jnu'un kuasun ini ni ka nakua'a sutu un Jesús nuu da.

<sup>19</sup> Ni nukoo Pilato mesa nuu ta'u da jniñu un, ti undi nuu kancha da un ni taji ñasi'i da razón nuu da, ni kachi ña: "Sia chaa jña. Koto ma nde'e ra ndo kuu siki da, chi kuu da iin chaa va'a, ndo kúní ni siu'u xaan iin jani ru'u, ja siki chaa jña", kachi ña. <sup>20</sup> Ko sutu ka kuña'nu un jiin taka chaa ka kuña'nu un, ni ka ska'an da yivi ja na kakan i ja na sia Pilato Barrabás, ti na ka'ní da Jesús. <sup>21</sup> Yukan ti ni jikajnu'un tuku chaa kuu gobernador un nuu yivi, ti ni kachi da:

—Ja ndinduu chaa ja'a, ¿nau chaa ka kuni ra ja na sia ri ki'in nusa? —ni kachi da.

Ti ni ka kachi yivi un:

—Sia ni Barrabás —ni ka kachi.

<sup>22</sup> Yukan ti ni jikajnu'un Pilato yivi un:

—¿Ti ndoo sa'a ri jiin Jesús, ja ka skonani Cristo nusa? —ni kachi da.

Yukan ti tendi'i yivi un ni ka kachi:

—¡Katacaa ni da nda'a cruz, na kuú da! —ni ka kachi.

<sup>23</sup> Yukan na ti ni kachi tuku Pilato jiin yivi un:

—¿Ti nau kuachi ni sa'a da nusa? —ni kachi da.

Ko vi'i ga ni ka keja'a kana ko'o yivi un:

—¡Katacaa ni chaa jña nda'a cruz, na kuú da! —ni ka kachi naa.

<sup>24</sup> Nu ni jini Pilato ja tu kundee da jiin yivi un, chi vi'i ga ni ka ndondaa i, ka kuvaai, yukan ti ni jikan da nducha, ti ni nanda'a da nuu yivi kua'a un, ti ni kachi da:

—Tu ki'in kuachi siki ri ja kuu chaa va'a ja'a, chi na ki'in kuachi siki maa ra naa ra —ni kachi da.

<sup>25</sup> Ti ni ka kachi tendi'i yivi kua'a un:

—Na kunchakuachi siki maa na naa na jiin se'e na ja kuu saa ni, nuu niñi chaa jña nu na kuū da —ni ka kachi naa.

<sup>26</sup> Yukan na ti ni sia Pilato Barrabás kua'an da. Ti ni ta'u da jniñu ja na kua'a da tau Jesús. Yukan na ti ni nakua'a da ya nuu yivi un ja, na katacaa da ya nuu nda cruz.

<sup>27</sup> Yukan na ti soldado chaa kuu gobernador un kua'an da jiin Jesús ichi yux'e palacio un, ti ni ka nastutu jna'an tendi'i kuiti da nuu ya naa da. <sup>28</sup> Ni ka tevichi da ya jiin sa'ma ñu'un ya, ti ni ka naskui'na da ya jiin iin sa'ma kua'a vixi. <sup>29</sup> Ni ka sa'a da iin corona iñu, ni ka chuxndee da xini ya. Ti ni ka chi'i da iin yujnu xii nda'a kua'a ya. Yukan na ti ka jakunjiti da nuu ya ja ka kuu ichi ini da nuu ya, ti ni ka kachi da:

—Too ni ndii, Rey chaa Israel. Na kuchaku na'an ni —kachi da naa da.

<sup>30</sup> Ti ka tivi si'i da nuu ya. Ka ki'in da yujnu xii yijni ya un, ti ni ka kani da xini ya. <sup>31</sup> Ni ndi'i ni ka ske ichi da ya, ja ni ka sa'a ndeva'a da jiin ya. Yukan na ti ni ka tava da sa'ma kua'a vixi ñu'un ya, ti ni ka naskui'na tuku da ya jiin sa'ma maa ya. Ti kuankoyo da jiin ya ja na kundaka ya nda'a cruz.

### *Ja ni ka jatacaa da Jesús nda'a cruz (Mr. 15.21-32; Lc. 23.26-43; Jn. 19.17-27)*

<sup>32</sup> Nu ni ka kee da kuankoyo da, ti ni ka ndejna'an da jiin iin chaa ñuu Cirene ja nani Simón, ti ni ka chayika da chaa un ja na kundiso da cruz Jesús. <sup>33</sup> Ti sia'an kuankoyo da undi ni ka jakoyo da nuu nani Gólgota, ti jnu'un un kuni ka'an "ñu'un yiki xini." <sup>34</sup> Yukan ni ka sko'o da Jesús vino sakantujiin mirra, ja na ko'o ya nava tu ndo'o xaan ya ja jatu ya. Ko ni soyu'u ya ti'li, ti tukaa ga ni jí'i ya.

<sup>35</sup> Nu ja ni ka jatacaa da Jesús nda'a cruz, ti soldado un ni ka chu'un da suerte, ja na tejna'an nuu jna'an da sa'ma ya naa da. Yukan ni kundaa nava ni kachi profeta sia'an: "Ni ka chu'un da suerte siki sa'ma ri, ti ni ka ki'in da."

<sup>36</sup> Yukan na ti ni ka nukoo da un ja na kundito da ya. <sup>37</sup> Ti ichi xini ya yukan ni ka chaa da iin tutu ja ka'an naa siki ni jí'i ya. Ti nuu tutu un yoso sia'an: "Ja'a kuu Jesús, chaa kuu Rey yivi nación Israel."

<sup>38</sup> Suni ni ka jatacaa da uu ñakui'na jiin ya, iin da nda'a kua'a ya, ti inga da nda'a sajni ya. <sup>39</sup> Ti yivi ka ya'a ichi yukan, ka ku ichi ini nuu ya, ti ka skuiko i xini i, <sup>40</sup> ti ka ka'an ndeva'a kuiti i:

—Ro'o ja ni ka'an ra ja xnaa ra veñu'un ka'nú Israel, ti nuu uni kívi ni ti nakani jaa tuku ra, nama maa ra vijnna. Ti nu Se'e Yandios kuu ra, ti kuan kuan nda'a cruz jña —kachi naa.

<sup>41</sup> Ti suni sia'an ka cu ichi ini chaa ka kuu sutu kuña'nu un, jiin takaa chaa ka xna'an ley un, jiin suni chaa fariseo, jiin takaa ña'nu ñuu Israel un, ti ka ka'an da:

<sup>42</sup> —Ni nama da sava yivi ko vijnna na, ti tu kuu nama da maa da. Ti nu ndixia da ja maa da kuu Rey yivi ñuu Israel, na kii kuun da nda'a cruz un, ti sa na kandixia yo jnu'un ka'an da. <sup>43</sup> Ni kuu kanu ini da Yandios. Ti maa Yandios na nama ya maa da vijnna nusa, nu ndixia da ja kuu ini Yandios maa da. Chi maa da ni kachi da nuu yo ja maa da kuu Se'e Yandios —ni ka kachi da.

<sup>44</sup> Suni ñakui'na ka ndakoyo nda'a cruz un, suni sia'an ni ka ku ichi ini nuu ya.

*Ni ji'i Jesús  
(Mr. 15.33-41; Lc. 23.44-49; Jn. 19.28-30)*

**45** Yukan ti ni kuñaa ni tu'u ñuyivi, ni keja'a undi sava nduu, ti kua'an undi ka uni ja'ini. **46** Ti hora un ni kanajiin Jesús:

—Elí, Elí, ¿lama sabactani? —ni kachi ya. Ti jnu'un un kuni ka'an: “Yandios maa na, Yandios maa na, ¿ndoo ni xndoo maa iin ni saña vijna”? —ni kachi ya.

**47** Ti sava yivi ka'iin un ni ka jiniso'o ja sia'an ni kanajiin ya, ti ni ka kachi:

—Kunso'o naa ra, chi kana da xini profeta Elías —kachi naa.

**48** Yukan ti jinu iin chaa un ni jan ki'in da ti'lli kachi, ni chuntoo da nuu vino iya, ti ni chuxndee da xini iin yujnu kani, ti ni chaa da yu'u ya ja na ko'o ya.

**49** Ko uu ga da ni ka kachi:

—Sia da, na nde'e yo nu kii Elías kii nama da chaa —ni ka kachi.

**50** Yukan na ti ni kanajiin ko'o Jesús, ti ni ji'i ya. **51** Ti maa hora ni ji'i ya un, ni te'nde sava sa'ma yindaka ini veñu'un ka'nu Israel un. Ja undi nuu sukun, ti undi nuu ja'a ni ndata. Ni ni'in ñuyivi jiin iin ñujnaa. Ti ni ka ndata kava un.

**52** Ti kua'a ñaña ndiyi un ni ka nuña, ja ni ka nandoto yiki kuñu yivi kua'a ni ka kandixia ndaa Yandios ja ja ni ka ji'i un. **53** Nu ni nandoto Jesús, ti ni ka ndenda yivi ni ka nandoto un, ni ka ndivi iñuu ii Jerusalén, ti kua'a yivi ni ka nakuni nuu i.

**54** Nu ja ni ji'i Jesús, ti capitán soldado un jiin taka ga da ja chaa ka ndito Jesús, nu ni ka jini da ja sia'an ni kuu ja, ja ni ni'in ñu'un jiin taka ga ja ni kuu un, ti ni ka yu'u xaan da, ti ni ka kachi da:

—Jandaa kuiti kuu ja Se'e Yandios ni kuu chaa ja'a —kachi da naa da.

**55** Ti yajni un, ni ka'iin tjiní ñasi'i, ka nde'e ña, ña'an un ni ka kuu ña'an ni ka kii jiin Jesús undi ñuu Galilea, ja ka chindee ña maa ya. **56** Ti ña'an un ka kuu María ñaa ñuu Magdala, María nana Jacobo jiin José, jiin nana se'e yií Zebedeo.

*Ni jakunduji Jesús  
(Mr. 15.42-47; Lc. 23.50-56; Jn. 19.38-42)*

**57** Nu kuan kuaa, ti ni jaa iin chaa ñuu Arimatea nani José, ni kuu da iin chaa riko ja suni ni skua'a da jiin Jesús. **58** Ni jan kakan da yiki kuñu Jesús nuu Pilato. Ti Pilato ni ta'u da jniñu ja na kua'a soldado un yiki kuñu Jesús nuu José. **59** Ni ki'in José yiki kuñu Jesús, ti ni suku da ya jiin iin manta finu, **60** ti ni chunde da ya ini iin yau jaa, ja ni jacha maa da jika iin kava. Ni jasi da yu'u yau un jiin iin yuu ka'nú. Yukan na ti kua'an da. **61** Ti yukan ka'iin María ñaa ñuu Magdala jiin inga María, kanchuku ña yu'u ñana nuu ni chunde da Jesús yukan.

*Chaa ni ka ndito nuu ñunduji Jesús*

**62** Ti inga kivi, ja kuan kuyajni kivi ndetatu, ti ka ja'an chaa ka kuu sutu ka kuñá'nu un, jiin chaa fariseo nuu kande Pilato, **63** ti ni ka kachi da:

—Ni'in Pilato, ni ka nuku'un ini na ja ni kachi chaa ni xndoña'an un, na ni chaku ga da, ja nu uni kivi ti nandoto tuku da. **64** Yukan kuu ja ta'u ni jniñu, ti na ndi'yu va'a yu'u yau un undi kivi uni. Sandau kinkoyo ndaja'a da un jakuua, ti tava da yiki kuñu chaa un, ti kachi da naa da nuu yivi ja, ja ni nandoto ndixia da nuu ñuji'i. Chi nu siukan na, ti vi'lí ga xndoña'an da yivi naa i —ni kachi da.

**65** Yukan ti ni kachi Pilato jiin da naa da:

—Kuankoyo maa ra naa ra, kunda'a nasa soldado kuni maa ra naa ra. Ti sal'a kutu yu'u ñaña un nava ka kuni maa ra —ni kachi da.

**66** Yukan na ti kuankoyo chaa un naa da, ti va'a xaan tonto ni ka sakutu da yu'u ñaña un. Ti ni chunsama da uu yo'o siki yuu un, ndi kuun jiki ja kuu nanu iin sello da naa da. Ti ni ka xndoo da soldado un ka ndito da.

**Ni nandoto Jesús**  
(Mr. 16.1-8; Lc. 24.1-12; Jn. 20.1-10)

## 28

**1** Nu ni ya'a kivi ndetatu un, ti ja kuan kundijin kivi nukuñi semana, ti María ñaa ñuu Magdala, jiin inga María un, kuankoyo ña kuan nde'e ña nuu ñunduji Jesús. **2** Ti hora un ni kii iin ñujnaa xaan. Sia'an ni kuu, vanuxia iin ángel junukuachi nuu Yandios, ni kuun ya ichi andivi vaji ya, ti ni chaa ya yu'u ñaña un, ni stuncha ni ya yuu ndi'yu un kua'an, ti ni nukoo ya siki. **3** Janducha ii ya nanu taja, ti sa'ma ñu'un ya xkiyí ni'ní. **4** Nu ni ka jini soldado un nuu ángel un, ti ni ka ni'in da naa da ja ni ka yu'u da, ti so ni ka sana ini da nanu ndiyi.

**5** Yukan na ti ni kachi ángel un jiin ñasi'i un naa ña:

—Koto yu'u ra naa ra. Ja jini ri ja ka nanduku ra Jesús, yaa ni ka jataakaa yiví nda'a cruz un. **6** Ko tukaa ga kande ya ja'a, chi ja ni nandoto ya nava ni kachi ya. Ña'an ti nde'e naa ra nuu ni katuu ya. **7** Vijnna na ti kuankoyo yachi naa ra, ti kani ra jnu'un nuu ndaja'a ya: "Chi ni ji'i ya ko ja ni nandoto ya, ti koxnuu ya ki'in ya ñuu Galilea sa kinkoyo ra. Ti yukan nakuni ra ya naa ra." Jnu'un ja'a vee kachi ri nuu ra naa ra —ni kachi ángel un jiin ña naa ña.

**8** Yukan na ti kuankoyo ña, ni ka nduñama si'i ña vasu ka yu'u ña, ko suni ka kusii ini ña. Ti kuan kaxnu'un ña nuu ndaja'a Jesús. **9** Ko ni kuankoyo ña ichi un, ti ni ka ndejna'an ña jiin Jesús, ni kanxia'u ya jiin ña naa ña. Ti maa ña ni ka tu'va ña nuu ya, ni ka nanuu ña ja'a ya ja ni ka nachiñu'un ña ya. **10** Ti maa ya ni kachi ya jiin ña:

—Koto yu'u ra naa ra. Kuan kaxjnu'un nuu chaa ka kandixia ru'u ja na kinkoyo ñuu Galilea, ti yukan ndejna'an ri jiin yiví un naa i —ni kachi ya.

**Jnu'un ni ka jani soldado un**

**11** Ni kuankoyo ñasi'i un naa ña, ti sava soldado ni ka ndito un, kuan nukoyo da ñuu un, ti ni ka jani da jnu'un taka nava ni kuu un nuu sutu ka kuña'nu un. **12** Ti sutu un ni ka kee ni ka ja'an ka'an jiin taka chaa ka kuña'nu un, ti yukan ni ka ndajnu'un nava iin ni jnu'un na koo yu'u da naa da. Yukan ti ni ka ja'a da xu'un kua'a nuu soldado un, **13** ti ni ka kachi jiin da:

—Ro'o, kachi ra naa ra ja ni ka naa ini ra ni ka kixi ra jakuua un, ti ni jakoyo ndaja'a Jesús, ti ni ka sakui'na da yiki kuñu chaa un. **14** Ti nu na kuni gobernador jnu'un un, ti maa ri na ka'an jiin da, ti na nama ri siki ro'o naa ra —ni ka kachi da.

**15** Ni ka ki'in soldado un xu'un un ti kuankoyo da, ti ni ka kachi da nava ni ta'u jniñu nuu da. Ti jnu'un ni ka ka'an soldado un, ni kendo ka ka'an yivi nación Israel undi kivi vijnna.

**Jniñu ni tatu Jesús nuu apóstol ya**  
(Mr. 16.14-18; Lc. 24.36-49; Jn. 20.19-23)

**16** Yukan na ti ndi uxi iin ndaja'a ya un kuan nukoyo da ñuu Galilea, undi yuku nuu ni kachi Jesús ja kinkoyo da. **17** Nu ni ka jini ndaja'a un nuu ya, ti ni ka nachiñu'un da ya. Ko uu ga da, tu ka kandixia va'a da ja maa ya kuu.

**18** Yukan ni tu'va maa ya nuu da naa da, ti ni kachi ya:

—Ja ni ja'a Yandios iin jniñu ña'nu nuu ri ja na kuña'nu ri nuu sava'a ni ga ja iyo nuu ni ka'nú ñuyiví jiin andivi. **19** Vijnna na ti na tatu ri iin jniñu ja'a nuu ra naa ra. Kuankoyo nuu yiví taka nación, ti xna'an ra jnu'un ri nuu i nava

na kandixia i ru'u. Ti skuanducha ra i nu ja ni ka kandixia ndaa i maa Tata yo Yandios, jiin Se'e ya, jiin Espíritu Santo. <sup>20</sup> Ti xna'an ra ja na kuandatu i taka jniñu ni ta'u ri nuu ra naa ra. Ti ku'un ini ra ja kancha ri jiin ra naa ra taka ni kiví undi na ndil'i ñuyivi. Ti sia'an na koo —kachi ya.

Ja'a kuu jnu'un Yandios ni chaa Mateo.

## Jnu'un Yandios ni chaa Marcos

*Jnu'un Juan, chaa skuanducha  
(Mt. 3.1-12; Lc. 3.1-9, 15-17; Jn. 1.19-28)*

<sup>1</sup> Ja'a keja'a jnu'un Jesús, ya kuu Cristo, Se'e Yandios. Ti jnu'un un kuu ja ni kii ja ja ni nama ya yo'o. <sup>2</sup> Chi sia'an ni chaa profeta Isaías tutu, na ni ka'an da jnu'un Yandios undi na jana'an. Ti ni chaa da jnu'un Juan nuu tutu sia'an: "Kunso'o ra", kachi Yandios jiin Se'e ya, chi taji ri ndaja'a ri.

Koxnuu da ki'in da, ti xndaku da nuu yivi naa i, ja na kotu'va i ja kuu kivi jaa ra.

<sup>3</sup> Ti kunde chaa un undi nuu ñuu'un te'e un, ti ka'an ni'in da nuu yivi sia'an: "Kotu'va ra naa ra, chi ja yajni chaa Jito'yo. Ti kuni ja na kaka ndaa ra", kachi da, ni kachi Yandios jiin Se'e ya.

Ni kachi Isaías.

<sup>4</sup> Yukan ti ni kundaa jnu'un Yandios nava ni kachi Isaías, chi ni kenda Juan undi nuu ñuu'un te'e un. Ti kua'a yivi vekoyo ja na skuanducha da i, ti ni kachi da:

—Nakani ini nuu kuachi ra naa ra, ti kuanducha naa ra nava na kuanka'nu ini Yandios nuu kuachi ra —kachi da.

<sup>5</sup> Ti kua'a yivi ñuu Jerusalén jiin kua'a yivi ndañuu Judea ni ka ja'an kunso'o i jnu'un ni ka'an Juan. Ti yivi un, nu ni ka kachi i ja ni ka nakani ini i nuu kuachi i, yukan na ti skuanducha da i ini yucha Jordán.

<sup>6</sup> Ti sa'ma Juan ni kuu jiin ixi camellu. Ni yi'i iin sanchi ñii chii da. Ndeyu da ni kuu ndikua'yí jiin nduxi ñuñu yuku. <sup>7</sup> Ti sia'an ni xndaku Juan nuu yivi:

—Kuan kuyajni iin chaa kuña'nú ga ja kuu ru'u. Ti kuña'nú ga da ja tu kuu kandu ri nuu da. <sup>8</sup> Ti maa da tu skuanducha da ro'o jiin nducha nanu sa'a ru'u, chi chaa un skuanducha da ro'o jiin Espíritu Santo naa ra. Ti yaa yukan kuu ya kuncha jiin ra naa ra —ni kachi Juan.

*Ni janducha Jesús  
(Mt. 3.13-17; Lc. 3.21-22)*

<sup>9</sup> Yukan ti ni kee Jesús ñuu Nazaret, ja kuu ndañuu Galilea. Ti ni skuanducha Juan ya ini yucha Jordán. <sup>10</sup> Nu ni kee Jesús ini nducha un, ni ti nuña andiví nuu kancha Yandios, ti ni jini Jesús ja vaji Espíritu Santo siki ya, ti kaa ya nanu kaa iin sata. <sup>11</sup> Ti ichi andiví un ni kii iin ndusu nu ni ka'an Yandios jiin Jesús:

—Ro'o kuu Se'e ri ja kunda'u xaan ini ri, ti kusii xaan ini ri jiin ra —ni kachi Yandios.

<sup>12</sup> Yukan ti ni yinda'a Espíritu Santo un maa Jesús undi nuu ñuu'un te'e un.

<sup>13</sup> Ti yukan ni kuncha ya uu xiko kivi nuu ka iyo kití yuku un. Ti ja'u'u un ni kuni ska'an Jesús ja na sani'in ini ya nuu Yandios. Ko ni kikoyo ángel, ja ka kuu ndaja'a Yandios, ti ni ka chindee i maa ya.

*Ni keja'a xndaku Jesús jnu'un Yandios  
(Mt. 4.12-17; Lc. 4.14-15)*

<sup>14</sup> Ti yukan ni ka chondree da Juan vekaa, ti Jesús ni nandeokuñi ya ñuu Galilea. Ti yukan ni xna'an ya jnu'un Yandios nuu yivi naa i, ti ni kachi ya:

**15** —Ja ni jaa kivi nuu ta'u Yandios jniñu nuu ni tu'u ñuyivi. Vijna na ti nakani ini naa ra ti kandixia jnu'un ichi Yandios, chi yukan kuu iin ichi va'a —ni kachi ya.

*Ni kana Jesúx xini kuun chaa ka jnií cháká  
(Mt. 4.18-22; Lc. 5.1-11)*

**16** Iin kivi ni ya'a Jesúx yu'u lago Galilea, ti ni jini ya ka'iin Simón jiin ñani da Andrés, ka jnií da cháká jiin iin ñunu, **17** ti ni kana ya xini da:

—Kundikun ru'u naa ra, na cho'o. Ni ka jnií xaan ra cháká, ko vijna ru'u na xna'an ri ro'o nasa nastutu ra yivi, ti xna'an ra yivi un maa jnu'un Yandios kandixia i ru'u —ni kachi ya.

**18** Ti luego ni, ni ka xndoo da ñunu da, ti kuankoyo da jiin Jesúx.

**19** Ni jika ya ti'lli ga. Yukan ni jini ya nuu Jacobo jiin Juan, se'e yii Zebedeo, ka nachaa da ñunu da nuu iin barco. **20** Suni ni kana ya xini da:

—Ña'an na cho'o —kachi ya.

Ti chaa un ni ka xndoo da tata da Zebedeo ini barco un jiin muzu da, ti kuankoyo da jiin Jesúx.

*Ni keni'in Jesúx iin tachi xaan jna'an iin chaa un  
(Mt. 7.28-29; Lc. 4.31-37)*

**21** Ni jakoyo da ñuu Capernaum. Ti ni kivi Jesúx ini veñu'un Israel jaña'an iin kivi ka ndetatu yivi Israel. Ti ni xna'an ya jnu'un Yandios nuu i. **22** Ti so ka naa ini i ni ka ñuso'o i jnu'un ni ka'an ya, chi ni xna'an va'a ya nuu i, nanu iin chaa ndiso jniñu nuu Yandios. Ti chaa ka xna'an ini veñu'un un, tu ka xna'an da nanu ni xna'an maa Jesúx.

**23** Ti yukan kande iin chaa jna'an tachi xaan ini veñu'un un, uni ni kanajiin ko'o da, ti ni kachi da:

**24** —Kuxio ni nuu na naa na, ni'in Jesúx, chaa ñuu Nazaret. ¿Ndoó kivi nduu ni jiin na, xi vají ni ja xnaa ni saña nu? —ni kachi da.

**25** Ti Jesúx ni nduxaan ya nuu tachi xaan un, ti ni kachi ya:

—Kasi yu'u, ti xndoo chaa ja'a —ni kachi ya.

**26** Ti tachi xaan un ni sa'a ja na kuyí'i chaa un, ti undi ni kanajiin ko'o ti ni kee kua'an. **27** Ti so ni ka sa'u ini yivi un ja so ka naa ini ka nde'e i, ti ka jikajnu'un jna'an i:

—¿Na jnu'un kuu ja'a, xi na sa'an kuu ja'a? ¿Xi kuña'nu chaa un ja undi tachi xaan un ka jandatu nuu da, ti ka kekoyo kua'an nu? —ni kachi i naa i.

**28** Ti yachi xaan ni jichanuu jnu'un Jesúx ni ñuu Galilea.

*Ni sa'a Jesúx tajna nana chiso Simón  
(Mt. 8.14-15; Lc. 4.38-39)*

**29** Yukan ni ka kekoyo da ini veñu'un un, ti kuankoyo da ichi ve'e Simón jiin Andrés. Ti Jesúx kua'an ya jiin Jacobo jiin Juan jiin uu ga chaa ka skua'a jiin ya, nu ni ka jakoyo da ve'e un. **30** Ti nana chiso Simón ku'u ña. Katuu ña jiin kue'e kiji xaan, ti ni ka kachi da nuu Jesúx ja ku'u ña. **31** Luego ni kivi ya nuu katuu ña. Ni jnií ya nda'a ña, ni ndokani ya maa ña, ti ni nduva'a a ni ña jiin kue'e kiji un, ti ni ndokuiñi ña. Yukan ti ni sa'a ña ndeyu ni yaji ya jiin uu ga yivi un.

*Ni sa'a Jesúx tajna tijni yivi ka ku'u  
(Mt. 8.16-17; Lc. 4.40-41)*

**32-33** Nu ni kee ndikandii ti ni ki'vi, ti tendí'i yivi ñuu un, ni ka chitu ndii ni yuxe'e nuu kancha Jesúx. Ka yinda'a i kua'a yivi ka ku'u jiin chaa ka jna'an tachi xaan. **34** Ti Jesúx, ni sa'a ya tajna kua'a yivi ka ku'u un. Suni ni kenchaa

ya kua'a tachi xaan. Ko tu ni ja'a ya jnu'un ja ka'an tachi xaan un, chi ka jini na se'e kuu ya.

*Ni xna'an Jesús jnu'un Yandios ñuu Galilea  
(Lc. 4.42-44)*

<sup>35</sup> Jaña'an inga kivi, ni iñaa ga, ni ndoko Jesús ti kua'an ya nuu ñu'un te'e nuu tu iyo yívi. Ti yukan ni jikanta'u ya nuu Yandios. <sup>36</sup> Ko Simón jiin uu ga da, kuan nunduku da ya naa da. <sup>37</sup> Nu ni ka nani'in da ya, ti ni ka kachi da jiin ya:

—Kua'a xaan yívi ka jikajnu'un ni'in —ni ka kachi da.

<sup>38</sup> Ti ni kachi ya:

—Na cho'o uu ga ñuu ka'iin yajni ja'a, ti na xna'an ri jnu'un Yandios nuu i. Chi ja yukan kuu ja ni taji Yandios ru'u vaji ri —ni kachi ya.

<sup>39</sup> Yukan na ti kua'an ya ni ñuu Galilea, ni ka'an ya jnu'un Yandios ini veñu'un yívi Israel jiin taka nda'a ñuu un, ti kenchaa ya tachi xaan ka jna'an sava yívi un naa i.

*Ni sa'a Jesús tajna iin chaa te'yu xaan jiin ndi'yí  
(Mt. 8.1-4; Lc. 5.12-16)*

<sup>40</sup> Iin kivi ni tu'va iin chaa jna'an kue'e ndi'yí te'yu. Ni jakunjiti da nuu Jesús, ti ni kanda'u da jiin ya:

—Nu kuni ni, ti kuu sandoo ni saña jiin kue'e jna'an na ja'a —ni kachi da.

<sup>41</sup> Ti ni kunda'u ini ya maa da, ni skaa ya nda'a ya, ni kue'e ya maa da, ti ni kachi ya jiin da:

—Kuni ri, na ndundoo ra vijna —ni kachi ya.

<sup>42</sup> Nu ni ka'an ya sia'an, ti ni nduva'a ni chaa un. <sup>43</sup> Yukan na ti ni'in xaan ni xndaku ya nuu da, ti ni kachi ya:

<sup>44</sup> —Koto kani ra jnu'un nuu ni iin yívi ja sia'an ni sa'a ri tajna ro'o. Kua'an nuu sutu Israel un, ti na nde'e da ro'o. Nu ni nde'e da ro'o, ti kunda'a ja soko ra nuu Yandios siki ja, ja ni ndundoo ra, nava kachi ley Moisés. Ti na soko sutu un nuu Yandios, nava na kuni yívi ja, ja ni kenchaa ndi'yí un ro'o —ni kachi ya.

<sup>45</sup> Ko tu ni jandatu chaa un jnu'un ni ka'an Jesús. Ti kua'an da, jani da jnu'un nuu taka yívi nava ni jna'an da. Ja yukan kuu ja tukaa ni kuu kivi ndijin Jesús taka ñuu, chi jini ya ja nu na kivi ndijin ya, ti kinkoyo kua'a xaan ga yívi nuu ya. Ja yukan kuu ja ni jikonuu ya nuu ñu'un te'e nuu tukaa iyo yívi, ko undi yukan ni ka kikoyo kua'a yívi taka ñuu nuu kande ya.

*Ni sa'a Jesús tajna iin chaa tikuku  
(Mt. 9.1-8; Lc. 5.17-26)*

## 2

<sup>1</sup> Nu ni kuu ga kivi ni nandeokuñi Jesús ñuu Capernaum. Ti ka jani da jnu'un ja, ja ni nchaa tuku ya. <sup>2</sup> Yukan ti vekoyo kua'a xaan yívi nuu kancha ya, ja tukaa ni kujaa ve'e un, chi ni chitu ndii ni tu'u undi fuera. Ti yukan ni xna'an ya jnu'un Yandios nuu i.

<sup>3</sup> Ko vekoyo ga yívi, ti kuun da ka ndiso iin chaa tikuku nuu iin yúú. <sup>4</sup> Ka kuni kunda'a da chaa un undi nuu kancha Jesús, ko tu kuu ya'a da ja xaan chitu yívi. Ti ni ka skaa da chaa ku'u un ichi xini ve'e. Ni ka kenchaa teja un, ti ni ka sino da chaa ku'u un nuu kancha Jesús, ti yukan ni ka sino da chaa un.

<sup>5</sup> Ti nu ni jini Jesús ja ka kandixia da maa ya ja kuu sa'a ya tajna, ti ni kachi ya jiin chaa tikuku un:

—Nda'u se'e ri, ja ni janka'nú ini ri nuu kuachi ra —ni kachi ya.

**6** Ti yukan ka'iin tijni chaa ka xna'an ini veñu'un yivi Israel. Ti nu ni ka jiniso'o da jnu'un ni ka'an Jesús jiin chaa tikuku un, ni ka ndo'o ini da: **7** "¿Nau ja kuu iin chaa ja'a ja ndo'o ini da ja kuu da Yandios, ti ka'an da siki Yandios ja ka'an da sia'an? Ti ja'a tu iyo ni iin ja kuanka'nu ini nuu kuachi yo, chi vajnu'un ni maa Yandios", ni ka ndo'o ini da.

**8** Ko maa Jesús ja ni jini ya ndoo ka ndo'o ini da, ti ni kachi ya jiin da:

—¿Ndoo ka ndo'o ini ra sia'an? **9-10** Chi na kachi ri ja ru'u kuu maa Se'e Yivi Ñuyivi, ti ndisojniñu ri ja kuanka'nu ini ri nuu kuachi yivi naa i. Vijnna ti na stuu ri iin jniñu sa'a ri ja'a —ni kachi ya.

Yukan na ti ni kachi ya jiin chaa tikuku un:

**11** —Ndokuni, nastuu yúu ra, ti kuano'on ve'e ra —ni kachi ya.

**12** Ti chaa un ni ki'in da yúu da, ti ni kee da kua'an da. So ni ka naa ini yivi un, ti ni kuvaan i ni ka nakanajaa i Yandios:

—¡Ka'nú iin jniñu sa'a Yandios ja tu ka jini kuiti yo iin jnu'un sia'an undi vijnna! —kachi i naa i.

### *Ni kana Jesús xini Leví ja na ki'in da jiin ya*

(Mt. 9.9-13; Lc. 5.27-32)

**13** Yukan na ti kua'an tuku Jesús yu'u lago Galilea, ti ni ka takaa kua'a xaan yivi nuu ya. Ti ni xna'an ya nuu i.

**14** Ichi kua'an ya ni ya'a ya yajni iin oficina nuu kinya'u puesto. Yukan nukoo Leví, se'e yii Alfeo, kinya'u da puesto. Ti ni kachi Jesús jiin da:

—Ña'an na cho'o, ti kundikun ra ru'u —kachi ya.

Ti ni ndokuiñi Leví, ti kua'an da jiin ya.

**15** Iin kivi ni kana Leví Jesús ja na ki'in ya ve'e da ja na kee ya staa jiin chaa ka skua'a jiin ya, jiin chaa ka kinya'u puesto, jiin chaa tu ka siuku jnu'un ka ka'an chaa ka xna'an ini veñu'un Israel. **16** Ti yukan ka'iin chaa ka kuu maestro ja ka xna'an ley, ka kuu da maa chaa fariseo. Nu ni ka jini da ja yee Jesús staa jiin takaa yivi un, ti ni ka kachi da jiin chaa ka skua'a jiin ya:

—¿Ndoo yee Jesús staa jiin takaa chaa ka kinya'u puesto, suni jiin chaa tu ka siuku jnu'un ka ka'an ri yukan? —kachi da.

**17** Ni jiniso'o Jesús jnu'un ka ka'an da, ti ni kachi ya jiin da:

—Chaa ku'u kuu chaa nandi'i iin médico, ansu chaa iyo ndendajnu. Ru'u ni chaa ri ja ka'an ri jnu'un Yandios nuu yivi ka nakuni i kuachi i, ti ansu yivi ka ndo'o ini ja ka iyo ndoo jiin kuachi i —kachi ya.

### *Kajikajnu'un da Jesús siki jnu'un koo ndicha ini*

(Mt. 9.14-17; Lc. 5.33-39)

**18** Ni kuu ja ni jaa iin kivi ka iyo ndicha ini takaa chaa fariseo jiin chaa ka skua'a jiin Juan, chaa skuanducha. Ti sava yivi un ni ka chakoyo i nuu Jesús, ti ni ka jikajnu'un i ya:

—¿Ndoo chaa ka skua'a jiin Juan jiin chaa ka skua'a jiin chaa fariseo, ka iyo ndicha ini da, ti chaa ka skua'a jiin ni, ndoo tu ka iyo ndicha ini da nusa? —kachi da.

**19** Ti ni kachi Jesús:

—¿Ti kuu koo ndicha ini yivi ka'iin iin viko nanda'a xi tuu nu? Ti nu kancha novio un jiin i, tu kuu ku'iin ndicha i viko un. **20** Suni nu kancha ri jiin chaa ka skua'a jiin ri, tu kuu koo ndicha ini da. Ko jaa iin kivi nu na kuxio ri ki'in ri, ti kivi un sa na koo ndicha ini da.

**21** Sia'an kuu ja tu kuu chajna'an ra jnu'un xna'an ri jiin jnu'un jana'an. Iin ni kuu ja nachaa yo iin pedazo sa'ma jaa, ti ndundoo ga nuu iin sa'ma tu'u. Chi sa'ma jaa un ndiyi, ti kuu ka'nú ga yau nuu sa'ma tu'u un. **22** Iin ni kuu ja

chu'un yo vino jaa ini ñii tu'u, chi vino jaa un ndata ti ka'ncha ñii un, ti xnaa yo ndinduu. Vanuxia sia'an ja chu'un yo vino jaa chii ñii jaa. Yukan kuu ja tu kuu chajna'an ra jnu'un ri jiin jnu'un jana'an—kachi ya.

*Jniñu ni ka sa'a ndaja'a Jesúś iin kivi ndetatu  
(Mt. 12.1-8; Lc. 6.1-5)*

<sup>23</sup> Iin kivi ndetatu ni ya'a Jesúś jiin chaa ka skua'a jiin ya, ti ni ka ya'a da iin ñu'un nuu kaa triu. Tí chaa un ni ka keja'a ka jnu'un da yoko triu un, ti ka yaji da. <sup>24</sup> Ni ka jini chaa fariseo un jniñu ka sa'a chaa un, ti ni ka kachi da jiin Jesúś:

—Nde'e, ¿ndoo ka sa'a chaa ka jika jiin ra jniñu ja tu kuu sa'a yo iin kivi ndetatu nu? —kachi da.

<sup>25</sup> Ti ni kachi Jesúś jiin da:

—¿Ndoo ka ka'an ra sia'an, xi tu ni ka ka'u ra ja ni jna'an tata yo David na jana'an, na ni ji'i da soko jiin chaa ni kunchuku jiin da un nu? <sup>26</sup> Ni kivi da ini ve'e Yandios, ni jikanta'u da nuu sutu Abiatar, ti ni ki'in da staa stila ni soko sutu un nuu Yandios. Ni yee da jiin chaa ni kunchuku jiin da, ja tu kuu kaji sava'nii ga yivi, ti xna'an ley Moisés ja nini sutu kuña'nu kuu, ja kaji staa stila un. <sup>27</sup> Nusa ti iyo va'a jniñu ka sa'a chaa vekoyo jiin ri. Chi ni sa'a Yandios kivi ndetatu un ja na kendo kuu iin kivi sa'a yo ja va'a, ti ansu ja na sa'a yo ja ii xaan. <sup>28</sup> Vanuxia ru'u kuu maa Se'e Yivi Ñuyivi, ti kuña'nu ga ri ja na ta'u ri jniñu nasa sa'a yivi kivi ndetatu —ni kachi ya.

*Ni nduva'a iin chaa ni ichi nda'a  
(Mt. 12.9-14; Lc. 6.6-11)*

### 3

<sup>1</sup> Ni kivi tuku Jesúś ini iin veñu'un yivi Israel, ti yukan kande iin chaa ni ichi nda'a. <sup>2</sup> Suni yukan kanchuku chaa fariseo ka iyo listo da ja nu sa'a Jesúś tajna kivi ndetatu un. Ti nu na sa'a ya tajna, ka ndo'o ini da ja kankuachi da ja'a ya ja jani'in ini ya nuu ley. <sup>3</sup> Ko ni kachi Jesúś jiin chaa ku'u un:

—Ndokuñi, ti kundichi ra ma'ñu un —kachi ya.

<sup>4</sup> Yukan ti ni jikajnu'un ya yivi un: —¿Nasa kachi ley ndoo sa'a yo vijna kivi ndetatu nusa? ¿Iyo va'a ja sa'a yo tajna iin chaa ku'u xi kua'a ini yo na kuða da nu? —kachi ya.

Ti chaa un tu ni ka ka'an kuiti da. <sup>5</sup> Yukan ni kitii ini Jesúś ni nde'e ya nuu da, ti ni kukui'ya xaan ini ya, chi ni jini ya ja tu ka ñu'un nda'u kitii ini da. Ti ni ka'an ya jiin chaa ku'u un:

—Skaa nda'a ra —kachi ya.

Ni skaas da nda'a da. Ti luego ni, ni nduva'a.

<sup>6</sup> Yukan ti ni ka kekoyo chaa fariseo un, ka sa'a da iin junta jiin chaa ka yi'i ijiin partido Herodes. Ka ndajnu'un da nasa kuu ka'nii da Jesúś.

*Ni kataka kua'a xaan yivi yu'u lago*

<sup>7-8</sup> Kua'an Jesúś ichi yu'u lago Galilea jiin tako chaa ka skua'a jiin ya. Ti ka ndikun yivi kua'a un kuankoyo i suni, chi ni ka jini i tako jniñu ña'nu sa'a ya. Ni kikoyo yivi kua'a tako ñuu nanu ñuu Galilea, ñuu Jerusalén, ñuu Idumea. Suni yivi kanchuku inga yu'u yucha Jordán, jiin suni yivi ñuu Tiro jiin Sidón.

<sup>9-10</sup> Ti sa'a ya tajna tako yivi ka ku'u ni ka chakoyo un, ko so ka chindajna'an maa ni ga yivi un ja ka kuni tu'vai nuu ya, ti jniñi i vasu ti'li sa'ma ya, ja nduva'a ijiin sava'a ni ga kue'e ka ndo'o i. Ko ja xaan chitu yivi un, ti ni kachi ya jiin chaa ka skua'a jiin ya ja na satu'va da iin barco lulu, na kinkivi ya nava tu

kaxin yivi un ya. <sup>11</sup> Suni ni kikoyo kua'a yivi ka jna'an tachi xaan. Nu ni ka jini nuu ya, ti ni ka nduva nuu ja'ya. Ti ni ka kanajin:

—¡Ro'o kuu Se'e Yandios! —kachi naa.

<sup>12</sup> Ko maa ya ni ka'an ni'in ya:

—Tu nau ja kuu ro'o ja ka'an ra ja ru'u kuu Se'e Yandios —kachi ya.

*Ni nakaji Jesús ndi uxi uu chaa kuu ndaja'a ya  
(Mt. 10.1-4; Lc. 6.12-16)*

<sup>13-14</sup> Yukan ti ni kana ya tako chaa ka skua'a jiin ya, ti kua'an ya jiin da undi yuku un. Yukan ni nakaji ya uxi uu ndaja'a ja na nakujin da jiin ya. Ti ni kachi ya jiin chaa un naa da ja na taji ya da kinkoyo da taka fiuu, ti ka'an da jnu'un Yandios nuu yivi naa i. <sup>15</sup> Ti kundiso da jniñu ña'nú ja kenchaa da tachi xaan ka jna'an sava yivi. <sup>16</sup> Ti ja'a ka kuu ndi uxi uu chaa ni nakaji ya: Simón ja ni skonani ya da Pedro; <sup>17</sup> Jacobo jiin Juan, se'e yii Zebedeo, ja suni ni skonani ya da naa da Boanerges, ja kuni ka'an se'e taja; <sup>18</sup> Andrés; Felipe; Bartolomé; Mateo; Tomás; Jacobo, se'e yii Alfeo; Tadeo; Simón, ja yi'i da nuu partido cananista; <sup>19</sup> jiin Judas, chaa ñuu Cariote, chaa ni nakua'a Jesús nuu chaa ka jito u'u ya.

*Ka chakuachi daja'a Jesús ja ni nduu ku'u ya  
(Mt. 12.22-32; Lc. 11.14-23; 12:10)*

<sup>20</sup> Nu ni ni'in ya chaa kujin jiin ya, ti ni nandeokuñi ya jiin da naa da iin ve'e. Ti yachi ni kataka tuku yivi kua'a ve'e un, ja tu ka ja'a i jnu'un ja kají ya staa jiin ndaja'a ya, chi ka jikanta'u i ja na chindée ya maa i. <sup>21</sup> Nu ni ka jini taka jna'an ya jnu'un ja sa'a ya tako nuu jniñu un, ti kuan nuki'in da ya, chi ni ka ndo'o ini da ja ni nduu ku'u ya.

<sup>22</sup> Ti suni chaa ka xna'an ley ini veñu'un yivi Israel ja vekoyo da undi ñuu Jerusalén, ni ka kachi da:

—Yi'i chaa ja'a jiin maa ja'u'u un. Yukan kuu ja jiin sivi maa ja'u'u un keni'in da tachi xaan un nuu yivi —ni ka kachi da.

<sup>23</sup> Yukan ti ni kachi Jesús:

—Kunso'o naa ra na ka'an ri. ¿Va nu kuu keni'in chaa u'u un tachi xaan ki'in ti nu ndaja'a da ka kuu nu? <sup>24</sup> Suni nu ndaja'a iin gobierno, na kusiin ini da naa da ti keja'a kanaa da, ti gobierno un tu kuñii. <sup>25</sup> Ti nu iin familia keja'a kanaa naa, ti familia un tu kuu kunchuku mani. <sup>26</sup> Suni sia'an kuu jiin chaa u'u un. ¿Xi ka jani ini ra ja na kuñii da nu na keni'in da tachi xaan un ki'in, nusa? <sup>27</sup> Ko ja siki maa chaa u'u un, sa'a yo nanu ja iin ni kuu nu iin chaa ni'in xaan, kuni sakui'na yo ve'e da, ti nu kancha da, ti xnakan ku'ni yo da, sa sakui'na yo ve'e da. ñin ni kuu ja ni kundee ri jiin chaa u'u un, chi ni keni'in ri ndaja'a da un kua'an.

<sup>28</sup> Jandaan na kachi ri ja iyo jnuka'nú ini Yandios nuu yivi ka sa'a tako nuu kuachi. Suni yivi ka ka'an ndeva'a, vatú ni saka'nú ini Yandios nuu i.

<sup>29</sup> Ko yivi na kusikinchaa maa Espíritu Santo jiin jnu'un ndeva'a kuiti, jankivi saka'nú ini Yandios nuu i —kachi ya.

<sup>30</sup> Sia'an ni ka'an Jesús, chi chaa ka xna'an ini veñu'un Israel ni ka ka'an ja ja ni nduu u'u ya.

*Nana ya jiin ñani ya kuni ka ka'an i jiin ya.  
(Mt. 12.46-50; Lc. 8.19-21)*

<sup>31</sup> Ti yukan ni chaa nana ya jiin ñani ya, ti ni ka kendo ña fuerá. Yukan ni tatu ña iin yivi ni kaxnu'un nuu ya. <sup>32</sup> Ti yivi kanchuku jiin ya ni ka kachi:

—Nana ni jiin ñani ni ka ka'iin da fuerá. Ka kuni ka'an da jiin ni —ni ka kachi da.

**33** Ti ni kachi ya:

—Na kachi ri nuu ra naa ra nau ja kuu nana ri, ti nau ja ka kuu ñani ri —ni kachi ya.

**34** Ti ni nde'e ya nuu taka yivi kanchuku jiin ya yukan, ti ni kachi ya:

—Ja'a kanchuku yivi ka kuu nana ri jiin ñani ri. **35** Chi sava'ni ga yivi na siuku jnu'un Yandios, yukan kuu nana ri, kuu kua'a ri, ti kuu ñani ri —ni kachi ya.

*Jnu'un iin chaa saka triu  
(Mt. 13.1-9; Lc. 8.4-8)*

## 4

**1** Inga kivi ni keja'a xna'an Jesùs nuu yivi yu'u lago Galilea. Nu ni ka taka kua'a xaan tonto yivi nuu kande ya, ni kivi ya nuu iin barco ka'nun, ti ni kuxio ya ti'li nuu nducha un. Ti yivi un ni ka kendo i nuu ñiti yu'u nducha un. **2** Ni nukoo ya nuu barco un ti ni xndaku ya nuu yivi naa i, ti jnu'un ni xndaku ya kuu ja'a:

**3** —Chunso'o naa ra na kachi ri jnu'un iin chaa ni saka triu. **4** Ti nuu kua'an da jacha da triu, sava triu un ni nukoyo in iichi. Ti ni chakoyo saa ni ka nachii ti. **5** Uu ga triu un ni nukoyo nuu kanchuku yaxin ñu'un nuu yuu ti ni kaña yachi, ko tu ni kee kunu yo'o i. **6** Ko nu ni kaña ndikandii, ti ni ichi triu un. **7** Uu ga ni nukoyo nuu yi'i kua'a yo'o nu'iñu, ti ni kaña triu un, ko nu ni nakua'nu numa nu'iñu un ti tukaa ni ja'nun triu un. **8** Ko sava ga triu ni nukoyo nuu yi'i kokon ñu'un, ni kaña ti va'a ni ja'nun, ti ni kuu xaan. Sava ni nakua'a oko uxi triu ja iin triu lulu un, ti sava ni nakua'a uni xiko, ti uu ga ni nakua'a iin ciento —kachi ya.

**9** Yukan ti ni kachi Jesùs:

—Yivi chunso'o ti na chunso'o i —ni kachi ya.

*Siki jnu'un ni ka'an Jesùs  
(Mt. 13.10-17; Lc. 8.9-10)*

**10** Ti nu kuankoyo yivi un, ti ni ka tu'va ndi uxi uu chaa ka kuu ndaja'a ya jiin uu ga yivi ni ka kendo un, ti ni ka jikajnu'un da ya nasa kuni ka'an jnu'un ni xndaku ya un. **11** Ti ni kachi ya:

—Ja ni xna'an Yandios nuu ra naa ra nava ta'u ya jniñu, ko ja kuu yivi tu kandixia, na xndaku ri nuu ijiin jnu'un ja'a. **12** Chi vasu ñuso'o i jnu'un ka'an ri, ti nde'e i jniñu sa'a ri, ko tu chaku ini i. Tu chaku ini i chi tu kuni xndoo i jnu'un kue'e ka ka'an i. Ti nu tu kuni nakani ini i nuu kuachi i, ti tu saka'nun i Yandios nuu i —ni kachi ya.

*Nava kuni ka'an jnu'un chaa saka triu  
(Mt. 13.18-23; Lc. 8.11-15)*

**13** Suni ni kachi ya jiin da:

—Ti nu tu ni ka chaku ini ra jnu'un ni ka'an ri un, ni tu kuu chaku ini ra uu ga jnu'un na ka'an ri nusa. **14** Ka'an ri ja nanu kuu iin chaa saka triu, suni sia'an kuu chaa xndaku jnu'un Yandios nuu yivi naa i. **15** Chi sava yivi kuu i nanu triu ni nukoyo in iichi un, chi ni ka ñuso'o i jnu'un Yandios, ti jaku ni kivi ti ni kundee ja'u un jiin i, ti naa ini i jnu'un Yandios. **16** Uu ga yivi kuu i nanu triu ni nukoyo nuu kanchuku yaxin ñu'un nuu yuu. Chi ka ñuso'o i jnu'un Yandios, ti kusii xaan ini i jiin. **17** Ko tu kukutu jnu'un Yandios ini i, ti yachi ka nandeokava i siki ya, nuu ka jna'an i nundo'o siki ja ka jito u'u yivi maa i, ja ni ka kandixia i jnu'un ya. **18** Ti uu ga yivi kuu i nanu triu ni nukoyo nuu iñu un. Chi ka ñuso'o i jnu'un Yandios. **19** Ko ka ndo'o xaan ini i jniñu iyo nuu ñuyivi ja'a, ja ñukuu ini i kuu riko i. Ti taka yukan sa'a ja jasi ini yivi un,

ti naa ini i jnu'un un. <sup>20</sup> Ti sava ga yivi un kuu i nanu triu ni nukoyo nuu yili'ñu'un va'a. Ni jiniso'o i jnu'un Yandios, ti ni kandixia ndaa kuiti i. Kuu i nanu iin triu ja ni nakua'a oko uxi, xi uni xiko, xi iin ciento triu, chi siuku ndaa i jnu'un Yandios. Yukan kuu ja kuni ka'an jnu'un chaa saka triu un —ni kachi ya.

*Jnu'un iin yiti  
(Lc. 8.16-18)*

<sup>21</sup> Ti ni kachi tuku ya jiin da:

—Nu skuikun yo iin yiti, ti tu kani yo chii iin cajón, ni tu kani yo chii iin jito. Chi su'va kani yo nuu sukun ja na kundijin va'a. <sup>22</sup> Suni sia'an kuu jiin jniñu kua'a ri nuu ra naa ra, chi tu kendo sa'yí. Vasu vijnal ñu'ní tu jini ni iin yivi, ko jaa iin kivi nu kenda ndijin ti kuni kua'a yivi naa i. <sup>23</sup> Yivi ñuso'o ti na chunso'o i nasa kuni ka'an jnu'un ja'a —kachi ya.

<sup>24</sup> Suni ni kachi ya jiin da:

—Chunso'o va'a jnu'un ka'an ri. Nu jiin ku'va un chikua'a ra, ti suni sia'an jiin ku'va un nachikua'a Yandios nuu ra. Ti vi'ga kua'a ya nuu ra nu na chunso'o ra. <sup>25</sup> Chi yivi ni chunso'o ti chinddee Yandios maa i ja na ni'in ga i inijnuni i. Ko yivi tu chunso'o va'a, su'va kenchaaya jnu'un va'a ni kendo inijnuni i.

*Jnu'un iin triu ni saka*

<sup>26</sup> Ti ni ka'an ga Jesús jiin da naa da:

—Ka'an ri iin jnu'un nasa kuu kivi yivi nda'a Yandios ja na ta'u ya jniñu nuu i. Ti yukan kuu nanu triu ni saka nuu ñu'un. <sup>27</sup> Chi nu ni ndili'i ni saka da triu un, ti siin siin jniñu sa'a da taka kivi. Ti nu ni kuu una uxi kivi, ti keja'a jinu, ti ja'nua kua'an, vasu tu jini da nasa ja'nua triu un. <sup>28</sup> Chi maa ñu'un un sa'a ja ja'nua. Xnakan jinu ti keja'a ja'nua. Yukan na ti kaña yoko ti jakili'i triu chii. <sup>29</sup> Ti nu ja ni kuaan triu un, ki'in da vusu, ti kin ka'ncha da —kachi ya.

*Jnu'un iin ndikin lulu*

*(Mt. 13.31-32; Lc. 13.18-19)*

<sup>30</sup> Siin Jesús ka'an ya ti ni kachi ya:

—Ka'an ri inga jnu'un nasa kuu kivi yivi nda'a Yandios ja na ta'u ya jniñu nuu i. <sup>31-32</sup> Kuu nanu iin ndikin lulu xaan, ko nu ni xndee yo ti keja'a ja'nua. Ja'nua nanu iin tuyukun, ti undi saa un ka sa'a ti taka ti chii nda'a yujnu un —kachi ya.

*(Mt. 13.34-35)*

<sup>33</sup> Taka jnu'un yukan ni jajniñu Jesús nu ni xndaku ya jnu'un Yandios nuu yivi naa i, ja na kendo'o ini i. <sup>34</sup> Ti mani sia'an ni xna'an ya nuu yivi naa i. Ko nu ni ka kendo maa ni ga ndaja'a ya, ti ni xndaku ya nasa kuni ka'an taka jnu'un un.

*Ni sa'a Jesús ja na jakiniñi iin tachi sau nuu lago Galilea*

*(Mt. 8.23-27; Lc. 8.22-25)*

<sup>35</sup> Yukan ti ja'ini kivi un ni kachi Jesús jiin ndaja'a ya:

—Cho'o naa yo inga yu'u lago —kachi ya.

<sup>36</sup> Yukan ti ni ka kivi da ini barco nuu kande ya. Ni ka kanxia'u da jiin yivi un ti ni ka jika da jiin barco un nuu lago. Suni kuankoyo uu ga barco jiin da naa da. <sup>37</sup> Ti ni keja'a iin tachi sau xaan tonto nuu lago un. Ti ni keja'a kivi nducha ini barco da, ti kuni chitu jiin nducha. <sup>38</sup> Ko Jesús kixi kixi ni ya ichi jata barco. Ti ni ka xndoto chaa un ya, ti ni kachi da:

—Maestro, tu ndili'i ini ni ja kuni keka'nu yo chii nducha, ti xaan kixi kixi ni —kachi da.

<sup>39</sup> Yukan ni ndokuiñi Jesús, ti ni kachi ya jiin tachi sau xaan un jiin lago un:

—Jakuñi ti na'in ni koo ra —ni kachi ya.

Yukan ti na'in kuiti ni ni kuu.

<sup>40</sup> Yukan ti ni kachi ya jiin ndaja'a ya:

—¿Ndoor xaan ka yu'u ra? ¿Xi kaja ni ini ra ja tu kuu chinddee Yandios ro'o naa ra nu? —kachi ya.

<sup>41</sup> Ti ndaja'a ya un ni ka yu'u xaan da, ti ka ndajnu'un da naa da:

—¿Nusa ti naa chaa kuu chaa ja'a ja undi tachi sau un jiin mar un ka jandatu i nuu da? —kachi da naa da.

### *Chaa ka jna'an tachi xaan ñuu Gadara*

(Mt. 8.28-34; Lc. 8.26-39)

## 5

<sup>1</sup> Yukan ti ni ka jakoyo da inga yu'u lago, ñuu Gadara. <sup>2-3</sup> Nu ni kee Jesús ini barco, ni kenda iin chaa jna'an tachi xaan. Ti chaa un nchaa da taka nuu ka ñunduji ndiyi. Ni nduu loco xaan da, chi ni iin yivi tu kundee jiin da vasu na kundikun da jiin cadena. <sup>4</sup> Tijni xaan jinu ni ka ju'nii da chaa un jiin cadena, kuu nda'a da kuu si'in da, ko kundee da ja'ncha da, ti sakuchi da cadena un. <sup>5</sup> Kuu nduu kuu ñuu kanajiin da yaku da chii yuku un jiin taka nuu ñaña ndiyi, ti stuji da maa da jiin yuu. <sup>6</sup> Ko nu ni jito nchaa jika da ja vaji Jesús, ni ja'a da corri, ti kua'an da undi nuu vaji ya. Ni jakunjiti da, <sup>7</sup> ti ni kanajiin ko'o da:

—Ni'in Jesús, Se'e Yandios ja kancha undi andivi, jikanta'u xaan tonto na nuu ni ja koto xndi'i ni ini na —kachi da.

<sup>8</sup> Sia'an ni kanajiin da, chi ja ni ta'u ya jniñu ja na xndoo tachi xaan un maa da. <sup>9</sup> Ti ni jikajnu'un ya sivi da:

—¿Ndoor nani ra nusa? —kachi ya jiin da.

Ti ni kachi da:

—Legión nani na, chi kua'a xaan jna'an na —kachi da.

<sup>10</sup> Ti kanda'u da jiin Jesús ja tu keni'in ya tachi xaan un ki'in inga ñuu yukan. <sup>11</sup> Ti yajni yukan ka'iin kua'a xaan kini ka yee ti yuku jika yuku un. <sup>12</sup> Ti tachi xaan un ni ka kanda'u jiin Jesús:

—Kua'a ni jnu'un na kinkoyo na jiin kini un naa na —ni ka kachi.

<sup>13</sup> Yukan ti ni ja'a ya jnu'un ja na kinkoyo. Ti tachi xaan un ni xndoo chaa un ti ni ka jankuncha jna'an jiin kini un naa ti. Ka iyo yajni uu mil kitii un. Ti ni ka ja'a ti corri ni ka nukoyo ti iin xa'va, ti ni ka kivi ti nuu lago un ni ka ji'i ti. <sup>14</sup> Ti yivi ka ndito kini un, ni ka yu'u xaan. Ni ka ja'a corri ni ka kaxnu'un nuu yivi ñuu jiin yivi kanchuku ranchu. Ti ni ka kikoyo yivi kua'a ni ka kin nde'e ndoo ni kuu.

<sup>15</sup> Nu ni ka jakoyo yivi nuu kancha Jesús, ti ni ka jini nuu chaa ni jna'an tachi xaan un, ja ni nduva'a da. Ti ja ñu'un da sa'ma kancha da jiin Jesús, ti ni ka yu'u da. <sup>16</sup> Ti yivi ni ka jini nava ni jna'an chaa un. Suni nava ni kuu jiin kini un, ni ka jani da jnu'un nuu yivi ni ka chakoyo un. <sup>17</sup> Ti tendi'i yivi un ni ka ka'an jiin Jesús ja na kuxio ya na ki'in ya ñuu i naa i.

<sup>18</sup> Ti nu ni ndivi Jesús ini barco, kanda'u chaa ni jna'an tachi xaan un ja na ki'in da jiin ya. <sup>19</sup> Ko Jesús tu ni ja'a ya jnu'un, chi ni kachi ya:

—Kuano'on ve'e ra ti kani ra jnu'un nuu takaa jna'an ra, suni nuu amigo ra, nava ni chinddee Yandios ro'o ja ni kunda'u ini ya maa ra —ni kachi ya.

<sup>20</sup> Yukan ti kua'an chaa un, ti ni jani da jnu'un ni ñuu Decápolis nava ni sa'a Jesús jiin da. Ti taka yivi ni ka jiniso'o un, ni ka naa ini i.

*In ña'an ni kue'e sa'ma Jesús jiin ja ni nadoto sesi'i Jairo*

(Mt. 9.18-26; Lc. 8.40-56)

<sup>21</sup> Nu ni najaa Jesús inga yu'u lago un, ni ka kututu tuku yivi kua'a nuu ya.  
<sup>22</sup> Yukan kande ya jiin da naa da. Ti iin chaa kuña'nu ini iin veñu'un Israel ja nani da Jairo, nu ni jini da Jesús, ni jakunjiti da nuu ya. <sup>23</sup> Ti ni kanda'u xaan da jiin ya:

—Kuni kuu se'e si'i na. Ka'an nda'u na jiin favor na cho'o, ti chuxndee ni nda'a ni siki yi, na nduva'a i ti na kuchaku i —kachi da.

<sup>24</sup> Ti kua'an Jesús jiin da. Ko kuankoyo kua'a xaan yivi jiin ya ja undi ka jaxin jna'an i. <sup>25</sup> Ma'ñu yivi un kua'an iin ñasi'i jna'an kue'e niñi xaan tonto ja ni ndo'o ña jiin kue'e un uxi uu kuiya. <sup>26</sup> Ti ni xnaa ña tak a ja ñava'a ña jiin kua'a chaa tajna ja kuni ña nduva'a ña, ko sa su'va vi'ga ni kuu ka'u ga ña. <sup>27-28</sup> Nu ni jiniso'o ña tak a jniñu ña'nu sa'a Jesús, ti ni ndo'o ini ña:

—Nu na kundee ri kue'e ri vasu ti'lí sa'ma ya ti va nduva'a ri —kachi ña.

Ja yukan kuu ja vaji ña jiin yivi un, ni tu'va ña ichi jata Jesús, ti ni ke'e ña sa'ma ya. <sup>29</sup> Ti yachi ni ni jini ña ja ni nduva'a ña, chi ni ichi ni niñi un maa ña. <sup>30</sup> Ko ni jini Jesús ja ni sa'a ya tajna iin yivi jiin jniñu ndiso ya. Ni ndeokoto ya nuu yivi un ti ni jikajnu'un ya:

—¿Nau ja ni ke'e sa'ma ri? —kachi ya.

<sup>31</sup> Ti ni ka kachi ndaja'a ya:

—¿Ndoo jikajnu'un ni nau ja ni ke'e sa'ma ni, ti jini ni ja yivi kua'a vaji jiin yo? —kachi da.

<sup>32</sup> Ko ni nde'e va'a ya yayukan nuu nau ja ni ke'e sa'ma ya. <sup>33</sup> Ti ña'an ni ke'e sa'ma ya un, ni yu'u xaan ña chi jini ña ja ni nduva'a ña. Ni jakunjiti ña nuu ya ti ni kachi ña tak a nundo'o ni jna'an ña. <sup>34</sup> Ti ni kachi Jesús jiin ña:

—Hija, ni nudva'a ra chi ni kandixia ra ru'u, ja kuu sa'a ri tajna maa ra. Koo siñi ini, ti tukaa kondo'o ra kue'e un —ni kachi ya.

<sup>35</sup> Ko ni ka'an ga ya sia'an jiin ña'an un, ja ni ka chakoyo yivi ka'iin ve'e Jairo, ti ni kachi jiin da:

—Ja ni ji'i sesi'i ni. Tukaa ndoo sa'a ni ja ki'in ni jiin maestro —kachi da.

<sup>36</sup> Ko ni jiniso'o ya ja sia'an ka ka'an da jiin Jairo. Ti tu ni ki'in ya jnu'un un, chi ni kachi ya:

—Koto yu'u ra. Kandixia ti ni kuu ni —kachi ya.

<sup>37</sup> Yukan ti kua'an ya jiin Jairo, ko tu ni ja'a ya jnu'un ja kinkoyo yivi kua'a un, chi niní Pedro, Santiago jiin Juan, chaa kuu ñani Santiago ni kuankoyo.

<sup>38</sup> Nu ni jaa ya ve'e chaa kuña'nu un ni jini ya ja ka nde'e xaan yivi ka'iin un, ja undi ka kanajjiin ko'o i ti ka ndi'i ini i. <sup>39</sup> Ni kivi Jesús ti ni kachi ya:

—Ndoo xaan ka kucaa ra ka nde'e ra ti suchi un tu ni ji'i yi, chi kixi yi —ni kachi ya.

<sup>40</sup> Ko so ni ka jaku yivi un ja sia'an ni ka'an ya, chi ni ka jini ja ni ji'i ndixia suchi un. Ko ni keni'in ya tendi'i kití yivi un kuankoyo ichi fuerá. Ti ni tu'va ya nuu katuu suchi un jiin tata i jiin nana i jiin ndaja'a ya. <sup>41</sup> Ni jniñi ya nda'a yi ti ni ka'an ya:

—Talita kumi, (kachi ya, ja kuni ka'an: ndoko, suchi lulu.)

<sup>42</sup> Ti suchi un ja iyo uxi uu kuiya i, ni ndoko i ti ni jika i. Tata i, nana i jiin ndaja'a ya, so ni ka naa ini da, ti ka yu'u xaan da ja ni nandoto suchi lulu un.

<sup>43</sup> Yukan ti ni'in xaan ni ta'u ya jniñu ja koto kani kití da jnu'un nuu ni iin yivi ja sia'an ni kuu. Ti ni kachi ya:

—Kua'a staa na kaji yi —ni kachi ya.

**6**

<sup>1</sup> Yukan ti kuano'on Jesúś ñuu Nazaret nuu ni ja'nu ya, ti kuankoyo ndaja'a ya suni. <sup>2</sup> Ti iin kivi ndetatu ni kivi ya ini veñu'un un, ti ni xna'an ya nuu yivi un. Kua'a xaan yivi ni ka ñuso'o jnu'un ni ka'an ya, ja so ni ka naa ini, ti ka ka'an:

—¿Nanu ni ni'in chaa ja'a jnu'un ka'an da un? ¿Nanu ni kutu'va da jniñu un ja undi jniñu ña'nu kuu sa'a da? <sup>3</sup> ¿Ti ansu ja'a kuu chaa ni tuji yujnu, se'e yií María, ja kuu ñani Jacobo, José, Judas, jiin Simón nu? Ti ja'a kanchuku kua'a da jiin yo naa yo —kachi naa.

Sia'an ni ka jini yivi un maa ya nanu iin chaa ndeva'a ni. Ja yukan kuu ja tu ni ka nde'e nuu ya.

<sup>4</sup> Ko ni kachi Jesúś:

—Sava'a ni ga inga ñuu ka ja'a yivi ja yiñu'un nuu iin profeta, ja ka'an jnu'un Yandios. Ti ansu maa yivi ñuu da, ni iin jna'an da, ti ni familia ini ve'e da, tu kuanta'u i maa da —kachi ya.

<sup>5</sup> Ti tu ni kuu sa'a ya kua'a jniñu ña'nu yukan. Chi jaku ni yivi ku'u ni sa'a ya tajna. <sup>6</sup> So ni kukui'ya ini ya, chi tu ni ka kandixia yivi un jniñu sa'a ya. Yukan ti kua'an ya ni jikonuu ya taka ñuu kuachi kendo yajni un, ni xna'an ya jnu'un Yandios.

*Taji Jesúś ndaja'a ya ja na ka'an da jnu'un Yandios  
(Mt. 10.5-15; Lc. 9.1-6)*

<sup>7</sup> Yukan na, ti ni kana ya ndi uxi uu ndaja'a un. Ti ni ta'u ya jniñu nuu ndi uu ndi uu da, ti ni kachi ya:

—Kuankoyo naa ra ti ka'an ra jnu'un Yandios, ti kundiso ra jniñu ña'nu ja keni'in ra tachi xaan un kinkoyo. <sup>8</sup> Ko tundo kunda'a ra ja kuu ichi, ni ñunu staa, ni xu'un, chi nini iin yujnu xii kuu ja kituu ra —ni kachi ya.

<sup>9</sup> Suni ni kachi ya ja na ki'i da ndijña nda'u, ti iin ni sa'ma na ku'un da. <sup>10</sup> Ti ni kachi ya jiin da:

—Nu ni ka jakoyo ra iin ve'e, kendo ra naa ra un, undi nu kuankoyo ra inga ñuu. <sup>11</sup> Ti nu ni jakoyo ra iin ñuu, ti nu tu ka chunso'o yivi un jnu'un ka ka'an ra, kisi tıkacha ini ja'a ra, na kuu iin seña ja ni ka kendo kui'ya i ja tu ni ka janta'u i ro'o naa ra, ti kuankoyo inga ñuu. Chi jandaa na kachi ri ja kivi na chaa juicio, ti vi'ga koo ndo'o yivi un nu tu kuanta'u i jnu'un ka'an ra, ti ansu ñuu Sodoma jiin Gomorra —ni kachi ya.

<sup>12</sup> Yukan ti kuankoyo ndaja'a ya, ni ka jikonuu da taka ñuu, ni ka xndaku da nuu yivi ja na nakani ini i nuu kuachi i naa i. <sup>13</sup> Tijni jinu ni ka keni'in da tachi xaan ka jna'an sava yivi. Suni ni ka sa'a da tajna tijni yivi ka ku'u, ja ni ka jaka da aceite olivo xini i, ti ni ka nduva'a i.

*Ndo'o ini rey Herodes ja Juan, chaa skuanducha, kuu Jesúś  
(Mt. 14.1-12; Lc. 9.7-9)*

<sup>14</sup> Ni iyo iin rey nani Herodes, iin chaa ni yinda'a ni ñuu Galilea. Ti Herodes ni ni'in da jnu'un ja ni ñuu ka ka'an sikí jniñu ña'nu xaan sa'a Jesúś. Ti sava yivi un ka ka'an:

—Juan ja ni skuanducha un kuu, chi ni nandoto. Yukan kuu ja kuu sa'a jniñu ña'nu un —kachi.

<sup>15</sup> Ti uu ga ka ka'an:

—Profeta Elías ja ni kii na jana'an un kuu da —kachi naa.

Ti sava ga yivi un ka ka'an:

—In profeta kuu, iin ni kuu jiin chaa ni ka ka'an jnu'un Yandios na jana'an —kachi.

<sup>16</sup> Ko ni kachi rey Herodes:

—Juan ja ni skuanducha un kuu. Ni nandoto vasu ni kenchaa ri xini —kachi da.

### *Nava ni kaja'ni da Juan, chaa skuanducha*

**17-20** Rey Herodes ni jisonchaa da Herodías, ñasi'í ñani da Felipe. Ti Juan ni kachi jiin Herodes ja tu va'a ja kuncha da jiin ñasi'í ñani da. Ti ña'an un ni kiti xaan ini ña nuu Juan ja sia'an ni ka'an da, undi ni kundee ña ni ju'ni Herodes Juan jiin cadena, ti ni chondee da chaa vekaa, chi kuni ña ja na kuú da. Ko Herodes ni nama da Juan, chi jini da ja iin chaa va'a kuu Juan. Jajna'an ini da jnu'un ka'an Juan, vasu tu chaku va'a ini da jnu'un.

**21** Ti kuu nava ni ndoo'o ini Herodías. Kivi ni kusii ini Herodes ni nasa'a da viko kivi ni kaku da. Ni ja'a da iin ja kuxini nuu taka chaa ka kuña'nu jiin da jiin chaa ka kuu generál, suni jiin chaa ña'nu ñuu Galilea. **22** Ti ni kanchuku da ka kuxini da, ni kivi se'e si'í Herodías. Ni jitaja'a ña nuu kanchuku Herodes jiin taka chaa ka kuña'nu un. Ti Herodes jiin chaa ka kuña'nu un ni ka kusii ini da ja ni jitaja'a ña'an un. Ti ni kachi Herodes jiin ña:

—Kakan nuu ri sava'ni ga ndoo kuni ra, ti na kua'a ri —kachi da.

**23** Ni kachi Herodes ja siuku da kua'a da sava'ni ga ndoo na kakan ña, vasu sava ñuu nuu ta'u da jniñu. **24** Ti ña'an un tu ni ka'an ña, ti ni kenda ña ni jikajnu'un ña nana ña, ti ni kachi ña:

—¿Ndoo kakan na nuu da? —kachi ña.

Ti ni kachi Herodías:

—Kakan xini Juan, chaa skuanducha un —kachi ña.

**25** Ni nandeokuñi ña'an lulu un, ti ni kachi ña jiin rey un:

—Vijna na ti kuni na ja na ta'u ni jniñu na kin ki'in da xini Juan, chaa skuanducha un. Na kii nuu na nuu iin ko'o xita —kachi ña.

**26** Nu ni jiniso'o rey un ja sia'an ni ka'an ña, ni kukui'ya xaan ini da. Ko vanuxia ni ka jiniso'o chaa kanchuku jiin da un. Ti ni siuku da jnu'un ni ka'an da. **27-28** Ti ni taji da soldado ndito yux'e un kua'an da ini vekaa un. Ni kenchaa da xini Juan. Ti ni nandeokuñi da jiin xini da un nuu iin ko'o xita. Ti Herodes ni nakua'a da nuu ña'an lulu un, ti ña'an lulu un ni nakua'a ña nuu nana ña. **29** Nu ni ka jini chaa ka skua'a jiin Juan ja sia'an ni kuu, ni ka januki'in da yiki kuñu ndiyí un, ti ni ka chunduji da. Sia'an ni ka ja'ní da Juan, chaa skuanducha.

### *Ni ja'a Jesúsj a ni ka yaji u'un mil yivi*

(Mt. 14.13-21; Lc. 9.10-17; Jn. 6.1-14)

**30** Nu ni ka nchakoyo ndaja'a un, ti ni ka jani da jnu'un taka jniñu ni ka sa'a da jiin ja ni ka xna'an da. **31** Ti kivi un kua'an vaji yivi kua'a nuu kancha Jesúsj, ja tu ni kuu kají da staa naa da. Ti ni kachi ya:

—Na cho'o naa yo undi nuu kuu ndetatu ra naa ra ti'lí —kachi ya.

**32** Ni ka kivi da nuu iin barco, ti ni ka jika da kua'a da naa da nuu iyo va'a, nuu ni ka'iin maa da naa da. **33** Ko sava yivi ni ka jini nuu ni kee barco un kua'an, ni ka nakuni. Ti ni ka kututu kua'a xaan yivi taka ñuu kendo yajni un. Ni ka jika i ni yu'u mar un, ti xnakan i ni ka jakoyo, sa ni jaa barco un jiin Jesúsj. **34** Nu ni kee ya ini barco un, ni jini ya ja ka'iin kua'a xaan yivi. Ti ni kunda'u xaan ini ya maa i. Chi ka'iin yi nanu rii tu jito'o. Ti yukán ni kundee ya nchaka ni xndaku ya jnu'un Yandios nuu i. **35** Nu kuan ini, ti ni ka kachi ndaja'a ya:

—Ja kuan ki'vi ti ja'a tundo iyo. **36** Na taji ni taka yivi ja'a na nukoyo i taka ranchu jiin taka ñuu kendo yajni ja'a, ti na kuaan i staa kuxini i —kachi da naa da.

**37** Ko ni kachi Jesúsj:

—Kua'a maa ra naa ra staa na kee i —kachi ya.

Ti ni ka kachi tuku ndaja'a un:

—Sa'a yo jniñu iin kuiya sa ni'in yo xu'un ja kuaan kua'a yo staa stila ja kuu yivi ja'a. ¿Kuni ni ja xnaa yo xu'un nu? —kachi da.

**38** Ti ni kachi tuku ya:

—Kuande'e naa ra nasa staa stila ka ñava'a yivi ja'a—kachi ya.

Ka jande'e da, ti ni ka nandeokuñi da nuu ya:

—Iyo u'un staa stila jiin uu cháká —ni ka kachi da.

**39** Ti ni kachi ya jiin ndaja'a ya:

—Kachi jini yivi ja na nukoo yukun i nuu icha un —kachi ya.

**40** Ti ni ka nukoo i uu xiko uxi xi iin ciento i iin iin yukun.

**41** Yukan ti ni ki'in Jesús ndi u'un staa stila un jiin uu cháká un. Ni ndakoto ya andiví. Ni nakuanta'u ya nuu Yandios. Ti ni ki'in ya ndi u'un staa stila un, ni sakuachi ya, ni ja'a ya nuu ndaja'a ya ja na tejna'an da nuu yivi un naa i. Suni ni sakuachi ya ndi uu cháká un, ti ni tejna'an ya nuu yivi un ja na kaji i. **42** Tendi'i yivi un ni ka yaji i nasa ni kundee maa i. **43** Nu ni ndi'i ni ka yee i staa, ni ka nastutu ndaja'a ya un uxi uu chika staa stila jiin cháká un ja ni kendoso kua'a ga. **44** Ti chaa ni ka yee staa stila un ni ka iyo u'un mil.

### *Jika Jesús nuu nducha lago*

(Mt. 14.22-27; Jn. 6.16-21)

**45** Nu ni ndi'i ni ka nastutu ndaja'a ya ja ni kendoso un, ti ni kachi ya jiin da ja na kivi da barco, ti na kinkoyo dä iinga yu'u lago un undi ñuu Betsaída, nuu ni kendo ya ni kanxia'u ya jiin yivi un kuankoyo i. **46** Yukan ti kua'an ya undi yuku un ja na kakanta'u ya. **47** Nu kuan ki'vi, ti barco un ja kua'an undi ma'ñu lago un. Ti Jesús kande maa iin ya undi nuu ñu'un ichi.

**48** Nu ni kuu kaa uni jaña'an, ni jini ya ja ka jna'an da nundo'o ja skaka da barco un, chi kee xaan tonto tachi ichi sajní. Yukan ti kua'an Jesús jika ya nuu nducha lago un undi nuu ka'iin da naa da. Ti ni ndo'o ini ya ja ya'a ndoo ya ki'in ya niku. **49** Ko nu ni ka jini da ja jika ya kuaja ya nuu nducha un, ni ka ndo'o ini da ja iin ni'na kuu, ti ni ka yu'u xaan da undi ka kanajii da.

**50** Tendi'i da ka yu'u xaan, ko ni ka'an ya:

—Maa ri kuu, koto yu'u ra naa ra —kachi ya.

**51** Ni ndiví ya nuu barco un, ti ni kuu na'in tachi un. So ka naa ini da ni ka nde'e da nuu ya. **52** Vasu ka jini da jniñu sa'a ya, ko tu ni ka chaku ini da ja jika ya nuu nducha un, ti ni jakuñi tachi un, chi changa ga kandixia va'a da naa da.

### *Sa'a Jesús tajna yivi ka ku'u ñuu Genesaret*

(Mt. 14.34-36)

**53** Nu ni ka kendajiyó da yu'u lago un, ni ka jakoyo da ñuu Genesaret. Yukan ni ka kuun da, ti ni ka ju'ní da barco da. **54** Ti yivi ka'iin un ni ka nakuni i Jesús.

**55-56** Ti ni ka ja'a i corri, ni ka kaxnu'uni nuu ni yivi ñuu, taká ranchu jiin taká ñuu kuachi kendo yajní un, ja na kunda'a i taka yivi ka ku'u yu'u ichi un, ja na sa'a ya tajna i. Ti ka kanda'u i jiin ya, ja na kua'a ya vasu ti'li yu'u sa'ma ya na jnií i, ti na nduva'a i naa i. Ti taka yivi ni ka kue'e sa'ma ya, ni ka nduva'a i.

### *Yivi ka ka'an ndeva'a siki jnu'un Yandios*

(Mt. 15.1-20)

ka nanda'a da ti ka yee da staa, ja tu ka siuku da jnu'un chaa un naa da. Chi chaa fariseo jiin chaa Israel ka siin da jiin jnu'un jana'an, ja nini ka nanda'a da tijni jinu ti sa kaji da staa, suni nu ni ka ja'an da ya'u. Chi ka ndo'o ini da ja nu na sa'a da sia'an, ti ka kendo va'a da nuu Yandios. Suni sia'an ka sa'a da jiin taka ndajniñu, ka nakacha da taza, ko'o, tindo'o, kisi, suni jito da. Ti nu ni ka jini da ja ndaja'a Jesús tu ka siuku da jiin jnu'un un, ti ni ka kachi da jiin Jesús:

—¿Ndoo tu ka nanda'a ndaja'a ra nava iyo jnu'un jana'an? —kachi da.

**6** Ti ni kachi Jesús:

—Jandaa ni chaa profeta Isaías na jana'an, ja jiin jnu'un ra un ka stuu ra maa ra ja tu ka chiñu'un ra jnu'un Yandios, na ni kachi da:

Ko yivi ja'a, so jiin yu'u i ka chiñu'un i ru'u, ko aña i, chi jika kuu ini i jito i ru'u.

**7** Ti so ka xnda'u i ja ka kandixia ndaa i jnu'un Yandios, chi ka siin i jiin jnu'un maa i.

Ti ka ka'an i ja iin ni kuu jiin jnu'un Yandios.

Ni kachi Yandios ja ni chaa Isaías.

**8-9** Suni sia'an ka kuu ra, chi ro'o ni ka xndoo ra ley Yandios ja siin ra jiin jnu'un ka ndo'o ini maa ra naa ra, ja ni'in ini ra naa ra. Chi ka xndoña'an ra jiin jnu'un un, ti ka chaa xio ra ley Yandios. **10** Ja yukan ni kachi Moisés: "Kuandatu nuu tata ra nuu nana ra", ti "Nu nau ja na ka'an ndeva'a nuu tata nuu nana, ti va'a ga na kuū", kachi da. **11** Ko ro'o naa ra, ka ka'an ra ja tu kuu chindee ra tata ra nana ra. Chi ka ka'an ra: "Ni jito na ni'in ni kuu, ko vijna tukaa, chi taka ja ñava'a na ja ni soko na nuu Yandios." **12** Ti tu iin yivi na ka'an sia'an, yukan ti ka'an ra jandaa ja tukaa koto i nuu tata i ni nana i. **13** Yukan kuu ja ka siuku ra sava'ni ga jnu'un ka jajna'an ini maa ra, undi ja ka kuña'nua ga ra ja kuu maa jniñu ta'u Yandios —ni kachi Jesús.

### *Tu naa kuachi ndeyu yaji yo*

**14** Yukan ti kana tuku ya yivi un, ti ni kachi ya:

—Chunso'o va'a naa ra. **15-16** Nchakuachi iin chaa, ko ansu jiin ja kivi yu'u da, chi su'va jiin ja kaña yu'u da ja ka'an da un. Yukan kuu ja sa'a ja nchakuachi da —kachi ya.

**17** Ni xndoo ya yivi kua'a un, ti ni ndivi ya ini ve'e. Ti ndaja'a ya ni ka jikajnu'un da nasa kuni ka'an jnu'un ni ka'an ya nuu yivi un. **18** Ti ni kachi Jesús:

—¿Vanu iin ni kanda ra jiin yivi un naa i, ja tu ni ka chaku ini ra jnu'un ka'an ri nusa? Ni iin yivi tu nchakuachi i nuu sava'ni ga ndeyu yaji i. **19** Chi ja yaji i tu kivi ini aña í ja ndo'o ndeva'a ini i, chi kua'an chii jiti i —kachi ya.

Sia'an ni kachi ndaa Jesús ja iyo ndoo taka nuu ndeyu yaji yo.

**20-21** Siin Jesús ka'an ya, ti ni kachi ya:

—Nchakuachi iin chaa ndo'o ndeva'a ini aña da ti sa'a ndeva'a da, chi taka jnu'un ndeva'a un kaña undi ini aña da. Yukan sa'a ja ka ndo'o ndeva'a ini yivi, ti tu kuu na'iin ini i jiin. Kuni sakui'na i, ji'yo i ka'ni i ndiyi, **22** kuni kuisonchaa i ndajniñu ñanijna'an i kuasun ini i, ja'a ini i, xndoña'an i, sa'a i jniñu ja chakuachi i inga yivi, ndo'o vixi ini i, tu ka'an yifñu'un i, jika i siki vicio, chaa un ka xnda'u da ñasi'i ja ka yisikinchaa jna'an da, ti ndo'o kue'e ini da siki sava'ni ga yivi ja ji'yo da kusu da jiin. **23** Ti taka yukan vaji undi ini aña da, ti sa'a ja nchakuachi xaan da jiin —kachi ya.

*In ña'an Sirofenicia kanda'u ña jiin Jesús  
(Mt. 15.21-28)*

**24** Yukan ti kua'an Jesús undi ñuu Tiro jiin Sidón. Ni ni'in ya iin ve'e ni kendo ya. Ti tu kuni ya ja kuni yivi nuu kancha ya yukan, ko tu ni kuu kisa'yí ya. **25** Ti ñuu un iyo iin ña'an lulu ja jna'an tachi xaan. Ti nu ni jiniso'o nana ña jnu'un Jesús, ni ja'an ña nuu kancha ya ti ni jakunjiti ña nuu ya. **26** Ti ansu ñ'a'an ñuu Israel kuu ña, chi ña'an ñuu Sirofenicia kuu ña, chi yukan ni kaku ña. Ti jikanta'u ña nuu Jesús ja na kenchaa ya tachi xaan jna'an iin se'e se'i ña. **27** Ko ni kachi Jesús jiin ña:

—Sia, xnakana na sa'a ri jniñu nuu chaa ñuu ri, ti sa na sa'a ri jniñu kuni ra. Chi tu kuu ja kujisonchaa yo staa yu'u suchi kuachi nu ka yee i, ti kua'a yo nuu ina un —kachi ya.

**28** Ti ña'an un ni kachi ña:

—Jandaa ka'an ni Jito'yo, ko ina un chi ka'iin ti chii mesa, ti nastutu ti staa nukoyo yu'u suchi kuachi un —kachi ña.

**29** Ti ni kachi Jesús:

—Ni kachi ndaa ra chi ni kandixia ra ru'u. Vijna ti kuano'on ve'e ra, chi tachi xaan un ja ni kenchaa nuu sesi'i ra —kachi ya.

**30** Yukan ti kuano'on ña. Ni najaa ña ti ni nde'e ña ja ndetatu sesi'i ña un nukoo nuu jito, ti ja ni nduva'a.

### *Ni sa'a Jesús tajna tijni nuu yivi ka ku'u*

**31** Jaku ni kivi ti ni kee ya ñuu Tiro, ti kua'an ya. Ni ya'a ya ichi ñuu Sidón jiin ñuu Decápolis ti ni najaa ya undi yu'u lago Galilea. **32** Yivi ñuu Decápolis un, ni ka kinchaka iin chaa so'ó, ti ni ka jikanta'u da nuu Jesús ja na chuxndee ya nda'a ya siki chaa un ti na nduva'a da. **33** Ti Jesús ni kana ya chaa so'ó un. Ti ni chundee ya xini nda'a ya ini so'o da. Ni tivi si'i ya xini nda'a ya. Ti ni kue'e ya yaá da. **34** Ni ndakoto ya ichi andivi, ti ni jakan ini ya ja kukui'ya ini ya, ti ni kachi ya:

—Efata (ja kuni ka'an: Nuña) —kachi ya.

**35** Ti hora un ni jiniso'o ni chaa un, ti ni kuu ka'an va'a da. **36** Ti ni kachi Jesús jiin yivi un ja tu kani kuiti i jnu'un ja ni sa'a ya jniñu ña'nun un. Ko vasu sia'an ni kachi ya, ko vi'ga ni ka jani yivi un jnu'un. **37** Ti taka yivi ni ka jiniso'o un, ni ka naa ini i, ti ni ka kachi i:

—Taka jniñu sa'a da iyo va'a. Chi nduva'a chaa so'ó jiin chaa ñi'in un sa'a da —kachi naa.

### *Ni skaji Jesús vi'i ga kuun milyivi*

(Mt. 15.32-39)

## 8

**1** Kivi un ni ka taka tuku kua'a xaan yivi nuu ya, ko tu ka ndiso i staa kaji i. Yukan ti ni kachi ya jiin ndaja'a ya:

**2** —Kunda'u ini ri yivi kua'a ja'a, chi ja ni kuu uni kivi ka'iin yivi ja'a jiin ri, ti tukaa ndoo kaji yi. **3** Nu na nataji ri yivi ja'a nukoyo ndichia i, ti va kuita i sava ichi un, chi iyo yivi vekoyo jika —kachi ya.

**4** Ti ni ka kachi ndaja'a ya un:

—¿Nanu kii ja kua'a yo nuu yivi ja'a, ti ja'a tu kanchuku ni iin yivi? —kachi da.

**5** Ti ni jikajnu'un ya da:

—¿Nasa ga staa stila kandiso ra nusa?

Ti ni ka kachi da:

—Kandiso na uxia staa stila —kachi da.

**6** Nusa, ti ka'an jiin yivi na nukoo i naa i —kachi ya jiin da.

Ti ni ki'in ya ndi uxia staa stila un, ni nakuanta'u ya nuu Yandios, ni sakuachi ya, ti ni ja'a ya nuu ndaja'a ya un, ja na tejna'an da naa da nuu yivi'i naa i. <sup>7</sup>Suni iyo jaku ga chaká kuachi. Ni ki'in ya ti ni nakuanta'u ya nuu Yandios ja kuu chaká un. Ti suni ni ja'a ya nuu ndaja'a ya ja na tejna'an da nuu yivi'i un. <sup>8-9</sup>Kivi'i un ni ka iyo kuun mil yivi'i, ti tendi'i i ni ka yee i nava kuu ini maa i. Ti ni kendoso uxia ga chika na'nua staa stila ja ni ka nastutu ndaja'a ya. Yukan na ti ni nataji ya, ti kuan nukoyo i. <sup>10</sup>Ni ndiví ya ini barco jiin ndaja'a ya, ti kua'an ya ichi ñuu Dalmanuta.

*Ka'an chaa fariseo jiin Jesúsjana sa'a ya iin jniñu ña'nu  
(Mt. 12.38-40; 16.1-4; Lc. 11.29-30; 12.54-56)*

<sup>11</sup>Nu ni jaa barco un, ti ni ka chakoyo chaa fariseo ni ka jande'e da Jesúsj, ti ni ka keja'a ka xndichi da ya, ja kuni kotonchaa da ya. Ni ka ka'an da jiin ya ja na sa'a ya iin jniñu ña'nu, nava na kuni ndaa da ja maa Yandios ni taji Jesúsj. <sup>12</sup>U'u ni jitu ini ya, ti ni kachi ya:

—¿Ndoo ka jani ini ra ja sa'a ri jniñu ña'nu nuu ra naa ra, ti sa kandixia ra ja Yandios ni taji ru'u nusa? Ko nuu ra naa ra tu sa'a ri ni iin jniñu ña'nu —ni kachi ya.

<sup>13</sup>Ni xndoo ya da naa da, ti ni ndiví ya nuu barco jiin ndaja'a ya. Ti kua'an ya inga yu'u lago un.

*Xndaku Jesúsjakotonchaa nda'a ya jiin jnu'un ka ka'an chaa fariseo jiin jnu'un rey Herodes  
(Mt. 16.5-12)*

<sup>14</sup>Ni ka naa ini ndaja'a ya ja kunda'a da staa stila, chi iin ni ga staa stila ka yinda'a da. Ti nu kuankoyo da nuu barco un, ti ni kachi Jesúsj:

<sup>15</sup>—Koto ra naa ra jiin jnu'un ka ka'an chaa fariseo jiin jnu'un ka'an rey Herodes, chi yachi kuan kuichanuu jnu'un un nuu ni ñuu, nanu yachi keni'no levadura chii yujña kuu staa stila —kachi ya.

<sup>16</sup>Ti ndaja'a ya ni ka keja'a ka ndajnu'un da naa da ndoo ni ka'an ya sia'an:  
—¿Xi ja tu ka yinda'a yo staa stila kuu ja ka'an ya sia'an nu? —kachi da.

<sup>17</sup>Ni jini Jesúsjatunika chaku ini da siki jnu'un ka'an ya, ti ni kachi ya jiin da:

—¿Ndoo ka ka'an ra ja tu ka ndiso ra staa stila? Tu ni ka chaku ini ra nusa. Xaan ga ndava ini ra ja tu ka chaku ini ra. <sup>18</sup>¿Ka nde'e ra jiin nduchi ra taka jniñu sa'a ri, ti ka ñuso'o ra taka jnu'un ka'an ri, ti tu ja'i chaku ini ra nu?  
<sup>19</sup>¿Tu ka na'an ra kivi na ni tejna'an ri u'un staa stila nuu u'un mil yivi'i un naa i nusa? ¿Ti nasa staa stila ni ka nastutu ra ja ni kendoso nusa? —kachi ya.

—Ni ka nastutu na uxi uu chika staa stila —kachi da naa da.

<sup>20</sup>—Tisuni na ni tejna'an ri uxia staa stila nuu kuun mil yivi'i un, ¿nasa chika na'nua ni ka nastutu ra un nusa? —kachi ya.

—Uxia chika na'nua ni ka nastutu na —kachi da naa da.

<sup>21</sup>—¿Ti ndoo tu ka chaku ini ra nusa? —kachi ya.

*Sa'a Jesúsjatjana iin chaa ñuu Betsaida*

<sup>22</sup>Nu ni jaa ya ñuu Betsaida, sava yivi'i ni ka yinda'a iin chaa kuáá nuu Jesúsj. Ti ni ka ka'an da jiin ya ja na sa'a ya tajna chaa kuáá un. <sup>23</sup>Ni jniñu ya nda'a chaa un, ti kua'an ya jiin da yu'u ñuu un. Ti yukan ni jaka ya ti'lli tisi'i ya nduchi da. Ni chuxndeede ya nda'a ya siki da, ti ni jikajnu'un ya da:

—¿Ja kuu nde'e ra ti'lli, xi tuu nu? —kachi ya.

<sup>24</sup>Ti chaa un ni nde'e da, ti ni kachi da:

—Jini na yivi'i, ko na kanda yujnu kanda ti ka jika kuankoyo —kachi da.

- 25** Ni chaa tuku ya nda'a ya nduchi da, yukan ti sa ti ni kuu nande'e va'a da.  
**26** Ti ni kachi ya jiin da:  
 —Kuano'on ve'e ra, ko tukaa ki'in ra ichi ñuu. Ti koto kani ra jnu'un nuu ni iin yivi un —kachi ya.

*Kachi ndaa Pedro ja Jesús kuu Cristo  
(Mt. 16.13-20; Lc. 9.18-21)*

- 27** Yukan ti kua'an Jesús jiin ndaja'a ya ñuu Cesarea, iin ndañuu Filipo. Ti ichi kuankoyo da ni jikajnu'un ya nuu da naa da:  
 —¿Ndo'o ka ndo'o ini yivi ja naa chaa kuu ri? —kachi ya.

- 28** Ti ni ka kachi da:  
 —Ka ka'an i ja kuu ni Juan, chaa ni skuanducha. Sava i ka ka'an ja kuu ni Elías, chaa ni ka'an jnu'un Yandios undi na jana'an. Ti sava ga i ka ka'an ja kuu ni inga profeta na jana'an—kachi da naa da.

- 29** —Ti maa ra, ¿nasa ka ndo'o ini ra nusa? —kachi ya.  
**Ti ni kachi Pedro:**  
 —Maa ni kuu Cristo, ja ni taji Yandios ja ndiso jniñu ña'nu —kachi da jiin ya.

**30** —Maa ri kuu, ko koto kani ra jnu'un naa ra nuu ni iin yivi —kachi ya.

*Ka'an Jesús ja ka'ni yivi ya ko nandoto ya  
(Mt. 16.21-28; Lc. 9.22-27)*

- 31** Yukan ni kachi ya jiin ndaja'a ya:  
 —Ru'u ja kuu ri maa Se'e Yivi Ñuyivi, koo ndo'o koo nene ri. Chi taka chaa ka kuña'anu nación Israel, jiin taka sutu kuña'nu, jiin suni chaa ka xna'an ley ini veñu'un un, tu kuajnu'un da ru'u. Chi ka'ni da ru'u, ko nu uni kivi ti nandoto ri —kachi ya.

- 32** Ni kachi kaji ya ja sia'an kondo'o ya. Ti Pedro ni kachi da jiin ya ja koto kua'a ya jnu'un ja koo yukan. **33** Ko Jesús ni nandeokuñi ya nuu uu ga ndaja'a ya un, ti ni ka'an ya nuu Pedro:

- Kuxio ki'in ra, chi xndaku ra nanu xndaku ja'u'u. Chi so ja sakanuu ini ri kuu ro'o, chi tu ndo'o ini ra ja kin siuku ri nava kuni maa Yandios, chi ro'o ndo'o ini ra nava ka ndo'o ini yivi ñuyivi ja'a —kachi ya.

*Nau ja kuni siin jiin jnu'un Yandios*

- 34** Yukan ti ni kana ya ndaja'a ya jiin yivi kua'a un, ti ni kachi ya jiin i:  
 —Nu nau ja kuni siin ri siki jnu'un Yandios ja ka'an ri, ti na xndoo i taka ja ndo'o ini i, ti na tava ini i ja taka kivi na koo ndo'o koo nene vasu na kuu i ja siki ru'u. **35** Chi yivi kandio ini ja kunchuku va'a i nuu ñuyivi ja'a, ja tu kandixia i jnu'un ri, ti xnaa i maa i. Ko yivi na kondo'o koo nene i ja na kandixia i ru'u jiin ja ka'an i jnu'un ri, ti yivi un na kunchuku i nuu andivi ja kuu saa ni. **36** Jandaa na kachi ri ja tundo ni'in yivi ja ka ndiyo ini i ni'in yi taka ja iyo nuu ñuyivi ja'a, ti xnaa i maa i, ja tu kuncha i jiin Yandios nuu andivi. **37** Jandaa na nachi ri ja tu iyo kuiti naa jiin chunaa yivi un ja nama i aña i. **38** Ko nu iin yivi kukanuu i ja siki ru'u, ja tu kuni ka'an i nuu yivi ja kandixia i ru'u, vasu nuu yivi ka yisikinchaa jnu'un ri, nusa ti ru'u, maa Se'e Yivi Ñuyivi, suni kukanuu ri ndakuni'in ri sivi i kivi na nchaa ri jiin taka ángel ja ka junukuachi nuu Yandios. Chi ja kuu kivi un kundiso ri jniñu ña'nu ja tatu Tata ri Yandios nuu ri naa ri. Yukan ti tu nakuni kuiti ri taka yivi ja tu ni kuni ka'an i ja kandixia i ru'u —ni kachi Jesús.

—Jandaa na kachi ri ja sava ro'o ja ka'iin ja'a kuchaku ra ti kuni ra nchaa Se'e Yandios jiin jniñu ña'nu xaan ga, ti ta'u ya jniñu —ni kachi ya.

**Ni nasama Yandios nuu Jesús**  
(Mt. 17.1-13; Lc. 9.28-36)

<sup>2</sup> Nu ni kuu iñu kivi ti ni kana ya Pedro, Jacobo jiin Juan, ti kua'an ya jiin da yuku sukun ga un nuu ni ku'iin da naa da. Ti Jesú ni nasama nuu ya. <sup>3</sup> Sa'ma ya ndinchaan ii. Ti ni ndukiyi xaan tonto ja ni iñin yiví ñuyiví ja'a tu nakacha sia'an. <sup>4</sup> Ti yukan ni ka jini da ja ni ka ndenda uu chaa ni ka kuu profeta na jana'an Elías jiin Moisés, ja ni kuu da iñin chaa kuña'nu ga nuu nación Israel, ka ndajnu'un da jiin Jesú. <sup>5</sup> Ti ni kachi Pedro:

—Maestro, va'a ga na kendo yo ja'a. Na sa'a na ve'e kuii na kunchaa yo. Iñin kuu maa ni, inga na kuu Moisés, ti inga na kuu Elías —kachi da jiin Jesú.

<sup>6</sup> Sia'an ni ka'an Pedro, chi so ni ka sa'u ini da naa da ja ka yu'u da, ti tu ni jini da nau kuu jnu'un ka'an da. <sup>7</sup> Yukan ni jakava iñin viko nu'un siki da naa da, ti nuu viko un ni ka jiniso'o da iñin ndusu ja ni ka'an:

—Ja'a kuu Se'e ri ja kunda'u ini ri. Chunso'o ti kuandatu ra naa ra jnu'un ka'an ya —kachi.

<sup>8</sup> Ti nu ni ka nde'e da un, tukaa ndoo iyo Moisés jiin Elías, chi maa ni ga Jesú ni ka jini da.

<sup>9</sup> Nu ni ka nandeokuñi da xini yuku un, ti ichi ka no'on da ni kachi Jesú ja tu kani kuiti da jniñu naa da ndoo ni ka jini da, chi undi nu ni nandoto ya ja kuu ya maa Se'e Yivi Ñuyiví. <sup>10</sup> Yukan ti tu ni ka jani kuiti da jnu'un nuu ni iñin yivi, chi so ka ñu'un ini maa da nasa kuu ja kuñ ya, ti nandoto ya. <sup>11</sup> Ni siin da kuankoyo da ti sa ni ka jikajnu'un da Jesú:

—¿Ndo ka ka'an chaa ka xna'an ley ini veñu'un un ja xnakan ndii tuku profeta Elías, ti sa kii Cristo nusa? —kachi da. <sup>12</sup> Ti ni kachi ya jiin da:

—Jandaa kuu ja xnakan Elías ndii tuku, ti satu'va da yiví jiin tendi'i ja iyo ini ñuyiví ja'a, chi sia'an ka'an nuu tutu ii. Nu sia'an kuu, ¿ti ndoo ka'an ga nuu tutu un ja koo ndo'o koo nene maa Se'e Yivi Ñuyiví, ti skexiko yivi maa ya, ti koto u'u i nuu ya nu? <sup>13</sup> Ko na kachi ri ja Elías, chi ja ni kii da, ko ni ka sa'a ndeva'a yivi nava kuu ini jiin da. Yukan ni kundaa nava yoso nuu tutu ii ja sia'an kuu —kachi ya.

**Ni nduva'a iñin chaa lulu ji'i yivi**  
(Mt. 17.14-21; Lc. 9.37-43)

<sup>14</sup> Yukan ti ni najaa ya nuu ka'iin uu ga ndaja'a ya, ni jini ya ka'iin kua'a xaan yivi nuu da, ti suni ka'iin chaa ka xna'an ley un, ti ka ka'an nchaa jna'an chaa un jiin ndaja'a ya. <sup>15</sup> Nu ni ka jini yivi un ja ni najaa Jesú, so ni ka naa ini i ka nde'e i nuu ya. Ti ni ka ja'a i corri kuan kanxia'u jiin ya. <sup>16</sup> Yukan na ti ni jikajnu'un ya ndaja'a ya:

—¿Ndo ka kijna'an ra jiin chaa un naa da? —kachi ya.

<sup>17</sup> Ti iñin chaa ni kachi:

—Maestro, yinda'a na iñin se'e na nuu ni ja ndo'o i tachi xaan, ti undi kuu ñiñi iñin i sa'a. <sup>18</sup> Nu ni ndeja'a kue'e un, undi jiyi'i i ti jiokava i nuu ñu'un, ti kaña ti'ñu yu'u i. Suni ku'yu jnu'un i, ti undi kuu tikuku i. Ni kachi na jiin ndaja'a na ni ja na kenchaa da tachi xaan un ki'in, ko tu ni kujnuni ja sa'a da naa da.

<sup>19</sup> Yukan ti ni kachi ya jiin ndaja'a ya:

—Xaan niñin ini ra naa ra. Nasa ga kivi ti sa kandixia ra nusa. Ti ja ni kuna'an ja ndo'o nene ri jiin ra naa ra. Kuan kiñin chaa lulu un na kii da —kachi ya.

**20** Ti ni ka janki'in da chaa lulu un. Ni jini tachi xaan un nuu Jesús, ti luego ni, ni sa'a ja na kuyi'i chaa lulu un. Ni nduva i nuu ñu'un, ni keja'a jiokava i, ti kaña ti'iñu yu'u i. **21** Ti ni jikajnu'un ya maa tata i:

—¿Nasa kuiya ni kuu ja jna'an i tachi xaan ja'a? —kachi ya.

Ti ni kachi tata i:

—Undi lulu i. **22** Ti tijni jinu kuni ka'ní tachi xaan un yi. Iyo nduva i nuu ñu'un. Iyo kanakava i ini nducha. Ti nu kuu chindee ni saña, kunda'u ini ni nuu na jiin se'e na, ti sa'a ni tajna i —kachi da.

**23** Ti ni kachi Jesús jiin da:

—Koto ka'an ra sia'an, chi jandaa kuu ja sa'a ri jniñu ña'nu un nu na kandixia ra —kachi ya.

**24** Ti tata suchi lulu un ni ka'an jaa da:

—¡Kandixia na, ko chindee ni saña nava na kandixia ndaa ga na! —kachi da.

**25** Nu ni jini Jesús ja kuan kututu ga yivi naa i, ti ni kachi ya jiin tachi xaan un:

—Ro'o tachi xaan, ja sa'a ñi'in ra, ti sa'a so'o ra chaa lulu ja'a, kuankee ti koto xnaña'an ga ra nuu i —kachi ya.

**26** Ti tachi xaan un ni kisi chaa lulu un, ni sa'a ja na kuyi'i tuku da, ni kanajiin, ti ni kenda kua'an. Ti suchi un undi ni ji'i naa i katuu i. Ni ka ndo'o ini sava yivi un ja ja ni ji'i yi. **27** Ko Jesús ni jnii ya nda'a i, ni ndokani ya i, ti ni ndokuiñi i kandichi i.

**28** Nu ni ka najaa da ve'e, ni ka jikajnu'un ndaja'a un ya:

—¿Ndoo tu ni kuu kenchaa na tachi xaan un ki'in naa na? —kachi da.

**29** Ti ni kachi Jesús:

—Ja keni'in yo iin tachi xaan sia'an, ti kuni ja na kakanta'u ni ini ni añu yo nuu Yandios. Chi tu kuu sa'a yo nu tu kuñukuu ini yo ja maa Yandios kuu ya sa'a jniñu un —kachi ya.

### *Ka'an tuku Jesús ja kuū ya ko nandoto ya*

(Mt. 17.22-23; Lc. 9.43-45)

**30-31** Yukan na ti kua'an ya jiin ndaja'a ya inga ichi, ni ka ya'a da ñuu Galilea. Ko quankoyo xe'e da jiin ya, chi kuni xndaku ya iin jnu'un kanuu ga nini nuu maa da naa da, ti tu kuni ya ja kuni yivi nanu kancha ya. Yukan ti ni kachi ya nuu da:

—Maa Se'e Yivi Ñuyivi, nakua'a yivi maa ya nuu chaa kanda kua'an kanda vaji un, ti ka'ni da maa ya. Ko nuu uni kivi ti nandoto ya —ni kachi ya.

**32** Ko tu ni ka chaku ini ndaja'a ya un jnu'un ni ka'an ya, ti ni ka yu'u da kajnu'un da ya.

### *Xna'an Jesús nau kuu chaa kuña'nu ga*

(Mt. 18.1-5; Lc. 9.46-48)

**33** Ti nu ni ka jaa da ñuu Capernaum, ni ka kivi da iin ve'e, ti ni jikajnu'un ya nuu ndaja'a ya:

—¿Ndoo ka ka'an ra ichi vaji yo? —kachi ya.

**34** Ti maa da tu ni ka ka'an kuiti da, chi ichi un ka ndajnu'un da sia'an:

—¿Nau iin yo kuña'nu ga nusa? —ni ka kachi da.

**35** Yukan ti ni nukoo Jesús, ni kana ya ndi uxí uu ndaja'a un, ti ni kachi ya:

—Nu nau ja kuni kunúú, ti kuni kuña'nu, va'a ga na kendo sandi'i ni ga, ti na kunukuachi nuu uu ga da un —kachi ya.

**36-37** Ti ni jnii ya iin suchi lulu, ti ni jununchaa ya i, ti ni kachi ya jiin ndaja'a ya:

—Jiin jniñu ndiso ri na kachi ri ja nu na kunda'u ini ra iin suchi lulu sia'an, tija ni kuu ra iin yivi ni janta'u ru'u. Ti ja janta'u ra ru'u, ansu ninu ru'u janta'u ra, chi suni janta'u ra Yandios, ya ni taji ru'u vají ri —kachi ya.

*Jesús ka'an ya jiin ndaja'a ya ja na kuanta'u da yivi sa'a jniñu ña'nu jiin sivi ya*

(Lc. 9.49-50; Mt. 10.42)

<sup>38</sup> Yukan ti ni kachi Juan:

—Maestro, ni ka jini na iin chaa ja jiin sivi ni keni'in da tachi xaan ka jna'an sava yivi. Ti ni ka kachi na jiin da ja tu sa'a da jniñu un, chi tu yaku da jiin yo —kachi da.

<sup>39</sup> Ti ni kachi Jesús:

—Tu ka'an ra nuu da niku, chi chaa ndaku ni'in sivi ri ja sa'a da iin jniñu ña'nu nanu sa'a ri ka'an va'a da ti tu ka'an da siki ri. <sup>40</sup> Chi yivi tu ka'an siki yo ja chindee i yo'o, su'va ka'an i ja'a yo. <sup>41</sup> Jandaa kuu ja iin yivi na kua'a iin vasu nducha ko'o ra ja siki ja ka yi'i ra jiin Cristo, ti jandaa kuiti kuu ja iyo ta'u i —kachi ya.

*Kachi Jesús ja koo yo nundo'o nu na sa'a yo kuachi*

(Mt. 18.6-9; 5.13; Lc. 17.1-2; 14.34-35)

<sup>42</sup> Siin Jesús ka'an ya, ti ni kachi ya:

—Iin nundo'o ka'nú xaan kundatu iin chaa nu na xnda'u da iin suchi lulu, ti sia'an tukaa kandixia i ru'u. Iyo va'a ga nu na kundikun sukun da jiin iin yoso molino, ti na ki'in da chii nducha mar. <sup>43</sup> Chi nu nau yivi kaña ini ja kuni sa'a i iin kuachi jiin nda'a i, ti yachi na nakani ini i ja tu va'a. Na sa'a i nanu ja, ja ni kenchaa nda'a i un kua'an. Chi va'a ga na koo iin ni nda'a i, ti kunukuachi i nuu Yandios ansu ja koo ndiinduu nda'a i, ti ki'in i nuu infiernu. <sup>44</sup> Ti yukan, tindaku un tu kuú ti, ti ñu'un un tu nda'va kuiti. <sup>45</sup> Xi nu nau yivi kaña ini i ja kuni kunchakuachi i jiin si'in i, ti na nakani yachi ini ja tu va'a. Ti na sa'a i nanu ja, ja ni kenchaa si'in i un kua'an. Ti va'a ga na koo ku'lú i najaa i nuu Yandios, ti ansu ja jiin ndiinduu si'in i ki'in yi nuu infiernu. <sup>46</sup> Ti yukan tindaku un, tu kuú ti, ti ñu'un un tu nda'va kuiti. <sup>47</sup> Ti nu nduchi i sa'a ja na sa'a i kuachi, ti yachi na nakani ini i ja tu va'a. Ti na sa'a i nanu ja, ja ni tava i kua'an. Chi va'a ga na najaa i nuu Yandios jiin iin ni nduchi i ti ansu ja ki'in yi jiin ndiinduu nduchi i nuu infiernu. <sup>48</sup> Ti yukan tindaku tu kuú ti, ti ñu'un un tu nda'va kuiti.

<sup>49</sup> Ko ja kuu maa ra naa ra, kuu nanu ja ni ka kivi ra nuu ñu'un, chi ja kondo'o koo nene ra, kuu nanu ja soko ra maa ra jiin nundo'o kondo'o ra un. Chi nanu ni ka chi'i ra ñii ja na sandoo ja ni soko ra nuu Yandios, nava ni kachi ley Moisés, ti sia'an sandoo Yandios ro'o naa ra ja jiin nundo'o un, nava na kunukuachi va'a ra nuu ya.

<sup>50</sup> Sa'a yo nanu ja ka kuu ra nanu ñii, chi nu ni naa xiko, tukaa kuajniñu yo ja kuu nuu ndeyu. Suni sia'an kuni ri jiin ra naa ra ja na kukutu ini ra jiin jnu'un xndaku ri, ti sia'an na kukuee kunchuku ra naa ra —kachi Jesús.

*Xndaku Jesús siki chaa ka xndoo ñasi'i*

(Mt. 19.1-12; Lc. 16.18)

## 10

<sup>1</sup> Yukan ni kee ya ñuu Capernaum, ti kua'an ya ichi ñuu Judea undi inga yu'u yucha Jordán. Ti ni ka kututu yivi nuu ya. Ti ni keja'a tuku ya xndaku ya nuu yivi un.

<sup>2</sup> Ti yukan ni ka jakoyo tijni chaa fariseo ja ka kuni xndichi da ya, ti ni ka jikajnu'un da:

—¿Iyo va'a ja xndoo iin chaa ñasi'i da nu? —kachi da.

<sup>3</sup> Ti ni kachi Jesús:

—Ñdoo ni kachi ley Moisés? —kachi ya.

<sup>4</sup> Yukan ni ka kachi da:

—Kachi ley Moisés ja iin chaa kuu xndoo da ñasi'i da, nu na kua'a da iin tutu nuu ña, ti kuu kendo ña —kachi da.

<sup>5</sup> Yukan ti ni kachi Jesús:

—Sia'an ni ka'aq Moisés, chi ndee ni'in ini ra naa ra, kachi ya. <sup>6</sup> Ko undi na ni nukoo ñuyivi, ni sa'a Yandios taka ndajniñu iyo nuu ñuyivi ja'a, ti ni sa'a ya iin chaa jiin iin ñasi'i. <sup>7-8</sup> Yukan kuu ja nu ni nanda'a iin chaa jiin iin ñasi'i, ti ndinduu da ni ka nduu da iin ni ga jiin ñasi'i da. Tukaa ka kuu siin siin yivi, chi iin ni ga ni ka kuu da. <sup>9</sup> Yukan kuu ja iin chaa, tu kuu sasiin da ja ni chajna'an maa Yandios —kachi ya.

<sup>10</sup> Yukan na ti ndaja'a ya, nu ni ka na jaa da ve'e jiin Jesús, ti ni ka jikajnu'un da ya nasa kuni ka'an jnu'un ni ka'an ya jiin yivi un, <sup>11</sup> ti sa ni kachi ya:

—Nu iin chaa na xndoo da ñasi'i da, ti nanda'a da jiin inga ña, ti yisikinchaa da ñasi'i da undi nuu ja sia'an. <sup>12</sup> Suni sia'an kuu jiin iin ñasi'i nu na xndoo ña yii ña undi nuu —kachi ya.

### *Jikanta'u Jesús ja kuu suchi kuachi*

(Mt. 19.13-15; Lc. 18.15-17)

<sup>13</sup> Yukan ti ni ka chakoyo yivi nuu ya jiin suchi kuachi ja na jniñi ya i. Ko ni ka jini ndaja'a ya ja sia'an ka kuni yivi un, ti tu ni ka ja'a da jnu'un ja tu'va yivi un nuu ya. <sup>14</sup> Ti nu ni jini Jesús ja ka nduxaan da nuu yivi un, ni kuiti ini ya, ti ni kachi ya jiin da:

—Sia, na kikoyo i nuu ri, ti tu kasí ra ichi i naa ra. Chi yivi ja tu vixi ini, ti nde'e ini i nanu suchi kuachi sia'an, kuu kivi i nda'a Yandios ja na ta'u ya jniñu nuu i. <sup>15</sup> Chi na kachi ndaa ri ja tu yiñi kuanta'u iin suchi lulu jnu'un Yandios ja na ta'u ya jniñu nuu i, chi ti kuni'in ga ini i, ti ansu iin yivi ña'nú ja, ja ni kuni'in ini, chi tu janta'u i ja kivi i nda'a Yandios ja na ta'u ya jniñu nuu i —kachi ya.

<sup>16</sup> Ti ni ki'in ya ndi iin ndi iin suchi kuachi un, ni jununchaa ya i, ni chuxndee ya nda'a ya siki i, ti ni jikanta'u ya nuu Yandios ja na koto ya i.

### *In chaa riko jikajnu'un da Jesús*

(Mt. 19.16-30; Lc. 18.18-30)

<sup>17</sup> Yukan ni siin ya ichi kua'an ya, ti jinu xaan iin chaa ni chaa nuu ya. Ni jakunjiti da, ti ni kachi da:

—Chaa va'a kuu ni maestro. Ti kachi ni, ¿naa jniñu va'a sa'a na, ti na ni ta'u na nuu Yandios, ti kuncha na nuu andivi ja kuu saa ni? —kachi da.

<sup>18</sup> Ti ni kachi Jesús:

—Ndoo ka'an ra ja chaa va'a kuu ri, ti tu iyo ni iin chaa va'a, chi maa iin ni Yandios. <sup>19</sup> Jini ra ja tu kusikinchaa ra ñasi'i, tu sakui'na ra, tu ka'an ra siki yivi, tu xndoña'an ra, kuandatu nuu tata ra nuu nana ra, kachi ley ya —kachi Jesús.

<sup>20</sup> Yukan ti kachi da:

—Maestro, taka jniñu un ja ni siuku na undi lulu na —ni kachi da.

<sup>21</sup> Ko ni nde'e va'a Jesús nuu da, ni kunda'au ini ya, ti ni kachi ya:

—In ni ga jniñu kumani ja sa'a ra. Kua'an ti xiko ndi'i ra taka ja ñava'a ra, ti tejna'an xu'un un nuu yivi nda'u. Sia'an ti sa kuñaya'a ra yaji nuu andivi. Nu ni ndi'i ni sa'a ra un, yukan ti ña'an na cho'o —kachi ya.

<sup>22</sup> Ko nu ni jiniso'o da ja sia'an ni ka'an Jesús, ni ndi'i ini da, ti ni kukui'ya xaan ini da ti kua'an da, chi vanuxia riko xaan da.

**23** Yukan ti ni nde'e vindaa ya nuu ndaja'a ya, ti ni kachi ya:  
—Xaan ga yii ja kivi iin chaa riko nda'a Yandios ja na ta'u ya jniñu nuu da —kachi ya.

**24** So ni ka naa ini ndaja'a ya ja sia'an ni ka'an ya. Ko ni kachi tuku ya:  
—Hijo naa ra, xaan ga yii ja kivi iin chaa riko nda'a Yandios ja na ta'u ya jniñu nuu da, chi ñukuu ga ini da taka ja ñava'a da. **25** Yachi ga kivi iin camellu yau iin yiki tikui, ansu ja na kivi iin chaa riko nda'a Yandios ti ta'u ya jniñu nuu da —kachi ya.

**26** Ko maa ndaja'a ya, vi'ga ni ka naa ini da, ti ka ndajnu'un da:  
—¿Nau kuu chaa nanita'u nusa? —kachi da.  
**27** Yukan ni nde'e ya nuu da naa da, ti ni kachi ya:  
—Ja kuu yivi, tu kuu kuiti sa'i i, ko Yandios chi taka ni kuu sa'a ya, ti tu iyo ni iin ja kendo sia'an ni ja tu kuu sa'a ya —kachi ya.

**28** Yukan na ti ni kachi Pedro jiin ya:  
—Nde'e ni, saña naa na, ni ka xndoo na taka ja ka ñava'a na, ti vekoyo na jiin ni —kachi da.

**29-30** Ti ni kachi ya:  
—Jandaa ndixia kuu ja na kachi ri nasa kuu jiin yivi ja kuni kivi i nda'a Yandios ja na ta'u ya jniñu nuu i, vasu na xndoo i ve'e i, kua'a i, ñani i, tata i, nana i, ñasi'i iin se'e i iin ñu'un i. Ja sia'an ti su'va na ni'l'in yi vil'ga ja kuu taka ja ni ka xndoo i un. Chi koto u'u yivi maa i, ko nuu kuncha i andivi, tukaa kuu kuiti i. **31** Ko na jaa kivi ja xndichi Yandios nuu taka i, ti chaa ka ndo'o ini ja ka kuña'nu da vijna, nduu da sandi'i ni ga. Ti chaa ka kuu sandi'i ni ga vijna, nduu ña'nu ga da kuu kivi un —kachi ya.

### *Ka'an tuku Jesús ja kuū ya (Mt. 20.17-19; Lc. 18.31-34)*

**32** Yukan ti ni ka kaa da ichi ñuu Jerusalén kuankoyo da. Yoxnuu Jesús, ti ka jindandikun ndi uxi uu ndaja'a un, ko so ka naa ini da kuankoyo da ti ka yu'u da, chi kua'an ya ichi nuu ka jito u'u yivi ya. Suni kuankoyo ga yivi ka skua'a jiin ya, ko suni ka yu'u i. Yukan ni kana siin ya ndi uxi uu ndaja'a ya un, ti ni kachi ya taka nundo'o ja kii siki ya. **33** Ti kachi ya:

—Ja ka jini ra ja ni ka kaa yo vekoyo yo ichi ñuu Jerusalén. Ti yukan nakua'a yivi maa Se'e Yivi Ñuyivi nuu taka sutu Israel ka kuña'nu, jiin nuu chaa ka xna'an ley ini veñu'un ka'nú Israel. Ti chakuachi da ya, ti nakua'a da ya nuu yivi inga nación. **34** Ti chaa un kusikinchaa da maa ya, tivi si'i da nuu ya, kua'a da tau ya, ti ka'ní da ya. Ko nu uni kivi, ti nandoto tuku ya ma'ñu ndiyi un —kachi ya.

### *Jacobo jiin Juan ka jikan da iin ta'u nuu Jesús (Mt. 20.20-28)*

**35** Yukan na ti Jacobo jiin Juan, se'e yii Zebedeo, ni ka tu'va da nuu Jesús ti ni ka kachi da:

—Maestro, ka kuni na ja kua'a ni ja ka jikan va —ka kachi da.

**36** Ti ni kachi Jesús:

—¿Ndoo ka kuni ra nusa? —kachi ya.

**37** Ti ni ka kachi da:

—Ka kuni na ja na nukoo na jiin ni kivi na nduña'nu xaan ni, ja ta'u ni jniñu nuu ni tu'u ñuyivi, iin na nda'a kua'a ni, ti inga na ichi nda'a sajní ni —kachi da.

**38** Ti ni kachi ya:

—Ko ro'o, tu jini ra ndoo ka jikan ra, ¿xi kundee ra koo ndo'o koo nene ra jiin ri taka nundo'o kii siki ri, ti tava ini ra koto ra nundo'o un, vasu na kuú ra naa ra nu? —kachi ya.

**39** Ti ni ka kachi da:

—Tava ini na ja kondo'o na jiin ni —ni ka kachi da.

Ti ni kachi tuku ya:

—Jandaa ndixia kuu ja ka tava ini ra kondo'o ra jiin ri, ti koto ra nundo'o un vasu na kuu ra. **40** Ko ja nukoo iin ra ichi nda'a kua'a ri ti inga ra ichi nda'a sajini, tu kachi ri, chi yukan ja ka iyo tu'va ja kunchuku nu nau ja na kachi maa Yandios ja kuncha jiin ri —kachi ya.

**41** Nu ni ka jiniso'o ndi uxi ga ndaja'a un, ti ni ka kití ini da nuu Jacobo jiin Juan. **42** Ko ni kana Jesús tendí'i da, ti ni kachi ya:

—Ka jini ra ja chaa kuña'nú nuu iin nación, ti maa da xiin, chi kuña'nú ga da, ti taka chaa ka kuña'nú jiin da, ta'u da jinñu nuu. **43-44** Ko ansu sia'an kuu jiin ra naa ra. Chi su'va, nu nau ro'o ka kuni kuña'nú ga nuu uu ga chaa ja'a, ti su'va na kuanukuachi da nuu ra naa ra. Chi sava'ní ga ja na kuni kuña'nú, ti su'va nduu nanu iin muzu. **45** Chi maa Se'e Yíví Ñuyíví, ni chaa ya, ko ansu ja kunukuachi yíví nuu ya, chi su'va ja na kunukuachi ya nuu yíví. Ti nakua'a da maa ya ja na chunaa ya nuu kuachi yíví naa i, nava na nanita'u i —kachi ya.

(Mt. 20.29-34; Lc. 18.35-43)

**46** Yukan ti ni ka jaa da ñuu Jericó. Ko ni siin ya kua'an ya jiin ndaja'a ya, ti kua'a yíví kuankoyo. Ko nu ni kenda ya yu'u ñuu un, yukan nukoo iin chaa kuaa nani Bartimeo, kuu da se'e yíi iin chaa nani Timeo, ti yukan jikan da xu'un. **47** Ti nu ni jiniso'o da ja Jesús, chaa ñuu Nazaret, kuu ya vaji un, ni kanako'o da:

—¡Ni'in Jesús! ¡Maa ni ta'u jniñu nanu ni sa'a rey yo David na jana'an, kunda'u ini ni saña! —kachi da.

**48** Tijni yíví ni ka nduxaan nuu da ja na kasi yu'u da, ko maa da vi'ga ni kanako'o da:

—¡Ni'in Jesús! ¡Maa ni kuu ja ta'u jniñu nanu ni sa'a rey yo David na jana'an, kunda'u ini ni saña! —kachi tuku da.

**49** Yukan ni jakuiñi Jesús, ti ni kachi ya:

—Kana da na kii da —kachi ya.

Ni ka kana da chaa un, ti ni ka kachi da jiin da:

—Koto ndi'i ini ra. Ndokuiñi, ña'an na cho'o, chi kana ya ro'o —kachi da jiin chaa kuaa un.

**50** Ti chaa un ni skaña da tikachi da, ti ni ndokuiñi da kua'an da nuu Jesús.

**51** Ti Jesús ni jikajnu'un ya maa da:

—¿Ndoo kuni ra ja sa'a ri jiin ra nusa? —kachi ya.

—Maestro, kuni na ja na ndundijin nduchi na —kachi da.

**52** Ti ni kachi Jesús jiin da:

—Kuano'on, ja ni nduva'a ra, chi ni kandixia ra jniñu sa'a ri —kachi ya.

Ti hora ni, ni ndundijin nduchi chaa kuaa un, ti ni nandikun da Jesús, ti kua'an da jiin ya.

*Kivi Jesús ñuu Jerusalén*

(Mt. 21.1-11; Lc. 19.28-40; Jn. 12.12-19)

## 11

**1** Nu ni kuyajni ya ñuu Jerusalén, yajni ñuu Betfagé jiin Betania, yajni yuku Olivos, **2** Ti yukan ni taji ya uu ndaja'a ya, ti ni kachi ya:

—Kuankoyo ñuu kande ndijin un. Ti yu'u ñuu un ndiku iin burru, ja ti koso ga yivi ti. Ndaji ti ti kii ra jiin ti. **3** Ti nu nau chaa jikajnu'un ndoo ka ndaji ra ti, ti kachi jiin da “Maa Jito'yo nandi'i da ti”, kachi ra —kachi ya.

<sup>4</sup> Ti kuankoyo nduu ndaja'a ya un, ti ni ka nani'in ndixia da burru un ndikun ti yu'u ichi un, yajni iin ve'e. Ti ni ka keja'a ka ndaji da ti. <sup>5</sup> Ti iin chaa ka'iin un ni kachi:

—Ndoo ka sa'a ra, ja sa burru jña ka ndaji ra? —kachi da.

<sup>6</sup> Ti maa da ni ka kachi da nava ni kachi Jesús jiin da, ti sa ni ka ja'a chaa un jnu'un kuankoyo da jiin burru un.

<sup>7</sup> Ni ka nandeokuñi da jiin burru un nuu ya. Ni ka chuku da tikachi da siki ti, ti ni kaa Jesús siki ti, ti ni ka siin da ichi kuankoyo da. <sup>8</sup> Kua'a xaan yiví ni ka chuku i tikachi i ini ichi un nuu kuan ya'a ya. Ti sava ga yiví un ka ja'nú i ndayuku ti ka chuku i ini ichi un. <sup>9</sup> Ti yiví ka yoxnuu nuu Jesús jiin yiví ka jindandikun ichi jata ya, ni ka keja'a ka kucaa i, ka kanajaa i Yandios:

—Na kuta'u yo nuu Yandios, ja ni taji ya iin chaa kuña'nu xaan vají, nakua'a ya ja va'a da. <sup>10</sup> Vaji da ja na ta'u da jniñu sia'an nanu ni ta'u tata yo rey David na jana'an. ¡Na kanajaa ndaja'a ya undi andiví un ja na kuña'nu chaa ja'a! ¡Sia'an na kachi ya! —ni ka kachi i.

<sup>11</sup> Sia'an ni kivi Jesús ñuu Jerusalén. Ti kua'an ya undi veñu'un ka'nu Israel. Yukan ni jini ya taka ja ka sa'a yiví un. Ti nu kuan ini, ti ni nandeokuñi ya ñuu Betania jiin ndi uxi uu ndaja'a ya.

### *Nundo'o ni ndo'o iin nutichi vixi (Mt. 21.18-19)*

<sup>12</sup> Nu ni kuxian inga kivi, ni kee ya ñuu Betania, ni nandeokuñi tuku ya ñuu Jerusalén, ti ichi kua'an ya ni chaa sokó ini ya. <sup>13</sup> Ti jaa yajni t'ilí un ni jini ya iin nutichi vixi, ko tu ni ni'in ya ni iin tichi, chi ansu yoo iyo tichi kuu. <sup>14</sup> Yukan ti ka ñuso'o ndaja'a ya ni ka'an ya jiin nutichi un:

—¡Na kachi ri ja jankivi ga kua'a ra tichi vixi! —kachi ya jiin yujnu un.

### *Ni keni'in Jesús yiví ka xiko ini veñu'un ka'nu Israel (Mt. 21.12-17; Lc. 19.45-48; Jn. 2.13-22)*

<sup>15</sup> Nu ni jaa ya ñuu Jerusalén, ni kivi ya ini veñu'un ka'nu un, ti ni keni'in ya taka yiví ka xiko jiin ja ka jaan yuxe'e un kuankoyo i. Ni skuokava ya mesa chaa ka sama xu'un, jiin sillaa chaa ka xiko sata. <sup>16</sup> Ti tu ni ja'a ya jnu'un ja kivi yiví ka ndiso ndajniñu ja xiko nuu yuxe'e un. <sup>17</sup> Yukan ti ni xndaku ya nuu yiví un:

—Ka jini ra naa ra ja yoso nuu tutu ii Yandios: “Ve'e ri konani ve'e nuu kakanta'u yiví taka nación.” Ko ro'o naa ra ni ka nasa'a ra ve'e ri nuu ka nataka ñakui'na —kachi ya.

<sup>18</sup> Ti chaa ka kuu sutu kuña'nu un jiin chaa ka xna'an ley ini veñu'un un, ni ka jiniso'o da jnu'un ni ka'an Jesús. Tu ni ka jajna'an ini da. Ti ni ka keja'a ka nduku da nasa ka'ní da ya. Ko kivi un tu ni ka sa'a da, chi ka yu'u da sa kiti ini yiví un naa i, chi tendí'lí yiví un ka kusii xaan ini i ka ñuso'o jnu'un ka'an ya.

<sup>19</sup> Ko nu kuan kuñaa, ti kua'an Jesús jiin ndaja'a ya inga ñuu un.

### *Ndoo ni ichi nutichi vixi un (Mt. 21.20-22)*

<sup>20</sup> Yukan ti jaña'an inga kivi, kuankoyo tuku da ichi un, ti ni ka jini da nutichi vixi un ja, ja ni ichi undi yo'o. <sup>21</sup> Yukan ti ni nuku'un ini Pedro jnu'un ni ka'an Jesús, ti ni kachi da jiin ya:

—Maestro, nde'e ni nutichi vixi ja'a, ja ni ka'an ni siki iku, ja ni ichi —kachi da.

<sup>22</sup> Yukan ti ni kachi Jesús jiin da:

—Kandixia ndaa nuu Yandios. <sup>23</sup> Chi nu ni ini ni añuu ra na kakanta'u ra nuu Yandios, ti kachi ra jiin iin yuku ja'a: "Kuancha'a ti ki'in ra nuu mar un", ti nu ñukuu ni ini ra ja sia'an na kuu, yukan ti jandaa ni kuu ja kuandatu yuku un nuu ra. <sup>24</sup> Chi jandaa na kachi ri ja tako ndoo na kakanta'u ra nuu Yandios, ti kua'a ya nu ñukuu ni ini ra ja ni'in ra, ti ni'in ra. <sup>25</sup> Ti nu ka jikanta'u ra, kuanka'nu ini nuu yivi jito u'u ro'o, nava Tata yo Yandios, ya kancha andivi, na kuanka'nu ini ya nuu kuachi ra naa ra. <sup>26</sup> Ko nu tu kuanka'nu ini ra nuu yivi, suni sia'an tu kuanka'nu ini Tata yo Yandios, ya kancha andivi, nuu kuachi ra —kachi ya.

*Siki jniñu ndiso Jesús  
(Mt. 21.23-27; Lc. 20.1-8)*

<sup>27</sup> Nu ni ka jaa da ñuu Jerusalén, ti kuankoyo tuku da nuu yux'e veñu'un ka'nu un. Yukan jikonuu Jesús ti ni ka tu'va sutu ka kuña'nu, jiin chaa ka xna'an ley ini veñu'un un, jiin taka chaa kuña'nu un naa da. <sup>28</sup> Ti ni ka jikajnu'un da ya:

—¿Nau ja ni ja'a jniñu nuu ra ja sa'a ra taka jniñu ja'a? ¿Nau ja xiin jniñu ña'nu ja'a ja sa'a ra? —kachi naa.

<sup>29</sup> Ti ni kachi ya jiin yivi un:

—Suni ru'u na kajnu'un ri ro'o naa ra, ti nu ni ka kachi ra, ti sa na kachi ri nuu ra nau ni ja'a jniñu ja'a nuu ri. <sup>30</sup> Kachi naa ra: ¿Nau ja ni taji Juan, chaa ni kii skuanducha yivi naa i, Yandios xi iin yivi nusa? —kachi ya.

<sup>31</sup> Ti ni keja'a ka ndajnu'un chaa un naa da:

—¿Nasa kachi yo nusa? Chi tu kuu kachi yo ja Yandios ni taji Juan chi kachi Jesús jiin yo: "¿Ndoo tu ni ka kandixia ra jnu'un ni ka'an da nusa?" <sup>32</sup> Ni tu kuu kachi yo ja yivi ni taji chaa un —ni ka kachi da.

Ti sia'an ni ka ndajnu'un da ja tu kachi da naa da, chi ka yu'u da sa kití ini yivi nuu da, chi tendi'i i ka jini ja Yandios ni taji Juan ni kii da. <sup>33</sup> Ti yukan ni ka kachi da jiin Jesús:

—Tu ka jini na nau ja ni taji chaa un —kachi da.

Yukan na ti ni kachi ya:

—Vanuxia tu ka kuni ra kachi ra, ti suni ru'u tu kachi ri nuu ra naa ra nau ja ni ja'a jniñu ña'nu ja'a nuu ri, ja kuu sa'a ri taka jniñu un —kachi ya.

*Siki muzu ni ka sa'a ndeva'a  
(Mt. 21.33-46; Lc. 20.9-19)*

## 12

<sup>1</sup> Yukan ni keja'a Jesús xndaku ya nuu da naa da, ti ni kachi ya:

—In chaa ni sa'a da iin huerta, ti ni xrdee kua'a da nutika'ya. Ni chi'i da jaku yuu huerta un. Suni ni sa'a da iin nundoo ka'nu xaan nuu kaxin da tika'ya un. Ni sa'a da iin ve'ev sukun, nuu kotonchaa da ni tu'u ñu'un da. Yukan ti ni jakanchaa da nuu uu chaa ka sa'a jniñu un, ti kua'an da viaje.

<sup>2</sup> Yukan ti ni jaa kivi naki'in da jniñu da, ti chaa xiin huerta un, ni taji da iin muzu kuan nuki'in sava jniñu un nava ni'in da kuu da. <sup>3</sup> Ko chaa ka yinda'a huerta un, ni ka ki'in da muzu un ni ka kani da, ti ni ka nataji da kuano'on. Ti tundo ni ka ja'a kuiti da kunda'a chaa un. <sup>4</sup> Ti chaa xiin huerta un ni taji tuku da inga muzu kua'an. Ti chaa ka yinda'a huerta un ni ka stuji da xini, ti ni ka ja'a xaan da tau muzu un. <sup>5</sup> Ni taji tuku da inga muzu kua'an, ko chaa ka sajniñu un ni ka ja'nii da muzu un. Yukan ti ni taji tuku da tijni ga muzu un kuankoyo, ko suni sia'an ni ka ja'a da tau muzu un. Sava da ni ka ndo'o, ti sava ga da ni ka ji'i.

<sup>6</sup> Ko iyo vajnu'un ga se'e yi'i chaa un ja kunda'u xaan ini da, ti suni ni taji da chaa lulu un kua'an da, chi ndo'o ini da, "Va kuandatu chaa ka sajniñu un nuu se'e ri, chi ka jini da ja se'e ri kuu i", kachi da. <sup>7</sup> Ko nu ni jaa chaa lulu un yux'e chaa ka sa'a jniñu un, ti ni ka kachi da: "Ja'a kuu se'e yi'i jito'o huerta ja'a. Va'a ga na ka'ní yo, ti nava na kendo yo jiin huerta ja'a", ni ka kachi chaa un. <sup>8</sup> Yukan na ti ni ka jniñu da chaa lulu un, ni ka ja'ní da, ti ni ka jan skaña da ndiyi un nuu yu'u huerta un —ni kachi Jesús.

<sup>9</sup> Siin Jesús ka'an ya, ti ni kachi ya:

—Ja sia'an ni kuu, ¿nasa ka ndo'o ini ra ja sa'a chaa xiin huerta un nusa? Xi ki'in da ti ka'ní da chaa ni ka sa'a jniñu un, ti kua'a da ñu'un nuu inga yivi.

<sup>10</sup> Xi tu ka ka'u ra nasa ka'an nuu tutu Yandios:

Yuū ni ka skaña chaa ni ka sa'a nama ja'a, kuu yuū kanuu ga ja ndiso ndi'i jiki ve'e.

<sup>11</sup> Maa Yandios ni sa'a sia'an, ti so naa ini yo nde'e yo jniñu ni kuu jiin yuū ja'a.

Kachi tutu —ni kachi Jesús.

<sup>12</sup> Nu ni ka'an Jesús sia'an, ti chaa ka kuña'nu Israel un, ni ka nduku da nasa kuu jniñu da Jesús, ko ni ka yu'u da nde'e da yivi un. Chi ni ka chaku ini da ja siki maa chaa ka kuña'nu un, ni ka'an Jesús jnu'un un. Yukan ti ni ka xndoo da ya ti kuankoyo da.

### *Siki jnu'un kinya'u puesto (Mt. 22.15-22; Lc. 20.20-26)*

<sup>13</sup> Yukan sa ni ka taji da sava chaa fariseo jiin sava chaa ka yi'i jiin Herodes, ja na nduku da nasa ka'an da jiin ya inga jnu'un, ti sia'an na kuu chakuachi da ya. <sup>14</sup> Ni jakoyo chaa un, ti ni ka kachi da:

—Maestro, jini na ja kuu ni iiñ chaa yiñu'un, chi ka'an ndaa ni, ti tu ki'in ni jnu'un vasu nasa ka ka'an yivi siki ni. Suni tu yu'u ni nde'e ni yivi kuña'nu ga. Chi su'va xna'an ndaa ni ichi Yandios nuu i. Ko kachi ni, ¿yo va'a ja cha'u yo xu'un puesto nuu gobierno Romano xi tuu nu? ¿Va'a ga ja tu cha'u yo nu?

—kachi da.

<sup>15</sup> Ko Jesús ja jini va'a ya nasa ka ndo'o ini da ja ka jikajnu'un da jnu'un un, ti ni kachi ya:

—¿Ndo ka ndo'o ñaa ini ra ja ka kuni xnda'u ra ru'u naa ra, ja ka kuni ra chakuachi ra siki ri? Chan iiñ xu'un na Kotonchaa ri —kachi ya jiin da.

<sup>16</sup> Ti ni ka ja'a da iiñ xu'un nuu ya. Yukan na ti ni kachi ya:

—¿Naa nüñ kuu ja nchaa nuu xu'un ja'a, ti naa sivi kuu ja yoso nuu xu'un ja'a nusa? —kachi ya.

Ti ni ka kachi da:

—Nüñ maa rey nación Roma kuu —kachi da.

<sup>17</sup> Yukan na ti ni kachi Jesús:

—Nusa ti kua'a nuu rey nación Roma ja xiin maa da, ti kua'a nuu Yandios ja xiin maa Yandios —ni kachi ya.

Ti so ni ka naa ini da jnu'un ni ka'an Jesús jiin da.

### *Jnu'un siki ja ka nandoto ndiyi (Mt. 22.23-33; Lc. 20.27-40)*

<sup>18</sup> Suni ni ka kikoyo tijni chaa Saduceo nuu Jesús, chaa ka ka'an ja tukaa ga ka nandoto kuiti ndiyi. Ti ni ka kachi da:

<sup>19</sup> —Maestro, nuu ley Moisés ka'an ja nu iiñ chaa ni nanda'a, ti nu na kuū da, ti xndoo da ñasi'i da. Ti nu tu ni iiñ se'e da ni iyo, ti ñani ndiyi un nanda'a tuku jiin ña'an un nava na koo iiñ se'e da jiin ña, ja tu ni iyo se'e ña jiin ndiyi un. Ti suchi lulu un naki'in yi sivi ndiyi un, ti kendo i jiin tendi'i yaji ni xiin

da. <sup>20</sup> Ko iin jinu ni iyo uxia chaa ni ka kuu ñani, ti chaa ña'nu un ni nanda'a da, ko ni ji'i da, ti tu ni iyo ni iin se'e da. <sup>21</sup> Ti chaa kuu uu un, ni nanda'a jin ña'an un, ko suni ni ji'l da, ti tu ni iyo ni iin se'e da jiin ña. Ti suni sia'an ni jna'an chaa kuu uni. <sup>22</sup> Sia'an ni kuu jiin ndi uxia da, vasu ni ka nanda'a da jiin ña'an un, ko tendi'i da ni ka ji'i, ti tu ni ka iyo ni iin se'e da jiin ña. Ti sandi'i ni ga suni ni ji'i ña'an un. <sup>23</sup> Nusa ti nu na nandoto ndiyi un ti kuchaku tuku da, ¿nau iin iin da xiin ñasi'i un, ja sia'an ndi uxia da ni ka nanda'a jiin ña nusa? —kachi chaa un.

<sup>24</sup> Yukan na ti ni kachi Jesús jiin da naa da:

—Ka yuji ra jnu'un ka ka'an ra naa ra, chi va tu ni ka chaku ini ra nava yoso nuu tutu ii. Ni tu chaku ini ra iin jniñu ña'nu sa'a Yandios. Yukan kuu ja ka ka'an ra sia'an. <sup>25</sup> Ko kivi na nandoto ndiyi un naa i, tukaa kuu i nanu ni kanda i nuu ñuyiví ja'a. Ni tu nanda'a i, ni tu xnanda'a i sesi'i i, chi kuu i nanu ángel Yandios kanchuku nuu andivi. <sup>26</sup> Ti siki jnu'un ja nandoto ndiyi un, ti ka chaku ini ra, xi tu ka ka'u ra nuu tutu ni chaa Moisés, nuu kachi ja ma'ñu yañu'un un ni ka'an Yandios jiin da, ti ni kachi ya: "Ru'u kuu Yandios ni ka nchañu'un Abraham, Isaac jiin Jacob." <sup>27</sup> Sia'an ni ka'an Yandios jiin Moisés, chi maa ya kuu Yandios yiví ka chaku, ansu Yandios yiví ni ka ji'i. Yukan kuu ja ka yuji ra naa ra jiin jnu'un ka ka'an ra —kachi Jesús.

*Iin ley kanuu xaan ga  
(Mt. 22.34-40)*

<sup>28</sup> Ti iin chaa xna'an ini veñu'un Israel kande da un, ti ni jiniso'o da jnu'un ndajnu'un Jesús jiin chaa un. Ni jini da ja va'a ka'an ya, ti ni jikajnu'un da ya: —¿Nau iin ley Yandios kuu ja kanuu xaan ga nusa? —kachi da.

<sup>29</sup> Ti ni kachi Jesús.

—Iin ley Yandios ja kanuu xaan ga kuu ja'a: "Chunso'o naa ra ro'o yiví Israel. Tata yo Yandios maa iin ni ya iyo. <sup>30</sup> Na kuu ini ra Tata yo Yandios jiin ni ini ni aña ra, jiin ndi'i inijnuni ra, ti jiin niini ra kunukuachi ra nuu ya." Yukan kuu ley undi nuu. <sup>31</sup> Ti inga ley kanuu xaan kuu ja'a: "Kunda'u ini nuu ñanijna'an ra nanu kunda'u ini ra nuu maa ra." Ndinduu ley yukan kuu ja kanuu xaan ga siuku ra, ti tukaa iyo inga —kachi ya.

<sup>32</sup> Yukan ti ni kachi chaa xna'an ley jiin Jesús:

—Va'a ni ka'an ra, Maestro. Jandaa ka'an ra ja maa iin ni Tata yo Yandios iyo, ti tukaa iyo inga, <sup>33</sup> ja na kuu ini yo nuu Yandios jiin ni ini ni aña yo, jiin inijnuni yo, ti jiin niini yo na kunukuachi yo nuu ya. Ti na kunda'u ini yo nuu ñanijna'an yo na nanu kunda'u ini yo nuu maa yo. Chi kanuu xaan ga ndixia uu ley ja'a ja na kuandatu yo, ti ansu ja soko yo tako ja ñava'a yo nuu altar un —kachi da jiin ya.

<sup>34</sup> Ni jini ya ja ni ka ka'an ndaa kuiti da, ti ni kachi ya:

—Ja kuan kuyajni ndivikoyo ra nda'a Yandios ja ta'u ya jniñu nuu ra —kachi ya.

Yukan ti ni iin chaa ka kuña'nu un tukaa ni ka ka'an kuiti ga da ja kajnu'un ga da ya.

*¿Naa se'e kuu Cristo nusa?  
(Mt. 22.41-46; Lc. 20.41-44)*

<sup>35</sup> Nu ni xna'an Jesús ini veñu'un ka'nu Israel yukan, ni kachi ya:

—¿Nasa kuu ja ka jani ini chaa ka xna'an ini veñu'un un, ti ka ka'an da ja Cristo kuu se'e nuu tata yo David na jana'an? Ko na kachi ndaa ri ja kuña'nu ga Cristo nuu tata yo David. <sup>36</sup> Ti maa David ni chaa da nuu tutu jiin inijnuni Espíritu Santo nuu kachi sia'an: Maa Yandios ni kachi sia'an jiin Cristo, ya kuu jito'o ri:

“Nukoo nda'a kua'a ri, chi ta'u ra jniñu jiin ri.  
Iyo yivi jito u'u ro'o, ko kundee ra jiin, chi chindee ri ro'o.”  
Ni kachi Yandios, kachi David.

<sup>37</sup> Nusa, ¿ti NASA kuu Cristo iin jna'an rey David jana'an, ti maa da ni kachi ja Cristo kuu jito'o da nusa? —ni kachi Jesús.

Ti nu ni ka'an ya sia'an, ti ni ka kusii ini yivi kua'a ka'iin un.

*Ka'an Jesús siki chaa ka xna'an ley Israel  
(Mt. 23.1-36; Lc. 11.37-54; 20.45-47)*

<sup>38</sup> Siin Jesús xna'an ya, ti ni kachi ya:

—Koto maa ra jin chaa ka xna'an ley ini veñu'un un. Koto sa'a ra nava ka sa'a da naa da. Chi chaa un ka jajna'an ini da ku'un da sa'ma nani nava na nakuni yivi ja chaa kuña'nu ka kuu da. Ti nu ka jikonuu da calle un, kuni da ja na kanxia'u yiñu'un yivi jiin da. <sup>39</sup> Ti ja kuu ini veñu'un ka nduku da nuu nukoo da nuu kuña'nu ga kunchuku da. Suni ja kuu iin viko, xnaka da ka nukoo yu'u mesa nuu iyo va'a ga. <sup>40</sup> Suni ka jisonchaa da ve'e ña'an ni ka kendo nda'u, ti ja na chisa'yí da jniñu ni ka sa'a da un, ti na'an xaan ka jikanta'u da nuu Yandios. Sia'an ka sa'a da nuu chitu yivi. Ko ja kuu maa da, kii iin nundo'o ka'nú xaan ga —ni kachi ya.

*Xu'un ni soko iin ña'an nda'u  
(Lc. 21.1-4)*

<sup>41</sup> Hin kivi nukoo Jesús nuu veñu'un ka'nú un, yajni nuu kancha iin kaja nuu kivi xu'un ka soko yivi. Nde'e ya ka chu'un ka chu'un yivi xu'un nuu kaja un. Ni jini ya ja taká yivi riko, kua'a xu'un ka chu'un nuu kaja un. <sup>42</sup> Ti sandi'i ni ga ni jaa iin ña'an nda'u xaan, ti ni chu'un ña uu xu'un cobre kuachi ini kaja un. <sup>43</sup> Yukan ti ni kana Jesús ndaja'a ya, ti ni kachi ya jiin da:

—Nde'e naa ra. Ña'an un, ya'u xaan ga nchaa xu'un ni ja'a ña nuu Yandios ansu xu'un ni ka ja'a chaa riko un. <sup>44</sup> Chi yivi riku un ka ja'a da jaku ni ja ka ñava'a da. Ko ña'an nda'u un, vasu nandi'i ña ja kuu gastu ña, ko ni soko ndi'i ña nuu Yandios —ni kachi ya jiin da naa da.

*Ka'an Jesús ja naa venu'un ka'nú Israel  
(Mt. 24.1-2; Lc. 21.5-6)*

## 13

<sup>1</sup> Nu ni kee Jesús veñu'un ka'nú un, ti iin ndaja'a ya ni kachi jiin ya:

—Maestro, nde'e ni. Xaan na'nú yuú ja'a, ti xaan vii kaa veñu'un ja'a —kachi da.

<sup>2</sup> Ti ni kachi Jesús:

—Ndixia ra chi vii xaan kaa, ko jaa iin kivi ja ni iin yuu tukaa kendo kosojna'an, chi ndi'i ja'a naa —kachi ya.

*Taka seña koo nu ja kuan kuyajni ndi'i ñuyivi yo  
(Mt. 24.3-28; Lc. 21.7-24; 17.22-24, 31)*

<sup>3</sup> Yukan ti kuankoyo da undi yuku Olivo, ja kendo yajni ichi nuu yux'e veñu'un ka'nú un, ti ka tu'va Pedro, Jacobo, Juan jiin Andrés, ti ni ka jikajnu'un da ya:

<sup>4</sup> —¿Naa kivi kundaa jnu'un ni ka'an ni ja naa veñu'un ka'nú un? ¿Ti naa seña kuni na nu ja kuan kuyajni kundaa jnu'un ja'a? —ka kachi da.

<sup>5</sup> Ti ni kachi ya jiin da:

—Koto maa ra naa ra nava tu xnda'u yivi ro'o. <sup>6</sup> Chi kua'a yivi kikoyo, ti ndaku ni'in yi sivi ri, ti kachi yi ja maa i kuu Cristo, ko so ja na xnda'u i kua'a xaan yivi. <sup>7</sup> Ti nu ni ka jini ra ja iyo guerra, xi ja koo guerra, koto yu'u ra.

Sia'an kuu, ko changa ga jaa kivi ndi'i ñuyivi ja'a. <sup>8</sup> Chi kanaa iin nación jiin inga nación. Suni kanaa iin ñuu jiin inga ñuu, ti koo guerra taka ñuu. Suni kii ñujnaa ya yukan, ti koo jnama xaan tonto, ti ndi'i xaan ini yivi. Ko ansu ja'a ni kuu ndi'i, chi sa ni keja'a nundo'o un, ti su'va kii ga —ni kachi ya.

### *Koto u'u yivi nuu chaa ka kandixia*

<sup>9</sup> Siin Jesús ka'an, ti ni kachi ya:

—Koto ra maa ra chi iin kivi ti jnii yivi presu ro'o, ti ki'in ra nuu juez jiin nuu chaa ka kuña'nu ini taka veñu'un Israel, ti kaní da ro'o naa ra. Ti undi nuu ndaja'a gobierno stuu ra maa ra ja ka kandixia ra ru'u jiin jnu'un ka'an ri. Chi sia'an ti sa kuniso'o da jnu'un ichi Yandios. <sup>10</sup> Chi xnakan kuichanuu jnu'un Yandios nuu yivi taka nación ti sa ndi'i ñuyivi. <sup>11</sup> Ti nu ni ka jnii yivi presu ro'o, tu xndi'i ra ini ra ja nasa koo jnu'un ka'an ra nuu justicia. Chi hora kua'a ra jandaa nuu da, ti maa Espíritu Santo kua'a taka jnu'un ka'an ra un.

<sup>12</sup> Ti yivi un naa i, nakua'a yi ñani yi nuu sticia ja na ka'ní da i siki ja ka kandixia ra ru'u. Ko nu nau ja tu kaka yata, ti siin ndaa kuiti jiin jnu'un ri undi kivi sandi'i ni ga, ti yivi un kuu ja nanita'u. <sup>13</sup> Ti taka ñuu koto u'u yivi ro'o naa ra siki ja ka kandixia ra ru'u. Ko nu nau ja tu kaka yata ti siin ndi kuiti jiin jnu'un ri undi kivi sandi'i ni ga, ti yivi un kuu ja na nita'u —kachi Jesús.

### *Koto u'u jna'an yivi ini veñu'un ka'nu un*

<sup>14</sup> Siin ka'an Jesús, ti ni kachi ya:

—Nu ni ka jini ra ja kandichi iin ndajniñu kue'e nuu ve'e ii ini veñu'un ka'nu un, yukan ti yivi ka'u tutu ja'a na chaku ini i nau ja kuu. Ti yivi kanchuku ñuu Judea, na kua'a i corri na nama i maa i undi chii yuku un. <sup>15</sup> Nu iin yivi ndetatu i yuxe'e i, koto ndivi i ini ve'e i ja ki'in yi ndajniñu i. <sup>16</sup> Ti yivi kande iin rancho, koto nandeokuñi i ve'e i ja ki'in i sa'ma i. <sup>17</sup> Na nda'u ñaa ka ñuse'e xi ñaa ka nchaka suchi yikin, chi tu kanda ña kunu yachi ña ja kuu kivi un. <sup>18</sup> Kakanta'u naa ra nuu Yandios ja tu kua'a ya jnu'un kondo'o ra yukan ja kuu iin viko sau xaan. <sup>19</sup> Chi kivi un koto ra nundo'o ka'nu xaan tonto ja tu ni ka ndo'o ra undi na ni sa'a Yandios ñuyivi. Ti ni tukaa ga koo inga nundo'o nanu ja'a. <sup>20</sup> Ko sa ti tu ni xnukuu Yandios kivi un, ti va ni iin yivi tu kaku. Ko ni xnukuu ya kivi un siki ja ni kunda'u ini ya taka yivi ni nakaji ya ja na nanita'u i —ni kachi ya.

### *Kikoyo chaa xndoña'an*

<sup>21</sup> Siin ka'an Jesús, ti ni kachi ya:

—Nu ni jaa kivi un, koto kandixia ra naa ra jnu'un ka'an yivi ti kachi: “Nde'e, ja'a kancha Cristo ja ni taji Yandios ja ta'u jniñu ña'nu”, xi kachi: “Nde'e, yukan kancha ya.” <sup>22</sup> Chi kikoyo kua'a yivi xndoña'an, ti kachi i ja maa i kuu Cristo, xi kachi ja kuu iin chaa ka'an jnu'un Yandios. Ti sa'a i tijní nuu jniñu ña'nu ja na xndoña'an i yivi ka kandixia. Nu na kuu, ti suni xnda'u yivi ni nakaji Yandios. <sup>23</sup> Ko koto kandixia ra naa ra ja xnda'u yivi un ro'o, chi ja ni kachi ri taka seña kii ja kuni ra naa ra.

### *Nasa ndii Jesús*

(Mt. 24.29-36, 42-44; Lc. 21.25-36)

<sup>24</sup> Ko nu ja ni ndi'i ni kii nundo'o un, yukan ti kuñaa nuu ndikandii, ti yoo, tukaa ga kua'a nduva. <sup>25</sup> Ti nukoyo chuxini nuu andivi, ti ni'in ni tu'u ja iyo nuu andivi. <sup>26</sup> Yukan na ti ru'u, maa Se'e Yivi Ñuyivi, kuni ra ndenda ri nuu viko un, ti nichaa ri jiin jniñu ña'nu xaan ga. <sup>27</sup> Ti taji ri Yandios kinkoyo undi

sandi'i ni ga ndi kuun jiki ñuyivi jiin andivi, ti nastutu i taka yivi ni nakaji Yandios ja kuu se'e ya.

<sup>28</sup> Nde'e ra iin nutichi vixi ti kuni ra. Nu ja ni ndi'i ni nakoyo nda'a yujnu un ti vee nene numa, yukan ni jini yo ja kuan sama kivi ti kuan kuyajni viko sau.

<sup>29</sup> Sia'an kuu jiin ra naa ra, chi nu ja ni ndi'i nundo'o un kuan kundaa, yukan ti chaku ini ra ja kuan kuyajni ndaa ni ga kivi nchaa ri. <sup>30</sup> Chi na kachi ndaa ri ja taka yivi ka chaku vijna, tu naa i undi na jaa kivi kundaa taka jnu'un ka'an ri ja'a. <sup>31</sup> Ti andivi jiin ñuyivi ndi'i kuiti naa, ko jnu'un ka'an ri chi jankivi naa, ti ndi'i un kundaa.

<sup>32</sup> Ko ja kuu kivi un, maa Yandios kuu ja jini na kivi kundaa taka jnu'un un. Ni ángel Yandios tu ka jini, ni ru'u ja kuu ri se'e ya. <sup>33</sup> Ko ro'o naa ra, kundito ini ra, chi ni tu ka jini ra na kivi kundaa taka jnu'un un. <sup>34-35</sup> Kuu nanu iin chaa kua'an viaje, ti tu ni kachi da na kivi nchaa da. Ti ni xndoo da muzu da ja na koto tendi'i jniñu iyo. Ni tejna'an da jniñu nuu iin iin muzu un. Ti ni ta'u da jniñu nuu inga muzu ja na koto ve'e da. Ko muzu un naa da, tu ka jini da na kivi nchaa jito'da. Suni sia'an ro'o naa ra, tu ka jini ra na kivi nchaa ri. Yukan kuu ja kotu'va naa ra, chi tu ka jini ra nu nchaa ri kuan kuu tilk'vi, xi nchaa ri ñúu, xi hora kana li'i ni ga, xi kuan kuxian ni ga ti nchaa ri. <sup>36</sup> Chi sanaa ini ra naa ra ti nchaa ri, ti na ni'in ri ro'o ka kixi ini ra. <sup>37</sup> Jnu'un ka'an riijiin ra naa ra, suni sia'an ka'an ri jiin tendi'i yivi naa i. Yukan kuu ja kotu'va naa ra —kachi Jesús.

*Ka ndajnu'un da nasa jnii da Jesús  
(Mt. 26.1-5; Lc. 22.1-2; Jn. 11.45-53)*

## 14

<sup>1</sup> Ka nasa'a chaa Israel uu viko ja tu ka naa ini da na ni keni'in Yandios maa da naa da ñuu Egipto, ja ni kunda'u ini ya maa da. Ti viko un kuu viko pascua, jiin viko ka yee da staa stila tu yi'i levadura. Ko kumaní uu ga kivi ja kuu viko un. Ti sutu ka kuñ'a'nu jiin chaa ka xna'an ley ini veñu'un un, ka kuni jnii xe'e da Jesús, ti ka'ni da ya. <sup>2</sup> Ko ka ndajnu'un da:

—Tu kuu sa'a yo kivi viko ja'a, chi sandau ndondaa yivi siki yo —kachi da.

*In ña'an ni chu'un perfume xini Jesús  
(Mt. 26.6-13; Jn. 12.1-8)*

<sup>3</sup> Yukan ti kancha Jesús ve'e Simón ñuu Betania, iin chaa ni jna'an kue'e ndi'yí te'yú. Nukoo ya yu'u mesa yee ya staa. Ti yukan ni jaa iin ñasi'i yinda'a ña iin tindo'o lulu alabastro. Ti ñu'un chitu aceite perfume mani ita nardo, ja nchaa ya'u xaan tonto. Ni ta'u ña tindo'o lulu un, ti ni chu'un ña perfume un xini Jesús. <sup>4</sup> Ti sava yivi kanchuku un, tu ni ka jajna'an ini i jniñu sa'a ña un. Ti ni ka ka'an i:

—Tu stívi ña un perfume un sia'an nikú. <sup>5</sup> Sa ti ni kuya'u, ti ni'in ña xu'un ti kuu tejna'an yo ñuu yivi nda'u nikú —kachi da.

Ti ni ka kití ini da nuu ña. <sup>6</sup> Ko ni kachi ya jiin da:

—Sia ña, ndoo ka skiti ra ini ña. Jniñu ni sa'a ña jiin ri, iyo va'a. <sup>7</sup> Yivi nda'u, chi nini kanchuku i jiin ra naa ra, ti nu ka kuni ra ti kuu chindee ra i. Ko ru'u, chi ansu sia'an ni kuncha ri jiin ra naa ra. <sup>8</sup> Ña'an ja'a ni sa'a ña nava iyo ini ña, chi ja ni chí'i tu'va ña perfume yíki kuñu ri ja kuu kivi kuñu ri. <sup>9</sup> Kuni ra ja ni tu'u ñuyivi, sava'ní ga nanu na ka'an i jnu'un ri ja na sketa'u ri yivi, ti kani i jnu'un jniñu ni sa'a ña ja'a ja na nuku'un ini yivi un maa ña —kachi ya.

*Judas nduku da nasa nakua'a da Jesús nuu sutu ka kuñ'a'nu  
(Mt. 26.14-16; Lc. 22.3-6)*

**10** Yukan ti Judas, *iin chaa ñuu Cariote*, ja suni kandee da jiin ndi uxi uu ndaja'a un naa da, ni ja'an ndajnu'un da jiin sutu ka kuña'nu un, ti ni kachi da ja nakua'a da Jesús nuu da naa da. **11** Nu ni ka jiniso'o chaa un jnu'un ni ka'an Judas, ni ka kusii xaan ini da, ti ni ka ka'ñu da xu'un nuu da. Yukan ti ni keja'a nduku da nasa nakua'a da Jesús nuu chaa un naa da.

*Ni kuxini Jesús jiin ndaja'a ya  
(Mt. 26.17-29; Lc. 22.7-23; Jn. 13.21-30;  
I Co. 11.23-26)*

**12** Maa kivi keja'a viko ka yee staa stila tu yi'i levadura un, suni kivi un ka ja'ni da lélú ja ka soko da ja kuu viko pascua. Ti ndaja'a ya ni ka jikajnu'un da ya:

—¿Nanu kuni ni ja na kin satu'va na ja kuxini yo vijna pascua? —kachi da jiin ya.

**13** Yukan na ti ni taji ya uu da, ti ni kachi ya jiin da:

—Kua'an naa ra undi ñuu, ti yukan ndejna'an ra jiin *iin chaa ndiso iin kiyi nducha*, ti kundikun ra da ki'in ra jiin da. **14** Ti nuu ndiví da un, yukan ka'an ra jiin maa chaa xiin ve'e un: “Kachi maa Maestro na ja nanu iyo *iin ve'e ja kua'anuu ni nuu kuxini da jiin ndaja'a da vijna kivi pascua*”, kachi ra. **15** Ti maa da na xna'an nuu ra *iin ve'e ka'nu ja kendo piso nuu sukun*, ti yukan ja iyo nakoo, ti satu'va ra naa ra ja kuxini yo —kachi ya.

**16** Ti kuankoyo da undi ñuu un, ti ni ka nani'in da taka nava ni kachi Jesús. Yukan ni ka satu'va da ja kuxini.

**17** Nu ni kuaa, ti ni jaa Jesús ve'e un jiin ndi uxi uu ndaja'a ya. **18** Ti nu kanchuku da ka yee da staa nuu mesa un, ni kachi Jesús jiin da naa da:

—Jandaa na kachi ri ja *iin ro'o ja yee staa jiin ri ja'a, nakua'a ru'u nuu chaa ka jito u'u ru'u* —kachi ya.

**19** Ti ndaja'a un ni ka kukui'ya xaan ini da ja sia'an ni ka'an ya. Ti ndi *iin ndi iin da ni ka kachi*:

—¿Xi saña kuu nu? ¿Xi saña kuu nu? —kachi da naa da.

**20** Ti ni kachi ya:

—Ja ndi uxi uu ro'o naa ra *iin ra kuu, ja chutoo staa stila nu ko'o ri*, yukan kuu. **21** Kundaa nava yoso nuu tutu Yandios ja nakua'a da maa se'e Yívi Ñuyiví nuu chaa ka jito u'u ya. Ko xaan ga ka'nu nundo'o kondo'o chaa kin nakua'a ru'u. Sa nu tu ni kaku da niku —kachi ya.

**22** Ni ka yee da staa. Ti ni ki'in Jesús *iin staa stila*, ni jikanta'u ya nuu Yandios, ni sakuachi ya, ti ni tejna'an ya nuu ndaja'a ya, ti ni kachi ya:

—Kaji naa ra. Ja'a kuu nanu yiki kuñu ri —kachi ya.

**23** Yukan na ti ni ki'in ya *iin vaso vino*, ni nakuanta'u ya nuu Yandios, ti ni ja'a ya nuu da ja na ko'o da *ti'lí ti'lí*. **24** Ti ni kachi ya jiin da:

—Ti niñi ri un stuu ja ni sa'a Tata ri Yandios *iin tratu jaa*. Ti yukan kuu ja ka'an ndaa kuiti ja nama ri siki kua'a xaan yívi, chi niñi ri ja katí ri ki'in, yukan kuu ja chunaa ri nuu yívi naa i. **25** Ko na kachi ndaa ri ja tukaa ga ko'o ri vino ja'a *jiin fiianjna'an yo*, kivi ka nasa'a i viko ja'a, undi na jaa kivi ko'o yo nuu kancha Tata ri Yandios, chi yukan kuu nuu ni'in ri *iin jniñu ña'nu ga*, ti yukan ta'u ri jniñu jiin maa ya nuu tendi'i ni tu'u ja iyo. Ti yukan kuu nuu nasa'a jaa yo viko ja'a naa yo —ni kachi Jesús.

*(Mt. 26.30-35; Lc. 22.31-34; Jn. 13.36-38)*

**26** Ni ndi'i ni ka kuxini da, ti ni ka jita da *iin himno*, ti kuankoyo da undi yuku Olivos.

*Kachi Jesús ja ndi'i nda'aja'aya kuichanuu da ti xndoo da ya*

**27** Yukan ti ni kachi Jesús:

—Tendi'i ra naa ra kuichanuu ti xndoo ra ru'u jakuaa vijna, chi sia'an ka'an nuu tutu Yandios: "Chi Yandios, kua'a ya jnu'un ja na kuū pastor, ti rii da un kuichanuu ti ki'in ti." <sup>28</sup> Ko kivi na nandoto ri, ti koxnuu ri ki'in ri ñuu Galilea, ti yukan kundatu ri ro'o naa ra —kachi ya.

<sup>29</sup> Yukan na ti ni kachi Pedro:

—Vasu tendi'i da na xndoo ni'in, ko saña tu xndoo kuiti na maa ni —kachi da.

<sup>30</sup> Ti ni kachi Jesús jiin da:

—Jandaa na kachi ri nuu ra, ja kuu jakuaa vijna, nu ti kana ga li'i uu jinu, ti kachi ra uni jinu ja tu jini ra ru'u —kachi ya.

<sup>31</sup> Ko Pedro, ni ini da ka'an da:

—Vasu na kuū na jiin ni, ko tu xndoo kuiti na ni'in —kachi da.

Ti tendi'i ndaja'a ya un, suni sia'an ni ka ka'an da.

### *Jikanta'u Jesús nuu Yandios nuu jardín Getsemaní (Mt. 26.36-46; Lc. 22.39-46)*

<sup>32</sup> Nu ni ka jakoyo da nuu nani Getsemaní, ti ni kachi ya jiin da naa da:

—Ja'a ni kunchuku ra ti ru'u na kin kankanta'u ri nuu Yandios —kachi ya.

<sup>33</sup> Yukan ti kua'an ya ti'lí ga ichi ndaku un jiin Pedro, Santiago jiin Juan. Ti ni keja'a kukui'ya xaan ini ya, ti kaña ini ya. <sup>34</sup> Ti kachi ya jiin da:

—Jatu aña ri ja kukui'ya xaan ini ri, chi ja ni kuyajni kuū ri. Ko ja'a ni kundatu ra naa ra ti koto kusu ra —kachi ya.

<sup>35</sup> Yukan na ti ni jika ya ti'lí ga, ti ni jakunjiti ya, ti jikanta'u ya, ja nu kuni Yandios, ti tu kondo'o ya nundo'o kii nuu ya. <sup>36</sup> Ti ni kachi ya:

—Tata maa na, ja kuu maa ni, taka ni ja kuu sa'a ni. Nusa ti chajiyi ni saña nuu nundo'o vají nuu na. Ko ansu nava kuni maa na, chi nava kuni maa ni —ni kachi ya.

<sup>37</sup> Yukan na ti na nandeokuñi ya nuu ka'iin ndaja'a ya un, ko ni jini ya ja ka kixi da, ti ni kachi ya jiin Pedro:

—Simón, ¿ja kixi ra nu? Tu ni kuu kundito ra vasu iin hora nusa. <sup>38</sup> Koto kusu ga ra naa ra. Kanajaa, ti kakanta'u nuu Yandios ja na kotu'va ra nava tu kotojnuni ja'u un o'o, ti chisa'yí ra ru'u, kachi ra ja tu ka jini ra ru'u. Chi va'a ndiyo ini ra ja siuku ra, ko yiki kuñu ra, chi tu iyo ndee ini.

<sup>39</sup> Yukan ti kua'an tuku ya, ti ni jikanta'u ya, ti suni jnu'un un ni ka'an tuku ya. <sup>40</sup> Nu ni nandeokuñi tuku ya, ni jini ya ja ka kixi tuku da, chi ka ji'i xaan da ma'ná ja undi ka kuvee nduchi da, ti tu ni kujnuni nasa kachi da nuu ya.

<sup>41</sup> Ti nu ni nandeokuñi ya jinu kuu uni, ni kachi ya jiin da:

—Vijna na, ndetatu ti kusu naa ra. Ko ja ni jaa hora ja ru'u, maa Se'e Yívi Ñuyivi, nakua'a da ru'u nuu yívi ka nchakuachi. <sup>42</sup> Ndoko naa ra na cho'o, chi ja vají chaa ni nakua'a ru'u un —kachi ya.

### *Ni ka jnii da presu Jesús (Mt. 26.47-56; Lc. 22.47-53; Jn. 18.2-11)*

<sup>43</sup> Ni ka'an ga Jesús sia'an, ti ja ni chaa Judas, iin ja ni kuu ndi uxi uu ndaja'a un. Ti vekeyo yívi kua'a jiin da, ka yínda'a i espada jiin yujnu. Vekoyo i jiin jniñu ni ka ta'u taka sutu ka kuña'nu jiin chaa ka xna'an ini veñu'un ka'nu un jiin taka chaa ka kuña'anu ñuu Israel. <sup>44</sup> Ichi kuankoyo da ni kachi Judas jiin chaa un naa da:

—Chaa teyu'u ri nuu, chaa un kuu ja nanduku yo. Jnii naa ra. Koto sia ra ki'in —ni kachi da.

<sup>45</sup> Ti nu ni jaa Judas, ni tu'va da nuu Jesús, ti ni kachi da:

—Maestro, maestro —kachi da.

Ti ni teyu'u da nuu ya. <sup>46</sup> Yukan ti chaa un ni ka jnii ni da ya.

**47** Ti iin chaa ka'iin jiin Jesús un, ni jista da espada da, ti ni ja'ncha da so'o iin muzu sutu kuña'nu ga. **48** Yukan na ti ni kachi Jesús jiin chaa ni ka jnii ya un:

—¿Va nu iin ñaku'i na kuu ri ja vekoyo ra jiin espada jiin yujnu ja jnii ra ru'u ki'in ri presu nu? **49** Ti taka kivi ni xna'an ri nuu ra naa ra ini veñu'un ka'nu un, ti tu ni ka jnii ra presu ru'u. Ko sia'an kuu ja na kundaa nava ka'an nuu tutu Yandios —kachi ya.

**50** Ti yukan tendi'i ndaja'a ya ni ka jinu da kuankoyo da. **51** Ko iin chaa lulu ni chindikun da jata yivi kuankoyo jiin Jesús, ti suku da nini iin sa'ma, ti suni ni ka jnii chaa un maa da. **52** Ko ni keni'ni chaa lulu un chii sa'ma un, ti vichi lii da, ko ni kundee da kua'an da.

*Chaa ka kuña'nu ñuu Israel ka xndichi da Jesús*  
(Mt. 26.57-68; Lc. 22.54-55, 63-71;  
Jn. 18.12-14, 19-24)

**53** Yukan ti kuankoyo yivi un jiin Jesús undi ve'e iin sutu kuña'nu ga, chi yukan ni ka ndututu taka sutu ka kuña'nu un, taka chaa ka kuña'nu jiin taka chaa ka xna'an ley ini veñu'un ka'nu un. **54** Ti Pedro ndikun jika da ichi jata chaa kuankoyo jiin Jesús, ni kivi da yux'e' palacio un, ti ni nukoo da jiin policía un ka nanduxin da yunu'un. **55** Ti sutu ka kuña'nu un jiin taka chaa ka kuña'anu ñuu Israel, ka nduku da nasa ka'an kuachi ga da siki Jesús, chi ka kuni ka'ni da ya. Ko tu kujnuni na jnu'un ga ka'an da. **56** Ti kua'a yivi ni ka xndoña'an, ja ka chakuachi siki Jesús, ko tu ni kejna'an kuiti jnu'un ka ka'an da. **57** Ti sandi'i ni ga ni ka ndokuiñi sava da, ti ni ka kankuachi da siki ya sia'an:

58—Saña naa na, ni ka jiniso'o na jnu'un ni ka'an da: “ru'u, xnaa ri veñu'un ja'a, ja ni ka sa'a yivi naa i jiin ndajá'a i, ti nuu uni kivi, ti na sa'a tuku ri inga veñu'un ja tu kuu jiin nda'a yivi”, sia'an ni kachi chaa jña —kachi da naa da.

**59** Ko vasu sia'an, tu ni keja'an tuku jnu'un ka ka'an da siki ya.

**60** Yukan na ti ni ndokuiñi maa chaa kuu sutu kuña'nu ga un nuu chitu un, ti ni jikajnu'un da Jesús: —¿Tu ka'an kuiti ra nusa? ¿Xi jandaa kuu jnu'un ka ka'an da siki ra nu? —kachi da jiin ya.

**61** Ko Jesús tu ni ka'an kuiti ya. Yukan na ti ni jikajnu'un tuku sutu kuña'anu un ya:

—Kachi nu maa ra kuu Cristo, Se'e Yandios ii, ja kancha andivi —kachi da.

**62** Ti ni kachi Jesús:

—Maa ri kuu, ti kuni ra naa ra ja maa Se'e Yivi Ñuyivi, nukoo ya nda'a kua'a Yandios ti kuña'nu ya jiin ya. Suni kuni ra nchaa ya ñuyivi ja'a nuu viko andivi un —kachi ya.

**63** Nu ni jiniso'o sutu ña'nu ga un, ni ndata da sa'ma da ja ni kití ini da, chi ni ndo'o ini da ja yisikinchaa Jesús maa Yandios jiin jnu'un un. Ti ni kachi da jiin yivi ka'iin un:

—¿Nau inga testigo nandi'i yo ja'a naa yo? **64** Ja ni ka jiniso'o ra ja ka'an ndeva'a da siki Yandios. ¿Nasa ka ndo'o ini ra naa ra? —kachi da.

Ti tendi'i yivi un ni kachi ja na kuū ya.

**65** Yukan na ti sava yivi un ni ka tivi si'i nuu ya. Ni ka jasi nduchi ya jiin sa'ma, ti ni ka kani jiki nuu ya, ti kachi:

—ro'o chaa ka'an jnu'un Yandios, kachi nau ja ni kani ro'o —kachi jiin ya.

Yukan na ti soldado ka'iin un, ni ka ja'a jiki nuu ya. Yukan kuu ja ni jna'an Jesús nu ni ka xndichi da ya.

*Kachi Pedro ja tu jini da Jesús  
(Mt. 26.69-75; Lc. 22.56-62;  
Jn. 18.15-18, 25-27)*

<sup>66</sup> Ti nukoo Pedro nuu yux'e un, ti iin ña'an junukuachi ve'e sutu kuña'anu ga un, ni ya'a ña ichi chukan. <sup>67</sup> Ti nu ni jini ña nduxin da ñu'un, ni nde'e va'a ña nuu da, ti ni kachi ña:

—ro'o, suni ni yaku ra jiin Jesús, chaa ñuu Nazaret un —kachi ña jiin da.

<sup>68</sup> Ko Pedro ni kachi da ja tu jini da:

—Tu jini ri na jnu'un ka'an ra jiin ri —kachi da.

Ti ni kenda da kua'an da ichi yux'e un ni jakuiñi da. Ti yukan ni kana iin li'i. <sup>69</sup> Ñaa junukuachi un, ni jini tuku ña nuu da, ti ni keja'a ka'an ña jiin takayiv'i ka'iin un:

—Suni ndaja'a chaa yukan kuu chaa ja'a —kachi ña.

<sup>70</sup> Ko Pedro ni kachi tuku da ja tu jini da. Ni kuu nuu ga, ti chaa ka'iin un ni ka kachi da jiin Pedro:

—Ndaa ndixia kuu ja ro'o kuu iin ndaja'a Jesús un, chi suni chaa Galilea kuu ra —kachi da.

<sup>71</sup> Ko ni kachi tuku Pedro:

—Va kunchakuachi na nu na xndoña'an na, ko ka'an ndaa kuiti na ja tu jini na chaa ka ka'an ni un —kachi da.

<sup>72</sup> Ko ni ka'an ga da sia'an, ti ni kana li'i jinu kuu uu. Ti yukan ni nuku'un ini da jnu'un ni ka'an Jesús: "Nu ti kana ga li'i jinu kuu uu, ti kachi ra uni jinu ja tu jini kuiti ra ru'u." Ti yukan ni nakani xaan ini da, ti ni jakunchaa da nde'e da.

*Xndichi Pilato Jesús  
(Mt. 27.1-2, 11-14; Lc. 23.1-5; Jn. 18.28-38)*

## 15

<sup>1</sup> Nu ni kundijin inga kivi, ni ka ndajnu'un sutu ka kuña'nu un jiin takayikan chaa ka kuña'nu, suni chaa ka xna'an ley ini veñu'un ka'nú Israel, jiin uu ga chaa ka kuña'nu ñuu un. Ka ndajnu'un da nasa sa'a da jiin Jesús, ja ni ka jnií da ya. Yukan na ti ni ka ju'ni da ya, ti kuankoyo da jiin ya nuu Pilato, chaa kuu gobernador. <sup>2</sup> Ti Pilato ni jikajnu'un da Jesús:

—¿Xi ro'o kuu Rey, ja ta'u jniñu nuu ni tu'u nación Israel nu? —kachi da.

Ti ni kachi Jesús:

—Ru'u kuu —kachi ya.

<sup>3</sup> Ti sutu ka kuña'nu un ni ka chakuachi da tijni nuu jnu'un siki ya.

<sup>4</sup> Ti ni jikajnu'un tuku Pilato un ya:

—Nde'e na ka chakuachi da siki ra, ¿ti tu ka'an kuiti ra nusa? —kachi da.

<sup>5</sup> Ko Jesús tu ni ka'an kuiti ya. Ja yukan na ti so ni naa ini Pilato, ti tu kujnuni nasa sa'a da jiin ya.

*Ni kachi Pilato ja na kuú Jesús  
(Mt. 27.15-31; Lc. 23.13-25; Jn. 18.38-19.16)*

<sup>6</sup> Taka viko pascua ni iyo iin jnu'un ja na sia Pilato iin chaa kande vekaa, nau ja na kachi maa yiv'i un. <sup>7</sup> Ti kivi un kande iin chaa nani Barrabás vekaa jiin tijni chaa ni ka ndonda siki gobierno, chi ni ka ja'ni da ndiyi. <sup>8</sup> Ja yukan kuu ja ni ka jakoyo yiv'i un ka jikan i nuu Pilato, ja na sia da iin presu nava iyo jnu'un da. <sup>9</sup> Ti ni jikajnu'un Pilato nuu yiv'i un:

—¿Kuni ra naa ra ja na sia ri chaa kuu Rey nuu ni nación Israel nu? —kachi da.

**10** Sia'an ni jikajnu'un Pilato, chi ni jini da ja ka kuu kuasun ini sutu un, ja kua'a yívi ni ka kandixia jnu'un ni ka'an Jesús. Ja siki yukan ni ka nakua'a da ya nuu Pilato, ti Pilato kuni sia da Jesús niku. **11** Ko sutu ka kuña'nun ni ka ska'an da yívi ja na kakan i nuu Pilato, ti na sia da chaa nani Barrabás.

**12** Yukan na ti ni jikajnu'un tuku Pilato yívi un:

—Nusa ti, ¿ndoo kuni ra naa ra ja sa'a ri jiin chaa ja'a, chaa ka skonani ra Rey nación Israel nusa? —kachi da.

**13** Ti ni ka kuvaad yívi un ka kana ko'o:

—¡Katakaa ni chaa jña nda'a cruz, na kuū da! —kachi naa.

**14** Ti ni kachi Pilato:

—¿Ko nau kuachi ni sa'a da nusa? —kachi da.

Tí yívi un vi'i ga ka kana ko'o:

—¡Katakaa ni chaa jña nda'a cruz, na kuū da! —kachi naa.

**15** Yukan na ti Pilato, ja na kusii ini yívi un jiin da, ni sia da Barrabás kua'an da. Ti ni ta'u da jniñu nuu soldado un ja na kani da Jesús jiin yo'o ñii, ti na ki'in da jiin ya ja na kundaka ya nda'a cruz, ti na kuū ya.

### *Ni ka yisikinchaa soldado un Jesús*

**16** Yukan na ti kuankoyo soldado un jiin Jesús undi nuu yux'e palacio nuu nani Pretorio. Ni ka nastutu jna'an da jiin tendi'i ga soldado. **17** Ti ni ka naskui'na da ya iin sa'ma kua'a ndi'i. Ni ka sa'a da iin corona iñu, ti ni ka chuxndee da xini ya. **18** Yukan ti ni ka keja'a ka kanajiiin da, ka sakata da nuu ya:

—Na kuchaku na'an Rey, chaa ñuu Israel —kachi da.

**19** Ni ka kani da yujnu xini ya, ni ka tivi si'i da nuu ya, ti ni ka jakunjiti da nuu ya, nanu ja kuu ya iin rey. **20** Ni ndi'i ni ka sakata da nuu ya, ni ka tava da sa'ma kua'a ndi'i ñu'un ya, ti ni ka naskui'na da ya jiin sa'ma maa ya. Ti kuankoyo da jiin ya ja ka taka da ya nuu nda'a cruz.

### *Ni ka jatakaa da Jesús nuu nda'a cruz*

(Mt. 27.32-44; Lc. 23.26-43; Jn. 19.17-27)

**21** Ichi kuankoyo da ni ka ndejana'an da jiin iin chaa ñuu Cirene nani Simón, ja chaa kuu tata Alejandro jiin Rufo, vendi da ja ni ja'an da nuu rancho da, ti soldado un ni ka chayika Simón ja na kundiso da cruz Jesús. **22** Sia'an kuankoyo da jiin Jesús undi iin ñu'un nani Gólgota, ja kuni ka'an, "ñu'un yíki xini." **23** Nu ni ka jakoyeo da yukan, ni ka ja'a da vino sakanuu jiin iin nuu suxia ja nani mirra, ja na ko'o ya nava tu kondo'o xaan ya ja jatu ya. Ko maa Jesús tu ni janta'u ya ja ko'o ya. **24** Yukan na ti ni ka chijnii da ya nuu nda'a cruz jiin nduyukaa. Ti soldado un ni ka chu'un da suerte siki sa'ma ya, ja na tejna'an nuu jna'an da.

**25** Ja ni kuu ka iin jaña'an na ni ka jatakaa da Jesús nuu nda'a cruz. **26** Ti xini cruz un ni ka chijnii da iin tutu ja ka'an ndoo yíndaka ya yukan. Kachi sia'an: "Ja'a kuu Rey nuu yívi nación Israel." **27** Suni ni ka jatakaa da uu ñakui'na jiin ya nuu uu ga cruz, iin ichi nda'a kua'a, ti inga ichi nda'a sajni ya. **28** Sia'an ni kundaa nava yoso nuu tutu Yandios ja kachi: "Ka'ni da ya nanu iin ñakui'na."

**29** Ti yívi ka ya'a ichi chukan, ka skuiko xini ja ka kuu ichi ini nuu ya, ti ka ka'an ndeva'a:

—Vijna na ti ro'o ja ni ka'an ra ja xnaa ra veñu'un ka'nu Israel, ti nuu uni kivi ti na sa'a jaa ra. **30** Nama maa ra vijna, ti kuan kuun nuu nda'a cruz jña —kachi jiin ya.

**31** Suni tako sutu ka kuña'nun un jiin chaa ka xna'an ley ini veñu'un un, ka ka'an ndeva'a kuiti da nuu ya, ti ka ndajnu'un da:

—Ni nama da sava yívi, ko tu kuu nama da maa da vijna. <sup>32</sup> Ko vijna ti nu na kandixia yo ja ka'an ndaa da ti kuun da nuu nda'a cruz un, ti sa na kandixia yo ja kuu da Cristo ni taji Yandios, ja kuu da Rey nuu ni tu'u nación Israel. Yukan ti kandixia yo ja vají da undi nuu andívi —ni ka kachi da.

Ti suni undi uu ga chaa ka ndakoyo yukan jiin ya, ni ka ka'an ndeva'a da nuu ya.

### *Ni ji'i Jesús*

(Mt. 27.45-56; Lc. 23.44-49; Jn. 19.28-30)

<sup>33</sup> Nu ni kuu sava nduu, ni kuñaa ni tu'u ñuyiví, ti ni ndundijin undi ka uni ja'ini. <sup>34</sup> Ti hora un ni kanajiin ko'o Jesús:

—Eloi, Eloi, ¿lama sabactani? —kachi ya. (Ja kuni ka'an: “Yandios maa na, Yandios maa na, ¿ndoo ni xndoo maa iin ni saña vijna”? —kachi ya.)

<sup>35</sup> Sava yívi ka'iin yajni yukan ni ka jiniso'o, ti ni ka kachi:

—Kunso'o naa ra, chi kana da xini profeta Elías na jana'an —kachi da.

<sup>36</sup> Yukan ti iin da ni ja'a corri, ni chutoo da kachi nuu vino iya, ni chuxndee da xini iin nuyoo kani, ti ni ja'a da ja na ko'o Jesús, ti kachi da:

—Na nde'e yo nu kii Elías kii nama da chaa —ni kachi da:

<sup>37</sup> Ko Jesús, uni ni kanajiin ko'o ya, ti ni ji'i ya. <sup>38</sup> Ti maa hora ni ji'i Jesús, ni te'nde sava sa'ma ii yíndaka ini veñu'un ka'nú Israel un, ni ndata sava kuiti sa'ma un undi nuu sukun ti undi nuu ja'a. <sup>39</sup> Ti iin soldado kuu capitán kandichi nuu Jesús hora un. Nu ni jini da nava ni ji'i Jesús, ti ni kachi da:

—Jandaa kuiti kuu ja Se'e Yandios ni kuu chaa ja'a —kachi da.

Yukan ni ji'i Jesús.

<sup>40</sup> Suni ka'iin sava ñasi'i ka jitonchaa jika ña. Ñaa un kuu María Magdalena, Salomé, jiin María nana Santiago, chaa suchi, jiin José. <sup>41</sup> Ñaa ja'a ni ka kandixia ña Jesús. Ni ka yaku ña jiin ya, ti ni ka junukuachi ña nuu ya na ni yaku ya ñuu Galilea. Suni yukan ka'iin tijni ga ñasi'i ja ni ka ja'an ña jiin ya undi Jerusalén.

### *Ni ka chunduji da Jesús*

(Mt. 27.57-61; Lc. 23.50-56; Jn. 19.38-42)

<sup>42-43</sup> Ti iin chaa ñuu Arimatea, nani José, ni kuu da iin chaa kuñanu ja kuu nuu junta ka'nú Israel. Ti ndiyo ini da ja kuni da nu na jaa kivi ta'u Yandios jniñu. Chi ni kandixia da jnu'un ni xna'an Jesús ja kuu kivikoyo yívi nda'a Yandios ja na ta'u ya jniñu nuu i, ti yukan ni'in yívi un iin ta'u ya ti kundisojñiñu i jiin ya. Ti vanuxia ja ni jaa vispera kivi ndetatu, ti ni tava ini da ni ka'an da jiin Pilato ja'ini kivi un, ti ni jikan da permiso ja na ki'in da jiin yiki kuñu Jesús. <sup>44</sup> Ti Pilato ni naa ini da nu ni jiniso'o da ja, ja ni ji'i Jesús. Ni kana da capitán soldado un, ti ni jikajnu'un da nu ja ni ji'i ndixia ya. <sup>45</sup> Ti capitán un ni kachi ja, ja ni ji'i ndixia ya. Yukan na ti Pilato ni ja'a da permisu nuu José ja na ki'in da jiin yiki kuñu ya.

<sup>46</sup> Ti José ni jaan da iin sa'ma finu, ni kuni'in da yiki kuñu ya nuu nda'a cruz un, ti ni nasuku da yiki kuñu ya. Yukan ti ni chunde da ya iin yau jaa, ja ni jacha da chii iin kava. Ti ni nakasi da jiin iin yuu ka'nú xaan. <sup>47</sup> Ti María Magdalena jiin inga María nana José, ka'iin ña yukan, ti ni ka jini ña nuu ni ka chunde da Jesús.

### *Ni nandoto Jesús*

(Mt. 28.1-10; Lc. 24.1-12; Jn. 20.1-10)

## 16

<sup>1</sup> Nu ni ya'a kivi ndetatu un, ti María Magdalena jiin inga María, nana Santiago, jii Salomé, ni ka jaan yachi ña perfume ja kin chi'i ña siki yiki kuñu Jesús. <sup>2</sup> Ña'an xaan kivi ni nukuni semana kuankoyo ña yu'u ñaña un. Ja ni kaña ndaa ndikandii ni ka jakoyo ña nuu ñaña un. <sup>3</sup> Ti ichi kuankoyo ña ka ndajnu'un ña:

—¿Nanu ni'in yo iin ja chajiyo yuu nuu ñaña un? —kachi ña.

<sup>4</sup> Nu ni ka jakoyo ña, ti ni ka jini ña ja, ja ni kuxio yuu ka'nu un. <sup>5</sup> Ni ka kivi ña ini yau un. Yukan ni ka jini ña iin ángel Yandios nukoo nda'a kua'a. Ti ñu'un ya iin sa'ma kani, xkiy'i ni'n'i. Ni naxna'an ya nuu ña nanu iin chaa lulu. Ti ña'an un ni ka yu'u ña. <sup>6</sup> Ko ángel un ni kachi:

—Koto yu'u ra naa ra. Chi jini rija ka nanduku ra Jesús, chaa ñuu Nazaret ja ni ji'i nuu nda'a cruz un. Ko tuu kande ya ja'a, chi ja ni nandoto ya. Nde'e, ja'a kuu nuu ni ka xndoo da yiki kuñu ya, ko tukaa ndoo iyo. <sup>7</sup> Vijná ti kua'an naa ra ti kachi ra nuu Pedro, ti suni nuu uu ga chaa ka kuu ndaja'a ya: “Koxnúu ya ki'in ya ñuu Galilea, ti yukan kundatu ya ro'o naa ra. Ti nakuni ra ya nava ni kachi ya jiin ra naa ra” —kachi ángel un.

<sup>8</sup> Ti ña'an un ni ka kee ña ini yau un, ti ni ka ja'a ña corri, chi ni ka yu'u xaan ña ja undi ka ni'in ña, ti so ni ka sana ini ña. Ko tu ni ka kachi ña nuu ni iin yivi ja sia'an ni kuu, chi ni ka yu'u xaan ña.

### *Ni ndenda Jesús nuu María Magdalena (Jn. 20.11-18)*

<sup>9</sup> Jaña'an kivi ni nukuiñi semana, nu ni nandoto Jesús, ti xnakan ni ndenda ya nuu María Magdalena, ñaa ni keni'in ya uxia tachi xaan yukan. <sup>10</sup> Ti maa ña ni jan kaxnu'un nuu uu ga chaa ni ka jika jiin ya. Chi ka na'nu da ya, ka kukui'ya xaan ini da, ti ka nde'e da. <sup>11</sup> Ko nu ni ka jiniso'o da ja chaku Jesús, tu ni ka kandixia da, vasu kachi ña un ja ni ndejna'an ña jiin ya.

### *Ni ndenda Jesús nuu uu chaa ni kuu ndaja'a ya (Lc. 24.13-35)*

<sup>12</sup> Kuee ga, ti ni ndenda Jesús sií tuku nuu uu chaa ni ka kuu ndaja'a ya ichi kuankoyo da ranchu da. <sup>13</sup> Chaa un, ni ka nandeokuñi da, ti ni ka kachi da nuu uu ga ndaja'a un, ko suni tu ni ka kandixia da jnu'un un.

### *Ni ndenda Jesús nuu uxi iin ndaja'a ya (Mt. 28.16-20; Lc. 24.36-49; Jn. 20.19-23)*

<sup>14</sup> Sandi'i ni ga, ni ndenda Jesús nuu uxi iin ndaja'a ya nuu kanchuku da ka yee da staa. Ti ni kanajiiñi ya nuu da naa da, ndoo tu ka kandixia da ja ni nandoto ya, ndoo xaan ga ni'in ni nduu ini ra naa ra ja tu ka chunso'o ra jnu'un ka ka'an yivi ni ka ndejna'an jiin ya, chi ni ka kachi i ja, ja ni nandoto ya. <sup>15</sup> Yukan na ti ni ta'u ya iin jniñu nuu da naa da, ti ni kachi ya:

—Kuankoyo naa ra ni tu'u ñuyivi, ti ka'an ra jnu'un Yandios nuu taká yivi naa i. <sup>16</sup> Yivi kandixia, ti kuanducha i, ti nanita'u i nuu Yandios. Ti yivi tu kandixia, na jna'nu ndatu i jiin kuachi i. <sup>17</sup> Yivi na kandixia ti kuu sa'a i jniñu ña'nu jiin sivi ri. Kuu kenchaa da tachi xaan ki'in. Ti ka'an da yu'u inga yivi ja tu ka jini da. <sup>18</sup> Nu na ku'uun ini ra ti jniñi ra iin koo, xi ku'uun ini ra ti ko'o ra veneno, ti tundo jna'an kuiti ra. Chuxndee a nda'a ra siki yivi ka ku'u, ti nduva'a i —kachi ya.

### *Kuano'on Jesús andivi (Lc. 24.50-53; Hechos 1.9-11)*

<sup>19</sup> Nu ni ndi'i ni ka'an Jito'yó Jesús jiin ndaja'a ya, ti ni ndaa ya kuano'on ya andivi. Ti ni nukoo ya nda'a kua'a Yandios nuu ni nduña'nu ya kancha ya.

20 Ti ndaja'a ya jiin chaa ka skua'a jiin ya, ni ka yaku da taka ñuu ni ka ka'an da jnu'un Yandios nuu yivi naa i. Ti maa Jito'yo ni chindee chituu ya da jiin jniñu ña'nu ni ka sa'a da, ti ni ka jini yivi ja iyo ndaa jnu'un ni ka ka'an da.  
Ja'a kuu jnu'un Yandios ni chaa Marcos.

## Jnu'un Yandios ni chaa Lucas

### *Siki jnu'un ka'an tutu ja'a*

<sup>1</sup> Nde tijní chaa ni ka nanduku ndaa nasa ni kuu na ni kii Cristo Jesús jiin taka jniñu ni sa'a ya, ja ni ka jini yo. <sup>2</sup> Sia'an nava ni ka xna'an yívi ni ka jini jniñu ni sa'a Jesús undi nuu, yívi ni ka jika jiin ya ti ni ka chinddee ya jiin jnu'un ni xndaku ya. <sup>3</sup> Ti suni ru'u Lucas, ni nanduku ndaa ri taka nasa ni kuu undi nuu, na ni kii Jesús. Ti ndo'o ini ri ja iyo va'a ja na chaa ri tutu ja'a nuu ra, amigo Teófilo, na kachi ri taka jniñu ni sa'a Jesús, undi na ni keja'a ya ti undi ni xndí'i ya. <sup>4</sup> Ti sia'an na kuni ndaa ra ja iyo ndaa taka jnu'un ni kutu'va ra siki Jesús. Yukan kuu ja chaa ri tutu ja'a.

### *Kachi iin ángel Yandios ja kaku Juan, chaa kii skuanducha*

<sup>5</sup> Na ni kuu Herodes rey ñuu Judea, ni iyo iin sutu Israel ni nani Zacarías, ti chaa un yí'i da jiin grupo sutu ni nani Abías. Ti ñasi'i da ni nani ña Elisabet, ni kuu ña jna'an iin sutu jana'an ni nani Aarón. <sup>6</sup> Ti ndinduu da ni ka jandatu va'a da nuu Yandios, ti suni ni ka siuku ndaa da taka ley ni ta'u maa Jito'yo Yandios. Ti ni iin yívi tu ni ka ka'an ndevel'a i siki da. <sup>7</sup> Ko tu ni ka iyo se'e da, chi Elisabet tu ni iyo se'e ña. Ti ndinduu da ja ni ka ja'nú xaan da naa da.

<sup>8</sup> Ti iin kivi ni kendo Zacarías nuu jniñu da ja junukuachi da, ja kuu da sutu nuu Yandios. <sup>9</sup> Sia'an nava ni iyo jnu'un ja kuu sutu un naa da, ni kuu suerte maa Zacarías ja ni kivi da ve'e ii, ini veñu'un ka'nu Jito'yo Yandios ja ka'ma da susxia kutu. <sup>10</sup> Ko ni ja'ma da susxia kutu un, ti ichi jata ve'e ii un ka'iin yívi kua'a ka jikanta'u i. <sup>11</sup> Ti ni kenda iin ángel Jito'yo Yandios nuu Zacarías ja kandichi xiin nuu altar nuu kayu susxia kutu un. <sup>12</sup> Ti nu ni jini Zacarías nuu ángel un ni yu'u da, ti tu ni kujnuni ini da nasa sa'a da. <sup>13</sup> Ko ni kachi ángel jiin da:

—Zacarías, koto ma yu'u ra, chi ni jiniso'o Yandios jnu'un ni jikanta'u ra nuu ya, ti koo iin se'e ñasi'i ra Elisabet vijna. Skaku ña iin suchi yíi lulu, ti skonani ra i Juan. <sup>14</sup> Ti kusii xaan ini ra jiin suchi lulu un, ti suni kua'a xaan yívi kusii ini jiin yi kivi na kaku i, <sup>15</sup> ti kua'a Yandios iin jniñu ña'nu nuu i. Tu ko'o i vino ni ndixi, ti kunchaa Espíritu Santo jiin i, vasu ni ñu'un ga i chii nana i. <sup>16</sup> Ti sa'a i ja kua'a yívi nación Israel na nakani ini i ti kuandatu i nuu Jito'yo Yandios. <sup>17</sup> Ti Juan un kuu ja koxnuu ki'in satu'va yívi ja kuu maa Jito'yo, ya kiji un, ti kuñava'a da jnu'un nde Espíritu nava ni ñava'a profeta Elías. Ti sa'a da ja taka tata na ndunda'u ini da nuu se'e da, ti yívi ni'in ini ja kanda kua'an kanda vají un kutu'va i kuandatu i. Ti sia'an satu'va da yívi naa i ja na kotu'va i kivi na chaa maa Jito'yo —ni kachi ángel Yandios un.

<sup>18</sup> Yukan ti ni jikajnu'un Zacarías ángel un:

—¿Nasa kuni ndaa na nu jandaa ndixia kuu nusa? Chi ja ni ja'nú xaan na, ti suni ñasi'i na —ni kachi da.

<sup>19</sup> Ko ni kachi ángel un:

—Ru'u kuu Gabriél, junukuachi ri nuu Yandios, ti ni taji ya ru'u vají ri ja na kasjnu'un ri iin jnu'un va'a ja'a nuu ra. <sup>20</sup> Ko vijna, vanuxia tu ni kandixia ra jnu'un ni ka'an ri, ti kendo ñi'in ra, ti tukaa ga kuu ka'an ra undi na jaa kivi kundaa jnu'un ja'a, ja kaku suchi lulu un. Ti jnu'un ja'a kundaa nava ni kachi ri —ni kachi ángel un.

<sup>21</sup> Ti ni ka ndajnu'un Zacarías jiin ángel un, ti ka'iin yiví ichi fuera ka ndatu i maa da, ti ka jani ini i ja ndoo jna'an da ja ni kuna'an kukuee da ini ve'e ii un. <sup>22</sup> Ko nu ni kenda Zacarías, ti tukaa kuu ka'an da jiin yiví un naa i. Yukan ti ni ka chaku ini yiví un ja iyo ii in ja ni naxna'an Yandios nuu da ini ve'e ii un. Ti seña ni ga ni sa'a da chi ni kendo ñi'in da.

<sup>23</sup> Nu ni jinu kiví ni junukuachi Zacarías ini veñu'un un, ti kuano'on da ve'e da. <sup>24</sup> Yukan na ti ni jaku'un se'e ñasi'i da Elisabet, ti tukaa ni kee ña ve'e ña nuu u'un yoo, chi ndo'o ini ña: <sup>25</sup> "Sia'an ni sa'a maa Jito'yo jiin ri, ti vijna tukaa ga kukanuu ri nuu takaa yiví ja skexiko i ru'u", sia'an ndo'o ini ña.

### *Ni kasjnu'un in ángel Yandios ja kaku Jesús*

<sup>26</sup> Nu ja ni kuu iñu yoo ja ñu'un se'e Elisabet, ti ni taji Yandios ángel Gabriél nuu ndañuu Galilea ja nani Nazaret. <sup>27</sup> Ni jan ka'an da jiin ii ña'an suchi ñu'un nani María. Ti ja ni kundaa ja nanda'a ña'an un jiin ii chaa nani José, ii chaa kuu jna'an chaa ni kuu rey ni nani David. <sup>28</sup> Ni jaa ángel un nuu kancha ña, ti ni kachi da:

—Too ni ndii. Ndatu ni kuu ra nuu Yandios, ti kancha Jito'yo jiin ra, ti ndatu xaan ga ni kuu ra nuu Yandios ja kuu takaa ga ñasi'i —ni kachi ángel un.

<sup>29</sup> Ko nu ni jini María nuu ángel un, ti ni sana inijnuni ña, ti ni kuñaa inijnuni ña ja sia'an ka'an ángel un. Ti ndo'o ini ña naa jnu'un kuu ja ka'an ángel un.

<sup>30</sup> Ti ni kachi tuku ángel un:

—Koto yu'u ra María, chi ni kunda'u ini Yandios ro'o ja ni ja'a ya ii jniñu ña'nú nuu ra. <sup>31</sup> Vijnna na ti jaku'un se'e ra. Ti kuu i ii suchi yíi, ti skonani ra i Jesús. <sup>32</sup> Nduñu'nú i, ti kuu i maa Se'e Yandios kancha andivi. Ti sa'a Jito'yo Yandios ja na kuu i rey nanu ni kuu David, chaa ni kuu jna'an i jana'an. <sup>33</sup> Ti ta'u i jniñu nuu nación Israel ja kuu saa ni ti jankiví ga ndi'i jniñu ta'u i un —ni kachi ángel un.

<sup>34</sup> Yukan na ti ni jikajnu'un María nuu ángel un sia'an:

—¿Nasa kundaa jnu'un ni ka'an ni un, ti changa ga koo yíi na? —ni kachi ña.

<sup>35</sup> Yukan ti ni kachi ángel un jiin ña:

—Maa Espíritu Santo sa'a ja na jaku'un suchi lulu un, chi ii jniñu ña'nú kuu ja sa'a Yandios jiin ra. Ti suchi lulu ii ja kaku un, kuu i Se'e maa Yandios.

<sup>36</sup> Suni na kachi ri nuu ra ja Elisabet, ñaa kuu jna'an ra un, koo ii se'e ña, vasu ja ni nchii ña. Ja yukan kuu ja ña'an ka ka'an ja tu iyo se'e un, vijnna ti ja iyo iñu yoo ja nchaa kuu'u ña. <sup>37</sup> Chi Yandios, takaa ni ja kuu sa'a ya, ti tu iyo ni ii ja tu kuu sa'a ya —kachi ángel un.

<sup>38</sup> Yukan na ti ni kachi María:

—Sia'an na koo nusa, chi maa ya kuu ja yinda'a saña, ti na kuu nava ni kachi ni —kachi ña.

Yukan na ti kua'an ni ángel un.

### *Ni jan ka'an María jiin Elisabet*

<sup>39</sup> Yukan ti uu uni ni kiví ti ni kee María, ti kua'an ña ii ñuu kande yuku ñuu Judea. <sup>40</sup> Ni jaa ña ve'e Zacarías, ti ni kanxia'u ña jiin Elisabet. <sup>41</sup> Ti nu ni jiniso'o Elisabet ja kanxia'u María jiin ña, ti yukan ni kanda suchi lulu un chii ña, ti ni chaa Espíritu Santo nuu ña. <sup>42</sup> Yukan na ti jaa xaan ni ka'an ña:

—Jandaa ndixia kuu ja ni chindee chituu Yandios ro'o. Ti ndatu xaan ga ni kuu ra ja kuu takaa ga ñasi'i. Ti suni na chindee xaan ga maa ya suchi ñu'un chii ra.

<sup>43</sup> Ti xaan ndatu ri ja ni chaa nana Jito'yo ri kii nde'e ña ru'u, ti ansu iin ña'an kuña'nu kuu ri. <sup>44</sup> Ti naa ini ri na ni jiniso'o ri jnu'un ni ka'an ra, ti ni kanda suchi lulu ja'a chii ri ja ni kusii ini i. <sup>45</sup> Na chindee chituu ya ro'o ja ni kandixia ra jnu'un ni ka'an ya jiin ra. Ti jaa kivi nu kundaa nava ni kachi maa Jito'yo nuu ra —ni kachi Elisabet.

<sup>46</sup> Yukan na ti ni kachi María:

Jiin ni ini ri kana jaa ri maa Jito'yo ja kuña'nu xaan ya.

<sup>47</sup> Ti kusii ini ri jiin Yandios ja ni nama ya ru'u.

<sup>48</sup> Chi maa Yandios ja ni kunda'u ini ya ru'u, iin ña'an junukuachi nuu ya. Ti undi vijna ka'an taka yivi naa i ja ndatu xaan ni kuu ri nuu Yandios, ti sia'an ndaku ni'in yivi ru'u ja kuu taka ni kivi.

<sup>49</sup> Ti ka'nu jniñu ni sa'a ya jiin ri, chi kuña'nu maa Yandios, ti Yandios ii Yandios ndoo kuu ya.

<sup>50</sup> Ti ja kuu saa ni kunda'u ini ya nuu taka yivi ka jandatu nuu ya.

<sup>51</sup> Ti ni sa'a ya jniñu ña'an jiin jnu'un maa ya, ti ni kundee ya jiin yivi ka ndo'o vixi ini.

<sup>52</sup> Ti chaa ka kuña'nu ni kenchaa ya jniñu nuu da, ti ni nakua'a ya nuu yivi nda'u ja na nduña'nu i.

<sup>53</sup> Ti yivi ka jii'soko ni ja'a ya ja na kaji va'a i.

Ti yivi riko ni sia ya maa i kuankoyo sia'an ni jiin nda'a iyu i.

<sup>54</sup> Ni chindee ni chituu ya yo'o, yivi nación Israel, ja ka junukuachi yo nuu ya. Chi ñukuu ini ya yo'o ja kunda'u ini ya yo'o naa yo.

<sup>55</sup> Chi sia'an ni chisojnu'un ya nuu taka tata yo, nuu Abraham jiin taka jna'an da ja kikoyo inga kuiya.

Ni kachi María.

<sup>56</sup> Ti ni kendo ña uni yoo jiin Elisabet, ti sa ni nandeokuñi ña ve'e ña.

### *Ni kaku Juan chaa skuanducha*

<sup>57</sup> Nu ni jaa kivi ja kaku se'e Elisabet, ti ni iyo iin suchi yii lulu nuu ña. <sup>58</sup> Ti taka yivi kanchuku yajni un jiin taka jna'an ña, ni ka jini yivi un ja ni kunda'u ini Yandios maa ña, ti ni ka kenda i ni ka jajnu'un i maa ña.

<sup>59</sup> Nu una kivi, ti ni ka chakoyo yivi un ni ka ndututu i ja ni ka sa'a i iin seña nuu yiki kuñu suchi yiki un (ti yukan kuu iin seña nuu yiki kuñu taka suchi yii nación Israel, ja jna'an ja ka kuu i yivi Yandios). Ti ka kuni skonani da suchi un sivi maa tata i Zacarías. <sup>60</sup> Ko ni kachi nana i:

—Tuu, chi Juan konani i —ni kachi ña.

<sup>61</sup> Ti ni ka kachi yivi un jiin ña:

—¿Ti ndoo nusa? Ti tu iyo ni iin jna'an ra ja ni nani sia'an —ni ka kachi i.

<sup>62</sup> Yukan na ti ni ka jikajnu'un da maa tata i jiin seña ja nasa kuni da ja na konani i. <sup>63</sup> Ti ni jikan da iin tabla lulu, ti ni chaa da nuu: “Juan konani yi”, kachi da. Ti tendi'i yivi un ni ka naa ini i nu ni ka jiniso'o i jnu'un un. <sup>64</sup> Ti hora un ni kuu ndoka'an Zacarías, ti ni keja'a kanajaa da Yandios. <sup>65</sup> Ti taka yivi kanchuku yajni un, so ni ka naa ini i jiin jnu'un un, ti jnu'un un ni jichanuu ni yuku ñuu Judea ja sia'an ni kuu. <sup>66</sup> Ti taka yivi ka jiniso'o jnu'un un, ti ni ka keja'a ka ndo'o ini, ti ka jikajnu'un jna'an:

—¿Nau ja kuu suchi lulu un nu na kua'nu i nusa? —ni ka kachi i.

Sia'an ni ka ka'an yivi un, chi jandaa ndixia kuu ja ndito Yandios suchi lulu un.

### *Jnu'un vii ni ka'an Zacarías*

<sup>67</sup> Yukan ti ni chaa Espíritu Santo siki Zacarías, ti ni ka'an da jnu'un ni ja'a maa Yandios nuu da, ti ni kachi da:

**68** Xaan ga va'a ini maa Jito'yo Yandios ja ndito ya yivi nación Israel, chi ni kinde'e ya nuu yo ja ka kuu yo yivi ñuu ya, ti ni nama ya yo'o.

**69** Ti ni taji ya iin ja kuña'nua ja ki nama yo'o.

Ti ya un kuu jna'an rey David na jana'an, chaa ni junukuachi nuu ya.

**70** Chi sia'an ni chisojnu'un ya nava ni ka kachi profeta undi jana'an.

**71** Ti nama ya yo'o nuu yivi ka jito u'u yo'o, jiin nuu taka yivi ka kitii ini jito yo'o.

**72** Ti kunda'u ini ya nuu ñanijna'an yo na jana'an, ti tu ni naa ini ya jnu'un kanuu ni ka'an ya.

**73** Ja ni chisojnu'un kaji nuu tata yo Abraham na jana'an,

**74** ja kin nama ya yo'o nuu yivi jito u'u yo'o, ti nava tu yu'u yo ja kuanukuachi yo nuu ya.

**75** Kani ndaa kuiti ini yo ja kunukuachi yo nuu ya ni kivi na kuchaku yo.

**76** Ti se'e yii lulu ri ja'a, nu na kua'nu i, ti kuu i iin profeta.

Ka'an jnu'un Yandios kancha andivi, chi koxnuu i ki'in i nuu Jito'yo.

Ti satu'va i yivi naa i sa na kii ya.

**77** Ti ka'an i iin jnu'un nuu yivi ñuu ya ja nama ya maa i, ti koo jnu'un ka'nu ini ya nuu kuachi i.

**78** Sia'an na koo, chi va'a ini Yandios yo, ti kunda'u ini ya yo'o.

Yukan kuu Yandios, ja kancha andivi, na xna'an ya nuu yo iin ichi va'a ja kuu taka kivi kuxian yo.

**79** Sa'a ya ja na kujnuni ini yivi, ti nakuni ga i jnu'un ya, ja kua'an i ichi ñuñaa nuu ñuji'i.

Ti kunda'a ya yo'o nuu iin ichi va'a nuu koo ndee koo sii ini yo, ja na kukuee kunchaa yo.

Ni kachi Zacarías.

**80** Ni ja'nu suchi lulu un, ti ni yixia ini jnuni i jiin jnu'un ya. Ti yukan ni kunchaa i nuu ñu'un te'e un undi ni jaa kivi ni ka natu'va yivi Israel nuu i.

### *Ni kaku Jesú斯 (Mt. 1.18-25)*

## 2

**1** Na kuiya un ni ta'u rey Augusto jniñu nuu taka nación ja yinda'a ñuu Roma, ti ni jachanuu da jnu'un nuu ni tu'u nación nuu yinda'a da un, ja na ndoko iin censo nuu ndututu ndi'i vii kuiti sivi yivi naa i. **2** Ti Cirenio ni kuu gobernador nuu ñuu Siria na ni ka nastutu da sivi yivi naa i. Yukan ni kuu iin censo undi nuu kuiti. **3** Ti tendi'i yivi ni ka nandeokuñi i nani ñuu i, ja na chiso i sivi i un.

**4** Ni kee José ñuu Nazaret, iin ndañuu Galilea, ti kuano'on da ichi ñuu Judea undi ñuu Belén nuu ni kaku rey David na jana'an, chi José ni kuu da jna'an David. **5** Ni jan chiso da sivi da jiin María, chi ja ni nanda'a da jiin ña, ti ja nchaa ku'u ña. **6** Ti ni kuu ja, ja ka'iin da ñuu Belén, ti ni jaa kivi ja kaku se'e María. **7** Yukan ni iyo iin suchi númeru nuu ña, ti ni kuu i suchi yii. Yukan ni nasuku ña i sa'ma vita, ti ni skatuu ña i ini iin nundoo nuu ka yaji kitii un, chi tukaa ga nuña mesón nuu kendo.

### *Ni kenda iin ángel Yandios nuu chaa ka ndito rií*

**8** Ti yajni ñuu Belén ka'iin uu chaa ka ndito rií undi yuku un jakuaa kivi un. **9** Ti sana ini da naa da, ti ni kenda iin ángel maa Jito'yo Yandios, ti nduva maa Jito'yo ni janducha ni nuu ka'iin da un, ti ni ka yu'u da. **10** Ko ni kachi ángel un jiin da naa da:

—Koto yu'u ra naa ra, chi ve kachi ri iin jnu'un va'a nuu ra naa ra, ti jiin jnu'un un na kusii xaan ini yivi naa i. <sup>11</sup> Ti ja'a kuu iin jnu'un va'a, chi undi fiuu David ni kaku ya kii nama ro'o vijna naa ra, ti Cristo maa Jito'yo kuu ya. <sup>12</sup> Ti jiin señia ja'a kuni ndaa ra ja sia'an iyo, nani'in ra suchi lulu un suku i jiin sa'ma vita, ti katuu i ini iin nundoo nuu ka yaji kitii —ni kachi ángel.

<sup>13</sup> Sanaa ni ti ni kenda kua'a xaan ga ángel nuu andivi, ka kanajaa i Yandios, ti ka ka'an i:

<sup>14</sup> —¡Na nakanajaa yo maa Yandios ja kancha ya nuu sukun! Ti vijna na ndusii ini taka yivi fiuyivi, chi ni ndunda'u ini ya nuu i naa i —ni ka kachi ángel un.

<sup>15</sup> Yukan na ti nu kuan nukoyo ángel un ichi andivi, ti ni keja'a ka ndajnu'un chaa ka ndito rii un:

—Na cho'o naa yo undi fiuu Belén, na cho'o nde'e nau ja kuu ja ni kasjnu'un maa Jito'yo nuu yo —kachi da naa da.

<sup>16</sup> Ti ni ka kekoyo da kua'an da, ni ka nani'in da nuu kancha María jiin José jiin suchi lulu un ja katuu i ini nundoo kitii un. <sup>17</sup> Nu ni ka jini da nuu suchi lulu un, ni ka jani da jnu'un nava ni kachi ángel un nuu da siki suchi lulu un. <sup>18</sup> Ti taka yivi ni ka jiniso'o jnu'un ni ka ka'an chaa ka ndito rii un, so ni ka naa ini i. <sup>19</sup> Ko María ni chu'un ini ña taka jnu'un un, ti ndo'o xaan ini ña siki jnu'un un. <sup>20</sup> Ti ni ka nandeokuñi chaa ka ndito rii un kuankoyo da, ka nakanajaa da Yandios ti ka ka'an da:

—¡Xaan ga ka'nú jniñu sa'a maa Yandios, ja ni kundaa taka ja ni ka jiniso'o yo, jiin ja ni ka jini yo! —ni ka kachi da.

### *Ni kayinda'a da Jesús nuu Yandios ini veñu'un Israel*

<sup>21</sup> Nu una kivi ja ni kaku suchi lulu un, ni ka ndututu da, ti ni ka sa'a da iin seña yiki kuñu i, ti ni ka skonani da i Jesús, nava ni kachi ángel un nuu María, na ti jaku'un ga se'e ña. <sup>22</sup> Nu ni jinu kivi ja kin siuku ña jnu'un ja na ndundoo ña nuu Yandios nava jnu'un ka'an ley, ja ni ja'a Yandios nuu Moisés. Ti ni ka ja'an María jiin José jiin suchi lulu un undi fiuu Jerusalén ja na kotonchaa Jito'yo Yandios maa i. <sup>23</sup> Sia'an ni ka sa'a da, vanuxia sia'an ni ta'u Jito'yo Yandios jniñu nuu ley Moisés ja taka suchi yií kaku, ti nu ka kuu i suchi núú, na nakua'a da i nuu maa Jito'yo Yandios. <sup>24</sup> Ni ka ja'an soko da ja kuu nuu Yandios nava jnu'un ka'an maa ley Jito'yo Yandios, ja na soko da uu ndivi xi uu sata, kachi tutu.

<sup>25</sup> Ti kuiya un ni iyo iin chaa ni nani Simeón fiuu Jerusalén, ti ni kuu da iin chaa yiñu'un, ja ni nchañu'un da Yandios. Ti fiukuu ini da ja kii maa Jito'yo ja kii nama ya nación Israel. Ti maa Simeón, jilka Espíritu Santo jiin da. <sup>26</sup> Ja yukan kuu ja ni jini jnuni da ja tu kuu yachi da undi nuu tu kuni da nuu Cristo, ja taji maa Jito'yo Yandios ja na sa'a ya jniñu ña'nu. <sup>27</sup> Maa Espíritu Santo ni yinda'a chaa un kua'an da nuu veñu'un ka'nú Israel un. Ti nu ni jakoyo María jiin José jiin suchi lulu un ja nani i Jesús, ti ni ka yinda'a da i nuu veñu'un ka'nú un ja na siuku da jiin i nava jnu'un ka'an ley Moisés. <sup>28</sup> Ti ni ki'in Simeón suchi lulu un, ni nunchaa da i nuu nda'a da, ti ni kanajaa da Yandios, ti ni kachi da:

<sup>29</sup> Jito'yo, vijna na ti sia ni saña, na kuñ na va'a na, chi ja ni siuku ni jnu'un ni chisojnu'un ni nuu saña ja kuu na muzu ni.

<sup>30</sup> Ti ni jini na jiin nuu na nuu ya, kii nama ya siki yivi naa i,

<sup>31</sup> ja ni taji ni nuu taka yivi fiuyivi.

<sup>32</sup> Maa ya kuu nanu iin nduva ja kivi ini yivi taka nación ja na jnuu ini i. Ti sa'a ya ja na nduñalnu yivi maa nación Israel.

Kachi Simeón.

<sup>33</sup> José jiin nana Jesús, so ni ka naa ini da ja sia'an ni ka'an Simeón siki suchi lulu un. <sup>34</sup> Yukan na ti ni jikanta'u Simeón nuu Yandios ja kuu maa da naa da jiin suchi lulu un, ti ni kachi da jiin María, nana Jesús:

—Ja ni nakaji Yandios suchi lulu ja'a vají i nava na kandixia kua'a yívi nación Israel, ti nanita'u i. Ti sava ga yívi tu kandixia, jna'nú ndatu i. Ti maa ya kuu ja ka'an jnu'un Yandios, ko kua'a yívi tu kuanta'u jnu'un ka'an ya. <sup>35</sup> Ti maa ya sa'a ja na ndundijin taka ja ka ndo'o ini añu taka yívi naa i. Ti ja kuu maa ra jatu yeni'ni ini añu ra, ja na'nú xaan ra i, ja nanu ja'ncha yuchi ini ra —ni kachi Simeón.

<sup>36</sup> Ti yukan kande iin ña'an junukuachi yux'e veñu'un ka'nú un, ja suni ka'an ña jnu'un Yandios. Nani ña Ana. Yíi ña ni nani Fanuel, ti kuu ña jna'an Aser, chaa ni ka xnukoo ñuu Israel na jana'an. Ti ja ni ja'nú xaan ña. Ni suchi xaan ña ni nanda'a ña, ti ni kuncha ña uxia kuiya jiin yíi ña, <sup>37</sup> ti ni kendo nda'u ña ja undi vijna kuu ña ña'an maa un nuu kuun xiko kuun kuiya. Ti tu kuxio ña nuu yux'e veñu'un ka'nú un ja junukuachi ña nuu Jito'yo kuu nduu kuu ñuu, kendo ndicha ini ña, ti jikanta'u ña nuu Yandios. <sup>38</sup> Ti maa hora ka'iin María jiin José un ni kenda ña ni tu'va ña nuu da naa da, ti ni nakuanta'u ña nuu Yandios. Ti ni keja'a ña ni ka'an ña siki Jesús lulu nuu taka yívi ka'iin ini veñu'un un, ja ka ñukuu ini i ja kii maa ya kii nama ya siki Jerusalén.

### *Ni ka nandeokuñi da ñuu Nazaret*

<sup>39</sup> Nu ni ndi'i ni ka siuku da taka jniñu ta'u ley maa Jito'yo Yandios, ti ni ka nandeokuñi da kuan nukoyo da ñuu da Nazaret ja kuu iin ndañuu Galilea.

<sup>40</sup> Ti kuan kua'nú ndendajnu ga Jesús, ti kuan kuu ndichi xaan inijnuni i, chi maa Yandios ni chindee chituu ya maa i.

### *Ni kendo Jesús ini veñu'un ka'nú Israel*

<sup>41</sup> Na kuiya yukan chi taka kuiya ka ja'an tata i jiin nana i undi Jerusalén, ja kuu viko pascua nación Israel. <sup>42</sup> Ti nu ja iyo uxi uu kuiya Jesús, ti kuankoyo taka da ñuu Jerusalén, chi sia'an ni ka ja'an da taka kuiya ja kuu viko un. <sup>43</sup> Ti nu ni ya'a viko un, ni ka nandeokuñi da kuan nukoyo da. Ti Jesús ni kendo i undi Jerusalén, ko tu ni ka jini José jiin María ja ni kendo i. <sup>44</sup> Ti ka ndo'o ini da ja kua'an Jesús ma'ñu yívi kua'a un, ti sia'an ni ka jika da nchakanchaa iin kivi. Ti sa ni ka nanduku da i ma'ñu taka jna'an da jiin ma'ñu yívi kuankoyo un, <sup>45</sup> ko tu ni ka nani'in da i. Yukan na ti ni ka nandeokuñi da undi ñuu Jerusalén, ja ka nanduku da i yukan. <sup>46</sup> Nu uni kivi sa ni ka nani'in da i ini veñu'un ka'nú Israel un, nukoo i ma'ñu chaa ka xna'an ley un, ñuso'o i jnu'un ka ka'an da, ti xndichi i chaa un jiin jnu'un ka ka'an da un. <sup>47</sup> Ti taka ja ka ñuso'o i jnu'un ka'an i, so ni ka naa ini ja ndichi xaan ka'an i, ti va'a xaan naxndeokani i jnu'un un nuu da naa da. <sup>48</sup> Ti nu ni jini tata i jiin nana i nuu i ja yukan kancha i, ti so ni ka naa ini da ni ka nde'e da nuu i ja nukoo i yukan. Ti ni kachi nana i jiin i:

—Nda'u se'e ri. ¿Ndoo ni sa'a ra sia'an jiin ri? Ru'u jiin tata ra ka ndi'i xaan ini ri ka nanduku ri ro'o —ni kachi ña.

<sup>49</sup> Yukan na ti ni kachi Jesús:

—¿Ndoo ka nanduku ni saña naa ni? ¿Xi tu ka jini ni ja kanuu ga ja na kunchaa na ini ve'e ii Tata na Yandios nu? —kachi i.

<sup>50</sup> Ko maa da, tu ni ka chaku ini da ndoo kuu ja ni kendo i yukan.

<sup>51</sup> Yukan na ti kuano'on i jiin da naa da ichi ñuu Nazaret, ti maa i ni siin i jandatu i nuu da naa da. Ti María ni chu'un ini ña taka jnu'un un, ti ndo'o xaan ini ña siki jnu'un un.

<sup>52</sup> Yukan ti kuan kua'nu ndendajnu ga Jesús, ti kuan kundichi ga xini i. Ti ni ni'l'in i ja yíñu'un nuu Yandios jiin nuu yíví naa i, chi maa Yandios ni chindee chituu ya i. Ti sia'an kuan kua'nu ga Jesús.

*Ka'an Juan, chaa skuanducha undi nuu ñu'un te'e un  
(Mt. 3.1-12; Mr. 1.1-8; Jn. 1.19-28)*

### 3

<sup>1</sup> Nu xia'un kuiya ja ni kenchaa ta'u rey Tiberio jniñu nuu taka nación yínda'a ñuu Roma, ti Poncio Pilato ni kuu gobernador ñuu Judea, Herodes ni kuu gobernador ñuu Galilea, ti ñani da Felipe ni kuu gobernador ñuu Iturea jiin ñuu Traconite, ti Lisanias ni kuu gobernador ñuu Abilinia. <sup>2</sup> Ti sutu ka kuña'nu Israel ni ka kuu Anás jiin Caifás na kuiya un. Ti ni ka'an Yandios jiin Juan, se'e yíí Zácarías. Ni ka'an ya jiin da nuu kande da undi nuu ñu'un te'e un. <sup>3</sup> Ti Juan ni jikonuu da taka ñuu ka'iin yajni yucha Jordán, ti ni kachi da nuu yíví ja na nakani ini i, ti na kuanducha i nava na kuanka'nu ini Yandios nuu kuachi i. <sup>4</sup> Ti yukan ni kundaa nava ni chaa Isaías nuu tutu ja kachi sia'an:

Kin ka'an iin chaa,  
kin ka'an undi nuu ñu'un te'e un, ti kachi da:  
Kotu'va naa ra, chi ja yajni chaa Jito'yó.  
Ti kuni ja na kaka ndaa ra naa ra.

<sup>5</sup> Na kotu'va yíví naa i, ti taka xa'va na ndundaa,  
ti taka yuku jiin loma na ndu iin nuu, ti taka ichi yakua na ndundoo,  
ti taka ichi kue'e na nduu iin nuu. Ti sia'an kuni yo ja na ndundaa añu yíví nuu ya.

<sup>6</sup> Ti taka yíví ñuyíví nakuni i nasa kii nama Yandios maa i.  
Sia'an ni ka'an Juan nava ni chiso Isaías nuu tutu na jana'an.

<sup>7</sup> Ti nu ni ka keja'a ka jakoyo yíví kua'a nuu Juan ja na skuanducha da i, ti ni kachi da nuu i:

—Ro'o, ka kuu ra nanu koo. ¿Xi ka jani ini ra ja nama ra maa ra nuu iin nundo'o kuan kuyajní nuu ra naa ra nu? <sup>8</sup> Na kachi ri ja kava yíñu'un naa ra nava na kuni ndaa yo ja, ja ni ka nakani ini ra. Ti nava sia'an na nduu ra nanu iin yujnu vixi ja ja'a nde'e va'a, chi ka sa'a ra jniñu va'a. Ti sia'an ka stuu ra maa ra ja, ja ni ka nakani ndixia ini ra, ti ni ka xndoo ra kuachi ra. Ti tu kondo'o vixi ini ra naa ra ja ka'an ra: "Maa yo naa yo chi ka kuu yo jna'an Abraham na jana'an." Tu ka'an ra sia'an, chi na kachi ri nuu ra ja suni undi yuu ja'a, ti kuu sa'a Yandios ja na kuu i jna'an Abraham. <sup>9</sup> Ti yíví ja tu ka kuni nakani ini nuu kuachi un, ja iyo tu'va Yandios ja kua'a ya iin nundo'o ja kondo'o i. Ti yukan kuu nanu iin chaa ja iyo tu'va da ja kin sandoo da nuu huerta da, ti ka'ncha da yujnu ja tukaa ja'a nde'e va'a un, ti ki'in nuu ñu'un ja na kayu —ni kachi Juan.

<sup>10</sup> Ti ni ka kachi yíví un:

—¿Ti ndoo sa'a na vijna naa na nusa? —ni ka kachi i.

<sup>11</sup> Ti ni kachi Juan:

—Nu ro'o ka ñava'a uu sa'ma, ti kua'a iin nuu yíví ja tundo ka ñava'a, ti nau ro'o ka iyo ja kaji, ti kua'a nuu yíví ja tundo ka ñava'a —ni kachi Juan.

<sup>12</sup> Suni ni ka ja'an sava chaa ka kinya'u puestu un nuu Juan, ja na skuanducha da chaa, ti ni ka kachi da:

—Maestro, ¿Ti ndoo sa'a saña naa na, nusa? —ni ka kachi da.

<sup>13</sup> Ti ni kachi Juan:

—Kinya'u ndaa naa ra nava ka'an ley, ti koto skaa ya'u ga ra ja kinya'u ra nuu puesto —ni kachi Juan.

**14** Ti suni sia'an ni ka jikajnu'un uu soldado un maa da, ti ni ka kachi:  
—¿Ti saña, ndoo sa'a na nusa? —ni ka kachi da.

Ti ni kachi tuku Juan:

—Koto ma kuisonchaa ra ni iin ndajniñu yivi naa i ja siu'u ra i, xi ja na chakuachi ra i nu tundo ka sa'a i. So nini kuu ja na kuanta'u ra xu'un ya'u ra ni —ni kachi Juan.

**15** Ti yivi kua'a un ka ndo'o ini i ja xi Juan kuu Cristo ja ka ndatu i ja kii un,  
**16** ko maa Juan ni kachi da nuu yivi kua'a un:

—Jandaa kuu ja ru'u skuanducha ri ro'o naa ra jiin nducha, ko vají iin ja kuña'nu ga ja kuu ru'u, ti maa chaa yukan skuanducha da ro'o naa ra, ti kua'a da Espíritu Santo ja na kunchaa ya jiin ra. Ti sia'an nanu sandoo iin ñu'un nuu kayu, suni sia'an sandoo Espíritu Santo undi ini añu ra naa ra. Ti tu kuu kandu ri nuu da, chi kuña'nu ga da ja kuu ru'u. **17** Ti chaa un xndichi da yivi nanu iin chaa ja ja yijní tu'va da pala da ja xndeche da triu da, ti kenso da paja ki'in tisava'a da triu da ini ve'e, ti ka'ma da paja un. Ko chaa un, chi kua'a da nundo'o nuu yivi jiin iin ñu'un ja tu nda'vea kuiti —ni kachi Juan.

**18** Ti jnu'un ja'a jiin tjiní ga jnu'un ni xndaku Juan, ti ni ka'an da jnu'un Yandios nuu yivi naa i.

**19** Suni ni kachi Juan nuu Herodes ja tu iyo va'a iin jniñu sa'a da. Chi Herodes kuu da gobernador, ti ni jaka da Herodías, ñasi'i ñani da Felipe, ja na kunchaa ña jiin da. Ti suni ni ka'an da ja tjiní ga jniñu kue'e sa'a da. **20** Ko Herodes, tu ni jandatu da jnu'un ni ka'an Juan, chi su'va vi'i ga ni sa'a ndeva'a da ja ni chunde da Juan vekaa.

### *Ja ni janducha Jesúis (Mt. 3.13-17; Mr. 1.9-11)*

**21** Na ti kivi ga Juan vekaa, ni kunde da ni skuanducha da yivi, ti suni ni skuanducha da Jesúis. Ti hora ni skuanducha da Jesúis ni jikanta'u ya nuu Yandios, ti ni nuña ni andivi nuu kancha Yandios, **22** ti ni kuun Espíritu Santo, ti ni jinu xini ya, ti kaa nanu iin sata. Yukan ti ichi andivi ni ka'an Yandios jiin Jesúis:

—Ro'o kuu Se'e ri ja kunda'u xaan ini ri, ti kusii xaan ini ri jiin ra —kachi.

### *Nava ni kii taká jna'an Cristo Jesúis undi jana'an (Mt. 1.1-17)*

**23** Na ni keja'a Jesúis undi nuu kuiti jiin jniñu ni tatu Yandios nuu ya, ja iin ya yajni oko uxi kuiya. Ti ka jani ini yivi ja ni kuu ya se'e yíi José. Ti jna'an José ni kuu se'e yíi Elí, **24** ti Elí ni kuu se'e Matat, ti Matat ni kuu se'e Leví, ti Leví ni kuu se'e Melqui, ti Melqui ni kuu se'e Jana, ti Jana ni kuu se'e José, **25** ti José ni kuu se'e Matatías, ti Matatías ni kuu se'e Amós, ti Amós ni kuu se'e Nahum, ti Nahum ni kuu se'e Esli, ti Esli ni kuu se'e Nagai, **26** ti Nagai ni kuu se'e Maat, ti Maat ni kuu se'e Matatías, ti Matatías ni kuu se'e Semei, ti Semei ni kuu se'e José, ti José ni kuu se'e Judá, **27** ti Judá ni kuu se'e Joana, ti Joana ni kuu se'e Resa, ti Resa ni kuu se'e Zorobabel, ti Zorobabel ni kuu se'e Salatiel, ti Salatiel ni kuu se'e Neri, **28** ti Neri ni kuu se'e Melqui, ti Melqui ni kuu se'e Adi, ti Adi ni kuu se'e Cosam, ti Cosam ni kuu se'e Elmodam, ti Elmodam ni kuu se'e Er, **29** ti Er ni kuu se'e Josué, ti Josué ni kuu se'e Eliezer, ti Eliezer ni kuu se'e Jorim, ti Jorim ni kuu se'e Matat, **30** ti Matat ni kuu se'e Leví, ti Leví ni kuu se'e Simeón, ti Simeón ni kuu se'e Judá, ti Judá ni kuu se'e José, ti José ni kuu se'e Jonán, ti Jonán ni kuu se'e Eliaquim, **31** ti Eliaquim ni kuu se'e Melea, ti Melea ni kuu se'e Mainán, ti Mainán ni kuu se'e Matata, ti Matata ni kuu se'e Natán, **32** ti Natán ni kuu se'e David, ti David ni kuu se'e Isai, ti Isai ni kuu se'e Obed, ti Obed ni kuu se'e Booz, ti Booz ni kuu se'e Salmón, ti Salmón

ni kuu se'e Naasón, <sup>33</sup> ti Naasón ni kuu se'e Aminadab, ti Aminadab ni kuu se'e Aram, ti Aram ni kuu se'e Esrom, ti Esrom ni kuu se'e Fares, ti Fares ni kuu se'e Judá, <sup>34</sup> ti Judá ni kuu se'e Jacob, ti Jacob ni kuu se'e Isaac, ti Isaac ni kuu se'e Abraham, ti Abraham ni kuu se'e Taré, ti Taré ni kuu se'e Nacor, <sup>35</sup> ti Nacor ni kuu se'e Serug, ti Serug ni kuu se'e Ragau, ti Ragau ni kuu se'e Peleg, ti Peleg ni kuu se'e Heber, ti Heber ni kuu se'e Sala, <sup>36</sup> ti Sala ni kuu se'e Cainán, ti Cainán ni kuu se'e Arfaxad, ti Arfaxad ni kuu se'e Sem, ti Sem ni kuu se'e Noé, ti Noé ni kuu se'e Lamec, <sup>37</sup> ti Lamec ni kuu se'e Matusalén, ti Matusalén ni kuu se'e Enoc, ti Enoc ni kuu se'e Jared, ti Jared ni kuu se'e Majalaleel, ti Majalaleel ni kuu se'e Cainán, <sup>38</sup> ti Cainán ni kuu se'e Enós, ti Enós ni kuu se'e Set, ti Set ni kuu se'e Adán, ti Adán ni kuu se'e Yandios, chi maa ya ni sa'a ya maa da.

*Kuni kue'e ja'u'u un Jesús  
(Mt. 4.1-11; Mr. 1.12-13)*

## 4

<sup>1</sup> Nu ni ni'in Jesús Espíritu Santo ja ni kukutu ini ya jiin, na ni kee ya ini yucha Jordán, ti maa Espíritu Santo ni yinda'a ya undi nuu ñuu'un te'e un. <sup>2</sup> Yukan ni kuncha ya uu xiko kivi, ti ja'u'u un kuni ke'e ya. Ti ni kivi un, tu ni yee kuiti ya staa. Ti nu ni ya'a kivi un, ti ni chaa soko ini ya. <sup>3</sup> Yukan na ti ni kachi ja'u'u un jiin ya:

—Nu ndixia ra ja Se'e Yandios kuu ra, ti sa'a ja taka yuu ja'a na nduu staa kaji yo —kachi ja'u'u un.

<sup>4</sup> Ti ni kachi Jesús:

—Su'va yoso nuu tutu Yandios ja ansu jiin nini staa kuchaku yi'vi naa i —ni kachi ya.

<sup>5</sup> Yukan na ti ni yinda'a ja'u'u un maa ya undi xini yuku sukun un. Ti yukan iiñ jinu kuiti ni ni xna'an nuu ya taka ñuu ka'iin nuu nii ka'nú ñuyivi, <sup>6</sup> ti ni kachi ja'u'u jiin ya:

—Kua'a ri iiñ jniñu nuu ra ti ta'u ra jniñu nu taka ñuu un, chi vii xaan kanda, chi maa ri kuu ja xiin un. Ti kuu kua'a ri nuu ra, nuu nau ja kuu ini maa ri.

<sup>7</sup> Nusa ti jakunjiti ra nuu ri, ti chiñu'un ra ru'u, ti maa ri na kua'a ndi'i taka un nuu ra —ni kachi.

<sup>8</sup> Ko ni kachi Jesús:

—Kuxio nuu ri ro'o ja'u'u, chi su'va kachi nuu tutu Yandios: “Chiñu'un nuu maa Jito'o ra Yandios, ti nuu maa iiñ ni ya kunukuachi ra”, kachi tutu —ni kachi Jesús.

<sup>9</sup> Yukan na ti ni yinda'a tuku ja'u'u un ya undi ñuu Jerusalén, ti ni skaa ya xini veñu'un ka'nú un, ti ni kachi:

—Nu ndixia ra ja kuu ra Se'e Yandios, ti skanakava maa ra undi nuu ñuu'un, <sup>10</sup> chi sia'an yoso nuu tutu Yandios:

Ta'u Yandios jniñu nuu ángel ya ja na koto ya ro'o.

<sup>11</sup> Ti na kinda'a ya ro'o nava tu stuji ra si'in ra nuu ni iiñ yuu —ni kachi ja'u'u un.

<sup>12</sup> Ti ni kachi Jesús:

—Tuu, chi su'va yoso nuu tutu Yandios: “Koto ma xna'an ga ra nuu maa jito'o ra Yandios” —kachi ya.

<sup>13</sup> Ja yukan ti tukaa ga ni kojnuni ini ja'u'u un nasa sa'a jiin Jesús, ti ni kuxio kua'an jaku kivi.

*Ni keja'a Jesús jiin jniñu ya nuu ñuu Galilea*

**14** Yukan ti ni nandeokuñi Jesús ichi ñuu Galilea, chi sia'an ni yinda'a Espíritu Santo maa ya. Ti ni ndañuu ja yi'i jiin Galilea, yukan ni jichanuu jnu'un ya. **15** Ti xna'an ya jnu'un Yandios ini veñu'un Israel taka nuu ka ndututu, ti tendi'i yivi nuu un ni ka jajnu'un i ya.

### *Kuano'on ya ñuu Nazaret*

(Mt. 13.53-58; Mr. 6.1-6)

**16** Yukan ti ni nandeokuñi ya ñuu Nazaret nuu ni ja'nu ya. Ti iin kivi ndetatu ni kivi ya ini veñu'un un nava jini sa'a ya. Ti ni ndokuiñi ya ja na ka'u ya tutu Yandios. **17** Ti ni ka ja'a da tutu ni chaa profeta Isaías nuu ya. Ni jiñña ya tutu un, ti ni nani'in ya nuu yoso sia'an, ti ni ka'u ya:

**18** Maa Espíritu Jito'yo Yandios kancha jiin ri. Yukan ni ja'a ya jniñu nuu ri ja xndaku ri nuu yivi nda'u, ja ka'an ri ja kunda'u ndixia ini ya nuu i naa i. Ni taji ya ru'u ja na kua'a ri jnu'un ndee ini nuu yivi ka kukui'ya ini, ja na ka'an ri iin jnu'un va'a nuu yivi ka yindi'yu nuu kuachi, nava na keta'u i.

Sa'a ri ja na kujnuni ini yivi tu ka jnuu ini.

Suni ja na nama ri yivi ni ka skexiko yivi maa i.

**19** Ti suni ja na kachi ri ja, ja ni jaa kuiya nu ni ndunda'u ini Jito'yo Yandios nuu yivi naa i.  
Kachi tutu ja ni ka'u ya.

**20** Ni nakasi Jesústutu un, ti ni nakua'a ya nuu chaa junukuachi ini veñu'un un, ti ni nukoo ya. Ko vanuxia tendi'i yivi ka'iin ini veñu'un un ka nde'e nuu ya, **21** ti ni jakunchaa ya ni ka'an ya:

—Vijna na ti ni kundaa nava yoso nuu tutu Yandios ja ni ka jiniso'o ra —ni kachi ya.

**22** Tendi'i yivi un ni ka jajnu'un i Jesúst, ti so ka naa ini i ja vii xaan ka'an ya jiin i, ti ka jikajnu'un jna'an i:

—¿Ti ansu se'e José kuu chaa ja'a nu? —ni ka kachi i.

**23** Ti ni kachi Jesúst jiin yivi un:

—Ja jini va'a ri nava ka ndo'o ini ra, ti suni ka ka'an ra jnu'un ja'a jiin ri: “Nu ndixia ni ja kuu ni médico, sa'a ni tajna ti sa na kandixia na naa na maa ni.” Ti suni kachi ra jiin ri: “Jnu'un ni ka jiniso'o na, ja ni sa'a ni ñuu Capernaum, sa'a ni suni ñuu maa ni ja'a” —ni kachi ya jiin i.

**24** Yukan na ti ni siin Jesúst ka'an ya, ti ni kachi ya:

—Jandaa na kachi ri nuu ra naa ra ja ni iin profeta ka'an jnu'un Yandios, tu ka janta'u yivi ñuu da maa da. **25** Chi jandaa kuu ja ni ka iyo kua'a ña'an ni ka kendo nda'u nación Israel undi jana'an na ni kii profeta Elías, na ni kii jnama xaan ini ni nación un, ja uni kuiya sava tukaa ga ni kuun sau. **26** Ko Elías tu ni ja'an da nuu kanchuku ña'an ni ka kendo nda'u ñuu Israel, chi ni ja'an da nuu kancha iin vajnu'un ni ña'an ni kendo maa iin ñaa nuu ñuu Sarepta, yajni ñuu Sidón, iin ñuu ja tu ni yi'i jiin Israel. **27** Suni ñuu Israel ni ka iyo kua'a yivi ni ka ku'u jin ndi'yi te'yu na ni kii profeta Eliseo, ko tu ni ka nduva'a a ni iin yivi ka ku'u un, chi maa iin ni Naamán ni nduva'a, ja ni kuu da chaa ñuu Siria, iin ñuu ja tu ni yi'i jiin ñuu Israel —ni kachi Jesúst.

**28** Nu ni ka jiniso'o yivi jnu'un ni ka'an ya, ti tendi'i yivi ka'iin ini veñu'un un, ni ka kit'i xaan ini nuu ya. **29** Ti ni ka ndonda yivi un siki ya ja ni ka keni'in da Jesúst undi fuera yu'u ñuu un. Ti kuankoyo da jiin ya undi yu'u yuku un ja ka kuni skanakava da yaa kava un. **30** Ko Jesúst ni naya'a ya ma'ñu da naa da, ti kua'an ya.

*In chaa ni jna'an tachi xaan  
(Mr. 1.21-28)*

<sup>31</sup> Yukan na ti kua'an Jesús ñuu Capernaum, iin ndañuu Galilea. Yukan ni ja'a kunchaa ya ni xna'an ya nuu yivi un iin kivi ndetatu. <sup>32</sup> Ti so ka naa ini yivi un ka ñuso'o i jnu'un ka'an ya, chi ka'an ya jnu'un ndaa kuiti nanu ka'an iin chaa ndiso jniñu nuu Yandios.

<sup>33</sup> Ti ini veñu'un un kande iin chaa jna'an tachi xaan, ja ni kanajiin ko'o, ti ni kachi da:

<sup>34</sup> —Kuxio ni nuu na naa na, ni'in Jesús, chaa ñuu Nazaret. ¿Ndoo kivi nduu ni jiin na, xi vaji ni ja xnaa ni saña nu? Ja nakuni na ni'in, ti jini na ja maa ni kuu se'e ii Yandios —ni kachi da.

<sup>35</sup> Ti Jesús ni nduxaan ya nuu tachi xaan un, ti ni kachi ya:

—Kasi yu'u ti xndoo chaa ja'a —ni kachi ya.

Yukan na ti tachi xaan un ni sa'a ja na kuikokava chaa un nuu yivi un, ti ni kee kua'an. Ti tundo ni sa'a jiin chaa un. <sup>36</sup> Ti so ni ka sa'u ini yivi un ja so ka naa ini i ka nde'e i, ti ka jikajnu'un jna'an i:

—¿Naa jnu'un kuu ja'a ja sia'an ni kuu? Kuña'nu chaa ja'a ja ta'u da jniñu nuu tachi xaan un, ti ka jandatu nuu da, ti ka kekoyo kua'an —kachi i naa i.

<sup>37</sup> Ti jnu'un Jesús ni jichanuu taka nuu ñuu Galilea yukan.

*Ni sa'a Jesús tajna nana chiso Simón Pedro  
(Mt. 8.14-15; Mr. 1.29-31)*

<sup>38</sup> Yukan na ti ni kee Jesús ini veñu'un un ti kua'an ya ichi ve'e Simón. Ni kivi ya ve'e da. Ti ini ve'e Simón kancha nana chiso da ku'u ña jiin kue'e kiji xaan. Ti ni kakanda'u da jiin Jesús ja na sa'a ya tajna ña. <sup>39</sup> Ni jankudandijin Jesús, ti ni kachi ya ja na kee kiji un, ti ni kenchaa ni kiji un kua'an. Ti ni ndoko ni ña, ti ni keja'a satu'va ña ja ni yaji ya jiin da naa da.

*Kua'a yivi ka ku'u ni sa'a ya tajna  
(Mt. 8.16-17; Mr. 1.32-34)*

<sup>40</sup> Nu kuan kee ndikandii, ti taka yivi ka ñava'a yivi ku'u, ja ka jna'an i tijni nuu kue'e, ni ka yinda'a i yivi un nuu Jesús, ti Jesús ni chaa ya nda'a ya siki iin yivi un, ti ni ka nduva'a i. <sup>41</sup> Ti ma'ñu tendi'i yivi ku'u un, ka iyo yivi ka jna'an tachi xaan, ko ni keni'in ya kuankoyo. Ti nu ni ka kekoyo kua'an, ka kanajiin ti ka ka'an:

—Ro'o kuu Se'e Yandios —kachi.

Ko Jesús ni nduxaan ya jiin tachi xaan un ja tukaa ni ja'a ya jnu'un ja ka'an, chi ja ka jini ja maa ya kuu Cristo, ja ni taji Yandios ja ndiso ya jniñu ña'nu.

*Ni xna'an Jesús jnu'un Yandios ñuu Galilea  
(Mr. 1.35-39)*

<sup>42</sup> Nu ni kundijin inga kivi, ti ni kee maa iin ni Jesús kua'an ya iin yu'u ñuu un nu tukaa yivi. Ko ni ka nanduku yivi un ya naa i, ti ni ka nani'in i nuu kande ya. Tu ka kuni i ja ki'in tukuu ya, <sup>43</sup> ko ni kachi ya jiin yi:

—Kanuu kuu ja ki'in ri uu ga ñuu un suni, ja na ka'an ri ti na xndaku va'a ri nasa kuu kivi yivi nda'a Yandios ja na ta'u ya jniñu nuu i, chi siki yukan ni taji Yandios ru'u vaji ri —ni kachi Jesús.

<sup>44</sup> Ti sia'an ni jikonuu Jesús ni ka'an ya jnu'un Yandios nuu taka veñu'un Israel ka iyo ñuu Galilea un.

*Ja ni ka ni'in kua'a da chāká  
(Mt. 4.18-22; Mr. 1.16-20)*

## 5

<sup>1</sup> Ti iin kivi kande Jesús yu'u lago Genesaret. Ti ni ka kututu yivi kua'a xaan nuu ya ja undi ka jaxin jna'an i, ja ka kuni kunso'o i jnu'un Yandios. <sup>2</sup> Ti ni jini ya ja ka'iin uu barco yajni yuu lago un, chi chaa ka jnii chāká un, ni ka kee da ka nakacha da ñunu da. <sup>3</sup> Ti ni kivi Jesús ini iin barco ja xiin Simón, ti ni ka'an ya jiin Simón ja na skaka da iin t'ilí barco un na ki'in nuu nducha un. Yukan na ti ni nukoo ya nuu barco un, ti undi nuu barco un ni xndaku ya nuu yivi naa i. <sup>4</sup> Nu ni ndi'i ni xndaku ya nuu yivi un, ti ni kachi ya jiin Simón:

—Kua'an jiin barco ja'a undi nuu kunú ga nducha un, ti skuita ka'nu ra ñunu ra naa ra chii nducha un, ti ni'in kua'a ra chāká —ni kachi ya.

<sup>5</sup> Ti ni kachi Simón:

—Maestro, ni niñu ni ka sajniñu na, ko ni iin chāká tu ni ka ni'in na. Ko ja kachi maa ni kuu, ti na skuita ka'nu na ñunu na nusa —kachi da.

<sup>6</sup> Ko nu ni ka sa'a da nava ni kachi Jesús, ti ni ka ni'in da kua'a xaan cháká ja ni keja'a te'nde ñunu da un. <sup>7</sup> Ti ni ka sa'a da seña nuu uu ga chaa ka'iin nuu inga barco da, ja na kin chindee da maa da. Ni ka chindee jna'an da ti ni ka skutu da chāká nuu ndinduu barco un, ja kuni keka'nun i ga chii nducha un. <sup>8</sup> Nu ni jini Simón Pedro ja sia'an ni kuu, ni jakunjiti da nuu Jesús, ti ni kachi da:

—Va'ga kuxio ni nuu na Jito'yo, chi kuu na iin chaa nchakuachi —ni kachi da.

<sup>9</sup> Chi Simón jiin uu ga chaa ka'iin jiin da un, so ni ka sa'u ini da ja ni ka ni'in kua'a da chāká ni sa'a ya. <sup>10</sup> Suni Jacobo jiin Juan, se'e yii Zebedeo, ja suni ka'iin da jiin Simón yukon. Suni so ni ka sa'u ini da. Ko ni kachi Jesús jiin Simón:

—Koto ma xndi'i ini ra, chi undi vijna ti tukaa ga jnii ra chāká, chi ru'u na xna'an ri nuu ra nasa nastutu ra yivi, ti xna'an ra yivi un maa jnu'un Yandios ja na kandixia i ru'u —ni kachi Jesús.

<sup>11</sup> Yukan na ti nu ni ka tava da barco un nuu ñu'un ichi, ti ni ka xndoo ndi'i kuiti da ndajniñu un, ti kuankoyo da jiin Jesús.

*Ni sa'a Jesús tajna iin chaa jna'an kue'e ndi'yí te'yu  
(Mt. 8.1-4; Mr. 1.40-45)*

<sup>12</sup> Ti ni kuu ja kande Jesús iin ñuu un, ti ni jaa iin chaa ku'u kue'e ndi'yí te'yu. Ti nu ni jini da nuu Jesús, ti ni jankunjiti da nuu ya, ti ni sino da nuu da undi nuu ñu'un, ti ni kanda'u da jiin Jesús:

—Jito'yo, nu kuni ni, ti kuu sandoo ni saña jiin kue'e jna'an na ja'a —ni kachi da.

<sup>13</sup> Yukan ti Jesús ni kue'e ya maa da jiin nda'a ya, ti ni kachi ya:

—Kuni ri, na ndundoo ra vijna —ni kachi ya.

Ti nu ni ka'an ya sia'an, ni nduva'a ni chaa ku'u un.

<sup>14</sup> Yukan ti ni xndaku ni'in ya nuu da ja tu kani kuiti da jnu'un nuu ni iin yivi. Ko ni kachi ya:

—Kua'an ti ki'in ra nuu sutu kuña'nu un, na nde'e da ro'o ja, ja ni nduva'a ra. Ti kunda'a ja soko ra nuu Yandios siki ja, ja ni ndundoo ra nava ta'u ley Moisés jniñu. Ti na soko sutu un nuu Yandios, nava na kuni yivi ja, ja ni kenchaa ndi'yí un ro'o —ni kachi ya.

<sup>15</sup> Ti jnu'un Jesús, vi'i ga ni jichanuu kua'an ja siki iin jniñu ña'nu ni sa'a ya yukon. Ti ja yukan kuu ja kua'a xaan ga yivi ka kututu ja ka kuni kunso'o i jnu'un ka'an ya, jiin ja na sa'a ya tajna maa i, nuu taka kue'e ka ndo'o i. <sup>16</sup> Ko tiji jinu kee siin maa ya kua'an ya nuu tukaa yivi, ti yukan jikanta'u ya nuu Yandios.

*Ni sa'a Jesúس tajna iin chaa tikuku  
(Mt. 9.1-8; Mr. 2.1-12)*

<sup>17</sup> Ti iin kivi kande Jesú斯 xna'an ya nuu yivi naa i, ti ichi chukan kanchuku sava chaa fariseo jiin chaa ka xna'an ley Moisés ja vekoyo da taka ñuu Galilea, jiin ñuu Judea, jiin ñuu Jerusalén. Ti ka nde'e da jniñu sa'a Jesú斯, ja jiin jniñu ña'nu maa Yandios sa'a ya tajna yivi ku'u naa i. <sup>18</sup> Yukan ti ni ka jakoyo jaku chaa ka yinda'a iin chaa tikuku nuu iin yúú, ti ka kuni skivi da chaa un ini ve'e, ti skatu da chaa nuu Jesú斯. <sup>19</sup> Ko tu ni kuu kivi da naa da, chi kua'a xaan yivi ka'iin un. Yukan na ti ni ka kaa da xini ve'e, ti ni ka xndonda da teja un, ti ni ka sino da chaa ku'u un jiin yúú da ma'ñu yivi kua'a un nuu kancha Jesú斯. <sup>20</sup> Nu ni jini Jesú斯 ja ni ini da ka kandixia da ja kuu sa'a ya tajna chaa ku'u un, ti ni kachi ya jiin chaa ku'u un:

—Nda'u se'e ri, ja ni janka'nu ini ri nuu kuachi ra —ni kachi ya.

<sup>21</sup> Yukan na ti chaa ka xna'an ley un jiin chaa fariseo un ni keja'a ka ndo'o ini da:

—¿Nau kuu chaa ja'a ja ndo'o ini da ja kuu da Yandios, ti sia'an ka'an ka'an ndevara'a da siki Yandios jiin jnu'un un nusa? Ti tu ni iin ja kuanka'nu ini nuu kuachi yo, chi vajnu'un ni maa Yandios —ni ka ndo'o ini da.

<sup>22</sup> Ko Jesú斯 ja ni jini ya ndoo ka ndo'o ini da, ti ni kachi ya:

—¿Ndoo ka ndo'o ini ra sia'an? <sup>23-24</sup> Chi na kachi ri ja kuu ri maa Se'e Yivi Ñuyivi, ti ndiso jniñi ri ja kuan ka'nu ini ri nuu kuachi yivi naa i. Vijna ti na stuu ri iin jniñu sa'a ri ja'a —kachi Jesú斯.

Yukan na ti ni kachi ya jiin chaa tikuku un:

—Ndoko, nastuu yúú ra, ti kuano'on ve'e ra —ni kachi ya.

<sup>25</sup> Ti hora ni, ni ndoko chaa tikuku un ma'ñu yivi kua'a un, ni naki'in da yúú nu ni katuu da nuu un, ti kuano'on da ve'e da. Ti ni nakanajaa da Yandios ja ni nduva'a da ni sa'a Jesú斯. <sup>26</sup> Ti tendi'i yivi un so ni ka naa ini i ja sia'an ni sa'a ya. Ti ni ka kanajaa i Yandios, ti ni ka ka'an i:

—Vijna ndixia ti ni ka jini yo iin jniñu ña'nu xaan —kachi naa.

*Ni kana Jesú斯 xini Leví  
(Mt. 9.9-13; Mr. 2.13-17)*

<sup>27</sup> Yukan na ti ni kee Jesú斯 ti kua'an ya, ti ni jini ya nuu iin chaa kinya'u puesto ja nani Leví, nukoo da nuu kinya'u puesto un, ti ni kachi ya jiin da:

—Ña'an na cho'o, ti kundikun ra ru'u —ni kachi ya.

<sup>28</sup> Ti ni ndokuiñi Leví, ni xndoo ndikuiti da ja ñava'a da un, ti kua'an da jiin Jesú斯.

<sup>29</sup> Yukan na ti ni nasa'a da iin viko ka'nu ve'e da ja kusii ini da jiin Jesú斯, ti yukan ni ka'iin kua'a chaa ka kinya'u nuu puesto jiin uu ga yivi ni kunchuku jiin da naa da nuu mesa un. <sup>30</sup> Ko chaa fariseo jiin chaa ka xna'an ley Moisés, ni ka keja'a ka ka'an nchaa da siki ndaja'a Jesú斯, ti ni ka kachi da:

—¿Ndoo ka yee ra ka jí'l ra jiin chaa ka kinya'u nuu puesto un, jiin taka chaa tu ka siuku ley Israel? —ni ka kachi da.

<sup>31</sup> Ti ni kachi Jesú斯:

—Yivi iyo va'a ndendajnu, tu ka nandi'i i médico, chi yivi ku'u kuu ja ka nandi'i tajna un. <sup>32</sup> Ja yukan kuu ja ru'u tu vaji ri ja ka'an ri jnu'un Yandios nuu yivi ka ndo'o ini ja iyo ndoo jiin kuachi. Chi su'va ni nchaa ri ja ka'an ri jnu'un Yandios nuu yivi ka nakuni nuu kuachi i nava nakani ini i nuu Yandios —kachi Jesú斯.

*Ka jikajnu'un da nuu Jesú斯 siki jnu'un ja koo ndicha ini  
(Mt. 9.14-17; Mr. 2.18-22)*

**33** Yukan na ti ni ka jikajnu'un da nuu Jesús:

—¿Ndoo chaa ka skua'a jiin Juan jiin chaa ka skua'a jiin chaa fariseo, nini ka iyo ndicha ini da, ti tijni jinu ka jikanta'u da, ti ndaja'a ni nini ka yee da, ti ka jí'i da? —ni ka kachi da.

**34** Ti ni kachi ya jiin da:

—¿Xi kuu koo ndicha ini yívi ka'iin iin viko nanda'a nu ni kancha novio un jiin yí nu? **35** Ko jaa iin kivi ja kuxio novio nuu i. Yukan na ti sa na koo ndicha ini i. Suni nu kancha ri, tu kuu koo ndicha ini chaa ka skua'a jiin ri. Ko jaa iin kivi nu na kujiyo ri, yukan na sa na koo ndicha ini da naa da —kachi ya.

**36** Ti ni kachi ya ja'a nuu da:

—Ni iin yívi tu ka'ncha i iin pedasu sa'ma jaa ti nachaa i nuu iin sa'ma tu'u. Chi nu sia'an na sa'a i, ti stivi i sa'ma jaa un, chi tu kejna'an ja jaa jiin ja tu'u. **37** Ni tu kuu chu'un yo vino jaa chii iin ñii tu'u. Chi nu sia'an na kuu ti xnaa yo ndinduu. Chi vino jaa un ndata ñii tu'u un. **38** Ja yukan kuu ja na chu'un yo vino jaa chii ñii jaa, chi sia'an ti ni iin tu xnaa yo. **39** Ti ni iin ja ja ni ji'i vino ava ti ko'o tuku vino jaa, chi vanuxia ka ka'an yívi ja nini va'a ga vino ni kuu ava —kachi ya.

*Jniñu ni ka sa'a ndaja'a Jesús iin kivi ndetatu  
(Mt. 12.1-8; Mr. 2.23-28)*

## 6

**1** Iin kivi ndetatu ni ya'a Jesús jiin ndaja'a ya nuu kaa triu. Ti ndaja'a ya kuankoyo da ka kenchaa da yoko triu un, ka kiin da ini nda'a da ti ka yee da.

**2** Yukan ti sava chaa fariseo ni ka jikajnu'un da ya:

—¿Ndoo ka sa'a ra jniñu ja tu kusa'a yo iin kivi ndetatu? —ni ka kachi da.

**3** Ti ni kachi Jesús jiin da:

—¿Xi tu ni ka ka'u kuiti ra tutu nasa ni sa'a David na iin jinu ja ni ji'i da soko jiin takaa ni kanchuku jiin da nu? **4** Ja ni kivi da ini ve'e ii Yandios, ti ni ki'in da staa stila ii ja ni soko sutu nuu Yandios, ti ni yee da. Ti suni ni ja'a da nuu yívi kanchuku jiin da, ja tu ka'an nuu ley ja tu kuu kaji inga yívi, chi maa ni maa sutu kuu ja yaji staa stila un —ni kachi ya.

**5** Suni ni kachi ya jiin da:

—Tíru'u, maa Se'e Yívi Ñuyívi, kuña'nu ga ri ti ta'u ri jniñu nuu kivi ndetatu ja'a —kachi ya.

*Ni nduva'a iin chaa ni ichi nda'a  
(Mt. 12.9-14; Mr. 3.1-6)*

**6** Ti inga kivi ndetatu, ni kivi Jesús ini veñu'un Israel, ti ni xna'an ya nuu yívi naa i. Ti yukan kande iin chaa ni ichi nda'a kua'a da. **7** Ti chaa ka xna'an ley jiin chaa fariseo, ka jito yu'u da Jesús ja nu sa'a ya tajna chaa un nuu kivi ndetatu un, ti sia'an ni'in da ichi ja kankuachi da ja'a ya. **8** Ko maa ya chi ja jini ya ndoo ka ndo'o ini da naa dà, ti ni kachi ya jiin chaa ni ichi nda'a un:

—Ndokuiñi ti kundichi ra ma'ñu ja'a —ni kachi ya.

Ni ndokuiñi chaa un ti ni jakuiñi da ma'ñu un. **9** Yukan na ti ni kachi Jesús jiin takaa yívi un:

—Na kajnu'un ri iin jnu'un nuu ra naa ra: “¿Nau iin ja iyo va'a ja sa'a yo vijna kivi ndetatu nu? ¿Xi kuu sa'a yo ja va'a, xi va'a ga sa'a ndeva'a yo? ¿Kuu nama yo iin chaa ku'u un, xi kua'a ini yo na kuñu da nu?” —ni kachi ya.

**10** Ti ni nde'e va'a Jesús nuu tendi'i yívi un, ti ni kachi ya jiin chaa ku'u un:  
—Skaa nda'a ra —ni kachi ya.

Ti chaa un ni skaa da nda'a da, ti hora ni, ni nduva'a nda'a da. <sup>11</sup> Ko sava yívi ka'iin un, ni ka kuiti xaan ini ja sia'an ni kuu, ti ni ka keja'a ka ndajnu'un nasa sa'a da ndonda da siki Jesús.

*Ni nakaji Jesúus ndi uxi uu chaa kuu ndaja'a ya  
(Mt. 10.1-4; Mr. 3.13-19)*

<sup>12</sup> Ni kuu jaku kivi kua'an Jesús undi yuku un ja kakanta'u ya, ti yukan ni kendo ya ni niñu ni jikanta'u ya nuu Yandios. <sup>13</sup> Nu ni kundijin inga kivi ti ni kana ya chaa ka skua'a jiin ya, ti ni nakaji ya ndi uxi uu da, ja ni skonani ya da apóstol, chi kundiso jniñu da ja na ka'an da jnu'un ya. <sup>14</sup> Ti chaa un ka kuu Simón ja ni skonani ya da Pedro, jiin ñani da Andrés; Jacobo jiin Juan; Felipe jiin Bartolomé; <sup>15</sup> Mateo jiin Tomás; Jacobo, se'e yií Alfeo; Simón, chaa ni yi'i jiin partido cananista; <sup>16</sup> Judas, se'e yií Jacobo; jiin inga Judas, iin chaa fiuu Cariote ja kuee ga ti ni nakua'a da Jesús nuu yívi jito u'u da.

*Xna'an yajnu'un Yandios nuu yívi kua'a  
(Mt. 4.23-25)*

<sup>17</sup> Yukan na ti ni nūn Jesús xini yuku un jiin ndaja'a ya, ti ni jakuiñi ya iin ndu'va. Ti kua'a xaan yívi ndañuu Judea, yívi ñuu Jerusalén jiin yívi vekoyo ichi yu'u mar Tiro jiin Sidón, ni ka kututu un ja ve kunso'o jnu'un xna'an Jesús, jiin suni ja na nduva'a i jiin kue'e ka ndo'o i. <sup>18</sup> Ti yívi ka ndo'o tachi xaan suni ni ka nduva'a i. <sup>19</sup> Ti tendi'i yívi un ka kuni kue'e i sa'ma Jesús, chi jiin jniñu ndiso ya un sa'a ya tajna tendi'i yívi.

*Yívi kundatū jiin yívi koo ndo'o*

<sup>20</sup> Yukan na ti ni nde'e va'a Jesús nuu ndaja'a ya ti ni kachi ya:

—Na kachi ri ja kandichi Yandios jiin ro'o yívi nda'u, chi jandaa kuu ja kivi ra ñuu nuu ta'u ya jniñu. <sup>21</sup> Kandichi Yandios jiin ro'o ja ka ji'i soko vijnna naa ra, chi jaa kivi ja kee ndendajnu ra naa ra. Kandichi Yandios jiin ro'o ja vijnna ka iyo ra jnukui'ya ini, chi inga kivi ti kusii ini ra, ti kuaku ra na ra. <sup>22</sup> Kandichi Yandios jiin ra naa ra, chi koto u'u yívi ro'o ti keni'in i ro'o ichi fuera, ka'an ndeva'a i nuu ra, ti skexiko i ro'o naa ra nanu ja ka kuu ra yívi ndeva'a ja siki ru'u, maa Se'e Yívi Ñuyivi. <sup>23</sup> Ko kivi un ti ndusii ini ra, chi kusii xaan ini ra, chi ka'nú xaan koo ta'u ra nuu andívi, chi suni sia'an ni ka sa'a ndeva'a jna'an da jiin chaa ni ka kuu profeta, ni ka ka'an jnu'un Yandios na jana'an. <sup>24</sup> Ko na nda'u ga taka ro'o chaa riku, chi vijnna ni ga ka iyo sií ini ra. <sup>25</sup> Na nda'u ro'o naa ra ja ka iyo ndendajnu ra vijnna, ko jaa kivi ja kuu ra soko. Na nda'u ra naa ra, vijnna chi ka jaku ra, ko jaa kivi ja ndukui'ya ini ra ti nde'e ra. <sup>26</sup> Na nda'u ra naa ra, chi kuajnu'un yívi ro'o, chi sia'an ni ka jajnu'un i chaa ni ka xndoña'an ja ka kuu da profeta, chaa ni ka ka'an jnu'un Yandios vasu tu ni kuu da, chi mani chaa ni ka xndoña'an ni ka kuu da —ni kachi ya.

*Jnu'un kanuu gaja na siuku yo  
(Mt. 5.38-48; 7.12)*

<sup>27</sup> Siin Jesús xndaku ya, ti ni kachi ya:

—Ko ro'o naa ra kunso'o jnu'un na ka'an ri. Kunda'u ini ti ka'an va'a ra jiin yívi jito u'u ro'o. Sa'a ja va'a ja kuu yívi ka sa'a ndeva'a nuu ka kuiti ini i nuu ra. <sup>28</sup> Ka'an va'a jiin yívi jikanta'u ja'a ra ja na jna'an ra iin nundo'o. Kakanta'u nuu Yandios ja kuu yívi ka chakuachi siki ra. <sup>29</sup> Koto kinjna'an ra jiin yívi kani ro'o, chi su'va nu ni kani iin nuu ra, ti kua'a inga nuu ra na kani tuku i. Nu iin yívi kuni kuisonchaa i sa'ma ra, sia na ki'in yívi un jiin, ti suni koto kinyii ra camisa ra, kua'a na ki'in yívi un jiin. <sup>30</sup> Kua'a nuu nuu yívi jikanuu nuu ra, ti nu iin yívi jisonchaa i ja ñava'a ra, kua'a ra ki'in, ti koto ma

nandakan ga ra. <sup>31</sup> Nu kuni ra ja na ka'an yiñu'un yivi jiin ra, ti kava yiñu'un tu maa ra nava na ka'an yiñu'un yivi jiin ra.

<sup>32</sup> Chi nu nini yivi mani ra jiin ka'an va'a ra, ¿Nau ta'u ra iyo nusa? Chi undi chaa ka sa'a ndeva'a ka sa'a sia'an. <sup>33</sup> Ti nu nini nuu yivi chindee ro'o ni yukan chindee ra, ¿nau ta'u ra iyo nusa? Chi undi chaa ka sa'a ndeva'a ka sa'a sia'an. <sup>34</sup> Ti nu kua'a ra nini nuu yivi jini ra ja kuu chunaa i nuu ra, ¿nau ta'u ra iyo nusa? Chi undi chaa ka sa'a ndeva'a, suni ka ja'a nuu nuu jna'an da, chi jini da ja chunaa i nuu da. <sup>35</sup> Ko maa ra naa ra, ka'an va'a jiin yivi ka jito u'u ro'o, ti chindee yivi un. Kua'a nuu nuu da, ti tu kuñukuu ini ra ja kakan ra ya'u nuu da. Chi nu sia'an sa'a ra, ti iyo kua'a ta'u ra nuu Yandios, chi sia'an ja'a ra jandaa ja ka yi'i ra jiin Yandios, ya kancha andivi. Chi maa ya va'a ini ya jiin takaa ni yivi, vasu iin yivi ja tu jini nakuanta'u nuu ya jiin yivi ndeva'a xaan. <sup>36</sup> Ja yukan kuu ja na kava nda'u ini ra naa ra, sia'an nanu ñunda'u ini Tata ra Yandios —ni kachi Jesús.

### *Koto kuu ichi ini yo nuu yivi (Mt. 7.1-5)*

<sup>37</sup> Siin Jesús xndaku ya, ti ni kachi ya:

—Koto kuu ichi ini ra nuu yivi ja ka'an ndoo ra. Chi nu sia'an na sa'a ra, ti kankuachi Yandios siki ra, ja suni sia'an kaa tu maa ra. Koto kankuachi ra ja'a yivi. Chi nu sia'an ka'an ra ti kankuachi Yandios siki ra. Koto ma kachi ra ja ni jna'nu ndatu ñanijna'an ra. Chi nu sia'an na ka'an ra, ti kachi Yandios ja ni jna'nu ndatu maa ra. Kuanka'nun ini nuu ñanijna'an ra nava na kuanka'nun ini Yandios nuu ra. <sup>38</sup> Ti ansu nini ja na kuanka'nun ini ra nuu ñanijna'an ra, chi suni kua'a sava'ni ga ja nandi'i da, ti maa Yandios na nakua'a ya vi'i ga nuu ra. Ti chikua'a va'a ya nuu ra nanu ni chikua'a maa ra nuu ñanijna'an ra undi na chitu ndii bolsa ra. Sia'an sa'a ra, chi nu jiin ku'va un chikua'a ra nava nandi'i ñanijna'an ra, ti suni sia'an na nachikua'a Yandios nava nandi'i tu ro'o —ni kachi Jesús.

<sup>39</sup> Suni ni xna'an Jesús inga jnu'un nuu yivi un, ti ni kachi ya:

—Na kajnu'un ri nuu ra naa ra. ¿Xi kuu koxnuu iin chaa kuaa nuu inga chaa kuaa ja nduku da ichi ki'in da nu? ¿Xi ansu ndinduu da nukoyo iin yau nu? <sup>40</sup> Yukan kuu ja kuu maa ra naa ra, nu ka kuu ra maestro ja xna'an jnu'un Yandios nuu inga yivi. Tu iyo ni iin ndaja'a ja ndu iin nuu jiin maestro da, chi xnakan na kutu'va da taka ja xna'an maestro un. Yukan na ti sa ndu iin nuu da jiin maestro da.

<sup>41</sup> ¡Suni na kajnu'un ri nuu ra! ¿Xi vatuni ja ka'an ndoo ra ja kuu ichi ini ra nde'e ra ñanijna'an ra, nu iyo iin kuachi i, vasu jakuu ga kaa tu maa ra jiin kuachi ra xino? <sup>42</sup> ¿Xi vatuni ja ka'an ndoo ra siki ñanijna'an ra, ja ka'an vixi ra siki da xino? Nde'e naa kaa jniñu sa'a ra, ti xaan yuji ra jiin kuachi un. Ko na kachi ri ja yivi ñaa xini kuu ra, ja tu jini ra ja xnakan nde'e va'a ra nasa kancha ra jiin kuachi ra, ti sa kuu kotonchaa ra kuachi lulu sa'a ñanijna'an ra —kachi Jesús.

### *Jiin nde'e un ti nakuni yo naa yujnu kuu (Mt. 7.16-20; 12.33-35)*

<sup>43</sup> Siin Jesús xndaku ya nuu yivi un, ti ni kachi ya:

—Sa'a yo nanu. Ja ka jini ra ja tu iyo ni iin yujnu va'a ja kua'a nde'e kue'e, ni tu iyo ni iin yujnu kue'e ja kua'a nde'e va'a. <sup>44</sup> Chi nakuni yo nau nuu takaa yujnu kuu nu jini yo naa nde'e kua'a. Suni tu kuni'in yo tichi vixi xini nu'iñu xaan, xi kuni'in yo nde'e tika'ya xini iin nu'iñu. <sup>45</sup> Sia'an kuu chaa va'a, chi ndo'o ini da mani jniñu va'a. Ti chaa ndeva'a un, mani jniñu kue'e ndo'o ini da. Ti yu'u da, chi ka'an nava ndo'o ini da —kachi ya.

*Xndaku Jesúsi siki uu ve'e  
(Mt. 7.24-27)*

<sup>46</sup> Yukan ti ni kachi Jesúsi nuu yívi kua'a ni ka ndututu un:

—Nde kua'a ra kachi jiin ri naa ra: “Ni'in kuu jito'o na, ti saña kuu se'e ni.”

Vasu ka ka'an ra sia'an, ko tu ka jandatu ra jnu'un ri. <sup>47</sup> Ko vijna na xna'an ri nasa kuu yívi vekoyo nuu ri, ja chunso'o jnu'un ka'an ri, ti jandatu i jnu'un ri. <sup>48</sup> Yívi un kuu i nanu iin chaa ni sa'a iin ve'e. Kunuu teyíi ni skee da yuu ndiso nama ve'e un. Yukan ni kii iin sau xaan, ti ni ndaa nducha ja kuni xnaa ve'e un, ko tu ni kanda ve'e un, chi kutu xaan ni kee ja'a ve'e un. <sup>49</sup> Ti yívi ka chunso'o jnu'un ka'an ri, ti tu ka jandatu i, yívi un kuu i nanu iin chaa ni sa'a ve'e da, ko tu ni skee kunu da yuu ja kundiso nama ve'e un. Ti ñuu ni ja'a iin sau xaan ti ni ndaa nducha, ti ni nduva ve'e un kua'an, ti ni naa ii —ni kachi Jesúsi.

*Sa'a Jesúsi tajna iin muzu capitán romano  
(Mt. 8.5-13)*

**7**

<sup>1</sup> Nu ni ndi'i ni ka'an Jesúsi nuu yívi un, ti kua'an ya ichi ñuu Capernaum. <sup>2</sup> Ti yukan kande iin chaa kuu capitán, ja kuu chaa yinda'a iin ciento soldado, ja ka yi'i i jiin ejército ñuu Roma. Ñava'a da iin muzu junukuachi nuu da, ti kunda'u xaan ini da chaa un. Ni ki'in kue'e maa da ja kuni kuu da. <sup>3</sup> Ti nu ni jiniso'o da jnu'un Jesúsi, ti ni taji da uu chaa ka kuña'nú Israel, ja na ki'in kanda'u da jiin Jesúsi, ja na kin sa'a ya tajna chaa junukuachi nuu da un. <sup>4</sup> Ni ka tu'va da nuu Jesúsi, ti ni ka kanda'u xaan tonto da sia'an:

—Kuni capitán un ja na chindee ni da, ti va'a ga ja na sa'a ni, <sup>5</sup> chi mani da jiin yívi ñuu na. Ti maa da ni ta'u jniñu ja ni kuu veñu'un na naa na —ni kachi da.

<sup>6</sup> Yukan na ti kua'an Jesúsi jiin da naa da. Ko nu kuan kuyajni ya ve'e capitán un, ti chaa un ni taji da uu amigo da ja na kachi da nuu Jesúsi sia'an:

—Jito'yo, kuña'nú ga ni ja kuu saña, ti tu iin nuu na jiin ni. Ja yukan kuu ja tu kuni na ja kivi ni ve'e na. <sup>7</sup> Ja yukan kuu ja tu ni kuni na ja jaa maa na ja nanduku na ni'in. Chi so kuni na ja na ta'u ni jniñu ti na nduva'a muzu na. <sup>8</sup> Chi saña suni iyo iin chaa kuña'nú ta'u jniñu nuu na, ti suni maa na ñava'a na soldado na. Ti kachi na jiin iin da “kua'an”, ti ki'in da. Ti kachi na jiin iinga “ña'an ja'a”, ti kii da. Ti ta'u na jniñu nuu muzu ja na sa'a i jniñu un, ti sa'a i —ni kachi da.

<sup>9</sup> Nu ni jiniso'o Jesúsi jnu'un un, so ni naa ini ya. Ti ni ndeokoto ya nuu yívi kua'a kuankoyo jiin ya un, ti ni kachi ya:

—Jandaa na kachi ri nuu ra naa ra ja ni tu'u ñuu Israel tu iyo ni iin yívi kandixia da ru'u nanu ni kandixia chaa ja'a —ni kachi Jesúsi.

<sup>10</sup> Nu ni ka najakoyo chaa ni taji da un ve'e, ti ni ka jini da ja, ja ni nduva'a chaa ku'u un.

*Ni naxndoto Jesúsi se'e yíi iin ña'an ni kendo maa iin*

<sup>11</sup> Nu ni ya'a un, ti kua'an Jesúsi iin ñuu nani Naín. Suni kuankoyo ndaja'a ya jiin kua'a xaan ga yívi. <sup>12</sup> Ti nu kuan kuyajni ya ñuu un, ti ni jini ya kuankoyo yívi kuan chunduji i iin ndiyi, ti maa iin ni ndiyi yukan ni kuu se'e yíi iin ña'an ni kendo maa iin. <sup>13</sup> Nu ni jini Jesúsi nuu ña'an un, ti ni kunda'u ini ya maa ña, ti ni kachi ya jiin ña:

—Koto nde'e ra —ni kachi ya.

<sup>14</sup> Yukan ti ni tu'va Jesúsi, ti ni ke'e ya jajnu ndiyi un, ti ni ka jankuñi chaa ka ndiso jajnu un, ti ni kachi ya jiin ndiyi un:

—Chaa lulu, na kachi ri jiin ra: ¡Ndokoo! —ni kachi ya.

<sup>15</sup> Yukan ti ni ndoko chaa lulu ja ja ni ji'i un, ti ni keja'a da ka'an da, ti ni nakua'a Jesú斯 maa da nuu nana da. <sup>16</sup> Nu ni ka jini yivi un, ti ni ka yu'u xaan i, ti ni ka keja'a ka nakanajaa i Yandios sia'an:

—Ni kenda iin profeta kuña'nú nuu kanchuku yo naa yo vijna —ni ka kachi i.

Suni ni ka kachi i sia'an:

—Ni chaa Yandios ja vee chindee ya ñuu ya —kachi i naa i.

<sup>17</sup> Yukan ti ni jichanuu jnu'un jniñu ni sa'a Jesú斯 ni ñuu Judea jiin taka ga ñuu ka'iin yajni un.

### *Chaa ni taji Juan, chaa ni skuanducha*

(Mt. 11.2-19)

<sup>18</sup> Yukan ti chaa ni ka kuu ndaja'a Juan, ni ka jani da jnu'un nuu da siki taka jniñu sa'a Jesú斯. <sup>19</sup> Ti ni taji da uu ndaja'a da un ja na kinkoyo da nuu kande Jesú斯, ja na kajnu'un da ya nu maa ya kuu Cristo ja kii un, xi kundatu da inga, ni kachi da. <sup>20</sup> Ni jakoyo chaa un nuu kande Jesú斯, ti ni ka jikajnu'un da ya:

—Juan, chaa skuanducha un, ni taji da saña naa na nava na kajnu'un na ja nu maa ni kuu Cristo ja ni chisojnu'un Yandios ja kii un. ¿Xi kundatu yo inga? —ni ka kachi da.

<sup>21</sup> Ti hora ni jakoyo chaa un, ni kuu ja sa'a Jesú斯 jniñu ña'nú kenchaa ya taka nuu kue'e ka jna'an yivi un, ti keni'in ya tachi xaan, jiin ja ka ndundijin nduchi tijni yivi kuaa un. <sup>22</sup> Ti ni kachi Jesú斯 jiin chaa ni taji Juan:

—Kuankoyo naa ra ti kani jnu'un nuu Juan naa ra siki taka ja ni ka jini ra jiin taka jnu'un ni ka jiniso'o ra ja'a naa ra. Kachi nuu da ja yivi kuaa un ka ndundijin nduchi i, jiin yivi tikuku un ja ka jika i, jiin suni ka ndundoo chaa ka jna'an kue'e ndi'yí te'yu un, jiin yivi so'o un ka ndundijin so'o i jiin ja ka nandoto ndiyí un naa i, jiin ja kuu nuu yivi nda'u ka'an ri jnu'un Yandios ja nasa nanita'u i. <sup>23</sup> Ti kachi jiin da ja kandichi Yandios jiin yivi, ti tu yu'u i kundikun i ru'u vasu na kondo'o koo nene i ja siki ru'u —kachi ya.

<sup>24</sup> Nu ni ka ya'a chaa ni taji Juan un kuankoyo da, ti ni keja'a Jesú斯 ka'an ya jiin yivi un siki naa chaa kuu Juan, ti ni jikajnu'un ya:

—Na ni ka jande'e ra undi nuu ñu'un te'e un, ¿Ndo'o ka ndo'o ini ra ja sa'a chaa un? Ti tu ni ka jini ra iin chaa nanu iin yoko icha ja kanda sa'a tachi un, ti chaa un tu ni sama nuu da jnu'un ka'an da, chi iin ni jnu'un ni ka'an da. <sup>25</sup> Ti nu ni ka jande'e ra yukan, ¿xi ni ka jini ra ja ñu'un da sa'ma va'a nu? Va tuu, chi na kachi ri ja yivi ka ñu'un sa'ma fino kanchuku da ini ve'e chaa ka kuu rey. <sup>26</sup> ¿Ti ndoo ni ka jande'e ra nusa? ¿Xi ka jani ini ra ja maa da kuu profeta ja ka'an jnu'un Yandios nu? Ti jandaa ndixia kuu ja chaa un, kuu da iin profeta ja ka'an da jnu'un Yandios. <sup>27</sup> Juan ni kuu chaa ka'an nuu tutu Yandios nuu kachi sia'an:

Na taji ri tajnu ri ja na koxnuu da jaa da.

Ti na satu'va da yivi naa i sa ki'in ra.

Ni kachi Yandios, kachi tutu.

<sup>28</sup> Jandaa na kachi ri ja tukaa ga ni iin yivi nanu Juan ja kuña'nú ga ja kuu Juan chaa skuanducha un. Ko yivi ja, ja ni ka janta'u jnu'un siki nasa ta'u Yandios jniñu, vasu tu ka ndiso ni iin jniñu nanu Juan, ko kuni ga yivi un jniñu ña'nú ga ja sa'a ya ansu maa da —ni kachi Jesú斯.

<sup>29</sup> Chaa ka kinya'u puesto jiin kua'a ga yivi un, ni ka kuu yivi ni skuanducha Juan. Ja yukan kuu ja ni ka janta'u i jnu'un ni ka'an Jesú斯, ti ni ka ja'a i jandaa ja mani jnu'un Yandios ni kuu ja ni ka'an Jesú斯, chi vanuxia ni ka janducha

i nuu Juan ja siki ja ni ka nakani ini i nuu kuachi i. <sup>30</sup> Ko chaa fariseo un jiin taka chaa ka xna'an ley, tu ni ka janta'u da jnu'un Yandios ni ka'an Jesús, chi vanuxia tu ni ka janta'u da jnu'un ni ka'an Juan ni tu ni ka janducha da naa da. Ni ka skexiko da nava kuni sa'a Yandios jiin da.

<sup>31</sup> Ti Jesús ni ka'an tuku ya, ti ni kachi ya:

—Ja'a na kachi ri jiin nau ja skejna'an ri yivi kanchuku kivi vijnna. <sup>32</sup> Chi yivi ka iyo vijnna ka kuu i nanu suchi kuachi ñu ni ka nukoo i nuu ya'u ti ka yisiki i, ti ka kana xini jna'an i: “Ka tivi yo xkili, ko tu ni ka jitaja'a i. Ti kuaka xaan ni ka jita yo iin yaa, ko tu ni ka nde'e i”, ni ka kachi i. <sup>33</sup> Suni sia'an kivi vijnna, chi ni kii Juan, chaa ni skuanducha un, ni kuncha da. Tu ni ji'i da ndixi, ti iyo nasa xndondicha da ini da. Ti ro'o ni ka ka'an ra ja ni yi'i da jiin iin tachi xaan.

<sup>34</sup> Yukan na ti ni chaa tu ru'u, maa Se'e Yivi Ñuyivi ja tu iyo nasa xndondicha ri ini ri, ti ji'i ri. Ko ka chakuachi ra ru'u ja yaji xaan ri, ti ji'i xaan ri vino, ti kejna'an ri jiin chaa ka kinya'u nuu puesto jiin taka ga yivi ka sa'a kuachi.

<sup>35</sup> Nusa ti tu ni ka kandixia ra jniñu ni sa'a Juan, ni tu ka kandixia ra jniñu ni sa'a ru'u. Ko tundo sa'a, chi yivi tu'va ka jini i ja iyo va'a sava'ni ga jniñu ni tatu Yandios nuu ri jiin Juan —ni kachi ya.

### *Ni ja'an Jesús ve'e iin chaa fariseo nani Simón*

<sup>36</sup> Yukan ti iin chaa fariseo ni kana Jesús ja kusama da jiin ya. Ni jaa ya ve'e da, ti ni nukoo ya nuu mesa. <sup>37</sup> Ti ñuu yukan iyo iin ña'an sií ini. Ni ni'in ña jnu'un ja kua'an Jesús ve'e Simón kuan kusama ya, ti yukan ni jaa ña jiin iin tindo'o lulu alabastro ja ñu'un chitu aceite perfume. <sup>38</sup> Ni nukoo ña nuu ja'a Jesús, nde'e ña, ti ni xndají ña ja'a ya jiin nducha nuu ña, ti ni nasichi ña jiin ixi xini ña. Yukan ti ni teyu'u ña ja'a ya, ti ni skuchi ña jiin aceite perfume un. <sup>39</sup> Nu ni jini chaa fariseo, chaa ni kana Jesús yukan, ti ni keja'a ndo'o ini da: “Nu sia'an ti ndixia chaa ja'a ja kuu da iin profeta, ti va kuni da naa ña'an kuu ña, chi kuu ña iin ña'an sií ini”, ni ndo'o ini da. <sup>40</sup> Yukan ti ni kachi Jesús jiin chaa fariseo un:

—Simón, iyo iin jnu'un kuni ka'an ri jiin ra —kachi ya.

Ti ni kachi chaa fariseo un:

—Kachi ni maestro —ni kachi da.

<sup>41</sup> Yukan ti ni kachi Jesús:

—Na kani ri iin jnu'un. Ni ka iyo uu chaa ka tau xu'un nuu iin chaa ja'a nuu xu'un. Ìn da tau u'un ciento xu'un plata, ti inga da tau sava ciento. <sup>42</sup> Ko ndinduu chaa un tu ka ni'in da ja chunaa da un. Yukan na ti chaa ni ja'a nuu un ni janka'nu ini da nuu ndinduu chaa un. Sia'an ni kuu jnu'un. Vijnna ti kachi nuu ri, ¿Nau iin iin chaa un kunda'u ga ini chaa ni ja'a nuu xu'un un nusa? —ni kachi ya.

<sup>43</sup> Ti ni kachi Simón:

—Ja ndo'o ini na va chaa ni tau kua'a ga nuu da un —ni kachi da.

Ti ni kachi Jesús:

—Jandaa kuu un —ni kachi ya.

<sup>44</sup> Yukan ti ni nde'e Jesús nuu ña'an un, ti ni kachi ya jiin Simón:

—Nde'e nuu ña'an ja'a. Ni kivi ri ve'e ra ko tu ni siuku ra jnu'un ra. Tu ni ja'a ra nducha ndundo ja'a ri. Ko ña'an ja'a ni xndají ña ja'a ri jiin nducha nuu ña, ti ni nasichi ña jiin ixi xini ña. <sup>45</sup> Tu ni teyu'u ra ru'u ja kanxia'u ra jiin ri, ko ña'an ja'a, undi ni kivi ri ni keja'a ña teyu'u ña ja'a ri. <sup>46</sup> Tu ni chu'un ra aceite perfume xini ri, ko ña'an ja'a, chi ni skuchi ña ja'a ri jiin aceite perfume. <sup>47</sup> Ja'a ti na kachi ri nuu ra ja nde'e mani xaan ña ru'u ja na kuanká'nu ini ri nuu taku kuachi ni sa'a ña. Ko iin yivi ja tu stuu i maa i ja

mani i jiin ri va tu nakani ini i ja iyo kua'a kuachi siki i, ni tu nduku i jnu'un ka'nu ini nuu ri ja na kenchaa kuachi i —ni kachi Jesús jiin Simón.

<sup>48</sup> Yukan ti ni kachi ya jiin ña'an un:

—Ja ni janka'nu ini ri nuu kuachi ra —ni kachi ya.

<sup>49</sup> Yukan na ti yivi ni ka jakoyo kanchuku jiin ya yukan, ni ka keja'a ka ndajnu'un naa:

—¿Naa chaa kuu chaa ja'a ja janka'nu ini da nuu kuachi un? —kachi naa.

<sup>50</sup> Ko maa Jesús ni kachi ya jiin ña'an un:

—Ja ni keta'u ra, chi ni kandixia ra ru'u. Na kukuee ki'in ra vijna —ni kachi Jesús.

### *Ña'an ni ka chindee Jesús*

## 8

<sup>1</sup> Yukan, ti ni keja'a Jesús jikonuu ya taka ñuu jiin taka rancho, ti xndaku ya nasa kivi yivi nda'a Yandios ti ta'u ya jniñu nuu i. Ka jikonuu ndi uxi uu ndaja'a ya jiin ya. <sup>2</sup> Ti suni ka jikonuu tijni ñasi'i ni sa'a ya tajna ja ni kenchaa ya tachi xaan ni ka jna'an ña jiin tijni nuu ga kue'e ni ka jna'an ña naa ña. Ti yukan ni ka'iin María, ja suni nani ña Magdalena, ña'an ni keni'in ya uxia tachi xaan. <sup>3</sup> Suni kua'an Juana ñasi'i Chuza, chaa ni ta'u jniñu nuu muzu Herodes chaa ni kuña'nu un. Suni Susana jiin tijni ga ña'an ni ka chindee ya jiin ja ka ñava'a ña.

#### *Jnu'un ñin chaa saka triu*

(Mt. 13.1-9; Mr. 4.1-9)

<sup>4</sup> Kua'a xaan yivi uu ga ñuu ni ka jakoyo nuu kande Jesús, ti nu ni ka taka kua'a ga yivi un, ti ni keja'a Jesús xna'an ya nuu yivi un sia'an, ti ni kachi ya:

<sup>5</sup> —En chaa jitu triu ni kenda da kuan saka da triu. Ti nuu kua'an da jacha da triu un, sava triu un ni ka nukoyo ini ichi, ni ka jañu ni'nu yivi, ti ni ka chakoyo saa un naa ti, ti ni ka nastutu ti. <sup>6</sup> Sava ga triu un ni ka jinu ma'ñu yuu, ti ni jinu triu un, ko nu ni na'ichi ñu'un, ti ni ka ichi. <sup>7</sup> Sava ga triu un ni ka jinu nuu yi'i yo'o nu'iñu. Ti nu ni kaña numa nu'iñu un, ti ni ka jasi i nuu triu un. <sup>8</sup> Ko sava ga triu un ni ka jinu i nuu yi'i ñu'un va'a, ti ni kaña triu un ti ni ja'nú, ti va'a xaan ni kuu. Ni ka nakua'a undi ñin ciento triu nuu ñin triu tata —ni kachi ya.

Yukan na ti jaa xaan ni ka'an Jesús sia'an:

—Nau ro'o na chunso'o, ti nakani ini nasa kuni ka'an jnu'un un —kachi ya.

#### *Na kachi Jesús nasa kuni ka'an jnu'un ni ka'an ya un*

(Mt. 13.10-17; Mr. 4.10-12)

<sup>9</sup> Yukan na ti ni ka jikajnu'un taka chaa ja skua'a jiin Jesús nasa kuni ka'an jnu'un ni xndaku ya un, <sup>10</sup> ti ni kachi ya:

—Ja kuu ro'o naa ra chi xna'an kaji Yandios nuu ra nasa ta'u ya jniñu, ko yivi tu kandixia, na xndaku ri nuu i jiin jnu'un un. Chi vasu ñuso'o i jnu'un ka'an ri, ti nde'e i jniñu sa'a ri, ko jini ri ja tu kuití kuni i chaku ini nasa ta'u ya jniñu. Chi vasu ka ñuso'o i jnu'un ka'an ri, ti nde'e i jniñu sa'a ri, ko tu chaku ini i —ni kachi ya.

#### *Xndaku Jesús nasa kuni ka'an jnu'un chaa saka triu un*

(Mt. 13.18-23; Mr. 4.13-20)

<sup>11</sup> Siin Jesús xndaku ya, ti ni kachi ya:

—Sia'an kuni ka'an jnu'un un. Sa'a yo nanu ja triu un kuu jnu'un Yandios.

<sup>12</sup> Ti yivi un kuu triu ja ni jinu ichi un, chi chunso'o i jnu'un Yandios, ko nu ni chaa ja'u un, ti xnda'u da ja tu kandixia i, ti nava tu keta'u i. <sup>13</sup> Ti triu ni

jinu nuu yuu yukan kuu nanu yivi ni ka jiniso'o jnu'un ka'an ri, ni ka janta'u i, ti ka kusii ini i jiin. Ko vanuxia ja changa ga kuñii ini i jiin jnu'un un, ti nu ni ka keja'a ka jito u'u yivi i ja siki jnu'un un, ti ka nakani ini i, ti tukaa ga ka kandixia i. <sup>14</sup> Ti triu ni ka jinu nuu yi'i yo'o nu'iñu kuu nanu yivi ni ka chunso'o jnu'un un, ko ka ndi'i ga ini i ja kuu takaa ga ja iyo nuu ñuyivi ja'a, ja na kuu riku i. Ti yukan kuu ja jasi ja tu ka siin jiin jnu'un Yandios, chi tukaa kuni kuandatu i nuu jnu'un ya. <sup>15</sup> Ko triu ni ka jinu nuu ñu'un va'a un kuu nanu yivi ka chunso'o nii ini i jnu'un Yandios, ti ka chaku ini i nasa kuu jnu'un un, ti ka siuku i jiin. Yivi un ka kuu nanu triu ni ka nakua'a undi in ciento triu nuu in triu tata —ni kachi Jesús.

*Jnu'un in yiti  
(Mr. 4:21-25)*

<sup>16</sup> Siin Jesús xndaku ya, ti ni kachi ya.

—Yivi yinda'a in yiti, tu skuikun i ti kasii nuu, ni tu kani yi chii jito. Chi su'va chuxndee i yiti un nuu sukun, ti nava na kundijin nuu yivi ka jakoyo un. <sup>17</sup> Suni sia'an kuu jiin jniñu kua'a ri nuu ra naa ra, chi vijnan ñu'n i jaku ni yivi ka jini, ko jaa in kivi nu kua'a yivi kuni ndijin. <sup>18</sup> Yukan ti na chunso'o va'a i jnu'un ka'an ri, chi siki yivi ja kandixia jnu'un ri, ti vi'i ga ni'in jna'an i inijnuni i ja kunukuuchi i nuu ya. Ko yivi ja tu kandixia, ti vi'i ga kendo i, ti tu chindee Yandios maa i. Chi su'va naa ini i jnu'un ri —ni kachi Jesús.

*Nana Jesús jiin ñani ya  
(Mt. 12:46-50; Mr. 3:31-35)*

<sup>19</sup> Yukan ti ni jakoyo nana Jesús jiin ñani ya nuu kande ya, ti ka kuni ña ka'an ña jiin Jesús, ko tu kuu nasa kivikoyo ña nuu kande ya, chi kua'a xaan yivi ka'lín nuu ya. <sup>20</sup> Ni ja'an in chaa ni jan kasjnu'un nuu ya, ti kachi da:

—Nana ni jiin ñani ni ka'lín da fuera, ti ka kuni ka'an da jiin ni —ni kachi da.

<sup>21</sup> Ti ni kachi ya jiin chaa un:

—Yivi ka chunso'o jnu'un Yandios ti ka jandatu i jnu'un un, yukan kuu nanu nana ri jiin ñani ri —ni kachi ya.

*Ni sa'a Jesús ja na jakuiñi tachi sau xaan nuu lago un  
(Mt. 8:23-27; Mr. 4:35-41)*

<sup>22</sup> In kivi ni kivi Jesús jiin ndaja'a ya ini in barco, ti ni kachi ya:

—Na cho'o inga yu'u mini un —ni kachi ya.

Yukan ti kuankoyo da. <sup>23</sup> Ko ni kuankoyo da nuu nducha un, ti ni kixi Jesús. Ichi kuankoyo da ti ni ndonda in tachi sau xaan tonto nuu mini un ja kava nuu mani ga nducha un nuu barco un, ti kuni kee ka'nu ki'in. <sup>24</sup> Ti ni ka xndoto ndaja'a un ya, ti ni ka kachi da:

—¡Maestro! ¡Maestro! Ka kuni keka'nú yo chii nducha —ni ka kachi da.

Yukan ti ni ndokuiñi ya ti ni ta'u ya jniñu nuu tachi sau xaan un jiin mini un, ti na'lín kuiti ni kuu. <sup>25</sup> Yukan ti ni kachi ya jiin ndaja'a ya:

—¿Ndoo ka jna'an ra naa ra nusa? ¿Ka jani ini ra ja tu kuu chindee Yandios ro'o naa ra nu? —ni kachi ya.

Ko maa da naa da, so ka naa ini da ja ni ka yu'u da, ti ni ka keja'a ka jikajnu'un jna'an da:

—¿Naa chaa kuu chaa ja'a ja undi tachi sau xaan un jiin mini un ka jandatu nuu da? —kachi da naa da.

*Chaa ni ka jna'an tachi xaan ñuu Gadara  
(Mt. 8:28-34; Mr. 5:1-20)*

<sup>26</sup> Yukan sa ni ka jakoyo da nuu ñu'un ñuu Gadara ja kande inga yu'u mini Galilea. <sup>27</sup> Nu ni kee Jesús ini barco un, ti ni tu'va in chaa ñuu un nuu ya. Ti

ja ni kuu na'an xaan ja jna'an chaa un tachi xaan un. Tu ū'un da sa'ma, ni tu nchaa da ve'e, chi mani siki kava nuu ka ūnduji ndiyi un nchaa da. <sup>28</sup> Nu ni jini da nuu Jesús, ti ni nduva da nuu ja'a ya, ti ni kanajiin da sia'an:

—¿Ndoo kivi nduu ni jiin na, ni'in Jesús, Se'e Yandios kancha andivi? Jikanta'u na nuu ni ja tu kua'a ni nundo'o saña! —ni kachi da.

<sup>29</sup> Sia'an ni kanajiin da, chi Jesús ja ni ta'u ya jniñu nuu tachi xaan ja na xndoo maa da. Tijni jinu jniñi tachi xaan un maa da, ti vasu ka ju'ni yivi nda'a da jin siñiñi da ja na kunu'ni da, ko kundee da ja'ncha da, ti kua'an tachi xaan un jinji da undi yuku te'e un. <sup>30</sup> Ni jikajnu'un Jesús maa da:

—¿Nasa nani ra? —ni kachi ya.

Ti ni kachi da:

—Nani na Legión —ni kachi da.

Sia'an ni ka'an da chi Legión kuni ka'an ja ka iyo kua'a xaan soldado, ti kua'a xaan tachi un jna'an da. <sup>31</sup> Ti tachi un ni ka kanda'u jin Jesús ja tu taji ya kinkoyo ini xnduchi kunu un nuu koto nundo'o. <sup>32</sup> Ti yuku un ka'iin kua'a xaan kini ka nduku ti ja kaji ti, ti ni ka kanda'u tachi un jin Jesús ja na kua'a ya jnu'un ja na kinkoyo jin ti, ti Jesús ni ja'a ya jnu'un. <sup>33</sup> Yukant ti ni ka xndoo tachi xaan un chaa un, ti ni ka kekoyo kua'an, ti ni ka jankuncha jna'an jin kini un. Yukant ti ndiñi ti ni ka ja'a ti corri, ni ka nukoyo ti xa'va, ti ni ka kivi ti nuu nducha mini un, ti ni ka kanchaa ti nducha un, ti ni ka ji'i ti.

<sup>34</sup> Nu ni ka jini chaa ka ndito kini un ja sia'an ni ka jna'an kini da, ni ka yu'u xaan da. Ti ni ka ja'a da corri ni ka jan kasjnu'un da nuu yivi ūuu jin tako yivi rancho. <sup>35</sup> Yukant ti ni ka kee yivi ūuu un ni ka jande'e i ja ni kuu un. Nu ni ka jakoyo yivi un nuu kande Jesús, ti ni ka jini i chaa ni jna'an tachi xaan un nukoo da nuu ja'a Jesús, ja ni nduva'a da ti ja ū'un da sa'ma da. Ti nu ni ka jini yivi un ni ka yu'u xaan i. <sup>36</sup> Ti uu ga yivi ni ka jini i jniñu ña'nú ni sa'a Jesús ni ka jani i jnu'un nasa ni nduva'a chaa ni jna'an tachi xaan un. <sup>37</sup> Ko ja siki jniñu ña'nú un ni ka yu'u xaan tendiñi yivi ūuu Gadara un, ti ni ka ka'an da jin ya ja na kee ya na ki'in ya ūuu da un naa da. Yukant na ti ni ndiví Jesús barco ti kua'an ya. <sup>38</sup> Ko chaa ni jna'an tachi xaan un, na ti ki'in ga Jesús ni ka'an nda'u da jin Jesús ja kuni da ki'in da jin ya. Ko maa ya ni kachi jin da ja na kendo da, ti ni kachi ya:

<sup>39</sup> —Kuano'on ve'e ra, ti kani ra jnu'un taka ja ni sa'a Yandios jin ra —ni kachi ya.

Yukan na ti kua'an chaa un, ti ni jani da jnu'un ni ūuu nava ni sa'a Jesús jin da.

*Se'e siñi Jairo jin ña'an ni kue'e sa'ma Jesús  
(Mt. 9.18-26; Mr. 5.21-43)*

<sup>40</sup> Nu ni naya'a tuku Jesús īnga yu'u nducha un, ti ni ka kusii ini yivi ja ni nchaa tuku ya, chi ka ndatu i ya. <sup>41</sup> Ti yukan ni jaa īñi chaa nani Jairo, chaa yinda'a īñi veñu'un Israel un. Ni jakunjiti da nuu ja'a Jesús, ti ni kanda'u da jin ya ja na ki'in ya ve'e da, <sup>42</sup> chi kuni kuu se'e siñi da, ti ma īñi xini i, ko ja īñi i uxí uu kuiya.

Ti kua'an Jesús jin da. Ko kuankoyo kua'a xaan yivi jin ya ja undi ka jaxin jna'an yivi un naa i. <sup>43</sup> Ti ma'ñu yivi un kua'an īñi ūñi jna'an kue'e niñi xaan tonto ja ni ndo'o ña jin kue'e un uxí uu kuiya. <sup>44</sup> Ni tu'va ña ichi jata Jesús, ti ni ke'e ña siki sa'ma ya. Ti hora ni ni jakuiñi niñi un. <sup>45</sup> Yukant ti ni jikajnu'un Jesús yivi un:

—¿Nau ja ni kue'e ru'u? —ni kachi ya.

Ti tendi'i yivi un ka ka'an ja tuu. Ti Pedro jiin uu ga ndaja'a un ni ka kachi da jiin Jesús:

—Maestro, yivi kuankoyo ja'a ka jaxin jna'an i, ti ka chinda'a jna'an i, ti jikajnu'un ni ja nau ja ni chinda'a ní'in —ni ka kachi da.

<sup>46</sup> Yukan ti ni kachi Jesús:

—Iyo iin yivi ni ke'e ru'u, chi ni jini ri ja jiin jniñu ndiso ri ni sa'a ri tajna iin yivi —ni kachi ya.

<sup>47</sup> Nu ni jini ña'an un ja ni jini Jesús ja ni ke'e ña ya, ti undi ní'in ña ni tu'va ña, ti ni jakunjiti ña nuu ya. Ti nuu chitu un ni kachi ña ndoo ni kuu ja ni ke'e ña sa'ma ya, ti ni nduva'a ña nuu ni kue'e ña sa'ma ya. <sup>48</sup> Yukan ti ni kachi Jesús jiin ña:

—Ndee sa'nii ra hija. Ja ni nduva'a ra chi ni kandixia ra ru'u ja kuu sa'a ri tajna maa ra. Ti na kukuee ki'in ra vijna —ni kachi ya.

<sup>49</sup> Ti ka'an Jesús sia'an, ti ni jaa iin chaa kande ve'e Jairo, ti ni kachi da jiin Jairo:

—Ja ni ji'i se'e si'i ni. Tukaa ndoo sa'a ni ja ki'in ni jiin maestro —kachi da.

<sup>50</sup> Ti Jesús ni jiniso'o ya ja sia'an ni ka ka'an da jiin Jairo. Ko tu ni ki'in ya jnu'un, ti ni kachi ya jiin Jairo:

—Koto yu'u ra, so kuni ri ja na kandixia ra ti nava na nduva'a se'e si'i ra —ni kachi ya.

<sup>51</sup> Nu ni jaa ya ve'e Jairo, ti tu ni ja'a ya jnu'un kivikoyo yivi jiin ya, chi nini Pedro, Jacobo jiin Juan, jiin tata suchi lulu un, jiin nana i ni ka kivi jiin ya.

<sup>52</sup> Ti tendi'i da ka nde'e ja ka na'nu ini da suchi lulu un, ko ni kachi Jesús:

—Tu nde'e ra naa ra, chi tu ni ji'i suchi lulu ja'a, chi so kixi i —ni kachi ya.

<sup>53</sup> Ti yivi ka'iin un so ni ka jaku i ja sia'an ni ka'an Jesús, chi ja ni ka jini da ja ni ji'i suchi lulu un. <sup>54</sup> Ti maa Jesús ni jniñu ya nda'a suchi lulu un, ti jaa xaan ni ka'an ya sia'an:

—Suchi lulu, ndoko! —ni kachi ya.

<sup>55</sup> Ti hora ni, ni nandoto suchi lulu un, ti ni ndoko i. Ti ni ta'u Jesús jniñu nuu nana i ja na kua'a ña ja kají i. <sup>56</sup> So ni ka naa ini tata i. Ko maa Jesús ni ta'u ya jniñu ja tu kani da jnu'un ja sia'an jniñu ni sa'a ya.

### *Taji Jesús ndaja'a ya ja na ka'an da jnu'un Yandios (Mt. 10.5-15; Mr. 6.7-13)*

## 9

<sup>1</sup> Ni nastutu Jesús ndi uxi uu ndaja'a ya, ti ni ja'a ya jniñu ña'nu nuu da naa da ja na kuu keni'in da taka nuu tachi xaan, ti suni na sa'a da tajna yivi ka jna'an taka nuu kue'e. <sup>2</sup> Ni taji ya da ja na xna'an da jnu'un Yandios siki ja nasa kuu kivi i nda'a ya ja na ta'u ya jniñu nuu i. Ti ni ja'a ya jniñu ja na kenchaa da kue'e naa da. <sup>3</sup> Ti ni kachi ya jiin da naa da:

—Tundo kunda'a ra naa ra ja kuu ichi, ni iin yujnu xii, ni ñunu staa, ti ni xu'un. Ti suni iin ni su'nu kuu ja kunda'a ra naa ra, tu kunda'a ra uu. <sup>4</sup> Nu ni ka jakoyo ra iin ve'e, kendo un naa ra undi nu kuankoyo ra inga ñuu. <sup>5</sup> Ti taka yivi ja tu ka ja'a ve'e, ni tu ka chunso'o jnu'un Yandios ka ka'an ra, kekoyo ve'e un jin ñuu i. Ti nu ni kekoyo ra, ti kisi tikacha ini ndijña ra naa ra, na kuu iin seña ja tu ni ka kandixia jnu'un ni ka ka'an ra nuu yivi yukan —ni kachi Jesús.

<sup>6</sup> Ni kekoyo ndaja'a un, ti ni ka jikonuu da taka ñuu ka xna'an da jnu'un Yandios, ti ka sa'a da tajna yivi naa i.

### *Ni ji'i Juan, chaa ni skuanducha (Mt. 14.1-12; Mr. 6.14-29)*

<sup>7</sup> Ti kuiya un kuu Herodes gobernador nuu ñuu un, ti ni ni'in da jnu'un taka jniñu sa'a Jesús, ko tu kojnuni ini da siki jniñu ña'nu sa'a Jesús, chi sava yivi un ka ka'an ja Juan kuu, chi ja ni nandoto da ma'ñu ndiyi. <sup>8</sup> Sava ga ka ka'an ja ni ndenda profeta Elías ja ni kii na jana'an, ti sava i ka ka'an ja inga profeta ni kii na jana'an ni nandoto ma'ñu ndiyi. <sup>9</sup> Ti ni kachi Herodes:

—Ko maa ri ni ta'u jniñu ja na ka'ncha da xini Juan, ti ¿naa chaa kuu ja ka'an yivi ja sa'a taka nuu jniñu ña'nu un nusa? —ni kachi da.

Ti ndiyo imi Herodes ja na kuni da nuu Jesús.

*Ni skaji Jesús vi'i ga u'un mil yivi naa i  
(Mt. 14.13-21; Mr. 6.30-44; Jn. 6.1-14)*

<sup>10</sup> Yukan ti ni ka nandeokuñi ndi uxi uu ndaja'a Jesús, ja ka nani apóstol, undi ñuu nuu ja ni ka ja'an da ni taji ya da naa da. Ti vijna ja ka nani da apóstol, chi ni ka kuu da chaa ni nakaji Jesús ja kuijin da jiin ya. Ti ni ka nakani da jnu'un nuu Jesús taka jniñu ni ka sa'a da. Yukan ti ni yinda'a Jesús maa da kuankoyo siin da iin ñu'un te'e ja kande yajni ñuu Betsaida. <sup>11</sup> Ko ni ka jini yivi taka nuu kua'an ya, ti ni ka chindikun i kuankoyo i. Ti Jesús ni janta'u ya maa i naa i. Ti ni xna'an ya jnu'un Yandios sik'i nasa kuu kivi i nda'a ya, ja na ta'u ya jniñu nuu i naa i. Ti suni ni sa'a ya tajna yivi ka ku'u. <sup>12</sup> Ko vanuxia ja kuan kuñaa, ti ni ka tu'va ndi uxi uu ndaja'a un nuu Jesús, ti ni ka kachi da:

—Ka'an ni jiin yivi ja na kii'ndetatu i naa i, ti na nduku i ja kaji i taka rancho jiin ñuu ka'iin yajni, chi tundo iyo nuu ka'iin yo ja'a —ni ka kachi da naa da.

<sup>13</sup> Ti ni kachi Jesús jiin da naa da.

—Kua'a maa ra ja kaji i naa ra —ni kachi ya.

Ti ni ka kachi da naa da:

—Ko tukaa ga ndoo ka yinda'a na, chi u'un ni ga staa stila jiin uu cháká ni ga ka yinda'a na. Ti nanu kuan na ja kaji yivi kua'a ja'a naa i nusa? —ni ka kachi da.

<sup>14</sup> Ti iyo yajni u'un mil chaa ni ka'iin un. Ti ni kachi Jesús jiin ndaja'a ya:

—Kachi jiin yivi ja na nukoo yukun i sava ciento naa i —ni kachi ya.

<sup>15</sup> Sia'an ni kachi ndaja'a ya nuu yivi un, ti ni ka nukoo i nuu icha un.

<sup>16</sup> Yukan na ti ni jnii Jesús ndi u'un staa stila un jiin uu cháká un ini nda'a ya. Ni ndakoto ya andivi, ti ni nakuanta'u ya nuu Yandios. Ni sakuachi ya, ti ni ja'a ya nuu ndaja'a ya ja na tejna'an da nuu yivi un naa i. <sup>17</sup> Tendi'l'i yivi un ni ka yee i nasa ni kundee maa i. Nu ni kuu ni ka yee i, ti ni ka nastutu da uxi uu chika jiin pedazu ni kendoso un.

*Kachi ndaa Pedro ja Jesús kuu Cristo  
(Mt. 16.13-19; Mr. 8.27-29)*

<sup>18</sup> In kivi kancha siin Jesús jikanta'u ya nuu Yandios, ti ka'iin yajni ndaja'a ya jiin ya. Yukan ti ni jikajnu'un ya da naa da sia'an:

—¿Nau ja ka ka'an yivi ja kuu ri? —ni kachi ya.

<sup>19</sup> Ti ni ka kachi da naa da:

—Sava yivi ka ka'an ja kuu ni Juan ja ni skuanducha un. Sava ga ka ka'an ja maa ni kuu profeta Elías, ja ni kii na jana'an. Ti sava ga ka ka'an ja kuu ni inga profeta jana'an, ja ni nandoto ma'ñu ndiyi —ni ka kachi da naa da.

<sup>20</sup> Yukan ti ni jikajnu'un ya da naa da:

—Ti ro'o naa ra, ¿nau ja ka ndo'o ini ra ja kuu ri? —ni kachi ya.

Ti ni kachi Pedro:

—Maa ni kuu Cristo, Se'e Yandios, ja ni taji ya ja ndiso ni jniñu ña'nu —ni kachi da.

*Iin kivi ni ka'an Jesús ja kuū ya*  
*(Mt. 16.20-28; Mr. 8.30-9:1)*

**21** Yukan na ti ni kachi Jesús jiin ndaja'a ya ja koto ma kani kuiti da jnu'un nuu yivi ja maa ya kuu Cristo, ja ni taji Yandios ja ndiso ya jniñu ña'nu.

**22** Ti ni kachi Jesús jiin da naa da:

—Ru'u, ja kuu ri maa Se'e Yivi Ñuyivi, kondo'o koo nene ri. Ti taka chaa ka kuña'nu nación Israel, jiin sutu ka kuña'nu, jiin takä chaa ka xna'an ley Israel ini veñu'un un, tu kuantal'a da ru'u. Chi su'va ka'ni da ru'u. Ko nu uni kivi ti nandoto ri ma'ñu ndiyi —ni kachi ya.

**23** Yukan na ti ni kachi ya jiin tendi'i yivi ni ka ndututu un:

—Nu nau yivi kuni kundikun ru'u, ja siuku i jnu'un ka'an ri, ti na xndoo i taka ja ka ndo'o ini i un, ti na tava ini i ja taka kivi na kondo'o koo nene i vasu na kuu i ja siki ru'u. **24** Chi yivi kandio ini ja kunchuku va'a i nuu ñuyivi ja'a ja tu kandixia i jnu'un ri, ti xnaa i maa i. Ko yivi na koo ndo'o koo nene i ja siki ru'u, ti su'va ni'in ta'u i ja kunchuku i nuu andivi ja kuu saa ni. **25** Chi tundo ni'l kuiti iin yivi, vasu na kundee i ni'in i taka ja iyo nuu ñuyivi ja'a, ti xnaa i añu i nuu Yandios. **26** Ko nu iin yivi kukanuu i ja siki ru'u, ja tu kuni ka'an i nuu inga yivi ja kandixia i ru'u, nusa ti ru'u, maa Se'e Yivi Ñuyivi, suni na kachi ri ja tu ka yi'i kuiti yivi un jiin ri. Sia'an kachi ri kivi nchaa ri tuku jiin taka ángel ndoo ja ka junukuachi nuu Yandios. Chi ja kuu kivi un kundiso ri jniñu ña'nu tatu Tata ri Yandios nuu ri naa ri. Yukan ti tu nakuni kuiti ri taka yivi ja tu ni kuni xna'an i ja kandixia i ru'u. **27** Ti ja siki kivi un, na kachi ri ja sava ro'o ja ka'iin ja'a kuchaku ra, ti kuni ra nchaa tuku ri jiin iin jniñu ña'nu xaan ga, ja iin ni ga jniñu ka ta'u ri jiin Yandios nuu tendi'i ja iyo —ni kachi ya.

*Ni nasama Yandios nuu Jesús*  
*(Mt. 17.1-8; Mr. 9.1-8)*

**28** Sia'an ni ka'an Jesús, nu ni ya'a yajni una kivi. Yukan ti ni ka ja'an ya jiin Pedro, Jacobo jiin Juan xini iin yuku, kuan kakanta'u ya. **29** Ni jikanta'u ya nuu Yandios, ni nasama nuu ya, ti sa'ma ya ni nduskuiyi xaan nanu iin nduva ndikandii. **30** Ti yukan ni ka jini da kaijin uu chaa ka ndajnu'un jiin ya. Ti iin chaa un ni kuu iin chaa ni kuña'nu nuu nación Israel na jana'an ni nani Moisés, ti inga chaa un ni kuu profeta ni nani Elías ja ni kii suni undi na jana'an. **31** Ti vii xaan ni nduu nuu kaijin da, ti ni ka ndajnu'un da ja ka'ní yivi Jesús nuu ñuu Jerusalén. **32** Ti Pedro jiin uu ga chaa un, vasu ka ji'i xaan da ma'na, ko ni ka ndoto nduchi da, ti ni ka nde'e da nuu kaijin Jesús jiin uu ga chaa un, ti ni ka nakuni da ja ni nduña'nu xaan Jesús. **33** Ti nu ni ka xndoo Moisés jiin Elías Jesús, ti ni kachi Pedro jiin ya:

—Maestro, xaan va'a ja ka'iin yo ja'a. Na sa'a yo uni ve'e kuachi kunchuku yo, iin kuu ni, inga na kuu Moisés, ti inga na kuu Elías —ni kachi da.

Ko vasu Pedro, tukaa jini da naa jnu'un ka'an da. **34** Ti ni ka'an ga da sia'an, ti ni jinu iin viko nu'un ja ni nasuku da naa da, ti yukan ni ka yu'u xaan da nu ni kasuku viko un da. **35** Ti nuu viko un ni ka'an iin ndusu sia'an:

—Ja'a kuu se'e ri ja kunda'u ini ri ti kusii ini ri jiin. Ti chunso'o jnu'un ka'an da —kachi.

**36** Nu ni ndi'i ni ka'an ndusu un, ti ni ka nde'e da ja maa iin ni ga Jesús kandichi. Yukan ti na'iin kuiti ni ka kuu da. Tu ni ka jani da jnu'un nuu ni iin yivi ja sia'an ni ka jini da un.

*Sa'a Jesús tajna iin chaa lulu ji'i yi'i*  
*(Mt. 17.14-21; Mr. 9.14-29)*

**37** Nu ni ka najinu da ja'a yuku un inga kivi, ti kua'a xaan yivi ni ka ja'an nujna'an Jesús. **38** Ti iin chaa un ni kana xini Jesús, ti jaa xaan ni kachi da:

—Maestro, kanda'u na jiin ni ja na kin nde'e ni se'e na, chi maa iin ni ja'a kuu see' na. **39** Iin tachi xaan un jni'i i, skanajiin i ti ja'n'i yi'i i, kaña ti'iñu yu'u i. Ja'a xaan nundo'o i, ti tu kuni sia maa i. **40** Ja ni kanda'u na jiin ndaja'a ni ja na kenchaa da ki'in, ko tu ni kuu sa'a da naa da —ni kachi da.

**41** Ti ni kachi Jesús nuu tendi'i yivi un:

—Xaan ga tu ka kandixia ra, jniñu sa'a Yandios. Xaan ga ni'in ini ra naa ra ja tu ka jandatu ra nuu Yandios. Nasa ga ndo'o nene ri ja siki ro'o naa ra. Chaan chaa lulu jña, na kii da naa ra —kachi Jesús.

**42** Ko nu kuan tu'va chaa lulu un nuu Jesús, ni skuiko tuku tachi xaan un maa da nuu ñu'un un, ti ja'n'i yi'i tuku maa da. Yukan ti ni nduxaan ni'in ya nuu tachi xaan un, ti ni nduva'a chaa lulu un. Ti ni nakua'a ya nuu tata da.

**43** Ti tendi'i yivi un ni ka naa ini i jiin jniñu ña'nú sa'a Yandios.

### *In kivi ni ka'an tuku Jesús ja kuū ya*

(Mt. 17.22-23; Mr. 9.30-32)

Ni ka naa ini yivi un jiin jniñu ña'nú ni sa'a Jesús, ti ni kachi ya jiin ndaja'a ya:

**44** —Chunso'o va'a jnu'un ja'a, ti koto naa ini ra naa ra. Ru'u, ja kuu ri maa Se'e Yivi Ñuyivi, ti iyo iin da ja nakua'a da ru'u nuu nda'a chaa ka jito u'u ru'u —ni kachi ya.

**45** Ko ndaja'a ya tu ka chaku ini da jnu'un ni ka'an ya un, chi tu ni ja'a ya jnu'un ja chaku ini da naa da. Ti ka yu'u da ka'an da jiin ya ja na xndaku ya jnu'un ni ka'an ya un nuu da.

### *Nau kuu ja kuñ'a'nu ga*

(Mt. 18.1-5; Mr. 9.33-37)

**46** Iin kivi ti ni ka keja'a ndaja'a Jesús ka jikajnu'un jna'an da na ndenu nau iin iin da kuu ja kuñ'a'nu ga. **47** Ko ni jini Jesús nava ka ndo'o ini da. Yukan ni ki'in ya iin suchi lulu, ni jani ya xiin ya, **48** ti ni kachi ya jiin da naa da:

—Jiin jniñu ndiso ri na kachi ri ja nu na kunda'u ini ra iin suchi lulu sia'an, ti ja ni kuu ra iin yivi ni janta'u ru'u. Ti ja janta'u ra ru'u, ansu niní ru'u janta'u ra, chi suni janta'u ra Yandios, ya ni taji ru'u vají ri. Ja yukan kuu ja taka ro'o ja ka ndo'o ini ja nukuu ga ja kuu taka ra naa ra, ja tu ka ndo'o vixi ini ra, yukan kuu ja kuñ'a'nu ga —ni kachi ya.

*Jesús ka'an ya jiin ndaja'a ya ja na kuanta'u da yivi sa'a jniñu ña'nú jiin sivi ya*

(Mr. 9.38-40)

**49** Yukan ti ni kachi Juan jiin Jesús:

—Maestro, ni ka jini na iin chaa ja jiin sivi ni ni kenchaa da tachi xaan un kua'an, ti ni ka nduxaan na jiin da, chi tu yaku da jiin yo —ni kachi da.

**50** Ti ni kachi Jesús jiin da:

—Tu kasi ra ja sa'a da, chi chaa kenchaa tachi xaan nanu sa'a ri, suni chindee da yo'o naa yo, chi tu ka'an da siki yo —ni kachi ya.

### *Ni nduxaan Jesús nuu Jacobo jiin Juan*

**51** Nu kuan kuyajni kivi ja kee Jesús ñuyivi ja'a no'on ya andivi, ni chundee ini ya ti kua'an ya ichi ñuu Jerusalén. **52** Ni taji ya uu chaa ka yoxnuu, ti chaa un ni ka ja'an iin ndañuu Samaria ka nduku da nuu kendo ya, **53** ko yivi Samaritano un tu ni ka janta'u ja kendo ya yukan, chi ni ka jini ja Jerusalén kua'an ya. **54** Yukan ti nu ni ka jini Jacobo jiin Juan ja yivi Samaritano un, tu ni ka janta'u i Jesús, ti ni ka kachi da:

—Jito'yo, kua'a ni jnu'un ti na ta'u yo jniñu ja na jinu ñu'un andivi, ti na xnaa yo yivi Samaritano un, nanu ni sa'a profeta Elías na jana'an—ni ka kachi da.

**55** Yukan ti ni nde'e Jesús nuu da naa da, ni nduxaan ya, ti ni kachi ya:

—Ro'o naa ra, tu ka jini ra na jnu'un ka ka'an ra. **56** Chi ru'u, maa Se'e Yivi Ñuyivi, tu vaji ri ñuyivi ja'a ja xnaa ri yivi naa i, chi su'va, vaji ri vee nama ri siki yivi naa i —ni kachi ya.

Yukan na ti kuankoyo da inga ñuu tuku.

### *Uu chaa ka kuni ki'in jiin Jesús (Mt. 8.19-22)*

**57** Ni kuankoyo da ichi un, ti ni kenda iin chaa ni kachi jiin Jesús:

—Jito'yo, kuni ki'in na jiin ni vasu sava'a ni ga ichi na ki'in ni, ti ki'in yo —ni kachi da.

**58** Ti ni kachi Jesús jiin da:

—Ñukuii un chi ka iyo yau kava ka yi'i ti. Ti saa un suni ka iyo taka ti nuu ka ndetatu ti. Ko ru'u, maa Se'e Yivi Ñuyivi, va sa nanu iyo nuu ndetatu ti'lì xini ri —ni kachi Jesús.

**59** Yukan ti ni kachi Jesús jiin inga da:

—Kundikun ru'u na cho'o —ni kachi ya.

Ti ni kachi chaa un:

—Jito'yo, kundatu ni na kin chunduji na tata na xnakan, sa chaa na, ti na cho'o —ni kachi da.

**60** Ti ni kachi Jesús jiin da:

—Jini ra ja ka iyo yivi un ja kanchuku i nanu ndiyi, chi tu ka chunso'o i jnu'un Yandios. Ti sia yivi un na chunduji jna'an maa i. Ko ro'o, kin xna'an ra jnu'un Yandios nau yivi kuu kivikoyo i nda'a maa ya, ja na ta'u ya jniñu nuu i —ni kachi ya.

**61** Yukan ti ni kenda inga chaa ni kachi jiin ya:

—Jito'yo, kuni ki'in na jiin ni, ko kundatu ni na kin kanxia'u na jiin yivi ni ka kendo ve'e na —ni kachi da.

**62** Ti ni kachi Jesús jiin da:

—Sa'a yo nanu ja iyo yivi ni chisojnu'un ja na kin kunukuachi i nuu Yandios, ko tu kundee i jiin jnu'un ni chiso i un. Yivi un kuu nanu iin chaa ki'in latu da ja na kutu da itu da, ko tu kundee da xndi'i da jniñu un. Ti yivi un tu kaxaan ja kunukuachi i nuu ta'u Yandios jniñu —ni kachi Jesús.

### *Ni taji Jesús uni xiko uxi ndaja'a ya*

## 10

**1** Nu ni ya'a yukan na ti ni nakaji Jito'yo Jesús uni xiko uxi ga yivi, ti ni taji ya ndi uu ndi uu da ka yoxnuu da kuankoyo da taka ñuu nuu ki'in maa ya, **2** ti ni kachi ya jiin da naa da:

—Jniñu Yandios kuu nanu kivi ka nastutu yo triu, chi jandaa ndixia kuu ja, ja ni kuu ja te'nde triu un, ko jaku ni muzu iyo ja kin sajníñu un. Sia'an kuu yivi ja'a naa i, chi nda'u ka sa'a i ja tundo xndaku nuu i, chi kumani chaa kin xndaku un. Yukan kuu ja ka'an ri ja kakanta'u nuu maa Yandios, ya xiin jniñu un, ti na chu'un ya muzu kin nastutu jniñu un. **3** Kuankoyo naa ra, ko nduku ndee ra, chi taji ri ro'o naa ra nanu rii ja kua'an ti nuu ka'iin kuiti xaan.

**4** Tu kundiso ra xu'un ni ñunu staa ja kuu ichi, ti tu kunda'a ra ndijña, ti koto jakuñi ra ja kanxia'u konu'un ra jiin yivi ichi naa ra. **5** Nu ka kivi ra iin ve'e ko xnaka kachi ra: “Na kukuee ja kuu ve'e ja'a.” **6** Ti nu yukan kanchuku yivi va'a ini, jiin jnu'un kukuee, ti na kuu ja kuu yivi un naa i. Ko nu tu va'a ini

yivi un, va tu kukuee kanchuku i. Kanxia'u jiin i ti kuankoyo naa ra. <sup>7</sup> Kendo ve'e nuu kanchuku yivi va'a ini, ti kaji ra ko'o ra ndoo na kua'a yivi un nuu ra naa ra, chi iin chaa sa'a jniñu, suni iyo ichi da ja kinya'u da. Ti koto kakanuu ra naa ra ja ndukunuu ra inga ve'e.

<sup>8</sup> Nu ni jakoyo ra iin ñuu naa ra, ti kaji vasu ndoo na kua'a yivi nuu ra naa ra. <sup>9</sup> Sa'a tajna yivi ka ku'u ka iyo yukan naa ra, ti kachi jiin i: "Jiin jniñu ña'nun ja ni ka jini ra ja, ja ni jaa kivi ta'u Yandios jniñu, ti kuu kivi ra nda'a ya na ta'u ya jniñu nuu ra naa ra." <sup>10</sup> Ko nu na jakoyo ra iin ñuu nuu tu kuanta'u yivi ro'o naa ra, kekoyo ichi un, ti kachi naa ra: <sup>11</sup> "Undi tikacha ñu'un ñuu ra ja ni jnii ja'a ri naa ri, na kisi ri, ti yukan na kuu seña ja tu ni ka janta'u ra ru'u naa ri. Ko kuñukuu ini ra ja, ja ni jaa kivi ja kivikoyo ra nda'a Yandios ja na ta'u ya jniñu nuu ra naa ra", kachi ra nuu yivi ñuu un. <sup>12</sup> Na kachi ri ja nu na chaa juicio, ti ka'nu ga kuu nundo'o ja kuu ñuu un, ti ansu yivi ñuu Sodoma —kachi Jesú.

### *Yivi ñuu ni ka nduni'in ini*

(Mt. 11.20-24)

<sup>13</sup> Siin Jesú xndaku ya, ti ni kachi ya:

—¡Na xaan nda'u ro'o yivi ñuu Corazín! ¡Na xaan nda'u ro'o yivi ñuu Betsaida! Sa ti ñuu Tiro jiin Sidón ni sa'a ri taka jniñu ña'nun un nava ni sa'a ri nuu ñuu ra naa ra, va ja ni kuu na'an ni ka nakani ini yivi un niku, ti ku'un i sa'ma nda'u, ti kuchi i yaa, ja na kuu seña i ja ni ka nakani ini i. <sup>14</sup> Ko na kachi ri ja kivi nu na chaa juicio, ti ni'in ga kii nundo'o siki ra ja kuu yivi ñuu Tiro jiin Sidón. <sup>15</sup> Ti ro'o, yivi ñuu Capernaum, koto ndo'o ini ra ja nduña'nu ga ñuu ra. Chi su'va nukuu ga ñuu ra, ti ndunda'u ga ja kuu taká ga ñuu —ni kachi Jesú.

<sup>16</sup> Ti ni kachi ya nuu ndaja'a ya tuku:

—Nu iin yivi na kuanta'u jnu'un ri ja ka ka'an ra, ti iin ni kuu ja kuanta'u i ru'u. Ko yivi ja tu kuanta'u ro'o naa ra, iin ni kuu ja tu kuanta'u i ru'u. Ti yivi tu ni janta'u i ru'u, iin ni kuu ja tu kuanta'u i Yandios ja ni taji ru'u nuu ñuyivi ja'a —ni kachi Jesú.

### *Ni ka ndeokuñi ndi uni xiko uxi ndaja'a Jesú*

<sup>17</sup> Ni ka ndenda ndi uni xiko uxi chaa ni taji Jesú. Ni ka kusii ini da, ti ni ka kachi da:

—Jito'yо, undi tachi xaan un ni ka jandatu nuu na, ja ni ka ndaku ni'in na sivi ni —ni ka kachi da.

<sup>18</sup> Ti ni kachi Jesú:

—Sia'an chi jini ri ja, ja ni xnaa ja'u'u un jniñu ña'nun maa, nanu ja ni sana ini, nanu iyo naa ini yo ti ndinchaa jinu iin taja nuu andivi. <sup>19</sup> Ti nuu ra naa ra ja ni ja'a ri jniñu ña'nun, ti kuu kuañu ra siki sava'ni ga koo xi ndisu'ma, ti kundee ra jiin sava'ni ga ja jito u'u ro'o, ti ni tundo jna'an ra. <sup>20</sup> Ko tu kusii ini ra naa ra ja ka jandatu tachi xaan un nuu ra. Chi su'va na kusii ini ra, chi ja ni nakuni' Yandios nau ka kuu ra, ti ni naki'in ya ro'o nda'a maa ya —ni kachi Jesú.

### *Ni kusii ini Jesú*

(Mt. 11.25-27; 13.16-17)

<sup>21</sup> Ti hora un ni kusii xaan ini Jesú ja ni sa'a Espíritu Santo, ti ni kanajaa ya nuu Yandios:

—Tata na, nakanajaa na ni'in ja kuu ni jito'o ja ta'u ni jniñu ni tu'u andivi jiin ni tu'u ñuyivi ja'a, chi ni xna'an ni taka jniñu ña'nun ni nuu yivi nda'u, ti ni ka chaku ini i. Chi su'va ni chisa'yи ni nuu yivi tu'va ja ndichi xini. Sia'an na koo jiin maa ni, Tata na, chi sia'an ni kuu ini maa ni —ni kachi ya.

**22** Yukan ti ni ka'an Jesús nuu yivi un:

—Maa tata ri ni nakua'a ya taka jniñu ja'a nuu ri. Ti maa iin ni ya jini nau kuu inijnuni ru'u ja kuu ri se'e ya. Ti suni ma iin ni ru'u ja kuu ri se'e ya, jini ri nau kuu inijnuni maa Tata ri Yandios. Ti suni ru'u, ja kuu ri se'e ya, na xndaku ri nuu yivi nau kuu maa Tata ri Yandios —ni kachi ya.

**23** Yukan na ti ni nde'e ya nuu chaa ka skua'a jiin ya, ti ni kachi ya nuu maa ni da naa da:

—Kancha Yandios jiin taka yivi ka nde'e i jiin nduchi i taka jniñu ña'nú ja ka jini ra vijna. **24** Ti jandaa na kachi ri nuu ra naa ra, ja kua'a xaan profeta ni kikoyo na jana'an, jiin taka chaa ni ka kuu rey, ni ka ñukuu ini da ja kuni da taka ja ka jini ra ja'a vijna, ko tu ni ka jini da. Suni ni ka ñukuu ini da ja kunso'o da taka jnu'un ka jiniso'o ra ja'a vijna, ko tu ni ka jiniso'o da —kachi Jesús.

### *Jnu'un iin chaa ñuu Samaria ja ni kunda'u ini da*

**25** Yukan na ti iin chaa xna'an ley Israel un, ni kenda da ni jan ka'an da jiin Jesús, chi kuni kotojnuni da ya, ti ni jikajnu'un da ya:

—Maestro, ¿nau kuu ja sa'a na ti ni ta'u na ja kuchaku na nusa ja kuu saa ni? —ni kachi da.

**26** Ti ni kachi Jesús:

—¿Nasa yoso nuu tutu ley Moisés, ti naa jnu'un ka'u ra yukan, nusa? —ni kachi ya.

**27** Ti ni kachi chaa xna'an ley un:

—Kachi ley un ja kuu ini nuu Jito'yo Yandios jiin ni ini ni aña ra, jiin ni tu'u ra, undi jiin inijnuni ra, ti kunda'u ini nuu ñanijna'an ra nanu kunda'u ini ra nuu maa ra —ni kachi da.

**28** Yukan na ti ni kachi Jesús jiin da:

—Jandaa kuiti ni nachiso ra. Ti nu sia'an na sa'a ra, ti ni'in ta'u ra ja kuchaku ra ja kuu saa ni —ni kachi ya.

**29** Ko chaa xna'an ley un, kuni nama da jnu'un ni ka'an da un nuu Jesús, ti ni kachi da:

—¿Ti nau kuu ñanijna'an na nusa? —ni kachi da.

**30** Ti ni kachi Jesús jiin da:

—Na kani ri jnu'un nava ni jna'an iin chaa ni jna'an. Ni kenda da ichi ñuu Jerusalén, ti kua'an da undi ñuu Jericó. Ko ichi un ni ka kenda uu ñakui'na nuu da ja ni ka sakui'na ndajniñu da. Ni ka kenchaa taka ja yinda'a da, jiin undi sa'ma da ni ka ki'in. Ni ka ja'a tau da, ti kuankoyo, ti ni kendo chaa un katuu da nanu ndiyi. **31** Ti ndo ichi yukan ni ya'a iin sutu Israel. Ni jini da nuu katuu chaa un, ko tu ni ve'e da nuu da, ti ni ya'a da inga yu'u ichi un, ti ni ya'a da kua'an da. **32** Suni ichi un ni ya'a iin chaa Israel ja kuu da iin ndaja'a nuu sutu levita naa da. Suni ni jini da nuu katuu chaa un, ko tu ni nde'e da nuu chaa un, ti ni ya'a da kua'an da. **33** Ko iin chaa ñuu Samaria, ja kua'an da suni ichi yukan, ti nu ni jini da chaa katuu un, ni kunda'u ini da maa da. **34** Ni tu'va da nuu katuu chaa un, ti ni sa'a da tajna nuu ni tuji chaa un jiin aceite, jiin vino yinda'a da un. Ti ni suku da nuu ni tuji un jiin sa'ma. Yukan na ti ni ndani'in da chaa un, ni skaa da chaa siki burru da, ti kua'an da jiin da undi nuu iyo iin ve'e ni kendo da. Ti ni jito va'a da chaa jakuua un. **35** Ti inga kivi kua'an chaa ñuu Samaria un, ko ni tava da uu xu'un plata, ti ni chunaa da nuu chaa xin ve'e un, ti ni kachi da: “Koto va'a ni chaa ja'a, ti nu ni xnaa ga ni jiin da, ti na chunaa na nuu ni kivi nandeokuñi na”, ni kachi da. **36** Vijná ti kachi nuu ri, ¿nau ndi uni chaa un ni kunda'u ini nuu ñanijna'an da nusa? —ni kachi Jesús.

**37** Ti ni kachi chaa xna'an ley un:

—Chaa ni kunda'u ini un kuu chaa va'a —ni kachi da.

Yukan na ti ni kachi Jesús jiin da:

—Kua'an nusa, ti siuku nava ni sa'a chaa un, ti kunda'u ini nuu taka yívi naa i —ni kachi ya.

### *Ni jaa Jesús ve'e Marta jiin María*

<sup>38</sup> Ti ni siin Jesús ichi kua'an ya, ti ni jaa ya *iin* ñuu lulu. Ti *iin* ña'an nani Marta yukan, ni kana ña ya kua'an ya ve'e ña. <sup>39</sup> Ti iyo *iin* ku'u Marta ja nani ña María, ti María ni nukoo ña nuu ja'a Jesús, ti ni ñuso'o ña taka jnu'un ka'an ya. <sup>40</sup> Ko Marta kujneñu xaan ña jiin jniñu iyo ini ve'e ña. Ti ni tu'va ña nuu Jesús, ti ni kachi ña:

—Jito'yo, tu ndi'i kuiti ini ni ja ku'u na María, ni xndoo maa *iin* ña saña jiin taka jniñu ja'a. Kachi ni jiin ña na chindee ña saña —ni kachi ña.

<sup>41</sup> Ko Jesús ni kachi ya:

—¡Marta! ¡Marta! Kujneñu xaan ra ti ndi'i xaan ini ra jiin taka jniñu un. <sup>42</sup> Ko vijna iyo *iin* ja kanuu ga ja kuu jniñu ra un. Ti María ni nakaji ña ja kanuu ga un. Ti jankiví ga naa ini ña taka jnu'un ni ñuso'o ña vijna —ni kachi ya.

### *Xna'an Jesús nasa kakanta'u yo nuu Yandios (Mt. 6.9-13; 7.7-11)*

## 11

<sup>1</sup> Ni kuu ja *iin* kivi kande Jesús jikanta'u ya nuu Yandios, ti nu ni ndi'i ni jikanta'u ya, ti *iin* chaa kuu ndaja'a ya un, ni kachi da:

—Jito'yo, xna'an ni saña naa na nasa kakanta'u na, nanu ni xna'an Juan nuu ndaja'a da —ni kachi da.

<sup>2</sup> Ti ni kachi Jesús:

—Su'va ka'an ra naa ra nuu ka jikanta'u ra:

Tata yo Yandios, ja kancha ni andivi.

Kava yiñu'un yo nuu maa ni, chi maa ni kuu ja kuña'nu ga.

Jika na nuu ni ja yachi na kiji kivi ta'u ni jniñu ña'nu nuu *iin* tu'u ñuyiví.

Ka kuni na ja yívi ñuyiví ja'a na kuandatu i jnu'un ni, nanu jandatu ángel kanchuku andivi.

<sup>3</sup> Ti kua'a ni staa na kaji na vijna ja kuu ja ndendajnu na *iin* kivi *iin* kivi.

<sup>4</sup> Kuan ka'nú ini ni nuu kuachi ka sa'a na, chi suni saña ka janka'nú ini na nuu taka ja ka sa'a yívi jiin na.

Ti koto ma kua'a ni jnu'un ja kotojnuni ja'u'u un saña, ti su'va nama ni saña nuu nundo'o un —ni kachi Jesús.

<sup>5</sup> Ti suni ni kachi ya:

—Sa'a yo nanu ja nau ro'o iyo *iin* yívi mani ra jiin, ti ñuu kuiti jaa ra ve'e da, ti kana ra xini da, ti kachi ra: “Amigo, kua'anuu ti uni staa nuu ri, <sup>6</sup> chi *iin* amigo ri kua'an da viaje, sa ni nchaa da ve'e ri, ti tu nau ja iyo ja kua'a ri ja kaji da”, kachi da. <sup>7</sup> Ti ka'an chaa xiin ve'e un undi ini ve'e da: “Tu xnaña'an ra ru'u, chi tu kuu ndoko ri kua'a ri ja kuni ra, chi ka kixi se'e kuachi ri jiin ri, ti vijna ndi'yu yuxé'e ri”, kachi da. <sup>8</sup> Ti kachi ri ja vasu tu kuni da ndoko da, vasu mani ra jiin da, ko vanuxia siin ra xnaña'an ra nuu da. Ti ndoko da kua'a da ja kuni ra. <sup>9</sup> Ja yukan kuu ja na kachi ri: Kakanta'u nuu Yandios, ti na kua'a ya ja kuni ra. Nduku taka ja va'a ja iyo nuu ya, ti ni'in ra. <sup>10</sup> Ti siin kakanta'u nuu ya undi ni'in ra, nanu sa'a *iin* yívi ja siin i skajan i yuxé'e undi naa nuñu, ti sa kivi i.

<sup>11</sup> ¿Xi iyo *iin* ro'o ja kuu tata suchi kuachi, xi kua'a ra *iin* yuū nuu se'e ra nu ka jikan i staa nu? ¿Xi kua'a ra *iin* koo nuu i nu ka jikan i cháká nu? <sup>12</sup> ¿Xi kua'a ra *iin* ndisu'ma nuu i nu ka jikan i ndivi nuu ra nu? <sup>13</sup> Ro'o naa ra, vasu

ka sa'a ra kuachi, ko suni iyo jniñu va'a ka sa'a ra ja ka nduku ra ja va'a ja kuu se'e ra. Ti suni sia'an Tata ra Yandios, ja kancha ya andivi, kua'a ya Espíritu Santo nu sia'an na kakanta'u ra —ni kachi Jesús.

*Ka chakuachi da Jesús ja ndiso jniñu ya nuu ja'u'u  
(Mt. 12.22-30; Mr. 3.19-27)*

**14** Ti iin kivi ni keni'in Jesús tachi xaan un ja ni sa'a ñi'in iin chaa un. Ko ni kee tachi xaan un kua'an, ti ni ndoka'an chaa ñi'in un, so ni ka naa ini yivi jiiñu un. **15** Ko sava i ni ka ka'an:

—Keni'in chaa ja'a tachi xaan un, ko jiin sivi maa ja'u'u kuña'nu un (ja suni nani Beelzebú), ja yinda'a taka tachi xaan un —ni ka kachi da.

**16** Ko sava ga yivi un, ka kuni kotojnuni da ya, ti ka jikan da iin jniñu ña'nu ja na koo nuu andivi. **17** Ko maa ya ja jini va'a ya ndoo ka ndo'o ini i, ti ni kachi ya:

—Nu ndaja'a iin gobierno kusiin ini da naa da ti keja'a kanaa da naa da, ti gobierno un tu kuñii, chi naa. Ti nu tendi'i iin familia keja'a kanaa naa, ti familia un tu kuu kunchuku mani. **18** Suni sia'an kuu nu maa ja'u'u un na sasiin jna'an jiiñu tachi xaan un, ¿ti ka jani ini ra ja nasa kuñii jiiñu un nusa? Na kachi ri ja'a nuu ra ch'i ka'an ra ja jiiñu sivi ja'u'u un kuu ja keni'in ri tachi xaan un kua'an. **19** Ti nu sia'an kuu, ti va suni yivi ka skua'a jiiñu ra naa ra, suni kuu ja kuu keni'in i tachi xaan jiiñu sivi ja'u'u un. Ja sia'an ti ka stuu i ja maa ni ra ka yuji jiiñu'un ka ka'an ra un. **20** Ko ru'u, jiiñu sivi maa Yandios keni'in ri tachi xaan un kua'an. Yukan kuu ja, ja ni chaa jniñu ña'nu Yandios ja kuu nuu ra naa ra.

**21** Ti ja siki ja'u'u un, sa'a yo nanu ja iin ni kuu nu iin chaa kaña ni'in xaan da ja ndito va'a da ve'e da, ti ka'iin va'a ja ñava'a da un. **22** Ko nu na chaa inga chaa ni'in ga ja kuu maa da, ti kundee chaa un jiiñu da, kuisonchaa da taka machete jiiñu espada ja ndito da ve'e da jiiñu un, ti kivi da keni'in da taka ja ñava'a chaa un. Iin ni kuu ja ni kundee ri jiiñu chaa u'u un, chi ni keni'in ri ndaja'a da un kua'an.

**23** Ti suni na kachi ri nuu ra naa ra siki yivi ja tu ka'an va'a siki ri, ti yivi un jito u'u i ru'u. Yivi tu kejna'an jiiñu ri, jachanuu i yivi ka kuni kejna'an jiiñu ri —kachi ya.

*In tachi xaan ja nandeokuñi  
(Mt. 12.43-45)*

**24** Siin Jesús xndaku ya, ti ni kachi ya:

—Nu iin tachi xaan na xndoo iin chaa ti ki'in, kua'an ti jikonuu nuu ñu'un ichi, nduku nuu ndetatu. Nu tu ni'lín, ti ndo'o ini: “Na nandeokuñi tuku ri ve'e nuu ni kunde ri un.” **25** Ko nu ni naja, ti jini ja iyo nuña ini chaa un nanu iin ve'e iyo nuña, ja iyo ndoo, ja iyo nakoo. **26** Yukan na ti ki'in tachi un, ti kin kuaka uxia ga tachi xaan un ja jaku ga kanda ga ja kuu maa. Yukan na ti nchaa, ti ñidivikoyo kunchuku jiiñu chaa un. Yukan na ti chaa un vi'i ga nduu da ansu nava ni'kaa da undi nuu —ni kachi ya.

*Ka'an Jesús nau yivi ndatu ga*

**27** Ni ka'an ga Jesús jnu'un un, ti ni kana ko'o iin ña'an kandichi ma'ñu yivi kua'a un xini Jesús, ti ni kachi ña:

—Xaan ga ndatu ña'an ni skaku ni'in, ti ni skaxin ña ni'in! —ni kachi ña.

**28** Ti ni kachi Jesús:

—Ko su'vea ndatu ga yivi ka jiniso'o jnu'un Yandios, ti ka jandatu i —ni kachi ya.

*Chaa fariseo ka jikan da iin jniñu ña'nu  
(Mt. 12.38-42; Mr. 8.12)*

<sup>29</sup>Tí ni ka nakuikonduu ni ga yiví kua'a un nuu Jesús, ti ni keja'a ka'an Jesús jnu'un ja'a:

—Taka yiví ka chaku vijna, tu kuni kuandatu i nuu Yandios, ka kuni i ja na sa'a ri iin jniñu ña'nu nuu i. Ko jankiví sa'a ri jniñu ña'nu un, chi nini jiin vanuxii nundo'o ni jna'an Jonás, chaa ni kuu profeta na jana'an, yukan ni kuu ja xna'an ri. <sup>30</sup>Chi yiví ñuu Nínive ni ka nakuni i ja ni ka'an profeta Jonás maa jnu'un Yandios nuu i. Ti suni sia'an ru'u, maa Se'e Yíví Nuyíví, ka'an ri jnu'un Yandios nuu ro'o naa ra vijna. <sup>31</sup>Suni iin ña'an ni kuu reina ja ni ta'u jniñu iin ñuu ichi sur, nandoto ña kivi na chaa juicio, kivi na kii xndichi ya yiví kivi vijna. Ti naa ini ña nde'e ña nuu yiví kivi vijna ja ni'l'in ini i, chi maa ña undi jíka xaan ni kii ña ja na kunso'o ña jnu'un ndichi ni ka'an rey Salomón, na jana'an. Ti vijna kuña'nú ga jniñu sa'a ri ja kuu Salomón, ti ro'o naa ra tu ka chunso'o ra jnu'un xndaku ri nuu ra.

<sup>32</sup>Ti ja kuu siki ñuu Nínive, nuu ni ja'an profeta Jonás, ti yiví ni kunchuku ñuu un, nandoto i kivi na chaa juicio ja xndichi ya yiví kivi vijna, ti naa ini i nde'e i nuu yiví kivi vijna, chi tendi'i yiví ñuu Nínive ni ka nakani ini i na ni ka'an profeta Jonás jnu'un Yandios nuu i. Ko ru'u, chi kuña'nú ga jniñu sa'a ri ja kuu Jonás, ti ro'o naa ra, tu ka chunso'o ra tu nakani ini ra naa ra —ni kachi Jesús.

*Jnu'un iin yiti  
(Mt. 5.15; 6.22-23)*

<sup>33</sup>Siin Jesús xndaku ya, ti ni kachi ya:

—Tu ni iin yiví ja skuikun iin yiti, ti chisa'yí chii iin janu. Chi su'va kani i yiti un nuu sukun nava na kundijin nuu yiví ja kivi ini ve'e. <sup>34</sup>Ti nduchi yo kuu nanu iin yiti ja kuu yiki kuñu yo, ti nuu nduchi ra iyo ndijin, ti suni sia'an iyo va'a ni yiki kuñu ra. Ko nu nduchi ra tu kundijin, ti nasa kundijin na ichi ki'in ra nusa. Ti ñuñaa kua'an ra nu sia'an, ti sana ini ra ti nduva ra. ¿Ti nasa ndoko ra ja ñaa xaan ichi kua'an un nusa? <sup>35</sup>Koto yukun inijnuni ra jiiñ jnu'un ka'an ri nava tu naa ini ra. <sup>36</sup>Ko nu kujnuni va'a ini ra jnu'un ka'an ri, ti tu naa ini ra, chi ñukuu ini ra. Chi ja ni nakuni ndijin ra ja ichi Yandios kuu nu ki'in ra nanu ja nu ndinchaa nduva yiti ja kundijin ichi ki'in ra ñuñaa —ni kachi ya.

*Ni kanajin Jesús nuu chaa fariseo jiiñ chaa ka xna'an ley Israel  
(Mt. 23.1-36; Mr. 12.38-40; Lc. 20.45-47)*

<sup>37</sup>Nu ni ndi'i ni ka'an Jesús jnu'un un, ti iin chaa fariseo ni kana da Jesús ja na kaji ya staa jiiñ da ve'e da. Ni jaa ya ve'e da, ti ni nukoo ya mesa ja kee ya staa jiiñ da. <sup>38</sup>Ko ni naa ini chaa fariseo un nu ni jini da, ja tu ni nanda'a ya nava iyo jnu'un ja xnaka ka nanda'a da tijni jinu, sa ka yee da staa.

<sup>39</sup>Ko maa Jito'yo ni kachi ya:

—Ro'o chaa fariseo naa ra, ndundoo ko'o ndundoo yajin ra, chi ndo'o ini ra ja ka iyo ndoo ra nuu Yandios, vasu jaku ga kanda ra. Ka kuu ra nanu yiví ka nakacha nini ichi jata ko'o i jiiñ yajin i, ko tu ka nakacha i ichi ini, vasu jña'an ga ichi ini un. Sia'an ka kuu ra, chi ka ndo'o ini ra ja ka kuu ra yiví va'a, vasu mani jnu'un kui'na jiiñ tako ga jnu'un kue'e ka ñu'un ini ra. <sup>40</sup>¡Yíví ni'l'in ini ka kuu ra! ¡Xi tu jini ra ja Yandios ni sa'a ya ni tu'u yiki kuñu ra jiiñ añu ra, ti ni ja'a ya inijnuni ra! <sup>41</sup>Ja yukan kuu ja nakani ini naa ra, ti nakua'a taká ja ni ka jisonchaa ra nuu yiví nda'u un. Sia'an na ti ka stuu ra ja, ja ni ka nundoo undi ini añu ra ja kuu nuu Yandios.

**42** ¡Xaan ga nda'u ro'o naa ra chaa fariseo! Chi ka siuku ra taka jniñu kuachi, ti tu ka siuku ra jniñu kanuu ja kuu nuu Yandios. Chi jakuu ni ka ja'a ra nuu takaa ja ka ñava'a ra, ka ja'a ra ja kuu nuu chaa junukuachi nuu Yandios. Ka ja'a ra jakuu nuu takaa ja yi'i xiko asun nanu ita tamino, jiin ruda, jiin sava'ni ga inga nuu yuku tajna, jiin yuku yi'i xiko asun. Taka un ka sa'a ra, ko ni ka naa ini ra jnu'un kanuu ga ja kaka ndaa ra nuu ichi Yandios, ti kuu ini ra nuu ya. Taka ja'a kanuu ga ja sa'a ra, ti koto naa ini ra ja kua'a ra taka nuu ja kaa ñava'a ra un.

**43** ¡Xaan ga nda'u ro'o chaa fariseo naa ra! Chi ka jajna'an ini ra jnu'un yiñu'un ga nuu nukoo ra ini veñu'un Israel un. Ti kuni ra ja na ka'an yiñu'un yiñi jiin ra nuu ya'u. **44** ¡Xaan ga nda'u ro'o ja ka xna'an jiin chaa fariseo naa ra! Ka kuu ra nanu ñaña ndiyi ja ni nda'va chi ka ya'a yiñi siki, ko tu ka jini i ja kande ndiyi chii un. Ti sia'an ka kuu ro'o naa ra, chi yiñi ka kandixia jnu'un ra, va tu chaku ini i ja jnu'un ra kuu nanu ndiyi ja kuan te'yú —ni kachi Jesú.

**45** Yukan ti ni nachiso iin chaa xna'an ley un:

—Maestro, jiin jnu'un ni ka'an ni un suni ni ka'an ndeva'a ni siki na naa na —kachi da.

**46** Ti ni kachi Jesú:

—Suni xaan ga nda'u tu ro'o ja ka xna'an ley! Kua'a jnu'un ka xna'an ra, ti ta'u ra jniñu ja na siuku yiñi jnu'un un naa i, vasu maa ra naa ra, tu ka siuku kuiti ra jnu'un un. **47** ¡Na nda'u ra naa ra! Chi ka sa'a ra nama nuu ñaña chaa ni ka kuu profeta na jana'an ja ni ka ja'ní ndiyi velu ra naa da. **48** Jiin jniñu ka sa'a ra vijna, jini yo ja ka kejna'an ini ra jiin jniñu ni ka sa'a ndiyi velu ra, chi maa da ni ka sa'a ja ni ka ji'i profeta un. Ti vijna ro'o naa ra, ka nasa'a ra nama nuu ñaña ndiyi ni ka kuu profeta un. **49** Ja siki yukan kuu ja undi jana'an ni kachi Yandios iin jnu'un ndichi: “Taji ri profeta ja na ka'an da jnu'un ri jiin chaa kuu apóstol nuu yiñi naa i, ti sava da ka'ní yiñi da, ti sava ga da koto u'u yiñi da naa da.” **50** Ko ro'o naa ra jiin taka ga yiñi ka iyo kivi vijna, chi kandiso ra niñi chaa ni ka kuu profeta ja ni ka ji'i da undi na ni nukoo ñuyivi. **51** Kandiso ra undi niñi Abel jiin niñi Zacarías, ja ni ka ja'ní jna'an ra jana'an sava mañiu altar jiin ve'e ii ini veñu'un Israel un. Ti na kachi ndaa ri nuu ra naa ra ja taka nundo'o un nanduku jnu'un Yandios, ti kii kuachi un siki taka yiñi kanchuku kivi vijna. **52** ¡Xaan ga nda'u ro'o chaa ka xna'an ley! Chi jiin jnu'un ra ka jasi ra ja na chunso'o yiñi jnu'un Yandios. Ti ni maa ra tu ka kuni chunso'o ra jnu'un ya, ni tu ka ja'a ra jnu'un ja kunso'o yiñi ka kuni skua'a jnu'un ya —ni kachi ya.

**53** Ti nu ni ka'an Jesú taka jnu'un un, ti chaa ka xna'an ley jiin chaa fariseo, ni ka kuiti xaan ini da nuu ya. Ti ni ka keja'a ka xnaña'an da jiin tijni jnu'un ka jikajnu'un da nuu ya, **54** ja ka nduku da na ndee nuu tu yuji ya iin jnu'un ka'an ya, nava yukan ti kuu kankuachi da siki ya.

### Xndaku Jesú siki jnu'un fariseo (Mt. 10.26-27)

## 12

**1** Ti ni kakuu da sia'an ti yachi xaan ni ka kututu tijni mil yiñi naa i, ti ni ka taka yiñi ja undi ka jaxin jna'an i naa i. Ti ni jakunchaa Jesú xndaku ya niní nuu maa ni ndaja'a ya, ti ni kachi ya:

—Koto maa ra naa ra jiin jnu'un ka ka'an chaa fariseo, chi yachi xaan kuan kuichanuu nanu keni'no levadura chii yujña staa stila. Ka kenda da nanu chaa va'a ga, ko vanuxia mani jnu'un xndoña'an kuu. **2** Chi tu iyo ni iin ja kendo sa'yí ja kuu nuu Yandios, chi taka ni kenda nuu ndijin. Ni tu iyo ni iin

ja yisa'yi ja tu kuni ndaa yo, chi taka ni kuni ndaa yo. <sup>3</sup> Ti taka jnu'un ni ka ndajnu'un xe'e ra jiin yivi, ti kenda ndijin vasu tu nau inga yivi ni jiniso'o. Vasu ni ka jasi ra yuxe'e, ti ni ka ndajnu'un ra un, ko kuichanuu ki'in, ti ya yukan kani yivi jnu'un un —ni kachi Jesús.

*Xndaku ya siki nau kuu ja na koyu'u yo  
(Mt. 10.28-31)*

<sup>4</sup> Siin Jesús xndaku ya nuu ndaja'a ya, ti ni kachi ya:

—Ro'o naa ra, amigo ri, na kachi ri ja tu koyu'u ra koto ra yivi ja'n'i yiki kuñu, chi nu na ka'n'i i ro'o ko nini yiki kuñu ra ka'n'i i. <sup>5</sup> Ko na kachi ri nuu ra nau iin ja koyu'u ra nde'e ra. Koyu'u ra Yandios, chi maa ya ndiso jniñu ña'n'u ja xnaa ndi'i ya ro'o, ti kuu chunde ya ro'o nuu infiernu. Ti yukan ndixia kuu ja koyu'u ra ya.

<sup>6</sup> Maa Yandios kuu ja kachi nasa koo jiin ra naa ra. Jini yo ja jandaa kuu yukan, chi undi u'un saa kuachi un, ka kuya'u ti ja uu pesu, ko jito va'a Yandios ti, chi ni iin ti tu naa ini ya. <sup>7</sup> Ti ja kuu ro'o naa ra, chi undi ixi xini ra ni ka'u ya ndi iin ndi iin. Yukan kuu ja koto xndi'i ra ini ra chi ya'u ga nchaa ra naa ra nuu Yandios ja kuu iin jnii saa kuachi un —kachi Jesús.

*Yivi ka'an ndaa ja'a Cristo Jesús nuu inga yivi  
(Mt. 10:32-33; 12:32; 10:19-20)*

<sup>8</sup> Siin Jesús xndaku, ti ni kachi ya:

—Ti na kachi ri ja taka yivi nu na ka'an ndaa i, ti stuu i ru'u nuu inga yivi, suni ru'u, maa Se'e Yivi Ñuyivi, suni ka'an ndaa ri ja stuu ri yivi un nuu ángel ka junukuachi nuu Yandios. <sup>9</sup> Ko nu na chisa'yí i ru'u nuu yivi, suni sia'an skexiko ri yivi un nuu ángel ka junukuachi nuu Yandios, chi kachi ri ja tu ka yi'i i jiin ri.

<sup>10</sup> Suni na kachi ri ja sava'a ni ga yivi na ka'an ndeva'a siki ru'u, ja kuu ri maa Se'e Yivi Ñuyivi, va iyo jnu'un ka'nu ini nuu i. Ko nu iin yivi na ka'an ndeva'a siki Espíritu Santo, jankivi iyo jnu'un ka'nu ini nuu i. <sup>11</sup> Nu na jnii chaa ka kuña'nu ini veñu'un Israel ro'o naa ra, xi stisia, xi juez jnii da ro'o naa ra, ti koto ma xndi'i ra ini ra naa ra ja nasa koo jnu'un ka'an ra. <sup>12</sup> Chi nu na jaa hora ka'an ra, ti maa Espíritu Santo kachi nasa koo jnu'un ka'an ra hora un —ni kachi ya.

*Siki ja tu kundio ini yo kuu riku yo*

<sup>13</sup> Ti iin yivi kandichi ma'ñu yivi kua'a un ni kachi jiin Jesús:

—Maestro, kachi ni jiin ñani na, na kua'a da ti'lli ñu'un kuu ta'u na —kachi da.

<sup>14</sup> Ko ni kachi Jesús:

—¿Ndoo ka'an ra sia'an? Ti tu kuu ri juez ja tejna'an ri ta'u ra naa ra —ni kachi ya.

<sup>15</sup> Ti suni ni kachi ya nuu yivi un:

—Nde'e, koto va'a maa ra naa ra, ti koto kundio ini ra ja kuñava'a kua'a ra ndajniñu ja kuu riku ra. ¿Ti va nu ja kua'a xaan ja ñava'a ra, ti nama un ro'o ja kuchaku na'an ra nu? —ni kachi Jesús.

<sup>16</sup> Yukan na ti ni ka'an ya jnu'un ja'a nuu yivi un:

—Ni iyo iin chaa riko xaan ja ni ñava'a kua'a da ñu'un, ti va'a xaan ni kuu itu da. <sup>17</sup> Ti ni keja'a ndo'o ini chaa riko un: “¿Nasa sa'a ri vijna? Ti tukaa ga nuña yaka nuu ku'un niñi ri.” <sup>18</sup> Yukan ti ni ndo'o ini da: “Su'va na sa'a ri. Na kanu ndi'i ri taka yaka ri, ti na sa'a ri iin ja ka'n'u ga, ti yukan kujaa sava'a ndi'i ri niñi ri jiin taka ja ñava'a ri. <sup>19</sup> Yukan ti kachi ri: Vijná ti kua'a xaan ja ñava'a ri ti kujaa ja kuu tijni kuiya. Vijná ti na ndetatu ri, ti kají ko'o ri ja

jnu'un sii ini", kachi da, ndo'o ini da. <sup>20</sup> Ko ni kachi Yandios jiin da: "¡Chaa ñaa kuu ra! Ja tu jini ra ja jakuaa vijna kuū ra. ¿Ti ndoo kendo jiin taka ja ñava'a ra un nusa?" ni kachi ya. <sup>21</sup> Sia'an ka jna'an yivi kandio ini ja kuu riku i naa i, ti tu ka nakututu ini i ja kuu ta'u i nuu Yandios, naa i —ni kachi Jesús.

### *Jito Yandios yivi ya*

(Mt. 6.25-34)

<sup>22</sup> Yukan sa ni kachi Jesús jiin ndaja'a ya:

—Na kachi ri nuu ra naa ra, ja koto maa xndi'i ra ini ra ja kuu ja kaji ra, ja na kuchaku ra, xi ja kuu sa'ma ku'un ra naa ra. <sup>23</sup> Chi nu ni ja'a Yandios ja kuchaku ra, va suni kua'a ya ja kaji ra jiin sa'ma ku'un ra. <sup>24</sup> Nde'e naa ra nasa chaku tikaka un. Tu naa jniñu ka sa'a ti ja nastutu ti ini yaka ti, ko maa Yandios jito ya ti ja ka yee ti. ¿Ti ansu kanuu ga ro'o naa ra ja kuu kuiti un nu? <sup>25</sup> ¿Ko ndoo ni'in ra naa ra vasu na xndi'i xaan ini ra jiin ja kuchaku ra, xi ja kundii kusuku ra yukan? Tu nijniñu ja sia'an ka xndi'i xaan ini ra, chi ni tu ni'l'in ra ja va'a ga ja kuu ra. <sup>26</sup> Nu tu kuu sa'a ra vasu iin jniñu lulu sia'an, ¿ti ndoo xaan ka ndi'i ini ra ja kuu taka ga ja kuchaku ra nusa?

<sup>27</sup> Ko nde'e naa ra, nasa ja'nun ita yuku un, ti tu jini yo nasa ja'nun, ko vii xaan kanda. Ko na kachi ri ja ni rey ni nani Salomón na jana'an, tu ni suku da nanu ita yuku un, vasu vii xaan ni kaa sa'ma da. <sup>28</sup> Ti maa Yandios skua'nun ya ita yuku un, ti vii xaan na skutu ya i. Ko vasu vii xaan kanda vijna, ti ijña ja ni ichi, ti ka'ma ya nuu ñu'un ini horno. Ja yukan kuu ja nu sia'an sa'a Yandios, ja jito ya ita yuku un, ¿ti ansu kanuu ga ro'o naa ra ja jito va'a ya ro'o naa ra nu? Ko ka ndi'i xaan ini ra, chi tu kandixia ndaa ra ja maa Tata ra Yandios jito va'a ya ro'o naa ra. <sup>29</sup> Ja yukan kuu ja tu nakukutu ini ra kuyaku ra ja nduku ra nasa kaji ra, nasa ko'o ra. <sup>30</sup> Chi taka un ka nduku yivi naa i ja tu ka nakuni i nau kuu Yandios, ko ro'o naa ra, iyo iin Tata ra ja kuu Yandios kancha andivi, ti ja jini ya ja taka un ka nandi'i ra naa ra. <sup>31</sup> Ti ro'o naa ra kukutu ini ja na kivi ra nda'a Yandios ja na ta'u ya jniñu nuu ra naa ra. Ti nu na kundio ini ra un, ti kua'a ya taka ja ka nandi'i ra ja kuchaku ra naa ra —ni kachi Jesús.

### *Nasa ni'in yo yaji yo*

(Mt. 6.19-21)

<sup>32</sup> Siin Jesús xndaku ya nuu ndaja'a ya, ti ni kachi ya:

—Koto yu'u ra naa ra chi ka kuu ra nanu iin ataju lulu ri, ja ndito va'a jito'o ti maa ti, ti ru'u ndito va'a ri ro'o naa ra. Ti maa Tata ri ja ni ja'a ya jnu'un ja na ndivi'ra ñuu nuu ta'u ya jniñu. <sup>33</sup> Ti koto xndi'i ini ra ja ni'in ra kua'a ndajniñu nuu ñuyivi ja'a. Va'a ga kua'an ti xiko ra taka ja ka ñava'a ra, ti kua'a xu'un un nuu yivi nda'u naa i. Sia'an ti sa nakaya ta'u ra nuu Yandios ja kancha ya andivi, ti yukan tu kututu nanu nu sava'a yo xu'un ini iin jajnu. Ti andivi yukan tu kivi ñakui'na, ni tikixin tu kivi ti ja stivi ti. <sup>34</sup> Ti sava'ni ga nanu ndo'o ini ra ja nakaya ra yaji ra, ti yukan kundio ini ra ja na ni'in ra —ni kachi ya.

### *Na kotu'va yo kivi chaa Jesús*

<sup>35</sup> Siin Jesús xndaku ya nuu ndaja'a ya, ti ni kachi ya:

—Va'a nusa, ti suni koto maa ra naa ra, kotu'va ra ja kuu kivi nchaa jito'o ra, <sup>36</sup> nanu iin muzu ja kayu kayu ni candil da, ja ndatu da jito'o da vendi da nu ni ja'an da iin viko nanda'a. Ti muzu un kuiña da yuxe'e sava'ni ga hora na nchaa amu da. <sup>37</sup> Ko ndatu muzu un, nu na nchaa jito'o da ti kuni da ja ndito muzu da. Ti na kachi ri ja maa jito'o da un, su'va kuanukuachi da, chi sava'a da mesa da, ti kana da muzu da un ja na nukoo da ti kee da staa. <sup>38</sup> Ti kee va'a muzu un nu ndito da sava'ni ga hora na nchaa jito'o da, va'a ni ñuu,

xi kuan ndii ni ga. <sup>39</sup> Nde'e naa ra, sa ti iin chaa xiin ve'e ja jini da na hora jaa ñakui'na ve'e da iin jakuaa, va kondito da, ti tu kua'a da jnu'un ja sakui'na ve'e da, ti tava ndajniñu da. <sup>40</sup> Ja yukan kuu ja suni kotu'va ra naa ra, chi jaa iin kivi, ti sana ini ra, ti nchaa ru'u, ja kuu ri maa Se'e Yivi Ñuyivi —ni kachi ya.

*Siki muzu va'a jiin muzu tu jandatu  
(Mt. 24.45-51)*

<sup>41</sup> Yukan ti ni jikan jnu'un Pedro ya:

—Jito'yо, ¿nuu takaa maa ni na ni ka'an ni jnu'un ja'a, xi ni ka'an ni ja kuu tendi'i yivi nu? —ni kachi da.

<sup>42</sup> Ti ni kachi maa Jito'yо:

—Chaa kuu muzu va'a ja junukuachi ndaa un, ti kanu ini chaa xiin ve'e un ja na kinda'a da uu ga muzu un, ti suni jiin hora na kua'a da ja kaji uu ga muzu un. <sup>43</sup> Ndatu chaa kuu muzu un nu na najaa chaa xiin ve'e un, ti kuni da chaa siuku da nava ni ta'u jniñu nuu da. <sup>44</sup> Ti na kachi ndaa ri ja kusiñ ini maa jito'o da un, ti xndoo da chaa ja na kinda'a da taka ja ñava'a da un. <sup>45</sup> Ko nu chaa junukuachi un na sa'a ndeva'a da, chi ndo'o ini da ja kukuee ga jito'o da un, ti keja'a nduxaan da nuu uu ga muzu un, jiin ña'an ka junukuachi, ti keja'a kaji ko'o da ti keja'a najini da. <sup>46</sup> Yukan ti iyo naa ini da ti nchaa jito'o da. Ti kua'a da tau chaa un jiin iin nundo'o ja jna'nu ndatu da. Sia'an ka jna'an yivi tu ka ñukuu kuiti ini i Yandios.

<sup>47</sup> Ko muzu ja tu chunso'o tako jniñu kuni jito'o da ja sa'a da, vasu jini da jniñu ta'u jito'o da, ti tu jandatu da ja siuku da taka nava kuni jito'o da, ni tu iyo tu'va da ja kuu kivi nchaa jito'o da. Ti muzu un, ndo'o xaan da. <sup>48</sup> Ko muzu ja tu jini na jniñu kuni jito'o da ja sa'a da, ti sa'a da iin jniñu ja tu jajna'an ini jito'o da, ti muzu un jaku ni ndo'o da. Chi vanuxia tu ni kujnuni ini da naa jniñu kuni jito'o da. Suni sia'an kuu jiin iin yivi ni kutu'va va'a chi kua'a ja nakua'a i jnu'un, chi jito'o i kuni ja na kuanukuachi va'a i nuu da, ti na siuku ndaa i jiin taka jniñu ni ta'u da nuu i —ni kachi ya.

*Ja siki Jesu's, ti kusiñ ini yivi naa i  
(Mt. 10.34-36)*

<sup>49</sup> Siin Jesu's xndaku ya nuu ndaja'a ya, ti ni kachi ya:

—Ru'u ni chaa ri, ko so ja na skuikun ri ñu'un, nanu ka naka'ma yo icha ja na ndundoo yuku. Chi ka iyo sava yivi ja nasa'a ndoo ri undi ini anñi i, ko ka iyo sava yivi ni'in ini, ti ja kuu yivi un, kuu ri nanu iin ñu'un nuu ka naka'ma yivi yuku, chi xnaa ri yivi un. Chi yukan kuu ja ve'sa'ri. <sup>50</sup> Ko iyo iin nundo'o kii siki ri, nanu nundo'o jna'an iin yivi keka'nu chii nducha. Ti kukui'ya xaan ini ri jiin nundo'o ja'a undi na siuku ndi'i ri. <sup>51</sup> ¿Xi ka jani ini ra ja ni chaa ri, ti sa'a ri ja na kunchuku mani yivi naa i nuu ñuyivi ja'a nu? Ko na kachi ri ja tuu. Chi su'va kusiñ ini yivi naa i ja siki ru'u. <sup>52</sup> Ti undi vijna keja'a kusiñ ini yivi ja siki ru'u. Chi nu ka iyo u'un yivi ini iin ve'e, uni yivi un kuanta'u i ru'u, ti uu ga yivi un, tu kuanta'u i ru'u. <sup>53</sup> Ti chunsama ini tata jiin se'e ja tu kunchukú mani ti koto u'u jna'an i. Ti koto u'u nana jiin se'e si'i, ti se'e si'i jiin nana. Koto u'u se'e janu un jiin nana chiso, ti nana chiso un jiin se'e janu —ni kachi ya.

*Nasa na kani kivi  
(Mt. 16.1-4; Mr. 8.11-13)*

<sup>54</sup> Ni ndi'i ni ka'an ya nuu ndaja'a ya, ti ni ka'an tuku ya nuu yivi kua'a un. Ti ni kachi ya:

—Nu ni ka jini ra nuu ku'iin viko ichi nuu kee ndikandii, ti ka ka'an ra ja kua'i sau, ti sia'an kuu ndixia. <sup>55</sup> Ti nu ni keja'a kee tachi ichi vee, ti ka ka'an

ra ja nandii, ti jandaa ndixia kuu. <sup>56</sup> Ko chaa ñaa xini ka kuu ra, vasu tu'va ra, ko ka xndoña'an ra. Chi ka jini va'a ra nasa nakani kivi nuu andiví jiin ja ndenda nuu ñu'un, ¿ti nasa kuu ja tu ka chaku ini ra nau ja kuu ru'u, ja sa'a ri taka jniñu ña'nu kivi vijna nusa? —ni kachi ya.

### *Kanuu ndumani yo jiin yívi jito u'u yo'o (Mt. 5.25-26)*

<sup>57</sup> Siin xndaku Jesús nuu yívi un, ti ni kachi ya:

—Kani ini nuu jniñu ña'nu sa'a ri, nanu ja ka nakani ini ra nasa ndumani ra jiin yívi kankuachi ja'a ra. <sup>58</sup> Chi nu iin yívi na kankuachi ja'a ra, ti ki'in ra ve'e sticia. Xnakan ndajnu'un mani naa ra ichi kuankoyo ra ti na kukuee, nava tukaa ga ki'in da jiin ra ve'e sticia, chi nakua'a juez un ro'o nuu policia, ti chindi'yu da ro'o vekaa. <sup>59</sup> Ti na kachi ndaa ri nuu ra naa ra ja tu kaña ra yukan undi nu tu chunaa ndi'i ra xu'un tau ra un —ni kachi Jesús.

### *Kanuu ja na nakani ini yo nuu kuachi yo*

## 13

<sup>1</sup> Ti kivi yukan ni ka chakoyo tijni chaa, ti ni ka jani da jnu'un nuu Jesús nava ni sa'a gobernador Pilato jiin tijni chaa ñuu Gálilea, ja nanu ka ja'ni da kuiti ja soko da nuu Yandios ni jakoyo soldado Pilato ti ni ka ja'ni da chaa Galilea un, ti undi ni ka nasakanuu niñi da jiin niñi kuiti un. <sup>2</sup> Ti ni kachi Jesús:

—Va nu ja sia'an ni ka jna'an chaa un, ti ka ndo'o ini ra ja iyo ga kuachi maa da ja kuu taka ga chaa ñuu Galilea un. <sup>3</sup> Ko na kachi ri ja tuu. Chi ro'o naa ra, nu tu nakani ini ra nuu kuachi ra, ti suni jna'nu ndatu ra ti xnaa ra maa ra. <sup>4</sup> ¿Xi ka jani ini ra ja ndi'i xia'un uni yívi ja ni ka ji'i chii torre Siloé na ni nduva siki da, xi ni iyo ga kuachi chaa un ja kuu taka ga yívi kanchuku ñuu Jerusalén nu? <sup>5</sup> Ko na kachi ri ja tuu. Chi ro'o naa ra, nu tu nakani ini ra nuu kuachi ra, ti suni jna'nu ndatu ra ti xnaa ra maa ra —ni kachi ya.

### *Siki nutichi vixi ja tu ja'a tichi*

<sup>6</sup> Yukan ti ni kachi Jesús jnu'un ja'a, ja xna'an ya nau kuu yívi ja tu siuku jnu'un xndaku Yandios:

—Kuu i nanu iin nutichi vixi ja kandichi nuu ñu'un iin yívi, ti chaa xiin un jan nduku da tichi vixi xini yujnu un, ko tundo ni'in da. <sup>7</sup> Yukan na ti ni kachi da jiin chaa ndito ñu'un da un: “Vijna ti ja ni kuu uni kuiya kin nduku ri tichi vixi xini yujnu ja'a, ko tu ja'a ni iin tichi. Ki'in ti ka'ncha ra va'a ga, chi so xnaña'an kandichi nuu ñu'un ja'a”, ni kachi da. <sup>8</sup> Ko ni kachi chaa ndito ñu'un un: “Taa, sia ni na kundichü til'i ga kuiya vijna, na staya na ñu'un ja'a, ti na chi'i na ja'an. <sup>9</sup> Na nde'e yo nu tu kuun tichi xini inga kuiya. Ti nu tuu, ti sa ka'ncha ni”, ni kachi muzu un —ni kachi ya.

### *In kivi ni sa'a Jesús tajna iin ña'an ni kuu ti'i siki*

<sup>10</sup> Ni kuu ja iin kivi ndetatu, kande Jesús ini iin veñu'un Israel ja xna'an ya, <sup>11</sup> ti yukan kande iin ña'an ja, ja ni kuu xia'un uni kuiya ku'u ña. Ja ni kuu ti'i siki ña ni sa'a iin tachi xaan, ti tu kuu kuiti kaka ndaa ña. <sup>12</sup> Ti nu ni jini Jesús maa ña, ni kana ya ña, ti ni kachi ya:

—Ro'o ñasi'i, vijna ti nduva'a ra jiin kue'e ra —ni kachi ya.

<sup>13</sup> Ti ni chuxndee ya nda'a ya xini ña, ti hora ni, ni ndokuiñi ndaa ña. Ti ni keja'a ña nakanajaa ña Yandios. <sup>14</sup> Ko chaa ndiso jniñu ini veñu'un un, ni kuiti ini da, chi Jesús ni sa'a ya tajna kivi ndetatu un. Ti ni kachi da nuu yívi un naa i:

—Iyo iñu kivi ja sa'a yo jniñu, ti nuu iin kivi un kikoyo ra ja nduva'a ra, ti ansu ja kikoyo ra kivi ndetatu ja'a —ni kachi da.

**15** Ko ni kachi Jito'yo jiin da:

—Chaa xnda'u ka kuu ra. ¿Va nu tu ka ndaji ra xndikí ra naa ra xi burru ra ja kin sko'o ra ti nducha iin kivi ndetatu nu? **16** Ti ña'an ja'a ja kuu ña ñanajna'an tata yo Abraham na jana'an, chi na kaa ni ndikun ña xia'un uni kuiya ni sa'a ja'u'u un. ¿Xi tu kuu kenchaa yo kue'e jna'an ña un vijna kivi ndetatu nu? —ni kachi ya.

**17** Ti nu ni ka'an ya sia'an, ti ni kukanuu chaa jito u'u ya un, ko taka ga yivi kua'a un ni ka kusii ini jiin jniñu ña'nú ni sa'a ya un.

### *Jnu'un iin ndikin lulu*

(Mt. 13.31-32; Mr. 4.30-32)

**18** Yukan na ti ni kachi Jesú:

—Na ka'an ri iin jnu'un nuu ra nava kuni ra nasa kuu ja ka nakaya yivi ta'u Yandios jniñu nuu i. **19** Sia'an kuu nanu iin ndikin lulu, ja nu ni xndee iin yivi nuu ñu'un i, ti yukan keja'a ja'nú undi kuu iin yujnu ka'nú xaan, ti yukan ka ja'an saa un ka sa'a ti taka ti nuu nda'a yujnu un —ni kachi ya.

### *Jnu'un levadura*

(Mt. 13.33)

**20** Suni ni ka'an tuku Jesú:

—Sia'an ka nakaya yivi ta'u Yandios jniñu nuu. **21** Kuu i nanu iin levadura ja ki'in iin ñasi'i ti sakantu ña jiin uni kilo yuchi triu, ti sa'a levadura un ja na naijinu ni tu'u chii yujña un —ni kachi Jesú.

### *Yii ja ka kivi yo nuu ta'u Yandios jniñu*

(Mt. 7.13-14, 21-23)

**22** Ichi kua'an Jesú ñuu Jerusalén xna'an ya nuu yivi ini veñu'un Israel taka ñuu nuu ya'a ya kua'an ya. **23** Ti ni kenda iin chaa ni jikajnu'un ya, ti ni kachi da:

—Jito'yo, ¿Jandaa kuu ja jaku ni yivi kuu ja keta'u i nu? —ni kachi da.

Ti ni kachi Jesú:

**24** —Nduku ndee naa ra ti kivikoyo ra ñuu nuu ta'u Yandios jniñu. Nduku ndee ra nanu yivi kuni kivikoyo i iin ve'e nuu iyo iin yux'e'lulu. Chi na kachi ri nuu ra naa ra ja nde kua'a yivi ka kuni kivikoyo i ñuu nuu ta'u ya jniñu, ko tu ka nani'in i ichi, **25** chi maa Yandios nakasi ya yux'e' nava tukaa kivikoyo i. Kasi ya nanu iin chaa xiin ve'e ja ndokuiñi da ti kasi da yux'e' da, ti tukaa kua'a da jnu'un kivikoyo yivi ve'e da. Vasu na kendo i ichi fuera ti kachi i: "Jito'yo, kuni kivikoyo na nuu ta'u ni jniñu." Ko kachi ya: "Tu kuanta'u ri ro'o naa ra, ni tu jini ri naa ichi vekoyo ra naa ra", kachi ya. **26** Yukan ti keja'a ra kachi ra naa ra: "Ko ka jini na maa ni, chi tako yo ni ka yee staa, ti maa ni, ni xna'an ni jnu'un ni nuu ñuu na naa na", kachi ra. **27** Ko maa ya chi kachi tuku ya: "Ja ni kachi ri ja tu jini ri naa yivi ka kuu ra. Kuancha'a naa ra, ro'o ja ka sa'a jniñu ndeva'a naa ra", kachi ya.

**28** Yukan na ti keja'a ra nde'e ra naa ra ti ku'yu jnu'un ra siki jnu'un kui'ya ini. Chi kuni ra nuu chaa jana'an, ja ni ka kuu tata yo, Abraham, Isaac, jin Jacob jiin taka ga profeta jana'an ja ka'iin da nuu ta'u Yandios jniñu, ti ro'o sa su'va kekoyo ra ki'in ra fuera naa ra. **29** Chi chakoyo yivi ka'iin ndi kuun jiki ñuyivi, ichi ninu, ichi vee, ichi nuu kaña ndikandii, jiin ichi nuu kee ndikandii, ti nukoo i ti kaji i ini ñuu nuu ta'u Yandios jniñu. **30** Ko kua'a yivi nda'u ja tu kuña'nú vijna, ti yivi un kuu ja nduña'nú ñuu nuu ta'u Yandios jniñu. Ti kua'a yivi ka kunuu vijna, ti yivi un ndunda'u i nuu ta'u Yandios jniñu —ni kachi Jesú.

*Ni iyo jnu'un kui'ya ini Jesús siki ñuu Jerusalén  
(Mt. 23.37-39)*

<sup>31</sup> Ti suni kivi un ni jakoyo sava chaa fariseo un, ti ni ka kachi da jiin Jesús:  
—Va'a ga ja na kee ra ñuu ja'a ti ki'in ra, chi rey Herodes kuni ka'ni da ro'o  
ni ka kachi da.

<sup>32</sup> Ti ni kachi Jesús jiin da:

—Kuankoyo naa ra nuu Herodes, ja kuu da chaa kua'an, chi kuni ka'ni da  
ndiyi, ti kachi ra jiin chaa un: “Nde'e, vijna jiin ijña keni'in ri tachi xaan un  
kinkoyo, ti isa sa xndil'i ri jniñu un.” <sup>33</sup> Ko siin ri ichi kua'an ri vijna, ijña, jiin  
isa, ¿xi vatuni ja kuu iin profeta Yandios fuera ñuu Jerusalén xino? —ni kachi  
Jesús.

<sup>34</sup> Yukan ti ni kachi ya siki yivi ñuu Jerusalén:

—Ro'o, yivi ñuu Jerusalén, ja ka ja'ní ra profeta najana'an, chaa ni ka'an  
jnu'un Yandios, ti ka ja'a ra yuu siki chaa ka ka'an jnu'un Yandios ja ni taji  
ya. Nasa jinu ni kunda'u ini ri nuu ra naa ra, ja nama ri ro'o nuu nundo'o un  
nanu sa'a chuun ja kana ti se'e kuachi ti ja na ndututu chii ndijin ti, ko tu ni  
ka janta'u ra naa ra. <sup>35</sup> Vijnna na nusa, ti na xndoo ri ro'o naa ra jiin ñuu ra.  
Chi na kachi ri jiin ra ja jankivi ga kuni ra ru'u naa ra undi na jaa kivi ja kachi  
ra naa ra: “Ña'nú na koo maa rey yo, chi Tata yo Yandios ni taji ya maa chaa  
ja ndiso jniñu ña'nú nuu ya”, kachi ra —ni kachi Jesús.

*Ni sa'a Jesús tajna iin chaa ni iin kuiñi*

## 14

<sup>1</sup> Iin kivi ndetatu ni kuu, na ni kana iin chaa fariseo kuña'nu un Jesús, ni jan  
kaji ya staa ve'e da, ti sava ga chaa fariseo un ka jito yu'u da Jesús. <sup>2</sup> Ti nuu  
kande Jesús yukan kande iin chaa ndo'o kue'e kuiñi. <sup>3</sup> Yukan ti ni jikajnu'un  
ya chaa ka xna'an ley Israel un jiin chaa fariseo, ti ni kachi ya:

—¿Kuu sa'a yo tajna iin yivi ku'u ja kuu kivi ndetatu, xi tuu nu? —ni kachi  
ya.

<sup>4</sup> Ti ni ka jasi yu'u yivi un, tukaa ni ka ka'an. Ti maa ya ni jniñi ya chaa ku'u  
un, ni sa'a ya tajna da, ti ni kachi ya jiin da ja na ki'in da. <sup>5</sup> Yukan ti ni kachi  
ya jiin chaa fariseo un:

—¿Nu iin iin ra na kanakava iin se'e ra xi iin xndiki ra ini soko, ti tu tava ra  
ti hora ni, vasu kuu iin kivi ndetatu nu? —ni kachi ya.

<sup>6</sup> Yukan na ti tukaa ni kuu ndeokani chaa un iin jnu'un maa da.

*Yivi ni kaja'an iin viko nanda'a*

<sup>7</sup> Nu ni jini Jesús ja ka nakaji yivi ni ka jakoyo viko un nuu va'a ga ja  
kunchuku i nuu mesa un, ti ni xndaku ya iin jnu'un nuu i, ti ni kachi ya:

<sup>8</sup> —Nu na kana yivi ro'o iin viko nanda'a naa ra, koto nukoo ra nuu sillia  
kanuu ga un, chi tu jini ra xi jaa iin chaa kuña'nu ga ja kuu ro'o, <sup>9</sup> ti chaa ni  
kana ro'o un, kuu kachi da jiin ra: “Kua'a sillia ra na nukoo iinga chaa ja'a.”  
Yukan na ti koñaa ra nuu kanuu, chi kua'a da iin sillia kanchaku undi sandi'i kuiti  
ni ga kuncha ra. <sup>10</sup> Ti va'a ga ja nu na kana yivi ro'o, ti nukoo undi sandi'i ni  
ga, ti nava nu na jaa chaa ni kana ro'o un, ti kachi da: “Amigo, ña'an ti kuncha  
ra undi nuu kanuu ga ja'a”, kachi da. Yukan na ti kuni yivi kanchuku mesa  
jiin ra un ja suni kuu ra iin chaa kuña'nu. <sup>11</sup> Ti yivi kuni kuña'nu, su'va ni'in  
yi jnu'un kanuu, ko yivi kui'ya kaa un, su'va nduña'nu i, chi maa Yandios kuu  
ja sa'a —ni kachi ya.

<sup>12</sup> Yukan ti ni kachi Jesús nuu chaa ni kana ya un sia'an:

—Nu kuni ra kua'a ra iin ndeyu ja kaji yivi, ti koto kana ra iin amigo ra, xi  
ñani ra, xi iin iin jna'an ra, xi iin iin chaa riko kanchuku yajni jiin ra, chi suni

na kana yivi un ro'o, ti yukan nani'in ra ja ni ja'a ra un. <sup>13</sup> Ti va'a ga ja nu na sa'a ra iin viko, ti kana taka yivi nda'u un, yivi tu ka kuu sa'a jniñu, yivi ni ka tiyi un jiin yivi kuaa un. <sup>14</sup> Ti nu sia'an na sa'a ra vasu ja kundatu ra, chi tu kuu chunaa yivi un nuu ra. Ko maa ra, chi nani'in ra taka ja ni ja'a ra un kivi na nachaku ra, ti kuncha ra nuu ka'iin yivi va'a ja ni nakaji Yandios ja kunchuku i, i jiin ya ja kuu saa ni —ni kachi Jesú.

### *Jnu'un #n viko nanda'a*

<sup>15</sup> Nu ni ka jiniso'o yivi jnu'un un, ti ni kachi iin chaa nukoo mesa un jiin Jesú:

—Xaan ndatu yivi kaji i staa ñuu nuu ta'u Yandios jniñu —ni kachi da.

<sup>16</sup> Yukan ti ni kachi Jesú jiin da:

—Sa'a yo nanu siki iin chaa ni sa'a iin viko ka'nú, ni ja'a da iin ja ni kuxini, ti ni kana da kua'a xaan yivi. <sup>17</sup> Nu ni jaa hora kuxini, ti ni taji da chaa ka junukuachi nuu da un, kuan kana da chaa ni kana da un, ti ni kachi muzu da jiin chaa un naa da: "Cho'o naa ra, chi ja ni kuu nakoo ja kuxini yo", ni kachi da. <sup>18</sup> Ko tendi'i chaa un ni ka kanda'u. Undi nuu ni kachi iin da: "San ni jaan ri iin pedazu ñu'un, ti yukan kin nde'e ri, ti kanda'u ri jiin ra ja na saka'nu ini ra nuu ri", ni kachi da. <sup>19</sup> Inga da ni kachi: "San ni jaa ri u'un yunta, ti kuni ri skua'a ri ti. Ja yukan kuu ja saka'nu ini ra nuu ri", ni kachi da. <sup>20</sup> Ti inga da ni kachi: "San ni nanda'a ri, ti ja yukan kuu ja tu kuu ki'in ri", ni kachi da.

<sup>21</sup> Nu ni nandeokuñi muzu un, ni nakani da jnu'un nuu jito'o da ja sia'an ni ka ka'an chaa un. Yukan ti ni kuiti xaan ini jito'o un, ti ni kachi da jiin muzu da un: "Kua'a corri. Kua'an taka ichi ka iyo ñuu yukan, ti kana taka yivi nda'u un, jiin taka yivi tu ka kuu sa'a jniñu un, jiin yivi ni ka tiyi un, jiin taka yivi kuaa un na kikoyo i", ni kachi da. <sup>22</sup> Nu ni kuu na'an ga, ti ni kachi tuku muzu un: "Jito'o na, ja ni ja'an ndi'i na nava ni ta'u ni jniñu, ko nuña ga ini ve'e ni", ni kachi da. <sup>23</sup> Yukan ti ni kachi tuku jito'o da jiin da: "Kua'an tuku taka calle un jiin takicha ichi un, ti chayika yivi na kikoyo i, ti nava na chitu ini ve'e ri. <sup>24</sup> Chi na kachi ri nuu ra naa ra, ja ni iin yivi ni kana ri undi nuu un, tu kuxini da ve'e ri", ni kachi da —kachi Jesú.

### *Ko ndo'o va'a ini yo, sa kundikun yo Cristo (Mt. 10.37-39)*

<sup>25</sup> Ni kuu kua'a xaan yivi kuankoyo i jiin Jesú, ti ni ndeokoto Jesú ja xndaku ya nuu i, ti ni kachi ya:

<sup>26</sup>—Nu nau yivi na kuni kundikun ru'u, ko nu ka ndi'i ga ini i ja kuu tata i, nana i, ñasi'i i, se'e i, ñani i, kua'a i, jiin maa i, ja kuu ru'u, ti na kachi ri ja tukaa ga yi'i i jiin ri. <sup>27</sup> Ti nu tu ka ñukuu ini ra ru'u ja kundikun ra ru'u, ti vasu na kuú ra, ko tukaa ga ndivi ra jiin ri.

<sup>28</sup> Ti nu iin iin ra ka kuni sa'a iin ve'e sukun ja na kundijin kotonchaa ra ni tu'u ñu'un ra, ¿xi ansu jandaa kuu ja xnakan nukoo ra, ti nde'e ra nasa gastu kuu, na ndenu kujaa xu'un ra undi xndi'i ra jniñu un nu? <sup>29</sup> Ti nu na keja'a ra sa'a ra nama ja'a, ti tu sinu ra, ti taka yivi kuni un, keja'a i kuaku i nde'e i ro'o, <sup>30</sup> ti kachi i: "Ni tejna'an chaa un ve'e da ko tu ni sinu da", kachi i.

<sup>31</sup> Xi iin rey kuni da kanaa jna'an da jiin inga rey, ¿xi ansu jandaa kuu ja xnakan nukoo da, ti nde'e da nu kundee uxí mil soldado da ja kinjna'an da jiin oko mil kikoyo jiin inga rey un nu? <sup>32</sup> Ti nu ni jini da ja tu kundee da, ti nu ni jika vajji inga rey un, ti taji da sava chaa ka ndiso jniñu, ja na kin ka'an nda'u jiin chaa un ja na kukuee. <sup>33</sup> Ti suni sia'an kuu jiin ro'o naa ra, nu kuni kundikun ra ru'u, ti kuñu kuu ini ra ja xndoo ra taka ndajniñu ñava'a ra. Xi nu tuu, ti na kachi ri ja tukaa ga yi'i ra jiin ri —ni kachi Jesú.

*Tukaa ga va'a ñii un nu ni xndi'i na nuu u'ua  
(Mt. 5.13; Mr. 9.50)*

**34** Siin Jesúس xndaku ya, ti ni kachi ya:

—Kuanjniñu yo ñii ja kuu nuu ndeyu, ko nu na naa xiko u'ua ñii un, ti tukaa kuajniñu yo, **35** ni vasu ja sakanuu yo jiin ñuu'un, ni ja sakanuu yo jiin ja'an. Tukaa kaxaan. Yukan ti so kacha yo ki'in. Yivi chunso'o, ti na chunso'o va'a i jnu'un un —ni kachi Jesúś.

*Jnu'un ri, kuiti ni sana  
(Mt. 18.10-14)*

## 15

**1** Yukan ni ka tu'va tijni ga yivi nuu Jesúś naa i ja ka ñuso'o i jnu'un ka'an ya. Ti ka'iin chaa ka kinya'u puesto un jiin uu ga yivi ja tu ka siuku ley Israel.

**2** Ti chaa ka xna'an ley Israel un jiin chaa fariseo un ka ka'an da siki Jesúś, ti ni ka kachi da:

—Janta'u chaa ja'a yivi tu siuku ley Israel, ti yaji jna'an da jiin i vasu ka kuu i yivi ka sa'a ndevela'a —kachi naa.

**3** Yukan ti ni jani Jesúś iin jnu'un ja xndaku ya nuu yivi un, ti ni kachi ya:

**4** —Nu iin ra ñava'a iin ciento ri, ti skuita ra iin ti, ¿ti va nu tu xndoo ra ndi'i kuun xiko xia'un kuu ga ti un yuku un, ti kin nunduku ra kuiti ni skuita ra un undi nu tu nani'in ra ti xino? **5** Ti nu na nani'in ra ti, ti kusii ini ra, nachuxndee ra ti nuu soko ra, ti kuano'on ra jiin ti. **6** Nu ni najaa ra ve'e ra, ti nastutu ra amigo ra jiin ñanijna'an ra, ti kachi ra: “Na kusii ini yo, chi ja ni ndenda ri ni skuita ri un”, kachi ra. **7** Ti na kachi ri jiin ra naa ra ja suni sia'an iyo jnu'un sii ini nuu andivi nuu kancha Tata yo Yandios jiin iin yivi ja ni nakani ini i nuu kuachi i, ansu jiin kuun xiko xia'un kuun yivi ja ka ndo'o ini i ja tu iyo kuachi i, ti ka ndo'o ini i ja tu nii kuu ja nakani ini i nuu kuachi i —ni kachi Jesúś.

*Siki ña'an ni skuita xu'un*

**8** Siin Jesúś xndaku ya, ti ni jani ya iin jnu'un sia'an:

—Jikajnu'un ri nuu ra naa ra. ¿Nu iin ñasi'i yijni ña uxi xu'un plata ti skuita ña iin, xi ansu jandaa kuu ja skui'kuun ña yiti ña, ti vyi vyi najistá ña undi nuu tu nani'in ña xu'un ña nu? **9** Nu ni ndenda xu'un ña un, ti nastutu jna'an ña, jiin amigo ña, jiin ñanijna'an ña ja kanchuku yajni un, ti kachi ña: “Na kusii ini yo vijnal, chi ja ni ndenda xu'un ni skuita ri un”, kachi ña. **10** Ti na kachi ri ja suni sia'an kusii ini ángel ka junukuachi nuu Yandios jiin iin yivi, ja nu ni nakani ini i nuu kuachi i —ni kachi Jesúś.

*In suchi ni naa, ti ni ndenda i*

**11** Siin Jesúś xndaku ya, ti ni jani ya iin jnu'un sia'an:

—In chaa ni iyo uu se'e da, **12** ti chaa suchi ga un ni kachi da jiin tata da: “Taa, kua'a na ti'l'i ta'u na, ti'l'i ñuu'un jiin xu'un na kuu na”, ni kachi da. Yukan ti ni chunsava tata da un ta'u da naa da. **13** Jaku ni kivi, ti ni xiko chaa suchi un ta'u da ja ni ja'a tata da un, ti jiin xu'un un kua'an chaa un, kuan kuikonuu da inga ñuu, ti yukan ni xnaa ndevela'a kuiti da xu'un da. **14** Nu ja ni ndi'i xu'un da ni xnaa da, ti kuiya un ni iyo iin jnama xaan tonto ñuu yukan, ti chaa un ni keja'a ja'i da soko.

**15** Yukan ti ni kee da ni jan nduku da jniñu nuu iin chaa ñuu yukan, ti chaa un ni taji da chaa kuan koto da kini. **16** Ko ni keja'a ja'i xaan da soko, ti kuni da kají da, nde'e da ka yee kini un, ko tu ni iin yivi ja kua'a ja kají da. **17** Yukan ti ni keja'a da ndo'o ini da: Iin kua'a muzu ve'e tata yo ja tu kumaní staa kají da, ko maa yo, kande yo ja'a, ndo'o nene yo ti ji'i xaan yo soko ja kuni kuú yo.

**18** Va'a ga na nandeokuñi yo nuu tata yo, ti na kachi yo jiin da: Taa, ni chaa kuachi na maa na nuu Yandios, ti suni nuu maa ni. **19** Yukaa ga sa'a ni nanu ja kuu na se'e ni, chi sa'a ni nanu ja kuu na iin muzu ni. Sia'an ndo'o ini da ja kachi da jiin tata da.

**20** Yukan ti ni ki'in da ichi, ti kuano'on da nuu kancha tata da. Ti jika ga kua'an da, ti ni jini tata da nuu da, ti ni kunda'u ini da se'e da. Ni ja'a da corri, ni janujna'an da chaa, ti ni ka nanuu jana'an da, ti ni ka teyu'u nuu jna'an da. **21** Yukan na ti ni kachi se'e da un: "Taa, ni chaa kuachi na maa na nuu Yandios, ti suni nuu maa ni. Tukaa ga sa'a ni nanu ja se'e ni kuu na", ni kachi da. **22** Ko chaa ña'nun un, ni kachi da jiin muzu da ka junukuachi nuu da un: "Yachi ro naa ra, tava iin sa'ma va'a ga yukan, ti na skui'na ra da naa ra. Suni nachi'l iin xe'e xini nda'a da, ti nachi'l i ra ndijña da naa ra. **23** Kuan ki'in chelu ni neñu un, ti ka'nir a naa ra. Na sa'a yo iin viko, ti na kaji yo naa yo! **24** Chi ni ndo'o ini ri ja, ja ni ji'i se'e ri ja'a, ko nanu ja ni nandoto da, chi ni ndenda tuku da. Ni skuita ri da, ko ni nani'in ri da", kachi da. Ti ni ka keja'a da ni ka sa'a da viko naa da.

**25** Ti se'e da chaa ña'nun ga, kande da nuu jniñu, ti nu ni nandeokuñi da ja'i ni, ni kuyajni da ve'e, ti ni jiniso'o da kuu yaa, ti ka jitaja'a yivi. **26** Yukan ti ni kana da iin chaa kuu muzu un, ti ni jikajnu'un da chaa ndoo kuu un. **27** Ti chaa un ni kachi da: "Tuu, chi ñiani ra ni nchaa, ti ni ta'u tata ra jniñu ja na kuu chelu ni neñu un, chi ni nchaa va'a da", ni kachi muzu un. **28** Ti chaa ña'nun un ni kuiti ini da, ti tu kuni da ndivi da ve'e da. Ti yukan ni kee maa tata da un, ni jan ka'an da jiin da ja na ndivi da. **29** Ti ni kachi da jiin tata da: "Ja jini ni nasa ja ni kuu kuiya junukuachi na nuu ni, ti ni iin kivi tu kuni'in ini na nuu ni, ko ni ti kua'a ga ni vasu iin ndixi'yu nuu na ja sa'a na iin viko jiin amigo na. **30** Ti vijna ni nchaa inga se'e ni ja'a ja ni ja'an xnaa ndeva'a xu'un ni jiin ña'an siñini, ti ni ja'nir ni chelu ni neñu un ja na sa'a ni viko da", ni kachi da. **31** Yukan ti ni kachi tata da un jiin da: "Ro'o, suni se'e ri kuu ra, ti taká ja ñava'a ri ja'a kuu ja kuu maa ra, chi ndi kivi kancha ra jiin ri. **32** Ko vijna chi kanuu ja na sa'a yo iin viko siñini, chi ñiani ra ja'a, ja ni ji'i da, ti nanu ja ni nandoto da chi ni ndenda tuku da. Ja ni ka skuita yo da, ko ni ka nani'in tuku yo da", ni kachi chaa ña'nun un —kachi Jesús.

### *Muzu ni junukuachi ndeva'a (Mt. 6.24)*

## 16

**1** Yukan ti ni xndaku Jesús nuu ndaja'a ya, ti ni kachi ya:

—In chaa riku, ni iyo iin muzu da ja ndiso jniñu nuu inga muzu, ko ni ka jani yivi jnu'un nuu da ja ni keja'a xnaa ndeva'a chaa un ja ñava'a chaa riku un. **2** Yukan ti ni kana chaa riko un muzu da un, ti ni kachi da jiin da: "¿Ndoó kuu ja ka jani yivi jnu'un ra sia'an? Nakua'a jnu'un taká jniñu ra, ti tukaa ga siin ra kuu ra muzu ri vijna na", ni kachi da. **3** Yukan na ti ni keja'a ndo'o ini chaa kuu muzu un: "¿Nasa sa'a yo vijna na, ja nu na kenchaa jito'o yo jniñu yo? Ti maa yo, tu kundee yo kutu yo nuu ñu'un yo ja kuchaku yo. Ti kukanuu yo kakan yo caridad", ni ndo'o ini da. Ko ni nakani tuku ini da sia'an: **4** "Su'va na sa'a yo sava'a ni ga kivi na kenchaa da jniñu ndiso yo, ti nava na koo mani yivi ñuu yo jiin yo, ti kuu kivi yo ini ve'e i. Ja jini yo nasa sa'a yo vijna", ni ndo'o ini da.

**5** Yukan ti ni kana da ndi iin ndi iin chaa ka tau nuu jito'o da. Ti ni kachi da jiin iin da: "¿Nasa tau ra nuu jito'o ri?" ni kachi da. **6** Ti ni kachi chaa un: "Tau ri uni mil litro aceite", ni kachi da. Yukan ti ni kachi muzu kuñanu ga un: "Ja'a iyo tutu ra ja tau ra un, nukoo ti vijna sa'a ra inga ja iin mil sava ni

ga", ni kachi da. <sup>7</sup> Yukan ti ni jikajnu'un da ñinga chaa, ti ni kachi da: "Ti ro'o, ¿Nasa tau ra nuu da nuu"? ni kachi da. Ti ni kachi chaa un: "Tau ri iin ciento nundoo triu", ni kachi da. Ti ni kachi tuku chaa kuu muzu kuña'nu un: "Ja'a iyo tutu ra ja tau ra un, ko sa'a tuku inga ja kuun xiko ni ga", ni kachi da.

<sup>8</sup> Yukan ti ni ni'in jito'o un jnu'un siki muzu xndofña'an un ja, ja ni ndu vivo da jiin jna'an da, chi vivo xaan ni ka ndajnu'un da jiin jna'an da un. Sia'an ni sa'a chaa un chi jandaa kuu ja yivi ñuyivi ja'a, ka kuu vivo ga i jiin jniñu ka sa'a jna'an i, ti ansu yivi ka kandixia jnu'un Yandios. <sup>9</sup> Ko na kachi ndaa ri nuu ro'o naa ra, ja ka kuu ra ndaja'a ri, ja ka sa'a ra mani jniñu va'a jiin taká ja ñava'a ra. Ti kua'a ra jaku ja ka nandi'i yivi nda'u nava na ndumani i jiin ra. Yukan ti nu ni ndi'i ja ñava'a ra nuu ñuyivi ja'a, ti kuaja ra andivi, ti yukan, taká yivi nda'u ni chindee ra ñuyivi ja'a, na kua'a i jandaa ja ni ka chindee ndixia ra i.

<sup>10</sup> Sa'a yo nanu. Taka yivi ka sa'a niña jniñu va'a jiin jaku ja ka ñava'a i ja ka chindee i ñinga yivi, suni sia'an na sa'a va'a i nu iin kua'a ndajniñu i ja chindee i ñinga yivi. Ko nu tu sa'a i jniñu va'a ja chindee i ñinga yivi jiin jaku ja ka ñava'a i, ti suni sia'an tukaa ga na sa'a kuiti i jniñu va'a nu ñava'a i kua'a ndajniñu. <sup>11</sup> Ti nu tu ni sa'a ra ja va'a ja chindee ra ñinga yivi ñuyivi ja'a, ti koto ma tatu ga Yandios ro'o jiin jniñu ña'nú ja kuu nuu ni kani andivi. <sup>12</sup> Ti nu tu sa'a ra jniñu va'a jiin taká ja ni ja'a ya nuu ra ñuyivi ja'a, ti koto ma tatu ga Yandios ro'o jniñu ña'nú ja kuu saa ni.

<sup>13</sup> Yukan na kachi ri nuu ra naa ra ja ni iin muzu tu kuu kuanukuachi nuu uu jito'o, chi kendo va'a jiin iin da, ti kendo kui'ya i jiin ñinga da. Ni tu kuu kuanukuachi i nuu Yandios, ti kundio ini i xu'un jiin ñu'un. Ja yukan kuu ja tu kuu kuanukuachi ra nuu Yandios, ti kuñukuu ini ra ni'in ra xu'un jiin ñu'un —ni kachi Jesús.

<sup>14</sup> Ti chaa fariseo un naa da, ni ka skee ichi da ya nu ni jiniso'o da jnu'un ni ka'an Jesús, chi tindi da xu'un naa da. <sup>15</sup> Yukan ti ni kachi Jesús jiin da:

—Ro'o naa ra, chi ka kuni ra ja na ka'an yifñu'un xaan yivi nuu ra ja chaa ndaa ka kuu ra. Ko Yandios, ja jini ya nasa kaa ichi ini ra. Chi vixi iní ra jiin taká jniñu ka sa'a ra, ti ja kuu nuu Yandios kuu mani jniñu kue'e jiin jniñu ndeva'a —ni kachi ya.

### *Nasa ni keja'a jniñu ta'u Yandios*

<sup>16</sup> Siin Jesús xndaku ya, ti ni kachi ya:

—Undi naa jana'an ni kii Juan, chaa ni skuanducha, ti ni keja'a ka'an da jnu'un Yandios. Ti undi naa ni kii Juan ni ta'u Yandios jniñu nuu ra naa ra jiin ley ni ja'a ya nuu Moisés, chaa ni kii na jana'an jiin uu ga profeta ni ka kii na jana'an. Ko vijnna, ti Juan nu ni keja'a ka'an da iin jnu'un jaa, ni jani da jnu'un siki nasa janta'u Yandios yivi naa i, ti kuu kivi i nda'a ya. Ti kua'a yivi ni ka ndusii ini i ja ni ka jiniso'o i jnu'un un. Vijnna ti kua'a yivi ka janta'u i jnu'un ri, ja na kuu kivi i nda'a Yandios.

<sup>17</sup> Ko vanuxia ja iyo iin jnu'un jaa vijnna. Na kachi ndaa ri nuu ra naa ra, ja yachi ga naa andivi jiin ñuyivi ti ansu ja na kenchaa iin letra nuu ley ni ja'a ya nuu Moisés jiin uu ga profeta. Ko jnu'un ka'an ley un, chi tu naa kuiti. <sup>18</sup> Ja yukan kuu ja nu iin chaa na xndoo da ñasi'i da, ti nanda'a da jiin ñinga ñasi'i ti nchakuachi da, chi yisiki nchaa da ñasi'i da. Ti suni nu iin chaa na nanda'a jiin iin ña'an ni xndoo yii, suni nchakuachi da —ni kachi Jesús.

### *In chaa riko jiin Lázaro*

<sup>19</sup> Siin Jesús xndaku ya, ti ni kachi ya:

—Sa'a yo nanu. Ni iyo iin chaa riku xaan ja taká kivi sa'a da viko ka'nú, ja va'a xaan sa'a da viko un, ti ñu'un da niña sa'ma va'a, sa'ma fina. <sup>20</sup> Ti suni

ni iyo *iin* chaa nda'u xaan tonto ja ni nani Lázaro, ti jan nukatuu da yux'e chaa riko un, ti ni tu'u da *iin* ndiy'i. <sup>21</sup> Ti chaa nda'u un, *nini* ji'i xaan da soko, ti kuni da kají da vasu sava'a ni ga ndeyu ja nukoyo yu'u mesa chaa riku un. Ti undi ina un ka tu'va ti nuu da, ti ka nayuu ti nuu ndiy'i da un. <sup>22</sup> Yukan ti ni jaa kivi ja ni ji'i chaa nda'u un, ko ni jakoyo ángel Yandios ti kuankoyo ya jiin da nuu andiv'i un ja na kuncha da jiin chaa ni kuu tata yo na jana'an ni nani Abraham. Ti chaa riku un suni ni ji'i da, ti ni jakununduji da. <sup>23</sup> Ti nu ni keja'a ndo'o da nundo'o nuu ka'iin ndiy'i un, ni ndokani da xini da, ti ni nde'e da ja jika ti'lí, ti yukan ka'*iin* Abraham jiin Lázaro. <sup>24</sup> Yukan na ti ni kanajii da, ni kachi da: "Tata na Abraham, kunda'u ini ni saña. Kachi ni jiin Lázaro na kin chutoo da ti'lí xini nda'a da nuu nducha, ti na kii stoo da ti'lí nuu yaa na, chi ndo'o xaan na nundo'o nuu yaa ñu'un ja'a", ni kachi da. <sup>25</sup> Ti ni kachi Abraham jiin da: "Hijo, nuku'un ini ja va'a xaan ni kuncha ra nuu ñuyivi, ti Lázaro chi nda'u xaan ni jna'an da. Ko vijna chi iyo jnu'un ndee ini jiin da ja'a, ti ro'o ko ndo'o ko nene ra. <sup>26</sup> Ko vijna iyo *iin* xa'va ka'nu ma'ñu nuu ka'iin yo ja'a, ja yukan kuu ja tu kuu ya'a yivi ka'iin jiin ri ja'a jiin nuu ka'iin ra jña. Ni yivi ka'iin jiin ra jña tu ku ya'a i nuu ka'iin ri ja'a", ni kachi Abraham.

<sup>27</sup> Yukan na ti ni kachi chaa riku un: "Ka'an nda'u na jiin ni, tata na Abraham. Taji ni Lázaro na ki'in da ve'e tata na, <sup>28</sup> chi yukan kanchuku u'un ga ñani na. Ti na xndaku da nuu da naa da nava tu kikoyo da ja'a, chi iyo xaan ga kaa nundo'o jito na ja'a", ni kachi da. <sup>29</sup> Ko ni kachi Abraham jiin da: "Ka ñava'a da tutu ni chaa Moisés jiin jnu'un ni ka chaa profeta na jana'an, ti nuu jnu'un un na chu'un ini da", ni kachi da. <sup>30</sup> Ti ni kachi tuku chaa riku un: "Jandaa kuu un, tata na Abraham, ko nu *iin* ndiy'i na nandoto ti ki'in nuu kanchuku da, ti va nakani ini da naa da", kachi da. <sup>31</sup> Ti ni kachi Abraham jiin da: "Ko nu tu ka kandixia da jnu'un Yandios ni ka'an tutu ni chaa Moisés, jiin jnu'un ya ja ni ka chaa profeta na jana'an, ti suni tu kandixia kuiti da vasu na nandoto *iin* ndiy'i ti ki'in nuu da", ni kachi Abraham —ni kachi Jesús.

*Ja sa'a ja kuncha kuachi yo*  
(Mt. 18.6-7, 21-22; Mr. 9.42)

## 17

<sup>1</sup> Siin Jesús xndaku ya nuu ndaja'a ya, ti ni kachi ya:

—*Nini* iyo *iin* jniñu sa'a ja na kunchakuachi yivi naa i, ko *iin* nundo'o ka'nu xaan kundatu yivi ja skanakava jna'an i nuu kuachi. <sup>2</sup> Va'a ga na kundikun sukun i jiin yoso molino, ti na ki'in i chii nducha, ansu ja xnda'u i *in* suchi lulu ja koto ma kandixia i ru'u.

<sup>3</sup> Koto va'a ra maa ra. Nu na sa'a ndeva'a ñani ra siki ra, ti ndajnu'un ra jiin da siki ja ni sa'a da un. Ti nu nakani ini da, ti kuanka'nun ini nuu da. <sup>4</sup> Vasu uxia jinu na sa'a ndeva'a da siki ra *in* kivi, ti ndi uxia jinu un jaa da ti kachi da: "Tukaa ga ndoo sa'a ri nuu ra vijna na", kachi da. Ti kuanka'nun ini nuu da —ni kachi Jesús.

*Ja na kandixia ni ini yo*

<sup>5</sup> Yukan ti apóstol, chaa ni nakaji ya ja kundiso jniñu un, ni ka kachi da jiin Jito'yo Jesús:

—Sa'a ni ja na kandixia ni ini ga na taká jniñu ja ta'u ni nuu na —ni ka kachi da.

<sup>6</sup> Yukan ti ni kachi Jesús jiin da:

—Nu kandixia ndaa ra, vasu ku'va iin ndikin lulu, ti kuu kachi ra jiin yujnu ja'a: "Kuxio nuu kandichi ra ja'a ti kua'an nuu mar un kundichi ra", kachi ra naa ra, ti yujnu un chi kuandatu i nuu ra naa ra —ni kachi ya.

### *Jniñu sa'a chaa junukuachi*

**7** Siin Jesús xndaku ya nuu ndaja'a ya, ti ni kachi ya:

—Sa'a yo nanu. Nu iin iin ra ñava'a iin muzu ja sajniñu, ko tu ni'l'in da ja kuu ya'u da, ti chaa un kin sa'a da jniñu, xi kin koto da xndiki ti nchaa da, ¿xi va nu kachi ra jiin da sia'an naa ra? "¿Kuan ya'a ti nukoo ra kaji ra staa un xino?" **8** Jandaa ni kuu ja tuu, chi su'va kachi ra jiin da: "Sava'a ja na kuxini ri, ch'u'un ra ndeyu kaji ri, ti ch'u'un ra nducha na ko'o ri xnakan, ti sa kuu nukoo ra ti kee ra staa." **9** ¿Xi va nu nakuanta'u ra nuu muzu ra un, ja ni sa'a da taka jniñu ni ta'u ra nuu da un nu? Jandaa ni kuu ja tuu. **10** Ti suni sia'an ro'o naa ra, nu ni ndi'i ni ka sa'a ra taka jniñu, ti tu nduvixi ini ra naa ra, ti kachi ra: "Tu kanuu ja nakuanta'u ya nuu yo, chi sa nini jniñu ni ta'u ya ni ka sa'a yo naa yo", kachi ra naa ra —ni kachi Jesús.

### *Ni sa'a Jesús tajna uxi chaa ni ka jna'an kue'e ndi'yí te'yú*

**11** Nu ni siin Jesús ichi kua'an ya ichi ñuu Jerusalén, ni ya'a ya ñu'un ñuu Samaria jiin Galilea. **12** Nu ni jaa ya iin rancho, ti yukan ka janujna'an uxi chaa ni ka jna'an kue'e ndi'yí te'yú ya. Ni ka jankuñi jika da ti'l'i, **13** ti ni ka kanajiin da sia'an naa da:

—¡Jesús! ¡Maestrol Kunda'u ini ni saña naa na —ni ka kachi da.

**14** Nu ni jini Jesús da naa da, ti ni kachi ya:

—Kuan stuu maa ra nuu sutu Israel un naa ra —ni kachi ya.

Ni kuankoyo da naa da, ti ni ka ndundoo da jiin kue'e ka jna'an da un. **15** Ti iin da, nu ni jini da ja, ja ni ndundoo kue'e da un, ni nandeokuñi da, kanajiin da nakanajaa da Yandios. **16** Ni jakunjiti da nuu Jesús, ni sinu da nuu da undi nuu ñu'un ja nakuanta'u da nuu ya. Ti maa iin ni chaa un ni kuu iin chaa ñuu Samaria.

**17** Yukan ti ni ka'an Jesús:

—¿Xi ansu ka iyo uxi jna'an ra ja ni ka ndundoo jiin kue'e ka jna'an ra un nu? ¿Nanu ka'iin uu ga jna'an ra un naa da? **18** ¿Xi maa iin ni chaa ñuu jika ja'a kuu ja ni nandeokuñi ja nakanajaa da Yandios nu? —ni kachi ya.

**19** Yukan ti ni kachi ya jiin chaa un:

—Ndokuñi ti kua'an, chi ja ni nduva'a ra ti kendo ndaa ra nuu Yandios, chi ni kandixia ndaa ra ru'u —ni kachi ya.

### *Nasa kuni yo jniñu ta'u Yandios*

(Mt. 24.23-28, 9.17-18, 36-41;

Mr. 13.6-9, 15-16; Lc. 21.8-12, 21)

**20** Chaa fariseo un ni ka jikajnu'un da Jesús nama kuu ja keja'a Yandios ta'u ya jniñu nuu ñuu da naa da, ti ni kachi ya jiin da:

—Na chaa jniñu ta'u Yandios, ko tu kuni ndijin ra nasa keja'a ya ta'u ya jniñu un. **21** Ti tu kuu kachi ra: "Ja'a kande", xi kachi ra: "Yukan kande." Chi na kachi ri ja, ja ni chaa ñin ja ta'u jniñu nuu ra naa ra —ni kachi ya.

**22** Yukan sa ni kachi ya jiin chaa ka skua'a jiin ya:

—Jaa iin kivi ja kundiyo ini ra naa ra ja maa Se'e Yívi Ñuyiví na ndenda ya nuu ra, ko tukaa ga kuni ra maa chaa un. **23** Ti kachi yívi jiin ra naa ra: "Ja'a kande ya", xi kachi: "Yukan kande ya." Koto ma kandixia ra naa ra jnu'un un. **24** Chi kivi nchaa maa Se'e Yívi Ñuyiví, ti kuni ndijin ra naa ra nanu sa'a nu janducha, ti ndinchaa ni tu'u undi nuu kaña ndikandii jiin undi nuu kee ndikandii. **25** Ko xnakan kuu yaku ri nuu ñuyiví ja'a, ti kondo'o koo nene ri,

chi vijna tu kuanta'u yivi ūyivi ja'a ru'u. <sup>26</sup> Chi nanu ni iyo kivi ni chaku Noé, chaa ni kii na jana'an, ti suni sia'an kuu nu na jaa kivi nchaa maa Se'e Yivi ūyivi. <sup>27</sup> Ni kunchuku datu yivi naa i nani kuncha Noé, chi ka ndo'o ini i ja kukuee nuu i naa i. Ka yaji i, ti ka ji'i i, ka nanda'a i, ti ka ja'a i se'e si'i i ka nanda'a ūnaa ūna, undi ni jaa kivi nu ni kivi Noé ini barco ka'nu da. Ko nu ni kuun ūin sau xaan un, ti ni ka naa i. <sup>28</sup> Ti suni sia'an ni kuu na ni chaku Lot. Ni kunchuku datu yivi. Ka yee i, ka ji'i i, ka jaan i sava'n'i ga ndajniūn, ti ni ka xiko i, ka sa'a i jniūn, ti ka sa'a i ve'e i naa i. <sup>29</sup> Ko nu ni kee Lot yu'u ūnu Sodoma, ti ni jinu ūnun jin azufre ja ni kii ichi andivi, ti ni ndi'i ni yivi un ni ka ji'i. <sup>30</sup> Ti suni sia'an kuu nu na jaa kivi ndenda maa Se'e Yivi ūyivi.

<sup>31</sup> Ti ja kuu kivi un, yivi ka ndetatu i yux'e i, koto ma ki'in i ūin ndajniūn i ini ve'e i, ti na kunu xaan i naa i. Ti yivi ka'uiin nuu jniūn, koto ma ndeokuūn i ve'e i ja stutu i ni ūin ndajniūn i. <sup>32</sup> Ti nuku'un ini naa ra nasa ni ndo'o ūnasi'i Lot ja sa naa ni ti ni ji'i ūna. <sup>33</sup> Chi taka yivi ja kuni nama i maa i ūyivi ja'a, ti tukaa nanita'u i nuu Yandios ja kuu saa ni. Ti taka yivi vasu na kuu i ja siki ru'u, ko yukan kuchaku i ja kuu saa ni. <sup>34</sup> Na kachi ri nuu ra naa ra nasa kuu ja kuu kivi un. Ti nu ka kixi uu yivi ūnu ūin jito jakuaa un, ti ūin ni ki'in, ko inga chi kendo. <sup>35</sup> Ti koo uu ūnasi'i ka ndiko nduu ūna; ūn ūna ki'in ri jin, ti kendo inga ūna. <sup>36</sup> Nu uu chaa ka'iin yuku xi nu ka sa'a da jniūn, ūn da ki'in ri jin, ti kendo inga da —ni kachi Jesú.

<sup>37</sup> Nu ni ndi'i ni ka ūuso'o ndaja'a Jesú, yukan na ti ni ka jikajnu'un da ya:  
—¿Ti nanu kuu nu kuu sia'an Jito'yo? —ni kachi da.

Ti ni kachi Jesú:

—Ndijin ndaa nde'e yo ka kututu tiji nuu katuu kuiti ni ji'i. Ti suni sia'an ndijin ndaa nde'e yo nu ndenda maa Se'e Yivi ūyivi —ni kachi Jesú.

### Jnu'un ūn ūna'an ni kendo maa ūn jin ūn juez

## 18

<sup>1</sup> Yukan ti ni jani Jesú jnu'un nuu chaa ka skua'a jin ya, ja kanuu ga ja tu xndoo da jnu'un kakanta'u da nuu Yandios, ja na koo ndee ini da ti siuku da taka jniūn tatu ya nuu da naa da. <sup>2</sup> Ti ja ni xndaku ya yukan nuu da, ti ni jani ya ūn jnu'un sia'an:

—Ni iyo ūn ūnu nuu ni iyo ūn juez ja tu chiñu'un da jnu'un Yandios, ni tu jandatu da nuu ni ūn yivi. <sup>3</sup> Ti suni ūnu yukan ni iyo ūn ūna'an maa ūn. Ti ūna'an un ja'an ūna, ja'an ūna nuu juez un, kanda'u ūna jin da ja na nama da ūna nuu ūn yivi ka kanaa jin ūna. <sup>4</sup> Ni kuu na'an ja'an ūna, ko tu kuni juez un sa'a da justicia. Ko ni jaa ūn kivi, ti ni nakani ini da ti ni ndo'o ini da: “Vasu tu chiñu'un yo Yandios, ni tu sa'a yo nanu nuu ni ūn yivi, <sup>5</sup> ko ūna'an ja'a ni kuu nuu nuu xnaña'an ūna nuu yo. Va'a ga ja na nama yo ūna, ti nava tukaa ga kiji ūna chi so skuiti ūna ini yo”, ni ndo'o ini da —kachi Jesú.

<sup>6</sup> Ti ni kachi tuku Jito'yo Jesú:

—Yukan kuu jnu'un ni ndo'o ini juez un ja tu va'a ini da, ti ni nama da ūna'an un. <sup>7</sup> Ti suni sia'an sa'a Yandios ja kuu taka yivi ka kandixia ja ni nakaji ya, ja kuu nduu kuu ūnu ka kanda'u i jin ya. Ti jandaa ni kuu ja tu kukuee ya nama ya maa i. <sup>8</sup> Na kachi ri ja tu kundatu ra, chi nama ya siki ra. Ko nu na jaa kivi nchaa maa Se'e Yivi ūyivi, ti na nde'e yo nu kuni ya yivi ka siuku ndaa i jnu'un ya, ja ka kandixia ndaa i maa ya xi tuu —ni kachi ya.

### Jnu'un siki ūn chaa fariseo jin ūn chaa kinya'u puesto

**9** Ti nuu ka'iin tijni chaa vixi ini, ja ka sa'a yiñu'un da maa da, ti ka skee ichi da ñanijna'an da. Ti nuu chaa un ni ka'an Jesús jnu'un ja'a:

**10** —Uu chaa ni ka ja'an siin da veñu'un ka'nú Israel ja ka jikanta'u da nuu Yandios. In da kuu chaa fariseo, ti inga da kuu chaa kinya'u puesto.

**11** Chaa fariseo un chi kandichi da jikanta'u da, ti kachi da: "Ni'in Yandios, nakuanta'u na nuu ni ja tukaa na nanu kanda sava yivi naa i, ja ka sakui'na i, kanda kua'an i, ti ka nchaka i uni kuun ñasi'i, ni tukaa na nanu kaa chaa kinya'u puesto ja'a. **12** Uu jinu kendo ndicha ini na iin semana, ti ja'a na ti'li ti'li nuu taka ja ni'l'in na nuu ni'in Yandios", ni kachi chaa fariseo un. **13** Ti chaa kinya'u puesto un, chi jika ni kandichi da nuu chaa fariseo un, ti ni tu ni tava ini da ndakoto da ichi andivi, chi so ni keja'a kani da nda'a da jika da, ti kachi da: "Ay Yandios, kuanka'nú ini ni nuu na, chi kuu na iin chaa nchakuachi", ni kachi da. **14** Ti na kachi ri nuu ra ja chaa kinya'u puesto un, ni janka'nú ini Yandios nuu kuachi da ja ni kendo va'a da nuu ya, sa kuan no'on da ve'e da. Ti chaa fariseo un, chi tuu. Yukan, na kachi ndaa ri ja taka yivi sa'a ya yiñu'un i maa i ja kuni kuña'nú i, ti su'va ka ndukui'ya ini i. Ko yivi ja kukui'ya ini un vijna su'va nduña'nú i, chi maa Yandios sa'a —ni kachi Jesús.

### *Jesús jiin suchi kuachi*

(Mt. 19.13-15; Mr. 10.13-16)

**15** Yukan ti ni ka yinda'a yivi suchi kuachi nuu Jesús ja na chuxndee ya nda'a ya xini i. Ko nu ni ka jini ndaja'a ya, ti ni ka keja'a ka nduxaan da jiin yivi un. **16** Ko ni kana Jesús ja na tu'va suchi kuachi un nuu ya, ti ni kachi ya jiin ndaja'a ya:

—Sia naa ra na kikoyo i nuu ri ti tu kasí ra naa ra. Chi taka yivi ja kuni kivi nda'a Yandios ja na ta'u ya jniñu nuu i, ti kuni ja na kivi i nanu suchi kuachi ja'a. **17** Na kachi ri nuu ra naa ra ja tu yii kuanta'u iin suchi lulu jnu'un Yandios ja na ta'u ya jniñu nuu i, ti ansu iin yivi ña'nu ja, ja ni kuni'in ini, ti tu ka kuni kivi i nda'a Yandios ja na ta'u ya jniñu nuu i —kachi ya.

### *In chaa riko*

(Mt. 19.16-30; Mr. 10.17-31)

**18** Yukan ti iin chaa kuña'nú un ni jikajnu'un da Jesús:

—Chaa va'a kuu ni, maestro. Ti kachi ni, ¿naa jniñu va'a sa'a na ti ni'in ta'u na ja kuchaku na sia'an ni nuu andivi ja kuu saa ni? —kachi da.

**19** Ti ni kachi Jesús:

—Ndoo ka'an ra ja chaa va'a kuu ri, ti tu ni iin chaa va'a iyo, chi maa iin ni Yandios iyo. **20** Ja jini ra jnu'un ta'u Yandios nuu yo: "Tu kunchaka ra tijni ñasi'i. Tu ka'ní ra ndiyi. Tu sakui'na ra. Tu chakuachi ra yivi. Kuandatu nuu tata ra, nuu nana ra" —ni kachi ya.

**21** Ti ni kachi chaa riko un:

—Ja ni ndi'i un ni jandatu na undi lulu na —ni kachi da.

**22** Ja sia'an ni ka'an da, ti ni kachi Jesús jiin da:

—Ko iyo inga jniñu kumaní ja sa'a ra. Xiko ndi'i ja ñava'a ra ti kua'a nuu yivi nda'u. Yukan na ti sa ni'in ra ta'u ra undi andivi. Yukan na ti sa kii ra na cho'o —kachi ya.

**23** Nu ni jiniso'o chaa un ja sia'an ni kachi Jesús, ni kukui'ya xaan ini da ti kua'an da, chi vanuxia chaa riko xaan kuu da. **24** Ti nde'e Jesús nuu da ni kee da kua'an da, ti ni kachi ya jiin uu ga yivi un:

—Yii xaan ja kuu iin chaa riko ja na xndoo da ichi maa da, ti kivi da nda'a Yandios ja na ta'u ya jniñu nuu da. **25** Jandaa ndixia ja va yachi ga ya'a iin camelli yau iin yiki tikui, ti ansu ja kivi iin chaa riko nda'a Yandios ja na ta'u ya jniñu nuu da —ni kachi ya.

**26** Yukan na ti yivi ni ka jiniso'o un ni ka kachi:

—Nusa, ¿ti nau kuu ja nanita'u nu? —kachi da naa da.

**27** Ti ni kachi Jesús:

—Ni iin yivi tu kuu sa'a un, ko Yandios chi taka ni ja kuu sa'a ya —ni kachi ya.

**28** Ti ni kachi Pedro:

—Saña naa na, ni ka xndoo na taka ja ka ñava'a na ti vekoyo na jiin ni —ni kachi da.

**29** Yukan ti ni kachi Jesús:

—Na kachi ndaa ri sik'i nasa kuu jiin yivi ja kuni kivi i nda'a Yandios ja ta'u ya jniñu nuu i, vasu nu na xndoo da ve'e da, xi ñasi'i da, xi ñani da, xi tata da jiin nana da, xi se'e da. **30** Ja sia'an ti nani'in da vi'ga ja kuu taka ga ja ni ka xndoo da un, nava kuchaku da nuu ñuyivi ja'a, ti nanita'u da nuu Yandios ja kuchaku da ja kuu saa ni —ni kachi ya.

### *Ka'an tuku Jesús ja kuū ya*

(Mt. 20.17-19; Mr. 10.32-34)

**31** Ni kana siin Jesús ndi uxi uu ndaja'a ya un, ti ni kachi ya:

—Ja kuankoyo yo ichi ñuu Jerusalén, ti yukan na kundaa nava ni ka chiso profeta na jana'an ja kuu sik'i ru'u, maa Se'e Yivi Ñuyivi. **32** Nakua'a yivi ru'u nuu yivi inga nación, ti kusikinchaa yivi un ru'u, ti tivi si'i i nuu ri, kani i ru'u, ti ka'ni i ru'u. **33** Ko nu uni kivi ti nandoto ri ma'ñu ndiyi un chi ru'u kuu maa Se'e Yivi Ñuyivi, ja ni nakaji Yandios vají ri —ni kachi ya.

**34** Ko ndaja'a ya un, tu ni ka chaku ini da ni ti'lí jnu'un ni ka'an ya, chi jnu'un un tu ni kivi inijnuni da naa da. Yukan kuu ja tu ni ka chaku ini da nasa kuni ka'an jnu'un un.

### *Sa'a Jesús tajna iin chaa kuaa*

(Mt. 20.29-34; Mr. 10.46-52)

**35** Nu kuan kuyajni Jesús ñuu Jericó, ti yu'u ichi un nukoo iin chaa kuaa jikan da xu'un. **36** Nu ni jiniso'o da ja ka ya'a yivi kua'a, ti ni jikajnu'un da ndoo kuu. **37** Ti ni ka kachi yivi un ja Jesús, chaa ñuu Nazaret kuu ja kua'an ichi un. **38** Yukan ti ni kanajin da:

—¡Ni'in Jesús! Maa ni ja ta'u jniñu nanu ni sa'a rey yo David na jana'an, kunda'u ini ni saña —ni kachi da.

**39** Ti yivi ka yosjnuu un ni ka nduxaan jiin da ja na kasi yu'u da, ko maa da vi'ga ni kanako'o da:

—¡Ni'in Jesús! ¡Maa ni ja ta'u jniñu nanu ni sa'a rey yo David na jana'an, kunda'u ini ni saña! —ni kachi da.

**40** Yukan ti ni jakuñi Jesús, ti ni kachi ya ja na kin ki'in da chaa un naa da. Nu ni jaa da nuu ya, ti ni jikajnu'un ya maa da:

**41** —¿Ndoo kuni ra ja sa'a ri jiin ra, nusa? —ni kachi ya.

Ti ni kachi chaa un:

—Jito'yoo, ja na ndundijin nduchi na —ni kachi da.

**42** Ti ni kachi Jesús jiin da:

—Na ndundijin nduchi ra. Ni nduva'a ra vijna na chi ni kandixia ndaa ra ru'u —ni kachi ya.

**43** Ti hora ni, ni nduva'a nduchi chaa un, ti ni chindikun da kua'an da jiin Jesús, ti nakuanta'u da nuu Yandios. Ti suni taka yivi ni ka jini jniñu ña'nu un, ni ka keja'a ka nakanajaa i Yandios.

*Jesús jiin Zaqueo*

## 19

<sup>1</sup> Yukan ti ni kivi Jesús ñuu Jericó, ti kuan ya'a ya ma'ñu ñuu yukan, <sup>2</sup> ti yukan iyo iin chaa riko nani Zaqueo, chaa kuña'nu nuu chaa ka kinya'u puesto un. <sup>3</sup> Ti chaa un ndiyo ini da ja kuni da nuu Jesús, ko tu jini da ya chi yivi kua'a ka'iin un ni jasi i nuu ya. Ti Zaqueo chi liki da ti'l. Ja yukan kuu ja tu kuu kuni da nuu Jesús. <sup>4</sup> Yukan ti ni ja'a da corri ni kandu da ti ni kaa da xini iin nutichi vixi kandichi yajni nuu ya'a Jesús, nava na kuni da nuu ya. <sup>5</sup> Nu ni jaa Jesús ja'a yujnu un, ni ndakoto ya nuu kaxndee Zaqueo, ti ni kachi ya jiin da:

—Zaqueo, yachi ro ti kuan nuu, chi kuni ri kendo ri ve'e ra vijna —ni kachi ya.

<sup>6</sup> Yukan ti yachi ni nuu Zaqueo, ti ni kanxia'u da jiin Jesús. <sup>7</sup> Nu ni ka jini taka ga yivi un, ti ni ka keja'a ka ka'an siki Jesús ja kuni kendo ya ve'e iin chaa kinya'u puesto, vanuxia tu ni siuku ndaa da ley Moisés. <sup>8</sup> Yukan ti ni ndokuiñi Zaqueo, ti ni kachi da jiin Jito'yo Jesús:

—Nde'e ni Jito'yo. Ja ndi'i ja ñava'a na, ti na kua'a na sava nuu yivi nda'u naa i, ti nu iyo iin yivi ni xndoña'an na ja ni jisonchaa na ja ñava'a i, ko vijna ti na nakua'a na kuun ga jinu ja kuu iin ja ni jisonchaa na un —ni kachi da.

<sup>9</sup> Ti ni kachi Jesús jiin da:

—Na kachi ndaa ri nuu ro'o Zaqueo chi jandaa kuu ja kuu ra iin jna'an tata yo Abraham na jana'an, ti ni kandixia ndaa ra ru'u vijna nanu ni kandixia tata Abraham na jana'an. Ti suni yivi kanchuku ve'e ra ja'a ni ka janta'u i ru'u, ti ja ni ka kandixia i ru'u. Yukan kuu ja kendo va'a ra ti keta'u ra nuu Yandios naa ra. <sup>10</sup> Chi na kachi ri ja ru'u, maa Se'e Yivi Ñuyivi ni chaa ri ja na chunaa ri nuu taka yivi nava tukaa kinkoyo i nuu infiernu —ni kachi Jesús.

### *Chaa ka sajniñu jiin xu'un*

<sup>11</sup> Ni ka ñuso'o yivi jnu'un ka'an Jesús yukan, ti ni xndaku ya nuu i jiin inga jnu'un siki nasa ta'u Ýandios jniñu. Yukan kuni xndaku ya, chi ja yajni jaa ya ñuu Jerusalén, ti ka ndo'o ini yivi un ja ja ni jaa hora ja nduña'nu ya ti ta'u ya jniñu nuu ni tu'u nación Israel. <sup>12</sup> Ni ja ni ya iin jnu'un sia'an, ti ni kachi ya:

—Ni iyo iin chaa riko, ti ni ndo'o ini da ja ki'in da inga nación jika, ja ni'in da jniñu kunchaa da ti ta'u da jniñu siki ñuu da, ja na nduu da rey siki ñuu da, ti sa ndeokuñi da. <sup>13</sup> Na ti ki'in ga da, ti ni kana da uxi muzu ka junukuachi nuu da un, ti ni ja'a da iin iin xu'un nchaa ya'u xaan nuu da naa da, ti ni kachi da: “Nu na ki'in ri ti sajniñu naa ra jiin xu'un ja'a nava na nakaya se'e xu'un ja'a ja kuu kivi nchaa ri”, ni kachi da. <sup>14</sup> Ko vanuxia yivi ñuu da un ka kuiti ini nuu da, ti ni ka taji da tijnu chaa kua'an jata da nuu inga ñuu, ja na kachi nuu chaa ña'nu inga ñuu un: “Tu ka jajna'an ini yivi ja kundiso jniñu chaa ja'a nuu na naa na”, ni ka kachi. <sup>15</sup> Ko chaa riku un, chi ni ni'in da jniñu kuncha da ja ta'u da jniñu siki ñuu da ja ni nduu da rey, ti ni nandeokuni da nuu ñuu da.

Yukan ti nu ni najaa da ñuu da tuku, ti ni kana da taka chaa ni ja'a da xu'un un nuu, ndenu nasa ni ka ni'in iin iin chaa un, nu ni ka natu'u se'e xu'un ni ja'a da un xi tuu. <sup>16</sup> Ni jaa iin muzu nuu chaa riko un, ti ni kachi da: “Taa, jiin iin xu'un ni un ni nani'in na uxi ga xu'un”, ni kachi da. <sup>17</sup> Ti ni kachi rey un: “Iyo va'a, ni kuu ra iin muzu va'a, ja va'a ni sa'a jniñu ra jiin iin xu'un un. Vijna na ti na tatu ri inga jniñu nuu ra ja na nduu ra iin chaa kuña'nu, ti ta'u ra jniñu nuu uxi ñuu”, ni kachi da.

<sup>18</sup> Yukan ti ni jaa inga muzu, ti ni kachi da: “Taa, jiin iin xu'un un ni nani'in na u'un ga xu'un”, ni kachi da. <sup>19</sup> Ti ni kachi tuku rey un jiin muzu da: “Iyo

va'a. Vijna na ti na tatu ri inga jniñu nuu ra ja na nduu ra iin chaa kuña'nu, ti ta'u ra jniñu siki u'un ñuu", ni kachi da.

<sup>20</sup> Yukan sa ni jaa inga muzu, ti ni kachi da jiin rey un: "Taa, ja'a iyo xu'un ni. Ni sava'a na chii iin pañitu. <sup>21</sup> Yu'u na chi ja jini na ja kuu ni chaa tu ñunda'u ini, chi kua'a ga nandakan ni, ti ansu ja ni ja'a ni, ti su'va kuni ga ni", ni kachi da. <sup>22</sup> Yukan ti ni kachi rey un jiin da: "Ro'o chaa ndevel'a, jiin jnu'un ka'an ni ra xndichi ra maa ra. Ti ka'an ra ja vi'i ga nandakan ri ansu ja ni ja'a ri. Ti suni ka'an ra ja su'ya vi'i ga kuni ri. <sup>23</sup> Ti nu sia'an kuu nusa, ñndo tu ni januu ra xu'un ri nuu chaa ka sajníñu siki tratu, nava nu ni nchaa ri, ti naki'in ri xu'un ri jiin se'e i niku"? ni kachi da.

<sup>24</sup> Yukan ti ni kachi da jiin chaa ka'iin un: "Kuisonchaa xu'un nuu muzu ja'a, ti kua'a nuu chaa yijñi uxí xu'un un", ni kachi rey un. <sup>25</sup> Ti ni kachi chaa un naa da: "Taa, ti ndoo ti ja ñava'a chaa un uxí jna'an", ni ka kachi da. <sup>26</sup> Ti ni kachi rey un: "Na kachi ri jiin ra naa ra ja nu yivi ñava'a un, ti su'va kii ga nuu i, ti kuña'nu ga i jiin jniñu ndiso i. Ko yivi tundo ñava'a, ti vasu ti'l'i jniñu ja ndiso i un, kuxio ki'in. <sup>27</sup> Ti yivi ka jito u'u ru'u un, ja tu ka kuni ja kuu ri rey, kuan ki'in ti ka'ni ra naa ra nuu ri ja'a", kachi da —ni kachi JesúS.

### Kivi JesúS ñuu Jerusalén

(Mt. 21.1-11; Mr. 11.1-11; Jn. 12.12-19)

<sup>28</sup> Nu ni ndi'i ni ka'an JesúS jnu'un un, ti ni siin ya kua'an ya ñuu Jerusalén.

<sup>29</sup> Nu ja yajni jaa ya ñuu Bettagé jiin Betania, yajni yuku Olivos, ti ni taji ya uu ndaja'a ya, ti ni kachi ya jiin da naa da:

<sup>30</sup> —Kuankoyo rancho kande yajni un naa ra, ti nu jakoyo ra un, nani'in ra nuu ndikun iin burru ja ti koso ga yivi ti. Ndaji ti ti kikoyo ra jiin ti naa ra.

<sup>31</sup> Ti nu ka jikajnu'un yivi ro'o ja ndoo ka ndaji ra ti, ti kachi jiin da naa ra ja maa Jito'o ra nandi'i da ti —ni kachi ya.

<sup>32</sup> Kuankoyo ndaja'a ya, ti ni ka nani'in da burru un nava ni kachi JesúS nuu da naa da. <sup>33</sup> Ja ka ndaji da burru un ti ni kekoyo chaa xiin ti un, ti ni ka kachi da:

—¿Ndoo ka ndaji ra burru un naa ra? —ka kachi da.

<sup>34</sup> Ti ni ka kachi ndaja'a un:

—Maa Jito'yo nandi'i ti —ni ka kachi da naa da.

<sup>35</sup> Yukan ti kuankoyo da jiin ti nuu kande JesúS, ni ka chuku da sa'ma da siki ti, ti ni ka skaa da JesúS siki ti. <sup>36</sup> Ti ichi kua'an JesúS ni ka chuku yivi sa'ma i ini ichi un. <sup>37</sup> Nu ni ka kuyajni ya nuu kande yuku Olivos, ti tendi'i yivi ni ka kandixia ya ni ka keja'a ka kanajjiin ja ka kusii ini ti ka nakuanta'u i nuu Yandios ja ni ka jini i taka jniñu ña'nú ni sa'a ya. <sup>38</sup> Ti kachi i naa i:

—Ña'nú na koo maa rey yo, chi Tata yo Yandios ni taji ya maa chaa ndiso jniñu ña'nú nuu ya. Ja ni ndumani Yandios jiin yivi ñuu ya vijna. ¡Na kachi ndaja'a ya undi andivi un ja na koo ña'nú chaa ja'a! ¡Sia'an na kachi da! —ni ka kachi i.

<sup>39</sup> Yukan ti sava chaa fariseo kuan koyo jiin yivi un, ni ka kachi jiin ya:

—Maestro, nduxaan ni nuu ndaja'a ni ja'a —ni kachi da.

<sup>40</sup> Ti ni kachi JesúS jiin da naa da:

—Na kachi ri jiin ra naa ra, ja nu na kasi yu'u yivi ja'a na i, ti suni kuu sa'a Yandios ja na kanajjiin yuu un naa i —ni kachi ya.

<sup>41</sup> Nu ni kuyajni ya ñuu Jerusalén, ni jitonchaa ya ñuu un, ti ni ndukui'ya ini ya. Ti ni nde'e ya ja siki yivi un, <sup>42</sup> ti ni kachi ya:

—Ro'o, yivi ñuu Jerusalén, sa ti ni ka chaku ini ra vasu iin ti'l'i ja vijna kuu kivi ja ndumani ra jiin Yandios naa ra niku, ko vijna tukaa chi ja ni ya'a un,

ti ja yisa'yí, ti tukaa ga kuni ra naa ra. <sup>43</sup> Chi su'va, jaa kívi ja kondoo'ra iin nundo'o xaan, ti chakoyo yívi ka jito u'u ro'o, kuikondouu i ñuu ra, ti kasí kutu i jiin yuu, ti ya yukan ndonda i siki ra. <sup>44</sup> Ti ndí'i ve'e ra kanuu i, ti ka'ni i tendí'i ra. Ti tukaa xndoo i ni iin ve'e ja kosojna'an ga iin yuu. Sia'an na koo nundo'o un nuu ra chi tu ni ka janta'u ra ru'u, ja ni taji Yandios ja chunaa ri nuu ro'o naa ra —kachi Jesús.

*Ni keni'in Jesús yívi ka sa'a ya'u iní veñu'un ka'nu  
(Mt. 21.12-17; Mr. 11.15-19; Jn. 2.13-22)*

<sup>45</sup> Nu ni jaa Jesús nuu yuxe'e veñu'un ka'nu un, ti ni keja'a keni'in ya taka yívi ka xiko ini veñu'un un. <sup>46</sup> Ti ni kachi ya jiin yívi un:

—Sia'an yoso nuu tutu Yandios: “Ve'e ri konani ve'e nuu kakanta'u yívi naa i”, ko ro'o naa ra, ni ka nasa'a ra ve'e nuu ka nataka ñakui'ha —kachí ya.

<sup>47</sup> Taka kívi ni xna'an Jesús nuu yuxe'e veñu'un ka'nu un, ko sutu ka kuña'nu un jiin taka chaa ka kuña'nu ñuu un, ka nduku da nasa kuu ka'ni da ya naa da. <sup>48</sup> Ko tu kuu nasa sa'a da naa da, chi tendí'i yívi un ka kusii xaan ini i jiin taka jnu'un ni xna'an Jesús.

*Na jniñu ndiso Jesús  
(Mt. 21.23-27; Mr. 11.27-33)*

## 20

<sup>1</sup> Fin kívi kande Jesús nuu yuxe'e veñu'un ka'nu un xna'an ya nuu yívi, ti ka'an ya jnu'un Yandios nuu i naa i, ti ni ka jakoyo sutu ka kuña'nu un jiin chaa ka xna'an ley Israel jiin chaa ka kuña'nu nación Israel, ti ni ka kachi da jiin ya:

<sup>2</sup> —Kachi nuu ri, ¿nau ni ta'u jniñu ña'nú ja sa'a ra taka jniñu ja'a? ¿Xi nau ja ni ja'a jniñu ña'nú ja'a nuu ra? —kachi da naa da.

<sup>3</sup> Ti ni kachi Jesús jiin da naa da:

—Suni ru'u, na kajnu'un ri ro'o naa ra iin jnu'un. Na kachi ri, <sup>4</sup> ¿nau ja ni tatu jniñu nuu Juan ja ni kii skuanducha da yívi nusa? ¿Inga yívi ni tatu jniñu un nuu da, xi maa Yandios nu? —ni kachi ya.

<sup>5</sup> Yukan ti ni ka keja'a ka ndajnu'un maa da naa da, ti ni ka kachi da:

—Nu na kachi yo ja Yandios ni taji chaa un, ti kachi da jiin yo: “¿Ndoo tu ni ka kandixia ra jnu'un ni ka'an da nusa?” <sup>6</sup> Ti nu na kachi yo ja yívi ni taji da, ti va tendí'i yívi ka'iin ja'a ka'ni yo'o jiin yuu, chi tendí'i yívi ka kandixia ja Juan ni kuu iin profeta, ja ni ka'an jnu'un Yandios —sia'an ka ndajnu'un da.

<sup>7</sup> Yukan sa ni ka kachi da:

—Tu ka jini ri nau ja ni taji Juan, ja ni kii skuanducha da yívi —ni ka kachi da.

<sup>8</sup> Yukan na ti ni kachi ya jiin da naa da:

—Vanuxia tu ka kuni kachi ra, ti suni ru'u tu kachi ri nuu ra nau ja ni ja'a jniñu ña'nú ja'a nuu ri —kachi ya.

*Siki muzu ka sajniñu ndeva'a  
(Mt. 21.33-44; Mr. 12.1-11)*

<sup>9</sup> Yukan ti ni xndaku Jesús nuu yívi un jiin jnu'un ja'a, ti ni kachi ya:

—In chaa ni xndee kua'a da nutika'ya, ti ni jakanchaa da ñu'un un nuu chaa ka sajniñu un, ti ni kee da kua'an da, ti ni kuna'an kua'an da. <sup>10</sup> Nu ni jaa kívi nastutu da tika'ya un, ti ni taji da iin muzu ja na kin kakan da sava tika'ya un ja kuu maa da nuu chaa ka yinda'a un. Ko ni ka ki'in da chaa un, ni ka kaja da chaa nuu ñu'un, ti ni ka nataji da chaa kuano'on da sia'an ni.

<sup>11</sup> Ti chaa xiin jniñu un, ni taji tuku da inga muzu da kua'an, ko suni ni ka ka'an ndeva'a chaa ka ndito un nuu da, ni ka kaja da chaa, ti kuano'on da sia'an ni tuku. Tundo ni ka ja'a da nuu da. <sup>12</sup> Chaa xiin un, ni taji tuku da inga da, ko chaa ka ndito jniñu un ni ka stuji da chaa, ti ni ka keni'in da chaa kua'an da.

<sup>13</sup> Yukan na ti chaa xiin ñuu'un un, ni ndo'o ini da: “¿Nasa sa'a yo vijna na? Va na taji yo se'e yo na ki'in da va'a ga, ti nu na kuni chaa un nuu da, ti va kuandatu da naa da”, ni ndo'o ini da. <sup>14</sup> Ko nu ni ka jini chaa ka ndito jniñu un nuu se'e chaa xiin ñuu'un un, ti ni ka kachi da: “Chaa ja'a kuu ja xiin ta'u. Va'a ga na ka'ni yo, ti na kendo ndi'i yo jiin yaji ja'a”, ni ka kachi da. <sup>15</sup> Ni ka jniñi da chaa un, ni ka keni'in da chaa fuera yu'u ñuu'un un, ti ni ka ja'n'i da chaa. ¿Ti ndoo sa'a chaa xiin ñuu'un un jiin chaa ka ndito jniñu ja sia'an? <sup>16</sup> Va najaña da ti ka'ni da chaa ka kuu muzu un, ti kua'a da ñuu'un un nuu inga yivi ka ndito un —ni kachi Jesús.

Nu ni ka jiniso'o yivi jnu'un un, ti ka ka'an:

—¡Ni tu kachi Yandios ja koo sia'an nuu yo, nanu ni jna'an muzu ni ka ndito i ñuu'un tika'yí un! —ni ka kachi i.

<sup>17</sup> Yukan ti ni nde'e Jesús nuu yivi un, ti ni kachi ya:

—Nusa ti ¿ndoo kuni ka'an jnu'un yoso nuu tutu Yandios ja kachi sia'an?

Yuū ni ka skaña chaa ni ka sa'a nama ja'a, kuu ja kanuu ga ja ndiso jniñu jiki iin ve'e.  
Kachi tutu.

<sup>18</sup> Ti nanu ni ka sa'a chaa ni skaña yuū un, suni sia'an na kuu yivi tu ka janta'u ru'u. Ti sia'an nanu ka tuji yivi ka jiokava siki iin yuū, suni sia'an jna'nu ndatu yivi tu kandixia ru'u. Ko kivi na sa'a ndaa Yandios kuachi i, ti yivi tu ni kandixia ru'u, koo ndo'o i nanu jna'an iin yivi kanakava iin yuū siki i ti kundi'i kukuachi i sa'a —ni kachi ya.

### *Siki jnu'un kinya'u puesto*

(Mt. 21.45-46; 22.15-22; Mr. 12.12-17)

<sup>19</sup> Ti chaa ka kuu sutu ka kuña'nu un jiin chaa ka xna'an ley Israel un, ni ka nduku da nasa kuu jniñi da Jesús hora un. Ko vanuxia ni ka yu'u da nde'e da yivi un. Chi ni ka chaku ini da ja siki maa chaa ka kuña'nu un, ni ka'an Jesús jnu'un un.

<sup>20</sup> Yukan ti chaa ka kuña'nu un ni ka nduku da chaa ni ka nduku jnu'un, ja na sa'a da ja chaa va'a ka kuu da, ja na nduku da iin jnu'un, na ndenu naa jnu'un kani Jesús, ti nava sia'an ti na ni'in da ichi ja kankuachi da ja'a ya, nava nakua'a da ya nuu gobernador. <sup>21</sup> Ja yukan kuu ja ni ka jikajnu'un da ya sia'an:

—Maestro, ka jini na ja ka'an ndaa ni, ti xna'an ndaa ni ichi Yandios, ti tu yu'u ni nde'e ni ni iin chaa vasu kuña'nu ga da. <sup>22</sup> Nusa ti kachi ni nuu na nasa ndo'o ini ni. ¿Iyo va'a nu cha'u yo xu'un nuu gobierno Romano xi tuu nu? —ni ka kachi da.

<sup>23</sup> Ko ja jini Jesús ja tu ka ndo'o va'a ini da, ti ni kachi ya:

—¿Ndoo ka kuni xnda'u ra ru'u? <sup>24</sup> Xna'an iin xu'un un nuu ri. ¿Naa nūū kuu ja nchaa nuu xu'un ja'a, ti naa sivi kuu ja yoso un nusa? —ni kachi ya.

<sup>25</sup> Ti ni ka kachi da:

—Nūū maa rey nación Roma kuu —ni ka kachi da.

Yukan ti ni kachi Jesús:

—Nusa ti kua'a nuu rey nación Roma ja xiin maa da, ti kua'a nuu Yandios ja xiin maa Yandios —ni kachi ya.

**26** Yukan ti tu ni kuu chakuachi da jiin jnu'un xna'an ya nuu yivi un. Chi su'va ni ka naa ini da ja sia'an ni nachiso ya nuu da, sa ni ti ni ka jasi yu'u da naa da.

*Jnu'un siki ja ka nandoto ndiyi*

(Mt. 22.23-33; Mr. 12.18-27)

**27** Nu ni ya'a un, ti ni ka ja'an sava chaa saduceo ni ka jande'e da Jesús. Chaa saduceo un ka ka'an ja tukaa ga ka nandoto ndiyi un, ti ni ka kachi da:

**28** —Maestro, ni kachi Moisés ja nu na kuū iin chaa ni iyo ñasi'i, ti tu ni iyo se'e da jiin ña, ti kuu nanda'a ñani ndiyi un jiin ña ja na koo se'e ña, ti suchi un nduu nanu se'e maa ndiyi un. **29** Ti yukan ni iyo uxia da mani ñani da naa da. Ti chaa ña'nu un ni nanda'a da, ko tu ni iyo se'e ñasi'i da, ti ni ji'i da. **30** Ni naki'in chaa kuu uu un ña'an un, ko suni tu ni iyo se'e da jiin ña, ti ni ji'i da. **31** Ti chaa kuu uni un ni naki'in tuku da ña'an un, ti sia'an ni ka sa'a ndi uxia da, ko ndi uxia da ni ka ji'i, ti tu ni iyo ni iin se'e ña'an un. **32** Sandi'i ni ga ti ni ji'i tu maa ña. **33** Ti nu na nandoto ndiyi un naa da, ¿nau ndi'i uxia ñani un xiin ñasi'i un, ja sia'an ni ka nanda'a da jiin ña nu? —ni ka kachi da.

**34** Yukan ti ni kachi Jesús jiin da naa da:

—Ja kuu nuu ñuyivi ja'a, chi kuu chaa, kuu ñasi'i ka nanda'a. **35** Ko nu na nandoto ndiyi un, ti kachi Yandios ja kuu kivi i ñuu nuu ta'u ya jniñu, ko tukaa kuu nanda'a i ni tu kua'a i se'e si'i i ja nanda'a ña. **36** Ti yukan tukaa ga ka ji'i ndiyi un, chi nduu i nanu ángel Yandios. Ka kuu i yivi Yandios ja kuu saa ni, chi maa Yandios ni naxndoto yai. **37** Suni nu ka ka'u ra nuu tutu Yandios ja ni chaa Moisés, ti ni ka'an da siki chaa ka chaku vasu ja ni ka ji'i da na jana'an. Chi nuu kayu yukū un, ni kachi Yandios nuu da: "Maa ri kuu Yandios ja ka kanajaa Abraham jiin Isaac jiin Jacob." Sia'an ni chaa Moisés jnu'un Yandios, chi ni ka chaku chaa un naa da. **38** Yukan kuni ka'an ja Yandios tu kuu ya Yandios nuu yivi ni ka ji'i un, chi kuu ya Yandios nuu yivi ka chaku, ja tu ka kendo i ma'ñu ndiyi, chi ni ka nandoto tako ndiyi un ja ka chaku i nuu ya, ja ka chiñu'un da Yandios ja kuu saa ni —ni kachi Jesús.

**39** Yukan ti sava chaa ka xna'an ley Israel un, ni ka kachi jiin Jesús:

—Iyo va'a jnu'un ka'an ni, maestro —ni ka kachi da.

**40** Yukan ti ni iin yivi, tukaa ni ka tava ini da kajnu'un ga da Jesús.

*Nau se'e kuu Cristo*

(Mt. 22.41-46; Mr. 12.35-37)

**41** Yukan ti ni kachi Jesús jiin chaa ña'nu Israel un:

—Ka'an yivi ja Cristo kuu iin jna'an rey David na jana'an, vasu maa Yandios ni taji ya ja na kundiso ya iin jniñu ña'nu ga ja kuu maa David. Ko vasu kuu ja sia'an ka ka'an yivi. **42** Ti maa David ni ka'an da nuu tutu Salmo sia'an: Yandios ni kachi nuu Jito'o Cristo:

"Nukoo nda'a kua'a ri, chi ta'u ra jniñu jiin ri.

**43** Iyo yivi jito u'u ro'o, ko kundee ra jiin, chi chindee ri ro'o."

Ni kachi Yandios, kachi David.

**44** Nu sia'an kuu ja maa David ni skonani da ya jito'o da, ti ¿nasa kuu ja Cristo kuu iin jna'an rey yo David na jana'an nusa? —ni kachi Jesús.

*Ka'an Jesús siki chaa ka xna'an ley Israel*

(Mt. 23.1-36; Mr. 12.38-40; Lc. 11.37-54)

**45** Nu tendi'i yivi un ka ñuso'o i jnu'un xndaku Jesús, ti ni kachi Jesús jiin ndaja'a ya sia'an:

**46**—Koto maa ra naa ra jiin chaa ka xna'an ley Israel. Koto ma sa'a ra nava ka sa'a da naa da. Chi chaa un ka jajna'an ini da ku'un da sa'ma nani, ja na kuni yivi ja chaa kuña'nu ka kuu da nuu veñu'un Israel. Ti ka kuni da ja na ka'an yiñu'un yivi jiin da nuu ya'u, ti na ka'an xia'u i jiin da, “Maestro, maestro.” Suni ka jajna'an ini da silla yiñu'un ga nuu kunchuku da ini veñu'un Israel un. Tí ka kusii xaan ini da jiin jnu'un yiñu'un nuu kunchuku da kaji da staa nuu iin viko. **47** Suni ka jisonchaa da ve'e ña'an ni kendo maa iin ña naa ña, ti ja tu kuni yivi jniñu kue'e ka sa'a da un, ti kani xaan ka jikanta'u da nuu Yandios. Ti ja kuu maa da kii iin nundo'o ka'nú xaan ga —ni kachi ya.

*Xu'un ni soko iin ña'an ni kendo nda'u  
(Mr. 12.41-44)*

## 21

**1** Nuu yux'e veñu'un ka'nú un ni jini Jesús ja ka chu'un chaa riku un xu'un nuu jajnu un. **2** Suni ni jini ya ja ni jaa iin ña'an nda'u xaan ni chu'un ña uu xu'un cobre kuachi, **3** ti ni kachi ya jiin yivi ka'iin yajni un:

—Nde'e naa ra. Na kachi ndaa ri ja iin ña'an nda'u xaan ga ja'a, ya'u xaan nchaa xu'un ni ja'a ña un nuu Yandios ja kuu xu'un ni ka ja'a chaa riku un. **4** Chi yivi riku xaan un, ni ka ja'a da kuu ni ja ka ñava'a da. Ko ña'an nda'u un, tu ñava'a kua'a ña xu'un, ko ni ja'a ndi'i ña ja ñava'a ña, vasu nandi'i ña ja kuu gastu ña —ni kachi ya.

*Ka'an Jesús ja naa veñu'un ka'nú Israel  
(Mt. 24.1-2; Mr. 13.1-2)*

**5** Ti sava ndaja'a Jesús ka ka'an da ja nde vii kaa veñu'un ka'nú un, ja nde vii kanda yuu un jiin taka ja ni ka soko yivi nu ni ka sa'a da veñu'un un. Ti ni kachi Jesús:

**6**—Ndi'i ja'a ka jitonchaa ra naa ra. Ko jandaa na kachi ri nuu ra naa ra ja, jaa iin kivi ja ni iin yuu tukaa kendo koso jna'an ja'a, chi ndi'i ja'a naa —ni kachi ya.

*Naa seña koo nu kuan kuyajni ndi'i ñuyivi  
(Mt. 24.3-28; Mr. 13.3-23; Lc. 17.22-25, 31)*

**7** Yukan na ti ni ka jikajnu'un ndaja'a ya naa da:

—Maestro, ¿nasa da ti sa kundaa jnu'un ka'an ni un? ¿Ti naa seña koo ja kuan kuyajni kundaa taka jnu'un un? —ni ka kachi da.

**8** Ti ni kachi Jesús:

—Koto maa ra naa ra. Koto ma xndau'yivi ro'o. Chi kua'a yivi kikoyo, ti ndaku ni'in yi sivi ri, ti kachi: “Ru'u kuu Cristo”, kachi i. Xi inga yivi ka'an: “Vijná kuu kivi ja ni taji Yandios ru'u ja sa'a ri jniñu ña'nú”, kachi. Koto kundikun ra jnu'un xndaku yivi un. **9** Ti kuni ra jnu'un ja ya yukan koo guerra, ti kanaa yivi. Koto yu'u ra naa ra, chi sia'an ndixia kuu. Ko jiin yukan ti ni ti jaa ga kivi ja ndi'i ñuyivi —ni kachi ya.

**10** Yukan ti ni siin Jesús ka'an ya:

—Kanaa iin nación jiin inga nación, suni iin ñuu jiin inga ñuu. **11** Koo ñujnaa xaan, jiin jnama xaan, jiin kue'e xaan ya yukan. Ti koo seña nuu andivi ja undi yu'u yivi naa i nde'e i un.

**12** Ko xnakan ro'o ja ka kandixia ra ru'u, jnií yivi ro'o naa ra, ti kua'a i tau ra. Ti nakua'a i ro'o naa ra nuu chaa ka kuña'nu ini taka veñu'un Israel, ja na xndichi da ro'o naa ra, ti jnaa da ro'o vekaa naa ra. Ti suni ja siki ru'u, ti nakua'a da ro'o naa ra nuu chaa ka kuu rey ja ka ta'u jniñu nuu ni tu'u iin nación, ti suni na kua'a da ro'o nuu gobernador siki ja ka kandixia ra ru'u.

**13** Sia'an kuu ka'an va'a ra nuu chaa ka kuña'nu un, ja siki ru'u kuu ja ka jna'an ra nundo'o. **14** Sia'an ti koto xndi'i ra ini ra ja nasa koo jnu'un ka'an ra nuu chaa ka kuña'nu un ja nama ra maa ra. **15** Chi maa ri kuu ja kua'a injnuni ra ja nasa koo jnu'un ka'an ra naa ra, ti nava ni iin yivi ja koto u'u ro'o tu kundee chajna'an jnu'un ka'an jiin ra naa ra. **16** Ti undi tata ra, ñani ra, jna'an ra, jiin amigo ra kinaa ña'an da ro'o naa ra, ti kachi da ja na kuū ra naa ra. Ti jandaa ni kuu ja tijni ra naa ra kuū.

**17** Ti tendi'i yivi ja tu ka kandixia i jnu'un ri, koto u'u i ro'o naa ra ja ni ka kandixia ra ru'u jiin jnu'un ka'an ri. **18** Ko tu naa ni iin ixi xini ra naa ra, chi koto ya ro'o naa ra. **19** Ti nu ka ñukuu ni ini ra jnu'un ri, ti kuchaku ra ja kuu saa ni.

**20** —Nu ni ka jini ra ja, ja ni ka jiconduu soldado ñuu Jerusalén, yukan na ti kuni ra ja kuan kuyajni kivi ja naa ñuu un. **21** Ti yivi kanchuku ñuu Judea, na kinkoyo i undi yuku un. Ti yivi kanchuku ñuu Jerusalén, na kekoyo i ñuu un, ti yivi ka'iin yuku xi nuu jniñu, koto ma ndeokuñi ga i ñuu un naa i. **22** Chi kivi un kuu kivi kii nundo'o ka'nú xaan nanu yoso nuu tutu Yandios. **23** Na nda'u ñaa ka ñuse'e xi ñaa ka nchaka suchi yikiñi ja kuu kivi un! Ko nundo'o xaan taka nuu ñuyivi ja kuu kivi un, ti kii iin nundo'o ka'nú xaan ja kuu yivi ñuu ja'a. **24** Kua'a yivi ñuu kuū nuu guerra un. Ti sava ga yivi un kinkoyo i presu nuu yivi inga nación. Ti ndunúú yivi ñuu jika un nuu yivi ñuu Jerusalén, ti sa'a ndeva'a i jiin da undi na jaa kivi na kachi maa Yandios ja sia'an koo jiin yivi un naa i.

### *Nasa ndii Jesús (Mt. 24.29-35, 42-44; Mr. 13.24-37)*

**25** Nu ni ndi'i un, yukan na ti koo iin seña nuu ndikandii, yoo, jiin choxini. Ti nuu ñuyivi ja'a sana ini yivi taká nación, chi yu'u i ja sa'a iyo nducha mar jiin ja iyo ndonda nuu nducha un. **26** Ti so sa'u ini yivi naa i ja sia'an na koo nuu ñuyivi. Ni'in nutu'u andiví ti nukoyo chuxini. **27** Yukan na ti ru'u, maa Se'e Yivi Ñuyivi, kuni yivi naa i ndenda ri, ti ndii ri nuu viko un, jiin jniñu ja ni nduña'nu xaan ri. **28** Nu ni keja'a kuu ndaa taká ja'a, koo ndee ini naa ra ti nava na kosii ini ra, chi ja yajni keta'u ra naa ra —ni kachi Jesús.

**29** Suni ni kachi ya inga jnu'un ja'a, ti ni kachi ya:

—Nde'e naa ra, nutichi vixi un jiin sava'a ni ga inga nuu yujnu, **30** nu ja ni nduyucha numa i, ti ja ni chaku ini yo ja kuan kuyajni viko sau. **31** Ti suni sia'an kuu nu ja ni keja'a kuu ndaa taká jnu'un ja'a, ti ni jini yo ja kuan kuyajni ndaa kivi nu keja'a ta'u ri jniñu jiin Yandios nuu nii tu'u ñuyivi ja'a. **32** Ti jandaa na kachi ri ja taká un kuu ndaa xnakan, ti sa kuū yivi ka iyo kivi vijná. **33** Va naa andiví jiin ñuyivi, ko jnu'un ka'an ri, jankivi naa kuiti, chi taká un kuu ndaa.

**34** Koto maa ra naa ra ja tu kinikava ra nuu kuachi nava ka ndo'o ini ra, ja najini ra jiin ndixi, xi inga jniñu kue'e, xi ja kujneñu ra nduku ra ja kuchaku ra, nava tu kinaa ri ro'o naa ra kivi nchaa ri, nanu iin vekaa nu ni nandi'yu. **35** Chi sia'an kii kivi un siki taká yivi kanchuku nuu nii tu'u ñuyivi. **36** Yukan kuu ja niní kotu'va ra naa ra, ti kondito ra ja na kakanta'u ra nava na keta'u ra nuu taká nundo'o kii un. Nu sia'an na ti tu kukanuu ra kuijin ra nuu ru'u ja kuu ri maa Se'e Yivi Ñuyivi —ni kachi ya.

**37** Ti na kivi un ni xna'an Jesús nuu yivi nuu yuxé'e veñu'un ka'nú un ja kuu nduu, ti ja kuu jakuua ja'an kendo ya undi yuku nani Olivos. **38** Ti ña'an ka jakoyo yivi kua'a ja na kunso'o i jnu'un ka'an ya ini veñu'un ka'nú un.

## *Ka ndajnu'un da nasa jnii da Jesús*

### **22**

<sup>1</sup> Yukan ti kuan kuyajni ndaa viko ja ka yee da staa stila ja tu yi'i levadura, ja suni ka ka'an da viko pascua. <sup>2</sup> Ti sutu ka kuña'nu jiin chaa ka xna'an ley Israel un, ka ndajnu'un da ja nasa kuu ti ka'ni da Jesús. Ko ka yu'u da sa kuuva yívi siki da naa da.

<sup>3</sup> Yukan ti Judas, ja suni nani da, chaa ñuu Cariote, ni kivi ja'u'u un ini da, ti ni ndo'o ini da ja nakua'a da Jesús nuu sutu ka kuña'nu un. Ti maa da suni kuu da iin jna'an nuu ndi uxi uu apóstol un nuu ya. <sup>4</sup> Ti chaa ja'a ni ja'an da nuu sutu ka kuña'nu un jiin suni nuu chaa ka yinda'a veñu'un ka'nun un, ti ni ndajnu'un Judas jiin da naa da ja nasa nakua'a da Jesús nda'a chaa un naa da. <sup>5</sup> Ti ni ka kusii xaan ini da jiin jnu'un ni ka'an Judas, ti ni kachi da ja kua'a da xu'un nuu da. <sup>6</sup> Ti Judas ni janta'u da nava ni ka kachi chaa un. Ti ni keja'a a nduku da nasa kuu nakua'a da Jesús nuu chaa un naa da, iin hora ja tu kaa ga naa yívi iyo.

#### *Ni ka kuxini Jesús jiin ndaja'a ya*

<sup>7</sup> Yukan ti ni jaa kivi viko ja ka yee da staa stila ja tu yi'i levadura. Ti suni kivi yukan ka ja'ni da iin lelu ja ka soko da nuu Yandios ja kuu viko pascua un. <sup>8</sup> Yukan ti ni taji Jesús Pedro jiin Juan, ti ni kachi ya jiin da naa da:

—Kuankoyo ti satu'va ra ja kuxini yo vijna viko pascua naa yo —ni kachi ya.

<sup>9</sup> Ti ni ka jikajnu'un da:

—¿Nanu kuni ni ja kinkoyo na satu'va na naa na nusa? —ni ka kachi da.

<sup>10</sup> Ti ni kachi ya:

—Nuu na jaa ra ñuu un, ti yukan ndejna'an ra jiin iin chaa ndiso iin kiyi nducha. Kundikun ra da undi na najaa da ve'e da, <sup>11</sup> ti kachi ra jiin chaa xiin ve'e un naa ra: “Kachi Maestro na: ¿Nanu kande iin ve'e nuu satu'va ri ja kuxini ri jiin ndaja'a ri vijna viko pascua”? kachi ra naa ra.

<sup>12</sup> Yukan na ti kin xna'an da ro'o iin ve'e ka'nun ja kaxndee nuu sukun un, ti ja iyo nakoo, ti yukan satu'va ra naa ra ja kuxini yo —ni kachi Jesús jiin Pedro jiin Juan.

<sup>13</sup> Ti kuankoyo da naa da undi ñuu nava ni kachi Jesús, ti ni ka nani'in da ve'e ni kachi ya un. Ti yukan ni ka satu'va da ja kuxini da naa da ja kuu viko pascua.

<sup>14</sup> Nu ni kuu hora ja kuxini, ti ni jaa Jesús jiin uu ga ndaja'a ya, ti ni kanchuku da nuu mesa ka yee da staa. <sup>15</sup> Yukan ti ni kachi Jesús jiin da naa da:

—Xaan ga ñukuu ini ri ja xnakan kuxini ri jiin ra naa ra, vijna kivi viko pascua, ti sa na kuū ri. <sup>16</sup> Chi na kachi ndaa ri nuu ra naa ra ja tukaa ga kunchuku yo sia'an kuxini yo undi na kundaa kivi ja ni'in ri jniñu ña'nun ga ja kua'a Tata ri Yandios nuu ri, ja na ta'u ri jniñu jiin maa ya nuu tendi'i nitú' ja iyo. Undi yukan ti sa na kuxini tuku yo —ni kachi ya.

<sup>17</sup> Yukan sa ni ki'in Jesús iin vasu vino, ni nakuanta'u ya nuu Yandios, ti ni kachi ya:

—Ko'o ti'lí ti'lí naa ra. <sup>18</sup> Chi jandaa na kachi ri ja tukaa ga ko'o ri nu ka sa'a jna'an yo viko ja'a, undi na jaa kivi ti nasa'a yo ñuu nuu ni'in ri jniñu ña'nun ga nuu Tata ri Yandios, ti ta'u ri jniñu jiin maa ya nuu ni tu'u ja iyo. Ti nu kunchuku jna'an yo ñuu un, yukan na ti sa nasa'a jaa yo viko ja'a —kachi ya.

<sup>19</sup> Ti suni ni ki'in ya iin staa stila, ti ni nakuanta'u ya nuu Yandios. Yukan na ti ni sakuachi ya, ti ni tejna'an ya nuu da naa da ja na kee da, ti ni kachi ya:

—Ja'a kuu nanu yiki kuñu ri ja soko ri, ja na chunaa ri nuu kuachi ra naa ra. Ti nini sa'a ra sia'an naa ra ja ka nuku'un ini ra ru'u ja ni ji'i ri ja kuu nuu maa ra naa ra —ni kachi Jesús.

<sup>20</sup> Yukan ti nu ni ndi'i ni ka kuxini da ti ni ki'in ya vasu vino un, ti ni kachi ya:

—Ja ñuu'un vaso ja'a kuu nanu niñi ri ja soko ri. Ti stuu ndijin niñi ri iin jnu'un jáá ni kachi Tata ri. Ti jnu'un un ka'an ndaa kuiti ja nama ya kua'a yivi, chi katii ri niñi ri ja chunaa ri nuu yivi naa i. <sup>21</sup> Ko vijnna ti chaa ja kin nukua'a ru'u nuu chaa ka jito u'u ru'u un, kaxndee nda'a da jiin nda'a ri nuu mesa ja'a. <sup>22</sup> Chi ru'u, maa Se'e Yivi Ñuyivi, siuku ndaa ri nava ni kachi maa Yandios, ko xaan ga nda'u chaa nakua'a ru'u nuu chaa ka jito u'u ru'u —ni kachi Jesús.

<sup>23</sup> Yukan ti ni keja'a ka jikajnu'un jna'an da naa da nau iin da kuu ja nakua'a ya nuu chaa ka jito u'u ya.

### *Ka ndajnu'un ndaja'a Jesús na ndenu nau iin da kuña'nu ga*

<sup>24</sup> Yukan na ti ndaja'a Jesús ni ka keja'a ka ndajnu'un da na ndenu nau iin da kendo kuña'nu ga. <sup>25</sup> Ti ni kachi Jesús jiin da naa da:

—Chaa ka kuu rey nuu taka ga nación, vanua maa da ka xiin nación un, ti ja yukan kuu ja nde kua'an ga da jiin yivi nación da. Ti jaa sia'an xaan ini da, ti ka sa'a yivi ja nakua'a i ja yiñu'un nuu chaa kuña'nu un, nava na kuu va'a ini da nuu i. <sup>26</sup> Ko ro'o naa ra, tu sa'a ra sia'an, chi nuu nau ja kuña'nu ga nuu ra naa ra, su've na kuanukuachi da nanu ja tu ndiso jniñu da, chi nau ja ta'u jniñu, suni na kuanukuachi. <sup>27</sup> ¿Xi nau kuu ja kuña'nu ga nu? ¿Ja nukoo nuu mesa xi ja kunukuachi nuu mesa un nu? ¿Xi ansu jandaa kuu ja kuña'nu ga chaa nukoo mesa un nu? Ko ru'u chi kancha ri jiin ra naa ra nanu iin chaa junukuachi ni.

<sup>28</sup> Ti ro'o naa ra, nini ka'iin ra jiin ri taka kivi ja jito ri nundo'o. <sup>29</sup> Ti ja yukan kuu ja na kua'a ri ja kuu ta'u ra naa ra. Nu na ni'in ri iin jniñu ña'nú ga nuu Tata ri Yandios ja na ta'u ri jniñu jiin maa ya nuu tendi'i nitu'u ja iyo, ti suni kua'a ri jniñu ña'nú nuu ra naa ra. <sup>30</sup> Kundiso ra iin jniñu ja na nukoo ra naa ra iin iin sillanuu ga, ti xndichi ra ndi uxi uu familia jna'an yo ja ka kuu i yivi nación Israel. Yukan kuu jniñu ña'nú ni'in ra, ti suni yukan kaji ko'o ra jiin ri nuu mesa ñuu nuu ta'u ri jniñu —ni kachi Jesús.

### *Kachi Jesús ja chisa'yí Pedro ya*

<sup>31</sup> Suni ni kachi Jito'yo Jesús jiin Simón:

—Simón, Simón, na kachi ri nuu ra ja siki ja'u'u un, chi ni jikan ja kotojnuni taka ro'o ja ka kuu ndaja'a ri. Ja siki nundo'o kii un, kuni ja'u'u uu siu'u ro'o ti kisi ro'o naa ra nanu sa'a yo jiin triu. <sup>32</sup> Ko maa ri ja ni jikanta'u ri ja'a ra nuu Yandios nava tu nukoyo ra nuu kuachi, ti kachi ra ja tukaa ka kandixia ra ru'u. Ko nu na kachi ra ja tu kandixia ndaa ra ru'u kivi chaa nundo'o un, ko nu yukan ti nakani tuku ini ra nuu kuachi un, ti kuanka'nu ini Yandios nuu ra, Simón. Yukan na ti chindee ñanijna'an ra ti kua'a ra jnundee ini da, nava na siin ni ini da ti na kandixia ndaa da ru'u —ni kachi ya.

<sup>33</sup> Yukan na ti ni kachi Simón:

—Jito'yo, ja iyo tu'va na ja kondo'o na jiin ni undi vekaa vasu na kuū na jiin ni —ni kachi da.

<sup>34</sup> Ti ni kachi Jesús jiin da:

—Pedro, jandaa na kachi ri ja vijna, ti kana ga li'i, ti ja chisa'yí ra ru'u uni jinu, ja kachi ra ja tu jini ra ru'u —ni kachi ya.

### *Ja ni kuyajni hora koto ya nundo'o*

<sup>35</sup> Yukan ti ni jikajnu'un Jesús nuu tendi'i ndaja'a ya un:

—Na ni taji ri ro'o ni ka ja'an ra naa ra ja ni ka'an ra jnu'un Yandios, ti tu ni ka yínda'a ra bolsa, ni xu'un, ni ndijña, ¿xi nau ja ni kumani nuu ra naa ra nusa? —ni kachi ya.

Ti ni ka kachi da:

—Tu kuiti —ni ka kachi da.

<sup>36</sup> Yukan na ti ni kachi ya jiin da naa da:

—Ko vijna ti na kachi ri, nu nau ja ka ñava'a bolsa, ti na kunda'a ki'in jiin. Xi nu ñava'a ra xu'un ti kunda'a ra. Ko nu nau chaa tu ñava'a espada ja koto da maa da, ti na xiko da tikachi da ti na kuan da. <sup>37</sup> Chi na kachi ri ja kundaa jiin ri nava yoso nuu tutu ja sia'an kondo'o ri: “Sa'a yivi jiin ri nanu ka sa'a i jiin iin chaa ndeva'a ja tu ka jandatu da nuu ley.” Chi taka ja yoso nuu tutu siki ri, vijna ti kundaa —ni kachi ya.

<sup>38</sup> Yukan ti ni ka kachi da:

—Jito'yo, ko ja'a iyo uu espada —ni ka kachi da.

Ti ni kachi Jesús:

—Sia —ni kachi ya.

### *Ni jikanta'u Jesús chii yuku Olivos*

<sup>39</sup> Yukan na ti kua'an Jesús undi chii yuku Olivos nava sa'a maa ya, ti ni ka ndikun ndaja'a ya kuankoyo da jiin ya. <sup>40</sup> Ti nu ni ka jakoyo da chii yuku un, ti ni kachi ya jiin da:

—Kakanta'u naa ra ja'a nava tu kaña ini añu ra ja sa'a ra iin jniñu kue'e —ni kachi ya.

<sup>41</sup> Yukan ti ni jika ya ti'lli ga kua'an ya, ku'va jika ski'in yo iin yuu, ti yukan ni jakunjiti ya, ja kakanta'u ya nuu Yandios, <sup>42</sup> ti ni kachi ya:

—Tata na Yandios, nu kuni ni ti chajijo ni nundo'o kii siki na un, ti nama ni saña, ko ansu nava kuni maa na, chi na kuu nava kuni maa ni —kachi ya.

<sup>43</sup> Ti yukan ni ndenda iin ángel Yandios ja ni kii nuu andivi, ti ni ja'a ángel un jnundee ini ya ja na siuku ya taka nundo'o un. <sup>44</sup> Ti ja xaan kukui'ya ini ya, ti vi'i ga ni keja'a jikanta'u ya jiin nii ini da, ti keja'a kaña ka'nii nuu ya, ti keja'a too nuu ñu'un un, nanu na'nii yuyu niñi too nuu ya. <sup>45</sup> Nu ni ndi'i ni jikanta'u ya, ni nandeokuñi ya nuu ka'iin ndaja'a ya. Ti ni jini ya ja ka kixi da, chi jiin jnukui'ya ini un tukaa ga ni ka kundee da kakanta'u da. <sup>46</sup> Yukan na ti ni kachi ya:

—¿Ndo xaan ka kixi ra naa ra? Ndoko ti kakanta'u ra nava tu kotojnuni ja'u'u un ro'o, kachi ra ja tu ka jini ra ru'u, ti chisa'yí ra ru'u —ni kachi ya.

### *Ni ka jni da presu Jesús*

<sup>47</sup> Ti ni ka'an ga ya sia'an, ja ni ka kenda kua'a xaan yivi kuajakoyo nuu ya. Ti chaa nani Judas, ja suni ni kuu da iin ndaja'a nuu Jesús, yoxnuu da vaji da nuu chaa un naa da. Ti ni tu'va da nuu Jesús, ti ni teyu'u da nuu ya. <sup>48</sup> Ti kachi ya jiin da:

—Judas, ¿xi ja so teyu'u ra nuu ri ti kinaa ra ru'u, ti sia'an nakua'a ra maa Se'e Yivi Ñuyivi nuu yivi ka sa'a ndeva'a nu? —ni kachi ya.

<sup>49</sup> Ti nu ni ka jini chaa ka'iin jiin Jesús ja sia'an kuu, ti ni ka jikajnu'un da:

—Jito'yo, ¿ki'in na siki yivi ja'a jiin espada nu? —kachi da naa da.

<sup>50</sup> Ti iin chaa ka'iin jiin Jesús ni stuji da so'o iin muzu sutu kuña'nii un, ti ni ja'lacha da so'o da so'o kua'a.

**51** Ko ni kachi Jesús:

—Sia da naa ra, chi ja ni kuu sia'an ni —ni kachi ya.

Yukan ti ni kue'e Jesús so'o chaa un, ti ni nduva'a ni da.

**52** Yukan na ti ni kachi ya jiin sutu ka kuña'nu un, jiin chaa ka yinda'a veñu'un ka'nu un, jiin nuu taka chaa ka kuña'nu nación Israel ja vekoyo da ja ki'in da jiin ya, ti ni kachi ya:

—¿Va nu iin chaa kui'na kuu ri, xi ni ndonda ri siki gobiernu nu? ¿Xi ndoo kuu ja vekoyo ra jiin espada jiin yujnu ja jnií ra ru'u naa ra? **53** Ti taka kivi ni kuncha ri jiin ra naa ra ini veñu'un ka'nu un, ko ni tu ni ka jnií ra presu ru'u. Ti kivi vijna vekoyo ra naa ra, chi ka ndo'o ndeva'a kuiti ini ra siki ri. Ti vijna kuu ja na siuku ra naa ra, chi nuu ñuñaa ka sa'a ra nava kuu ini maa ra na ra. Chi jniñu ja'a kuu ja ndiso ja'u'u un ja yinda'a ñuñaa —ni kachi ya.

### *Ka'an Pedro ja tu jini da Jesús*

**54** Ni ka jnií da presu Jesús ti kuankoyo da jiin ya undi ve'e sutu kuña'nu un, ti Pedro jika jika ni, ni ndikun da jata yivi un. **55** Ti sava yux'e chaa un ni ka xna'an policia un iin ñu'un, ti ni ka nakuconduu da kanchuku da yunu'un un ka nduxin da. Ti suni ni nukoo Pedro ma'ñu da naa da. **56** Ti iin ña'an junukuachi ve'e un ni jini ña nukoo Pedro yuñu'un un. Ni nde'e va'a ña nuu da, ti ni kachi ña:

—Suni kande chaa ja'a jiin chaa ni ka jnií da un niku —kachi ña.

**57** Ko ni chisa'yí Pedro ja tu jini da Jesús, ti ni kachi da:

—Tu jini kuiti ri chaa yukan —ni kachi da jiin ña.

**58** Ni kunuu ga, ti ni jini inga chaa un nuu Pedro, ti ni kachi:

—Ro'o, suni kuu ra jna'an chaa un —ni kachi da.

Ko ni kachi Pedro:

—Ansu kuu ri, vasu na kajnu'un ndaa ra ru'u —kachi da jiin chaa un.

**59** Ni kuyajni iin hora, ti ni kachi tuku inga da:

—Ndixia ra naa ra, ja suni ni kunde chaa ja'a jiin chaa un, chi suni chaa ñuu Galilea kuu da —ni kachi da.

**60** Yukan sa ni kachi Pedro jiin chaa un:

—Tu jini kuiti ri naa jnu'un ka'an ra jiin ri —kachi da.

Ti hora un, ni ka'an ga da sia'an, ti ni kana iin li'i. **61** Yukan ti ni ndeokoto Jito'yo Jesús, ti ni nde'e ya nuu Pedro. Ti Pedro ni nuku'un ini da nava ni kachi Jito'yo Jesús jiin da: “Ja nu ti kana ga li'i, ti kachi ra uni jinu ja tu jini ra ru'u.” **62** Yukan na ti ni kenda da kua'an da, ti ni nde'e xaan tonto da ja ni nakani ini da. Ti ni kukui'ya xaan ini da ja ni kachi da ja tu jini da ya.

### *Ka yisikinchaa da Jesús*

**63** Ti taka chaa ka ndito Jesús, ni ka ku ichi ini da nuu ya, ti ni ka kani da ya.

**64** Ni ka jasi da nduchi ya, ti ni ka kani da jiki nuu ya, ti kachi da jiin ya:

—Kachi nau ja ni kani ro'o —ni ka kachi da.

**65** Ti kua'a ga jnu'un ndeva'a ni ka ka'an da nuu ya, ja ka skuiti da ini ya.

### *Kandichi Jesús nuu chaa ka kuña'nu nación Israel*

**66** Nu ni kundijin inga kivi, ti ni ka ndututu taka chaa ka ña'nú nación Israel, jiin taka sutu ka kuña'nu un, jiin taka chaa ka xna'an ley Israel un. Ti ka yinda'a policia un Jesús nuu ni ka ndututu chaa ka kuña'nu un, ti yukan ni ka jikajnu'un da ya:

**67** —Kachi ndaa nuu maa ra kuu Cristo ja vaji nuu Yandios —ni ka kachi da.

Ti ni kachi ya:

—Nu na kachi ri ja maa ri kuu, ni tu kandixia ra naa ra. <sup>68</sup> Ti nu kajnu'un ri ro'o naa ra ja nasa ka ndo'o ini ra siki ri, va ni tu kachi kuiti ra, ti ni tu sia ra ru'u naa ra. <sup>69</sup> Ko vijna na kachi ndaa ri ja ru'u, maa se'e Yivi Ņuyivi, kino'on ri nuu andivi ti yukan nukoo ri nda'a kua'a Yandios, ja na ta'u ri jniñu jiin ya nuu tendi'i nitu'u ja iyo —ni kachi ya.

<sup>70</sup> Yukan na ti tendi'i yivi un ni ka jikajnu'un maa ya:

—¿Nusa, ti maa ra kuu Se'e Yandios nu? —kachi naa.

Ti ni kachi Jesús:

—Maa ri kuu nava ni ka kachi ra naa ra —ni kachi ya.

<sup>71</sup> Yukan na ti ni ka kachi da:

—¿Nanu nandi'i ga yo inga testigo? Ti ja ni ka jiniso'o yo jnu'un ni ka'an da jiin ndusu yu'u maa da —ni ka kachi da.

*Kandichi Jesús nuu Pilato  
(Mt. 27.1-2, 11-14; Mr. 15.1-5; Jn. 18.28-38)*

## 23

<sup>1</sup> Yukan na ti ni ka ndokuiñi yivi un ti kuankoyo jiin Jesús nuu Pilato, chaa kuu gobernador. <sup>2</sup> Ti yukan ni ka keja'a yivi ka kankuachi siki ya, ti kachi naa:

—Ni ka jniñi na chaa ja'a chi ska'an da yivi ja na ndonda i siki taka chaa ka kuña'nu. Ti kachi da ja tu cha'u yo puestu nuu gobiernu romano, ti suni ka'an da ja maa da kuu Cristo, ja kuu rey ja ni taji Yandios —ni ka kachi da naa da.

<sup>3</sup> Yukan na ti ni jikajnu'un Pilato maa ya:

—¿Maa ra kuu rey nuu yivi nación Israel nu? —kachi da.

Ti ni kachi Jesús:

—Maa ri kuu, nava ni kachi ra —kachi ya.

<sup>4</sup> Yukan ti ni kachi Pilato nuu sutu ka kuña'nu un jiin nuu taka yivi un:

—Tu ni iin kuachi ni'in ri siki chaa ja'a —ni kachi da.

<sup>5</sup> Ko vi'i ga ni ka ka'an yivi un:

—Ja ni ska'an da taka yivi ñuu Judea ja na ndonda i jiin jnu'un xna'an da un. Ni keja'a da jiin jnu'un un undi ñuu Galilea, ti vijna ni chaa da undi nuu kanchuku yo ja'a —kachi i naa i.

*Kandichi Jesús nuu Herodes*

<sup>6</sup> Nu ni jiniso'o Pilato jnu'un un, ti ni jikajnu'un da nuu yivi un ja nu Jesús kuu ya chaa ñuu Galilea. <sup>7</sup> Nu ni ka kachi yivi un ja suu kuu ya, ti ni taji da ya kua'an ya nuu Herodes, chaa ni kuu gobernador ñuu Galilea, ja suni kande da ñuu Jerusalén kivi yukan.

<sup>8</sup> Ti nu ni jini Herodes nuu Jesús, ni kusii xaan ini da, chi ja ni kuu na'an ndo'o ini da ja kuni da nuu ya. Chi ni jiniso'o da ka jani yivi jnu'un siki ya, ti kuni da ja na sa'a ya iin jniñu ña'nú nuu da. <sup>9</sup> Kua'a xaan jnu'un ni jikajnu'un da Jesús, ko tu ni nachiso kuiti ya ni iin jnu'un nuu da.

<sup>10</sup> Ti suni ka'iin taka sutu ka kuña'nu un jiin chaa ka xna'an ley Israel un, ja ni'in xaan ka jikan kuachi da ja'a ya. <sup>11</sup> Yukan ti Herodes jiin soldado da, ni ka ku ja'a ini da nuu ya, ti ni ka yisikinchaa da ya. Ni ka naskui'na da ya jiin iin sa'ma va'a xaan, nanu ja kuu ya iin rey. Yukan ti ni natatajiku Herodes Jesús nuu Pilato. <sup>12</sup> Ti undi kivi yukan sa ni ka ndumani jna'an Pilato jiin Herodes, chi undi nuu ni ka jito u'u jna'an da naa da niku.

*Ni kachi Pilato ja na kuū Jesús  
(Mt. 27.15-26; Mr. 15.6-15; Jn. 18.38-19.16)*

<sup>13</sup> Yukan na ti ni nastutu Pilato taka sutu ka kuña'nu un, jiin chaa ka ndiso jniñu ña'nu nuu nación Israel, jiin yivi ñuu un, <sup>14</sup> ti ni kachi da:

—Ni ka chakoyo ra jiin chaa ja'a nuu ri. Ti ka ka'an ra ja ska'an da yivi. Ko nde'e ra naa ra ja ni jikajnu'un ri da, ti tu ni'in ri ni iin kuachi siki da nava ka chakuachi ra ja'a da. <sup>15</sup> Suni Herodes tu ni ni'in da ni iin kuachi siki chaa ja'a. Ja yukan kuu ja ni nakua'a tuku da chaa ja'a nuu yo. Ja ka jini ra naa ra ja tu ni sa'a da ni iin kuachi ja kuū da. <sup>16</sup> Na ta'u ri jniñu nuu soldado ja na kua'a da tau chaa ja'a, ti sa na sia ri da ki'in da —ni kachi Pilato.

<sup>17</sup> Ti iyo jnu'un ja taka viko pascua sia Pilato iin presu, nau ja na kachi yivi ja sia da. <sup>18</sup> Ko tendi'i yivi un ni ka keja'a ka kanako'o:

—¡Na kendo chaa jña na kuū da! ¡Sia Barrabás! —kachi yivi un naa.

<sup>19</sup> Ti kande Barrabás vekaa siki, ja ni ndonda da siki gobierno ja ni ka kanaa da ñuu un, ti ni ja'ní da ndiyi. <sup>20</sup> Ko Pilato, kuni sia da Jesús, ti ni kachi tuku da jiin yivi un ja na xndaku da nuu i ja na sia da Jesús, chi Barrabás iyo xaan kuachi da. <sup>21</sup> Ko yivi un vi'i ga ni ka kanajiin ko'o:

—¡Katacaa ni chaa jña nda'a cruz! ¡Katacaa ni chaa jña nda'a cruz, na kuū da! —kachi naa.

<sup>22</sup> Ko jinu ku uni ni kachi tuku Pilato jiin yivi un:

—¿Ko naa kuachi ni sa'a da nusa? Ja ru'u tu nau ni iin kuachi ni'in ri siki da ja jiin kuachi un na kuū da. Na ta'u ri jniñu ja na ndo'o da ti sa na sia ri da na ki'in da —ni kachi Pilato.

<sup>23</sup> Ko yivi un ni ka siin ka kanako'o, ja ka jikankuachi ja na katacaa da Jesús nuu nda'a cruz. Ti ni ka siin da ka kanako'o da jiin chaa ka kuña'nu un, undi ni ka kundee da ja ni kuu nava ka kuni da. <sup>24</sup> Yukan ti ni ja'a Pilato jnu'un ja na kuu nava ka kuni da. <sup>25</sup> Ti ni sia da chaa ni ka jikan yivi un nuu da, chaa kande vekaa ja ni ndonda da siki gobierno, jniñu ja ni ja'ní da ndiyi. Ti ni nakua'a Pilato Jesús nuu yivi un, ja na sa'a i nava ka kuu ini maa i jiin ya.

### *Ni ka jatacaa da Jesús nuu nda'a cruz (Mt. 27.32-44; Mr. 15.21-32; Jn. 19.17-27)*

<sup>26</sup> Ichi nuu kuankoyo da jiin Jesús ja katacaa da ya, ni ka ndejna'an da jiin iin chaa ñuu Cirene nani Simón, ja vendi da ni ja'an da ranchu da. Ti ni ka chayika da chaa un ja na kundiso da cruz Jesús, ti na kundandikun da jata ya.

<sup>27</sup> Yukan kuankoyo yivi kua'a. Ti suni kuankoyo kua'a ñasi'i ja ka kanajiin ko'o ña, ka nde'e ña, ja ka kunda'u xaan ini ña ja kuu ya. <sup>28</sup> Ko ni nandeokoto Jesús nuu ña naa ña, ti ni kachi ya:

—Ro'o, ña'an Jerusalén naa ra, tu nde'e ra ja'a ri. Nde'e naa ra ja kuu ja'a maa ra jiin se'e ra, <sup>29</sup> chi kiji kivi ja koo nundo'o xaan siki ra, ti kachi ra naa ra: "Xaan ga ndatu ña'an tu se'e, ja tu ni ka ñu'un se'e ña, ja tu ni ka nchaka ña suchi yikin ja kaxin i jikha ña." <sup>30</sup> Ti kivi un kachi yivi naa i: "Va'a ga ja na nduva yúku ja'a siki ri naa ri, ti na kuū ri." Ti kachi i jiin yuku un: "Va'a ga ja chisa'yí ru'u naa ri", kachi i. <sup>31</sup> Chi na kachi ndaa ri nuu ra ja yivi ja'a, ja ka sa'a ndeva'a i sia'an jiin ri, ka sa'a i nanu ja ka ja'ma i yujnu yi'i ja tu kuni kayu, chi tu chaku va'a ini i ndoo ka sa'a i jiin ri. Ti yivi ka sa'a ndeva'a sia'an jiin ri vijnal, ti ja kuu kivi un kii iin nundo'o xaan ga siki i. Ti yachi kii nundo'o un siki i nanu ja nu ka'ma yo iin yujnu ichi —ni kachi Jesús.

<sup>32</sup> Suni ka yinda'a da uu chaa ni ka ja'ní ndiyi, ja na kuu da naa da jiin Jesús. <sup>33</sup> Ti nu ni ka jakoyo da iin ñu'un ja nani "yiki xini", ti yukan ni ka jatacaa da ya nda cruz jiin ndinduu chaa ni ka ja'ní ndiyi un, iin da ichi nda'a kua'a ya,

ti inga da ichi nda'a sajni ya. <sup>34</sup> Ti hora ka chijnii da ya nuu nda'a cruz, ti ni kachi ya:

—Tata na Yandios, kuanka'nu ini ni nuu yivi ja'a, chi tu ka jini i ndoo ka sal'i —ni kachi ya.

Ti soldado un ni ka chu'un da suerte siki sa'ma Jesú, ja na tejna'an nuu jna'an da.

<sup>35</sup> Yivi ka'in un ka nde'e va'a nuu ya, ti undi chaa ka ndiso jniñu ña'nu un, suni ni ka ske ichi ini da nuu ya, ti ka ka'an da:

—Ni nama da sava yivi, ko vijna na ti na nama da maa da nu jandaa ndixia kuu ja maa da kuu Cristo, ja ni nakaji Yandios ja kii —kachi da naa da.

<sup>36</sup> Ti suni undi soldado un ni ka kuu ichi ini da nuu ya. Ni ka tu'va da, ti ni ka ja'a da vino iya ja na ko'o ya, <sup>37</sup> ti ni ka kachi da jiin ya:

—Nu ndixia ra ja maa ra kuu rey nuu nación Israel, ti nama maa ra vijna ñu'n'i —kachi da naa da.

<sup>38</sup> Ti xini cruz ya yukan ni ka teña da iin tutu ja yoso jiin letra griego, jiin latín, jiin hebreo, ja kachi sia'an: "Chaa ja'a kuu Rey nuu yivi nación Israel."

<sup>39</sup> Ti iin chaa yindaka nda'a cruz un ni ka'an ndeva'a da nuu ya, ti kachi da:

—Nu maa ra kuu Cristo, nama maa ra vijna, ti nama ru'u naa ri —ni kachi da.

<sup>40</sup> Ko inga chaa yindaka jiin da un, ni nduxaan da nuu da, ti ni kachi da:

—Ja tu yu'u ra nde'e ra Yandios. ¿Xi tu jini ra ja kunchakuachi ga yo nuu ya nu? Ti iin ni ja ka ndo'o yo naa yo. <sup>41</sup> Maa yo chi vatu ni ka ndo'o yo, chi ja'a ni'in yo siki ja ni ka sa'a ndeva'a yo. Ko chaa ja'a, tu na iin kuachi ni sa'a da ja kondo'o da jiin yo —ni kachi da.

<sup>42</sup> Yukan ti ni kachi da jiin Jesú:

—Jesú, nukun'ini ni saña kivi na keja'a ta'u ni jniñu ña'nu nuu ni tu'u ja iyo —ni kachi da.

<sup>43</sup> Ti ni kachi Jesú jiin da:

—Jandaa na kachi ri jiin ra ja undi vijna ti ndii ra jiin ri andivi, nuu vii xaan kaa —ni kachi ya.

### Ni ji'i Jesú

(Mt. 27.45-56; Mr. 15.33-41; Jn. 19.28-30)

<sup>44</sup> Nu ni kuu sava nduu, ni kuñaa ni ka'nú ñuyivi, ti ni ndundijin undi ka uni ja'iní. <sup>45</sup> Ti ni kuñaa nuu ndikandii. Ti undi sa'ma yindaka ini veñu'un ka'nú Israel un, ni ndata sava kuiti undi nuu sukun ti undi nuu ja'a. <sup>46</sup> Yukan ti ni kanajii Jesú:

—Tata na Yandios, na kí'in ni añu na vijna —ni kachi ya.

Sia'an ni ka'an ya, ti ni ji'i ya.

<sup>47</sup> Nu ni jini chaa kuu capitán romano un ja sia'an ni kuu, ti ni ka'an da ja kuña'nu xaan Yandios, ti ni kachi da:

—Jandaa kuiti kuu ja tu ni iyo ni iin kuachi chaa ja'a —ni kachi da.

<sup>48</sup> Tendi'i yivi ka'in un, ni ka jini ja sia'an ni kuu. Ti ichi kuankoyo i, ka kani i jíki jíka i, chi ni ka yu'u i ja sia'an ni ka janhan i un. Ni ka kuu kui'ya ini i ja ka na'nú i ya. <sup>49</sup> Ko taka yivi ja ni ka jini jna'an jiin ya, ka'iin yi un jiin suni taka ñasi'i ja vekoyo ña jiin ya undi ñuu Gálilea. Ni ka kendo jíka ña ka nde'e ña taka ja ni kuu un.

### Ni ka chundujii da Jesú

<sup>50</sup> Ni iyo iin chaa va'a, ja ni jíka ndaa da, nani da José, ni kuu da chaa ñuu Arimatea, ja kuu iin ndañuu Judea. Yi'i da nuu junta kuña'nu nación Israel un.

<sup>51</sup> Ti ni kandixia chaa un jnu'un ni xna'an Jesú, ja kuu kivi yivi nda'a Yandios ja na ta'u ya jniñu nuu i, yukan ti ni'in yivi un iin ta'u ñuu ya ja kundiso i jniñu

jiin ya. Ti maa da tu ni kejna'an da jiin chaa ni ka ndututu nuu junta un ja ni ka kachi da ja na kuū Jesús. <sup>52</sup> Ja yukan kuu ja ni ja'an da nuu Pilato, ti ni jikan da yiki kuñu Jesús ja na chunduji da. <sup>53</sup> Nu ni kuni'in da yiki kuñu Jesús nuu nda'a cruz un, ti ni nasuku da ya jiin iin sa'ma finu. Ti ni chunde da ya ini iin yau jaa, ja ni jacha maa da jika iin kava, ja ti jakunduji ga ni iin ndiyi.

**54** Chi ja'ini kivi yukan keja'a kivi ka ndetatu yivi nación Israel.

**55** Ti ña'an ni ka kikoyo jiin Jesús undi ñuu Galilea, ni ka ja'an ña jiin José, ti ni ka jini ña nuu ni chunde da ya, ti ni ka jini va'a ña nava ni ka skatuu da yiki kuñu Jesús. <sup>56</sup> Ti nu ni ka nandeokuñi ña ve'e ña, ti ni ka satu'va ña perfume, jiin iin nuu pomada ja na kin chi'i ña siki yiki kuñu Jesús. Yukan ti ni ka chiñu'un ña kivi ndetatu un nava iyo ley Moisés.

*Ni nandoto Jesús  
(Mt. 28.1-10; Mr. 16.1-8; Jn. 20.1-10)*

## 24

**1** Ña'an xaan kivi domingo ni ka ja'an ña'an yukan nuu ñunduji Jesús, ti ka yinda'a ña perfume ja ni ka satu'va ña. Ti suni kuankoyo tijni ga ñasi'i jiin ña naa ña. **2** Ti nu ni jakoyo ña, ti ni ka jini ña ja, ja ni kuxio yuu ndi'yu yu'u ñaña un. **3** Ni ka kivi ña, ko tukaa ga ni ka nani'in ya yiki kuñu Jito'yo Jesús. **4** Ni ka ndo'o kue'e ini ña ja ni ka jini ña ja tukaa ga yiki kuñu ya, ti tu ka kujnuni ini ña nasa sa'a ña naa ña. Ti ni ka ndo'o ini ña sia'an, ti ni ka ndenda ni uu chaa ka ñu'un sa'ma xkiyi ni'ní, ja janducha ii, ti kajjin da xiin ña naa ña. **5** Ni ka yu'u xaan ña, ti ni jakundandijin nuu ña undi nuu ñu'un, ti chaa un ni ka kachi da:

—¿Ndoo ka nanduku ra iin chaa chaku nu ka'iin ndiyi ja'a? **6** Tu kande ya ja'a chi ja ni nandoto ya. Nuku'un ini naa ra nasa ni kachi ya nuu ra na ni kunde ga ya ñuu Galilea. **7** Chi ni kachi ya: "Ru'u, maa Se'e Yivi Ñuyivi, nakua'a yivi ru'u nuu yivi nde'va'a kuiti, ti kin katakaa da ru'u nuu nda'a cruz, ko nu uni kivi, ti nandoto tuku ri", ni kachi ya —ni ka kachi chaa un.

**8** Ti ni ka nuku'un ini ña nava ni kachi Jesús. **9** Ti ni ka kee ña nuu ni ñunduji ya, ti kuanukoyo ña, ni ka jani ña jnu'un nuu ndi'uxi iin chaa ni ka kuu ndaja'a ya, jiin nuu taka ga yivi un. **10** Ti ña'an ni ka jani jnu'un nuu ndaja'a ya un, ni ka kuu María ñaa ñuu Magdala, jiin Juana, jiin María ña'an kuu nana Jacobo, jiin tijni ga ñasi'i un naa ña. **11** Ko ndaja'a ya un ni ka jani ini da ja ni ka nduloco xini ña, ti tu ni ka kandixia da jnu'un ni ka ka'an ña. **12** Ti vasu tu ka kandixia da naa da, ko Pedro ni ja'a da corrí kuan nde'e da nuu ñaña un. Ni jaa da ti ni nde'e da ini yau un, ti ni jini da ja mani ga sa'ma manta un kanchuku. Yukan ti kuano'on da ve'e da, ko so ni naa ini da ja sia'an ni kuu un.

*Ndajnu'un Jesús jiin uu chaa kuankoyo ichi Emaús  
(Mr. 16.12-13)*

**13** Ti uu chaa un ni ka kee da suni kivi yukan, ti kuankoyo da iin ñuu nani Emaús ja kendo uxi iin kilometro jiin Jerusalén. **14** Ti ichi kuankoyo da, ka ndajnu'un da siki taka ja ni kuu kivi un. **15** Ti ni ka ndajnu'un da, ti ka ka'an ka ka'an da kuankoyo da, ti ni tu'va maa Jesús kua'an ya jiin da. **16** Ti vasu kua'an ya jiin da, ko tu ni ka nakuni kuiti da ja maa ya kuu, nanu ja so ni jasi ini da. **17** Ti maa Jesús ni jikajnu'un ya naa da:

—¿Naa jnu'un ka ndajnu'un ra ichi vekoyo ra ja'a? ¿Ti ndoo ka kukui'ya ini ra naa ra? —ni kachi ya.

**18** Ti iin chaa nani Cleofas ni kachi da:

—Ni ka'nu yivi ñuu Jerusalén ka jini i taka ja ni kuu ñuu un. ¿Xi maa iin ni ro'o kuu ja tu jini taka ja ni kuu un, vasu yukan kancha ra nu? —ni kachi da.

**19** Ti maa ya ni jikajnu'un:

—¿Ndoó ni kuu nusa? —ni kachi ya.

Ti ni ka kachi da:

—Nundo'o ni jna'an Jesús, chaa ñuu Nazaret, ja ni kuu da profeta ni ka'an da jnu'un Yandios. Ndichi xaan ni ka'an da, ti ni sa'a da taka jniñu ña'nú ja vaji nuu Yandios. Nuu taka yivi ni ka jini. **20** Ko chaa ka kuu sutu ka kuña'nu un jiin chaa ka ndiso jniñu ña'nú un, ni ka nakua'a da chaa ja na kuu da nuu nda cruz. **21** Ti ka ñukuu ini ri ja maa da kin nama yivi nación ri Israel nuu gobierno ñuu Roma. Ko vijna ja iyo uni kivi ja ni jí'i da ja siki jniñu ni sa'a da. **22** Ti sava ñasi'i ka jini jna'an ri jiin, ni ka siu'u ña ru'u, chi jaña'an xaan vijna ni ka ja'an ña nuu ñaña un. **23** Ti ka jani ña jnu'un ja tukaa ga ni ka jini ña yiki kuñu da ini ñaña un. Ti ni ka nchakoyo ña ka jani ña jnu'un ja, ja ni ka jini ña uu ángel Yandios. Ti ángel un ni ka kachi da ja chaku Jesús. **24** Yukan ti sava ñanijna'an ri ni ka jande'e nuu ñaña un, ti ni ka jini da ja jandaa ndixia kuu jnu'un ka ka'an ña'an un, ko tukaa ga ni ka jini da nuu maa Jesús —ni ka kachi chaa un.

**25** Yukan ti ni kachi Jesús jiin da naa da:

—¡Chaa tu ka chaku ini ka kuu ra! Xaan ga u'u ti kandixa ra naa ra jnu'un ni ka ka'an profeta na jana'an, ja ka'an siki Cristo, ja taji Yandios nava na sa'a ya jniñu ña'nú. **26** ¿Va nu tu kanuu kondo'o Cristo taka nundo'o ja'a xnakan, ti sa kin no'on ya andivi ti nduñu'nu ya nu? —ni kachi ya.

**27** Yukan na ti ni keja'a xndaku ya taka jnu'un yoso nuu tutu Yandios, ja ka'an nasa kondo'o maa ya. Ni keja'a xndaku ya nava ka'an nuu tutu Yandios ni chaa tutu Moisés, ti ni siin ya jiin tutu Yandios ni ka chaa profeta na jana'an un.

**28** Ti nu ni ka jakoyo da ñuu nuu kuankoyo da un, ti Jesús ni sa'a ya ja siin ya ichi ki'in ya. **29** Ti maa da naa da ni ka chayika da ya ja na kendo ya jiin da, ti ni ka kachi da:

—Kendo jiin ri ja'a na kendo yo naa yo, chi ja ni ini xaan, ti ja kuan ki'vi —ni ka kachi da.

Yukan ti ni kivi Jesús ja kendo ya ni naa da. **30** Ti nu ni nukoo ya mesa jiin da ja kuxini da, ti ni ki'in ya iin staa stila, ni nakuanta'u ya nuu Yandios, ti ni tejna'an ya nuu da naa da. **31** Ti ja sia'an ni sa'a ya, sa ni ka nakuni da ya, ja maa Jesús kuu ya. Ko nu ni ka nakuni da ya, ti ni ndoñu'un ni ya kua'an ya.

**32** Ti ni ka kachi da:

—Jandaa ni kuu ja ka na'nú ini yo ya, ko nu ni ndakuni'in ya nava ka'an tutu Yandios siki Cristo, na ichi vaji yo, ti ni ka ndusii xaan ini yo jiin jnu'un ni ndaku ni'in ya nuu yo —ni ka kachi da.

**33** Yukan ti tukaa ni ka kendo da, chi ni ka naki'in da ichi kuanukoyo da undi Jerusalén nuu kanchuku ndi uxi iin apóstol jiin taka ga jna'an da, ja ni ka ndututu da kanchuku da. **34** Ti yachi ni ka nchakoyo da, ti ni ka kachi chaa kanchuku un:

—Jandaa kuiti kuu ja ni nandoto Jito'yo, ti ni ndenda ndijin ya nuu Simón! —ni ka kachi chaa kanchuku ve'e un.

**35** Yukan na ti ni ka jani da jnu'un nava ni ka ndejna'an da jiin ya ichi kuankoyo da, jiin ja nasa ni ka nakuni da ya na ni tejna'an ya staa stila nuu da.

### Ni ndenda Jesús nuu ndaja'aya

**36** Ti ni ka ndajnu'un ga da jnu'un un, ti ni ndenda ndijin Jesús kandichi ya ma'ñu da naa da, ti ni kanxia'u ya sia'an jiin da naa da:

—Na kukuee nuu ra, ti na kusii ini ra naa ra —ni kachi ya.

<sup>37</sup> Ko maa da naa da ni ka yu'u xaan da, ti ka ndo'o ini da ja so ni naxna'an ya maa ya nuu da, chi tu ni ka nakuni ndaa da ja maa ya kuu ndixia. <sup>38</sup> Ti maa Jesú斯 ni kachi ya jiin da naa da:

—¿Ndoo ka jani siki ini ra ti ka yu'u ra naa ra? <sup>39</sup> Nde'e nda'a ri jiin si'in ri naa ra, ti kuni ndaa ra ja maa ri kuu ndixia. Ke'e ru'u jiin nda'a ra ti kuni ndaa ra, chi iin tachi ja naxna'an nuu yo tu iyo yikí kuñu nanu ka nde'e ra ru'u —ni kachi ya.

<sup>40</sup> Nu ni ka'an ya sia'an, ni xna'an ya nda'a ya jiin ja'a ya. <sup>41</sup> Ko vanuxia maa da naa da, changa ga kandixia va'a da, ti ka kusii ini da, ko so ka sa'u ini da naa da. Ti ja yukan ni kachi Jesú斯:

—¿Ka ñava'a ra ti'lí ja kají yo já'a naa ra nu? —ni kachi ya.

<sup>42</sup> Ti maa da ni ka ja'a da iin pedazu cháká ja ni ka tau da nuu ñu'un, jiin iin staa nduxi ñuñu nuu ya. <sup>43</sup> Ti ni ki'in ya un, ti ni yaji ya nuu da naa da.

<sup>44</sup> Yukan ti ni kachi ya:

—Nundo'o ni jna'an ri, yukan kuu jnu'un ni jani ri nuu ra naa ra na ni kuncha ga ri jiin ra naa ra, ja kanuu ja na siuku ri nava yoso taka tutu Yandios, tutu ya ja nani ley Moisés, jiin nuu tutu ya ni ka chaa profeta na jana'an, jiin nuu tutu ya ja nani Salmo —ni kachi ya.

<sup>45</sup> Yukan na ti ni kachi ndaa ya nuu da nasa kuni ka'an taka jnu'un yoso nuu tutu Yandios siki maa ya. <sup>46</sup> Ti ni kachi ya:

—Sia'an yoso nuu tutu ja siki ru'u ja kuu ri Cristo, ja taji Yandios ru'u sa'a ri jniñu ña'nú, koo ndo'o koo nene ri ti kuñu ri. Ti nu uni kivi ti nandoto ri ma'ñu ndiyí un. <sup>47</sup> Ti sivi ri kuu ja kuichanuu ki'in nuu taka nación, ja na kuni yivi jnu'un ri naa i. Ti keja'a undi ñuu Jerusalén, kachi nuu i ja na nakani ini yivi naa i nuu kuachi i, nava na kuanka'nú ini Yandios nuu i. <sup>48</sup> Ti maa ra naa ra, kua'a ra jandaa nuu taka ja ka jini ra jiin taka ja ni ka jiniso'o ra. <sup>49</sup> Ko kundatu ra ñuu Jerusalén ja'a, chi taji ri maa ya ni chisojnu'un Tata ri Yandios nuu ra naa ra. Ko kundatu ra ñuu ja'a undi na ni'in ra maa ya kii nuu Yandios, ya kancha andivi, sa kuu sa'a ra jniñu tatu ri nuu ra naa ra —ni kachi ya.

### *Ni ndaa Jesú斯 andivi*

(Mr. 16.19-20; Hechos 1.9-11)

<sup>50</sup> Yukan na ti ni kee ya Jerusalén jiin da naa da, ti kua'an ya undi ñuu Betania. Ti yukan ni kani'ín ya ndinduu nda'a ya, ti ni jikanta'u ya nuu Yandios ja ná kua'a ya jnundee ini nuu da naa da, ti na koto nda'u ya naa da. <sup>51</sup> Ti ni ka'an ga ya sia'an, ni kuxio ya ma'ñu da ti ni ndaa ya kuano'on ya andivi.

<sup>52</sup> Ti maa da naa da ni ka chiñu'un da ya, ti sa kuan nukoyo da Jerusalén, ko ka kusii xaan ini da kuankoyo da. <sup>53</sup> Ti yukan nini ka ja'an da ini veñu'un ka'nu Israel un, ja ka nakanajaa da Yandios ja ña'nú kuu taka jniñu ni sa'a ya.

Ja'a kuu jnu'un Yandios ni chaa Lucas.

## Jnu'un Yandios ni chaa Juan

*Ka'an apóstol Juan nau kuu maa Jnu'un ndaa*

<sup>1</sup> Na ti sa'a ga Yandios ñuyivi jiin taka ga iyo, ti ja iyo ñin ja kancha jiin ya ja nani Jnu'un. Sia'an ni nani chi xna'an nasa kaa maa Yandios. Ti iin ni kuu Jnu'un un jiin maa Yandios. Ti suni sia'an iin nuu ini maa Yandios jiin Jnu'un un. <sup>2</sup> Sia'an ni ja iyo kancha Jnu'un un jiin Yandios sa ni sa'a ya ndi'i ga ja iyo. <sup>3</sup> Ti maa iin ni Jnu'un un ni sa'a nava ni kachi Yandios, ni sa'a taka ja iyo. Tu ni iyo ni iin ja tu ni sa'a Jnu'un un.

<sup>4</sup> Ni sa'a Jnu'un un ja taka ja iyo na kuchaku. Ti nava na kujnuni ini yivi nau kuu Yandios, chi Jnu'un un ni kuu nanu iin ñundijin ja na ndinchaa ichi i nava na kujnuni ini i nau ja kuu ya. Tu ka kuni kuitti i ja na ndinchaa ñu'un un nuu i. Vasu sia'an tu ka kuni i tu ni ka kundee i nda'va i ñu'un un naa i. <sup>5</sup> Ti vasu sia'an ni kuu, ko tu ni ka kujnuni ini i nau ja kuu ya, chi kanchuku i nanu ñuñaa kuiti. Ni chaa ya ti ni kuu ya nanu iin ñu'un ja na ndundijin nuu naa un. Ti vasu sia'an ni kuu ko tu ni ka kujnuni ini yivi nau ja ni kuu ya.

<sup>6</sup> Yukan ti sa ni nakaji Yandios iin chaa ni nani Juan, <sup>7</sup> ti ni ja'a ya iin jniñu nuu da ja na ka'an da jnu'un ya nuu yivi. Ni ka'an da, ti ni kachi da: "Ja ni chaa Chaa un!" —ni kachi da. Sia'an ni ka'an da, chi ni kachi da ja Chaa un kuu ja kua'a inijnuni yivi. Chi kuu da nanu iin ñu'un ja xndinchaa nava na kujnuni ini yivi na ichi kinkoyo i. <sup>8</sup> Sia'an ni ka'an Juan chi ni kachi da ja ansu maa da kuu Chaa kuu nanu ñu'un un, chi so kachi da ja na kandixia yivi naa i.

<sup>9</sup> Undi ni chaa Chaa un, ti sa ni ka kujnuni ini yivi naa ichi kinkoyo i, chi ni ja'a da inijnuni yivi ñuyivi. Ti jnu'un ka'an da un, ni kuu nanu iin nduva ja ndinchaa nuu ñuñaa. Chi ni xna'an naa ichi kinkoyo yivi naa i. Ti sia'an na kujnuni ini i nau ja kuu maa Yandios. Jiin jnu'un ni ka'an chaa un, ni ka jini i naa ichi kinkoyo i.

<sup>10</sup> Vasu maa Chaa un ni sa'a ñuyivi ja'a ti ni kuncha da nuu, ko tu ni ka janta'u yivi maa da. Chi tu ni ka nakuni i nau chaa kuu da. <sup>11</sup> Ni kuncha Chaa un nuu kanchuku yivi ñuu da, ja su ndi'i i kuanta'u maa da, ja maa da kuu Se'e Yandios, ya kuu Cristo. <sup>12</sup> Ti yivi ni ka janta'u ya yukan, ni ka kuu i yivi ka kandixia. Ni ja'a ya jnundee ini yivi un, ti sia'an ni ka nduu i yivi Yandios. <sup>13</sup> Ti ka kuu i yivi Yandios, chi sia'an ni kuu ini maa ya. Ti ansu ja ni ka kuu ini maa yivi naa i, chi ja ni kuu ini maa Yandios ni kuu ja ni ka nduu i se'e maa ya, ti tukaa ga kuu i nanu kuu iin se'e tata jiin nana.

<sup>14</sup> Chaa ni kuu Jnu'un ja ni kuncha undi nuu jiin Yandios un, ni kii da ni kaku da nuu ñuyivi ja'a. Ni kuncha da jiin yivi naa i, ti ru'u naa ri ni ka jini ri ja iin ni kuña'nu da jiin Tata da Yandios. Jiin jniñu ni sa'a da ni stuu da ja kuña'nu Yandios. Ti yukan sa ni ka jini ri ja maa da kuu Se'e Yandios, chi iin ni ka kuña'nu ya jiin maa Yandios. Ni nakachi ya taka jnu'un ndaa vaji nuu maa Yandios. Sia'an ni kuu na ni chaa Jnu'un un nuu ñuyivi ja'a.

<sup>15</sup> Juan, chaa ni skuanducha un, ni ka'an da jnu'un ya nuu yivi, ti ni kachi da:

—Siki Chaa ja'a ni ka'an ri nuu ra naa ra na, ni kachi ri ja jaa iin kivi ti chaa iin Chaa kuña'nu ga, chi xnaka Chaa un iyo, ti sa ni kaku ru'u —ni kachi Juan, chaa ni skuanducha un.

**16** Iyo xaan jnu'un ndee ini nuu ya nuu Yandios. Ja yukan kuu ja kunda'u ini ya yo'o naa yo, ti chindee xaan ya yo'o. **17** Xnaka Moisés ni xnukoo ley Yandios, ti sa ni taji ya Jesús, ya kuu Cristo, ti maa ya kuu ja kunda'u ini yo'o. Ti Jesús kuu ya ni xndaku taka ga jnu'un vaji nuu maa Yandios nuu yo naa yo. **18** Tu ja'i nakuni yivi nuu Yandios, chi maa iin ni se'e ya kuu ja kancha jiin ya. Ja yukan kuu ja ni kii ya, ni kii stuu ya nava kaa maa Tata ya.

*Ni ka'an Juan, chaa ni skuanducha un, jnu'un JesúS, ya kuu Cristo  
(Mt. 3.11-12; Mr. 1.7-8; Lc. 3.15-17)*

**19** Yukan ti chaa ka kuña'nu nuu nación Israel, ja kanchuku ñuu Jerusalén, ni ka ja'a da jniñu nuu tijni sutu jiin ndaja'a da ja ni ka nani levitas. Ni ka taji da chaa un nuu kande Juan ja na kajnu'un da, na ndenu nau siki kuu jniñu sa'a da un. Ti ja'a kuu jnu'un ni ka'an Juan jiin da. **20** Tu ni nduku da inga jnu'un ja xnda'u da chaa un, chi su'va ni kachi ndaa da:

—Ansu ru'u kuu maa Cristo ja ni taji Yandios ja sa'a jniñu ña'nu un —ni kachi da.

**21** Yukan na ti ni ka jikajnu'un tuku chaa un:

—¿Nau ja kuu ra nusa? ¿Xi maa ra kuu profeta Elías ja ni ka'an jnu'un Yandios un nu? —ni ka kachi da.

—Ansu kuu ri —ni kachi Juan.

Ti ni ka jikajnu'un tuku da:

—Kii iin chaa kii ka'an jnu'un vaji undi nuu maa Yandios. ¿Xi maa ra kuu chaa un nu? —ni ka kachi da.

Ti ni xndeokani Juan:

—Tuu —ni kachi da.

**22** Yukan na ti ni ka jikajnu'un tuku da, ti ni ka kachi da:

—¿Nau ja kuu ra nusa? Kachi, nava sia'an na ni'in ri jnu'un nakani ri nuu chaa ña'nu ni ka taji ru'u un, ¿Ko na chaa kuu maa ra nusa? —ni kachi da.

**23** Ti ni kachi Juan:

—Maa ri kuu ja ve ka'an undi nuu ñu'un te'e ja'a, ja na kachi ri nuu yivi: "Satu'va maa ra naa ra, chi ja yajni chaa Jito'yo Yandios", chi sia'an ni ka'an Isaías na ni chaa da jnu'un Yandios na jana'an —ni kachi Juan.

**24-25** Ti chaa vekoyo nuu chaa fariseo un ni ka jikajnu'un da Juan, ti ni ka kachi da:

—¿Ti ndoo skuanducha ra yivi, ti nu tu kuu ra maa Cristo, ni Elías, ni inga profeta ja ka'an jnu'un vaji undi nuu maa Yandios nusa? ¿Ndoo kuu ja sa'a ra un nusa? —ni ka kachi da.

**26** Ti ni kachi Juan jiin da naa da:

—Saña chi skuanducha na jiin nducha, ko iyo inga Chaa ja chaa nuu ni naa ni, ti ni'in, tu ka nakuni ni chaa un. **27** Xnaka saña ni chaa, sa chaa Chaa un. Ko vanuxia kuña'nu ga da ja kuu saña. Kuña'nu xaan ga da ja tu kuu kandu na nuu da, ni ansu jniñu na kuu jakuitandijin na ti tava na ndijña da —ni kachi Juan.

**28** Sia'an ni ka'an Juan na ni kunde da yajni ñuu Betábara, ja kande inga yu'u yucha Jordán nu ni skuanducha da yivi un.

*Ka'an Juan, chaa skuanducha un, ja JesúS kuu maa Lelu Yandios*

**29** Inga kivi ti ni jini Juan nuu Jesús ja vaji ya nuu kande da, ti ni kachi da jiin yivi:

—Nde'e naa ra, ja'a vaji maa Lelu Yandios, ti kuu ya nanu lelu ni ka ja'ní yivi Israel ja ni ka soko i ja na kencha kuachi i. Ti maa ya kuu Lelu Yandios, chi sia'an ni chaa ya ja na kencha ya kuachi yivi ñuyivi ja'a. **30** Undi nuu ni ka'an ri jnu'un ya ja ni kachi ri: "Xnaka ru'u, ni kenda ti sa kenda maa Chaa

kuña'nu ga un. Kuña'nu ga ya chi ja iyo ya, ti sa ni kaku ru'u. <sup>31</sup> Undi na sa ti kuni ga ri nau kuu maa ya. Ko xnaka ni kenda ri skuanducha ri jiin nducha nava sia'an na stuu ri maa ya nuu yívi Israel. Yukan na ti sa na nakuni yívi Israel nau kuu ya” —ni kachi Juan.

<sup>32</sup> Yukan na ti ni janji Juan jnu'un, ti ni kachi da:

—Ni jini ri ni kuun Espíritu Yandios vaji ya undi andívi, vaji ya nanu iin sata, ni jinu ya ti ni kendo ya jiin Jesús. <sup>33</sup> Undi sa ti kuni ga ri nau kuu ya, ko vijna ti ja ni jini ri chi maa Yandios ni taji ya ru'u. Ni ja'a ya jniñu nuu ri ja na skuanducha ri yívi jiin nducha. Ni ka'an ya jiin ri, ti ni kachi ya: “Nu ni jini ra ni kuun Espíritu Yandios ti jinu ya siki iin chaa un. Ti Chaa yukan kuu ja taji Espíritu Yandios ja na kuncha ya jiin yívi naa i”, ni kachi Yandios jiin ri. <sup>34</sup> Ru'u Juan, na kachi ri ja, ja ni jini ri Chaa un, ti ja'a ri jandaa ja maa ndixia da kuu maa Se'e Yandios. Ti jandaa kuiti kuu ja Chaa un kuu maa Se'e Yandios —ni kachi Juan.

<sup>35</sup> Inga kívi ti kande tuku Juan jiin uu chaa ka jika jiin da. <sup>36</sup> Ni jini da nuu Jesús ni ya'a ya yukan, ti ni kachi da:

—Nde'e naa ra, Chaa un kuu maa Lelu Yandios —ni kachi da.

<sup>37</sup> Ni ka jiniso'lo chaa ka jika jiin Juan ja sia'an ni ka'an da, ti ni ka chindikun chaa un jata Jesús kuankoyo da. <sup>38</sup> Ni ndeokoto Jesús, ni jini ya ja ka ndikun chaa un kuankoyo da jata ya. Ni ka'an ya, ti ni kachi ya:

—¿Ndoo ka nduku ra naa ra? —ni kachi ya.

Ti ni ka kachi da naa da:

—Maestro, ¿Nanu nchaa ni? —ni ka kachi da.

<sup>39</sup> Ti ni kachi Jesús:

—Ña'an na cho'o, ti kuni ra —ni kachi ya.

Kuankoyo da jiin ya naa da ti ni ka jini da nuu kancha ya. Ti yukan ni ka kendo da jiin ya kivi un, chi ja ni kuu kaa kuun ja ini.

<sup>40</sup> In chaa un ni kuu Andrés, ñani Simón Pedro. Ni jini da ja sia'an ni ka'an Juan, ti ni chindikun da jata Jesús. <sup>41</sup> Yukan na ti ni jan nunduku Andrés ñani da Simón Pedro, ti ni kachi da jiin da:

—Ni nakejna'an ri jiin Cristo, ya ni taji Yandios ja sa'a jniñu ña'nun un —ni kachi da.

<sup>42</sup> Yukan na ti kua'an da jiin ñani da nuu kancha Jesús. Nu ni jini Jesús nuu Simón, ti ni kachi ya:

—Maa ra kuu Simón, se'e yíi Jonás. Undi vijna ti kendo ra konani ra Cefas —ni kachi ya.

(Cefas kuni ka'an Pedro nuu sa'an ni ka ka'an yívi un.)

<sup>43</sup> Inga kívi ti ni ki'in Jesús ichi kua'an ya ichi ñuu Galilea. Yukan ni ndejna'an ya jiin Felipe. Ni kachi ya jiin da:

—Ña'an na cho'o —ni kachi ya.

<sup>44</sup> Ti Felipe ni kuu da iin chaa ñuu Betsaida, nu kuu ñuu Andrés jiin Pedro.

<sup>45</sup> Ni nanduku Felipe Natanael, ti ni kachi da jini da:

—Ja jini ra nava ni chiso Moisés jiin taka ga profeta ni ka ka'an da jnu'un Yandios na jana'an. Ni ka ka'an da ja chaa iin chaa kuña'nun ja kuu inga kuiya. Ni ka ndejna'an ri jiin chaa un, ti maa da kuu Jesús, se'e yíi José, chaa ñuu Nazaret —ni kachi Felipe.

<sup>46</sup> Ti ni kachi Natanael jiin Felipe:

—Ti va nu iyo iin chaa va'a kenda nuu ñuu Nazaret —ni kachi da.

Ti ni kachi Felipe jini da:

—Na cho'o, nde'e ti kuni ra —ni kachi da.

<sup>47</sup> Ni jini Jesús ja kuaja Natanael, ti ni kachi ya jiin da:

—Ja'a vaji *iin* maa chaa ñuu Israel ja tu jini da xnda'u ña'an da —ni kachi ya.

<sup>48</sup> Ti ni kachi Natanael jiin Jesús:

—¿Nasa ni nakuni ni saña? —ni kachi da.

Ti ni kachi Jesús jiin da:

—Na ti kana ga Felipe xini ra, ti ja ni jini ri ro'o kande ra ndati nutichi vixi un —ni kachi ya.

<sup>49</sup> Ti ni kachi Natanael:

—Maestro, maa ni kuu Se'e Yandios. Ti maa ni kuu rey ta'u jniñu nuu ni tu'u nación Israel —ni kachi da.

<sup>50</sup> Ti ni kachi Jesús jiin da:

—Ni kandixia ra ru'u chi ni kachi ri jiin ra ja, ja ni jini ri kande ra ndati yujnu un. Ko nde'e ra ti kuni ra ja su'va na'nu ga jniñu sa'a ri, chi su'va nduña'nu ga ri —ni kachi ya.

<sup>51</sup> Ni siin Jesús ka'an ya jiin da, ti ni kachi ya:

—Jandaas na kachi ri nuu ra ja vijna na ti kuni ra nuña andivi, ti nde'e ra chakoyo ndaja'a Yandios (ja ka nani ángel), ti ka ndaa ka nuu i nuu kancha ru'u, ja kuu ri se'e Yívi Ñuyiví ja' —ni kachi Jesús.

### *Ni ja'an Jesús #n viko nanda'a*

## 2

<sup>1</sup> Nu ni ya'a uni kivi, ti ni iyo *iin* viko nanda'a ñuu Caná, ja kuu ndañuu Galilea. Ti yukan kande nana Jesús. <sup>2</sup> Suni kua'an Jesús jiin chaa ka skua'a jiin ya, chi ni ka kana yívi un maa ya.

<sup>3</sup> Ti nu ni jaa hora ja ni ndi'i vino ni ka jí'i yívi un, ti ni kachi nana Jesús jiin ya:

—Ja ni ndi'i vino —ni kachi ña.

<sup>4</sup> Ti ni kachi Jesús jiin ña:

—Koto xndi'i ni ini ni, chi tu ja'i jaa kivi ja sa'a na *iin* jniñu ña'nu —ni kachi ya.

<sup>5</sup> Yukan na ti ni kachi nana Jesús nuu chaa ka jicondiso vasu un:

—Sa'a taka ndoo na kachi maa ya nuu ra —ni kachi ña.

<sup>6</sup> Ti yukan kajiiñ iñu tenaja yuu na'nu ja kivi kuun xiko xi undi *iin* ciento litro nducha chii. Ti jnu'un yívi hebreo ni'kuu ja ka jajniñu i tenaja un ja kuu nducha ja ka nanda'a i jiin ja ka na sandoo i ko'o i, nava sia'an na kendo va'a i nuu Yandios. <sup>7</sup> Ni kachi Jesús nuu chaa ka jicondiso vasu un:

—Chu'un chitu nducha chii tenaja ja'a —ni kachi ya.

Ti ni ka chu'un chitu chaa un nducha chii tenaja un. <sup>8</sup> Yukan ti ni kachi Jesús:

—Tava ti'lí ti kua'a ra nuu chaa yinda'a viko un —ni kachi ya.

Ni ka tava da ti'lí ti kuankoyo da jiin nuu chaa un. <sup>9</sup> Ni ka jí'i da ti'lí, ti so ni naa ini da chi va'a xaan ga iyo vino un. Ti tu jini da nasa ni jaa un. Ko maa chaa ka jicondiso un chi ni ka jini da. Yukan na ti ni kana chaa ndisojníñu un xini chaa ni nanda'a un, <sup>10</sup> ti ni kachi da jiin da:

—Taka yívi chi xnaka ka ja'a i vino va'a un ka jí'i yívi kua'a un, ti sandi'i ni ga sa ka ja'a i vino nda'u ga. Ko ro'o, chi su'va sandi'i ni ga ni xndoo ra ja va'a ga. Ja'a kuu ja va'a xaan ni sa'a ra —ni ka kachi da.

<sup>11</sup> Yukan ni kuu *iin* jniñu ña'nu ni sa'a Jesús undi nuu kuiti. Undi ñuu Caná, ja kuu *iin* ndañuu Galilea, sia'an ni sa'a ya. Yukan ti vi'i ga ni ka kandixia chaa ka skua'a jiin ya naa da. Ni sa'a ya *iin* jniñu ña'nu un ja na kuni yívi ja ni ja'a Yandios *iin* jniñu ña'nu ga nuu ya.

<sup>12</sup> Yukan na ti sa kua'an ya ichi ñuu Capernaum. Nana ya, ñani ya, jiin chaa ka skua'a jiin ya suni kuankoyo da jiin ya, ti yukan ni ka'iin da jaku kivi.

### *Ni keni'in Jesú斯 yivi ka iin ini veñu'un ka'nu*

(Mt. 21.12-13; Mr. 11.15-18; Lc. 19.45-46)

<sup>13</sup> Kuan kuyajni viko ka sa'a yivi hebreo ja ka nuku'un ini i na ni keni'in Yandios maa i ñuu Egipto na jana'an. Ti viko un nani viko pascua. Kua'an Jesú斯 ñuu Jerusalén ja ni kuu kivi viko un. <sup>14</sup> Ti nuu veñu'un ka'nu un ni jini ya ka xiko yivi xndikí, jiin rii, jiin sata. Ti suni ka'lín chaa ka xndayi xu'un.

<sup>15</sup> Nu ni jini Jesú斯 yukan ti ni kuiti ini ya. Ti yukan ni sa'a ya iin cuarta ñii, ti ni keni'in ya yivi un kuankoyo i. Ni keni'in ya yivi un ichi fuera yux'e un. Ni keni'in ya rii, ni keni'in ya xndikí. Ni skuiokava ya mesa chaa ka xndayi xu'un un, ti ni ka jichanuu xu'un un kua'an. <sup>16</sup> Ti nuu chaa ka xiko sata un ni kachi ya:

—Keni'in ja'a naa ra, ti tukaa sa'a ra ya'u ini ve'e Tata ri —ni kachi ya.

<sup>17</sup> Yukan ti ni ka nuku'un ini chaa ka skua'a jiin ya ja ka'an nuu tutu ii Yandios siki Jesú斯: “Ndi'i xaan ini na ve'e ni, ja na kuu iin ve'e ii”, kachi nuu tutu.

<sup>18</sup> Yukan sa ni ka jikajnu'un chaa hebreo un maa ya:

—Nu ndixia ra ja ndisojniñu ra ja sa'a ra yukan, ti já'a kua'a ra jandaa vijna. ¿Ti na iin jniñu ña'nú ndiso ra nusa? —ni ka kachi da.

<sup>19</sup> Ti ni kachi Jesú斯 nuu da naa da:

—Kuu kanuu na veñu'un ja'a ki'in, ko nuu uni kivi ti nakani tuku ni na kundichi —ni kachi ya.

<sup>20</sup> Ti ni ka kachi yivi hebreo un:

—Uu xiko iñu kuiya ni ka sa'a yivi jniñu ti sa ni ka jani i veñu'un ka'nu ja'a kandichi, ti ro'o ndo'o ini ra ja nuu uni ni kivi ti nakani tuku ra kundichi —ni ka kachi da.

<sup>21</sup> Ja sia'an ni ka'an Jesú斯 jnu'un veñu'un ka'nu un, ko ni ka'an ya ja siki yiki kuñu maa ya, <sup>22</sup> ja nandoto tuku ya nuu ñuji'i. Ti yukan sa ni ka nuku'un ini chaa ka skua'a jiin ya. Ni ka nuku'un ini da jnu'un ni ka'an ya, ti sa ni ka kandixia da ja sia'an ndixia ka'an nuu tutu Yandios. Suni ni ka kandixia da jnu'un ni ka'an maa Jesú斯 na kivi un.

### *Jajini Jesú斯 na kanda yivi*

<sup>23</sup> Na ni kunde Jesú斯 ñuu Jerusalén ja ni kuu kivi Pascua, nde kua'a yivi ni ka kandixia ja maa ya kuu Cristo, chi yukan ni ka jini i jniñu ña'nú sa'a ya ja ndisojniñu ya. <sup>24</sup> So ja tu kachi kaji ya, ko maa ya ja jini ya nasa kanda taká yivi. <sup>25</sup> Ja yukan kuu ja tu nini kuu ja kachi iin yivi nuu ya nasa kanda i, chi vanua ja jini va'a maa ya nasa ka ndo'o ini yivi, jiin undí inijnuni i.

### *Ka'an Jesú斯 ja na nakaku jaa yo*

## 3

<sup>1</sup> Ni iyo iin chaa fariseo ni nani Nicodemo. Ti ni kuu da iin chaa kuñu nuu yivi nación hebreo. <sup>2</sup> Ti iin jakuaa ni ja'an da nuu kancha Jesú斯, ti ni kachi da jiin ya:

—Maestro, ja ka jini na ja maa Yandios ni taji ni'in ja na xna'an ni jnu'un ya nuu na naa na. Tu ka kuu sa'a iin yivi iin jniñu ña'nú nanu sa'a maa ni nu tu chindée Yandios maa i. Ti jiin yukan ka jini na ja maa ya ni taji ni'in vají ni —ni kachi da.

<sup>3</sup> Ti ni kachi Jesú斯 jiin da:

—Jandaa na kachi ri nuu ra ja nu tu nakaku jaa iin yivi nuu Yandios, ti tu kuu kivi i ñuu nuu ta'u Yandios jniñu —ni kachi ya.

**4** Ti ni kachi Nicodemo:

—¿Ti nasa kuu nakaku jaa iin chaa ña'nu, ti nu ja ni ja'nu da nusa? ¿Xi va nuu kuu ndiv'i tuku da chii nana da, ti sa nakaku tuku da nu? —ni kachi da.

**5** Yukan na ti ni kachi Jesús jiin da:

—Jandaa na kachi ri nuu ra ja nu tu nakaku jaa iin yivi, ti tu kuu kivi i ñuu nuu ta'u Yandios jniñu. Ti yukan kuu ja sa'a maa Espíritu Yandios ja na nakani ini i ti na kuanducha i, nava na kondoo undi ini aña i, ti ansu ja na nakaku i nuu ja'a nana i. Chi ja na nakaku i kuu ja sa'a maa Espíritu Yandios. Yukan na ti sa kuu kivi i nda'a Yandios ja na ta'u ga jniñu nuu i. **6** Sa'a yo nanu ja nu na kaku iin yivi, ko kaku i jiin yiki kuñu ñuyivi ja'a. Ko ja sa'a Espíritu Santo kuu ja na nakaku jaa i undi ini aña i. Yukan kuu ja na nakaku jaa iin yivi.

**7** Ti va so naa ini ra jiin jnu'un ni ka'an ri un, chi nu ka kuni kivikoyo yivi ñuu nuu ta'u Yandios jniñu, ti tukaa iyo inga ichi kinkoyo i, chi iin ni ichi iyo. Ti yukan kuu ja sa'a maa Espíritu ii ja na nakaku jaa i.

**8** Nde'e ra nu kee tachi, ti jiniso'o yo ko tu kuu kuni yo jiin nduchi yo, ni tu kuu jnii yo jiin nda'a yo, ni tu kuni yo na ichi kua'an. Suni sia'an sa'a Espíritu Yandios jiin yivi, chi tu ka jini i nasa sa'a ya ja na nakaku jaa i —ni kachi ya.

**9** Ni jikajnu'un tuku Nicodemo:

—¿Ti nasa kuu ja nakaku jaa yivi nusa? —ni kachi da.

**10** Ti ni kachi Jesús jiin da:

—Kuu ra iin maestro, ti kuñu'nra nuu jna'an yo ja ka kuu yivi Israel, ti tu kujnuni ini ra jnu'un ja'a, ¿Va tu jini ra nusa?

**11** Jandaa na kachi ri nuu ra, ja ka jini ndaa ra taka jnu'un ka'an ri, ti jani ndaa ri jnu'un taka ja ni jini ri. Ko so ja ro'o, tu kandixia ra jnu'un ka'an ri. **12** Ja sia'an tu kandixia ra jniñu sa'a Yandios nuu ñuyivi ja'a, ¿Ti ndee ga ja kandixia ra nu na kachi ri nasa jito Yandios taka jniñu sa'a ya undi nuu kancha maa ya nusa? Va tukaa ga kandixia ra yukan.

**13** Ni iin tundo ja'an andiv'i ja kuni nasa iyo yukan, chi maa iin ni ja ni chaa nuu ñuyivi ja'a kuu ja jini. Maa iin ni ru'u ja kuu ri Se'e Yivi Ñuyivi, ja ni kuncha ri andiv'i, ti jini ndaa ri nasa iyo. **14** Ko yukan na ti katakaa yivi ru'u nuu nda'a cruz, ja kuu ri Se'e Yivi Ñuyivi. Na ni ka jikonuu yivi hebreo nuu ñu'un te'e un na jana'an, ni jatakaa Moisés iin koo kaa nuu iin nda'a yujnu un un. Ti suni sia'an kuu vijnal, chi katakaa yivi ru'u nuu nda'a cruz. **15** Yukan na ti taka yivi kandixia ru'u, tukaa jna'nun datu i. Sia'an na ti sa kuu kunchuku i jiin Yandios ja kuu saa ni. Chi sia'an sa'a Yandios jiin taka yivi ka kandixia Se'e Yivi Ñuyivi.

### Ni kunda'u ini Yandios yivi ñuyivi

**16** Ni kunda'u xaan ini Yandios yivi ñuyivi. Ja yukan kuu ja ni taji ya se'e ya ni kii ya, vasu maa iin ya ni kuu Se'e Yandios. Ni kii se'e ya nuu ñuyivi nava taka yivi na kandixia ya, ti tukaa jna'nun datu i, ti kunchuku i jiin Yandios ja kuu saa ni. **17** Sia'an ni taji Yandios Se'e ya nuu ñuyivi. Ko tu ni taji ya Se'e ya ja na ka'nun datu ya yivi, chi su'va ja na nama ya yivi naa i.

**18** Taka yivi ni ka kandixia ya, tukaa jna'nun datu i, ko yivi ja tu ka kandixia i ya, ja ni ka jna'nun datu i. Ko ni ka jna'nun datu i ja tu ni ka kandixia i maa Se'e Yandios, ja maa iin ni ya kuu ja nama siki yivi naa i. Sia'an ni kunda'u ini Yandios yivi ñuyivi.

**19** Iyo kua'a yivi ja tu ka kandixia jniñu ni sa'a Yandios. Ka sa'a ndeva'a i, ti jiin jniñu ka sa'a i un jini yo ja ka jna'nun datu i. Ja ni taji Yandios se'e ya nuu ñuyivi, ti kuu ya nanu iin ñu'un ja ndinchaa nuu ñuñaa, ja na kuni yivi na

ichi kinkoyo i, ko tu ka jandatu i. Chi ka ndiyo ini i ja sa'a ndeva'a i nanu iin chaa jajna'an ini kaka jakuaa. Suni sia'an ka ndiyo ini i kundikun i kuachi un. Sia'an ka stuu yivi un maa i ja ka jna'nunndatu i nuu Yandios.

<sup>20</sup> Ja ni taji Yandios se'e ya nuu ñuyivi, ti ni kuu ya nanu iin nduva ñu'un ja ndinchaa nuu ñuñaa, nava na kuni yivi ichi kinkoyo i. Ko sa su'va ka jito u'u i Yandios jiin se'e ya ja xna'an ya na ichi kinkoyo i. Ti ka jito u'u i jnu'un ya, chi tu ka na kuni i yukan sa ni ka jini i ja iyo kuachi siki naa. Tu ka janta'u i jnu'un ya, chi ka ndiyo ini i ja siin i jiiñ kuachi un. <sup>21</sup> Ko ka iyo yivi ka janta'u Se'e Yandios, ja kuu ya nanu iin nduva ñu'un ja ndinchaa nuu ñuñaa. Chi xna'an ya naa i ichi kinkoyo i, ti ka kusi ini kaka ndaa i ichi un, chi tu ka yu'u i sa'a i jniñu va'a ja kuni Yandios. Ti sia'an ka stuu kaji ja ka sa'a i taka jniñu va'a kuni maa Yandios —ni kachi Jesús.

### *Ndakuni'in tuku Juan jnu'un Jesús*

<sup>22</sup> Yukan na ti kua'an Jesús ichi ñuu Judea. Suni kuankoyo chaa ka skua'a jiin ya. Yukan ni ku'iin da jiin ya jaku kivi, ti yukan ni skuanducha ya yivi.

<sup>23</sup> Suni ni kundee Juan ni skuanducha da ñuu Enón, chi yukan ni iyo kua'a nducha. Ñuu yukan kendo yajni jiin ñuu Salím. Ni ka ja'an yivi nuu da, ti ni skuanducha da i. <sup>24</sup> Yukan ni sa'a Juan undi na ti kivi ga da vekaa.

<sup>25</sup> Uu xi uni jna'an chaa ka skua'a jiin Juan, ti ni ka keja'a ka ka'an da jiin chaa hebreo un. Ti ka ka'an da siki ja nasa kuu ja ka ndundoo yivi nuu Yandios. <sup>26</sup> Yukan na ti ni ka ja'an da nuu kande Juan, ti ni ka kachi da:

—Maestro, ni jini ni chaa ni jaa nuu ni kunchuku yo ichi inga yu'u yucha Jordán, ja ni kachi ni na chaa kuu chaa un. Vijnna ti ja skuanducha da, ti tendili yivi kuankoyo nuu da un —ni ka kachi da.

<sup>27</sup> Ti ni kachi Juan:

—Nu tu chindee Yandios, ti tu kuu sa'a yivi iin jniñu nava kuni maa ya. <sup>28</sup> Ja ka jini va'a ra ja ni kachi ri ja tu kuu ri maa Cristo. Ko ni taji Yandios ru'u ve sa'a ri iin jniñu ti jniñu un kuu ja na kaxnu'un ri nuu yivi ja kii ya.

<sup>29</sup> Na kani ri iin jnu'un. Nu na nanda'a iin chaa jiin ñasi'i da, ka sa'a da viko jiin amigo da. Ti amigo da un kuu chaa ta'u jniñu nuu viko un, ti amigo da un kajnu'un nu iyo siñi ini da ja nanda'a da xi tu. Nu ni kachi chaa nanda'a un ja iyo siñi ini da, yukan ti amigo da un, suni kusi xaan ini da. Ti suni sia'an kusi xaan ini ri ja na kinkoyo yivi nuu Jesús. <sup>30</sup> Siki ja ka ka'an ra un, ti kanuu ga ja na nduña'nua maa ya, ti su'va na nukuu gá ru'u —ni kachi Juan.

### *In ja vaji ichi andivi*

<sup>31</sup> Ti maa iin ni ya kuu ja vaji undi andivi, yukan kuu ja kuña'nu ga ya nuu tendili yivi. Taka yivi ni ka kaku nuu ñuyivi ja'a ka kuu i se'e ñuyivi ja'a, ti ka ka'an i mani maa jnu'un iyo nuu ñuyivi ja'a. Ko iin ja vaji undi andivi, chi kuña'nu ga nuu tendili yivi.

<sup>32</sup> Ti ka'an ya taka ja ni jini ya, ti jani ya jnu'un taka ja ni jiniso'o ya, ko tu ka kuni chunso'o yivi taka jnu'un ka'an ya. <sup>33</sup> Taka yivi ni ka chunso'o jnu'un ya, ni ka nakuni ndaa i ja iyo ndaa jnu'un ni ka'an ya. <sup>34</sup> Ti jandaa ndixia kuu un, chi ni taji Yandios maa ya, ti maa ya kuu ja ni ka'an taka jnu'un ka'an Yandios, vanuxia kancha maa Espíritu Yandios jiin ya, ti tu yiku'va Espíritu ni ja'a Yandios ja na kuncha jiin ya.

<sup>35</sup> Xaan ga mani Yandios jiin se'e ya. Ti ja yukan kuu ja ni nachi'i ya taka ja iyo nuu nda'a se'e ya ja na ta'u ya jniñu nuu.

<sup>36</sup> Yivi kandixia Se'e Yandios ja nama ya i, ti kunchuku i jiin ya ja kuu saa ni. Ko yivi ja tu kandixia Se'e ya, tu kuu kunchuku i jiin ya, chi su'va vil'i ga kuiti ini Yandios nuu i, ti kua'a ya nundo'o koo ndo'o koo nene i ja kuu saa ni.

## *Ka'an Jesús jiin iin ña'an ñuu Samaria*

### **4**

<sup>1</sup> Ni ka ni'in chaa fariseo un jnu'un ja kua'a ga yivi ka jika jiin Jesús, ti ni skuanducha ya kua'a xaan ga yivi ja kuu Juan. <sup>2</sup> Vasu ansu maa Jesús ni skuanducha yivi, chi chaa ni ka skua'a jiin ya un ni ka sa'a.

<sup>3</sup> Ni jaa jnu'un un nuu Jesús ja sia'an ni ka jini chaa fariseo. Yukan kuu ja ni kee ya ñu'un ñuu Judea, ti kuano'on ya ichi nuu ñu'un ñuu Galilea. <sup>4</sup> Ti ichi kua'an ya ni ya'a ya nuu ñu'un ñuu Samaria.

<sup>5</sup> Ni jaa ya ñuu Sikar ja kuu iin ndañuu Samaria. Ñuu un kande yajni iin ñu'un ni ja'a Jacob nuu se'e da José na jana'an. <sup>6</sup> Yukan iyo iin soko nducha ni nani soko Jacob. Ni kuita Jesús ja kua'an ya ichi un, ti yukan ni jakuiñi ya yu'u soko un. Ko ja ni kuu koxiuu kivi un.

<sup>7</sup> Ti ni jaa iin ña'an ñuu Samaria kuaja ki'in ña nducha. Ti ni kachi Jesús jiin ña:

—Kua'a ti'lì nducha na ko'o ri —ni kachi ya.

<sup>8</sup> Ti chaa ka skua'a jiin ya, kuankoyo da ñuu un kuan kuaan da ja kaji da jiin ya naa da, ti ni kendo maa iin ni ga ya.

<sup>9</sup> Ti ña'an ñuu Samaria un ni kachi ña jiin ya:

—Ni'lìn ja kuu ni chaa hebreo. ¿Ndo jikan ni nducha ko'o ni nuu na, ti saña kuu na ña'an ñuu Samaria? —ni kachi ña.

Sia'an ni ka'an ña, chi yivi hebreo un, tu mani i jiin yivi ñuu Samaria.

<sup>10</sup> Ti ni kachi Jesús jiin ña:

—Tu jini ra nasa kaa iin ta'u va'a ja kuni kua'a maa Yandios nuu ra. Ni tu chaku ini ra, ti ni tu jini ra na chaa kuu iin ja ka'an jiin ra ja'a ja na kua'a ra nducha ko'o. Ko nu na kakanta'u ra nuu ri, ti kua'a ri iin nuu nducha ko'o ra ja na kuchaku ra ja kuu saa ni —ni kachi ya.

<sup>11</sup> Yukan ti ni kachi ña jiin ya:

—Taa. Ko ni'in, ni tu ñava'a ni najin tava ni nducha. Ti soko ja'a chi kunu xaan. ¿Ti nanu kin ki'in ni nducha ja ka'ñu ni nuu na nusa? <sup>12</sup> Jacob chaa ni kuu tata jna'an na undi na jana'an. Chaa un ni jacha soko ja'a ti ni kendo jiin na naa na. Ja'a ni ka ji'i maa da nducha, ti suni ja'a ni ka ji'i taka jna'an da jiin taka kuiti ni ka nchaka da. Iin chaa ni kuña'nu ni kuu chaa un, ¿ti xi kuña'nu ga ni'in ja kuu chaa un nu? —ni kachi ña.

<sup>13</sup> Ti ni kachi Jesús jiin ña:

—Taka yivi ko'o nducha ja'a, ti ichi tuku i. <sup>14</sup> Ko nu na ko'o i iin nducha kua'a ri nuu i, ti tukaa ga ichi kuiti i. Kua'a ri nducha un nuu i, ti yukan nduu nanu iin soko nuu kaña nducha kua'a. Yukan na ti kuncha i jiin Yandios ja kuu saa ni —ni kachi ya.

<sup>15</sup> Ti ni kachi ña'an un jiin ya:

—Taa. Kua'a ni nducha yukan, na ko'o na nava tukaa ichi kuiti na, ti nava tukaa kii ki'in kuiti na nducha soko ja'a —ni kachi ña.

<sup>16</sup> Ti ni kachi Jesús jiin ña:

—Kuan kana yií ra ti kii ra jiin da —ni kachi ya.

<sup>17</sup> Ti ni kachi ña jiin ya:

—Tu na yií na iyo —ni kachi ña.

Ti ni kachi Jesús jiin ña:

—Ndaa jnu'un ka'an ra ja tu na yií ra iyo, <sup>18</sup> vanuxia, ja ni kuu u'un chaa ni kunchuku jiin ra, ti chaa kancha jiin ra vijna chi ansu yií ra kuu da. Ja'a ni kachi ndaa ra vijna —ni kachi ya.

<sup>19</sup> Ti ni kachi ña jiin ya:

—Taa. Ko ndo'o ini na ja maa ni kuu iin profeta ja ka'an jnu'un Yandios.  
**20** Tata yivi ñuu Samaria na jana'an, ni ka chiñu'un i Yandios xini yuku ja'a. Ti ni'in ka ka'an ni ja Jerusalén kuu ñuu nuu kunchañu'un yo Yandios —ni kachi ñua.

**21** Ti ni kachi Jesús jiin ña:

—Ro'o ñas'i'i. Kandixia jnu'un ka'an ri. Chi jaa iin kivi ja ni ansu ga yuku ja'a, ti ni ansu ga ñuu Jerusalén kuu nuu kunchañu'un ra maa Yandios, ya kuu Tata ra naa ra.  
**22** Ro'o yivi ñuu Samaria naa ra, ka nchañu'un ra Yandios, ko vanuxia tu ka jini ra nasa kaa Yandios. Ko ru'u yivi hebreo chi ka jini ri nasa kaa Yandios, ka jini ri ja nini nuu yivi hebreo vaji fin ja nama siki yivi naa i.

**23** Na kachi ri ja, ja nija kivi kunchañu'un yivi Yandios, ja tukaa ka nandi'i iin ni veñu'un nuu chiñu'un i ga. Ko chiñu'un i ya undi jiin ni ini ni aña i. Chi sia'an kuu ja kuni maa Yandios ja na kunchañu'un yivi maa ya.  
**24** Tu kuu kuni yivi nuu Yandios, chi maa ya kuu Espíritu. Yukan kuu ja nu iin yivi kuni i chiñu'un i ya, ko kanuu ja na chiñu'un ndaa i ya jiin ni ini ni aña i —ni kachi ya.

**25** Ti ña'an un ni kachi tuku ña:

—Jini na ja kii iin ja ni nakaji Yandios ja nama siki yo, iin ja konani Cristo. Nu na chaa chaa yukan, yukan ti xna'an kaji ga da taka jnu'un un nuu yo —ni kachi ñua.

**26** Ti ni kachi Jesús jiin ña:

—Maa ri kuu —ni kachi ya.

**27** Ni ka'an ga ya jiin ña'an un, ti ni ka najakoyo chaa ka skua'a jiin ya. So ka naa ini da ja sia'an ka ndajnu'un ya jiin ña'an un. Ko ni iin tu ni ka tava ini da ja kajnu'un da ya: “¿Ndo nduku ña'an un?” Xi kachi da jiin ya: “¿Na ndoo ka'an ni jiin ña'an un?” Tu kuiti ni ka ka'an da sia'an.

**28** Ña'an un ni xndoo ña kiyi nducha ña ti kua'an ni ña ichi ñuu. Ni jaa ña ti ni keja'a ña ka'an ña jiin yivi un:

**29** —¡Ña'an na cho'o naa ra, ti kuni ra iin chaa ni kachi ndi'i nuu ri taka ja ni sa'a ri! ¿Ti ansu maa da kuu Cristo nu? —ni kachi ñua.

**30** Yukan ti ni ka kee yivi ñuu un kuankoyo i nuu kande Jesús.

**31** Ni ti jakoyo ga yivi un, ti chaa ka skua'a jiin Jesús, ka kanda'u da jiin ya:

—Maestro, kaji ni iin vanuxii staa, na kaji yo —ni ka kachi da.

**32** Ti ni kachi Jesús jiin da:

—Iyo iin staa yaji ri ja ro'o naa ra, tu ka jini ra nasa kaa —ni kachi ya.

**33** Yukan ti chaa ka skua'a jiin ya ka jikajnu'un jna'an da naa da:

—¿Xi ja ni ka kinchaka yivi staa ni yaji ya nu? —ni ka kachi da naa da.

**34** Ti ni kachi Jesús jiin da:

—Sia'an ni kachi ri, chi sa'a ri nava kuni maa ya ni taji ru'u vaji ri ja na sa'a ri jniñu ya. Ti yukan kuu nanu ja na ni'in jnu'un ndee ini yiki kuñu ri, nanu ni'in yo jnu'un ndee ini jiin iin ndeyu yaji yo. Ti ndiyo ini ri ja sinu ri jniñu ni ja'a ya nuu ri.

**35** Ti ja sa'a yo jniñu ka'ncha triu, ti vatu ni ka ka'an ra ja undi kuun yoo ti sa nastutu yo. Ko na kachi ri ja xnaka nde'e va'a ra naa ra, nde'e va'a ti kuni ra, chi vinañu'ni ka iyo kua'a xaan yivi nanu triu ja, ja ni kuaan ja ka'ncha yo, chi yivi kua'a ka tu'va i ti ka kandixia i ru'u.  
**36** Xaan ndatu yivi nastutu jniñu un chi iyo xaan ta'u i, chi sa'a i jniñu ja nastutu i yivi, ti nasava'a i nuu kunchuka yivi un jiin Yandios ja kuu saa ni. Ja sia'an ti nanu kusii ini chaa ni sa'a jniñu un, suni sia'an kusii ini chaa nastutu.

**37** Ndaa jnu'un ka'an iin jnu'un, ja “Siin chaa sa'a jniñu, ti inga da nastutu.”

**38** Suni sia'an taji ri ro'o naa ra ja ka skua'a jiin ri, ja na kachanuu ra jnu'un

ri ki'in. Chi ka kuu ra nanu iin chaa nastutu triu. Vasu ansu maa ra ni ka jachanuu jnu'un un, chi inga yivi ni ka jachanuu jnu'un ri, ko ro'o kuu nanu nastutu jniñu ni ka sa'a chaa un naa da —ni kachi Jesús.

**39** Ja sia'an kuu ja kua'a xaan yivi ñuu un ni ka kandixia i Jesús, chi ni kachi ña'an un: "Ni kachi ndi'i da taká ja ni sa'a na", ni kachi ña.

**40** Nu ni ka jakoyo yivi ñuu Samaria un nuu kande Jesús, ti ni ka ka'an nda'u i jiiñ ya ja na kendo ya jiiñ yi ti jaku kivi. Ti ni kendo ya yukan ni kundee ya uu kivi. **41** Kua'a xaan i ni ka kandixia ya ja siki jnu'un va'a ni ka'an ya yukan.

**42** Yukan na ti sa ni ka kachi yivi jiiñ ña'an un:

—Tukaa niní kuu ja undi kani ra jnu'un ti sa kandixia ri ya, chi suni ni ka jiniso'o maa ri jnu'un ni ka'an ya. Yukan na ti ni ka jini ndaa yo ja maa ya kuu maa Cristo, ya ni nakaji Yandios ja nama ya siki yivi ñuyiví —ni ka kachi yivi un.

### *Jiin ndusu yu'u Jesús ni nduva'a se'e iin chaa kuña'nu*

**43** Nu ni ya'a uu kivi, ni kee Jesús ñuu Samaria, ti ni naki'in ya ichi kuano'on ya nuu ñu'un ñuu Galilea. **44** Ti maa ya ni ka'an undi nuu, na ni kachi ya ja tu kua'a yivi ja yiñu'un nuu iin chaa ka'an jnu'un Yandios, ñuu nuu ni ja'nú da. **45** Ko nu ni jaa ya ñuu Galilea, ti ni ka janta'u yivi un ya, chi ni ka jini i jniñu ña'nu ni sa'a ya ñuu Jerusalén ja ni kuu kivi viko un, chi suni ni ka ja'an i yukan.

**46** Yukan na ti ni ndeokuñi Jesús ichi ñuu Caná ja kuu ndañuu Galilea, nuu ni NASA'a ya vino jiiñ nducha un. Ti ñuu Capernaum ni iyo iin chaa kuña'nu ja ndiso jniñu da nuu rey. Ti ku'u se'e chaa un. **47** Ni ni'in da jnu'un ja ni kee Jesús ñuu Judea, ti ni nandeokuñi ya ichi ñuu Galilea. Yukan ti ni ja'an chaa kuña'nu un nuu kancha Jesús, ti ni keja'a jikanta'u da nuu Jesús ja na ki'in ya jiiñ da ve'e da:

—Sa'a ni ti'lí tajna se'e na —ni kachi da.

Sia'an ni ka'an chaa kuña'nu un chi ja yajni kuū se'e da niku.

**48** Ti ni kachi Jesús jiiñ da:

—Maa ra jiiñ tendi'i yivi iin nuu kanda jiiñ ra, nu tu nde'e ra jiiñ nuu ra iin jniñu ña'nu sa'a ri, ti ni tu kandixia kuití ra ru'u —ni kachi ya.

**49** Ti ni kachi chaa kuña'nu un:

—Taa. Jikanta'u xaan na nuu ni. Ko nu tu ki'in ni ve'e na, ti va kuū se'e na —ni kachi da.

**50** Ti ni kachi Jesús jiiñ da:

—Kuano'on ve'e ra chi tu kuū ndixia se'e ra —ni kachi ya.

Ni kandixia chaa un jnu'un ni ka'an Jesús, ti kuano'on ni da. **51** Kuan nduyajni da ve'e da, ti ja kuaja iin chaa kuū muzu da un, ti ni kachi da jiiñ chaa kuña'nu un:

—Ja ni nduva'a se'e ni —ni kachi da.

**52** Yukan ni jikajnu'un da muzu da un:

—¿Na hora ni nduva'a se'e ri nusa? —ni kachi da.

Ti ni kachi muzu un:

—Ja yajni na koxiuu ni kee kiji un maa i —ni kachi da.

**53** Yukan ti ni nuku'un ini da ja hora yukan ni kachi Jesús jini da: "Kuano'on ve'e ra, chi tu kuu se'e ra", ni kachi ya. Yukan ti ni kandixia da Jesús, ti suni ni ka kandixia tendi'i yivi kanchuku ve'e da.

**54** Yukan kuu inga jniñu ña'nu ni sa'a Jesús na ni kee ya nuu ñu'un ñuu Judea ti kuano'on ya ichi ñuu Galilea. Sa yukan kuu uu jniñu ña'nu ni sa'a Jesús.

*Ni sa'a Jesús tajna iin chaa ku'u yu'u pila nducha ñuu Betesda*

## 5

<sup>1</sup> Nu ni ya'a yukan na ti sa ni nandeokuñi Jesúś ñuu Jerusalén, ti yukan nuku'un iin viko ka nasa'a yivi hebreo.

<sup>2</sup> Ni iyo iin pila ka'nú nducha ñuu Jerusalén. Ni nani Betesda nuu yu'u ka ka'an yivi hebreo. Ni iyo u'un yuxe'e lulu nuu ka kivi yivi nuu nducha un. Kendo yajni yu'u ñuu, ti yuxe'e un ni nani Yuxe'e Nuu Ka Ya'a Rii. <sup>3-4</sup> Ti yukan kandatu kua'a yivi ka ku'u. Kandatu yivi kuaa nduchi, yivi rengo jiin yivi tikuku.

<sup>5</sup> Ti suni yukan katuu iin chaa ja ja ni kuu oko xia'un uni kuiya ku'u da. <sup>6</sup> Ni jini Jesúś nuu chaa un katuu da. Suni ni jini ya ja ja ni kuu na'an xaan ku'u da, ti ni jikajnu'un ya maa da:

—¿Kuni ra nduva'a ra nu? —ni kachi ya.

<sup>7</sup> Ti ni kachi chaa ku'u un:

—Taa, kuni na, ko tu iyo ni iin chaa chindee saña. Ni iin yivi tu kii chindee i saña ja na kivi na nuu nducha un nuu keja'a kanda. Chi taka jinu ja kuni kivi na, ti xnakan ja kivi inga yivi —ni kachi da.

<sup>8</sup> Ti ni kachi Jesúś jiin da:

—¡Ndokuñi! Nastuu yuu ra, ti kaka kuano'on ve'e ra —ni kachi ya.

<sup>9</sup> Ni ndoko da ni nastuu da yuu da, ti ni keja'a jika da kua'an da.

Yukan ni kuu iin sabado, kivi ka ndetatu yivi hebreo. <sup>10</sup> Ti chaa hebreo ka kuña'nu un, ni ka kachi da jiin chaa nda'u un:

—Kivi ndetatu kuu vijna, ti tu va'a ja kundiso ra yuu ra ki'in ra jiin —ni ka kachi da.

<sup>11</sup> Ti ni kachi chaa ni nduva'a un:

—In chaa ni sa'a tajna saña yukan ni kachi da ja na kundiso na yuu na ti na ki'in na —ni kachi da.

<sup>12</sup> Ni ka jikajnu'un chaa un maa da:

—¿Nau chaa kuu ja ni kachi jini ra ja na naki'in ra yuu ra ti ki'in ra nusa? —ni ka kachi da.

<sup>13</sup> Ti chaa ni nduva'a un, tu ni jini da nau chaa kuu, chi vanuxia kua'a xaan yivi ka'iin yukan, ti Jesúś kua'an ni ya.

<sup>14</sup> Kuee ga sa ni ndejna'an Jesúś jiin da yuxe'e veñu'un ka'nú un, ti ni kachi ya jiin da:

—Ja ni nduva'a ra vijna. Vijnna na ti koto ma sa'a ga ra kuachi. Chi nu na sa'a tuku ra, yukan na ti kii iin nundo'o ka'nú xaan ga siki ra —ni kachi ya.

<sup>15</sup> Yukan na ti kua'an chaa un, ni jani da jnu'un nuu chaa hebreo ka kuña'nu un:

—Jesúś kuu ja ni sa'a tajna saña —ni kachi da.

<sup>16</sup> Ti siki ja ni sa'a Jesúś iin jniñu un kivi ndetatu, ja yukan kuu ja ni ka keja'a ka jito u'u chaa hebreo ka kuña'nu un Jesúś, ti ka kuni ka'ní da ya.

<sup>17</sup> Ti ni kachi Jesúś jiin da naa da:

—Na kachi ri nuu ra ja taka ni hora sajniñu Yandios. Maa Tata ri, sajniñu ya taka ni kivi. Ti suni sia'an sajniñu tu ru'u taka ni kivi —ni kachi ya.

<sup>18</sup> Ja sia'an ni ka'an Jesúś, ti vi'i ga ni ka nduku da nasa ka'ní da ya, chi tu ni jandatu ya jnu'un ka'an ley ja kuu kivi ndetatu un, jiin suni ja ni kachi ya ja Tata maa ya kuu Yandios, chi sia'an ni skejna'an ya maa ya jiin maa Yandios. Yukan kuu ja ka kuni da ka'ní da Jesúś.

### Ndisojniñu Se'e Yandios

<sup>19</sup> Ni kachi Jesúś jini chaa hebreo ka kuña'nu un:

—Na kachi ndaa ri nuu ra naa ra ja maa ri kuu Se'e Yandios, ti ni iin yivi tu kuu sa'a ja sa'a maa ya. Ti jandaa ndixia kuu yukan chi ru'u sa'a ri taka ja sa'a maa Tata ri. <sup>20</sup> Ti sia'an kuu ndixia chi mani Yandios jiin Se'e ya, ti

xna'an ya nuu Se'e ya taka ja sa'a ya. Ti su'va ña'nu ga jniñu xna'an ya nuu se'e ya, ja undi so naa ini ra naa ra.

**21** Chi hin ni ka kuña'nu ya kuu Se'e jiin Tata ya. Tata yo Yandios, naxndoto ya yivi nuu ñuji'i, ti nachaku tuku i. Ti suni sia'an sa'a maa se'e ya, chi suni naxndoto ya yivi naa i nuu ñuji'i. **22** Ja'a kuu ja iin ni kuña'nu ya kuu Se'e jiin Tata ya. So ja maa Tata yo Yandios tu xndichi ya kuachi siki ni iin yivi, chi ni ja'a ya jniñu ña'nu un nuu Se'e ya ja na xndichi ndaa kuiti ya siki kuachi yivi naa i.

**23** Sia'an ti na chiñu'un yivi Se'e Yandios naa i nanu ka chiñu'un i maa Yandios. Ko nu nau yivi tu nachiñu'un Se'e ya, suni sia'an tu nachiñu'un i Tata ya, vasu iin ni ka kuña'nu ya jiin Se'e ya, chi maa Tata Yandios kuu ja ni taji ya Se'e ya —ni kachi Jesú.

**24** Ni siin Jesú ka'an ya ti ni kachi ya:

—Jandaa na kachi ri ja nu na chu'un ini yivi jnu'un ka'an ri, ti kandixia ndaa i ja maa Yandios ni taji ru'u, yukan na ti tu jna'nu ndatu i. Vasu na kuu i ko tu kondo'o i nundo'o. Su'va ndiví i nda'a maa Yandios ti yukan kuchaku i jiin ya ja kuu saa ni.

**25** Jandaa na kachi ri ja jaa iin kivi ti kundaa nava ni kachi ri, ti kivi yukan ja ni jaa. Yivi ka chaku vijnna, ka kuu i nanu ndiyi, ko nu na chu'un ini i jnu'un ka'an Se'e Yandios, ti kandixia i naa i, yukan na ti ja ka yi'i i nda'a maa Yandios, ti ka jika i ichi ya. Tukaa ka kuu i nanu ndiyi, chi su'va ja ni ka nachaku i kanchuku i jiin ya.

**26** Sia'an sa'a Yandios jiin Se'e ya vanuxia iin ni kuu se'e ya jiin maa ya. Ti ka'nu iin jniñu sa'a Yandios chi sa'a ya ja na kuchaku yivi naa i. Ti nanu sa'a maa Yandios suni siukan sa'a Se'e ya, chi sa'a ya ja na kuchaku yivi naa i ja kuu saa ni.

**27** Siki ja iin ni kuu Yandios jiin Se'e ya, yukan kuu ja ni ja'a ya jniñu nuu Se'e ya, chi maa ya kuu maa Se'e Yivi Ñuyivi. Ti nanduku vindaa ya kuachi siki yivi naa i nuu nasa iyo. Ti maa Se'e ya na kachi nau kuu yivi ni ka jna'nu ndatu, ti nau kuu yivi ni ka nita'u. Ti xndichi ndaa kuiti ya yivi naa i, chi maa ya kuu Se'e Yivi Ñuyivi, ti maa Tata ya ni ja'a jniñu un nuu ya.

**28** Koto ma naa ini ra iin jnu'un ka'an ri ja'a siki jniñu ndiso ri, ja iin ni kuu ri jiin Tata ri Yandios, chi nu na jaa kivi, ti taka ndiyi ka ñunduji un kuniso'o i jnu'un ka'an Se'e ya. **29** Yukan na ti taka yivi ni ka sa'a ja va'a, nandoto i ti kunchuku i jiin Yandios. Ti taka yivi ni ka sa'a ndeva'a un suni nandoto i, ko kivikoyo i nuu jna'nu ndatu i naa i —ni kachi Jesú.

### *Nasa nakuni yivi ja ndisojníñu Jesú*

**30** Ni siin Jesú ka'an ya jiin chaa hebreo ka kuña'nu un, ti ni kachi ya:

—Siuku ndaa kuiti ri taka nava kuni maa Tata ri Yandios, chi tu iyo ni iin ja sa'a ri ja kuu ini maa ri. Ti xndichi ndaa ri yivi naa i sia'an nava ni kachi maa Tata ri. Sia'an xndichi ri yivi, chi tu sa'a ri nava kuu ini maa ri. Chi su'va siuku ri nava kuu ini maa ya, chi ja siki yukan ni taji ya ru'u vaji ri nuu ñuyivi ja'a.

**31** Ko nu na ka'an ri ja ndo'o ini maa ri, ti ka'an ri ja kusii ini ri, yukan na ti kachi ra ja tu njiniñu kuiti jnu'un ka'an ri, chi tu iyo inga ja kua'a jandaa ja'a ri. **32** Ko iyo inga ja ndakuni'in ru'u ti kachi nau ja kuu ri, ti ka'an ndaa chaa un chi jini da ru'u. Ti jini ri ja iyo ndaa jnu'un ka'an chaa un ti ni'in jniñu ja'a.

**33** Maa ra naa ra, ni ka taji ra chaa ni ka ja'an kajnu'un Juan, chaa ni skuanducha un. Ti chaa un, ni kachi ndaa kuiti ni da ja kuu ru'u. **34** Ti vasu sia'an ko tu nandi'i ri ja inga yivi kachi nasa jniñu sa'a ri. Sia'an ka'an ri ja na

kundaa jnu'un ni ka'an Juan siki maa ri nava na kandixia ra taka jnu'un ni ka'an da un, ti nava na kuu nama ra maa ra.

<sup>35</sup> Sa'a yo nanu Juan ni kuu da nanu *iiñ* *ñu'un* ja ni ndinchaa nuu ñuñaas, chi ni xna'an ndaa da ichi Yandios nuu yivi. Ko jaku ni kivi ni ka chifñu'un ra jnu'un ni xna'an da un. Vanuxia yukan ni kuu *iiñ* jniñu ni sa'a da. <sup>36</sup> Ti kua'a ni kuu *iiñ* jnu'un ni ndakuni'in Juan siki maa ri. Ko ka'nu ga kuu jnu'un ka'an maa Tata ri ja'a ri, chi ni ja'a ya jniñu ña'nu nuu ri. Yukan na ti kuni ndaa ra nau ja kuu ru'u, ti kuni ndaa ra ja maa Tata ri ni taji ya ru'u vajji ri, chi sa'a ri jniñu ña'nu ni ja'a ya nuu ri.

<sup>37</sup> Tata ri ni taji ru'u, ti stuu kaji ya taka nau ja kuu ri. Ni kachi kaji ya nau ja kuu ru'u, vasu tu ni ka jini ra *jiñ* nuu ra nuu Tata ri, ti ni tu ni ka jiniso'o ra ndusu yu'u maa ya. Ko jandaa kuu ja ni tu ka chu'un ini ra jnu'un ka'an Tata ri. Yukan kuu ja tu ka kandixia ra ja ka'an *iiñ* Chaa ni taji maa Tata yo Yandios. <sup>38</sup> Ni tu ka chu'un ini ra jnu'un ni ka'an Tata ri. Ti ni tu ka kandixia ra *fiñ* ja ni taji maa ya. Tu ka kandixia ra, chi tu ka janta'u ra jnu'un ka'an maa Tata ri.

<sup>39</sup> Ka skua'a xaan ra tutu *iiñ* Yandios ja ni ka chaa yivi jana'an. Ka skua'a xaan ra tutu un, chi ka ndo'o ini ra ja *jiñ* yukan ti na nita'u ra ja kunchuku ra *jiñ* ya ja kuu saa ni. Ko maa tutu un kuu ja ka'an ndaa siki ri. <sup>40</sup> Ti ro'o tu ka kuni kuiti ra kandixia ra ru'u nava na ndivi ra nda'a Yandios ti kunchuku ra *jiñ* ya. Ko ni ka kuu ni'in xaan tonto ini ra, chi tu ka kuni kandixia ra ru'u naa ra —ni kachi Jesús.

<sup>41</sup> Ni siin Jesús ka'an ya ti ni kachi ya:

—Tu nandi'i ri ja kua'a ra ja *yñu'un* ru'u. Ni tu nduku ri ja ka'an yivi ja kuña'nu ri nu tu iyo ndaa ini i. <sup>42</sup> Ko ru'u chi jini va'a ri nasa kaa undi ini jnuni ra. Ti jini ndaa ri ja tu ka iyo ini ra ja chifñu'un ra Yandios, ti jini va'a ri chi *yijiyo* nde'e ri ro'o naa ra.

<sup>43</sup> Jini ri ja tu ka janta'u ra ru'u. Ko maa ri kuu, ni chaa ri nuu ñuyivi ja'a ti ndaku ni'in ri jnu'un ka'an Tata ri Yandios. Nu na nakuni ra ru'u, ti suni sia'an nakuni ra nasa kaa Yandios. Ko sa ti nakuni ra ru'u, ti suni nakuni ra ja kuña'nu Yandios nuu tendi'i ja iyo. Ti vasu sia'an kuu, ko tu ka janta'u ra ru'u. Ko nu na kii *inga* chaa, ti ndakuni'in da nanu maa da, ti va kuanta'u ni ra chaa yukan.

<sup>44</sup> Yukan kuu ja tu kuu nasa kandixia ra ru'u, chi ni'in xaan ka ñukuu ini ra ja na kuanta'u *iiñ* yivi ro'o, ti ansu ja na kuanta'u maa Yandios ro'o naa ra. Vi'i ga ka nakutu ini ra ja, nakua'a ja *yñu'un* nuu jna'an maa ra, ko tu ka nakutu ini ra ja na nakuanta'u maa Yandios ro'o naa ra. Yukan kuu ja tu kuu nasa kandixia ra ru'u.

<sup>45</sup> Ti vasu sia'an iyo, ko tu kani ini ra ja kankuachi ri siki ra nuu Tata yo Yandios. Ko ley ni ja'a Yandios nuu Moisés, yukan kuu ja kankuachi siki ra naa ra. Ti jandaa ndixia kuu, chi vasu ka ndo'o ini ra ja ka iyo ndoo ra nuu Yandios, ko so ja ka siuku ra ley Moisés ti ka ndo'o ini ra sia'an. Ko *jiñ* yukan ti ja kankuachi Moisés siki ra naa ra.

<sup>46</sup> Ko nu ka kandixia ndaa ra jnu'un Moisés, ti suni kandixia ndaa ra ru'u niku. Chi vanua undi na jana'an xaan ni chaa da tutu nuu ka'an siki ru'u ja chaa ri nuu ñuyivi kivi vijna. <sup>47</sup> Ko ro'o tu ka ñukuu ndaa ini ra jnu'un ni chaa Moisés. Yukan kuu ja tu kuu nasa kandixia ra jnu'un ka'an ri vijna. Tu kuu kuiti —ni kachi Jesús jini chaa hebreo ka kuña'nu un.

*Ni ja'a Jesús ja ni ka yaji u'un mil yivi  
(Mt. 14.13-21; Mr. 6.30-44; Lc. 9.10-17)*

**6**

<sup>1</sup> Yukan na ti sa kua'an Jesús jiin chaa ka skua'a jiin ya ichi inga yu'u mini Galilea. Ti mini un suni nani mini Tiberias. <sup>2</sup> Kua'a xaan yivi ni ka ndikun i Jesús, chi ni ka jini i tako jniñu ña'nu sa'a ya. Ni sa'a ya jniñu ña'nu xaan ga, chi ni sa'a ya ja ni ka nduva'a yivi ka ku'u.

<sup>3</sup> Yukan ti kua'an Jesús jiin ndaja'a ya, ni ndaa ya iin yuku, ti yukan ni jakuiñi ya. <sup>4</sup> Ti ja kuan kuyajni kivi viko Pascua ka NASA'a yivi hebreo, ja ka nuku'un ini i kivi ni ka kekoyo i nuu ñu'un nación Egipto na jana'an.

<sup>5</sup> Ni jitonuu Jesús ti ni jini ya ja kua'a xaan yivi ni ka kaa kuankoyo. Ti ni kachi ya jiin Felipe:

—¿Nanu kin kuaan yo ja kaji yivi ja'a naa i? —ni kachi ya.

<sup>6</sup> Sia'an ni ni ka'an ya, chi kuni ya ja na ndee nu NASA'a yivi sa'a ya. kandixia ndaa da maa ya xi tuu, vanuxia ja jini va'a maa ya NASA'a ya.

<sup>7</sup> Ti ni kachi Felipe jiin ya:

—Nu na kuaan yo uu ciento xu'un staa, ti ni tu kuja ja kaji yivi ja'a, vasu ni iin ti'l'i iin iin yivi naa i —ni kachi da.

<sup>8</sup> Ti inga ndaja'a ya ni ka'an da, ti chaa un kuu Andrés, ñani Simón Pedro. Ti kachi da:

<sup>9</sup> —Chukan kande iin chaa lulu, ndiso da u'un staa stila cebada jiin uu cháká. Ko yukan tu kujaa chi kua'a xaan yivi naa i —ni kachi da.

<sup>10</sup> Yukan na ti ni ta'u Jesús jniñu nuu ndaja'a ya:

—Kachi jini yivi ja na nukoo i nuu icha jña naa ra —ni kachi ya.

Ti yukan mani icha kuii kuu, ti yukan ni ka nukoo yivi naa i. Ti va ka iyo u'un mil niña kuiti chaa. <sup>11</sup> Ti ni ki'in Jesús ndi u'un staa yukan, ti ni nakuanta'u ya nuu Yandios. Ti ni ja'a ya nuu ndaja'a ya ja na tejna'an da nuu yivi kanchuku yukan. Suni sia'an ni sa'a ya jiin cháká un, ti jiin yukan ni ni ka yaji va'a yivi un naa i.

<sup>12</sup> Nu ni kuu ni ka yaji va'a yivi un staa, ti ni kachi Jesús jiin ndaja'a ya:

—Nastutu pedazu ni kendoso jña, nastutu ra chí tu stivi yo naa yo —ni kachi ya.

<sup>13</sup> Ni ka nastutu da, ti ni chitu ubi uu chika jiin pedazu staa un. Sia'an chika ni ndututu vasu u'un ni jna'an staa ni tejna'an Jesús, ko ubi uu chika pedazu staa un ni kendoso.

<sup>14</sup> Nu ni ka jini yivi jniñu ña'nu ni sa'a Jesús yukan, so ni ka naa ini i, ti ka ka'an jiin jna'an i:

—Va ndaa ndixia ja chaa ja'a kuu ja ka'an nuu tutu ii Yandios, ja kii iin profeta nuu ñuyivi, kii ka'an da jnu'un ya —ni ka kachi yivi.

<sup>15</sup> Yukan ti ni jinijnuni maa Jesús ja ka kuni yivi kin ki'in i ya, ti chayika i ya ja na kuu ya rey, ti na ta'u ya jniñu nuu i naa i. Yukan kuu ja ni kaa ga Jesús kua'an ya undi xini yuku un.

### *Ni jika Jesús nuu nducha*

(Mt. 14.22-27; Mr. 6.45-52)

<sup>16</sup> Ja kuan ini, ti chaa ka skua'a jiin Jesús, ni ka nuu da ja'a yuku un, ti ni ka najakoyo da yu'u mini un. <sup>17</sup> Ni ka kivi da barco, ti kuankoyo da ichi inga nuu yu'u mini undi ñuu Capernaum. Ni kuu ñaa, ti tuja'i najaa Jesús nuu ka'iin da un naa da.

<sup>18</sup> Ti ni jakunchaa iin tachi xaan, ja ni keja'a sa'yo nuu nducha mini un.

<sup>19</sup> Ti va sa u'un xi iñu ni mil metro kuu ja ni ka jika da jiin barco da, ti ni ka jini da jika Jesús kuaja ya nuu nducha mini un, kuan kuyajni ya nuu barco un. Ti chaa un ni keja'a ka yu'u da.

<sup>20</sup> Ti ni kachi maa Jesús jiin da naa da:

—Koto yu'u ra naa ra chi maa ri kuu —ni kachi ya.

<sup>21</sup> Yukan na sa ni ka ndusii ini da ja ni kivi Jesùs ini barco un. Sia'an na sa ni ka jakoyo yachi da nuu kuankoyo da un.

### *Ni ka nanduku yivi Jesùs*

<sup>22</sup> Ni kuxian inga kivi, ti yivi kua'a ni ka kendo i inga nuu yu'u mini un. Ni ka jini i ja iin ni barco ni kunde yu'u mini un. Ti suni ni ka jini i ja ndaja'a Jesùs ni ka kivi da barco un ti kuankoyo da. Ko ni ka jini va'a i ja tu ni kivi Jesùs. <sup>23</sup> Ti yukan ka'iin tijni ga barco ja ni ka jakoyo ichi ñuu Tiberias, ni ka jakoyo yajni nuu ni nakuanta'u Jesùs nuu Yandios, na ni ja'anya staa ni ka yaji yivi un. <sup>24</sup> Ni ka jini yivi ja tu kande Jesùs yukan, ti suni ni ka jini i ja, ja kuankoyo ndaja'a ya. Yukan kuu ja ni ka kivi i barco ti kuankoyo i undi ñuu Carpernaum, kuan nunduku i Jesùs.

<sup>25</sup> Ni ka jakoyo yivi naa i undi inga yu'u nducha un, ti yukan ni ka nakejna'an i jiin Jesùs. Ti ka jikajnu'un i ya:

—Maestro, ¿na hora ni chaa ni ja'a? —ni ka kachi i.

<sup>26</sup> Ti ni kachi Jesùs:

—Jandaa na kachi ri jiin ra naa ra ja ka nanduku ra ru'u, ko ansu ja ni ka chaku ini ra nasa kuni ka'an jniñu ña'nun un, chi ka nanduku ra ru'u, ko siki ja ni ja'a ri staa ni ka yaji ra undi ni ka chituv'a chii ra, yukan kuu. <sup>27</sup> Ko iin ja yaji yo, tu kuñii. Ti na kachi ri jiin ra ja koto nakutu ini ra so nini ja kuu ja kaji ra nuu ñuyivi ja'a. Chi su'va ja na nakutu ini ra ja na kendo ndaa ra nuu Yandios, nava na kunchuku ra jiin ya ja kuu saa ni. Ti yukan kuu ja kua'a maa chaa kuu Se'e Yivi Ñuyivi nuu ra naa ra. Chi maa Tata yo Yandios, ni ja'a ya jniñu ja'a nuu Se'e ya ja na nakuni ra naa ra nau kuu ya —ni kachi Jesùs.

<sup>28</sup> Yukan na ti ni ka jikajnu'un tuku i Jesùs:

—¿Nau ja sa'a na ja siuku na jniñu kuni maa Yandios nusa? —ni ka kachi i.

<sup>29</sup> Ti ni kachi Jesùs:

—Maa Yandios ni taji ya iin vanuxii ni chaa vaji nuu kancha maa ya. Ti nu na kandixia ra un, yukan ni kuu ja kuni maa Yandios ja na siuku ra —ni kachi Jesùs.

<sup>30</sup> Ti ni ka kachi yivi un jiin ya:

—¿Nau iin jniñu ña'nun sa'a ni nusa? Nu na sa'a ni iin jniñu nuu na ja na nde'e na jiin nuu na, yukan ti sa na kandixia na. ¿Ko nau iin jniñu ña'nun sa'a ni nusa? <sup>31</sup> Chi chaa ni ka kuu jna'an tata na na jana'an, ni ka yaji da iin nuu staa ja ni nani "maná", ja ni ja'a maa Yandios nuu da naa da. Ni ka yaji da maná un nuu ñu'un te'e nanu ka'an nuu tutu Yandios, ja kachi: "Ni ja'a ya staa ni ka yaji yivi. Ja ni kuun ichi andivi." Sia'an ka'an nuu tutu Yandios —ni ka kachi yivi un jiin ya.

<sup>32</sup> Ti ni kachi Jesùs jiin yivi un naa i:

—Na kachi ndaa ri nuu ra ja ansu Moisés ni ja'a ja ni ka yaji yivi na jana'an un, chi maa Yandios ni skuun yukan ni kii ichi andivi ja na kuchaku yivi naa i. Ko vijnna na ti maa Yandios, ya kuu Tata i, ni taji ya iin ja kuchaku ra, ti yukan ndixia kuu ja kua'a ja ndendajnu ro'o naa ra. <sup>33</sup> Chi ja vaji ichi andivi, yukan sa'a ja na kuchaku yivi naa i jiin Yandios. Chi ni kuun vaji ichi andivi ti ni chaa nuu ñuyivi ja na kaji yivi naa i, nava sia'an na nakuni ndaa i nau kuu ja ni chaa nuu ñuyivi ja'a —ni kachi Jesùs.

<sup>34</sup> Yukan ti ni ka kachi tuku yivi un:

—Taa, kua'a ni ja ni kachi ni yukan na kaji na ndi kivi naa na —ni ka kachi i.

<sup>35</sup> Ti ni kachi Jesùs:

—Maa ri kuu yukan, chi jiin yukan ti kuchaku ra. Ko ru'u kuu ja sa'a ja na kunchuku ra saa ni ga jiin Yandios. Nu na kandixia ra ru'u, ti kuu ra nanu yivi ka ñava'a ndi'i ja kaji i jiin ja ko'o i ja na kuchaku i nuu ñuyivi ja'a. Ti maa iiñ ni ru'u kuu ja na kandixia ra. Chi tu iyo inga ja sa'a ja na nduu ra yivi Yandios ti kunchuku ra jiin ya ja kuu saa ni. <sup>36</sup> Ja ni kachi ri nuu ra naa ra ja vasu ni ka jini ra jniñu ña'nu sa'a ri, ko tu ka kuni kandixia ra ru'u.

<sup>37</sup> Taka yivi ja ni nachi'i Tata ri nda'a ri ti ja ni kandixia i ru'u, yukan kuu ja nakinda'a ri yi. Ti janta'u ri taka yivi ka kuni kivikoyo nuu ri, ti tu nataji ri ni iiñ yivi un ja na ki'in yi, chi sa su'va nakinse'e ri yi. <sup>38</sup> Ti jandaa ndixia kuu chi vaji ri ichi andivi, ko ve sa'a ri nava kuni maa ya ni tají ru'u, ansu ja sa'a ri nava kuni maa ri.

<sup>39</sup> Ti jniñu kuni Tata ri kuu ja ni iiñ yivi yinda'a ri, koto ma skuita ri yi, ti naa i. Chi sa su'va na koto va'a ri yi nava naxndoto ri i ja kuu maa kivi ka'nu, kivi nasa'a ndaa maa Yandios kuachi yivi naa i. <sup>40</sup> Ja kuni Tata ri kuu ja na kuchaku sia'an ni ga yivi ka kandixia ndaa maa Se'e ya. Nu na jaa maa kivi ka'nu ti xndichi ndaa Yandios yivi ni ka sa'a ndeva'a. Ti kivi un naxndoto ri yivi ka kandixia ja kunchuku i jiin ya ja kuu saa ni —ni kachi Jesús.

<sup>41</sup> Yukan na ti tu ni ka jajna'an ini chaa hebreo ka kakuña'nu un. Chi ni ka keja'a ka ka'an da siki Jesús. Ni ka keja'a ka ndajnu'un xe'e da:

—Tu iyo va'a nava ni ka'an Jesús, ndoo ka'an da sia'an: “Maa ri kuu nanu iiñ staa ni kuun ichi andivi?” Ko tu iyo va'a kuiti un. <sup>42</sup> Chi vanuxia ka jini yo tata da, jiin nana da. Tata da un kuu José, ti maa da nani Jesús. Tu iyo va'a ja ka'an da ja ni kii da ichi andivi —kachi yivi un, ka ndajnu'un xe'e i.

<sup>43</sup> Yukan sa ni kachi Jesús:

Koto ka'an ra siki ri naa ra. <sup>44</sup> Tata ri Yandios, ni tají ya ru'u ja na kundiso jniñu ri. Ti nu tu kua'a ya inijnuni ra naa ra ti tu kuu kandixia ra ru'u. Ko nu na kandixia ra ru'u, yukan na ti naxndoto ri ro'o ja kuu maa kivi ka'nu, kivi nasa'a ndaa maa Yandios kuachi siki yivi ni ka sa'a ndeva'a un.

<sup>45</sup> Undi na jana'an, yoso jnu'un Yandios nuu tutu ni ka chaa profeta un naa da ja kachi: “Kua'a Yandios inijnuni nuu tendi'i yivi ja na kandixia i ya”, kachi nuu tutu ya. Yukan kuu ja nu na chunso'o ra jnu'un ka'an Tata ri, ti nu na sa'a ra nava kachi ya, yukan na ti nduu ra yivi ka kandixia ru'u. <sup>46</sup> Ti vasu sia'an ka'an ri, ko ansu kachi ri ja iyo yivi ni ka jini nuu maa Tata ri. Ko iyo ñin ja vaji nuu maa ya ja ndiso jniñu. Ti maa ñin ni yukan kuu ja ni jini nuu maa Tata ya Yandios.

<sup>47</sup> Ko jandaa ka'an ri, ja nu na kandixia ra ru'u, yukan na ti kuchaku ra jiin ri ja kuu saa ni. <sup>48</sup> Maa ri kuu nanu staa kaji ra, chi sa'a ri ja na kuchaku ra saa ni jiin Yandios saa ni.

<sup>49</sup> Nde'e naa ra. Chaa ni ka kuu tata ra na jana'an, ni ka yaji da maná ni ja'a Yandios, ko ni jaa kivi ni ka ji'i da. <sup>50</sup> Ko vijna na ti ni tají Yandios ñin ja kuu nanustaa kaji ra, ti jiin yukan na ti tukaa ga naa ra nuu Yandios. <sup>51</sup> Ti maa ri kuu nanu staa yukan, chi nu na kaji ra, yukan na ti tukaa ga kendo ra kunchuku ra nuu ñuyivi ja'a, chi nukoyo ra ti kunchuku ra jiin Yandios ja kuu saa ni. Nu na kuanta'u ra ja kua'a ri nuu ra ja'a, ti kuchaku ra ja kuu saa ni. Ti staa kua'a ri un, yukan kuu yiki kuñu maa ri ja chunaa ri nuu yivi ñuyivi ja'a naa i, nava na keta'u i ti no'on i kunchuku i jiin Yandios —ni kachi Jesús jiin yivi naa i.

<sup>52</sup> Yukan na ti ni ka keja'a chaa hebreo ka kuña'nu un ka ndajnu'un da, ti ka ka'an da:

—¿Nasa kuu ja kachi chaa ja'a ja kua'a da yiki kuñu da un nusa? ¿Xi kuu kaji yo yiki kuñu da un nu? —ni ka kachi da naa da.

**53** Ti ni kachi Jesús:

—Jandaa na kachi ri nuu ra naa ra, ja nu tu kaji ra yíki kuñu maa Se'e Yíví Ñuyíví, ti nu tu ko'o ra niñí da, yukan ti tu najaa ra ja kunchuku ra jiin Yandios. **54** Ko nu na kaji ra yíki kuñu ri, ti ko'o ra niñí ri, yukan na ti, naxndoto ri ro'o nu najaa kívi ka'nu ja na sa'a ndaa Yandios kuachi yíví, ti sa kuu kívi ra ti kunchuku ra jiin Yandios ja kuu saa ni. **55** Chi nu na kandixia ra jniñu sa'a ri jiin yíki kuñu ri jiin niñí ri. Ti yukan sa'a ja na kuchaku ra ja kuu saa ni. **56** Nu na siuku ra taka yukan, yukan na ti kunchaku ra jiin ra, ti maa ra suni kunchuku ra jiin ri, ti iin ni ga ni ka nduu yo naa yo.

**57** Maa ya ña'nú, ya kuu Tata ri, chaku ya. Ti maa ya kuu ja ni taji ru'u jiin jniñu ja'a. Yukan kuu ja kancha ri jiin maa ya, ti chaku ri. Ko nu na kívikoyo ra nu kancha ri, ti kanuu ja na kandixia ra ja ru'u kuu nanu staa, ja sa'a ja na kuchaku ra ja kuu saa ni. **58** Maa ri kuu ja ni kii ichi andiví, ti kuu ri nanu staa ja kaji ra naa ra, ko jiin yukan ti tukaa jna'an ra nanu ni ka jna'an yíví ni ka kuu jna'an ra na jana'an. Chi tendí'i i ni ka yají maná, ko ni jaa kívi nu ni ndí'i i ni ka ji'i. Ko ro'o, nu na kinkoyo ra nuu kancha ri, yukan na ti kunchuku ra jiin ri ja kuu saa ni —ni kachi ya.

**59** Sia'an ni ka'an Jesús jiin yíví naa i ini veñu'un Israel kande ñuu Caper-naum nuu ni skua'a ya jiin yíví un naa i.

### *Ka'an Jesús ja kuchaku yo ja kuu saa ni*

**60** Ko yukan na ti kua'a yíví ka skua'a jiin Jesús, ni ka jiniso'o i jnu'un un ja sia'an ni ka'an ya. Ti ni keja'a ka ndajnu'un i:

—Xaan ga yíi iyo jnu'un ka'an ya, ja tu iyo ni iin jnu'un chaku ini yo —ni ka kachi i.

**61** Ko maa Jesús, ni jini ni ya ja sia'an ka ndajnu'un xe'e i ja yíi xaan jnu'un ni ka'an ya, ti ni kachi ya:

—Tu ni ka chaku ini ra jnu'un ni ka'an ri un. ¿Ja sia'an tu ka jajna'an ini ra nu? **62** Xi nu ka jani ini ra ja yíi xaan jnu'un un, ti ¿nasa kachi ga ra nu na kuni ra ru'u, ja kuu ri maa Se'e Yíví Ñuyíví, ndaa ri kino'on ri nuu ni kuncha ri undi nuu nusa? ¿Va nasa kachi ga ra nu sia'an nu?

**63** Ko sa ti chaku ini ra nava iyo jnu'un ka'an ri, yukan na ti sa kuni ndaa ra taka ja sa'a Espíritu Yandios ja kancha ya jiin ra. Chi yíki kuñu ra ja ka chaku ra jiin nuu ñuyíví ja'a, yukan tu kuxii chi jaa iin kívi ti naa. Ko ja sa'a maa Espíritu Yandios kuu ja na kuchaku ra ja kuu saa ni. **64** Ko ka iyo sava ra ja tu ka kandixia jnu'un un —ni kachi Jesús jiin yíví naa i.

Sia'an ni ka'an Jesús chi vanuxia ja jini va'a maa ya nau yívi kuu ja tu ka kandixia, ti suni ja jini va'a ya nau kuu ja nakua'a ya nuu yívi ka jito u'u ya.

**65** Ni kachi tuku Jesús:

—Ja ni kachi ndaa ri ja maa Tata ri Yandios kuu ja ni nakua'a ya ro'o nda'a ri. Chi nu tu chindée ya ro'o, ti ni tu nakuni ra jnu'un ja kandixia ra ru'u naa ra —ni kachi ya.

**66** Undi kívi yukan ti kua'a yíví ni ka skua'a jiin Jesús, ni ka xndoo i ya. Ti tukaa ni ka siin yi jiin ya.

**67** Ni jikajnu'un nuu Jesús ndi uxi uu ga chaa ka skua'a jiin ya, ti ni kachi ya:

—¿Ti suni ka kuni kinkoyo tu ro'o jiin yíví un nu? —ni kachi ya.

**68** Ti ni kachi Simón Pedro:

—Jito'yo. Tu iyo inga nanu ga ki'in na. Maa iin ni ni'in kuu ja kachi nasa kívikoyon daa'a Yandios, ti kunchuku na jiin ya ja kuu saa ni. **69** Ka kandixia ndaa na maa ni, chi ka jini na ja maa ni kuu Cristo. Maa ni kuu Se'e maa Yandios.

**70** Ti ni kachi Jesús jiin da naa da:

—Vasu maa ri ni nakaji ndi uxi uu ro'o ja na kaka ra jiin ri, ko iyo iin ra ja kuu iin ja'u'u. Iin ra kuu ja kin sa'a jniñu sa'a ja'u'u un —ni kachi ya.

**71** Sia'an ni ka'an Jesús siki Judas, se'e yií Simón, chaa ñuu Cariote, chi chaa yukan kuu ja kin nukua'a ya nuu chaa ka jito u'u ya. Yukan kuu ja kin sa'a Judas vasu ni jikonuu jna'an da jiin Jesús.

## 7

**1** Ti yukan ni jikonuu Jesús ni ñuu Galilea. Tu ni kuni ya kin kuikouuu ya ñuu Judea, chi jna'an ya, yií hebreo yukan, ka kuni ka'ni da ya.

**2** Kuan kuyajni kivi ka NASA'a yií hebreo un viko ve'e kuii, ti kivi yukan kuu kivi ka nukunchuku i ve'e kuii kachi naa i. **3** Ti ni ka kachi ñani Jesús jiin ya:

—Va'a ga ki'in ra ñuu Judea. Va'a ga ja na kin sa'a ra iin jniñu ña'nú yukan ti nava na kandixia ndaa ga yií yukan ti na kundikun i ro'o, ti nava na kuni i naa jniñu sa'a ra. **4** ¿Xi iyo va'a ja sa'a xe'e ra jniñu un nu? Ko nu kuni ra ja na kuni yií ro'o ti na kuanta'u i ro'o, ti kuan sa'a iin jniñu ña'nú nuu chitu yií un naa i —ni ka kachi da jiin ya.

**5** Sia'an ni ka ka'an ñani ya jiin ya, chi ni maa ñani ya tu ka kandixia da ya.

**6** Yukan ti ni kachi Jesús:

—Ti jaa ga kivi ki'in ri. Ko va'a ro'o naa ra, chi kuu kinkoyo ra na kivi ka kuni maa ra, **7** chi tu ka kuiti ini yií un nuu ra. Ko ru'u, chi ka kuiti ini i ka jito u'u i ru'u, chi vanua ka'an kaji ri nuu i nava kanda i jiin taka jniñu kue'e ka sa'a i. **8** Kuankoyo viko un naa ra. Ru'u tu ki'in ri, chi tuja'i jaa kivi ja kuni yií kua'a un nau ja kuu ru'u. Yukan kuu ja tuja'i jaa kivi ja ki'in ri un —ni kachi ya.

**9** Sia'an ni ka'an Jesús jiin da naa da, ti ni kendo ya nuu ñu'un ñuu Galilea.

### *Kua'an Jesús viko ve'e kuii*

**10** Kuankoyo ñani Jesús viko un naa da. Yukan na ti sa kua'an maa Jesús suni. Tu ni ka jini yií ja kande ya yukan, chi tu ni stuu ya maa ya. Tu ni ja'an ya jiin taka ga yií Galilea un. **11** Ko ka nanduku chaa hebreo ka kuña'nu un maa ya nuu viko un, ti ka ka'an da naa da:

—¿Nanu kande chaa yukan nusa? —kachi da naa da.

**12** Ti yií ka'iin yukan ka ndakuni'in xaan i jnu'un Jesús. Sava i ka ka'an: “Chaa va'a kuu chaa un.” Ko sava ga i ka ka'an: “Tuu, chi so xnda'u da yo'o”, ni ka kachi i.

**13** Ko so ja tu ka stuu ndijin i jnu'un Jesús, chi ka yu'u i sa kuiti ini chaa hebreo ka kuña'nu un.

**14** Ja ni kuu sava viko, ti sa ni kenda Jesús, ni kaa ya kua'a ya yux'e le veñu'un ka'nu un, ti ni keja'a xna'an ya nuu yií un naa i. **15** Ti so ka naa ini chaa hebreo ka kuña'nu un, ti ni ka kachi da:

—¿Nasa kuu ja xaan ndichi ka'an chaa ja'a jnu'un un, ti tu ni skua'a da? —ni ka kachi da naa da.

**16** Ti ni kachi Jesús jiin da:

—Jnu'un xndaku ri nuu ra naa ra ja'a, ansu ja kuu ini maa ri ti ka'an ri.

**17** Taka jnu'un xna'an ri ja'a, ansu jnu'un ndo'o ini maa ri kuu. Ti nu ka ndiyo ini ra ja siuku ra jniñu kuni Yandios, yukan ti sa nakuni ra ru'u, ja ka'an ri niña jnu'un ni ja'a maa Yandios nuu ri, ti tu ka'an ri jnu'un ja jani ini maa ri.

**18** Chi nu na ka'an vixi iin yií ja kuu maa i, ti jandaa ni kuu ja nduku i ja na nakua'a yií ja yiñu'un nuu i. Ko ru'u, chi su'va kuni ri ja na nakua'a i ja yiñu'un nuu maa Yandios, chi maa ya ni taji ru'u ti ndiso jniñu ri nuu ya. Yukan kuu ja ka'an ri niña jnu'un ndaa, ti tu jajna'an ini ri xndoña'an ri.

**19** Ka ka'an vixi ra ja Moisés kuu ja ni ja'a Ley Yandios nuu ra naa ra. Ti nu jandaa kuu, ¿ndoo kuu ja ni iin ra tu ka kuni siuku Ley yukan nusa? ¿Xi ndoo kuu ja ka kuni ka'ni ra ru'u, ti ru'u kuu ja ka'an jnu'un Yandios nuu ra naa ra ja'a? —ni kachi ya.

**20** Ti ni ka na ndeokani yivi un sia'an:

—Ja ka'an ra sia'an va kancha iin tachi u'u jiin ra. ¿Xi nau chaa kuu ja ka kuni ka'ni ro'o nu? —ni kachi da.

**21** Ti ni kachi Jesús:

—Ni sa'a ri iin jniñu ña'nú ja ni kuu iin kivi ndetatu, ti yukan ni kuu ja ni ka jini ra naa ra. **22** Ni xndoo Moisés iin jnu'un ja na sa'a ra iin seña nuu yiki kuñu suchi yíi kuachi vasu iin kivi ndetatu. Ko ansu maa Moisés ni sa'a yukan, chi undi jana'an ga vají jnu'un un ja kuu ley ni ja'a Moisés ja kuu kivi ndetatu. Ti sia'an ka siin tu ro'o naa ra, chi ka sa'a ra jniñu un vasu iin kivi ndetatu.

**23** Ka siin ra jnu'un un naa ra, vasu iin kivi ndetatu, chi ka ndiyo ini ra ja siuku ra Ley Moisés. Ko su'va ni ka kuiti ini ra nuu ri ja ni sa'a ri tajna iin yivi ku'u ja ni kuu kivi ndetatu un. **24** Ti sia'an ka kankuachi ra siki ri naa ra. Ko na kachi ri ja tukaa ga kani ini ra sia'an, chi su'va kani ini nu ka siuku ndaa yivi naa i xi tu. Yukan kuu ja koto ma kankuachi ra siki yivi nu tu ka iyo kuachi i —ni kachi Jesús.

### *Ka ka'an yivi ñuu Jerusalén ja Jesús kuu Cristo*

**25** Yukan na ti sava yivi ñuu Jerusalén un, ka jikajnu'un jna'an i:

—¿Ti ansu chaa ja'a kuu ja ka nanduku chaa ka kuñu'nú un ja ka'ni da nu?

**26** Ko ja'a ni kancha da ti ka'an da nuu chitu un, ¿ti ndoo tundo ka sa'a chaa ka kuñu'nú un jiin da nusa? ¿Ndo tu ka jasi da ja ka'an chaa ja'a? Va xi ka ndo'o ini chaa ka kuñu'nú un ja maa chaa ja'a kuu Cristo ja ni taji Yandios, ja na sa'a jniñu ña'nú. **27** Ko yo'o chi ka jini va'a yo nanu vají chaa ja'a. Ko kivi na chaa Cristo ti ni iin yo tu kuni na ichi kii ya —ni ka kachi yivi un.

**28** Ti yukan ni ka'an jaa Jesús nuu ni xna'an ya yuxel'e veñu'un un, ti ni kachi ya:

—¿Va nu ja ka jini ra nau ja kuu ri nu? ¿Xi ka jani ini ra ja nanu vají ri xino? Ko ansu vají ri ti kancha ri ñuyivi ja'a ja so ja kuu ini maa ri. Ti ansu sia'an kuu. Chi su'va maa Yandios, ni kuu ini ya ja ni taji ya ru'u. Ti ro'o naa ra tu ka jini kuiti ra nasa kaa Yandios, ti ni tu ka jini ra nasa kaa jniñu sa'a ya. **29** Ko ru'u, chi jini va'a ri nasa kaa Yandios, chi vají ri undi nuu kancha maa ya. Maa ya kuu ja ni taji ru'u vají ri, ti ndiso jniñu ri nuu ya —ni kachi Jesús nuu yivi un naa i.

**30** Yukan na ti ni ka nduku da nasa jnii da ya ti chondee da ya vecaa. Ko ni iin da tu ni kuu jnii da ya naa da, chi vanuxia tuja'i jaa maa kivi ni kachi maa Yandios ja kuu ya. Tuja'i jaa hora ya.

**31** Ti kua'a xaan yivi ka'iin yukan ni ka kandixia i ya, ti ni ka keja'a ka ka'an i:

—Jandaa ndixia kuu ja chaa ja'a kuu Cristo ni taji Yandios ja sa'a jniñu ña'nú, chi ka'an iin jnu'un ja sia'an sa'a Cristo nu na chaa ya. Ti va tu nau inga jniñu sa'a Cristo ja tu kuu sa'a chaa ja'a —ni ka kachi yivi naa i.

**32** Yukan na ti chaa fariseo un jiin sutu ka kuñu'nú un, ni ka taji da policía ka ndito veñu'un un, ja na kin jnii da Jesús. Chi ni ka jiniso'o chaa fariseo un ja ka janta'u yivi jnu'un ka'an ya. Yukan kuu ja ni ka taji da policía ja na jnii da Jesús.

**33** Ti ni kachi Jesús:

—Jaku ni ga kivi kuncha ri jiin ra naa ra. Yukan na ti kino'on tuku ri nuu kancha *iin* ja ni taji ru'u vají ri. <sup>34</sup> Kivi jña ti nanduku ra ru'u, ko tu nani'in ra ru'u. Ti ni tu kuu jakoyo ra nuu ki'in ri —ni kachi ya.

<sup>35</sup> Yukan ti chaa hebreo ka kuña'nu un, ni ka keja'a ka jikajnu'un jna'an da, ti ka kachi da:

—¿Nachi ki'in chaa ja'a ja tu kuu nani'in yo da nusa? ¿Xi ki'in da *inga nación* nuu kanchuku jna'an yo hebreo jiin yivi Grecia un nu? ¿Xi kin skua'a da jiin yivi ñuu jika un nu? <sup>36</sup> ¿Ti na jnu'un kuu ja ni ka'an da ja kachi da ja nanduku yo da ti tu nani'in yo da, ti ni tu kuu kinkoyo yo nuu kande da un nu? Tu chaku ini yo ndo kuni ka'an chaa un ja ka'an da sia'an —ni ka kachi da.

### *Kancha Espíritu Santo jiin yivi ka kandixia Jesús*

<sup>37</sup> Kivi ni ndi'i viko un ni kuu *iin* kivi ka'nu ga, ni jakuiñi Jesús ti ni ka'an jaa ya nuu yivi ka'iin yukan, ti ni kachi ya:

—Nu nau ro'ka ichi nducha naa ra, ña'an nuu ri ja'a ti na kua'a ri nducha ko'o ra. <sup>38</sup> Nu nau *iin* yivi na kandixia ru'u, jankiví ga kendo'o jnu'un ri ki'in, chi jankoo ini aña i, ti kuñii ja kuu saa ni. Kuu ini i nanu *iin* yucha ka'nu nu jika ni ga nducha ti jankiví ichi —ni kachi ya.

<sup>39</sup> Sia'an ni ka'an Jesús jnu'un siki Espíritu Santo, chi ni kachi ya nasa kuu kuncha Espíritu jiin yivi kandixia maa ya. Ko vanuxia tuja'i chaa Espíritu Santo, chi tuja'i ndaa maa Jesús andivi nuu nduña'nu ya. Yukan kuu ja tuja'i chaa Espíritu Santo ja kuncha ya jiin yivi naa i.

<sup>40</sup> Sava yivi kua'a ka'iin un ni ka jiniso'o i jnu'un, ni ka'an Jesús, ti ni ka kachi i:

—Jandaa ndixia kuu ja chaa yukan kuu maa Profeta ja ka'an jnu'un vají undi nuu maa Yandios —ni ka kachi i.

<sup>41</sup> —Chaa ja'a kuu maa Cristo ja ni taji Yandios, chi ndiso ya *iin* jniñu ña'nu —ni ka kachi i.

Ko sava ga i ni ka kachi:

—Tuu, chi ansu ñuu Galilea kii Cristo. <sup>42</sup> Chi kachi nuu tutu Yandios ja Cristo kuu *iin* jna'an tata yo David, chaa ni kuu rey undi na jana'an. Ti kaku ya ñuu Belén, ñuu nuu ni kaku maa tata yo David undi na jana'an xaan tonto —ni ka kachi i.

<sup>43</sup> Ti yukan ni ka kuu sava yivi un, chi tu ni kejna'an *iin* nuu ini i siki ja nanu vají Jesús. <sup>44</sup> Sava i ka kuni jnii i ya ja na ki'in ya vekaa, ko ni *iin* i tu ni ka tava ini ja jnii i ya.

<sup>45</sup> Tu ni ka jnii policía un Jesús. Va'a ga ja ni ka nandeokuñi da nuu chaa fariseo un jiin sutu ka kuña'nu un, ti chaa un ni ka jikajnu'un da policía un:

—¿Ndo tu ni ka kii ra jiin chaa un? —ni ka kachi da.

<sup>46</sup> Ti ni ka kachi policía un:

—Tuu, chi jnu'un ka'an da un, tu ni *iin* chaa ka'an nanu ka'an chaa yukan —ni ka kachi da.

<sup>47</sup> Ti ni ka kachi chaa fariseo un:

—¿Xi suni ja ni xnda'u chaa un ro'o naa ra nu? <sup>48</sup> Ko ni *iin* jna'an yo tu ka kandixia chaa un. Ni *iin* yo'o ja ka kuña'nu jiin chaa fariseo, tu ka kandixia da naa da. ¿Ti ro'o, xi ja ni ka kandixia ra chaa un naa ra nu? <sup>49</sup> Ti yivi kua'a un chi tu ka jini va'a i ley yo naa yo nanu maa ra naa ra, ti ka kuu i nanu yivi ni ka jna'nú ndatu. Tu ka jini kuiti i nava ka sa'a i —ni ka kachi da.

<sup>50</sup> Ti suni yukan kande Nicodemo nuu ni ka ndututu chaa un. Kuu da *iin* chaa kuña'nu nuu yivi hebreo, ja *iin* jakuaa ni ja'an ka'an da jiin Jesús. Ni ndokuiñi da ti ni kachi da jiin na'an da un:

<sup>51</sup> —Kachi Ley yo ja tu kuu kankuachi yo siki iin chaa, nu tu kunso'o yo xnaka na jnu'un ka'an da, nava sia'an ti sa kuni yo na kuachi ni sa'a da —ni kachi Nicodemo.

<sup>52</sup> Ti ni ka kachi chaa un naa da:

—¿Va nu suni chaa ñuu Galilea kuu tu ro'o? Nanduku vii ndaa nuu tutu Yandios, ti kuni va'a ra ja ni iin chaa ka'an jnu'un Yandios, tu kenda kuiti ñuu Galilea —ni ka kachi da.

<sup>53</sup> Yukan na ti ndi iin ndi iin da ni ka naki'in ichi, ti kuan nukoyo da ve'e da.

### *Jnu'un ña'an siñini*

## 8

<sup>1</sup> Yukan na ti kua'a Jesús ichi yuku Olivos.

<sup>2</sup> Yukan ti jaña'an inga kivi, ti ja ni najaa tuku ya veñu'un ka'nu un. Kua'a yivi ni ka ndututu tuku nuu kande ya. Ni nukoo ya ti ni keja'a skua'a ya jiin yivi naa i.

<sup>3</sup> Yukan ti chaa ka xna'an ley Israel jiin chaa fariseo un, ni ka yinda'a da iin ñasi'i nuu Jesús. Ni ka jñii da ña'an un nuu kande ña jiin inga chaa. Ni ka jani da ña sava ma'ñu yivi ka'iin nuu Jesús un, <sup>4</sup> ti ni ka kachi da jiin ya:

—Maestro, ni ka jñii na ña ja'a maa hora kande ña jiin chaa. <sup>5</sup> Ti nu iin ña'an sa'a sia'an kachi nuu ley Moisés ja na kua'a yo yuu xini ña nava na kuú ña. Yukan kuu ja ka'an ley ni ja'a Moisés, chaa ni kuu tata yo na jana'an. Ti ni'in, ¿nasa kachi ni? —ni ka kachi da.

<sup>6</sup> Sia'an ni ka kachi da ja na ndenu nasa kachi ya, nu kuanta'u ya nava ka'an ley un xi tuu. Ti nu tuu, ti kankuachi da siki ya. Yukan ti ni jankuitandijin Jesús, ti keja'a sa'a ya letra nuu ñu'un jiin xini nda'a ya. <sup>7</sup> Ko maa da ka ka'an ka ka'an da. Ni ndokuiñi Jesús, ti ni kachi ya:

—Nuu nau iin ro'o ndo'o ini ja tu na kuachi ra iyo, kanduu ti ki'in iin yuu ti kua'a ra xini ña —ni kachi ya.

<sup>8</sup> Yukan ti ni jankuitandijin tuku Jesús, ti sa'a ya letra nuu ñu'un un. <sup>9</sup> Ko nu ni ka jiniso'o da ja sia'an ni ka'an Jesús jiin da, ni ka kukanuu da, ti ndi iin ndi iin da ni ka kekoyo kua'an. Xnakan chaa ña'nu ga ni kenda kua'an, sia'an undi ni ndi'i da kuankoyo. Yukan ti ni kendo ma iin ni ga ña'an un jiin Jesús.

<sup>10</sup> Ni ndokuiñi Jesús, ti ni kachi ya jiin ña:

—Ro'o ñasi'i, ¿vanu ja kuankoyo chaa ka kankuachi siki ra un? ¿Vanu tukaa ni iin chaa kankuachi siki ra nu? —ni kachi ya.

<sup>11</sup> Ti ni kachi ña:

—Tukaa ni iin da, taa —ni kachi ña.

Ti ni kachi Jesús:

—Ni ru'u tu kuu kankuachi ri siki ra. Kua'an ti koto sa'a ga ra kuachi un —ni kachi ya.

### *Jesús kuu nanu ñu'un ja ndinchaa nuu ñuñaa*

<sup>12</sup> Ni ka'an tuku Jesús jiin yivi ni ka ndututu veñu'un ka'nu un, ti ni kachi ya:

—Maa ri kuu nanu ñu'un ja ndinchaa ichi yivi kanchuku nuu ñuyivi ja'a. Nu na kandixia ra ru'u, ti tukaa kaka ra ichi ñuñaa. Chi kuncha ri jiin ra, ti kuu ri nanu ñu'un ja ndinchaa, nava na kuni ra na ichi ki'in ra. Nava tukaa ga ki'in ra ichi ñuñaa un, chi ja ni ka ndundijin nuu ra. Sia'an ti ni'in ra ja kuchaku ra ja kuu saa ni —ni kachi ya.

<sup>13</sup> Ti ni ka ka'an chaa fariseo un jiin ya:

—Ro'o, chi ka'an ra ja kuu maa ra. Ja sia'an kuu ja tu ka'an ndaa kuiti ra —ni ka kachi da.

**14** Ti ni kachi Jesús:

—Vasu ka'an ri ja kuu jnu'un maa ri, ti jandaa kuu, chi jini ndaa ri nanu vaji ri, ti jini ndaa ri nuu ki'in ri. Ko ro'o, tu ka jini ra nanu vaji ri ti ni nanu ki'in ri.

**15** Ro'o naa ra, chi ka ka'an ra ja jna'nu ndatu ri, ko so ka ka'an ra ja ka ndo'o ini maa ra. Ko ru'u, nu kachi ri ja jna'nu ndatu yivi. **16** Ko nu na nasa'a ndaa ri jiin yivi naa i, yukan na ti kundaa ndixia taka jnu'un ka'an ri. Ka iyo uu ja xndichi yivi. Maa ri kuu ja xndichi ri yivi jiin maa Tata ri, chi maa ya kandichi jiin ri, ti ni taji ya ru'u jiin jniñu ja'a vaji ri. **17** Ti nu ley ra yoso ja nu ka iyo uu chaa ka ja'a jandaa, ti nu ni kejna'an jnu'un ka ka'an chaa un naa da. Yukan na ti ni jini yo ja iyo ndaa jnu'un ka'an ka ka'an da. **18** Yukan kuu ja maa ni ri kuu ja ka'an ja kuu maa ri. Ti inga ja ja'a jandaa ja'a ri kuu maa Tata ri, ya ni taji ru'u jiin jniñu ja'a—ni kachi Jesús.

**19** —¿Nanu kancha tata ra nusa? —ni kachi da.

**Ti ni kachi Jesús:**

—Sia'an ka ka'an ra chi tu ka jini kuiti ra nau ja kuu ri. Suni sia'an tu ka jini kuiti ra nasa kaa maa Yandios. Ni tu ka jini ra nasa sajniñu ya. Ko nu sia'an ti kuni ra nau ja kuu ri, ti suni sia'an nakuni ndaa ra nau ja kuu Tata ri—ni kachi ya.

**20** Yukan kuu jnu'un ni ka'an Jesús na ni skua'a ya ini veñu'un ka'nun un, yajni nuu kancha jajnu ka soko yivi xu'un nuu Yandios. Ko tu ni ka jniñi ni iin da ya, chi tu ja'i jaa hora ni kachi Yandios ja kuū ya. Tu ja'i jaa maa hora ya.

**Ni kachi Jesús ja tu kuu kinkoyo yivi nuu ki'in ya**

**21** Ni ka'an tuku Jesús jiin yivi ni ka ndututu yukan, ti ni kachi ya:

—Ru'u, ki'in ri ti nanduku ra ru'u, ko tu nani'in ra ru'u. Jaa kivi kuū ra, ko yukan kendo kuachi siki maa ra. Chi tukaa iyo jnuka'nun ini, ni tu kuu kinkoyo ra nuu ki'in ri—ni kachi ya.

**22** Ti yivi hebreo un ka ndajnu'un da ti kachi da naa da:

—Va kin ka'ni chaa ja'a maa da ja kachi da ja tu kuu ki'in yo nuu ki'in da—ni ka kachi da.

**23** Ti ni kachi Jesús nuu da naa da:

—Ro'o chi ka yi'i ra jiin yivi ñuyivi ja'a. Ko ru'u chi yi'i ri jiin ya kancha andivi. Ka yi'i ra jiin yivi ñuyivi ja'a. Ko ru'u tu yi'i ri jiin ñuyivi ja'a.

**24** Ja yukan kuu ja ni kachi ri ja jaa iin kivi ti kuū ra, ko kendo kuachi siki maa ra. Tukaa koo jnuka'nun ini Yandios nuu ra naa ra. Chi nu tu kandixia ra nava ka'an ri, yukan na ti nu na kuū ra ti kendo kuachi ri ja maa ri kuu—ni kachi ya.

**25** Yukan ti ni ka kachi da jiin ya:

—Nusa ti, ¿nau ja kuu ra? —ni ka kachi da.

**Ti ni kachi Jesús:**

—Undi nuu ja ni kachi ri nau ja kuu ri. **26** Ti iyo kua'a ga jnu'un kuni ka'an ri jiin ra, ti suni iyo kua'a ga ja kuni xndichi ri ro'o naa ra. Ko jnu'un ka'an ri vijnal kuu mani jnu'un ni jini ri nuu maa ya ni taji ru'u. Ti maa ya kuu Yandios ndaa ndixia. Ti ru'u, ka'an ri mani maa jnu'un ni kachi maa ya nuu ri—ni kachi Jesús.

**27** Ko tu ni ka chaku ini yivi un ja ni ka'an Jesús jnu'un Tata ya, ya kancha andivi.

**28** Yukan ti ni kachi Jesús nuu da naa da:

—Jaa kivi nu kataakaa ra ru'u nuu nda'a cruz, ko nu na sa'a ra taka yukan jiin ri, ru'u ja kuu ri Se'e Yivi Ñuyivi, yukan na ti kuni ra ja maa ri kuu ndi'i nava ni kachi ri. Nakuni ra ja tu ni sa'a ri ja kuu ini maa ri. Chi su'va sa'a ri nava ni xnal'an maa Tata ri, ti yukan kuu taka ja sa'a ri nuu ñuyivi ja'a. **29** Maa

Tata ri ni taji ru'u jiin jniñu ja'a. Nini kancha ya jiin ri. Tu xndoo ya maa iin xini ri ja sa'a ri nava kuni ri. Chi su'va taka ni kivi sa'a ri nava kuni maa ya sa jajna'an ini ya —ni kachi Jesús.

**30** Ja sia'an ni kachi Jesús, ti kua'a yivi ni ka keja'a ka kandixia i ya.

### *Nasa kuu yivi Yandios jiin yivi ka sa'a kuachi*

**31** Ni kachi Jesús nuu jna'an ya hebreo, chaa ni ka kandixia ya:

—Nu na siuku ndaa ra jnu'un xna'an ri, yukan na ti ka kuu ndixia ra chaa ka skua'a jiin ri. Nu sia'an na ti ni kundaa ndixia ja ka yi'i ra nda'a ri. **32** Yukan na ti nakuni va'a ini jnuni ra ja jnu'un ka'an ri kuu mani jnu'un ndaa. Chi natava ri ro'o nuu nundo'o nava tukaa ga kivi ra jiin kuachi un —ni kachi ya.

**33** Ko tijni yivi un ni ka kachi:

—Ka kuu ri yivi kuu jna'an tata ri Abraham, chaa ni chaku undi na jana'an. Ti tu ni ka yi'i ri nda'a ni iin ja kuña'nu ja kunukuachi ri nuu. ¿Ti nasa kuu ja ka'an ra ja natava ra ru'u naa ri nusa? —ni ka kachi da.

**34** Ti ni kachi Jesús:

—Jandaa ndixia na kachi ri ja taka yivi ka sa'a kuachi, ni'in xaan ka siin jiin kuachi un, ti tu kuu nasa nama i maa i nuu, chi ni'in xaan ka yijn'i i nuu nda'a kuachi un, ti so ka junukuachi ka'a i nuu. **35** Sa'a yo nanu, iin yivi sajniñu ka'a, tu kuu i jna'an yivi xiin ve'e nuu sajniñu i un. Ko iin se'e, chi kuu i jna'an yivi xiin ve'e un. **36** Ko ru'u ja kuu ri Se'e Yandios, nama ri ro'o nava tukaa ga sajniñu ka'a ra nuu kuachi un, ja sia'an na ti kundee ra siki kuachi un. Ko vijnna ti ka sajniñu ka'a ra nuu kuachi un, vasu ka kuu ra jna'an Abraham, chaa ni kuu tata yo na jana'an. **37** Jini ri ja ka kuu ra jna'an tata yo Abraham, ti vasu sia'an iyo, ko ka kuni ka'n'i ra ru'u, chi tu ka kuni kuanta'u ra jnu'un ka'an ri. **38** Ru'u, chi ka'an ri jnu'un ni xna'an Tata ri nuu ri. Ko ro'o naa ra, chi ka sa'a ra iin jniñu kuni maa tata ra, ja kuu chaa u'u un —ni kachi ya.

**39** Ti ni ka kachi da:

—Ka kuu ri jna'an tata ri Abraham —ni ka kachi da.

Ko ni kachi Jesús nuu da naa da:

Ti nu jandaa kuu ja ka kuu ra jna'an Abraham, ti sa'a jniñu va'a naa ra, sia'an nanu ni sa'a maa da. **40** Ko va'a nde'e ra jniñu sa'a ra, chi ka kuni ka'n'i ra ru'u, vasu ni ka'an ri mani jnu'un ndaa nuu ra naa ra, nanu ni xna'an Tata ri Yandios nuu ri. Ko va'a nde'e ra naa ra, chi tu ni sa'a ndeva'a Abraham nanu ka kuni sa'a ra. **41** Ro'o chi iin ni kuankoyo ra jiin jniñu ka sa'a maa tata ra naa da —ni kachi ya.

Ti ni ka kachi da:

—Ru'u, tu ka kuu ri se'e ja tu iyo tata, chi iyo iin ni tata ri, ti maa ya kuu Yandios —ni ka kachi da.

**42** Ti ni kachi Jesús nuu da naa da:

—Nu ndixia ra ja ka kuu ra yivi Yandios, ti va koo mani ra jiin ri niku. Chi ru'u, undi nuu Yandios ni kee ri vají ri. Ti tu vají ri ja kuu ini maa ri, chi maa ya ni taji ru'u jiin jniñu ya. **43** Ko ro'o naa ra, tu ka chaku ini ra. Tu ka kuni chu'un ini ra jnu'un ka'an ri. **44** Sia'an kuu chi vanuxia maa tata ra kuu ja'u'u un, ti ka ndiyo ini ra sa'a ra nau jniñu ta'u tata ra un. Chi maa ja'u'u un ni keja'a ja'n'i ndiyí undi na ni keja'a ñuyivi yo. Ti tu jini kuiti ja'u'u un ni iin jnu'un ndaa. Ni undi vijnna tu ka'an kuiti ni iin jnu'un ndaa. Mani jnu'un xndoña'an ka'an. Ti hora xndoña'an, ka'an nanu ja jandaa ndixia kuu, vanuxia maa ja'u'u un kuu tata yivi ka xndoña'an un. Ti yukan kuu ja kunuu jiin yivi ka xndoña'an un. **45** Ko vijnna ti ru'u ja ka'an ri taka jnu'un ndaa, ti ro'o tu ka kandixia ra ru'u naa ra. **46** ¿Va nu iyo iin ra kuu chakuachi ru'u ja ja ni sa'a ri iin kuachi xino? Ti vasu tu kuu ka'an ra sia'an, ko tu ka kuni

kandixia ra ru'u ja ka'an ri niña jnu'un ndaa. <sup>47</sup> Yivi ka kuu yivi Yandios, ti ka chu'un ini i jnu'un ka'an ya. Ko ro'o naa ra, tu ka kuni chu'un ini ra, chi tu ka kuu ra yivi Yandios —ni kachi ya nuu da naa da.

<sup>48</sup> Yukan na ti ni ka kachi chaa hebreo un jiin Jesús:

—Va vatuni ka ndo'o ini ri ja kuu ra iin chaa ñuu Samaria, ti va nu tu jika iin tachi u'u jiin ra, ¿ndoo ka'an ra sia'an nu? —ni ka kachi da.

<sup>49</sup> Ti ni kachi Jesús:

—Tu jika ni iin tachi u'u jiin ri. Chi su'va jiin jnu'un ka'an ri, ja'a ri ja yiñu'un nuu Tata ri. Ko maa ra naa ra, tu ka ja'a ra ja yiñu'un ru'u.

<sup>50</sup> Ko tu ka'an ri ja kuu maa ri, ja nduku ja kuña'nu ri. Ko iyo iin ja sa'a ja kuña'nu ri. Ti nu na jaa kivi, ti maa ya kuu ja sandaa kuachi siki ra naa ra.

<sup>51</sup> Jandaa na kachi ri ja tako yivi nu na siuku ndaa jnu'un ri, tu naa kuiti i, chi ki'in i kuncha ijiin Yandios ja kuu saa ni —ni kachi Jesús.

<sup>52</sup> Yukan ti yivi hebreo un ni ka kachi i:

—Vijna ti ka jini ndaa ri ja ni nduu ku'u xini ra, ti kancha iin tachi u'u jiin ra. Chi tata ri Abraham na jana'an, jiin tako ga chaa ni ka kuu profeta na jana'an un, ni ka jii'da. Ko ro'o, chi kachi ra ja kuu kuncha ri ja kuu saa ni nu na siuku ndaa ri jnu'un ka'an ra. <sup>53</sup> ¿Jani ini ra ja ña'nu ga ra ja kuu tako jna'an Abraham na jana'an, xi ña'nu ga ra ja kuu tako chaa ni ka kuu profeta un nu? ¿Vanu kuña'nu ga ra ja kuu maa da naa da xino? —ni ka kachi da.

<sup>54</sup> Ti ni kachi Jesús:

—Nu maa ni ri na ka'an ja kuña'nu ri, ti tu nijniñu. Ko maa Tata ri kuu ya kachi ja kuña'nu ri. Ro'o naa ra, ka ka'an ra ja ka nchañu'un ra Yandios. Ko vanuxii maa ya kuu maa Tata ri, ti maa ya kua'a ja yiñu'un ru'u.

<sup>55</sup> Ti vasu sia'an ka ka'an ra, ko tu ka jini ra maa ya. Ti ru'u, chi jini va'a ri maa ya. Nu na ka'an ri ja tu jini ri maa ya, ti kuu ri iin chaa xndoña'an nanu ro'o naa ra. Ko tuu, chi jini ndixia ri ya. Yukan kuu ja siuku ndaa ri jnu'un ka'an ya.

<sup>56</sup> Suni tata ra Abraham, ni jini jnuni da ja kii kaku ri nuu ñuyivi ja'a. Yukan ti ni kusii ini da. Chi ni kandixia ndaa da ja sia'an kuu ndaa, ti ni kusii ini da —ni kachi Jesús.

<sup>57</sup> Ti ni kachi chaa hebreo un jiin Jesús:

—Va ni tu iin ra uu xiko uxi kuiya, ¿ti nasa kuu ja ka'an ra ja ni jini ra nuu Abraham nusa? —ni ka kachi da.

<sup>58</sup> Ti ni kachi Jesús:

—Jandaa na kachi ri nuu ra naa ra ja undi na ti kaku ga Abraham, ti ja iyo ru'u —ni kachi ya.

<sup>59</sup> Yukan ti ni ka ki'in da yuu ja kua'a da ya. Ko maa Jesús, xe'e ni ni kenda ya ini veñu'un ka'nun, ti kua'an ni ya.

### Ni sa'a Jesús tajna iin chaa ni kaku kuua

## 9

<sup>1</sup> Ichi kua'an Jesús, ni jini ya iin chaa kuua, ja kuua nduchi da undi ni kaku da. <sup>2</sup> Ti chaa ka skua'a jiin ya, ni ka jikajnu'un da ya:

—Maestro, ¿ndoo ni kuu ja ni kaku kuua chaa ja'a? ¿Ja ka iyo xaan kuachi tata da, nana da, xi kuachi maa da kuu nu? —ni ka kachi da.

<sup>3</sup> Ti ni kachi Jesús jiin da naa da:

—Ni ansu kuachi maa da, ti ni ansu kuachi tata da xi nana da kuu ja ni kaku da sia'an. Chi ja ni kaku da sia'an kuu ja na kuni yivi naa i iin jniñu ña'nu ja sa'a Yandios jiin da. <sup>4</sup> Sa'a yo ja nu ni iin ndijin ti'lí ga, ti kuu sa'a yo jniñu, ko nu tukaa ndijin, ti tukaa ga kuu sa'a jniñu yo. Suni sia'an ja kuu ru'u, chi kanuu ja na sa'a ri iin jniñu vijna ni ndijin ti'lí ga, chi jan iin kivi ja tukaa ga

kuu sa'a jniñu ni iin yivi naa i. <sup>5</sup> Ru'u, ni kancha ri nuu ñuyivi ja'a, ti kuu ri nanu iin ñu'un ja ndinchaa ichi yivi kanchuku nuu ñuyivi, chi xna'an ri nasa kuu sa'a yivi iin jniñu kuni Yandios —ni kachi Jesús.

<sup>6</sup> Sia'an ni kachi ya, ti ni tivisi'i ya nuu ñu'un. Ni sa'a ya nde'yu jiin tisi'i ya, ti ni jaka ya nde'yu un nduchi chaa kuaa un. <sup>7</sup> Yukan na ti ni kachi ya jiin da:

—Kua'an yu'u pila nducha Siloé un, ti nakacha ra nduchi ra —ni kachi ya. (Siloé kuni ka'an: "Ja ni taji ri.")

Yukan na ti kua'an chaa un, ni nakacha da nduchi da, ti ni ndundijin nuu da. Yukan na ti kuano'on da.

<sup>8</sup> Yivi ñuu da un jiin taka ga yivi ka jini ja kuu da iin chaa kuaa, ka jikajnu'un jna'an i:

—¿Ti ansu chaa ja'a kuu ja ni jikan da xu'un nukoo da un nu? —ni ka kachi i.

<sup>9</sup> Ni ka iyo sava yivi ni ka kachi:

—Suu kuu da.

Ti sava ga i ni ka kachi:

—Ansu kuu da, ko sia'an kaa da.

Ko maa da ni kachi da:

—Maa ri kuu.

<sup>10</sup> Yukan ti ni ka jikajnu'un yivi un maa da:

—¿Nasa kuu ja ni ndundijin nduchi ra nusa? —ni ka kachi chaa un.

<sup>11</sup> Ti ni kachi da:

—Ka jini ra iin chaa nani Jesús. Chaa yukan, ni sa'a da nde'yu jiin tisi'i da, ni jaka da nduchi ri, ti ni kachi da ja na ki'in ri yu'u pila nducha Siloé un, ti na nakacha ri nduchi ri. Ni ja'an ri yukan, ni nakacha ri nduchi ri, ti ni ndundijin va'a nde'e ri vijnna —ni kachi da.

<sup>12</sup> Ti ni ka jikajnu'un chaa un maa da:

—¿Nanu kande chaa un nusa? —ni ka kachi da.

—Tu jini ri —ni kachi da.

<sup>13</sup> Yukan ti ni ka janchaka da chaa ni kaku kuaa un nuu chaa fariseo un.

<sup>14</sup> Ni kuu un iin kivi ndetatu, kivi ii, na ni sa'a Jesús nde'yu ja ni sa'a ya tajna nduchi chaa kuaa un. <sup>15</sup> Yukan na ti ni ka jikajnu'un chaa fariseo un maa da nasa kuu ja ni ndundijin nduchi da. Ti ni kachi da:

—Ni sa'a chaa un nde'yu ti ni jaka da nduchi na, ni janukacha na nuu na, ti vijnna ja ni ndundijin va'a nduchi na —ni kachi da.

<sup>16</sup> Yukan na ti sava chaa fariseo un ni ka kachi da:

—Ansu Yandios ni taji chaa un jiin jniñu sa'a da un, chi tu chiñu'un da kivi ii —ni ka kachi da.

Ti sava ga chaa fariseo un ni ka ka'an:

—Nu ansu chaa vaji nuu Yandios kuu da, ¿ti nasa kuu ja kuu sa'a da jniñu ña'nun u nusa? —ni ka kachi da.

Ti ni ka kusiñn ini da naa da ja siki Jesús. <sup>17</sup> Ni ka jikajnu'un tuku da chaa ni kaku kuaa un:

—Maa ra kachi ja chaa un kuu ja ni sa'a tajna ro'o, ja ni ndundijin va'a nduchi ra vijnna. Vijnna na ti ¿ndo'o ndo'o ini ra nau ja kuu chaa yukan nusa? —ni ka kachi da.

Ti ni kachi chaa un:

—Maa da kuu iin profeta ni taji Yandios ja na ka'an da jnu'un ya —ni kachi da.

<sup>18</sup> Ti chaa hebreo un, tu ka kuni kandixia da ja ni kaku kuaa chaa yukan, chi vanua ja ni nduva'a nduchi da. Ja yukan kuu ja ni ka kana da tata'da jiin nana da, <sup>19</sup> ti ni ka jikajnu'un da chaa un naa da:

—¿Se'e ra kuu chaa ja'a nu? ¿Kuaa ndixia da undi ni kaku da nu? ¿Nasa ni kuu ja ni ndundijin nduchi da vijnna nusa? —ni ka kachi da.

**20** Ti ni ka kachi tata da jiin nana da:

—Se'e na kuu da, ti kuaa ndixia nduchi da undi ni kaku da, **21** ko tu ka jini na nasa kuu ja ni nduva'a nduchi da, ti ni ndundijin vijnna. Ni tu ka jini na nau ja ni sa'a tajna nduchi da. Kajnu'un ni maa da chi ja ña'nú da, ti na kani maa da jnu'un —ni ka kachi da.

**22** Sia'an ni ka ka'an tata da jiin nana da, chi ni ka yu'u da nde'e da chaa hebreo ka kuña'nú un. Chi vanua ka ndajnu'un chaa un ja nu nau iin iin yivi na kachi ja Jesú Cristo, ya ni taji Yandios jiin jniñu ña'nú, ti keni'in da yivi un, ti tukaa kuu ndivi i ini veñu'un ka'nú yivi hebreo. **23** Ja yukan kuu ja sia'an ni ka kachi tata da jiin nana da:

—Kajnu'un maa ni da naa, chi ja ña'nú da —ni ka kachi da.

**24** Ni ka kana tuku chaa hebreo ka kuña'nú un, chaa ni iyo kuaa un, ti ni ka kachi da jiin da:

—Nakuanta'u nuu maa Yandios, ti koto kua'a ra ja yifu'un chaa nani Jesú yukan, chi ka jini ri ja maa da kuu iin chaa nchakuachi —ni ka kachi da.

**25** Ti ni kachi chaa un:

—Tu jini na nu iyo kuachi da xi tu, ko ja jini na kuu ja ni iyo kuaa nuu na, ti vijnna ja ni ndundijin va'a nduchi na —ni kachi da.

**26** Yukan ti ni ka jikajnu'un va'a da:

—¿Ndoo ni sa'a chaa un jiin ra nusa? ¿Nasa ni sa'a da tajna nduchi ra nusa? —ni ka kachi da.

**27** Ti ni kachi chaa un:

—Ja ni kachi na nuu ni naa ni, ti tu ka kuni ni kandixia ni, ¿nasa kuni ni ja na kachi tuku na inga jinu nusa? ¿Xi suni ka kuni kundikun ni maa da ja skua'a ni jiin da nu? —ni kachi da.

**28** Yukan ti ni ka keja'a ka nduxaan chaa un jiin da, ti ni ka kachi da:

—Ro'o, va yi'i ra jiin chaa un nusa. Ko ru'u, chi ka yi'i ri jiin tata ri Moisés naa ri. **29** Ka jini ndaa ri ja ni ka'an maa Yandios jiin Moisés, ko chaa yukan, tu ka jini ri na ichi vaji da —ni ka kachi da.

**30** Ti ni kachi chaa ni iyo kuaa un:

—Naa ini na ja tu ka jini ni nanu vaji chaa un, ko ni sa'a da tajna nduchi na. **31** Ka jini yo ja tu siuku Yandios nava ka jikanta'u yivi ka iyo kuachi. Ko siuku ya nava ka jikanta'u yivi ka nchañu'un ya, ti ka sa'a i nava kuni maa ya.

**32** Undi ni jankoo ñuyivi, ti undi vijnna, tu ka jini yo iin yivi sa'a tajna nduchi iin yivi ni kaku kuaa. Ni iin. **33** Ti nu ansu nuu maa Yandios vaji chaa yukan, va ni tu kuu kuiti sa'a da iin jniñu sia'an —ni kachi da.

**34** Ti ni ka kachi chaa un naa da:

—Ro'o chi iyo xaan kuachi ra undi kivi ni kaku ra. Nusa ti tu chunso'o kuiti ri ni iin jnu'un ja kuni ra xndaku ra —ni ka kachi da.

Yukan na ti ni ka keni'in da chaa un kua'an da füera.

### *Jikajnu'un Jesú nu kandixia chaa ni ku'u un maa ya, xi tuu*

**35** Ni jini Jesú ja sia'an ni ka keni'in da chaa nda'u un, ti ni jan nunduku ya maa da. Nu ni ndejna'an ya jiin da, ti ni jikajnu'un ya maa da:

—¿Kandixia ra maa Se'e Yivi Ñuyivi ja'a nu? —ni kachi ya.

**36** Ti ni kachi da:

—Taa, ¿ko nau chaa kuu chaa yukan? Xna'an ni chaa un ti'li saña, ti na kandixia na da —ni kachi da.

**37** Ti ni kachi Jesú jiin da:

—Ja ni jini ra maa da, ti chaa un kuu chaa ka'an jiin ra ja'a vijna —ni kachi ya.

<sup>38</sup> Yukan na ti ni jakunjiti da nuu ya ja nachiñu'un da ya, ti ni kachi da:

—Kandixia na n'i'in, Jito'yo —ni kachi da.

<sup>39</sup> Ti ni kachi Jesús:

—Vají ri nuu ñuyiví ja'a ja xndichi ri kuachi yiví naa i. Yiví ja tu ka jini kuiti, na sa'a ri ja na ndundijin undi inijnuni i. Ti yiví ka ndo'o ini ja ka jini ndaa kuiti i, na sa'a ri ja tukaa chaku kuiti ini i naa i —ni kachi ya.

<sup>40</sup> Suni ka'iin tijní chaa fariseo yajni nuu kandichi Jesús yukan. Nu ni ka jiniso'o da ja ni kachi ya sia'an, ti ni ka jikajnu'un da ya:

—¿Kachi ra ja suni ru'u, tu ka jini kuiti ri naa ri nusa? —ni ka kachi da.

<sup>41</sup> Ti ni kachi Jesús jiin da:

—Nu sia'an ti tu ka jini kuiti ra, va tu koo kuachi siki ra. Ko tu ka ka'an ra sia'an. Chi su'va ka ka'an ra ja ka jini ndaa kuiti ra. Yukan kuu ja ka nchakuachi ga siki ra naa ra, ti tukaa kuiti iyo jnuka'nú ini —ni kachi Jesús.

### *Jnu'un ka'an siki rii*

## 10

<sup>1</sup> Siin Jesús ka'an ya, ti ni kachi ya:

—Na kachi ndaa ri nuu ra naa ra, ja iin chaa kanda sava'ni ga yu'u nda'a jaku rii ti kivi xe'e da, chaa un kuu iin ñakui'na. <sup>2</sup> Ko maa chaa xiin rii un chi kivi ndaa da ichi yu'u jaku ti. Ti chaa yukan kuu maa chaa nchaka rii un. <sup>3</sup> Chaa ndito rii un kuiña da yu'u jaku rii, ti kivi maa chaa xiin rii un. Kana da xini ti, ti kuiti un ka nakuni ti ndusu yu'u da, kekoyo ti ki'in ti, ti tu kusiin ti kinkoyo ti.

<sup>4</sup> Nu ni ndi'i rii da ni keni'in da, nastutu da ti ti kinkoyo tutu ti jiin da, chi ka ñunuun ti ja maa da kuu jito'o ti. <sup>5</sup> Ti tu kaka tutu ti jiin inga yivi, chi vanua tu ka nakuni ti ndusu yivi un, ti su'va kuichanuu ti kinkoyo ti, chi ansu maa jito'o ti kuu —ni kachi Jesús.

<sup>6</sup> Sia'an ni ka'an Jesús jiin yivi un, ko tu ni ka chaku ini i nasa kuni ka'an ya jiin jnu'un un.

### *Jesús kuu maa jito'o*

<sup>7</sup> Ti yukan ni xndaku Jesús sia'an

—Ja'a na kachi ndaa ri nuu ra naa ra. Maa ri kuu nanu yu'u jaku nuu kivikoyo rii un. <sup>8</sup> Na ti chaa ga ru'u, ni ka kii chaa ni ka kuni nastutu yivi ri. Chaa un ni ka kuu da iin ñakui'na, chi ni ka xnda'u da yivi naa i. Ti yivi ka kuu nanu rii un, tu ni ka sa'a i nanu nuu chaa un. <sup>9</sup> Ru'u, kuu ri nanu iin yu'u jaku nuu kivikoyo rii un. Taka yivi kivikoyo i yux'e un, nu na kandixia i ru'u, yukan na ti kendo ndaa i nuu Yandios. Koto va'a ri yivi un nuu kunchuku i, ti koo taka ja nandi'i i. Sia'an kuu ri nanu iin yux'e ja kuu yivi kivikoyo nuu Yandios.

<sup>10</sup> Sa'a yo nanu. Chaa ka xndoña'an un, ka kuu da nanu iin ñakui'na, chi jaa da nuu ka'iin rii un, sakui'na da ti, ka'ní da ti ti xnaa da ti. Ko ru'u, tu sa'a ri sia'an. Chi su'va, vaji ri na nakana ri yivi ja na ndivikoyo i nda'a Yandios, ti ka kusii ini i, chi ka jíka i ichi maa ya nuu ñuyiví ja'a. Ti sia'an kunchuku i jiin ya ja kuu saa ni.

<sup>11</sup> Maa ri kuu nanu iin chaa xiin rii un, ja jito va'a da rii da. Nu ni jini da ja iyo iin nundo'o xaan nuu rii da, ti yachi nduku da nuu kuu nasa nama da ti. Ti vasu na kuu da, ko nama da rii da. <sup>12</sup> Ko iin chaa sa'a jniñu ja kin ya'u da, nu ni jini da ja kuan kuyajni iin va'u nuu rii da, xndoo da rii un, ti ja'a da corri kua'an da, chi vanua ansu rii maa da kuu kuiti ndito da un. Ti va'u un

kivi ti ma'ñu rii un, ti kachanuu ti rii un kinkoyo. <sup>13</sup> Sia'an ka sa'a chaa ka kuu muzu, chi ka sa'a da jniñu, ko so ja na ni'in da xu'un ya'u da, ti ansu ja koto va'a da rii un.

<sup>14</sup> Ko ru'u, kuu ri nanu iin chaa va'a ja jito va'a da rii da. Jini ndaa ri nau ndi'i ka kuu yivi ri, ti maa i ka nakuni va'a i ru'u. <sup>15</sup> Suni sia'an maa Tata ri, chi mani xaan ya jiin ri, ti maa ri, jini va'a ri nuu maa ya.

Nanu kuu iin chaa va'a ja nama da rii da, suni sia'an kuu ru'u ja nama ri siki yivi yi'i jiin ri, chi kuu ri ja kuu maa i naa i.

<sup>16</sup> Ti suni ka iyo yivi inga nación ja kivikoyo i nda'a ri, vasu tuja'i natu'va i ru'u. Ko jaa iin kivi ti nastutu ri yivi un. Tendi'i i natu'va ru'u, ti kuandatu i nuu ri. Tendi'i yivi un najna'an i, ti koo iin ni chaa kinda'a maa i naa i.

<sup>17</sup> Yukan kuu ja kunda'u xaan ini Tata ri ru'u, chi tava ini ri kuū ri ja na nama ri yivi ri naa i. Ti kuū ri, ko nandoto tuku ri. <sup>18</sup> Ni iin chaa ka ndiso jniñu, tu kuu ka'nii da ru'u nu tu kuu ini maa ri. Chi kuū ri, ko ja kuu ini maa ri ti kuū ri. Iyo iin jniñu ndiso ri, ja yukan kuu ja maa ri na kua'a jnu'un ja kuū ri. Ti jniñu ndiso ri, yukan kuu ja sa'a ja na nandoto tuku ri, chí sia'an ni ta'u maa Tata ri jniñu —ni kachi Jesúus nuu yivi un.

<sup>19</sup> Ja sia'an ni ka'an Jesúus, ti ni ka kusiin tuku ini chaa hebreo un naa da.

<sup>20</sup> Kua'a yivi un ni ka kachi:

—Jna'an da iin tachi xaan, yukan kuu ja ni nduku'u xini da. Koto ma nde'e ga ra nuu da —ni ka kachi i.

<sup>21</sup> Ko sava ga i ni ka ka'an:

—Ansu sia'an ka'an iin chaa jna'an tachi xaan. Chi nu jna'an da tachi xaan, ti va ni tu kuu sa'a da tajna nduchi iin chaa ni kaku kuaa —ni ka kachi i.

### Ka kuni yivi kua'a i yuu siki Jesúus

<sup>22</sup> Na iin viko ñuu, ni ka nasa'a yivi ñuu Jerusalén iin viko ja ka nuku'un ini i kivi ni kuu ii veñu'un ka'nu un. <sup>23</sup> Ti yukan jikonuu Jesúus yux'e'le veñu'un un, nuu nani yux'e'le Salomón. <sup>24</sup> Yukan ni ka nataka chaa ka kuña'nu un, ti ni ka kachi da:

—¿Nasa ga ti sa ka'an kaji ra nuu ri naa ri nusa? Nu jandaa kuu ja maa ra kuu Cristo, ni taji Yandios ja sa'a jniñu ña'nu. Nu jandaa kuu ti kachi kaji nuu ri naa ri vinañu'ni —ni ka kachi da.

<sup>25</sup> Ti ni kachi Jesúus:

—Ja ni kachi ri nuu ra, ko tu ka kandixia ra naa ra. Ja ni ka jini ra jniñu ña'nu ni sa'a ri. Ni sa'a ri taka un, chi maa Tata ri ni ja'a jniñu un nuu ri. Ti jiin yukan xna'an kaji ya ja maa ya ni taji ru'u vají ri, ti sia'an sa na kuni ra naa ri kuu ri. <sup>26</sup> Tu ka kandixia ra ru'u, vanuxia tu ka yi'i ra jiin ri. Tu ka kuu ra nanu ka kuu rii ja ka ñunuun ti nuu maa chaa ndito ti un.

<sup>27</sup> Ko yivi ka yi'i jiin ri, ka nakuni i ru'u, ti ru'u nakuni ri maa i. Ti nanu ka nukunuun rii un tachi maa jito'o ti, suni sia'an ka nakuni yivi naa i jnu'un ka'an ri, ti ka natu'va i ru'u. <sup>28</sup> Ti kua'a ri nuu kunchuku i jiin ri ja kuu saa ni. Ti tukaa naa kuiti i, ti ni tundo kuisonchaa i nuu nda'a ri.

<sup>29</sup> Maa Tata ri ni nachi'i yivi un nda'a ri. Ti maa ya kuu ja kuña'nu ga ja kuu nuu taka ga. Ti ni iin tu kuu kencha ja yinda'a maa ya. <sup>30</sup> Ru'u jiin Tata ri, iin ni ga yivi ka kuu ri naa ri —ni kachi Jesúus.

<sup>31</sup> Ti yukan ni ka kani'in chaa un yuu ja kua'a da siki Jesúus niku. <sup>32</sup> Ti ni kachi Jesúus jiin da naa da:

—Maa Tata ri ni ja'a ya jnu'un ndee ini ru'u, ti ni sa'a ri kua'a jniñu va'a ja kuu ro'o naa ra. ¿Va nu xi kua'a ra yuu siki ri ja ni sa'a ri yukan nu? —ni kachi ya.

<sup>33</sup> Yukan ti ni ka kachi chaa hebreo ka kuña'nu un:

—Ansu ja ni sa'a ra jniñu ña'nu un kuu ja kua'a ri yuu siki ra, chi siki ja ni ka'an ndeva'a ra siki Yandios kuu. Chi maa ra ka'an ja iin ni kuu ra jiin maa Yandios. Vasu suni iin chaa sia'an ni kuu ra, ti ka'an ra ja iin nuu ra jiin Yandios —ni ka kachi da.

<sup>34</sup> Ti ni kachi Jesús nuu da naa da:

—Yoso nuu tutu Yandios ka ñava'a ra, nuu ka'an ya sia'an: "Yandios ka kuu ro'o naa ra", ni kachi ya. <sup>35</sup> Sia'an ni kachi Yandios ja yivi ni ka ka'an jnu'un ya, ni ka kuu i nanu Yandios. Sia'an ti tu kuu ka'an yo siki tutu Yandios ja tu ka'an ndaa. <sup>36</sup> Ko ro'o naa ra, ka ka'an ra ja ka'an ndeva'a ri siki Yandios, so ja ni kachi ri ja kuu ri Se'e maa ya. Sia'an ka ka'an tu ro'o naa ra. Ko vasu maa ya ni ja'a iin jniñu nuu ri, ti ni taji ya ru'u vaji ri nuu ñuyivi ja'a.

<sup>37</sup> Ti nu tu sa'a ri nava kuni maa Tata ri, ti tu kanuu kuu ja kandixia ra ru'u. <sup>38</sup> Ko nu na sa'a ri nava kuni maa ya, ti suni kanuu kuu ja kandixia ra ru'u. Ko kandixia taka jniñu sa'a ri. Yukan na ti sa kuni ndaa ra ja kancha maa Tata ri jiin ri, ti maa ri suni kancha ri jiin maa ya, ti kivi undi inijnuni ra ja jandaa ndixia kuu un —ni kachi Jesús.

<sup>39</sup> Yukan ti ka kuni tuku da jniñi da ya, ko ni kenda ya ti kua'an ya.

<sup>40</sup> Yukan na ti kuano'on Jesús. Ni naya'a ya undi inga yu'u yucha Jordán, ichi nuu kaña ndikandii, nuu ni skuanducha Juan undi nuu yukan, ti yukan ni kundee ya tijni kivi. <sup>41</sup> Kua'a yivi ni ka kendo jiin ya, ti sava i ka ndajnu'un sia'an:

—Tu ni sa'a Juan jniñu ña'nu nanu sa'a chaa ja'a vijna, ko taká jnu'un ni ka'an da ja sa'a chaa ja'a, ti kundixia nava ni kachi da —ni ka kachi yivi un naa i.

<sup>42</sup> Ti kua'a yivi yukan ni ka kandixia i Jesús.

### Ni nandoto Lázaro

## 11

<sup>1</sup> Ni kuncha iin chaa ñuu Betania ja ni nani Lázaro, ni kuu da kua'a María jiin Marta. Ti ni ku'u xaan da. <sup>2</sup> María un kuu ña ni chi'i aceite perfume ja'a Jito'yo, ti ni nasichi ña jiin ixi xini ña. <sup>3</sup> Ti ña'an un ni ka taji razón nuu Jesús, ja kachi:

—Taa, chaa mani xaan ni jiin, ku'u da vijna, ni kachi ña —kachi muzu un.

<sup>4</sup> Ni jini Jesús jnu'un un, ti ni kachi ya:

—Ku'u da ko va tu kuu da. Ku'u da chi sia'an ti sa kuni yivi nasa kuña'nu ya ni taji ru'u, maa Se'e Yandios. Jiin kue'e ja'a ti stuu ri ja suni kuña'nu ri —ni kachi ya.

<sup>5</sup> Mani Jesús jiin Marta, jiin ku'u ña, jiin Lázaro. <sup>6</sup> Ti vasu sia'an, ko ni kendo ya uu ga kivi nuu kancha ya na ni ni'in ya jnu'un ja ku'u da. <sup>7</sup> Yukan ti sa ni ka'an ya jiin chaa ka skua'a jiin ya:

—Ña'an na cho'o, chi nandeokuñi yo ñuu Judea —ni kachi ya.

<sup>8</sup> Chaa ni ka skua'a jiin ya ni ka kachi da:

—Maestro, ja jini ni ja yivi hebreo un ka kuni kua'a i yuu siki ni na ni kunde ni yukan, ti va kua'a yivi un yuu siki ni nu na jaa tuku ni yukan. ¿Ti kuni ki'in tuku ni yukan nu? —ni ka kachi da.

<sup>9</sup> Ti ni kachi Jesús nuu da naa da:

—Iyo uxi uu hora iin kivi ja na kuni ndaa yo na ichi ki'in yo. Ti nu sa'a yo nanu ka sa'a yivi ka jikonuu nduu, ja sa'a yo jniñu va'a, ti tu naa yo, chi ka jini ndaa yo na ichi ki'in yo.

<sup>10</sup> Ko nu sa'a yo nanu ka sa'a yivi ka jikonuu nuu ñaa kuiti ja sa'a yo jniñu ndeva'a, yukan na ti naa yo, chi'tu jini ndaa yo na ichi ki'in yo —ni kachi ya.

<sup>11</sup> Nu ni ndi'i ni ka'an ya sia'an, ti ni kachi ya:

—Amigo yo Lázaro ja ni kixi da, ti ki'in ri ja na naxndoto ri da —ni kachi ya.

<sup>12</sup> Yukan ti ni ka ka'an chaa ka skua'a jiin ya:

—Taa, nu kixi da, ti ni jini yo ja nduva'a da —ni ka kachi da.

<sup>13</sup> Ko so sia'an ni ka'an Jesús jiin da, chi ja ni ji'i Lázaro. Ko ka jani ini chaa ka skua'a jiin ya ja so kixi ndixia da.

<sup>14</sup> Ti sa ni kachi ndaa Jesús:

—Ja ni ji'i Lázaro. <sup>15</sup> Ti kusii imi ri ja tu ni kuncha ri yukan, chi sia'an na ti kandixia va'a ra ru'u. Ña'an na cho'o nde'e ndiyi un —ni kachi ya.

<sup>16</sup> Yukan ti Tomás, chaa nani kuati un, ni ka'an da jiin uu ga chaa ka skua'a jiin ya:

—Suni na cho'o tu yo'o, nava na kuu yo jiin da —ni kachi da.

<sup>17</sup> Yukan ti ni jaa Jesús ñuu Betania. Ko ni ka jani yivi jnu'un nuu ya ja ja ni ya'a kuun kivi ja ñunduji Lázaro.

<sup>18</sup> Ñuu un kendo yajni jiin ñuu Jerusalén, jika uu kilómetro sava. <sup>19</sup> Ti kua'a jna'an yivi hebreo ni ka kenda nuu kanchuku Marta jiin María ja ka'an ndee jiin jna'an ña, ja sia'an ni ji'i kua'a ña. <sup>20</sup> Yukan ti nu ni ni'in Marta jnu'un ja vaji Jesús, ti ni kee ña kuan nujna'an ña ya. Ti María ni kendo ña ve'e. <sup>21</sup> Ni kachi Marta jiin Jesús:

—Taa, sa ti ni kuncha ni ja'a ti va tu kuu kua'a na niku. <sup>22</sup> Ti vasu sia'an ko jini na ja taka ndo na kakan ni nuu Yandios, ti sa'a ya —ni kachi ña.

<sup>23</sup> Ti ni kachi Jesús:

—Na ndoto kua'a ra —ni kachi ya.

<sup>24</sup> Ti ni kachi Marta:

—Jini na ja nandoto da kivi na nandoto taká ndiyi, undi kivi ka'nu ga ja sa'a ndaa Yandios yivi ñuyivi —ni kachi ña.

<sup>25</sup> Ti ni kachi Jesús jiin ña:

—Ru'u kuu ja naxndoto yivi ja na kuchaku i jiin Yandios. Nu kandixia i ru'u, ti vasu na kuu i ko nandoto i ja kuncha i jiin Yandios. <sup>26</sup> Yivi chaku ti nu kandixia i ru'u, jankivi ga kuu i, chi kuchaku i ja kuu saa ni. Ti ro'o Marta, ¿kandixia ra jnu'un ja'a nu? —ni kachi ya.

<sup>27</sup> Ti ni ka'an Marta:

—Kandixia na, taa. Kandixia na ja maa ni kuu Cristo. Maa ni kuu Se'e Yandios, ja ni taji ya nuu ñuyivi ja'a —ni kachi ña.

<sup>28</sup> Sia'an ni ka'an Marta ti kua'an ña. Kuan kana xe'e ña ku'u ña. Ni kachi ña jiin ña:

—Maa maestro ni chaa, ti kana ya ro'o —ni kachi ña.

<sup>29</sup> Sia'an ni kachi ña ti yachi ni ndokuiñi María ti kua'an ni ña nuu ya.

<sup>30</sup> Ti changa ga kivi Jesús ñuu un, chi ni kendo ya nu ni janujna'an Marta ya.

<sup>31</sup> Jna'an ña hebreo ja kanchuku ini ve'e jiin María, ja ka ja'a i jnu'un ndee ini maa ña. Ni ka jini i ja ni ndokuiñi yachi ña kua'an ña. Ni ka chindikun i ña, chi ka ndo'o ini i ja kua'an ña nuu ñaÑa ndiyi un kua'an nde'e ña. <sup>32</sup> Yukan ti ni jaa María nuu Jesús. Nu ni jini ña nuu ya, ti ni jakunjiti ña nuu ya. Ti ni kachi ña:

—Taa, sa ti ni kuncha ni ja'a ti va tu kuu kua'a na niku —ni kachi ña.

<sup>33</sup> Ni jini Jesús ja nde'e xaan ña jiin ja ka nde'e xaan yivi hebreo un. Ja yukan ti so ni jaka'nu ini ya, chi ni kunda'u xaan ini ya nuu i.

<sup>34</sup> Ni jikajnu'un ya maa ña:

—¿Nanu ni chunduji ra da nusa? —ni kachi ya.

—Cho'o ti kuni ni, taa —ni kachi ña.

<sup>35</sup> Nu ni jini Jesús yukan ni kukui'ya ini ya, ti ni nde'e ya.

**36** Ti yivi hebreo un ni ka ka'an jiin jna'an i:

—Jandaa ndixia kuu ja mani xaan ni iyo da jiin ndiyi un, chi suni kukui'ya ini da —ni ka kachi i.

**37** Ko sava i ni ka kachi:

—Ni sa'a da tajna chaa ni kaku kuaa un. Ti va suni kuu sa'a da ja tu kuu Lázaro niku —ni ka kachi i.

**38** Ti ni ndukui'ya tuku ini Jesús nu ni jaa ya nuu ñunduji Lázaro. Hin yau kava kuu, ti yukan ndi'yu iin yuu ka'nu.

**39** Ni kachi Jesús nuu da naa da:

—Chajijo yuu un naa ra —ni kachi ya.

Marta, kua'a ndiyi yukan, ni kachi ña:

—Taa, va ja ni kuxiko xaan da, chi ja iyo kuun kivi ja ni ji'i da —ni kachi ña.

**40** Ko ni kachi Jesús jiin ña:

—Ni kachi ri ja nu kandixia ra, ti kuni ra ja kuña'nu xaan Yandios jiin jniñu sa'a ya —ni kachi ya.

**41** Yukan ti ni ka chajijo da yuu ndi'yu yu'u yau ndiyi un. Ti Jesús ni ndakoto ya ichi andiví, ti ni kachi ya:

—Tata na, nakuanta'u na nuu ni ja ni jiniso'o ni jnu'un ka'an na. **42** Ja jini na ja niní chunso'o ni jnu'un ka'an na, ko ni kachi na sia'an, chi kuni ka'an na jnu'un ndaa nuu yivi ka'iin ja'a, ti nava sia'an na kandixia i ja maa ni ni taji saña vaji na jiin jniñu ja'a —ni kachi Jesús.

**43** Ni ndi'i ni jikanta'u ya, ti ni kanajin ko'o ya sia'an:

—¡Lázaro! ¡Ña'an ti kenda! —ni kachi ya.

**44** Ti ni kenda Lázaro. Suku da sa'ma ndiyi. Ndikun sa'ma nda'a da jiin si'in da, ti suni suku iin sa'ma nuu da. Yukan ti ni kachi Jesús nuu yivi un:

—¡Ndaji da naa ra! Ti sia ra da na ki'in da —ni kachi ya.

*Ka ndajnu'un chaa hebreo ka kuña'nu un nasa jnii da presu Jesús  
(Mt. 26.1-5; Mr. 14.1-2; Lc. 22.1-2)*

**45** Yivi hebreo ja ni ka ja'an ve'e María, ni ka jini i jniñu ni sa'a Jesús, ti kua'a i ni ka kandixia ya. **46** Ko sava yivi un kua'an i nuu ka ndututu chaa fariseo, ti ni ka jani i jnu'un jniñu ni sa'a Jesús. **47** Yukan ti ni kachi sutu kuña'nu ga un nuu chaa fariseo un naa da ja na ndututu taka chaa ka yí'i jiin junta ka'nú nuu nación Israel. Nu ni ka ndututu da, ti ni keja'a ka ndajnu'un da:

—¿Ndoo sa'a yo vijnna? Chi Jesús yukan, kua'a jniñu ña'nu sa'a da. **48** Nu tu kasí yo yu'u da, ti va ndi'i yivi kandixia i, ti kundikun i maa da. Jiin jnu'un ka'an da un ti chaa soldado ñuu Roma, ti xnaa da veñu'un ka'nú yo. Ka'ní da yo'o jiin yivi ñuu yo. Yukan ti koo nundo'o siki yo nu tu nakutu yachi ini yo nasa sa'a yo jiin chaa un —ni ka kachi da.

**49** Ti kancha Caifás yukan, ja kuu da iin sutu kuña'nu ga kuiya un, ti ni kachi da:

—Tu ka jini kuiti ra nasa sa'a ra naa ra. **50** Va nu tu ka jini ra ja va'a ga ja iin chaa na kuu ja kuu nuu ni ñuu, ti ansu ja kuu tendi'i kuiti yo naa yo. Va'a ga ja na kuu Jesús nava na nama yo maa yo jiin yivi ñuu yo —ni kachi da.

**51** Maa da kuu sutu kuña'nu ga kuiya yukan. Ko tu jini da ja ansu siki maa da ni ka'an da ja kachi da ja na kuu Jesús nava na keta'u yivi ni ñuu hebreo.

**52** Ko ansu siki maa iin ni yivi hebreo kuu ya. Chi kuu ya ja kuu ni ka'nú yivi ñuyivi, nava sia'an na ti nastutu ndi'i ya yivi ni ka kandixia Yandios, ti na nduu i iin ni ga yivi nuu ya, vasu jika xaan ni ka jichanuu i nuu kanchuku i nuu ñuyivi ja'a. **53** Ja sia'an kuu ja undi kivi jña, chaa hebreo ka kuna'nu un ni ka keja'a ka nduku da nasa ka'ní da Jesús. **54** Ja yukan tukaa ni jikonuu Jesús nuu ka'lín chaa ka kuña'nu un, chi ni kee ya ñuu Judea, ti kua'an ya iin ñuu

nani Efraín, nu iyo yajni ñuu'un te'e un. Yukan ni kendo ya jiin chaa ka skua'a jiin ya.

<sup>55</sup> Kuan kuyajni kivi viko pascua ka nasa'a yivi hebreo un, ja ka nuku'un ini i kivi na ni nama Yandios maa i ñuu Egipto na jana'an. Ja yukan kua'a yivi ni ka jakoyo yachi ja ka nasandoo i maa i, ti na ndu ii yi nuu Yandios naa i.

<sup>56</sup> Ti ka nanduku i Jesús ñuu Jerusalén yukan, ko tu ni ka nani'in i ya. Ni ka jakoyo i veñu'un ka'nun un, ti ni keja'a ka ndajnu'un i jiin jna'an i:

—¿Ndoo ndo'o ini ra? ¿Kii chaa un viko ja'a vijnal xi tuu nu? —ni ka kachi i.

<sup>57</sup> Ti sutu ka kuña'nu jiin chaa fariseo un, ni ka taji da jnu'un, ja nu ni ka jini yivi nuu kande Jesús, ti na kaxnu'u ni nuu da, nava na jnii da presu Jesús, ni ka kachi da naa da.

*Jin ña'an ni chi'i aceite perfume ja'a Jesús*  
(Mt. 26.6-13; Mr. 14.3-9)

## 12

<sup>1</sup> Kumaní iñu ga kivi ja keja'a viko pascua, ti ni jaa Jesús ñuu Betánia, nuu kancha Lázaro, chaa ni naxndoto ya nuu ñuji'i. <sup>2</sup> Nu ni jaa Jesús ti ni ka sa'a iin viko lulu ja kuu maa ya. Marta ni sava'a ja kuu viko un. Ti Lázaro kancha da nuu mesa jiin Jesús.

<sup>3</sup> Suni kancha María yukan. Ti ja iyo tu'va ña sava litro aceite perfume, mani maa nardo, ja nchaa ya'u xaan tonto, ti ni chi'i ña sikí ja'a Jesús. Ti na nasichi ña jiin ixi xini ña. Ti ni chitu xiko vixi ini ve'e jiin xiko perfume un.

<sup>4</sup> Ti Judas, chaa ñuu Cariote, suni kancha da un, chi suni ni skua'a da jiin Jesús. Ko so ja maa da kuu iin ja kin nukua'a Jesús nuu chaa ka jito u'u ya. <sup>5</sup> Ti ni kachi da:

—¿Ndoo tu ni xiko ña aceite perfume un? Ti i ni'in ña uni ciento xu'un plata ja chindée ña yivi nda'u nikú —ni kachi da.

<sup>6</sup> Sia'an ni kachi da, ko ansu ja kunda'u ini da yivi nda'u, chi vanuxia kuu da iin chaa kui'na. Ti maa da kuu ja ndiso xu'un ja kuu nuu ndaja'a Jesús, ti tava da xu'un ja ka ja'a yivi naa i. <sup>7</sup> Yukan ti ni kachi Jesús:

—Sia na sa'a maa ña, chi ja satu'va ña ru'u ja kuu kivi jakunduji ri. <sup>8</sup> Ko yivi nda'u un naa i, chi sia'an ni kunchuku i jiin ra, ko ru'u chi ansu sia'an ni kuncha ri jiin ra naa ra —ni kachi Jesús.

<sup>9</sup> Kua'a yivi hebreo ni ka ni'in yi jnu'un ja kande Jesús ñuu Betania, ti ni ka kee i kuankoyo i yukan, kuande'e i ya. Ko ansu nini Jesús kuan nde'e da naa da, chi suni kuan nde'e da Lázaro, chaa ni naxndoto Jesús nuu ñuji'i. <sup>10</sup> Ti sutu ka kuña'nu un, suni ni ka ndo'o ini da ja ka'ní da Lázaro. <sup>11</sup> Chi kua'a xaan yivi hebreo un ni ka jini i nava ni kuu jiin Lázaro, ni ka kusih i jiin sutu un, ti ni keja'a ka kandixia i Jesús. Ni ka kandixia i Jesús chi ni ka jini i jniñu ña'nú ni sa'a ya jiin Lázaro.

*Ni kivi Jesús ñuu Jerusalén*  
(Mt. 21.1-11; Mr. 11.1-11; Lc. 19.28-40)

<sup>12</sup> Kua'a yivi ka kuchitu ñuu Jerusalén, chi ni ka jakoyo i ja kuu viko pascua. Ínga kivi, ti ni ka ni'in yi jnu'un ja chaa Jesús ñuu Jerusalén. <sup>13</sup> Ni ka kenda i ti kuan nujna'an i ya jiin nda'a yuku ñuu. Ti ni keja'a ka kanajaa i:

—Ña'nú na koo maa ya ja ni taji Yandios ja vají ya. Vají ya jiin jniñu maa Jito'yo Yandios. Na ta'u ya jniñu nuu ni tu'u yivi ñuu Israel —ni ka kachi i.

<sup>14</sup> Ni ni'in Jesús iin burru lulu, ti ni yoso ya ti nava ni kachi tutu ii Yandios ja ni ka'an ja'a Jesús:

<sup>15</sup> Ro'o, yivi ja kanchuku nuu ñuu'un ñuu Sión, koto ma yu'u ra.

Maa ya ja kii ta'u jniñu nuu ra, ja vaji ya,  
ti yoso ya iin burru.  
Kachi tutu.

<sup>16</sup> Kivi un tu ni ka chaku ini chaa ni ka skua'a jiin Jesús ja nasa kuni ka'an tutu ii Yandios, ja sia'an kii Jesús nuu ñuu Jerusalén. Ko nu ni nandoto tuku Jesús nuu ñuji'i, ti sa ni ka nuku'un ini da. Ni keja'a ka nuku'un ini da ja ni kachi tutu Yandios ja sia'an koo, ti sia'an ni kundaa ndixia nava ni jna'an ya.

<sup>17</sup> Yukan ka'iin yivi ni ka jan nde'e na ni naxndoto ya Lázaro, ti ka jani i jnu'un ja ni ka jini i nu ni ñunduji da, ti suni ni ka jini i nasa ni kana ya xini da hora ni nandoto da. <sup>18</sup> Ja yukan kuu ja kuankoyo i kuan nujna'an i Jesús, vanuxia ja ni ka jiniso'o i ja ni sa'a ya jniñu ña'nu un.

<sup>19</sup> Ko chaa fariseo un, ni ka keja'a ka ndajnu'un da naa da:

—Ja ni ka jini yo ja tukaa ga ndo kuu sa'a yo vijna na. Chi ja ni ndi kuiti yivi kuankoyo i jin chaa un —ni ka kachi da.

### *Yivi ñuu Grecia ka nanduku i Jesús*

<sup>20</sup> Suni ni iyo yivi ñuu Grecia ja ni ka jakoyo i ñuu Jerusalén, chi kuan chiñu'un i kivi viko un. <sup>21</sup> Ni ka ndejna'an i jiin Felipe, iin ndaja'a Jesús ja kuu da chaa ñuu Betsaida, ja kuu iin ndañuu Galilea. Ti ni ka kachi i:

—Taa, ka kuni ka'an na jin Jesús —ni ka kachi i.

<sup>22</sup> Ni ja'an Felipe, ni kaxnu'un da nuu Andrés. Ti ndiinduu da sia'an kuan kaxnu'un nuu Jesús. <sup>23</sup> Yukan ti ni kachi ya nuu da naa da:

—Ja ni jaa kivi ja kuu Se'e Yivi Ñuyivi, nava na kuni yivi naa i ja nduña'nu ri sa'a Yandios. <sup>24</sup> Yukan kuu ja na kachi ndaa ri nuu ra nasa kuu jin iin ni triu. Chi jini yo ja nu tu kanakava triu un nuu ñu'un ti ndi'yu siki, ni tu ndoto kuiti. Ti sa'a yo nanu ja ni ji'i triu un. Chi nani kaa ni kaa triu un. Ko nu na kanakava triu un chii ñu'un, yukan na ti nandoto ti nakaya kua'a xaan.

<sup>25</sup> Suni sia'an kuu jin ro'o naa ra. Nu ndi'i kuu ini ra nasa ni'in ga ra ja kuñava'a ra nuu ñuyivi ja'a, ko na kachi ri ja jin yukon ti naa ra nuu Yandios. Ko nu su'va na sa'a ra nanu triu un, ja sa'a ra nanu ja tukaa ga chaku ra, yukan ti ni tukaa kundiyo ini ra ndajniñu iyo nuu ñuyivi ja'a. Nu siukan na sa'a ra ti kendo ndaa ra nuu Yandios, chi nakutu ini ra ja kuu nuu maa ya. Sia'an na ti kuncha ra jin ya ja kuu saa ni. <sup>26</sup> Ko nu kancha ra ñuyivi ja'a ti sa'a ra jniñu ja kuu maa ri, ti siuku ndaa ra jniñu ri. Nu sia'an sa'a ra, ti kuncha ra jin ri, chi sa'a ra jniñu ja kuu nuu maa ri. Nu sajniñu ra ja kuu ru'u, ti na sa'a Tata ri ja na nduña'nu ra —ni kachi Jesús.

### *Ni ka'an Jesús ja kuu ya*

<sup>27</sup> Siin Jesús ka'an ya ti ni kachi ya:

—Vijna ti ndi'i xaan ini ri ja undi nda'u kuu ini ri. Ti tu jini ri nasa ka'an ri jin Tata ri. Ko tu kachi ri ja na nama ya ru'u nuu nundo'o kii siki ri, chi ja siki jniñu yukan vaji ri. <sup>28</sup> Ko na kachi ri jin ya: “Tata na, vijna ti na ka'an yivi ja kuña'nu xaan ni” —ni kachi Jesús.

Yukan ti ichi andivi ni ka'an iin ndusu yu'u Yandios, ti ni kachi ya:

—Ja ni ka jini yivi ja kuña'nu xaan ri, ko na kuni tuku i ja kuña'nu xaan ndixia ri —ni kachi ya.

<sup>29</sup> Ti yivi ka'iin yukan ni ka jiniso'o da ndusu un, ti sava i ni ka kachi:

—Taja ni ka'an —kachi da.

Ko sava ga yivi un ni ka kachi:

—In ángel Yandios ni ka'an jin ya —ni ka kachi da.

<sup>30</sup> Yukan ti Jesús ni kachi ya nuu da naa da tuku:

—Ansu nuu ru'u ni ka'an Yandios jnu'un un, chi su'va, nuu ro'o naa ra ni ka'an ya nava na kuni ra ja ni ka'an ndixia ya jiin ri. <sup>31</sup> Ti na kachi ri nuu ra naa ra ja ja ni jaa kivi ja xndichi Yandios kuachi siki yivi ñuyivi ja'a. Ti iin ja ta'u jniñu nuu i kuxio ki'in iin. <sup>32</sup> Ko kivi na ndani'in yivi ru'u, yukan na ti sa'a ri ja na kandixia da sivi da naa da, ti nakuaka ri yi kunchuku da jiin ri —ni kachi ya.

<sup>33</sup> Jiin jnu'un un ni jani ya jnu'un nasa kuu ya. <sup>34</sup> Ti yivi un ni ka ka'an da jiin ya:

—Ka jini na ja tutu ii Yandios ni kachi ja kua'a Yandios jniñu nuu Cristo, ti kuchaku ya ja kuu saa ni. Nusa ti, ¿nasa kuu ja kuu Se'e Yivi Ñuyivi? ¿Nau kuu Se'e Yivi Ñuyivi un nusa? —ni ka kachi da.

<sup>35</sup> Yukan ni kachi Jesús nuu da:

—Maa iin ja kuu nanu ñu'un ndinchaa, kuncha jiin ra jaku ni ga kivi. Ja sia'an kuu ja kanuu ja na kaka ndaa ra, chi maa ñu'un ndijin un ndinchaa nuu ichi ra. Koto maa kivi ra nuu ichi ñuñaa un, chi sia'an na ti xnaa ra maa ra. Ko nu ka jikonuu ra nuu ñuñaa, ti tu ka jini kuiti ra na ichi ki'in ra. <sup>36</sup> Víjna ti maa iin ja kuu nanu ñu'un ndijin kancha jiin ra. Víjna ti kandixia maa ya naa ra, chi sia'an na ti nduu ra yivi ka jika nuu ichi ndaa —ni kachi ya.

Jnu'un yukan ni ka'an Jesús ti kua'an ya. Ni sa'u ya kua'an ya. Ti tukaa ga ni ka jini yivi naa da nachi kua'an ya.

### *Tu ni kandixia yivi hebreo Jesús*

<sup>37</sup> Yivi hebreo un ni ka jini da jniñu ña'nú ni sa'a Jesús, ko tu ni ka kandixia da ya. <sup>38</sup> Ja yukan ti ni kundaa jnu'un ni ka'an profeta Isaías na jana'an, chi ni kachi da nuu Yandios:

Jito'yo, tu iyo ni iin yivi ja kandixia ra jnu'un ni ka'an ri.

Ni tu ni kandixia ra ja sa'a ri jniñu ña'nú.

Ni kachi Isaías.

<sup>39</sup> Ja yukan tu ni kuu kandixia da, ti sia'an ni ka'an Isaías tuku:

<sup>40</sup> Tu ni ja'a Yandios ja na kujnuni ini da.

Ni sia ya maa da nava na nduni'in ga undi ini aña da.

Ka kuu da nanu yivi kuua ja tu ka jini da na ichi ki'in da, chi tu chaku kuiti ini da.

Ja yukan nu tukaa sia da jniñu ndeva'a un, ti ni tu nduva'a undi ini aña da.

Ni kachi Jesús, kachi tutu.

<sup>41</sup> Yukan ni kachi Isaías chi ni jini da ja kuña'nú xaan Jesús, ti ni jani da jnu'un siki nasa koo kivi kii ya.

<sup>42</sup> Vasu ni iyo kua'a ga yivi hebreo ja tu ni kandixia i Jesús, ko kua'a yivi ni keja'a ka kandixia da ya. Suni kua'a chaa ka kuña'nú ja ka ta'u jniñu nuu yivi hebreo un, ni ka keja'a ka kandixia da. Ko tu ni ka stuu da maa da ja ka'an da jnu'un ja ka kandixia da, chi ka yu'u da chaa fariseo. Chi sandau tukaa kua'a chaa un jnu'un ja kivi da ini veñu'un ka'nú un. <sup>43</sup> Sia'an ni ka sa'a chaa un, chi ni ka ndiyo xaan ini da ja na kua'a yivi ja yiñu'un nuu da, ti ansu ja na kua'a maa Yandios ja yiñu'un nuu da naa da.

### *Xndichi Jesús yivi naa da jiin jnu'un ka'an ya*

<sup>44</sup> Ni ka'an jaa Jesús, ti ni kachi ya:

—Yivi ja ka kandixia ru'u, ansu maa iin ni ru'u kandixia da, chi suni kandixia da undi maa Tata ri, ya ni taji ru'u. <sup>45</sup> Ti yivi jini nuu ri, suni ka jini da nuu maa ya ni taji ru'u.

<sup>46</sup> Kuu ri nanu iin ñu'un ja ndinchaa ñuyivi ja'a, ja na kuni yivi na ichi kaka da. Nu na kandixia da ru'u, ti tukaa ga ka jika da nanu yivi ka jikonuu nuu

ñuñaa, ja tu ka ni'in da na ichi ki'in da. <sup>47-48</sup> Ko nu tu kuni kandixia ra ru'u, ni tu kuni kuanta'u ra jnu'un ka'an ri. Ko iyo fin ja kankuachi siki ra ti sa'a ndaa ya kuachi ra. Chi kii kivi juicio ja sa'a ndaa ya siki ra, ti xndichi ya ro'o ndenu ni ka janta'u ra jnu'un ri xi tuu.

<sup>49</sup> Ko tu ka'an ri jnu'un ja'a ja kuu ini maa ni ri, chi Tata ri ni taji ru'u jiin jniñu ja'a. Ti maa ya kuu ja ni kachi nasa koo jnu'un ka'an ri nuu yivi ñuyivi ja'a. <sup>50</sup> Jini ndaa ri ja nu na sa'a ra nava kachi Yandios, ti kunchuku ra jiin ya ja kuu saa ni. Ja yukan kuu ja ka'an ri jnu'un ja'a nava ni kachi maa Tata ri nuu ri —ni kachi Jesús jiin yivi un naa da.

### Ni nakacha Jesús si'in ndaja'aya

## 13

<sup>1</sup> Kumani iin kivi ga ja keja'a viko pascua un. Ti jini Jesús ja, ja ni jaa kivi ja kee ya nuu ñuyivi ja'a ti kin no'on ya nuu Tata ya. Sia'an ja jini ya, kuu nda'u xaan ini ya taka yivi ni ka skua'a jiin ya. Vijna ti stuu kají ya ja kunda'u ini ya maa da naa da.

<sup>2</sup> Ko ja ni jini Jesús ja, ja ni kue'e ja'u'u un ini aña Judas, se'e Simón, chaa ñuu Cariote, ja nakua'a da Jesús nuu chaa ka jito u'u ya. <sup>3</sup> Suni jini Jesús ja maa Tata ya ni ja'a jniñu nuu ya ja yinda'a ya taka ja iyo. Jini ya ja vají ya nuu kancha Tata ya, ti jini ya ja nandeokuñi tuku ya nuu kancha Tata ya. Sia'an ni ndo'o ini ya kivi ni kuxini ya jiin chaa ka skua'a jiin ya.

<sup>4</sup> Ni ka kuxini da ti ni ndokuiñi Jesús. Ni chajiyó ya sa'ma ya, ti ni ki'in ya iin toalla. Ni ju'ní da chii ya. <sup>5</sup> Yukán ti ni chu'un ya nducha ini iin ti ja'an, ti ni keja'a nakacha ya ja'a ndaja'aya. Ti nasichi ya ja'a da jiin toalla nu'ní chii ya un.

<sup>6</sup> Ni jaa ya nuu kancha Simón Pedro, ti ni kachi Pedro jiin ya:

—Jito'yó, ¿va nu nakacha ni ja'a na xino? —ni kachi da.

<sup>7</sup> Ti ni kachi Jesús jiin da:

—Tu chaku ini ra ndoo sa'a ri vijna, ko jaa kivi ti ndi'i nuku'un ini ra —ni kachi ya.

<sup>8</sup> Ti ni kachi Pedro:

—Sia'an ko tu nakacha kuiti ni ja'a na —ni kachi da.

Ti ni kachi Jesús:

—Nu tu kuanta'u ra ja nakacha ri ja'a ra, ti tu ni'in ra ta'u ja kuncha ra jiin ri —ni kachi ya.

<sup>9</sup> Yukán ti ni ka'an Pedro jiin ya:

—Jito'yó, vatuni nu na nakacha ni ja'a na, ko suni nakacha ni nda'a na jiin xini na —ni kachi da.

<sup>10</sup> Ti maa Jesús ni kachi ya jiin da:

—Fin yivi sa ni jichi, tukaa nini kuu ja kuchi da uu jinu, chi so ja'a ni ga da na ndundoo, chi ja iyo ndoo ni tu'u da. Ro'o naa ra, chi ja ka iyo ndoo undi ini aña ra, vasu ansu taka ra —ni kachi ya.

<sup>11</sup> Sia'an ni kachi ya chi ja ni jini ya na chaa kuu ja kin nakua'a ya. Ja yukan kuu ja ni kachi ya ja tu ka iyo ndoo taka da naa da. <sup>12</sup> Nu ni ndi'i ni nakacha Jesús ja'a da naa da, ni nakui'na tuku ya sa'ma da, ti ni nukoo tuku ya nuu mesa.

Ni nukoo tuku ya nuu mesa un, ti ni kachi ya jini da naa da:

—¿Ni ka chaku ini ra jniñu ni sa'a ri ja'a xi tuu nu? <sup>13</sup> Ro'o chi ka ka'an ra ja kuu ri Maestro ra siki ja ni xna'an ri ro'o ra naa ra. Ti ka ka'an ra ja kuu ri jito'o ra, chi kuña'nú ri. Ti vatuni ka ka'an ra, chi sia'an kuu jniñu ndiso ri.

<sup>14</sup> Ti nu ru'u ja kuu ri Maestro, ja kuña'nú ri nuu ra naa ra, ti ni nakacha ri

ja'a ra. Ti suni sia'an ro'o naa ra, nakacha ja'a ñanijna'an ra. <sup>15</sup> Jniñu ja'a ni sa'a ri ja ni xna'an ri nuu ra naa ra ja na chun ini chun aña ra ja suni sia'an sa'a ra jiin ñanijna'an ra.

<sup>16</sup> Jandaa na kachi ri ja tendi'i ka kuu muzu, chi ni iin muzu tu kuña'nu ga da nuu jito'o da. Vanuxia kuña'nu ga chaa ta'u jniñu un. Suni sia'an chaa kuu tajnu, tu kuña'nu ga da ja kuu chaa nata'u jniñu nuu da, chi chaa nata'u jniñu un kuña'nu ga da. <sup>17</sup> Ka jini va'a ra tendi'i jnu'un. Ko kanuu ja na siuku ra sia'an nava kachi ri, nava na kunchaa Yandios jiin ra, ti kosii ini ra naa ra.

<sup>18</sup> Ko tu ka'an ri siki nasa koo jiin tendi'i ra naa ra. Chi jini va'a ri nasa kuu jiin taka yivi ni nakaji ri, ko kanuu ja na jinu ndaa nava kachi tutu Yandios, chi ni kachi siki ru'u: "Iyo iin ja kaji staa jiin ri, ti yukan kuu ja sa'a ndeva'a siki ri", kachi tutu. <sup>19</sup> Sia'an ja kaxnu'un ri jnu'un un nuu ra vijna ti changa ga kundaa ga. Nava nu na kundaa, yukan na ti kandixia ra ja maa ri kuu Cristo ni taji Yandios, chi koo nundo'o siki ri sia'an nava ni kachi ri.

<sup>20</sup> Jandaa na kachi ri ja iyo yivi taji ri. Ti nu kuanta'u yivi da, suni kuanta'u da ru'u, ti yivi kuanta'u ru'u, suni kuanta'u da maa ya ni taji ru'u jiin jniñu ja'a —ni kachi Jesús.

### *Kachi Jesús nau kuu ja nakua'a ya (Mt. 26.20-25; Mr. 14.17-21; Lc. 22.21-23)*

<sup>21</sup> Nu ni ndi'i ni ka'an Jesús jnu'un un, ti ni keja'a ndi'i kuu ini ya ja undi kaña aña ya. Ja yukan na ti ni kachi kaji ya nuu da naa da:

—Na kachi kaji ri ja iin ra kuu ja nakua'a ru'u nuu yivi ka jito u'u ru'u —ni kachi ya.

<sup>22</sup> Yukan ti ni ka keja'a ka nde'e nuu jna'an da, chi tu ka jini da nau iin da ka'an ya siki. <sup>23</sup> Ti yajni xiin Jesús nukoo iin chaa mani ga ya jiin, ti ka ndajnu'un da jiin ya ni hora ka yaji da staa. <sup>24</sup> Ti Simón Pedro ni sa'a da iin seña nuu chaa un ja na kajnu'un da ya na ndenu nau siki chaa ka'an ya.

<sup>25</sup> Chaa un ni tu'va ga da xiin Jesús, ti ni jikajnu'un da ya:  
—Jito'yo, ¿na chaa kuu nusa? —ni kachi da.

<sup>26</sup> Ti ni kachi Jesús jiin da:

—Na chunttoo ri iin pedazu staa stila, ti chaa kua'a ri nuu, chaa yukan kuu —ni kachi ya.

Yukan ti ni chunttoo ya iin pedazu staa stila, ti ni ja'a ya nuu Judas, se'e yii Simón, chaa ñuu Cariote.

<sup>27</sup> Ti hora ni ja'a ya staa un nuu Judas ni yee da, hora un ni nakue'e ja'u'u un maa da. Yukan ti ni kachi Jesús jiin da:

—Ja iin jniñu sa'a ra, ti kuan sa'a vinaña'i —ni kachi ya.

<sup>28</sup> Ti ni iin chaa kanchuku mesa nuu ka yee da staa un, tu ni ka chaku ini da ndoo ni ka'an Jesús sia'an jiin Judas. <sup>29</sup> Chi vanuxia Judas kuu chaa ndiso xu'un da naa da, ti sava da ni ka ndo'o ini ja ni ka'an Jesús jiin da ja na kin kuaan da nau ja ka nandi'i da ja kuu kivi viko un. Sava ga da ni ka ndo'o ini ja na kua'a jaku xu'un nuu yivi nda'u un naa i.

<sup>30</sup> Nu ni ndi'i ni yaji Judas staa yukan, ti ni kee da kua'an da. Ko ja ni kuaa kuu.

### *Ja na kunchuku vii na kunchuku maniyo*

<sup>31</sup> Nu ni ya'a Judas kua'an da, ti ni kachi Jesús:

—Vijna na ti kuni yivi ja maa fin ni ya kuu Se'e Yivi Ñuyivi, ja kuña'nu xaan ga jiin iin jniñu kin sa'a ya vijna. Ti na kuni ndijin yivi naa da ja vii kuña'nu Tata yo Yandios. <sup>32</sup> Vijna na ti maa Se'e ya xna'an nasa kuña'nu Yandios jiin jniñu sa'a ya. Vijna na ti nakua'a ndixia Yandios ja yiñu'un nuu maa Se'e ya. Vijna ti sa'a Yandios ja na nduña'nu ga maa Se'e ya.

<sup>33</sup> Hijo, ndee kunda'u ini ri ro'o naa ra, ko xaan ga kuiti hora ja'a, ja iin nundaa ni ga kunchaku ri jiin ra ti ki'in ri. Ko nanu ni kachi ri nuu yivi hebreo un, suni sia'an na kachi ri nuu ra naa ra vijna. Chi nanduku ra ru'u, ko tu kuu ki'in ra nuu ki'in ri. Tu kuu kundikun ra ru'u vijna.

<sup>34</sup> Ko na ta'u ri iin jniñu jaá nuu ra naa ra, ja na kunda'u ini nuu jna'an ra, sia'an nanu ni kunda'u ini maa ri ro'o. Ti sia'an na kunchuku vii na kunchuku mani ra. <sup>35</sup> Ti nu vii vii kanchuku ra, ja ka kunda'u ini nuu jna'an ra, ti kuni yivi naa i ja ni ka skua'a ra jiin ri —ni kachi Jesús.

*Kachi Jesús ja uni jinu ka'an Pedro ja tu jini da ya  
(Mt. 26.31-35; Mr. 14.27-31; Lc. 22.31-34)*

<sup>36</sup> Ni kachi Pedro jiin Jesús:

—Jito'yo, ¿nanu ki'in ni nusa? —ni kachi da.

Ti ni kachi Jesús jiin da:

—Tu kuu ki'in ra nuu ki'in ri vijna, ko kuee ga ti sa jaa ra —ni kachi ya.

<sup>37</sup> Yukan ti ni kachi Pedro:

—Jito'yo, ¿ti ndoo tu kuu ki'in na jiin ni vijna? Ja iyo tu'va na ja nama na ni'in vasu ná kuú na ja siki ni —ni kachi da.

<sup>38</sup> Ti ni kachi Jesús jiin da:

—¿Nusa ti tava ini ra kuu ra ja siki ru'u nu? Ko na kachi ndaa ri ja uni jinu kachi ra ja tu jini ra ru'u, ti sa kana iin li'i ja ña'an ijña —ni kachi ya.

*Xna'an Jesús na ichi kuu ja ki'in nuu Tata ya Yandios*

## 14

<sup>1</sup> Siin ka'an Jesús, ti ni kachi ya: —Koto xndi'i ra ini ra naa ra. Kandixia ndaa nuu maa Yandios. Ti suni kandixia ndaa ru'u. <sup>2</sup> Na kachi ndaa ri nuu ra naa ra ja nuu kancha Tata ri, iyo kua'a xaan ve'e nuu kunchuku yivi naa i. Ti sia'an ka'an ri chi jandaa ndixia kuu. Chi sa ti tu, va tu kachi ri sia'an nuu ra. Ko vanuxia kin no'on ri yukan, ti yukan satu'va ri nuu kunchuku ra. <sup>3</sup> Ki'in ri ti satu'va ri nuu kunchuku ra. Ti nu ja ni kuu nakoo, nandeokuñi tulku ri ti chhaha ri kii nukuaka ri ro'o naa ra, nava na kunchuku ra nuu kuncha ri yukan. <sup>4</sup> Ko ja ka jini ra ichi nuu ki'in ri —ni kachi Jesús.

<sup>5</sup> Ti Tomás ni jikajnu'un da Jesús:

—Jito'yo, tu ka jini na nachi ki'in ni. ¿Ti nasa kuu nani'in na ichi un naa na? —ni kachi da.

<sup>6</sup> Ti ni kachi Jesús jiin da:

—Maa ri kuu nanu iin ichi, ti jnu'un ka'an ri na kuu iin ichi ndaa un, chi ka'an ri taku jnu'un ndaa nuu yivi, nava na kuni yivi nau ichi kuu ichi ndaa. Maa iin ri ru'u kuu ja sa'a ja na kuchaku yivi ja kuu saa ni, ti kunchuku ijiin Yandios. Ko nu tu kandixia ni iin yivi ru'u, ti tu kuu kuiti jakoyo i nuu kancha Tata ri.

<sup>7</sup> Ni ka nakuni ra Tata ri chi ja ni ka nakuni ra ru'u. Ti undi vijna ja ni ka nakuni ra maa ya, chi ka nde'e ra nuu ya —ni kachi Jesús.

<sup>8</sup> Yukan ti ni kachi Felipe jiin ya:

—Jito'yo, kua'a ni jnu'un ja na nde'e na nuu maa Tata yo Yandios. Jiin yukan ni ti na kuva'a ini na naa na —ni kachi da.

<sup>9</sup> Ti ni kachi Jesús jiin da:

—Felipe, ja ni kuu na'an kancha ri jiin ra ¿ti tu ja'i nakuni ra ru'u nusa? Ja ni jini ra nuu Tata ri, chi ja ni jini ra ru'u. Nusa ti nasa ga kuni ra ja na xna'an ri Tata ri nuu ra. <sup>10</sup> Kanuu ja na kandixia ra ja kancha Tata ri jiin ri, ti kancha ri jiin maa ya. Jnu'un ka'an ri nuu ra vijna, tu ka'an ri ja ñu'un xini maa ri, chi maa Yandios kancha jiin ri, ti maa ya kuu ja sa'a jniñu un. <sup>11</sup> Ko kandixia

ja kancha Tata ri jiin ri, ti kancha ri jiin ya. Ti nu tu kandixia ra nava ka'an ri, ko kandixia ru'u ja siki taka jniñu sa'a ri.

<sup>12</sup> Ti na kachi ndaa ri nuu ra naa ra ja nu na kandixia ndaa ra ru'u, ti suni kuu sa'a ra jniñu sa'a ri, ti vasu ñin jniñu ña'nu ga, ti kuu sa'a ra naa ra. Chi ru'u, ki'in ri nuu kancha Tata ri. <sup>13</sup> Ti taka ndoo na kakan ra nuu Tata ri, ti kakan ra jiin sivi ri siki ja ka yi'i ra jiin ri. Chi ndiso ri jniñu ja kua'a ri sava'a ni ga ndoo na kakan ra. Ti na nde'e yivi jniñu sa'a ru'u, ja kuu ri se'e ya, ti na kachi i ja kuña'nu xaan Tata ri. <sup>14</sup> Ko na kachi ndaa ri ja taka ndoo na kakan ra nuu ri siki ja ka yi'i ra jiin ri ti kua'a kue'e ri, chi ndiso ri jniñu ja sia'an sa'a ri —ni kachi Jesús

### *Chisojnu'un Jesús ja taji ya Espíritu Santo*

<sup>15</sup> Siin ka'an Jesús, ti ni kachi ya:

—Nu ka ñukuu ini ra ru'u ja mani ri jiin ra, ti kuandatu jniñu ta'u nuu ra naa ra. <sup>16</sup> Ti ru'u, na kakanta'u ri nuu Tata ri ja na taji ya ñinga ja chindee ro'o naa ra, ja kuncha ya jiin ra ja kuu saa ni. <sup>17</sup> Maa ya kuu Espíritu Yandios, ti maa ya ndaa kuiti kuu ya. Chi mani jnu'un ndaa ka'an ya. Kua'a ya jnundee ini ro'o naa ra, ti sia'an ni kuncha ya jiin ra ja kuu saa ni. Ko tu chindee ya yivi ñuyivi ja'a, yivi ka sa'a ndeva'a un, chi tu ka nakuni kuiti i maa ya. Ko ro'o naa ra chi ka nakuni ra maa ya, chi kancha ya jiin ra vijnna. Ko jaa ñin kivi ja kendo'o jnu'un ya undi ini aña'ra, ti yukan kuncha ya ja kuu saa ni jiin ra. <sup>18</sup> Ko tu xndoo kuiti ri ro'o ja kendo nda'u ra naa ra. Chi su'va, nchaa tuku ri ti kuncha ri jiin ra.

<sup>19</sup> Ko ja inga yivi ñuyivi ja'a, jaku ni ga kivi ti tukaa ga kuni i ru'u. Ko ro'o naa ra, chi nakuni ra ru'u, chi vanuxia nachaku tuku ra sia'an nanu nachaku tuku ru'u. Chi nandoto tuku ri, ti suni sia'an nandoto tu ro'o naa ra. <sup>20</sup> Kivi na nachaku ri, yukan ti kuni ra ja kancha ri jiin Tata ri, ti maa ya kunchaa ya jiin yo naa yo. <sup>21</sup> Nu ñu'un ini ra jniñu ta'u ri ti siuku ra, ti yukan ni kundaa ndixia ja mani ra jiin ri. Ti nu mani ra jiin ri, ti suni koo mani Tata ri jiin ra. Nu ñukuu ini ra ja siuku ra jniñu ta'u ri, ti sa ni ru'u koo mani ri jiin ra. Naxna'an ri maa ri nuu ra ja kancha ndixia ri jiin ra —ni kachi ya.

<sup>22</sup> Yukan ti ni ka'an Judas (ko ansu Judas chaa ñuu Cariote), ti ni jikajnu'un da:

—Jito'yo, ¿nasa naxna'an ndijin ni maa ni nuu na naa na, ti nuu yivi ñuyivi, ndoo tuo? —ni kachi da.

<sup>23</sup> Ti ni kachi Jesús jiin da:

—Nu mani yivi jiin ri, ti jandatu i jnu'un ka'an ri ti siuku i. Ti undi Tata ri ti suni koo mani ya jiin yivi un naa i. Ti ru'u jiin Tata ri, chaa ri ti kunchuku ri jiin yi. <sup>24</sup> Ko yivi ja tu mani jiin ri, chi tu siuku i jnu'un ka'an ri. Ti jnu'un ka'an ri ja'a, ansu jnu'un maa ri kuu. Chi jnu'un ni ka'an maa Tata ri kuu, vanuxia maa ya ni taji ru'u jiin jniñu ja sia'an na ka'an ri. <sup>25</sup> Ja ni kuu kua'a jnu'un ni xna'an ri nuu ra naa ra vijnna ni kancha ga ri jiin ra. <sup>26</sup> Ko Tata ri na taji ya ñin ja na chindee ro'o. Ti yukan kuu ja kii nuu ru'u, ti maa ya kuu Espíritu Santo. Chaa ya ti xna'an ya ro'o naa ra, xndaku ya nuu ra, ti sa'a ya ja na nuku'un ini ra taka jnu'un ni ka'an ri jiin ra.

<sup>27</sup> Sandee ini ra nuu kua'an ri, ko tu xndi'i ra ini ra, chi sa'a ri ja na kosii ini aña'ra, ti na kukuee kunchuku ra. Chi jnu'un ka'an ri ti siuku ri, ti tu sa'a ri nanu ka sa'a yivi ñuyivi ja'a, ja ka ja'a i jnundee ini, ko so ka ka'an i. Yukan kuu ja koto kukui'ya ini ra jiin taka nundo'o, ti koto ma yu'u ra naa ra.

<sup>28</sup> Ja ni ka jini ra ja ni ka'an ri ja kin no'on ri, ko ndixia ri ja kii tuku ri nuu kanchuku ra nu ka iyo mani ini ra jiin ri. Yukan ti kusii ini ra naa ra ja ki'in ri, chi ki'in ri nuu kancha Tata ri. Ti maa ya kuña'nu ga ja kuu ru'u.

**29** Ni kachi ri nuu ra naa ra ja kin no'on ri, ti ndeocuñi tuku ri ti kuncha ri jiin ra. Ja ni jani ri jnu'un ja sia'an koo. Ti sa na kandixia ra nu ja ni kundaa jnu'un ri.

**30** Tukaa na jnu'un kua'a ka'an ri jiin ra naa ra, chi ja vaji ja'u un ja ndiso jniñu nuu yivi ñuyivi ja'a. Ko tu ndiso jniñu ja nata'u jniñu nuu ri. **31** Na siukun ri sia'an nava ni kachi Tata ri nuu ri. Ti sia'an nava na nakuni yivi ñuyivi ja mani ri jiin Tata ri ti kuu ini ri ya. Ndokuñi naa ra, ti ña'an na cho'o —ni kachi ya.

### *Jesús na kuu nanu iin yo'o nuu tika'ya*

## 15

**1** Siin ka'an Jesús, ti ni kachi ya nuu da naa da:

—Maa ri na kuu nanu iin yo'o nuu nutika'ya va'a, ti Tata ri na kuu nanu iin chaa jitu nuu nutika'ya un. **2** Ti maa ra naa ra, chi ka kuu ra nanu nda'a yuku tika'ya un. Chi nu tu sa'a va'a ra jniñu ya, ti sa'a yo nanu ja tu ja'a ra nde'e, ti sasiin Tata ri ro'o, nanu ja ka'ncha yo iin nda'a nuu tika'ya ja tu ja'a nde'e un. Ko nu sa'a va'a ra jniñu ya, ti sandoo ga ya ro'o, nanu ja sete yo nda'a nuu tika'ya un nava na kua'a ga nde'e.

**3** Ja ni ka ndundoo ra undi ini aña ra, chi ni ka kandixia ra jnu'un ni ka'an ri jiin ra. **4** Ko nu na jakuñi ni'in ra jiin ri, ti suni maa ri na kundaka ni'in ri ro'o, chi sa'a ra jniñu va'a nuu ya nu tu jakuñi ni'in ra jiin ri. Suni sia'an kuu jiin nda'a yuku nuu tika'ya un. Nu na kencha iin nda'a nuu yijnii un, ti tukaa kua'a nde'e, chi nasa kuu kua'a nde'e ti tukaa ga yijnii.

**5** Maa ri kuu nanu yo'o nuu tika'ya un, ti ro'o naa ra ka kuu ra nanu nda'a yujnu un. Nu ro'o na natu'va ru'u, ti maa ri na kinda'a ni'in ri ro'o naa ra. Yukan na ti va'a xaan kuu jniñu ya, chi nakaya ki'in, nanu ja kuun vee nde'e xini nuu tika'ya un. Ko nu tu kinda'a ni'in ri ro'o naa ra, ti va tu kuiti na jniñu va'a sa'a ra.

**6** Nu tu jakuñi ni'in ra jiin ri, ti sasiin Tata ri ro'o, nanu ja ka'ncha yo nda'a yujnu ja tu ja'a nde'e, na ichi. Yukan na ti nastutu yo ja na kayu nuu ñu'un. **7** Ko nu ni ka jakuñi ni'in ra jiin ri, ti ku'un ini ra jnu'un ka'an ri. Yukan na ti kakan ra ja kuni ra, ti kua'a ri sava'ni ga ndoo na kakan ra. **8** Nu sia'an na siuku ra taka un, yukan na ti ka stuu ra maa ra ja ka kundixia ra yivi ka skua'a jiin ri. Sia'an na ti nakuni yivi ja kuña'nu xaan ga Tata ri.

**9** Mani ri jiin ra naa ra sia'an nanu mani Tata ri jiin ri. Yukan kuu ja ni'in kuijiin ra naa ra ti kunchuku mani ra siki ja kunda'u ini ri ro'o. **10** Nu sia'an na sa'a ra ti kuandatu ra jniñu ta'u ri. Yukan ti ka ñukuu ini ra ru'u ja mani ri jiin ra. Chi suni sia'an ni'jandatu ri nuu Tata ri, ti ñukuu ini ri ja mani ya jiin ri.

**11** Taka jnu'un ja'a xndaku ri nuu ra naa ra ja na kuandatu ra, nava sia'an na ni'in ra jnu'un ndee ini ti na koo siñndixia ini ra jiin ri. **12** Ti ja'a kuu iin jniñu ta'u ri nuu ra, ja na kunda'u ini nuu jna'an ra, sia'an nanu ni kunda'u ini ri ro'o naa ra.

**13** Nu vasu na kuu iin chaa, ja nama da amigo da siki ja kunda'u ini da, ti yukan kuu iin jniñu ka'nú ja kuu nuu Yandios. Chi tukaa iyo iin jniñu kanuu ga ja kuu sa'a yo. **14** Ti ro'o naa ra, ka kuu ra amigo ri nu ka siuku ndaa ra jniñu ta'u ri. **15** Vijnal tukaa kachi ri ja ka kuu ra nanu muzu ri, chi iin muzu tu jini da nasa ndo'o ini jito'o da. Na ka'an ri amigo vijnal na, chi ja ni kachi ndaa ri nuu ra naa ra taka ja ni ka'an Tata ri jiin ri.

**16** Tu ni ka nakaji ra ru'u ja na kundichi ri jiin ra. Chi su'va, maa ri ni nakaji ro'o ja na ki'i ra jiin ri. Ni ja'a ri jniñu sa'a ra, ti nu na sa'a ra iin jniñu ja kendo

va'a, ti ni tukaa naa. Ti kua'a Tata ri ndi'i ja na kakan ra nuu ya siki ja ka yi'i ra jiin ri.

<sup>17</sup> Ti ja'a kuu iin jniñu ta'u ri nuu ra naa ra, ja na kunda'u ini nuu jna'an ra —ni kachi Jesús.

### *Ka kuiti ini yivi ñuyivi nuu Jesús jiin yivi ya*

<sup>18</sup> Siin Jesús ka'an ya, ti ni kachi ya:

—Nu na kuiti ini yivi ñuyivi nuu ro'o naa ra, ti ja ka jini ra ja xnakan nuu maa ri ni ka kuiti ini i. <sup>19</sup> Sa ti iin nu kanda ra jiin yivi ñuyivi, ti va koo mani i jiin ra niku, sia'an nanu mani i jiin jna'an i. Ko su'va, ka kuiti ini i chi ni nakaji ri ro'o naa ra ja na kuijin ra jiin ri. Chi tukaa ga ka sa'a ra ja ka sa'a yivi ñuyivi un. Ja yukan kuu ja ka kuiti ini i nuu ra naa ra, chi tukaa ka kuu ra nanu yivi ñuyivi.

<sup>20</sup> Koto naa ini ra ja ni kachi ri, chi ni kachi ri ja iin muzu tu kuña'nu ga da nuu jito'o da, chi chaa ta'u jniñu un, kuña'nu ga da. Yukan kuni ka'an ja kua'a yivi nundo'o ro'o ra naa ra, ja ka yi'i ra jiin ri, suni sia'an nanu ni ka sa'a i jiin ri. Sia'an kuu yivi un, chi nu ni ka janta'u i jnu'un ri, ti suni sia'an na kuanta'u jnu'un ka'an ra. <sup>21</sup> Sia'an sa'a i jiin ra chi vanuxia ka yi'i ra jiin ri. Sia'an sa'a nedeva'a yivi un jiin ra, chi vanua tu ka nakuni kuiti i maa Yandios, ya ni taji ru'u jiin jniñu.

<sup>22</sup> Ni kii ri ti ni kachi ndaa ri nuu yivi naa i ja ka iyo kuachi siki i. Vijna ti tu kuu ka'an i ja tu jini i ja ka iyo kuachi siki i. <sup>23</sup> Ti yivi kuiti ini nuu ri, yukan ti suni ja kuiti ini i nuu Tata ri.

<sup>24</sup> Iyo kuachi siki i chi ni sa'a ri jniñu ña'nú nuu i, ko tu ni ka kandixia i. Kivi ja ja ni ya'a, tu ni iin chaa ni sa'a sia'an, ko vijna ti ni ka jini yivi naa i jniñu ña'nú ni sa'a ri. Ti vasu sia'an ko ka kuiti ini i nuu ri jiin Tata ri. <sup>25</sup> Sia'an ka sa'a i nava na kee ndaa jnu'un yoso nuu tutu ley Yandios, ja kachi: "Ni kuiti ini i nuu ri, vasu tu na kuachi ri", kachi tutu —ni kachi Jesús.

<sup>26</sup> Siin Jesús ka'an ya, ti ni kachi ya:

—Kivi na najaa ri nuu kancha Tata ri, ti taji ri iin ya kii chindee ga ro'o, ti maa ya kuu Espíritu Santo, ti Espíritu yukan kuu ja xna'an jnu'un ndaa. Chaa ya ti kua'a ya jandaa ja'a ri ja kuu nuu tako jnu'un ni ka'an ri. <sup>27</sup> Yukan kuu ja suni ro'o naa ra, kua'a ra jandaa ja'a ri ja ka'an ra jnu'un ri, chi ni ka jika ra jiin ri undi na ni keja'a ka'an ri jnu'un un nuu yivi naa i —ni kachi Jesús.

## 16

<sup>1</sup> Siin ka'an Jesús, ti ni kachi ya:

—Taka jnu'un ni xna'an ri nuu ra naa ra na sa'a ja na kundee ini ra ti tu xndoo ra jnu'un ri, vasu na kii nundo'o un siki ra naa ra. <sup>2</sup> Chi keni'in yivi ro'o ti tukaa kua'a da jnu'un ku'iin ra veñu'un. Jaa kivi ti ka'ni ro'o, ti kani ini da ja iin jniñu va'a ni sa'a da nuu Yandios. <sup>3</sup> Ti sia'an sa'a i chi tu ka jini kuiti da ru'u, ni tu ka jini kuiti i nuu Tata ri. <sup>4</sup> Ni kachi ri jnu'un ja'a nuu ra nava nu ni jaa kivi ja kondo'o ra, yukan na ti nuku'un ini ra ja sia'an ni kachi ri nuu ra naa ra —ni kachi ya.

### *Jniñu sa'a Espíritu Santo*

Siin Jesús ka'an ya, ti ni kachi ya:

—Tu ni kachi ri yukan nuu ra undi nuu, chi ni kuncha ga ri jiin ra naa ra.

<sup>5</sup> Ko vijna chi kino'on ri nuu kancha maa ya ni taji ru'u. Ti vasu yukan ka'an ri, ko ni iin ra tu ka jikajnu'un nanu ki'in ri. <sup>6</sup> Chi sa ka kukui'ya xaan ini ra ja ni ka'an ri taka jnu'un un.

<sup>7</sup> Ko jandaa ka'an ri ja va'a ga kendo ra nu na kino'on ri. Chi nu tu no'on ri, ti maa ya kii chindee ro'o, tu kuu kii ya. Ko va'a ga na ki'in ri, ti na taji ri maa ya na kii ya nuu ra naa ra.

<sup>8-11</sup> Nu na chaa ya, ti na xna'an kaji ya nuu yivi naa i ja ka iyo kuachi i, chi maa kuachi un sa'a ja tu ka kandixia i ru'u. Na xna'an ya na ichi kuu ichi va'a ja na kendo ndaa yivi naa i nuu Yandios. Chi vanuxia kino'on ri nuu Tata ri, ti tukaa ga kuni ra nuu ri. Na xna'an kaji ya ja nasa'a ndaa Yandios kuachi yivi, chi ja ni kundaa ja jna'nun ndatu maa ja'u'ja kuña'nu nuu ñuyivi ja'a.

<sup>12</sup> Ti iyo kua'a ga jnu'un ja kuni kachi ri nuu ra naa ra. Ko tu kuu kachi ri, chi ro'o tu chaku ini ra vijnna. <sup>13</sup> Na chaa maa ya kuu Espíritu Santo, ti sa na xna'an ndaa ya jnu'un un, chi maa ya kuu ya ndaa ndixia. Ti tu ka'an ya ja ndo'o ini maa ya. Chi su'va, ka'an ya jnu'un ni ka'an maa Yandios. Ti xna'an ya taka ja koo kivi vajji.

<sup>14</sup> Xna'an ya ja kuña'nu ri, chi nakachi ya jnu'un un nuu ra taka jnu'un ni kachi ri nuu ya, ti sa'a ya ja na nuku'un ini ra. <sup>15</sup> Ndil'i nasa kuña'nu Tata ri, suni sia'an kuña'nu maa ri. Yukan kuu ja ni kachi ri ja Espíritu Santo kuu ya nakachi ndil'i jnu'un un nuu ra taka jnu'un ka'an ri, ti sa'a ya ja na chaku ini ra —ni kachi Jesús.

### *Ka kukui'ya ini da ko ndusii tuku ini da naa da*

<sup>16</sup> Siin Jesús ka'an ya, ti ni kachi ya:

—Jaku ni ga kivi ti tukaa ga kuni ra ru'u. Ko na kuu uni kuun kivi ti nakuni tuku ra ru'u —ni kachi Jesús.

<sup>17</sup> Yukan ti sava chaa ka skua'a jiin ya, ka jikajnu'un jna'an da:

—¿Ndoo ni ka'an ya jiin yo sia'an? Ka'an ya ja jaku ni ga kivi ti tukaa ga kuni yo maa ya, ti nu na kuu ni ga kivi ti nakuni tuku yo ya. Suni ni kachi ya ja kin no'on ya nuu kancha Tata ya. <sup>18</sup> ¿Ndoo ni kachi ya ja sia'a jaku ni ga kivi nusa? Tu ka chaku ini yo nasa kuni ka'an ya —ni ka kachi da.

<sup>19</sup> Ni jini Jesús ja ka kuni kajnu'un da ya. Yukan ti ni kachi ya nuu da naa da:

—Ni ka'an ri ja jaku ni ga kivi ti tukaa ga kuni ra ru'u, ti nu na ya'a jaku ni kivi ti nakuni tuku ra ru'u. ¿Ti yukan kuu ja ka jikajnu'un jna'an ra nasa kuni ka'an jnu'un un nu?

<sup>20</sup> Vanuxia na kachi ndaa ri nuu ra ja koo ra jnukui'ya ini ti katii ra nducha nuu ra. Ko yivi ñuyivi ja'a chi sa su'va katu nda'a da ja xaan tonto sii kuu ini da. Ti jandaa ni kuu ja koo ra jnukui'ya ini naa ra nu na jaa kivi. Ko nu na ya'a kivi un ti ndusii xaan tonto ga ini ra. <sup>21</sup> Sa'a yo nanu. ñin ña'an ja kuan kuyajni kaku se'e ña, ti ja'ncha i chii ña, chi ja ni jaa kivi ja kaku suchi lulu un. Ko nu ja ni kaku suchi lulu un, ti tukaa na'an ña ja ni ndo'o ña, chi kusii xaan ini ña ja ni ya'a va'a ña. <sup>22</sup> Ti suni sia'an kuu ja ka kukui'ya ini ra vijnna, ko jaku ni kivi ti nakuni jna'an tuku yo. Yukan na ti ni iin tundo kasi ja xaan sii kuu ini ra naa ra.

<sup>23</sup> Nu na jaa kivi no'on ri nuu Tata ri, ti tukaa ndoo kajnu'un ra ru'u. Chi jandaa na kachi ri ja nuu maa Tata ri kuu nu kakan ra, ti na kua'a ya ndil'i ja ka jikan ra, siki ja ka kandixia ra ru'u. <sup>24</sup> Undi vijnna ti tundo ka jikan ra nuu Tata ri siki ja ka yi'i ra jiin ri. Ko vijnna ti kakan ra nuu ya jiin sivi ri siki ja ka yi'i ra jiin ri. Kakan naa ra nuu Tata ri, ti na kua'a ya nuu ra, nava yukan ti na kusii xaan ga ini ra —ni kachi Jesús.

### *Kundee Jesús jiin in ja kanaa jiin ya*

<sup>25</sup> Siin Jesús ka'an ya, ti ni kachi ya:

—Ja ni jani ri jnu'un nuu ra naa ra, ko ndee tijni jnuun ni ka'an ri jnu'un yi'i ti'l'i ja chaku ini ra. Ko jaa kivi nuu tukaa ka'an ri sia'an, chi sa su'va kachi

ndaa ri nuu ra nasa sa'a jniñu Tata ri. <sup>26</sup> Kivi yukan na ti kakan ra nuu Tata ri siki ja ka yi'i ra jiin ri. Ti tu kachi ri ja tukaa kakanta'u ri ja'a ra naa ra, chi vanua ja ka jini ra ja nini ka'an ri jiin Tata ri ja na kua'a ya ja ka jikan ra nuu ya. <sup>27</sup> Ti jandaa ndixia kuu yukan, chi kunda'u ini Tata ri ro'o naa ra siki ja ka iyo mani ra jiin ri, ti ka kandixia ra ja vaji ri undi nuu maa ya.

<sup>28</sup> Ni kee ri undi nuu kancha Tata ri, ti ni kenda ri nuu ñuyivi. Vijnna ti kee ri nuu ñuyivi ja'a, ti kino'on tuku ri nuu Tata ri —ni kachi Jesús.

<sup>29</sup> Ti ni ka kachi chaa ka skua'a jiin ya:

—Vijnna na ti ka'an kaji ni, chi tukaa ka'an ni jnu'un yii ja tu chaku ini na.

<sup>30</sup> Vijnna ti ni jini na ja jini ndi'i kuiti ni. Tu nini kuu ja kajnu'un yivi maa ni, chi ja jini ni nau ja ndo'o ini i ja kajnu'un i nuu ni. Ja yukan na kandixia ndaa na ja vaji ni undi nuu kancha maa Yandios —ni ka kachi da naa da.

<sup>31</sup> Ti ni kachi Jesús jiin da naa da:

—Undi vijnna ti sa ni ka kandixia nusa. <sup>32</sup> Ko ja ni kuyajni ndaa kivi, ti ja ni jaa hora ja kuichanuu ra kinkoyo ra, ti ndi iin ndi iin ra nachanuu ra ve'e ra. Ti xndoo ra maa iin ni ga ru'u kendo ri. Ti vasu na xndoo maa iin ra ru'u, ko kancha Tata ri jiin ri. <sup>33</sup> Sia'an ka'an ri nava na kukuee undi ini aña ra. Chi jandaa ndixia kuu ja kondo'o konene ra nuu ñuyivi ja'a, ti koto ndukui'ya ini ra naa ra, kua'a sa'a ini ra naa ra maa ra, su'va na kosii ini aña ra, chi ja ni kundee ri jiin iin ja kanaa siki ra nuu ñuyivi ja'a —ni kachi ya.

### Nijkanta'u Jesús ja'a yivi ka kandixia

## 17

<sup>1</sup> Yukan ti ni ndakoto Jesús ichi andivi ti ni kachi ya jiin Tata ya:

—Tata na, ja ni jaa kivi ja kondo'o na. Vijnna ti stuu ni ja kuña'nu na, ja kuu na se'e ni, nava suni maa na na stuu na ja kuña'nu ga maa ni. <sup>2</sup> Ni ja'a ni jniñu nuu na ja na ta'u na jniñu nuu yivi kanchuku nuu ni tu'u ni kaa nuyivi naa i. Ti ni sa'a ni ja yivi ni nakaji ni, na ndivi i nda'a na, ja na kuchaku ijiin yo ja kuu saa ni. <sup>3</sup> Ti sia'an kuchaku da chi ni ka nakuni i ni'in, ja ni'in kuu maa iin ni Yandios ndaa. Suni ni ka nakuni da saña ja kuu na Jesús, ya kuu Cristo ni taji ni jiin jniñu ña'nu.

<sup>4</sup> Ni xna'an na nuu yivi ñuyivi ja kuña'nu ni, ti ni sinu na jniñu ni tatu ni nuu na. <sup>5</sup> Ti vijnna, Tata na, sa'a ni ja na nduña'nu tuku na undi nuu kancha ni, sia'an nanu ni kuña'nu na jiin ni undi na ti jankoo ga ñuyivi.

<sup>6</sup> Ni nachil'i ni yivi ñuyivi ja'a nuu nda'a na, ti ni xna'an na nuu da nau kuu ni'in. Maa ni ni yinda'a da undi nuu, ti vijnna ni nachil'i ni i nuu nda'a na, chi ni ka jandata da jnu'un ni. <sup>7</sup> Vijnna ti ka jini ndaa da ja undi nuu maa ni vaji taka ja sa'a na, jiin taka jnu'un ka'an na. <sup>8</sup> Ni nakachi na nuu da naa da, sia'an nava ni ka'an ni jiin na. Ti ni ka chunso'o da jnu'un ni ka'an na, chi ni ka nakuni ndaa da ja undi nuu maa ni vaji na, ti ka kandixia da ja maa ni kuu ja ni taji saña jiin jniñu ja'a.

<sup>9</sup> Ti jikanta'u na nuu ni ja kuu taka yivi ni ka kandixia, ansu ja kuu yivi ñuyivi ja tu ka kandixia. Sia'an kanda'u na jiin ni ja kuu yivi ni nachil'i ni nda'a na, chi nuu nda'a maa ni ni ka yi'i i, ko vijnna ti ja ni nduu nanu na i. <sup>10</sup> Chi taka ja yi'i nda'a na, suni ja kuu maa ni kuu. Ti taka ja kuu maa ni, suni ja kuu maa na kuu. Chi vanuxia ka kandixia da saña, ti jiin jnu'un yiñu'un kanchuku da nuu ñuyivi ja'a ti ka stuu da ja kuña'nu na.

<sup>11</sup> Saña, tukaa kuncha na nuu ñuyivi ja'a, chi na jaa na nuu kancha ni. Ko yivi ni nachil'i ni nda'a na, chi kendo i kunchuku ga i nuu ñuyivi ja'a. Yukan kuu ja jikanta'u na nuu ni Tata na, ja ii kuu sivi ni ti ndoo xaan ga ni, chi maa ni kuu ya kuña'nu. Koto nda'u ni taka yivi ni nachil'i ni nuu nda'a na nava

tu naa i, ti na koo iin nuu ini i sia'an nanu ka iyo iin nuu ini maa yo. <sup>12</sup> Ni kuncha na jiiñ i nuu ñuyivi ja'a. Ni jito naa i ti ni na maa i ja ni ndito va'a na i, chi vanuxia sia'an ni tatu ni saña ja na koto va'a na i. Ti ni iin tu ni ka naa, chi nini iin vajnu'un ni da ni naa ja na kundaa nava yoso nuu tutu ni. <sup>13</sup> Vijnal ti ndeokuñi na nuu ni Tata na, ko ka'an na jnu'un ja'a nava na kusii ini da sia'an nanu iyo siñ ini maa na.

<sup>14</sup> Ni xndaku na jnu'un ni nuu da naa da. Ti sa su'va ni ka keja'a ka jito u'u yivivi ñuyivi ja'a maa da. Chi vanuxia ansu iin ni ka kuu da jiiñ yivivi ñuyivi ja'a. Chi tu ka ndo'o ini da nanu ka ndo'o ini yivivi ñuyivi ja'a, nanu maa na tu ndo'o ini na nanu ka ndo'o ini yivivi ñuyivi ja'a. <sup>15</sup> Tu ka'an na ja na keni'in ni maa da naa sa nuu ñuyivi ja'a. Chi su'va jikanta'u na nuu ni Tata na, ja na koto va'a ni maa da, nava ja'u'u un tu kuu sa'a ndevara'siki da naa da. <sup>16</sup> Vanuxia ansu ka kuu da nanu yivivi ñuyivi ja'a, nanu maa na suni tu yi'i na jiiñ yivivi ñuyivi ja'a.

<sup>17</sup> Ja sia'an ka sa'a jniñu da nuu ni, ti na sandoo ni maa da jiiñ jnu'un ni. Chi jnu'un ni kuu maa jnu'un ndaa. <sup>18</sup> Ni ta'u na jniñu nuu da naa da, sia'an nanu ni ta'u ni jniñu nuu maa na. <sup>19</sup> Ja kuu nuu maa da naa da kuu ja soko na maa na ja na kuñ na, nava suni maa da kondo'o maa ni konene da nuu ni kanchuku i nuu ini ñuyivi ja'a. Yukan sa'a i chi ka nakutu ini i jiiñ maa jnu'un ndaa —sia'an ni jikanta'u Jesús nuu Tata ya.

<sup>20</sup> Siin ka'an Jesús jiiñ Yandios, ti ni kachi ya:

—Jikanta'u na nuu ni Tata na, ja kuu siki maa da naa da, ko suni jikanta'u na nuu ni ja kuu siki yivivi kunso'o jnu'un ka ka'an da, ti na kandixia i saña. <sup>21</sup> Jikanta'u na ja iin nuu na koo ini da naa da chi iin ni ga ka kuu da ja ni ka kandixia da saña, sia'an nanu iin ni kuu maa na jiiñ ni'in. Tata na. Sia'an na koo iin nuu ini da jiiñ ñanijna'an da nava na nde'e yivivi ñuyivi yukan, ti na kandixia i ja maa ni kuu ja ni taji saña.

<sup>22</sup> Ni sa'a ni ja na nakuni yivivi ja iin ni kuña'nun na jiiñ maa ni, Tata na. Suni sia'an ni sa'a na jiiñ yivivi ka kandixia saña. Ni saña'nun na maa da naa da nava iin nuu ni ka kuu i jiiñ na, nava sia'an na nakuni yivivi ñuyivi ja ka iyo iin nuu ini i jiiñ yo. <sup>23</sup> Iin ni ga ni ka kuu i jiiñ na, sia'an nanu iin ni kuu na jiiñ maa ni. Ja yukan kuu ja iin nuu kuiti ka iyo ini da naa da, nava nu na kuni yivivi ñuyivi yukan, ti nakuni ndaa i ja maa ni ni taji saña. Na nakuni ndaa yivivi ñuyivi un ja mani xaan ni jiiñ da naa da, sia'an nanu mani xaan ni jiiñ maa na.

<sup>24</sup> Tata na, ni nachil'i ni maa i nuu nda'a na naa i, ko vijnal ti kuni na ja na kunchuku i jiiñ na nuu kuncha na, nava na kuni i nasa vii xaan kuña'nun na jiiñ jniñu ni ja'a ni nuu na. Sia'an na kuni i ja mani xaan ni jiiñ na undi changa ga jankoo ñuyivi ti undi vijnal. <sup>25</sup> Tata na, iyo ndaa kuiti jniñu sa'a ni. Ti vasu sia'an, ko yivivi ñuyivi, tu ka nakuni kuiti i ni'in. Ko maa na, chi nakuni na ni'in. Ti yivivi ja'a, mani i jiiñ na, chi ka jini i ja maa ni ni tatu jniñu nuu na. <sup>26</sup> Ni xna'an na nuu i naa i da ja maa ni kuu Yandios va'a. Ti siin ga na xna'an na yukan nuu i nava na koo mani xaan i jiiñ ñanijna'an i, sia'an nanu iyo mani xaan ni jiiñ maa na. Ti xndaku na nuu i ja kuncha na jiiñ i kivi vaji ga.

Yukan kuu ja jikanta'u na nuu ni, Tata na, ti sia'an ka'an na ja'a yivivi mani jiiñ na —ni kachi Jesús.

*Ni ka jnii da presu Jesús  
(Mt. 26.47-56; Mr. 14.43-50; Lc. 22.47-53)*

## 18

<sup>1</sup> Sia'an ni ka'an Jesús, yukan na ti ki'in ga. Kua'an ya jiiñ ndaja'a ya. Ni ya'a ya inga yu'u yucha Cedrón. Ni ka jakoyo da nuu iyo iin huerta mani

yujnu vixi, ti yukan ni ka kivi da. <sup>2</sup> Ti suni jini Judas nuu kande huerta un, chi vanuxia tijni jinu ni ndututu Jesús jiin chaa ka skua'a jiin ya yukan. <sup>3</sup> Ti yukan ni jaa Judas jiin kua'a xaan soldado, jiin tajnu ni ka taji sutu ka kuña'nu un jiin chaa fariseo, ti ni ka jakoyo da yukan. Ti ndinchaa kua'a ni ga ñuu'un yiti ka yijni da kuajakoyo da. Ti ka ndiso da espada jiin yujnu. <sup>4</sup> Ko ja jini maa Jesús na nundo'o vají sikí ya. Ni kenda ya ichi nuu da naa da, ti ni kachi ya:

—¿Na chaa ka nanduku ra naa ra?

<sup>5</sup> Ti ni ka kachi da:

—Ka nanduku na Jesús, chaa ñuu Nazaret —ni kachi da.

Ti ni kachi Jesús:

—Maa ri kuu —ni kachi ya.

Ti yukan kandichi Judas ma'ñu chaa un naa da, vanuxia maa da kuu ja ni nakua'a Jesús nuu chaa ka jito u'u ya. <sup>6</sup> Nu ni kachi Jesús: "Maa ri kuu", ti ni ka jika yata chaa un, ti ni ka jiokava da nuu ñuu'un. <sup>7</sup> Yukan ti ni jikajnu'un tuku ya:

—¿Na chaa ka nanduku ra nusa?

Ti ni ka kachi da:

—Ka nanduku na Jesús, chaa ñuu Nazaret.

<sup>8</sup> Ti ni kachi tuku Jesús nuu da naa da:

—Ja ni kachi ri ja maa ri kuu, ti nu ru'u ka nanduku ra ko sia chaa ja'a na kinkoyo da, nuu maa ri ve ki'in ra —ni kachi ya.

<sup>9</sup> Sia'an ni kachi ya nava na kundaa jnu'un ni ka'an ya jiin Tata ya: "Tu ni ja'a na jnu'un ja naa ni iin chaa ni ja'a ni nuu na", ni kachi ya.

<sup>10</sup> Yukan ti ni tava Pedro espada da, ti ni ja'ncha da so'o kua'a iin chaa nani Malco, chaa kuu muzu maa sutu kuña'nu. <sup>11</sup> Ti ni kachi Jesús jiin Pedro:

—Nasava'a espada ra ini cubierta. Chi siuku ri nava ni kachi Tata ri ja kondo'o ri —ni kachi ya.

*Ni ka yinda'a da Jesús ve'e Anás  
(Mt. 26.57-58; Mr. 14.53-54; Lc. 22.54)*

<sup>12</sup> Yukan na ti soldado un jiin capitán da, jiin policía chaa hebreo un, ni ka jnii da Jesús, ti ni ka ju'ni da ya. <sup>13</sup> Ti kuankoyo da jiin ya xnakan ve'e Anás, chaa kuu tata chiso Caifás. Ti Caifás kuu maa sutu kuña'nu ga na kuiya yukan. <sup>14</sup> Caifás ni kuu chaa ni kachi nuu jna'an da hebreo ja va'ga ja na kuú iin ni chaa ja kuu nuu yivi ni ñuu Israel.

*Ka'an Pedro ja tu jiin da Jesús  
(Mt. 26.69-70; Mr. 14.66-68; Lc. 22.55-57)*

<sup>15</sup> Simón Pedro ni ndikun da Jesús nuu kua'an ya jiin soldado un. Suni ni ndikun inga ndaja'a Jesús. Ti sutu kuña'nu ga un ni jini mani da jiin chaa un. Yukan kuu ja ni kivi da jiin Jesús nuu yuxé'e sutu kuña'nu ga un. <sup>16</sup> Ko ni kendo Pedro yajni yuxé'e. Chi iyo iin ña'an ndito yuxé'e un. Ti yukan ni kenda chaa ni jini mani jiin sutu kuña'nu ga un, ti ni ka'an da jiin ña'an ndito yuxé'e un. Yukan na sa ni kivi Pedro yuxé'e un. <sup>17</sup> Ko ña'an un ni kachi ña jiin Pedro:

—¿Ansu ni'in kuu iin ja ni jika jiin Jesús nu? —kachi ña.

Ti ni kachi Pedro:

—Ansu kuu ri —ni kachi da.

<sup>18</sup> Ti muzu un jiin policía, ni ka joto da ñuu'un jiin tikayi, ti yukan ka'iin da ka nduxin da, chi vijin xaan sa'a. Ti Pedro, suni kandichi da yukan, nduxin da ñuu'un.

*Ni keja'a xndichi sutu kuña'nu un Jesús  
(Mt. 26.59-66; Mr. 14.55-64; Lc. 22.66-71)*

<sup>19</sup> Yukan na ti Anás, ja kuu sutu kuña'nu un, ni keja'a jikajnu'un da Jesús nau ka kuu yivi ka skua'a jiin ya. Jikajnu'un da ya na jnu'un ni xna'an ni nuu yivi naa i. Ti ni kachi Jesús:

<sup>20</sup> —Nini ni ka'an ri nuu chitu un nuu yivi naa i. Ni xna'an ri tijní veñu'un Israel jiin ini veñu'un ka'nu nuu ka ndututu jna'an yo un. Tu ni iin jnu'un ni chi sa'yí ri. <sup>21</sup> Koto kajnu'un ra ru'u. Kajnu'un maa yivi naa i, chi ni ka jiniso'o i ndi kuiti jnu'un ni ka'an ri. Ti ka jini ndaa i na jnu'un ni ka'an ri —ni kachi ya.

<sup>22</sup> Sia'an ni kachi Jesús, ti iin policía ndito veñu'un ka'nu un, kandichi yajni da xiin Jesús, ti ni kani ni da iin jiki nuu ya, ti ni kachi da:

—¿Vanu sia'an ka'an ra jiin sutu kuña'nu nu? —ni kachi da.

<sup>23</sup> Ti ni kachi Jesús:

—Nu ni ka'an ndeva'a ri, ¿ti kachi na iin jnu'un kue'e ni ka'an ri nusa? Ko nu su'va ni ka'an ndaa ri, ¿ti ndo ni ja'a ra jiki nuu ri? —ni kachi Jesús.

<sup>24</sup> Yukan ti Anás, ni nasia'a da ya nuu kancha Caifás, chaa ni kuu maa sutu kuña'nu ga. Ti nu'ní ya kua'an ya.

*Ka'an tuku Pedro ja tu jiin da Jesús  
(Mt. 26.71-75; Mr. 14.69-72; Lc. 22.58-62)*

<sup>25</sup> Ti Simón Pedro siin da nduxin da yuñu'un yukan, ti ni ka jikajnu'un sava chaa un maa da:

—¿Ti ansu ni skua'a ra jiin Jesús nu?

Tí ni kachi Pedro:

—Tuu, tu ni skua'a ri jiin da —ni kachi da.

<sup>26</sup> Suni yukan kandichi iin muzu ja junukuachi nuu sutu kuña'nu ga un. Kuu da jna'an chaa ni ja'ncha Pedro so'o un, ti ni kachi da jiin Pedro:

—¿Ndoo tuu, ti ni jini ri ro'o yukan, na hora ni ka jnii da Jesús nuu huerta un? —ni kachi da.

<sup>27</sup> Ko ni kachi tuku Pedro ja ansu maa da kuu. Ti hora un ni kana li'i.

*Ni ka nasia'a da Jesús nuu gobernador  
(Mt. 27.1-2, 11-14; Mr. 15.1-5; Lc. 23.1-5)*

<sup>28</sup> Yukan ti ni ka kekoyao da nuu kancha Caifás, ti ni ka nasia'a da Jesús undi nuu kancha gobernador ja yi'i jiin chaa romano. Ja kuan kuxian ti'li kuu. Ti chaa hebreo un tu ni ka kuni kivi da ini ve'e palacio gobernador nava tu chakuachi da siki da, chi ka kuni da koo ndoo da ja na kuxini da lelu viko pascua. <sup>29</sup> Yukan kuu ja ni kenda Pilato fuera nuu ka'iin yivi un, ti ni jikajnu'un da:

—¿Na kuachi ka ka'an ra siki chaa ja'a? —ni kachi da.

<sup>30</sup> Ti ni ka ka'an da:

—In chaa ja'ní ña'an kuu chaa jña. Ja yukan kuu ja vee nchaka na da nuu ni —ni kachi yivi un.

<sup>31</sup> Yukan ti ni kachi Pilato:

—Xndichi maa ra chaa ja'a nava ka'an ley ra naa ra —ni kachi da.

Tí ni ka kachi tuku yivi hebreo un:

—Tu ka iyo ichi na ja ka'ní na ni iin yivi —ni ka kachi i.

<sup>32</sup> Yukan ni kundaa nava ni ka'an Jesús, chi ni kachi ya nasa kuū ya. <sup>33</sup> Ni kana da Jesús, ti ni jikajnu'un da ya:

—¿Maa ra kuu ja ta'u jniñu nuu yivi hebreo nu? —ni kachi da.

<sup>34</sup> Ti ni kachi Jesús:

—¿Sia'an ndo'o ini maa ra, xi inga yivi ni kachi ja sia'an kuu nu? —ni kachi ya.

**35** Ti ni kachi Pilato:

—Ansu chaa hebreo kuu ri ja ka'an ra sia'an. Sutu ka kuñ'a'nu jiin jna'an maa ra hebreo un ni ka nakua'a da ro'o nuu ri ja'a. ¿Ndo ni kuu, xi ndoo ni sa'a ra nusa? —ni kachi da.

**36** Ti ni kachi Jesùs:

—Jniñu ndiso ri tu yi'i jiin ñuyivi ja'a. Chi sa ti sia'an, ti va kanaa taká yivi ka jika jiin ri ja nama i ru'u, ti tu kua'a i jnu'un ja jniñi yivi hebreo ru'u. Ko ansu sia'an kuu, chi jniñu ndiso ri tu yi'i jiin ñuyivi ja'a —ni kachi ya.

**37** Yukan ti ni kachi Pilato jiin ya:

—¿Nusa ti ndiso jniñu ra ja ta'u ra jniñu nuu yivi ñuyivi nusa? —kachi da.

Ti ni kachi Jesùs:

—Ni kachi ra ja ta'u ri jniñu nuu yivi. Ti jandaa ndixia kuu, chi ja yukan vají ri nuu ñuyivi ja'a. Ja siki yukan ni kaku ri ja'a ja na ka'an ri taká jnu'un ndaa. Nau yivi ka ndo'o ndaa ini, ti na chunso'o i jnu'un ka'an ri —ni kachi ya.

**38** Ni jikajnu'un Pilato nuu ya:

—¿Nau ja kuu maa jnu'un ndaa nusa? —ni kachi da.

*Ni kachi Pilato ja na kuú Jesùs*

(Mt. 27.15-31; Mr. 15.6-20; Lc. 23.13-25)

Sia'an ni jikajnu'un Pilato, ti ni kee da nuu ka'iin yivi hebreo yukan, ti ni kachi da:

—Tu na kuachi ni'in ri siki chaa ja'a. **39** Ko ro'o ka ñava'a ra iin jnu'un ja na sia ri iin chaa kande vekaa ja kuu kivi viko pascua. ¿Kuni ra ja na sia ri maa chaa ta'u jniñu nuu ra nu? —ni kachi da.

**40** Yukan ti ni ka kuвая kuiti yivi un, ti ka kana:

—¡Koto sia ni chaa jña! ¡Va'a ga sia ni Barrabás! —ni ka kachi.

Vasu Barrabás ni kuu da iin chaa kui'n'a.

## 19

**1** Yukan ti Pilato ni kachi da ja na kani soldado un Jesùs jiin yo'o ñii. **2** Ti soldado un ni ka sa'a da iin corona iñu, ti ni ka chuxndee da xini ya. Ti ni ka naskui'na da ya iin sa'ma kua'a tijnuu, nanu ja kuu ya iin rey. **3** Ni ka tu'va da nuu kandichi Jesùs, ti ni ka kachi da:

—Na kuchaku na'an chaa kuu rey ta'u jniñu nuu yivi hebreo —ni ka kachi da.

Ti ka kani da xiiki nuu ya.

**4** Ni kee tuku Pilato, ti ni kachi da nuu yivi hebreo un:

—Vee nchaka ri chaa ja'a nava na kuni ra ja tu na kuachi ni'in ri siki da —ni kachi Pilato.

**5** Yukan ti ni kenda Jesùs. Ñu'un ya corona iñu ti ñu'un ya iin sa'ma kua'a tijnuu ndi'i. Ti ni kachi tuku Pilato nuu yivi un:

—Nde'e va'a nuu da naa ra, chi ja'a kandichi da —ni kachi Pilato.

**6** Ti sutu ka kuñ'a'nu nde'e da taká policía, ni ka jini da nuu ya, ti ni ka jakunchaa da ka kanako'o da:

—¡Na kuú da! ¡Na kuú da!

Ti ni kachi Pilato:

—Nusa ti jniñu maa ra da naa ra ti ka'ní ra da, chi tu na kuachi ni'in kuiti ri siki da —ni kachi Pilato.

**7** Ko ni ka kachi yivi hebreo un:

—Nuu ley yo kachi ja na kuú da, chi ni kachi da ja Se'e Yandios kuu da —ni ka kachi da.

**8** Nu ni jiniso'o Pilato jnu'un un ni keja'a yu'u da, chi ni ka kachi ja yivi un Se'e Yandios kuu Jesús.

**9** Ni ndivi tuku da ini palacio, ti ni jikajnu'un da Jesús:

—¿Na ñuu vaji ra nusá? —kachi da.

Ko tu ni ka'an kuiti Jesús. **10** Yukan ti ni kachi Pilato jiin ya:

—¿Ndoo tu ka'an ra ja ka'an ri? ¿Va nu tu jini ra ja iyo ichi ri ja sia ri ro'o ki'in ra? ¿Ti suni iyo ichi ri ja ka'ní ri ro'o nu? —ni kachi da?

**11** Yukan ti ni ka'an Jesús:

—Nu tu ni ja'a Yandios iin jniñu nuu ra nikú, ti va ni tu kuu sa'a ra justicia ja'a ri. Yukan kuu ja chaa ni ka nakua'a ru'u nuu ra, yukan kuu ja ja ni'in ga ka iyo kuachi siki ja kuu ro'o —ni kachi ya.

**12** Ti undi hora yukan ni keja'a ndi'i ini Pilato ti nduku da nasa sia da ya. Ko yivi hebreo un ka kana ko'o ka'iin:

—¡Nu sia ni chaa ja'a, ti tu kuu ni iin chaa mani jiin César, chaa kuña'nu ga un! Ti Jesús ja'a, chi ni ndonda da siki César, ti kuni ta'u da jniñu nuu ni tu'u nacion yo —ni ka kachi yivi hebreo un.

**13** Ni jiniso'o Pilato jnu'un ka ka'an yivi hebreo un, ti ni kachi da ja na keni'in soldado un Jesús undi ichi yux'e. Yukan ti ni nukoo Pilato nuu sillón da nuu ta'u da jniñu, nuu mani yuu ni jankava. Yukan nani Gabata nuu yu'u ka ka'an maa yivi hebreo un.

**14** Kivi un ka satu'va yivi naa i ja kuu viko pascua, ti ja kuan kuyajni koxiuu kuu hora un. Ni ka'an Pilato ti ni kachi da jiin yivi hebreo un:

—¿Nde'e naa ra! Ja'a kuu maa chaa ta'u jniñu nuu ra naa ra —ni kachi da.

**15** Ti ni ka kana ko'o yivi un:

—¡Na kuú da! ¡Na kuú da! ¡Katacaa ni da na kuú da nuu nda'a cruz! —ni ka kachi.

Ti ni kachi Pilato:

—¿Ka jani ini ra ja ka'ní ri chaa ta'u jniñu nuu ra nu? —ni kachi da.

Ti ni ka ka'an sutu ka kuña'nu:

—Maa iin ni César kuu ja ta'u jniñu nuu na naa na, ti tukaa iyo inga —ni ka kachi da.

**16** Yukan ti ni ta'u Pilato jniñu ja na kuú Jesús. Ni ka jnií soldado romano un maa ya ti kuankoyo da jiin ya, ja na katacaa da ya nuu nda'a cruz.

### *Ni katacaa da Jesús nda'a cruz*

(Mt. 27.32-44; Mr. 15.21-32; Lc. 23.26-43)

**17** Ni kenda Jesús, ndiso ya cruz ya. Kuankoyo da jiin ya iin ñu'un nani "Yiki Xini", ja yu'u chaa hebreo un nani Gólgota. **18** Yukan ni ka jatacaa da ya nuu nda'a cruz. Ti suni ni ka jatacaa da uu ga chaa nuu uu ga cruz, iin iin da xiin ya, ti maa ya ni kendo mañiu.

**19** Suni ni kachi Pilato ja na koso letra xini cruz ya nuu kachi: "Jesús, kuu chaa ñuu Nazaret, chaa ta'u jniñu nuu yivi hebreo." **20** Yukan ti kua'a yivi hebreo un ni ka ka'u da jnu'un yoso nuu tutu un, vanuxia yajni yu'u ñuu Jerusalén kuu nuu ni ka jatacaa da ya. Ti jnu'un un yoso nuu sa'an hebreo, jiin griego jiin latín.

**21** Yukan ti ni ka kachi sutu ka kuña'nu un nuu Pilato:

—Tu iyo va'a jnu'un ka'an tutu un, ja ta'u da jniñu nuu yivi hebreo. Va'a ga ja na ka'an: "Ni kachi da ja ta'u da jniñu nuu yivi hebreo" —ni ka kachi sutu un.

**22** Ko ni kachi Pilato nuu da naa da:

—Sia'an na kendo nava yoso, chi ja ni chiso ri —ni kachi da.

**23** Nu ni ndi'i ni ka jatacaa soldado un Jesús nuu nda'a cruz, ni ka ki'in da sal'ma ya, ti ni ka sa'a da kuun pedazu. Ti iin iin pedazu ni ka tejna'an nuu

jna'an da. Suni ni ka ki'in da sa'ma kuita ya. Ko vanuxia sa'ma un tu ni kuiku, chi so ni kee ni. <sup>24</sup> Ti yukan ni ka ndajnu'un soldado un:

—Ko tu ka'ncha yo sa'ma ja'a, chi va'a ga na chu'un yo suerte siki, ti na nde'e yo na iin yo ni'in —ni ka kachi da.

Sia'an ni ka sa'a da, ti ni kundaa nava yoso nuu tutu ii Yandios, ja kachi: "Ni ka ki'in da sa'ma ri ti ni ka tejna'an nuu jna'an da. Ti ni ka chu'un da suerte siki sa'ma kuita ri", kachi tutu. Ti sia'an ndixia ni ka sa'a soldado un.

<sup>25</sup> Ti yajni ja'a cruz nuu yindaka Jesú, yukan kandichi nana ya, jiin ku'u ña María, ñasi'i Cleofas, jiin María ña'an ñuu Magdala. <sup>26</sup> Ni jini Jesú nuu nana ya kandichi ña xiin iin ndaja'a, chaa ni kuu mani xaan ya jiin niku. Ti ni kachi ya jiin nana ya:

—Naa, yukan kandichi se'e ni —ni kachi ya.

<sup>27</sup> Ti ni kachi ya jiin chaa un:

—Yukan kandichi nana ra —ni kachi ya.

Ti undi hora yukan ni nakuaka da ña iñi ve'e da, ti ni jito da ña nanu nana maa da.

### *Niji'i Jesú*

(Mt. 27.45-56; Mr. 15.33-41; Lc. 23.44-49)

<sup>28</sup> Yukan ti ni jini Jesú ja ja ni jinu taká jniñu vaji ya, ti ja na kundaa nava ka'an nuu tutu ii Yandios. Ti ni kachi ya:

—Ichi ri nducha —ni kachi ya.

<sup>29</sup> Ti yukan kandichi iin tindo'o, ñuu'un chitu nducha iya. Ni ka chuntoo da kachi nuu nducha iya un, ti ni ka chaa da xini iin nda'a yujnu hisopo, ti ni ka chaa da yu'u ya ja na ko'o ya.

<sup>30</sup> Yukan ni ji'i Jesú nducha iya un, ti ni kachi ya:

—Ja ni ndi'i ni kuu nakoo vijna na —ni kachi ya.

Ti ni skanindee ya xini ya, ti ni ji'i ni ya.

### *In soldado un ni kuji lanza yiki jika Jesú*

<sup>31</sup> Chaa hebreo un ni ka ka'an da jiin Pilato ja na ta'u da jniñu, ja na ka'nu da yiki sa'nda chaa ka ndakoyo nuu nda'a cruz un. Yukan ti na kuu da nu tu ja'i kuu da, ti na kuni'in da chaa nuu nda'a cruz un. Sia'an ni ka ndo'o ini yivi hebreo un, chi ja ka satu'va da ja kuu viko pascua, chi iñga kivi ni ga kuu iin kivi ii, iin kivi ii xaan ga. Ja yukan kuu ja tu ka kuni da ja kendo ndiyi un kundakoyo i nuu nda'a cruz yukan kuu kivi ndetatu.

<sup>32</sup> Yukan ti ni jakoyo soldado un ni ka ja'nú da si'in ndinduu chaa ka ndakoyo jiin Jesú. <sup>33</sup> Ko nu ni ka tu'va da nuu Jesú, ti ni ka jini da ja, ja ni ji'i ya. Yukan ti tu ni ka ja'nú da si'in ya.

<sup>34</sup> Ko iin soldado un ni kuji da lanza da nuu yiki jika ya, ti ni kaña niñi jiin nducha nuu ni tuji un. <sup>35</sup> Ti chaa jani jnu'un ja'a kuu iin chaa ni jini, ti jani ndaa da jnu'un nava ni kuu un, ti nava sia'an na kandixia ra Jesú naa ra.

<sup>36</sup> Sia'an ni kuu, ti yukan ni kundaa nava yoso nuu tutu ii Yandios, ja kachi: "Tu ka'nú yivi ni iin yiki ya." <sup>37</sup> Ti suni iyo iñga nuu yoso: "In kivi ti nde'e yivi nuu ya ni ka stuji yivi yikijika ya", kachi.

### *Ni ka chunduji da Jesú*

(Mt. 27.57-61; Mr. 15.42-47; Lc. 23.50-56)

<sup>38</sup> Yukan na ti José, chaa ñuu Arimatea, ni kanda'u da jiin Pilato ja na kuni'in da yiki kuñu Jesú. Chi vanuxia ni kuu da chaa ni kandixia Jesú niku. Ko tu ni ka jini yivi un ja mani da jiin ya, chi tu ni stuu da maa da, chi yu'u da sa kuni jna'an da hebreo un. Ti ni ja'a Pilato jnu'un nuu da ja na kuni'in da yiki kuñu ya. <sup>39</sup> Ti suni Nicodemo ni ja'an da jiin José. Nicodemo un ni kuu

chaa ni ja'an ka'an jiin Jesús iin jakuaa na ti kuu ga ya. Ni jaa da jiin yajni oko uxi kilo crema vixi, ja niakanuu jiin suxia mirra jiin áloe.

**40** Yukan na ti José jiin Nicodemo, ni ka ki'in da yíki kuñu Jesús, ni ka suku da jiin sa'ma finu, ti ni ka jaka da crema un ni chii sa'ma un nava iyo jnu'un ja ka sa'a yivi hebreo, ka chunduji i ndiyi i.

**41** Yajni nuu ni ji'i Jesús un ni iyo iin huerta, ti nuu huerta yukan, kande iin yau ja ni ka jacha yívi iin jika xa'va. Ni kuu iin yau jaa, nuu ti kunde ga ni iin ndiyi. **42** Yukan ni ka chundee da yíki kuñu Jesús, chi vanuxia kande yajni, ti vijna ja kuan kuyajni keja'a kivi ii ja ka ndetatu yívi hebreo un. Ti kachi ley ja tu kuu chunduji da ndiyi nuu ja ni jaa kivi ii un.

*Ni nandoto Jesús  
(Mt. 28.1-10; Mr. 16.1-8; Lc. 24.1-12)*

## 20

**1** Ni kuu jaña'an domingo, ti María, ña ñuu Magdala, ni ja'an ña nuu ñunduji Jesús. Ni ña'an xaan ga ja ni iin ña ga na ni ja'an ña. Ni jaa ña ti ni jini ña ja tukaa ga ndi'yu yuu ni ka jasi da yu'u yau un. **2** Ti yukan ni jinu ña kua'an ña nuu kancha Simón Pedro jiin nuu inga chaa ni iyo mani ga Jesús jiin un niku. Ti ni kachi ña:

—Ni ka tava yívi Jito'yo nuu ni ñunduji ya, ti tu ka jini yo nanu ni ka janchaka da ya —ni kachi ña.

**3** Yukan ti ni ka kee Pedro jiin inga ndaja'a un kuankoyo da nuu ñunduji Jesús. **4** Ndinduu da ka jinu tayu da kuankoyo, ko inga chaa un chi ni'in ga ni jinu da, ti xnakan da ni jaa sa ni jaa Pedro nuu ñaña un. **5** Ni jito ni'n'i da ini yau un, ti ni jini da kanchuku sa'ma un, ko tu ni kivi da. **6** Ti jata da ndikun Simón Pedro ni jaa da, jaa da ti ni kivi ni da ini yau un. Ti suni ni jini da ja kanchuku sa'ma un. **7** Ti sa'ma ni suku xini Jesús, ti tu kanchuku tutu jiin uu ga sa'ma un, chi ni stuu sa'ma un ti katuu siin. **8** Yukan na ti sa ni kivi chaa ni jaa undi nuu yu'u yau un. Ni jini da ja sia'an ni kuu, ti ni kandixia da ja ni nandoto Jesús. **9** Sia'an ni kuu vasu ti chaku ga ini da jnu'un ka'an nuu tutu ii Yandios, ja nandoto Jesús nuu ka'iin ndiyi un.

**10** Yukan na ti ni ka nandeokuñi ndaja'a un ve'e da.

*Ni ndenda Jesús nuu María, ña ñuu Magdala  
(Mr. 16.9-11)*

**11** Yukan ti ni kendo María kandichi ña ichi fuera nuu ni ñunduji Jesús, ti ni jakunchaa ña nde'e xaan ña. Nde'e ña nde'e ña, yukan ti ni jito ni'n'i ña ini yau un. **12** Ti ni jini ña uu ángel Yandios, ka ñu'un da sa'ma kiyi la'lì, ti ka nukoo ya nuu ni katuu Jesús. Ìn da nukoo da nuu ni kendo xini Jesús, ti inga da nukoo nuu ni kendo ja'a ya. **13** Ti ka jikajnu'un da maa ña:

—Ro'o ñasí'i, ¿ndo kuu ja nde'e ra?

Ti ni kachi ña:

—Ja ni ka ki'in da yíki kuñu jito'o na, ti tu jini na nanu ni ka janchaka da ya —ni kachi ña.

**14** Skan ni ka'an ña sia'an, ni ndeokoto ña, ti ni jini ña Jesús kandichi ya yukan, so ja tu jini ña ja maa Jesús kuu ya. **15** Ti ni kachi Jesús jiin ña:

—Ro'o ñasí'i, ¿ndo kuu ja nde'e ra? ¿Nau kuu ja nanduku ra? —ni kachi ya.

Ko maa ña ni ndo'o iní ña ja chaa ndito huerta yukan kuu, ti ni kachi ña:

—Taa, nu maa ni kuu ja ni chajijo ndiyi ja'a, kachi ni nuu na nanu ni janchaka ni ya, ti nava na kin nu kí'in na ya —ni kachi ña.

**16** Yukan na ti ni kachi Jesús:

—¡María! —ni kachi ya.

Ni ndeokoto ña nuu ya, ti ni ka'an ña sa'an hebreo:

—¡Raboni! —ni kachi ña.

Ti jnu'un un kuni ka'an: "Maestro."

**17** Yukan ti ni kachi Jesús:

—Koto jnii ra ru'u, chi changa ga ndaa ri no'on ri nuu kancha Tata ri, ko ja yajni ki'in ri. Vijna ti kua'an nuu kanchuku ñani ri chaa ni ka skua'a jiin ri un naa da, ti kachi ra nuu da ja kino'on ri nuu kancha Tata ri Yandios. Maa yaa kuu Tata ra naa ra suni —ni kachi ya.

**18** Yukan ti María, ñaa ñuu Magdala un, kua'an ña, ti ni kaxnu'un ña nuu chaa ni ka skua'a jiin ya un, ja ja ni jini ña nuu maa Jito'yo. Ti ni jani ña jnu'un nava ni kachi ya nuu ña.

#### *Ni ndenda Jesú斯 nuu chaa ka skua'a jiin ya*

(Mt. 28.16-20; Mr. 16.14-18; Lc. 24.36-49)

**19** Nu ni kuñaa ja'iní kivi domingó, ni ka ndututu chaa ni ka skua'a un. Ko va'a ndi'yu yuxé'e ve'e nuu kanchuku da un, chi vanuxia ka yu'u da jna'an da chaa hebreo un. Ko ni kivi Jesús. Ti ni jankuiñi ya ma'ñu da naa da, ti ni kachi ya:

—Kukuee kanchuku ra —ni kachi ya.

**20** Sia'an ni kachi Jesús. Yukan ti ni xna'an ya nda'a ya nuu da naa da. Ni xna'an ya yíki jika ya suni. Ja yukan ti ni ka ndusii tuku ini da, ja ni ka jini da nuu maa jito'o da. **21** Yukan ti ni kachi tuku Jesús jiin da:

—Na kukuee kunchuku ra naa ra. Sia'an nava ni taji Tata ri ru'u, ti suni sia'an taji ri ro'o naa ra kinkoyo ra —ni kachi ya.

**22** Yukan ti ni tiví ya nuu da naa da, ti ni kachi ya:

—Na kunchaa Espíritu Santo jiin ra naa ra. **23** Ko na tatu ri iiñ jniñu nuu ra naa ra ja na saká'nú ini ra nuu yívi nava na kuanka'nú ini Yandios nuu kuachi da. Ti nuu yívi ja tu ni janka'nú ini Yandios, ni tu kuanka'nú ini ra nuu da naa da, ti nchakuachi siki da —ni kachi ya.

#### *Ni ndenda Jesú斯 nuu Tomás*

**24** Suni Tomás ni kuu da iiñ ndaja'a Jesús ja ni ka skonani yívi maa da (Tomás), chaa kuati. Ti tu kancha da jiin uu ga chaa un kivi ni ka ndututu da na ni kii Jesús. **25** Ko kuee ga sa ni ka nakani uu ga chaa un jnu'un nuu da:

—Ni ka jini ri Jito'yo —ni ka kachi da.

Ti ni kachi Tomás jiin da naa da:

—Undi nu tu kuni ri nda'a ya, ti chunde ri xini nda'a ri nuu ni kivi nduyu kaa un, ti chunde ri nda'a ri yíki jika ya, ti tu kandixia ri ja ni nandoto ya nuu ñuji'i —ni kachi da.

**26** Nu una kivi ti ni ka ndututu tuku da, kanchuku da ini iiñ ve'e, ti kancha Tomás jiin da naa da kivi un. Ti vasu va'a ndi'yu yuxé'e, ko ni kivi Jesús, ni jankuiñi ya ma'ñu da naa da, ti ni kachi ya:

—Kukuee kanchuku ra nu —ni kachi ya.

**27** Yukan ti ni kachi ya jiin Tomás:

—Nde'e ini nda'a ri ti skiví xini nda'a ra. Skaa nda'a ra ti chunde yíki jika ri, ti kandixia. Koto ma kachi ra ja tu kandixia ra —ni kachi ya.

**28** Ti ni kachi Tomás:

—Jito'o na Yandios! —ni kachi da.

**29** Ti ni kachi Jesús jiin da:

—Tomás, undi ni jini ra ru'u, vijna sa ni kandixia ra. Ko iyo yívi ja vasu tu kuni da jiin nuu da ru'u, ti kandixia da. Ti na kachi ri ja ndatu ga koo yívi un —ni kachi ya.

### *Ni chaa Juan tutu ja'a ja na kandixia yivi Jesús*

<sup>30</sup> Ti iyo kua'a xaan ga jniñu ña'nú ni sa'a Jesús ja ni ka jini yivi ni ka skua'a jiin ya. Ko tu ni chiso ndi'i ri un nuu tutu ja'a. <sup>31</sup> Ko taka jnu'un ni chiso ri ja'a kuu ja na kandixia ra naa ra ja Jesús kuu Cristo, ya ni taji Yandios jiin jniñu ña'nú, ja kuu ya maa Se'e Yandios. Ti nu na kandixia ra maa ya, kuu kivi ra nda'a ya vijná, ti kuchaku ra jiin ya ja kuu saa ni.

### *Ni ndenda Jesús nuu uxia chaa ni ka skua'a jiin ya*

## 21

<sup>1</sup> Yukan ti ni ya'a jaku kivi, ti ndaja'a Jesús ni ka ndejna'an tuku da jiin ya undi yu'u mini Tiberias. Ti ja'a na kachi ri nasa ni ndenda ya. <sup>2</sup> Ni ka ndututu Simón Pedro, jiin Tomás, chaa ni kaku kuati un, jiin Natanael, chaa ñuu Caná ja kuu jiin ndañuu Galilea, ndinduu se'e Zebedeo, jiin uu ga ndaja'a ya un.

<sup>3</sup> Sia'an ni ka ndututu da, ti ni kachi Simón Pedro jiin da:

—Maa ri, kin jnií ri cháká va'ga.

Ti ni ka kachi sava ga da un:

—Ti nu ki'in ra, ti na cho'o taka yo naa yo suni —ni ka kachi da.

Ti kuankoyo da, ni ka kivi da iin barco lulu, ti kuan jnií da cháká. Ko jakuaa un tu ni ka jnií kuiti da ni iin ti.

<sup>4</sup> Ti kuan ndii ni ga ni kenda Jesús kandichi ya yu'u mar yukan. Ko tu ni ka nakuni da ja Jesús kuu ya. <sup>5</sup> Yukan ti ni kachi Jesús:

—Amigo, ¿tu ni ni'in ra cháká ja kají yo nu? —ni kachi ya.

Ti ni ka kachi da:

—Tu kuiti.

<sup>6</sup> Ti ni kachi Jesús:

—Chunde ñunu ra ichi nda'a kua'a, ti na ni'in ra ti —kachi ya.

Ti sia'an ni ka sa'a da. Ni ka chunde da ñunu un nuu inga barco da, ti yukan tukaa kuu kuiti natava da, chi ni kuu vee ii ja xaan kua'a cháká ni ka kivi ini.

<sup>7</sup> Suni yukan kande chaa mani ga jiin Jesús, ti ni kachi da nuu Pedro:

—¡Nde'e! ¡Maa Jito'yo kuu ja kandichi yukan!

Nu ni jiniso'o Simón Pedro ja maa Jito'yo kuu ya, ti ni nakui'na da sa'ma da, chi tu ñu'un da sa'ma da nikuu. Ti ni ndava ni da kua'an da nuu nducha un, ti sucha da kua'an da undi yu'u mini. <sup>8</sup> Ti uu ga chaa un kuankoyo kuee da jiin barco da, chi vanua yajni kendo yu'u mini un, va kuu iin ciento ni ga metro. Ti ka jista da ñunu da kuankoyo da jiin. Sia'an undi ni ka jakoyo da yu'u mini, vanuxia vee xaan ñunu un, chi kua'a xaan cháká ka ñu'un.

<sup>9</sup> Nu ni ka kee da ini barco un, ni ka jini da ja kayu ñu'un. Ti ja kasun iin cháká, ti suni ja iyo staa. <sup>10</sup> Yukan ti ni kachi Jesús jiin da naa da:

—Kuan ki'in jaku cháká ja ni ka jnií ra vinañu'ní, ti na skasun yo ti —ni kachi ya.

<sup>11</sup> Ti ni kivi Simón Pedro ini barco, ti ni jista da ñunu un undi nuu ñu'un ichi. Ko mani maa cháká na'nú ka ñu'un chii ñunu un. Undi iin ciento uu xiko uxi uni ti. Ti vasu kua'a xaan ti, ko tu ni te'nde ñunu un. <sup>12</sup> Yukan ti ni kachi Jesús nuu da naa da:

—Ña'an naa ra, ti na ka sini yo —ni kachi ya.

Ko ka yu'u da ti'lí ja kajnu'un da Jesús nuu maa ya kuu xi tuu, ko ja ka jini ndaa da ja maa jito'o da kuu ya.

<sup>13</sup> Yukan ti ni tu'va Jesús yuñu'un un, ni ki'in ya staa, ni ja'nú sava ya, ti ni tejna'an ya nuu da naa da. Suni sia'an ni sa'a ya jiin cháká un. <sup>14</sup> Ja'a kuu jinu kuu uni ja ni ndenda Jesús nuu chaa ni ka skua'a jiin ya, ja ni nandoto ya nuu ñuji'i.

### *Ni ka'an Jesús jiin Pedro*

15 Nu ni ndi'i ni ka yasini da, yukan ti ni kachi Jesús jiin Simón Pedro:

—Simón, se'e Jonás, ¿kunda'u ga ini ra ru'u ja kuu taka ga ndaja'a ri ja'a, ja ka kunda'u ini da ru'u nu?

Ti ni kachi Pedro:

—Jito'yo, jini ni ja kunda'u ini na ni'in.

Ti ni kachi Jesús:

—Nusa ti chindree ra yivi ka yi'i nda'a jiin ri, chi ka kuu i nanu lelú.

16 Yukan ti ni ka'an tuku Jesús jiin Pedro:

—Simón, se'e Jonás, ¿kunda'u ini ra ru'u nu?

Ti ni ndeokani Pedro:

—Ja jini ni ja kunda'u ini na maa ni, Jito'yo.

Ti ni kachi Jesús:

—Nusa ti koto va'a ra yivi yi'i nda'a ri, chi ka kuu i nanu rii —ni kachi ya.

17 Ko ni ka'an tuku Jesús jiin da, ti ja'a kuu uni jinu ja ka'an ya, ti ni kachi ya:

—Simón, se'e Jonás, ¿kunda'u ndixia ini ra ru'u nusa?

Ti ni kukui'ya ini Pedro ja ni kachi ya uni jinu: “¿Kunda'u ndixia ini ra ru'u nu?” Ti ni kachi Pedro:

—Jito'yo, maa ni jini ndi'i nasa ndo'o ini na, ti jini ni ja kunda'u ndixia ini na maa ni.

Ti ni kachi Jesús:

—Nusa ti koto yivi yi'i nda'a ri vijnna, chi ka kuu i nanu rii. 18 Chi jandaa na kachi ri nuu ra vijnna, ja undi na suchi ra ni naki'in maa ra sa'ma ra, ti ni jika ra ichi ni kuu ini maa ra. Ko na nchii ra, ti ansu ga ja kuu ini maa ra, chi inga yivi kunda'a da ro'o nuu tu kuu ini ra ki'in ra, ti naskaa ra nda'a ra kivi kuu ra —ni kachi ya.

19 Sia'an ni kachi Jesús ja ni stuu ya nasa kuū Pedro, ja kuū da nuu nda cruz. Ti stuu da ja kuña'nu xaan Yandios, chi ni jandatu da nuu ya vasu na kuū da. Yukan ti ni ka'an ga ya:

—Vijnna ti kundandikun ru'u, ti sa'a ra jniñu ni tatu ri nuu ra —ni kachi ya.

### *Chaa mani ga jiin Jesús*

20 Yukan ti ni ndeokoto Pedro, ti ni jini da ja ichi jata da vaji chaa mani ga jiin Jesús. Chaa un kuu ja ni kuncha xiin Jesús na ni ka kuxini da jiin ya kivi pascua un. Chaa un kuu ja ni jikajnu'un Jesús: “Jito'yo, ¿nau kuu ja nakua'a ni'in nuu yivi ka jito u'u maa ni?”

21 Ni jini Pedro nuu chaa yukan, ti ni jikajnu'un da Jesús:

—Jito'yo, ¿ti nasa koo jiin chaa yukan nusa? —ni kachi da.

22 Ti ni kachi Jesús jiin Pedro:

—Nu kuni ri ja na kuchaku da undi kivi nchaa tuku ri, va tundo sa'a un. Ko ro'o, ndoo jitu ini ra. Kundikun ru'u, ti sa'a ra jniñu ni tatu ri nuu ra —ni kachi ya.

23 Ja sik'i yukan ti ni ka ka'an yivi ka kandixia Jesús ja tu kuū chaa yukan. Ko tu ni kachi Jesús ja tu kuū da, chi ni kachi ya: “Nu kuni ri ja na kuchaku da undi kivi nchaa tuku ri, va tundo sa'a un. Ko ro'o, ndoo jitu ini ra”, ni kachi ya.

24 Maa chaa mani ga jiin Jesús, kuu chaa ka'an jnu'un ja'a, ti tako yukan ni chaa da nuu tutu. Chi ni jini va'a da nasa ni kuu undi na saa. Ti yukan ka jini ndaa yo ja ka'an ndaa da.

25 Suni iyo kua'a xaan ga jniñu ni sa'a Jesús. Ko jini ri ja tu kuu chaa yo ndi in ndi iin, tako ja ni sa'a ya, chi va tu kujaa yo ka'u yo, vanua kua'a xaan ga ja ni sa'a ya. Ti sia'an na koo.

Ja'a kuu jnu'un Yandios ni chaa Juan.

## Jniñu ni ka sa'a apóstol JesúS, ya kuu Cristo

### *Vaji Espíritu Santo*

<sup>1</sup> Teófilo, nuu tutu ni sa'a ri undi nuu, ni chiso ri taka jniñu ni sa'a JesúS <sup>2</sup> undi ni ndaa ya andivi. JesúS ni nakaji ya taka apóstol, chaa kujiin jiin ya, ti ni ta'u ya jniñu nava sa'a da naa da. Ti ni ta'u JesúS jniñu nuu taka apóstol ya nava ni kachi maa Espíritu Santo. <sup>3</sup> Nuu uu xiko kivi ja ni ji'i ya, ni ndenda kaji ya nuu da naa da ja chaku ya. Ni ka'an ya nasa ta'u Yandios jniñu.

<sup>4</sup> Ni ka'iin tutu ga JesúS jiin taka apóstol ja kajin jiin ya un, ti ni kachi ya:  
—Tu kuxio ra ñuu Jerusalén naa ra. Kundatu ra naa ra undi na jinu jnu'un ni ka'an Tata ri, nava ni kachi ri nuu ra naa ra. <sup>5</sup> Jandaan kuu ja Juan ni skuanducha da jiin nducha, ko jaku ni kivi ti ni'in ra Espíritu Santo naa ra —sia'an ni kachi JesúS.

### *Ndaa JesúS andivi*

(Mt. 16.19-20; Lc. 24.50-53)

<sup>6</sup> Ka ndututu tuku da jiin JesúS, ti ni ka jikajnu'un da ya:  
—¿Jito'yo JesúS, vijna kuu ja sa'a ni ja na kuña'nu nación Israel nu?  
<sup>7</sup> Ti ni kachi JesúS:  
—Tu kanu kuu ja kuni ra naa ra, chi maa Yandios jini ya nava sa'a ya.  
<sup>8</sup> Ko kanu kuu ja na ni'in ra Espíritu Santo naa ra. Ti kuña'nu ra naa ra, ti ndakuni'in ra sivi ri, ti xna'an ra jnu'un ri nuu yivi ñuu Jerusalén, ñuu Judea, ñuu Samaria, ti undi nuu ni tu'u ñuyivi.

<sup>9</sup> Nu ni ndi'i ni ka'an ya jnu'un yukan, ni ka nde'e da nuu ya, ni ndondaa ya ti kua'an ya andivi. Ni kivi ya chii iin viko, ti tukaa ni ka jini da ya. <sup>10</sup> Ka ndakoto da andivi ti ni ka jini da uu chaa ka ñu'un sa'ma kuijin kajin nuu da. <sup>11</sup> Ti ni ka kachi chaa un:

—Ro'o chaa Galilea, ndoo ka ndakoto ra andivi naa ra. Nanu kua'an JesúS, suni sia'an nchaa tuku ya —sia'an ni ka kachi chaa un.

### *Ka nakaji da Matías ja na nukuiñi da nuu Judas*

(Mt. 27.3-10)

<sup>12</sup> Ni ka kee da yuku Olivos, ti kuankoyo da ñuu Jerusalén ja kendo yajni yukan, nava iyo ley ja kaka da iin kivi ndetatu. <sup>13</sup> Ti yukan ni ka kaa da siki ve'e kuu uu nuu kanchuku da. Yukan ka'iin Pedro, Jacobo, Juan, Andrés, Felipe, Tomás, Bartolomé, Mateo, Jacobo se'e Alfeo, Simón, chaa ni kuu partido político ni nani cananista, jiin Judas ñani Jacobo. <sup>14</sup> Taka da sia'an ni kejna'an ini da, ti ni ka najna'an da ka jikanta'u da nuu Yandios jiin ñani JesúS, nana ya nani María, jiin taka ga ñasi'i un.

<sup>15</sup> Kivi jña ni ndokuñi Pedro ma'ñu iin ciento oko yivi un, ti ni kachi da:

<sup>16</sup> —Kuunso'o naa ra, ni kuu nava ni chiso David nuu tutu ja ni kachi Espíritu Santo siki Judas, ja ni yoxnuu da nuu chaa ni ka jniñ presu JesúS. <sup>17</sup> Suni ni yaku Judas ni sa'a da jniñu ja'a. <sup>18</sup> Ti jiin xu'un ni ka cha'u yivi un da, ni jaan da iin ñu'un, ko yukan ni skua'ña da maa da, ni te'nde yo'o un, ni kanakava da, ti ni ndi'i jiti da ni kaña. <sup>19</sup> Nu ni ka jini yivi Jerusalén yukan,

ti ni ka kachi da ja na konani ñu'un un Acéldama, ja kuni ka'an ndu'va niñi.

<sup>20</sup> Chi nuu tutu Salmo ka'an sia'an:

Na kendo ve'e da, tundo kuncha ini.

Suni kachi sia'an:

Inga na naki'in jniñu da.

Kachi tutu.

<sup>21</sup> Ja'a ka'iin chaa ni ka yaku jiin yo undi jana'an na ni kuncha Jesúsjii yo,

<sup>22</sup> undi na ni skuanducha Juan ya, ti undi kua'an ya andivi. Nini kuu ja na nukuiñi iin da jiin yo na kani da jnu'un ja ni nandoto ya —ni kachi Pedro.

<sup>23</sup> Yukan ni ka tava da uu jna'an da un, José nani da Barsabás ti suni nani da Justo, jiin Matías. <sup>24-25</sup> Ti ni ka jikanta'u da nuu Yandios sia'an:

—Jito'yó Jesúsjii, ni'in ja jini ni ini takayivi. Ja uu chaa ja'a, nau chaa ja'a na sa'a da jniñu apóstol ni xnaa Judas, ja ni kuu siin da kua'an da nuu ka'iin yivi ka iyo kuachi un —sia'an ni ka jikanta'u da.

<sup>26</sup> Ni ka chu'un da suerte, ti ni kendo Matías ja undi hora jña ni ndiví da jiin ndi uxi iin chaa un naa da.

### Ni chaa Espíritu Santo

## 2

<sup>1</sup> Kua'a yivi ka kandixia Jesúsjii, ni ka ndututu da kivi Pentecostés, kivi ka nakua'a da ta'u triu. <sup>2</sup> Kanchuku da ini ve'e, ti ni ka jiniso'o da kuu iyo andivi, nanu nuu vaji iin tachi xaan. Ti ni kulajan ve'e un. <sup>3</sup> Ti ni ka jini da yaa ja kanda'a nuu ñu'un, ti ni jicha nuu siki da naa da. <sup>4</sup> Ti hora un ni ka ni'in da Espíritu Santo, ti siin siin yu'u ni ka ka'an iin iin da, nava ni kachi maa Espíritu Santo.

<sup>5</sup> Ti ñuu Jerusalén yukan, ka'iin taka chaa Israel ja vekoyo da ni ñuyivi.

<sup>6</sup> Tendi'i yivi un ni ka kututu nu ni ka jiniso'o ja ni kulajan un, ti tu ka kujnuni ndoo sa'a, ja sia'an ni ka jiniso'o ja ka ka'an chaa un yu'u ka ka'an iin iin yivi un. <sup>7</sup> Ni ka naa ini, tu ka chaku ini, ti ni ka jikajnu'un jna'an:

—¿Ansu chaa Galilea ka kuu tendi'i ja ka ka'an ja'a? <sup>8</sup> ¿Ndoo ja ni ndi'i ka ka'an jnu'un ka ka'an iin iin yo naa yo? <sup>9</sup> Ja'a ka'iin yivi ñuu Partia, Media, Elam, Mesopotamia, Judea, Capadocia, Ponto, Asia, <sup>10</sup> yivi ñuu Frigia, Panfilia, Egipto, yivi ñuu Lybia, ja kendo chii ñuu Cirene. Suni ka'iin chaa romano ja kanchuku ja'a; sava ka kuu chaa Israel, ti sava ni ka ka'an yu'u chaa Israel. <sup>11</sup> Suni ka'iin yivi Creta jiin Arabia ja'a, ko tindi'i yo ka jiniso'o ja ka ka'an taka jniñu ña'nus a Yandios, ko yu'u ka ka'an iin iin yo naa yo ka ka'an —kachi naa.

<sup>12</sup> Ni ka naa ini yivi un, ti tu ka ni'in jniñu sa'a, ti ka jikajnu'un jna'an:

—¿Na jnu'un kuu ndi'i? —kachi ka ka'an.

<sup>13</sup> Ko sava ka kuu ichi ini, ti ka ka'an:

—Ka jini da naa da —kachi naa.

### Jnu'un ni ka'an Pedro nuu yivi

<sup>14</sup> Ni ndokuiñi Pedro jiin ndi'i uxi iin apóstol yukan, ti ni ka'an da nuu yivi un:

—Ro'o chaa Israel naa ra, jiin tindi'i ja kanchuku ñuu Jerusalén. Kunso'o ra naa ra na ka'an ri. <sup>15</sup> Tu ka jini chaa ja'a nava ka ndo'o ini ra naa ra, chi sa kaa iin jaña'an kuu. <sup>16</sup> Su'va iyo, ja'a kuu jnu'un ni kachi profeta Joel na ni ka'an da jnu'un Yandios:

<sup>17-18</sup> Kivi sandi'i ni ga kachi Yandios:

Kachanuu ri Espíritu Santo ni ñuyivi, ti yivi ña'nu yivi kuachi ka junukuachi  
nuu ri, ka'an i jnu'un ri.

Naxna'an jani nuu chaa kuachi, ti suni koo nuu chaa ña'nu.

<sup>19-20</sup> Jniñu ña'nu sa'a ri andivi, kuu iin seña ja na yu'u yivi.

Ti uu ga seña ja kuu ñuyivi kuu ja na chaku ini yivi nava sa'a ri.

Koo nundo'o, chi kuū yivi, ti kayu ñu'un, ti koo xaan ñu'ma.

Nda'vea ndikandii ti ndukua'a yoo. Ndukua'a nanu niñi.

Sia'an kuu nu ni kuyajni kivi nchaa Jesús, ja kuu iin kivi ka'nu ga.

Ti kivi jña kuu ja kii xndichi ya ñuyivi.

<sup>21</sup> Ti taka yivi ka kandixia, ti kakanta'u i nuu ya, kivi jña kuu ja keta'u i.

Sia'an ni kachi Yandios, ni kachi Joel —kachi Pedro.

<sup>22</sup> Ni siin Pedro ka'an da:

—Ro'o chaa Israel, chunso'o naa ra na kachi ri. Na kachi ri nau chaa ni kuu Jesús, chaa ñuu Nazaret. Ni kuu da iin chaa ni kii nuu Yandios nuu ra naa ra. Ti ja ni ka jini ra seña, taka jniñu ña'nu ni sa'a ya, nava ni kachi Yandios. <sup>23</sup> Iyo yivi ja ka sa'a ndeva'a, ti ni ka ja'a ra jnu'un ni ka jatakaa da Jesús nda'a cruz, nava ni kachi Yandios undi jana'an. Ti sia'an ni ni ka ja'nii ra Jesús. <sup>24</sup> Ko Yandios ni naxndoto tuku ya Jesús, ti ni kuxio ya nuu ka'iin ndiyi un, chi tu ni kundee ñuji'i un jiin ya. <sup>25</sup> Suni ni ka'an David nava ni jna'an Jesús na ni kachi da:

Jini na ja kancha Yandios jiin na. Nini kancha ya jiin na. Ti tu ndi'i ini na.

<sup>26</sup> Yukan kuu ja kuu si in na. Ti kaxnu'un na nuu ni ja iyo si in na.

Ti jini na ja nandoto tuku na.

<sup>27</sup> Tu ndi'i ini na, chi tu xndoo ni saña nanu ka'iin ndiyi.

Iyo iin se'e ni ja kin sa'a jniñu ña'nu, ti tu kachi ni ja kendo yiki kuñu ya te'yu.

<sup>28</sup> Ni xna'an ni saña nava ni kuncha na ñuyivi, ti suni ni xna'an ni saña ichi ki'in na andivi.

Ti kusii in na chi kuncha na jiin ni.

Sia'an ni ka'an David ja sia'an jna'an Jesús.

<sup>29</sup> Siin Pedro ka'an da, ti ni kachi da:

—Sa'a ri ja ñani ri ka kuu ra naa ra, ti na kachi ndaa ri nasa ni jna'an David, chaa ni kuña'nu ñuu yo, <sup>30</sup> na ni ka'an David jnu'un Yandios najana'an. Ti ni jini da ja sa'a Yandios nava ni kachi ya nuu da, chi ni kachi ya: "Chaa iin jna'an ra, ti ta'u da jniñu ña'nu nanu sa'a ra vijna", ni kachi ya. <sup>31</sup> Ni jini David najana'an ti ni kachi da ja nandoto tuku Cristo, chaa ta'u jniñu ña'nu un. Sia'an ni kachi David siki Cristo: "Tu xndoo Yandios ni'in nuu infiernu, ti ni tu te'yu yiki kuñu ni", ni kachi da. <sup>32</sup> Tendi'i ri naa ri ka ka'an ja ni ka jini ri ja maa Yandios ni naxndoto tuku ya Jesús. <sup>33</sup> Nu ni najaa Jesús andivi, ni ja'a Yandios jniñu ña'nu nuu ya. Xnaka ni kachi Yandios najana'an: "Jaa iin kivi ja kachanuu ri Espíritu Santo ni ñuyivi", ni kachi ya. Yukan kuu ja ni taji Jesús Espíritu Santo vijna. Ti yukan kuu taka jniñu ka sa'a ri vijna ja ka nde'le ra, ti ka jiniso'o ra ja'a vají nuu maa ya. <sup>34</sup> Ni kachi David nava kua'an Jesús andivi, chi ansu maa da kua'an andivi. Chi maa David ni ka'an nava ni jna'an Jesús:

Yandios ni kachi nuu Jito'yo Jesús: "Nukoo nuu nda'a kua'a ri, chi ta'u ni jniñu.

<sup>35</sup> Iyo yivi kuasun ini, ko kundee ra jiin, chi chindee ri maa ra."

Yukan kuu jnu'un ni ka'an Yandios, kachi David.

Kachi tutu.

<sup>36</sup> Siin Pedro ka'an da, ti ni kachi da:

—Ro'o naa ra, ni ka jatacaa ra Jesúz nda cruz, ko Yandios ni kachi ja na ta'u ya jniñu nuu ni ñuyivi. Suni na kuanka'nu ini ya nuu yivi, ti nama ya siki i. Tendi'i ro'o, chaa Israel naa ra, na kuni ndaa ra naa ra taka jnu'un ka'an ri nuu ra —sia'an ni kachi Pedro nuu tendi'i yivi ni ka ndututu yukan.

### *Jnu'un ni ka nandeokani yivi Israel nuu Pedro*

<sup>37</sup> Nu ni ka jiniso'o yivi un jnu'un ni ka'an Pedro, ni ka kukui'ya ini, ti ni ka jikajnu'un Pedro jiin taka ga apóstol yukan:

—Na sa'a mani jna'an yo naa yo, ti kachi ni NASA sa'a na naa na —ni ka kachi da.

<sup>38</sup> Ni xndaku Pedro nuu da naa da, ti ni kachi da:

—Xndoo kuachi ra naa ra, ti nakani ini nuu Yandios, ti tendi'i ra kuan-ducha ja ni ka kandixia ra jnu'un Jesúz, ya kuu Cristo, nava na kuanka'nu ini ya nuu kuachi ra naa ra. Ti na kua'a Yandios Espíritu Santo ja na kuncha ya jiin ra naa ra. <sup>39</sup> Undi na jana'an ni kachi Yandios. Ti Espíritu Santo yukan kuncha jiin taka yivi ka kandixia jnu'un Yandios —kachi Pedro.

<sup>40</sup> Tijni jinu ni xndaku Pedro nuu da naa da, ti ni kachi da:

—Kani ini NASA jniñu sa'a ra naa ra, ti natu'va ra nuu Yandios nava tu skuita ra maa ra jiin yivi kue'e un —ni kachi Pedro.

<sup>41</sup> Taka yivi ni ka chunso'o, ti ni ka kandixia jnu'un ni ka'an Pedro, ni ka janducha. Ti kivi jña ni ka najna'an uni mil yivi un jiin uu ga yivi ka kandixia Jesúz. <sup>42</sup> Ni ka kejna'an ini da. Taka kivi ka ndututu da. Ti ka skua'a da jiin chaa ka kuu apóstol yukan. Suni ka yee da staa ja ka nuku'un ini da nava ni sa'a Jesúz, ti ka nakanajaa da Yandios.

### *Nava ni kunchuku yivi ni ka kandixia undi nuu*

<sup>43</sup> Ti tendi'i yivi un ni ka naa ini, ti ni ka yu'u i nuu ni ka jini i taka jniñu ña'nu ni ka sa'a apóstol. <sup>44</sup> Tendi'i yivi ni ka kandixia un ka ndututu da, ti ka chindee jna'an da. <sup>45</sup> Ka xiko da ñu'un da jiin taka ja ka ñava'a da, NASA ka nandi'i iin iin da. <sup>46</sup> Ti taka kivi ni ka ndututu da ini veñu'un ka'nú yivi Israel. Ti suni ve'e, ka yee tutu da. Ka kusii ini da. <sup>47</sup> Ka nakanajaa da Yandios, ti uu ga yivi un ka kuva'a ini nuu da naa da. Ti taka kivi sa'a Yandios ja na kandixia uu ga yivi un, ti na najna'an i jiin taka yivi ja ni ka kandixia un. Sia'an ni sa'a Yandios.

### *Pedro jiin Juan ni ka sa'a da tajna iin chaa tikuku*

## 3

<sup>1</sup> Iin kivi kuankoyo nduu Pedro jiin Juan nuu veñu'un ka'nú yivi Israel. Kaa uni ja'ini kuu hora ka jikanta'u chaa Israel un. <sup>2</sup> Kuan kuyajni da yukan, ti ni ka ya'a chaa ka ndiso iin chaa ni kaku tikuku. Ti taka kivi ka xndoo da chaa un iin yux'e nuu nani "yux'e vee kaa." Yukan ni kendo chaa un, jikan da xu'un nuu yivi kua'a ka ja'an veñu'un un. <sup>3</sup> Nu ni jini da Pedro jiin Juan kuan kivi da veñu'un, ti ni jikan da xu'un nuu da naa da. <sup>4</sup> Ni ka jankuñi da, ti ni ka nde'e va'a da nuu chaa un, ti ni kachi Pedro:

—Nde'e nuu ri naa ri —ni kachi da.

<sup>5</sup> Ni nde'e chaa tikuku un nuu da naa da, chi ni ndo'o ini da ja kua'a Pedro jiin Juan xu'un nuu da. <sup>6</sup> Ko ni kachi Pedro:

—Tu ñava'a ri xu'un, ko na chindee ri ro'o. Jiin jniñu ña'nu ndiso Jesúz, ya kuu Cristo, ja kuu ya iin chaa ñuu Nazaret, na kachi ri nuu ra: ndokuñi ti kaka ra —sia'an ni kachi Pedro.

<sup>7</sup> Ti ni jniñi da nda'a chaa tikuku un, ti ni ndokani da chaa. Ti hora jiña ni ndojna'nu si'in da jiin sukun ja'a da. <sup>8</sup> Ti yachi ni kuu ni ndokuiñi da, ti ni

keja'a jika da. Ni kivi da veñu'un un un jiin Pedro, jiin Juan. Jikonuu da, kanda da, ti nakanajaa da Yandios. <sup>9</sup> Ti tendi'i yivi ka'iin ini veñu'un un ni ka jini ja jikonuu da, ti nakanajaa da Yandios. <sup>10</sup> Ti ni ka nakuni yivi un nuu da, ja maa da kuu chaa ni kuncha yuxe'e veñu'un un, ni jikan da xu'un. Ti ni ka naa ini, ti tu ka chaku ini nasa ni nduva'a chaa un.

### *Jnu'un ni ka'an Pedro nuu yivi ka'iin yuxe'e nani Salomón*

<sup>11</sup> Ti chaa ni iyo tikuku un, tu kuni da xndoo da Pedro jiin Juan. Ti yachi xaan ni ka kututu yivi nuu ka'iin da, iin yuxe'e un nuu nani "Salomón." Ti ka naa ini yivi un ka nde'e chaa ni nduva'a un. <sup>12</sup> Nu ni jini Pedro ja ni ka kututu yivi un, ti ni kachi da:

—Ro'o chaa Israel naa ra. Ndoo ka naa ini ra ja ni ka jini ra ni nduva'a si'in chaa ja'a. Ti ka nde'e ra nuu ri naa ri, chi ka ndo'o ini ra ja ru'u ta'u jniñu, xi ka ndo'o ini ra ja ru'u ka kuu chaa va'a ga nuu Yandios. Ja yukan kuu ja ni kuu jikda da. Ko ansu sia'an iyo. <sup>13</sup> Chaa ni ka kuu jna'an yo jana'an Abraham, Isaac, jiin Jacob, ni ka nchañu'un da yandios, ti maa Yandios ni ja'a ya jniñu ña'nu nuu se'e ya Jesúus, ya ni ka jnii ra presu. Ti ni ka nakua'a ra ya nuu Pilato. Ko nu ni kachi Pilato ja sia da ya, ti ro'o tu ni ka kuni ra. <sup>14</sup> Ii ga ni kuu Jesúus, ko tu ni ka janta'u ra ya. Ti tu ni ka kuni ra ja sia Pilato ya, chi ni ka kachi ra ja na sia da iin chaa ja'ni ña'an. <sup>15</sup> Ti ni ka ja'ni ra Jesúus, ti maa Jesúus ni sa'a ja ka chaku yo. Ko Yandios ni naxndoto ya Jesúus, ti tu ni kendo ya nuu ka'iin ndiyi un. Ti ru'u naa ri, ni ka jini ri ja chaku tuku Jesúus. <sup>16</sup> Ja ni ka jini ra chaa ni iyo tikuku ja'a. Ka nakuni ra da. Ni kandixia da ja ndiso jniñu ña'nu Jesúus, ti Yandios ni sa'a ja ni nduvita si'in da, chi ni kandixia da Jesúus. Yukan kuu ja ni nduva'a da, ti tendi'i ra naa ra ni ka jini.

<sup>17</sup> Siin Pedro ka'an da, ti ni kachi da:

—Sa'a ri ja ñani ri ka kuu ra naa ra. Ti ja jini ri ja tu ni ka chaku ini ra jniñu ni ka sa'a ra na ni ka ja'ni ra Jesúus, ni chaa ka ta'u jniñu nuu ra un, tu ni ka chaku ini da. <sup>18</sup> Undi jana'an ni kachi ndaa Yandios nava ni ka ka'an chaa ni ka ka'an jnu'un ya, ja na kondo'o Cristo ti kuū ya. Yukan ni jna'an Jesúus ja ni sa'a Yandios nava ni kachi ya. <sup>19</sup> Ko nakani ini nuu kuachi ra naa ra, ti kandixia ra Yandios, nava na kenchaa kuachi ra un naa ra. <sup>20</sup> Ti sia'an sa kuanta'u ya ro'o naa ra ti ndusii ini ra. Sia'an kuu, ti Yandios, taji tuku ya Jesúus, chi ni nakaji ya Jesúus ja kuu Cristo ja na ta'u ya jniñu ña'nu. <sup>21</sup> Vijna ti kancha Jesúus andivi undi na ndujaa ñuyivi, nava ni kachi Yandios undi jana'an. Sia'an ni ka ka'an chaa ni ka ka'an jnu'un Yandios. <sup>22</sup> Suni sia'an ni ka'an Moisés nuu chaa ni ka kuu jna'an yo najana'an:

—Taji Yandios iin chaa kuu jna'an yo nanu ni taji ya ru'u, ti ka'an da jnu'un Yandios. Ti chunso'o ra naa ra tako jnu'un ka'an da. <sup>23</sup> Chi nu tu chunso'o ra naa ra, ti kusiin ra nuu Yandios. Sia'an ni kachi Moisés —kachi Pedro.

<sup>24</sup> Siin Pedro ka'an da, ti ni kachi da:

—Tendi'i chaa ni ka ka'an jnu'un Yandios najana'an, ni ka kachi ja chaa Jesúus, ti ni kundai, chi ni chaa ya. Suni jnu'un yukan ni ka'an Samuel, ti taka ga chaa ka ndikun jata suni ni ka ka'an jnu'un un. <sup>25</sup> Jna'an yo ni ka kuu chaa ni ka ka'an jnu'un Yandios. Ja ni kachi Yandios nuu jna'an yo jana'an, ti suni jnu'un yukan siin undi vijna jiin ra naa ra. Ti ni kachi ya nuu Abraham: "Chaa iin chaa kuu jna'an ra ti nama da ñuyivi", ni kachi Yandios. <sup>26</sup> Jesúus kuu ya junukuachi nuu Yandios. Ti maa Yandios ni taji Jesúus ja na chindee ya ro'o nava na xndoo ra kuachi ra naa ra —ni kachi Pedro.

*Ni ka xndichi chaa ka kuña'nu Israel Pedro jiin Juan*

**4**

<sup>1</sup> Ni ka ka'an Pedro jiin Juan nuu yivi un, ti ni ka jakoyo sutu chaa Israel, jiin chaa saduceo, jiin chaa ka kuña'nu ja ka ndito veñu'un un. <sup>2</sup> Ka kuiti ini ja ka xna'an Pedro jiin Juan nuu yivi un ja ni nandoto tuku Jesús nuu ka'iin ndiyi. <sup>3</sup> Ti ni ka jnií da presu Pedro jiin Juan, ti ni ka jnaa da vekaa. Ti undi inga kivi sa xndichi da naa da, chi ja ni ini xaan kuu, ti ja kuni kuñaa. <sup>4</sup> Ti kua'a xaan yivi ni ka jiniso'o jnu'un ni ka ka'an Pedro jiin Juan, ni ka kandixia i Jesús. Ja ni jinu u'un mil chaa, ti siin ñasi'i. <sup>5</sup> Inga kivi ni ka ndututu sutu ka kuña'nu, jiin taka chaa ña'nu, jiin chaa ka xna'an ley Israel. Ni ka ndututu da ñuu Jerusalén. <sup>6</sup> Suni ni ka ndututu Anás, ja kuña'nu ga nuu sutu ka kuña'nu un, jiin Caifás jiin Juan jiin Alejandro jiin taka ga yivi ja ka kuu jna'an sutu kuña'nu ga un. <sup>7</sup> Ni ka kana Pedro jiin Juan, ni ka jakuñi da nuu taka chaa kuña'nu un, ti ni ka xndichi da naa da, ti ni ka kachi:

—Nasa ni ka sa'a ra ja ni nduva'a chaa tikuku un. Nau ja ni ta'u jniñu nuu ra naa ra —kachi ka ka'an.

<sup>8</sup> Jiin inijnuni Espíritu Santo ni kachi Pedro:

—Taka ni'in chaa ña'nu naa ni, <sup>9</sup> ¿ndoo ka jikajnu'un ni saña vijna naa ni, ja ni ka chindee na chaa tikuku un? Ti ka jikajnu'un ni nasa ni ka sa'a na ja ni nduva'a da. <sup>10</sup> Nu ja yukan kuu ja ka xndichi ni saña naa na, na kachi na nuu ni jiin nuu taka yivi ñuu Israel. Ni nduva'a chaa un, chi Jesús, ya kuu Cristo, iin chaa ñuu Nazaret, ni ta'u ya jniñu. Ni ka jatacaa ni Jesús nda'a cruz, ko ni nandoto tuku ya nuu ñuji'i, chi ni ja'a Yandios jniñu ña'nu nuu ya. <sup>11</sup> Sa'a yo nanu ja iin ni ka kuu ni jiin chaa ka sa'a ve'e jiin yuu, ja ka sasiin da yuu va'a ga, ti Jesús ni kuu nanu iin yuu va'a ga. Ko ni ka sasiin ni ya, ti maa ya kuu iin chaa kuña'nu. <sup>12</sup> Nuu Jesús kuu nuu nanita'u yivi naa i, ti tu iyo inga, chi maa iin ni Jesús kuu Se'e Yandios, ti maa ya kuu ja nama siki yo naa yo —ni kachi Pedro.

<sup>13</sup> Ni ka jini ja tu ka yu'u Pedro jiin Juan. Chi ka jini ja tu na'an ni ka skua'a da. Yukan kuu ja ni ka naa ini, ko ja ni ka jini ja ni ka skua'a da jiin Jesús. <sup>14</sup> Suni ni ka jini chaa ka kuña'nu un ja kandichi chaa tikuku un, ti ja ni nduva'a da. Yukan kuu ja tu ni kuu nachiso da jnu'un ni ka'an Pedro. <sup>15</sup> Ni ka keni'in da Pedro jiin Juan fuera chi ka kuni ndajnu'un maa da naa da:

<sup>16</sup> —Nasa sa'a yo jiin chaa ja'a naa da. Ti tu kuu ka'an yo ja tundo ni ka sa'a da, chi ni ka sa'a da jniñu ña'nu, ti ja ni ndi'i yivi ñuu ja'a ka jini. <sup>17</sup> Na siu'u yo da, ti na kachi yo jiin da ja tukaa ga ndakuni'in da sivi Jesús, nava tukaa ga xna'an da nuu yivi ja'a naa i —kachi da ni ka ndajnu'un da.

<sup>18</sup> Yukan ti ni ka kana tuku da Pedro jiin Juan, ti ni ka kachi da nuu da:

—Tukaa ga ndakuni'in ra sivi Jesús, ti tukaa ga xna'an ra nuu yivi naa ra —ni ka kachi da.

<sup>19</sup> Ti ni ka kachi Pedro jiin Juan nuu da:

—Kani ini ni naa ni. Ndeo nuu nau ja va'a ga ja kuu nuu Yandios. Va'a ga ja kuandatu na nuu ni, xi va'a ga ja kuandatu na nuu Yandios. <sup>20</sup> Tu kuu kasi yu'u na naa na, chi kanu kuu ja kani na jnu'un taka ja ni ka jini na, ti ni ka jiniso'o na —ni ka kachi da.

<sup>21</sup> Yukan ti ni ka siu'u tuku chaa ka kuña'nu un maa da. Ti ni ka sia da, chi tu ni ka ni'in nasa chakuachi da naa da. Ti ni ka yu'u ja kuiti ini yivi naa i. Tendi'i yivi un ka kanajaa i Yandios ja ni nduva'a chaa tikuku un. <sup>22</sup> Vil'i ga uu xiko cuiya ni ku'u chaa un, ti sa ni nduva'a da. Yukan ni ka jini yivi jniñu sa'a Yandios, chi ni nduva'a chaa tikuku un.

<sup>23</sup> Nu ni ka sia chaa ka kuña'nu un Pedro jiin Juan, ti kuankoyo da nuu ni ka ndututu taka ga apóstol un naa da. Ti ni ka jani da jnu'un nava ni ka ka'an sutu ka kuña'nu un jiin taka ga chaa ka kuña'nu un nuu da naa da. <sup>24</sup> Ni ka jiniso'o taka ga chaa un jnu'un ni ka ka'an da, taka da ni ka nakanajaa da Yandios, ti ni ka kachi da:

—Ni'l'in Yandios kuu ja ta'u jniñu nuu na naa na. Ni sa'a ni andivi, ñuyivi, jiin mar, jiin taka ja iyo ñuyivi, jiin andivi. <sup>25</sup> Undi najana'an ni ja'a ni Espíritu Santo nuu David, chaa ni junukuachi nuu ni. Ti jiin inijnuni Espíritu Santo ni kachi da:

Ni ka ndututu chaa ka kuña'nu tijni nación ja ka kuni kanaa jiin Se'e Yandios, ya kuu Cristo.

Ti suni yivi Israel ka nduni'in ini, ko tu ka jini na jnu'un ka ka'an.

<sup>26</sup> Ni ka ndututu chaa ka kuña'nu tijni nación.

Ka kuni kanaa jiin ni, Yandios jiin Se'e ya Cristo, ya ni taji ya ja na ta'u jniñu ña'nú un, ni kachi David.

Kachi tutu.

<sup>27</sup> Nuu ja'a ni ka ndututu Herodes, jiin Poncio Pilato, jiin taka chaa vekoyo inga nación, jiin yivi Israel, ti ni ka skejna'an da jnu'un ja na kuú Jesús, ti ni ka ja'ní da Se'e ii ni Jesús, ya junukuachi nuu ni, ya ni taji ni ja na ta'u jniñu ña'nú nuu ni tu'u ja iyo. <sup>28</sup> Yukan ni ka sa'a da, chi undi jana'an ni kachi ni ja sia'an koo. <sup>29</sup> Ti vijna nde'e ni, ni'l'in Yandios kuu ja ta'u jniñu nuu na naa na. Ka kuni siu'u yivi saña. Kua'a ni jnu'un ndee ini saña naa na, chi ka junukuachi na nuu ni. Tu kua'a ni jnu'un ja siu'u yivi saña naa na. Ti sia'an na kundee ini na ka'an na jnu'un ni. <sup>30</sup> Ti suni kachi ni ja na nduva'a yivi ka ku'u, sa'a naa na. Ti kachi ni ja na koo tijni ga jniñu ña'nú, nava na kuni yivi taka jniñu sa'a Jesús, Se'e ii ni, ya junukuachi nuu ni —sia'an ni ka nakanajaa taka apóstol un Yandios.

<sup>31</sup> Nu ni ndi'i ni ka nakanajaa da Yandios, ti ni jnaa ve'e nuu ka'iin da un. Ti hora jña ni ka ni'in da Espíritu Santo, ti ni ka kundee ini da ka ka'an da jnu'un Yandios.

### *Taka ndajniñu kuu jaku tendi'i da*

<sup>32</sup> Ti tendi'i yivi ka kandixia jnu'un Jesús ni ka ndu iin nuu ini i. Ti nau ndajniñu ka ñava'a iin iin i, yukan kuu ja kuu taka i. <sup>33</sup> Ni ka ndundee ini taka apóstol un, chi taka yivi ni ka kandixia jnu'un Jito'yo Jesús, ka chindee jna'an. Ni ka siin apóstol un ka ka'an da ja ni nandoto Jesús. Ti uu ga yivi un ka kuu va'a ini nuu da naa da. <sup>34-35</sup> Taka chaa ni ka kandixia un, tu ni ka jna'an da nundo'o, chi taka da ka chindee jna'an da. Nu ka ñava'a da ñu'un xi ve'e, ka xiko da ti ka nakua'a da xu'un nuu apóstol. Ti apóstol un ka tejna'an da nasa ka nandi'i iin iin da naa da.

<sup>36</sup> Sia'an ni sa'a iin chaa ni nani José. Ti apóstol un ni ka na skonani da Bernabé, chi ni ja'a da jnundee ini apóstol un naa da. Ni kaku da ñuu nani Chipre, ti ni kuu jna'an da jiin familia Leví, chaa ni kuu sutu nuu Yandios najana'an. <sup>37</sup> Ni xiko da ñu'un da, ti ni nakua'a da xu'un nuu apóstol.

### *Nava ni jna'an Ananías jiin Safira*

## 5

<sup>1</sup> Ni jna'an iin chaa ni nani Ananías jiin ñasi'i da Safira. Suni ni xiko da ñu'un da. Ti Ananías ni chisa'yí da jaku xu'un ja ni ka ni'in da nuu ñu'un da un. <sup>2</sup> Ti jaku ni ni nakua'a da nuu apóstol, ti ni kachi da ja yukan ni kuu ndi'i xu'un

da ja ni ka ni'in da jiin ñu'un da. Sia'an ni sa'a da, ko ni jini ñasi'i da. <sup>3-4</sup> Ti ni kachi Pedro nuu da:

—Va ni jikun ja'u'un ro'o Ananías, ja yukan kuu ja kuni ra xnda'u ra Espíritu Santo niku. Ni chisa'yí ra sava xu'un ni ni'in ra jiin ñu'un ra. Na ti xiko ga ra ñu'un un, ni kuu ñu'un maa ra, ti kuu sa'a ra nava kuu ini ra jiin. Ti nu ni xiko ra, ni ni'in ra xu'un un, ko suni xu'un maa ra kuu. Ni ndo'o ini ra ja xnda'u ra ru'u naa ri. Ko ansu ru'u ni xnda'u ra, chi maa Yandios kuni xnda'u ra —kachi Pedro.

<sup>5</sup> Nu ni jiniso'o Ananías jnu'un ni ka'an Pedro, ni nduva da, ti ni ji'i ni da. Tendi'i yívi ni ka jini jnu'un un ni ka yu'u xaan. <sup>6</sup> Ti yukan ka'lín tijní chaa kuachi. Ni ka tu'va da nuu katuu ndiyí un, ni ka suku da iin sa'ma. Ni ka ndokani da ndiyí un, ti ni ka ja'an chunduji da.

<sup>7</sup> Ni kuu na'an ti ni chaa Safira, ñasi'i ndiyí Ananías. Ti kuni ga ña nundo'o ni jna'an Ananías. <sup>8</sup> Ti ni jika jnu'un Pedro nuu ña, ni kachi da:

—¿Ni kuya'u ñu'un un nava ni ka kachi ra nu?

Ti ni kachi Safira:

—Ya'u yukan kua'an.

<sup>9</sup> Ti ni kachi Pedro:

—Tu va'a ja ni ka kijna'an ra ti maa Espíritu Yandios ka kuni xnda'u ra. Nde'e chaa vekoyo yukan ni ka jan chunduji yíi ra, ti vijna ki'in da jiin maa ra suni —ni kachi Pedro jiin ña.

<sup>10</sup> Hora jña ni nduva ña nuu ja'a Pedro, ti ni ji'i ni ña. Ni ka ndiví chaa un, ni ka jini da ja suni ja ni ji'i ña. Ni ka kani'in da ña, ti ni ka jan chunduji da ña xiin yíi ña un. <sup>11</sup> Ndi'i yívi ka kandixia Jesúus un jiin uu ga yívi ni ka jiniso'o, ti ni ka yu'u xaan i.

### *Tijní jniñu ña'nu ni ka sa'a taka apóstol*

<sup>12</sup> Tijní jniñu ña'nu ni ka sa'a taka apóstol. Ti sia'an sa ni ka jini yívi un jniñu sa'a Yandios. Ti tendí'i yívi ni ka kandixia Jesúus un ni ka ndututu yux'e' nani Salomón. <sup>13</sup> Ti taka yívi ja tu ka kandixia Jesúus ka yu'u najna'an jiin yívi ka kandixia un, ko ni ka jini ja mani chaa va'a ka kuu da. <sup>14</sup> Ti ni kuu kua'a ga yívi ni ka keja'a ka kandixia jnu'un Jesúus. Kuu chaa, kuu ñasi'i ni ka kandixia, ti ni ka najna'an jiin yívi ka kandixia un. <sup>15</sup> Yukan ti ka keja'a ka yínda'a yívi ka ku'u un jiin tikachi xi jiin yuu. Undi yu'u ichi un, ti yukan ka xndoo yívi ka ku'u un. Sia'an ni ka sa'a, chi ka ndó'o ini ja nu na ya'a Pedro yukan, ti kuikun ndati da siki yívi ka ku'u un, ti nduva'a i naa i. <sup>16</sup> Suni ni ka kii yívi ñuu ka'iin yajni Jerusalén. Ka ndiso i yívi ku'u jiin yívi ka jna'an tachi xaan, ti ni ndí'i un ni ka nduva'a.

### *Ni ka jnii da presu apóstol*

<sup>17</sup> Nu ni ka jiniso'o sutu ka kuña'nu un jiin chaa saduceo taka jniñu ka sa'a apóstol un, ni ka kuu kuasun ini da. <sup>18</sup> Ti ni ka jnii da taka apóstol un, ti ni ka jnaa da vekaa. <sup>19</sup> Ti jakuaa ni ja'an iin tajnu Yandios ni jiña yux'e' vekaa un, ti ni keni'in da naa da, ti ni kachi tajnu un nuu da:

<sup>20</sup> —Kua'an ni veñu'un ka'nú Israel un, ti kani ni jnu'un nasa nanita'u yívi, ti na kunchuku i jiin Yandios —ni kachi tajnu Yandios.

<sup>21</sup> Sa ni ndí'i ni ka'an tajnu un, ti ni kundijin. Kuankoyo da ti ni ka kivi da yux'e' veñu'un un, ti ni ka keja'a da ka xna'an da nuu yívi ka'iin un.

Yukan ka'iin da ti sutu kuña'nu ga un jiin taka ndaja'a da ni ka ndututu da. Ni ka kana da tendí'i chaa ka kuña'nu ñuu un jiin taka ga chaa ka kuña'nu nación Israel. Ti ni ka ta'u da jniñu nuu chaa ka ndito vekaa un ja na keni'in da apóstol. <sup>22</sup> Kuankoyo tajnu un kuan kii'in da apóstol un naa da. Ko tukaa

ga ka'iin da. Ti ni ka nandeokuñi tajnu un ni ka jani da jnu'un nuu taka chaa ka kuña'nu un ja sia'an ni kuu. <sup>23</sup> Ti ni ka kachi da:

—Ni jakoyo na, ko ni ka jini na ja ndi'yu va'a yux'e'vekaa un. Ti kajiin policia yux'e'vekaa un ka ndito da. Ni ka jiñna na, ko tukaa ga ndoo ka'iin ini vekaa un —ni ka kachi da.

<sup>24</sup> Nu ni ka jiniso'o chaa ka yinda'a veñu'un Israel un, jiin taka sutu ka kuña'nu un, jnu'un ni ka ka'an tajnu un, ka keja'a ka ndo'o ini. Ti tu ka jini nasa sa'a. <sup>25</sup> Ni ka ndo'o ini sia'an, ti ni jaa iin chaa ni jani jnu'un, ti ni kachi da:

—Chaa ni ka jnnaa ni vekaa iku un, ja ka'iin da ini veñu'un un ka xna'an da yivi —ni kachi da.

<sup>26</sup> Yukan na ti kua'an chaa ka yinda'a veñu'un un jiin tajnu da, ni ka jan ki'in vii da apóstol un naa da, chi ka yu'u da ja kua'a yivi un yuu siki da naa da. <sup>27</sup> Ni chakoyo da jiin apóstol un, ni ka jani da chaa nuu chaa ka kuña'nu un. Ti ni keja'a sutu kuña'nu un ni xndichi da apóstol un naa da:

<sup>28</sup> —Ja ni kachi ri nuu ra naa ra ja tukaa ga skua'a ra jiin yivi ja'a naa i, ko tu ni ka chunso'o ra, ti ka siin ra ka xna'an ra jnu'un Jesús nuu yivi. Ti ja ni ndi'yi yivi ñuu Jerusalén ka jini, ti suni ka ka'an ra naa ra ja ru'u ni ka ja'ni Jesús —ni ka kachi chaa ña'nu un.

<sup>29</sup> Ti ni kachi Pedro:

—Xnakan kuandatu na nuu Yandios ti sa kuandatu na nuu yivi naa i.

<sup>30</sup> Jna'an yo najana'an, ni ka nchañu'un da Yandios, ti maa Yandios ni naxndoto ya Jesús tuku. Ni ka ja'ni ni Jesús, ni ka jatakaa ni ya nda'a cruz.

<sup>31</sup> Ti vijnal kuña'nu Jesús, chi Yandios ni ja'a jniñu ña'nu nuu ya ja na ta'u ya jniñu, ti na kuanka'nu ini ya nuu yivi. Ti kuni ya ja taka yivi nación Israel na xndoo kuachi nava na kuanka'nu ini ya nuu da. <sup>32</sup> Ni ja'a Yandios Espíritu Santo nuu taka yivi ka jandatu nuu ya. Yukan kuu ja ka ka'an na jiin inijnuni Espíritu Santo, chi ja ni ka jini na taka jniñu ni sa'a Jesús —ni kachi Pedro.

<sup>33</sup> Nu ni ka jiniso'o chaa ka kuña'nu un taka jnu'un ni ka'an Pedro, ni ka kuiti xaan ini da, ti ka kuni da ka'ni da taka apóstol un. <sup>34</sup> Yukan kande iin chaa fariseo nani Gamaliel. Suni kuu da iin chaa kuña'nu ñuu Israel. Ti suni ni skua'a da tutu Yandios jana'an. Ti taka yivi ka jandatu nuu da. Ni ndokuiñi da, ti ni kachi da ja na kekoyo apóstol un iin nundaa kuiti, chi kuni da ndajnu'un da jiin uu ga chaa ka kuña'nu un. <sup>35</sup> Yukan ti ni kachi da nuu chaa un naa da:

—Tendi'i ra naa ra, kani ini nasa sa'a ra jiin chaa ja'a naa ra. <sup>36</sup> Ka nuku'un ini ra ja na jana'an. Ni iyo iin chaa ni nani Teudas, ti ni kachi da ja maa da kuu iin chaa kuña'nu. Ni ka kandixia kuun ciento yivi ni ka ndikun da. Ti ni ka kanaa da jiin chaa ka kuña'nu un. Ti ni ka ja'ni da chaa, ti ndi'i yivi ka ndikun da un ni ka jichanuu, ti tundo ni kuu kuiti. <sup>37</sup> Ni ya'a un ti ni jaa iin kivi ni ka ndokani da iin censo nación yukan. Kuiya jña ni iyo iin chaa Galilea nani Judas. Ti suni kua'a yivi ni ka ndikun jiin da. Suni ni ka ja'ni da chaa un, ti taka yivi ni ka ndikun jiin da un ni ka jinu. <sup>38</sup> Yukan kuu ja va'a ga ja na sia ra chaa ja'a naa ra. Na kinkoyo da. Chi nu ka sa'a da ja fluxini maa da, ti tu kuñii. <sup>39</sup> Ko nu ka sa'a da jniñu ta'u Yandios, tu kuu xnaa ra naa ra. Sia da na kinkoyo da, chi tu kuu kanaa ra jiin Yandios —ni kachi Gamaliel nuu da naa da.

Ni ka jandatu chaa ña'nu un, ti ni ka sa'a da nava ni kachi Gamaliel.

<sup>40</sup> Yukan ti ni ka kana tuku da apóstol un ni ka jakoyo da, ti ni ka ta'u jniñu nuu da. Ni ka kachi:

—Tukaa ga ka'an ra jnu'un Jesús naa ra —ni ka kachi chaa ka kuña'nu un nuu da.

Ti ni ka sia da kuankoyo da. <sup>41</sup> Ni ka kee apóstol un nuu chaa ka kuña'nu un, ti ni ka kusii ini da, chi ni kachi Yandios ja kondo'o da ja siki Jesús naa da. <sup>42</sup> Tu ni ka jandatu da jnu'un ni ka ka'an chaa ka kuña'nu un, chi ni ka siin da ka skua'a da jiin yivi ini veñu'un Israel, ti suni ve'e, ti ni ka kachi da:

—Ka ndatu ra Cristo naa ra, ti Jesús kuu Cristo ni kii un —ni ka kachi apóstol.

Yukan kuu jnu'un ni ka xna'an da taka ve'e yivi un.

### *Ni ka nakaji da uxia chaa kunukuachi*

## 6

<sup>1</sup> Kivi jña kuan kukua'a ga yivi ka kandixia jnu'un Jesús. Ka iyo yivi ni ka ka'an jnu'un griego, jiin yivi ka ka'an jnu'un hebreo. Yivi ka ka'an jnu'un griego ni ka keja'a ka kankuachi siki yivi ka ka'an jnu'un hebreo, ti ni ka kachi:

—Na'an ni ka ji'i yii un, tu ka ni'in ña taka ja ka ja'a apóstol un taka kivi —ni ka kachi.

<sup>2</sup> Ni ka nastutu apóstol taka yivi ka kandixia Jesús, ti ni ka kachi da:

—Tu kuu xndoo ri jniñu ri ja ka ka'an ri jnu'un Yandios, ti kua'a ri ja kaji yivi nda'u un. <sup>3</sup> Taka ra naa ra ja ka kandixia, va'a ga ja na nakaji ra uxia chaa kunukuachi, ti na kua'a da ja kaji yivi un. Nduku ra chaa ka jini junukuachi, chaa ni ka ni'in Espíritu Santo, ti na kua'a ri jniñu nuu da. <sup>4</sup> Ti ru'u naa ri, na siin ri kakanta'u ri nuu Yandios, ti na ka'an ri jnu'un ya taka kivi —ni kachi da.

<sup>5</sup> Sia'an ni kuu, ti tendi'i da ni ka kusii ini. Ti ni ka nakaji da Esteban, chi ni kandixia ni ini aña da Jesús, ti ni ni'in da Espíritu Santo. Suni ni ka nakaji da Felipe, Prócoro, Nikanor, Timón, Parmenas jiin Nicolás, chaa ñuu Antioquía, ja tu ni kuu da chaa Israel, chi tu ja'i kuni da jnu'un Jesús. <sup>6</sup> Ni ka jakuiñi chaa un nuu apóstol, ti apóstol un ni ka jikanta'u da nuu Yandios. Ti ni ka chuxndee da nda'a da xini chaa un ja na sa'a da jniñu un.

<sup>7</sup> Kua'a yivi ni ka jiniso'o jnu'un Yandios, ti ni ka keja'a ka kandixia, ti kuan kukua'a ga yivi ñuu Jerusalén ka kandixia. Ti suni kua'a sutu veñu'un Israel ka keja'a ka kandixia jnu'un Jesús.

### *Ni ka jnii da presu Esteban*

<sup>8</sup> Tijni jniñu ña'nú ni sa'a Esteban nuu yivi un, chi sia'an ni ta'u Yandios jniñu nuu da, ti ni chinddee ya maa da. Nu ni ka jini yivi un taka jniñu ta'u Yandios ja ni sa'a Esteban, ni ka yu'u. Ti tendi'i yivi ka jandatu nuu da naa da.

<sup>9</sup> Ti yukan ka'iin yivi ka junukuachi ini veñu'un Israel ja ni nani "Chaa ni ka keta'u", chi tukaa ga ka sajniñu ka'a da. Suni ka'iin chaa Israel ja kanchuku ñuu Cirene, ñuu Alejandría, ñuu Cilicia jiin Asia. Ti ni ka chajna'an da jnu'un jiin Esteban. <sup>10</sup> Ti tu kuu nandeokani da jnu'un ka'an Esteban, chi Esteban ka'an da jiin inijnuni Espíritu Santo. Yukan kuu ja va'a ni ka'an Esteban nuu da. <sup>11</sup> Ni ka nduku chaa Israel un tijni chaa ka xnda'u ña'an ja na kachi da:

—Ni ka jiniso'o na jnu'un ni ka'an Esteban siki Moisés jiin Yandios —ni ka kachi da.

<sup>12</sup> Yukon ti ni ka kuiti xaan ini yivi un jiin taka chaa ña'nú, jiin chaa ka xna'an ley Israel. Ni ka jnii da presu Esteban, ti kua'an da jiin da nuu ni ka ndututu taka chaa ka kuña'nu nación Israel. <sup>13</sup> Ti ni ka kachi chaa ka xndoña'an un:

—Taka kivi ka'an Esteban ja tu kaxan veñu'un ka'nu yo, ti suni ka'an da ja tutu Yandios najana'an, tukaa kaxan. <sup>14</sup> Suni ni ka jiniso'o na jnu'un ni ka ka'an da ja Jesú, chaa ñuu Nazaret, kanuū da veñu'un ka'nu ja'a, jiin ja sama da jnu'un ni xndoo Moisés jiin yo —ni ka kachi da. <sup>15</sup> Yukan ti taka chaa ka kuña'nu un jiin tendi'i yivi kanchuku un, ni ka nde'e va'a nuu Esteban. Ti ni ka jini ja jito da nanu iin tajnu Yandios, chi ndinchaa nuu da.

### *Nama Esteban maa da*

## 7

<sup>1</sup> Ti iin sunu kuña'nu un ni jikajnu'un da Esteban, ti ni kachi da:  
—¿Jandaa kuu jnu'un ka ka'an chaa ja'a nu? —ni kachi da.

<sup>2</sup> Yukan ti ni kachi Esteban:

—Tendi'i ni'in chaa ka kuña'nu naa ni jiin taka ga yivi ka'iin ja'a, kunso'o ni na ka'an na. Ka jini yo ja tundo kejna'an jiin Yandios, ko ni ndenda ya nuu Abraham, ti Abraham ni jini da ya jiin nuu da. Ti jna'an Abraham ka kuu yo. Ni kancha ga da ñuu Mesopotamia, ti ki'in ga da Harán na ni jini da Yandios.

<sup>3</sup> Ti ni kachi Yandios nuu da: "Kuxio ñuu ra, xndoo jna'an ra, ti ki'in ra iin ñuu nuu xna'an ri ro'o", ni kachi Yandios. <sup>4</sup> Yukan kuu ja ni xndoo Abraham ñuu Mesopotamia nuu kanchuku yivi Caldea, ti kua'an da ñuu Harán. Yukan ni kuncha da. Yukan ni ji'i tata da. Ti ni kachi Yandios nuu da ja na ndiji da ñuu Israel nuu kanchuku yo ja'a vijna. <sup>5</sup> Tu ni kuni Yandios ja kuñava'a da ñu'un maa da, ni vasu iin ti'lí nuu kuañu da, ko ni kachi Yandios nuu da: "Kua'a ndi'i ri ñu'un ja'a nuu ra kuu ra. Nu na jaa iin kivi kuú ra, ko kendo jiin jna'an ra", ni kachi Yandios jiin Abraham, vasu ti koo ga se'e da.

<sup>6</sup> Suni ni kachi Yandios: "Jaku ni kuiya kunchuku jna'an ra iin ñuu jika, nuu kanchuku inga yivi. Chayika yivi un da sa'a da jniñu, kua'a tau da, ti kondo'o da kuun ciento kuiya ja tu kinya'u da ni iin xu'un", ni kachi Yandios. <sup>7</sup> Ti suni ni kachi ya: "Ru'u na xndichi ri yivi kua'a nundo'o nuu jna'an ra un. Xnaka kondo'o da sa kekoyo da, ti nchakoyo da ñu'un Israel ja'a, ti kunchañu'un da ru'u", ni kachi ya.

<sup>8</sup> Sia'an ni kachi Yandios nuu Abraham undi na jana'an. Yukan kuu ja ni xndoo Yandios iin jnu'un ja na sa'a yivi iin seña yiki kuñu da nava ni kachi Yandios. Suni sia'an ni sa'a Isaac jiin se'e da Jacob, ti suni sia'an ni sa'a Jacob jiin ndi uxi uu se'e da. Ni ka ja'nú chaa un, ti ni ka xnukoo da nación Israel —ni kachi Esteban nuu yivi un.

<sup>9</sup> Siin Esteban ka'an da nuu chaa ka kuña'nu un, ti ni kachi da:

—Ti ni iyo iin se'e Jacob ni nani José, ti taka ñani da un ni ka kuu kuasun ini jiin da. Yukan kuu ja ni ka xiko da José nuu chaa ka jika ichi ja kuankoyo ichi ñuu Egipto, ko Yandios tu ni xndoo ya maa da. <sup>10</sup> Maa ya ni sa'a ja tu ni iyo xaan da nundo'o. Ni chindee Yandios José, ti Faraón, chaa ni kuña'nu nuu ni ñuu Egipto yukan, ni jini da ja iyo inijnuni José, chi chindee Yandios maa da. Yukan ni kuu ja ni ja'a da jniñu nuu José, ti José ni ta'u da jniñu ni ñuu Egipto, ti suni ni ta'u da jniñu nuu yivi ni ka junukuachi ini ve'e Faraón —ni kachi Esteban nuu yivi un.

<sup>11</sup> Siin Esteban ka'an da nuu chaa ka kuña'nu un, ti ni kachi da:

—Kuiya jña ni kii iin jnama xaan ni ñuu Egipto jiin Canaán, ti ni ka ji'i yivi soko. Ti jna'an yo na jana'an un, tukaa ga ni ka ni'in da ja kaji da. <sup>12</sup> Ko nu ni jini Jacob ja iyo triu ñuu Egipto, ti ni taji da se'e da ni ka jan kuan da triu yukan. Ni ka ja'an da iin jinu. <sup>13</sup> Ni ka nandeokuñi tuku da inga jinu, sa ni stuu José nuu da naa da ja ñani da kuu da. Yukan ti ni jini Faraón chaa ka kuu jna'an José. <sup>14</sup> Yukan na ti ni kachi José jiin ñani da ja na ki'in tata da Jacob

jiin taka ga jna'an da un. Ti ja tindi'i da, iyo uni xiko xia'un yivi. <sup>15</sup> Yukan ti kua'an Jacob ñuu Egipio. Yukan ni kuncha da undi ni ji'i da. Ti tindi'i se'e da ni ka ji'i yukan. <sup>16</sup> Yukan ti ni jaa iin kivi ja ni ka naki'in jna'an da un yi'ki da jiin yi'ki taka se'e da kuano'on undi ñuu Siquem, ti ni ka chunduji da yi'ki un iin ñaÑa nuu ni jaan Abraham nuu se'e Hamor undi najana'an. Ja ni cha'u da jiin xu'un plata na ni kuncha da ñuu Siquem.

<sup>17</sup> Ni ka kaya xaan jna'an Abraham ñuu Egipio un. Kuan kuyajni kuiya ja kua'a Yandios ñu'un nuu jna'an Abraham nava ni kachi ya undi nuu. <sup>18</sup> Nu ni kivi inga chaa ta'u jniñu ñuu Egipio, tu ni jini da jniñu ni sa'a José, chi ja ni kuu na'an xaan ni ji'i da. <sup>19</sup> Ni xnda'u chaa ta'u jniñu un jna'an yo, ti ni ka jito da nundo'o. Ko ni ka kaya xaan da naa da. Ti ni kachi chaa ta'u jniñu un ja nu ni kaku iin suchi lulu, na skaña da i ti na kuü i, chi kuan kaya xaan jna'an Abraham, ni kachi chaa ta'u jniñu un.

<sup>20</sup> Kuiya jña ni kaku Moisés. Ni kuncha i uni yoo jiin tata i, ko ni jini Yandios ja kuu i iin suchi va'a, ti ni jajna'an ini ya maa i. <sup>21</sup> Ni jaa iin kivi ja tukaa ga ni kuu kisa'yí i ve'e i, ti ni ka chajijo tata i maa i. Ko se'e si'i maa chaa ta'u jniñu un ni nanil'in yi, ti ni na ki'in ña kua'an jiin ña. Yukan ni skua'nu ña'an un nava se'e maa ña. <sup>22</sup> Yukan ni skua'a Moisés taka ja ka jini chaa Egipio, ti ni kuña'nu da. Ni kuu ndichi xini da jiin taka jniñu ni sa'a da jiin yivi. <sup>23</sup> Nu uu xiko kuiya da, ti ni ndo'o ini da ja kin nde'e da nasa kanchuku jna'an da ñuu Israel. <sup>24</sup> Iin kivi ni jini da ja kani iin chaa Egipio un iin jna'an da, ti Moisés ni nama da jna'an da un, ni kani da chaa Egipio un, ti ni ja'ní da. <sup>25</sup> Ni ndo'o ini da ja kachi jna'an da un ja Yandios ni taji maa da ja na nama da, ko tu ni ka chaku ini chaa un.

<sup>26</sup> Ti inga kivi ni jini da ka kanaa uu chaa Israel un, ti iin da kundee jiin inga da. Ti ni ndo'o ini Moisés ja ka'an da jiin da na ndumani da, ti ni kachi da: "Kunso'o naa ra, tu va'a ja ka kanaa ra, chi kuu jna'an ra naa ra." <sup>27</sup> Ti chaa ni kundee un ni chinda'a da Moisés, ti ni kachi da: "Ansu ni'in kuu chaa ta'u jniñu nuu na ja xndichi ni saña naa na. Tundo ni ta'u jniñu nuu ni. <sup>28</sup> Xi kuni ni ka'ní ni saña nanu ni ja'ní ni chaa Egipio un iku", ni kachi da. <sup>29</sup> Nu ni jiniso'o Moisés ja ni ka'an chaa un sia'an, ni yu'u da ti kua'an da inga ñuu nani Madián. Yukan ni kuncha da iin ñuu jika un. Yukan ni nanda'a da, ti ni iyo uu se'e da —ni kachi Esteban nuu yivi un.

<sup>30</sup> Siin Esteban ka'an da:

—Yukan ni kuncha Moisés uu xiko kuiya, ti iin kivi ni ja'an da nuu ñu'un te'e un. Ni ya'a da yuku nani Sinaí, ti ni nde'e da kayu nu'lñu ndi'i un. Ma'ñu ñu'un un kandichi iin ángel ja kuu tajnu ni taji Yandios. <sup>31</sup> Nu ni jini da yukan ti ni naa ini da. Kuan tu've da ja kin nde'e va'a da. Ti ni jiniso'o da ka'an Yandios. <sup>32</sup> Ti ni kachi ya: "Maa ri kuu Yandios. Tendi'i jna'an ra najana'an ni ka nchañu'un da ru'u. Abraham, Isaac jaín Jacob ni ka nchañu'un da ru'u", ni kachi ya. Ti ni keja'a Moisés ni'in da ja ni yu'u da, ti tukaa kuni da nde'e da yukan. <sup>33</sup> Ti ni kachi tuku Yandios nuu da: "Tava ndijña ra, chi kachi ri ja ñu'un ii kuu nuu kandichi ra jña. <sup>34</sup> Jini ri ja ni ka ndo'o yivi Israel ñuu Egipio, ti kunda'u ini ri. Ni jiniso'o ri ka ka'an i ja tukaa ga ka kundee i kuchaku i. Yukan kuu ja ni kuun ri venama ri i. Ti ro'o, no'on ra ñuu Egipio", ni kachi Yandios —ni kachi Esteban nuu yivi un.

<sup>35</sup> Siin Esteban ka'an da, ti ni kachi da:

—Ni taji Yandios Moisés kua'an da Egipto, vasu tu ka kuva'a ini yivi Israel nuu da, chi ni kachi da: "Ansu ni'in kuu chaa ta'u jniñu nuu na ja xndichi ni saña. Tundo ni ta'u jniñu nuu ni", ni ka kachi. Ko Yandios ni ja'a ya jniñu nuu Moisés ja na kuña'nu da, ti nama da siki yivi Israel, ti ni chindee tajnu

Yandios un Moisés jiin taká jniñú ni sa'a da. <sup>36</sup> Yukan kuu ja kua'a jniñú ña'nu ni sa'a Moisés ñuu Egípto, ti chaa kuña'nu un ni yu'u da nu ni jini da taká jniñú sa'a Yandios. Yukan sa ni ka jini chaa Israel un nasa jniñú sa'a Yandios. Yukan ni ku'iin da uu xiko kuiya. <sup>37</sup> Suni maa Moisés un ni kachi da nuu yivi Israel: "Taji Yandios iin jna'an ra ti ka'an da jnu'un ya nanu ni taji yo maa ri. Ti chunso'o ra jnu'un ka'an chaa un naa ra", ni kachi Moisés. <sup>38</sup> Na kua'an Moisés jiin yivi Israel nuu ñu'un te'e un. Ni ja'an da yuku Sinaí, ti yukan ni ka'an da jiin iin tajnu Yandios. Ti yukan kuu nuu ni ni'in da jnu'un Yandios ja na kuandatu yivi Israel, ti ni xndoo da jiin yo undi vijn —kachi Esteban.

<sup>39</sup> Siin Esteban ka'an, ti ni kachi da: —Ko jna'an yo na jana'an, tu ni ka jandatu da nuu Moisés, chi ka kuni da ndeokuñi da ñuu Egípto. <sup>40</sup> Yukan kuu ja ni kande Moisés yuku Sinaí un, ni ka keja'a chaa Israel un ka ka'an da jiin Aarón, ñani da: "Natejna'an iin santu na koxnuu nuu yo nandi ki'in yo, chi ni yoxnuu Moisés nuu yo na ni ka kee yo ñuu Egípto, ko tu jini yo ndo ni jna'an da vijn", ni ka kachi da. <sup>41</sup> Ti ni ka sa'a da ja natejna'an da iin xndiki lulu. Yukan ni ka nachiñu'un da, ti ni ka ja'ni da kuiti da ni ka soko da nuu un. Ni ka kusii ini da jiin ja ni ka sa'a da un. <sup>42</sup> Yukan kuu ja ni xndoo Yandios maa da, ni ka siin da nava ichi kuankoyo da, ja suni ni ka nchañu'un da ndikandii, yoo jiin chuxini. Chi sia'an ka'an nuu tutu ni ka sa'a chaa ni ka ka'an jnu'un Yandios na jana'an, chi nuu tutu un kachi sia'an:

"Ro'o chaa Israel naa ra, ni ka jikonuu ra nuu ñu'un te'e, tu ni ka nchañu'un ra ru'u, chi tu ni ka ja'ni ra kuiti ra ja soko ra nuu ri. <sup>43</sup> Taka nuu ni ka jikonuu ra ni ka ndiso ra ve'e ñi lulu nuu ni kunde santu nani Moloc. Ti suni ni ka ndiso ra inga santu ni nani Renfán ja ni ka natejna'an ra nanu iin chuximi. Ni ka nchañu'un ra santu un ja kuu santu ni ka sa'a maa ra naa ra. Yukan kuu ja tukaa jito ri ro'o naa ra. Ti taji ri ro'o kinkoyo ra undi inga ñuu Babilonia", ni kachi Yandios —kachi Esteban.

<sup>44</sup> Siin Esteban ka'an, ti ni kachi da:

—Na ni ka jikonuu jna'an yo nuu ñu'un te'e un na najana'an, ni ka ñava'a da iin ve'e ñi nuu ni ka nchañu'un da Yandios. Ni ka sa'a da ve'e un nava ni kachi Yandios nuu Moisés. <sup>45</sup> Yukan ti nu ni jaa iin kivi ni ta'u Josué jniñú nuu jna'an yo najana'an, ni ka kani'in da ve'e un kua'an da jiin undi nuu ñuu Canaán. Ti ni ka keni'in da yivi ñuu un kua'an, chi ni chindee Yandios maa da naa da. Sia'an ni ka ñava'a da ve'e ñi un undi kivi ni kivi David ni ta'u da jniñu. <sup>46</sup> Ni kuu ini Yandios David. Yukan kuu ja ni jikan David iin ta'u nuu Yandios, chi ni ndo'o ini da ja sa'a da iin ve'e va'a ja kuu Yandios, ya ni nchañu'un tata da najana'an Jacob, ko tu ni kachi Yandios. <sup>47</sup> Ti Salomón, se'e yii David kuu ja ni sa'a ve'e Yandios. <sup>48</sup> Vasu tu kancha Yandios chaku ini ve'e ka sa'a yivi, nava ni kachi chaa ni ka'an jnu'un Yandios undi jana'an:

<sup>49</sup> Ta'u ri jniñú andiví ti suni nuu ñuyivi,

Tí tu ka sa'a ra iin ve'e ja kuncha ri ndetatu ri.

<sup>50</sup> Chi maa ri ni sa'a tendí'i ja iyo ja'a.

Sia'an ni kachi Yandios, ni kachi profeta un —kachi Esteban.

<sup>51</sup> Siin Esteban ka'an, ti ni kachi da:

—Ro'o chaa Israel naa ra, nini ka kuni'in ini ra naa ra. Tu ka chunso'o ra jnu'un Yandios. Tu ka jandatu ra nuu Espíritu Santo. Ka sa'a ra nanu ni ka sa'a jna'an ra najana'an, <sup>52</sup> na ni ka ja'a da tau chaa ni ka ka'an jnu'un Yandios. Ti ni ka kachi profeta un ja chaa iin chaa va'a, ko ni ka ja'ni yivi chaa un naa da. Ni chaa Jesús, ko ro'o ni ka jnií ra ya, ti ni ka ja'ni ra ya. <sup>53</sup> Undi najana'an ni ka'an iin tajnu Yandios jnu'un ya nuu jna'an yo ja na kuandatu da, ti ja ka

jini ra, ko tu ka jandatu ra jnu'un ni ka'an tajnu un —ni kachi Esteban nuu da naa da.

### *Ni ji'i Esteban*

<sup>54</sup> Nu ni ka jiniso'o da jnu'un ni ka'an Esteban, ni ka keja'a ka ku'yu yu'u da, chi ni ka kuiti xaan ini da naa da. <sup>55</sup> Jjin inijnuni Espíritu Santo ni ndakoto Esteban ichi andivi, ti ni jini da nukoo Yandios ta'u ya jniñu, ti kandichi Jesús nuu nda'a kua'a ya. <sup>56</sup> Yukan ti ni kachi Esteban:

—Nde'e naa ra, nuña andivi, ti nde'e va'a ri ja kandichi maa Se'e Yívi Ñuyivi, ti yukan kuu Jesús —ni kachi da.

<sup>57</sup> Tendi'i chaa un ni ka sa'a so'o da, ti ni ka kana jjiin ko'o da, chi ni ka kuiti xaan ini da. Ni ka kututu yachi da nuu kandichi Esteban. <sup>58</sup> Ni ka keni'in da Esteban undi yu'u ñuu ja na kua'a da yuu siki da. Tendi'i yivi un ni ka tava manga ka ñu'un, ti ni ka xndoo jjiin iin chaa nani Saulo. <sup>59</sup> Ni ka keja'a ka ja'a da yuu siki Esteban, ti Esteban ni jikanta'u da nuu Jesús ti ni kachi da:

—Jito'yo Jesús, naki'in ni saña —ni kachi da.

<sup>60</sup> Yukan ti ni jakunjiti da, ni kanajiiin ko'o da, ti ni kachi da:

—Jito'yo Jesús. Tu chakuachi ni yivi ja'a ja jniñu ka sa'a i ja'a! —ni kachi da.

Nu ni ndi'i ni ka'an da jnu'un un, ti ni ji'i da.

### *Keni'in Saulo yivi ka kandixia jnu'un Jesús*

## 8

<sup>1-2</sup> Ni kusii ini Saulo ja ni ka ja'nii da Esteban. Yukan ka'iin tijni chaa ka kandixia Jesús, ni ka chunduji da Esteban, ti ni ka nde'e xaan da ja ni ji'i Esteban. Yukan ti ni ka kuiti ini yivi tu ka kandixia jnu'un Jesús, ti yivi ka kandixia Jesús kuankoyo da inga ñuu. Sava da kuankoyo ichi ñuu Judea, ti sava da kuankoyo ichi ñuu Samaria, ti ni ka kendo apóstol ñuu Jerusalén. <sup>3</sup> Ko Saulo ni siin da ja'a da nundo'o nuu taká yivi ka kandixia jnu'un Jesús. Ti kivi da ve'e yivi un, ti ni jniñi da presu chaa jjiin ñasi'i, ti ni jnaa da vekaa.

### *Ni jichanuu jnu'un Jesús ñuu Samaria*

<sup>4</sup> Taka yivi ni ka kee Jerusalén, ni ka ka'an da jnu'un Yandios taka ñuu ni ka ya'a da. <sup>5</sup> Suni ni kee Felipe ti kua'an da ñuu Samaria, ti yukan ni ka'an da nuu yivi taka jniñu ni sa'a Jesús. <sup>6</sup> Ni ka chunso'o yivi un jnu'un ni ka'an Felipe, ti suni tijni jniñu ña'nú ni sa'a da. Ti tendi'i yivi un ni ka kuva'a ini nuu da. <sup>7</sup> Ti kua'a tachi xaan ka jna'an yivi un ni kenchaa da. Nu ni ka kee tachi xaan un, ti maa tachi xaan un ni ka kanajiiin ko'o. Ti suni kua'a yivi tikuku ni ka nduva'a. <sup>8</sup> Yukan ti ni ka kusii ini tendi'i yivi ñuu yukan.

<sup>9</sup> Ti yukan ni iyo iin chaa tasí ni nani Simón. Ti ka kunda'u ini yivi un maa da, chí ni sa'a da jniñu ja tu kuu sa'a inga yivi, ti ni kachi da ja kuu da iin chaa kuña'nú. <sup>10</sup> Ti tendi'i yivi un ka chunso'o taka jnu'un ka'an da. Kuu chaa ña'nú kuu chaa kuachi ni ka chunso'o ti ni ka kachi:

—Ndiso da jniñu ña'nú nuu Yandios —ni ka kachi da.

<sup>11</sup> Ni ka chunso'o yivi jnu'un ni ka'an da, chi jjiin jniñu tasí un ni xnda'u da yivi tijni kivi. <sup>12</sup> Ti Felipe ni kachi da nasa kuu kivi i nda'a Yandios ja ta'u ya jniñu nuu i. Ti suni ni ka'an da jnu'un Jesús. Yukan ti ni ka kandixia yivi jnu'un ni ka'an Felipe, ti ni ka janducha i. Kuu chaa, kuu ñasi'i ni ka janducha. <sup>13</sup> Suni undi maa Simón ni kandixia da, ti ni janducha da. Ti ni keja'a da jikonuu da jjiin Felipe, ti ni jini da taka jniñu ña'nú sa'a da. Ni naa ini Simón nu ni jini da taka jniñu ña'nú un.

**14** Ni ka'iin apóstol ñuu Jerusalén, ni ka jini da ja ni ka kandixia yivi Samaria jnu'un Jesús. Yukan ti ni ka taji uu ga apóstol un Pedro jiin Juan kuankoyo da ñuu Samaria. **15** Ni jakoyo da ñuu Samaria, ti ni ka jikanta'u da nuu Yandios, ti ni ka kachi da:

—Kua'a ni Espíritu Santo nuu yivi ja'a —ni kachi da.

**16** Sia'an ni ka kachi da, chi ja ni ka janducha chaa un jiin sivi Jito'yo Jesús, ko tu ja'i ni'in da Espíritu Santo naa da. **17** Yukan ti ni ka chuxndee Pedro jiin Juan nda'a da siki yivi un, ti ni ka ni'in da Espíritu Santo. **18** Ni jini Simón ja so ni ka chuxndee apóstol un nda'a da siki yivi un, ti ni ka ni'in i Espíritu Santo. **19** Yukan ti ni kachi Simón:

—Kua'a ni jniñu ja'a nuu na, na chuxndee na nda'a na siki yivi, ti na ni'in i Espíritu Santo, ti cha'u na ni'in —ni kachi da.

**20** Ti ni kachi Pedro jiin da:

—Na naa xu'un ra jiin ra, chi ndo'o ini ra ja kuan ra ja ja'a Yandios nuu yo.

**21** Tu kuu sa'a ra jniñu ja'a, chi tu iyo ndaa ini ra nuu Yandios. **22** Xndoo jniñu kue'e ndo'o ini ra, ti kakanta'u nuu Yandios na kuanka'nú ini ya nuu ra. **23** Ja jini ri ja jiin kuachi ra xnaa ra maa ra, chi ni'in xaan ndikun ra jiin kuachi ra. Ti yukan kuu ja xnaa ra maa ra jiin —ni kachi Pedro.

**24** Yukan ti ni kachi Simón:

—Kakanta'u ni nuu Yandios ja tu jna'an na nava ni kachi ni —ni kachi da.

**25** Yukan ti ni ka siin Pedro jiin Juan ka ka'an da jnu'un Yandios. Ti ka ka'an da jnu'un Yandios ni ndañuu Samaria nasa nanita'u yivi. Sa ni ka nandeokuñi da ñuu Jerusalén.

**26** Yukan ti ni kachi iin tajnu Yandios nuu Felipe:

—Sa'a tu'va ra maa ra ti ki'in ra ñuu Gaza. Ki'in ra ichi ja ndejna'an jiin ichi Jerusalén, ti ki'in ra ñuu Gaza. Ya'a ra nu tu kanchuku yivi un, ti jaa ra ñuu Gaza. Sia'an ni kachi tajnu un nuu da. **27** Yukan ti ni kee Felipe kua'an da. Ti ichi kua'an da ni ndejna'an da jiin iin chaa Etiopía. Ni kuu da iin chaa ndisojiníñu nuu iin reina ni nani Candace, ni ta'u jniñu ñuu Etiopía. Ni kuu da chaa sava'a xu'un nuu ña'an un. Chaa Etiopía un ni ja'an da ñuu Jerusalén, chi nchañu'un da Yandios nava iyo jnu'un chaa Israel. **28** Nukoo da nuu iin carreta kuano'on da ichi ñuu da. Ti skua'a da iin tutu Yandios ni chaa Isaías najana'an. **29** Ti Espíritu Santo ni kachi nuu Felipe:

—Kua'an ti najna'an ra jiin chaa nukoo nuu carreta un —ni kachi ya.

**30** Yukan ti ni ja'a da corri kua'an da nuu kua'an carreta un, ti ni jiniso'o da ja skua'a chaa Etiopía un jnu'un ni chiso Isaías, ti ni kachi Felipe jiin da:

—¿Chaku ini ra jnu'un ka'u ra ja'a nu?

**31** Ti ni kachi chaa un:

—Tu chaku ini na, chi tundo xndaku nuu na —ni kachi da.

Yukan ti ni kana da Felipe ja na nukoo da nuu carreta da un. **32** Ti nuu ka'u da un kachi sia'an:

Ka jankuñi riñu nuu chaa ka sete ti, ko tu ka nde'e ti.

Ka janchaka yivi riñi i nuu kuu ti, ko tu ka nde'e ti.

Suni sia'an kondo'o chaa un, ko tu ka'an da.

**33** Ni ka sa'a yivi nava kuu ini jiin da.

Tu ni ka xndichi ndaa maa da, vasu tu ni iyo kuachi da.

Ko tundo jini nasa yivi kandixia jniñu ni sa'a da.

Ni ka ja'ni yivi da, ti ni kee da ñuyivi ja'a.

Sia'an ka'an nuu tutu nuu skua'a chaa un.

Kachi tutu.

**34** Yukan ti ni jikajnu'un chaa Etiopía un Felipe, ti ni kachi da:

—Kachi ni ti'li nuu na nasa kuni ka'an jnu'un ja'a. Na chaa kuu ja ka'an profeta ja'a. Ka'an da nu maa da, xi ka'an da siki inga yivi —sia'an ni jikajnu'un da nuu Felipe.

<sup>35</sup> Yukan ti ni keja'a Felipe ni xndaku da. Xnaka ni kachi Felipe nuu chaa Etiopía un ja Jesús kuu chaa ni ka'an tutu un, ti sa ni kachi da taka ga jniñu ni sa'a Jesús. <sup>36</sup> Kuankoyo da ichi un, ti ni jakoyo da nuu ñu'un nducha, ti ni kachi chaa Etiopía un:

—Nde'e ni. Ja'a ñu'un nducha ;tu kuu skuanducha ni saña ja'a nu? —ni kachi da.

<sup>37</sup> Ti ni kachi Felipe:

—Nu kandixia ni ini ra Jesús, ti vatuni —ni kachi da.

Ti ni kachi chaa un:

—Kandixia na ja maa iin Jesús kuu Se'e Yandios —ni kachi da.

<sup>38</sup> Yukan ti ni kachi chaa Etiopía un ja na jakuiñi carreta un. Ni ka kuun da nuu ñu'un nducha un, ti ni skuanducha Felipe maa da. <sup>39</sup> Ni ka ndaa da yu'u nducha un, ti Espíritu Santo kua'an ya jiin Felipe ichi inga ñuu nani Azoto. Ti tukaa ni jini chaa Etiopía un nuu da, chi kua'an da. Ni siin chaa Etiopía un ichi kua'an da, ko ja ni ndusii ini da, chi ja ni kandixia da Jesús.

<sup>40</sup> Ni kunde Felipe ñuu nani Azoto. Ni kee da yukan, ti kua'an da ka'an da taka jniñu ni sa'a Jesús. Sia'an ni ka'an da taka ñuu ni ya'a da undi ni jaa da ñuu Cesarea.

*Ni naki'in Saulo ichi Yandios  
(Hechos 22.6-16; 26.12-18)*

## 9

<sup>1</sup> Tu ja'ncha ini Saulo ja ka kanaa da jiin yivi ka kandixia Jesús. Ni kachi da ja ka'ni da yivi un. Yukan ti ni ja'an da nuu sutu kuñanu ga ñuu Israel. <sup>2</sup> Ti ni jikan da tutu nuu sutu kuñanu ñuu Jerusalén ja ki'in nuu sutu ka'iin ñuu Damasco. Yukan ni ni'in jnu'un ndee ini da ja jniñi da presu taka yivi ka kandixia Jesús ja ndejna'an da jiin. Ti kin nchaka da presu yukan undi ñuu Jerusalén. <sup>3</sup> Yukan ti ni kee da kua'an da. Ni kuyajni da ñuu Damasco, ti ni ndinchaa iin nduva siki da. <sup>4</sup> Ni nduva Saulo nuu ñu'un, ti ni jiniso'o da iin ndusu andivi ni kachi:

—Ro'o Saulo, ¿ndoo ka kanaa ra jiin ri? —ni kachi ndusu un.

<sup>5</sup> Ti ni kachi Saulo:

—Taa, ¿nau ni'in ka'an?

Ti ni kachi tuku ndusu un:

—Maa ri kuu Jesús, ti ro'o kuu ja ka kanaa jiin ri. <sup>6</sup> Ndokuñi ti kivi ra ñuu, ti iin yivi ñuu yukan kachi nuu ra ndoo sa'a ra, ni kachi ya. <sup>7</sup> Chaa kuankoyo jiin Saulo, tu ni ka ka'an da chi ni ka yu'u xaan da. Ni ka jiniso'o da ja ni ka'an, ko tundo ni ka jini da. <sup>8</sup> Ni ndokuiñi Saulo, ni jiña da nduchi da, ko tukaa ga ni kuu nde'e da, chi ni kukuaa da. Yukan ti ni ka jniñi chaa kuankoyo jiin da un nda'a da, ti ni ka kivi da ñuu Damasco. <sup>9</sup> Ni kuncha da uni kivi ja tu ni kuu nde'e da. Tu ni yee da staa, ni tu ni ji'i da nducha.

<sup>10</sup> Ti ñuu Damasco un kancha iin chaa kandixia Jesús, nani da Ananías. Ti nuu iin janí ni kachi Yandios nuu da:

—Ro'o Ananías.

Ti ni kachi Ananías:

—Ji'in Yandios, ¿na jniñu kuni ni saña?

<sup>11</sup> Ti ni kachi Yandios:

—Ndokuiñi ti ki'in ra iin ichi nani Ichi Ndoo. Ti ve'e Judas yukan kajnu'un ra iin chaa ñuu Tarso, nani Saulo. Vinañu'ni nakanajaa da ru'u. <sup>12</sup> Ni jini da vaji iin chaa nani Ananías, ti chuxndee da nda'a da siki da ja na kuu nde'e tuku da —ni kachi Yandios.

<sup>13</sup> Yukan ti ni kachi Ananías:

—Ni'iin Yandios, tijni yivi ka ka'an jnu'un chaa un, ti ka ka'an da naa da ja ni ja'a xaan da nundo'o nuu yivi ka kandixia Jesús ñuu Jerusalén. <sup>14</sup> Ti vijnal kancha da ñuu ja'a, chi ja ndisojniñu da nuu sutu ka kuña'nu un ja na jniñi da presu yivi ñuu yo ka kandixia Jesús —ni kachi Ananías nuu Yandios.

<sup>15</sup> Yukan ti ni kachi Yandios nuu Ananías:

—Tu yu'u ra ki'in ra nuu kancha Saulo, chi ru'u ni ta'u jniñu nuu da. Ni nakaji ri chaa un ka'an da jnu'un ri nuu yivi tijni nación yukan, jiin yivi nación Israel. <sup>16</sup> Ti na kuni da nasa kondo'o da ja siki ru'u —ni kachi Yandios nuu Ananías.

<sup>17</sup> Yukan ti kua'an Ananías ve'e nuu kancha Saulo un. Ni kivi da ini ve'e un, ti ni chuxndee da nda'a da siki Saulo, ti ni kachi da:

—Ñani Saulo, ja ni jini ra Jito'yo Jesús ichi vaji ra. Maa ya ni taji ru'u vaji ri ja na kuu nde'e tuku ra, ti ni'iin ra Espíritu Santo —ni kachi Ananías nuu Saulo.

<sup>18</sup> Yukan na ti ni ndundijin nduchi Saulo, chi ni kencha viko nduchi da, ti ni kuu nde'e da, ti ni janducha da. <sup>19</sup> Ni ndokaji da, ti ni ndundee ini da.

Yukan ni kuncha Saulo tijni kivi jiin yivi ka kandixia Jesús kanchuku ñuu Damasco.

### *Ni keja'a Saulo xna'an da nuu yivi ñuu Damasco*

<sup>20</sup> Ni ja'an Saulo veñu'un yivi Israel, ti ni kachi da ja maa iin ni Jesús kuu Se'e Yandios. <sup>21</sup> Ni ka jiniso'o yivi un jnu'un ni ka'an Saulo, ti tendi'i ni ka naa ini, ti ni ka keja'a ka ndajnu'un:

—Ndo'o ini yo ja ni chaa Saulo ja na jniñi da presu taka yivi ka kandixia Jesús ñuu yo, ti kin nchaka da nuu sutu ka kuña'nu un, ko vijnal tukaa sa'a da sia'an —ni ka kachi da.

<sup>22</sup> Ni ja'a Yandios jnundee ini Saulo, ti ni kachi da nuu chaa Israel kanchuku ñuu Damasco un, ja Jesús kuu Cristo ja ni taji Yandios ja ta'u jniñu ña'nu. Ti chaa un tu ni ka kuu ndeokani da jnu'un ni ka'an Saulo.

### *Ni kaku Saulo nuu chaa Israel*

<sup>23</sup> Nu ni kuu kivi, ti ni ka ndajnu'un chaa Israel un nasa ka'nii da Saulo. <sup>24</sup> Ni jini Saulo ja sia'an ka ndo'o ini chaa un. Suni kuu nduu kuu ñuu ka ndito da yux'e'le nama ka'nii ja ndasi yu'u ñuu un ja ka kuni ka'nii da Saulo. <sup>25</sup> Suni ni ka iyo yivi ni kejna'an ini jiin Saulo, ja ni ka keja'a ka kandixia jnu'un Jesús ni ka'an da. Ni ka nama da chaa iin jakuua. Ni ka chundee da Saulo ini iin chika ka'nii, ti ni ka skuun da chaa yu'u nama un jiin yo'o. Yukan ni kaku da, ti ni jinu da kua'an da.

### *Ni ka'an Saulo jnu'un Jesús ñuu Jerusalén*

<sup>26</sup> Kuano'on Saulo ñuu Jerusalén tuku ja kuni da najna'an da jiin takaa ga yivi ka kandixia Jesús yukan, ko ni ka yu'u chaa un nde'e da Saulo, chi tu ka kandixia da ja ni nduu Saulo ndaja'a Jesús. <sup>27</sup> Yukan ni naki'in Bernabé Saulo, ti ni janchaka da chaa nuu apóstol, ni nama da chaa un, ti ni kachi da:

—Saulo ja'a, ni jini da Jesús ichi kua'an da ñuu Damasco, ti ni ka'an Jesús jiin da. Ja yukan kuu ja ni kuu ndee ini da ni ka'an da jnu'un Jesús ñuu un —ni kachi Bernabé.

<sup>28</sup> Yukan ti ni ka naki'in apóstol un Saulo, ni ka jikonuu da ñuu Jerusalén. Ti suni ni ka'an da jnu'un Jesúsjiiñ jnundee ini yukan. <sup>29</sup> Ni ka'an da jnu'un un nuu chaa Israel ja ka ka'an yu'u griego, ko tu ni ka janta'u chaa un maa da, ti ka kuni da ka'nii da Saulo. <sup>30</sup> Nu ni ka jini uu ga ndaja'a un ja ka kuni da ka'nii da Saulo, ti ni ka taji da uu chaa kuankoyo jiiñ da ñuu Cesarea. Ti yukan ni ka natajia da chaa kuano'on da ñuu da Tarso.

<sup>31</sup> Ti kuiya yukan, tukaa ni iyo nundo'o nuu yivi ka kandixia Jesúsjiiñ Judea, ñuu Galilea, jiiñ ñuu Samaria. Ni ka ndundee ini yivi un, ti ni ka keja'a ka ndukua'a, ti ka jandatu i jniñ ta'u Yandios. Ti Espíritu Santo, ja'a ya jnundee ini i naa i.

### Ni nduva'a Eneas

<sup>32</sup> Yukan ti ni ja'an Pedro taka ñuu nuu kanchuku yivi ka kandixia Jesúsjiiñ. Suni ni ja'an da ñuu Lida ja na kuni da nasa kanchuku yivi ka kandixia Jesúsjiiñ yukan. <sup>33</sup> Yukan ni jini da iin chaa nani Eneas ja ku'u da. Ni katuu da una kuiya ja ni kuu tikuku si'in da. <sup>34</sup> Ni kachi Pedro jiiñ da:

—Ro'o Eneas, ja ni sa'a Jesúsjiiñ tajna ro'o vijnañu'nii. Ndoko ti na stuu ra yuu ra —ni kachi da.

Yukan ti ni ndoko da, chi ja ni nduva'a da. <sup>35</sup> Tendi'i yivi kanchuku ñuu Lida jiiñ yivi ñuu Sarón, ni ka jini ja ni nduva'a da, ti ni ka keja'a ka kandixia jnu'un Jesúsjiiñ.

<sup>36</sup> Ñuu Jope kancha iin ñasi'i nani Tabita, ja ni nani ña Dorcas nuu yu'u griego. Suni ni kandixia ña Jesúsjiiñ, ti ka ja'a yivi ja yiñu'un maa ña, chi chindee ña yivi nda'u. <sup>37</sup> Kivi jña ni keja'a ku'u ña, ti ni ji'i ña. Ni ka skuchi yivi un yiki kuñu ña, ti ni ka skatuu ña ini iin ve'e kuu uu. <sup>38</sup> Ti ni ka jini ndaja'a Jesúsjiiñ Jope un ja kancha Pedro ñuu Lida. Yukan ni ka taji da uu chaa kuankoyo nuu kancha Pedro ñuu Lida, chi tu jika xaan. Ni ka jakoyo da yukan, ti ni ka ka'an nda'u da jiiñ Pedro ja na ki'in da ñuu Jope, chi katuu iin ndiyi ja na ni chaku i, kuu i iin yivi va'a. Ti ni kachi da:

—Cho'o ñuu un vijnañu'nii —ni kachi da.

<sup>39</sup> Yukan ti ni kee Pedro kua'an da jiiñ da. Ni jaa da, ti ni kaa da nuu katuu ndiyi yukan. Yukan ka'iin tijni ña'an ni kendo maa iin ka nde'e xaan ña, ti ni ka xna'an ña taka sa'ma ni sa'a Dorcas na ni chaku ña. <sup>40</sup> Tendi'i ña'an un ni keni'in Pedro kuankoyo ña, ni jakunjiti da ti ni jikanta'u da nuu Yandios. Yukan ni tu'va da nuu katuu ndiyi un, ti ni kachi da:

—Ndoko Tabita —ni kachi da.

Yukan ti ni jña ña nduchi ña. Ni nde'e ña nuu Pedro, ti ni nukoo ña. <sup>41</sup> Ni jniñ da nda'a ña, ti ni ndokani da ña. Yukan ti ni kana Pedro taka yivi, ndaja'a Jesúsjiiñ ña'an un, ti ni xna'an da nuu yivi un ja chaku tuku ña. <sup>42</sup> Tendi'i yivi ñuu Jope un ni ka jini nava ni jna'an Dorcas, ti kua'a ni ka keja'a ka kandixia Jito'yo Jesúsjiiñ. <sup>43</sup> Yukan ni kuncha Pedro tijni kivi, ni nchaa da ve'e iin chaa nani Simón, iin chaa ste'yu ñiiñ.

### Ni ja'an Pedro ve'e Cornelio

## 10

<sup>1</sup> Kancha iin chaa nani Cornelio ñuu Cesarea. Ni kuu da iin capitán ni ta'u da jniñ nuu iin ciento soldado. Ni ka yi'i nuu soldado vekoyo ñuu Italia. <sup>2</sup> Ñava'a da jnu'un chaa Israel, ansu maa chaa Israel ni kuu da, ko ni nchañu'un da Yandios jiiñ taka jna'an da. Ti kua'a xu'un ni ja'a da nuu yivi nda'u. Nini nakanajaa da Yandios taka kivi. <sup>3</sup> Iin kivi kaa uni ja'ini ni naxna'an Yandios

maa ya nuu da, ti ni jini da iin tajnu Yandios ni chaa nuu kandichi da, ti ni kachi tajnu un nuu da:

—Ro'o Cornelio —ni kachi da.

<sup>4</sup> Ni nde'e va'a Cornelio nuu tajnu un, ni yu'u xaan da, ti ni kachi da:

—Ni jiniso'o Yandios taka jnu'un jikanta'u ra nuu ya, ti jini ya ja chindee xaan ra yivi nda'u. Yukan kuu ja nuku'un ini ya maa ra. <sup>5</sup> Taji uu chaa na ki'in kana da Simón Pedro, kancha da fiuu Jope, na kii da ja'a. <sup>6</sup> Ti kancha Pedro ve'e inga chaa nani Simón, iin chaa ste'yu fi. Ti ve'e chaa un kancha undi yu'u mar. Yukan ti na xna'an Pedro nuu ra nasa sa'a ra —ni kachi tajnu un.

<sup>7</sup> Yukan ti kua'an tajnu un. Ti Cornelio ni kana da uu chaa ka junukuachi nuu da jiin iin soldado ja ndito maa da. Ti soldado un suni ni kandixia da Yandios. <sup>8</sup> Ni jani Cornelio jnu'un nuu chaa un taka ja ni jini da, ti ni taji da chaa un kuankoyo da fiuu Jope, ja na kin kana da Pedro.

<sup>9</sup> Ni kundijin inga kivi ja ka'iin da ichi, kuan kuyajni da fiuu Jope, ti koxiuu kivi yukan ni kaa Pedro siki ve'e un ja kanajaa da Yandios. <sup>10</sup> Ji'i da ti'lli soko, ti kuni da kusama da, ko ti kuva'ga ndeyu da. Yukan kuu ja ni kaa da siki ve'e un, ti yukan ni skoto Yandios nuu da. <sup>11</sup> Ni jini da andivi vekuun iin sa'ma ka'nu, ka ndikun ndi kuun jiki, ti kuan kuun undi nuu fiu'un. <sup>12</sup> Ti nuu sa'ma un ka'iin taka nuu kuiti, kuiti ka iyo kuun nda'a, jiin koo, jiin taka kuiti ka jika nuu tachi. <sup>13</sup> Ti ni jiniso'o Pedro ja ni ka'an Yandios, ti ni kachi ya:

—Pedro, ndokuiñi, ka'ni kuiti ja'a, ti kaji ra —ni kachi ya.

<sup>14</sup> Yukan ti ni kachi Pedro:

—Yandios, tu kuu kaji na, chi tu ni kutu'va na sia'an —ni kachi da.

<sup>15</sup> Ni ka'an tuku Yandios inga jinu:

—Tu va'a ja kachi ra ja tu kuu kaji ra ja ja'a ri nuu ra —ni kachi ya.

<sup>16</sup> Uni jinu ni kachi Yandios sia'an. Yukan ti ni jini Pedro ja ni ndaa manta un kuano'on andivi.

<sup>17</sup> Ni naa ini Pedro ja ni jini da yukan. Ti ni ndo'o ini da nau ja kuu yukan, ti ni ka kuyajni chaa ni taji Cornelio. Ti ka nduku jnu'un da nanu nchaa ve'e chaa nani Simón. Ni jakoyo chaa un yux'e Simón, <sup>18</sup> ti ni ka jikajnu'un da:

—¿Kancha iin chaa nani Simón Pedro ja'a nu? —ni ka kachi da.

<sup>19</sup> Ni ndo'o ini Pedro ja ni jini da un, ti ni kachi Espíritu Santo:

—Ni chakoyo uni chaa ka nanduku ro'o. <sup>20</sup> Kuan kuun, ti ki'in ra jiin da. Tundo kani ini ra vasu chaa inga nación ka kuu da, chi maa ri ni ta'u jniñu nuu da ja kii da nu kancha ra —ni kachi ya.

<sup>21</sup> Yukan ti ni kuun Pedro, ni jaa da nuu kaijin chaa un, ti ni kachi da:

—Maa ri kuu ja ka nanduku ra, ¿ti na jniñu vekoyo ra? —ni kachi da.

<sup>22</sup> Ti ni ka kachi chaa un:

—In chaa nani Cornelio ja kuu capitán. Kuu da iin chaa va'a. In tajnu Yandios ni kachi nuu da ja na kana da maa ni ki'in ni ve'e da, ti na kunso'o da taka jnu'un ka'an ni —ni ka kachi da.

<sup>23</sup> Yukan ti ni kachi Pedro:

—Ña'an ti kivi ini ve'e, chi nuña ti'lli nuu kusu ra naa ra —ni kachi da.

Ni kundijin inga kivi, ti kua'an Pedro jiin da naa da. Ti suni kuankoyo tijní chaa ka kandixia Jesúus kanchuku fiuu Jope. <sup>24</sup> Ni kundijin inga kivi ni jakoyo da fiuu Cesarea. Ja ni ndi'i taka jna'an Cornelio jiin chaa mani da jiin, ni kana da ni ka ndututu ve'e da. Ni ka ndututu da yukan ja ka ndatu da Pedro. <sup>25</sup> Ni jakoyo chaa un jiin Pedro, ti ni kee Cornelio ni ja nujna'an da chaa, ni jakunjiti da nuu ja'a Pedro, ja kuni da na Chiñu'un da Pedro. <sup>26</sup> Ko ni ndokani Pedro maa da, ti ni kachi da:

—Cornelio, ndokuiñi. Tu va'a ja nachiñu'un ra ru'u, chi suni iin chaa ñuyivi ja'a kuu ri —ni kachi Pedro.

<sup>27</sup> Ni ka keja'a da ka ndajnu'un da, ni ka kivi da ini ve'e, ti ni jini Pedro ja kua'a yivi ni ka kututu un. <sup>28</sup> Ti ni keja'a Pedro ka'an da:

—Ja ka jini ra ja ru'u kuu chaa Israel, ti ro'o ka kuu chaa inga nación naa ra. Yukan iyo iin jnu'un ja tu kuu kunchuku ri ni ti'li jiin ra naa ra, ti ni tu kuu najna'an yo naa yo, chi tu ni iyo ley ja najna'an yo najana'an. Ko vijna ni kachi Yandios nuu ri ja tu kuu ka'an ri ja tu iyo ley, ti ni tu kuu ka'an ri ja tu kuu najna'an ri jiin yivi inga nación. <sup>29</sup> Yukan kuu ja tukaa ndi'i ini ri, ti vajji ri na ni jakoyo chaa ni ka ja kuaka ru'u. Ti vijna jikajnu'un ri: ¿Ndoo ni ka kana ra ru'u? —ni kachi Pedro.

<sup>30</sup> Yukan ti ni jani Cornelio jnu'un, ti ni kachi da:

—Vijna ni kuu kuun kivi ja ni nakanajaa na Yandios ve'e na ja'a. Suni hora vijna ni kuu, chi kaa uni ja'in ni keja'a nakanajaa na Yandios. Iyo ndicha na chi sia'an ni nchañu'un na Yandios, ti ni skoto ya nuu na. Ni jini na iin chaa ñu'un sa'ma ndinchaa, ti iin tajnu Yandios ni kuu. <sup>31</sup> Ti ni kachi da nuu na: "Cornelio, ni jiniso'o Yandios taka jnu'un jikanta'u ra nuu ya, ti jini ya ja chindee xaan ra yivi nda'u. Yukan kuu ja nuku'un ini ya maa ra. <sup>32</sup> Vijna taji uni chaa ñuu Jope, nuu iin chaa nani Simón, ja suni nani da Pedro, ja na kii da ja'a. Kancha da ve'e Simón, chaa ste'yu ñi un. Ti ve'e chaa un kancha undi yu'u mar. Nu na chaa chaa un, ti ka'an da jiin ra", ni kachi tajnu Yandios. <sup>33</sup> Tu ni kukuee na, ti ni ja'a na jnu'un nuu ni, ti va'a sa'a ni ja ni chaa ni. Ni ka ndututu taka na nuu Yandios, chi ka kuni kunso'o na taka jnu'un ni kachi Yandios nuu ni —ni kachi Cornelio.

### *Jnu'un ni ka'an Pedro ve'e Cornelio*

<sup>34-35</sup> Yukan ti ni keja'a Pedro ka'an da nuu yivi un:

—Ja jini ri vijna ja kuu ini Yandios nuu tendi'i yivi inga nación. Nu ka nchañu'un i Yandios, ti ka jandatu i nuu ya, ti naki'in ya yivi un. <sup>36</sup> Ka jini ra ja ni ka'an Yandios nuu yivi Israel, ti ni kachi ya ja Jesú kuu Cristo, ya sa'a ja na ndusii ini yo, ti ta'u ya jniñu nuu ni ñuyivi. <sup>37-38</sup> Ka jini ra nava ni jna'an nación Israel na ti kuu ga kuiya. Xnaka Juan ni ka'an da jnu'un Yandios, ti ni skuanducha da yivi. Yukan ti Jesú, iin chaa ñuu Nazaret, ni keja'a ya ka'an ya jnu'un Yandios ñuu Galilea, jiin ni ñuu Judea. Jini yo ja Yandios ni taji ya Jesú, ti ni ja'a ya Espíritu Santo nuu ya. Suni ni ja'a ya jniñu ña'nú nuu Jesú. Ti Jesú ni jikonuu ya taka ñuu, ti ni sa'a ya jniñu va'a nuu yivi kanchuku un. Ni sa'a ya tajna yivi ka jna'an tachi xaan, chi ni chindee Yandios maa ya. <sup>39</sup> Ka ka'an ri taka jniñu ni sa'a Jesú ñuu Jerusalén jiin taka ga ñuu yinda'a nación Israel, chi ni ka jini ri taka ja ni sa'a ya. Yukan ti ni ka ja'ní chaa Israel ya, ni ka jatakaa da ya nda'a cruz. <sup>40</sup> Ko nu uni kivi, ti ni naxndoto Yandios maa ya, ti ni ka jini tuku ri ya. <sup>41</sup> Tu ni ka jini tendi'i yivi ya. Nini ru'u naa ri. Ka ka'an ri ja ni ka jini ri ya, chi ni ka yee ri staa jiin ya, ti ni ka ji'i ri nducha jiin ya. Ti kivi ni nandoto ya nuu ñujil'i un, ni ka ndututu tuku ri jiin ya naa ri.

<sup>42</sup> Ti ni ta'u ya jniñu ja na ka'an ri jnu'un ya nuu yivi naa i. Ka'an ri ja Yandios ni taji Jesú ja na ta'u ya jniñu ña'nú, chi jaa iin kivi ja kii maa Jesú, kii xndichi ya ñuyivi. Ti kivi un, tendi'i yivi ni ka ji'i naa i, jiin tendi'i yivi ka chaku un, jakuiñi i nuu ya. <sup>43</sup> Tendi'i profeta ni ka ka'an tjinj jnu'un un najana'an, ti yukan kuu Jesú. Ni ka kachi da ja jaa iin kivi nu kuanka'nu ini Yandios nuu kuachi taka yivi, nu na kandixia ndaa i jniñu sa'a Jesú ja kuu maa i naa i —ni kachi Pedro nuu yivi un.

### *Ni ka ni'in yivi inga nación Espíritu Santo*

**44** Ni ka'an Pedro jnu'un un, ti ni chaa Espíritu Santo siki yivi ka ñuso'o un. **45** Taka chaa vekoyo jiin Pedro un ja ni ka kandixia da Jesús, ko chaa Israel ka kuu da. Yukan kuu ja ni ka naa ini da ja ni ka ni'in yivi inga nación un Espíritu Santo. **46** Ni ka jini da ja ni ka ni'in yivi un Espíritu Santo, chi ni ka jiniso'o da ja ka ka'an yivi un sa'an yu'u ja ka ka'an yivi inga nación, ti ka ka'an i ja Yandios kuu ja kuña'nuaan ga. **47** Yukan ti ni kachi Pedro nuu chaa vekoyo jiin da un:

—Ni ka ni'in yivi ja'a Espíritu Santo nanu ni ka ni'in ru'u naa ri. Yukan kuu ja tundo ka'an, ti kachi ja tu kuu kuanducha da —ni kachi Pedro.

**48** Yukan ti ni kachi Pedro ja na kuanducha yivi un, chi ni ka kachi i ja ni ka kandixia i taka jniñu ni sa'a Jesús, ya kuu Cristo. Ti ni ka ka'an nda'u yivi un jiiñu Pedro ja na kuncha da yukan jaku kivi jiin da naa da.

### *Jnu'un ni ka'an Pedro nuu yivi ka kandixia Jesús ñuu Jerusalén*

## 11

**1** Yukan ti ni ka jini taka ga apóstol un jiin taka ndaja'a Jesús ka'iin ñuu Judea, ja ni ka kandixia yivi inga nación jnu'un Yandios. **2** Ni nandeokuñi Pedro ñuu Jerusalén. Ni jaa da nuu kanchuku uu ga ndaja'a Jesús, ja ka kuu chaa Israel. Tijni ndaja'a un ni ka ka'an ja na koo seña yiki kuñu yivi inga nación nanu ni ka ka'an maa da naa da un ni ka kandixia da Jesús. Ti ndaja'a un ni ka keja'a ka xndichi da Pedro, ti ni ka kachi da:

**3** —Tu va'a ni sa'a ra ja ni kivi ra ve'e yivi inga nación ja tu ka iyo seña yiki kuñu, ti ni ka yee ra jiin da —ni ka kachi da.

**4** Yukan ti ni kachi Pedro taka ja ni jini da nuu chaa un naa da, ti ni kachi da:

**5** —Kancha ra ñuu Jope. Ni keja'a kanajaa ri Yandios, ti ni skoto ya nuu ri. Ni jini ri iin sa'ma ka'nu ja vekuun andivi, ti ka ndikun ndi kuun jiki, ti ni jinu undi nuu kande ri. **6** Ni jini va'a ri chi ni nde'e va'a ri ja nuu sa'ma un ka'iin taka nuu kuiti, kuiti ka iyo kuun nda'a, jiin koo, jiin taka kuiti ka jika nuu tachi. **7** Ti ni jini so'o ri ja ni kachi Yandios: “Pedro, ndokuiñi ti ka'ni ra kuiti ja'a ti kaji ra.” **8** Ti ni kachi ri nuu ya: “Yandios, tu kuu kaji na, chi tu ni kutu'va na sia'an” **9** Ni ka'an tuku Yandios inga jinu: “Tu va'a ja kachi ra ja tu kuu kaji ra ja ja'a ri nuu ra.” **10** Uni jinu ni kuu sia'an, ti sa ni ndaa sa'ma un kuano'on andivi.

**11** Ti hora jña ni jakoyo uni chaa ñuu Cesarea ve'e nuu kancha ri, ka nanduku da ru'u ja ni taji Cornelio da naa da. **12** Ti ni kachi Espíritu Santo nuu ri ja tundo, kani ini ri ki'in ri jiin chaa un. Suni ni ka ja'an iñu ndaja'a ja'a jiin ri, ni ka kivi ri ve'e chaa un. **13** Ti ni kachi Cornelio nuu ri naa ri ja ni jini da iin tajnu Yandios ini ve'e da, ja kandichi ya ti ni kachi ya: “Cornelio, taji uu chaa ka junukuachi nuu ra na ki'in da ñuu Jope, ti na ka'an nda'u da jiin iin chaa nani Simón Pedro ja na kii da ja'a. **14** Na chaa Pedro ti na kachi da nuu ra nasa nanita'u ra jiin tendili jna'an ra.” Jnu'un un ni ka'an tajnu un, ni kachi Cornelio. **15** Ni keja'a ri ka'an ri nuu yivi un, ti hora yukan ni ka ni'in da Espíritu Santo, nanu ni ka ni'in yo'o naa yo undi nuu. **16** Yukan ti ni nuku'un ini ri jnu'un ni ka'an Jesús na ni kachi ya nuu yo: “Ni skuanducha Juan jiin nduchka, chi tu ja'i chaa Espíritu Santo, ko jaa iin kivi ti kuncha ya jiin ra naa ra”, ni kachi ya. **17** Ni ja'a Yandios jnu'un ja ni chaa Espíritu Santo siki yivi un, nanu ni ja'a ya jnu'un ja ni chaa ya siki yo'o naa yo na ni ka kandixia yo Jito'yo Jesús, ya kuu Cristo. Ti tu ni kuu kenchaa ri ja ni ja'a Yandios —ni kachi Pedro.

**18** Nu ni ka jiniso'o tako chaa ka kandixia Jesúus ñuu Jerusalén yukan, ti tukaa ni ka ka'an kuiti da. Ni ka keja'a da ka nakanajaa da Yandios, ti ni ka kachi da:

—Ni ja'a Yandios jnu'un ja na nakani ini yivi inga nación, ti na kuchaku i jiin ya —ni ka kachi da.

### *Kua'an Bernabé ñuu Antioquia*

**19** Na ni ka ja'ní da Esteban, suni ni ka ndikun da uu ga yivi ja ka kandixia Jesúus yukan. Yukan kuu ja ni ka jinu da. Tijni yivi un kuankoyo ichi ñuu Fenicia, ti tijni da kuankoyo ichi ñuu Chipre, ti tijni da kuankoyo ichi ñuu Antioquia. Ti yukan ni ka ka'an da jnu'un Yandios nini nuu yivi Israel ni ga. Ti tukaa ni ka ka'an da nuu yivi inga nación. **20** Suni ni ka iyo yivi ni ka kandixia Jesúus ñuu Chipre jiin ñuu Cirene, ti ni ka kee da ñuu da ti kuankoyo da ñuu Antioquia, ti ni ka ka'an da nuu yivi ka ka'an griego ja kanchuku yukan. Ti ni ka kachi da taka jniñu ni sa'a Jesúus. **21** Ti ni chindee Yandios maa da jiin taka jnu'un ni ka ka'an da. Yukan kuu ja kua'a yivi inga nación un ni ka xndoo da jnu'un maa da, ti ni ka kandixia da jnu'un Jesúus. **22** Nu ni ka jini yivi ka kandixia Jesúus ñuu Jerusalén ja ni ka keja'a ka kandixia yivi inga nación, ti ni ka taji da Bernabé kua'an da ñuu Antioquia.

**23** Nu ni jaa da yukan, ti ni jini da ja chindee xaan Yandios yivi un, ti ni kusii ini da. Ti ni kachi da ja ni ini da ka siin i ichi Yandios. **24** Sia'an ni kachi Bernabé, chi ni kuu da iin chaa va'a. Ti jiin inijnuni Espíritu Santo ni kandixia ni ini da Jesúus. Yukan kuu ja kua'a yivi ni ka keja'a ka kandixia da Jesúus jiin jnu'un ni ka'an da.

**25** Yukan ti ni kee Bernabé kua'an da ñuu Tarso, kuan nunduku da Saulo. Ni nani'in da Saulo, ti kuanukoyo tuku da ñuu Antioquia. **26** Yukan ni kunchuku da iin kuiya jiin yivi ka kandixia Jesúus, ti kua'a yivi ni ka skua'a jiin da naa da. Ti suni ñuu Antioquia yukan, ni ka keja'a ka ka'an uu ga yivi un:

—Ndaja'a Jesúus na konani “Yivi yinda'a Cristo”, —ni ka kachi da.

**27** Ni ka'iin Bernabé jiin Saulo ñuu Antioquia, ni ka jakoyo uu chaa Jerusalén. Ja ni ja'a siin Yandios iin jniñu nuu da ja na ka'an da ja kuu ya. **28** Ni ka ndututu yivi ka kandixia un, ti ni jakuiñi iin chaa nani Agabo nuu da naa da ti jiin inijnuni Espíritu ni kachi da ja koo iin jnama ni ñuyivi. Yukan ti ni kuu nava ni kachi da. Ni kuu un na kuiya ni kuña'nu Claudio nuu ñuu Roma. **29** Yukan ti tijni yivi ka kandixia Jesúus kanchuku ñuu Judea, vasu nasa ni kundee kua'a iin iin yivi. **30** Sia'an ni ka sa'a da, ti ni ka taji da xu'un un kua'an jiin Bernabé jiin Saulo. Ti ni ka yinda'a da xu'un un nuu chaa ka ta'u jniñu nuu yivi ka kandixia ñuu Judea.

### *Ni ji'i Jacobo ti ni kivi Pedro vekaa*

## 12

**1** Ni ka'iin Bernabé jiin Saulo ñuu Antioquia, ti iin chaa nani Herodes, ni ta'u jniñu ñuu Galilea. Ni keja'a da ja'a da nundo'o yivi ka kandixia Jesúus un.

**2** Ni jniñi da presu Jacobo, ñani Juan. Nu ni ndi'i ni ka xndichi da chaa, ti ni ka ja'ní da chaa jiin machete. **3** Ni jini Herodes ja ni ka jajna'an ini chaa Israel un ja ni ji'lí Jacobo. Ti suni ni jniñi da presu Pedro. Ni sa'a Herodes yukan kivi ka nasa'a chaa Israel, un viko ja ka nuku'un ini da ja ni ka keta'u jna'an da nuu yivi ñuu Egipto najana'an. Viko un ka yee da staa stila tu yi'i levadura. **4** Kivi un ni ka jniñi Herodes Pedro ni ka chundee da chaa vekaa. Ti ni kachi Herodes:

—Xia'un iin soldado na kundito Pedro —ni kachi da.

Ndi kuun, ndi kuun soldado ka'iin. Ndo'o ini Herodes ja undi kivi ya'a viko un sa keni'in da Pedro, ti xndichi da chaa nuu yivi Israel, ti sa ka'n'i da chaa, chi sia'an ti ka kusii ini yivi Israel. <sup>5</sup> Kande Pedro veekaa ti ka'iin soldado ka ndito, ti chaa ka kandixia Jesús un, ni ini da ka jikanta'u da nuu Yandios ja na chindree ya Pedro.

<sup>6</sup> Yukan ti iin jakuaa ndo'o ini Herodes ja keni'in da Pedro inga kivi. Jakuaa jña ni kixi Pedro ma'ñuu uu soldado, ti ndikun da jiin uu cadena. Ti uu ga soldado ka ndito yux'e veekaa un. <sup>7</sup> Kixi naa Pedro, ti ni kivi iin tajnu Yandios, ti ni ndinchaa ini veekaa un. Ti ni skanda tajnu un Pedro ja na ndoto da, ti ni kachi da:

—Yachi ndoko —ni kachi da.

Yukan ti ni ka ndaji cadena nuu ni nda'a Pedro. Ti ni kachi tajnu un tuku:

<sup>8</sup> —Na ku'n'i chii ra ti na chi'i ra ndijña ra —ni kachi da.

Ndi'i un ni sa'a Pedro ti ni kachi tuku tajnu un:

—Na suku tikachi ra ti kundikun ra ru'u.

<sup>9</sup> Yukan ti ni chindikun Pedro jata tajnu un ti ni ka kee da, ko tu jini da nuu jandaa kuu ja iin tajnu Yandios kuu, xi so skoto i nuu da. <sup>10</sup> Ni ka ya'a da nuu ka'iin soldado ka ndito un, ti ka ya'a tuku da nuu ka'iin inga uu ga chaa, ti sa ni jakoyo da yux'e kea ka'nu nuu ka kekoyo yivi un. Ndi'yuu un, ti nu ni jakoyo da, ni nuña maa, ti ni ka kee da kua'an da yux'e un. Ti yukan ni xndoo tajnu un maa da. <sup>11</sup> Yukan ti sa ni ndoto va'a nduchi Pedro, ti ni ndo'o ini da:

—Vijna ti ni jini ndaa ri ja ni taji Yandios iin tajnu ya nuu ni kunde ri, ti ni kaku ri nuu Herodes. Vijna tukaa ga sa'a chaa Israel jiin ri nava ni ka ndo'o ini da ja sa'a da niku —ni ndo'o ini da.

<sup>12</sup> Yukan ti ni kee da kua'an da ve'e María, nana Juan Marcos. Yukan ni ka ndututu yivi ka kandixia Jesús. Yukan ka'iin kua'a yivi un ka jikanta'u i nuu Yandios ja na chindree ya Pedro. <sup>13</sup> Ni jaa Pedro yux'e un, ti ni keja'a da skajan da. Yukan kande iin ña'an nani Rode, ja junukuachi ve'e un. Ni kee ña kuande'e ña nau skajan yux'e un. <sup>14</sup> Ni nakuni ña tachi Pedro. Tu ni jiña ña yux'e un, chi ja ni kusii ini ña, ti ni nandeokuñi ña ja na kasjnu'un ña nuu yivi un, ti ni kachi ña:

—Pedro kuu ja skajan yux'e un —ni kachi ña.

<sup>15</sup> Ti ni ka kachi yivi un:

—Kaku'u ra —ni ka kachi i.

Ni siin ña ka'an ña ja Pedro kuu, ko yivi un ni ka kachi:

—Ansu Pedro kuu. Nu suu iin tajnu Yandios ja ndito Pedro kuu —ni ka kachi.

<sup>16</sup> Ni siin Pedro skajan da yux'e un, ti sa ni ka jiña yivi un. Nu ni ka jini ja maa Pedro kuu da, ti tendi'i yivi un ni ka naa ini. <sup>17</sup> Yukan ti ni sa'a da seña jiin nda'a da ja na kasi yu'u yivi un. Ti ni keja'a da janí da nasa ni keni'in Yandios maa da ini veekaa un, ti suni ni kachi da:

—Kani jnu'un nuu Jacobo jiin uu ga yivi ka kandixia, taká ja ni jna'an ri —ni kachi da.

Yukan ti ni kee da kua'an da.

<sup>18</sup> Nu ni kundijin inga kivi, ti tendi'i soldado un ni ka sana ini, ti ka jikajnu'un jna'an:

—Nachi kua'an Pedro —ni ka kachi.

<sup>19</sup> Yukan ti ni kachi Herodes ja na nanduku da Pedro, ko tu ni ka nani'in da chaa. Yukan ti ni keja'a Herodes jikajnu'un da soldado, ti soldado un tu na jnu'un ni ka ja'a da. Yukan ti ni kachi Herodes ja na kuū soldado un. Ti

yukan ni kee Herodes ñuu Judea ti kua'an da ñuu Cesarea. Yukan ni kuncha da.

### *Ni ji'i Herodes*

<sup>20</sup> Kití ini Herodes nuu yivi ñuu Tiro jiin yivi ñuu Sidón. Ti ni ka ja'an yivi ñuu un nuu Herodes ja ka kuni ndajnu'un iin jniñu jin da. Tendi'i da ni jakoyo nuu kancha Herodes, ti ni ka ka'an da jiin Blasto, iin chaa ndisojniñu ña'nu nuu Herodes, ja na ka'an da jiin Herodes, ti cha'u yivi un maa da. Ti ni kachi da ja chindee da yivi un. Ni ka ka'an va'a da jiin Herodes ja na ndumani da naa da, chi taka ja ka yaji da vaji ñuu nuu ni ta'u Herodes jniñu un. <sup>21</sup> Yukan ti ni kachi Herodes na kivi jakoyo tuku da. Nu ni jaa kivi un, ni naki'in Herodes sa'ma da ja jajniñu da nu ka'an da nuu yivi. Ni nukoo da nuu sillla kuña'nu da, ti ni ka'an da nuu yivi un.

<sup>22</sup> Yukan ti ni ka keja'a yivi ka kanajjiin, ti ni ka kachi:

—jChaa ka'an jnu'un ja'a, ansu chaa ñuyivi ja'a kuu, chi iin yandios kuu! —ni ka kachi da.

Sia'an ni ka kachi da, chi ka kuni da ja na ndumani tuku da.

<sup>23</sup> Ti hora jña ni sa'a iin tajnu Yandios ja na koo u'u Herodes, chi ni ja'a ya jnu'un ja ni ka kachi yivi un ja kuu da iin yandios. Ni ndo'o xaan da nundo'o, chi ni ka yee tindaku da, ti sa ni ji'i da.

<sup>24</sup> Yukan ti kua'a xaan yivi ni ka kandixia jnu'un Yandios, ti ni ka ka'an jnu'un ya nuu kua'a ga yivi.

<sup>25</sup> Bernabé jiin Saulo ni ka yinda'a da xu'un ja ni ka kekoo da ja kuu yivi nda'u ka iyo ñuu Jerusalén, ti sa ni ka nandeokuñi da ñuu Antioquía. Ti suni ni ja'an Juan Marcos jiin da naa da.

### *Bernabé jiin Saulo ni ka jachanuu da jnu'un Yandios yivi inga nación*

## 13

<sup>1</sup> Ñuu Antioquía ni ka iyo kua'a yivi ni ka kandixia jnu'un Jesús. Tijni yivi ni ka ka'an da, ti ni ka skua'a da jnu'un Yandios. Yukan ni ka'iin Bernabé, Simón ja ni ka ka'an da "Chaa jnuu", Lucio chaa ñuu Cirene, Saulo, jiin Manaén chaa ni kuu mani jiin Herodes, chi yukan ni ja'nú da. <sup>2</sup> Iin kivi ni ka ndututu tendi'i chaa ka kandixia un, ka iyo ndicha da ja nakanajaa da Yandios naa da, ti ni kachi Espíritu Santo nuu da:

—Taji Saulo jiin Bernabé na kinkoyo da nuu sa'a da jniñu, chi kua'a ri iin jniñu nuu da —ni kachi ya.

<sup>3</sup> Yukan na ti ni ka iyo ndicha ini da, ni ka nakanajaa da Yandios. Ni ka chuxndee da nda'a da siki Bernabé jiin Saulo ja na ki'in sa'a da jniñu un, ti ni ka kanxia'u da naa da. Sia'an ni taji Espíritu Santo Bernabé jiin Saulo ja na sa'a da jniñu un naa da.

### *Ni ka ka'an apóstol jnu'un Yandios ñuu Chipre*

<sup>4</sup> Yukan kuu ja kuankoyo Bernabé jiin Saulo ñuu Seleucia. Yukan ni ka kivi da iin barco ti kuankoyo da ñuu Chipre, ja kande nuu mar un. <sup>5</sup> Ni jakoyo da ñuu Salamina, ja yinda'a Chipre. Ni ka kivi da veñu'un yivi Israel yukan, ti ni ka ka'an da jnu'un Yandios. Suni ni ja'an Juan chindee da Bernabé jiin Saulo. <sup>6</sup> Ni ka kee da kuankoyo da ti ni jakoyo da ñuu Pafos. Yukan ni ka jini da iin chaa Israel nani Barjesús. Suni nani da Erimas chi kuu da iin chaa tasi. Ni xnda'u da yivi, chi ni kachi da ja ka'an da jnu'un Yandios vasu tu jini da. <sup>7</sup> Ni kuu mani da jiin Sergio Paulo, chaa ni ta'u jniñu ñuu yukan. Sergio Paulo ni kuu iin chaa ndichi ñuu yukan. Ni kana Sergio Paulo Bernabé jiin Saulo ja kuni kunso'o da jnu'un Yandios. <sup>8</sup> Ko chaa tasi un tu kuni da ja na ka'an

Bernabé jiin Saulo nuu Sergio Paulo, chi tu kuni da ja na kandixia chaa un jnu'un Jesú. <sup>9</sup> Ti Saulo, ja suni nani da Pablo, jiin inijnuni Espíritu Santo ni nde'e va'a da nuu chaa tasi un, <sup>10</sup> ti ni kachi da:

—Ro'o ja xnda'u ña'an, ja sa'a jniñu kue'e. Kuu ra iin se'e ja'u'u. Tu sa'a ra iin jniñu kaxan. Taka jinu ka'an ra ja tu va'a ja ki'in yivi ichi Yandios. <sup>11</sup> Vijna na ti xndichi Yandios ro'o. Kukuaa ra ti tu kunde'e ra ja kuu tijni kivi —ni kachi Pablo.

Yukan ti ni kukuaa ni chaa tasi un, chi ni chaa ni viko nduchi da, ti ni nduku da iin chaa kunchaka da nuu nachi ki'in da. <sup>12</sup> Ni jini Sergio Paulo nava ni jna'an chaa tasi un, ti ni keja'a da kandixia da Jesú, ti ni naa ini da jiin taka jnu'un Yandios ni ka ka'an Bernabé jiin Pablo.

### *Kanchuku Pablo jiin Bernabé ñuu Antioquía Pisidia*

<sup>13</sup> Pablo jiin uu ga jna'an da, ni ka kee da ñuu Pafos, ni ka kivi da barco ti kuankoyo da ñuu Perge, ja kande nuu yinda'a ñuu Panfilia. Yukan ni xndoo Juan Bernabé jiin Pablo, ti ni nandeokuñi da ñuu Jerusalén. <sup>14</sup> Ni ka ya'a Pablo jiin uu ga chaa kuankoyo jiin da ñuu Perge, ti kuankoyo da ñuu Antioquía ja kande nuu yinda'a ñuu Pisidia. Ni jakoyo da yukán iin sábado, ni ka kivi da veñu'un nuu ka nchañu'un chaa Israel, ti ni ka nukoo da jiin yivi un. <sup>15</sup> Xnakan ni ka ka'u da tutu ni chaa Moisés, ti sa ni ka ka'u da tutu ni ka chaa profeta, chaa ka'an ja kuu Yandios. Yukan ti sa ni ka taji chaa ka kuña'nu veñu'un un iin chaa ni kaxjnu'un nuu Pablo jiin uu ga chaa un, ti ni kachi da:

—Ro'o naa ra, nu ka iyo jnu'un ka'an ra nuu yivi ja'a, kuu ka'an ra vijnañu'ni —ni kachi da.

<sup>16</sup> Ni ndokuiñi Pablo, ti ni sa'a da seña jiin nda'a da ja na kasi yu'u yivi un, ti ni kachi da:

—Ro'o chaa Israel naa ra jiin taka yivi ka nchañu'un Yandios, kunso'o va'a ra jnu'un ka'an ri naa ra. <sup>17</sup> Ni nakaji Yandios jna'an yo najana'an, ti ni ka nchañu'un da ya. Ni chindee ya maa da na ni kanchuku da ñuu Egipto, chi ni ka nakaya xaan da. Yukan ti ni keni'in Yandios maa da ñuu Egipto, chi kuu sa'a Yandios nasa kuni maa ya. <sup>18</sup> Ni ja'a ya jnu'un ja na sa'a yivi un nava kuu ini i nuu ñu'un te'e un ja kuu uu xiko kuiya.

<sup>19</sup> Ni jaa iin kivi nu ni ka kivi da ñuu Canaán. Ni chindee Yandios maa da, ti ni ka xnaa da uxia ñuu na'nú yukan. Ti ñuu yukan ni ka kuña'nu nuu uu ga ñuu, ko Yandios ni ja'a ndi'i ya ñu'un un nuu da naa da. <sup>20</sup> Ni kunchuku da yukan kuun ciento uu xiko uxi kuiya, ti ni kachi Yandios ja na ta'u chaa kuu juez jniñu nuu yivi un undi kivi ni kii Samuel.

<sup>21</sup> Ni kuiya ni chaku Samuel, ni ka jikanta'u yivi un nuu Yandios ja na koo iin chaa kaña'nu ta'u jniñu nuu da naa da. Yukan ti ni ja'a ya jnu'un ni kii Saúl, se'e Cis, ni kuu da chaa ni ta'u jniñu nuu yivi un. Ni kuu da iin jna'an Benjamín. Ni ta'u Saúl jniñu nuu yivi un nuu uu xiko kuiya. <sup>22</sup> Ni keni'in Yandios Saúl.

Yukan ni nakua'a ya jniñu un nuu David, ti yukan ni kendo da kuu da chaa ta'u jniñu ni tu'u nación Israel. Ni ka'an Yandios nava kaa David, chi ni kachi ya: "Jini ri David, se'e yii Isaí, ti jajna'an ini ri da, chi sa'a da taka nau ja kuni ri", ni kachi ya. <sup>23</sup> Na kivi ni ya'a ni kachi Yandios: "Jaa iin kivi ja koo iin jna'an David, ti chaa un nama siki yivi ti keta'u i", ni kachi ya.

Ti chaa un kuu ja nama yo'o naa yo ja ka kuu yo chaa Israel. Chaa un kuu Jesú. <sup>24</sup> Tu ja'i keja'a Jesú ka'an ya jnu'un Yandios na ni ka'an Juan ja na nakani ini yivi Israel nuu kuachi i, ti na kuanducha i. <sup>25</sup> Kuan kuyajni kivi ja xndil'i Juan jniñu da, ti ni kachi da nuu yivi: "Ka ndatu ra iin chaa kuña'nu ga,

ti ka ndo'o ini ra ja ru'u kuu, ansu ru'u kuu, ko kuan kuyajni chaa chaa un, ti ta'u da jniñu ña'nu ga. Yukan kuu ja tu kejna'an ri jiin da, chi tu kuña'nu ga ri", ni kachi Juan —kachi Pablo.

<sup>26</sup> Siin Pablo ka'an da:

—Ro'o ja ka kuu jna'an Abraham naa ra, jiin taka yivi ka nchañu'un Yandios, ja ni kachi Yandios nasa nanita'u yo. <sup>27</sup> Sábado taka semana, ka skua'a yivi ñuu Jerusalén jiin taka chaa ka ta'u jniñu un, tutu ni ka sa'a profeta jana'an, ko tu ka chaku ini ra taka jnu'un ka skua'a ra. Yukan kuu ja ni ka siuku i jnu'un ni ka skua'a ra un, chi tu ni ka nakuni ra na chaa ni kuu Jesús, ti ni ka xndichi ra ya. <sup>28</sup> Ni ka jini ra ja tu ni iyo kuachi Jesús, ko ni ka ndo'o ini i ja ka'nii ra ya. Ni ka ka'an ra jiin Pilato ja na ka'mi da ya. <sup>29</sup> Kua'a ja ni ka sa'a i jiin Jesús, ti ni ka ja'nii ra ya nava ni ka kachi profeta najana'an. Yukan ti ni ka kuni'in ra Jesús nda'a cruz un, ti ni ka chunduji ra ya. <sup>30</sup> Ko ni ja'a Yandios jniñu nuu ya ti ni naxndoto ya Jesús nuu ñuji'i un. <sup>31</sup> Tijni kivi ni ka jini ndaja'a Jesús un ja chaku ya. Chaa un ni ka yaku jiin ya na kivi ni kee ya ñuu Galilea, ti ni nandeokuñi ya ñuu Jerusalén. Ni ka kachi chaa un ja ni ka jini da ya —ni kachi Pablo.

<sup>32</sup> Siin Pablo ka'an da, ti ni kachi da:

—Ka ka'an ri jnu'un Yandios nuu ra naa ra. Ja ka jini ra ja ni kachi Yandios nuu jna'an yo najana'an. <sup>33</sup> Ja ka jini yo vijna ja ni siuku Yandios nava ni kachi ya, chi ni ja'a ya jniñu ña'nu nuu Jesús, ti ni naxndoto tuku ya Jesús. Nuu Salmo kuu uu ni chiso David nava ni kachi Yandios ja nava jna'an Jesús na ni kachi ya: "Ro'o kuu se'e ri, ti vijna ni stuu ri ro'o nuu yivi, ti na kuni yivi ja se'e ri kuu ra", ni kachi ya.

<sup>34</sup> Iyo nuu yoso inga jnu'un ja ni ka'an Yandios jiin Jesús na ni kachi ya: "Chindee ri ro'o nava ni kachí ri nuu David." Sia'an ni kachi Yandios, chi kua'a ya jniñu nuu Jesús ti naxndoto ya Jesús nuu ñuji'i un, chi tu ni ja'a Yandios jnu'un ja te'yú yiki kuñu Jesús. <sup>35</sup> Ti iyo nuu yoso inga jnu'un ja ni ka'an David ja ndoo na jna'an Jesús na ni kachi da: "Yandios, tu kua'a ni jnu'un ja te'yú yiki kuñu se'e ni, ja kin sa'a jniñu ña'nu", sia'an ni kachi da. <sup>36</sup> Na ni kuncha David ñuyivi ja'a, ni sa'a da nava ni kachi Yandios, ti ni jaa iin kivi ja ni ji'i da. Ñunduji da nuu ka ñunduji jna'an da najana'an, ti ni te'yú yiki kuñu da. <sup>37</sup> Sia'an ni jna'an David, ko nuu Jesús ni ja'a Yandios iin jniñu nuu ya, ni naxndoto tuku ya Jesús, ti tu ni te'yú yiki kuñu ya.

<sup>38</sup> Kuni ri ja na kuni ra naa ra ja maa Jesús kuu ja kenchaa kuachi yo. <sup>39</sup> Undi vijna tu ja'i keta'u ra vasu ni ka jandatu ra taka jnu'un Yandios ni chiso Moisés. Ko vijna ti Jesús kuu ja kenchaa kuachi ra naa ra, ti nanita'u ra nu na kandixia ra ya naa ra. <sup>40</sup> Koto ra maa ra naa ra nava tu jna'an ra nava ka'an jnu'un ni ka chiso profeta najana'an. Ni kachi da:

<sup>41</sup> Ko ru'u ja kuu Yandios, nu na sa'a ri iin jniñu ña'nu, ti naa ini ra naa ra ti kuú ra.

Chi ni tu kandixia ra vasu na kani yivi jnu'un nuu ra.

Ti vijna ni stuu ri ro'o nuu yivi, ti na kuni yivi ja se'e ri kuu ra, ni kachi profeta un.

Sia'an ni ka'an Pablo nuu yivi ni ka ndututu veñu'un un.

<sup>42</sup> Yukan ti nu kuan kee Pablo jiin uu ga chaa un, ti ni ka kachi yivi un jiin da ja na kinkoyo tuku da inga semana, ti na ka'an tuku da jnu'un un. <sup>43</sup> Nu ni ndi'i yivi ni ka jicha veñu'un un, kua'a yivi Israel ni ka ndikun da Pablo jiin Bernabé. Suni ni ka ndikun yivi ka ñava'a jnu'un chaa Israel. Ti ni kachi Pablo jiin Bernabé nuu yivi un ja ni ini ni añu i na kundikun i ichi Yandios.

**44** Nu ni jaa inga sábado, ti ni ka ndututu kua'a xaan ga yivi ñuu un ja ka kuni i kunso'o i jnu'un Yandios. **45** Uu chaa Israel, tu ni ka jajna'an ini ja ni ka jini da ja kua'a xaan yivi un ni ka ndututu, ti ni ka kuu kuasun ini da. Yukan ti ni ka kachi da ja tu va'a jnu'un ni ka ka'an Pablo jiin uu ga chaa un, ti ni ka keja'a ka kananchaa da Pablo jiin uu ga chaa ka jika jiin da un. **46** Pablo jiin Bernabé, tu ni ka yu'u da, ti ni ka keja'a da ka ka'an da nuu yivi un, ti ni ka kachi da:

—Kanu kuu ja ka'an ri jnu'un Yandios nuu ro'o naa ra ja ka kuu ra chaa Israel, ko vijna, na ka'an ri nuu yivi inga nación, chi tu ka kuni ra kunso'o ra, ti ni tu ka jandatu ra. Ti tu ka kuni ra kunchuku ra jiin Yandios andivi. **47** Yukan kuu ja na kinkoyo ri nuu ka'iin yivi inga nación, chi undi jana'an ni kachi Yandios:

Ni taji ri ro'o ja ka'an ra nuu yivi inga nación.  
Yukan kuu ja ni ñuyivi ka'an ra nasa nanita'u yivi.  
Sia'an ni kachi Yandios —kachi Pablo.

**48** Nu ni ka jiniso'o yivi inga nación ka'iin un taka jnu'un ni ka'an Pablo, ni ka kusii ini ti ni ka kachi:

—Jnu'un Yandios kuu ja kanuu ga —ni ka kachi.

Ni nakaji Yandios tijni chaa un ja na kunchuku da jiin ya sa ni ka keja'a ka kandixia da. **49** Yukan ti taka chaa un ni ka ka'an da jnu'un Yandios ni ñuu yukan. **50** Yukan ka'iin tijni ñasi'i ka siuku ndaa jnu'un chaa Israel. Niñi ka ja'an ña veñu'un Israel, ka kanajaa ña Yandios. Ti chaa Israel un ni ka keja'a ka ka'an jiin ñasi'i un, jiin chaa ka kuña'nu ñuu un, ti ni ka ndondaa da siki Pablo jiin Bernabé. Yukan ti ni sa'a yivi un ja na kondo'o Pablo jiin Bernabé, chi tu ni ka jajna'an ini, ti ni ka keni'in da kuankoyo da. **51** Yukan ti Pablo jiin Bernabé, ni ka kisi da tikacha ja'a da nuu yivi un. Yukan ni kuu seña ja tu ni ka janta'u yivi un maa da. Ni ka kee da ti kuankoyo da ñuu Iconio. **52** Yukan ti taka yivi ni ka kandixia ñuu Antioquia un ni ka kusii ini i, chi ja ni chaa Espíritu Santo kancha ya jiin i naa i.

### Ka'iin Pablo jiin Bernabé ñuu Iconio

## 14

**1** Pablo jiin Bernabé ni jakoyo da ñuu Iconio. Ni ka kivi da veñu'un nuu ka skua'a chaa Israel. Yukan ni ka ka'an da jnu'un Yandios nuu yivi ka'iin un. Yukan kuu ja ni ka keja'a yivi ni ka kandixia i jnu'un Jesús. Ni ka kandixia yivi Israel jiin yivi inga nación, ti ni ka kuu kua'a yivi un. **2** Tijni yivi Israel ka'iin un ni ka ñuso'o jnu'un ni ka'an Pablo, ko tu ni ka jandatu, ti ni ka ska'an da yivi inga nación ja na ka'an kue'e da siki yivi ka kandixia un. **3** Yukan kuu ja ni kunchuku Pablo jiin jna'an da tijni kivi ñuu Iconio un. Tu ni ka yu'u da kachi da ja kunda'u Yandios yivi naa i. Ti Yandios ni ja'a jniñu ña'nú nuu da naa da ja na sa'a da jniñu ña'nú. Yukan kuu ja ni sa'a Yandios nava na chaku ini yivi ñuu un ja jandaakuu ja ka ka'an da jnu'un ya. **4** Ti yivi Iconio un ka ñuu sava. Sava kajiiñi jiin chaa Israel, ti sava kajiiñi Pablo jiin Bernabé. **5** Tijni chaa Israel jiin chaa inga nación, jiin chaa ña'nú un ni ka keja'a ka ndo' kue'e ini ja kua'a yuu siki da maa da. **6** Yukan ti ni ka jini Pablo jiin jna'an da. Ni ka kee da kuankoyo da ñuu Likonia. Ni jakoyo da ñuu Listra, ti sa ni ka ya'a da ñuu Derbe. Kuankoyo da taka ga ñuu yukan, **7** ti ka ka'an da jnu'un Jesús.

### Ni kaja'a dayuu siki Pablo ñuu Listra

**8** Ñuu Listra yukan kancha iin chaa tikuku, chi sia'an ni kaku da. Yukan kuu ja tu kuu kaka da. Ni jiniso'o da jnu'un ka'an Pablo. **9** Ni nde'e va'a Pablo

nuu chaa tikuku un, ti ni jini Pablo ja ni kandixia chaa un, ti kuni da nduva'a da. <sup>10</sup> Yukan ti jiin tachi ni'l'in ni kachi Pablo nuu da:

—¡Ndokuñi ndaa jiin si'l'in ra! —ni kachi da.

Yukan ti uni ni kanda chaa un ti ni keja'a da jika da. <sup>11</sup> Ni ka jini yivi un nava ni sa'a Pablo, ti ni ka keja'a ka kanajin, ti ka ka'an:

—¡Ni ka kuun Yandios nuu ka'iin yo ja'a, ti kanda nanu kanda yo'o naa yo. Ti yo'o chi yivi ka kuu yo! —ni ka kachi yivi un. (Sia'an ni ka ka'an da nuu yu'u ka ka'an yivi Likonia.)

<sup>12</sup> Ni ka kachi da ja Bernabé ni kuu Júpiter, ti Pablo ni kuu Mercurio, chi maa da kuu ja ni ka'an. Sia'an ni ka ka'an da, chi ja ni ka nchañu'un da Júpiter jiin Mercurio. <sup>13</sup> Yu'u ñuu un iyo iin veñu'un nuu ni ka nchañu'un yivi un Júpiter. Yukan ti sutu Júpiter, ni yinda'a da xndiki jiin corona ita. Ti kuni sutu jiin yivi ñuu un ka'ní da tijni xndiki ja soko da ti nuu Pablo jiin Bernabé, chi ka ndo'o ini da ja maa da ka kuu uu santu. <sup>14</sup> Yukan ti ni ka jini apóstol, Bernabé jiin Pablo ja ka kuni yivi un kunchañu'un i maa da naa da. Ni ka keja'a da ka ja'ncha da sa'ma da, chi ni ka kuu kui'ya ini da. Ni ka kanajin da, ti ni kachi Pablo:

<sup>15</sup> —Ro'o naa ra, tu va'a ja ka sa'a ra sia'an. Suni yivi ka kuu ri. Ka'an ri nuu ra naa ra ja na xndoo ra jniñu ka sa'a ra, chi tu kaxan. Ka'an ri jiin ra ja na kandixia ra nuu Yandios chaku, chi maa ya ni sa'a taka ja iyo. Ni sa'a ya andivi, ñuyivi jiin mar. <sup>16</sup> Undi jana'an ni ja'a ya jnu'un ja na sa'a yivi nasa kuu ini. <sup>17</sup> Ko Yandios ni stuu ya maa ya nava kaa ya, chi ni sa'a ya jniñu va'a ja kuu tendi'i yivi. Ni sa'a ya ja na kuun sau, ni sa'a ya ja na kuu jniñu ka sa'a yivi taka kuiya, ja ni ja'a ya ja kuu chaku yivi nava na koo sii ini i. Yukan kuu ja ni sa'a Yandios ja kuu yo naa yo —ni kachi Pablo.

<sup>18</sup> Sia'an ni ka'an Pablo, ko yii sa ni kuu ni jasi da ja ka'ní yivi un xndiki ja solo nuu da, chi ka kuni kunchañu'un da maa da naa da.

<sup>19</sup> Yukan ti yivi ñuu Antioquía ni chakoyo nuu ka'iin Pablo jiin chaa ka jika jiin da. Suni chakoyo chaa Israel kanchuku ñuu Iconio, ni ka ska'an da yivi Listra un, ti ni ka keja'a ka kuiti ini nuu Pablo jiin jna'a da. Yukan ti ni ka ja'a yuu siki Pablo, ti ni ji'i nuu da. Yukan ti ni ka ñu'un da Pablo undi yu'u ñuu un, chi ni ka ndo'o ini ja ni ji'i da. <sup>20</sup> Yukan ti yivi ni ka skua'a jiin Pablo un ni chakoyo da nuu katuu da, ti hora jña ni ndukaji ini da ti ni ndoko da. Ni ndokuiñi da, ti ni ndivi tuku da ñuu un. Ni kundijin ñinga kivi, ti kua'an da jiin Bernabé ichi ñuu Derbe. <sup>21</sup> Yukan ni ka ka'an da jnu'un Yandios, ti kua'a xaan yivi un ni ka kandixia jnu'un Jesús. Ni ka kee da yukan, ti ni ka nandeokuñi tuku da ñuu Listra. Ti ni ka naya'a tuku da ñuu Iconio, ti ni najakoyo da ñuu Antioquía. <sup>22</sup> Yukan ni ka ja'a da jnundee ini yivi ka kandixia un, ti ni kachi Pablo:

—Kandixia ni ini ni aña ra Jesús naa ra. Tendi'i yo koo nundo'o, ko sia'an ti na jakoyo yo ñuu nuu ta'u Yandios jniñu —ni kachi Pablo.

<sup>23</sup> Taka ñuu nuu ni ka ya'a da un ni ka nduku da chaa nchañu'un Jesús un, ti ni ka ja'a da jniñu nuu da. Ni ka iyo ndicha yivi un, ti ni ka jikanta'u da nuu Yandios, ti sa ni kachi Pablo nuu da:

—Ja ni ka kandixia ra Jesús naa ra, ti maa ya kuu ja koto ro'o naa ra —ni kachi da.

### *Ka nandeokuñi Pablo jiin Bernabé ñuu Antioquía*

<sup>24</sup> Yukan ti ni ka naya'a da ñuu Pisidia, ti ni najakoyo da ñuu Perge nuu yinda'a Panfilia. <sup>25</sup> Suni ni ka ka'an da jnu'un Yandios yukan, ti sa kuankoyo da ñuu Atalia. <sup>26</sup> Yukan ni ka kivi da barco, ti kuankoyo da ñuu Antioquía nuu ni ka kee da un. Yukan ni kuu undi nuu nu ni ka jikanta'u yivi nuu Yandios ja na chindee ya Pablo jiin chaa ka jika jiin da taka nuu kinkoyo da. Ni ka

nandeokuñi da yukan, chi ja ni ndi'i jniñu da ni ka sa'a da. <sup>27</sup> Ni jakoyo da ñuu un, ti ni ka nastutu da taka yivi ka kandixia un, ti ni jani da jnu'un nava ni chindee Yandios nuu da. Ni ka kachi da nuu yivi un:

—Ja ni chindee Yandios ja yivi inga nación, suni na kandixia i Jesús —ni kachi da.

<sup>28</sup> Yukan ti na'an ni kunchuku Pablo jiin Bernabé jiin yivi ka kandixia un.

### *Ni ka ndututu yivi ka kandixia ñuu Jerusalén*

## 15

<sup>1</sup> Nu ni ka najakoyo Pablo jiin Bernabé ñuu Antioquía tijni yivi ni ka kee ñuu Judea, ti kuankoyo i ñuu Antioquía. Yivi Israel ni ka kuu i, ko ni ka kandixia i Jesús. Yukan ni ka keja'a yivi ka skua'a jiin yivi inga nación ja ka kandixia i Jesús, ti ni ka kachi i:

—Kuni ja na koo seña yiki kuñu ra naa ra nava ni kachi Moisés, chi nu tuu, ti tu keta'u ra naa ra —ni ka kachi da.

<sup>2</sup> Ko Pablo jiin Bernabé tu ni ka jajna'an ini da, ti ni ka chajna'an da jnu'un jiin yivi Judea un. Yukan ti ni ka ja'a yivi Antioquía un jniñu nuu Pablo jiin Bernabé jiin uu ga chaa ka kandixia un, ja na kinkoyo da ñuu Jerusalén nuu kanchuku apóstol jiin chaa ka kuña'nu nuu yivi kandixia un, ja na ndajnu'un da siki nundo'o iyo ñuu Antioquía.

<sup>3</sup> Yivi Antioquía un ni ka taji da kuankoyo da ñuu Jerusalén. Ichi kuankoyo da ni ka ya'a da ñuu Fenicia jiin ñuu Samaría. Nu ni ka ya'a da ñuu yukan, ni ka jani da jnu'un nuu yivi ka kandixia un, ja ni ka keja'a yivi inga nación ka xndoo i jnuún i ti ka kandixia i Jesús. Yukan ti tendi'i yivi ka kandixia un ni ka kusii ini i.

<sup>4</sup> Ni jakoyo Pablo jiin chaa ka jika jiin da ñuu Jerusalén, apóstol un jiin chaa ka kuña'nu nuu yivi kandixia un, jiin taka yivi ka kandixia un, ni ka kanxia'u jiin da naa da. Yukan ti Pablo jiin jna'an da un ni ka jani da jnu'un nava ni sa'a Yandios taka ñuu ni ka ja'an da. <sup>5</sup> Yukan ka'iin tijni chaa fariseo ja ni ka kandixia Jesús. Ni ka ndokuiñi da, ti ni ka kachi da:

—Kanu kuu ja na koo seña yiki kuñu taka yivi ka kandixia Jesús, nava ni kachi Yandios najana'an, ti suni kanu kuu ja na kachi yo ja na sa'a yivi taka jnu'un ni xndoo Moisés —ni ka kachi da.

<sup>6</sup> Yukan ja ni ka ndututu apóstol jiin chaa ka yinda'a yivi ka kandixia un, ja ndajnu'un da siki jniñu Pablo jiin chaa ka jika jiin da. <sup>7</sup> Kani xaan ni ka ndajnu'un da sa ni ndokuiñi Pedro, ti ni ka'an da:

—Ro'o naa ra, ja ka jini ra ja undi najana'an ni taji Yandios ru'u ja ka'an ri nuu yivi inga nación. Nu ni ka jiniso'o i jnu'un Yandios, ti suni ni ka kandixia i. <sup>8</sup> Jini Yandios aña taka yivi naa i, ti ni xna'an ya nuu yo ja ni janta'u ya yivi un, chi ni taji ya Espíritu Santo nuu i nanu ni taji ya Espíritu Santo nuu yo'o naa yo. Yukan kuu jnu'un ja ni janta'u Yandios yivi yukan. <sup>9</sup> Tu ni kachi Yandios nuu yo: “Tu kaxan yivi inga nación, chi ro'o kuu ja kaxan.” Suni ni janta'u Yandios yivi inga nación naa i, chi ni ka kandixia i ya. <sup>10</sup> Nu kachi yo nuu yivi ka kandixia Jesús inga nación ja na siin jnu'un ni xndoo Moisés, kondo'o yivi un. Yukan kuu ja tu va'a kachi yo. Jini yo ja jna'an yo jana'an, tu ni ka kundee da siiku da taka jnu'un ni kachi Moisés. Ti ni yo'o, tu ka kundee yo siiku yo. <sup>11</sup> Ansu niní sia'an ti sa keta'u yo, chi keta'u yo sia'an ni nava kuni maa Jesús. Ti suni sia'an ni ka keta'u yivi inga nación yukan —sia'an ni ka'an Pedro nuu chaa un.

**12** Yukan ti ni ndi'i yivi un ni ka jasi yu'u, chi ni ka'an kaji da. Suni ni ka chunso'o da taka jnu'un ni ka ka'an Pablo jiin Bernabé. Ni ka jani da jnu'un nava ni chindee Yandios maa da, ja ni ka sa'a da jniñu ña'nu nuu yivi inga nación. Ni ka jini yivi un nasa sa'a Yandios jniñu, ti ni ka naa ini i. **13** Nu ni ndi'i ni ka ka'an Pablo jiin Bernabé, ti ni kachi Jacobo:

—Ro'o naa ra, kunso'o na ka'an ri. **14** Ja ni kachi Simón Pedro nasa ni nakaji Yandios yivi inga nación, ti ni ka ndivi i nuu ya. **15** Suni jnu'un un ni ka chiso profeta najana'an nasa chindee Yandios yivi inga nación na ni ka ka'an da jnu'un Yandios:

**16** Nu vaji ga kivi, ti chaa iin chaa kuu Cristo, chi maa ri taji da. Na ni chaku David ni ka nchañu'un ndaa yivi ru'u, ko ni jaa iin kivi ja ni ka xndoo ru'u.

Ti jaa iin kivi ja kunchañu'un tuku yivi ru'u, nanu ni ka nchañu'un ru'u na ni chaku David.

**17** Yukan kuu ja na nduku ndaa yivi inga nación ru'u, ti kandixia ru'u.

**18** Sia'an ni kachi Yandios na ni xna'an ya nuu yo na jana'an.

Kachi tutu.

**19** Yukan kuu ja ndo'o ini ri ja tu kuu kua'a yo nundo'o nuu yivi inga nación ja ka kandixia. **20** Chi so ja na sa'a yo iin tutu na ki'in, ti yukan na chiso yo ja koto ma kaji ga i kuñu kuiti ni ka soko inga yivi un nuu santu i, ti chaa iyo ñasi'i koto kunchaka da inga ñasi'i. Ti suni ña'an ka iyo yi, koto kunchaka ña inga chaa. Suni na chiso yo ja koto ma kaji i kuñu kuiti ka ne'ne, xi kuiti ka kanchaa ti ni niñi ti, koto ma kaji i naa i. **21** Ka'an ri ja na kachi yo jnu'un ja'a, chi taka ñuu ka ka'an yivi jnu'un un ja sia'an ni chiso Moisés najana'an, ti taka sábado ka skua'a yivi jnu'un un ini veñu'un Israel undi vijna. Ti nu xnaa yo jnu'un Moisés, yukan tu jajna'an ini yivi un —sia'an ni kachi Jacobo nuu yivi ni ka ndututu un.

**22** Yukan ti apóstol jiin chaa ka yinda'a yivi un, jiin uu ga yivi ka kandixia Jesú un, ni ka ndo'o ini da ja nakaji da uu chaa taji da kinkoyo da jiin Pablo jiin Bernabé ñuu Antioquía. Yukan ti ni ka taji da Judas Barsabás jiin Silas, chaa ka kuña'nu nuu yivi ka kandixia un. **23** Ni ka ja'a yivi un iin tutu ka yinda'a chaa un. Ti tutu un ni taji da nuu yivi inga nación ja kanchuku ñuu Antioquía, ñuu Siria, jiin ñuu Cilicia, ti ni ka kachi da sia'an:

“Ru'u apóstol naa ri jiin chaa ka kuña'nu jiin uu ga chaa ka kandixia ja'a. Ka kanxia'u ri jiin ra naa ra. **24** Ni chaa jnu'un ja'a ja uu chaa ka jika jiin ri ni ka kee da ja'a, ti kuajakoyo da jña, ti ka ja'a da ti'li nundo'o nuu ra naa ra, ti vijna ka ndi'i ini ra naa ra. Tu ni ka taji ri chaa un naa da. **25** Ni ka ndajnu'un taka ri naa ri, ti ni ka nduku ri uu chaa na jakoyo da nuu ka'iin ra. Jakoyo da jiin Bernabé jiin Pablo. Ka kusii ini ri jiin Bernabé jiin Pablo. **26** Ni ka ja'an da tijni ñuu nuu ni ka kuni ka'nii yivi da naa da, chi ka sa'a da jniñu ja kuu Jito'yo Jesú, ya kuu Cristo. **27** Yukan kuu ja na taji ri Judas jiin Silas jiin da naa da. Ka ka'an kaji da nuu ra naa ra siki jnu'un ka chiso ri ja'a. **28** Ni chindee Espíritu Santo ru'u naa ri. Yukan kuu ja ka ndo'o ini ri ja na kachi ri nuu ra ja tu nini kuu ja kuandatu ra taka jnu'un najana'an, ko nini kuu ja koto ra maa ra nuu taka jnu'un ka chiso ri ja'a. **29** Tu kuu kaji ra ja ka soko yivi nuu santu. Tu kuu kaji ra kuñu kuiti nu tu ni jati ndi'i niñi ti, ni tu kuu kaji ra niñi kuiti. Ro'o chaa naa ra, tu kuu kunchaka ra inga ñasi'i. Suni sia'an ñasi'i naa ña, tu kuu kunchaka ña inga chaa. Nu na koto ra maa ra naa ra ti va'a kunchuku ra. Na kukuee jiin ra naa ra nuu Yandios.” Yukan kuu tutu ni ka sa'a da nuu yivi Antioquía na ni ka ndututu da ñuu Jerusalén.

<sup>30</sup> Yukan ti Pablo jiin chaa ka jika da jiin da, kuankoyo da jiin jnu'un yukan ñuu Antioquia. Yukan ni ka kana da taka yivi ka kandixia un, ti ni ka nakua'a da tutu un. <sup>31</sup> Nu ni ka ka'u yivi un tutu un, ni ka kusii xaan ini da, chi ni ja'a da jnundee ini nuu da. <sup>32</sup> Yukan ti Judas jiin Silas ni ka keja'a da ka ka'an da nuu yivi un, chi suni ka kuu da chaa ka ka'an jnu'un Yandios, ti suni ni ka ja'a da jnundee ini yivi un. Ni ka chindee da yivi un, ti ni ka kusii tuku ini da. <sup>33</sup> Ni ku'iin da jaku kivi yukan, ti ni ka nataji tuku yivi un Judas jiin Silas kuankoyo da nuu ka'iin chaa ni ka taji da un. Ti ni ka kachi da nuu da:

—Na kukee jiin ra naa ra nuu Yandios —ni ka kachi da.

<sup>34</sup> Ko ni ndo'o ini Silas ja kendo da yukan jaku ga kivi niku. <sup>35</sup> Ti Pablo jiin Bernabé ni ka kendo da ñuu Antioquia yukan. Ni ka skua'a da jiin yivi un, ti ni ka ka'an da jnu'un Yandios. Yukan ti suni kua'a chaa ni ka ka'an jnu'un Yandios yukan.

### *Kua'an Pablo jinu kuu uu*

<sup>36</sup> Yukan ni jaa iin kivi ja ni kachi Pablo nuu Bernabé:

—Na nandeokuñi yo taka ñuu nuu ni ka ka'an yo jnu'un Yandios undi nuu. Nde'e yo nasa kanchuku taka yivi ni ka kandixia jnu'un Jesús un —ni kachi da.

<sup>37</sup> Bernabé kuni da ja na ki'in Juan Marcos jiin da naa da. <sup>38</sup> Ko Pablo tu kuni da, chi ni xndoo Juan Marcos da naa da ñuu Panfilia, ti tukaa ni ja'an da jiin da ja sa'a da jniñu yukan. <sup>39</sup> Bernabé jiin Pablo tu ni ka kejna'an ini da, ti ni ka kusiñn da naa da. Yukan ti kua'an Bernabé jiin Marcos ni ka kivi da barco, ti kuankoyo da ñuu Chipre. <sup>40</sup> Yukan ti kua'an Pablo jiin Silas. Ti yivi ka kandixia un ni ka jikanta'u ñuu Yandios ja na chindee ya Pablo jiin chaa kua'an jiin da tuku. Yukan ti ni ka kee da kua'an da. <sup>41</sup> Ni ka ya'a da ñuu Siria, ni ka ya'a da ñuu Cilicia, ti ni ka ja'a da jnundee ini taka chaa ka kandixia un.

### *Ni chindee Timoteo Pablo jiin Silas*

## 16

<sup>1</sup> Yukan ti Pablo jiin Silas ni na jakoyo tuku da ñuu Derbe. Ni ka naya'a tuku da ñuu Listra. Yukan ni ka ndejna'an da jiin iin chaa nani Timoteo. Ni ndivi da jiin Yandios. Nana da ni kuu ña iin ña'an Israel, ko suni ni kandixia ña Jesús. Tata da ni kuu chaa griego. <sup>2</sup> Yivi ka kandixia ñuu Listra ni ka kachi ja chaa va'a kuu Timoteo. Suni sia'an ni ka kachi yivi Iconio. <sup>3</sup> Yukan kuu ja ni kuni Pablo ja na ki'in Timoteo jiin da, ko xnakan ni sa'a da seña yiki kuñu Timoteo nava tu ka'an chaa Israel kanchuku un siki da, chi ka jini da ja chaa griego kuu tata da, ti tu siuku da jnu'un chaa Israel. <sup>4</sup> Yukan ni ka ya'a da ndi iin ndi iin ñuu un, ti ni ka jani dajnu'un nava ni ka chiso da nuu tutu un. <sup>5</sup> Yukan kuu ja ni ka kundee ini yivi ka kandixia un, chi ni ka kandixia ndaa da Yandios. Ti taka kivi kuan kukua'a yivi ka kandixia un.

### *Ni jani Pablo iin chaa ñuu Macedonia*

<sup>6</sup> Pablo jiin chaa kua'an jiin da, ni ka ya'a da ñuu Frigia, ti suni ni ka ya'a da ñuu Galacia, chi Espíritu Santo tu ni ja'a ya jnu'un ja ka'an da jnu'un Yandios ñuu Asia. <sup>7</sup> Yukan ti na jakoyo da nuu ndejna'an ñuu Misia jiin inga ñuu, chi ka kuni kinkoyo da ñuu Bitinia, ko Espíritu Santo tu ni ja'a ya jnu'un ja kinkoyo da yukan. <sup>8</sup> Yukan kuu ja ni ka kivi da ñuu Misia, ti ni jakoyo da ñuu Troas. <sup>9</sup> Yukan ni ka kixi da jakuaa, ti ni jani Pablo ja ni jini da iin chaa ñuu Macedonia kandichi da yukan. Knda'u da jiin Pablo, ti ni kachi da:

—Yaa ni ñuu Macedonia, ti chindee ni saña naa na —ni kachi da.

**10** Yukan kuu ja ni jini Pablo nuu jani da. Ru'u Lucas suni ni jaa ri nuu ka'iin Pablo jiin chaa kua'an jiin da. Yukan ni ka sa'a tu'va ri maa ri, ti kuankoyo ro ri nuu Macedonia, chi ni ka jini ri ja Yandios taji ru'u ja na kinkoyo ri yukan, ja na ka'an ri jnu'un ya nuu yivi yukan.

### *Ka'iin Pablo jiin Silas ñuu Filipos*

**11** Ni ka kivi ri barco ñuu Troas yukan, ti kuankoyo ndoo ri undi ñuu Samotracia. Ni kundijin inga kivi, ni jakoyo ri ñuu Neápolis. **12** Yukan ni ka xndoo ri barco ti kuankoyo ri ñuu Filipos, ja kuu iin ñuu ka'nú yukan. Tu iyo inga ñuu ka'nú ga jkuu ñuu Macedonia un ja yinda'a ñuu Roma. Na'an ni ku'iin ri yukan. **13** Iin sábado kuankoyo ri yu'u ñuu un, ni ka ja'an ri nuu ni ka ndututu yivi Israel yu'u iin yucha un, ja kanajaa da Yandios. Ni jakoyo ri, ti ni ka nukoo ri, ti ni ka ka'an ri jiin ñasi'i ni ka ndututu yukan. Ni ka ka'an ri jnu'un Yandios. **14** Iin ñasi'i un ni nani ña Lidia. Xiko ña sa'ma va'a, sa'ma ja ni ka sa'a jiin yu'va nchaa. Ni kuu ña iin ña'an ñuu Tiatira, ti suni ni nchañu'un ña Yandios nanu ka sa'a yivi Israel. Ni chunso'o va'a ña, ti ni chindee Yandios maa ña. Yukan kuu ja ni kandixia ña nava ni kachi Pablo. **15** Ni janducha ña jiin taka jna'an ña kanchuku ve'e ña, ti ni kachi ña nuu ri naa ri:

—Ña'an ve'e ri, ti kendo ra naa ra, chi ka jini ra ja kandixia ndaa ri Jesúz —ni kachi ña.

Ni chayika ña ru'u naa ri, ti ni ka ja'an ri ve'e ña.

**16** Inga kivi kuankoyo ri ichi nuu ka kanajaa chaa Israel un Yandios. Ni ka ndejna'an ri jiin iin ña'an suchi. Nini ka'an ña nuu yivi nasa kuu inga kivi vaji, ti ka'an ña nasa jna'an yivi un, chi yi'i tachi xaan jiin ña. Ni kuu ña muzu uu ga chaa un naa da, ti ni'in kua'a ña xu'un nuu chaa un naa da. **17** Ni keja'a ndikun ña Pablo jiin tendi'i ri naa ri, ti ni keja'a ña kanajii ko'o ña, ti ni kachi ña:

—¡Chaa ja'a ka sa'a da jniñu ja kuu Yandios ña'nú kancha andiví! ¡Ka jani da jnu'un nasa nanita'u yo! —ni kachi ña.

**18** Sia'an ni ndikun ña tijni kivi ru'u naa ri undi tukaa ni kundee Pablo. Ti ni ndeokoto da nuu ña, ti ni kachi da nuu tachi xaan ja yi'i jiin ña un:

—Na kachi ri ja kin kee ra ini ña'an jña, nava jniñu ta'u Jesúz, ya kuu Cristo —ni kachi da.

Ti hora jña ni kenchaa tachi xaan un kua'an.

**19** Yukan ti nu ni ka jini chaa ka ta'u jniñu nuu ña un, ja tukaa ga ni'in ña xu'un, chi ni kenchaa tachi xaan un. Yukan ti ni ka jniñ da Pablo jiin Silas kuankoyo da jiin da nuu ni ka ndututu chaa ka kuñu'nu nuu ya'u un.

**20** Kuankoyo chaa un jiin da naa da nuu juez un, ti ni ka kachi da:

—Ka ja'a chaa ja'a nundo'o ñuu yo, ti chaa Israel ka kuu da. **21** Ka ka'an da ja na kuandatu yo jnu'un da, ko tu ka'an ley yo ja kuandatu yo jnu'un da, chi Roma ta'u jniñu nuu yo —ni ka kachi da.

**22** Suni sia'an ni ka kachi tendi'i yivi un. Yukan ni ka kachi juez nuu policía:

—Tava sa'ma da, ti kani ra yujnu siki da naa ra —ni ka kachi da.

**23** Ni ka kani xaan da Pablo jiin Silas, ti ni ka jnaa da chaa vekaa, ti ni ka kachi da nuu policía ndito vekaa un:

—Kundito va'a ra chaa jña naa da —ni ka kachi da.

**24** Sia'an ni ka kachi juez nuu policía un, ti policía un ni ka jniñ da chaa, ti ni ka jnaa da undi sandi'i ni ga jiki vekaa un. Ti ni ka sa'a kutu da si'in Pablo jiin Silas tikui yujnu na'nú.

**25** Sa'a yo ja kuan kuu ñuu, ti Pablo jiin Silas ka kanajaa da Yandios, ti ka jita da himno. Ti taka chaa ka'iin ini vekaa un ka ñuso'o da. **26** Sana ini da ti ni chaa iin ñujnaa xaan. Ni kanda ni nama vekaa un, ti tendi'i yux'e un ni ka

nuña, ti ni ka ndaji cadena ka ndikun taka presu un. <sup>27</sup> Ni ndoto chaa ndito yux'e un, ti ni jini da ja ni ka nuña yux'e un. Ni tava da machete da. Kuni da ka'ni da maa da, chi ni ndo'i ini da ja ni ndi'i presu un ni ka kee kua'an.

<sup>28</sup> Ni jini Pablo ti ni kana ko'o da xini da, ti ni kachi da:

—Tu ka'ni ra maa ra, chi tendi'i ri ka'l'in ja'a —ni kachi da.

<sup>29</sup> Ni jikan policía un iin ñuu'un, ti ja'a da corri ni kivi da ini vekaa un, ti ni jakunjiti da nuu Pablo jiin Silas. Ti ni'in da ja yu'u da. <sup>30</sup> Yukan ti ni keni'in polícia un Pablo jiin Silas, ti ni keja'a jikajnu'un da:

—Taa, ndoo sa'a na nava na kenchaa kuachi na, ti nanita'u na —ni kachi da.

<sup>31</sup> Yukan ti ni kachi Pablo:

—Kandixia Jito'yo Jesús ti na nanita'u ra, ti suni tendi'i yivi kanchuku ve'e ra nanita'u i —ni kachi da.

<sup>32</sup> Yukan ti ni ka ka'an Pablo jiin Silas jnu'un Yandios nuu da jiin tendi'i yivi kanchuku ve'e da. <sup>33</sup> Ti suni hora jakuaa yukan ni nakacha policía un nuu ni ka tuji Pablo jiin chaa ka jika jiin da. Yukan ti ni ka janducha policía un jiin tendi'i yivi kanchuku ve'e da, chi ni ka kandixia da jnu'un Jito'yo Jesús. <sup>34</sup> Yukan ti ni ka kivi da ve'e policía un, ti ni ja'a chaa un ja ni ka yaji da. Ni kusii ini policía un jiin tendi'i jna'an da kankuchu ve'e da, chi ni ka kandixia da Yandios. Yukan ti ni ka nandeokuñi Pablo jiin Silas vekaa un tuku.

<sup>35</sup> Ni kundijin inga kivi, ti ni ka taji juez un policía ja na kachi da nuu policía ndito vekaa un ja na sia da Pablo jiin Silas. <sup>36</sup> Yukan ti ni kachi policía ndito vekaa un nuu Pablo:

—Ni ka taji juez razón ja na sia na ni'in naa ni. Yukan kuu ja kuu kekoyo ni, ti na kukee kinkoyo ni —ni kachi da.

<sup>37</sup> Yukan ti ni kachi Pablo nuu policía un:

—Ka'an ley ja yivi yi'i ñuu Roma, tu kuu kani da i nu tu ja'i xndichi da. Chaa Roma ka kuu na. Tu ni ka xndichi ni saña naa na. Ni ka kani ni saña naa na nuu yivi kua'a un, ti ni ka chondree ni saña vekaa. Ti vijnal ka kuni keni'in xe'e ni saña naa na. Ko tu kuu. Kuan kachi ni nuu chaa kuña'nun un na kikoyo maa da, ti na sia da saña —ni kachi Pablo.

<sup>38</sup> Yukan ti ni kachi policía un nuu juez nava ni kachi Pablo. Nu ni ka jini juez un ja suni chaa Roma ka kuu Pablo jiin Silas, ti ni ka yu'u da. <sup>39</sup> Yukan ti kuankoyo da nuu ka'iin Pablo jiin Silas vekaa un, ti ni ka nandakan ta'u da nuu da. Ni ka keni'in da chaa, ti ni ka kachi da nuu da naa da:

—Ka kanda'u na jiin ni naa ni, ja na kekoyo ni ñuu na ja'a ti kinkoyo ni —ni ka kachi da.

<sup>40</sup> Yukan ti ni ka kee da vekaa un, ti kuankoyo da ve'e Lidia. Yukan ni ka ka'an tuku da nuu uu ga yivi ka kandixia un, ti ni ka ja'a da jnundee ini yivi un, ti sa kuankoyo da.

### Ni ka ndondaa yivi Tesalónica

## 17

<sup>1</sup> Ni ka ya'a Pablo jiin chaa kua'an jiin da ñuu Anfípolis, ni ka ya'a da ñuu Apolonia, ti sa ni jakoyo da ñuu Tesalónica. Suni iyo iin veñu'un ni ka nchañu'un yivi Israel yukan. <sup>2</sup> Ni kivi Pablo yukan, chi sia'an ni sa'a da tako ñuu nuu ni ja'an da. Uni sábado ni ja'an da yukan, ti ni ka skua'a da jnu'un Yandios jiin yivi un. Nu ni ka'an da un, ti ni kachi kají da jnu'un Yandios. <sup>3</sup> Ni kachi da nuu yivi un:

—Jnu'un Yandios ka'an ja kondo'o Cristo ti kuū ya, ti nandoto tuku ya nuu ñuji'i un. Ti ka'an ri ja Jesús kuu Cristo, chi Yandios ni taji ya ja ta'u ya jniñu ña'nu —ni kachi Pablo.

<sup>4</sup> Yukan ti tijni yivi Israel un, ni ka keja'a ka kandixia Jesùs, ti ni ka kejna'an ini i jiiin Pablo jiiin Silas. Ti suni ka'iin yivi griego ja undi nuu ni ka ki'in jnu'un yivi Israel. Suni kua'a yivi un ni ka kandixia Jesùs. Suni ni ka'iin tijni ñasi'i ka nchañu'un ndaa Yandios. Ka ja'an xaan ña veñu'un chaa Israel, ti ka sa'a ña nava iyo jnu'un chaa Israel. Yukan kuu ja ka ja'a yivi un ja yñu'un ña naa ña. Suni ni ka kandixia ña'an un Jesùs, ti ni ka kuu kua'a ña'an un naa ña. <sup>5</sup> Ti suni tijni yivi Israel ka'iin un, tu ni ka kandixia. Ni ka kuu kuasun ini, ti ni ka ka'an jiiin sava chaa kuxi ja ka ndo'o kue'e ini ka yaku ichi un. Yukan ti ni ka keja'a ka kanajiin ko'o da, ti yachi xaan ni ka kututu yivi ñuu un. Ti ni ka ska'an yivi un. Yukan kuankoyo da ve'e Jasón, ni ka kivi da ka nanduku da Pablo jiiin Silas, ja na keni'in da chaa ti kinchaka da nuu yivi un. <sup>6</sup> Tu ni ka ni'in da Pablo jiiin Silas. Yukan kuu ja ni ka ñu'un da Jasón jiiin uu ga chaa ka kandixia Jesùs un, ti ni ka chakuachi da yukan:

—Chakoyo tijni chaa inga ñuu yo ja'a ja ni ka ska'an da yivi taka ñuu nuu ni ka ja'an da. <sup>7</sup> Ti Jasón ja'a ni skivi da chaa un ve'e da. Tu ka jandatu da jniñu ta'u César, chaa ta'u jniñu ñuu Roma. Ka ka'an da ja iyo inga chaa ta'u jniñu ni ñuyivi. Ti chaa un kuu Jesùs —sia'an ni ka kachi da nuu chaa ka kuña'nu un.

<sup>8</sup> Nu ni ka jiniso'o da jnu'un un, tendi'i chaa ka kuña'nu jiiin yivi un, ni ka kuiti xaan ini, ti ni ka keja'a ka kanajiin. <sup>9</sup> Yukan ti chaa ka kuña'nu un ni ka jikan da multa nuu Jasón jiiin da naa da, ja na kekoyo Pablo jiiin Silas ki'in da inga ñuu, ti sa ni keta'u Jasón jiiin chaa un naa da.

### Kande Pablo jiiin Silas ñuu Berea

<sup>10</sup> Yukan ti yivi ka kandixia ñuu Tesalónica ni ka taji da Pablo jiiin Silas kuankoyo da ñuu Berea. Jakuaa ni ka kee da kua'an da. Ni jakoyo da yukan, ti ni ka kivi da veñu'un nuu ka nchañu'un yivi Israel. <sup>11</sup> Va'a ga ini yivi Israel kanchuku ñuu Berea, chi tu ni ka sa'a nanu ni ka sa'a yivi Israel kanchuku ñuu Tesalónica. Yivi Berea un ni ka kuni kunsho'o jnu'un Yandios. Taka kivi ni ka skua'a va'a jnu'un Yandios, ti ka nanduku da nuu tutu Yandios nu jandaa kuu jnu'un ka'an Pablo. <sup>12</sup> Yukan ti kua'a yivi un, ni ka kandixia jnu'un Jesùs. Suni ni ka kandixia yivi griego. Kua'a yivi kuu kandixia un, kuu yivi ka un kuña'nu. Kuu ñasi'i kuu chaa. <sup>13</sup> Yukan ti ni jaa jnu'un nuu yivi ñuu Tesalónica, ti ka jiniso'o yivi Israel kanchuku yukan ja suni ka'an Pablo jnu'un Yandios ñuu Berea. Kuankoyo da yukan ti ni keja'a ka ska'an da yivi ñuu un, ti ni ka keja'a yivi Berea un ka ndo'o ini. <sup>14</sup> Yukan ti yivi ka kandixia un ni ka taji ni da Pablo kua'an da ichi yu'u mar un, ko Silas jiiin Timoteo ni ka kendo da ti'li ga ñuu Berea yukan. <sup>15</sup> Suni tijni chaa ka kandixia un kuankoyo da jiiin Pablo, ti kuankoyo da jiiin da undi ñuu Berea ja na kasjnu'un da nuu Silas jiiin Timoteo ja na kinkoyo yachi da nuu kande Pablo. Yukan ti ni ka nandeokuñi chaa un undi ñuu Berea.

### Kande Pablo ñuu Atenas

<sup>16</sup> Ndatu Pablo, Silas jiiin Timoteo ñuu Atenas. Ni ndatu da, ti ni jini da ja ka iyo kua'a santu ni ka sa'a yivi yukan ti ka nchañu'un i, ti ni kukui'ya ini da. <sup>17</sup> Yukan kuu ja ni ka'an kua'a da jiiin tendi'i yivi un. Ni ka'an da jiiin yivi Israel ini veñu'un nuu ka nchañu'un. Suni ni ka'an da jiiin yivi inga nación ja ka nchañu'un da Yandios. Suni taka kivi ni ka'an da nuu yivi ka'iin nuu ya'u. <sup>18</sup> Yukan ti ni ka ka'an yivi un jiiin Pablo. Tijni yivi un ka skua'a jnu'un epicúreo, suni tijni ka skua'a jnu'un estoico. Ni ka'an Pablo nuu yivi un, ti yivi un ni ka keja'a ka ka'an:

—¡Naa jnu'un ka'an chaa ja'a ja ka'an xaan da, ko siin xaan jnu'un ka'an da! —ni ka kachi yivi un.

Sava yivi un ka ka'an:

—Ka'an da ja iyo inga Yandios —ni ka kachi.

Sia'an ni ka ka'an yivi un, chi ni ka'an Pablo jnu'un Jesús, ti suni ni kachi da ja ka nandoto tuku ndiyi. <sup>19</sup> Ni ka jni yivi un Pablo, ti kuankoyo jiin da nuu yuku nani Areópago. Yukan ka ndututu chaa ka kuña'nu ñuu Atenas ka ndajnu'un da. Yukan ti ka kachi da nuu Pablo:

—Kani na jnu'un kuu jnu'un xna'an ra nuu yivi ja'a, <sup>20</sup> chi siin xaan ka'an ra. Tu ja'i kunso'o ri naa ri na jnu'un ka'an ra. Ka kuni ri naa ri na jnu'un kuu —ni ka kachi da.

<sup>21</sup> Tendi'i yivi ñuu Atenas ka kuni ka'an tako jnu'un jaa un. Suni ka kuni kunso'o tako jnu'un jaa un, chi sia'an kanda. Tukaa iyo inga jniñu ka sa'a. Suni sia'an sa'a yivi ñuu un, ti suni sia'an sa'a inga yivi chakoyo ñuu un. <sup>22</sup> Yukan ti ni jakuiñi Pablo ma'lñu nuu ni ka ndututu chaa ka kuña'nu nuu yuku Areópago yukan, ti ni keja'a ka'a da nuu chaa Atenas:

—Tendi'i ni'in, chaa ka kuña'nu naa ni, jini na ja ka nchañu'un ni ini ni kua'a suntu. <sup>23</sup> Ni jikonuu na ñuu ni, ti ni jini na tako suntu ja ni ka sa'a, ti ka nchañu'un ni. Suni ni jini na ñuu kuncha ñin suntu, ko tundo kancha. ñin letra jika altar un ja ka'an: "Tu ka jini ri Yandios un." Ka nchañu'un ni un, ko tu chaku ini ni. Víjna na kachi na nuu ni nava kuu —ni kachi Pablo.

Siiñ Pablo ka'an da:

<sup>24</sup> —Yukan kuu Yandios ja ni sa'a ñuyivi jiin tako ja iyo ñuyivi. Ni ta'u ya jniñu andivi, ti suni ni ta'u ya jniñu ñuyivi ja'a, ko tu nandi'i ya ñin ve'e ja sa'a yivi ja kuncha ya, nanu ka sa'a yivi ja kuu suntu. <sup>25</sup> Tu nandi'i ya ja chindee yivi ya, chi tundo kumani nuu ya. Maa ya ja'a tendi'i ja iyo. Maa ya sa'a ja ka chaku yo, ti jaan tachi yo. <sup>26</sup> ñin ni yivi ni sa'a Yandios undi nuu. Yukan ti ni ka nduu kúa'a yivi, ti ni sa'a ya ja na kuchaku yivi ni ñuyivi. Ni kachi Yandios nasa na'an kuchaku ñin yivi, ti ni kachi ya nanu kunchuku yivi. <sup>27</sup> Sia'an ni sa'a Yandios nava na kachi yivi: "¿Ndoo ni kuu sia'an? Ti sia'an sa na nanduku yivi Yandios, ko tu yi'i nani'l'in yivi ya." <sup>28</sup> Ni sa'a ya ja chaku yo. Ni sa'a ya ja jikonuu yo, ti sa'a yo tako jniñu. Suni sia'an ni ka ka'an tijni chaa tu'va ñuu ni undi najana'an na ni ka ka'an da: "Yandios ni sa'a yo'o."

<sup>29</sup> Yukan kuu ja tu va'a ka ndo'o ini ni ja kaa Yandios nanu ka ndo'o ini yivi. Ni ka sa'a i suntu nava ni ka ndo'o ini i, ansu Yandios kuu ja ni ka sa'a yivi jiin oro, ni ja ni ka sa'a jiin plata, ni ja ni ka sa'a jiin yuu. Tu va'a ja ni ka ndo'o ini ni ja sia'an kaa Yandios, chi maa ya ni sa'a yo'o. <sup>30</sup> Undi najana'an tu ni ka jini yivi jniñu ka sa'a i. Tundo ni sa'a Yandios jiin yivi un, ko víjna ti ni kuni ya ja tendi'i yivi na nakani ini i nuu kuachi i. <sup>31</sup> Kuni ya ja na kuu sia'an, chi ni kachi ya ja na koo ñin kivi na xndichi ya tendi'i yivi, chi ni ja'a ya jniñu nuu ñin chaa ja na nde'e da nu ni sa'a va'a yivi, xi ni sa'a kue'e i, ti chaa un ka'an da mani jandaa. Ti ni naxndoto ya chaa un nuu ka'lín ndiyi un ja nakuni yo na kaa chaa xndichi nuu yivi un —sia'an ni kachi Pablo.

<sup>32</sup> Nu ni ka jiniso'o ja ni ka'an Pablo ja nandoto tuku ndiyi, sava da ni ka kuu ichi ini, ti sava da ni ka kachi:

—Inga jinu sa na kunso'o ri naa ri nasa nandoto tuku ndiyi —ni ka kachi da.

<sup>33</sup> Yukan ni kee Pablo nuu ka'lín da un, ti kua'an da. <sup>34</sup> Tijni yivi un ni ka najna'an jiin Pablo, ti ni ka kandixia. ñin chaa un ni nani Dionisio. Suni ni kuu da ñin chaa kuña'nu ñuu un. ñin ñasi'i un ni nani Dámaris. Suni sia'an ni ka kandixia uu ga yivi un.

## 18

<sup>1</sup> Ni kee Pablo ñuu Atenas ti kua'an da ñuu Corinto. <sup>2</sup> Yukan ni ndejna'an Pablo jiin iin chaa Israel nani Aquila. Ni kuu da iin chaa ñuu Ponto. Sa jaku kivi ni jakoyo da yukan jiin ñasi'i da nani Priscila, chi ni ka kee da ñuu Italia. Ni ka kee da yukan, chi Claudio ni keni'in tendi'i yivi Israel kanchuku ñuu Roma yukan. Claudio ni ta'u jniñu ni ñuu Italia. Ni ja'an Pablo ve'e Aquila jiin Priscila. <sup>3</sup> Ti yukan ni kuncha da jaku kivi, chi iin ni jniñu ni ka sa'a da naa da. Ni ka sa'a da ve'e jiin sa'ma. Ni ka sa'a ndinduu da jniñu un, ti sia'an ka ni'in da xu'un da. <sup>4</sup> Taka sábado ni ja'an Pablo veñu'un nuu ka nchañu'un yivi Israel un, ti ni ka'an da. Ni ka'an da nuu yivi Israel, ti suni ni ka'an da nuu yivi inga nación, chi kuni da ja na kandixia yivi un Jesús.

<sup>5</sup> Yukan ti Silas jiin Timoteo ni ka kee da ñuu Macedonia, ti ni jakoyo da yukan. Ti Pablo ni keja'a ni ini da ka'an da jnu'un Yandios. Ni skua'a da jiin yivi Israel un, ti ni kachi da:

—Kandatu ra Cristo naa ra. Ko na kachi ri nuu ra ja Jesús kuu Cristo, chi Yandios ni taji ya ja ta'u ya jniñu ña'nu —ni kachi da.

<sup>6</sup> Ni ka keja'a ka kuiti ini yivi Israel un nuu Pablo, ti ni ka ka'an kue'e da nuu da. Yukan ti ni kisi Pablo sa'ma da, chi tukaa kundee ini da jiin jnu'un ni ka ka'an yivi un, ti ni kachi da:

—Kuachi maa ra naa ra nu tu nanita'u ra naa ra. Tu na kuachi ru'u, chi ja ni ka kachi ri nuu na nava ni kachi Yandios. Vijna ti na ki'in ri, ti na ka'an ri jnu'un Yandios nuu yivi inga nación —ni kachi da.

<sup>7</sup> Ni kee da veñu'un Israel un, ti kua'an da ve'e iin chaa nani Justo, ja kancha xiin veñu'un un. Suni ni nchañu'un da Yandios. <sup>8</sup> Ko iyo iin chaa nani Crispo ja ni yinda'a veñu'un Israel un. Maa da jiin tendi'i jna'an da ni ka kandixia da Jesús. Suni kua'a yivi ñuu Corinto ni ka jiniso'o jnu'un Yandios, ni ka kandixia i Jesús, ti ni ka janducha i. <sup>9-10</sup> Yukan ti ni skoto jani nuu Pablo iin jakuaa, ti ni kachi Yandios nuu da:

Tu yu'u ra siin ra ka'an ra jnu'un ri, chi chindee ri ro'o, ti tundo sa'a yivi jiin ra. Siin ka'an ra ti tu kasiyu'u ra, chi iyo kua'a xaan yivi ñuu ja'a ja na kandixia ru'u —ni kachi ya nuu jani un.

<sup>11</sup> Yukan ti ni kendo Pablo ñuu Corinto un ni kuncha da iin kuiya sava, ti ni skua'a da jnu'un Yandios jiin yivi un naa i.

<sup>12</sup> Galión ni nani iin chaa ni ta'u jniñu ni ñuu Acaya un. Ni ka nduu iin nuu ini chaa Israel un, ni ka jniñi da Pablo ti kuankoyo da jiin da nuu Galión. <sup>13</sup> Ti yukan ni ka kachi da:

—Ka'an chaa ja'a ja na kunchañu'un yivi Yandios, ko ansu sia'an ka'an ley yo —ni ka kachi da.

<sup>14</sup> Ja kuni ka'an Pablo, ti ni kachi Galión nuu yivi Israel un:

—Nde'e naa ra, tundo ni sa'a chaa ja'a. Nu ni sakui'na da, xi ni ja'nii da iin ndiyi, sa na kunso'o ri jnu'un ka ka'an ra naa ra, ko tundo ni sa'a da. <sup>15</sup> Na kachi ri ja kuu maa ra naa ra. Ka kuni chakuachi ra da ja skua'a da inga jnu'un. Siin jnu'un ka'an da, ti siin kuu ley ra naa ra. Tu kuanta'u ri jnu'un ka ka'an ra naa ra —ni kachi Galión.

<sup>16</sup> Yukan ti ni keni'in da yivi un kuankoyo fuera. <sup>17</sup> Yukan ti tendi'i chaa griego un ni ka jniñi da Sóstenes ja kuña'nu veñu'un chaa Israel un, ni ka ja'a da tau chaa un yux'e sticia un, chi tu ni ka jajna'an ini chaa Israel un, ko Galión tu ni nde'e da un.

**Ni nandeokuñi Pablo ñuu Antioquía ti kua'an da jinu kuu uni**

<sup>18</sup> Tijni ga kivi ni kuncha Pablo ñuu Corinto. Yukan ti ni ka kanxia'u da jiin yivi ka kandixia un, ti kua'an da ichi ñuu Cencrea, ja kuu iin ndañuu Siria. Suni kua'an Aquila jiin Priscila. Ni ka jakoyo da ñuu Cencrea. Yukan ni sete

Pablo ixi xini da, chi ja ni sinu da jnu'un ni kachi da nuu Yandios. Yukan ni ka kivi da barco ti kuankoyo da ichi ñuu Siria. <sup>19</sup> Ichi kuankoyo da ni ka ya'a da ñuu Efeso. Yukan ni ka kendo Aquila jiin Priscila, ti ni ja'an Pablo veñu'un nuu ka nchañu'un yivi Israel kanchuku ñuu yukan, ti ni ka'an da jnu'un Yandios nuu yivi un. <sup>20</sup> Ni ka kuni yivi un ja na kendo Pablo tijni kivi un, ko tu ni kuni da. <sup>21</sup> Ni kuu hora ka'an da ja ki'in da, ti ni kachi da:

—No'on ri ñuu Jerusalén, chi koo iin viko, ti kuni ri kunde ri yukan. Nu na kachi Yandios ti nandeokuñi tuku ri —ni kachi da.

Ni kee da ñuu Efeso un, ti kua'an da ichi yu'u mar. Yukan ni kivi da barco. <sup>22</sup> Yukan ni ya'a da ñuu Cesarea, ti ni jaa da ñuu Jerusalén. Yukan ni kanxia'u da jiin yivi ka kandixia Jesús un, ti sa kua'an da ñuu Antioquia. <sup>23</sup> Na'an ni kuncha da ñuu Antioquia. Yukan ni kee tuku da, ti ni nandeokuñi da ñuu Galacia. Ni naya'a da ñuu Frigia. Ni ya'a da ndi iin ndi iin ñuu yukan, ti ni ja'a da jnundee ini tendi'i yivi ka kandixia Jesús un.

### *Ni ka'an Apolos ñuu Efeso*

<sup>24</sup> Na ni ya'a Pablo ñuu yukan, iin chaa Israel ni jaa da ñuu Efeso. Ni nani da Apolos, ti ni kuu da chaa Alejandría. Ni ka'an va'a da jnu'un Yandios, ti nakuni va'a da tutu Yandios jana'an. <sup>25</sup> Skua'a da jnu'un Jesús. Ni ka'an ni ini da, ko tu jini ndi'i da jnu'un Jesús. Nini jnu'un ni ka'an Juan ni jini da, ti Juan ni skuanducha da yivi. <sup>26</sup> Tu ni yu'u da ti ni keja'a ka'an da jnu'un un ini veñu'un nuu ni ka nchañu'un yivi Israel un. Ni ka jimsoni' Aquila jiin Priscila nava ni ka'an da. Yukan kuu ja ni ka kana da chaa, ti ni ka xndaku ndaa da nuu da nava ni jna'an Jesús undi na ni ji'i Juan. <sup>27</sup> Yukan ti Apolos kuni da ki'in da Acaya. Ni ka chindee yivi ka kandixia ñuu Efeso un maa da, ti ni ka sa'a i iin tutu nuu yivi ka kandixia Acaya. Ni ka kachi i: "Kuanta'u Apolos." Sia'an ni ka chiso da, ti kua'an Apolos. Ni ja'a da jnundee ini yivi ka kandixia un. Ja ni ka kandixia yivi un Jesús, chi ni chindee Yandios maa i. <sup>28</sup> Ni ka jini yivi un ja ni nachiso ndaa Apolos nuu yivi Israel, chi ni ja'a Yandios jniñu nuu da. Yukan kuu ja ni skua'a da nava ka'an tutu Yandios. Ni kachi da nuu yivi Israel un:

—Ka ndatu ra Cristo naa ra. Ko na kachi ri nuu ra ja Jesús ni kuu Cristo, chi ni taji Yandios ja ta'u ya jniñu ña'nu —ni kachi da.

### *Kande Pablo ñuu Efeso*

## 19

<sup>1</sup> Apolos ni kendo da ñuu Corinto, ti Pablo kua'an da yuku ñuhún ñuu Asia un, ti ni jaa da ñuu Efeso. Ni jaa da nuu iin tijni yivi ka kandixia jnu'un ni ka'an Juan ja ni skuanducha. <sup>2</sup> Ti ni jikajnu'un da nuu da, ti ni kachi da:

—¿Ni ka ni'in ra Espíritu Santo kivi ni ka kandixia ra nu? —ni kachi da.

Ti ni ka kachi da nuu Pablo:

—Ni tu jini ri nu iyo Espíritu Santo —ni ka kachi da.

<sup>3</sup> Ti ni jikajnu'un tuku Pablo nuu da naa da, ti ni kachi da:

—¿Nasa ni ka janducha ra naa ra? —ni kachi da.

Ni ka kachi da nuu Pablo:

—Ni ka janducha ri nava ni kachi Juan.

<sup>4</sup> Ti ni kachi Pablo nuu da:

—Juan ni skuanducha da yivi jiin nducha nu ni ka nakani ini da nuu kuachi da. Ni kachi da nuu yivi ja kii inga chaa, ti yivi un na kandixia i ja chaa un kuu Jesús, ya kuu Cristo. Sia'an ni ka'an Juan —ni kachi Pablo.

<sup>5</sup> Nu ni ka jiniso'o da jnu'un ni ka'an Pablo, ti ni ka janducha da, chi ni ka kandixia da ja Jesúz kuu Cristo. <sup>6</sup> Yukan na ti Pablo ni chuxndee da nda'a da siki da naa da, ti ni ka ni'in da Espíritu Santo, ti ni ka keja'a da ka ka'an da inga yu'u yivi, ti suni ka ka'an da jnu'un Yandios. <sup>7</sup> Ti ka iyo yajni uxi uu jna'an da.

<sup>8</sup> Nu uni yoo ni kunde Pablo un, ni ja'an da veñu'un nuu ka nchañu'un yivi Israel un. Tu ni yu'u da ja ka'an da jiin yivi un, ti ni xna'an da nuu da naa da, ti kua'a jnu'un ni ka'an da nasa ta'u Yandios jniñu. <sup>9</sup> Yukan ni ka'iin tijni yivi Israel ja ni'in xaan ini da. Tu ni ka kandixia da jnu'un ni ka'an Pablo. Ti ni ka kachi da jiin jna'an da un ja tu iyo va'a jnu'un Jesúz. Yukan ti Pablo ni kuxio da nuu ve'nun' da, ti ni kuu siñ da kua'an da jiin chaa ni ka kandixia jiin da un. Ti ni naya'a da iin skuela chaa nani Tiranno. Yukan ti taka kivi ni xna'an Pablo jiin taka yivi ka jakoyo skuela un. <sup>10</sup> Ni skua'a da uu kuiya yukan. Ti tendi'i yivi kanchuku ndañuu Asia un ni ka jiniso'o i jnu'un Jesúz. Ni ka jiniso'o yivi Israel, ti suni ni ka jiniso'o yivi inga nación. <sup>11</sup> Ni sa'a Pablo kua'a jniñu ña'nun yukan, chi ni chindee Yandios maa da, ti ni ka jini yivi un nava sa'a jniñu Yandios. <sup>12</sup> Ti yivi un ni ka yinda'a i sava'ni ga pafiitu xi sava'ni ga sa'ma, ja ni kue'e Pablo, ti ni ka yinda'a i nuu yivi ka ku'u, ti yivi un ni ka nduva'a i. Suni ni ka yinda'a i nuu yivi ka jna'an tachi xaan, ti tachi xaan un ni kee kua'an, ti ni ka nduva'a yivi un.

<sup>13</sup> Yukan ka jikonuu tijni chaa Israel ja suni ka kenchaa da tachi xaan nuu yivi, chi ka kuu da chaa tasi. Ka kuni kenchaa da tachi xaan un nuu yivi jiin sivi Jesúz, ti ni ka kachi da jiin tachi xaan un:

—Pablo ni ka'an jnu'un Jesúz. Jiin jniñu ni ta'u Jesúz ka'an ri, ti kuan kee naa ra —ni ka kachi da.

<sup>14</sup> Sia'an ni ka sa'a ndi uxia se'e Esceva, iin chaa kuu sutu kuña'nu. <sup>15</sup> Ni ka kachi da jniñu ta'u Jesúz nuu tachi xaan un, ti tachi xaan un ni ka kachi:

—Jini ri nau ja kuu Jesúz, ti jini ri nau ja kuu Pablo, ko tu jini ri nau ja kuu ro'o naa ra, chi tu ka ta'u ra jniñu ña'nun —ni ka kachi tachi xaan un.

<sup>16</sup> Yukan ti chaa ka jna'an tachi xaan un, ni kanda da siki chaa kuachi un ni jnii da i, ti ni ja'a da tau i ja undi ni ka tuji i. Ni tevichi lii da suchi un naa i. Sia'an ni ka kee i ve'e un, ni ka jinu i. <sup>17</sup> Yukan ti tendi'i yivi ñuu Efeso ni ka jiniso'o nava ni ka jna'an suchi un. Ni ka jiniso'o yivi Israel, ti suni ni ka jiniso'o yivi inga nación. Yukan kuu ja tendi'i yivi un ni ka keja'a ka yu'u da, ti ni ka keja'a ka ka'an da ja ña'nun kuu jniñu ni sa'a Jesúz.

<sup>18</sup> Kua'a yivi ni ka kandixia Jesúz, ti vekoyo i ka ka'an i ja tu iyo va'a jniñu ni ka sa'a i niku. <sup>19</sup> Ni ka kachi kaji i nasa ni ka xnda'u i yivi. Chaa tasi un ni ka yinda'a da tutu tasi, ti tendi'i yivi un ni ka jini ja ni ka ja'ma da un. Ti ni ka tava da nasa nchaa tutu un, ti ni ka jini da ja nchaa uu xiko uxi mil xu'un plata. <sup>20</sup> Sia'an ni jichanuu jnu'un Yandios, ti ni ka kandixia kua'a yivi un, ti Yandios ni ja'a ya jnundee ini nuu yivi un.

<sup>21</sup> Yukan ni ndo'o ini Pablo ja nandeokuñi da ndañuu Macedonia. Ya'a da ndañuu Macedonia. Ya'a da ndañuu Acaya, ti no'on da undi Jerusalén, ko ni kachi da:

—Nu na ya'a ri Jerusalén, ti ki'in ri undi Roma —ni kachi da.

<sup>22</sup> Yukan ti ni taji Pablo Timoteo jiin Erasto undi Macedonia, chi ni ka chindee da jiin da, ti ni kendo Pablo jaku ga kivi ñuu Asia.

### *Ni ka ndondaa yivi Efeso*

<sup>23</sup> Ti kivi un ni ka ndondaa yivi ñuu Efeso, ja kua'a yivi ni ka kandixia Jesúz. <sup>24</sup> Ni iyo iin chaa ni nani Demetrio. Ni sa'a da jniñu jiin plata, ti ni ka natejna'an da mani santu kuachi. Nanu santu ni nani Diana. Ti chaa ka

sa'a jniñu jiin da un, ni ka ni'in kua'a da xu'un, chi ni kuu ya'u xaan. <sup>25</sup> Ti Demetrio un ni nastutu da taka chaa un jiin uu ga chaa ka sa'a jniñu siki jniñu un, ti ni kachi da:

—Taa, ja ka jini yo ja jiin jniñu ja'a ka na'i'in kua'a yo xu'un. <sup>26</sup> Ko jini yo ja ka'an Pablo ja santu kuachi ka sa'a yo, ansu maa Yandios kuu. Ti sia'an ni skandixia da kua'a yivi, ti tukaa ka jaan i santu ka sa'a yo. Ti ansu nini ñuu Efeso ja'a, chi ni ñuu Asia. Sia'an ka jini yo nava sa'a da. <sup>27</sup> Chi nu tukaa kuaan yivi suntu ka sa'a yo, ti tu iyo va'a nu sia'an, ko vi'i ga kuu nu na xndoo da ja tukaa kunchañu'un da santu Diana, chi maa ña kuu iin suntu ja kuu ña'nu ga. Vijna ni ñuyivi ka nchañu'un i suntu un. Sandau xi jaa iin kivi ti tukaa kunchañu'un i Diana —ni kachi Demetrio.

<sup>28</sup> Nu ni ka jiniso'o da jnu'un ni ka'an Demetrio, ni ka kuiti xaan ini da, ti ni ka kanajii da:

—Diana, ñuu Efeso ja'a, kuu iin suntu kuña'nu ga! —ni ka kachi da.

<sup>29</sup> Yukan ti ni ka ndondaa yivi ni tu'u ñuu yukan, ni ka jni yivi un Gayo jiin Aristarco, uu chaa ñuu Macedonia, chi ka yaku da jiin Pablo. Ti taka yivi ñuu un ni ka ndututu iin nuu iyo junta ni tu'u ñuu. <sup>30</sup> Kuni ki'in Pablo nuu ka kanajii yivi un, ti ni ka ka'an da jiin da, ko chaa ka kandixia jiin da tu ni ka ja'a da jnu'un. <sup>31</sup> Ti yukan ka'iin tijni chaa ñuu Asia, ja ka kuu mani da jiin Pablo. Suni ni ka kasjnu'un da nuu Pablo ja tu ki'in da un. <sup>32</sup> Ti nuu junta un ni ka keja'a ka kanajii yivi. Tijni ni ka ka'an iin jnu'un, ti uu ga ni ka ka'an inga jnu'un, chi ni ka kuvaad ka kanajii da. Kua'a da tu ka jini ndoo ni ka ndututu da. <sup>33</sup> Ti chaa Israel un ni ka chinda'a da iin chaa nani Alejandro, ja na ka'an da nuu tendi'i yivi, ni ka jani sava yivi un jnu'un nuu da ndoo ni ka ndututu da, chi tu jini kuiti da. Yukan ti Alejandro ni sa'a da seña jiin nda'a da ja na kasiyu'u yivi un, chi kuni kachi da ja ansu chaa Israel ni ka ndondaa siki ñuu un. <sup>34</sup> Ko nu ni ka jini yivi un ja kuu da iin chaa Israel, ti ni ka kanajii yivi un yajni uu hora, ti ni ka kachi da:

—Diana, ñuu Efeso ja'a, kuu iin suntu kuña'nu ga —sia'an ni ka kana jiin da.

<sup>35</sup> Yukan ti iin chaa kuu secretario ñuu un, nu ni kundee da ni ka jasiyu'u yivi un, ti ni keja'a ka'an da nuu i:

—Ni'in naa ni chaa ñuu Efeso, ka jini yivi ni tu'u ñuyivi ja ka jito va'a yo ve'e Diana, chi kuu ña iin suntu kuña'nu ga. Suni jini da ja ka jito yo suntu ni kinikava undi andivi. <sup>36</sup> Ti tu ni iin yo kachi ja ansu jandaa kuu. Kasi yu'u ni naa ni. Ti tukaa ndoo ka'an ni naa ni, chi tu ni ka jani va'a ini ni. <sup>37</sup> Ti ka yinda'a ni Gayo jiin Aristarco. Tu ni ka sakui'na da ini ve'e Diana, ni tu ka ka'an da siki Diana. <sup>38</sup> Ti nuu Demetrio jiin uu ga chaa ka sa'a jniñu jiin da un, ka ñu'un kuachi da jiin yivi, ti na kin kankuachi da nuu juez jiin nuu juzgado, na kankuachi da nuu justicia nava na ni'in da ichi da. <sup>39</sup> Nu inga jniñu ka jikan ni naa ni, kuu kakan ni nuu iin junta nava ka'an nuu ley. <sup>40</sup> Sia'an sa'a ni naa ni, chi kuu kankuachi i siki ni, ti kachi i ja ni ka ndondaa ni naa ni siki justicia ja ni ka ndututu ni ja'a. Ti nu na kuni justicia ja ni ka ndututu ni naa ni vijna, ti kajnu'un da ni'in naa ni, ti tundo kachi ni nuu da —ni kachi secretario un.

<sup>41</sup> Nu ni ndi'i ni ka'an da sia'an, ti ni nataji da taka yivi un kuano'on i ve'e i.

### Kua'an Pablo ñuu Macedonia jiin ñuu Grecia

## 20

<sup>1</sup> Nu ni ndi'i ni ka jicha nuu yivi ni ka kanajii nuu junta un. Ti Pablo ni ndututu da jiin yivi ka kandixia, ti ni ja'a da jnundee ini nuu yivi un, ti ni ka kanxia'u da jiin yivi un ti kua'an da undi ñuu Macedonia. <sup>2</sup> Ni ya'a da ñuu

Macedonia ti ni jikonuu da taka ñuu un ni ja'a da jnundee ini nuu taka yivi ka kandixia jnu'un Jesús. Yukan ti ni ya'a da undi ndañuu Grecia.<sup>3</sup> Ni kendo da yukan uni yoo. Ni jaa iin kivi ja kuni ki'in da barco ja ki'in da undi ndañuu Siria. Yukan ti ni ni'in da jnu'un chaa Israel ka ndo'o ini da ja ka'nii da chaa. Yukan ti ni ndo'o ini da ja nandeokuñi da ñuu Macedonia.<sup>4</sup> Ti kua'an Pablo jiin iin chaa nani Sópater, chaa ñuu Tesalónica. Suni Gayo, chaa ñuu Derbe, jiin Timoteo kuankoyo da jiin da.<sup>5-6</sup> Tendi'i da kuankoyo da ñuu Filipos. Ti ni kendo da jaku kivi jiin Lucas, ti uu ga chaa un ni ka kandu da kua'an da. Ti ni ka ndatu da saña undi ñuu Troas. Nu ni ya'a viko ka yee da staa stila tu yi'i levadura, ti ni ka kivi na iin barco ti kua'an na. Ti nuu u'un kivi ni ka janujna'an naa da undi ñuu Troas, ti yukan ni ka kendo na uxia kivi.

### *Kande Pablo ñuu Troas*

<sup>7</sup> Hin kivi domingo ni ka ndututu na jiin taka yivi ka kandixia, ti ni ka yee na staa ja ni ka nuku'un ini na kivi ni kuxini Jesús. Ni ka'an Pablo jnu'un Jesús nuu yivi un undi ñuu, chi inga kivi kuni ki'in da.<sup>8</sup> Ti kua'a yiti ka kayu nuu ni ka ndututu da, ka'iin da iin ve'e kendo nuu sukun.<sup>9</sup> Hin chaa lulu nani da Eutico, nukoo da yu'u ventana un. Ti vanuxia ja ni siin Pablo ka'an da, ti ni chaa ma'na nuu chaa lulu un, ti ni kanakava i. Kanakava i uni piso undi nuu ñu'un. Ni ji'i yi.<sup>10</sup> Yukan ti Pablo ni kuun da nuu ni kanakava chaa lulu un, ti ni jinu da siki i, ti ni nanuu da i. Yukan na ti ni kachi Pablo nuu yivi un:

—Koto yu'u ra naa ra, chi chaku i —ni kachi da.

<sup>11</sup> Yukan na ti ni ndaa Pablo nuu ka'iin da un. Ni ka yee da staa jiin yivi un, ti ni siin da ka'an da undi ni kuxian inga kivi ti kua'an da.<sup>12</sup> Chaa lulu un ni nandoto tuku da, ti kuano'on da ve'e da. Yukan kuu ja ni ka kusii xaan ini yivi un.

### *Kua'an Pablo jiin chaa ka jika jiin da ñuu Mileto*

<sup>13</sup> Yukan ti ni ka kandu na, ti ni ka kivi na iin barco. Ti kua'an na undi Asón, nuu ni ka ndatu na Pablo. Sia'an ni kuu ini maa da, chi ni jika ja'a ka kua'an da undi ñuu un.<sup>14</sup> Yukan ni ka ndejna'an na jiin Pablo ñuu Asón un. Ni kivi da jiin na naa na ini barco un, ti kuankoyo na undi ñuu Mitilene.<sup>15</sup> Kee na kuankoyo na yukan jiin barco, ti inga kivi ni ka ya'a na ñuu Quío, ti inga kivi ni ka ja'an na ñuu Samos. Ni kendo na jaku kivi ñuu Trogilio, ti undi inga kivi sa ni ka jaa na undi ñuu Mileto.<sup>16</sup> Tu ni ka ja'an na ñuu Efeso, chi Pablo tu ni kuni da kendo da ñuu Asia yukan. Sia'an ni sa'a da, chi ni ndi'i ini da ja kuni da jaa yachi da ñuu Jerusalén. Nu na kuu yachi da, ti kuni da nasa'a da viko ta'u itu xi triu.

### *Jnu'un ni ka'an Pablo nuu chaa ka yinda'a yivi kandixia ñuu Efeso*

<sup>17</sup> Undi ñuu Mileto ni kana Pablo taka chaa ka yinda'a yivi ka kandixia Jesús ñuu Efeso, ja na ki'in da undi nuu kancha Pablo.<sup>18</sup> Nu ni ka jakoyo da nuu kancha Pablo, ti ni kachi Pablo jiin da:

—Ni'in naa ni, ja ka jini ni nasa ni chaa na, na ni chaa na ñuu Asia.<sup>19</sup> Ni sa'a na jniñu ni ta'u Yandios. Tu ni sa'a vixi na maa na. Kukui'ya xaan ini na jiin taka nundo'o ka sa'a yivi nuu na. Ni ndo'o nene na, chi chaa Israel ni ka sa'a ndeja'a da jiin na.<sup>20</sup> Ka jini ni ja tu yu'u na ka'an na jnu'un Yandios nuu ni, ja na kendo va'a ni naa ni. Ni skua'a na jiin ni naa ni nu ni ka ndututu ni, ti suni undi ve'e ni.<sup>21</sup> Ni ka'an na nuu yivi Israel, ti suni nuu yivi inga nación. Ni ka'an na ja na nakani ini da nuu kuachi da, ti na kandixia da ja Jesús kuu Cristo.

<sup>22</sup> Vijna ti ki'in na Jerusalén, chi sia'an kuni maa Espíritu Santo, vasu tu jini na ndoo jna'an na yukan.<sup>23</sup> Taka ñuu ni kii na, ni kachi Espíritu Santo nuu

na ja koo ndo'o koo nene na, chi ki'in na vekaa. <sup>24</sup> Ko tu ndi'i ini na ja yukan. Vasu na ka'ni yivi saña, tundo jitu ini na, chi ndo'o ini ja siuku na jniñu ni ja'a Jesús nuu na, ja na ka'an na jnu'un Yandios. Ti sia'an kuu ja kusii ini na. Kuu xaan ini na ka'an na jnu'un Yandios nava kuu ini maa ya, ja kunda'u ini ya yivi naa i.

<sup>25</sup> Taka nuu kanchuku ni na ni ya'a na, ti ni ka'an na jnu'un ja kuu kivi i nda'a Yandios ti ta'u ya jniñu nuu i. Vijnna ti ndo'o ini na ja tukaa kuni ni saña ñuyivi ja'a. <sup>26</sup> Ja yukan kuu ja na kachi na nuu ni naa ni, ja tu na kuachi na nu tu ni kandixia ni iin yivi jnu'un Jesús. <sup>27</sup> Sia'an na kachi na nuu ni, chi ni ka'an ndaa na taka jniñu ta'u Yandios nuu ni. <sup>28</sup> Ja yukan kuu ja koto ni maa ni naa ni. Suni koto ni ñanijna'an ni ja ni kandixia Cristo, chi Espíritu Santo ni ja'a ya jniñu un nuu ni. Ja Jesús ti nanita'u yo, chi ni jati ya niñi ya ti ni ji'i ya ja yo'o naa yo.

<sup>29</sup> Yukan kuu jnu'un ja'a na nuu ni, ja koto ni maa ni naa ni. Chi nu na ya'a na ki'in na, ti jini na ja kikoyo yivi koto u'u ni'in naa ni, ti kuni xnaa i jnu'un Yandios, ti xnda'u i ni'in naa ni. <sup>30</sup> Iyo sava ni naa ni keja'a xndoña'an, ti xnda'u ni naa ni ja tukaa siin ni jnu'un Yandios. <sup>31</sup> Ja yukan kuu ja kuni na ja koto va'a ni maa ni naa ni. Ti nuku'un ini ni saña ja uni kuiya ni xna'an na nuu ni, ti ni xndaku na nuu ni, chi ndi kivi ndi ñuu ni skua'a na jiin ni, ti tu ni kuxio na nuu ni. Suni ni nde'e na ti'lja kuu ni'in naa ni nuu Yandios. <sup>32</sup> Tendi'i ni'in, mani ñani yo naa yo, ña'an ni naa ni ti na ch'i na ni'l'in nda'a Yandios naa ni. Jnu'un ya ka'an ja kunda'u xaan ini ya. Nu skua'a ni jnu'un ya, ti chindee chitu ya ni'in naa ni ja ni ka kandixia ni ya. Ti kinkoyo ni kunchuku ni jiin Yandios undi andi'i jiin uu ga yivi ni nakaji maa ya. <sup>33</sup> Tu ni ndo'o ini na ja kuu maa na xu'un ni, jiin sa'ma ni. <sup>34</sup> Ka jini va'a ni ja ni sa'a na jniñu jiin nda'a na jiin ja'a na, ti ni ni'in na taka ja nandi'i na. Suni ni ni'in na taka ja ka nandi'i chaa ni kunchuku jiin na. <sup>35</sup> Sia'an ni xna'an na, ja na sa'a yo jniñu, ti chindee yo nuu uu ga yivi nda'u. Nuku'un ini ni jnu'un ni kachi Jesús, na ni ka'an ya: "Kusii ga ini yivi ja chindee ni yi, ti vi'i ga kusii ini maa ni nuu i", ni kachi Jesús —kachi Pablo.

<sup>36</sup> Nu ni ndi'i ni ka'an Pablo sia'an, ni jakunjiti da, ti ni kanajaa da Yandios jiin tendi'i yivi un. <sup>37</sup> Ti tendi'i yivi un ni ka nde'e i. Ni ka nanuu i, ti ni ka teyu'u i nuu Pablo. <sup>38</sup> Ko kukui'ya xaan ini i, chi ni kachi Pablo ja tukaa nakunijna'an i jiin da. Ni ka jan chu'un ichi i da undi nuu barco, ti ni ka kanxia'u i jiin Pablo.

### Kua'an Pablo ñuu Jerusalén

## 21

<sup>1</sup> Nu ni ka kendo ñanijna'an yo, ti kuankoyo ndoo na undi ñuu Cos, ti inga kivi, undi ñuu Rodas. Yukan ti kuankoyo na undi ñuu Pátara. <sup>2</sup> Yukan ni ka kivi na inga barco ja kua'an undi ñuu Fenicia, ti kuankoyo na. <sup>3</sup> Nu kuankoyo na ni ka jini na ñuu Chipre ja ni kendo ichi nda'a sajni ichi kuankoyo na, ti ni ka siin na undi ñuu Siria. Yukan ti ni jakoyo na ñuu Tiro, chi barco un ni xndoo jaku ndajniñu ñuu un. <sup>4</sup> Ti ni ka nanduku na yivi ka kandixia kanchuku ñuu un, ti ni ka kendo na uxia kivi jiin da. Ni ka kachi da nuu Pablo:

—Tu ki'in ni ñuu Jerusalén —ni ka kachi da.

Sia'an ni ka kachi da nuu Pablo, chi sia'an ni ka jini da jiin inijnuni Espíritu Santo. <sup>5</sup> Ti ni jaa kivi kinkoyo tuku na, ti ñanijna'an yo jiin ñasi'i da, jiin se'e kuachi da, ni ka jan chu'un ichi da saña naa na undi yu'u ñuu un. Yukan ti ni ka jakunjiti naa na na yu'u mar un, ti ni ka jikanta'u na nuu Yandios

yukan. <sup>6</sup> Yukan ti kuankoyo na. Ka kivi tuku na barco, ti maa da naa da, ni ka nandeokuñi da ve'e da.

<sup>7</sup> Sia'an ni kekoyo na ñuu Tiro, ti ni ka jakoyo na undi ñuu Tolemaida. Yukan ni ka kanxia'u na jiin yivi ka kandixia jnu'un Jesús un. Ni ka kendo na iin kivi jiin da naa da. <sup>8</sup> Ni kundijin inga kivi ti kuankoyo na. Ni ka jaa na ñuu Cesarea, ti ni ka ja'an na ve'e Felipe, chaa ka'an jnu'un Yandios. Kuu da iin chaa junukuachi ja ni nakaji yivi ka kandixia ñuu Jerusalén, chi na jana'an ni ka nakaji yivi uxia chaa chindejna'an jiin apóstol. Ni ka kendo na jiin da jaku kivi. <sup>9</sup> Felipe un ñava'a da kuun sesi'i da, ja tu ni ka nanda'a ña, ti ñaa un ka ka'an ña jnu'un Yandios. <sup>10</sup> Ni kendo na yukan jaku kivi, ti ni chaa iin chaa ka'an jnu'un Yandios. Vaji da ñuu Judea, ti nani da Agabo. <sup>11</sup> Ti ni chaa da nuu kanchuku na. Ni ndaji da sanchi Pablo, ti ni ju'ni da nda'a maa da, ti ni kachi da nuu Pablo:

—Ni kachi Espíritu Santo ja sia'an ku'ni chaa Israel ja xiin sanchi ja'a, ti nakua'a da chaa nuu yivi inga nación, ni kachi Espíritu Santo —kachi Agabo.

<sup>12</sup> Ni ka jiniso'o na jnu'un ni kachi Agabo, ti ni ka keja'a ka xndaku na nuu Pablo ja tu ki'in da undi ñuu Jerusalén. Suni yivi ka kandixia ñuu Cesarea, ni ka chayika i Pablo. <sup>13</sup> Yukan ti Pablo ni kachi da nuu na naa na:

—Koto nde'e ra naa ra. Koto sakui'ya ra ini ri. Ja iyo tu'va ri nuu ndoo na kuu. Nu yivi Jerusalén na jnii da presu ru'u tundo sa'a, ti iyo va'a vasu na kuúri. Sia'an na kuu ri ja siki Jesús —ni kachi da.

<sup>14</sup> Tu ni ka kundee na kasi na ini da. Yukan kuu ja ni ka sia na da, ti ni ka kachi na:

—Na kuu nava kuni maa Yandios —ni kachi na.

<sup>15</sup> Yukan na ti ka nduku ndee na ni ka stutu na ndajniñu na, ti kuankoyo na undi ñuu Jerusalén. <sup>16</sup> Ti kuankoyo tijni chaa ka kandixia Jesús ñuu Cesarea jiin na. Ñuu Jerusalén yukan, iyo iin chaa nani Mnasón, ja najana'an vaji da ñuu Chipre, ti ja iyo kuiya ni kandixia da Jesús. Ñanijna'an yo ni ka yinda'a da saña ja kendo na ve'e Mnasón.

### *Ja nija Pablo ve'e Jacobo*

<sup>17</sup> Yukan ti ni jakoyo na ñuu Jerusalén. Yivi ka kandixia un, ka kusii xaan ini da ja ni ka jaa na. <sup>18</sup> Ni kundijin inga kivi, ti ka ja'an na jiin Pablo ni ka jande'e na Jacobo. Yukan kanchuku taka chaa ka ndisojniñu ña'nú veñu'un un. <sup>19</sup> Ni ka kanxia'u na jiin tendi'i da, ti Pablo ni keja'a da ka'an da jiin da, ti ni jani da jnu'un taka ja ni sa'a Yandios jiin da. Ni kachi da nasa ni ka ñuso'o yivi inga nación jnu'un Yandios ni ka'an da. <sup>20</sup> Nu ni ka jiniso'o da jnu'un ni ka'an Pablo, ti ni ka keja'a ka ka'an da ja Yandios ja kuñu'nu ga. Yukan ti ni ka kachi da nuu Pablo:

—Nani Pablo, ja jini ni ja yivi Israel, iyo kua'a xaan ja ni ka kandixia vijnna. Ka kuni i ja na siin yivi inga nación jiin jnu'un ni xndoo Moisés. <sup>21</sup> Ni ka kachi yivi un nuu i ja ni'in xna'an nuu yivi Israel ja ka'iin ñuu kanchuku yivi inga nación, ti ni xna'an ni nuu i ja tu siin i jiin jnu'un ni xndoo Moisés. Ka ka'an i ja ni xna'an ni ja se'e kuachi i, tukaa nandi'i seña yiki kuñu yi, ti ni tu siin i jiin jnu'un jana'an. <sup>22</sup> Yukan ti, ¿ndo sa'a na vijnna na naa? Yivi un kuu ndututu i, nu na kuni i ja ni chaa ni. <sup>23</sup> Yukan kuu ja va'a ga sa'a ni nava kachi na nuu ni. Ka iyo kuun jna'an na ja'a. Na siuku dà nava ni jikan da nuu Yandios. <sup>24</sup> Kua'an ni veñu'un ka'nu Israel un jiin da naa da, ti siuku ni jiin da jnu'un jana'an, nava na kendo va'a ni nuu Yandios. Suni cha'u ni xu'un chaa iin rii ja kin soko da nuu Yandios. Yukan ti sete ni ixi xini ni nava ka sal'a da, ti na kuni yivi naa i ja ansu jandaa kuu ja ni xna'an ni ja tu siin yo

jnu'un jana'an. Na kuni i ja siuku ni nava iyo jnu'un ni xndoo Moisés. <sup>25</sup> Jini ni nava ni sa'a na jaan yivi ka kandixia inga nación. Ni ka taji na tutu nuu i ti ni ka kachi na nuu i nava ka ndo'o ini na. Ni kachi na ja tukaa kají i kuñu kuiti ja ni ka soko yivi nuu santu ka nchañu'un i. Ni tu kuu kají i kuñu kuiti nu tu ni jati ndi'i niñi ti. Ni tu kuu kunchaka iin ñasili inga chaa nuu yii ña —sia'an ni ka kachi da nuu Pablo.

### *Ni ka jni da presu Pablo ini veñu'un ka'nu Israel*

<sup>26</sup> Yukan ti kua'an Pablo jiin ndi kuun chaa un, ti inga kivi ni ka siuku da nava ka sa'a da naa da, ti ni kivi da ini veñu'un Israel un, ti ni ka kasjnu'un da nuu sutu Israel un na kivi sa siuku jnu'un ni ka ka'an da. Ni ka'an Pablo nuu sutu un na kivi nasoko da naa da nuu Yandios.

<sup>27</sup> Ko kuan jinu uxia kivi ka siuku da jnu'un un. Ka'iin tijni chaa Israel ini veñu'un un, chaa ñuu Asia. Ni ka jini da nuu Pablo ini veñu'un un, ti ni ka keja'a ka ska'an da tendi'i yivi un. Ti ni ka jni da Pablo, <sup>28</sup> ti ni ka keja'a ka kanajjiin da, ti ka ka'an da:

—¡Ni'in chaa Israel, chindee ni saña naa na! Ja'a kuu chaa yaku ni tu'u ñuyivi, ti xna'an da yivi ja yo'o, ansu chaa va'a ka kuu yo, ti jnu'un yo tukaa kaxan, ja ni tu kaxan veñu'un yo ja'a. Vijna skivi da ini veñu'un ja'a yivi inga nación, ti tu ja'a da ja yiu'nun veñu'un ii ja'a —ni ka kachi da.

<sup>29</sup> Sia'an ni ka ka'an da, chi ni ka ndo'o ini da ja ni ja'an Pablo jiin iin chaa inga nación ini veñu'un un, ti tu ka jajna'an ini da ja kivi yivi inga nación ini veñu'un da. Chaa un ni kuu Trófimo, iin chaa inga nación, chaa ñuu Efeso, ja ni yaku da jiin Pablo ñuu Jerusalén, ko tu ni kivi da ini veñu'un un.

<sup>30</sup> Yukan ti ni ka ndondaa ni tu'u yivi ñuu Jerusalén, ti ni ka jinu da kuankoyo i undi veñu'un un. Ni ka jni da Pablo, ti ni ka ñu'un da da undi yux'e'e veñu'un un, ti ni ka nakasi da yux'e'e veñu'un un. <sup>31</sup> Ka kuni ka'ni da chaa, ti ni jaa jnu'un un nuu chaa yinda'a soldado un, tendi'i te tu'u yivi ñuu Jerusalén ni ka ndondaa i. <sup>32</sup> Ti chaa un ni na stutu da taka capitán da, jiin tendi'i soldado da, ti ka ja'a da corri kuankoyo da nuu ka'iin yivi un. Nu ni jini yivi un ja vají chaa un jiin soldado da, ti tukaa ni ka kani da siki Pablo. <sup>33</sup> Yukan ti ni jaa chaa un nuu kandichi Pablo, ti ni kachi da ja na jni da presu Pablo, ti na ku'ni da chaa jiin uu cadena. Yukan na ti ni jikajnu'un chaa un nuu Pablo na chaa kuu da, ti ndoo ni sa'a da. <sup>34</sup> Yukan ti yivi un ni ka kanajjiin iin jnu'un, ti uu ga ni ka ka'an inga jnu'un. Ti chaa un tu ni chaku ini na jnu'un ka kanajjiin yivi un, chi so ka kuvaai ii. Yukan ti ni ta'u da jniñu ja na ki'in da jiin Pablo undi nuu cuartel.

<sup>35</sup> Ni ka jakoyo da escalera yux'e'e cuartel un, ti soldado un ni ka kaki'i da Pablo, chi undi ka chinda'a jna'an yivi un ja ka kuiti ini i. <sup>36</sup> Chi tendi'i yivi vekoyo ichi jata, ka kanajjiin:

—¡Na kuú da! —kachi na.

### *Nama Pablo maa da nuu yivi*

<sup>37</sup> Ja kua'an skivi da Pablo ini cuartel, ti ni kachi Pablo jiin chaa un:

—Kuu ka'an na jaku jnu'un nuu ni xi tuu —ni kachi Pablo jiin chaa un:

—¿Kuu ka'an ni sa'an griego nu? <sup>38</sup> ¿Nusa ti ansu ni'in kuu iin chaa ñuu Egipto ja na jana'an ni ka kana jiin gobieno, ti ni yinda'a ni kuun mil yivi undi nuu ñu'un te'e un, ti ni ka ja'ní da yivi nu? —ni kachi da.

<sup>39</sup> Yukan na ti ni kachi Pablo jiin da:

—Ansu chaa yukan kuu na, chi chaa Israel kuu na. Kuu na iin chaa ñuu Tarso, iin ñuu ka'nú ja yi'i jiin ñuu Cilicia. Ko kua'a ni jnu'un ja na ka'an na nuu yivi ja'a —ni kachi da.

**40** Ti chaa un ni ja'a da jnu'un ni ka'an Pablo, ni jakuiñi da nuu escalera un, ti ni sa'a da seña jiin nda'a da ja na kasi yu'u yivi un. Nu ni ka jasi yu'u yivi un, ti ni keja'a ka'an Pablo. Ni ka'an da yu'u yivi Israel, ti ni kachi da:

## 22

**1**—Ni'in chaa ña'nua naa ni jiin ñanajna'an yo, kunso'o ni na ka'an na nuu ni vijnna ja tundo ni sa'a na, ni tundo tau na —ni kachi da.

**2** Ni ka jiniso'o yivi un ja ni ka'an Pablo yu'u yivi Israel, ti ni ka jasi yu'u ga da. Sia'an ti Pablo ni kachi da jiin da naa da:

**3**—Saña kuu chaa Israel. Ni kaku na ñuu Tarso, ja kuu iin ndañuu Cilicia, ko ni ja'nu na ñuu Jerusalén ja'a. Ni skua'a na jiin chaa kuña'nu ga nani Gamaliel. Ni xna'an ndaa da saña taka jnu'un najana'an. Ti ndo'o ini ni ja ka siuku ndaa ni nuu Yandios nava ka sa'a ni undi vijnna. **4** Kivi jña suni ni kani na yivi ka siin jiin jnu'un Jesús, ti ni ndo'o ini na ja ka'ni na yivi un. Ni jniñ na yivi un ja na ki'in i vekaa. Sia'an ni sa'a na jiin chaa, suni jiin ñasi'i. **5** Sutu kuña'nu ga un, jiin taka chaa ña'nua yivi Israel, na kani da jnu'un ja ni sa'a na sia'an. Ni ka ja'a da tutu nuu na, ti ni yinda'a na nuu jna'an yo kanchuku ñuu Damasco. Yukan ni ka ja'an nunduku na chaa ka kandixia jnu'un Jesús, ja na kii da presu. Ti kundikun da kii da undi ñuu ja'a, ja na kondo'o da —ni kachi Pablo.

### *Kachi Pablo nama ni kandixia da Jesús*

**6** Siin Pablo ka'an da nuu yivi un, ti ni kachi da:

—Kua'an na ichi, ti yajni jaa na ñuu Damasco, ja ni kuu yajni koxiuu. Sanaa ni ga ti ni ndinchaa iin nduva undi andiv'i nuu na. **7** Ni jinu na nuu ñu'un, ti ni jiniso'o na iin ndusu ni ka'an jiin na, ti ni kachi: “Ro'o Saulo, ndoo ka kanaa ra jiin ri”, ni kachi ndusu un. **8** Yukan ti ni jikajnu'un na: “Taa, ¿nau ni'in ka'an”? ni kachi na. Ti ni kachi ndusu un jiin na: “Maa ri kuu Jesús, chaa ñuu Nazaret, ti ro'o kuu ja ka kanaa jiin ri”, ni kachi Jesús. **9** Chaa kuankoyo jiin na, ni ka keja'a ka yu'u da ja ni jini da nduva un, ko tu ni ka jiniso'o da ja ni ka'an ndusu un jiin na. **10** Ti ni jikajnu'un tuku na Jesús: “Nusa ti ¿ndoo kuni ni ja sa'a na, taa”? ni kachi na. Ti ni kachi Jesús jiin na: “Ndokuñi, siin ichi kua'an ra, ti nu ni jaa ra Damasco, ti yivi ñuu yukan kachi nuu ra ndoo sa'a ra”, ni kachi ri ya. **11** Ti ni kuu kuaa na, tukaa ni kundijin nduchi na ja ni ndinchaa nduva un nuu na. Yukan ti chaa kuankoyo jiin na, ni ka jni da nda'a na, ti kua'an na jiin da undi Damasco.

**12** Yukan nchaa iin chaa nani Ananías. Ni nchañu'un da Yandios jiin ley ni xndoo Moisés. Ti taka chaa Israel kanchuku un ni ka ka'an da ja kuu da iin chaa va'a. **13** Ni jaa Ananías nuu kancha na, ti ni kachi da jiin na: “Ñani Saulo, na nde'e tuku”, ni kachi da. Ti hora jña ni ndundijin tuku nduchi na ti ni nakuni na Ananías. **14** Ni kachi tuku da nuu na: “Yivi ña'nú yo na jana'an ni ka nchañu'un da Yandios, ti Yandios un ni nakaji ya maa ra ja sa'a ra rjniñu nava kuni maa ya. Ja ni jini ra Jesús, maa Se'e Yandios. Ja ni jiniso'o ra jnu'un ni ka'an ya jiin ra. **15** Ja yukan kuu ja vijnna ti ka'an ra jnu'un ya ni tu'u ñuyivi, ti kani ra jun'un taka ja ni jini ra, ti jiin ja ni jiniso'o ra. **16** Vijnna, ko tu kukuee ra, ndokuiñi ra, ti kuanducha ra. Kakanta'u ra nuu Jesús, ti na kenchaa ya kuachi ra”, ni kachi Ananías —kachi Pablo.

### *Pablo jani da jnu'un nasa kua'an da nuu yivi inga nación*

**17** Siin ka'an Pablo, ti ni kachi da:

—Ni nandeokuñi na Jerusalén, ti ni ja'an na ini veñu'un ja na kanajaa na Yandios, ti ni naxnal'an ya nuu na. **18** Ni jini na maa Jesús, ti ni kachi ya jiin na:

“Nduku ndee ti kuan kee yachi ñuu Jerusalén ja'a, chi tu sa'a yivi ja'a jnu'un ka'an ra ja ru'u”, ni kachi ya. <sup>19</sup> Yukan na ti ni kachi na jiin ya: “Yivi un ka jini i ja ja'an na taka veñu'un nuu ka nchañu'un yivi Israel, ti ni jni na presu taka yivi ka kandixia maa ni, ti kua'an na jiin i vekaa, ti ja'a na tau i. <sup>20</sup> Suni ka jini i ja ni kundichi na jiin chaa ni ka ja'nii Esteban, chaa ni ka'an jnu'un ni. Ti saña ni ndito na manga chaa ni ka ja'nii Esteban”, ni kachi na jiin ya. <sup>21</sup> Ko ni kachi ya jiin na: “Taji ri ro'o ti kua'an jika nuu kanchuku yivi inga nación.” Sia'an ni ka'an Jesús jiin na —kachi Pablo nuu yivi un.

### *Ni kendo Pablo nda'a chaa yinda'a a jniñu*

<sup>22</sup> Undi ja'a ni ka ñuso'o yivi jnu'un ni ka'an Pablo. Nu ni kachi Pablo ja ki'in da ñinga nación, ti ni keja'ka kanajii yivi un, ti ni ka kachi i:  
—Na kuú chaa jña, tukaa kuni yo ja kuchaku da! —ni ka kachi i.

<sup>23</sup> Ko vanuxia ka kanajii yivi un, ti ka skanda i sa'ma ka yindii i nuu tachi, ti ka joso i ñu'un yuchi nuu tachi un, chi ka kuiti xaan ini i. <sup>24</sup> Yukan ti chaa un ni ta'u da jniñu nuu soldado un ja na naxndivi da Pablo ini cuartel. Ti suni ni ta'u da jniñu ja na kani da yo'o ñii chii Pablo, ja na kachi Pablo ndoo ka kuvaan yivi siki da. <sup>25</sup> Ko nu ni ka ju'nii soldado un Pablo jiin ñi, ja kani da chaa, ti ni kachi Pablo jiin capitán kande un:

—Ka'an ley yo naa yo ja tu kuu kani ni saña, chi suni maa na kuu ñin chaa Roma nu tu ja'lí xndichi ni saña —ni kachi da.

<sup>26</sup> Ni jiniso'o capitán jnu'un ni ka'an Pablo, ti kua'an da, ti ni kachi da nuu chaa un:

—Va'a nde'e ni jniñu sa'a ni, chi chaa jña kuu ñin chaa Roma —ni kachi da.

<sup>27</sup> Yukan na ti ni tu'va chaa un nuu kande Pablo, ti ni jikajnu'un da chaa:  
—Kachi ndaa nuu ri nu ndaa ja kuu ra ñin chaa Roma —ni kachi da.

Ti ni kachi Pablo nuu da:

—Sia'an ndixia iyo —ni kachi da.

<sup>28</sup> Ti ni kachi chaa un nuu da:

—Ru'u, kua'a xu'un ni cha'u ri, ti ni kendo ri kuu ri chaa Roma —ni kachi da.

Ti Pablo ni kachi da:

—Ko saña chi kuu na chaa Roma, chi yukan ni kaku na —ni kachi da.

<sup>29</sup> Yukan ti soldado ja ka kuni kani chii Pablo, ni ka kuxio da kua'an da. Ti undi chaa un ni yu'u nu ni jini ja chaa Roma kuu Pablo, ti ni yu'u da, chi ja ni ju'nii da Pablo. Ti tu kuu sa'a da sia'an jiin ñin chaa Roma.

### *Ni kundichi Pablo nuu junta chaa ka kuñu'un yivi Israel*

<sup>30</sup> Inga kivi, ti chaa un, kuni da ja na kuni ndaa da na jnu'un kuu ja ka kankuachi chaa Israel siki Pablo. Ti chaa un ni ta'u da jniñu ja na ndututu taka sutu ka kuñu'nii nación Israel jiin taka chaa ka kuñu'nii nuu junta Israel. Ni ndají da Pablo, ti ni keni'in da chaa nuu junta un.

## 23

<sup>1</sup> Yukan ti ni nde'e Pablo nuu yivi ni ka ndututu nuu junta un, ti ni ka'an da:

—Ni'in chaa ka kuñu'nii naa ni, undi vijna kukuee chaku na, ja kuu na ñin chaa va'a nuu Yandios —ni kachi da.

<sup>2</sup> Yukan ti Ananías, ja kuu da sutu kuñu'nii ga, ni kachi da jiin chaa ka'iin yajni xiin Pablo ja na kani da ñin jiki yu'u da. <sup>3</sup> Ko Pablo ni kachi da:

—Kuu ni ñin chaa ñaa xini. Yandios na xndichi ya maa ni. Nukoo ni ja'a ja xndichi ni saña nava ka'an ley Yandios. Ni ta'u ni jniñu ja na kani da saña, ko ansu sia'an ka'an ley Yandios —ni kachi da.

<sup>4</sup> Ti yivi kanchuku yukan ni ka kachi nuu Pablo:  
—¿Sia'an ka'an ndeva'a ni nuu sutu kuña'nu ga ja junukuachi nuu Yandios nu? —ni ka kachi i.

<sup>5</sup> Ti Pablo ni kachi:  
—Ni'in chaa ka kuña'nu naa ni, jini na ja ka'an nuu tutu Yandios ja tu kuu ka'an ndeva'a yo nuu chaa ta'u jniñu nuu yo, ko tu ni jini na ja kuu da sutu kuña'nu ga —ni kachi da.

<sup>6</sup> Yukan na ti ni jini Pablo ja uu chaa ka'iin nuu junta un, sava da ka yi'i da jiin chaa saduceo, ti uu ga da ka yi'i da jiin chaa fariseo, ti tu ka iyo iiñ nuu ini da. Ti ni ka'an jaa ga Pablo nuu da:

—¡Ni'in ñani naa ni, kuu na iiñ chaa fariseo! Tata na ni kuu fariseo suni. Ka xndichi ni saña, chi kandixia na ja ka nandoto ndiyi —ni kachi da.

<sup>7</sup> Ti nu ni ka'an da sia'an, ti ni ka keja'a ka ndajnu'un chaa saduceo jiin chaa fariseo, ti tu ni kejna'an jnu'un ni ka ka'an da. <sup>8</sup> Chaa saduceo ka ka'an da ja tu ka nandoto ndiyi, ti ni tu iyo ángel, ni inga tajnu Yandios ja kii andivi, ni tu iyo espíritu, ni ka kachi da. Ti chaa fariseo, ka kandixia da tendi'i un. Ja yukan tu ni kejna'an jnu'un ni ka ka'an da. <sup>9</sup> Ti tendi'i yivi un ni ka kanajin. Suni ka'iin tijni chaa ka xna'an ley Israel ja suni yi'i da jiin chaa partido fariseo. Ni ka ndokuiñi da ti ni ka ka'an da ja'a Pablo ja ka kuni nama da chaa:

—Chaa ja'a tu nau iiñ kuachi ni sa'a da, ti nu iiñ ángel xi iiñ espíritu ni ka'an jiin da, ti koto ka'an yo siki Yandios —ni ka kachi da.

<sup>10</sup> Ni keja'a ka ndokaña yivi un jiin Pablo ja ka ka'an maa ni ga. Yukan ti chaa un ni yu'u da ja sakuchi yivi un Pablo, ti ni ta'u da jniñu nuu soldado un ja na jnii da Pablo. Ti sia'an ni ka nama da Pablo nuu yivi kua'a un, ti kuano'on da undi nuu cuartel.

<sup>11</sup> Ti jakuua inga kivi, ni ndenda Jesús nuu Pablo, ti ni kachi ya:  
—Ndee sa'a ini ra Pablo. Kin ka'an ra jnu'un ri undi Roma, nanu ka'an ra jnu'un ri fluu Jerusalén ja'a —ni kachi ya.

### Ka ndajnu'un da ja ka'ní da Pablo

<sup>12</sup> Ni kundijin inga kivi, ti sava chaa Israel ni ka ndajnu'un da ja ka'ní da Pablo, ti ni kachi da:

—Siuku yo jnu'un ka ndajnu'un yo. Ti ni tu kaji yo, ni tu ko'o yo undi nu tu ka'ní yo Pablo —ni ka kachi da.

<sup>13</sup> Iyo vi'i ga uu xiko chaa un naa da, ti tendi'i da ni ka ndu iiñ nuu ini. <sup>14</sup> Ni ka ja'an da nuu sutu kuña'nu ga jiin chaa ka kuña'nu Israel, ti ni ka kachi da:

—Ni ka ndajnu'un na ja tu kaji kuiti na naa na undi nu tu ka'ní na Pablo. <sup>15</sup> Ni'in naa ni jin un uu ga chaa ka kuña'nu nuu junta ja'a, ka'an ni jiin chaa un na keni'in da Pablo jaña'an ijña nuu ka ndututu ja'a, ja nduku ni nasa xndichi ni da. Ti Pablo tu chaa da ja'a, chi ichi un na ka'ní na da —ni ka kachi da.

<sup>16</sup> Yukan ti iiñ sajin Pablo ni jiniso'o da nava ka ndajnu'un chaa un ja ka'ní da Pablo, ti ni jan kasjnu'un da nuu Pablo undi nuu cuartel un. <sup>17</sup> Yukan na ti ni kana Pablo iiñ chaa kuu capitán nuu soldado un, ti ni kachi da:

—Kua'an jiin chaa lulu ja'a nuu chaa un, chi iyo iiñ jnu'un ka'an da jiin da —ni kachi da.

<sup>18</sup> Ti kua'an capitán un jiin chaa lulu un undi nuu chaa un, ti ni kachi capitán un nuu chaa:

—Jini ni Pablo, chaa kuu presu kande vekaa un, ni kachi da ja na kii na jiin chaa lulu ja'a nuu ni, chi iyo iiñ jnu'un ka'an da jiin ni —ni kachi da.

<sup>19</sup> Ti chaa un ni jnii da nda'a chaa lulu un, ti kua'an siin da, ti ni jikajnu'un da chaa lulu un:

—¿Ndoo kuni ka'an ra jiin ri? —kachi da.

**20** Ti ni kachi chaa lulu un jiin da:

—Chaa Israel, ni ka ndu *iin* nuu ini da ja kakan da nuu ni, ti kunda'a ni Pablo ijña undi nuu ka ndututu chaa ka kuña'nu un. Ti kachi da ja na xndichi va'a da Pablo, ko tu ndixia da naa da. **21** Ti tu kandixia ni jnu'un ka'an da, chi iyo vi'i ga uu xiko chaa ka yisa'yí ja ka'ni da chaa. Ti ni ka ndu *iin* nuu ini da ja tu kaji da, ni tu ko'o da undi nu tu ka'ni da Pablo. Ti vijna ka ndatu da ja kua'a ni jnu'un nuu da ja na keni'in ni Pablo nuu chaa ka kuña'nu un —ni kachi da.

**22** Yukan ti ni kachi chaa un:

—Tu kani ra jnu'un nuu ni *iin* yívi ja sia'an ni ka ndajnu'un yo —ni kachi da.

Ti ni na chu'un ichi da chaa lulu un kua'an da.

### *Ka yinda'a da Pablo nuu gobernador Félix*

**23** Yukan na ti chaa yinda'a soldado un ni kana da uu chaa kuu capitán da, ti ni keja'a kachi da nuu da:

—Satul'va ra ndajniñu ra naa ra, chi kinko'o ra ñuu Cesarea kaa *iin* jakuaa vijna. Uu ciento soldado kaka ja'a. Uni xiko uxi chaa ki'in jiin kuayu. Uu ciento chaa kinkoyo jiin lanza. **24** Suni ta'u ra jniñu ja na kotu'va *iin* kuayu koso Pablo. Ti sia'an na kejiyo va'a da undi nuu Félix, chaa ta'u jniñu ñuu Cesarea —ni kachi da jiin capitán un.

**25** Chaa yinda'a un ni taji da *iin* tutu nuu gobernador Félix, ti sia'an ni kachi da nuu da: **26** “Saña, Claudio Lisias, kanxia'u na jiin ni'in, chaa ña'nu Félix.

**27** Chaa Israel, ni ka jniñi da presu chaa ja'a. Kuni ka'ni da chaa, ti ni jaa na jiin soldado na nuu ka'iin yívi un. Ni nama na da, chi ni jini na ja kuu da *iin* chaa yí'i ñuu Roma. **28** Ni nanduku jnu'un ndoo ka kankuachi yívi ja'a da. Ti yukan ni yinda'a na da nuu ka ndututu chaa ña'nu Israel. **29** Yukan ti ni jini na ja ka kankuachi da nava ka kuni maa da naa da, chi Pablo tu ni ja'a da ja yiñu'un ley Israel. Ko tu kuu ja ka'ni da chaa, ni tu kuu ja ki'in da vekaa. **30** Sia'an ni kuu ti ni jiniso'o na ja ka ndajnu'un chaa Israel ja ka'ni da Pablo. Ja yukan kuu ja ni taji na da undi nuu ni. Suni ni kachi na jiin chaa ka kankuachi ja'a da ja na kachi da nuu ni nuu ndoo ni sa'a chaa ja'a.” Sia'an ni chiso da nuu tutu kua'an nuu Félix.

**31** Yukan ti soldado un, ni ka jandatu da nava ni ta'u jniñu nuu da, ti kuankoyo da jiin Pablo jakuaa jña undi Antípatris. **32** Ni kundijin *inga* kivi, ti Pablo kua'an da jiin soldado ka yoso da kuayu un undi Cesarea, ti uu ga soldado ka jilka ja'a un ni ka nandeokuñi undi nuu cuartel ñuu Jerusalén. **33** Sia'an ni kuu, ti Pablo ni jaa da ñuu Cesarea jiin soldado un, ti soldado un ni ka nakua'a da tutu nuu gobernador Félix, chaa ta'u jniñu nuu ñuu yukan. Ti suni ni ka nakua'a da Pablo nuu gobernador un. **34** Chaa kuña'nu un ni ka'u da tutu un, ti ni jikajnu'un da Pablo:

—¿Nasa nani ñuu ra? —kachi da jiin Pablo.

Ti Pablo ni kachi da:

—Chaa ñuu Cilicia kuu na —kachi da.

**35** Sia'an ni kuu, ti chaa kuña'nu un ni kachi da nuu Pablo:

—Kunso'o ri jnu'un ka'an ra, ko undi na chakoyo chaa ka kankuachi ja'a ra —ni kachi da.

Ti ni ta'u da jniñu ja na kundito soldado un Pablo ini palacio nuu ni kuncha Herodes.

### *Pablo nama da maa da nuu Félix*

## 24

<sup>1</sup> Ni ya'a u'un kivi, ti Ananías, iin sutu kuña'nu ga, ni jaa ñuu Cesarea jiin sava chaa ña'nu Israel. Suni ni chaa iin chaa nani Tértulo, ti jniñu da kuu ja ka'an da ja'a inga yívi nuu juzgado, ti iyo iin nuu ini da jiin chaa ka kankuachi ja'a Pablo. Ni kachi da nuu Félix ndoo ni sa'a Pablo. <sup>2</sup> Sia'an ni kuu, ti Félix ni ta'u da jniñu ja na keni'in soldado un Pablo. Yukan ti Tértulo, ni keja'a kankuachi da ja'a Pablo nuu Félix, ti ni kachi da:

—Kuta'u yo nuu ni, ni'in chaa ña'nu, ni kukuee ti ni kuu kanchuku yo. Chi jini va'a ni ja kuan kuña'nu taka ñuu yo. <sup>3</sup> Ti tendí'i saña naa na ka jikanta'u na nuu Yandios ja kuu maa ni, ti ka nakua'a na ja yiñu'un nuu ni, chaa kuña'nu Félix. <sup>4</sup> Ti kuee sa'a ini ni, ti kunso'o ni jnu'un ka'an na, tu kukuee yo, chi ndee kuee ini ni. <sup>5</sup> Ni ka jini na ja chaa ja'a tundo kuu kuiti da. Ni tu'u ñuyiví ni ska'an da yívi Israel. Kuu da iin ni xini jiin ja ni nani Jesú, chaa ñuu Nazaret. <sup>6</sup> Ti undi ni kuni kusikinchaa da veñu'un ka'nu na, ti ni ka jniñi na da presu, ti ni ka kankuachi na ja'a da nava iyo ley na naa na. <sup>7</sup> Ti chaa yinda'a soldado ñuu Lisias ni kivi da, ti ni kencha da Pablo nuu na naa na. <sup>8</sup> Chaa un ni ta'u jniñu ja na kii kankuachi na ja'a Pablo undi nuu ni. Kuu kajnu'un ni da, ti kuni ni na siki kankuachi na ja'a da —sia'an ni ka'an Tértulo.

<sup>9</sup> Ti suni sia'an ni ka ka'an tendí'i chaa Israel un ja sia'an ni kuu ndixia nava ka'an Tértulo. <sup>10</sup> Yukan na ti chaa kuu gobernador un, ni sa'a da seña nuu Pablo ja na ka'an da, ti Pablo ni ka'an da:

—Kusii ini na, chi ni'in kunso'o ni jnu'un ka'an na, chi jini na ja tijni kuiya ni ta'u ni jniñu nuu ni tu'u ñuu ja'a. <sup>11</sup> Ti ni'in kuu nduku jnu'un ni, ti kuni ni ja sa uxi uu kivi ni jaa na Jerusalén, ja na chiñu'un na Yandios. <sup>12</sup> Tu ni sa'a na ni iin jniñu ja tu iyo va'a ini veñu'un ka'nu un, ni ini veñu'un kuachi, nuu suni ni ka nchañu'un yívi Israel, ni inga ñuu un. <sup>13</sup> Yívi ja'a tu kachi da nuu ni nu ndoo ni sa'a na ja kankuachi da ja'a na vijna.

<sup>14</sup> Ja'a kuu jnu'un ka'an na jiin ni. Nchañu'un na Yandios. Ti Yandios un kuu yaa ní ka nchañu'un yívi jana'an. Kandixia na taka jnu'un ni chiso Moisés ja kuu ley yo. Suni kandixia na taka jnu'un ni chiso chaa ni ka ka'an ja kuu Yandios. Nchañu'un na Yandios nava ni kachi Jesú, ko ka ka'an chaa Israel ja'a ja tu va'a ichi ni xna'an Jesú. <sup>15</sup> Suni kandixia na ja nandoto ndiyi nanu ka kandixia chaa Israel ja'a. Yívi va'a nuu Yandios, nandoto i ti yívi tu ni ni sa'a jniñu va'a nuu Yandios, suni nandoto i. <sup>16</sup> Yukan kuu ja niní nduku na ichi va'a, chi kukuee kancha na ja kuu nuu Yandios, ti suni ja kuu nuu yívi naa i.

<sup>17</sup> Tijni kuiya ni yaku na inga nación, ti ni nandeokuñi na ñuu Jerusalén ja na nakua'a na xu'un nuu yívi nda'u, ja ni ka kekoo yívi uu ga ñuu un. <sup>18</sup> Kivi ni kunde na Jerusalén, ni ja'an na ini veñu'un ka'nu un, ja na siuku na nava ka sa'a ni. Tu ni ka'iin kua'a yívi, ni tu ni ska'an na yívi un. Ti ni kande na ini veñu'un un, ti ni ka jini sava chaa Israel ka yí'i ñuu Asia saña. <sup>19</sup> Ti na kachi na ja chaa yukan kuu ja kikoyo undi ja'a, ja na kankuachi da ja'a na, nu ndo'o ini da ja ni sa'a na kuachi. <sup>20</sup> Ti tu ni chakoyo ni iin da. Ja yukan kuu ja chaa ja'a na kachi da nuu nau iin kuachi ni'in ni sa'a na, ti ja ni ka xndichi da saña na ni kundichi na nuu ka ndututu ka'nu chaa Israel. <sup>21</sup> Tu ni ka ni'in da ni iin kuachi siki na, ko nu suu ja ni ka'an jaa na nuu da naa da nu junta un, ti kachi na: "Vijna ti ka chakuachi ni saña, chi kandixia na ja nandoto ndiyi." Sia'an ni kachi na nuu da —kachi Pablo.

<sup>22</sup> Nu ni jini va'a Félix nava ka kandixia yívi Jesú. Yukan na ti ni kachi da jiin chaa un naa da:

—Iyo va'a sia'an ni, ti kuu kinkoyo ra vijna. Xnakan na chaa yinda'a soldado Lisiás, ti sa na nde'e yo nasa sa'a yo jiin jniñu ja'a —ni kachi da.

<sup>23</sup> Yukan na ti Félix, ni ta'u da jniñu nuu capitán un ja na kundito da Pablo, ti na kuu kee da ti'lí, ti na kuu kívikoyo sava chaa ka kuu jna'an Pablo, ja na kin nde'e da chaa.

<sup>24</sup> Nu ni ya'a tijni kívi, ti ni jaa tuku Félix jiin ñiasi'i da Drusila. Ña'an yukan kuu iin ñiaa ñiuu Israel. Yukan ti ni kana da Pablo. Ni ñuso'o Félix jnu'un ni ka'an Pablo nava ka kandixia yívi jnu'un Jesú. <sup>25</sup> Ni ka'an Pablo ja na kaka ndaa yo nuu Yandios. Suni ni kachi da ja na koto va'a yo maa yo ja tu sa'a yo jniñu ja tu va'a. Suni ni kachi da ja jaa iin kívi xndichi' Yandios ñuyiví. Sia'an ni kachi Pablo nuu da. Yukan na ti ni yu'u Félix, ti ni kachi da jiin Pablo:

—Kua'an va'a ga, ti iin kívi kukuee sa na ka'an tuku yo —ni kachi da.

<sup>26</sup> Félix kuni da ja na kua'a Pablo xu'un nuu da ti sia da chaa. Yukan kuu ja tijni jinu kana da Pablo ja na ka'an da jiin da. <sup>27</sup> Sia'an ni kuu undi uu kuiya, ti Félix ni kee da ja ni kuu da gobernador. Kuni da ja na kendo va'a da jiin chaa Israel, ti ni xndoo da presu Pablo. Sia'an ni kuu, ti ni kívi Porcio Festo kuu da gobernador ñuu un.

### Kandichi Pablo nuu Festo

## 25

<sup>1</sup> Yukan na ti ni jaa Festo, ni nukoo da kuu da gobernador. Ni kuu uni kívi, ni kee da Cesarea ti kua'an da Jerusalén. <sup>2</sup> Nu ni jaa da yukan, ti sutu ka kuña'nu un jiin chaa ka kuña'nu Israel, ni ka keja'a da ka ka'an da jiin Festo. Chaa Israel un ni ka kankuachi da ja'a Pablo. <sup>3</sup> Ni ka ka'an nda'u da nuu Festo ja na nataji da Pablo ñuu Jerusalén. Sia'an ni ka ndo'o ini chaa Israel, chi ka kuni da ja kinsa'yí da ichi un, ti ka'ní da Pablo. <sup>4</sup> Festo ni kachi da jiin chaa Israel un:

—Na kendo Pablo presu ñuu Cesarea. Jaku ni kívi ti nandeokuñi tuku na yukan. <sup>5</sup> Yukan kuu ja ni'in chaa ka kuña'nu kíkoyo ni jiin na ñuu Cesarea, ti nuu iyo iin kuachi ni sa'a chaa un, kuu kankuachi ni ja'a da —ni kachi Festo.

<sup>6</sup> Ti Festo ni kendo da yajni uxi uu ga kívi ñuu Jerusalén, ti sa ni nandeokuñi da Cesarea. Ni kundijin inga kívi ti kua'an da ve'e sticia. Ni ta'u da jniñu ja na kinchaka soldado un Pablo nuu da. <sup>7</sup> Yukan ti ni jaa Pablo nuu ni nukoo da. Ni ka'iin suni chaa Israel ja ni chaa undi ñuu Jerusalén, ti chaa Israel un ni ka tu'va da nuu Pablo. Kua'a xaan kuachi ni ka chaa da siki Pablo, ko tu ni ka ni'in da jnu'un ka'an da ja kankuachi ja'a Pablo. <sup>8</sup> Yukan ti Pablo ni kachi da jiin Festo:

—Ni iin kuachi tundo ni sa'a na. Tu ni sa'a na iin kuachi nuu ley Israel, ni tu ni sa'a na ni iin kuachi nuu veñu'un ka'nú da, suni tu ni sa'a na ni iin kuachi nuu César, chaa kuña'nu ga ñuu Roma —ni kachi da.

<sup>9</sup> Festo kuni da ja na kendo va'a da jiin chaa Israel un, ti ni jikajnu'un da Pablo:

—¿Kuni ra no'on ra Jerusalén, ti yukan na kachi ri nasa sa'a yo nu? —ni kachi da.

<sup>10</sup> Ti ni ka'an Pablo:

—Kandichi na nuu ni'in chaa kuña'nu, ja ni ta'u jniñu nuu ni undi Roma, ti ja'a kachi ni nasa sa'a yo, ti jini va'a ni ja saña tu ni sa'a na ni iin kuachi nuu chaa Israel. <sup>11</sup> Tu nduku na ja na keta'u na, chi jini na ja tu na kuachi ni sa'a na ja na kuu na. Ti tu yu'u na ja kuú na. Tu kuu nakua'a ni saña nuu yívi Israel un, chi tu iyo ndaa jnu'un ka kankuachi da siki na. Jikanta'u na nuu ni ja maa César, chaa kuña'nu ga un, na xndichi da saña —ni kachi da.

<sup>12</sup> Sia'an ni kuu, ti Festo ni keja'a da ka ndajnu'un da jiin chaa ka'iin jniñu jiin da un. Yukan ti ni kachi da nuu Pablo:

—Jikanta'u ra ja na xndichi maa César ro'o, chi maa da kuña'nu ga, ti yukan ki'in ra —ni kachi da.

### *Kandichi Pablo nuu inga chaa kuña'nu*

<sup>13</sup> Nu ni ya'a tijni kivi, ti ni jaa chaa kuña'nu Agripa jiin ñasi'i da Berenice ñuu Cesarea ja kanxia'u da jiin Festo. <sup>14</sup> Ni ka kendo da yukan tijni kivi. Ti Festo ni jani da jnu'un Pablo nuu Agripa, ti ni kachi da:

—Iyo iin chaa kande vekaa ja'a, ja ni xndoo Félix na ni kee da jniñu da. <sup>15</sup> Na ni ja'an na Jerusalén, ti taka sutu Israel ka kuña'nu un jiin chaa ka kuña'nu Israel, ni ka ndakuni'in da kuachi ni sa'a Pablo nuu da. Ka kuni da ja na ka'nii na chaa un. Ti ni kachi na jiin da naa da ja ka ndisojníñu na nuu ñuu Roma, ti Roma ta'u jniñu nuu ni ñuyivi, ti ka jandatu yo ley un. <sup>16</sup> Yukan kuu ja tu kuu xndichi yo yivi nu tu jini da nau ja kankuachi ja'a i, ni tu kuu ja nama da maa da. <sup>17</sup> Sia'an ni kuu, ti chaa Israel un ni kikoyo da undi ja'a. Ti tu ni xnaa na kivi na, chi inga kivi ni ja'an na ve'e sticia na, ti ni ta'u na jniñu nuu soldado ja na keni'in da Pablo. <sup>18</sup> Ni ndo'o ini na ja ni sa'a da iin kuachi ka'nu, ko tundo ni ka kankuachi chaa Israel ja'a da. <sup>19</sup> Tendi'i chaa Israel ka kuni kankuachi da, chi Pablo tu ni siuku da jnu'un. Chaa Israel un, suni ni ka jani da jnu'un iin chaa ni nani Jesús. Ni ka kachi da ja ni jí'i Jesús, ko Pablo ni kachi da ja chaku da. <sup>20</sup> Sia'an ni kuu, ti tu ni chaku ini na jnu'un ka ka'an da. Yukan ti ni jikajnu'un na Pablo nu kuni no'on da Jerusalén ja na xndichi na da siki jniñu ja'a. <sup>21</sup> Sia'an ni kuu ti Pablo, ni kachi da ja maa César na kachi da nasa xndi'i yo jnu'un ja'a. Yukan kuu ja ni ta'u na jniñu ja na kendo Pablo vekaa undi kivi na nataji na da ñuu Roma, nuu kancha César —ni kachi Festo nuu Agripa.

<sup>22</sup> Yukan na ti ni kachi Agripa:

—Suni ru'u, kuni kunso'o ri jnu'un ka'an chaa un —ni kachi da.

Ti ni kachi Festo:

—Ijña ti kunso'o ni jnu'un ka'an da —ni kachi da.

<sup>23</sup> Ni kundijin inga kivi, ti ni chakoyo yivi jiin Agripa jiin Berenice. Ti ka ñu'un da sa'ma fino. Ni jakoyo da ve'e nuu kunso'o da jnu'un ka'an Pablo, ti ni ka kivi da jiin soldado ka kuña'nu jiin yivi ka kuña'nu ñuu un. Sia'an ni kuu, ti Festo ni ta'u da jniñu nuu kuun soldado ja na keni'in da Pablo. <sup>24</sup> Yukan na ti Festo ni keja'a ka'an da nuu ndi'i yivi ni ka ndututu un:

—Ni'in, chaa kuña'nu Agripa jiin tendi'i yivi ka'iin ve'e ja'a, nde'e ni naa ni, ja'a kandichi chaa ja'a. Tendi'i chaa Israel ni ka kankuachi da ja'a da nuu na ñuu Jerusalén. Suni sia'an ni ka kankuachi da ja'a Pablo na ni kikoyo da ñuu Cesarea ja'a. Ni ka ndondaa da siki Pablo, ti ka kachi da ja na kuū Pablo. <sup>25</sup> Ni ndo'o ini na ja tu ni sa'a da iin kuachi ja na kuū da. Ko Pablo ni jikanta'u da ja César kuu ja na kachi nasa kuu jniñu ja'a. Ti ni keja'a ndo'o ini na ja nataji na da nuu kancha César. <sup>26</sup> Kuni taji na tutu nuu chaa kuña'nu un, ko tu iyo ni iin jnu'un ja kachi na nuu da. Yukan kuu ja ni kachi na ja keni'in na Pablo nuu ni'in naa ni. Kandichi da nuu ni ja'a, ni'in chaa kuña'nu Agripa. Yukan kuu ja kunso'o ni nava jnu'un ka'an da, ti maa ni kachi ni nasa ndo'o ini ni ja sa'a yo jiin chaa ja'a. Sia'an na ti ni'in na jnu'un ka'an na nuu tutu taji na nuu César. <sup>27</sup> Sia'an ni kachi na, chi ni ndo'o ini na ja tu iyo va'a ja taji yo iin presu nuu César, ti nu tu kachi yo na kuachi ni sa'a da —ni kachi Festo nuu Agripa.

### *Ni nama Pablo maa da nuu chaa kuña'nu*

## 26

**1** Yukan na ti ni kachi Agripa nuu Pablo:

—Kuu ka'an ra ja'a maa ra vijna na —ni kachi da.

**2** Ti Pablo ni ndokani da nda'a da, chi ni kanxia'u da jiin Agripa, ti ni kachi da:

—Ni'in, chaa ña'nú Agripa, kusii ini na, chi ni ja'a ni jnu'un vijna ja na ka'an na ja'a maa na. Na kachi na nuu ni ndoo ni sa'a na ja chaa Israel ka kankuachi da ja'a na. **3** Kusii ini na, chi jini na ja ni'in jini va'a ni jnu'un chaa Israel. Jini va'a ni na jnu'un ka'án da. Yukan kuu ja jikanta'u na nuu ni ja na kunso'o kuee ni jnu'un ka'án na.

### *Nasa ni chaku Pablo ti sa ni kandixia da Jesús*

**4** Siin ka'an Pablo jiin Agripa:

—Tendi'i chaa Israel ka jini da nasa ni ja'nú na ñuu na. Suni ka jini va'a da nasa ni chaku na ñuu Jerusalén. **5** Maa da ka jini va'a da saña ja ni kuu tjiní kuiya. Ti nu kuu kachi da ja kuu na iin chaa fariseo ka siuku ni'in taka ley Israel. **6** Ti vijna chaa Israel un, ka xndichi da saña chi kandixia na ja Yandios naxndoto ya tendi'i ndiyi nava ni kachi ya nuu yivi ña'nú yo najana'an. **7** Sia'an ti tendi'i yivi Israel ka kandixia i. Yukan kuu ja ka kuni siuku ni'in da, ti ka junukuachi da nuu Yandios ndi kivi ndi ñuu. Ja sia'an kuu ja kandixia na ja nandoto ndiyi, ti siki yukan ni ka kankuachi da ja'a na. Sia'an ka'an na jiin ni'in, chaa ña'nú. **8** Ti tu iyo va'a ja ka ndo'o ini ni ja Yandios tu naxndoto ya ndiyi.

**9** Undi najana'an, ndo'o ini na ja iyo va'a jniñu ni sa'a na ja ni ka'an na siki Jesús, chaa ñuu Nazaret. **10** Ti sia'an ni sa'a na ñuu Jerusalén. Ni ka ja'a sutu ka kuña'nú jniñu un nuu na, ti saña ni jnaa na vekaa taka chaa ni ka kandixia Jesús. Ti suni ni ndu iin nuu ini na jiin chaa ni ka ja'ní yivi ka kandixia Jesús. **11** Taka kivi ni ja'an na ini veñu'un nuu ka nchañu'un yivi naa i, ti ni ja'a na tau i. Sia'an ni ka chisa'yí i jnu'un Jesús. Ni kuiti xaan ini na nuu i. Yukan kuu ja ni ja'an na inga ñuu jíka ga, ti ni kani na taka yivi ka kandixia un.

### *Kachi tuku Pablo nasa ni kandixia da jnu'un Jesús*

**12** Siin ka'an Pablo jiin Agripa:

—Sia'an ni kuu, ti sutu ka kuña'nú un, ni ka ja'a da jniñu nuu na ja na kin jniñi na presu chaa ka kandixia undi ñuu Damasco. **13** Ti ni'in, chaa ña'nú, na kachi na nuu ni ja ichi kua'an na undi Damasco, ti ja kuan kuu koxiuu, ti ni jini na undi andiví ni ndinchaa iin nduva nuu na, jiin suni chaa kuankoyo jiin na, ni'in ga ni ndinchaa nduva un ja kuu nduva ndikandii. **14** Ti tendi'i naa na na ni ka nduva na nuu ñu'un, ko saña ni jiniso'o na iin ndusu ni ka'an yu'u hebreo (ja ka'an yivi Israel), ti ni kachi: "Ro'o Saulo, tu iyo va'a ja ka kanaa ra jiin ri. Ti stuji ra maa ra, nanu sa'a xndikí nu ja'a ti patada punta puya", ni kachi ndusu un. **15** Yukan ti ni jikajnu'un na: "Nau ni'in ka'an taa", ni kachi na. Ti ndusu un ni kachi jiin na: "Ru'u kuu Jesú, ti ro'o kuu ja kanaa jiin ri. **16** Ndokuñi ti kundichi ra. Ni jini ra ru'u, chi ru'u ja ni nakaji ri ro'o ja na sa'a ra jniñu ri, ti kani ra jnu'un taka ja ni jini ra vijna. Suni nakani ra jnu'un nu na kuni ra taka ga ja xna'an ri nuu ra. **17** Chindee ri ro'o ja tu kuu kani yivi Israel ro'o, ni yivi inga nación. Ti taji ri ro'o ja na sa'a ra jniñu ri, chi ki'in ra nuu kanchuku yivi inga nación, **18** ja na kandixia i ru'u. Na xndoo i taka jniñu kue'e ka sa'a i, ti na kandixia i ru'u. Tukaa ga sa'a i nava kuni ja'u'u un, ti na kandixia i nava kuni maa Yandios. Ti sia'an na kenchaa kuachi i un ki'in, ti nanita'u i nuu Yandios jiin uu ga yivi ni nakaji ri", ni kachi Jesús nuu na.

**19** Sia'an ni kuu, ti ni jandatu na jnu'un ni ka'an Jesús jiin na undi andivi. **20** Ti undi nuu, ni xna'an na jnu'un Yandios ja na nakani ini i nuu kuachi i, ti na xndoo i taka jniñu kue'e ka sa'a i, ti na kandixia i jnu'un Jesús. Ti na sa'a i jniñu iyo va'a, nanu ka sa'a yivi ka kandixia Jesús. Sia'an ni ka'an na undi nuu yivi kanchuku ñuu Damasco, ti suni sia'an ni ka'an na ñuu Jerusalén. Suni jnu'un un ni ka'an na nuu yivi kanchuku ni ndañuu Judea jiin nuu yivi kanchuku inga nación. **21** Ti yukan kuu ja siki jnu'un ka'an na un, ni ka jniñi yivi Israel saña ini veñu'un un, ti ka kuni ka'ni da saña. **22** Ni chindee Yandios saña undi vijna. Siin na ka'an na nuu taka yivi. Suni jnu'un ka'an na nuu chaa ka kuña'nu, ka'an na jiin taka ga yivi. Na jana'an ni ka ka'an chaa profeta jnu'un Yandios, ti suni ni ka'an Moisés. Ni ka ka'an da nava kii Jesús. **23** Ni ka kachi da nava kondo'o Jesús ti kuñu ya, ti nandoto tuku ya nuu ñuji'i. Maa ya kuu ja nandoto undi nuu kuiti. Sia'an ni kachi ya nasa nanita'u yivi Israel. Ti sia'an kachi ya nasa nanita'u yivi inga nación. Ti jnu'un yukan kuu jnu'un ni ka ka'an profeta na ni ka ka'an jnu'un Yandios najana'an. Ti jnu'un yukan kuu ja ka'an na nuu yivi vijna —ni kachi Pablo.

### *Ni ka'an Pablo jiin Agripa ja na kandixia da jnu'un Jesús*

**24** Sia'an ni ka'an Pablo ja'a maa da nuu Agripa jiin uu ga chaa ka'iin un. Ti Festo ni keja'a ka'an jaa da, ti ni kachi da jiin Pablo:

—Kaku'u ra, Pablo. Ja xaan ni skua'a ra, ti ni nduku'u ra —ni kachi da.

**25** Ko Pablo ni kachi da nuu Festo:

—Ni'in chaa kuña'nu, tu kaku'u na. Ja ni kachi kaji na iin jnu'un ndaa nuu ni, ti jnu'un ka'an na un, jandaa ndixia kuu. **26** Chaa kuña'nu Agripa ja'a, jini va'a da jnu'un ni ka'an na. Tu ndi'i ini na ka'an na jiin da, chi jini na ja jini va'a da nava ka'an na jiin ni. Jini da ja yukan kuu nuu ndijin ja ni ka jini taka yivi taka jnuhun Jesús —ni kachi da nuu Festo. **27** Sia'an ni kuu ti ni kachi Pablo nuu Agripa:

—Jini va'a na ja kandixia ni jnu'un ka ka'an chaa ni ka ka'an ja kuu Yandios undi na ja na'an, ni'in, chaa ña'nu Agripa —ni kachi Pablo. **28** Ti ni kachi Agripa jiin da:

—Va ndo'o ini ra ja yachi kandixia ri Jesús —ni kachi da. **29** Ti ni kachi tuku Pablo jiin da:

—Kakan nuu Yandios ja na nakandixia ni Jesús. Vasu vijna xi luego ni, kandixia ni ti kuni na ja tendi'i ni nava ka iin ja'a. Ja ni ka jini ni nava ni ka'an na vijna. Kuni na ja nduu ni cuenta saña ko tu kuni na ja konde ni vekaa cuenta maa na —ni kachi da. **30** Sia'an ni kuu ti chaa ña'nu Agripa jiin Festo jiin Berenice jiin tendi'i yivi ni ka ndututu un ni ka ndokuiñi da. **31** Ti kuankoyo da fuera ti ni ka keja'a ka ndajnu'un da, ti ni ka kachi da:

—Tu ndoo ni sa'a chaa un ja na kuu da, ni tu kuu konde da vekaa —ni ka kachi da. **32** Ti Agripa ni kachi nuu Festo:

—Undi nuu kuu sia yo da ni kuu, ko vijna tu kaa, vanuxia ja maa da ni kachi da ja César na xndichi da chaa —ni kachi Agripa.

### *Ni ka taji da Pablo undi Roma*

## 27

**1** Nu ni ka ndo'o ini da ja taji da saña undi Italia, nuu kancha César, Pablo jiin uu ga presu, ni nakua'a da chaa nuu iin chaa ni nani Julio, ja yinda'a da soldado batallón Augusto. Saña Lucas, suni kua'an na jiin da naa da.

**2** Aristarco, iin chaa Tesalónica ja kuu iin ndañuu Macedonia, suni kua'an da jiin na. Ni ka kivi na iin barco ja ni chaa ñuu Adramitio. Kuni ki'in barco un

taka ñuu yu'u mar ja ka kuu ñuu Asia. Sia'an ni kuu, ti kuankoyo na. <sup>3</sup> Ni kundijin inga kivi, ti ka jaa na ñuu Sidón. Julio ni kunda'u ini da Pablo, ti ni ja'a da jnu'un ni ja'an Pablo nuu chaa mani da jiin ja kanchuku da ñuu un, ti yukan ni ka ja'a da nuu Pablo taka ja nandi'i da. <sup>4</sup> Yukan ti ka kivi tuku na barco. Kuankoyo na ti ni kendo na ñuu Sidón. Ni ka ya'a na ñuu Chipre, ja ni kendo ichi sajni, chi kee xaan tachi inga ñuu un. <sup>5</sup> Ni ka ya'a na sava nuu mar un, ti ni ka ya'a na yajni costa ñuu Cilicia jiin Panfilia, ti ni ka jaa na ñuu Mira, ja kuu iin ndañuu Licia. <sup>6</sup> Ñuu Mira yukan ni ni'in chaa yinda'a soldado un inga barco ñuu Alejandría, ja ki'in undi Italia. Yukan ti ni kachi capitán un ja na kivikoyo na ini barco un. <sup>7</sup> Yukan ti ni ka kee na kuankoyo na. Tijni kivi kuee xaan ni ka jika na. Kua'a xaan nundo'o, ti sa ni ka jaa na ñuu Gnido. Ti tukaa ni siin ga barco un ichi kua'an, chi kee xaan tonto tachi. Yukan ti ni ka ya'a na yajni ñuu Salmón, ni ka ya'a na yajni costa ñuu Creta. Sia'an ni ka ya'a na, chi tukaa kee xaan tachi yukan. <sup>8</sup> Ti yií xaan nu ni ka siin na ni kani costa un, ti ni ka jaa na yajni ñuu Lasea nuu nani "Ka kendo va'a barco." <sup>9</sup> Ni ka'iin na tijni kivi yukan. Tukaa ni kuni siin barco un, chi ja ni nasama yoo ja kee xaan tachi. Ja ni ya'a kivi viko ja ni ka iyo ndicha iní yivi Israel, ti kivi un tukaa ga ni jika barco, chi sandau keka'nu nuu mar un. Yukan kuu ja ni xndaku Pablo nuu chaa un, <sup>10</sup> ti ni kachi da:

—Ñani naa ni, ndo'o ini na ja nu na siin yo, ti koo xaan yo nundo'o. Xnaa yo carga ndiso barco ja'a, ti suni kuu xnaa yo maa barco ja'a, ti suni undi maa yo naa yo —ni kachi Pablo.

<sup>11</sup> Ti chaa yinda'a soldado un tu ni chunso'o da jnu'un ni ka'an Pablo, ti ni jandatu ga da nuu capitán barco un jiin nuu chaa xiin barco un, ti tu ni ka chunso'o da jnu'un ni ka'an Pablo. <sup>12</sup> Ti barco un, tu kuu kendo va'a un, chi kuun xaan sau ja kuu viko sau, ti kee xaan tonto tachi kivi un. Yukan ti ni ka ndo'o ini da ja iyo va'a ga nu na kinkoyo da ichi, ti ka ndo'o ini da ja ki'in da undi Fenice, iin puerto ja kendo ñuu Creta. Ka ndo'o ini da ja iyo va'a ga puerto un, chi sa'a vijin xaan, tu kee xaan tachi, ti puerto kendo ichi nuu kaña ndikandii.

### Kee tachi sau xaan nuu mar

<sup>13</sup> Yukan ti ni keja'a kee iin tachi vita ichi vee. Ti ka ndo'o ini da ja kuu siin da ichi kuankoyo da. Ka kee da kua'an da. Ni ka ya'a da yajni costa ñuu Creta. <sup>14</sup> Ko tu ni ka jika kua'a da, ti ni keja'a kee iin tachi xaan ichi nenu ñuu Creta. Kee xaan tachi nuu kua'an barco un. Kuu iin tachi ja vají ichi nuu kaña ndikandii, kachi yivi un. <sup>15</sup> Tukaa ni kuni siin barco un, chi kee xaan tachi nuu kua'an barco un, ti ni nachinda'a ichi jata. <sup>16</sup> Sia'an ni kuu, ti ni ka ya'a na yajni iin ñuu lulu nani Clauda. Tu ni kee xaan tachi nu ni ka ya'a na yukan. Barco un ñu'un inga barco lulu. Ni ka jista da barco lulu un, ti ni ka na chondree na ini barco ka'nun, ko ni'in iyo ja sa'a yo jniñu un. <sup>17</sup> Sia'an ni kuu, ti chaa un ni sakutu da barco ka'nun un jiin yo'o ka'nun, ti ni ka ju'nida. Ni ka ndo'o ini da ja tu te'nde barco un. Yukan ti ni ka keja'a ka yu'u da ja kin kaninchaa barco un maa nuu ñití un ja ni xndaa nducha mar un. Yukan ti ni ka nasinu da manta ka'nun, chi chii manta un kani tachi, ti chinda'a i barco un kua'an. Ti ni ka sia da maa da kuankoyo da jiin tachi un. <sup>18</sup> Ni kundijin inga kivi, ni ka keja'a ka skaña da ndajniñu ñu'un ini barco un nuu nducha, chi tachi sau un sa'a ja kanda barco un nuu mar. Ti sia'an ni ka sa'a da ja na nduñama barco un. <sup>19</sup> Ni kundijin inga kivi, ti ni ka skaña na taka ndajniñu ja jajniñu maa barco un. <sup>20</sup> Tijni xaan kivi tu ni ka jini na ndikandii, ni tu ni ka jini na chuxini. Sia'an ni kuu, ti ni ka keja'a ka ndo'o ini na ja tukaa kendajiyo na, chi kee xaan tonto tachi, ti kuun xaan tonto sau.

<sup>21</sup> Tijni xaan kivi tukaa ni ka yee na staa. Yukan kuu ja Pablo ni keja'a ka'an da jiin da:

—Tendi'i ni'in naa ni, tu ni ka chunso'o ni jnu'un ni kachi na nuu ni, na ni ka'iin yo ñuu Creta. Tu ni iyo va'a ja ni ka kee ni ñuu Creta. Yukan kuu ja kando'o kanene yo vijnal, ti ni ka xnaa yo taka ndajniñu yo. <sup>22</sup> Ko vijnal na kachi na jiin ni ja koto xndi'i yo ini yo. <sup>23</sup> Ja ka jini ni ja saña junukuachi na nuu Yandios, ti sa'a na jniñu nava kuni maa ya. Jakuaa vijnal ni tajji ya iin tajnu ya nuu na, <sup>24</sup> ti ni kachi tajnu un nuu na: "Koto yu'u ra, ro'o Pablo. Nini kuu ja kin ka'an ra jiin César. Ni kachi Yandios ja chindel ya ro'o. Nama ya ro'o jiin taka chaa ka'iin barco ja'a, ti ni iin da tu kuū", ni kachi tajnu un. <sup>25</sup> Yukan kuu ja na kachi na jiin ni ja tu xndi'i ni ini ni naa ni, taka yo naa yo. Saña kandixia na Yandios. Jini na ja siuku ya nava ni kachi tajnu ya jiin na. <sup>26</sup> Barco ja'a kin kaninchaa maa nuu iin ñu'un kendo ma'ñu mar ja'a —ni kachi da.

<sup>27</sup> Ni kuu xia'un kivi sa ni ka jankoyo na. Ti iin jakuaa kua'an barco un nuu mar Adria, ti ndanu ndenu barco un kua'an jiin tachi un. Ja yajni ñuú, ti chaa ka sajñiñu jiin barco un, ni ka ndo'o ini da ja kuan kuyajni na nuu ñu'un.

<sup>28</sup> Yukan kuu ja ni ka keja'a da ka chikua'a da nasa kunu ñu'un nducha nuu ka ja'an na, ti ni ka jini da ja iyo oko xia'un iin metro. Ni ka jika na ti'l'i ga, ti ni ka chikua'a tuku da nducha un, ti ni ka jini da ja iyo oko uxia metro ja kunu.

<sup>29</sup> Ni ka yu'u xaan da ja jaku'un barco un jiin yuu, ti kuu kue'e. Ja yukan kuu ja ni ka nasinu da kuun kaa nuu nducha ichi jata barco un. Kaa un sa'a ja tukaa kaka barco un. Ti chaa un ni ka ndi'i xaan ini da, ti ka ndatu da ja na kundijin inga kivi. <sup>30</sup> Yukan ti chaa ka sa'a jniñu jiin barco un, ka kuni'in barco lulu un nuu nducha, chi ni ka kachi da ja sia'an na sinu da kaa ichi nuu barco un, ko ni ka xnda'u da. Ni ka sa'a da sia'an ja ka kuni nama da maa da. <sup>31</sup> Yukan ti Pablo ni keja'a ka'an da jiin chaa jiin nuu tendi'i soldado da, ti ni kachi da:

—Nu tu kendo chaa un nuu barco ja'a, tu kuu nama yo maa yo —ni kachi da.

<sup>32</sup> Yukan na ti soldado un ni ka ja'ncha da yo'o yinda'a barco lulu un, ti ni ka sia da kua'an nuu nducha un. <sup>33</sup> Nu kuan ndii, ti ni kachi Pablo jiin da naa da:

—Kaji ni naa ni ti'l'i ndoo iyo. Vijnal ni kuu xia'un kivi ja tukaa ni ka yee ni staa, ni tu ni kuu kusu ni ti'l'i naa ni. <sup>34</sup> Yukan kuu ja na kachi na nuu ni ja kaji ni ti'l'i ja na ja nani'in ini ni ti'l'i, ti na kuu sucha ni naa ni. Sia'an ti sa kuu nama ni maa ni naa ni, chi ni iin yo tu kondo'o vasu ti'l'i —ni kachi Pablo.

<sup>35</sup> Ni ndi'i ka'an Pablo jnu'un un, ni ki'in da iin staa stila, ti tendi'i da ni ka jini ja ni nakuenta'u Pablo nuu Yandios. Ni ja'nu sava da staa stila un, ti ni keja'a da yajji da. <sup>36</sup> Yukan ti tendi'i chaa un ni ka kundee ini da, ti ni ka yee da ti'l'i. <sup>37</sup> Ka'iin uu ciento uni xiko xia'un iin yivi ini barco un. <sup>38</sup> Ni ka yee da undi ni ka ndutu chii da. Yukan ti ni ka skaña da triu nuu nducha un ja na nduñama barco.

### Keka'nu barco

<sup>39</sup> Ni kundijin inga kivi, ti ni ka jini da ja kuan kuyajni ñu'un un, vasu tu ni ka nakuni da naa ñuu kuu. Ni ka jini da yu'u mar un nuu ñu'un na'in nducha, nuu vita xaan ñiti yu'u mar un. Ni ka kinyii da nu kuu tu'va barco undi yukan. <sup>40</sup> Yukan ti ni ka sia da kaa ka yindaka barco un, ti ni ka sia da kua'an nuu mar. Ti ni ka ndaji da yo'o ndikun tabla ja yinda'a nuu barco. Ni ka ndokani tuku da manta ichi nuu barco un, chi tachi un sa'a ja na ki'in tuku barco un ichi yu'u mar. Sia'an na ti kuantu'va barco undi yu'u mar. <sup>41</sup> Jaku ni ga ti ya'a barco un undi nuu ñu'un na'in nducha un, ti ni jakoto nuu ni ndututu ñiti un,

ti ni'in xaan ni jakoto xini barco un, ti tukaa ni kuni kanda. Ichi jata barco un ni keja'a jna'nu ja ni'in kaninchaa nducha un chii. <sup>42</sup> Tijni soldado un ka kuni ka'ni da taka presu un, nava tu sucha da nuu nducha un, ti jaa da nuu yi'i ñuu'un, ti kunu da ki'in da. <sup>43</sup> Chaa yinda'a soldado un tu ni kuni da ja kuū Pablo. Yukan kuu ja tu ni ja'a da jnu'un ja ka'nii soldado un taka presu un. Ti ni ta'u da jniñu ja tendi'i chaa ka jini sucha, na ndava da nuu nducha un, ti na sucha da ki'in da undi nuu yi'i ñuu'un yu'u mar un. <sup>44</sup> Suni ni kachi da ja uu ga da na kinkoyo da siki tabla, xi siki iin pedazo maa barco un. Sia'an ni ka kundee da ni ka nama da maa da, ti ni ka jaa da nuu yi'i ñuu'un undi yu'u mar un.

### *Kande Pablo ñuu Malta*

## 28

<sup>1</sup> Sia'an ni ka nama na maa na nuu mar un, ti sa ni ka jini na ja ñuu'un lulu un nani Malta, ti kande ma'ñuu mar un. <sup>2</sup> Yivi kanchuku yukan ni ka kunda'u ini da saña naa na. Ni ka joto da ñuu'un, chi kuun sau, ti vijin ka jna'an na. Sia'an ni ka chindee da saña naa na. <sup>3</sup> Ti Pablo suni ni nastutu da uu nduku ichi un, ti ni jnaa da nuu ñuu'un. Yukan ti iin koo ni kendava ti nuu ñuu'un un ja ni'nii xaan. Ni ndava ti ti ni yeyi'i ti nda'a Pablo, ti tu kuni ti sia ti. <sup>4</sup> Nu ni ka jini yivi ñuu un ja yindaka koo un nda'a Pablo, ti ni ka ka'an:

—Va nu suu chaa ja'nii ñaa'an kuu chaa ja'a. Ti vasu ni nama da maa da nuu mar, ko Yandios tu ja'a ya jnu'un ja na kúchaku da —ni ka kachi i.

<sup>5</sup> Ti Pablo ni kisi da koo un nuu ñuu'un un, ti tundo ni kuu nda'a da. <sup>6</sup> Ti yivi un ka ndatu i, chi ni ka ndo'o ini i ja kaa kuiñii nda'a Pablo, ti yachi kuū da. Ti ni kuu na'an ka ndatu da, ti ni ka jini da ja tundo ni jna'an Pablo. Yukan ti ni ka ndo'o tuku ini da, ti ni ka kachi da:

—In yandios kuu Pablo —ni ka kachi da.

<sup>7</sup> Yajni un nchaa iin chaa nani Publio. Chaa un ta'u da jniñu nuu ñuu'lulu un. Yajni nu ni ka joto yivi un ñuu'un nchaa ve'e da jiin ñuu'un da. Ni kachi da nuu na:

—Ña'an ni ve'e na —ni kachi da.

<sup>8</sup> Ti tata Publio, katuu da ku'u da, ti ka'u xaan jna'an da. Jna'an da kue'e kiji, jiin kue'e kuun. Pablo ni tu'va da nuu katuu tata Publio, ti ni jikanta'u da nuu Yandios. Ni chuxndee da nda'a da siki chaa ku'u un, ti ni nduva'a da.

<sup>9</sup> Yukan na ti tendi'i yivi ka ku'u ñuu un ni ka kikoyo da, ti ni ka nduva'a da.

<sup>10</sup> Yivi un ni ka ja'a da kua'a xaan ndajniñu nuu na naa na. Ti ni jaa hora ja kinkoyo tuku na, ti ni ka ja'a da taka ja ka nandi'i na naa na ja kuu ichi.

### *Ni jaa Pablo ñuu Roma*

<sup>11</sup> Nu ni ka ya'a uni yoo ja ka'in na ñuu lulu un, ti ni kaki'in na iin barco tuku. Barco un ki'in ñuu Alejandría. Xini barco un kanchuku uu nuu nani Cástor jiin Pólux. Ni kendo barco un ñuu Malta ja ni kuu viko vijin xaan.

<sup>12</sup> Yukan ti ni ka kekoyo na ñuu un. Ni jakoyo na ñuu Siracusa. Ni ka kendo na uni kivi yukan. <sup>13</sup> Ni kekoyo na yukan, ti ni ka ya'a na ni yu'u mar un, undi ni ka jaa na ñuu Regio. Ni kundijin inga kivi, ti ni keja'a kee tachi ichi vee. Yukan kuu ja ni kekoyo na tuku ti kuankoyo na. Ni kundijin inga kivi, ti ni ka jaa na ñuu Puteoli. Yukan ti ni ka xndoo na barco un. <sup>14</sup> Yukan ni ka ndejna'an na jiin tijni chaa ka kandixia Jesús, ti ni ka kana da saña ja na kendo na jiin da iin semana. Ti sa kuankoyo na ichi Roma. Ti yukan ni ka jika ja'a na kuankoyo na.

<sup>15</sup> Yukan ti yivi ka kandixia Jesús un, ni ka jiniso'o da ja jakoyo na, ti ni ka kii nujna'an da saña. Tijni da ni ka kikoyo undi nuu nani Foro de Apio, ti uu ga da ni kikoyo undi nuu nani Tres Tabernas. Nu ni jini Pablo nuu da, ni

kundee ini da ti ni jikanta'u da nuu Yandios. <sup>16</sup> Sia'an ni kuu, ti ni jakoyo na Roma. Chaa yinda'a soldado un ni nakua'a da Pablo jiin uu ga chaa ka kuu presu un nuu iin chaa ka ndito vekaa un. Yukan ti chaa un ni ja'a da jnu'un ja na nduku Pablo iin ve'e kuncha da, ti na kundito iin soldado chaa.

### *Ka'an Pablo jnu'un Jesús ñuu Roma*

<sup>17</sup> Ni ka ya'a uni kivi, ti ni kana Pablo chaa ka kuña'nu nación Israel kanchuku ñuu Roma. Nu ni ka ndututu da, ti ni kachi Pablo jiin da:

—Ñani naa ni, vasu tu nau ni iin kuachi ni sa'a na nuu yivi Israel. Ni siuku na jnu'un ni ka xndoo chaa jana'an, ko ñuu Jerusalén ni ka nakua'a yivi Israel presu saña nuu chaa Roma kanchuku yukan. <sup>18</sup> Nu ni ka xndichi da saña, ti ka kuni da sia da saña, chi ka jini da ja tu ni iin kuachi ni sa'a na ja na kuú na. <sup>19</sup> Tu ni kuni na kankuachi na nuu yivi Israel ja kuu jna'an yo, ko ni jikanta'u na nuu da ja César na xndichi da saña, chi tu ni ka ja'a yivi un un jnu'un ja na sia sticia un saña. <sup>20</sup> Yukan kuu ja ni kana na ni'in naa ni, chi kuni na ndajnu'un na jiin ni. Kuni na ndajnu'un na jiin ni, chi suni kandixia na ja Yandios naxndoto ya tendi'i ndiyi. Ti sia'an taka yivi Israel, ñanijna'an yo, ka kandixia i. Ja yukan kuu ja ndikun na jiin cadena ja'a, chi kandixia na taka un —ni kachi da nuu chaa ka kuña'nu un.

<sup>21</sup> Yukan na ti ni ka kachi chaa un jiin Pablo:

—Ni iin tutu tu ni chaa nuu ri naa ri ja taji chaa Israel. Iyo sava ñanijna'an yo ja vekoyo undi Jerusalén, ko tu na jnu'un ka kankuachi da ja'a ra. <sup>22</sup> Kuni kunso'o ri jnu'un ka'an ra, ti na kuni ri nasa ndo'o ini ra, chi ka jini ri ja taka ñuu ka ka'an yivi jnu'un Jesús, ti yivi ka kandixia Jesús, siin ka chiñu'un i —ni ka kachi da.

<sup>23</sup> Yukan ti ni ka kachi da ja na ndututu tuku yivi nuu kancha Pablo. Kivi un ni chakoyo yivi kua'a nuu kancha Pablo. Pablo ni ka'an kaji da nuu yivi un nasa ta'u Yandios jniñu. Ni kachi da nasa ni ka'an Moisés kivi jana'an, na ni kachi da nasa kuu jniñu sa'a Jesús. Suni sia'an ni ka kachi chaa ni ka ka'an jnu'un Yandios najana'an, ni ka'an Pablo.

Sia'an ni ka'an Pablo, chi kuni da ja na kandixia chaa un Jesús. Sia'an ni ka'an da nchaka iin kivi un jiin yivi un naa i. <sup>24</sup> Sia'an ni kuu ti tijní yivi ni ka kandixia jnu'un ni ka'an Pablo, ti sava ga yivi tu ni ka kandixia. <sup>25</sup> Tu ni ka iyo iin nuu ini yivi un naa i, ti ka kuni nokoyo i ve'e i, ko Pablo ni ka'an da jaku ga jnu'un nuu i. Ni kachi da:

—Ni kachi kaji Espíritu Santo nuu Isaías nuu jna'an yo jana'an. Ni kachi ya ja Isaías na ka'an jnu'un ja'a nuu yivi:

<sup>26</sup> Kua'an ti kachi ra nuu yivi un:

Ro'o naa ra, kunso'o ra jnu'un Yandios, ko tu chaku ini ra.

Kuni ndaa ra jniñu sa'a Yandios, ko tu chaku ini ra nasa sa'a ya jniñu un.

<sup>27</sup> Yivi ndee ni'in ini ka kuu ra. Tukaa chunso'o ra, vasu ka chaku ini ra. Tu ka kuni nakani ini ra, vasu ka chaku ini ra nasa ka jini ra, ni kachi Espíritu Santo nuu Isaías, ja na ka'an da nuu yivi un.

Kachi tutu.

<sup>28</sup> Vijna ti na ka'an na jnu'un Yandios nuu yivi inga nación. Yivi un chi kunso'o i jnu'un Yandios, ti nanita'u i nuu ya, ti maa i na kandixia i ya —ni kachi da.

<sup>29</sup> Sia'an ni ka'an Pablo. Chaa Israel un ni ka kee da kuankoyo da, ti ka ndajnu'un da siki jnu'un ni ka'an Pablo.

<sup>30</sup> Uu kuiya ni kendo Pablo ñuu Roma yukan. Ni ki'in nuu da iin ve'e ni kuncha da un, ti suni ni cha'u da nuu ve'e un. Ni kusii ini da jiin taka yivi ni ka jakoyo nuu kancha da. <sup>31</sup> Ni ka'an da nuu yivi un nasa kuu kivi i nda'a

Yandios ti ta'u ya jniñu nuu i. Ni xna'an da jnu'un Jesús, ja maa ya kuu Cristo ni taji Yandios sa'a ya jniñu ña'nu. Tu ni yu'u da ja ka'an da, ti tundo ni jasi yu'u da ja ka'an da jnu'un Jesús.

## Tutu ni chaa Pablo nuu yivi Roma

*Kanxia'u Pablo nuu yivi ka kandixia ñuu Roma*

<sup>1</sup>Ru'u kuu Pablo ja junukuachi ri nuu Cristo Jesú, chi Yandios ni nakaji ya ru'u ja kuu ri iin apóstol, ti ni nakaji ya ru'u ja na ka'an ri jnu'un va'a Yandios siki Cristo Jesú. <sup>2</sup>Ti undi nuu ni chisojnu'un Yandios siki Cristo Jesú. Ni chisojnu'un ya un nu ni ta'u ya jniñu nuu profeta na jana'an ja na chaa maa da jnu'un un, ti yukan ni kenda tutu Yandios. <sup>3</sup>Ti nuu tutu un ni ka jani da jnu'un siki Se'e Yandios. Ti Se'e Yandios un, suni ni kuu ya iin ñanijna'an rey Israel na jana'an ja ni nani David. <sup>4</sup>Ti maa ya ni ndoto ya ma'ñu ndiyi ni sa'a Espíritu Santo, ti jiin jniñu ña'nun ni xna'an ndaa Yandios ja Jito'yo Cristo Jesú kuu maa Se'e Yandios. <sup>5</sup>Ti maa Jesú ni ja'a ya jniñu ña'nun nuu ri ja na kuu ri iin apóstol. Maa ya ni chindree ya ja na kuu ri jiin jniñu ña'nun ja ka'an ri jnu'un siki Jesú nuu taka ga yivi inga nación ichi fuera nación Israel. Ti sia'an kuu ja ka kandixia i jniñu ña'nun ni sa'a Jesú nava na kundatu i jnu'un ya. Ti yukan na koo ña'nun ga siví Jesú ma'ñu yivi un. <sup>6</sup>Ti maa ra naa ra, ja kuncha ra ñuu Roma, ka kuu ra sava yivi un, chi ni nakaji Yandios ja na yi'i ra jiin Cristo Jesú.

<sup>7</sup>Ru'u Pablo, chaa ri tutu ja'a nuu ra naa ra ja kanchuku ra ñuu Roma, nuu maa ra ja kunda'u ini Yandios, ja ni nakaji ya ja na kundaa ini ra ti na siin ra nuu ichi Yandios.

*Ja kuni Pablo ki'in da Roma*

<sup>8</sup>Xnakan ka'an ri ja nakuanta'u ri nuu Yandios ja kuu maa ra naa ra, chi ka kandixia ra Cristo Jesú. Ti jika kua'an jnu'un siki nasa kandixia ra Jesú. <sup>9</sup>Ti maa Yandios kua'a jandaa ja nini jikanta'u ri nuu ya ja kuu maa ra naa ra, ti nuu maa Yandios kuu ja janukuachi ri ti ka'an ri jnu'un siki Cristo Jesú, ti sa'a ri jniñu un jiin ní ini ní aña ri. <sup>10</sup>Ti nini jikanta'u ri nuu ya ja na jaa ri nuu kanchuku ra. Nini jikanta'u ri ja na kachi ya ti na kee ri ja'a, ti na kukuee kin ri ichi ja na jande'e ri ro'o naa ra.

<sup>11</sup>Kundio ini ri kinde'e ri ro'o nava na xna'an ri jnu'un ya nuu ra, ti na chindree Espíritu Santo ja chaku va'a ini ra jnu'un un. Yukan ti na kituu ini ra jiin jnu'un ya. <sup>12</sup>Ko ansu kituu ini maa iin ni ro'o naa ra, chi suni kua'a yo jnundee ini jna'an yo naa yo nava na kandixia ndaa yo, ti siuku yo jnu'un Jesú. <sup>13</sup>Ti na kachi ndaa ri nuu ra ñani ri ja kandixia Jesú yukan, ja kua'a jnuun nuku'un ini ri ja jande'e ri ro'o naa ra, ko nini jasi ya ichi ti undi vijná. Kundio ini ri ki'in ri ñuu ra ja na ka'an ri jnu'un Yandios siki Cristo Jesú, ti na nakani ini yivi ñuu ra ti na kandixia i Jesú. Sia'an ni jna'an ma'ñu yivi inga nación nuu ni ka'an ri jnu'un Jesú, ti suni sia'an kundio ini ri nu na jaa ri ñuu ra. <sup>14</sup>Chi ndiso ri jniñu ja ka'an ri jnu'un Yandios siki Jesú nuu taka yivi. Ni chayika Yandios ru'u ja ka'an ri jnu'un Jesú nuu yivi tu'va jiin nuu yivi tu tu'va. <sup>15</sup>Ja yukan kuu ja kuñukuu ini ri ka'an ri jnu'un Jesú nuu ro'o naa ra ja kanchuku ra ñuu Roma.

*Iyo jnu'un ka'nu ini Yandios nuu kuachiyo*

<sup>16</sup>Ru'u Pablo, tu kukanuu ri ka'an ri jnu'un Cristo Jesú nuu yivi taka ñuu, chi jiin jnu'un maa Yandios skandixia ya yivi nava na kandixia i nuu Jesú, ti sia'an na kendo keta'u i. Xnakan ni skandixia ya kua'a yivi hebreo ja janta'u i

Jesús, ti vijna suni skandixia ya kua'a yivi inga nación ja na kuanta'u i jnu'un Jesús, <sup>17</sup> chi jiin jnu'un siki Cristo Jesús kachi Yandios ja tukaa jna'nu ndatu yo, chi vijna iyo jnu'un ka'nun ini ya nuu kuachi yo. Ko nu kuni yo ni'in yo jnu'un ka'nun ini Yandios nuu kuachi yo, iyo ja na kandixia ndaa yo jnu'un Yandios siki Cristo Jesús, chi sia'an kachi tutu ii Yandios nuu kachi: "Taka yivi ja kandixia ndaa i jnu'un Yandios, nuu yivi un kachi Yandios ja iyo jnu'un ka'nun ini ya nuu kuachi i, ti yivi un na kendo keta'u i, ti na kuchaku i ja kuu saa ni", kachi tutu.

<sup>18</sup> Yukan kuu ja jiin Yandios ja kancha ya andivi, chi kuiti xaan ini ya nuu taka kuachi, ti ni nuku'un ini ya ja kua'a ya nundo'o nuu yivi ja iyo kuachi. Ni jna'nu ndatu ya taka yivi ja iyo kuachi, ti na kua'a ya nundo'o nuu taka yivi ja tu yiñu'un i jnu'un ya, nuu yivi ja nini ka sa'a i kuachi. Kandio ini ja sa'a i kuachi, ti jiin kuachi un ka jasi i jnu'un ndaa Yandios. <sup>19</sup> Siukan ka jasi i jnu'un va'a Yandios vasu nakuni ndaa i ja maa Yandios ni xnukoo ya ñuyivi yo. Nakuni ndaa i chi maa Yandios ni xna'an ya i. <sup>20</sup> Vasu tu ndijin maa Yandios, ko chaku va'a ini i ja kancha Yandios ti iyo ña'nu xaan ga nuu ya. Sia'an kuu chi ndijin ndaa taka jniñu ña'nu ni sa'a Yandios ini ñuyivi ja'a, ti chaku va'a ini i ja maa Yandios ni sa'a ñuyivi ja'a. Yukan kuu ja tu kuu nasa ka'an i ja tu iyo Yandios. <sup>21</sup> Chi undi na ni sa'a Yandios ñuyivi ni ka jini va'a ja kancha Yandios, ko ka ja'a i ja yiñu'un nuu ya, ni tu nakuanta'u i nuu ya ja kuu taka ja ja'a ya nuu i taka kivi. Chi nini kandio ini i ja ni'in i taka jnu'un ichi fuera jnu'un Yandios ti kuandatu i jnu'un ndeva'a un. Yukan kuu ja ni kuñaa inijnuni i ja tukaa nakuni i jnu'un Yandios, ni tu chaku ini i jnu'un un. <sup>22</sup> Ka ka'an i ja mani yivi ndichi ka kuu i, ko su'va ka kuu i mani yivi ñaa. <sup>23</sup> Tu ka kuni i kua'a yiñu'un nuu Yandios ja maa ya kuña'nun ga, ja tu naa kuiti naa ya. Su'va kuu ja ni ka sa'a i taka nuu santu. Ni ka sa'a i santu inga chaa ja ka jili'. Suni ni ka sa'a i santu saa un, jiin koo, jiin kuiti ka jilka ti ndi'kuun si'in.

<sup>24</sup> Yukan kuu siki taka kuachi un, ti sia Yandios maa i ja na sa'a i taka jniñu ndeva'a ja kandio ini i. Ni sia ya maa i ja na sa'a i sava'a ni ga jniñu ndeva'a nanu ina, ja na ka sajñan jna'an i. <sup>25</sup> Tu ni kandixia i jnu'un ndaa Yandios, chi su'va ni kandixia i mani jnu'un xndoña'an. Yukan ni nuku'un ini i ja chiñu'un i taka ndajniñu ni sa'a Yandios ansu yiñu'un i maa Yandios, vasu maa ya kuu ja ni sa'a ya taka ndajniñu ja iyo, ti maa ya kanuu ga jiin ja kuña'nun ga maa ya ja kuu ja saa ni. Sia'an na koo.

<sup>26</sup> Ja yukan maa Yandios ni sia ya i ja na sa'a i taka jniñu kue'e ja kandio ini ka sa'a i. Chi undi ñasi'i ni ka sama ña maa ña si'i, ti ni kivi ña jiin jniñu kue'e. <sup>27</sup> Suni sia'an siki chaa ni ka sia da maa da jajniñu jiin ña'an, ti ni kundio ini da ka sa'a da taka jniñu ndeva'a ja jiin jna'an yii da. Ti ni ka sañaa chaa jiin chaa. Ti ini yiki kuñu da ni ni'in da ta'u ja kondo'o siki ja kuu jniñu kue'e ndeva'a ni ka sa'a da.

<sup>28</sup> Ja yukan kuu jiin yivi un, ja nuku'un ini i ja tukaa chiñu'un i jnu'un Yandios. Yukan ti ni sia ya i, ti ja'a ya jnu'un nava na nduñaa inijnuni i, ja ka ndo'o ini i taka jniñu ndeva'a ka kuni sa'a i. <sup>29</sup> Yukan kuu ja nini ka ndo'o ini i ja sa'a i sava'a ni ga jniñu ndeva'a. Kundio ini taka nuu kuachi ja ka jikka i naa i. Ka kuni kencha i ndajniñu inga yivi. Nini ka ndo'o ini i siki jniñu ndeva'a ka sa'a i siki inga yivi. Kandio ini ti nuku'un ini ja sa'a i taka jniñu kue'e. Mani ja kukuasun ini i. Ka ja'nii i ndiyi. Ka kanaaa maa i. Ka xnda'u jna'an i. Nanu kini ja ka kua'an ja ka vaji. Ka ka'an xe'e i jnu'un ndeva'a siki jna'an. <sup>30</sup> Suni ka ka'an jnu'un siki jna'an i yee yukan. Ka jito u'u i Yandios jiin jnu'un ya. Ka ka'an ndeva'a i nuu jna'an i, ti ka sa'a i jniñu kue'e. Ka nduvixi ini. Nini ka nduku i inga nuu jniñu ndeva'a ja ka sa'a i. Kuni'in ini i nuu tata i nuu nana i. <sup>31</sup> Ni nduñaa inijnuni i ja tukaa chaku ini nava kuu ja va'a jiin nava

kuu ja tu va'a. Tu ka siuku jnu'un kee yu'u i. Tu kunda'u ini i nuu inga yivi. Jankivi ndumani nu ka kanaa i jiin jna'an i. Tu kunda'u ini i nuu yivi nda'u.

<sup>32</sup> Ko jandaa kuu ja ka jini va'a yivi un taka jnu'un Yandios siki jniñu ndeva'a ka sa'a i. Chaku va'a ini i ja ta'u jniñu Yandios siki jniñu ndeva'a un ja taka yivi ja ka sa'a i un, kachi ya ja na naa i. Ko vasu yukan ka jini yivi un, ko nini ka siin i jiin jniñu ndeva'a un, ti ka ndajnu'un i jiin inga yivi ja suni sia'an ka sa'a i.

### Nasa sa'a jandaa siki kuachi

## 2

<sup>1</sup> Nusa ti nu iin yivi ja suni sia'an sa'a i jniñu ndeva'a un, ¿xi kuu ka'an i kuachi siki jna'an nu? Chi nu sia'an kuu ti suni sa'a i kuachi un, jandaa kuu ja jna'n u ndatu i siki iin ni kuu kuachi ka sa'a i. <sup>2</sup> Chi ja ka jini yo ja Yandios, sa'a ndaa ya ti kachi ya ja jna'n u ndatu taka yivi ja ka sa'a i jniñu ndeva'a un. <sup>3</sup> Ka'an kuachi i siki jna'an vasu iin ni kuu kuachi ka sa'a. Sia'an ti na kachi Yandios ja jna'n u ndatu maa. <sup>4</sup> Vanuxia ja tu yachi kuiti ini ya nuu yo, ni tu yachi ja kua'a ya nundo'o nuu yo, ko iyo yivi ja skexiko i Yandios, vasu ndixia ndaa kuu ja va'a xaan ini ya jiin yo. Skexiko i Yandios ja kunda'u ya yo'o, ti tu ka sa'a i ja kundio ini ya ja nakani ini yo nuu kuachi yo. <sup>5</sup> Ko iin kua'a yivi ja tu ka jandatu i nuu jnu'un Yandios. Kuni'in xaan ini, ti tu ka kuni nakani ini nuu kuachi. Ti jandaa ndixia kuu ja yivi un ka nakaya i nundo'o ja kuu maa i naa i, ti nundo'o un na chaa nuu i nuu kivi ña'n u un nu na sa'a jandaa Yandios jiin ndi yivi ini ñuyivi ja'a. Nu kivi ña'n u un na kachi Yandios nau kuu yivi va'a jiin nau kuu yivi ja tu va'a. Ti nuu kivi un na taji ya nundo'o xaan siki taka yivi ja kuni'in ini i, ja tu kuni ka nakani ini i nuu kuachi i. <sup>6</sup> Ti na cha'u ya nuu ndi iin ndi iin yivi nava jniñu ni sa'a i. <sup>7</sup> Na kua'a ya ta'u nuu sava yivi ja kuchaku i ja kuu ni kani, chi tu ni xndi'i ini i ka sa'a i jniñu va'a, ti ni ndio ini i kuchaku i saa ni, ti ni ndio ini i ja ni'in i ta'u nuu maa Yandios ja na nduña'n u i ñuu nuu ta'u ya jniñu. <sup>8</sup> Chi su'va, na taji ya iin nundo'o xaan nuu taka yivi ja ni kuni'in ini i siki jnu'un ya, ja tu kuni kuandatu i jnu'un ndaa ya, chi kandio ini i ja siuku i jnu'un yakuaa. Kití ini Yandios jiin yivi un, ti na taji ya nundo'o xaan siki i.

<sup>9</sup> Ti jandaa ndixia kuu ja nuu taka yivi ka sa'a i jniñu ndeva'a, nuu yivi un na taji Yandios nundo'o xaan, ti nu nchaa nundo'o ka'n u xaan un, ti na ndi'i xaan ini i. Ti kanuu ga na taji ya nundo'o xaan nuu yivi hebreo, ti suni sia'an na taji ya nundo'o nuu yivi taka ga nación. <sup>10</sup> Chi su'va na kua'a ya ta'u nuu yivi ja ka sa'a i jniñu va'a. Na kua'a ya ta'u ja na nduña'n u i nuu ta'u ya jniñu, ti na kondee kosii ini i. Ti kanuu ga ja kua'a ya ta'u un nuu yivi hebreo, ti suni sia'an nuu yivi taka ga nación. <sup>11</sup> Chi Yandios tu nde'e ya nuu nasa kaa iin iin yivi, chi iin nuu sa'a ya ndaa jiin taka yivi. <sup>12</sup> Yukan kundaa ndixia chi taka yivi ka sa'a i kuachi. Vasu tu ka yi'i chii ley ni ja'a Yandios nuu Moisés, ko jna'n u ndatu i nuu Yandios, ti na kua'a ya nundo'o nuu i ja na naa i. Ko taka yivi ja ka sa'a i kuachi ja ka yi'i chii ley Moisés, suni sia'an jna'n u ndatu i nuu Yandios, chi jiin maa ley Moisés un na sa'a ndaa ya kuachi i. <sup>13</sup> Yukan kundaa chi vasu kua'a yivi ni ka jini so'o i nuu jnu'un ja ka'an ley ni ja'a ya nuu Moisés, ko nini na kachi Yandios ja jna'n u ndatu yivi un siki kuachi i. Ko siki yivi ja ka siuku ndaa i jnu'un ja ka'an ley Moisés, na kachi ndaa Yandios ja tukaa jna'n u ndatu yivi un ja kuu kuachi i.

<sup>14</sup> Ti jandaa ndixia kuu ja yivi taka ga nación tu ñava'a i tutu ley ni ja'a Yandios nuu yivi hebreo. Ti yivi taka ga nación un tu ka jini kuiti i ni iin jnu'un ley Moisés un. Ko nu ka sa'a i iin ni kuu jiin jnu'un ja ka'an ley un,

yukan kuni ka'an ja ka siuku i maa ley inijnuni i. Ja yukan kuu ja ka ñava'a i iin ley maa i. <sup>15</sup> Yukan kuu nu ka sa'a i iin ni kuu jnu'un ja ta'u ley Moisés, ti ka jini va'a yo un ja iin ni jnu'un ja ka'an ley Moisés, suni yoso jnu'un un inijnuni i, vasu tu ka ñava'a i tutu ley ni ja'a Yandios nuu Moisés. Ti sia'an ni kuu ja maa inijnuni i kuu nanu iin testigo, ti iyo uu jniñu ja sa'a testigo un. Ka'an kuachi siki i nu ka jani i iin jniñu kue'e xi xndaku ja kuva'a nu ka jani i iin jniñu va'a.

<sup>16</sup> Ti chaa iin kivi ña'nú, ti nuu kivi un, ti na kundee maa jnu'un Jesús ni ka'an ri ja sandaa Yandios taka jnu'un yisa'i ni jani ini taka yivi jiin taka jniñu yisa'i ni sa'a taka yivi. Ti maa Cristo Jesús na kua'a ya nundo'o nuu taka yivi ja ni sa'a jniñu ndeva'a un.

<sup>17</sup> Vijnna na kachi ri nuu ro'o naa ra ja vixi ini ra ka kuu ra yivi hebreo. Ka vixi ini ra ja maa Yandios ni ja'a ya ley ya nuu chaa ña'nú na jana'an ja nani Moisés, ti yukan kuu ja ka ndo'o ini ra ja maa Yandios janta'u ya ro'o. Ti vixi xaan ini ra ja maa iin ni Yandios ja ka nchaañ'un ra. <sup>18</sup> Ti ro'o ja ka kuu ra yivi hebreo, ka chaku va'a ini ra maa jnu'un ta'u Yandios nuu ra. Ja ni ka skua'a va'a jnu'un un, ti yukan kuu ja kuni nakaji ra ma'lñu nava kuu jniñu va'a jiin nava kuu jniñu ndeva'a. Sia'an ka kuni ka sa'a ra, chi nini ka jiniso'o ra nuu jnu'un ley Moisés.

<sup>19</sup> Yukan kuu ja ni nduvixi ini ra, ro'o ja ka kuu ra yivi hebreo, ti ni nuku'un ini ra ja maa ra kutu'va xaan ja kuni xndaku ra nuu yivi taka ga nación ja tu ka jini kuiti i. Ka kandixia ra ja va'a na xndaku ra nuu yivi ja kanchuku i nanu yivi ka jika i ñuñaa, ja tu ka jini kuiti i. <sup>20</sup> Ka ka'an ra ja ka ñava'a ra maa ley Yandios ni ja'a ya nuu Moisés. Ja yukan ti ka ndo'o vixi ini ra ja ka jini ndaa ra taka jnu'un ndichi, jiin ja iyo ichi ra ka xndaku ra nuu yivi ja tu jini kuiti i jnu'un un. <sup>21</sup> Yukan ti ro'o naa ra, ja ka kuu ra yivi hebreo, ja ka ndo'o vixi ini ra ja va'a xaan xndaku ra ley Moisés nuu yivi taka ga nación, ¿ti nasa kuu ja tu ka jandatu kuiti ra ley un nusa? Ti ka xna'an ra taka ga yivi ja tu sakui'na i, ¿ti nasa kuu ja suni sia'an ka sakui'na ra naa ra nusa? <sup>22</sup> Ka xna'an ra ja koto kusikinchaa jna'an i, ¿ti nasa kuu ja suni sia'an ka yisikinchaa jna'an ra maa ra? Tu kandixia ra santu, ko ka sa kui'na ra ndajniñu nuu veñu'un santu un. <sup>23</sup> Ka ka'an ra vixi ja ñava'a ra maa ley ni ja'a Yandios nuu Moisés, ko skexiko ra maa Yandios nu tu ka siuku ndaa ra jnu'un ya ja ta'u ley un. <sup>24</sup> Ti jandaa ndixia ja sia'an yoso nuu tutu ii Yandios nu ka'an: "Yivi taka ga nación ka ka'an ndeva'a i siki maa Yandios, ti sia'an ka'an i ja siki jniñu ndeva'a ka sa'a ro'o yivi hebreo."

<sup>25</sup> Ko vatuni nu ka kuu ra yivi hebreo, ti ni ka ni'in ra marca yiki kuñu ra, ti ka siuku ra jnu'un Yandios ja ta'u ley Moisés nuu ra naa ra. Ko nu tu ka siuku ndaa ra jnu'un ja ta'u ley un, ti ni nduu iin nuu jiin yivi taka ga nación ja tu jini kuiti siki ley un. <sup>26</sup> Ti siki yivi taka ga nación, nu ka siuku i jnu'un Yandios nuu ley Moisés, vasu tu ka ñava'a i ley un, ni ja ni ka ni'in i marca yiki kuñu i, nusa ti na kachi Yandios ja ni ka nduu kanuu jiin yivi hebreo. <sup>27</sup> Ti vasu yivi taka ga nación ja tu ka ni'in da marca yiki kuñu da, ko ka siuku da jnu'un ley Moisés, ti yivi na kankuachi da siki ro'o naa ra ja ka kuu ra yivi hebreo. Ka ñava'a ra tutu ii ni ja'a Yandios nuu Moisés, ko tu ka siuku i ley un. Ti yukan kuu maa kuachi ja nchaa nuu ro'o naa ra ja ka kuu ra yivi hebreo. Maa kuachi un kuu ja ñava'a ra ley un ja ni ja'a Yandios nuu Moisés, ko tu ka siuku ra un.

<sup>28</sup> Ti jandaa kuu ja maa yivi Yandios ja ka yi'i i jiin ya, ti tu nakuni yo ja maa iin ni yivi hebreo kuu ja ni ka ni'in da marca yiki kuñu da, <sup>29</sup> chi maa yivi Yandios kuu yivi ja ka ñu'un ini da jiin jnu'un ndaa. Nuku'un ini da ka siuku da jnu'un ya. Ti tu ka siuku da maa iin ni jnu'un ley Moisés, ja na ni'in

da marca yíki kuñu da, chi jiin ni ini ni aña ka siuku da jnu'un Yandios un. Ti vasu tu ka janta'u i yívi ñuyivi ja'a, ko maa Yandios janta'u ya maa da naa da.

### 3

<sup>1</sup> ¿Nusa ti nasa kuu ja kendo va'a ga yívi hebreo ja kuu yívi taka ga nación, ja ni ka ni'in yívi hebreo iin marca yíki kuñu da? <sup>2</sup> Ko iyo kua'a jnu'un ja kanuu xaan kuu yívi hebreo, ti jnu'un kanuu ga kuu ja ni kívi ini nda'a da jnu'un Yandios, ja ni tatu ya nuu da jiin jnu'un ya.

<sup>3</sup> Ti vasu kua xaan yívi hebreo tu ni ka siuku jnu'un Yandios un, ¿yukan sa'a ja Yandios tukaa kundee ya jnu'un ni chiso ya nu? <sup>4</sup> Ko tu kuiti yukan, chi su'va Yandios mani ndaa ka'an ya. Ti vasu kua xaan yívi mani jnu'un xndoña'an ka ka'an, ko Yandios nini kundee jnu'un ni chiso ya. Yukan yoso nuu tutu ii:

Ka'an yívi ja iyo ndaa jiin taka jnu'un ka'an ni, ti kundee ni nuu yívi ka'an siki.

Kachi tutu.

<sup>5</sup> Ko iyo yívi ka ka'an ja va'a ka sa'a yo kuachi, ja tu siuku yo jnu'un Yandios, chi jiin yukan na kuni ndi'i yívi ja iyo ndaa Yandios ti mani jniñu kue'e ka sa'a yívi ñuyivi ja'a. Ka kachi i ja ndi'i yívi na nakuni i ja jiin kuachi yo ka junukuachi yo Yandios, chi jajniñu kuachi yo ja xna'an ja iyo mani ndaa nuu Yandios. Nusa ti kachi yívi un ja tu va'a sa'a Yandios nu taji ya nundo'o nuu yo, chi ka kachi i ja ka chindee yo Yandios jiin kuachi yo. Ko ru'u Pablo kachi rija jnu'un un kuu mani jnu'un ka ka'an sava yívi, ansu maa jnu'un kandixia ri. <sup>6</sup> Tu kandixia kuiti ri jnu'un un, chi nu siukan sa'a Yandios, ti tu kuu ja maa Yandios ka'an kuachi siki yívi ñuyivi ja'a, ti taji ya nundo'o nuu i.

<sup>7</sup> Ti suni iyo yívi ja xndaku ja tu va'a sa'a Yandios un kankuachi ya siki i, ti taji ya nundo'o nuu i, chi ka xndaku i ja ka chindee Yandios jiin jnu'un xndoña'an. Ka xndaku i ja nu inga yívi ka jiniso'o i jnu'un xndoña'an, nusa ti chaku va'a ini i ja jnu'un Yandios kuu mani jnu'un ndaa, jiin ja jandaa ndixia ja Yandios kuña'nu ga. <sup>8</sup> Ti vasu jandaa kuu ja sava yívi ka xndaku da sia'an ni, ko ru'u Pablo, tu kandixia kuiti ri jnu'un ja ka xndaku yívi un, vasu iyo yívi ja ka'an da siki ru'u ja siukan suni xndaku ri nuu yívi naa i. Nusa ti nu sia'an kuu nava ka xndaku sava yívi un, ti va'a ga ja na sa'a yo mani jniñu kue'e ti yukan na kachi Yandios ja mani yívi va'a ka kuu yo. Chi su'va tukaa kuanca'nu Yandios jiin yívi ja xndaku i sia'an ni, chi na kendo jna'nu ndatu i, ti na taji ya nundo'o nuu i naa i.

#### Tu iyo ni iin yívi ndaa nuu Yandios

<sup>9</sup> Nusa ti maa yo ja ka kuu yo yívi hebreo, ¿va'a ga yo'o nuu Yandios ja kuu yívi taka ga nación? Tu ka kuu kuiti sia'an, chi kajji ni kachi ri ja ndi'i yívi ka yílixaan i jiin kuachi, vasu ka kuu i yívi hebreo xi yívi taka ga nación. <sup>10</sup> Chi sia'an ni yoso nuu tutu ii Yandios:

Tu iyo yívi ndaa, ni iin.

<sup>11</sup> Tu iyo ni iin yívi ja chaku ini i jnu'un ja ta'u Yandios.

Ni iyo iin yívi ja nduku ndee na kívi ini ichi Yandios.

<sup>12</sup> Ndi'i yívi tu ka siuku i ichi ya. Chi su'va ni nakaji i mani ichi yo'o.

Kandio ini i ka sa'a i mani jniñu ndeva'a. Tu iyo ni iin yívi kundio ini i jniñu va'a.

<sup>13</sup> Ka kuu i nanu ndiyi ni kuxiko.

Tu kuajniñu jnu'un ka ka'an i, chi mani jnu'un xndoña'an ka ka'an i.

Xaan tachi yu'u i nanu yu'u kuiti xaan.

<sup>14</sup> Yíli jnu'un tasi un yu'u i. Yíli jnu'u yu'u i.

<sup>15</sup> Ka jajna'an ini i ka ja'ni i ndiyi.

16 Kanchuku i nanu ja skiti ini ña'an.

17 Tu kuni kunchuku mani jiin jna'an i.

18 Tu jandatu i ni iin jnu'un Yandios, chi tu kuiti ka yiñu'un i jnu'un ya. Kachi tutu.

19 Nusa ti jandaa ndixia kuu ja taka jnu'un Yandios un, ja ka'an ley un, ka'an nuu tendi'i yivi, chi taka yivi ka yi'i i jiin jnu'un ley ya un. Sia'an kuu nava ni iin yivi nama maa i ja kankuachi Yandios siki i, ti ja kachi ya ja jna'nun datu i. 20 Na kachi ndaa Yandios ja iin yivi ja tukaa jna'nun datu i vasu kundio ini i ka siuku i taka jnu'un ni ta'u ley Moisés un, chi ni kenda ley un ja na xna'an kaji siki nava kuu kuachi, jiin ja jna'nun datu tendi'i yivi nuu Yandios siki kuachi un.

### *Na nita'yu yo nu kandixia yo Jesús*

21 Ko vijna tu kachi ya ja kendo va'a ndaa nuu ya nu ka siuku ndaa yo ley Moisés. Chi vijna ni kenda ndijin nasa kuu ja maa Yandios kuu kachi ya ja tukaa jna'nun datu yo nuu ya siki kuachi yo. Ko suni sia'an ni ka ka'an jnu'un ley Yandios ja ni ja'a ya nuu Moisés jiin jnu'un ya ni ka ka'an profeta na jana'an. 22 Nusa ti na kachi Yandios ja taka yivi na kendo keta'u i nuu ya nu kandixia ndaa i ja Cristo Jesús ni ji'i ya ja na chunaa ya kuachi i. Chi unuu nuu Yandios kuu ndi'i yivi ñuyivi ja'a. 23 Chi ndi'i yivi ni ka sa'a i kuachi, ti yukan kuu ja tukaa janta'u Yandios maa i, chi maa ya kuña'nun xaan ga ja tu kuni kuanta'u ni iin yivi jiin kuachi. 24 Ko kachi ya ja tukaa jna'nun datu i nuu ya siki kuachi i. Sia'an kuu ja kachi Yandios, chi ma iin ni maa ya ni kunda'u ini ya yo'o ja ni taji ya Cristo Jesús na kuū ya, ti sia'an ni ni chunaa ya kuachi yo. 25 Ti taji Yandios Jesús na kuū ya nuu nda'a cruz nava na ndumani ya jiin yo'o, ja tukaa kuiti ini Yandios nuu yo siki kuachi yo. Ko iyo ja na kandixia ndaa yo ja Cristo ni jati ya niñi ya. Ti nu kandixia yo un ti tukaa kuiti ini ya nuu yo siki kuachi yo. Ti nu ni ji'i Jesús yukan, ti ni kenda ndijin nava ni sa'a Yandios. Sia'an ti iyo ndaa nuu Yandios nu kachi ya ja tukaa jna'nun datu yivi siki kuachi i. Yukan ni sa'a ya chi undi nuu tu ja'i ni taji ya nundo'o xaan nuu yivi ñuyivi ja'a siki taka kuachi ni ka sa'a i. 26 Sia'an ni sa'a Yandios nava na kenda ndijin nuu yo'o ja iyo ndaa nuu Yandios nu kachi ya ja tukaa jna'nun datu yivi siki kuachi i. Sia'an ni sa'a ya ja'a yo ja kanchuku yo vijna. Yukan kuu ja ja ni taji ya Jesús ja na kuū ya nda'a cruz, ti jiin yukan iyo ndaa nuu ya nu kachi ya ja tukaa taji ya nundo'o xaan nuu yivi siki kuachi i, ko sia'an na kachi ya nuu mani yivi ja kandixia ndaa i nuu Jesús.

27 ¿Nusa ti kuu nduvixi ini yo siki maa yo? Tu kuu kuiti, chi tu kuiti nduvixi ini yo siki taka jniñu va'a ka sa'a yo, ja siki yukan ka siuku ndaa yo taka jniñu ta'u ley ya nuu yo. Chi su've, janta'u ya yo'o nu kandixia ndaa yo jniñu ja ni sa'a Jesús. 28 Nusa ti ja ka jini yo ja Yandios tu janta'u ya ni iin yivi vasu ka nduku ndee i ka siuku i taka jniñu ta'u ley ya nuu i, chi kachi Yandios ja tukaa jna'nun datu i siki kuachi i. Ko mani kachi ya sia'an nu kandixia ndaa i jniñu ni sa'a Jesús.

29 ¿Nusa ti kuu ya Yandios ja janta'u ya mani yivi hebreo ja ñava'a ley ni ja'a ya nuu Moisés? Tu kuu kuiti, chi kuu ya Yandios ja janta'u ya yivi taka ga nación. 30 Chi iin ni Yandios kuu, ti na kachi ya ja tukaa jna'nun datu sava'a ni ga yivi siki kuachi i, vasu ka kuu i yivi hebreo ja ni ka ni'in i iin marca nuu yiki kuñu i, xi ka kuu i yivi taka ga nación ja tu ni ka ni'in i iin marca nuu yiki kuñu i. Ko na kachi ya yukan nuu sava'a ni ga yivi ja kandixia ndaa i jniñu ni sa'a Jesús. 31 Ti vijna ja kandixia yo jniñu ni sa'a Jesús, ¿yukan kuu sa'a ja

tukaa jandatu ley Yandios un? ¡Tu kuu kuiti! Chi su'va nu kandixia ndaa yo Jesús, sa'a ja na siuku ndaa yo ley Yandios un.

### *Jnu'un ni kandixia Abraham*

## 4

<sup>1</sup> Abraham ni kuu da tata na jana'an yo ja ni xnukoo da nación Israel. Vijnatina sa'a yo nanu siki nasa ni janta'u Yandios maa da ja ni kendo ndaa da nuuya. <sup>2</sup> Chi nu ni siuku ndaa da taka jnu'un ley Yandios un, nusa ti kuu nduvixi ini da undi maa da siki taka jniñu va'a ni sa'a da. Ko taka jniñu va'a un tu jajniñu ja na kendo ndaa da nuu Yandios. <sup>3</sup> Chi tu ni kachi tutu ii Yandios sia'an. Ka'an ja ja ni kandixia ndaa Abraham jnu'un ni chiso Yandios nuu da, ti siki yukan ni janta'u ya maa da, ti ni kachi ya ja tukaa jna'nu ndatu da siki kuachi da. Ni kendo ndaa da nuu Yandios chi vii ni kandixia da ya.

<sup>4</sup> Ti nu sajniñu iin yivi, ti ni'in da ya'u da, ansu ta'u da kuu, chi su'va chunaa yo nuu da. <sup>5</sup> Ko siki nasa kuu ja kachi Yandios ja kendo ndaa yivi nuu ya, kachi ya ja taka jniñu va'a ka sa'a yivi tu jajniñu kuiti ja na kendo va'a i nuu ya. Chi su'va mani yivi ja kandixia ndaa i jnu'un Yandios, maa iin ni nuu yivi un ja kachi ya ja tukaa jna'nu ndatu da siki kuachi da. Chi maa iin ni Yandios kuu ja ka'an ya jnu'un un nuu yivi ñuyivi ja'a, ja kundio ini ka sa'a da kuachi. <sup>6</sup> Suni ni kachi rey na jana'an David ja taka jniñu va'a ka sa'a yivi tu jajniñu ja na kendo ndaa da nuu Yandios. Chi su'va kachi da ja taka yivi siki nau kachi Yandios ja tukaa jna'nu ndatu da, ti ndixia ndaa ja na ndusii ini da jiin jnu'un Yandios un. <sup>7</sup> Chi ni ka'an David:

Na ndusii ini yivi ja ni saka'nun ini Yandios nuu jniñu ndeva'a ni sa'a da siki ley ya, ti tukaa taji ya nundo'o nuu da.

Ti na ndusii ini yivi ja tukaa jini Yandios kuachi da, chi ni jasi ya siki kuachi un.

<sup>8</sup> Ti na ndusii ini yivi ja tukaa kuiti kan kuachi Yandios siki kuachi da. Kachi David.

<sup>9</sup> ¿Ti kachi yo ja ndusii ini mani yivi hebreo sia'an ni, ja ni ka ni'in i marca yiki kuñu i nu? Ko tuu, chi suni ndusii ini yivi taka ga nación, ja tu ja'i ñava'a i marca yiki kuñu i. Chi ja ni kachi ndaa ri ja Abraham ni kandixia ndaa da jnu'un ni chiso ya nuu da. Ti siki yukan ni janta'u ya maa da, ti ni kachi ya ja tukaa jna'nu ndatu da siki kuachi da. <sup>10</sup> ¿Nusa, ti nasa kuu ja ni janta'u ya Abraham? ¿Undi ni ni'in da marca yiki kuñu da, xi ja ni ni'in da marca un nu? <sup>11</sup> Ko nu ni ni'in da marca yiki kuñu da, ti ni kuu iin seña ja ni nachiso Yandios ja jandaa kuu nu ni kachi ya ja tukaa jna'nu ndatu Abraham, chi ni kandixia ndaa da jnu'un ni chiso ya nuu da. Ko ni kandixia da yukan sa ni ni'in da marca yiki kuñu da. Nusa ti ni kachi ya ja Abraham kuu maa tata nuu taka yivi kandixia ndaa i jnu'un Yandios, vasu tu ni'in i marca yiki kuñu i, ti ni'in i jnu'un ya ja tukaa jna'nu ndatu i siki kuachi i. <sup>12</sup> Ti ni ni'in Abraham iin marca yiki kuñu da nava na kuu da tata nuu yivi hebreo ja suni na ni'in i marca yiki kuñu i. Ko kanuu ga ja kuu da tata nuu taka yivi kandixia ndaa i jnu'un Yandios nanu ni kandixia da sa ni ni'in da marca yiki kuñu da.

<sup>13</sup> Abraham kuu tata sava'a ni ga yivi ja kandixia ndaa i jnu'un Yandios, ti ni chisojnu'un ya nuu da jiin taka ga yivi un ja na ni'in i iin ta'u, ti ta'u un kuu ja na nduña'nu i ja ta'u da jniñu nuu ni ñuyivi jiin Yandios. Sia'an koo vasu tu ka ni'in i ta'u un siki ni ka siuku ndaa i ley Yandios, vasu ni kandixia ndaa i jnu'un ya. Ti siki yukan ni janta'u ya maa i, ti ni kachi ya ja tukaa jna'nu ndatu i siki kuachi i. <sup>14</sup> Ko nu ja'a ya ta'u nuu yivi ja nduku ndee i ka siuku i ley ya, nusa ti tukaa janta'u ya yivi ja mani kandixia ndaa i jnu'un ya. Ti

tukaa jajniñu jnu'un ni nachiso ya nuu yivi ja kandixia, chi ni iin yivi tu kuni siuku ndaa i ley ya.

<sup>15</sup> Ti kachi ley ya ja jna'nun ndatu ndi'i yivi siki kuachi i, ti kuiti ini ya jiin kuachi un ja na taji ya nundo'o nuu yivi un, chi tu iyo ni iin ñuu nuu tu ni kenda ley ya. Yukan kuu ja tendi'i yivi ni ka sa'a i kuachi siki ley ya.

<sup>16</sup> Nusa ti nuu taka yivi ja kandixia ndaa i jnu'un Yandios, nuu yivi un chisojnu'un ya ja tukaa jna'nun ndatu i siki kuachi i. Ti tu ni kuu ni iin jnu'un chayika ja sia'an ni chisojnu'un Yandios. Chi su'va, mani ja kunda'u ini ya yo'o. Ja yukan ni chisojnu'un ya nuu taka yivi ja kandixia ndaa i jnu'un ya nanu ni kandixia Abraham. Ti ni chisojnu'un ya nuu sava'a ni ga yivi ja kandixia ndaa i jnu'un ya nanu ni kandixia Abraham, ansu mani yivi hebreo ja ñava'a i ley ni ja'a ya nuu Moisés, ko suni taka ga yivi ja kandixia ndaa i nanu ni kandixia Abraham. Chi Abraham kuu nanu iin tata nuu sava'a ni ga yivi ja kandixia ndaa i jnu'un Yandios. <sup>17</sup> Ti yukan kachi tutu ii Yandios: "Ru'u Yandios, nakaji ri ro'o Abraham ja na kendo ra tata nuu ndi'i yivi ja kandixia i jnu'un ri, nuu ndi'i yivi ka yi'i i jiin sava'a ni ga nación", kachi tutu. Yukan kachi maa Yandios ja Abraham kuu tata nuu taka yivi ja kandixia i jnu'un ya. Ti sia'an ni kachi Yandios chi ni kandixia ndaa Abraham maa jnu'un ni chisojnu'un ya nuu da. Ti ni kandixia da ja maa iin ni Yandios kuu ja xndoto ya sava'a ni ga ndiyi. Ti maa iin ni Yandios kuu ja kachi ja na koo iin ndajniñu ja ti koo ga.

<sup>18</sup> Ti maa Abraham, vasu tukaa ñukuu ini da ja na koo se'e da, ko ni kandixia ndaa da taka jnu'un ni kee yu'u ya nuu da, ja na koo da nanu tata nuu kua xaan yivi ka kandixia i Yandios ja ka yi'i i jiin tijni nación, chi ni chisojnu'un Yandios: "Yukan ndukua'a se'e ni ja kandixia i ru'u", ni kachi ya jiin da.

<sup>19</sup> Ti ja yajni kaña da ciento kuiya. Ti vasu yukan ti tu ni kee da jnu'un ni kandixia da un, vasu ni jini ndaa da ja maa da jiin ñasi'i da ja ña'nun xaan da ja tukaa koo se'e da. <sup>20</sup> Ti tu ni ndo'o siki ini da ja tukaa kandixia ga da jnu'un ni kee yu'u Yandios, ja na koo se'e da. Chi sa ni kandixia ni'l'ga da, ti ni nakuanta'u da nuu ya ja yukan kuña'nun xaan ga Yandios. <sup>21</sup> Chi ni kandixia da ti ni nduka'nun va'a ini da ja na kundee Yandios jnu'un ni kee yu'u ya. <sup>22</sup> Ti siki yukan ni janta'u ya Abraham, ti ni kachi ya ja tukaa jna'nun ndatu da siki kuachi da. <sup>23</sup> Ti ansu niní siki Abraham kuu ja yoso nuu tutu ii Yandios ja sia'an ni nuku'un ini Yandios, <sup>24</sup> vasu suni yoso jnu'un un siki yo'o, chi suni na kachi ya ja tukaa jna'nun ndatu yo siki kuachi yo, chi suni kandixia ndaa yo Jito'yo Jesús. Ni kandixia ndaa yo ja ja ni xndoto ya Jito'yo Jesús nuu ñuji'i. <sup>25</sup> Chi ni nakua'a Jesús ja ni ji'i ya siki kuachi yo, ti ni xndoto ya Jesús nuu ñuji'i nava na kachi ya ja tukaa jna'nun ndatu yo siki kuachi yo.

### Nasa kenda yivi ja njanta'u ya

## 5

<sup>1</sup> Nusa ti nu kandixia ndaa yo jnu'un Yandios siki Cristo Jesús, sa ti kachi ya ja tukaa jna'nun ndatu yo siki kuachi yo. Ti siki yukan, tukaa kuuti ini Yandios jiin yo'o, chi vijnna ni ndumani ya jiin yo, chi ni ji'i Jito'yo Cristo Jesús ja na chunaa ya kuachi yo. <sup>2</sup> Ti kandixia ndaa yo jniñu ni sa'a Jesús nu ni ji'i ya ti ni nandoto ya tuku nuu ñuji'i, ti siki yukan janta'u Yandios yo'o. Ko janta'u ya yo'o siki ja ni kunda'u ini ya yo'o, chi tu iyo ni iin jniñu va'a yo ja kenchaa kuachi yo. Yukan kuu ja kachi ya ja tukaa jna'nun ndatu yo siki kuachi yo. Nusa ti kuñukun ini yo ja jandaa ndixia ja janta'u ya yo'o. Yukan kusii ini yo chi kuñukun ini yo ja janta'u ya yo'o, ti nakua'a ya yo'o iin ta'u ja nduña'nun yo nuu ta'u ya jniñu. <sup>3</sup> Ti ansu jiin ta'u un, chi suni kusii ini yo ja kondo'o yo

nundo'o siki ja ni ka yi'i yo jiin Cristo, chi nundo'o un sa'a ja ni'in ga jika yo nuu ichi Yandios. <sup>4</sup> Ti nu kundee yo jiin nundo'o un, ti jini yo ja kundee ini Yandios jiin yo'o, ti siki yukan ndiyo ini yo ni'in yo ta'u un. <sup>5</sup> Ti nu kundio ini yo yukan, ti tu xndi'i ini yo, chi jini ndaa yo ja kundee ya taka jnu'un ni kee yu'u ya, ti siki yukan kandixia yo jiin ni ini ni aña yo ja kunda'u ini ya yo'o. Ti sia'an kandixia yo chi ni ja'a Yandios maa Espíritu Santo nuu yo, ti Espíritu un skandixia ya yo'o ja jandaa ndixia kunda'u ini Yandios yo'o. <sup>6</sup> Chi siki maa yo naa yo tu ni kojnuni ja kenchaa yo kuachi yo nuu Yandios. Ko vasu tu ni ndiyo ini yo ja siuku yo jnu'un ya, chi ni ji'i Cristo ja chunaa ya kuachi yo. Ti ni ji'i ya maa kivi ni kachi Yandios.

<sup>7</sup> Sa'a yo ja. Tu ni iyo ni iin yivi ja tava ini na kuū i ja'a inga yivi, vasu inga yivi un kuu iin yivi va'a ndixia. <sup>8</sup> Ko nduku ndee ra nuu jniñu ni sa'a Yandios, chi yukan jini ndaa yo ja kunda'u ini ya yo'o. Chi ni ji'i Cristo ja'a yo vasu ni'in ni ka yi'i yo jiin kuachi.

<sup>9</sup> Nusa ti siki jniñu ni sa'a Jesús nu ni ji'i ya ti ni jati ya niñi ya, ti siki yukan kachi Yandios ja tukaa jna'nunu ndatu yo ja kuu kuachi yo, ti tukaa kuiti ini ya siki kuachi yo un ja na taji ya nundo'o xaan nuu yo, chi vijnna kendo keta'u yo nuu ya. <sup>10</sup> Ko undi nuu ni kuiti ini Yandios siki kuachi yo, ko maa Yandios ni taji ya se'e ya ja na kuū ya ti chunaa ya kuachi yo nava tukaa kuiti ini Yandios siki kuachi un, ja na ndumani ya jiin yo'o naa yo. Ti nu sia'an kuu, ti jandaa ndixia kuu ja kuchaku Cristo vijnna, ti nama ya yo'o nava tu taji ya nundo'o siki yo.

<sup>11</sup> Ko undi nuu ni kuiti ini Yandios jiin yo'o siki kuachi yo, sa maa Yandios ni taji se'e ya ja na kuū ya chunaa ya kuachi yo, nava tukaa kuiti ini Yandios siki kuachi yo. Chi su'va ja na ndumani ya jiin yo. Ti nu sia'an un, ti jandaa ndixia kuu ja kuchaku Cristo vijnna, ti nama ya yo'o nava tukaa taji Yandios nuno'o siki yo.

### *Jnu'un Adán jiin jnu'un Cristo*

<sup>12</sup> Nusa ti undi nuu ni keja'a ka sa'a kuachi ndi'i yivi ñuyivi ja'a, chi maa iin ni chaa ni keja'a da jiin kuachi, ko siki kuachi da un, ti ni kivi kue'e kuū yo. Ti ni sa'a kuachi da un ja ni jicha kue'e kuu ndi'i yivi ñuyivi ja'a, chi taka ni ka sa'a i kuachi. <sup>13</sup> Ti kuu ga ja ni ja'a Yandios ley ya nuu Moisés ni ka sa'a i kuachi. Ko nu tu ni ja'a Yandios ley ya nuu Moisés nava na nakuni yivi nau kuu iin kuachi, nusa ti tu kuni kankuachi ya siki i, ko tu kuu sia'an ni. <sup>14</sup> Chi ka jini ndaa yo ja undi na ni iyo Adán ti undi na ni iyo Moisés ndi'i yivi ni ka ji'i i siki kuachi i, chi ni ji'i i siki kuachi ja ni sa'a taka maa i, vasu tu ni sa'a i jna'an kuachi ja ni sa'a Adán, ja ni kuni'in ini da nuu iin jniñu ja ni ta'u ya nuu da. Ti siki kuachi ni sa'a Adán, ni kivi nundo'o nuu ñuyivi, chi inga chaa ni sa'a ja na kendo va'a yivi.

<sup>15</sup> Ko maa kuachi ni sa'a Adán, ja ni nduni'in ini da siki jniñu ni ta'u Yandios nuu da, tu kejna'an kuiti yo jiin maa ta'u ni ja'a ya nuu yo, nu ni kachi ya ja tukaa jna'nunu ndatu yo siki kuachi yo. Ti jandaa ndixia kuu ja jiin maa kuachi ni sa'a Adán, ti ni kivi nundo'o kuū ndi'i yivi ñuyivi ja'a. Ko sa ni kivi ta'u ja ni kunda'u ini Yandios yo'o ja ni taji ya Cristo Jesús na kuū ya ja'a yo. Ti ña'nu xaan ga jniñu ja ni sa'a Jesús ja kuu maa kuachi ni sa'a Adán, chi jiin jniñu Jesús tukaa jna'nunu ndatu yo siki kuachi yo. <sup>16</sup> Ti maa kuachi ni sa'a Adán, tu kejna'an kuiti yo jiin ta'u ni ja'a Yandios nuu yo. Chi jiin maa iin ni kuachi ni sa'a Adán, ni kachi Yandios ja jna'nunu ndatu tendi'i yivi ñuyivi ja'a. Ko jiin ta'u Yandios un, ni taji ya Jesús ja na kuū ya siki kuachi yo, ti siki yukan tukaa kuiti ini ya jiin yo, ti vijnna kachi ya ja tukaa jna'nunu ndatu yo siki kuachi yo. <sup>17</sup> Jiin maa kuachi ni sa'a Adán ni kivi nundo'o ja kuu ndi'i yivi ñuyivi ja'a, ko

ñā'nu xaan ga kuu ta'u Yandios, ja ni taji ya Jesúš ja na kuū ya ja'a kuachi yo. Ti ñā'nu xaan ga ta'u Yandios nuu yíví ja kachi ya ja tukaa jna'nu ndatu i siki kuachi i, ti ka ni'in i ta'u ja na nduña'nu i nuu ta'u Yandios jniñu.

<sup>18</sup> Nusa ti ja siki ni sa'a Adán maa kuachi un, ti ni kachi Yandios ja jna'nu ndatu ndí'i yíví ñuyíví ja'a. Ko siki jniñu ni sa'a Jesúš nu ni ji'i ya ja'a yo, ti kachi Yandios ja tukaa jna'nu ndatu yo siki kuachi yo ja na kuū yo. Chi su'va kachi ya ja na ni'in yo ta'u ja na kuchaku yo ja kuu taka saa ni. <sup>19</sup> Chi siki ja tu ni jandatu iin ni chaa Adán, ti sa ni ka kivi ndí'i yíví nuu kuachi un. Ti suni sia'an ni jandatu iin ni chaa Cristo Jesúš, ti sa ni kachi Yandios nuu kua'a xaan yíví ja kandixia i Jesúš ja tukaa jna'nu ndatu i siki kuachi i.

<sup>20</sup> Ko suni ni ja'a Yandios ley ya nuu Moisés nava ja taka jinu tu ka jandatu yíví ley un, ti ka ndukua'a kuachi i. Ko siki ni ndukua'a kuachi yo jiin ley un, ti ka'nu xaan ga kuu ja kunda'u ini Yandios yo'o. <sup>21</sup> Nusa ti siki kuachi un ni kivi kue'e kuū yo. Ko ni kunda'u ini Yandios yo'o, ti kachi ya ja tukaa jna'nu ndatu yo siki kuachi yo, ko vijna ka ni'in yo ta'u ja kuchaku yo ja kuu saa ni. Ti kachi ya yukan chi ja ni taji ya Jito'yo Cristo Jesúš ja na kuū ya ja'a kuachi yo.

### Tukaa chaku yo jiin kuachi

## 6

<sup>1</sup> ¿Nusa ti nasa ka ndo'o ini yo nu? ¿Ka ka'an yo ja kunda'u ini Yandios yo'o, ti yukan vatuni kaka yo jiin kuachi, ti jiin yukan vi'i ga na kunda'u ini ya yo'o nu? ¿Sia'an ka ndo'o ini yo nusa? <sup>2</sup> ¡Tu kuu kuiti! Chi yo'o ja kandixia ndaa yo Cristo Jesúš vijna, ka kuu yo nanu ja ni ka ji'i yo, ja tukaa ka yi'i yo jiin kuachi, ja tukaa kaka yo jiin kuachi, nusa. <sup>3</sup> Ko na ni ka janducha yo ti ni ja'a yo jandaa ja kandixia ndaa yo Cristo Jesúš. Jiin jniñu un ni ka kachi yo ja ja ni ji'i ya ja'a yo, ti ni ka yi'i yo jiin ya. <sup>4</sup> Na ni ka janducha yo ni ka ja'a yo jandaa ja ka yi'i yo jiin ya nanu ni ñunduji yo jiin ya. Ti kuu nanu ja ni ka nandoto yo tuku jiin ya. Nusa ti vijna jika ndaa yo nuu Yandios ansu nanu jika yo sa ni kandixia ga yo Jesúš. Yukan kundaa chi jiin iin jniñu ña'nú Tata yo Yandios ni naxndoto ya Jesúš nuu ñuji'i, ti suni sia'an sa'a Yandios iin jniñu ja na kaka ndaa yo nuu ya vijna, ansu nanu jika ka yo niku ti sa ni kandixia ga yo Jesúš.

<sup>5</sup> Hora ni ka janducha yo, ni ka ja'a yo jandaa ja ka yi'i yo jiin Jesúš na ni ji'i ya. Suni kachi yo ja ka yi'i yo jiin ya hora ni nandoto ya nuu ñuji'i, nava na kaka ndaa yo nuu ya vijna, ansu nanu ni ka jika yo na ti kandixia ga yo maa ya. <sup>6</sup> Ti jandaa ndixia taka un chi tukaa ka jika yo nanu ni ka jika yo na ti kandixia ga yo Cristo. Chi taka jniñu kue'e un ni naa nu ni ji'i Cristo nda'a cruz. Ti siki jniñu ni sa'a Cristo yi'i yo jiin ya ni sa'a Yandios. Ni naa jniñu maa yo ja ni sa'a yo ni junukuachi yo nuu kuachi, nanu ni ka kuu yo muzu nuu kuachi un. Ko tukaa kuiti, chi vijna ti ka yi'i yo jiin Cristo. <sup>7</sup> Ti siki ja ni naa jniñu maa yo ja ni sa'a yo nu ni ka junukuachi yo nuu kuachi, yukan kundaa ja kachi Yandios ja tukaa jna'nu ndatu yo nava tukaa kundio ini yo ka junukuachi yo nuu kuachi.

<sup>8</sup> Kandixia yo ja ka yi'i yo jiin ya nanu ni ka ji'i yo jiin ya. Nu sia'an kuu ti suni sia'an kandixia yo ja ja ni ka yi'i yo jiin ya hora ni naxndoto ya nuu ñuji'i. Sia'an ni sa'a Yandios jiin yo nava na kaka ndaa yo nuu ya vijna, jiin ja na kuchaku yo jiin ya ja kuu saa ni. <sup>9</sup> Chi ka jini ndaa yo ja iin ni jinu ni nandoto ya nuu ñuji'i ja tukaa kuiti ja kuū ya, chi ni kundee ya. Ti suni ka kundee yo ja ka siuku yo jiin jnu'un ya, chi ka yi'i yo jiin ya. <sup>10</sup> Ti maa Cristo, iin jinu ni ni ji'i ya ja chunaya ka kuachi yo, ko ja chaku ya vijna ti mani sa'a ya ja kuni Tata Yandios. <sup>11</sup> Ti nuu maa ra naa ra ja ka yi'i ra jiin Cristo, na kachi

ri ja na kondo'o va'a ini ra siki jniñu nu ni ka jika ra na ti ka kandixia ga ra Cristo, ja ni naa jni'nu un nu ni ka junukuachi ra nuu kuachi un. Ti vijnalna, na naku'un ini ra ja na kunukuachi ra nuu Yandios, chi ja ka yi'i ra jiin Cristo Jesú.

**12** Nusa ti tukaa kundio ini ra ja kunukuachi ra nuu kuachi, ja ka sa'a ra sava'a ni ga jniñu kue'e ja kuni yiki kuñu ra. **13** Tukaa kundio ini ra ja kunukuachi ra nuu kuachi, ja tukaa sa'a ra jniñu kue'e ja kuni yiki kuñu ra, chi ja ni naa jniñu ja ni ka jika ra sa ni ka yi'i ra jiin Cristo. Ko vijnalna kachi ra ja na kuandatu ra taka jnu'un Yandios, nava na kunukuachi ra nuu ya jiin ni ini ni aña ra. **14** Chi tukaa ka kuu ra muzu nuu kuachi nava na kunukuachi ra un, chi tukaa ta'u Yandios jniñu nuu yo ja kuandatu yo ley ni ja'a ya nuu Moisés, ti jiin yukan ka kendo ndaa yo nuu ya. Chi su'va, ka kunukuachi yo nuu Yandios, chi ni kunda'u ini ya yo'o ja ni taji ya Jesú na kuü ya ja'a yo.

### *Kuanukuachi yo nuu mani maa Yandios*

**15** ¿Nusa ti nasa ka ndo'o ini yo vijnalna? ¿Ka ka'an yo ja vatuni ka sa'a yo kuachi chi kunda'u ini ya yo'o vijnalna, ja tukaa ta'u Yandios jniñu nuu yo ja na siuko yo ley ni ja'a ya nuu Moisés? ¿Tukaa ga siuku yo ley un, chi vijnalna mani ja kandixia ndaa yo nuu Jesú ja ni taji Yandios chunaa ya kuachi yo nu? ¿Sia'an ka ndo'o ini yo nusa? ¡Tu kuu kuiti! **16** Chi jandaa ndixia ja ka jini ra, ja nu chiso ra jnu'un ja ka kendo ra nanu muzu nuu inga chaa un, ti kaa nuu kuu ja kuandatu ra nuu chaa un. Suni sia'an, nu kundio ini ra ka siuku ra jiin kuachi, nusa ti ka kuu ra nanu muzu nuu kuachi. Ko na kondo'o ra iin nundo'o xaan ja naa ra maa ra siki kuachi un. Ko nu kunukuachi ra nuu Yandios ja kuandatu ra jnu'un ya, ti siki yukan na kachi ya ja tukaa jna'nu ndatu ra ja taji ya nuno'o xaan nuu ra. **17** Ko vijnalna nakuta'u ri nuu Yandios ja tukaa ka kendo ra nanu muzu nuu kuachi, chi jiin ni ini ni aña ra ka janta'u ra maa jnu'un ndaa ja ni skandixia ya ro'o naa ra. **18** Ja ni ka kee ra ini nda'a kuachi nava na nduu ra nanu muzu ja junukuachi ra nuu Yandios, ja kuandatu ra jnu'un ya.

**19** Ru'u Pablo, xndaku ri nuu ra jiin jnu'un siki nasa kuu jiin iin muzu ini ñuyivi ja'a, chi tu kivi yachi injnuni ra maa jnu'un ja kuni xndaku ri nuu ra. Ti xnukuu ini ri ro'o undi naa kandio ini ra ja kunukuachi ra nuu kuachi, ja mani jniñu ndeva'a ni ka sa'a ra jiin yiki kuñu ra, ja ka kuni'in xaan ini ra siki ley Yandios. Ko vijnalna kachi ri nuu ra ja na kundio ini ra chi xndoo ra taka jniñu kue'e un nava kunukuachi ra nuu Yandios jiin ni ini ni aña ra, ja na kuandatu ra mani jnu'un ndaa Yandios. **20** Chi undi nuu ni kundio ini ra ka junukuachi ra nuu kuachi, ti tu kuiti kundio ini ra ja kuandatu ra jnu'un ndaa Yandios. **21** Ti jikajnu'un ri nuu ra, ¿nasa ni kundee ra jiin jnifü kunchuku ra sa ni kandixia ra nuu Cristo? ¿Nasa ni chinddee taka jniñu kue'e ni ka sa'a ra? ¡Tu kuu kuiti! Ti vijnalna kukanuu ra siki taka jniñu kue'e ni ka sa'a ra sa ni kandixia ra Jesú. Ti jandaa kuu ja na naa taka yivi ka sa'a i jniñu kue'e un. **22** Ko vijnalna kachi ri ja maa ra naa ra ni ka kee ra ini nda'a kuachi nava na ka nduu ra muzu ja junukuachi nuu Yandios. Chi ni ka sasiin ra nuu jniñu kue'e un nava na koo ndoo koo ii ra nuu ya. Ti na ni'in ra ta'u nuu Yandios ja kuchaku ra ja kuu saa ni. **23** Chi jandaa kuu ja ta'u ka ni'in yivi siki kuachi i kuu ja na naa i maa i. Chi su'va, ta'u ja kua'a Yandios nuu yo kuu ja kuchaku yo ja kuu saa ni, chi ni ka yi'i yo jiin Jito'yo Cristo Jesú.

### *Tukaa kunukuachi yo nuu kuachi*

## 7

<sup>1</sup> Ñani ri, ja suni ka yi'i ra jiin Cristo Jesús, na xndaku ri iin jnu'un kanuu nuu ra, chi ndixia ri ja ka jini va'a ra siki taka ley ja iyo. Ka jini va'a ra ja taka ley un ta'u jniñu nuu yo ja kuu ni kani kuchaku yo. <sup>2</sup> Ti ka jini va'a ra ja tu kua'a ley un jnu'un ja na kusiin iin ñasi'i nuu yii ña nu chaku da. Ko nu ni ji'i da, ti ja ni keta'u ña ley ja ni kejña'an ña jiin da. <sup>3</sup> Ti nu najna'an ña jiin inga chaa nu nu chaku ga yii ña, ti konani ña iin ña'an yisikinchaa yii ña. Ko nu ja ni ji'i yii ña, ti keta'u ña chii ley un. Ti vasu ni najna'an ña jiin inga chaa, ko tukaa yisikinchaa ña yii ña.

<sup>4</sup> Ti suni siki maa ra naa ra ñani ri, na kachi ri ja ka kuu ra nanu ja ni ka ji'i ra siki ley Yandios, chi tukaa kankuachi ley ya nuu ra siki kuachi ra, chi ni ka kandixia ra jniñu ni sa'a Cristo nuu ni ji'i ya ti ni chunaa ya kuachi yo, ja ni ndoto ya nuu ñuji'i. Ti vijna ja ka yi'i ra jiin Cristo nava na sa'a ra sava'a ni ga jniñu ndaa kuni Yandios. <sup>5</sup> Ko na ti ka kandixia ga yo Cristo, ti ni kundio ini yo ja ka sa'a yo sava'a ni ga jniñu kue'e. Ti vasu ni kachi ley un ja tu kuni sa'a yo jniñu kue'e un, ko jiin maa jnu'un un, chi vi'i ga ni kundio ini yo ka sa'a yo sava'a ni ga jniñu ndeva'a jiin yiki kuñu yo. Ti jiin jniñu ndeva'a un ka ni'in yo ta'u ja na naa yo. <sup>6</sup> Ko vijna tukaa, chi na ti kandixia ga yo Cristo ni ka yi'i yo jiin maa ley ni ja'a Yandios nuu Moisés, ti ni kankuachi ley un siki yo, ti ni ka jna'nú ndatu yo siki kuachi yo. Ko vijna ka kuu yo nanu ja ni ka ji'i yo nuu ley un. Ni ka kee yo ini nda'a ley un ti tukaa ka jna'nú ndatu yo siki kuachi yo. Vijnna ti chindée Espíritu Santo yo'o ja na kunukuachi yo nuu Yandios, ti tukaa kunukuachi yo nuu kuachi, ti siki kuachi un ni jna'nú ndatu yo jiin jnu'un ley ni ja'a Yandios nuu Moisés, ko vijna tukaa.

*Iyo uu jnu'un ini yo*

<sup>7</sup> ¿Nusa ti nasa ka ndo'o ini ra? ¿Ka ka'an yo ja ley Yandios un ndiso kuachi nu? ¡Tu kuu kuiti! Chi ru'u Pablo, na kachi ri nasa ni jna'an ri. Chi nu tu ni kenda ley Yandios, va tu nakuni ri ja ini ri jiin kuachi, ni tu ni nakuni ri ja niní kundio ini ri ndajniñu jna'an ri. Ko ni kenda ley ja ni ja'a ya nuu Moisés, ti ni kachi: "Tu kundio ini ra", kachi. <sup>8</sup> Ti vasu sia'an ni kachi ley Yandios, ko siki ru'u ni kundee kuachi un, ti vi'i ga ni keja'a kundio ini ri ja sa'a ri kua'a jniñu ndeva'a. Ko nu tu iyo ley un, va tu ni nakuni ri ja jandaa uu ja ñu'un chitu ini ri jiin kuachi. <sup>9</sup> Undi nuu ni kusi'iní ri nasa ni kuncha ri, chi tuja'i kivi inijnuni ri nasa kuni ka'an jnu'un ley Yandios. Ti sa ni kivi inijnuni ri siki nasa kuni ka'an ley un, ja kachi ja tu kundio ini yo ndajniñu jna'an yo. Yukan ni nakuni ri ja jandaa ni kuni'iní ini ri jiin kuachi un, ko tu kuu kuiti jniñu ja kundee ri jiin kuachi un. <sup>10</sup> Vasu ni ja'a Yandios ley ya ja na chaku va'a yo ini ñuyivi ja'a, ko ru'u, ni jini ndaa ri ja tu kuu kuiti ja kuandatu ri ley ya. Ni sa'a ley ya nanu ja ni ji'i ri, chi tu kuiti jniñu ni ni'in ri ja kuandatu ri ley un, chi niní ni kundee kuachi siki ri. <sup>11</sup> Vasu jandaa ndixia ni ta'u jniñu ley Yandios siki nasa kunchuku yo ini ñuyivi ja'a, ko tu ni kundee ri. Chi su'va ni kundee kuachi siki ri. Ni kendo xndaa'u ri ja ni ndo'o ini ri ja kundee ri siki kuachi, ko ni jna'an ri nanu ja ni ji'i ri, chi tu kuiti ni ni'in ri jnu'un ja kundee ri, chi niní ni kundee ri kuachi siki ri. Vasu ni ta'u jniñu ley Yandios nuu ri, ko tu ni kundee ri kuandatu ri, chi niní ni kundee kuachi siki ri. <sup>12</sup> Nusa ti jandaa ndixia ja ley Yandios iyo ndoo iyo ndaa va'a siki taka jniñu ta'u nuu yo. Ti ka'an ndaa ley un nu kankuachi siki yo, ti kachi ja jna'nú ndatu yo siki kuachi yo.

<sup>13</sup> Yukan ti vasu tu ni ni'in ri ni iin jnu'un ja kuandatu ri ley un, ¿ti yukan kuni ka'an ja tu kuiti ni jajniñu ley ya nu? ¡Tu kuu kuiti! Chi nu tu ni kenda ley ya, va tu kivi inijnuni ri ja ndixia chitu ini ri jiin kuachi. Ni kuu nanu ja ni ji'i ri, chi tu kuiti jniñu ni ni'in ri ja kundee ri jiin kuachi un. Ti siki yukan, ni kivi inijnuni ri ja ndaa ndixia ni chitu ini ri jiin kuachi.

**14** Ru'u Pablo, na kachi ri ja vijna ti chaku ini ri ja maa ley Yandios ja iyo ndoo iyo ndaa ley un, chi maa Espíritu Yandios ni ja'a ley un. Ko nu kancha ri nuu ñuyivi ja'a, iyo ja nini kuni'in ini ri siki ley ya. Nini yuji ri jiin kuachi nanu kuu ri muzu nuu kuachi, **15** chi tu ñukuu ini ri siki kuachi un ja tu va'a, ansu sa'a ri maa jniñu va'a ja ndio ini ri. Chi su'va, iyo ja sa'a ri maa kuachi ja jito u'u ri.

**16** Yukan, nu sa'a ri kuachi un, vasu ndio ini ri ja sa'a ri mani jniñu va'a, nusa ti ja'a ri jandaa jiin kuachi un ja ka'an ndaa ley Yandios nu kachi ja jna'nú ndatu yo siki kuachi yo. **17** Ko vijna, ru'u Pablo, tukaa kundio ini ri siin ri jiin kuachi, ko suni nini iyo iin jnu'un ini ri ja siuku ri jiin kuachi. **18** Ti vasu suni iyo ja nini ndio ini ri sa'a ri jniñu va'a, ko tu kundee ri ja sa'a ri un. **19** Vasu kundio ini ri mani jniñu va'a, ko siin sa'a ri kuachi, ansu ndio ini ri sa'a ri kuachi un. **20** Ko nu sia'an kuu, nusa ti ni kancha ri nuu ñuyivi ja'a, ti jandaa kuu ja nini iyo iin jnu'un ini ri ja siuku ri jiin kuachi.

**21** Nusa ti jini va'a ri ja taka jinu kundiyo ini ri sa'a ri jniñu va'a, ti suni kande ini ri iin jnu'un ja sa'a ri kuachi. **22** Ti vasu sia'an kuu, ko jandaa kuu ja iyo siin ri jiin ley Yandios, ti kundio ini ri kuandatu ri ley ya jiin ni ini ni aña ri. **23** Ko siki ja kancha ri nuu ñuyivi ja'a, jini va'a ri ja nini kuu ja ka kanaa jnu'un un jiin jnu'un ndiyo ini ja kuandatu ri ley Yandios. Ti vasu ndio ini ri ja kundee ri siki jnu'un kuachi un, ko iyo ja kundee kuachi un siki ri. **24** Yukan kundaa ja chaa nda'u xaan kuu ri, chi tu siuku ndaa ri ley Yandios. Yukan ti jikanda'u ri, ¿nau kuu ja nama ru'u, nava tukaa kundee kuachi siki ri nu kancha ri ñuyivi ja'a? ¿Nau kuu ja nama ru'u nusa nu? **25** ¡Na kuta'u ri nuu Yandios ja maa Jito'yo Cristo Jesús, na kin nama ya ru'u!

Nusa ti nini iyo inijnuni ri ja kuandatu ri ley Yandios, ti nini kundio ini ri kuanukuachi ri nuu ya. Sia'an ndixia, ko suni jandaa kuu ja nu kancha ri nuu ñuyivi ja'a, ti nini iyo iin jnu'un ini ri ja sa'a ri kuachi, ja kendo ri nanu iin muzu nuu kuachi.

## 8

**1** Nusa ti tukaa kachi Yandios ja jna'nú ndatu yo siki kuachi yo, ti tukaa kua'a ya nuno'o xaan siki yo. Chi tukaa kundio ini yo ja kuandatu yo jnu'un ini yo ja na sa'a yo kuachi, chi vijna kundio ini yo ja kuandatu yo maa jniñu ta'u Espíritu Santo siki yo. **2** Vijna ka yi'i yo jiin Cristo Jesús, ti siki yukan, maa Espíritu Santo sa'a ya ja na kuchaku yo ja kuu taka saa ni. Ko nu kanchuku yo nuu ñuyivi ja'a, maa Espíritu un chindee ya yo'o jiin jniñu ña'nú ya nava na kundee yo siki jnu'un iyo ini yo ja sa'a yo kuachi. **3** Chi maa ley ni ja'a Yandios nuu Moisés, tu ni nama yo'o nava tukaa jna'nú ndatu yo siki kuachi yo. Chi nu kanchuku yo ñuyivi ja'a, va tu kundio ini yo kuandatu yo ley Yandios un, chi nini kundio ini yo ka siuku yo jiin kuachi. Ko Yandios ni kundee ya nu ni taji ya maa Se'e ya nuu ñuyivi ja'a, ti ni kendo ya jiin iin yiki kuñu ya nanu yo'o. Ko siki yiki kuñu yo'o, iyo ja nini kundio ini yo ka sa'a yo kuachi. Ko siki kuachi yo un, ni chunaa Cristo yo'o, ti jiin jniñu ya un ni ja'a jandaa Yandios ja tukaa kundee kuachi nuu ñuyivi ja'a. Jandaa ndixia kuu un, ko vasu nu kanchuku yo ñuyivi ja'a nini kuu ja kundio ini yo ka sa'a yo kuachi un. **4** Ko ni taji Yandios Se'e ya Jesúz ja chunaa ya kuachi yo, nava na kundaa ini yo siki ja tukaa jna'nú ndatu yo siki kuachi yo, jiin ja kundio ini yo kuandatu yo jniñu ta'u ley Yandios nuu yo. Yukan ni sa'a ya ja'a yo, chi yo'o kuu maa yivi ja kandio ini yo ja kuandatu yo jniñu ta'u Espíritu Santo nuu yo, ansu ja kuandatu yo nu jnu'un iyo ini yo ja sa'a yo kuachi.

<sup>5</sup> Chi yivi ja nini jandatu i nuu kuachi iyo ini i, ti jandaa ndixia kuu ja nini ñukuu ini i ja siuku i jiin maa kuachi kandio ini i un. Chi su'va, yivi ja ka jandatu i maa jniñu ta'u Espíritu Santo siki i, ti ka ñu'un ini i ja siuku i mani jniñu ja ta'u Espíritu un. <sup>6</sup> Ko yivi ja nini kandio ini i ka siuku jiin kuachi ti ka kuu i nanu ñdiyi, chi tu ka yi'i i jiin Yandios. Yivi ja kandio ini i ja siuku i maa jniñu ta'u Espíritu Santo, ka jini ndaa yivi un ja ka yi'i i jiin Yandios, ti ni ndumani ya jiin i naa i. <sup>7</sup> Ko siki yivi ja nini ka jandatu i jnu'un kuachi iyo ini i, mani ka sani'in ini i siki Yandios. Ti nu sia'an kuu, nusa ti tu kuiti jnu'un NASA kuandatu i ley ya. <sup>8</sup> Ti taka yivi ja ka siuku jiin jnu'un kuachi iyo ini i un, tukaa kusii kuti ini Yandios nuu i.

<sup>9</sup> Ko ro'o ja ka kandixia ra Jesús, na kachi ri ja kuandatu ra nu maa Espíritu Santo, ansu ja kuandatu ra jnu'un iyo ini ra ja siuku ra jiin kuachi. Ti jandaa ndixia kuu yukan, chi ni kejna'an Espíritu Santo jiin ra naa ra. Ko nu tu kancha Espíritu Yandios jiin yivi, ti tu ka yi'i kuiti yivi un jiin Cristo. <sup>10</sup> Ti nu kancha Cristo jiin ra, ti sa'a Espíritu Yandios ja kuchaku ra ja kuu taka saa ni. Sia'an sa'a ya vasu na chaa kivi ja kuú yiki kuñu ra sa'a kuachi. Sia'an sa'a Cristo chi ni kachi ya ja tukaa jna'nudata ra ja kuu kuachi ra, ti ni kendo ndaa ra nuu ya. <sup>11</sup> Ti nu jandaa ndixia kuu ja ni kukutu Espíritu Yandios jiin ra naa ra, ya ja ni xndoto Jesús nuu ñuji'lí, ti jiin jniñu ña'nun, ni ja'a Yandios jandaa ja suni na xndoto ya yiki kuñu ra jiin jniñu ña'nun Espíritu ya. Ti jandaa ndixia kuu ja yi'i kutu Espíritu ya jiin ra naa ra.

<sup>12</sup> Sia'an kuu ñani ri, siki ja ni ka kukutu yo jiin Espíritu Santo, tu kuiti kundiso yo jniñu kuandatu yo jnu'un kuachi ini yo nu ka chaku yo ini ñuyivi ja'a. <sup>13</sup> Chi nu kandio ini ra siuku ra jiin kuachi un ja ni kanchuku ra ini ñuyivi ja'a, ti jandaa ndixia kuu ja xnaa ra maa ra. Ko su'va, na ku'un ini ra ja kuandatu ra nuu maa Espíritu Santo, nava na chindee ya ja tukaa ga siuku ra jiin kuachi. Ti nu sia'an kuu, ti ka jini ndaa ra ja ka yi'i ra jiin Yandios ti kuchaku ra ja kuu saa ni.

<sup>14</sup> Chi taka yivi ja ka jandatu i maa jniñu ta'u Espíritu Yandios, jandaa ndixia ja maa i ka kuu Se'e Yandios. <sup>15</sup> Chi Espíritu ja ni ja'a ya nuu ra, tu kuu iin nundo'o ja na nduu ra nanu iin muzu nda'u nuu Yandios, ja yu'u da ja na taji Yandios nuno'o xaan nuu da. Chi su'va, sa'a Espíritu Santo jiin yo'o ja na kuni ndaa yo ja ka kuu yo Se'e Yandios. Ti maa Espíritu un sa'a, ti nu kanajaa yo Yandios, ka'an yo: "Tata ri." <sup>16</sup> Ti maa Espíritu Santo un sa'a jiin inijnuni yo ja jandaa ndixia ka kuu yo Se'e Yandios. <sup>17</sup> Ti jandaa ndixia kuu ja ka kuu yo Se'e Yandios, ti suni ndixia kuu ja na kua'a ya iin ta'u nuu yo, ti ta'u un kuu ja na nduña'nu yo jiin Cristo ini ñuu nuu ta'u ya jniñu. Ko ni kanchuku yo nuu ñuyivi ja'a, kondo'o ndixia yo nanu ni ndo'o Cristo, chi koto u'u yivi siki yo nanu ni ka jito u'u i Cristo. Ko jiin nundo'o un satu'va Yandios yo'o ja na nduña'nu yo jiin Cristo ini ñuu nuu ta'u ya jniñu.

### Kundatu yo ja kuu kivi ka'nu

<sup>18</sup> Ru'u Pablo, ndo'o va'a ini ri siki nasa ka ndo'o yo vijna ja ka yi'i yo jiin Cristo. Ti na kachi ri ja lulu xaan nundo'o un, ti tu nau ni kuu ja kuu nuu jniñu ña'nun xaan sa'a Yandios nuu kivi ka'nu ja kii. Chi nuu kivi ka'nu un na kuni ndijin yo ja suni nduña'nu yo jiin Cristo. <sup>19</sup> Ti suni taka ndajniñu ja ni sa'a Yandios, taka ja iyo nuu ñuyivi ja'a, ka ñukuu ini i ja kandatu i undi na jaa kivi ka'nu xaan un. Ti na xna'an ndaa Yandios nuu kivi un ja na nduña'nu taka se'e ya. <sup>20</sup> Ti taka ndajniñu ja ni jankoo suni kandatu ja kuu kivi ka'nu un, chi taka ja iyo nuu ñuyivi ja'a ni kivi chii jnu'un ja tukaa kendo va'a. Ti ansu keja'a maa taka nundo'o un, chi maa Yandios ni ta'u jniñu ja sia'an na

kendo. Chi tu ni kuni ya ja na kendo sia'an ja kuu saa ni. <sup>21</sup> Ja kuu kivi un ni iin ndajniñu tukaa kendo ava, vasu taka ndajniñu ja kuan te'yu vijnna. Ko na chaa kivi nu tukaa kendo sia'an ni, ti nu na jaa kivi ka'nun un, tukaa kanchuku Se'e Yandios jiin nundo'o ja iyo nuu ñuyivi ja'a. Ko nanita'u i ja na nduña'nu i ini ñuu nuu ta'u Yandios jniñu. Ti ja kuu kivi ka'nun xaan un, tukaa kendo ni iin ndajniñu ava ñuyivi ja'a, chi nduu vii xaan.

<sup>22</sup> Ti jini yo ja taka ja ni jankoo, chi undi vijnna, ti iin nuu ni ja kuan te'yu nanu ja nda'u xaan, jiin ja kañña ini ja kundatu kivi nu ndo'o xaan. <sup>23</sup> Ko ansu maa iin ni ndajniñu ñuyivi ja'a, chi suni siin yo kondo'o yo ja kanchuku yo nuu ñuyivi ja'a, ti suni kundatu nduu yo ja kuu kivi ka'nun un, vasu ja ni ndusii ini yo siki ja ni ni'in yo Espíritu Santo ni kancha ya jiin yo. Ko vasu sia'an kuu, ko iyo jnu'un kui'ya ini yo ka ndi'i ini yo ja kanchuku yo nuu ñuyivi ja'a, chi tu ja'i na chaa kivi ka'nun un nava na ni'in yo ta'u yo nuu Yandios. Ti nuu kivi un na sama ya yiki kuññu yo nava tukaa kondo'o yo jiin, nava na nduña'nu yo nuu ta'u Yandios jniñu. <sup>24</sup> Ti undi maa kivi ni keta'u yo nuu Yandios yo'o, kivi ja ni keja'a kandixia yo Jesú, nuu maa kivi un ni keja'a kundio ini yo ja na chaa kivi ka'nun nuu na sama ya yiki kuññu yo. Ko tu ja'i ndenda kivi un. Siin kundatu yo ja kuu kivi un, chi ndixia ndaa kuu ja tukaa kundatu yo nu ja ni ni'in yo ta'u yo nuu Yandios. Ko tu ja'i na koo kivi ka'nun un. <sup>25</sup> Ti vasu tu ja'i ndenda kivi un, koto xndi'i ini yo. Chi su'va siin kundio ini yo ja na kenda kivi ka'nun un.

<sup>26</sup> Ko nu kunchuku yo nuu ñuyivi ja'a, maa Espíritu Santo kua'a ya jnundee ini yo nava tu xndi'i ini yo jiin nundo'o ndo'o yo. Ti ndixia ja tu jini va'a yo nasa kanta'u yo ja kuu ja kanuu ga. Ko maa Espíritu Santo chindree ya yo'o nu jikanta'u yo nuu Yandios, chi jikanta'u ya nuu ya ja kuu yo'o naa yo, vasu tu ni'in yo maa jnu'un ndaa kuni ka'an yo nuu ya. Ti kundio ini yo jikanta'u yo nuu ya, ko nu tu ni'in yo maa jnu'un, ti Espíritu Santo chindree ya yo'o ja jikanta'u ya ja kuu yo'o naa yo. <sup>27</sup> Ti jini va'a Yandios nu kundio ini kanda'u yo nuu ya, ti jini va'a ya maa jnu'un jikanta'u Espíritu Santo ja'a yo nu tu ni'in yo maa jnu'un ja kakanta'u yo nuu ya. Ti ndixia ndaa ja jini Yandios, chi yukan kuu iin jniñu kanuu ga ni ja'a ya nuu Espíritu Santo ja kanda'u ya nuu Yandios ja kuu yo'o naa yo.

### *Chindree Espíritu Yandios nu kanchuku ñuyivi ja'a*

<sup>28</sup> Ti ru'u Pablo na kachi ri ja siki ni ndumani ra jiin Yandios, ti jandaa ndixia ja taka nundo'o ja ka ndo'o ra nu kanchuku ra ñuyivi ja'a, ti jajniñu ya nundo'o un nava na ndundee ini ra nu kunukuachi ra nuu Yandios nuu ñuyivi ja'a. Ti sia'an sa'a Yandios chi ni nakaji ya yivi ja ka yi'i i jiin ya, ti yukan ni kundaa ini ya undi na jana'an. <sup>29</sup> Chi maa Yandios kuu yivi ni jini nuu i undi nuu, ti ni nakaji ya maa i ja na ndundoo i, ti ndundaa i ja na ndaku i nanu kaa maa Se'e ya, ti na nduña'nu i jiin ya ini ñuu nuu ta'u ya jniñu. Ti ndixia ja Se'e ya kuññu ga ma'ñu kua'a xaan yivi ja ni nakaji Yandios ja ndundoo ti ndundaa, ja ka ndaku i nanu Se'e ya. Ni nakaji Yandios ja ka yi'i i jiin ya, ko maa Se'e ya kendo ña'nu ga. <sup>30</sup> Ti siki taka yivi ni ndo'o ini Yandios ja nakaji ya yivi un, ti ni jisonchaa ya i ja ka yi'i jiin ya, ti ni kachi ya siki i ja tukaa jna'nun ndatu i siki kuachi, ti ni kachi ya ja na nduña'nu i ini ñuu nuu ta'u ya jniñu. <sup>31</sup> ¿Nusa ti, nasa ka ndo'o ini ra siki jnu'un un? Ti na kachi ri ja ndixia kuu ja ka'an Yandios ja'a yo. Ti jandaa kuu, nusa ti tu iyo ni iin yivi ka kundee i siki yo. <sup>32</sup> Ti tu ni nama Yandios maa iin ni Se'e ya nu ni ji'i ya nda'a cruz. Chi su'va, ni ja'a ya maa iin ni se'e ya ja chunaa ya kuachi yo, ja ni ji'i ya ja kuu ndi'i yo ja kandixia yo maa ya vijnna. Ti nu sia'an kuu, nusa ti suni jandaa kuu ja kua'a ya nuu yo sava'a ni ga ja nandi'i yo nava na kundee yo ja

kanchuku yo ñuyiví ja'a. <sup>33</sup> Ti nu sia'an nama ya yo'o, ja siki yukan ni nakaji ya yo'o, nusa ti tu iyo ni iin yiví ka kuni kankuachi siki yo, chi maa Yandios ni kachi ya ja tukaa jna'nú ndatu yo siki kuachi yo.

<sup>34</sup> Ti tu iyo ni iin yiví ka kuni kachi i ja jna'nú ndatu yo siki kuachi yo, chi maa Cristo Jesú斯 ni ji'lí ya chunaa ya kuachi yo, ti tu ní kendo ya nuu ñuji'lí, chi ni nandoto tuku ya, ti ni ndaa ya andíví nuu ni nduña'nu ya ja nukoo ya nuu nda'a kua'a Yandios. Ti vijná ndixia ja ka'an ya ja'a yo. <sup>35</sup> Tu iyo ni iin nundo'o ja kuni sasiín yo nuu Cristo ja tukaa kunda'u ini ya yo'o. Vasu kondo'o yo kua xaan nundo'o nuu ñuyiví ja'a, vasu ka xndí'i ini yo ti ka sa'a yiví jniñú ndeva'a siki yo siki ja kandixia yo Cristo, xi na koo iin jnama xaan nuu yo, xi kumani sa'ma yo, xi ka yu'u yo jiin taka nundo'o un, xi ka'ni i yo'o, ko ni iin nundo'o un kuni ja sasiín yo nuu Cristo ja tukaa kunda'u ini ya yo'o. <sup>36</sup> Chi siukan yoso nuu tutu ii Yandios jnu'un ja ka'an yiví kandixia jiin Yandios:

Ndi kivi ka nakua'a i yo'o ja na kuū yo.

Ti kivi ka jito u'u yo'o kachi i ja na kuū yo nanu ríi ja ka ja'ni i ka yee i kuñu un.

Kachi tutu.

<sup>37</sup> Ko vasu ndo'o yo nundo'o ja'a nu kanchuku yo ñuyiví ja'a, ti kundee yo siki taka nundo'o un. Kundee yo chi ka yi'i yo jiin Cristo, ti jandaa ndixia kuu ja kuanda'u ini ya yo'o. <sup>38</sup> Ti ru'u Pablo, na kachi ri jandaa ndixia ja tu iyo ni iin nundo'o ja kuni tava yo nuu Yandios ja tukaa kunda'u ini ya yo'o. Vasu na kondo'o yo nu kunchuku yo nuu ñuyiví ja'a siki ja kandixia yo Jesú斯, ti vasu na kuū yo, xi iin ángel xi iin yiví ña'nú ñuyiví ja'a ka sa'a ndeva'a siki yo, ni nundo'o ja ka ndo'o yo vijná xi ja koo, <sup>39</sup> ni iin jniñú ndeva'a undi nuu sukun, ni iin jniñú ndeva'a undi nuu kunu, xi sava'a ni ga inga yiví xi jniñú ña'nú nuu taka nuu ñuyiví ja'a, ni iyo inga ndajniñú ja kuni kundee siki yo. Ti tava yo nuu Yandios ja jiin Jito'yo Cristo kunda'u ini ya yo'o.

### *Ni nakaji Yandios yiví Israel*

## 9

<sup>1</sup> Ru'u Pablo, ja yi'i ri jiin Cristo ka'an ndaa kuiti ri, ti tu xnda'u ri ro'o naa ra, chi ka'an ri mani jnu'un ndaa ja maa Espíritu Santo ni ja'a inijnuni ri. <sup>2</sup> Ti na kachi ri ja kukui'ya xaan ini ri, ti nini na'nú ini ri nu ndo'o ini ri siki ñanijna'an ri, ja suni ka kuu i yiví hebreo. <sup>3</sup> Ti nu kuni Yandios, ti vatuni ja na kuxio ri nuu Cristo ti na naa ri ja chunaa ri ñanijna'an ri, <sup>4</sup> ja ka kuu i yiví hebreo. Ti maa i kuu maa yiví ni nakinse'e ya. Ti ma'ñu viko ni kancha ya jiin i, ti ni sa'a ya trato jiin i siki tijni jniñú ni ta'u ya nuu i jiin tijni jnu'un ni chiso ya nuu i. Ti ni ja'a ya ley ya nuu Moisés ja kuu maa i. Ti ni xna'an ya nasa chíñu'un i ya, ti nuu maa i ni stuu ya kua'a jnu'un. <sup>5</sup> Ti jandaa ndixia ka kuu i ñanijna'an taká tata hebreo na jana'an ja ni kuñá'nú. Ti suni nuu maa i ni kenda Cristo ja ni taji Yandios ndiso ya jniñú ña'nú, ti ni ndaku ya nanu iin chaa, ti Cristo kuu maa Yandios ja ta'u ya jniñú nuu tukaa ja iyo. Ti ja kuu ni kani na ka'an yiví ja kuñá'nú ya. Sia'an na koo.

<sup>6</sup> Ko tu ka'an ri ja tu ni siuku Yandios jnu'un ni keyu'u ya nuu yiví hebreo. Chi na kachi ri ja ansu ndi'i yiví hebreo kuu maa yiví ni nakaji Yandios ja na koo se'e ya. <sup>7</sup> Ti ansu ndi'i jna'an tata na jana'an Israel ja nani Abraham, ansu maa i ka kuu yiví ni nakaji Yandios, chi ni kachi ya nuu maa iin ni Abraham: "Nuu maa iin ni se'e ra Isaac na koo jna'an da nuu ni keyu'u ri ni chisojnu'un ri." <sup>8</sup> Yukan kuni ka'an ja tu ni nakaji Yandios ndi'i se'e Abraham ja ka ni'in da jnu'un ni keyu'u ya, chi nuu maa iin ni se'e ja ni nakaji ya kuu ja ni ni'in

da jnu'un ni keyu'u Yandios. <sup>9</sup> Chi ja'a kuu jnu'un ni keyu'u Yandios nuu Abraham: "Maa kivi ni jani ri ti kiji ri ti koo iin se'e yivi nuu nasi'i ra Sara", kachi ya.

<sup>10</sup> Ti ansu ja'a ni kuu ndi'i, chi suni Rebeca ni iyo uu se'e yivi ña, ti iin ni tata i naa i, ja ni kuu tata yo na jana'an Isaac. <sup>11-13</sup> Ti undi na ti kaku ga i naa i, ja tiki kuni ga i sa'a i ja va'a jiin ja kue'e, ti ja ni ka'an Yandios jiin nana i Rebeca, ti kachi: "Suchi ña'nun un kunukuchí i nuu suchi nukuu ga", kachi ya. Chi suni siki yukan ka'an tutu ii Yandios: "Ni iyo mani ri jiin Jacob, ko ni jito u'u ri Esaú", ni kachi Yandios. Ti yukan ni kundaa jnu'un maa Yandios ja ni nakaji ya yivi ni ndo'o ini ya, ja ni nakaji ya ti ni kana ya, ti tu ni ki'in ya jnu'un sava'a ni ga ndoo ni ka sa'a i, chi sia'an ni kuu ini maa ya.

<sup>14</sup> ¿Nusa ti nasa ka ndo'o ini ra? ¿Ko ndo'o ini ra ja tu iyo iin nuu ini Yandios ja sia'an sa'a ya nu? Ja ni ndumaní ya jiin Jacob, ko ni jito u'u ya Esaú, nusa? Jandaan kuiti ja tuu! <sup>15</sup> Chi undi na jana'an ni kachi Yandios jiin Moisés: "Ni ja kuu ini ri yukan kunda'u ini ri, ti ja kunda'u ini ri yukan kuu ini ri", kachi ya. <sup>16</sup> Yukan ti jandaa ndixia ja tu iyo ni iin jniñu ja kuni kinyii yo ja na kuan ka'nu ini Yandios nuu yo, chi mani maa Yandios kuni kunda'u ini ya yo'o. <sup>17</sup> Ti siki yukan suni yoso nuu tutu ii ja ni ka'an ya nuu rey nación Egipto: "Ni ndokani ri ro'o ja na kuurra rey nava jiin ro'o na stuu ri jniñu ña'nun ri, ti nava na kuichanuu sivi ri ni tu'u ñuyivi ja'a, ja ka nakuni yivi ja kuña'nu xaan ga ru'u ndixia", kachi tutu. <sup>18</sup> Nusa ti nau iin ja kunda'u ini ya, ti kunda'u ini ya. Ti nu na iin ja kuni kuni'in ini nuu ya, ti sa'a ya ja na ndundava ini nanu yuu.

<sup>19</sup> Ti sanaa ti kachi iin ra jiin ri: "Nu siukan kuu, ¿ndo chakuachi ya siki yo nusa? ¿Ko nau ja kuni kasi nasa ndo'o ini maa ya nu"? kachi ra. <sup>20</sup> Ko ro'o chaa nda'u! Na kachi ri nuu ra: "¡Nau ja kuu ra ja jani ini ra ja nachiso ra nuu jnu'un Yandios!" Jikajnu'un ri ro'o: Kuu ka'an iin kisi ñu'un jiin chaa ni sa'a: "¿Ndoo ni sa'a ra ru'u siukan"? kachi. <sup>21</sup> Ko chaa sa'a kisi un kuni sa'a da jiin ñu'un un sava'a ni ga nasa kuni maa da, chi jiin ñu'un sa'a da iin kisi va'a, ti suni kuu sa'a da kisi nda'u.

<sup>22</sup> Ti suni sia'an sa'a Yandios, chi sa'a ya nasa kuni maa ya. Chi sia'an ndixia ni sa'a ya ja ni satu'va ya yivi ja na koto u'i nuu ya, nava na xnaa ya yivi un. Ko xnakan xna'an ya nuu i taka jniñu ña'nun ni sa'a ya, ja ni kuiti xaan ini ya jiin taka jniñu ndevara'i na ka sa'a i. Ti yukan ni skun ndijin ya nuno'o ni taji ya siki yivi un. Ja siki yukan tu ni xnaa yachi ya yivi un, ja na siin sa'a ndevara'i. <sup>23</sup> Jiin jniñu ni sa'a Yandios nuu yivi ndevara'a un, ni xna'an kají ya ja vyi xaan kuña'nu ya siki jniñu ña'nun ni sa'a ya nuu yivi ja kunda'u ini ya. Chi undi najana'an ni satu'va ya yivi ja ka yi'i i jiin ya, ja na nduña'nu i nuu ta'u ya jniñu. <sup>24</sup> Ti suni ni nakaji ya yo'o ja na kandixia yo jnu'un ya, ko ansu mani yivi hebreo ni nakaji ya, chi suni ni nakaji ya yivi taka ga nación ja na kandixia i. <sup>25</sup> Chi suni sia'an ni ka'an Yandios nuu tutu Oseas: Yivi ja tu ni ka yi'i jiin ri, vijná ti kachi ri ja kuu i yivi yi'i jiin ri.

Ti yivi ja tu ni iyo mani ri jiin, vijná ti kachi ri ja kuu i yivi mani jiin ri.

<sup>26</sup> Ti taka nuu ni ka'an ri ja ansu yivi ñuu ri ka kuu i.

Ti siki maa i kachi yivi ja ka kuu i Se'e Yandios chaku, ja kancha ya ja kuu saa ni.

Kachi tutu.

<sup>27</sup> Suni ni'in ni ka'an profeta Isaías jnu'un siki yivi Israel: "Vasu ni nakaya xaan se'e yivi Israel nanu ñiti yu'u mar, ko ja kuu kuiti ni kuu yivi ja keta'u nuu Yandios, <sup>28</sup> chi maa Tata yo Yandios siuku yachi ya jnu'un ni chiso ya, ja ndonda ya siki yivi ka sa'a jniñu ndevara'i, ti na taji ya nundo'o ka'nun ga siki i", kachi tutu. <sup>29</sup> Ti siki ja ni nama ya yivi Israel, ni ka'an profeta Isaías nuu tutu:

Maa Yandios, ja kuu ya Jito'yo siki taka ja iyo undi andivi, jiin taka ja iyo ini ñuyivi.

Ko nu tu ni nama ya jaku jna'an yo na jana'an, ti va naa ndi'i yo niku, nanu ni xnaa ndi'i ya yivi ñuu Sodoma jiin yivi ñuu Gomorra, ja ni naa ndi'i kuiti.

Kachi tutu.

<sup>30</sup> Ni nakaji Yandios nau ja kuni maa ya, ¿nusa ti nasa kachi yo? Ru'u na kachi ri siki yivi inga nación, ja tu ni ka jitu ini i na kendo ndaa i nuu Yandios. Ti tjiní yivi un, ni ka kandixia i jnu'un Yandios. Ti siki maa i ni kachi Yandios ja na keta'u i, ti tukaa jna'nun ndatu i siki kuachi un. <sup>31</sup> Ko sa yivi Israel, ni ka jitu ndi'i ini i kuandatu i ley ni ja'a ya nuu Moisés, ja na kendo ndoo i nuu Yandios. Ko tu ni ka kendo ndoo i nuu ya ja na keta'u i, chi tu ni ka siuku ndaa i ley ya. <sup>32</sup> ¿Ti ndoo nusa? Chi vanuxia ka kuni kendo ndaa i nuu siuku i ley ya jiin maní jniñu maa i, ansu ja kandixia i jniñu ña'nun ni sa'a ndijin ya nuu i. Ko tu ni ka nde'e i nuu jniñu ña'nun ni sa'a Yandios. Chi su'va ni ka skexiko i jniñu ña'nun un tu ni ka kandixia i Yandios. <sup>33</sup> Ko yukan yoso nuu tutu ii Yandios:

Undi ñuu ri Sión kani ri maa yuu kanuu ga, ti yukan kuu maa jniñu ña'nun sa'a ya, vasu tu ka jandatu i.

Ti suni ka skexiko i jniñu ña'nun ja sa'a ya un.

Ko yivi na kandixia ndaa jniñu ña'nun un, chi jankivi kukanuu i.

Chi maa Se'e Yandios kuu ja sa'a ya jniñu ña'nun un.

Kachi tutu.

## 10

<sup>1</sup> Ñani naa ra ja suni ka yili' ra jiin Cristo, ru'u Pablo, na kachi ri ja ñukuu ini ri ti nini jikanta'u ri nuu Yandios ja'a yivi nación yo Israel, ja na chunaa ya i. <sup>2</sup> Chi ka'an ndaa ndixia ri ja va'a ka sa'a i chi ka ndi'i ini i ja ka chiñu'un i Yandios. Ko vasu sia'an ka sa'a i, tu ka chiñu'un ndaa i Yandios vasu ni xna'an ndaa ya nuu i naa i. <sup>3</sup> Ti tu ni ka janta'u i jnu'un ndaa Yandios siki nasa kendo ndaa i nuu ya. Chi su'va, ni ka siuku i ichi ka kuni maa i, ti jiin yukan ka ndo'o ini i ja ni ka kendo ndaa i nuu Yandios, vasu ni ka ndonda i siki jnu'un ndaa ya. Ti ni ka kuni'in ini i ja tu ka kuni kuanta'u i jnu'un ndaa ya siki kuachi i. <sup>4</sup> Tu ka janta'u i ja ni sino Cristo taka jnu'un ni chayika ley Moisés siki yo, ja vijná maní ja kandixia yo Cristo nava na kendo ndaa yo nuu Yandios, nava na kachi ya ja tukaa jna'nun ndatu yo siki kuachi yo. Ko tu ni ka janta'u i.

<sup>5</sup> Chi ni chaa Moisés siki nasa kendo ndaa yivi nuu Yandios, ti ni kachi: "Nu iin yivi na siuku ndaa i taka jniñu ta'u ley, nusa ti kuchaku va'a i nuu ñuyivi ja'a ti nii'n i ta'u nuu Yandios", kachi tutu. <sup>6</sup> Ko siki jnu'un ja nii'n yo nuu Yandios ja tukaa jna'nun ndatu yo siki kuachi yo, ti so nini ja kandixia yo jnu'un Cristo, chi kachi jnu'un ni ka'an Moisés nu ni chaa da: "Tu kani ini ra ja ki'in ra andivi", chi jiin jnu'un un skuun ra Cristo undi ñuyivi, ko tu kojnuni ja sa'a ra sia'an. <sup>7</sup> Xi nakani ini ra jnu'un ni chaa Moisés ja ka'an: "¿Nau kuu ja kinkuun undi nuu kunu xaan chii ñu'un un?" Ti jiin jnu'un un kani ini ra ja na tava ra Cristo nuu ñuji'i, ko tu kuu ja sia'an. Vasu na kuu sa'a ra taka jniñu ña'nun xaan un, ko tu kuu kendo ndaa ra nuu Yandios ja sia'an. Tu iyo ni iin jniñu ja kendo ndaa yivi nuu Yandios.

<sup>8</sup> Ko jnu'un siki nasa kandixia yo Cristo, iin ni kuu jiin jnu'un ni chaa Moisés nu ni kachi da: "Ko jini va'a ra jnu'un ndaa Yandios ti nini ndo'o ini ra siki un", kachi tutu. Ti yukan kuu maa jnu'un ja ru'u Pablo, jani ri siki nasa kandixia ra jnu'un Yandios siki Cristo. <sup>9</sup> Ti nu ka'an ndaa ra ja jito'o ra kuu Jesúz, ti nu kandixia ra jiin ni ini ni aña ra ja ja ni nandoto ya ma'lñu ñuji'i,

yukan kuu ja keta'u ra nuu Yandios. <sup>10</sup> Chi jiin ni ini ni aňu yo kandixia yo ja nij'i Jesúš ja'a yo, ti siki un kachi Yandios ja tukaa jna'nu ndatu yo siki kuachi yo. Ti ka ka'an ndaa yo ja Jito'yo kuu maa Cristo Jesúš, ti jiin yukan keta'u yo nuu ya. <sup>11</sup> Chi suni ka'an tutu ii Yandios: "Taka yívi ja kandixia i ya, chi jankivi kukanuu i", kachi tutu. <sup>12</sup> Ka'an sia'an chi iin nuu yívi hebreo jiin tako yívi inga nación. Chi maa ya kuu jito'yo nuu tendi'i yo, ti maa ya kunda'u xaan ini ya nuu tendi'i yívi ka'an nda'u jiin ya ja kuni kandixia i ya. <sup>13</sup> Chi sia'an ka'an tutu Yandios: "Taka yívi ja ka'an nda'u jiin Jito'yo ja kuni kandixia i ya, ti jandaa ndixia kuu ja na keta'u i nuu ya", kachi tutu.

<sup>14</sup> Ko tu kuni kanda'u i jiin ya nu tu kandixia i ja maa ya kuu ja kua'a ta'u nuu i. Ni tu kuni kandixia ndaa i nu tu kuniso'o i jnu'un ya. Ti jandaa ndixia ja tu kuniso'o i jnu'un ya nu tu nau i ja kani jnu'un ya nuu i. <sup>15</sup> Ti nu tu taji ya yívi ja tatu ya jniňu nuu i, va tu kuu kani i jnu'un ya, chi sia'an ka'an tutu ii Yandios: "Vii xaan kuu jniňu ja ndiso taká yívi ja jika i ka'an i jnu'un Yandios, ti jiin yukan ja'a i jnundee ini yívi naa i", kachi tutu.

<sup>16</sup> So ja ansu ndi'i yívi janta'u jnu'un Yandios, chi undi na jana'an kachi profeta Isaías nuu yívi hebreo: "Tata yo Yandios, jaku ni yívi ni kandixia jnu'un ni ka ka'an na", kachi da. <sup>17</sup> Nusa ti nu ka jiniso'o i jnu'un Yandios, chi kuu kandixia sava'ni ga yívi. Ti maa jnu'un ja ka jiniso'o i kuu jnu'un Yandios siki Cristo. <sup>18</sup> So ja ru'u Pablo, jikajnu'un ri: ¿Ja tu ni ka jiniso'o i yívi hebreo jnu'un Yandios nusa? Tuu, chi jandaa ndixia ni ka jiniso'o i, chi tutu ii Yandios ka'an:

Undi ni ñuyivi ni ka jiniso'o i jnu'un Yandios ja ni ka jani ndaa chaa ni ka ka'an.

Ti undi nuu taká ñuu ni jikajnu'un ya.

Kachi tutu.

<sup>19</sup> Ingá jinu ru'u Pablo, jikajnu'un ri ro'o, ¿xi kuu ja tu ni ka chaku ini i yívi Israel maa jnu'un Yandios nu? Tuu, chi ni ka chaku ini i so ja tu ni ka janta'u i. Ti yukan ni ka'an Moisés jnu'un ni ka'an Yandios siki yívi Israel nu ni kachi da:

Na sa'a ri ja na kava kuiňi ini ra ti kava kuasun ini ra naa ra,  
chi na kani ri jnu'un ri nuu yívi taká ga nación, vasu ka ndo'o ini ra ja tu  
kuanta'u ya yívi un.

Ti na kuiti ini ra naa ra ja na kuicha nuu jnu'un ri nuu yívi taká ga nación,  
vasu ka ndo'o ini ra ja yívi un tu ka chaku kuiti ini i jnu'un ri.

Kachi tutu.

<sup>20</sup> Ti suni profeta Isaías ni chundee ini da ni ka'an kaji da ja ni kachi Yandios:  
Ni sa'a ri ja ni kenda kají jnu'un ri nuu yívi taká ga nación, vasu tu ni ka ñukuu  
ini i ja kunso'o i jnu'un ri.

Ti jiin jnu'un ri ni xna'an ndaa ri nuu i ja maa ri kuu Yandios, vasu tu ni ka  
nanduko i ru'u.

Kachi Isaías.

<sup>21</sup> Ko siki maa yívi Israel, ni ka'an profeta Isaías ja ni kachi Yandios:  
Ndikivi kanda'u ri ja na kandixia ra jnu'un ri, ko tu ni ka janta'u ra jnu'un un.  
Chi su'va ni ka nduni'in xaan ini ra siki jnu'un ri.

Ni kachi ya, ni kachi Isaías.

### *Yívi Israel ja ka kandixia i Jesúš*

## 11

<sup>1</sup> Nusa, ti jikajnu'un ri: ¿Xi ja ni xndoo Yandios yívi ñuu ya Israel, ja na naa  
i naa i nu? ¡Ko tu kuu kuiti! Chi ru'u Pablo, suni kuu ri chaa Israel. Kuu ri  
jna'an tata najana'an Abraham ja ni xnukoo da nación Israel, ti suni kuu ri

jna'an maa Benjamín, ja ni xnukoo da iin jna'an da ja ka yi'i jiin nación Israel.

<sup>2</sup> Yukan kundaa ja tu ni xndoo Yandios ndi'i yivi Israel, chi ma'fuu yivi un iyo yivi ja ni nakaji ya undi najana'an. Va tu ka jini ra nava ka'an tutu ii Yandios, ja ka'an Elías nasa ni ka'an nda'u da jiin Yandios siki yivi Israel, ti ni kachi da:

<sup>3</sup> "Tata na Yandios, ni ka ja'nii chaa ka kuu profeta ja ni taji ni ja na nakani da jnu'un ni. Ni ka janu i altar ni, ti maa iin ni na kendo ja chiñu'un na ni'in. Ti vijnna suni ka ndiyo ini i ja ka'nii si saña", ni kachi da. <sup>4</sup> Ko ni nachiso Yandios nuu da: "Ja ni sasiin ri uxia mil yivi Israel ja kuu maa ri, ti yivi un tu ni ka jakunjiti i nuu santu ni ka sa'a yivi inga nación, ja nani santu un Baal. Ti kua'a xaan yivi Israel ni ka chiñu'un i santu un", ni kachi ya.

<sup>5</sup> Ti sa ni undi vijnna, na kachi ri ja ni nakaji Yandios jaku ni yivi Israel ja na kandixia i jnu'un ya. Ti ni nakaji ya yivi un so ja ni kunda'u ini ya nuu i. <sup>6</sup> Ko nu ni nakaji ya siki ja mani ni kunda'u ini ya, nusa ti tu iyo ni iin jniñu ja kuni sa'a i nava na kendo ndaa nuu ya, chi mani maa ya ni kunda'u ini nuu i.

<sup>7</sup> ¿Nasa kuu nusa? Kuu ja yivi Israel tu ni ka i ni'in ja ni ka nduku i ja na kendo ndaa i nuu Yandios. Ko sava yivi Israel ja ni nakaji Yandios, ni ka kundee i nava ni ka kendo ndaa i nuu ya. Ko sava ga yivi Israel ni ka nduni'in ini i. <sup>8</sup> nanu ka'an nuu tutu ii Yandios: "Ni sa'a Yandios ja tu ku'un kuiti ini i siki jnu'un ya, ni tu kivi inijnuni i siki nasa kuni ka'an jnu'un ya, ti yukan ka jna'an yivi undi kivi vijnna", kachi tutu. <sup>9</sup> Ti suni ni kachi rey na jana'an David:

Vasu kua'a jniñu va'a xaan ni sa'a Yandios jiin yivi Israel,  
ko jikan ri nuu ya vijnna ja na koo takaa jniñu va'a un, nava maa jniñu un na  
ndeokani ja kuu maa i, ja na ndeokava ini i nuu kuachi,  
ti na taji Yandios nundo'o siki i.

<sup>10</sup> Ti na nduni'in ini i ka jini i ja ni ka ndeokava i jiin kuachi.  
Ti na kondo'o i nundo'o ja kuu ni kani, ti na koyu'u xaan ini i jiin nundo'o ka  
kondo'o i.  
Kachi tutu.

### *Yivi inga nación ja kandixia i Jesús*

<sup>11</sup> Nusa ti jikajnu'un ri: ¿Ja tu kuanta'u kuiti Yandios yivi Israel siki ja ni ka yuji ndi'i i, ti ni ka nduni'in in i siki jnu'un ya nu? ¿Ti ja siki un tukaa kuanta'u ya maa i nu? ¡Ko tu kuu kuiti! Chi siki ja ni ka nduni'in ini i siki jnu'un ya, ti yukan sa'a ya nava yivi taka ga nación na kivi i nuu jnu'un ya ja na ni'in jnu'un ka'nu ini nuu Yandios, ti na nama ya i. Ko yukan sa'a ya nava yivi Israel na kuasun ini siki yivi inga nación, ti kundio ini i ja ni'in jnu'un ka'nu ini nuu ya, siki nasa nama ya i naa i. <sup>12</sup> Ti siki ja tu ni ka kandixia yivi Israel jnu'un Yandios, yukan ni nuña ndixia ichi nuu yivi taka ga nación ja ka kandixia i. Ti ansu nini yivi Israel ka ndisojniñu nuu Yandios ja ka xna'an i jnu'un ya, chi ni kenchaa ya jniñu un nuu i, ti ni ja'a ya nuu yivi taka ga nación. Ko nu na ya'a kivi un, ti yivi Israel ti keja'a kandixia i jnu'un ya siki Cristo, ti na siuku Yandios jnu'un ya ja kandixia kua'a xaan yivi Israel naa i.

<sup>13</sup> Ko vijnna ru'u Pablo na kachi ri nuu ra naa ra, ja ka kuu ra yivi inga nación, ja ru'u kuu apóstol ja ni nakaji Yandios, ja na ka'an ri jnu'un ya siki Cristo Jesús nuu ro'o naa ra. Ti jiin ni ini ni aña ri sa'a ri jniñu un ja ni tatu ya nuu ri. <sup>14</sup> Chi kuni ri ja sia'an na nakani ini sava jna'an ri, ja ka kuu i yivi Israel, ja na kundio ini i ni'in i jnu'un Yandios siki nasa nama ya yivi naa i, ti saka'nu ini ya nuu i. <sup>15</sup> Ti jandaa ndixia ja ni xndoo Yandios yivi Israel, ti ni taji ya jnu'un ya nuu yivi taka ga nación ja na ni'in i jnu'un ka'nu ini nuu ya, ti na ndumani i nuu ya. Nusa ti kivi na naki'in tuku ya yivi Israel ja na kandixia i

jnu'un ya, ti kuu nanu ja ni ka nandoto i nuu ūji'i, chi vijna ka kuu i nanu ndiyi ja tu ka jiniso'o kuiti i jnu'un ya.

<sup>16</sup> Ti siki jniñu yivi Israel ja ka soko i xnakan nuu Yandios staa ja kee undi nuu nuu yujña un, yukan ka xna'an i ja ndi'i yujña un yi'i nda'a Yandios. Nusa ti suni sia'an iin yujnu, undi yo'o jiin undi tendi'i nda'a yi'i jiin maa. Ti suni siukan yivi Israel ka yi'i iin Yandios, chi maa Yandios ni nakaji ya tata i najana'an ja ni xnukoo da nación Israel, ti ni ka kuu i kua'a nda'a nuu ri kaña yo'o i un, <sup>17</sup> chi yivi Israel ka kuu i nanu nda'a iin yujnu olivo va'a. Ti ni ja'ncha taka nda'a un. Ti taka ro'o naa ra ja ka kuu ra nanu nda'a yujnu olivo yukú, ja ka kuu ra yivi inga nación, ja undi nuu tu ni ka jini ra jnu'un ya, ni ka nduu ra nanu nda'a yujnu olivo yukú. Ti olivo yukú ni nachu'un ya ro'o naa ra ma'ñu uu ga nda'a un ja ka kuu i maa yivi ka yi'i jiin yujnu olivo va'a. Ti sia'an ni ka ni'in ra jnundee ini nuu Yandios, nuu ndee yujnu olivo va'a un nuu yo'o yujnu un. <sup>18</sup> Ti nu sia'an ni sa'a va'a ya jiin ro'o naa ra, ko tu kuu nduvixi ini ra siki yivi ja ka kuu i nanu nda'a yujnu ni te'nde un. Chi na nuku'un va'a ini ra ja ansu nda'a un kuu ja jista kajin nuu yujnu un. Chi su'va yo'o yujnu un kuu ja jista kajin. Ja yukan kuu ja chaku. <sup>19</sup> Ti sanaa ti ka'an ra: "Tuu, chi sava nda'a un ni ja'ncha nava na nachijnii ya ru'u nuu ni ja'ncha nda'a un", kachi ra.

<sup>20</sup> Jandaa ka'an ra, ko nuku'un ini ra ja ni ja'ncha ya yivi Israel un siki tu ni ka kandixia i jnu'un Yandios. Ko siki ro'o ja ka kuu ra yivi inga nación, so ja ni ka kandixia ndaa ra jnu'un ya. Yukan kuu ja ni keta'u ra nuu Yandios. Ti yukan tu kani vixi ini ra nuu yivi Israel nusa. Chi su'va, na kuyu'u ra ja koto yuji ra nuu Yandios. <sup>21</sup> Chi jandaa ndixia kuu ja nu tu ni saka'nun ini ya nuu yivi Israel, ja ka kuu i maa nda'a yujnu va'a un, ti suni sia'an tu saka'nun ini ya nuu ro'o naa ra nu tu siuku ndaa ra jnu'un ya.

<sup>22</sup> Nusa ti kani ini naa ra ja va'a xaan ini Yandios jiin ra, ko suni nasa ni taji ya nundo'o nuu yivi Israel ja tu ni ka jandatu i jnu'un ya. Ko ni kunda'u ini ya ro'o naa ra, ja ka kuu ra yivi inga nación nu kuandatu ra jnu'un ya. Ko nu tuu, ti tukaa ni'in ra jnu'un ka'nu ini nuu Yandios. <sup>23</sup> Ti maa yivi Israel, nu nakani ini i ti kandixia i jnu'un Yandios, nusa ti na nduka'nun ini ya nuu i, ti kuu na chijnii ya tuku nu ni ka kenchaa i, ti nduu i se'e ya. <sup>24</sup> Nusa ti taka ro'o ja ka kuu ra yivi inga nación, ja undi nuu tu ni ka jiniso'o kuiti ra jnu'un ya, ko ni janta'u ya ti ni nasama ya ro'o. Ni nasama ya ro'o nava ka'ncha yo nda'a yujnu olivo yukú, ti nachijnii yo xini yujnu olivo va'a. Sia'an ni sa'a Yandios jiin ro'o naa ra, ja ka kuu ra yivi inga nación, vasu undi nuu tu ni ka kuu ra se'e ya nanu yivi Israel, chi ni ka kuu ra nanu nda'a yujnu olivo yukú ja tu ja'i nachijnii yo xini yujnu olivo va'a. Ko vijna chi tukaa, chi ja ni ka nduu ra se'e Yandios, chi ni nasama ya ro'o. Ko nu sia'an sa'a ya jiin ro'o, ja ka kuu ra yivi inga nación, nusa ti yachi ga nduka'nun ini ya nuu yivi Israel, chi undi nuu kuiti maa i ka kuu maa yivi Yandios, chi maa i ka kuu maa nda'a yujnu olivo va'a ansu yivi inga nación.

### Kandixia kua'a yivi Israel

<sup>25</sup> Ñani, ja ka kuu ra yivi inga nación, kuni ri ja na chaku ini ra siki jniñu sa'a Yandios jiin yivi Israel, nava tu ku'un ini ra ja ni ka nduña'nu ga ra nuu Yandios ja kuu yivi Israel. Chi undi nuu ni kundee sa'yí jnu'un ja'a, ko vijna ja ni stuu ndaa ya ja savä yivi Israel ni ka nduni'in ini i. Ti sia'an koo jiin yivi un undi na jinu kivi ja na kandixia yivi taka ga nación ja changa ga kuni i jnu'un ka'an Yandios, undi nu ni ndi'i yivi ni ka fuso'o jnu'un un, yukan na ti ni jinu kivi. <sup>26</sup> Yukan na ti nakua'a ya ta'u nu ndi'i yivi nación Israel, chi sia'an ka'an tutu ii Yandios:

Ichi ñuu Síón kiji Yandios ja nama ya yivi.

Ti na sa'a ya ja tukaa koo kuachi nuu taka jna'an tata najana'an Israel ja nani da Jacob.

**27** Chi ja'a kuu jnu'un ni chiso ri nuu i naa i, ja nchaa ndixia ri iin kivi, ti kenchaa ri kuachi i.

Kachi tutu.

**28** Siki ja yivi Israel, ka jito u'u i jnu'un Yandios siki Cristo Jesús, ja yukan ni nuña ichi ja kua'an jnu'un Yandios nuu ro'o ja ka kuu ra yivi inga nación. Ko vasu ka jito u'u i jnu'un va'a ga vijna, ko ni nakaji ya yivi un ja ni kunda'u ini ya nuu i, chi yukan ni chisojnu'un ya nuu tata na jana'an yivi Israel. **29** Chi Yandios tu nandeokaya kuiti ini ya ja ni nakaji ya yivi un naa i ja kundiso i jniñu ñia nuu ya, chi vanuxia undi nuu ni nakaji ya ja na kuu i maa se'e ya. **30** Chi undi nuu, ro'o ja ka kuu ra yivi taka ga nación, ni ka kuu ni'in ini ra siki jnu'un Yandios, ko nu ni ka nduni'in ini yivi hebreo siki ya, ti ni kunda'u ini ya nuu taka ro'o naa ra. **31** Ti vijna, vasu ni ka nduni'in ini yivi hebreo siki ya. Ja yukan ni kunda'u ini Yandios ro'o naa ra, ko suni kunda'u ini ya nuu i vasu ni ka nduni'in ini i vijna. **32** Chi ni kachi Yandios ja tendi'i yivi na nduni'in ini i. Sia'an ni sa'a Yandios jiin yivi nava maa iin ni maa ya kuu ja saka'nun ini ya nuu i naa i.

**33** So sa'u ini yo chi ndichi xaan jnu'un Yandios, chi tendi'i kuiti ni satu'va ya. Ti jankivi kachi yo ja nasa sandaa ya taka un. Ni tu kujnuni ini yo nasa kuu taka ja sa'a ya jiin yivi ñuyivi ja'a. **34** Chi ka'an tutu ii: "¡Tu iyo ni iin yivi kujnuni ini nasa ndo'o ini maa Jito'yo! ¡Ni tu iyo ni iin yivi xna'an nuu ya! **35** ¡Suni tu iyo ni iin yivi ja sa'a jniñu va'a nuu ya, ja jiin yukan nachunaa ya nuu i!" —kachi tutu. **36** Chi undi nuu maa ya vaji taka ja iyo, ti maa ya ni sa'a ya taka ja iyo, ti ja kuu maa ya kuu. Ti na kachi yo ja vii xaan kuña'nun Yandios ja kuu taka kuiya kua'an vaji. Ti sia'an na koo.

### Ta'u ja ja'a Yandios nuu yo naa yo

## 12

**1** Ñani naa ra, ru'u Pablo, kanda'u ri jiin ra siki ja ka yi'i ra jiin Cristo Jesús. Soko maa ra naa ra nuu Yandios ja kuanukuachi ra nuu maa iin ni ya. Na koo ñia'i ra nava na kondoo ra ja kuajniñu ya ro'o. Sia'an ka'an nda'u ri jiin ra naa ra, chi ndoo ndixia ja kunda'u ini ya yo'o. Ti nu sia'an na sa'a ra, nusa ti na kusii ini Yandios jiin ra. Ko tu ka'an nda'u ri jiin ra ja na sa'a ra iin jniñu yi'i xaan, chi mani ja na kunukuachi ra nuu Yandios jiin ni ini ni aña ra. **2** Ti tukaa siuku ra jiin jniñu kue'e ja ka sa'a yivi ñuyivi ja'a. Chi su'va na sama ra ini ra ja nasa koo ra, ti sia'an siuku va'a ra ja jiin jnu'un Yandios, ti na sa'a yo ja na ndujaa inijnuni ra jiin jnu'un ya. Ti sia'an kuu nakaji ra nau kuu ja va'a ja jajna'an ini Yandios, ja kusii ini ya, ja na ku kutu ini ra jiin jnu'un ya.

**3** Ti siki ja ni nakaji ya ru'u, ti ni tatu ya jniñu nuu ri ja na xndaku ri jnu'un ya, ti na kachi ri nuu taka ro'o ja kanchuku ini ñuu Roma ja ka yi'i ra jiin Cristo, ja tu kani ini ra ja kuña'nun ra siki ñani jna'an ra. Chi ndi iin ndi iin ra na kani ndaa ini siki naa jniñu ni ja'a ya nuu ra. Chi sa'a ya ja na kandixia ndaa ra Yandios ja na chindee ya jiin sava'a ni ga jniñu ni ja'a ya nuu ra. **4** Chi sa'a yo nanu ja yiki kuña yo yi'i kua'a nuu, ti iin iin un siin siin jajniñu. **5** Ti suni sia'an yo'o naa yo, vasu iyo kua'a yo ja ka yi'i yo jiin Cristo, ti siin siin ka junukuachi yo nuu ya ko iin ni yiki kuña ka kuu yo ja ka yi'i yo jiin ya, chi iin ni ka kuu taka yo. **6** Ti siin siin ta'u ni ja'a ya nuu yo ja na sa'a yo maa jniñu kuni ya, ti nasa jniñu ni sa'a ya nuu iin yo. Nusa ti na kuajniñu va'a yo taka ta'u ni ja'a ya. Nu iin ra ni ni'in ta'u ja nakani ra jnu'un Yandios, nusa ti kanuu ja kandixia ndaa ra ja maa Yandios ja'a ya jnu'un un nuu ra. **7** Ti nu

iin ra ni ni'in ta'u ja chindee ra ñani jna'an ra, ti konuu ini ra sa'a ra. Ti nu iin ra ni ni'in ta'u ja xna'an ra jnu'un Yandios, ti nduku ndee ra jiin jniñu un. <sup>8</sup> Ti nu iin ra ni ni'in ta'u ja kua'a jnundee ini nuu ñanijna'an ra, ti koto xndi'i ini ra jiin jniñu un. Ti yivi ja kuta'u iin ndajniñu ja chindee i nuu ñanijna'an nda'u i, ti ni ini i na kua'a i ndajniñu un. Ti chaa ta'u jniñu nuu ñani jna'an, ti vii na ta'u da jniñu un sa'a da. Ti yivi ja jito nda'u nuu yivi jna'an nundo'o, ti na kusii ini i jiin jniñu un.

### *Jniñu ja kunda'u ini jna'an yo*

<sup>9</sup> Na kunda'u ndixia ini ra naa ra nuu taka ñanijna'an ra jiin jniñu sa'a ra, ti ansu ja so ka'an ra. Su'va na koto u'u ra jniñu kue'e un, chi sa'a dañu nuu jna'an ra. Su'va na kukutu ini ra sa'a ra mani jniñu va'a ja kuu ñani jna'an ra. <sup>10</sup> Chi kanuu ga ja na kunchuku mani ra jiin taka jna'an ra, ja ka chindee jna'an ra. Ti kava yiñu'un ra nava na ka'an yiñu'un ga ñanijna'an ra jiin ra.

<sup>11</sup> Kukutu ini koto kukuxi ra jiin taka jniñu sa'a ra, chi ni ini ni añau ra na kañukuu ini ra ja sa'a ra taka jniñu ja kuni maa Jito'yo. <sup>12</sup> Ti na kosii ini ra kundatu ra kivi nduña'nru ra nuu ta'u Yandios jniñu. Ti na sandee ini ra nu jito ra nundo'o. Ti koto ka'nccha ini ra, siin ka kanta'u ra nuu Yandios. <sup>13</sup> Koto nda'u ra ti chindee ra nuu taka ga yivi kandixia nu nau ja kumani nuu i. Ti ndinduu nda'a ra kuanuu ra ve'e nuu taka yivi kandixia i nu kuaja i ve'e ra.

<sup>14</sup> Ti kakanta'u naa ra ja'a yivi ja kajito u'u i ro'o naa ra. Ko tu ka'an ndeva'a ra siki i. Su'va, kakanta'u ja'a i ja kuu nuu Yandios.

<sup>15</sup> Ti nu kusii ini ñanijna'an ra, ti suni na kusii ini ra jiin i. Ti nu kukui'ya ini i, suni na ndukui'ya ini ra jiin i.

<sup>16</sup> Na kunchuku mani ra jiin ñanijna'an ra, ti tu kava vixi ra ja kundio ini ra nduña'nru ra nuu ñanijna'an ra. Chi su'va iin ni na koo ra jiin yivi nda'u. Tu kani ini ra ja tu'va ga ra xi ja ndichi ga xini ra.

<sup>17</sup> Koto sa'a ndeva'a ra nuu ni iin yivi, nu ni sa'a ndeva'a i jiin ra. Su'va na kundio ini ra jniñu yiñu'un ga nava taka yivi un nakuni i nasa kancha ra.

<sup>18</sup> Su'va kava va'a ini ra ti kunchuku mani ra jiin taka yivi, vasu nasa kanda maa i. <sup>19</sup> Ñani naa ra, koto chanda'a ra yivi nu ni sa'a ndeva'a i siki ra. Sia chi maa Yandios na kua'a ya nundo'o i. Chi yukan ka'an tutu ii Yandios: "Maa ri kua'a nundo'o i, ti maa ri nakua'a ya'u i", kachi Jito'yo. <sup>20</sup> Ti suni ka'an tutu ii: "Chaa, jito u'u ro'o, nu jii'da soko, ti kua'a ra ja kaji da. Ti nu ichi ini da, kua'a ra ja ko'o da. Chi nu sa'a ra siukan, ti kukanuu da ti nakani ini da ja ni jito u'u da ro'o", kachi tutu. <sup>21</sup> Koto kua'a ra jnu'un ja na kundee jniñu kue'e un jiin ra. Sa'a mani jniñu va'a nava na naa ini ra taka jniñu kue'e un.

### *Na kuandatu yo nuu sticia*

## 13

<sup>1</sup> Taka yivi na kuandatu i nuu taka chaa ka kuu sticia, chi ndisojniñu da nuu ñuu. Chi taka jniñu un vaji nuu Yandios, ti maa Yandios ni ja'a jniñu nuu chaa un. <sup>2</sup> Ja yukan taka yivi ja tu jandatu nuu jniñu ta'u sticia, iin ni kuu ja tu jandatu i jniñu ta'u Yandios, chi maa Yandios ni ja'a jniñu un. Ti yivi nduni'in ini, kuachi ka sa'a i, ti na ni'in i nundo'o. <sup>3</sup> Chi taka chaa ndisojniñu, ansu ndiso da jniñu ja na yu'u yivi ka sa'a jniñu va'a, chi su'va ja na kuyu'u yivi ka sa'a jniñu kue'e. Ti nu kuni ra ja tu nduxaan taka chaa ndisojniñu un nuu ra, sa'a mani jniñu va'a nusa. Yukan ti na kuajnu'un taka chaa un ro'o ja kuu ra iin chaa va'a. <sup>4</sup> Chi taka chaa un ndisojniñu da nuu Yandios, ja kuu ja va'a taka ra naa ra. Ko so ja nu na sa'a ra jniñu ndeva'a, ti na ko yu'u ra, chi ansu ndiso ka'a taka chaa un jniñu ja kua'a da nundo'o nuu yivi. Chi

jajniñu ya maa da ja na kua'a va'a da nundo'o nuu yivi ka sa'a jniñu ndeva'a.  
<sup>5</sup> Ja yukan kanuu ja kuandatu ra nuu chaa ndiso jniñu un. Ko ansu nini ja tu ni'in ra nundo'o, chi suni ja tu jani inijnuni ra ja tu ni jandatu ra maa jniñu ni ja'a Yandios nuu da. <sup>6</sup> Ti yukan kuu ja taka ra suni kua'a ra xu'un nuu taka chaa ndisojnihun un, chi xu'un un kuu ja kuu ñuu. Chi ansu nini ndisojnihun da nuu ñuu, chi ka sa'a da maa jniñu ni ja'a Yandios nuu da.

<sup>7</sup> Ti chunaa ndi'i ra taka ja ka tau ra nuu yivi. Kua'a xu'un ñuu nuu chaa na ki'in xu'un ñuu. Ti cha'u xu'un puesto ra nuu chaa kinya'u nuu puesto. Ti nuu yivi jandatu kuu ra, ti kuandatu. Ti kua'a ra ja yiñu'un nuu yivi ja kanuu kua'a ra ja yiñu'un. <sup>8</sup> Ti koto tau kuiti ra nuu ni iin yivi. Chi mani ja na kunda'u ini jna'an ra. Chi yivi ja kunda'u ini jna'an, ja ni siuku i jiin ndi'i ja ni ta'u ley un. <sup>9</sup> Chi yukan ta'u ley jniñu: "Tu kusikinchaa jna'an ra. Tu ka'ni ra yivi. Tu sakui'na ra. Tu sajnu'un ra jiin jnu'un xnda'u ña'an. Tu kundio ini ra ja ñava'a ñanijna'an ra", kachi ley. Chi taka jnu'un yukan jiin taka ga jniñu ta'u ley un, ja yi'i ndi'i jiin maa iin ni jnu'un kanuu ja ka'an tutu ii: "Na kunda'u ini ra nuu ñani jna'an ra nanu kunda'u ini ra nuu maa ra", kachi tutu. <sup>10</sup> Chi nu kunda'u ini yo jna'an yo, ti tu sa'a ndeva'a yo nuu i. Chi ja kunda'u ini yo nuu jna'an yo, yukan kuu ja siuku ndaa yo ni ley Yandios.

<sup>11</sup> Yukan na kondo'o ini ra, chi sa'a yo nanu ja kuan kuyajni kivi kenda Cristo tuku. Ti tukaa sa'a kuxi ra nuu jniñu ta'u ya nanu yivi kixi. Chi vijnal kuan kuyajni kivi ja ni'in yo ta'u ja nduña'nu yo nuu ta'u ya jniñu. Kuan kuyajni ga kivi un ansu kivi ja ni kandixia yo jnu'un ya. <sup>12</sup> Ti nava ja kuan ya'a jakuaa, ti ja kuan kuyajni kivi ja ni'in yo ta'u nuu Yandios. Nusa ti tukaa sa'a kuiti yo jniñu ndeva'a ja ka sa'a yivi kanchuku nuu ñuñaa. Ti na sa'a yo mani jniñu iyo ndaa ja ndenda ndijin nuu Yandios. <sup>13</sup> Na kaka yiñu'un yo ja mani jniñu ndaa sa'a yo ja ndenda ndijin nuu Yandios. Koto ko'ra ndixi ja na jini ra, ni tu sa'a ra taka viko kue'e un. Koto kuikonuu ra sa'a ra jniñu kue'e. Ni tu kanaa ra ja kukuasun ini ra. <sup>14</sup> Chi su've na kaka ndaa ra jiin jnu'un Yandios nanu ni sa'a Jito'yo Cristo Jesùs nu ni kuncha ya ñuyivi ja'a. Ti koto kundio ini ra sa'a ra jniñu kue'e ja nini kuni sa'a yo nu kanchuku yo ñuyivi ja'a.

### Tu kuu ichi ini ra nuu ñanijna'an ra

## 14

<sup>1</sup> Kuanta'u ra yivi ja tu ja'i chaku va'a ini i maa jniñu ña'nú ni sa'a Cristo ja'a i. Koto skexiko ra i, ko tu kanaa ra jiin i siki jnu'un ja tu ja'i chaku va'a ini i. <sup>2</sup> Chi iyo yivi ja jani ini ja kaji taka ni nuu, ko iyo uu ga ja tu ja'i chaku va'a ini ti jani iní i ja tu va'a kaji i kuñu, chi mani yuva kuii jiin nduchi ni yaji i. <sup>3</sup> Ti ro'o, nu yaji ra taka ni nuu, ti koto skexiko ra yivi ja tu yaji taka nuu un. Ti ro'o ja tu ka yaji taka nuu ndeyu, koto na skexiko ra nuu yivi ja ka yaji i taka ni nuu ndeyu, chi ja ni janta'u ndixia Yandios yivi un ja kuu i se'e ya. <sup>4</sup> Ti ro'o, tu ndisojnihun ra ja kankuachi ra ja'a muzu ja junukuachi da ve'e jito'o da. Tu kuñau'ra ja sava'a ra jniñu da un. Chi muzu un yi'i da jiin maa iin ni ve'e un, ti maa jito'o da un ndiso jniñu ja na sa'a ndaa jniñu sa'a da ansu ro'o. Ti siki yivi ja yi'i i jiin Jito'yo Jesùs, ja junukuachi i nuu maa ya, chi maa iin ni Jito'yo kuu ja na sava'a maa da, ja na siuku ndaa da jiin jniñu ni tatu ya nuu da.

<sup>5</sup> Chi suni iyo yivi ja jani ini i ja ii ga iin kivi ansu inga kivi. Ti iyo yivi ja jani ini i ja iin nuu ni taka kivi. Ti taka yivi na kondo'o ndaa ini i siki nasa ka jani ini i, ko ansu ja ku ichi ini i nuu inga yivi. <sup>6</sup> Ti chaa ja sa'a da ja ii ga iin kivi, ñukuu ini da ja chiñu'un da Jito'yo ja sa'a da sia'an, ti chaa ja tu sa'a ja ii iin kivi, suni ñukuu ini da ja chiñu'un da Jito'yo kivi un. Ti chaa ja yaji taka nuu,

ñukuu ini da chiñ'un da Jito'yo ja sa'a da yukan, chi suni na kuanta'u da nuu ya. Ti chaa tu yaji taka nuu un, suni ñukuu ini ja chiñ'un da Jito'yo ja sa'a da sia'an. Chi suni nakuanta'u da nuu ya. <sup>7</sup> Chi nu ka yi'i yo nuu nda'a maa Jito'yo, ti tu kundiyo ini yo ja sa'a yo maa iin ni jniñu kuni maa yo, chi ni iin yo tu kuchaku nava ka kuni maa yo, ti ni iin yo tu nakaji maa kivi kuū yo. <sup>8</sup> Chi nu kanchuku yo nuu ñuyivi ja'a, na sa'a yo maa jniñu ja kuni maa Jito'yo. Ti nu ni ji'i yo, ti na kuū yo siki ja sia'an kuni maa Jito'yo. Nusa ti nu kuchaku yo xi kuū yo, ko yi'i yo ini nda'a maa Jito'yo. <sup>9</sup> Chi siki yukan ni ji'i Cristo ja'a yo naa yo, ti ni nandoto tuku ya nava na nduña'nu ya ja kuu ya Jito'yo ja ta'u ya jniñu nuu yo, ti sia'an sa'a ya vasu chaku yo xi ni ji'i yo. <sup>10</sup> Ti nu sia'an kuu, ja maa iin ni Cristo ta'u ya jniñu nuu yo, ti maa ra tu ndisojníñu ja xndichi ra siki ñani ra ja kandixia i, ni tu ndiso ra jniñu ja skexiko ra maa da. Chi taka yo'o kujin nuu Cristo, ti maa ya na xndichi ya yo'o nuu taka jniñu ni ka sa'a yo. <sup>11</sup> Ti jini va'a yo yukan, chi yoso nuu tutu ii Yandios:

Jandaa ndixia ja nuu maa ri tendi'i kuiti yivi na kuandatu i.

Ti tendi'i i na kuni ndaa ja maa ri kuu Yandios.

Kachi Jito'yo.

<sup>12</sup> Nusa ti ndi iin ndi iin yo nakua'a jnu'un nuu Yandios nasa jniñu ni ka sa'a yo jiin ñanijna'an yo.

### *Koto siuku yo jna'an yo nuu kuachi*

<sup>13</sup> Tija yukan ti tukaa ku ichi ini yo nuu ñani ka kandixia siki nasa ka yaji da. Su've na chu'un ini ja tu sa'a ra ni iin jniñu ja tu jajna'an ini ñani ka kandixia jiin ra, siki ja ndo'o ini da ja jniñu un kuu iin kuachi. <sup>14</sup> Ko ja siki maa ri ja yi'i ri jiin Jito'yo Jesú, chi kandixia ndaa ri ja tu iyo ni iin ndeyu ja tu iyo ndoo ja kuu nuu Yandios, ja tu kuu kaji yo. Ko nu iin yivi jani ini ja tu va'a ja kaji da iin nuu ndeyu, nusa ti tu kendo ndoo ndeyu un nuu maa da. <sup>15</sup> Ti nu ni jini iin ñani ra ja yaji ra iin nuu ndeyu ti tu kuva'a ini da siki un, ti tukaa sa'a ra un ja kunda'u ini ra nuu ñani ja suni kandixia da. Koto ma sa'a ga ra ja tu xndi'i ra ini ñani kandixia un, siki ja yaji ra ndeyu ja jani ini da ja kuachi kuu. Koto ma sa'a ra un chi maa da kuu iin ñani kandixia suni, ti suni ja'a maa da ni ji'i Cristo. <sup>16</sup> Yukan koto ma sa'a ra jniñu ja inga yivi na ka'an siki un vasu jini ndaa maa ra ja iyo va'a. <sup>17</sup> Koto ma sa'a ra un chi kanuu ga jniñu ta'u Yandios nuu yo. Kanuu ga un ansu ja kanaa yo siki naa ndeyu ka yaji yo xi ja ka ji'i yo. Kanuu ga ja kuandatu yo jniñu ta'u Yandios, ja na kaka ndaa yo nuu ya, ja na kunchuku mani yo jiin ñani ja kandixia, jiin ja na kusii ga ini yo ja sa'a maa Espíritu Santo. <sup>18</sup> Ti nu siukan sa'a yo, ti jandaa ndixia ja junukuachi yo nuu Cristo. Ti suni kusii ini Yandios jiin yo. Ti suni yivi naa i kua'a i ja yiñu'un nuu yo.

<sup>19</sup> Nusa ti taka yo'o ja ka yi'i jiin Cristo Jesú, na kukutu ini yo ti na kunchuku mani yo jiin ñanijna'an yo, ti na kua'a jnundee ini jna'an yo jiin jnu'un Yandios, nava na siuku ndaa yo naa yo nuu ichi ya. <sup>20</sup> Ja yukan, koto ma xnaa ra jniñu ja sa'a Yandios jiin ñani ka kandixia. Koto ma sa'a ra un siki ja kuni kaji ra iin nuu ndeyu ja tu kuva'a ini ñani un. Jandaa kuu ja iyo ndoo taka nuu ndeyu ja ka yaji yo. Ti vasu sia'an, ko tu va'a ja kaji ra ndeyu un ja tu jajna'an ini ñani ra ja kandixia un, ja jani ini da ja kuachi kuu. <sup>21</sup> Va'a ga ja tu kaji ra kuñu, ni tu ko'o ra vino nu tu kuva'a ini ñani ja kandixia da siki yukan, chi jani ini da ja kuachi kuu. Ti koto sa'a ra un nava tu sa'a ra ja na kinikava da nuu kuachi, ti nava tu na kakayata da jiin jnu'un ya.

<sup>22</sup> Ti nu kandixia ndaa ra ja tundo sa'a ja yaji ra, nusa ti jini va'a Yandios ja kandixia ndaa ra nuu ya, ti koto kondo'o vixi ini ra siki un. Chi ndatu xaan kuu yivi ja tu nchakuachi i siki ja yaji i iin nuu ndeyu, vasu tu kuva'a

ini ñanijna'an i ja jani ini da ja kuachi kuu. <sup>23</sup> Ko nu kaji ra ndeyu ti ndo'o ini ra siki ndeyu un, chi tu jini ndaa ra nu ja va'a xi ja tu va'a. Nusa ti kuachi kuu, chi tu ndo'o ndoo ini ra ja kendo va'a ndeyu un nuu Yandios. Ti yo'o ja ka yi'i jiin Cristo Jesús, nu tu kandixia ndaa yo siki taka ja iyo va'a nuu Yandios, nusa ti kuachi kuu.

### *Vi'ga na kunda'u ini ra ñani jna'an ra ansu nuu maa ra*

## 15

<sup>1</sup> Ko yo'o naa yo ja tu ndo'o uu ini yo siki ndeyu yaji yo, ti iyo ja chindee yo nuu taka ñani yo ja ka ndo'o uu ini i. Chindee yo nuu i ja tu kaji yo ndeyu ja tu kuva'a ini ñani un, chi vi'i ga na kunda'u ini yo ñanijna'an yo ansu nuu maa yo. <sup>2</sup> Taka yo na kusii ini jiin ñanijna'an yo ja suni kandixia i Cristo. Ti sia'an na kendo va'a i, ti suni kua'a yo jnundee ini nuu i. <sup>3</sup> Na sa'a yo ja kusii ini ñani jna'an yo, chi jandaa ndixia ja tu ni sa'a Cristo nava ni kusii ini maa ya, chi su'va ni sa'a ya nasa ni kusii ini maa Tata ya, chi siukan yoso nuu tutu ii: "Taka jnu'un kue'e ni ka ka'an yivi siki ni, ti ni jinu jnu'un un siki na", ni kachi Cristo jiin Tata ya. <sup>4</sup> Chi taka jnu'un ja ni jankoso nuu tutu ii undi najana'an, ni jankoso ja na xna'an nuu yo'o ja tu xndi'i ini yo kaka yo nuu ichi Yandios, ja na ni'in yo jnundee ini nuu jnu'un un. Siukan kuñukuu ini yo ja ni'in yo taka ja va'a ja kua'a ya nuu yo. <sup>5</sup> Jandaa ndixia sa'a ya ja tu xndi'i ini yo, ti ja'a ya jnundee ini nuu yo. Tí ru' Pablo, ñukku xaan ini ri ja sa'a ya ja na koo ii nuu ini taka ra naa ra, chi sia'an kuni Cristo Jesús ja ninu nuu maa ya ka siuku ra. <sup>6</sup> Nava ii nuu na kava ini taka ra naa ra nu ni ka ndututu ra, ti ii ni ndusu na koo yu'u ra ja ka chiñu'un ra maa Tata yo Yandios kuña'nu, ja kuu ya Tata Jito'yo Cristo Jesús.

<sup>7</sup> Ja yukan na kachi ri ja kuanta'u ra taka jna'an ra nanu ni janta'u Cristo Jesús yo'o naa yo, ja jiin yukan ni ja'a ya jandaa ja kuña'nu xaan ga Tata yo Yandios. <sup>8</sup> Ti suni na kachi ri ja ni kiji Cristo nuu ñuyivi yo ja ni junukuachi ya nuu yivi hebreo, ja ni xna'an ndoo ya jnu'un Yandios nuu i naa i, nava na kundaa taka jnu'un ni keyu'u ya ja ni chisojnu'un ya nuu taka tata najana'an nación Israel. Ti siukan ni xna'an kaji Cristo Jesús ja ni siuku ndaa Yandios taka ja ni chisojnu'un ya nuu i. <sup>9</sup> Ti suni ni kiji Cristo nava yivi taka ga nación ja tu ja'i kuniso'o i jnu'un ya, kanajaa i ya ti kachi i ja kuña'nu ya, chi ni kunda'u ini ya nuu i, nava ka'an nuu tutu ii:

Nusa ti ka'an na jiin yivi taka ga nación ja maa ni kuña'nu ga,  
ti kata na yaa ii ja chiñu'un na ni'in.

<sup>10</sup> Chi sia'an ka'an tuku nuu tutu ii:

Taka ro'o, yivi taka ga nación, ii nuu na kusii ini ra jiin taka ga yivi ni nakaji maa ya.

<sup>11</sup> Ti ka'an tutu ii tuku:

Taka ro'o yivi taka nación, ka'an ra ja kuña'nu ga Jito'yo Yandios.

Ti taka ro'o, yivi taka ñuu, suni ka'an ra ja kuña'nu ga ya.

<sup>12</sup> Ti suni profeta najana'an Isaías ni chaa da nuu tutu:

Chii tata Isaí kiji ii ja kuña'nu.

Ti ta'u jniñu nuu yivi taka ga nación.

Ti yivi taka nación na kandixia ndaa i maa ya, chi kundio ini i ja kua'a ya ta'u nuu i naa i.

Kachi tutu.

<sup>13</sup> Sa'a ndixia Yandios ja kandixia ndaa yo Cristo, ti ndiyo ini yo ja ni'in yo ta'u nuu ya. Yukan jikan ri nuu ya ja maa Yandios na sa'a ya ja na kosii ini taka ra, jiin ja na kondee ini ra. Chi siki yukan kandixia ra maa ya, ti sia'an

kuñukuu ini ra ja ni'in ra taka ja va'a ja kua'a ya nuu ra. Chi maa Espíritu Santo sa'a jniñu un.

### *Pablo ni nakani da jnu'un Cristo*

<sup>14</sup> Ñani ri naa ra, ru'u Pablo, kandixia ndaa ri ja maa ra naa ra ka ndiyi ini ra ja sa'a ra mani jniñu va'a, ti suni ka chaku va'a ini ra taka jniñu va'a ja kuni Yandios. Ti kandixia ndaa ri ja va'a ka xndaku nuu jna'an ra, ja nu iyo iin ra ja tu jandatu jnu'un Yandios, ti inga ra xndaku ni'iñ undi na kívi ini da NASA kuni ka'an jnu'un ya siki jniñu un. <sup>15</sup> Ni jani ini ri ja chaa ri tutu ja'a ja ka'an kaji ri jiin iin iin ra, nava na chaku kaji ga ini ra taka jnu'un ja'a. Ti siukan sa'a ri siki ja va'a ini Yandios ja ni tatu ya ru'u jiin jniñu ja'a. <sup>16</sup> Chi ni nakaji ya ru'u ja kunukuachi ri nuu Cristo Jesú, ja na ka'an ri jnu'un ya nuu yívi taka ga nación ja tu ja'i kuni i jnu'un ya. Sia'an sa'a ri nava yívi taka ga nación na nakuni i nuu Yandios, nanu ja soko ri maa i nuu ya, ti kuanta'u ya i, chi maa Espíritu Santo sa'a ja na koo ndoo na koo ii yi'nuu ya.

<sup>17</sup> Nusa ti ni tatu ya ru'u jiin jniñu ja'a, ti kusii ini ri ja va'a sa'a ya jiin jniñu sa'a ri, ja ka'an ri jnu'un va'a Yandios siki Cristo Jesú. <sup>18</sup> Yukan tu ka'an vixi ri siki jniñu ni sa'a ri, chi ka'an ri maa jnu'un NASA ni jajniñu Cristo ru'u, ja ka'an ri jnu'un ya nuu yívi taka ga nación. Chi jiin jniñu sa'a ri ti jiin jnu'un ka'an ri, ni sa'a ya ja ni ka jandatu i nuu ya. <sup>19</sup> Ti ni sa'a ri tijni jniñu ña'nu ja xna'an ja kuñña'nu ya, chi yukan ni kuu maa jniñu ña'nu ni sa'a Espíritu Santo jiin ri. Ti sia'an ni ka'an ri jnu'un va'a Yandios siki Cristo nuu yívi taka ñuu. Ni keja'a ri undi Jerusalén, ti ni ndekava ri taka ñuu jiin undi taka nda'a ñuu Ilírico. <sup>20</sup> Yukan ni jitu ndi'i ini ri ni jani ri jnu'un va'a Yandios siki Cristo Jesú nuu taka ñuu, nuu yívi ja changa ga kuniso'o i jnu'un Cristo, chi ru'u tu ni ja'an kani ri jnu'un nuu taka yívi ja ja ni ka jiniso'o jnu'un ja ni ka ka'an taka ga chaa. <sup>21</sup> Su'va ni sa'a ri nava ka'an nuu tutu ii:

Taka yívi ja jankívi ni kiji jnu'un ya nuu i, vijnna ti na kuniso'o i jnu'un ya. Ti taka yívi ja tu ja'i kuni kuiti i jnu'un ya, vijnna ti chaku va'a ini i jnu'un ya.

### *Ndo'o ini Pablo ja ki'in da ñuu Roma*

<sup>22</sup> Ja yukan, siki jniñu sa'a ri ja'a, ja jani ri jnu'un ya taka ñuu, ti tu kuu ja jaa ri nuu kanchuku ra naa ra. Vasu tijni jinu ni ndo'o ini ri ja jaa ri. <sup>23</sup> Ko vijnna chi ja ni ndekava ri jiin jniñu nuu ni ka'nun da'a ñuu ja'a, ti vanuxia ni kuu kuiya ja ndio ini ri jaa ri nuu kanchuku ra. <sup>24</sup> Ja yukan ndo'o ini ri ya'a ri nuu kanchuku ra ichi ki'in ri nuu España. Ti kusii ini ri nu ja ni ka kanxia'u yo. Yukan ti chindee ra ru'u naa ra ja kuu ichi ki'in ri yukan.

<sup>25</sup> Ko vijnna chi ki'in ri ñuu Jerusalén, ti kunda'a ri jaku xu'un ja kuu taka ñani yo kanchuku yukan. <sup>26</sup> Chi ñani yo ja ka kandixia ini ñuu Macedonia jiin ñani ka kandixia ñuu Acaya, ni ka kueko i jaku xu'un ja ki'in nuu taka ñani ka jna'an nundo'o ñuu Jerusalén. <sup>27</sup> Chi taka i ni kusii ini ja ni ka kueco i xu'un. Ti iyo va'a yukan, chi taka maa i ja kuu yívi taka ga nación, ti ndixia ja ka chindee va'a i yívi hebreo yukan. Chi ja siki yívi hebreo ti ni ka ni'in i jnu'un Yandios ja ka kuu i yívi inga nación. Ja yukan kanuu na chindee i yívi hebreo ja ka kandixia, chi ka nandi'i i ja kuchaku i. <sup>28</sup> Ko nu ni sino ri jniñu ja'a ja kin sia'a ri xu'un nuu i, yukan ti kee ri kuaja ri nuu kanchuku ra, ti sa ya'a ri ki'in ri España. <sup>29</sup> Ti jini va'a ri ja nu na chaa ri nuu kanchuku ra, ti taka yo na ni'in jnundee ini siki ja ka yi'i yo jiin Cristo Jesú.

<sup>30</sup> Ñani naa ra, ka'an nda'u ri jiin taka ra ja na chindee chituu ra ru'u, ti kakanta'u ra ja'a ri nuu Yandios siki jniñu ja nduku ndee ri jiin. Yukan sa'a ra siki ja ka kandixia yo Jito'yo Cristo Jesú, jiin siki ja kunda'u ini Espíritu

Santo yo'o. <sup>31</sup> Ti kakanta'u ra ja na kaku ri nuu nda'a taka chaa tu ka kandixia ja kanchuku ini ñuu Judea. Ti suni kakanta'u ra ja na kusii ini taka ñani kanchuku Jerusalén ja kin sia'a ri xu'un ja'a ja kuu da naa da. <sup>32</sup> Nusa ti nu kuni Yandios ti kuaja ri nuu kanchuku ra naa ra, ti na kusii xaan ini yo naa yo, ti na ni'in ri jnundee ini nu kancha ri jiin ra. <sup>33</sup> Ti jikanta'u ri ja Yandios na kua'a ya jnu'un va'a ini yo, ja kancha ya jiin taka ra naa ra. Ti sia'an na koo.

### *Jnu'un ka kanxia'u da*

## 16

<sup>1</sup> Ti vijnna, ru'u Pablo, ka'an ri jiin taka ra ja na chindree ra kua'a yo Febe, chi maa ña kuu ña'an ja junukuachi nuu yivi ka kandixia ñuu Cencrea. <sup>2</sup> Kuanta'u va'a ña naa ra, chi suni yi'i ña jiin Jito'yo, chi kanuu ja sia'an na sa'a taka yivi ka kandixia. Ti chindree ra ña jiin sava'a ni ga ja nandi'i ña, chi ni chindree ndixia ña kua'a yivi, ti suni undi ru'u ni chindree ña. <sup>3</sup> Kanxia'u ra jiin Priscila jiin Aquila ja kuu ru'u ti na sa ndee ini ndinduu da, chi ndinduu da ni ka chindree ru'u siki jniñu Cristo Jesú. <sup>4</sup> Chi nu ni jna'an ri nundo'o ja jaku ni ga ti kuū ri niku, ti ndinduu da ni ka nama ru'u, ti tu ni jitu ini da vasu na kuū da niku. Ja yukan nakuanta'u ri nuu ndinduu da, ti ansu nini ru'u, chi suni taka chaa ja ka kandixia ma'ñu taka ga nación.

<sup>5</sup> Suni kanxia'u ra nuu taka yivi ka kandixia ja ka ndututu i ini ve'e Priscila jiin Aquila ja na sandee ini da. Suni kanxia'u ra nuu amigo ri Epeneto ja na sandee ini da. Chi maa da kuu ja ni kandixia undi nuu jnu'un Cristo nuu nda'a ñuu Acaya. <sup>6</sup> Suni kanxia'u ra ja na sandee ini María, ña'an ja ni sajniñu xaan nuu ra naa ra ja ni junukuachi ña nuu ro'o naa ra. <sup>7</sup> Suni kanxia'u ra ja na sandee ini Andrónico jiin Junias, ndinduu chaa ja kuu jna'an ri, ja ni ku'iin ri jiin da veakaa. Ti taka apóstol ka ja'a da yiñu'un nuu ndinduu chaa un, chi xnakan da ni ka kandixia Cristo ja kuu maa ri.

<sup>8</sup> Ti kanxia'u ra nuu Amplias ja na sandee ini da, chaa mani ri jiin, chi kandixia ndaa da Jito'yo. <sup>9</sup> Kanxia'u ra nuu Urbano ja na sandee ini da, ja chindree jna'an da jiin yo siki jniñu Cristo Jesú. Ti suni nuu Estaquis, chaa mani ri jiin. <sup>10</sup> Kanxia'u ra nu Apeles ja na sandee ini da, chaa ja ni stuu da ja jika ndaa da nuu ichi Yandios. Suni kanxia'u ra nuu yivi ve'e Aristóbulo, ja na sandee ini da naa da. <sup>11</sup> Kanxia'u nuu Herodión, chaa kuu jna'an jiin ri ja na sandee ini da. Ti suni sia'a ka'an ra jiin yivi ve'e Narciso, ja ka kandixia i maa Jito'yo. <sup>12</sup> Kanxia'u ja na sandee ini Trifena jiin Trifosa, ndinduu ña'an ja sajniñu xaan siki jnu'un Jito'yo. Ti suni kanxia'u ra ja na sandee ini Pérsida, kua'a yo ja mani yo jiin, chi suni ni sajniñu xaan ña siki jnu'un Jito'yo. <sup>13</sup> Kanxia'u ra ja na sandee xaan ini Rufo, chaa ka jini yivi ja va'a xaan sajniñu ja kuu nuu Jito'yo. Ti suni sia'an ka'an ra jiin nana da, chi maa ña ni jito ru'u, ti sa'a ri nanu ja nana ri kuu ña. <sup>14</sup> Kanxia'u ja na sandee ini Asíncrito jiin Flegonte jiin Hermas jiin Patrobas jiin Hermes jiin taka ga ñani yo ja ka iyo jiin da yukan. <sup>15</sup> Ti suni sia'an Filólogo jiin Julia jiin Nereo jiin kua'a da, suni Olimpas, jiin taka ga ñani ka kandixia yukan, ja na sandee ini taka da naa da.

<sup>16</sup> Ti yiñu'un xaan kanxia'u jiin jna'an ra ja ka ndututu ra, ti teyu'u ra nuu da. Taka yivi ka kandixia Cristo Jesú ka kanxia'u i ja na sandee ini ra naa ra.

<sup>17</sup> Ti ka'an nda'u ri nuu ra ñani, ja koto ra maa ra nuu yivi ja ka nduku nasa sasiñ jna'an jiin jnu'un ja tu yi'i jiin taka ja ni ka kutu'va ra. Ti kuxio ra nuu yivi un nu sia'an ka sa'a da, <sup>18</sup> chi yivi un tu sa'a da jniñu ja kuni maa Jito'yo Cristo Jesú, chi maa ni jniñu ja kuni maa da. Chi vixi xaan yu'u da ka ka'an

da, ti yukan ka xnda'u da nuu yivi ja tu ja'i kuni va'a da jnu'un ndaa ti ka kandixia da un. <sup>19</sup> Ti taka ro'o, chi ka jini va'a yivi naa i ja ka kandixia va'a ra ti ka jandatu ra nuu ya, ti ja siki yukan kusii ini ri. Ti kuni ri ja va'a na kutu'va ra taka jnu'un va'a ja yi'i jiin jnu'un Yandios, chi maa iiñ ni jnu'un un ka'an jandaa, ansu ja sa'a ra iiñ jniñu ndeva'a. <sup>20</sup> Ti maa Yandios na kua'a ya jnu'un ndee ini jiin jnu'un siñ ini, nava yachi na sa'a ya ja na kundee ra siki taka jniñu kue'e ja kuni sa'a ja'u'u un. Ti maa Jito'yo Jesús ja kunda'u ini ya yo'o, na chindee ya taka ro'o naa ra, ti nava sia'an na koo.

<sup>21</sup> Sandee ini ra naa ra kachi Timoteo, chaa chindee jiin ri siki jnu'un ya. Ti suni sia'an ka'an taka jna'an ñuu ri, Lucio, Jasón jiin Sosípater.

<sup>22</sup> Ti maa ri ñani Tercio, ja chaa ri tutu ja'a ja ka'an Pablo, suni kanxia'u ri ja na sandee ini taka ra naa ra ja ka kandixia yo Jito'yo. <sup>23</sup> Ti suni sia'an ka'an Gayo, chaa ni ja'a nuu ve'e nuu kanchuku ri. Kanxia'u da ja na sandee ini ra naa ra. Chi suni sia'an januu da ve'e nuu taka yivi ka kandixia. Ti suni siukan kanxia'u Erasto, chaa kuu tesorero ñuu ja'a. Suni siukan ka'an ñani yo Cuarto.

<sup>24</sup> Ti maa Jito'yo Cristo Jesús ja kunda'u xaan ini ya yo'o, na chindee ya ro'o naa ra nava sia'an na koo, chi maa Jesús kuu Cristo ja ndiso ya jniñu ña'nú nuu Yandios. Ti sia'an na koo.

### *Jnu'un sa ndi'i ni ga*

<sup>25</sup> Ti vijna na kana yo Yandios chi ña'nú xaan ga kuu ya. Chi mani maa ya sa'a kutu jnu'un ini taka ra naa ra, jnu'un ja ni xna'an ri nuu ra ja kuu mani jnu'un ndaa siki Cristo Jesús. Ti suni kua'a ya jnundee ini nuu ra, chi vijna ja ni xna'an Yandios jnu'un Cristo Jesús, maa jnu'un ja ni kunde sa'yí undi changa ga ni ndenda Cristo. <sup>26</sup> Ko vijna ti ja ni kenda ndijin chi ni chaa Cristo. Vijna ti chaku ini yivi maa tutu ii ja ni chaa taka profeta, ja ni ka ka'an da jnu'un ya. Ti sia'an kuu chi maa Yandios ni ta'u jniñu ja'a, ja na kenda ndijin jnu'un ya nuu yivi tendi'i kuiti nación, nava na kandixia i Jesús ti kuandatu i jnu'un ya.

<sup>27</sup> Ni kani ni kuiya na ka'an yo ja kuña'nú Yandios siki jniñu ña'nú ni sa'a ya jiin Cristo Jesús. Chi maa iiñ ni maa ya kuu ja ndichi xaan ga. Sia'an na koo.

## Carta ni chaa San Pablo nuu yíví ñuu Corinto

### *Chaa Pablo tutu nuu yíví kandixia ini ñuu Corinto*

<sup>1</sup> Ru'u Pablo jiin ñani yo Sóstenes, ka kanxia'u ri nuu taka ro'o ja kanchuku ñuu Corinto. Ja ni nakaji Yandios ru'u ja kuu ri apóstol nuu Cristo Jesú, ya ndiso jniñu ña'nu nuu Yandios, ti ni ja'a ya jniñu nuu ri ja na kuu ri apóstol nuu ya. <sup>2</sup> Ti chaa ri tutu ja'a nuu ra naa ra ja ka kuu ra yíví kandixia, ja ka ndututu nuu ñuu Corinto. Ka yí'l nda'a Cristo Jesú suni sia'an ja ka yí'l taka ga yíví kandixia nuu taka ga ñuu. Ndinduu ra ka ndakuni'in ra sivi ya ja ka chíñu'un ra maa ya, chi maa ya kuu maa Jito'yo. Ni nakaji Yandios maa ra naa ra ja ka yí'l ra jiin Jito'yo Jesú, ya kuu Cristo, chi ni nakana ya ja koo ndoo koo ii ra nuu ya naa ra. <sup>3</sup> Ti maa Tata yo Yandios jiin Jito'yo Cristo Jesú, na kunda'u ini ya ti na chinddee ya ro'o naa ra, ja na kukuee kunchuku ra nava kuni maa ya.

<sup>4</sup> Nini nakuanta'u ri nuu Yandios ja ni kunda'u ini ya ro'o siki ja ni ka kandixia ndaa ra jnu'un Cristo Jesú na ni ka jiniso'o ra, chi maa ya ni chinddee ja ni nakua'a ya inijnuni ja na chaku va'a ini ra jnu'un ya. Yukan kuu ja nakuanta'u ri nuu Yandios ja kuu maa ra naa ra ja va'a ni ka janta'u ra jnu'un ya. <sup>5</sup> Ti siki ja ka yí'l ra nuu nda'a maa Cristo Jesú, ti ni'in ra taka ja nandi'i ra nuu Yandios nu na chu'un ini chu'un aña'ra nuu ichi ya. Ja sia'an kuu ja vijna ti ja ka iyo tu'va inijnuni ra ja na ka'an ndaa kuiti ra jnu'un Cristo Jesú. <sup>6</sup> Ti jandaa ndixia kuu, chi sia'an ni ka janta'u ra jnu'un ya na ni xndaku ri nuu ra naa ra. <sup>7</sup> Yukan ni ja'a ya inijnuni ra naa ra nasa kojnuni kuanuauachi ra nuu ya ja kuu nuu nuyíví ja'a. Ti tu kumani nuu ra ni iin ja nandi'i nu na kundatu kuee ra undi na jaa maa kivi ka'nú, ja ndenda maa Jito'yo Cristo Jesú. <sup>8</sup> Ti maa ya kuu ja chinddee navá na kundee ra siuku ndaa ra naa ra undi na jaa kivi nakuaka ya ro'o, ti navá sia'an tu koo kuachi siki ra kivi na nchaa maa Jito'yo Cristo Jesú. <sup>9</sup> Ti jandaa ndixia kuu chi siuku ndaa Yandios taka ja ni chisojnu'un ya, chi maa ya ni nakaji ro'o naa ra ja iin ni na kuu ra jiin se'e ya Cristo Jesú, ya kuu Jito'yo.

### *Xndaku Pablo ja tu kondo'o siiñ siiñ ini yíví*

<sup>10</sup> Ñani, vijna ti na kachi ri iin jnu'un nuu ra, siki ja iin ni ka kuu yo, chi ka kandixia yo jnu'un Jito'yo Cristo Jesú, ya ndiso jniñu ña'nu. Kanda'u ri jiin ra naa ra ja iin nuu na koo ini ra jin iin ni inijnuni. Koto kondo'o siiñ siiñ ini ra, ja sava ra ka'an iin jnu'un ti uu ga ra ka'an inga jnu'un. <sup>11</sup> Sia'an xndaku ri, ñani naa ra, chi sia'an ni ni'in ri jnu'un ja ni ka kachi yíví veko'o ve'e Cloé, ja ka yeysi'i jna'an ra nanu ina <sup>12</sup> siki ja siiñ siiñ ka ka'an ra: "Ru'u chi jiin Pablo yí'l ri." "Ti ru'u yí'l jiin Apolos." Uu ga ka ka'an: "Ru'u yí'l jiin Pedro." "Ti ru'u yí'l jiin Cristo." <sup>13</sup> Ti ja sia'an ka ka'an ra xi ka ndo'o ini ra ja ni taji Yandios tjin yíví kii nama yo'o nu? ¿Xi ru'u Pablo, xi ni ji'l ri nuu nda'a cruz ja kuu maa ra naa ra nu? ¿Xi Pablo, ni skuanducha ro'o nu? <sup>14</sup> Ko na kuta'u ri nuu Yandios ja ansu tendi'i ra ni skuanducha ri, chi nini Crispo jiin Gayo, yukan ni.

<sup>15</sup> Ti tu kachi ra naa ra ja tendi'i ra ni ka janducha jiin sivi ri. <sup>16</sup> Chi ñu'un ini ri ja ni skuanducha ri Estéfanias jiin yíví kanchuku ve'e da. Ti jini ri ja yukan ni kuu yíví ni skuanducha ri jani ini ri. <sup>17</sup> Sia'an ni kuu yíví ni skuanducha ri, chi tu ni nakaji Cristo ru'u ja kin sa'a ri jniñu yukan. Su'va ni kana ya ru'u

ja na kachi ndaa ri jnu'un ya nuu yivi naa i. Ko tu ka'an ri jnu'un ndichi ja xndaku ri nava tu chaku ini ra. Chi nu sia'an ti va tu kujnuni va'a ini ra na ra jnu'un un ja ni ji'i Cristo nuu nda'a cruz.

### *Juin Cristo ni xna'an Yandios maa jniñu ña'nu ya*

<sup>18</sup> Siki jnu'un ja ni ji'i Cristo nuu nda'a cruz ja ni nama ya yivi, ti jnu'un xndoña'an kuu un ja kuu nuu taka yivi ka iyo kuachi, ja ni ka jna'nun dnatu i. Ko ja kuu maa yo, chi su'va jnu'un Yandios kuu, chi ni kachi ya ja jnu'un un kundiso jniñu ña'nu. <sup>19</sup> Chi sia'an yoso nuu tutu ii Yandios: Tu kuanta'u kuiti ri jnu'un ka ka'an chaa tu'va xaan un. Ni tu kuanta'u ri inijnuni chaa ndichi xini un. Chi su'va sa'a ri ja na ki'vi inijnuni da. Kachi nuu tutu un.

<sup>20</sup> ¿Nusa ti nau kuu chaa tu'va xaan nu? ¿Ti nau kuu chaa ndichi xini un nu? ¿Xi nau kuu chaa nanduku vii ndaa vee nene taka jnu'un yivi tu'va nusa? Ti taka jnu'un chaa tu'va ka iyo nuu ñuyivi ja'a, ni kachi Yandios ja tu ni'in jniñu kuiti. <sup>21</sup> Chi jandaa ndixia kuu ja ndichi xaan ga maa jnu'un Yandios, ti ansu inijnuni taka yivi ndichi xini iyo nuu ñuyivi ja'a. Ja yukan ni kachi Yandios ja tu kuajniñu kuiti jnu'un un nasa nakuni ndaa i nau kuu maa ya jiin tendi'i jniñu sa'a ya. Chi su'va ni ndo'o ini ya ja taji ya chaa kikoyo ja na ka'an da jnu'un va'a siki Cristo Jesùs. Ti taka yivi na kandixia jnu'un un ni kachi ya ja nama ya i nuu kuachi, vasu ka janí ini yivi ñuyivi ja'a ja mani jnu'un xndoña'an kuu. <sup>22</sup> Ti sia'an kundixia chi yivi hebreo, mani ka kuni i ja na sa'a Yandios kua'a jniñu ña'nu nava na kandixia i ja maa ya kuu Yandios kuña'nun xaan. Ti yivi griego ka jitu ndi'i ini i nasa kundichi xaan ga xini i. <sup>23</sup> Ko ru'u Pablo, na kachi ndaa ri ja ni ji'i ndixia Cristo nuu nda'a cruz ja ni nama ya yivi. Ko yivi hebreo tu kukanuu i ja skexiko jnu'un un. Ti suni yivi taka ga nación ka ndo'o ndeva'a ini i ja tu nijniñu kuiti jnu'un un. <sup>24</sup> Ko taka yivi ni nakaji ya ni ka kandixia ndaa i Cristo Jesùs, vasu yivi hebreo xi yivi griego, ka nakuni ndaa i ja jniñu ña'nu ni sa'a Yandios jiin Cristo. Ni xna'an ya ja kuña'nun xaan ya, ti iyo jnu'un ndichi xaan ga ini ya. <sup>25</sup> Vasu ka ka'an yivi ja tu ni jniñu kuiti jnu'un Yandios, ko tu'va ti ndichi xaan ga kuu jnu'un maa ya, ansu inijnuni taka yivi tu'va ja ka iyo nuu ñuyivi. Suni ka janí ini yivi ja kukui'ya ini Yandios ja ni ji'i se'e ya Jesùs nuu nda'a cruz. Vasu ansu sia'an kuu, chi jiin jniñu un ni stuu Yandios nuu yo ja kuña'nun xaan ya, ansu ja ka ndo'o ini yivi ñuyivi ja'a ja ka kuña'nun xaan i.

<sup>26</sup> Ñani, kani ini naa ra siki nasa ni kunchuku ra na ti kandixia ga ra Jesùs, chi ka jini va'a ra ja tu ni iyo kua'a yivi tu'va jiin ra, ni tu ni iyo kua'a yivi kuña'nun ja ta'u jniñu, ti ni tu ni iyo yivi ja ni kuu se'e yivi ka kuña'nun ga. <sup>27</sup> Ko ja na kukanuu yivi tu'va un jniñu yivi ka kuña'nun, ni nakaji Yandios ro'o ja ka ndo'o ini yivi un ja tu tu'va kuiti ra jiin ja tu kuajniñu kuiti ro'o naa ra, chi ka ndo'o ini i ja kui'ya xaan kanda ra. <sup>28</sup> Ko su'va ni nakaji ya yivi kui'ya ja tu kuanjniñu kuiti, yivi ja ni ka skexiko chaa ka ndo'o vixi ini ja tu'va i xi ja kuña'nun i nuu ñuyivi ja'a. Ko ni nakaji Yandios ro'o naa ra, ti ni stuu ya ja kuu sa'a ra naa ra taka jniñu kuni ya, ti sia'an na kukanuu yivi ka ndo'o vixi ini ja ka kuña'nun i. <sup>29</sup> Sia'an ni sa'a Yandios nava ni iin yivi tu kondo'o vixi ini jiin inijnuni ja kuña'nun i nuu Yandios.

<sup>30</sup> Ja kuu maa ra naa ra ni sa'a Yandios ja iin ni ga ni ka nduu ra jiin Cristo Jesùs, chi ni ka kandixia ra ya. Ja yukan ni ka ni'in ra inijnuni ndichi ga, chi ni ka jini ndaa ra ja ni ji'i ya ja'a yo. Ti sia'an na na ni'in ta'u yo nuu ya, ti tukaa jna'nun dnatu yo jiin kuachi yo, chi ni sa'a ya ja na ndundoo yo, ti na koo ii yo nuu ya. Chi ni chunaa ya kuachi yo ja ni ji'i Jesùs ja kuu maa yo.

**31** Ti sia'an na koo nava yoso nuu tutu ii: "Nu iin yivi kuni ndo'o vixi ini, ti va'a ga na kondo'o vixi ini i jiin maa jnu'un ja ni sa'a Jito'yo ja'a yo", kachi.

### Xndaku Pablo ja ni ji'i Cristo

## 2

**1** Ñani, ti ru'u, na ni jaa ri nuu kanchuku ra ñuu Corinto, kaji xaan ni xndaku ri jnu'un Yandios nuu ra siki jniñu ña'nú ni sa'a Cristo, ko tu ni ka'an ri mani jnu'un ndichi ja tu chaku ini ra. **2** Ti iin jinu ni ni chundee ini ri ja tu nau inga jnu'un ndakuni'in ri ja xndaku ri nuu ra, chi iin jiña ni maa jnu'un Cristo Jesús ja ni ji'i ya nuu nda'a cruz ja ni nama ya yo'o. **3** Ti na ni jaa ri nuu kanchuku ra, tu kuiti jnu'un ndee ini ri iyo ja kundee ri jiin jniñu ni ja'a ya, ti yu'u ri keja'a ri jiin jniñu un ja nanu ni'in ri. **4** Ti na ni ka'an ri jnu'un un nuu ra naa ra, ni tu ni ndo'o vixi ini ri ja ka'an ri mani jnu'un ndichi nava ka ka'an yivi naa i. Chi su'va jiin maa jniñu ña'nú Espíritu Yandios ni xndaku ri nuu ra. **5** Sia'an ni xndaku ri nava na kandixia ra maa jniñu ña'nú Yandios, ansu ja kandixia ra jnu'un ndichi ka ka'an yivi ja tu ka janta'u i jnu'un Yandios.

### Ndaku ni'in Pablo NASA kuu Espíritu Yandios

**6** Ti ru'u Pablo, ja xndaku ri jnu'un siki Cristo Jesús, jandaa ndixia kuu ja ndichi xaan jnu'un un. Ti yivi ni ka kandixia jnu'un un ka kuu ndichi ndixia i, ti ansu yivi ka kuña'nu ja tu ka janta'u jnu'un Yandios siki Cristo Jesús. Ti yivi un va'a ga na naa i. **7** Ti jnu'un ja ka'an ri kuu maa jnu'un Yandios ja ndichi ga, ja undi na jana'an vijna tu ja'i ndenda nuu yivi ñuyivi, chi sia'an ni kachi Yandios ja na kasi inijnuni i nava tu chaku ini i. Chi undi na ti xnukoo ga ya ñuyivi, ni chu'un ini ya siki yo'o nava na kandixia yo, ti na ni'in yo jnu'un ndichi un nava na nduña'nu yo ja keta'u yo vijna, ti kuchaku yo ja kuu saa ni. Sia'an ni kachi Yandios ja kuu yo'o naa yo. **8** Ti jnu'un ndichi Yandios ja ka'an siki Cristo, ni iin chaa ka kuña'nu ja ka ta'u jniñu nuu ñuyivi ja'a, tu chaku kuiti ini da, chi nu ni chaku ini yivi un jnu'un ya, ti va tu ka'ni kuiti da naa da maa Jito'yo ja kuu ya nuu nda'a cruz nikü, ja kuña'nu xaan ga ya. **9** Chi su'va ni siuku ya nava yoso nuu tutu ii Yandios:

Taka ja ni satu'va ya ja kuu yivi mani jiin ya.

Hiñ jnu'un ja jankivi ni jini kuiti i ja iyo.

Ti ni tu ni ka jiniso'o i ja iyo, chi ni iin ja ni kii kani jnu'un nuu i.

Kachi tutu.

**10** Ti sia'an kuu ndixia chi ni xna'an Yandios yo'o maa jnu'un ndichi ndixia ja kuu siki Cristo. Ti jiin jniñu ña'nú maa Espíritu Santo ya, ni xna'an ya nuu yo, chi maa Espíritu Santo kuu ja jini va'a ndi'i kuiti, vasu undi inijnuni maa Yandios. **11** Ti sia'an kuu ndixia chi ni iin yivi tu jini nasa ndo'o ini inga yivi, chi maa iin ni inijnuni i jini nasa ka ndo'o ini i. Ti suni sia'an kuu jiin Yandios, chi tu ni iin yivi ja jini nasa kuu ya, so nini mani maa Espíritu kuu ja jini va'a.

**12** Ti yo'o ja ka kandixia Cristo, ni ka ni'in yo Espíritu ja vají nuu maa Yandios, ti jiin Espíritu Yandios ni ni'in yo inijnuni maa Yandios, ti tu ndo'o ini yo nanu ka ndo'o inijnuni yivi ñuyivi ja'a. Víjna ti chaku va'a ini yo taka ta'u ni ja'a ya nuu yo, nava na kundee yo jiin jniñu ya. **13** Ti ru'u Pablo ka'an ri maa jnu'un ni xna'an Espíritu Santo nuu ri, ansu xndaku ri jnu'un ja ni kutu'va ri nuu yivi ñuyivi, chi maa Espíritu Yandios ni xna'an ru'u nasa ka'an ndaa ri maa jnu'un ya nuu yivi ni nakaji ya.

**14** Ko yivi tu chaku ini nasa kuu maa Espíritu Yandios, tu janta'u i maa jnu'un ya, chi ka ka'an i ja jnu'un ndeva'a kuu. Ja yukan tu chaku ini i, chi tu ja'a i jnu'un ja kuncha Espíritu Santo, jiin ja ni chaku va'a ini i. **15** Ti yivi ja ni

ni'in Espíritu Santo, ti chaku ndaa ndixia ini jnuni i nau kuu ja iyo va'a ti nau kuu ja tu iyo va'a. Ko yivi tu kancha jiin Espíritu Santo tu iyo ndaa inijnuni i ja ka'an i nau ja iyo va'a ti nau ja tu. <sup>16</sup> Chi sia'an kachi nuu tutu ii: "Yandios kuu Yandios, ti tundo jini kuiti nasa ndo'o ini maa Jito'yo. Ni tu ni iin ja xndaku nuu ya. Yukan kuu ja tundo iyo kuiti." Kachi tutu. Ti vasu sia'an kuu, ko yo'o naa yo ja ni ka ni'in yo Espíritu Santo, chaku ini yo nasa ndo'o ini inijnuni Cristo.

### *Xndaku Pablo ja iin nuu na kava ini yivi ka kandixia*

## 3

<sup>1</sup> Ti na kachi ri nuu ra naa ra ñani ja undi nuu, tu ni xndaku ri nanu xndaku yo nuu yivi ja jika i jiin Espíritu Santo, chi ja ni ka janta'u i ya. Chi su'va ni xndaku ri nava ka'an ri jiin yivi ja ka ñukuu ini nuu ñuyivi ja'a. Ti sia'an ni kunchuku ra nava suchi kuachi ja changa ga kuniso'o i jnu'un Cristo. <sup>2</sup> Na ni xndaku ri jnu'un Yandios nuu ra, tu ni nduku ri jnu'un yi ja tu chaku ini ra, chi ka kuu ra nava suchi lulu ja ni yaxin ga. Chi ka kuu ra nava suchi ti kua'nu ga ja kuu kaji i staa. Ti nava suchi kuachi un ka kuu ra undi vijna. <sup>3</sup> Sia'an ka kuu ra chi changa ga kondo'o ndaa ini ra, chi tu ka iyo iin nuu ini ra. Su'va ka kuu kuasun ini jna'an ra. Yukan sa'a ja tukaa ga ka iyo mani ini ra. Ka kanaaa ra ti ka sasiin jna'an ra. Ja sia'an ka sa'a ra ti ka kuu ra nava yivi ñuyivi ja'a, chi kua'an ra jiin nava ka ndo'o ini maa ra. <sup>4</sup> Ja ka'an ra: "Ru'u yi'i jiin Pablo." Ti uu ga ra ka'an: "Ru'u ka yi'i jiin Apolos." Nu sia'an ka ndo'o ini ra, ¿ansu iin ni ka kuu ra jiin yivi ni'in ini un ja ki'in yi nava kuni maa i nu?

<sup>5</sup> ¿Nusa ti nau ja kuu ru'u Pablo xi nau ja kuu Apolos? Ti ja ka jini ra ja suni chaa junukuachi nuu Yandios ka kuu ri. Ja yukan jajniñu ya ru'u ja na xndaku ri jnu'un ya siki Cristo Jesú. Chi iin iin ri ka junukuachi sava'ni ga jniñu ni tatu Jito'yo nuu ri. <sup>6</sup> Nanu ja ru'u ni xndee iin ndikin lulu ja ni ka'an ri jnu'un Yandios siki Jesú. Ti Apolos ni kuu chaa ja ni chi'i da nducha nuu ndikin lulu un, chi ja ni xndaku ndaa da maa jnu'un ya nuu ra naa ra. Ti nanu sa'a Yandios ja ja'nú ndikin lulu un, suni sia'an ni sa'a ya jiin ra naa ra ja ni ka kandixia ndaa ra jnu'un ya. Ti kuan kuixia inijnuni ra jiin jnu'un ya. <sup>7</sup> Nusa ti tundo kuu kuiti chaa ka sa'a jniñu. Ni chaa xndee ndikin lulu un jiin chaa ni chi'i nducha un, chi maa iin ni Yandios kuu ja sa'a taka jniñu un. Yukan kuu ja kuan kutu'ya ri jiin jniñu ri, ti suni Apolos. <sup>8</sup> Chi jandaa na kachi ri ja iin ni ka kuu chaa ka sa'a jniñu un vasu iin da ni xndee ti inga ni chi'i nducha, ti maa Yandios cha'u ya nuu iin iin da nasa kuu maa jniñu ni ka sa'a da. <sup>9</sup> Chi ru'u ka kuu ri chaa ka sajníñu ja kuu nuu maa Yandios. Ti ro'o naa ra ka kuu ra nava un itu ja sa'a ya ja ja'nú kua'a. Ti suni ka kuu ra nanu iin ve'e ja sa'a Yandios.

<sup>10</sup> Chi ni kunda'u ini Yandios nuu ri, ti ja yukan ni ja'a ya jniñu ña'nú ja na sa'a ri jniñu nuu ra, naa ra nanu iin albañil tu'va xaan ja va'a jini da chikua'a da nasa ku'va kani da nama iin ve'e. Chi va'a ni satu'va ri jniñu un, ti siki nama yukan na sa'a uu ga da jniñu. Ti taka chaa na sa'a jniñu un, na koto va'a xaan da ja tu yuji da kendo kui'ya jniñu sa'a da. <sup>11</sup> Ti Cristo kuu nanu yuu ka'nú xaan ja ndiso nama jiki ve'e un. Ja yukan kuu ja tu iyo ni iin chaa kin sama jniñu un. Iin ni kuu ja tu kuu kin sama yo jnu'un Cristo Jesú jiin inga jnu'un. <sup>12</sup> Ti chaa kin sa'a ve'e siki nama un, kuu nanu chaa kin xndaku jnu'un Yandios nuu ra naa ra. Yukan kuni ndaa yo nu kuketu jniñu sa'a da nanu kuketu taka ndajniñu va'a ja kuu oro, plata, xi yuu vii xaan. Xi kuu nanu yujnu, xi nanu icha, xi nanu ndayo'o. <sup>13</sup> Sia'an kuu ja kanuu ja na kunukuachi va'a chaa xna'an jnu'un Yandios, chi jaa iin kivi ka'nú ga, ti yukan kuni ndijin yo naa nuu jniñu ni sa'a da. Chi xndichi Yandios da

nasa kuu jniñu ni ka sa'a da, chi jiin ñu'un kii kivi un. Yukan na ti naa takana ndajniñu ja kayu, chi jiin maa ñu'un un kujnuni ini yo nasa kanda maa jniñu ni ka sa'a ndi iin ndi iin da. <sup>14</sup> Ko nu tu ni kayu jniñu ni sa'a da, yukan na ti ni'in da iin ta'u nuu Yandios. <sup>15</sup> Ko nu jniñu ni sa'a da ni ndi'i ni kayu, yukan na ti ni xnaa da ta'u da nuu Yandios. Vasu na nama ya maa da ti tu ki'in da nuu ñu'un, ko nanu ja ni ja'an da nuu ñu'un kuu ja tu ni kee va'a jniñu ni sa'a da.

<sup>16</sup> ¿Ko vijna na kachi ri, xi tu chaku ini ra naa ra ja ka kuu ra nanu ve'e ii maa Yandios, ti kancha Espíritu ya jiin ra xi nu? <sup>17</sup> Ti nu nau ja kuni xnaa ve'e ii Yandios jiin jnu'un xndoña'an ja xndaku da nuu yivi, ti maa Yandios na xnaa ya chaa un. Chi ndoo xaan kuu ve'e ii Yandios. Ti sia'an ka kuu yo nanu maa ve'e ii ya.

<sup>18</sup> Ti na kachi ri ja ni iin ra koto ma xnda'u ra maa ra ja kani vixi ini ra ja ndichi ka'an ra, chi yivi jani vixi ini jiin jnu'un maa da, ka ka'an da nanu ka ka'an yivi ñuyivi ja'a. Koto sa'a ra sia'an, chi va'a ga jiin maa jnu'un Yandios na ndundichi xini da, vasu na kachi yivi ja ni kuñaa xini ra. <sup>19</sup> Chi na kachi ndaa ndixia ri ja yivi jani vixi ini ja ndichi xaan xini da, ko so nini mani maa jnu'un iyo nuu ñuyivi ja'a kuu, chi jnu'un ñaa kuiti kuu ja kuu nuu maa Yandios. Chi suni kachi nuu tutu ii: "Yivi jani vixi ini jiin jnu'un ndichi un ti vasu tu'va xaan da, ko jasi Yandios inijnuni i nava tu kejiyo da jiin nava ka ndo'o ini da", kachi tutu.

<sup>20</sup> Ti suni kachi nuu tutu ii: "Jini va'a maa Jito'yo tako ja ka ndo'o ini chaa tu'va un, vasu tu njniñu chi so ka ndo'o ka'a ini da", kachi. <sup>21</sup> Ja yukan koto ndo'o vixi ini ra ja siuku ra nini jnu'un ja xndaku iin iin ra. ¿Ti ndoo sa'a ra sia'an? Ti ja ka jini ra ja maa Yandios kuu ya ni ja'a inijnuni taka ri ja na kuu chinddee ri ro'o naa ra jiin jnu'un maa ya, chi taka ja iyo ja ni ja'a ya nuu ra, <sup>22</sup> kuu Apolos, xi Pedro, xi ru'u Pablo ja ka xna'an ri jnu'un ya, ti tendi'i ja iyo nuu ñuyivi ja'a xiin ra. Taka ja iyo vijna jiin taka ja koo ga, ti vasu ja ni ji'i ra xi ni chaku ga ra nuu ñuyivi ja'a, ko tendi'i kuu ja kuu maa ra naa ra. <sup>23</sup> Chi jandaa ndixia kuu ja yi'i ra jiin Cristo ja ka junukuachi ra nuu ya, ti Cristo kancha ya jiin maa Yandios, ja nuu maa ya junukuachi Cristo.

### Nava sajniñu chaa ka kuu apóstol

## 4

<sup>1</sup> Nusa ti ro'o, yivi ñuu Corinto, kanuu ja na chu'un ini ra siki jniñu ka sa'a ri, ja suni muzu ka junukuachi nuu Cristo Jesúz ja ni tatu Yandios ja sa'a ri naa ri. Yukan kuu ja ka jachanuu ri jnu'un Cristo ja kuu kivi vijna ja undi kivi ja ni ya'a un, tu ni kenda ndijin jnu'un un. <sup>2</sup> Yukan kuu ja ru'u naa ri, ka junukuachi ndaa ri jniñu ni ja'a ya ja ka ka'an ri jnu'un Yandios. <sup>3</sup> Ti ru'u Pablo, tu jituu ini ri ja nasa ka ndo'o ini ra siki ri. Ni tu sa'a ri nava ka ndo'o ini yivi ka kuña'nu nuu yivi ja'a, ni undi ru'u tu jini ri nuu iyo ndaa jniñu sa'a ri xi tuu. <sup>4</sup> Ti vasu jini inijnuni ri ja tu na kuachi yi'i jiin jniñu sa'a ri, ko ansu jiin yukan, ti ja iyo ndoo ri nuu Yandios, chi maa Jito'yo kuu ya kin xndichi ru'u. <sup>5</sup> Yukan kuu ja tu nde'e ra siki ri ja nasa jika ri jiin jniñu Yandios, chi tu ja'i jaa kivi ja na ki'in ya jniñu yo. Chi undi na nchaa maa Jito'yo, ti sa na keni'in ya nuu ndijin taka jniñu yisa'y'i ndeo nu iyo va'a xi tuu. Ti stuu kaji ya nasa ka ndo'o inijnuni taka yivi. Yukan na ti sa kuajnu'un ya iin iin yivi nasa kuu maa jniñu ni ka sa'a i ja ni tatu ya.

<sup>6</sup> Ñani, ja ka kandixia ra Cristo, na kachi ri ja taka ja'a ni ka'an ri nava na chaku ini ra naa ra, nasa kuu siki jniñu ka sa'a chaa ka xndaku nuu ra. Ni ndakuni'in ri sivi ri jiin sivi Apolos, nava na kujnuni ini ra nasa ka junukuachi ri nuu jniñu Yandios. Ti sia'an na chaku ini ra nava yoso nuu

tutu ii, ti tu kondo'o ini ra inga jnu'un ja tu yi'i jiin jnu'un Yandios. Nu sia'an na sa'a ra, yukan ti tukaa skexiko ra chaa ka ka'an jnu'un Yandios, ja iin da kuajnu'un ra ti inga da tuu. <sup>7</sup> Ti ru'u Pablo na kachi, ¿Nau ni xndaku nuu ra naa ra ja ka ndo'o vixi ga ini ra siki iin chaa ja ni xna'an jnu'un ya nuu ra, ti ka skexiko ra nuu uu ga chaa ja ni xna'an jnu'un ya nuu ra? ¿Nau ni xndaku sia'an? ¿Ti nau jnu'un iyo ja tu ni kutu'va ra nuu chaa ni xna'an jnu'un ya nuu ra? Nu sia'an kuu, ¿ti ndoo ka ndo'o vixi ini ra ja mani maa ra ni kutu'va jnu'un va'a un, ti tu ni ni'in ra nuu Yandios nu? Chi mani maa ya ni taji chaa ja ni xna'an jnu'un un. <sup>8</sup> Va ka jani ini ra ja ja ni kutu'va xaan inijnuni ra jiin jnu'un ndichi, ti va tukaa nandi'i kuiti ra naa ra inga jnu'un, chi va ka ndo'o ini ra ja, ja ni nduña'nua ra naa ra nuu Yandios. Ti nu sia'an va ja ka ndiso ra iin jniñu ña'nu ga nuu ya vijna, vasu ru'u naa ri ni ka xndaku ri nuu ra ja na ni'in ra inijnuni tu'va un. Ko vijna ti nu ja ka kuña'nua ndixia ra jiin jniñu ña'nu ga un, nusa ti va'a ga kuaja ri yukan nava na ni'in ri iin jniñu ña'nu suni nuu kanchuku ra ka ta'u ra jniñu.

<sup>9</sup> Xaan ga va'a nu sia'an iyo jiin ra naa ra. Ko ru'u, chi ka kuu ri apóstol nuu ya, ti tu kua'a ya jnu'un ja kunchuku ri nanu maa ra naa ra. Chi su'va ndo'o ini ri ja ni sa'a ya ja na kondo'o ri nundo'o, ja ni xndoo kui'ya ga ya ru'u ja kuu taka ga yivi, nanu iin chaa ja ni jna'nua ndatu ti kuū da. Nava ja ni chu'un ya ru'u nuu ñuyivi ja na kotonchaa yivi naa i ru'u jiin ángel iyo andivi. <sup>10</sup> Ko ja siki jnu'un Cristo Jesús ka ndo'o ini yivi ja ni ka sanaa inijnuni ri. Ti maa ra va ka ndo'o ini ra ja ni ka ndundichi ga xini ra jiin jnu'un Cristo. Ka ndo'o ini yivi naa i ja tundo kuu kuiti ri, ti maa ra va ka ndo'o ini ra ja ka kuña'nua ra. Chi ka ni'in ra ja yíñu'un nuu yivi, ko ru'u naa, ri chi su'va ka skexiko yivi ru'u naa i.

<sup>11</sup> Sia'an ka ndo'o ini ra, ko nde'e ra nuu ri nasa ka jika yo nuu ñuyivi ja'a. Chi undi vijna ka jna'an ri nundo'o jiin jniñu ka ndiso ri. Iyo ka ji'i ri soko xi ka ichi ri nducha, ti suni kumani sa'ma ku'un ri. Ni tu ka ñava'a ri ve'e nuu kunchuku ri, ti ka sa'a yivi nava kuu ini i jiin ri ja ka kuni kua'a i tau ri. <sup>12</sup> Ka nduku ndee xaan ri ka sa'a jniñu ri jiin nda'a ri ja na ni'in ri ja kuchaku ri. Ti ka ka'an ndeva'a yivi nuu ri, ko ka janta'u ri ti va'a ka'an ri jiin yivi un. Suni ka jito u'u yivi ru'u, ko ka janta'u ri suni, chi tundo iyo ja kuiti ini ri. <sup>13</sup> Ka ka'an ndeva'a kuiti yivi jnu'un kue'e siki ri, ko maa ri ka iyo mani ini ri jiin yivi un undi vijna. Ka skexiko i ru'u nava iin jayaka katuu ichi.

<sup>14</sup> Ti jnu'un ja'a ka'an ri, ko ja na chunso'o ra ti chu'un ini ra nasa kunchuku ra ansu ja na kukanuu ra, chi kunda'u ini ri ro'o. Yukan kuu ja xndaku ri nanu nuu se'e ri. <sup>15</sup> Sia'an ka'an ri chi vasu na koo uxi mil chaa xndaku jnu'un va'a Cristo nuu ra naa ra, ko ansu tendi'i kunda'u ini nuu ra naa ra, chi nini ru'u, ja kuu ri nanu tata ra, ja maa iin ni ri ka'an jnu'un Cristo Jesús nuu ra naa ra undi nuu. <sup>16</sup> Ja yukan kanda'u ri ja na nde'e na kotonchaa ra nasa siuku ri jiin jnu'un ya. <sup>17</sup> Ti ja siki yukan na jaa Timoteo, iin chaa ja kuu nanu se'e ri siki ja ni kandixia da jnu'un Jito'yo ja ni ka'an ri nuu da. Ti va'a siuku da jnu'un un, ti maa da na kachi nuu ra naa ra siki nasa siuku ri ichi Yandios ja kandixia ri Cristo Jesús. Ti jnu'un nava kandixia ri, yukan xndaku ri nuu yivi ka kandixia ja kanchuku i taka ñuu. <sup>18</sup> Ko sava ra ja ka kuu ichi ini siki ri, ja ka ndo'o ini ja tukaa jaa kuiti ri nuu kanchuku ra ja xndaku ni'in ri jnu'un un nuu ra. <sup>19</sup> Ti sia'an ka ndo'o ini ra ko ansu sia'an kuu, chi nu kuni maa Jito'yo, ti yachi ni kuaja ri, ti na nde'e yo nasa kanchuku ra. Ti taka chaa ka kuu ichi ini siki ri, ti tu nde'e ri nuu da jiuñ jnu'un ka'an da. Chi su'va kotojnuni ri da nu ndixia da ja ka sa'a ndaa da jniñu ja kuni Yandios. <sup>20</sup> Sia'an kin sa'a ri, chi nu ta'u Yandios jniñu, tu kuu jiin mani maa jnu'un ja kuni ndijin yo. Chi su'va jiin maa jniñu sa'a da, yukan kuu ja na nde'e yo nu iyo

ndaa ja nu ndixia da ja ndiso jniñu da nuu Yandios xi tuu. <sup>21</sup> Ko jikajnu'un ri ro'o ja kanchuku ñuu Corinto, ¿Nau ja iyo va'a? ¿Nu na jaa ri, va'a ga nduxaan ri nuu ra siki ja tu iyo va'a jniñu sa'a ra, xi va'a ga ndajnu'un vii yo jiin jnu'un mani ini nu?

### *Ka'an Pablo siki jnu'un yisikinchaa jna'an*

## 5

<sup>1</sup> Ni ni'in ri jnu'un ja iin chaa kancha jiiñ ra un nchaka da nana uu da. Ti na kachi ri ja tu iyo va'a kuiti un, chi ni yivi ja tu ja'i kuni kuiti i jnu'un Yandios tu ka sa'a i sia'an. <sup>2</sup> Ti vasu sia'an iyo, ko ni tu ka nde'e kuiti ra nuu jniñu sa'a chaa un. ¿Ndoo tu kukui'ya ini ra naa ra ja sia'an kanchuku ra? Ja sa su'va ka ndo'o vixi ini ra jiiñ jniñu ka sa'a ra. Su'va chajiyo ra chaa un na ki'in da niku, ansu ja ka ja'a ini ra ja najna'an da jiiñ ra naa ra. <sup>3</sup> Ti ru'u, vasu tu kancha ri jiiñ ra naa ra, ko ja jini ini ri nasa koo chaa un. <sup>4</sup> Ti nu ni ka ndututu ra siki ja chiñu'un ra Jito'yo Jesú, ti sa'a ri nanu ja kuncha ri yukan jiiñ maa jniñu ña'nu ndiso ri nuu Jito'yo Jesú, <sup>5</sup> ti jiiñ jniñu ya na chajiyo chaa un na ki'in da. Ti na nachi'i yo da nuu nda'a ja'u'li un, nava tukaa ga kivi da jiiñ ra naa ra. Sia'an na kondo'o da jiiñ yiki kuñu da, ti na nakani ini da nava na ni'in ta'u aña da kivi na nchaa tuku Jito'yo Jesú.

<sup>6</sup> Koto kondo'o vixi ini ra naa ra ja iyo va'a kuachi sa'a chaa un. Xi tu jini ra iin jnu'un ja ka'an sia'an: "¿Vasu t'ilí ni levadura ko keni'no ni tu'u chii yujña iya nu?" kachi. <sup>7</sup> Nusa ti tukaa kua'a ra jnu'un ja kenda tuku inga jniñu ndeva'a nanu ka sa'a ra niku. Chi nu na kua'a ini ra kunchuku ra sia'an, ti kuikun jna'an jniñu kue'e un jiiñ ra naa ra, chi kuu nanu levadura ja keni'no ni tu'u chii yujña. Xnaa ini taka jniñu kue'e un na kuxio ki'in, ti kunchuku yiñu'un naa ra nava na kuu ra nanu stila ja tu yi'i levadura, nanu iin staa va'a ja kaji yo taka viko pascua. Ka kuu ra nanu stila va'a un, chi ja ni ka kandixia ndaa ra Cristo. Ja yukan, koto siin ga ra jiiñ jniñu ndeva'a un. Chi jandaa ndixia ja ni ji'i Cristo Jesú ja ni soko ya maa ya ja'a yo, nava tukaa ga siin yo jiiñ taka jniñu kue'e un. Ni ji'i ya nanu lelu ja ka soko yivi Israel taka viko pascua. <sup>8</sup> Nusa ti na koo siñ ini yo ja nuku'un ini yo nava ni ji'i Cristo ja'a yo, ti tukaa kondo'o ini yo taka jniñu nava ni sa'a yo na changa ga kandixia yo Cristo, chi undi nuu ni ka jika yo jiiñ jniñu yo ja kuu nanu ja yi'i levadura. Ko vijná ka kuu yo nanu stila ja tu yi'i levadura. Ja yukan na kundio ini yo ja siuku ndaa yo jiiñ jnu'un Cristo Jesú.

<sup>9</sup> Nuu inga tutu ja ni chaa ri nuu ra naa ra, ni kachi ri ja tu kejna'an ra jiiñ yivi ka yisikinchaa jna'an sia'an. <sup>10</sup> Ko ansu jiiñ yukan ka'an ri ja na kuxio ra iin jnu ni jiiñ yivi un naa i, ja sia'an ka sa'a i ja ka kuu i yivi siñ imí, ni jiiñ jna'an i ja ka ndo'o kue'e ini i siki iin ndajniñu, ni jiiñ ja ka sakui'na i, ti ni jiiñ yivi siin ka nchañu'un sava'ni ga santu, ja tu kuu maa Yandios ja kancha andivi. Sia'an ka'an ri, ko ansu ja koto ma kejna'an ga ra jiiñ yivi un ja chajiyo ra iin jnu ni, chi nu sia'an ti va'a ga na kuxio ra nuu ñuyivi ja'a. <sup>11</sup> Ko nu iyo yivi ja ka'an ja kandixia i Cristo, chi nu kanda i nanu yivi ndeva'a un, ti tukaa kivi nduu kuiti ra jiiñ i naa i. Ti nu kuu i yivi siñ ini ja jika jiiñ ña'an, xi yivi ndo'o kue'e ini siki sava'ni ga ndajniñu ja kuni kuñava'a i, xi yivi nchañu'un santu, xi yivi nduku ña'an ja skuiti ini nuu yivi, xi yivi ji'i ndixi, xi yivi kui'na i, ti yivi kanda sia'an, koto kivi nduu ga ra jiiñ i, ni tukaa kaji ra staa jiiñ yivi un.

<sup>12-13</sup> Ko ansu jniñu ru'u kuu ja sa'a ndaa ri siki yivi ja tu yi'i jiiñ yo nuu ichi Yandios, chi maa Yandios kuu ya kin sa'a ndaa siki yivi un. Ko yivi yi'i jiiñ ra naa ra ja ka kandixia jnu'un Cristo Jesú, kanuu najista ra i ja na sa'a ndaa ra jniñu sa'a i. Ti chaa sa'a sia'an jiiñ nana uu da un, ru'u Pablo, ta'u ri jniñu ja nu ni ka ndututu ra, ti keni'in chaa un na ki'in da.

## Xndaku Pablo ja tu kankuachi siki jna'an i undi nuu sticia

### 6

<sup>1</sup> Nu iiñ ra kuni kankuachi siki iiñ ñanijna'an ra, ¿Ndoo tu ka ndututu ra naa ra ti sa'a ndaa ra kuachi da nuu taka ñani jna'an yo ja ka kandixia i Jesú ansu ja kankuachi ra undi ve'e sticia nau kuachi iyo jiin ra naa ra? <sup>2</sup> ¿Va nu tu ka jini ra naa ra ja yivi ka kandixia Jesú, ti iiñ kivi na sa'a ndaa i jniñu ka sa'a yivi ñuyivi ja'a nu? Ti nu ro'o naa ra na sa'a ndaa jniñu yivi ñuyivi, ¿ndo tu ka xndichi ra kuachi lulu ja ka sa'a nuu jna'an ra ja na ndundaa nu? <sup>3</sup> ¿Xi tu ka jini ra ja jaa iiñ kivi ti kin sandao yu undi jniñu taka ángel andivi? Ti nu sia'an iyo ja kuu jiin ángel, nusa ti na sa'a ndaa yo iiñ kuachi lulu ja jna'an yo nuu ñuyivi ja'a. <sup>4</sup> Nusa ti nu tu kanchuku mani ra ja siki iiñ kuachi lulu ja tu iyo ja'a ni tu iyo xini, ti nu tu kuu sa'a ndaa maa ra naa ra, nusa ti nduku iiñ chaa ja tu ndiso ni iiñ jniñu ja kuu nuu ra naa ra, ti maa da na xndichi kuachi un, nu tu kuu sa'a ndaa maa ra naa ra. <sup>5</sup> Sia'an na kachi ri nu tu kukanuu ra naa ra. ¿Va nu tu iyo chaa tu'va jiin ra naa ra ja na sandaa da siki kuachi ñanijna'an da nu? <sup>6</sup> Tu iyo va'a kuiti ja sia'an ka sa'a ra, chi ka kuu ra yivi ka kandixia, ti ka kankuachi siki jna'an ra vasu undi ve'e sticia, ja chaa un tu ka kandixia da jnu'un kandixia yo.

<sup>7</sup> Ti kuachi kuu ndixia un ja nuu nuu ka kanaa ra. Va'a ga na saka'nun ini nuu jna'an ra ti na kukuee ni ansu ja ka ja'an ra undi ve'e sticia, chi iiñ nuu kanda ra. <sup>8</sup> Tu ka jani ini ra nasa kunchuku ra ti sa su've ka skexiko jna'an ra, ti takra kanda sia'an.

<sup>9</sup> ¿Xi tu ka jini ra ja yivi kancha ndeva'a, tu ni'in ta'u i ja na jaa i ñuu nuu ta'u Yandios jniñu? Ja tu kujnuni ini ra ja nuu ta'u Yandios jniñu, tu kivikoyo yivi jika jiin jnu'un siii ini ja ndajnu'un da jiin ñasi'i, xi ña'an ndajnu'un jiin chaa, ni yivi ka kandixia xaan sava'ni ga santu, ni yivi yisikinchaa jna'an ja yisikinchaa da ñasi'i da, xi ña'an yisikinchaa yiñ ña, ni chaa ja kixi jiin inga chaa, <sup>10</sup> ni yivi kui'na, ni yivi kuasun ini, ja ndio ini kenchaa i ndajniñu jna'an i, ni yivi ji'i ndixi, ni yivi ka'an ndeva'a siki jna'an, ni yivi sakui'na sava'ni ga ndajniñu. Ti taka yivi kanda sia'an, tu nita'u i ja kivi i ñuu nuu ta'u Yandios jniñu. <sup>11</sup> Ti sia'an ni ka jika sava ra naa ra niku, ko vijnal tukaa ga. Chi ja ni sa'a ndoo ya ro'o jiin kuachi ra. Chi yivi ndeva'a xaan ni ka kuu ra, ko vijnal tukaa ga, chi ja ni kenchaa ya kuachi un siki ra, nava vijnal ti kunukuachi ra nuu ya, vasu undi nuu ja ni ka jna'nun ndatu ra jiin kuachi ra niku. Ko vijnal tukaa ga, chi ni kachi Yandios ja tukaa jna'nun ndatu ra siki kuachi ra. Chi sia'an ni sa'a Yandios ja jiin jniñu ni sa'a Jito'yo Cristo Jesú, jiin jniñu ña'nun maa Espíritu Santo ni keta'u ra nuu ya.

#### Iyo ndoo iiyiki kuñu yivi kandixia

<sup>12</sup> Iyo yivi ja ka'an: "Taka ni jniñu iyo va'a ja sa'a yo nu kuni yo", kachi. Ti jandaa kuiti kuu jnu'un un, vasu ansu tendi'i iyo va'a, chi kuu sa'a yo taka ni nuu jniñu ja kuni yo, ko ansu tendi'i un kanuu ja sa'a yo. Taka ni iyo va'a, ti suni taka ni kue'e nu tu kani va'a ini yo. <sup>13</sup> Iyo inga jnu'un ja ka'an yivi: ¿Ndoo ñava'a yo ndeyu nu tu kaji yo ti ndoo ñava'a yo chii nu tu chu'un yo ini? Ti jandaa kuu un, ko jaa iiñ kivi ti nasama ndi'i Yandios ndinduu jniñu ja'a. Ni tu kuañu ni'no yo yiki kuñu yo ja kusikinchaa jna'an yo, chi ansu ni ja'a Yandios yiki kuñu yo ja kusikinchaa yo. Su'va ni ja'a ya yiki kuñu yo ja na kunukuachi yo nuu maa Jito'yo. Chi maa ya kuu ja ndito yiki kuñu yo. <sup>14</sup> Jaa iiñ kivi ti naxndoto Yandios yo'o jiin jniñu ña'nun ya sia'an nanu ni naxndoto ya Jito'yo. <sup>15</sup> ¿Xi tu ka jini ra ja taka yo naa yo kuu nanu yiki kuñu Cristo Jesú nu? ¿Xi kuu kenchaa yo yiki kuñu Cristo Jesú ti skejna'an yo jiin yiki kuñu iiñ

ñā'an sii xaan ini nu? ijandaa kuiti ja tu kuu sia'an! <sup>16</sup> ¿Xi tu ka jini ra ja nu iin chaa na kejna'an da jiin iin ñā'an sii xaan ini ti iin ni ga ni kuu yiki kuñu da jiin ñā'an un nu? Chi jini ra ja kachi nuu tutu ii Yandios: "Ndinduu da ni kuu iin ni ga yiki kuñu", kachi. <sup>17</sup> Ti suni sia'an nu iin yivi na kejna'an jiin maa Jito'yo, ti iin ni ga ni nduu i jiin ya, chi ni kandixia ndaa i.

<sup>18</sup> Nusa ti xndoo jnu'un yisikinchaa jna'an un, chi sava'ni ga kuachi lulu na sa'a iin yivi, tu yi'i un jiin yiki kuñu i, ko yivi yisikinchaa jna'an, jañu ni'no i maa yiki kuñu i ja sa'a i sia'an, ti jiin yukan nchaa kuachi ga i. <sup>19</sup> ¿Xi tu jini ra naa ra ja yiki kuñu ra kuu iin ve'e ii nuu kancha maa Espiritu Santo ja ni ja'a Yandios? Ja yukan kuu ja ansu maa ra xiin yiki kuñu ra, <sup>20</sup> chi ya'u xaan ni ja'a Yandios ro'o naa ra. Ja yukan na kava yiñu'un ra ja chiñu'un ra ya ja sa'a ra mani jniñu va'a undi jiin yiki kuñu ra, jiin ni ini ni aña ra, chi ja kuu maa ya kuu.

### *Jnu'un xndaku Pablo nuu yivi ka nanda'a*

## 7

<sup>1</sup> Vijnna ti ru'u Pablo na kachi ri ja siki taka jnu'un ni ka jikajnu'un ra ru'u nuu iin tutu ja ni ka taji ra nuu ri. Ti jandaa ndixia kuu ja kendo va'a iin chaa nu tu koo ñasi'i da. <sup>2</sup> Ko siki jniñu yisikinchaa jna'an un, ti va'a ga ja iin chaa un na koo iin ni ñasi'i da, ti suni iin ñasi'i na koo iin ni yii ña. <sup>3</sup> Ti yii ña un na kua'a da maa da nuu ñasi'i da ja kuu da yii ña. Suni ñasi'i un, na kua'a va'a ña maa ña nuu yii ña ja kuu ña ñasi'i da. <sup>4</sup> Chi ñasi'i un tu kuu sa'a ña ja kuni ña jiin yiki kuñu ña, chi yii ña xiin yiki kuñu ña. Ti suni chaa yii un tu kuu sa'a da ja kuni da jiin yiki kuñu da, chi ñasi'i da kuu ña'an xiin. <sup>5</sup> Ja yukan kuu ja ni chaa ni ñasi'i tu kuu sasiin i maa i nuu ñanijna'an i. Ko nu iyo iin jniñu kanuu ja kin kakanta'u i nuu Yandios ja kuu ti'lí ni kivi, ti kuu ndajnu'un mani da ja tu kunchuchu nduu da, ti yachi na ndeokuñi da ja na najna'an da naa da, nava tu ska'an ja'u'u un ro'o naa ra, ti kivi nduu ra naa ra jiin inga chaa xi jiin inga ñasi'i, ti tivi nuu jniñu kuu. <sup>6</sup> Taka jnu'un un ka'an ri nanu iin jun'un xndaku ri, chi ansu ta'u ri jniñu ja sia'an na koo. Yivi kundee kuncha maa sia'an ni, ti sia'an na kuncha i, ko yivi tu kuni kuncha maa iin, va'a ga na nanda'a i. <sup>7</sup> Chi ndo'o ini ri ja iyo va'a ja taka chaa na kunchuku maa iin da nanu ru'u, ko siki ja siin siin ta'u ni ja'a Yandios nuu iin iin yo, ti siukan na koo, chi sava yo ni ni'in iin nuu ta'u, ti uu ga yo nuu inga ta'u.

<sup>8</sup> Ko ja kuu chaa kancha maa iin xi ña'an kancha maa iin jiin taka ña'an ni kendo maa iin, na kachi ri ja iyo va'a nu tu nanda'a yivi un nanu ru'u. <sup>9</sup> Ko nu tu iyo ta'u i ja kuncha maa iin i, ti va'a ga na nanda'a, chi va'a ja na nanda'a i, ti ansu kondo'o kue'e ini i siki ichi nuu sii ini.

<sup>10</sup> Ko yivi ni ka nanda'a, na ta'u ri jniñu, ko ansu ja ndo'o ini maa ri, chi ja ni kachi maa Jito'yo kuu ja iin ñasi'i tu kuu xndoo ña yii ña. <sup>11</sup> Ko nu nau ñaa na xndoo yii, ti na kuncha ña sia'an ni, xi na ndeokuñi ña jiin yii ña, ko tu kuu ja nanda'a ña jiin inga. Suni sia'an kuu jiin chaa, chi tu kuu ja xndoo da ñasi'i da, ti kusiin da ki'in da.

<sup>12</sup> Ti ja kuu taka ga yivi na kachi ri iin jnu'un ja tu ni ka'an maa Jito'yo, ja nu ñasi'i iin ñanijna'an yo tu kuu ña ñaa kandixia, ko nu kuu ini ña ja kuncha ña jiin da, ti maa da tu kuu xndoo da ña. <sup>13</sup> Suni sia'an nu iin ña'an ni nanda'a jiin iin chaa tu kandixia, ko nu kuu ini da ja kuncha da jiin ña, ti tu kuu xndoo ña da. <sup>14</sup> Chi iin chaa ja tu kandixia yi'i da suni nda'a maa Yandios siki ja ni najna'an da jiin iin ña'an kandixia. Xi iin ña'an tu kandixia suni yi'i ña nda'a maa Yandios siki ja ni najna'an ña jiin iin chaa kandixia. Chi nu ansu siukan sa'a ya, ti se'e chaa un naa da, tu kuanta'u ya i nanu ja ka kuu i se'e yivi tu

kandixia. Ko ansu sia'an kuu, chi su'va nakinse'e Yandios suchi kuachi un se'e yivi ka kandixia.

<sup>15</sup> Ko vijna ti nu yii iin ñasi'i kandixia xi ñasi'i iin chaa kandixia tu kuni kandixia, ti kuni xndoo jna'an i ti va'a ga na kusiin, nava na kendo nuña yivi kandixia un, ti na kukuee kuncha i, chi Yandios tu kuni ya ja siin kanaa i nu tu kuu kunchuku mani i. <sup>16</sup> Chi ro'o ja kuu ra ñasi'i, tu jini ra ja sanaa ti kandixia yii ra sa'a ra ti na nita'u da. ¿Ti sa ni tu ro'o ja kuu ra yii tu jini ra ja sanaa ti kandixia ñasi'i ra sa'a ra ti na nita'u ña nu? <sup>17</sup> Ti vasu tu kejna'an kunchuku ra, ko na ndajnu'un mani ra jiin yii ra xi jiin ñasi'i ra ja tu kandixia, sia'an nava kuni maa Yandios. Ti sia'an na koo nava ni kuncha ra undi nuu na ti kandixia ga ra. Suni sia'an na koo vijna, ja ja ni kandixia ra nava kuni maa Yandios ja ni ja'a ya nuu ra. Ti jnu'un yukan xndaku ni'in ri nuu taka yivi ka kandixia.

<sup>18</sup> Nu ni kana ya iin chaa ja iyo iin seña nuu yiki kuñu da, ti sia'an na koo da. Ti nu ni kana ya iin chaa ja tu yi'i seña yiki kuñu da, ti suni siukan na koo da. <sup>19</sup> Ti tundo sa'a nu iyo seña yiki kuñu yo xi tu, ko kanuu xaan ga ja na siuku ndaa yo taka jniñu ta'u Yandios. <sup>20</sup> Ti iin iin ra na kusii ini ja kendo ra nasa ni kana Yandios ro'o ja ni kandixia ra. <sup>21</sup> Nu muzu ja ni jaan yivi kuu ra na ni nakana ya ro'o, ti koto xndi'i ra ini ra, chi nu kuu keta'u ra, ti iyo va'a ja siukan na sa'a ra. <sup>22</sup> Chi chaa ja kuu muzu ja ni jaan iin yivi, ti ni nakana Jito'yo da ja na kandixia da, ti ja ni keta'u da nuu kuachi da un, chi ni kendo nuña da ja kunukuachi da nuu maa Jito'yo. Suni chaa ni iyo nuña da ja sajniñu da ja kuu maa da, na ni nakana Yandios ja na kandixia da, ni iyo nuña da, da ko vijna ni nduu da muzu ja kunukuachi da nuu Cristo Jesùs. <sup>23</sup> Chi ya'u xaan kuu ja ni nakuan Yandios taka ro'o naa ra siki ja ni ndo'o ni nene Cristo Jesùs. Ja yukan ko nu sajniñu ra nuu jniñu ndeva'a ja sa'a yivi ñuyivi ja'a, ti tu va'a. <sup>24</sup> Ja yukan ñani naa ra, na kachi ri ja taka iin iin ra, siin jiin jniñu nava ni nakana Yandios ro'o, chi maa Yandios ni ja'a jniñu un nuu ra.

<sup>25</sup> Ti vijna na kachi ri iin jnu'un siki ña'an kuachi, iin jnu'un ja tu ni xndaku maa Jito'yo, vanuxia ni kunda'u ini Jito'yo nuu ri ja ka'an ri jnu'un ja'a. Ja yukan ni jiña ya injinjuni ri ja na nakani ndaa kuiti ri jnu'un ja'a. <sup>26</sup> Ja ni ini ri ja taka yivi, va'a na kendo i kunchuku i sia'an ni, ja tu nanda'a i siki ja iyo xaan nundo'o vijna. <sup>27</sup> Ko nu iyo ñasi'i ra, ti koto xndoo ra ña. Ti nu tu iyo ñasi'i ra, ti koto nduku ra ña. <sup>28</sup> Ko ja kuu ro'o chaa kuachi, nu ka kuni nanda'a ra, ti ansu kuachi kuu un. Suni sia'an ña'an kuachi, nu na nanda'a ra, suni ansu kuachi kuu un. Ko na kachi ri ja yivi ka nanda'a, kua'a ga nundo'o vaji nuu i ja koo ndo'o koo nene i nuu ñuyivi ja'a. Ti ja tu kuni ri ja kondo'o ra naa ra, yukan kuu ja ka'an ri.

<sup>29</sup> Ñani naa ra, na kachi ri siki ja kuiti kivi chaku yo ja kunukuachi yo nuu ya. Yukan kuu ja chaa ka iyo ñasi'i, na kukutu ga ini da siki jniñu maa Yandios ansu kukutu ini da ja kuu ñasi'i da. <sup>30</sup> Yivi kukui'ya ini, koto kendo i jiin jnu'un kui'ya ini un. Ti yivi kusii xaan ini, koto kusii ini i sia'an ni jiin jnu'un un. Ti yivi ja jaan ndajniñu, koto kuñukuu xaan ini i ndajniñu un, na sa'a i ja tundo ñava'a i. <sup>31</sup> Ti yivi jitu ndi'i ini ja ni'in yi taka ja iyo nuu ñuyivi ja'a, ti va'a ga koto kundio ini i un, chi ñuyivi ja'a, ja yajni naa jiin taka ja iyo.

<sup>32</sup> Ti ru'u Pablo, na kachi ri ja koto kundio xaan ini ra siki taka ndajniñu iyo nuu ñuyivi ja'a, chi chaa kancha maa iin, ndo'o ini da niní jniñu maa Jito'yo, ja na kusii ini ya jiin da. <sup>33</sup> Ti chaa ja iyo ñasi'i, ti jitu ndi'i ini da jiin sava'ni ga jniñu ja iyo nuu ñuyivi ja'a ja na kusii ini ñasi'i da jiin da. <sup>34</sup> Suni sia'an siin siin jani ini ña'an iyo yii jiin ña'an kancha maa iin, chi ña'an maa iin un jitu

ndi'i ini ña jiin jniñu maa Jito'yo, chi ndiyo ini ña ja kondoo ii añu ña jiin yiki kuñu ña ja kuu nuu maa Jito'yo. Ko ña'an iyo yi, chi ndi'i xaan ini ña ja siuku ña taka jniñu iyo nuu ñuyivi ja na kusii ini yi ña jiin ña. <sup>35</sup> Sia'an ka'an ri ko ja na kukuee kunchuku ra, chi ansu jasi ri ja nanda'a ra naa ra. Chi su'va ka'an ri ja na kukutu ini ra, ti nini na kaka yiñu'un ra ja kuu nuu ichi Yandios.

<sup>36</sup> Ti nu iin chaa iyo se'e si'i da, ti ja kuanya'a kuiya i, ti nu jani ini da ja va'a ga ja na nanda'a i, ti na sa'a da nava ndo'o ini da. Na kua'a da se'e si'i da ja nanda'a i, ti na koo yi i, chi ansu kuachi kuu un. <sup>37</sup> Ko nu iin chaa ni ndo'o ndaa ini da ja kuncha se'e si'i da sia'an ni, ja tu kua'a da i nanda'a i vasu ka nduku yiñi maa i, nusa ti na kuncha maa i sia'an ni nava kuni maa da, chi va'a ndo'o ini da ja sia'an. <sup>38</sup> Nusa ti chaa xnanda'a se'e si'i, va'a sa'a da. Ti chaa tu xnanda'a se'e si'i, va'a ga sa'a da ja sia'an.

<sup>39</sup> Ti ña'an ja iyo yi, yinda'a yi ña maa ña ja kuu ni kuiyi chaku da. Ko nu ni ji'l yi ña, yukan ti ni kendo nuñu ña ja nanda'a tuku ña jiin inga chaa ja kuu ini ña, ko nini jiin iin chaa kandixia nuu maa Jito'yo. <sup>40</sup> Ko jani ini ri ja ndatu ga koo ña nu na kuncha maa ña sia'an ni. Ti sia'an ka'an ri, chi jani ini ri ja suni jiin maa Espíritu Yandios kuu ja xndaku ri jnu'un ja'a nuu ra naa ra.

### Siki kuñu ja ka soko nuu santu

## 8

<sup>1</sup> Ti vijnna na kachi tuku ri inga jnu'un siki kuñu ja ka soko yiñi nuu santu i. Jandaa ndixia ja taka yo ka jini va'a, ti chaku va'a ini yo nasa kuu siki jnu'un un. Ti taka jnu'un ja chaku va'a ini yo un, sa'a ndixia ja na nduvixi ini yo ja ndo'o ini yo ja kanuu ga. Ko ansu sia'an kuu, chi su'va nu iyo jnu'un nda'u ini yo nuu ñani jna'an yo ja kandixia, ti nu sia'an sa'a yo, ti ja'a yo nundee ini nuu jna'an yo. <sup>2</sup> Ko nu nau yiñi ja jani vixi ini ja jini va'a i siki jnu'un un, ti changa ga chaku va'a ini i nava iyo. <sup>3</sup> Ko nu nau yiñi na kuu ga ini nuu Yandios ja kanuu xaan ga yukan, ti yiñi un kuu ja janta'u maa ya, chi kunda'u ini ya nuu i.

<sup>4</sup> Nusa na kachi ri iin jnu'un siki ja ka soko yiñi nuu santu i. Ti jandaa ndixia ja taka santu iyo nuu ñuyivi, tundo kuu kuiti un, chi tu nau inga yaa iyo, chi maa iin ni Yandios ja kancha andivi. <sup>5</sup> Ti vasu iyo yiñi ka jani ini ja iyo tijni Yandios nuu andivi jiin ñuyivi, ti sia'an ka ka'an ndixia yiñi ja iyo tijni Yandios nuu i jiin kua'a jito'o i. <sup>6</sup> Ko ja kuu nuu maa yo, chi maa iin ni Yaa iyo ja kuu Tata yo Yandios. Ti maa ya ni sa'a taka ja iyo ñuyivi jiin andivi, ti suni maa ya ni sa'a taka yo'o naa yo. Ti suni maa iin ni Jito'yo iyo, ya kuu Cristo Jesú. Ti maa ya xiin yo'o naa yo undi jiin taka ja iyo nuu andivi jiin ñuyivi.

<sup>7</sup> Ko siki kuñu ja ni soko nuu santu un, chi ansu tendi'i yiñi chaku va'a ini jnu'un xndaku ri siki ja ni ka nchañu'un i santu un na changa ga kandixia i. Ti vijnna ja ka kandixia i nu na kaji yi kuñu un, ti kukue'e xaan ini i kaji i kuñu un, chi jini i ja kuñu ni soko nuu santu un kuu. Ti vanuxia changa ga kujnuni va'a ini i jiin jnu'un Yandios, ti ka ndo'o ini i ja ni sa'a i iin jniñu kue'e ja ni yají i kuñu ni soko un. <sup>8</sup> Ko na kachi ri ja siki sava'ni ga ndeyu kaji yo, ti jiin un janta'u Yandios yo'o, ansu ja kaji yo sava'ni ga ndeyu un ti kendo va'a yo. Xi ja tu kaji yo ndeyu un, ti yukan kendo kui'ya yo nuu ya.

<sup>9</sup> Ti vasu tundo iyo ja kasí ja kaji ra kuñu ni soko un, ko koto ra ñanijna'an ra, ja changa ga chaku va'a ini da jnu'un Yandios. Chi nu na kuni da ja yají ra kuñu un, ti suni kaji da, vasu ndo'o ini da ja kuachi kuu. <sup>10</sup> Ko va'a ga ja tu kaji kuiti ra kuñu un, chi sandau kuni iin ñani jna'an ra ja changa ga kutu'va va'a da jiin jnu'un Yandios, ja yají ra ndeyu ni soko un ini iin ve'e nuu kanchuku santu un, vanuxia jini va'a ra ansu kuachi kuu yukan. Ko nu siukan na sa'a ra, ti kuni ñani ra ja tu ja'i chaku va'a ini da jiin jnu'un Yandios, ti suni kaji da

kuñu un, vasu ndo'o ini da ja kuachi kuu. <sup>11</sup> Chi vanu ja tu'va ga ra jiin jnu'un ya ti sa'a ra sia'an, ko su'va jiña ra ichi ja kuu ñani ra ja kondo'o xaan ini da ja kuachi ndixia kuu ja ni yaji da kuñu ni soko un, vasu so stuji ra añañ ñani ra ja changa ga kuixia ini da jiin jnu'un ya. Ko tu va'a ja xnaa ra ñani ra, chi suni ja kuu maa da ni ji'i Cristo Jesú. <sup>12</sup> Ti nu sia'an sa'a ra taka jniñu un ja tu iyo va'a, ti so stuji ra añañ ñani ra ja sa'a ra sia'an, chi kukui'ya ini da vanuxia changa ga kuixia injnuni da jiin jnu'un Yandios. Ti ja sa'a ra kuachi un nuu ñanijna'an ra, iin ni kuu ja nuu maa Cristo Jesú ni sa'a ra kuachi un, chi suni kandixia ñani ra nuu Cristo. <sup>13</sup> Ja yukan ti na koto va'a yo naa ichi ki'in yo. Chi nu siki ndeyu un ndo'o ini ñani yo ja kuachi ndixia kuu, nusa ti va'a ga ja tu kaji kuiti yo ndeyu un, nava tu xnaa yo ñani yo ja kivi da nuu ichi kue'e, ti xnaa da maa da.

### *Jniñu xiin iin apóstol*

## 9

<sup>1</sup> Ti ru'u Pablo jikajnu'un ri, ¿iyo va'a ja kaji ri kuñu un xi tuu nu? ¿Ti ansu iyo ichi ri siki taka jnu'un un nu? Ko na kachi ri ja tu iyo ni iin ley ja chayika ru'u ja siuku ri jnu'un ichi un nu tu kuni ri. Ko vasu iyo, ko maa ri kuu apóstol nuu ya, chaa ni taji ya jiin jniñu ña'nú ja'a. Ti maa ri ni jini ndixia ri nuu maa Jito'yo Jesú. Ti siki ja ni ka kandixia ra Jesú jiin jnu'un ni ka'an ri, yukan maa ra na kua'a jandaa kuiti ja ndiso jniñu ri nuu Jito'yo. <sup>2</sup> Ti vasu sava yivi tu ka janta'u i ja maa ri kuu apóstol, ko ja kuu maa ra naa ra, chi apóstol kuu ndixia ri nuu ra naa ra siki ja ni skandixia ri ro'o ja ni ka xna'an ra maa Jito'yo. Ti jiin yukan kundaa ndixia ja maa ri kuu apóstol nuu Jito'yo.

<sup>3</sup> Sia'an na ndeokani ri jnu'un ja'a nuu tako yivi ka ka'an siki ri. <sup>4</sup> Ko xnakan na kachi ri ja iyo ichi ri ja kaji ko'o ri taka ja na kua'a yivi nuu ri. <sup>5</sup> Ko suni iyo ichi ri ja nanda'a ri jiin iin ña'an kandixia ja kuu ña ñasi'i ri nu kuni ri, ja na kunduu ña jiin ri nuu ichi jikonuu ri, nanu ka iyo ñasi'i taka ga apóstol, suni Pedro jiin chaa ka kuu ñani maa Jito'yo. <sup>6</sup> Uu ga apóstol ka ki'in xu'un ja ka chindee yivi ka kandixia ja na kuchaku da. Nusa ti ru'u jiin Bernabé, suni iyo ichi ri ja ki'in ri xu'un nuu i ja na kuchaku ri. ¿Xi ka jani ini ra ja nini maa ri naa ri kuu ja na sa'a inga jniñu ja na ni'in ri ja kuchaku ri nu?

<sup>7</sup> Ti jikajnu'un ri, ¿xi iyo soldado ja chaku da jiin xu'un ve'e maa da nu? ¿Xi iyo chaa ja jitü tika'ya ti tu yaji da nde'e tika'ya un nu? ¿Xi nau chaa ñava'a kua'a xndiki, ti tu ko'o da lechu ti nu? Ti suni ru'u Pablo, ¿Iyo ichi ri ja kuchaku ri nuu jniñu sa'a ri ja ka'an ri jnu'un Yandios, xi tuu nu? <sup>8</sup> Ko nu kuu sia'an ti koto kani ini ra naa ra ja taka jnu'un ka'an ri ja'a kuu mani jnu'un ja ka ka'an yivi ñuyivi ja'a. Chi undi maa ley ja ni ja'a ya nuu Moisés ka'an sia'an. <sup>9</sup> Chi kachi nuu tutu ley ni ja'a Yandios: "Tu chu'un ra ñunu yu'u xndiki ra nu sa'a ti jniñu", kachi. Ti ni kachi ndaa ya, chi ansu nini siki maa xndiki un kuu ja ni ka'an ya sia'an. <sup>10</sup> Chi suni ja kuu yo'o naa yo ni ka'an ya, chi ni ja'a ya ley yukan ja kuu maa yo. Chi chaa chi'i tata nuu ñu'un jiin chaa jaxin triu, ñukuu ini da ja na ni'in da jniñu ni sa'a da un kivi ndututu. <sup>11</sup> Ti suni sia'an ru'u, nanu chaa ni saka triu un kuu ja ni ka'an ri jnu'un nuu ra, taka ja iyo nuu Yandios jiin Espíritu ya. Ti nu sia'an kuu jniñu ni sa'a ri, va tu kua'a kuu ja nandi'i ri ja kuchaku ri, nu na chindee ra naa ra ru'u. <sup>12</sup> Chi nu sava ga chaa ka xndaku nuu ra, iyo ichi da ja ni'in da ya'u da nuu ra naa ra. Nusa ti vi'i ga iyo ichi tu ru'u ja kakan ri ya'u ri nusa. Ko ru'u tu ni jikan ri ja cha'u ra ru'u, chi ni tava ini ri ja kuchaku ri ja jiñu maa ri, nava tu jakuiñi ri jiin jniñu ja ka'an ri jnu'un Yandios siki Cristo Jesú. <sup>13</sup> Ti siukan kuu ko ka jini va'a ra ja taka sutu nación Israel ja junukuachi ini veñu'un ka'nu un,

chaku da jiin ndeyu ja ka soko yivi ini veñu'un un. Ti suni sunu junukuachi undi nuu altar yukan, chaku da jiin kuñu kuiti ja ka soko yivi naa i. <sup>14</sup> Ti suni siukan ni ta'u Jito'yo, jniñu ja chaa ka ka'an jnu'un Yandios nuu yivi ja na sa nanita'u i, iyo ja na ni'in da ja kuchaku da nuu maa jniñu un.

<sup>15</sup> Ko ru'u Pablo, tu jikan kuiti ri ya'u ri nuu ra naa ra, ni ansu ja na cha'u ra ru'u kuu ja chaa ri tutu ja'a. Chi nu sia'an na kuu, ti va'a ga ja na kuñu ri, ti ansu ja kinya'u ri nuu ra naa ra. Chi nu tuu, ti tu kusii ini ri ja ka'an ri jnu'un Yandios nuu yivi. <sup>16</sup> Ti tu nduvixi ri jiin jniñu ja ka'an ri jnu'un Yandios siki Cristo, chi ja ni nakaji ya ru'u ja sa'a ri jniñu un. Ti kanuu jniñu un ja na siuku ri, chi na nda'u maa ri nu tu ka'an ri jnu'un ya. <sup>17</sup> Ja yukan kuu ja nu na ka'an ri jnu'un ya ja kusii ini maa ri, ti kuu ni'in ri ya'u ri. Ko nu chayika ri maa ri ja ka'an ri jnu'un ya, ti jiin yukan jandaa ja maa Yandios ni tatu jniñu ja'a nuu ri. <sup>18</sup> Ti ja ka'an ri jnu'un Yandios ja siki Cristo Jesùs nuu yivi naa i jiin ni ini ni aña ri, ti yukan ni kuu ya'u ri ja ni'in ri, ti vasu iyo ichi ri ja kinya'u ri nuu jniñu sa'a ri, siki ja kuu ri chaa ka'an jnu'un Yandios.

<sup>19</sup> Chi iyo nuña nuu ri, ti tu iyo ni iin yivi kuñu'nu ja ta'u jniñu nuu ri nasa kunukuachi ri. Ko nanu muzu ja sajñiñu tatu, sia'an kuu ri nuu yivi naa i ja ka'an ri jnu'un ja na nuña iin ichi va'a nuu kua'a xaan i na kandixia Cristo Jesùs. <sup>20</sup> Ti nu kancha ri jiin jna'an ri, yivi fiñu Israel ja ka chiñu'un i ley ni ja'a Moisés, nduu ri iin ni ga jiin da ja ka jandatu ri ley un, vasu tu yi'i ri jiin ley un. Ti sia'an sa'a ri nava na kusii ini da jiin ri. Ti vii vii xndaku ri nuu da naa da. Yukan ti ii ni ja ka kandixia da jnu'un Cristo Jesùs. <sup>21</sup> Ti suni sia'an sa'a ri nuu kancha ri jiin yivi tako ga nación ja tu ka siuku i nuu ley ni ja'a Moisés, ti iin nuu kejna'an ri jiin yivi un ja tu siuku ri nuu ley Moisés, vasu tu xndoo ri ley maa Yandios, ja siuku ri ley ni ja'a Cristo Jesùs. Ti siukan ka kusii ini i jiin ri, ti ii ni ka kandixia i jnu'un Jesùs.

<sup>22</sup> Ko nu kancha ri jiin ñani yo ja changa ga kujnuni va'a ini i jiin jnu'un ya, ti ja tu kasí ri inijnuni i, ti vii vii xndaku ri nuu i nava na nuña inijnuni i. Sia'an sa'a ri jiin tako yivi un. Yukan ti tijni i ka kandixia jnu'un Cristo Jesùs ti ka ndivi i ichi Yandios. <sup>23</sup> Ti sia'an xndaku konu'un ri jnu'un Yandios nuu sava'ní ga yivi ja na nuña inijnuni i nasa keta'u i nuu ichi Yandios, nava suni maa ri na nita'u ri nuu ya.

<sup>24</sup> Sa'a yo nava iin chaa jinu ja ka jinu da naa da. Ti vasu tendi'i da ka jinu xaan, ko iin ni da kuu ja kundee ti ni'in da iin ta'u. Ti nanu ni kundee chaa ni jinu xaan ga un, suni sia'an na kukutu ini ra nuu ichi Yandios undi najaa kivi ja kua'a ya ta'u ra. <sup>25</sup> Ti taka chaa ka yisiki, konu'un xaan satu'va da maa da ja jitu ndi'i ini da nasa kundee da ja ni'in da ta'u, iin corona ita vii xaan, ja yukan tu kuñii ja kuu tijni kivi. Ko ja kuu maa yo, nu na siuku ndaa yo jiin jnu'un ya, yukan na ti kuñukuu ini yo ja kua'a ya iin ta'u nuu yo ja tu naa kuiti. <sup>26</sup> Ti ru'u, ja junukuachi ri nuu Yandios, sa'a ri jniñu un nanu sa'a chaa jinu xaan da ansu ja ka'ncha ini ri nanu ka sa'a chaa tu ka kanda kunu. Chi ni ini ni aña ri sa'a ri jniñu un ansu nanu sa'a iin chaa ñaa ja kani iyu da nda'a da nuu tachi. <sup>27</sup> Chi su'va chayika ri yi'ki kuñu ri ja kuandatu ri jiin jniñu ri vasu koo ndo'o koo nene ri, nava tu kendo kui'ya ri nuu Yandios ti xnaa ri ta'u ri nuu ya. Ti vasu ni xndaku va'a ri jnu'un ya undi nuu, ko iyo jniñu ja na siuku ndaa ri undi kivi kundee ri.

### Ja tu chiñu'un yo santu

## 10

<sup>1</sup> Ñani naa ra, ru'u Pablo, na ndakuni'in ri iin jnu'un nuu ra naa ra ja koto naa ini ra nasa ni ka ya'a tata yo na jana'an iin nuu nducha mar. Chi tendi'i da

ni ka jika nuu ndati iin viko, ja ni jakava kani siki da naa da ja kuu iin seña ichi ki'in da. Ti tendi'i da naa da, ni ka ya'a nuu Mar Rojo ja ni ndututu nducha un, ti ma'ñu un ni nuña iin ichi ja ni ka ya'a da. <sup>2</sup> Yukan ni ka kikoyo da jiin tata yo jana'an ja ni kuu Moisés, ja ni ka jindandikun da ndati viko un jiin ja ni ka ya'a da sava nducha mar. <sup>3</sup> Ti tendi'i da ni ka yaji iin ni nuu ndeyu ja ni ja'a Yandios ja vaji nuu andivi. <sup>4</sup> Ti suni Yandios ja kancha andivi ni ja'a ya nducha ni ka ji'i da. Ti nducha un ni kaña nuu kava ja ni ja'a ya ja kancha jiin da. Ti jiin kava un ka jini yo ja maa Cristo ni kuncha ya jiin da sava'ni ga nuu ka kendo da, chindee ya maa da. <sup>5</sup> Ti vasu sia'an ni ka yee ni ka ji'i da ja ni ja'a Yandios nuu da, ko yajni tendi'i da ni ka nduni'in ini nuu jnu'un Yandios. Ja yukan tukaa ni kuu va'a ini ya jiin da, ti ni ka ji'i da ja ni kundatu yiki kuñu da ni ñu'un te'e un.

<sup>6</sup> Sia'an ni ka jna'an tata yo na jana'an, ti yukan na nde'e na kotonchaa yo naa yo vijna, nava tu kuñukuu ini yo taka jnu'un ndeva'a nanu ni ka sa'a tata yo undi na jana'an. <sup>7</sup> Ja yukan koto chiñu'un ra sava'ni ga santu nanu ni ka sa'a chaa jana'an un naa da, chi siukan ka'an tutu ii Yandios: "Ni ka nukoo yivi, ti ni ka yaji ni ka ji'i yi nuu viko ja ka chiñu'un i santu i, ti yachi ni ka ndokuiñi i ni ka jita ja'a i ni ka jita ja'a i nuu santu i", kachi. <sup>8</sup> Koto kusikinchaa jna'an ra nanu ni ka sa'a chaa jana'an un, ja chaa un ni ka xnda'u da ñasi'i, ti ña'an un ni ka kivi nduu ña ichi kue'e jiin chaa un, chi ja sia'an ni ka sa'a da, ti iin kivi ni ja'a ya nundo'o nuu da ja ni ka ji'i oko uni mil yivi naa i. <sup>9</sup> Su've na kondo'o ndaa ini ra, ti koto ma nduku ra ja kuiti ini Jito'yo nanu ni kuiti ini ya nuu yivi jana'an un, chi ni ka kenda koo ni tuu ti da naa da ti ni ka ji'i da. <sup>10</sup> Ni koto nduni'in ini ra ti ka'an ndeva'a ra siki Yandios, nanu ni ka ka'an ndeva'a yivi jana'an un siki Yandios, ti ni taji ya ángel ya ja ni kii ka'ní yivi un naa i.

<sup>11</sup> Sia'an ni ka jna'an yivi jana'an un naa i, ti yukan na nde'e na kotonchaa yo, ti koto ma sa'a yo sia'an. Chi jnu'un un ni kendo yoso nuu tutu nava na ka'u yo, ti na chu'un ini yo naa yo ja tu kivi nduu yo jiin jniñu ndeva'a un, chi ja kuan kuyajni kivi ja ndi'i ñuyivi ja'a. <sup>12</sup> Ti siki ja tu kojnuni NASA kinikava yo nuu kuachi ja kuu kivi vijna, ti va'a ga na chu'un ini chu'un añu ra ja sa'a ra mani jniñu va'a, nava tu kinikava ra nuu kuachi un. Chi nu nau ro'o ndo'o ini ja tukaa ka sa'a ra ni iin kuachi, ti koto maa ra sandau kinikava ra nuu kuachi un. <sup>13</sup> Ti nu jna'an ra iin nundo'o ja nduku skivi ro'o naa ra nuu kuachi, ti koto kukui'ya ini ra, chi suni sia'an ka jito uu ga yivi naa i nundo'o un. Ko kaña ra nuu nundo'o un, chi Yandios tu sia ya ro'o ja vi'i ga na ki'in ra nuu nundo'o un, ti naa ra. Chi siuku ya ja ni chisojnu'un ya. Su've nama ya ro'o nuu nundo'o un, ja tu kinikava ra nuu kuachi.

<sup>14</sup> Ja yukan ñiani naa ra, koto maa chiñu'un kuiti ga ra nuu santu ra. <sup>15</sup> Sia'an ka'an ri, chi ka kuu ra yivi chaku ini, chi ndichi xini ra naa ra, ti maa ra na kachi nu iyo ndaa jnu'un ka'an ri xi tuu. <sup>16</sup> Chi ka jini va'a ra nava ka chiñu'un yo Jito'yo Cristo Jesú, ti na kuanta'u yo nuu ya ja kuu vino un ti ka ji'i yo ti'li ti'li. Jiin yukan kuu jandaa ja iin ni ka kuu inijnuni yo ja ka kandixia yo Jito'yo Cristo Jesú, ja maa ya ni ji'i nuu nda'a cruz, ti ni jatti ya niñi ya ja'a yo. Suni sia'an kuu nu ka ja'nu yo iin staa stila ti ka yaji yo ti'li ti'li. Suni yukan kundaa ja iin ni ga ka kuu yo ja ka kandixia yo ja ni nakua'a ya maa ya ja kuu maa yo na ni ji'i ya nuu nda cruz. <sup>17</sup> Ti vasu kua'a xaan yo ka iyo, ko iin ni ga ni ka nduu yo, chi iin ni kuu staa ka yaji yo.

<sup>18</sup> Nuku'un ini naa ra nasa ni ka sa'a yivi ñuu Israel, ja ni ka yaji da ti'li ti'li kuñu kuiti ni ka soko yivi nuu altar un, ti jandaa kuu ja jiin yukan ka stuu i maa i ja iin ni ka kuu i, chi ka kandixia ndaa i nuu ja iyo nuu altar un. <sup>19</sup> Ko na kachi ri nuu ra, ro'o yivi ñuu Corinto, ja tundo kuu kuiti santu kancha nuu

iiñ altar, ni tundo kuu kuiti kuñu ja ka soko ra nuu santu un. <sup>20</sup> Ti su'va na kachi ndaa ri ja yivi tui jnu'un Yandios ka nduku i nasa nakuni ndaa i nau kuu maa Yandios. Ja yukan ka soko i ja ka ñava'a i nuu altar un, ko ansu nuu santu un ka soko i. Chi su'va nuu maa ndaja'a ja'u'u un ka soko i, ti ansu nuu maa Yandios. Ja yukan tu kuni ri ja kivi nduu ra naa ra jiin ndaja'a ja'u'u un. <sup>21</sup> Na kachi ri ja nu ko'o ra ti'l'i ti'l'i vino, ti kaji ra ti'l'i ti'l'i stila nava ni kachi maa Jito'yo, ja nuku'un ini ra nava ni nakua'a ya maa ya ja ni ji'i ya, nusa ti koto ma kaji ra ti ko'o ra jiin yivi ka ndututu ja ka chiñu'un i ja'u'u un. Chi tu kejna'an kuiti ndinduu jniñu ja'a. <sup>22</sup> Chi tu kuu kuiti kivi nduu yo jiin ndaja'a chaa xaan un, chi kukuiñi maa Jito'yo ja'a yo. ¿Va nu ka kuña'nu ga yo ja kuu maa ya xino?

### *Ja na kunchuku yiñu'un yo nava iyo ichi Yandios*

<sup>23</sup> Iyo yivi ka ka'an: "Iyo nuña yo ja sa'a yo nasa kuu ini yo", kachi. Ti jandaa kuu ndixia un, ko ansu taka nuu jniñu un iyo va'a. Chi tendi'i ni kuu sa'a yo sava'ni ga nasa kuni yo, ko ansu tendi'i un chindee yo'o, ja chindee yo nuu ñani yo, chaa kandixia ja na kaka ndaa da nuu ichi Yandios. <sup>24</sup> Chi kanuu chindee ga yo ñianijna'an yo, chaa ka kandixia, ti ansu nuu maa yo.

<sup>25</sup> Suni na kachi ri ja nu kin kuan ra kuñu iyo nuu ya'u un, ti tu kani ini ra nu kuñu ni soko nuu santu kuu xi tuu. <sup>26</sup> Chi sia'an yoso nuu tutu ii ja ka'an: "Nanu maa Jito'yo kuu ni tu'u ñuyivi jiin tendi'i kuiti ja iyo nuu", kachi. Ja yukan kuu kuajniñu yo taka ja iyo nuu.

<sup>27</sup> Ti nu iiñ chaa tu kandixia, kana da ro'o ve'e da ja kaji ra staa jiin da, ti nu kuni ra ki'in ra, ti iyo va'a. Ko kaji taka ja na kani da nuu ra, ti koto kajnu'un ra ni tu kani ini ra ja nu ja ni soko nuu santu kuu xi tuu. <sup>28</sup> Ko nu inga chaa na kachi nuu ra: "Kuñu ni soko nuu santu kuu ja'a", kachi da. Nusa ti koto kaji ra siki ja ndo'o ini da ja kuachi kuu ja kaji da kuñu ni soko un. <sup>29</sup> Ti koto kaji ra un nava tu xndi'i ra ini da, vasu ja jini maa ra ja tundo kuu nu na kaji ra. Chi kuu kachi inga ra ja kuu kaji yo sava'ni ga nau ja kuni yo, ko tu va'a ja ka'an yo sia'an, nava tu kukui'ya ini inga yivi kandixia un. <sup>30</sup> Iyo ka jani ini yo ja tu iyo ichi inga yivi kandixia ja kankuachi i siki yo nu na kaji yo sava'ni ga ndeyu, vasu ka nakuanta'u yo nuu Yandios ja kuu ndeyu un. <sup>31</sup> Ko tu va'a ja ka jani ini yo sia'an. Chi su'va na koto va'a yo nasa kunchuku yo naa yo undi ja kaji yo ja ko'o yo jiin undi ja sa'a yo sava'ni ga jniñu. Va'a na koto yo taka jniñu sa'a yo, nava na ka'an va'a yivi naa i ja'a yo ja ka junukuachi yo nuu Yandios, nava na kuni ndixia i naa i ja kuña'nu xaan maa Yandios ja chiñu'un yo ya. <sup>32</sup> Ti va'a na kunchuku ra nava yukan na nde'e yivi naa i, ti na chu'un ini i, ti sia'an tu kivi i nuu kuachi, ja kuu nuu yivi nación Israel, ni jiin yivi inga nación ja tu jini kuiti i jnu'un Yandios, ni nuu yivi ja ka kandixia Jito'yo Cristo Jesú. Chi su'va na kusii ini i jiin ra naa ra ja va'a kanchuku ra nuu ichi Yandios. <sup>33</sup> Suni sia'an ru'u, chi jitu ndi'i ini ri jiin taka jniñu va'a ja kuu nuu yivi naa i, ko tu nduku ri ja kuu maa ri, chi su'va sa'a ri taka jniñu va'a un ja kuu nuu taka ni yivi nava na kuni ndaa i iiñ ichi va'a ja na kandixia i nuu maa Jito'yo Cristo Jesú ti nata'u i.

## 11

<sup>1</sup> Nde'e ti kotonchaa jniñu sa'a ri, ti na tejna'an naa ra nanu ru'u ja na tejna'an ri taka ja ni sa'a Cristo Jesú.

### *Ja na kundi'yu xini ñasi'i naa ña*

<sup>2</sup> Jajnu'un ri ro'o naa ra ñani, ja va'a kanchuku ra, chi nini ka nuku'un ini ra ru'u, ja ka jitu ini ra jiin taka jnu'un ndaa ni xna'an ri. Chi sia'an ni ni'in ri jnu'un ya, ti ni xndaku ri nuu ra naa ra.

<sup>3</sup> Ko vijna ti kuni ri ja na chaku va'a ini ra naa ra ja kuña'nu ga Cristo nuu taka chaa, ti chaa un kuña'nu ga da ja kuu ñasi'i da, sia'an nanu kuña'nu maa Yandios nuu Cristo Jesús. <sup>4</sup> Ti ja sia'an kuu, ti na kachi ri ja jnu'un kanuu kuu nu iin chaa na kasi da xini da hora jikanta'u da nuu Yandios, xi hora ka'an da jnu'un ya nuu yivi naa i. <sup>5</sup> Suni sia'an nu tu kasi iin ñasi'i xini ña hora jikanta'u ña nuu Yandios, xi ja ka'an ña jnu'un ya, suni jnu'un kanuu kuu un ja kuu maa ña nu tu kasi ña xini ña, ti iin ni kuu nanu ja ja ni sete ña xini ña. <sup>6</sup> Chi nu tu kasi ña xini ña, ti va'a ga na sete ndi'i ña ixi ña. Ko nu jani ini ña ja jnu'un kanuu kuu ja ka'ncha ña ixi ña, xi ja sete ndi'i ña ixi ña, nusa ti va'a ga na kasi ña xini ña. <sup>7</sup> Ko ja kuu chaa tu iyo jnu'un ja kasi da xini da, sik ja ni sa'a Yandios maa da ja na ndaku da nava kaa maa ya. Jiin yukan xna'an da nasa kuña'nu xaan maa Yandios. Suni sia'an, nu kasi ñasi'i un xini ña naa ña, ti jiin yukan xna'an ña suni ja kuña'nu ga chaa ja kuu maa ña. <sup>8</sup> Sia'an iyo chi xnakan chaa ni sa'a Yandios, ti sa ni sa'a ya ñasi'i. Ni sa'a ya ñasi'i un jiin yiki kuñu chaa, ansu yiki kuñu ñasi'i un ni kuu chaa un, <sup>9</sup> chi ja kuu maa da ni sa'a ya ñasi'i un. Tu ni sa'a ya ñasi'i un ja koo ña sia'an ni, chi ja na kundiua ña jiin chaa ni kuu ña. <sup>10</sup> Yukan kuu ja kanuu kasi ña xini ña ja kua'a ña ja yiñu'un nuu chaa, chi undi ángel Yandios ka nde'e jniñu sa'a ña.

<sup>11</sup> Ti vasu sia'an iyo, ko yo'o ja ka kandixia maa Jito'yo Cristo Jesús, kuu ña'an kuu chaa, iin ni ka kuu yo ja kuu nuu Jito'yo. Ja yukan ni iin ni iin yo tu kuu kandu ja ta'u jniñu. <sup>12</sup> Ti vasu ni sa'a ya ñasi'i jiin yiki kuñu chaa, ko suni nuu nda'a nuu ja'a ñasi'i kaku iin chaa. Ti sia'an kuu ndixia, chi ndiñduu da ni sa'a Yandios na ni sa'a ya da jiin taka ja iyo.

<sup>13</sup> Ko sik ja nasa ka jakoyo ñasi'i naa ña hora ka ndututu ra, ti na kachi ri ja va'a nde'e ra, ¿nde'o nu iyo va'a ja tu kasi ña xini ña naa ña hora ka jikanta'u ña xi tuu? <sup>14</sup> ¿Va nu ansu jnu'un kanuu kuu ja iin chaa koo nani ixi da nanu ixi xini ñasi'i nu? <sup>15</sup> Chi su'va ja yiñu'un maa ñasi'i kuu ja ni ja'a Yandios ixi nani un ja na kundi'yu xini ña, ti na tuu ña jiin ixi ña.

<sup>16</sup> Ko nu iyo yivi tu jajna'an ini jiin jnu'un xndaku ri ja'a, nusa ti va'a na nde'e da jnu'un ka'an da, chi ni maa ru'u Pablo ni inga yivi ja ka kandixia jnu'un Cristo, ni tu ndenda inga ichi ja sia'an sa'a yo.

### *Tu ni ka chiñu'un va'a da nava ni kuxini maa Jito'yo*

<sup>17</sup> Ti inga jnu'un ja ka'an ri ja'a. Na kachi ri ja tu kuu kuajnu'un ri ro'o naa ra siki iin jnu'un ni ni'in ri ja tu kanchuku mani ra hora ka ndututu ra, chi sa su'va ka sa'a ra jniñu ja tu ni jniñu kuiti. <sup>18</sup> Sia'an ka'an ri, chi ni ni'in ri jnu'un ja hora ka ndututu ra, ti siin siin ka ndo'o ini ra, ti va jandaa kuu un ndo'o ini ri. <sup>19</sup> Ti tu kachi ra ja tu, chi sia'an ni ni'in ri jnu'un. ¿Xi vatuni ja ka sasiin jna'an ra nu ka ndututu ra xino? ¿Xi va nu kusii xaan ga ini Yandios jiin ra naa ra nu? <sup>20</sup> Sia'an ni ta'u ndixia Jito'yo jniñu ja na ko'o yo vino ti na kaji yo staa ja nuku'un ini yo jniñu ña'nu ni sa'a ya ja'a yo. Ko ro'o naa ra, tu ka sa'a ra sia'an, chi su'va nu ni ka ndututu ra, ti tu ka iyo iin nuu ini ra. Chi sa siin siin ka sa'a ra, ja undi ni ka sama ndi'i kuiti ra nava ni kachi ya ja sa'a yo. <sup>21</sup> Chi nu ni kuu hora ja ki'in ra ja kuxini nava ni kachi maa Jito'yo, ti tu ka ndatu kuee ra ti'lí, chi ndi iin ndi iin ra, xnakan ga kandu, ti ka ki'in ra nasa kuu ini ra. Ti iyo sava ra ja ka najini vasu sava yivi nda'u ka kendo i sia'an ni, ti ka jil'i yi soko, chi tu ka tejna'an iin nuu ra naa ra. <sup>22</sup> ¿Va nu tu ka iyo ve'e ra ja kaji ko'o ra xino? Ti ja sia'an ka sa'a ra naa ra, nusa ti tu ka ja'a kuiti ra ja yiñu'un nuu sava ga fñanjna'an ra, ja suni iin ni ka kuu i jiin ra, ti xndoo ra jnu'un kanuu nuu yivi tu iyo ndeyu kaji i. ¿Nusa ti nasa kachi ri jiin ra? ¿Va nu kuajnu'un ri ro'o naa ra ja sia'an ka sa'a ra nu? Ko va tu kuajnu'un kuiti ri ro'o, chi tu iyo va'a kuiti jniñu ka sa'a ra naa ra un.

### *Nasa kuu nava ni kuxini maa Jito'yo*

<sup>23</sup> Ti vijna, ru'u Pablo, na kachi ri maa jnu'un ni ni'in ri nuu maa Jito'yo Cristo Jesú. Ja ni xndaku ri nuu ra naa ra ja maa jakuaa, kivi ni nakua'a da ya nuu yivi ndeva'a un, ni kuxini ya jiin ndaja'a ya. Ti ni kli'in ya iin staa stila, <sup>24</sup> ni nakuanta'u ya nuu Tata yo Yandios, ti ni kachi ya jiin da naa da: "Ja'a kuu nanu yik'i kuñu ri ja na kua'a ri ti kuu ri ja'a ra naa ra. Ti nini sia'an kaji ra naa ra ja nuku'un ini ra, ru'u ja ni ji'l'i ri ja kuu maa ra naa ra", ni kachi ya. <sup>25</sup> Ti suni sia'an ni sa'a ya nu ni ndi'i ni ka kuxini da jiin ya. Ni kli'in ya iin vasu un, ti ni kachi ya: "Ja ñu'un vasu ja'a kuu nanu niñi ri ja soko ri ja kuu maa ra naa ra. Ti niñi ri kuu iin tratu jaa ja kua'a jandaa kuiti ja ni nama Yandios ro'o. Ti taka jinu ko'o ra sia'an, ti nuku'un ini ra ru'u", ni kachi ya. <sup>26</sup> Chi taka jinu ja kaji ra staa ti ko'o ra jiin vasu, ja nuku'un ini ra ja ni ji'l'i Jito'yo ja kuu maa ra naa ra, ti sia'an na siin ra sa'a ra naa ra undi kivi na nchaa ya tuku.

<sup>27</sup> Ko na kachi ri ja ña'n u kuu jniñu ni sa'a Jito'yo. Yukan ti nu nau yivi na kaji staa xi ko'o i jiin vasu ja tu sa'a i nanu ni kachi maa Jito'yo Cristo Jesú, ti jiin yukan nchaa kuachi yivi un, chi yisikinchaa i maa Jito'yo jiin niñi ya. <sup>28</sup> Ja yukan kanuu na kani va'a ini iin iin ra naa ra xnakan, nu iyo ndoo ra naa ra, nu tu na kuachi ra iyo, yukan na ti kuu kaji ra staa ti ko'o ra jiin vasu ya. <sup>29</sup> Ti va'a nde'e ra jniñu sa'a ra naa ra, chi ii ga kaa. Nu nau yivi tu kua'a ja yiñu'un ja nuku'un ini i maa Jito'yo, ti kaji i staa ti ko'o i jiin vasu ya, ti nu sia'an ka sa'a i, ti na kachi ri ja kuu nundo'o maa i ka nduku i. <sup>30</sup> Yukan kuu ja ka iyo kua'a yivi ku'u jiin yivi ka kuita xaan. Ti sava i ja ni ka ji'i. <sup>31</sup> Ko xnakan kani ndaa kuiti ini yo nasa kuu ja kaji yo ko'o yo, ja kuxini yo siki ja chiñu'un yo maa Jito'yo. Ti nu siuku va'a yo sia'an, ti ni maa ya tu kua'a ya kundo'o yo. <sup>32</sup> Ko nu maa ya na kachi ja kua'a ya nundo'o kondo'o yo, ti na kuanta'u yo ja kundo'o yo nava na chaku ini yo nasa ki'in yo nuu ñuyivi ja'a, ti tu jna'nu ndatu yo jiin yivi ñuyivi ja'a ja tu ka jandatu i nuu Yandios.

<sup>33</sup> Sia'an iyo jnu'un ja'a ro'o ñani naa ra ja kanchuku ñuu Corinto. Nu ka ndututu ra ja kaji ra ko'o ra ja kuxini nava ni kachi maa Jito'yo, nusa ti kundatu kuee ra ti'l'i naa ra nava iin nuu na ndekava tendi'i ra naa ra. <sup>34</sup> Ti nu nau iin ro'o naa ra ja ji'l'i soko, ti va'a ga xnakan na kaji ra staa undi ve'e ra, ansu ja chaa ra undi nuu ka ndututu ra ti kaji ra nava kuu ini ra. Chi nu sia'an na sa'a ra, ti maa ra nduku ja kua'a Yandios ja kundo'o ra siki ja sia'an ni yivi kuu ra.

Ti iyo uu ga jnu'un ja kuni ka'an ri, ko na kendo ti sa na kachi ri undi kivi na jaa ri nuu kanchuku ra.

### *Siiñ siiñ ta'u ja'a Espíritu Santo nuu yivi*

## 12

<sup>1</sup> Vijna ti na kachi ri nuu ra naa ra ñani. Na xndaku ri siki taka ta'u ja ja'a Espíritu Yandios nuu yo. Ti jiin ta'u un stuu ndijin yo maa jniñu sa'a Espíritu Santo. Ti iin iin yo kunukuachi sava'ni ga jniñu ja kua'a Espíritu nuu yo. <sup>2</sup> Ko ja jini va'a ra naa ra ja ni changa ga kandixia ra naa ra ni ka iyo ñaa kuiti nduchi ra, chi ni ka nchaañu'un ra taka santu ja tu kuu ka'an chi ñi'in. <sup>3</sup> Undi nuu tu ni ka jini ra nasa sa'a jniñu Espíritu Santo, ko vijna na kachi ri ja ni iin yivi tu ka'an ndeva'a i siki Jesú, nu ansu jnu'un ja ja'a Espíritu kuu ja ka'an i. Ti suni ni iin yivi, tu ka'an i ja Jesú kuu jito'yo i nu tu ka'an i jiin maa jnu'un ja vají nuu Espíritu Santo.

<sup>4</sup> Ko na kachi ri ja siiñ siiñ ta'u ja'a Espíritu Santo nuu iin iin yivi naa i ja ka kunukuachi i, ti taka ta'u un vají nuu maa iin ni Espíritu Santo. <sup>5</sup> Ti vasu siiñ siiñ jniñu ka junukuachi yo naa yo, ko maa iin ni Jito'yo kuu ya ni tatu jniñu

un nuu yo. <sup>6</sup> Ti vasu ndi siin ndi siin ka sajniñu yo, ko maa iin ni Yandios kuu ya chindee yo'o jiin jniñu ja kandio ini yo sa'a yo.

<sup>7</sup> Vijnal ti yo'o ja ka kandixia, ja ni ni'in yo ta'u un nuu Espíritu Santo, ti ta'u ni ka ni'in yo un, tu kuajniñu yo ja kuu maa yo, chi ni ni'fn yo ta'u un ja na chindee yo nuu taka ñanijna'an yo ja na kaka ndaa i nuu ichi Yandios. <sup>8</sup> Nuu sava yo ni ja'a ya ta'u ja ndichi xaan na xna'an yo jnu'un Yandios. Ti nuu sava yo ni ja'a ya ta'u ja na nuña inijnuni yo ti chaku va'a ini yo nasa kuni ka'an taka jnu'un ndichi ja vaji nuu Yandios. Ko taka ta'u un ni ja'a maa Espíritu Santo ja sia'an na koo jiin yo. <sup>9</sup> Nuu sava yo ni ni'in iin jiña ni inijnuni ja kuu kuñukuu ndaa kuiti ini yo, ja kuu sa'a yo tijni nuu jniñu ña'nu, ja ni tu kuu kuiti sa'a inga yivi. Ti sava yo kuu sa'a tajna nuu yivi ka ku'u, ti nduva'a ni i. Ko taka jniñu ja'a sa'a maa Espíritu Santo. <sup>10</sup> Ti nuu sava ga yo ni ja'a ya iin ta'u jiña ja kuu sa'a yo jniñu ña'nu, ja ni tu kuu kuiti sa'a inga yivi. Ti nuu sava ga yo'o ni ja'a ya iin inijnuni ja kuu nakachi yo jnu'un vaji nuu maa Yandios nuu yivi naa i. Ti uu ga yo ni ja'a ya inijnuni ja na chaku va'a ini yo nau jnu'un vaji nuu Espíritu Santo, ti nau jnu'un vaji nuu espíritu chaa xaan. Nuu uu ga yo ni ja'a ya inijnuni ja ka'an yo tijni yu'u yivi ja tu jini yo. Ti suni ni ja'a ya inijnuni sava ga yo ja kuu nakachi yo nasa kuni ka'an sa'an ja ka'an jna'an yo jiin inga yu'u. <sup>11</sup> Ko taka nuu jniñu un sa'a maq iin ni Espíritu Santo ja siin ta'u ni ja'a ya nuu iin yivi ja na sa'a i, nasa kuu ini maa ya.

### *In ni ka kuu tendi'i yo*

<sup>12</sup> Sa'a yo nanu kuu iin yiki kuñu ja iyo kua'a nuu, sia'an ka kuu yo jiin Cristo ja kuu yo nava yiki kuñu ya siki ja ka kandixia yo maa iin ni ya. Ti vasu kua'a xaan yo ka iyo, ko iin ni ka kuu yo. <sup>13</sup> Ja sia'an ja iin ni ka kuu tendi'i kuiti yo naa yo, kuu yivi hebreo, xi yivi griego, xi vasu kuu yo muzu ja ni jaan yivi, xi chaa sajniñu ja kuu maa da. Ti vasu siin siin kanda yo, ko iin ni ka kuu yo jiin Cristo, nava ja iin iin nuu yiki kuñu ya ka kuu yo naa yo. Ti maa Espíritu Santo ni sa'a ya ja iin ni ga yivi ni ka kuu yo. Chi hora ni ka janducha yo, ni ja'a yo jandaa ja yi'i yo jiin Cristo Jesús.

<sup>14</sup> Chi yiki kuñu iin yivi ansu iin ni yiki kuu, chi su'va kua'a xaan yiki kuachi ka junukuachi jiin. <sup>15</sup> Chi nu ja'a yo na kachi: "Ansú nda'a kuu ri. Ja yukan tu yi'i ri jiin yiki kuñu", kachi. Ko tuu, ¿chi va nu ja sia'an na kachi, ti ansu yiki kuñu yo kuu ndixia nu? <sup>16</sup> Ti nu so'o yo na kachi: "Vanuxia ansu nduchi kuu ri. Ja yukan tu yi'i ri jiin yiki kuñu", kachi. Ko tuu, chi va nu ja sia'an ka'an, ko suni yi'i ndixia jiin yiki kuñu yo. <sup>17</sup> Ko nasa kuu nu sia'an na sa'a yiki kuñu yo, ¿chi nasa koo yo nu ndi'i yiki kuñu yo kuu nduchi, ti nasa kuni so'o yo nusa? ¿Xi nasa kuu ndi'i yiki kuñu yo na kuu mani so'o, ti nasa ni'in yo xiko jiin yuxijni yo nu? <sup>18</sup> Ti vasu siin siin ka junukuachi yiki kuñu yo, ko maa Yandios ni chijnii jna'an ya iin iin yiki kuachi, nava kuu ini maa ya ja sia'an na koo, ti tendi'i un ni kuu iin ni ga yiki kuñu. <sup>19</sup> Sa ti mani si'in na kuu yiki kuñu yo, ¿nasa kuu nusa? <sup>20</sup> Ko tuu, chi ansu iin ni si'in kuu yiki kuñu yo, chi iyo kua'a xaan yiki kuachi ja jajniñu, ti tendi'i un kuu iin ni ga.

<sup>21</sup> Va nu kachi nduchi yo jiin nda'a yo: "Tu nandi'i ri ro'o", kachi. Ni xini yo tu kuu kachi jiin ja'a yo: "Tu nandi'i kuiti ri ro'o", kachi. <sup>22</sup> Ko ansu sia'an kuu, chi su'va taka yiki kuñu yo ja jani ini yo ja tu kuajniñu, ko yukan kuu ja kanuu ga ja nandi'i yo. <sup>23</sup> Ti taka yiki kuñu yo ja jani ini yo ja tu kanuu kasi yo siki, ko sa yukan jitú ndi'i ini yo ja na kasi yo jiin sa'ma, taka ja yisa'u ja ndo'o ini yo ja tu ndijin nuu, sa yukan va'a ga jasi yo. <sup>24</sup> Ko iin nuu vii ga kaa nuu yiki kuñu yo, sa yukan tu jasi yo. Ko sia'an ni sa'a Yandios yo'o ja vi'i ga na koto yo nuu yisa'u un ja tu vii kaa. <sup>25</sup> Ti siukan ni sa'a Yandios nava tu kusiin taka yiki kuñu yo, chi su'va taka na chindee jna'an nava na kendo

va'a ni tu'u. <sup>26</sup> Ti nu ni tuji iin yiki kuñu, ti ni tu'u ni kaa jatu yeni'ni. Ti suni sia'an nuu chiñu'un ga yo iin nuu yiki kuñu yo, ti suni ni tu'u ni yiki kuñu ni'in ja yíñu'un.

<sup>27</sup> Ti nu iyo kua'a nuu yiki kuñu yo, ti sia'an ka kuu yo naa yo jiin Cristo ja ka kandixia yo maa iin ni ya, chi kuu yo nanu maa yiki kuñu ya, ti ndi iin ndi iin yo naa yo kuu iin iin nuu yiki kuñu maa ya, chi tendi'i yo iin ni ga ni ka kuu yo jiin maa Jito'yo. <sup>28</sup> Ja yukan siin siin jniñu ni tatu ya nuu yo ja kunukuachi yo nava kuu ta'u ni ja'a ya nuu yo. Xnakan ni jani ya apóstol ja ka ndiso da jniñu ña'nu ga ja kuu nuu Yandios. Yukan na ti ni jani ya profeta ja kuu nakachi i jnu'un vaji nuu maa Yandios nuu yivi naa i. Ti sa ni jani ya chaa ka xna'an jnu'un ya ja ka xndaku da nuu yivi. Yukan na ti ni jani ya uu ga yivi ja sa'a i jniñu ña'nu, ja ni tu kuu kuiti sa'a inga yivi. Suni yivi ja sa'a tajna yivi ku'u ti nduva ka'a ni 1. Jiin yivi ndiyo ini ja chindee jna'an i nuu sava'ni ga jniñu. Suni chaa ka ta'u jniñu nuu yaka yivi ka kandixia. Jiin yivi ni ni'in inijnuni nuu ya ja ka'an tijni yu'u yivi ja ni maa i tu chaku ini. <sup>29</sup> Nu sia'an iyo, ¿va nu tendi'i yo ka kuu apóstol nu? ¿Xi tendi'i yo kuu profeta nu? ¿Va nu tendi'i yo ka xndaku? ¿Xi tendi'i ka sa'a jniñu ña'nu nu? <sup>30</sup> ¿Va nu tendi'i yo kuu sa'a tajna nuu yivi ku'u nu? ¿Xi tendi'i yo ka'an siin siin yu'u? ¿Xi va nu tendi'i yo kujnuni ini nasa ka'an yo taka jnu'un ka ka'an yivi siin siin yu'u nu? <sup>31</sup> Nusa ti kundio ni ini ra ja na kua'a Yandios iin ta'u kanuu ga ja kuu ra naa ra, ja kunukuachi nuu jna'an ra naa ra.

Ti ru'u Pablo, na xna'an ri nuu ra nau kuu iin ichi va'a ga.

### Jnu'un kunda'u ini jna'an

## 13

<sup>1</sup> Ti na kachi ri ja vasu kuu ka'an ri tijni nuu yu'u yivi, xi jnu'un ja ka'an ángel Yandios ja tu chaku ini yo, ti nu tu ñunda'u ini ri jiin jna'an ri, nusa ti va jnu'un ka'a ri kuunanan iin tambor ja so kuitini'in kuna'ma, xi iin platillo ja so kuitini'in kaxin kaxin ni, ja nanu kuxi so'o yo sa'a. <sup>2</sup> Ti vasu ni ja'a Yandios iin inijnuni ja kuu nakachi ri nuu yivi maa jnu'un ya, ti vasu va'a na kujnuni ini ri taka jnu'un ya ja ni iin yivi tu jini, xi vasu kujnuni va'a ini jiin jnu'un ndichi Yandios, ko nu tu ñunda'u ini ri, ti va tu kaxan jniñu sa'a ri nusa. Xi vasu kandixia ndaa ri ya, ti ñukuu ni ini ri ja kuu chajijo ri iin yuku, ko nu tu ñunda'u kuiti ini ri, ti va tundo kuu kuiti ri nusa. <sup>3</sup> Vasu na tejna'an ndi'i ri ja ñava'a ri nuu taka yivi nda'u, xi vasu na ka'ma yivi ru'u nuu ñu'un ja siki jnu'un ya, ko nu tu ñunda'u ndixia ini ri nuu ñanijna'an ri, ti va tundo kuu kuiti jniñu sa'a ri nusa.

<sup>4</sup> Yivi ñunda'u ini, chi tu kuiti yachi ini i. Ka'nú xaan ini i, ti kuee ini i, ti va'a ini i jiin jna'an i. Tu kuasun ini i, ni tu kuu ichi ini i nuu ñanijna'an i, ti ni tu vixi ini i. <sup>5</sup> Ni tu ka'an ndeva'a i siki yivi, ni tu sa kuasun ini, ni tu kuiti kuiti ini, ni tu ñu'un tutu ini i ja ku'un koso ini i sava'ni ga nau ja kuu. <sup>6</sup> Ni tu jajna'an ini i jiin jniñu ndeva'a ja ka sa'a ñani jna'an i. Chi su'va ndiyo ndaa ini i jiin jniñu va'a. <sup>7</sup> Ti yivi ñunda'u ini, taka ni ndo'o i, taka ni kundee ini i jiin taka ni ñukuu ini i, ti taka ni ndatu kuee i.

<sup>8</sup> Jnu'un ñunda'u ini, chi tu naa kuiti, ko jaa iin kivi ja tukaa koo chaa ja kuu nakachi jnu'un vaji nuu maa Yandios nuu yivi naa i, ni tukaa ga koo yivi ka'an siin siin yu'u, ni tukaa koo chaa ka'an jnu'un ndichi ja vaji nuu Yandios. Taka jnu'un un chi ja kuan ndi'i, ko jnu'un kunda'u ini jna'an, ni tu ndi'i kuiti. <sup>9</sup> Ti sia'an kuu ndixia yukan, chi vasu ñu'un kua'a ini yo jnu'un ndichi Yandios, ti sia'an kuu ndixia, ko jaku ni kuu jnu'un un nuu yo ja kanchuku yo nuu ñuyivi ja'a. Ti vasu vii na ka'an yo jnu'un Yandios vijna, ko suni jaku ni kuu

siki ja tu jini va'a yo jnu'un ya. <sup>10</sup> Ko nu na jaa kivi ka'nu ga un, ja keja'a Yandios nasama ya taka ja iyo nuu ñuyivi, yukan na ti kuni ndaa yo ja ja ni ndi'i ni kendo va'a, ti ja tu ni iyo va'a un, ndi'i kuxio ki'in. <sup>11</sup> Chi na ni kuu yo iin suchi lulu, ni ka'an yo nanu suchi lulu, ni chaku ini yo, ti ni ndo'o ini yo nanu suchi lulu un. Ko nu ni ka kuña'nu yo, ti ni xndoo yo taka ja kuu jnu'un suchi lulu un. <sup>12</sup> Ko vijna nini iyo ñaa inijnuni yo nanu nu nde'e yo nuu iin espejo ja tu ndijin va'a. Ko na jaa kivi ka'nu un, yukan na ti kujnuni va'a ini yo NASA sajiniñu Yandios, sia'an nanu maa Yandios jini va'a ya yo'o naa yo nasa yivi ka kuu yo.

<sup>13</sup> Nusa ti iyo uni jnu'un kendo kutu ja kuu saa ni ja kuu saa ni: ja kandixia ni'in yo jnu'un ya, ja na kundio ndaa ini yo siuku yo ja ni chisojnu'un ya, jiin ja na kunda'u ini jna'an yo. Ko iin ja kanuu xaan ga un kuu iin jnu'un ja na kunda'u ini jna'an yo.

### *Ja ka'an yo siin siin yu'u*

## 14

<sup>1</sup> Ja yukan na kachi ri ja jnu'un kanuu ga kuu ja na kukutu ini ra kunda'u ini jna'an ra. Ti suni kukutu ini ra ja kuñukuu ini ra ni'in ra ta'u ja ja'a Espíritu Santo, ja na ni'in ra iin ta'u kanuu ga ja na kuu nakachi ra jnu'un vaji nuu maa Yandios. <sup>2</sup> Chi chaa ñava'a ta'u ja ka'an da siin yu'u ja ni maa da tu chaku ini. Ko jini va'a maa Yandios naa jnu'un ka'an da, ti vasu ka ñuso'o yivi naa i, ko tu chaku ini i. Chi ka'an da jiin inijnuni maa da ja ka'an da siin yu'u un.

<sup>3</sup> Ko chaa ja nakachi maa jnu'un vaji nuu Yandios, sa'a ja nuña ga inijnuni yo jiin jnu'un ya, ti sia'an vi'i ga ka ñukuu ini yo ichi Yandios. Ti suni jnu'un un ja'a jnu'un ndee ini nasa kaka yo nuu ichi ya ja kuu nuu ñuyivi ja'a. <sup>4</sup> Chaa ka'an inga yu'u, chi nini mani da yi'i jiin jnu'un Yandios. Ko chaa nakachi jnu'un ya, chi su'va chinddee da tendi'i yivi ka kandixia ja na kivi kaji ga jnu'un Yandios nuu inijnuni i. Ti sia'an vi'i ga kundio ndaa ini i ichi Yandios. <sup>5</sup> Ru'u Pablo, jajna'an ini ri ja tendi'i ra na ka'an siin siin yu'u, ko vi'i ga kuni ri ja na kundiyo ini ra ta'u ja nakachi ra jnu'un vaji nuu Yandios. Ko ña'nu ga kuu jniñu sa'a chaa nakachi jnu'un Yandios, ansu chaa ja ka'an inga yu'u ja ni maa da tu chaku ini. Chi nu tu kuu nakachi da jnu'un ka'an da un, tu ni jniñu ja chinddee da nuu yivi ka kandixia, ja na kaka ndaa i nuu ichi Yandios.

<sup>6</sup> Ja yukan ñani naa ra, nu na jaa ri nuu kanchuku ra naa ra, ti ka'an ri jiin siin yu'u ja tu chaku kuiti imi ra, ¿nusa ti nasa kuajniñu jnu'un un nu? Ko nu ka'an ri jnu'un jaa ja vaji nuu maa Yandios, xi xna'an ri nasa kuni ka'an jnu'un ndichi ya, xi ja nakachi ri sava'ni ga jnu'un vaji nuu maa ya, xi ja xna'an kaji ri jnu'un ya nuu ra naa ra, ti suu yukan kuu ja kuajniñu yo.

<sup>7</sup> Sa'a yo nuu iin yujinu yaa ja kuu xkili xi guitarra, vasu tu chaku, ko kuu jita siin siin ndusu. Nusa ti nu tu kua'a siin siin ndusu, ¿nasa kuni yo naa yaa tivi xkili un, ti naa yaa chaa guitarra un? <sup>8</sup> Suni sia'an kuu iin ndiki, chi nu tu tivi kaji kuiti, ti ni iin soldado tu satu'va da maa da ja ki'in da nuu guerra. <sup>9</sup> Suni sia'an ro'o naa ra, nu na ka'an ra siin yu'u ja tu chaku ini yivi, ¿ti nasa kujnuni ini i nuu jnu'un ka'an ra un? Ti nu so kuu tindi'i ka'an ka'an ra, ti nuu tachi ni kua'an un.

<sup>10</sup> Ti sia'an iyo kua'a yu'u ka ka'an yivi nuu ni tu'u ñuyivi, ti taka yivi ka ka'an siin yu'u un ka chaku va'a ini i nasa kuu maa jnu'un ka ka'an i. <sup>11</sup> Ko nu tu chaku ini ri yu'u ka'an iin chaa, ti kuu ri nanu chaa ñuu jika nuu chaa un, ti suni nanu chaa ñuu jika kuu maa da nuu ri. <sup>12</sup> Ja yukan, ro'o ja ka ndio ni ini ra ni'in ra ta'u ja ja'a Espíritu Santo, ko kanuu ga ja na kukutu ini ra chinddee jna'an ra, nava na kivi kaji ga inijnuni yivi maa jnu'un Yandios ja na kaka ndaa i nuu ichi ya.

<sup>13</sup> Nusa ti yivi ja ka'an inga yu'u ja ni maa i tu chaku ini, na kakanta'u i nuu Yandios ja na kuu nakachi i jnu'un ka'an i un. <sup>14</sup> Nu jikanta'u yo ti ka'an yo siin yu'u, ti añañ yo kuu ja jini ndoo ka'an yo, vasu inijnuni yo tu jini ndoo ka'an yo. Nu sia'an ti ni tu kuu kuiti xndaku yo jnu'un ya nuu ñanijna'an yo. <sup>15</sup> ¿Nasa sa'a yo nusa? Va'a ga na kakanta'u ni ini yo ni jiin inijnuni yo siki ja kujnuni ini yo nasa ka'an yo. Ti suni kuu kata yo yaaa ni ini añañ yo, ko ni jiin inijnuni yo, ko siki ja kujnuni ndaa ini yo ndoo jita yo. <sup>16</sup> Chi nu nakuatu ra mani jnu'un ja vaji nuu añañ ra, ti tu kujnuni ini ra ndoo ka'an ra, ti yivi tu chaku ini, tu kuu nakuatu i jiin ra, chi tu chaku kuiti ini i na jnu'un ka'an ra. <sup>17</sup> Ti vasu nakuatu ndaa kuiti maa ra, ko yivi tu kivi inijnuni naa jnu'un ka'an ra, ¿nasa kujnuni ini i ja kaka ndaa i nuu ichi ya, ti nu tu chaku ini i jnu'un ka'an ra nu?

<sup>18</sup> Ti ru'u Pablo, chi nakuanta'u ri nuu Yandios ja vi'ga na ka'an ri siin ga yu'u ja kuu taka ro'o naa ra. <sup>19</sup> Ko ja kuu nuu yivi ka kandixia na xndaku ri vasu ti u'un ni jnu'un, ko jnu'un ja na chaku ini i, ansu ja ka'an ri uxi mil jnu'un inga yu'u, ti tu chaku kuiti ini i.

<sup>20</sup> Ñani ja yukan koto kani ga ini ra nanu suchi lulu, chi su'va na kani va'a ini ra nanu yivi ña'nú. Ti ja kuu siki jniñu ndeva'a na koo ra nanu suchi lulu ja kuu ñaa xini i. <sup>21</sup> Sia'an yoso nuu tutu ley jana'an: "Ka'an ri jiin yivi ja'a siin yu'u, ti suni ka'an ri yu'u chaa ñuu jika jiin yi. Ko vasu sia'an ti ni tu chunso'o kuiti", kachi maa Jito'yo.

<sup>22</sup> Ja yukan nu ñava'a yo ta'u ja ka'an yo siin yu'u, ti iin jniñu ña'nú sa'a Yandios jiin yo ja kuu nuu yivi tu kandixia, ko ja nakachi yo jnu'un vaji nuu Yandios. Yukan kuu iin jniñu ña'nú sa'a Yandios jiin yo ja kuu nuu yivi ka kandixia, ti ansu nuu yivi tu kandixia. <sup>23</sup> Sa ti tendi'i ro'o ja ka kandixia ndututu ra, ti jakuncha ra ka'an ra siin siin yu'u, ti jaa iin yivi ja tu kivi ini nasa ka'an jnu'un un, xi jaa iin yivi tu kandixia, ti kachi i ja ni ka sana inijnuni ra naa ra. <sup>24</sup> Ko nu taka ra na nakachi jnu'un vaji nuu Yandios, ti kivi iin yivi tu kandixia, xi iin yivi ja tu chaku va'a ini, ti yivi un na kuni ndaa ini i ja yivi yuji kuu i, chi kivi ini jnuni i jnu'un ka ka'an ra. <sup>25</sup> Yukan ti na'nú ini da yivi un jin añañ i ja nakuni ndaa i nuu kuachi i. Yukan na ti jakunjiti i ti na kanajaa i Yandios, chi nakuni ndaa kuiti i ja kancha ndixia ya jiin ra naa ra.

### *Ja na kava yifñu'un yo jiin ja yukun na ka'an yo*

<sup>26</sup> Nusa ti nu ka ndututu ra naa ra ñani, ti taka ra na kata iin yaa ii. Yukan ti sava ra kuu xndaku iin jnu'un, xi ja nakachi ra jnu'un vaji nuu Yandios, xi ja ka'an ra siin yu'u, xi ja nakani ra nasa ka'an jnu'un un. Ti iyo va'a nusa, ko kanuu na chaku ini tendi'i ra naa ra nava na ni'in ga ra jnu'un ndee ini, ja kaka ndaa ra nuu ichi Yandios. <sup>27</sup> Ti nu iyo chaa ka'an inga yu'u ja tu chaku ini yo, ti uu xi uni ni da na ka'an, ko ndi iin ndi iin da na ka'an, ti na koo iin ja nakachi jnu'un ka ka'an da un. <sup>28</sup> Ti nu tu iyo chaa ja nakachi jnu'un un, va'a ga ja tu ka'an da nu ni ka ndutu ra naa ra, ti na ka'an maa ni da jiin ini da jiin Yandios.

<sup>29</sup> Suni sia'an na kuu jiin chaa nakachi jnu'un vaji nuu Yandios. Suni uu xi uni ni da na ka'an, ti sava ga ro'o naa ra, nakani ndaa ini nu iyo ndaa jnu'un ka'an da un. <sup>30</sup> Ko nu nuu inga chaa kancha un, na stuu Yandios iin jnu'un jaa nuu inijnuni da, ti jakuncha da ka'an da jnu'un un, ti va'a ga na kasí yu'u chaa ka'an un, nava na siin inga chaa un na ka'an da. <sup>31</sup> Yukan na ti kuu ka'an tendi'i ra naa ra, ko ndi iin ndi iin da na ka'an ja nakachi ra jnu'un vaji nuu Yandios, nava tendi'i ra na kutu've, ti na siin ni ini ga ra naa ra jiin jnu'un ndee ini. <sup>32</sup> Ti vasu iyo inijnuni ra ja nakachi ra jnu'un vaji nuu Yandios, ko tu sia ya ro'o ja iin jnu ni ka'an tendi'i ra naa ra, chi su'va ndi iin ndi iin da na

ka'an. <sup>33</sup> Sia'an na koo jiin ra naa ra, chi tu jajna'an ini Yandios ja kuvaan ra naa ra.

Ti nanu sa'a taka yivi kandixia, <sup>34</sup> ti suni sia'an na koo jiin ro'o ja kanchuku ñuu Corinto, nu ni ka ndututu ra naa ra, ti taka ñasi'i naa ña, na'in na kunchuku ña, chi tu va'a ja ka'an ña ni iin jnu'un. Na koo yiñu'un ña, ti na kuandatu ña nuu yiñu ña sia'an nanu ta'u ley Yandios jniñu. <sup>35</sup> Ti nu iyo iin jnu'un ja tu kujnuni ini ña, ti kuni kajnu'un ña nuu chitu un, va'a ga na najaa ña undi ve'e jiin yiñu ña, ti sa na kajnu'un ña, chi jnu'un kanuu kuu ja ndokuñi iin ñasi'i ti ka'an ña ma'ñu yivi ka ndututu ja ka chiñu'un i Yandios. <sup>36</sup> Ti nu ansu jandaa kuu jnu'un ka'an ri ja xndaku ri, nusa ti na kachi ri: ¿Va nu xnanan nuu maa ra naa ra ni kenda jnu'un Yandios nu? ¿Xi nini nuu mani ra naa ra ni jaa jnu'un ya nu? <sup>37</sup> Ti nu iin chaa yukan jani ini da ja kuu nakachi da jnu'un ja vajji nuu Yandios, xi ja jani ini da ja ñiava'a da ta'u ni ja'a Espíritu Santo, nusa ti na chu'un va'a ini da ja jnu'un ka'an ri ja'a kuu jniñu ta'u maa Jito'y, chi ndiso jniñu ri nuu ya, ansu so ka'an maa ri sia'an ni. <sup>38</sup> Ko nu tu janta'u da jnu'un ka'an ri ja'a, iyo va'a, ko suni maa da tu kuanta'u yo.

<sup>39</sup> Nusa ti, ñani, kundio ni ini ra ta'u ja'a Espíritu Santo ja nakachi ra jnu'un vajji nuu Yandios. Ti koto kasí ra nuu chaa ja ka'an siin siin yu'u. <sup>40</sup> Yukan ja nu ni ka ndututu ra naa ra ti na kava yukun ini ra, ti yiñu'un na sa'a ra taka nuu jniñu un.

### *Jnu'un ja ni nandoto Cristo Jesús*

## 15

<sup>1</sup> Ñani naa ra, ru'u Pablo, kuni ri ja na nuku'un ini ra maa jnu'un Yandios siki Cristo Jesús ja ni ka'an ri nuu ra naa ra, ti jnu'un ni ka janta'u ra un sa'a ja siin ka jika ndaa ra nuu ichi ya. <sup>2</sup> Ti suni jiin jnu'un un ni keta'u ra naa ra nu ni'in ka siin ra ja ka kandixia ndaa ra Cristo Jesús. Ti nu tuu, va so ni ka kandixia ka'a ra nusa. <sup>3</sup> Chi ni sa'a Yandios ja ni chaku ini ri taka jnu'un ya jiin taka jniñu ña'nú sa'a ya, ti yukan kuu jnu'un ja ni nakachi ri nuu ra naa ra undi nuu. Ti jnu'un un kuu ja ni ji'i Cristo Jesús ja siki kuachi yo, sia'an nava kachi nuu tutu ii Yandios undi na jana'an, <sup>4</sup> ja ni ka chunduji da ya, ko nuu uni kivi ti ni nandoto ya, sia'an nava kachi nuu tutu ii Yandios. <sup>5</sup> Ja ni ndenda ndijin ya nuu Pedro, ti sa ni ndenda ndijin ya nuu taka ga apóstol ya. <sup>6</sup> Ti sa ni ndenda ndijin ya nuu vi'i ga u'un ciento ñamijnan'ay yo ni ka ndututu da un. Ti sava i ka chaku ga vijnna, vasu sava ga i ja ni ka ji'i. <sup>7</sup> Ti sa kuee ga ni ndenda ndijin ya nuu Jacobo ja suni nani Santiago, ti kuee ga ni ndenda tuku ya nuu tendi'i apóstol ya. <sup>8</sup> Ti undi sandi'i ni ga ti ni ndenda ndijin ya nuu maa ri, ja kuu ri nanu suchi lulu ni kaku yucha. <sup>9</sup> Ti ni ansu chaa va'a kuiti ni kuu ri ja konani ri apóstol nuu ya. Su'va ni jito u'u xaan ri tendi'i yivi ka kandixia maa Jito'y Cristo Jesús. <sup>10</sup> Ko maa Yandios ni kunda'u xaan ini ya ja ni nakaji ya ru'u, ja na kuu ri apóstol nuu ya jiin jniñu ja'a, ti ja sia'an ni sa'a ya jiin ri. Ti tu ni nakaji ka'a ya ru'u ja sa'a ka'a ri jniñu, chi sa su'va vi'i ga ni jitu ndi'i ini ri jiin jniñu ja kuu taka ga apóstol ya, ti vasu iyo hora kuita ri jiin jniñu ja'a, ko kundee ri, chi maa ya kuu ja chindee chituu ru'u. <sup>11</sup> Ja yukan tu xndi'i ri ini ri jiin jniñu ni tatu ya, chi iin ni kuu jniñu ka sa'a ri jiin uu ga apóstol ya ja ka ka'an ri jnu'un Yandios siki Cristo Jesús, ti yukan kuu maa jnu'un ja ka kandixia ra.

### *Ja ka nandoto ndiyi*

<sup>12</sup> Nu jandaa kuu jnu'un ni ka ka'an ri nuu ra, ja nandoto Cristo nuu ñuji'i, ¿ti ndo ka ka'an sava ra ja tu ni nandoto ya nusa? <sup>13</sup> Chi nu tu nandoto ni iin

ndiyi un, ti va suni tu nandoto Cristo nuu ūji'i un nusa. <sup>14</sup> Ti nu tu ni nandoto Cristo nuu ūji'i un, ¿va tu ni jniñu kuiti jnu'un ka ka'an ri nusa? ¿Ti va suni tu iyo ni iin jnu'un ndaa ini ra naa ra ja ka kandixia ra nusa? <sup>15</sup> Nu sia'an kuu, ¿ti va ka kuu ri chaa xndoña'an ja kuu nuu Yandios nusa? Chi ni ka kachi ri ja ni naxndoto ya Cristo ma'ñu ndiyi. Ko nu tu nandoto ndixia ndiyi, ti va ndaa ja tu ni naxndoto kuiti ya Cristo nusa. <sup>16</sup> Chi nu jandaa kuu ja tu nandoto kuiti ndiyi, ti va suni tu ni nandoto Cristo nusa. <sup>17</sup> Chi nu tu ni nandoto kuiti Cristo, ti va tundo kuu kuiti jnu'un ka kandixia ra nusa. Ko nu sia'an kuu, ti na kachi ri ja ka siin ga ra jiin kuachi ra. <sup>18</sup> Nu sia'an ti suni taka chaa ni ka kandixia Cristo ja ja ni ka ji'i da, va ni ka naa da iin jinu ni nusa. <sup>19</sup> Ja yukan yo'o ja ka kandixia Cristo, ja ka chaku ga yo nuu ūyivi ja'a, ti kivi na kuū yo, va tukaa nandoto yo ma'ñu ndi'i nusa, ti na xaan ga kui'ya kendo yo ja kuu taka ga yivi nu sia'an. Chi ni ka kandixia yo jnu'un ja nandoto yo nuu ūji'i ko tu ni kuu, chi ni kuu yo yivi ni ka xndoña'an.

<sup>20</sup> Ko ansu sia'an kuu jnu'un un, chi jandaa ndixia ja ni naxndoto Yandios Cristo Jesús ma'ñu ndiyi, ti maa ya kuu undi nuu kuiti ja ni nandoto ansu taka ga ndiyi ja nandoto un. <sup>21</sup> Chi ja siki maa iin ni chaa ni nani Adán, ti ni kivi kue'e ja kuū yo. Ti suni sia'an ja siki maa iin ni chaa kuu Cristo Jesús, ti nandoto yo ma'ñu ndiyi. <sup>22</sup> Chi nanu tendi'i yo ni ka ji'i siki ja ka kuu yo jna'an Adán, ti suni sia'an tendi'i yo nandoto siki ja kandixia ni ini yo Cristo Jesús. <sup>23</sup> Ko ndi iin ndi iin yo nani vekoyo yo. Xnakan Cristo ni nandoto nuu ūji'i yukan na ti undi nchaa tuku ya, ti sa nandoto taka yivi ka yi'i jiin ya. <sup>24</sup> Yukan ti na jaa maa kivi sandi'i ni ga un ja xnaa Cristo taka jniñu jiin taka yivi ni ka nduña'nu siki ya, ti na kua'a ya jniñu un nuu maa Tata ya Yandios, maa jniñu ūja'a ya ni ta'u ya nuu ūyivi ja'a. <sup>25</sup> Ko tu ja'i jaa hora un, chi kanuu ja xnakan na ta'u Cristo jniñu nuu taka ja iyo, undi tukaa ga koo kuiti ni iin ja jito u'u nuu ya, chi ndi'i kuiti kundee ya jiin. <sup>26</sup> Ti ja jito u'u yo'o, yukan kuu maa kue'e ja kuū yo, ja kin xnaa ya undi sandi'i ni ga. <sup>27</sup> Ti siki yukan ka'an tutu ii Yandios ja ni sa'a ya ja ni kundee iin jinu ni Cristo Jesús jiin taka ja jito u'u nuu ya. Ko ja ka'an sia'an, yukan chaku ini yo ja suni junukuachi maa Jito'yo nuu Tata ya Yandios, chi maa Yandios kuu ya ni chi'i tendi'i kuiti jniñu un nuu nda'a Cristo Jesús. <sup>28</sup> Ko nu na ndi'i yukan kivi nuu nda'a maa Tata ya Yandios, Yaa xiin tendi'i kuiti ja iyo. Yukan kuu ja kuña'nu xaan ga maa Tata yo Yandios, chi yinda'a ya ndi vii kuiti ja iyo.

<sup>29</sup> Ti siki ja ka janducha yivi naa i ja nandoto ndiyi, nusa ti ¿ndoo ka ndo'o ini i ja ka sa'a i sia'an, ti nu tu ndaa ja nandoto ndiyi un nu? Ti ndo'o ini ri ja nu tu nandoto ndiyi un, ¿ndoo ka janducha i nusa?

<sup>30</sup> Ko ja kuu ru'u naa ri, nu tu ndaa ja nandoto ndiyi, va tu kondo'o ri taka kivi nava ka jna'an ri vijnal jiin jniñu ka sa'a ri. <sup>31</sup> Ru'u Pablo, ka'an ndaa ri ñani naa ra, ja ndi kivi ni ka nduku yivi ka'ni i ru'u ja siki jniñu ya. Ti vasu jito ri nundo'o, ko kusii xaan ini ri ja suni ka kandixia ra maa Jito'yo Cristo Jesús. <sup>32</sup> Ti siki jniñu ndiso ri nuu Yandios, kuu nanu ja ni ka kanaa ri jiin kuiti xaan nuu ūji'i Efeso ja'a. Ko nu tu ndaa ja nandoto ndiyi, va tundo ni'in kuiti ri ya'u ri nusa. Ti nu sia'an, ti va'a ga na sa'a ri nanu kachi iin jnu'un: "Na kusii ini yo ti na kaji na ko'o yo, chi sandau ijña ti kuū yo ti ndi'i kendo", kachi. <sup>33</sup> Ko tu kua'a ra jnu'un ja xnda'u yivi ro'o jiin jnu'un un, sia'an nava kachi inga jnu'un i: "Nu jika ra jiin yivi ndeva'a ti naa ini ra taka ja iyo va'a ti tukaa jika ndaa ra", kachi. <sup>34</sup> Nusa ti nachu'un ini naa ra ti koto kivi nduu kuiti ga ra jiin yivi kue'e un, nava tu kivi ra nuu kuachi, chi ma'ñu ra naa ra ka iyo yivi ja tu

jini kuiti i nau kuu maa Yandios. Sia'an ka'an ri nava na kukanuu ra naa ra ja ka iyo yivi kue'e un jiin ra.

### *Nasa nandoto ndiyi*

<sup>35</sup> Ko nu iin ra na kachi: “¿Nasa nandoto ndiyi nusa? ¿Ti nasa kaa yiki kuñu ndiyi un nu na ndenda nu?” <sup>36</sup> ¡Aa! Ko ndoo ka ndo'o ini ra sia'an, va nu tu chaku ini ra ja nava nandoto ndiyi un kuu nanu chi'i yo tata chii ñu'un, chi kaña yuku ko maa nuni un chi te'yú. <sup>37</sup> Ti tata ja kivi chii ñu'un un kuu nuni, xi triu xi inga nuu, ko ansu mani yuku kuu ja nde'e yo chi mani nuni kuu. <sup>38</sup> Ti kuee ga ti kaña yuku, ti keja'a kua'nú sava'a ni ga nasa kuni maa Yandios. <sup>39</sup> Ti suni sia'an kuu jiin taka yiki kuñu, chi ansu iin ni kanda. Siin kaa yiki kuñu yivi, ti siin kaa iin kuiti, suni siin kaa iin saa, ti siin kanda chaká un. <sup>40</sup> Suni sia'an kuu jiin taka ja iyo nuu andivi jiin taka ja iyo nuu ñuyivi. Chi siin ni sa'a vii ya ja iyo andivi, ti suni siin ni sa'a vii ya ja iyo ñuyivi. <sup>41</sup> Ti suni siin ndii ndikandii, ti siin ndii yoo. Ti siin ndinchaa chuxini un, chi siin siin ndii iin iin, sava'ní ga nasa kanda maa.

<sup>42</sup> Ti suni sia'an kuu nu na nandoto ndiyi. Tukaa ga koo i nava ni iyo i undi nuu. Yiki kuñu ja ni chunduji yo chii ñu'un ndi'i te'yú, ko kivi na nandoto ndiyi un, tukaa ga kaa sia'an. <sup>43</sup> Iin yiki kuñu ja chunduji yo, tukaa ga va'a kuiti kaa, ko kivi na naxndoto Yandios ndiyi un ti tukaa ga koo nava ni kaa undi nuu, chi su'va siin nduvii yivi un. Iin ndiyi ja chunduji yo chii ñu'un, tukaa ga ndoo kuu, ko kivi na nandoto, su'va ndu ndajnu ga yiki kuñu yivi un. <sup>44</sup> Iin ja chunduji yo chii ñu'un, nde'e ndaa kuiti yo ja iin yivi sia'an ni kuu, ko kivi na nandoto, tukaa ga koo sia'an, chi ndi'i nasama ya jiin iin yiki kuñu ja kunchaku nuu andivi. Chi iyo yiki kuñu yivi ñuyivi ja'a, ti suni iyo yiki kuñu yivi kunchuku nuu andivi.

<sup>45</sup> Chi sia'an yoso nuu tutu ii Yandios: “Ja kuu yivi naa i, xnakan ni sa'a Yandios iin chaa ja ni nani Adán, ti ni kunchaku da nuu ñuyivi ja'a”, kachi tutu. Ti sandi'i ni ga ti taji ya inga chaa ja kuu nanu Adán. Ni kee da andivi, ko ndiso da jniñu ña'nú ja naxndoto da yivi yi'i jiin Yandios ja na kunchuku i nuu andivi. <sup>46</sup> Vijnal chi kuu yo yivi kanchuku nuu ñuyivi ja'a jiin yiki kuñu yo, ko ijña xi isa, ti nduu yo yivi kunchuku nuu andivi, chi nasama yiki kuñu yo. <sup>47</sup> Ti Adán ni kuu da iin chaa yi'i jiin ñuyivi ja'a, chi jiin tikacha ñu'un ni sa'a Yandios maa da. Ko inga chaa kuu uu chi undi nuu andivi ni kii da, ti yukan kuu maa Jito'yo. <sup>48</sup> Yivi ñuyivi ja'a chi ka kuu i jna'an Adán ja ni kuu da jiin tikacha ñu'un. Ko yivi yi'i jiin Cristo, ja ni kii ya nuu andivi, nduu i nanu kuu maa ya. <sup>49</sup> Chi nanu ni ka ndaku yo nava kaa maa chaa ni kuu jiin tikacha ñu'un un, suni sia'an nduu yo nava kaa maa Cristo, ja ni kii undi nuu andivi.

<sup>50</sup> Nani naa ra, na kachi ri nuu ra, ja jiin yiki kuñu yo nava kanchuku yo nuu ñuyivi ja'a, tu kuu kivi yo ñuu nuu ta'u Yandios jniñu, chi ja naa kuu. Ja yukan tu kuchaku ja kuu saa ni. <sup>51</sup> Vijnal ti kunso'o va'a iin jnu'un na ka'an ri, iin jnu'un ja ni chisa'yí Yandios ja kuni stuu ya vijnal, ti kachi: “Tendi'i yo ja ka kandixia Cristo, ansu tendi'i yo kuñu, ko tendi'i yo nasama Yandios yiki kuñu yo”, kachi. <sup>52</sup> Chi kivi sandi'i ni ga na jaa kivi, ti tivi ndiki. Ti tu na'an kuiti kuu un, chi kuu nanu ja iin nakuani ni yo, ti ja ni nasama ni Yandios yo'o. Chi tivi ndiki, ti kivi un nandoto taka ndiyi ja tukaa ga kuñu i. Ti taka yo'o naa yo ja ka chaku, so nasama Yandios yiki kuñu yo. <sup>53</sup> Chi siki ja te'yú yiki kuñu yo, yukan kuu ja kanuu nasama ya yo'o nava tukaa ga te'yú kuiti yo. Chi siki ja ka jí'i yo jiin kue'e, ti kanuu ja na nasama ya yo'o nava tukaa ga kuñu kuiti yo. <sup>54</sup> Ti ja ka jí'i yo ti te'yú yiki kuñu yo nuu ñuyivi ja'a, ja siki yukan kii kivi ja nasama

ya yo'o naa yo nava tukaa ga kuū yo, ni tukaa ga te'yu yiki kuñu yo. Yukan na ti kundaa nava yoso jnu'un nuu tutu ii Yandios: "Ni kundee ndikuiti ya, ni xnaa ya kue'e ja ja'nii yo'o".<sup>55</sup> Ti vasu jandaa kuū ja kuu yo, ko tu naa yo, chi nandoto yo. Tukaa kundee kuiti kue'e un jiin yo, chi ja ni kundee Yandios ja xnaa ya kue'e un", kachi tutu.<sup>56</sup> Ti maa kuachi yo sa'a ja kundee kue'e un jiin yo ti ji'lí yo. Ko ley Yandios kachi nau kuu kuachi nusa. Ja yukan kankuachi ley un siki yo.<sup>57</sup> Ko na kuanta'u yo nuu Yandios, chi ni taji ya Jito'yo Cristo Jesúus ja ni sa'a ya jniñu ñia'nu ja'a yo ja ni nama ya yo'o, chi ni kundee ya siki kuachi jiin siki kue'e un. Ti tukaa ga naa yo, chi ni nandoto maa Jito'yo nuu ñuji'lí un. Ti jiin yukan suni ni ka kundee yo jiin kue'e un, chi suni nandoto yo.

<sup>58</sup> Ja yukan ñani ri naa ra, siki ja jandaa ndixia kuu ja nandoto yo, koto yuji ini ra jiin jniñu ka sa'a ra ja ka junukuachi ra nuu maa Jito'yo. Kukutu ini naa ra jiin jnu'un ya, ti niní na sa'a ra jniñu maa Jito'yo jiin ni ini ni aña ra. Chi ja jini ra ja tu ka sa'a ka'a ra jniñu un ja ka junukuachi ra nuu maa Jito'yo.

### *Ka kekoo da xu'un ja kuu yivi nda'u*

## 16

<sup>1</sup> Ti vijnna, ru'u Pablo, na kachi ri ñin jnu'un siki nasa kekoo ra xu'un ja kuu nuu ñanijna'an yo ja ka kandixia, ja ka kuu da chaa nda'u. Ti na sa'a ra nanu ni xndaku ri nuu taka yivi ka kandixia ndañuu Galacia. <sup>2</sup> Ti taka domingo na sava'a ndi ñin ndi ñin ra jaku xu'un, sava'a ni ga nasa ni ka ni'in ra, nava nu na jaa ri ti ja ka iyo tu'va ra, ansu jaa ri ti ka jinu ra ka nduku ra xu'un. <sup>3</sup> Nu na jaa ri ti nakaji ra chaa, chaa kunda'a tutu ri, ti taji ri da kinkoyo da nuu ñani yo kanchuku ñuu Jerusalén. Ti na nakua'a da xu'un ni ka kekoo ra naa ra un. <sup>4</sup> Ti nu kanuu ja ki'in ri jiin chaa kinkoyo un, ti ki'in ri jiin da.

### *Kanda'u Pablo jiin yivi ñuu Corinto*

<sup>5</sup> Ti nu kuaja ri nuu kanchuku ra, xnakan ya'a ri ichi ndañuu Macedonia, ti sa kuaja ri ñuu Corinto. <sup>6</sup> Ti na nde'e yo nu kuncha ri yukan jaku ni kivi, xi kuncha ri yukan ni viko ñuu jiin ra naa ra. Yukan ti kuu chindée ra ru'u ja chu'un ichi ra naa ra ru'u nuu ichi ki'in ri. <sup>7</sup> Ko tu jaa ri ja kuncha ri ñin nundaa ni jiin ra naa ra, chi ndo'o ini ri ja kuncha ri yukan ñin kani ti'lí, nu sia'an kuni maa Jito'yo. <sup>8</sup> Ko na kendo ri ñuu Efeso ja'a undi na jaa kivi Pentecostés, <sup>9</sup> chi iyo kua'a yivi ja'a ja ka kuni kunso'o i jnu'un Yandios, chi ka iyo kua'a yivi ka janta'u jnu'un Cristo Jesúus. Vasu suni iyo kua'a yivi ja kuni kasí ichi ri.

<sup>10</sup> Ko nu ni jaa Timoteo, ti tendi'i ra na kunchuku mari nava na kosíi ini da nuu kancha da yukan jiin ra naa ra, chi suni junukuachi da nuu jniñu maa Jito'yo nanu junukuachi maa ri suni. <sup>11</sup> Ti ni ñin ra koto saja'a ini nuu da. Su'va na chindée ra da ja na chu'un ichi ra da nu vendi da, nava na ni'in da jnundee ini jiin ra naa ra ja ni ini ka kandixia ra. Ti na kukuee ndiji da nuu ichi, chi kundatu ri da ja'a jiin uu ga ñani yo ja ka kandixia.

<sup>12</sup> Ti sikí ñani yo Apolos, xaan ga nda'u ni kuu ri jiin da, chi tu ni kuu ja jaa da jiin uu ga ñani yo un, ja na jande'e da ro'o naa ra. Va'a ni ndo'o ini da, ko tu ni kuu ja jaa da vijnna. Ko nu na nuña da ti'lí, ti kuaja da.

<sup>13</sup> Ko na kachi ri nuu ra naa ra ja na kondito ra, ti koto yuji ra ja na kaka yata ra ichi Yandios. Na kuñukuu ni ini ra ja siin ra jiin jnu'un va'a Jito'yo Cristo Jesúus. Na kukutu ini ra jiin jnu'un Yandios nava na kuixia inijnuni ra jiin jnu'un ya. <sup>14</sup> Ti taka ja sa'a ra, na kuu mani jniñu va'a. Na kuu jiin jnu'un kunda'u ini nuu ñanijna'an yo, ti suni nuu taka ga yivi.

**15** Ñani, ka jini va'a ra ja xnakan yivi ve'e Estéfanas ni ka kandixia i nuu ichi Yandios, ja kanchuku i ndañuu Acaya. Ti ni ka nakua'a i maa i nuu jniñu ja ka chindee i taka ga yivi ka kandixia. **16** Ti kanda'u ri jiin ra ñani, ja na kua'a ra ja yiñu'un nuu yivi ka sa'a sia'an, ja ka junukuachi i nuu yivi ka kandixia. Ti suni sia'an na sa'a ra naa ra nanu vii ka chindee jna'an yivi un.

**17** Ti kusii ini ri ja ni chaa Estéfanas jiin Fortunato jiin Acaico, chi maa da ni ka ja'a jnundee ini nuu ri jiin jnu'un da sik'i ja jika xaan kanchuku ra. **18** Ni ka ja'a da jnundee ini añu ri, sia'an nanu ni ka sa'a da jiin maa ra naa ra. Ti yivi sia'an, kanuu ja na kuajnu'un ra da, chi iyo va'a jniñu sa'a da.

### *Sandi'i ni ga jnu'un sandee ini*

**19** Na sandee xaan ini ra naa ra, kachi taka ñanijna'an yo ka kandixia ja kanchuku i ndañuu Asia. Aquila jiin Priscila jiin taka yivi ka ndututu ini ve'e da, ka kanxia'u i ja na sandee xaan ini tendi'i ra jiin sivi maa Jito'yo. **20** Suni sia'an kachi taka ñani yo ja na sandee ini ra, ti na nanuu jna'an naa ra jiin jnu'un xia'u ri.

**21** Ti ru'u Pablo, chaa ri jnu'un ja'a jiin letra nda'a ri ja na sandee ini ra naa ra.

**22** Ti nu iyo yivi ja tu janta'u maa Jito'yo Cristo Jesús, na jna'nu ndatu i ti na naa i nusa. Ti na kachi yo: jJito'yo, ña'an ni vijna!

**23** Ñukuu ini ri ja maa Jito'yo Jesús, na kunda'u ini ya ro'o naa ra, ti na chindee ya nuu ra nava sia'an na koo.

**24** Sandi'i ni ga jnu'un ja'a na kachi ri. Ro'o ja ka kandixia Cristo Jesús ñuu Corinto, kunda'u ini ri nuu taka ra naa ra. Sia'an na koo.

## Carta kuu uu ja ni chaa Pablo nuu yivi ñuu Corinto

*Chaa Pablo tutu nuu yivi ka kandixia ñuu Corinto*

**1** Ru'u Pablo jiin Timoteo, ja kuu da ñani yo ja ka kandixia yo Jesús, ka kanxia'u ri nuu taka ra ja kanchuku ñuu Corinto. Kuu ri apóstol Jesús, ti Jesús kuu Cristo ja ndiso ya jniñu ña'nu nuu Yandios, ti maa Jesús ni ja'a ya jniñu un nuu ri ja na kuu ri apóstol nuu ya. Ti chaa ri tutu ja'a nuu taka ra ja ka kandixia Jesús, ja ka ndututu ra ñuu Corinto. Chaa ri tutu ja'a nuu ra naa ra ja ni ka kusiñn ra nuu ichi ndeva'a, ti ni ka ndiví ra nuu ichi Yandios jiin nuu tendi'i yivi ka kandixia ja kanchuku ni ka'nú ndañuu Acaya. **2** Ti ñukuu ini ri ja Tata yo Yandios jiin Jito'yo Cristo Jesús na kunda'u ini ya, ti na chindee ga ya ro'o naa ra.

### *Nundo'o ni jna'an Pablo*

**3** Na ka'an yo ja kuña'nú xaan Yandios, Yaa kuu Tata maa Jito'yo Cristo Jesús. Chi maa ya kuu Tata yo ja kunda'u ini ya yo'o, ti nini ja'a ya jnundee ini nuu yo ja na kosíi ini yo'o. **4** Maa ya kuu ja ja'a jnundee ini siki taka nundo'o jna'an ri, ti suni kua'a ri jnundee ini nuu ñani jna'an ri ja suni ka ndo'o i nundo'o. Chi nanu ni sa'a ya ja ni ni'in ri jnundee ini, suni siukan na sa'a ri ja na ni'in ra jnundee ini naa ra. **5** Ti vasu kua'a nundo'o jito ri siki ja ni kandixia ri Cristo, chi ja yi'i ri jiin Cristo kuu ja nini ja'a Yandios jnundee ini nuu ri. **6** Ja yukan, nu taka ri ka jito nundo'o, nusa ti chaku va'a ini ri nasa kuu ja ka ndo'o tu ro'o naa ra, nava kuu kua'a ri jnundee ini nuu ra. Chi ni jito ri nundo'o na ni ka'an ri jnu'un va'a Jesús, nava na keta'u ra nuu Yandios ja kuu taka kivi. Ti taka jinu ja'a ya jnundee ini ru'u, yukan chaku va'a ini ri nasa kuu kua'a ri jnundee ini ro'o naa ra. Ja yukan tu xndi'i ini ra, chi kundee ini ra nasa kaka ndaa ra nuu ichi Yandios, vasu na kondo'o ra nundo'o nanu ka ndo'o maa ri naa ri. **7** Ti ñukuu xaan ini ri ja kuu taka ra, chi jini ri ja nu taka ra ka ndo'o nundo'o jiin ri, suni sia'an na kua'a Yandios jnundee ini ro'o naa ra.

**8** Ñani naa ra, ja kanchuku ñuu Corinto un, kuni ri naa ri ja taka ra na kuni nasa ni ka ndo'o ri naa ri ichi ndañuu Asia. Chi ni ka jito ri nundo'o xaan, ja ni ka ndo'o ini ri ja tukaa kundee ri naa ri niku. Ni ka jani ini ri ja kuú ri. Tukaa ni ndo'o ini ri ja kuchaku ri. **9** Ti ja ni ka ja'ncha ini ri ja kuú ri. Ko yukan ni sa'a ja na jnuu ini ri nasa kundee ri jiin nundo'o un ja kuñkuu ini ri maa Yandios. Sa tu ni xndi'i ini ri jiin nundo'o un, chi ni chaku ndaa ini ri ja maa Yandios kuu ya kua'a jnundee ini ja na kundee ri jiin nundo'o un, chi maa iin ni Yandios kuu ya ja'a jnundee ini, ti maa iin ni ya kuu ja ndiso jniñu ña'nu ja kuu naxndoto ya ndiyi. **10** Yukan kuu ja mani maa ya ni nama ru'u nuu nundo'o xaan un ja ja yajni kuú ri niku, ti siin nama ya ru'u vijna. Chi ñukuu ini ri ja suni sia'an kin nama ya ru'u sikí nundo'o kii ga ichi nuu ri. **11** Ti nu taka ra na chindee ru'u ja kakanta'u ra ja'a ri, chi nu kua'a xaan yivi na kakanta'u i ja'a ri, suni kua'a i nakuanta'u ja'a ri ja ni kunda'u ini Yandios ru'u naa ri, ti ni nama ya ru'u nuu taka nundo'o un.

### *Ni kukuee tu ni ja'an Pablo ñuu Corinto*

**12** Iyo iin jnu'un ja sa'a ja kusiñi ini ri. Chi jini injnuni ri ja va'a ii ni ka jika ri nuu yivi ñuyivi ja'a, ti vil'i ga ni ka jini ndijin taka maa ra naa ra. Ti sia'an

kuu chi kunda'u ini ya ru'u ja ni chindee ya maa ri. Ti ja'a tu ni kuu ja ndichi xaan xini maa ri ja sia'an ni jika ri. <sup>13</sup> Ti jnu'un chaa ri nuu taka tutu ri ja kuu ra naa ra, chi mani jnu'un ja kuu ka'u ra kuu ja na chaku ini ra. Ti ñukuu ini ri ja chaku va'a ga ini ra nasa ka'an tutu ri, <sup>14</sup> vasu sa jaku ni ka chaku ini ra vijnna. Ti jiin yukan kuu kusii ini ra naa ra siki ru'u naa ri kiv'i na kii tuku Jito'yo Jesú, nanu na kusii ini ri siki taka maa ra naa ra. <sup>15</sup> Ti ja siki yukan ñukuu xaan ini ri ja jaa ri nuu kanchuku ra naa ra, ja ki'in ri, ti nchaa ri uu jinu, nava na kusii ini ra ja jikonuu ri nde'e ri nuu kanchuku ra. <sup>16</sup> Ni ndio ini ri ja ya'a ri nuu kanchuku ra xnakan nuu ichi ki'in ri ñuu Macedonia, ti nandeokuñi tuku ri nuu ra naa ra, nava yukan ti kuu chindee ra ru'u naa ra ja ki'in ri ichi ñuu Judea niku. <sup>17</sup> Ko siukan ni jani ini ri, ja jaa ri nuu kanchuku ra, ti tu ni kuu. Xi ndo'o ini ra ja sa'a ri nanu sa'a yivi uu xini, ja tu jini kuiti i jnu'un Yandios, chi yivi un ka'an i jiin uu inijnuni. <sup>18</sup> Ko tu ni ka'an ri jiin ra siukan, chi maa Yandios ja nini siuku ndaa kuiti ya jnu'un ya, na kua'a ya jandaa ja nini ka'an ndaa ri jiin ra naa ra. <sup>19</sup> Siukan kuu chi ka jini va'a ra siki jnu'un ni jani ri nuu ra, ja mani jnu'un ndaa kuu ja ni ka jani ri jiin Silvano jiin Timoteo, na ni ka jani ri jnu'un va'a Cristo Jesú, Se'e Yandios. Ti jnu'un ja ni ka jani ri siki Cristo Jesú ka'an ja undi vijnna tu na tu'u ini ya, chi nini siuku ya jiin jnu'un ya. <sup>20</sup> Chi maa Cristo Jesú kuu ja ni siuku ndaa kuiti taka jnu'un ni chiso Yandios. Ja yukan ka'an yo ja vii kuña'nii ii Yandios, ti kachi yo sia'an na koo, chi maa Cristo Jesú ni siuku ndaa kuiti taka jnu'un ni chiso Yandios. <sup>21</sup> Ti maa Yandios kuu ja sa'a ja maa ra jiin ru'u ka kandixia ndaa kuiti yo Cristo, ti maa iin ni jnu'un ya kuu ja ni sasiin yo'o ja na siuku yo nuu maa iin ni Cristo, ja ni taji Yandios ja sa'a ya jniñu ña'nii. Ti maa Yandios kuu ja ni sasiin yo'o ja na sa'a yo maa iin ni jniñu ja kuni ya. <sup>22</sup> Sia'an sa'a Yandios, chi ni ja'a ya Espíritu ya ja kuncha jiin yo, ti jiin yukan ja'a ya jandaa nuu inijnuni yo ja kuu yo se'e ya, jiin ja na siuku ndaa kuiti yo taka jnu'un ni chiso ya nuu yo.

<sup>23</sup> Ti ka'an ri ja maa Yandios jini va'a taka ja iyo inijnuni ri, ti kuu kua'a ya jandaa siki jnu'un ka'an ri ja jandaa kuu ja changa ga kee ri nuu kanchuku taka yivi ñuu Corinto, chi tu ni kuu ini ri ja nduxaan ri nuu ra naa ra ja tu siuku va'a ra. Ti maa Yandios kuu ja jini va'a ja ka'an ndaa ri. <sup>24</sup> Ko tu kuni nduxaan ri jiin ra siki jnu'un ka kandixia ra, chi ka kandixia ndaa ra jnu'un Yandios. So mani ñu'un ini ri ja na kusii ga ini ra naa ra ja kaka ra nuu ichi ya.

## 2

<sup>1</sup> Ja yukan ni ndo'o ini ri ja tu jaa ri inga jinu nuu kanchuku ra jiin jnu'un nduxaan, chi sandau kukui'ya ini ra naa ra. <sup>2</sup> Ko nu nduxaan ri jiin ra naa ra, koto kukui'ya ini ra, chi sia'an kuu ja na nakani ini ra. Ti jiin yukan na kusii ini maa ri suni. <sup>3</sup> Yukan kuu ja ni chaa tuku ri tutu ja'a nuu ra, nava nu na chaa ri ti ja ni nakani ini ra nuu kuachi ni sa'a ra, nava tu kukui'ya ini ri jiin ra ja ka sa'a ra kuachi kivi chaa ri nuu kanchuku ra. Chi su'va na sa'a ra naa ra ja na kusii ini ri. Ti kuni va'a ra ja nu kusii ini ri, ti suni tendi'i ra na kusii ini. <sup>4</sup> Ti na ni chaa ri tutu un, ni nakani xaan ini ri siki ra, ti ni na'nii ini ri ro'o naa ra, ja undi ni nde'e xaan ri kivi ni chaa ri tutu un. Ko tu ni chaa ri ja na kukui'ya ini ra naa ra, chi su'va ja na kuni ra ja kunda'u ndixia ini ri ro'o naa ra.

### Ni saka'nu ini Pablo nuu chaa ni sa'a kuachi

<sup>5</sup> Ti ja ni ndukui'ya ini ri ni sa'a chaa ja ni sa'a jniñu kue'e un, ti ansu nini mani ri, chi suni taka maa ra naa ra ni ka ndukui'ya ini siki jniñu ni sa'a da.

Ti ka'an ri ja jaku ni si'a da, chi tu ni kuni ri ja nduxaan ga ri. <sup>6</sup> Chi jiin ja ni ka nduxaan ra nuu da na ni ka ndututu tendi'i ra un, jiin yukan ti ni kuu ni. <sup>7</sup> Ti vijnal kuni ri ja na saka'nun ini ra naa ra nuu da, nava na ndusii ini da, chi sandi'i ini da jiin jnu'un kui'ya ini un, ti tukaa ndusii ini da. <sup>8</sup> Nusa ti ka'an nda'u ri jiin taka ra ja na ndumanri ja jiin da. <sup>9</sup> Chi ja siki yukan ni chaa ri tutu un nuu ra, ja na kujnuni ini ri ndeo nu kuanta'u va'a ra jniñu ni ta'u ri xi tuu. <sup>10</sup> Ti ni ka siuku ndixia ra jiin jniñu un. Chi ni nakani ini da nuu kuachi da. Ti vijnal kanuu ja na saka'nun ini ra nuu da. Ti nu siukan na sa'a ra, ti ru'u, suni saka'nun ini ri nuu da. <sup>11</sup> Ti kanuu ja iyo jnu'un ka'nun ini yo, chi tu kuni yo ja ni'in ja'u'u un kuachi siki yo, chi ja ka jini va'a yo nasa nduku ndee ja'u'u un ja na sa'a yo kuachi.

### *So ni kaña ini Pablo na ni ja'an da ñuu Troas*

<sup>12</sup> Na ni ja'an ri ñuu Troas ja na ka'an ri jnu'un Jito'yo Cristo Jesú, ti va'a ni chindee ya ja ni iyo nuu ja ka'an ri jnu'un ya. <sup>13</sup> Ko tu ni kusii ini añu ri, chi tu ni nani'in jna'an ri jiin ñani yo Tito. Yukan ni nakuanta'u ri nuu yivi un, ti ni ki'in ri ichi kuano'on ri ichi ñuu Macedonia.

### *Juin Cristo ti kundee yo siki taka nundo'o*

<sup>14</sup> Ti na kuta'u ri nuu Yandios, chi nini sa'a ya ja kundee ri jiin taka jniñu ja ta'u ya nuu ri. Ti jandaa ndixia kuu ja ka kundee ri, chi ka yi'i ri jiin se'e ya Cristo Jesú. Ti jajiniñu ya ru'u ja kachanuu ri jnu'un Cristo nuu taka ni ñuu, nanu jichanuu iin xiko asun. <sup>15</sup> Ti nanu ja ja'an yo iin xiko asun, chi suni sia'an kusii ini Yandios jiin jniñu ja jachanuu yo jnu'un ya, ti jaa jnu'un un nuu yivi vita ini ja keta'u i, jiin nuu yivi ndava ini ja naa i. <sup>16</sup> Tin yivi un, vasu ka jiniso'o i jnu'un Cristo, ko naa ini i. Ti nuu yivi un kuu ri nanu iin xiko xaan ja kuu i sa'a. Ti nuu inga yivi ja jiniso'o va'a jnu'un un, kuu ri iin xiko asun, chi ni nani'in i ta'u i ja kuchaku i ja kuu saa ni. Ti ni iin yo tu kundee yo sa'a yo jniñu ja kachanuu yo jnu'un Cristo nu tu chindee ya yo'o. <sup>17</sup> Ti ru'u, chi tu sa'a ri nanu ka sa'a tijni chaa ja nduku da ni'in da xu'un siki jnu'un Yandios. Chi su'va xndaku ndaa ri jnu'un Yandios siki Cristo, chi maa Yandios ni tatu ru'u ja na xndaku nakani ndaa ri jnu'un un siki ja yi'i ri jiin Cristo, ti nuu mani maa ya junukuachi ri.

### *Jnu'un siki tratu jaa*

## 3

<sup>1</sup> Ti ja ka'an ri sia'an, ansu mani ka'an ri ja chaa va'a ga kuu ri, vasu iyo chaa ka kankuachi sia'an siki ri. Chi iyo sava chaa ka jikonuu ja xna'an da tutu ja kachí nau chaa kuu da jiin na jniñu sa'a da, ti jikan tuku da inga tutu sia'an ja ki'in da ichi inga ñuu. <sup>2</sup> Nusa ti iyo ja suni sia'an xna'an ri iin tutu ri nuu ra naa ra nava na kuanta'u ra ru'u nu? <sup>2</sup> Tuu, chi taka maa ra naa ra ka kuu nanu iin tutu ja xna'an ndaa nau ja kuu ri. Ti suu kuu nava ñu'un ini ri ja sia'an ka kuu ra, chi ka kandixia ndaa ra jnu'un Yandios siki Cristo ja ni xndaku ri nuu ra naa ra. Ti sava'nii ga yivi kuni va'a i ja siukan ni janta'u ra jnu'un ya. <sup>3</sup> Ti siukan ka stuu ra naa ra ja maa Cristo ni sa'a ja ni ka nakani ini ra, ti yukan xna'an ndijin nuu yivi nanu nuu ka'u i iin tutu yoso va'a. Yukan kuu ja ni siuku ri jniñu ni tatu Cristo nuu ri ja ni xndaku ri jnu'un ya nuu ra naa ra. Ti vijnal ka kuu ra nanu iin tutu ja yoso jiin Espíritu Yandios, Yaa chaku, ansu ka kuu ra iin tutu ja yoso jiin tinta nuu iin tutu. Chi ka jini ndijin yivi naa i nasa ka jandatu ra nuu jnu'un Cristo ja ni xna'an ri nuu ra naa ra. Ja yukan nu nde'e i nuu ra, tu jini i iin tutu ja yoso nuu iin tabla yuu nanu ni chaa maa Yandios, na ni ja'a ya ley ya nuu Moisés. Chi su'va nakuni va'a yivi

un nasa ni nasama ra siki ja ni ka kandixia va'a ra jnu'un Cristo Jesús, nanu ja ni chaa ya iin tutu ini anu ra.

<sup>4</sup> Ti ka'an ndaa, ri chi jini va'a ri ja maa Cristo ni tatu ya ru'u jiin maa jniñu ja ni nakaji Yandios. <sup>5</sup> Ti ansu jani ini ri ja iyo tu'va ri ja kuu kundiso ri jniñu un. Chi maa iin ni Yandios sa'a ja kuu siuku ri jiin jniñu un. <sup>6</sup> Chi Yandios kuu ja ni nakaji ru'u ja na kachi ri siki iin tratu jaa ja ni satu'va maa ya. Ti tratu jaa un, tu ka'an ja na siuku yo ley ja ni chaa jiin letra, chi ja na kaka ndaa yo nava kuni maa Espíritu Santo ja yinda'a yo'o. Chi jnu'un ley ja yoso jiin letra, ja ni ja'a Yandios nuu Moisés, kankuachi siki yo ja na jna'nu ndatu yo jiin kuachi yo, ti na kuu yo. Ko Espíritu Santo sa'a ja na chaku va'a ga inijnuni yo maa jnu'un ja ka'an tratu jaa, ja ni ja'a ya nuu yo nava na kuchaku yo ja kuu taka saa ni.

<sup>7</sup> Chi na ni ja'a Yandios ley nuu Moisés na jana'an, ni yoso letra un nuu iin tabla yuu. Ti ni sa'a ya ja ni ndinchaa nuu kande Moisés ja nanu janducha ii ni ga nuu da. Ti yukan tukaa ni kuu nde'e va'a yivi Israel nuu da. Yukan ti kuee ni kuee ni ti ni nda'va ja ndinchaa un nuu da. Ti nu siukan, ña'nu xaan kuu ley un na ni chaa ja kankuachi siki yivi ja jna'nu ndatu i siki kuachi i nava na kuū i. <sup>8</sup> Ti vi'i ga kuña'nu xaan jnu'un ja'a Espíritu Santo ja na kuchaku yo saa ni nava iyo tratu jaa un. <sup>9</sup> Chi nu ña'nu xaan ni kii ley yukan, ja ka'an ja jna'nu ndatu yivi siki kuachi i, nusa ti vi'i ga ni kuña'nu xaan jnu'un ja ka'an Yandios siki tratu jaa un ja tukaa jna'nu ndatu yivi jiin kuachi i. <sup>10</sup> Chi ley ja ni kuña'nu xaan ga undi na saa, vijna tukaa ga kuña'nu kuiti siki ja ja ni ja'a Yandios inga tratu jaa ja iyo vijna. <sup>11</sup> Ti nu siukan ni kuña'nu ley ja ni kii jaku ni kivi, ko jnu'un ka'an siki tratu jaa un kuña'nu xaan ga chi koo ja kuu ni kani.

<sup>12</sup> Jandaad ndixia kuu ja ja ni ni'in yo tratu jaa ja ni chisojnu'un Yandios. Ja yukan iyo ni'in ini ri ja na xndaku ri nava ka'an tratu jaa un. <sup>13</sup> Ko Moisés, tu ni sa'a da sia'an, chi ni jasi da sa'ma nuu da nava tu kuu nde'e yivi Israel nuu da nasa kuan nda'va ja ndinchaa un. <sup>14</sup> Ti yivi un ni nduni'in ini i siki jnu'un ley Yandios ja ni ja'a ya nuu Moisés. Ti undi vijna nu ka ka'u i tutu siki tratu ley jana'an, suni tu ka chaku inijnuni i nasa kuni ka'an jnu'un un, chi sa'a yo nanu ja jasi sa'ma un nuu inijnuni i, ti tu ka chaku kuiti ini i. Ti undi na kandixia i Cristo, sa na chaku ini i jnu'un ley jana'an un. <sup>15</sup> Ti suni siukan kuu undi vijna, chi nu ka'u i tutu ley ni ja'a Yandios nuu Moisés, ti nanu ja jasi iin sa'ma nuu inijnuni i, chi tu ka chaku ini i. <sup>16</sup> Ko nu na nakani ini i ti kandixia i Jito'yo Cristo Jesús, yukan ti kuxio ja jasi nduchi i un, ti sa chaku ini i. <sup>17</sup> Jandaad ndixia kuu yukan, chi Jito'yo kuu maa Espíritu, ti tako ñuu nuu sa'a jniñu Espíritu maa Jito'yo, yukan kuxio yivi nuu kuachi i ja tukaa jna'nu ndatu i jiin. <sup>18</sup> Ja yukan kuu ja tako yo'o ja ni ka kandixia Cristo Jesús, tukaa ndi'yu inijnuni yo. Chi ka kuu yo nanu iin espejo ja ndinchaa ti na xna'an nasa kaa yo, ti jiin yukan ka xna'an yo nasa vii xaan kuña'nu maa Jito'yo ja ka jika ndaa yo nuu ñuyivi ja'a. Ti maa Espíritu sa'a ja vi'i ga kuan nasama yo, ti kuan nduu yo nanu kaa maa Jito'yo Cristo Jesús ja kuña'nu xaan ya. Ti tako kivi ndakuni'in yo Jito'yo ja ka jika ndaa yo nanu kuni maa ya, chi maa ya kuu Espíritu ja sa'a ja sia'an na kaka yo.

## 4

<sup>1</sup> Ja yukan kuu ja tu xndi'i kuiti ini ri ja ka'an ri jnu'un Yandios siki Cristo Jesús. Chi ni kunda'u ini Yandios ja ni nakaji ya ru'u ja na kundiso ri jniñu ja'a. <sup>2</sup> Ti siki jniñu ni ja'a Yandios nuu ri, tu jajna'an ini ri jniñu yisa'y'i ja sa'a ja kukanuu yo, ni tu jikonuu ri jiin jnu'un ndichi ja xndoña'an ri, ti ni tu sama

ri jnu'un Yandios. Chi ka jini ra ja mani jnu'un ndaa ka'an ri. Siukan ti taka yivi ka jini inijnuni i ja mani jnu'un ndaa kuiti ka'an ri. Ti undi maa Yandios jini va'a ya siki jnu'un ka'an ri. <sup>3</sup> Ti nu iyo yivi ka jasi inijnuni i ja tu chaku ini l jnu'un va'a siki Cristo ja ka'an ri, ti yukan kuu mani yivi ja jna'nunu ndatu jiin kuachi, ti siuku i undi kivi na naa i. <sup>4</sup> Vanuxia tu ka kandixia i ti maa ja'u'u un xna'an ja maa kuu Yandios ja ta'u jniñu nuu ñuyivi ja'a, ti maa jasi inijnuni yivi ja tu kandixia i Cristo, nava tu kuni ndijin i nasa kuni ka'an maa jnu'un Yandios ja kuu Cristo Jesùs, ti tu kuni i ja vii xaan kuña'nun jniñu ni sa'a ya ja'a yo, ja iin ni kuu ya jiin Yandios. <sup>5</sup> Ti ja ka'an ri jnu'un un, ansu jnu'un maa ri ka'an ri, chi jnu'un Jito'yo Cristo Jesùs ka'an ri. Ti yukan junukuachi ri nanu muzu nuu taka yivi ka kandixia Jesùs. Sia'an junukuachi ri nuu Jesùs, chi maa ya kuu ja ni tatu jniñu un nuu ri ja na ka'an ri jnu'un ya nuu ra. <sup>6</sup> Chi na ni sa'a ya Yandios ñuyivi ni ka'an ya ja na ndinchaa nuu ñuñaa un. Ti suni siukan ni sa'a ya nuu yo nanu ja ni xndinchaa ya iin nduva nuu yo ja kancha yo nuu ñuñaa xaan un. Chi ni sa'a ya ja na chaku inijnuni yo ja vii xaan kuña'nun Yandios. Ti maa Yandios ni sa'a ja chaku ini ri taka jniñu ña'nun ni sa'a Jesùs.

### *Na kuncha yo jiin maa jnu'un ja kandixia yo*

<sup>7</sup> Ti taka jnu'un ka'an ri ja vii xaan kuña'nun, kuu nanu ja ñu'un ini iin kisi ñu'un, ti kuu ri nanu kisi ñu'un un, chi tu na jun'un ndee ini ri iyo ja siuku ri jniñu ni tatu Yandios nuu ri. Ti yukan jini va'a ri ja maa Yandios kuu ja chindree ru'u, nava na sa'a ri sava'ni ga jniñu ña'nun kuni ya, ja sa'a ri taka nuu ja ka'an ri jnu'un Cristo. Ti maa ya sa'a ja na siuku ri jiin jniñu un, chi ansu ndee ini maa ri kuu. <sup>8</sup> Ti siki jniñu ni tatu ya nuu ri, ti taka nuu jna'an ri nundo'o. Ti vasu sia'an, ko tu ndi'yu ichi ki'in ri ja siuku ri jiin jniñu ri. Ti vasu kukui'ya ini ri jiin nundo'o, ko tu ndi'i kuiti ini ri, chi ñukuu ini ri ja kee va'a jniñu sa'a ri. <sup>9</sup> Ti vasu ka jito u'u yivi ru'u, ko maa Yandios tu xndoo kuiti ya ru'u. Ti vasu ka nduku i ja xnaa i ru'u jiin jniñu sa'a ri, ko tu ka kundee i ja sa'a i. <sup>10</sup> Ti sava'ni ga nuu na ichi na ki'in ri, ti ñukuu ini ri nanu ni ndo'o Jesùs ja ni ji'i ya. Suni siukan ndio ini ri ja kondo'o ri ti na kuñu ri, nava na xna'an kaji ri ja chaku Jesùs, ti ndio ini ri ja na naxndoto Yandios ru'u nuu taka nundo'o un. <sup>11</sup> Chi ni kuncha ri nuu ñuyivi ja'a, ti taka kivi ñukuu ini ri ja ka'ni yivi ru'u siki ja ka'an ri jnu'un Jesùs. Ko siukan ti sa na kuni yivi ja chaku Jesùs, chi maa ya kuu ja kua'a jun'un ndee ini ru'u ja na siuku ri jiin jniñu ni ja'a ya nuu ri nu kancha ri ñuyivi ja'a. <sup>12</sup> Nusa ti ru'u, nini kuu ja na kuu ri siki ja ka'an ri jnu'un Cristo. Ti yukan kuu ja ka ni'in ra jnu'un va'a un, nava na kandixia ra ti kuchaku ra ja kuu saa ni.

<sup>13</sup> Chi yoso nuu tutu ii Yandios: "Ni kandixia ri, ti ja yukan ni ka'an ri", kachi. Ti saa ni ru'u, suni ni kandixia ndaa ri jnu'un Yandios, ti yukan kuu ja siin ri ka'an ri jnu'un Jesùs. <sup>14</sup> Siukan siin ri vasu na kuu ri, chi jini va'a ri ja maa Yandios ni naxndoto ya Jito'yo Jesùs, ti suni siukan naxndoto tuku ya taka ro'o, ti sa'a ya ja iin jinu ni ndututu tendi'i yo nuu ya. <sup>15</sup> Ti taka nundo'o ja'a ndo'o ri nava na ni'in ra jnu'un va'a Yandios siki Jesùs. Ti siki jnu'un va'a un, ka'an ja kunda'u ini Yandios nuu yivi, ti na jaa jnu'un va'a un nuu kua'a xaan ga yivi taka ñuu, nava kua'a xaan yivi na nakuanta'u i nuu Yandios ja siukan sa'a ya jniñu ña'nun xaan.

<sup>16</sup> Yukan kuu ja tu ndi'i ini ri, ni tu yu'u ri siki jniñu ndiso ri. Ti vasu kuan ndi'i jnu'un ndee ini yiki kuñu ri ja ni kancha ga ri ñuyivi ja'a, ko kundee ga ini aña ri taka kivi. <sup>17</sup> Chi nundo'o ja ndo'o ri ja ka'an ri jnu'un siki Cristo, tundo kuu kuiti un ñuyivi ja'a, chi su'va sa'a nundo'o un ja ni'in ri iin ta'u vii xaan ga nuu Yandios ja kuu taka saa ni. <sup>18</sup> Ja yukan tu sa'a ri nanu nuu taka

nundo'o ja ndo'o ri nuu ñuyivi ja'a, chi taka un kondo'o ri jaku ni kivi. Ko na nduku ndee ri undi kivi ni'in ri ta'u ja kuña'nu ri nuu ta'u Yandios jniñu, chi ta'u un, tu kuni ndijin yo nuu ini ñuyivi ja'a, chi ja tu jini ndijin yo un koo ja kuu taka saa ni.

## 5

<sup>1</sup> Ko yiki kuñu ri ja kancha ri jiin nuu ñuyivi ja'a, kuu nanu iin ve'e naa. Chi jini ri ja nu na naa, ti nakua'a Yandios iin yiki kuñu jaa, ti kuu nanu iin ve'e ja kundichi ja kuu taka saa ni undi andivi. Chi ansu kuu iin ve'e ja ni sa'a yivi jiin nda'a i, chi ja ni sa'a Yandios kuu. <sup>2</sup> Ti jini va'a ri ve'e ja'a ja kuu yiki kuñu ri, ko kukui'ya ini ri sa'a, ti ndo'o xaan ga ini ri ja yachi nani'in ri yiki kuñu jaa un undi andivi nuu kancha Yandios. <sup>3</sup> Ti nu iyo iin yiki kuñu ri, ti tu koo maa iin ni aña ri siki ja ni naa yiki kuñu ri ja'a. <sup>4</sup> Ti yiki kuñu ri kuu nanu iin ve'e nuu kuncha ri ñuyivi ja'a, ja tu kuñii, ti vasu kukui'ya xaan ini ri siki nundo'o ja ndo'o ri ja kancha ri jiin yiki kuñu ri ja'a. Ko tu ndo'o ini ri ja xndoo ri un ti na koo maa iin ni aña ri. Chi sa ndiyo ga ini ri maa yiki kuñu jaa un nava nandi'i yiki kuñu ri ja ni naa un, ti na ni'in ri maa yiki kuñu ja kuchaku ri ja kuu taka saa ni.

<sup>5</sup> Ti maa Yandios kuu ja ni sa'a ja siukan na koo ri. Ti ni ja'a ya Espíritu ja na kuncha ya jiin ri, ti jiin yukan ja'a ya jandaa ja kua'a ya iin ta'u kuu ri. <sup>6</sup> Nusa ti ninì iyo jnundee ini ri, chi jini ri ja nu ni kancha yo jiin yiki kuñu yo ja'a, ti tu ja'i ni'in yo yiki kuñu jaa ja kuncha yo jiin Jito'yo. <sup>7</sup> Chi nu ni kancha ri nuu ñuyivi ja'a, ti jini ndaa ri ja jaa iin kivi ti ni'in ri ja ni chisojnu'un ya nuu ri, vasu undi vijna changa ga kua'a ya. <sup>8</sup> Ko ninì iyo jnundee ini ri ti ndiyo ga ini ri ja va'a ga nu na xndoo ri yiki kuñu ri ja'a ti ki'in ri nuu kuncha ri jiin jito'o ri. <sup>9</sup> Ja yukan na nduku ndee ri ja na kusii ga ini ya jiin ri, vasu ni kancha ga ri jiin yiki kuñu ri ja'a, xi vasu ja kuncha ri jiin ya. <sup>10</sup> Chi jandaa ndixia kuu ja tendi'i kuiti yo kin kundichi nuu ta'u Cristo jniñu ja kin xndichi ya taka jniñu ni sa'a yo. Ti ndi iin ndi iin yo ni'in nasa kaa maa jniñu ni ka sa'a yo, nu va'a ni kaa yo xi ndevara'a ni kaa yo, nasa ni kaa maa yo na ni kuncha yo jiin yiki kuñu yo nuu ñuyivi ja'a.

### *Jnu'un ja ni ndumani Yandios jiin yo*

<sup>11</sup> Nusa ti ja jini va'a ri nava kuña'nu Yandios, ti koto sa'a ri ni iin jniñu kue'e, ti ninì na koo yu'u ri, chi tu jajna'an ini jito'o ri jnu'un kue'e. Ja yukan na kukutu ini ri ja na xndaku ri nuu yivi ja ka'an ndaa kuiti ri. Chi jini va'a maa Yandios ja iyo ndaa taka jniñu sa'a ri. Ti kuni ri ja siukan na chaku va'a ga inijnuni ra, ro'o ja kanchuku ñuu Corinto un. <sup>12</sup> Ti ansu ja'a maa ri ka'an ri ja kachi ri ja chaa va'a kuu ri. Chi su'va ja'a ri jandaa nuu ra naa ra jiin jnu'un chaa ri nuu tutu ja'a siki jniñu ndiso ri, ja sa'a teyi'i ri jniñu un, nava na kusii ini ra naa ra siki ri, nava jiin tutu ja'a na ni'in ra jnu'un na xndeokani ra nuu chaa ka nduvixi siki jniñu ka sa'a da, ja ka skekiko da maa jniñu ndiso ri. Chi vasu ka ka'an da ja mani jniñu va'a ka sa'a da, ja ka sa'a da nava nava kanchuku yivi naa i, ko chaa víxi ini ka kuu da jiin jniñu kue'e ka sa'a da un. <sup>13</sup> Chi va ka jani ini da ja chaa ñaa kuu ri siki jniñu sa'a ri ja ndiso ri nuu Yandios. Ko ka jini va'a ra ja ru'u iyo va'a xini ri. Yukan kuu ja jajniñu Yandios jnu'un xna'an ri nuu ra, nava taka ra na kendo va'a nuu ya.

<sup>14</sup> Ti siki ja kunda'u ini Cristo yo'o, yukan kuu ja siin ri ka'an ndaa ri ja maa iin ni Cristo ni ji'i ja'a tendi'i yo. Ti jniñu ña'nu ni sa'a Cristo, ni kuu nanu ja ni ji'i ndi'i yo jiin ya, chi ja siki yo'o ni kuu jniñu ña'nu un. <sup>15</sup> Chi ni ji'i ya ja'a tendi'i yo nava nu kanchuku yo nuu ñuyivi ja'a, ti tukaa sa'a yo mani jniñu ja kuni maa yo, chi su'va na kuandatu yo jniñu ta'u ya. Ti siukan sa'a yo chi

ni ji'i ya ja'a yo. Ti suni ni sa'a Yandios jniñu ña'nu ja'a yo na ni naxndoto ya Jesús nuu ñuji'i nava na kuandato yo nuu mani ga ya.

<sup>16</sup> Ja yukan ti vijnna, siki jniñu ña'nu ni sa'a Cristo ja'a yo, tukaa jani ri nuu yivi nanu ni sa'a ri undi nuu, nava ka sa'a yivi ñuyivi ja'a ja tu kandixia i Cristo, chi ni jani ini rija iin chaa sia'an ni ni kuu Cristo, ko vijnna tukaa ndo'o ini ri siukan. <sup>17</sup> Chi sava'ni ga yivi ja yi'i i nda'a Cristo, ti tukaa ndo'o ini i nanu ni sa'a i undi nuu, chi ni sa'a Yandios ja ni ndujaa i. Ti tukaa ñu'un ini i jnu'un kue'e un, chi tendi'i ja ni ya'a kua'an, ti vijnna ja ni ndi'i i ni ka ndujaa.

<sup>18</sup> Ti Yandios kuu ya sa'a ndi'i ja'a, chi ni taji ya Cristo ja na sa'a ya jniñu ña'nu un ja'a yo, nava na ndumani ya jiiñ yo. Ti ni tatu ya jniñu nuu ri ja na xndaku ri nuu yivi ja jandaa ndixia kuu ja ni ndumani Yandios jiiñ yivi naa i.

<sup>19</sup> Chi ni taji Yandios maa Cristo jiiñ jniñu ña'nu un, nava na kuni yivi ñuyivi ja'a ja ni ndumani Yandios jiiñ i siki jniñu ni sa'a Cristo, ti tukaa ga kankuachi ya siki i. Ti ni tatu ya ru'u jiiñ jniñu un ja na ka'an ri jnu'un ja jandaa ndixia kuu ja ni ndumani Yandios jiiñ yivi.

<sup>20</sup> Nusa ti ru'u Pablo, kuu ri iin chaa ja ndiso maa jniñu ni ja'a Cristo. Ti ja ka'an ri un kuu nanu ja kanda'u maa Yandios jiiñ takaa yivi. Nusa ti kanda'u rijiin ra naa ra maa jnu'un ja ka'an Cristo ja na kandixia ndaa ra jnu'un ja ni ndumani Yandios jiiñ yivi. <sup>21</sup> Chi Cristo, vasu tu ni iyo ni iin kuachi ya, ko ni sa'a Yandios ja ni ndak'i'i ya kuachi yo siki ja na ni ji'i ya ja'a yo. Ti jiiñ jniñu ña'nu un ni ka'an Yandios ja tukaa ga jna'nun datu yo jiiñ kuachi yo.

## 6

<sup>1</sup> Nusa ti siki ru'u Pablo, ja kuu ri chaa ja ni nakaji Yandios ja na sajniñu ri jiiñ ya, ti siki un kanda'u ri jiiñ takaa ro'o, ja kanchuku ñuu Corinto, ja ni ka janta'u ra jnu'un va'a ja kunda'u ini Yandios yo'o. Ti kanda'u ri jiiñ ra naa ra ja tu skexiko ra jnu'un un ti koto xndoo ra ichi ja xna'an jnu'un un. <sup>2</sup> Chi ni kachi Yandios nuu tutu ii ya:

Maa kivi kuu ini ri ti ni ni'in ri jnu'un ja ni kanda'u ra jiiñ ri.

Ti maa kivi ja nama ri yivi, ni nama ri ro'o.

Kachi ya.

Ti vijnna ni kuu maa kivi ja kuni Yandios ja ka'an ya jnu'un siki ja kunda'u ini ya yivi. Ti vijnna ni kuu maa kivi ja nama ya yivi.

<sup>3</sup> Ti siki jniñu ni tatu ya nuu ri, ja ka'an ri jnu'un va'a ga siki Jesú, ti nduku ri jiiñ jniñu un ja tu kasí ichi ja ka kandixia yivi jnu'un va'a un, nava tu ka'an i siki jniñu ndiso ri. <sup>4</sup> Chi sa su'va kuni ri ja tendi'i ja sa'a ri na xna'an ja kuu ri chaa junukuachi nuu Yandios. Ja yukan kundee ini ri ja siin ri jiiñ jniñu ni ja'a Yandios nuu ri, vasu na koo ndo'o koo nene ri jiiñ nundo'o ja kii nuu ri, vasu sava'ni ga nasa na kuu maa. <sup>5</sup> Ni siin ri jiiñ jniñu un vasu tijni jinu ni ka ja'a i tau ri ni ka kani i ru'u, ti ni ka chondree i ru'u vekaa, ni ka ndondaa i siki ri ja siki jnu'un xndaku ri. Suni tijni jinu ni kuita ii ini ri jiiñ jniñu siki nundo'o un, chi iyo jinu ja yi'i xaan ja ndo'o ini yo ja tukaa jinu. Iyo jinu ja tu ni kixi ri. Ti tijni kuu ni ka ji'i ri soko ja siki jniñu un. <sup>6</sup> Sia'an ni jitu ndi'i ini ri ja ni jika ndaa ri sava'ni ga nuu ni yaku ri ja tu ni kivi ri jiiñ jniñu kue'e. Chi iyo ndaa ini ri siki taka jnu'un xna'an ri. Ti tu kuiti yachi ini ri jiiñ yivi ja tu chaku yachi ini i nasa kuni ka'an jnu'un ja xna'an ri. Ti nduku ndee ri ja na koo jnu'un mani ini jiiñ ñani jna'an ri. Ti jiiñ jniñu sa'a ri, yukan stuu ri ja kancha Espíritu Santo jiiñ ri. Chi kunda'u ndixia ini ri nuu ñani jna'an ri.

<sup>7</sup> Ti jniñu ri kuu na xndaku ndaa ri jnu'un Cristo Jesú. Ti xna'an ndaa Yandios ja jniñu ña'nu un ndiso ri. Chi ni kachi Yandios ja tukaa jna'nun datu ri, chi ni kendo ndoo ri nuu ya. Ja yukan ti ni ja'a ya nuu ri sava'ni ga ja nandi'i ri nava na kundee ri siki taka jniñu kue'e ja ka kinjna'an ri jiiñ, ti kuu

nama ri maa ri nuu taka jniñu kue'e ja kii siki ri. <sup>8</sup> Ti jiin jniñu ja junukuachi ri nuu Yandios, iyo jinu ja ka ja'a i ja yiñu'un ru'u, ti iyo jinu ja tuu. Iyo jinu ja ka jajna'an ini ru'u, ti iyo jinu ja ka ka'an ndevara'i siki ri. Iyo jinu ja ka'an i ja chaa xndoña'an kuu ri, ti iyo jinu ka ka'an va'a i siki ri ja chaa ndaa kuu ri.

<sup>9</sup> Iyo yivi tu nde'e nuu ri, ka sa'a i nanu ja kuu ri chaa ñuu jika, ko iyo yivi ja ka jini va'a i nau ja kuu ri jiin na jniñu sa'a ri. Ti iyo jinu ka kuni yivi ja ka'n'i i ru'u, ko ni chaku ga ri. Ti vasu ni ka ndo'o ri nda'a i, ko tu ni ka ja'n'i i ru'u. <sup>10</sup> Ti vasu iyo kukui'ya ini ri, ko nini kusii ini ri siki jniñu ni ja'a ya nuu ri. Ti vasu chaa nda'u ka kuu ri, ko sa'a ri ja nduu riku kua'a yivi siki ja ka'an ri jnu'un Yandios nuu i ja na kuu keta'u i nuu ya. Ti vasu tundo iyo ja ñava'a ri nuu ñuyivi ja'a, ko nuu kancha Yandios, yukan ñava'a kua'a xaan ri sava'niga ja nandi'i ri.

<sup>11</sup> Ñani, chaa ñuu Corinto ja ka kandixia ra Cristo, ru'u Pablo, ja suni kuu ri iin ñani ra naa ra, ni jani kaji ri ndi kuiti jnu'un nuu ra taka nundo'o ni jna'an ri, nava na ndetatu ini ri, vanuxia iyo jnu'un mani ini ri jiin ra. Ja yukan ni kachi ndi'i ri nasa jito ri nundo'o. <sup>12</sup> Suu ja kunda'u xaan ini ri ro'o naa ra, ti ni kachi kaji ri nuu ra nasa jito ri nundo'o, ko ro'o naa ra kojnuni nu iyo mani ra jiin ri sia'an xi tuu. <sup>13</sup> Ti kanda'u ri jiin ra nanu kanda'u iin tata jiin se'e da. Suni siukan kanda'u ri jiin taka ra naa ra, ja na kachi ra nuu ri nasa kanchuku ra, nanu ni kachi ri nundo'o jna'an maa ri, siki ja iyo jnumani ini jiin yo naa yo.

### Ka kuu yo ve'e Yandios

<sup>14</sup> Ru'u Pablo, xndaku ri nuu taka ra ja koto maa kivi nduu ra jiin jniñu kue'e ja ka sa'a yivi tu ka kandixia, chi tu kuu kejna'an ra jin i. ¿Nusa ti nasa kuu kejna'an jniñu sa'a yivi va'a jiin jniñu sa'a yivi ndevara'a nu? ¿Ti nasa kejna'an iin nuu yivi jika jiin nduva ñundijin ja sa'a Yandios jiin yivi ka jika nuu ñuñaa, ja ñuñaa kuiti kuankoyo i jiin kuachi? <sup>15</sup> Ti tu iin ni kuu ja va'a jiin ja kue'e, chi tu iin ni kuu Cristo jiin ja'b'u. Ni tu kuu koo mani yivi kandixia jiin yivi tu kandixia kuiti. <sup>16</sup> Ti ansu iin ni kuu jnu'un ja ka nchañu'un yo ini ve'e Yandios jiin jnu'un ja kunchañu'un yo santo. Ti maa yo ka kuu iin ve'e nuu kancha Yandios, maa Yandios chaku, ansu ka kuu yo nanu iin ve'e santu ja tu kuñi kuiti. Chi siukan ni ka'an Yandios nuu tutu iif ya:

Kuncha ri ti kuikonuu ri jiin i nuu kanchuku i.

Ti maa ri kuu Yandios maa i, ti maa i kuu yivi ñuu ri.

Ni kachi Yandios.

<sup>17</sup> Ja yukan ni kachi maa Jito'yo, koto maa kivi nduu ra naa ra jiin jniñu kue'e ka sa'a yivi ndevara'a.

Su'va kuxio naa ra, kachi Jito'yo. Koto maa nandeokuñi ga ra kue'e ra jniñu kue'e un.

Yukan na ti nakinse'e ri ro'o naa ra, ni kachi ya.

<sup>18</sup> Ti kuu ri Tata nuu taka ra naa ra, ti maa ra kuu se'e yii ri jiin se'e si'i ri, kachi Jito'yo, Yandios kuña'nu xaan ga.

Ni kachi tutu, kachi Pablo.

### 7

<sup>1</sup> Ñani ri ja kunda'u ini ri, ru'u Pablo, xndaku ri nuu ra naa ra ja jandaa ndixia kuu ja ni ka ni'in yo taka jnu'un ndaa un ja ni chisojnu'un Yandios nuu yo, ja maa ya kuu Tata yo, ti maa yo kuu se'e ya. Ja yukan na sasiin yo maa yo nuu taka ja kue'e ti na kondoo yo nava tu kivi nduu yo jiin taka jniñu sakue'e siki yiki kuñu yo, ti tu ku'un inijnuni yo sava'nii ga jniñu kue'e. Ti na ku'un ini yo ja koto ma skexiko yo taka jnu'un ni ja'a Yandios nuu yo. Chi su'va na kuanta'u yo jnu'un ya, ti jiin yukan ja'a yo ja yiñu'un nuu ya.

*Yivi ñuu Corinto ni ka ka'an ini i nuu kuachi i*

<sup>2</sup> Ru'u Pablo, kanda'u ri nuu takar'o ja kandixia ñuu Corinto un, ja na kani va'a ini ra ja kuu ru'u, ti na koo jnumanini ini. Chi tu ni sa'a kue'e ri nuu ni iin yivi. Ni tu ni xna'an ri ni iin jnu'un kue'e ja na nandeokava ini i, ti no'on i jiin kuachi. Ti ni iin ra tu ni xnda'u ri ro'o. <sup>3</sup> Ko jiin jnu'un un tu kuni chakuachi ri ro'o naa ra ja tu ni ka ndo'o va'a ini ra siki ri. Chi ja ni ka'an ri ja kunda'u ini ri nuu takar'a. Ti nini ñukuu ini ri ro'o naa ra, ti nu kuni Yandios ti kuchaku yo naa yo, ti nu tuu, ti na kuü yo naa yo. <sup>4</sup> Ti chundee xaan ini ri ti kusii xaan ini ri jiin jnu'un ja ka jika ndaa ra, ti ja'a ri jnundee ini maa ri, chi tendili yo ka jito nundo'o.

<sup>5</sup> Ti undi ni ka jaa ri ñuu Macedonia, tu kuu kuiti ja ndetatu ri, chi jito ri nundo'o taka ñuu. Chi iyo ja ni ka nduni'in ini yivi nuu jnu'un ni ka'an ri un. Ti ni yu'u ri ja sandau naa kaka yata yivi ni ka kandixia un. <sup>6</sup> Ti Yandios ja ja'a ya jnundee ini nuu yivi, ka iyo jnu'un kui'ya ini. Ni sa'a ya ja naa kundee ini ri jiin jnu'un ni ka'an Tito na ni chaa da. <sup>7</sup> Ti ni kusii ini ri, ko ansu nini maa ri, chi suni ni kusii xaan ini maa da ni ka sa'a ra. Chi ni kasjnu'un da ja ka ñukuu ini ra naa ra ja na kuni tuku ra nuu ri, jiin ja ka kukui'ya ini ra siki kuachi ra naa ra, jiin ja ka ka'an ini ra ja'a ri ja ka ndi'i ini ra. Ja yukan vi'i ga ni kusii xaan ini ri.

<sup>8</sup> Ti tutu ni tajiri nuu ra naa ra undi nuu, vasu ni sa'a ja ni ka ndukui'ya ini ra, ko tu kukui'ya ini maa ri ja ni sa'a siukan. Chi vasu kukui'ya ini ri na ni tajiri tutu un, ti vijnatukaa, chi ni jini ri ja jaku ni kivi ni ka iyo jnu'un kui'ya ini. <sup>9</sup> Ti vijnatukaa ini ri, ko ansu siki ja ni ka ndukui'ya ini ra, chi siki ja ni ka'an ini ra nuu kuachi ra. Chi ni ka kundee ra jiin jnu'un kui'ya ini nava kuni maa Yandios, ti ansu so ni ka na'n'u ini ra naa ra. <sup>10</sup> Chi nu kukui'ya ini yo nava kuni maa Yandios, yukan sa'a ja na ka'an ini yo siki kuachi yo, ti nama ya yo'o. Nusa ti tu ndakuni'in yo ja ni ka'an kui'ya ini yo. Ko nu ka kukui'ya ini yivi ja tu ka kuni kandixia i, ni tu ni jniñu un vasu naa ka'an ini i siki kuachi i, chi sa vi'i ga jna'n'u ndatu i jiin un ti naa i.

<sup>11</sup> Ro'o, chi ni ka kukui'ya ini ra nava kuni Yandios, ti vijnatukaa ja ni ka jini ra ja va'a ni njinu ja ni ka kukui'ya ini ra un. Chi ni ka ndukui'ya ini ra ja ni ka'an ini ra nuu kuachi un. Ti ni ka jitu ini ra ja na kendo va'a ra, ti tu ni kejna'an iin nuu ra jiin chaa ka sa'a kuachi un. Ti ni ka nduxaan ndixia ra nuu chaa ka sa'a kuachi un, ni ka yu'u ra ni ka jito ra kuachi un. Yukan ti ni ka ñukuu ini ra ja kuni tuku ra nuu ri, ja iyo jnu'un mani ini jiin yo. Ti ni ka iyo ndixia ini ra ja nduxaan ra nuu chaa ka sa'a kuachi un. Ti siukan ni ka xna'an ra ja tu na kuachi iyo siki ra, chi tu ni jajna'an ini ra ja sa'a chaa un, ti ni nduxaan ra nuu da, ti maa da ni ka'an ini da nuu kuachi da un.

<sup>12</sup> Ti na ni chaa ri tutu un, ansu maa ni siki chaa ja ni sa'a kuachi un, ni ansu maa ni ja'a chaa ni ndo'o nda'a chaa un. Chi su'va ni chaa ri tutu un nava na sa'a ra nanu siki nasa ni ka ka'an ini ra naa ra, ti siukan ni ka xna'an ndaa ra nuu Yandios ja ni ka jandatu ndixia ra jniñu ni ta'u ri nuu ra naa ra.

<sup>13</sup> Ja yukan ni kusii ini ri siki maa ra naa ra. Ti vi'i ga ni kusii ini ri ja ni jini ri ja iyo siii xaan ini Tito. Ti kusii xaan ini da siki ja mani xaan ni kunchuku ra jiin da na ni kunchuku da yukan. <sup>14</sup> Ti tu ni kendo kui'ya ri jiin Tito na ni ka'an ri jiin da ja kusii xaan ini ri, chi yivi va'a ka kuu ra, chi tu ni kendo ri jnu'un kanuu jiin ra naa ra. Chi nanu ni ka jini ra ja iyo ndaa takar'o jnu'un ni ka'an ri siki ra, suni siukan ni kee ndaa ja ni ka'an ri jiin Tito ja kusii ini ri siki ra naa ra, ja va'a ka siukan ra takar'o jnu'un ni ta'u ri nuu ra. <sup>15</sup> Ti vi'i ga kusii ini Tito jiin ra naa ra vijnatukaa, ti ñu'un ini da ja va'a ni ka jandatu ra jnu'un ni ka'an da. Ti ni ka iyo yivi un ra, chi ni ka ndi'i ini ra ja tu nduni'in ini ra nuu da.

<sup>16</sup> Nusa ti kusii xaan ini ri jiin ra, chi kanu ini ri ro'o naa ra.

*Ni ini ni aña yo na kua'ay*

## 8

<sup>1</sup> Ñani naa ra, vijna ti kuni kachi ri iin jnu'un nuu ra naa ra si ki kua'a ja va'a ni sa'a Yandios jiin yi vi ka kandixia ja kanchuku ndañuu Macedonia. <sup>2</sup> Chi vasu ni jito xaan i nundo'o, ko suni ni iyo sihxaan ini i jiin jnu'un ya. Ti vasu nda'u xaan ni ka ndo'o i, ko va'a xaan ni ka ja'a i xu'un ja kuu nuu inga yi vi ka kandixia. <sup>3</sup> Chi ja'a ri jandaa ja ni ka kusii ini i ni ka ja'a i nasa ka yijni maa i, ti undi vijna vi'i ga ni ka ja'a i nasa ka flukuu ini maa i. <sup>4</sup> Chi ni ka ka'an nda'u xaan i jiin ri, ja na kua'a ri jnu'un ja na chindee jna'an i jiin yo, ja kua'a i xu'un kuu taka ñani jna'an yo ka kandixia ja nda'u i naa i. <sup>5</sup> Ti vi'i ga ni ka sa'a i ansu nava ndo'o ini ri, chi ñukuu ini i ja kanuu ga ja xnakan na nakua'a i maa i ja kuandatu i nuu Jito'yo jiin nuu ri. Sia'an ni ka sa'a i, chi ñu'un ini i ja ka sa'a i maa iin ni ja kuni maa Yandios. <sup>6</sup> Ja yukan ni ka'an ndaa ri jiin Tito ja na jaa tuku da nuu kanchuku ra, ti na sino da jniñu ja ni keja'a da, ja nastutu da xu'un kakekoo ra ja kuu yi vi nda'u. <sup>7</sup> Chi maa ra naa ra, va'a xaan ga ka sa'a ra taka jniñu ra, chi ka kandixia ndaa ra Jesús. Ti va'a ka ka'an ra jnu'un ya, ti va'a xaan ka kujnuni ini ra jiin jnu'un un. Ti vi'i ga ka jitu imi ra ka sa'a ra taka jniñu un. Ti ka kunda'u xaan ini ra ru'u. Nusa ti suni kanuu ja na sa'a va'a ra jniñu ja'a, ja kua'a ra ja kuu yi vi nda'u.

<sup>8</sup> Ti ansu ja kuni ri ta'u ri jniñu nuu ra naa ra, chi kachi ri nuu ra nasa kusii ga ini sava yi vi ni ka ja'a xu'un un. Ti siukan kuni ri ja suni na kunda'u ndixia ini ra nuu yi vi nda'u. <sup>9</sup> Ti ja ka jini va'a ra nasa va'a xaan ni kuu ini Jito'yo Cristo Jesús, ja ni kunda'u ini ya yo'o, ti ja yukan ni kee ya andivi nuu ni kuña'nu xaan ya. Ti ni ndunda'u ya nu ni chaa ya nuu ñuyivi ja'a ja si ki ro'o naa ra. Ti siukan ni sa'a ya nava na nduña'nu yo jiin ya nuu ta'u ya jniñu, ti na ni'in yo ta'u nuu ya.

<sup>10</sup> Ti ja'a kuu jnu'un nava jani ini ri si ki jniñu ja kua'a ra xu'un ja kuu yi vi nda'u. Va'a ni ka keja'a ka nastutu ra xu'un andujin. Ko ansu maa ni xu'un ni nastutu ra, chi suni ni ka kusii xaan ini ra naa ra nava ni sa'a ra. <sup>11</sup> Nusa ti ka sinu ra jiin jniñu un. Ti nanu ni kusii ini ra ja ni ka keja'a ra, suni sia'an na kosii ini ra undi sinu ra, ti taka ra na kua'a nasa ka ñava'a ra. <sup>12</sup> Chi nu kusii ini yo kua'a yo, ti janta'u ya nuu yo nasa ñava'a maa yo, chi tu jikan ya ja kua'a yo ja tu ñava'a yo.

<sup>13</sup> Ti ansu ja ka'an ri jnu'un ja'a, ti xndi'i ini ra ja nasa ni'in ga ra ja chindee ra nuu yi vi nda'u, chi kuni ri ja iin nuu na kava ini ra naa ra. <sup>14</sup> Chi kua'a ka ñava'a ra vijna, ko kua'a ga ja kumani nuu taka i. Yukan ti nu iin kivi ka ñava'a maa i, ti suni kuu taji i ja ka nandi'i ra nu na kumani nuu ra naa ra. Ti siukan iin nuu na kuñava'a taka ra, <sup>15</sup> nava ka'an nuu tutu ii Yandios si ki yi vi ja ni ka nastutu staa maná undi jana'an: "Chaa ni nastutu kua'a, tu ni kendoso ga. Ti chaa ni nastutu jaku ni, suni tu ni kumani nuu da", kachi tutu.

*Jnu'un Tito jiin uu ga da*

<sup>16</sup> Ti ru'u Pablo, na kuanta'u ri nuu Yandios ja ni sa'a ya ja ndi'i ini Tito ja'a taka ra nanu ni ndi'i ini maa ri ja'a ra naa ra. <sup>17</sup> Chi ni janta'u da ja ni ka'an nda'u ri jiin da ja na jaa da nuu kanchuku ra naa ra. Ti si ki ja ndi'i ini da taka ro'o naa ra, yukan ni kee da kuaja da ja siuku da nava kuni ini maa da.

<sup>18</sup> Ti suni taji ri inga ñani yo kandixia kuaja da jiin Tito nuu ra naa ra. Ti taka nuu ka ndututu yi vi ka kandixia, ka jajnu'un i chaa un ja va'a xaan sajñiu da, ja ka'an da jnu'un Cristo Jesús. <sup>19</sup> Ti taka yi vi ka kandixia, ni ka nakaji i maa da ja na chindee da kin tejna'an da xu'un ja ni ka ja'a yi vi. Ti ka sa'a ri jniñu ja'a nava na kachi yi vi ja ña'nu xaan kuu Jito'yo, ja ni ja'a ya jniñu ja'a nuu ri, ti nava na kuni ra ja ka jito nda'u ri yi vi nda'u. <sup>20</sup> Yukan ka sa'a ri nava tu ka'an ndeva'a ni iin yi vi si ki ri ja si ki xu'un ni ka soko i ja kuu yi vi nda'u.

**21** Chi ka nduku ndee ri ja ka siuku ndaa ri taka jniñu ka ndiso ri, ko ansu nini nuu Yandios, chi suni ja kuu nuu yivi.

**22** Ti suni taji ri inga ñani yo kandixia kuaja da jiin uu ga chaa ja'a. Ti ja ni kuu tijni jinu ni xna'an da ja kusii xaan ini da, ti ja ka jito nchaa i taka jniñu da. Ti vijnal ti vi'i ga jitu ini da ja'a ra, chi ñukuu xaan ini da ja na siuku ra.

**23** Ti nu ka jikajnu'un yivi siki Tito, ti kachi ra ja kuu da chaa chindree ru'u ja sajniñu da jiin ri, ja ka'an da jnu'un Yandios ja kuu Cristo Jesú. Ti uu ga ñani yo ja'a, ka kuu da ndaja'a ja ni taji uu ga ñani kandixia nuu ra naa ra. Ti ka kuu da chaa va'a, chi ka nakanajaa yivi nuu Yandios ja kuu maa da, ja vii xaan ka sa'a da jniñu ni ta'u ñani un nuu da naa da. **24** Nusa ti ro'o naa ra, ja kanchuku ri jiin ra, na xna'an ra nuu chaa ja'a ja taji ri nuu ra naa ra, ja iyo mani ndixia ra jiin da, nava na kuni taka ñani ka kandixia ja maa ri ni taji chaa ja'a naa da.

### *Na kekoo yo xu'un ja kuu ñani jna'an yo*

## 9

**1** Vijnal ti tukaa ñu'un ini ri ja chaa ri tutu nuu ra naa ra siki xu'un ja nastutu ra ja kuu ñani yo ka kandixia ja ka ndo'o nda'u i. **2** Chi ja ni jini ri ja ni kuu ini ra ja sa'a ra jniñu va'a un. Ti ja yukan kusii ini ri ka'an ri jiin yivi ndañuu Macedonia, ja taka ro'o ja kanchuku ndañuu Acaya, ja ni ka iyo tu'va ra ja kua'a ra xu'un un undi andujin. Ti na kusii ini ra naa ra, chi ja yukan kua'a yivi ndañuu Macedonia, suni ni ka kusii ini i, ti suni ni ka ja'a i xu'un ja kuu yivi nda'u.

**3** Ti ru'u Pablo, taji ri ñani kandixia ja'a kuaja da nuu ra naa ra, ro'o ja kanchuku ra Corinto, nava na kotu'va ndixia ra xu'un un, chi tu ni ka'an ka'a ri siki ra ja ja ka iyo tu'va ndixia ra ja siuku ra jniñu un. Chi ka iyo tu'va ra jiin xu'un un nava ni ka'an ri. **4** Chi sanaa ti chaa ri jiin uu ga chaa ndañuu Macedonia, ti kuni da ja tu iyo tu'va ra, ti ni'in ri jnu'un kanuū, ti suni maa ra naa ra kuta'u jnu'un kanuū, chi ja ni kachi ri ja kotu'va ndixia ra naa ra. **5** Ja yukan ni jani ini ri ja kanda'u ri jiin taka ñani ka kandixia ja'a ja na jaa da nuu ra. Ti na sino da ja kutu'va ra naa ra jiin xu'un ja ni chisojnu'un ra ja kua'a ra. Ti sia'an kotu'va ra, chi iin ja va'a ja kuu nuu taka ra kuu, ko tu ja chayika yo ro'o naa ra.

**6** Ti chu'un ini naa ra iin jnu'un ja'a, ja nu jaku ni na kua'a ra ti suni jaku ni na ni'in ra. Chi chaa sa'a jaku ni jniñu, suni jaku ni jniñu da nastutu da. Ti chaa sa'a kua'a jniñu suni kua'a jniñu da nastutu da. **7** Yukal ti ndi iin ndi iin ra kua'a nasa kujaa maa ra. Ti koto kuxii ini ra kua'a ra, ni tu kua'a ra ja chayika ra maa ra nu tu kuu ini ra. Chi kusii ini Yandios jiin yivi ja'a ni ini ni afu, chi ni ini i ja'a i. **8** Ti Yandios kuu ya sa'a ja kusii xaan ini ra ja va'a chindree ra nuu yivi nda'u. Ti sa'a ya ja nini na kotu'va ini ra ja sa'a ra jniñu va'a un, chi maa ya kuu ja kua'a tendi'i ja nandi'i ra ja kuchaku ra nuu ñuyivi ja'a. Ti vi'i ga kua'a ya nuu ra nava na chindree ra jiin taka jniñu va'a ja nandi'i ja chindree yo jiin. **9** Chi sia'an yoso nuu tutu ii Yandios siki taka yivi ka chindree yivi nda'u.

Ni ini da ni ja'a kua'a da nuu yivi nda'u.

Ti taka jniñu va'a ni sa'a da un, nini kendo ja kuu taka saa ni.

Kachi tutu ii.

**10** Ti kuu ini Yandios nuu yo ja ja'a ya kua'a ja kuu tata nuu chaa sa'a jniñu, chi maa ya kuu ja ja'a staa yají yo. Chi sia'an sa'a ndixia ya, ti vi'i ga na kua'a ya nuu ra taka ja nandi'i ra ja chindree ra nuu yivi nda'u. Ti suni nakaya ga ya taka jniñu va'a ja ka sa'a ra un. **11** Ti Yandios siin ya nakaya ya taka ja nandi'i ra nava na kua'a ra. Ti xu'un ja kua'a ra ki'in nuu taka ñani nda'u

xaan, ti maa i nakuanta'u xaan i nuu Yandios siki ja ni sa'a ra jniñu va'a un, nava ni kanda'u ri jiin ra naa ra. <sup>12</sup> Sia'an kuu, chi xu'un ja ka taji ra nuu yivi nda'u un, ansu niñi ka jniñi i sia'an ni ja kumanii nuu i. Tuu, chi su'va ka nakuanta'u xaan i nuu Yandios ja siukan ni sa'a ya ja ka chindree ra nuu i. <sup>13</sup> Ti nu sia'an ka chindree ra jiin ja ka nandi'i yivi nda'u, nusa ti ka nakuanta'u i nuu Yandios ja ña'nku kuu jniñu sa'a ya, chi ka chindree ra ja kumanii nuu i. Ti ka nakuanta'u i nuu ya jiin jniñu va'a un, chi ni ka ja'a ra jandaa ndixia ja ka kandixia ra jnu'un Yandios siki Cristo nanu ka kandixia i naa i suni. Ti suni jiin jniñu va'a un ja'a ra jandaa ja ñu'un ini ra ja kuandatu ra jnu'un Cristo nanu ka jandatu maa i. Yukan kuu ja nakuanta'u i nuu Yandios ja siukan ni sa'a ya ja ni ka ñu'un ini ra ja chindree ra i, jiin ja suni ñu'un ini ra ja chindree ra tako ja kumanii nuu sava ga yivi. <sup>14</sup> Ti yivi nda'u un ka ni'in i xu'un ja ka taji ra, suni kakanta'u i ja'a ra. Chi koo mani xaan i jiin ra siki ja va'a xaan sa'a ya jiin ra, ja ni ka chindree ra i jiin tako ja kumanii nuu i.

<sup>15</sup> Ti na kuta'u yo nuu Yandios, chi ni ja'a ya Se'e ya nuu yo ja kuu iin ta'u ka'nunxaan ga, ti tu kujaat kuiti yo ja xndaku ndi'i yo jnu'un ya.

### Jniñu ña'nu ndiso Pablo ja kuu da apóstol

## 10

<sup>1</sup> Ti ru'u Pablo, ka'an nda'u ri jiin tako ro'o, ja kanchuku ñuu Corinto, ti ka'an nda'u ri jiin ra jiin jnu'un ni ka'an maa Cristo, ja vita ini ya ti mani ini ya. Ru'u, chi ka ka'an sava ra ja nu kancha ri jiin ra, ti su'va nda'u ga sa'a ri maa ri, ko nu kancha jika ri, chi chundee ini ri ka'an ni'in ri jiin ra naa ra. Siukan ka ka'an sava ra. <sup>2</sup> Yukan ka'an nda'u ri jiin ra ja nu na jaa ri nuu kanchuku ra, ti tu nduku ra ja nduxaan tuku ri nuu ra. Chi sava ra ka ka'an ja sa'a ri jniñu nanu ka sa'a yivi ja kanchuku ñuyivi ja'a ja tu ka kandixia i Cristo. <sup>3</sup> Ti vasu kancha ri ñuyivi ja'a, ko tu sajniñu ri nanu ka sa'a yivi kanchuku ñuyivi ja'a, ja ka kanaa i jiin jna'an i, chi ka nduni'in ini i, ti ka sa'a i jniñu kue'e. Chi su'va kanaa ri jiin tako jnu'un kue'e un. <sup>4</sup> Ko tu jani ini ri ja kanaa ri jiin jniñu kue'e un ti kundee ri jiin, ti kuu kundee ri siki jnu'un kue'e un, chi ka'an ri mani jnu'un ndaa ja ja'a maa Yandios, chi kachi Yandios ja ña'nu ga kuu jnu'un ya ja kundee siki tako jnu'un kue'e ja ka ka'an yivi ñuyivi ja'a, ja ka nduni'in ini i siki jnu'un Yandios. <sup>5</sup> Siukan kuu xnaa ri tako jnu'un ja jajniñu yivi ka kanaa siki jnu'un Yandios. Ti jiin jnu'un Yandios kundee ri siki jnu'un ka ka'an vixi yivi siki jnu'un Yandios. Ti jasi ri tako jnu'un un ja ka ndo'o ini i ja iin nuu jiin jnu'un ya. Sia'an sa'a ri nava na kandixia i Cristo. <sup>6</sup> Ti ndi'i ri ka kuandatu tako jnu'un Yandios ja ta'u ri. Yukan na ti kotu'va ri ja kua'a ri nundo'o nuu tako ga yivi ja tu kuni kuandatu i nuu jnu'un Yandios.

<sup>7</sup> Ti tako ra yukan, chi tu ka jani va'a ini ra nasa ka'an sava ga yivi un. Chi iyo yivi ja ka'an vixi i ja jandaa ndixia kuu ja yi'i i nda'a Cristo, ti nuu maa iin ni Cristo ka junukuachi i. Vatuni ka'an i, ko siki yivi un na kani va'a ini i ja suni siukan junukuachi ri nuu ya. <sup>8</sup> Ti chundee xaan ini ri ja ka'an ri jnu'un siki jniñu ndiso ri ja ni ja'a Jito'yo nuu ri, ti tu kukanuu ri. Chi jniñu un kuu ja chindree ri ro'o jiin jnu'un Yandios, ja xna'an ri nuu ra nava na kuixia ini ra jiin jnu'un un, ansu ja sa'a ri ja ndeokava ini ra nuu kuachi. <sup>9</sup> Ka'an ri un nava tu kani ini ra ja nduku ri jnu'un siu'u ri tako ra jiin tutu ri. <sup>10</sup> Chi sava ra ka ka'an ja tako tutu taji ri, mani nduxaan ri ti ni'in xndaku ri jniñu. Ko tuu, chi nu chaa ri tutu un tu kundee ini ri ja xndaku ni'in ri. Ti suni tu ka'an vii ri ti'li, kachi sava ra. <sup>11</sup> Ti yivi ka'an ja siukan kuu, ti na sa'a i ja nanu ka'an ni'in nuu tutu ri ja kande jika ri, ti suni sia'an ni'in xndaku ri jniñu nuu ra nu na kuncha ri jiin ra.

<sup>12</sup> Ti va tu chundee ini ri ja sa'a ña'nu ri maa ri nanu ka sa'a sava chaa un ja ka jajnu'un da maa da. Chaa un, chi iyo ñaa xini da, ti ka'an vixi da ja kuña'nu ga da ja kuu jna'an da. Ti tu ka sa'a da nasa iyo ga nuu Yandios. <sup>13</sup> Ko siki jniñu ndiso ri, tu nduku ri ja nduña'nu ri nuu inga jniñu ja tu ni ja'a ya nuu ri. Chi su'va sa'a teyii ri maa ri siki jniñu ni ja'a Yandios nuu ri, chi ni ja'a ya jnu'un ja na sa'a ri jniñu un nuu ro'o, yivi ñuu Corinto. <sup>14</sup> Ti vatuni sa'a teyii ri maa ri jiin jniñu un nuu ro'o chaa ñuu Corinto, ti tu jakuiñi ri ja ka'an ri un, chi jandaa ndixia kuu ja xnakan maa ri ni ka'an jnu'un Yandios siki Cristo. <sup>15</sup> Ti tu kuva'a ini ri siki jniñu ni sa'a inga chaa, chi mani jniñu ja ni ja'a Yandios nuu maa ri na xna'an ri. Chi ñu'un teyii ini ri ja vi'i ga na kandixia ra, ti vi'i ga na kundiyo ini ra kuandatu ra nuu jnu'un Yandios. Ti siukan na ndukua'a jniñu ni ja'a Yandios nuu ri ja sa'a ri jiin ra naa ra. Chi maa Yandios kachi ja taka ñuu na sa'a ri jniñu un. Ti yukan na kuandatu i nuu jnu'un ya, yukan ti ni'in ri jnundee ini. <sup>16</sup> Ja na ki'in ri uu ga ñuu ka iyo ichi jata ñuu ra un, ja na kuu jicha ga nuu kuikonuu ri ka'an ri jnu'un Cristo Jesús. Ko tu kivi nduu ri ja sa'a vixi ri ini ri nuu ja ni jikonuu inga chaa ni ka'an jnu'un Cristo Jesús.

<sup>17</sup> Ti nu nau chaa kuni nduña'nu teyii, ti na nduña'nu da siki ja na sa'a Jito'yо, ti ansu siki ja sa'a maa da. <sup>18</sup> Chi ka iyo chaa ka ja'a jandaa ja kuu maa da, ti kachi da ja va'a ga kuu jniñu sa'a da. Ko chaa jajnu'un maa Jito'yо, yukan kuu ja kendo yiñu'un nuu ya.

### Ka'an Pablo siki chaa ka xndoña'an

## 11

<sup>1</sup> Taka ro'o ja kanchuku ñuu Corinto, na koñaa jnu'un ka'nú ini ra naa ra, ti na ka'an ri jaku ni jnu'un siki jniñu nava ka ka'an yivi naa i. Ko kuaka'nu ndixia ini ra siki jnu'un un, <sup>2</sup> chi ka'an ri siki jniñu ni sa'a ndijin ri ja ka jini ndaa ra. Ja yukan kukuiñi ndixia ri ja'a ra, ti ndi'i ini ri siki ro'o naa ra. Chi maa Yandios sa'a ja sia'an na kukuiñi ri ja'a ra. Chi taka ro'o, ka kuu ra nanu ña'an ja iyo ndoo, chi jiin jniñu yukan ni sa'a ri ja na kejna'an ra jiin Cristo, ja kandixia ndaa ra jnu'un ya, nanu kejna'an ña'an jiin yii ña.

<sup>3</sup> Ko ndi'i ini ri ja sanaa ti kandixia ra jnu'un ka ka'an uu ga yivi ti xnda'u da ro'o, ti xndoo ra jnu'un ja chiñu'un ra Cristo jiin ni ini ni aña ra. Chi suni siukan ni sa'a ja'u'jiin Eva, chi ni kivi ini ñin koo, ti ni xnda'u i ña jiin jnu'un ndichi. <sup>4</sup> Ndi'i ini ri siki ro'o naa ra, chi kii inga chaa nuu kanchuku ra ti tu ka'an da jnu'un Jesú nanu ni xndaku ri nuu ra naa ra, ti va'a ka janta'u ra inga espíritu ja tu kejna'an jiin Espíritu Santo. Ti yachi ka janta'u ra jnu'un ka'an inga chaa un ja tu kejna'an jiin jnu'un Jesú. <sup>5</sup> Ti taka chaa un ka kandixia ra ja ka'an da ja ka ndo'o ini da ja ka kuu da apóstol kuña'nu ga, ko na kachi ri ja tu kuña'nu kuiti chaa un nuu ri. <sup>6</sup> Chi vasu tu ni'in va'a ri jnu'un ja ka'an vii ri, ko chaku va'a ini ri taka jnu'un xna'an ri nuu ra naa ra. Ti siki jniñu ndiso ri un, va'a xna'an kaji ri taka jnu'un kanuu, nava na chaku va'a ini ra naa ra.

<sup>7</sup> Tu ni jikan ri xu'un nuu ra naa ra, ja ni ka'an ri jnu'un Yandios siki Cristo. Yukan ni sanda'u ri maa ri ja ni sa'a ri jniñu jiin nda'a ri nava tu kakan ri xu'un nuu ra. ¿Nusa ti vijnna ti kankuachi ra nuu ri ja siukan ni sa'a ri nu? <sup>8</sup> Chi nuu sava ga ñani yivi ka kandixia ni ki'in ri xu'un ni ka ja'a i, nava na kuajniñu ri ja kuncha ri jiin ra ja na xndaku ri jnu'un ya nuu ra naa ra. <sup>9</sup> Chi na ni kuncha ri jiin ra naa ra ti ni nandi'i ri xu'un, ko tu ni jikan kuiti ri nuu ni ña'an ja xndi'i ri ini ra. Chi ñani yo ja ka kandixia ichi ñuu Macedonia, ni ka ja'a da nuu ri ja ni nandi'i ri. Ti siukan tu ni xndi'i kuiti ri ini taka ro'o naa ra. <sup>10</sup> Ti siki ja iyo niña mani jnu'un ndaa Cristo inijnuni ri, ja yukan ka'an ri ja ni xndaku va'a ri jnu'un Yandios siki Cristo. Ti tu ni ki'in ri xu'un nuu ni ña'an

yivi ni ndañuu Acaya, nava tu kasi i ja iyo sii ini ri ja siukan ni ka'an ri jnu'un Cristo. <sup>11</sup> ¿Va nu tu kunda'u ini ri nuu ra naa ra ja ka'an ri siukan, ka jani ini ra nu? Ko tuu, chi maa Yandios jini va'a ya ja kunda'u ini ri nuu ra naa ra.

<sup>12</sup> Ko na kachi ri ja siin ri jiin jniñu ni ja'a Yandios nuu ri, ko tu ki'in ri xu'un ra naa ra jiin jniñu un. Ti sia'an na kasi ri taka jnu'un vixi ka ka'an uu ga chaa un, ja ka ka'an da ja iin nuu ni ka sa'a da jniñu ya jiin ri. <sup>13</sup> Ti chaa un, chi ansu apóstol ndaa ka kuu da, chi mani ka xnda'u da jiin jniñu ka sa'a da. Ti sa'a da ja ka kuu da apóstol nuu Cristo. <sup>14</sup> So naa ini yo ja siukan ka sa'a da, chi ja ni jini yo ja ja'u'u un ni nasama maa, ti xnda'u yaku, nanu ja kuu iin ángel Yandios ja ndinchaa ti sa'a mani jniñu ndoo. <sup>15</sup> Ja yukan suni so naa ini yo nde'e yo taka chaa ka jajniñu nuu ja'u'u un, chi xnda'u da maa da ja chaa jika ndaa kuiti kuu da. Ko chaa kivi ja ni'in da ya'u da siki jniñu ndeva'a ka sa'a da un.

### Nundo'o ni jito Pablo ja kuu da apóstol

<sup>16</sup> Inga jinu ka'an ri jiin ra naa ra ja ni iin ra tu kani ini ja chaa kaku'u kuu ri. Ko nu sia'an ka ndo'o ini ra, ti va kuanta'u ra ru'u jiin jnu'un ka'an ri nanu iin chaa kaku'u nusa. Ti nu sia'an, va suni maa ri kusii ti'l'i ini ri nanu ka sa'a uu ga chaa yukan. <sup>17-18</sup> Ja ka'an ri siukan, ko ansu ja ni ka'an maa Jito'yo kuu ja ka'an ri, chi sa nanu chaa iyo ñaa xini, sia'an ka'an ri ja kusii teyii ini ri nusa. <sup>19</sup> Ti kanu ini ri ro'o naa ra, chi va'a ka janta'u ra nuu chaa ka ñaa xini, chi ndixia ra ja chaa ndichi xini ka kuu ra, chi tu'va xaan ra naa ra. <sup>20</sup> Ko janta'u ra taka chaa un ja ka chayika da ro'o ja na kunukuachi ra nuu da, jiin taka chaa ka chayika ro'o ja ña kua'a ra taka ja nandi'i da ja kuchaku da. Suni ka janta'u ra taka chaa un ja ka xnda'u da ro'o jiin jnu'un ka'an da. Ti nu chaa un sa'a ña'nua da maa da nuu ra ti vasu na kua'a da jiki nuu yiki nuu ra, va kuanta'u ra chaa un. <sup>21</sup> Ti vasu kukanuu ri ja kachi ri, ko na kachi ri ja va tu kuña'nua ri ja kusii teyii ini ri nanu ka sa'a taka chaa un.

Ko vijna ti nu iyo sava chaa ka chundee ini da ka'an da ja kusii teyii ini da nua da, ti suni na chundee ini tu maa ri nusa. Ti na ka'an ri nanu ka ka'an chaa un ja ka'an da nanu chaa ñaa xini. <sup>22</sup> Ti nu kusii teyii ini da ja se'e nación Israel ka kuu da, ti suni ru'u. Ti nu kusii teyii ini da ja kuu da jna'an tata Abraham na jana'an, ti suni ru'u. <sup>23</sup> Ti vijna ka'an ri nanu ka'an chaa ñaa xini un, chi na kachi ri ja kusii teyii ini ri ja junukuachi ri nuu maa Cristo. Ti chaa ka xndoña'an un ka ka'an da ja ka junukuachi da nuu Cristo, ko ru'u vi'i ga ka'an ndaa ri ja junukuachi ri nuu ya, chi vi'i ga sajniñu ri ansu taka ga chaa un. Ti tijni ga jinu ni kani yivi ru'u. Suni tijni jinu ni ja'an ri vekaa. Ti suni tijni jinu ni ka kuni ka'nii yivi ru'u ja na kuu ri. <sup>24</sup> Ti jna'an ri chaa hebreo un, u'un jinu ni ka kani da ru'u jiin yo'o ñii, iin ku'va oko xia'un kuun jinu ni ka ja'a da siki ri taka jinu. <sup>25</sup> Uni jinu ni ki'in ri yujnu xii. Ti iin jinu ni ka ja'a da yuu siki ri. Uni jinu ni kee ka'nii barco ri chii nducha mar un. ñuu jinu iin nduu ni ka yosojnene ri undi sava kuiti mar un. <sup>26</sup> Ti siki jniñu ndiso ri, tijni jinu jito ri nundo'o ja jika ri ichi. Ti ni kaku ri nuu taka yucha na'nun un. Ti ni kaku ri nuu taka ñakui'na. Suni ni kaku ri nuu yivi nación ri jiin yivi ñuu jika. Ni kaku ri nuu yivi ñuu ja ni ka ndondaa siki ri. Suni ni kaku ri nuu yaku ri nuu ñu'un te'e, jiin nuu jika ri nuu nducha mar ti suni ni kaku ri. Ti suni ni ndo'o ri siki jniñu kue'e ja ka sa'a jna'an ri hebreo ja ka xndoña'an da. <sup>27</sup> Kua'a nundo'o ni jna'an ri ja ni ndi'i ini ri. Kua'a jinu ni ja'nii ri maa ri jiin ma'na ja tu ni kixi ri. Ni jii'r i soko. Ni ichi ri nducha. Ti ja siki jniñu ndiso ri tijni jinu ni iyo ndicha ini ri. Tijni jinu ni kuita xaan ri. Ni ndo'o ri kajin ti ni kumani sa'ma nuu ri.

<sup>28</sup> Ti siki taka nundo'o ni ndo'o ri yukan, chi iyo ga. Ko ndi kivi nakani ini ri, ti jitu ini ri ja kuu taka yivi kandixia. <sup>29</sup> Ti nu iyo iin yivi ma'fū yivi un ja tu kuni siuku ndaa i jnu'un Yandios siki Cristo, ko ndo'o xaan ini ri ja kuu i. Ti nu iin yivi un na kanakava i nuu kuachi ja sa'a inga yivi, ti kondo'o ri jnu'un kanuu jiin jnu'un kuiti ini.

<sup>30</sup> Ti nu kanuu ja kusii teyii ini ri, nusa ti na kusii teyii ini ri siki taka nundo'o yukan ja ni ndo'o ri, ti na siuku ri jiin jniñu ndiso ri nuu Yandios, chi taka nundo'o un xna'an ja tu iyo ndee ini maa ri ja siuku ri jniñu un. <sup>31</sup> Ti Yandios, ja kuu Tata Jito'yo Cristo Jesú, jini va'a ya ja ka'an ndaa ri. Ti ja kuu taka saa ni na ka'an yivi ja ña'nú xaan ga kuu Yandios.

<sup>32</sup> Na ni kunde ri ñuu Damasco, ti gobernador ja ta'u jniñu ni regióñ nuu yinda'a rey Aretas, ti ni jani da soldado ka ndito va'a taka yux'e nama ja jikonduu ñuu un, ja jnii da ru'u ja ki'in ri vekaa niku. <sup>33</sup> Ti ni kivi ri ini iin chika ka'nu, ti yivi ka kandixia un, ni ka tava i ru'u yu'u ventana iin ve'e ja iyo siki nama un, ti ni skuun i ru'u jiin chika un. Ti siukan ni kaku ri nuu chaa yukan, ja ni ndo'o ini da ja jnii da ru'u niku.

### *Ja ni naxna'an Yandios nuu Pablo ja na stuu da nuu yivi*

## 12

<sup>1</sup> Ti ru'u Pablo, kachi ri ja tundo ni jniñu ja kusii teyii ini yo, ko na kachi ri iin jnu'un siki iin ja ni naxna'an maa Jito'yo nuu ri. <sup>2</sup> Jini ri iin chaa kandixia Cristo, ti ni kuu xia'un kuun kuiya ja ni sa'a ya ja ni ndaa chaa un kua'an da undi andiv'i kuu uni. Ko tu jini ri nu ni ja'an da jiin yiki kuñu da xi tuu, xi ni xndoo da yiki kuñu da, tu jini ri. Maa Yandios kuu ja jini. <sup>3</sup> Ti jini ri chaa un, ti tu jini ri nu kua'an da jiin yiki kuñu da, tu jini ri. Maa Yandios kuu ya jini. <sup>4</sup> Chi ni sa'a ya ja ni nchaa chaa un nuu kanchuku ndiyi ni ka nanita'u. Ti ichi chukan ni jiniso'o da jnu'un ja tu kuu xndaku da nuu inga yivi. <sup>5</sup> Ti siki ja ni sa'a Yandios siukan jiin chaa un, kuu ja kusii teyii ini ri, ko siki maa ri, chi tu kusii ini ri. Ko ndixia ja kusii teyii ini ri siki taka nundo'o ni ndo'o ri un ja siuku ri jniñu ndiso ri, chi taka nundo'o un xna'an ja tu na jaa iyo ini maa ri ja siuku ri jniñu un. <sup>6</sup> Ko nu ka'an ri jnu'un siki maa ri ja kusii ini ri, ti ansu ja naa xini ri ja sa'a ri siukan, chi jandaa ndixia iyo jniñu ri ja kusii teyii ini ri. Ko tu sa'a ri, chi tu kuni ri ja kondo'o ini yivi ja kuña'nu ga ri ja ni jini i xi ja ni jiniso'o i ka'an ri.

<sup>7</sup> Ti siki ja ni xna'an ndijin Yandios ru'u kua'a ja vii xaan kaa nuu ni ndaa ri un. Ja yukan tu kuni ya ja sa'a ña'nú ri maa ri. Ja yukan ni ja'a ya iin nundo'o ja kondo'o yiki kuñu ri. Ti siki un ni ja'a ya jnu'un ja na sajniñu ja'u'u un, ja xndo'o ru'u nava tu sa'a ña'nú ri maa ri. <sup>8</sup> Ti uni jinu ni ka'an nda'u ri jiin Jito'yo ja na chajiyi ya un ki'in. <sup>9</sup> Ko ni ka'an ya jiin ri: "Tuu, chi tu kumaní ja kunda'u ini ri ro'o. Jandaa ndixia kuu un, chi nu jani ini yivi ja tu kundee i ja sa'a i jniñu, ja ta'u ri nuu i. Nusa ti sa'a ri ja ni'in ga i jnu'un ndee ini i nava na siuku i jiin jniñu un", ni kachi ya. Ja yukan ti kusii ini ri ja ndo'o ri nundo'o nu sa'a ri jniñu un, chi siukan sa'a Cristo ja vi'i ga na kuni ini añu ri sa'a ri jniñu ni ja'a ya nuu ri. <sup>10</sup> Ja yukan kuu ja kusii teyii ini ri ja ndo'o ri nundo'o ni siukan ri jniñu un. Ti siki jniñu un ka'an kue'e i siki ri, jiin ja iyo kua'a ja tu kumaní, nau ni jiin ja jito u'u yivi ru'u, jiin taka ga nundo'o kondo'o ri siki Cristo. Chi nu jani ini ri ja tu kuiti ja siuku ri jiin jniñu un, ti kivi un sa'a ya ja ni'in ri jnu'un ndee ini ja kundee ri.

### *Ndi'i ini Pablo siki yivi ka kandixia ñuu Corinto*

<sup>11</sup> Yukan ti ka'an ri nanu iin chaa ñaa xini ja ni kusii teyii ini maa ri nusa. Ti siki ja tu ni ka kandixia ra ru'u, ti ja yukan ni sa'a ri siukan. Chi kanuu

ja ni ka'an ra ja'a ri nuu chaa ka'an siki ri, ko tu ni sa'a ra siukan, vasu tu kumani kuiti siki jniñu sa'a ri nuu jniñu ka sa'a chaa ka ka'an ja ka kuu da apóstol kuña'nu ga. <sup>12</sup> Chi ni sa'a ndixia ri tijni jniñu ña'nú nu ni kuncha ri jiin ra ini ñuu Corinto yukan, ti jiin jniñu un ni ja'a ri jandaa ja kuu ri apóstol ndiso jniñu nuu Yandios. Chi jniñu ña'nú un ni ja'a jandaa ja maa Yandios ni tají ya ru'u, jiin ja ni naa ini yivi ja ni jini jniñu ña'nú un, jiin ja xna'an ja kuña'nu xaan ga Yandios, ja ni ja'a ya jniñu un nuu ri ja na ka'an ri jnu'un ya. Ti ni siin ri jiin jniñu un nuu ra naa ra vasu na koo ndo'o koo nene ri ja na siuku un. <sup>13</sup> Vasu ni sa'a ri jniñu un, ko tu ni sa'a ri nanu ni sa'a ri nuu uu ga yivi ka kandixia, chi tu ni jikan ri nuu ra ja kuchaku ri. Ja yukan tu ni kundee iin nuu ra jiin uu ga yivi ka kandixia un ja ni ja'a ja kuchaku ri. Ti saka'nú ini naa ra nu siukan ni sa'a ri kuachi, ja tu ni jikan ri nuu ra naa ra ja kuu ja kuchaku ri un nusa.

<sup>14</sup> Vijná ti iyo tu'va ri ja jaa nde'e ri ro'o naa ra jinu kuu uni. Ti suni tu kakan ri nuu ra ja kuu kuchaku ri, chi ansu yukan kuu ja kuni ri, chi sa ja kanuu ga un jitu ndi'i ini ri na kendo va'a ra nuu Yandios. Yukan ka'an ri, chi ka kuu ra se'e ri ja jitu ndi'i ini ri, ti se'e ansu kanuu ja nakaya i ja kuu tata i. Chi su'va tata un kanuu ja kua'a da ja nandi'i se'e da. <sup>15</sup> Ja yukan kuu ja ka kuu ra nanu se'e ri, ti nu kuaja ri yukan, ti kusii ini ri ja vi'i ga sajñiñu ri jiin ni ini ni añu ri jiin ra naa ra. Ti sia'an ndiyo ini ri sajñiñu ri undi tukaa kundee ri siin ri, chi jitu ndi'i ini ri siki ro'o naa ra ja na kendo va'a ra nuu Yandios. Ti vasu siukan kunda'u ini ri ro'o naa ra, ko ro'o ti'lí ni ka kunda'u ini ra ru'u.

<sup>16</sup> Ti iyo jaku ra un ja ka'an ja vasu tu ni jikan ri nuu ra ja kuu kuchaku ri, ko chaa xndoña'an kuu ri, chi ni nduku ri nasa ndichi ja ni'in ri xu'un ra, chi sia'an ka ka'an sava ra. Ko tuu. <sup>17</sup> Ti ru'u Pablo, jikajnu'un ri ro'o naa ra, chaa ni tají ri un, iyo iin da ja ni xnda'u ro'o naa ra ja keni'in da xu'un ra ja kuu maa ri nu? Ko tu kuiti. <sup>18</sup> Ti ni ka'an nda'u ri jiin Tito ja kuan nde'e da ro'o naa ra, ti ni tají ri inga ñani kandixia ni jaa jiin da. Ti jikajnu'un ri ro'o, ñi xnda'u Tito ro'o naa ra ja ni keni'in da xu'un nuu ra ja kuu maa da xi nau? Tuu, chi iin nuu ni ka sa'a ndinduu ri, chi iin ni ichi ka jika ri.

<sup>19</sup> ¿Ti siki taká jnu'un xndaku ri ja'a, ka janí ini ra ja na nduku ri ka'an ri ja'a maa ri nu? Ko ansu siukan kuu, chi ja jini Yandios ja ka'an ri mani jnu'un ja kuni Cristo. Ti jini ya ja kunda'u ini ri ro'o, ñani. Ti siki un xndaku ri jiin taká jnu'un ja'a nava na kendo'o ini ra naa ra ja jiin jnu'un Yandios. <sup>20</sup> Sia'an siin xndaku ri, chi yu'u ri ja chaa ri nuu ra, ti sanaa ti kuni ri ja tu ka sa'a ri jniñu va'a ja jajna'an ini ri. Ti ro'o naa ra, suni tu jajna'an ini ra nu iyo ja nduxaan ri nuu ra. Chi sanaa ti kanaa ra, xi kukuasun ini ra, xi kuiti ini ra, xi sasiin jna'an ra, xi chakuachi ra siki jna'an ra, xi ka'an ndeva'a siki jna'an ra, xi nduvixi ra maa ra ja tu kejna'an jiin jniñu ka sa'a ra. <sup>21</sup> Ti yu'u ri ja nu na chaa tuku ri, ti kua'a Yandios jnu'un kanuu ini ri siki jniñu kue'e ka sa'a ra. Ti kukui'ya ini ri nu iyo kua'a ra ja ni ka nhakuachi undi nuu, ti tu ja'i nakani ndi'i ini ra ja xndoo ra jniñu kue'e un, jiin yivi ja ka yisikinchaa jna'an siki jnu'un siin, jiin sava'ni ga nuu jniñu kue'e ka sa'a ra un, ja tu ja'i naa ini ra.

### Kanxia'u Pablo jiin jnu'un xndaku da sandi'i ni ga

## 13

<sup>1</sup> Ja'a kuu uni jinu ja kuan nde'e ri ro'o naa ra. Ti na sa'a ndaa yo jniñu ja ka'an tutu ii Yandios. Jiin jnu'un uni testigo ti kundaa taká jniñu. <sup>2</sup> Ti ndixia ja ja ni xndaku ni'in ri nuu yivi ka sa'a kuachi un, ti suni sia'an nuu sava ga i. Ti vijná vasu jika kancha ri jiin ra, ko nu na jaa ri inga jinu, ti tukaa

kuanka'nu ini ri nuu i jiin kuachi i. <sup>3</sup> Ti iyo ichi ri ja sa'a ri sia'an, nusa ti na kondaa ja mani ka'an ri jiin jnu'un ni ja'a Cristo. Ti nu ka'an ri mani jnu'un ni ja'a Cristo, nusa ti na xna'an ri jniñu ña'nú ja sa'a ya jiin ri ja xndaku ri, nuu ra jiin jnu'un ja nduxaan ri. <sup>4</sup> Chi vasu ni iyo vita ini Cristo ja tu ni xna'an ya jniñu ña'nú ya na ni ji'lí ya nuu nda'a cruz, ko vijna ti chaku ya siki jniñu ña'nú ni sa'a Yandios jiin ya. Ti suni siki ja yi'lí ri jiin ya, ti iyo vita ini ri ja tu ja'i ni nduxaan ri jiin ra naa ra. Ko vijna nu na jaa ri nuu kanchuku ra ñuu Corinto, ti suni na xna'an ri nuu ra ja ndiso ri jniñu ña'nú ja ni ja'a Yandios nuu ni kancha ri ñuyivi ja'a.

<sup>5</sup> Ko vijna na kachi ri nuu ra naa ra, ja na nduku ndee ra nu ka kandixia ndaa ra jnu'un Yandios siki Jesúxi tuu. Ti na sa'a va'a ra nava ndiyo ini ra siuku ra jnu'un un, nava tu jna'nú ndatu ra nuu Yandios. ¿Xi tu ka jini ra ja Cristo Jesúxi kancha ya jiin ra naa ra siki ja ka kandixia ra maa ya nu? Ti nu ka kandixia ndaa ra jnu'un Yandios siki Cristo Jesúxi, nusa ti tu jna'nú ndatu ra nuu ya. <sup>6</sup> Ti maa ra naa ra, nu sa'a va'a ra un, nusa ti ñu'un ini ri ja na kuni ra ja suni iyo jnu'un ka'nú ini Yandios, ja ni tatu ya nuu ri iin jniñu ña'nú, ja kuu ri iin apóstol ni taji ya. <sup>7</sup> Ko ja kuu maa ra naa ra, jikanta'u ri nuu Yandios ja tu ka sa'a ra ni iin jniñu kue'e ja nandi'i nundo'o. Ko tu jikanta'u ri un naya na kuni ra ja kendo va'a maa ri nuu Yandios, jiin ja ni tatu ya ru'u jiin iin jniñu ña'nú. Tu kuni ri un. Mani jikanta'u ri nuu Yandios ja kuu maa ra, ja ka sa'a ra mani jniñu va'a ja kuni maa ya. Mani yukan kuni ri, vasu nu kundee ra un xi tuu, ti kendo ri nuu ra nanu chaa ja tu ndiso jniñu ña'nú nuu Yandios. Chi nu sa'a ra mani jniñu ndaa yukan, nusa ti tu iyo ichi ja nduxaan ri jiin ra siki jniñu ña'nú ndiso ri nuu Yandios. <sup>8</sup> Chi nu ka sa'a ra mani jniñu ndaa un, nusa ti tu iyo ja kankuachi ri siki ra, chi tu kasi ri jniñu ndaa, chi su'va siuku ri jiin jnu'un ndaa un.

<sup>9</sup> Ja yukan kusii ini ri ja vita ini ri, chi tu ndo'o ini ri ja xndaku ri nuu ra jaa nduxaan. Yukan kusii ini ri xna'an ri ja vii na sa'a ra mani jniñu va'a. Ti nini jikanta'u ri ja'a ra ja na kuixia ini ra jiin jnu'un Yandios. <sup>10</sup> Ti ru'u Pablo, chaa ri tutu ja'a nuu ra naa ra xnakan, ti sa na jaa ri nava nu na chaa ri, ti tu iyo ja nduxaan ri nuu ra naa ra. Chi ni ja'a Jito'yo jniñu ja'a ndiso ri, nava na sa'a ri ja na uixia ini ra jiin jnu'un ya, ansu ja sa'a ri ja na nandeokava ra jiin kuu, ti naa ra.

<sup>11</sup> Vijnati ru'u Pablo, ka'an ri jnu'un sandi'i ni ga ja'a nuu ra. Ti kachi ri ja na kosii ini ra. Ti na sandee ini ra naa ra jiin jnu'un Yandios siki ja taka ra na nduku ndee sa'a mani jniñu va'a. Ti na chaku va'a ini ra jnu'un ni chaa ri nuu tutu ja'a. Na koo iin nuu ini ra jiin jna'an ra, ti na kunchuku vii na kunchuku mani ra jiin ñanijna'an ra. Ti nu sia'an iyo ti na kuncha Yandios jiin ra, chi maa ni Yandios kuu ya kua'a jnu'un ndee ini nuu yo naa yo, chi mani maa ya kuu ja kunda'u ini yo'o.

<sup>12</sup> Kanxia'u jiin jna'an, ti yiñu'un teyu'u nuu jna'an ra.

<sup>13</sup> "Sa'a ndee ini naa ra", kachi taka ñani yo ka kandixia ja ka iyo ja'a.

<sup>14</sup> Ti ru'u Pablo ñukuu ini ri ja kancha ra jiin jnu'un vii ja kunda'u ini Jito'yo Cristo Jesúxi ro'o naa ra, ti siki yukan kusii xaan ini ya ja taji ya jnu'un ndee ini nuu ra. Suni ñukuu ini ri ja kancha jnu'un vii ja kunda'u ini Yandios ro'o naa ra, jiin ja kancha jnu'un vii ja ni nduu iin nuu ini ra jiin jna'an ra, siki ja taka ra ni ka ni'in Espíritu Santo ja kancha ya jiin ra vijna. Ti sia'an na koo.

## Carta ni chaa Pablo nuu yívi ndaňuu Galacia

### *Ja na sandee ini yívi ndaňuu Galacia*

<sup>1</sup> Ru'u Pablo, chaa ri tutu ja'a, ja kuu ri apóstol nuu Cristo Jesús ja ka'an ri jnu'un ya. Ko ansu yívi ni nakaji ru'u ja kundiso ri jniňu un. Ti ni ansu yívi ni xndaku nuu ri ja sia'an na ka'an ri. Chi su'va, maa Cristo Jesús jiin Tata yo Yandios, ya ni xnandoto Jesús nuu ñuji'i. <sup>2</sup> Tendi'i ñani yo ja kanchuku ja'a jiin ri, ka taji ri tutu ja'a nuu ra naa ra, ja ka kuu ra yívi ka kandixia ja kanchuku ndaňuu Galacia.

<sup>3</sup> Ti maa Tata yo Yandios jiin Jito'yo Cristo Jesús, na kunda'u ini ya, ti na chindee chituu ya ro'o naa ra ja na kukuee kunchuku ra, sia'an nava kuni maa ya. <sup>4</sup> Chi ja yukan ni soko Jesús maa ya, ja ni ji'i ya ja siki kuachi yo naa yo. Siukan ni sa'a ya ja ni nama ya yo'o nuu tako jnu'un kue'e ja iyo nuu ñuyiví ja'a, nava tukaa ga siin yo naa yo ja kunukuachi yo nuu tako jniňu ndeva'a un. Siukan ni sa'a Jito'yo Jesús, chi maa Tata yo Yandios ni ta'u ya jniňu ja sia'an na koo. <sup>5</sup> Ti na kanajaa yo Yandios ja vii xaan kuña'nu ya ja kuu tako saa ni. Siukan na koo jiin ya.

### *Jnu'un Cristo ja kandixia yo*

<sup>6</sup> So naa ini ri ja yachi xaan ka nduku ra xndoo ra ichi ndaa Yandios, ti ka kuni kandixia ra inga jnu'un siin ja tu kejna'an jiin jnu'un Cristo. Ko tu va'a ja ka sa'a ra sia'an ja ka kuni xndoo ra Cristo. Chi maa Yandios ni nakaji ro'o naa ra ja na kivi ra nuu nda'a ya siki ja ni kunda'u ini Cristo yo'o naa yo. <sup>7</sup> Ti na kachi ri ja tu kuiti naa inga jnu'un iyo ja nama Yandios yo'o. Ko yukan ka iyo jaku yívi ja ka ska'an i ro'o naa ra jiin jnu'un xnda'u i ja ka kuni nasama i jnu'un siki nasa nama Cristo yo'o. <sup>8</sup> Ko ru'u, ni xna'an ndaa kuiti ri jnu'un Cristo Jesús nuu ra naa ra undi nuu. Ko nu xna'an yo inga jnu'un ja tu iin nuu jiin maa jnu'un Cristo, xi iin ángel vají andiví na xna'an siin inga jnu'un, nusa ti na jna'nu ndatu yo naa yo jiin jnu'un un nusa. <sup>9</sup> Jnu'un ni xna'an ri nuu ra naa ra kivi undi nuu, ti iin ni kuu jnu'un xna'an tuku ri vijna. Ko nu iyo inga yívi ka xna'an inga jnu'un nuu ra naa ra, nusa ti yívi un tu xna'an ndaa i maa jnu'un Yandios nava ni xna'an ri nuu ra naa ra undi nuu. Nusa ti na jna'nu ndatu yívi un jiin jnu'un ka'an i.

<sup>10</sup> Jiin jnu'un ka'an ri ja'a, ¿Va nu ka ndo'o ini ra ja kuni kuña'nu ri nuu yívi naa i xino? Ko tuu, chi su'va kuni sa'a ri mani maa jniňu ja kuni maa Yandios. ¿Xi ka ndo'o ini ra ja kuni ri ja na kusii ini yívi jiin ri xino? Ko ansu sia'an kuu, chi nu na nduku ri ja na kusii ini yívi jiin ri, ti tukaa ga junukuachi ri nuu Cristo nuu sia'an na sa'a ri.

### *Nasa ni nduu Pablo Apóstol*

<sup>11</sup> Ñani naa ra, na kachi ri iin jnu'un nuu ra siki jnu'un va'a ja ni xna'an ri, chi tu iin ni kuu jiin jnu'un ka ka'an yívi ñuyiví ja'a. <sup>12</sup> Chi ni iin yívi tu ni xna'an i jnu'un un ru'u. Ni ansu yívi ni xna'an jnu'un un nuu ri ja ni kutu'va ri. Chi su'va, maa Jesús, ya kuu Cristo, ni xna'an ya nuu ri na ni ka'an ya jiin ri. <sup>13</sup> Ka jini va'a ra nasa ni kuncha ri undi nuu, chi kuu ri chaa hebreo ja ni chiňu'un ri Yandios nanu yívi hebreo. Ti ka jini ra ja ndeva'a xaan ni sa'a ri siki yívi ka kandixia Jesús. Ti ni'in xaan ni nduku ndee ri ja xnaa ri yívi

kandixia un niku. <sup>14</sup> Chaa tu'va xaan ga ni kuu ri jiiñ sa'an yivi hebreo ja kuu taka ga chaa nación ri, ja iin nuu ni ka ja'nú da jiiñ ri, chi ni ndi'i xaan ga ini ri ja koto va'a ri ichi ni ka ñava'ta tata ri, nava tu naa. <sup>15</sup> Ti vasu siukan iyo, ko Yandios ja ni nakaji ya ru'u undi na changa ga kaku ri ja na kundiso ri jniñnu yá. Ti vasu tu ni iin jniñva'a ni sa'a ri, ko ni kunda'u ini ya ru'u. Yukan kuu ja ni nakaji ya ru'u. <sup>16</sup> Yukan ti ni kuni ya ja na chaku inijnuni ri nau kuu maa Se'e ya. Chi sia'an ni kuni ya ja na ka'an ri sivi Se'e ya nuu yivi inga nación. Sia'an ni sa'a ya jiiñ ri ja na chaku ini ri, ko tu ni ja'an ri nuu inga yivi ja xndaku nuu ri sikí NASA koo jnu'un ka'an ri. <sup>17</sup> Ni tu ni ja'an ri ñuu Jerusalén ja kin nde'e ri chaa ka kuu apóstol nuu Jesú, ja xnakan da ni ka kuu apóstol ansu ru'u. Chi sa su'va, ni nduku ndee ri ti yachi ni ja'an ri undi ndañuu Arabia. Yukan ti ni nandeokuñi ri undi ñuu Damasco.

<sup>18</sup> Ni ya'a uni kuiya ti sa ni ja'an ri ñuu Jerusalén, chi ni ndo'o ini ri ja kuni ri nuu Pedro. Ti yukan ni kuncha ri xia'un ni kivi jiiñ da. <sup>19</sup> Suni ni jini ri Jacobo, ñani Jito'yo Jesú. Ko tu ni jini ri inga chaa kuu apóstol yukan. <sup>20</sup> Ti jini va'a maa Yandios ja tu xnda'u kuiti ri jnu'un chaa ri. Ja yukan taka jnu'un chaa ri ja'a kuu jandaa.

<sup>21</sup> Yukan na ti ni ja'an ri nuu ndañuu Siria. Suni ni ja'an ri nuu ndañuu Cilicia. <sup>22</sup> Yukan kuu ja yivi ka kandixia Cristo ja kanchuku i ndañuu Judea, kivi un changa ga kuni i nuu ri. <sup>23</sup> Chi mani jnu'un ni ka ni'in i ja ni ka kachi uu ga yivi: "Chaa ni sa'a ndeva'a jiiñ yo undi nuu, vijna ti suni xna'an da jnu'un Jesú nava ka kandixia yo, ja xnakan ni nduku da xnaa da jnu'un un niku", ni ka kachi i. <sup>24</sup> Ti ni ka kanajaa i Yandios ja ña'nú xaan kuu ya ja sia'an ni sa'a ya jiiñ ri.

### Ni ka janta'u uu ga apóstol nuu Pablo

## 2

<sup>1</sup> Yukan ni ya'a uxi kuun kuiya ti sa ni ja'an tuku ri ñuu Jerusalén. Ti ni kunduu Bernabé jiiñ ri, ti suni ni ka yinda'a ri Tito. <sup>2</sup> Ni ja'an ri chi ni kachi Yandios ja na ki'in ri. Ti yukan ni ka ndututu siñ mani maa chaa ka kuña'nu nuu yivi ka kandixia. Ti ni nakani ri jnu'un ri nuu da naa da sikí jnu'un ka'an ri nuu yivi inga nación, ja yivi un tu ka jini kuiti i jnu'un Yandios. Siukan ni kachi ri nuu da naa da nava na kujnuni ini da ja siukan kuu jniñsa'a ri. Ti ni ka janta'u da ru'u. Ja yukan tu ni kendo ka'a jniñsa'a ri ja ni ka'an ri undi nuu.

<sup>3</sup> Ti yukan ni kuncha Tito jiiñ ri. Vasu tu ni kuu da maa chaa hebreo, ko tu ni kachi chaa ka kuña'nu un ja na chiñu'un da ichi yivi hebreo, ja ni'in da iin seña nuu yiki kuñu da. Tu kuiti ni ka ka'an da un. <sup>4</sup> Ti tijñi yivi ja tu ka kandixia ndaa maa Cristo ni ka kivi da yukan, ko ni ka kivi da so ja kuni da nde'e da nasa ka chiñu'un yo Yandios, nu siin yo jiiñ ichi chaa hebreo un xi tuu. Ko tukaa chayika ley jana'an un yo'o ja na siuku yo taka ichi un, chi ja ni jiñsa Cristo Jesú iin ichi jaa ki'in yo. Ko uu ga yivi un tu ka kandixia i sia'an. Ti ka kuni i chayika i ru'u naa ri ja na chiñu'un ri ichi chaa hebreo. <sup>5</sup> Ko ni iin ti'li tu ni ka janta'u kuiti ri nuu yivi un ja chayika i yo'o naa yo, ja siuku yo ichi yivi hebreo un. Siukan ni ka sa'a ri nava na kuñi maa jnu'un ndaa sikí Cristo Jesú jiiñ ra naa ra.

<sup>6</sup> Sa su'va maa chaa ka ndisojniñu ña'nú nuu yivi ka kandixia un, tu ni xndaku da nuu ri ja na xna'an ri ichi un. Ti ni inga jniñja, tukaa ni kachi da ja sa'a ri. Ti vasu chaa ña'nú ka kuu da, ko tu ni yu'u ri ja ka'an ndaa ri jnu'un nuu da. Tu ni yu'u kuiti ri, chi iin ni ka kuu tendi'i yivi nuu Yandios. Ja yukan tu nau inga jnu'un ni chayika da naa da ru'u ja sa'a ri. <sup>7</sup> Su'va ni ka nakuni

ndaa da ja maa Yandios ni tatu ya jniñu ja'a nuu ri, ja na ka'an ri jnu'un ya nuu yivi inga nación nanu ni tatu ya jniñu nuu Pedro ja na ka'an da jnu'un ya nuu maa yivi hebreo. <sup>8</sup> Sia'an ni nakuni ndaa chaa ka ndisojoniñu un, ja maa Yandios ni ja'a jniñu nuu Pedro ja na kuu da apóstol, ti ka'an da jnu'un Cristo nuu yivi nación hebreo. Suni sia'an ni nakuni ndaa da ja maa Yandios ni ja'a jniñu nuu ri ja na kuu ri apóstol nuu ya, ti ka'an ri jnu'un Cristo nuu yivi taka ga nación. <sup>9</sup> Ja yukan kuu ja Jacobo, Pedro, jiin Juan ni ka jini ndaa da ja maa Yandios ni ja'a jniñu nuu ri, chi iyo va'a xaan jniñu ni tatu ya ja sa'a ri. Vasu ka ka'an yivi ka kandixia ja maa da naa da kuu chaa ka kuña'nu ga, ko ni ka jniñu da nda'a ri jiin Bernabé. Yukan ni kundaa ja iyo jnu'un mani ini jiin ri, chi ni kundaa ini da naa da ja na kin ka'an ri jnu'un Cristo nuu yivi taka ga nación, ti maa da naa da na ki'in da jiin jnu'un ya nuu mani yivi hebreo. <sup>10</sup> In jnu'un ni ka tatu da nuu ri kuu ja na koto va'a ri nuu yivi nda'u, ti na chindee ri i. Ti suni maa ri, ñukuu ndaa ini ri ja sia'an kin koto va'a ri nuu yivi nda'u naa i.

### *Kanajiin Pablo nuu Pedro*

<sup>11</sup> Yukan ti na ni jaa Pedro ñuu Antioquía iin jinu, ni kanajiin ri nuu da, chi ni yuji da jiin iin jniñu sa'a da. <sup>12</sup> Xnakan iyo va'a xaan jniñu sa'a da niku, chi yaji da staa jiin yivi inga nación. Ko ni jakoyo uu xi uni chaa ni taji Jacobo. Ja yukan tukaa ni yaji Pedro staa jiin yivi inga nación un, ti ni kuxio da kua'an da. Tukaa ni yaji da staa jiin yivi un, chi yu'u da sa kuni chaa ni jakoyo un ja tukaa ga siuku da ichi yivi nación hebreo. Ti yukan ka'an da siki da. <sup>13</sup> Ti uu ga chaa hebreo un ja suni ka kandixia da, ni ka jajnu'un da Pedro ja tu yaji da staa jiin yivi inga nación un. Ti suni undi Bernabé suni sia'an ni sa'a da ja ni kejna'an da jiin Pedro. <sup>14</sup> Ti ru'u Pablo, nu ni jini ri ja tu iyo va'a nava sa'a Pedro, ti ni kanajiin ri nuu da nuu ni ka ndututu ri. Sia'an ni sa'a ri nuu taka ga ñani jna'an ri un, chi tukaa siuku ndaa da maa jnu'un Yandios, ti ni kachi ri jiin Pedro: "Kuu ra chaa nación maa yo ja kuu hebreo, ti tukaa siuku ra ley jana'an un, chi kuu kaji ra staa jiin yivi inga nación un. Ko siki ja ni kuxio ra kua'an ra, ti vijna ?xi kuni xndaku ra nuu yivi inga nación un ja na siuku i ley chaa hebreo xino? Xi nu sia'an kuni ra sa'a ra, ko ni maa ra tu siuku jnu'un un." Siukan ni kachi ri nuu Pedro na ni ka ndututu yivi ka kandixia un.

<sup>15</sup> Yo'o, chi ka kuu yo maa chaa nación hebreo, ti undi nuu ni kachi yo ja tu ka sa'a yo kuachi nanu maa yivi taka ga nación ja ka nchakuachi i. <sup>16</sup> Ko tukaa vijna. Chi yo'o ja ka kuu yo yivi hebreo, ka jini ndaa yo ja tu kendo ndaa nuu Yandios ja siuku yo jniñu ta'u ley Moisés. Chi ansu kachi Yandios ja tukaa jna'nu ndatu yo jiin kuachi yo nu na kuandatu yo ley un, chi mani maa ja na kandixia ndaa yo jniñu ña'nu ni sa'a Jesús, ya kuu Cristo. Yukan kuu ja yo'o ja ka kuu yo yivi hebreo, tu iyo inga ichi, chi maa iin ni ja ka kandixia yo Cristo Jesús. Siki yukan ti kachi Yandios ja tukaa ga jna'nu ndatu yo jiin kuachi yo, ansu ja siuku yo maa ley Moisés. Chi kachi nuu tutu ii: "Ni iin yivi tu kendo ndaa i nuu Yandios siki ja siuku i maa ley Moisés", kachi tutu.

<sup>17</sup> Ti yo'o naa yo, yivi hebreo, nu ka kandixia ndaa yo ja ni ji'l Cristo ja'a yo, nusa ti ka ñukuu ini yo ja kachi Yandios ja tukaa ga jna'nu ndatu yo jiin kuachi yo. Ti vasu kandixia yo Cristo, ko nini iyo iin jnu'un ini yo ja sa'a yo kuachi nanu yivi taka ga nación. Nu sia'an kuu, ¿ti ndixia ja skivi Cristo yo'o nuu kuachi nu? ¡Tu kuu kuiti! Chi tu kuu kuiti kachi yo ja ni skivi Cristo yo'o nuu kuachi, chi maa ya tu yi'i ya jiin kuachi. <sup>18</sup> Tu kachi kuiti yo ja Cristo ni skivi ya yo'o nuu kuachi. Ko nu na nandeokuñi tuku ri ja xna'an ri ley Moisés ja ni xndoo ri undi nuu, ti sakanuu ri inga jniñu jiin maa jniñu ni sa'a Cristo ja'a ri. Nu siukan ti nduni'in ini ri siki maa Yandios, chi vijna ni ja'a ya inga ley ja

kachi ja kandixia yo Cristo sia'an ni. <sup>19</sup> Undi nuu, su'va ni nduku ndee ri ja siuku ri maa ley Moisés, ko ansu ja sia'an ni sa'a ri ti ja ni kendo ndaa ri nuu Yandios. Ko tuu, chi vijna kuu ri nanu ja ni ji'i ri nuu ley. Tukaa yinda'a ley ru'u. Sia'an kuu nava na kuchaku ri ja na sa'a ri nava kuni Yandios. <sup>20</sup> Kuu nanu ja ni ji'i Cristo ja'a ri, ti yukan tukaa ga nandeokuñi ri sa'a ri nanu ni sa'a ri undi nuu. Vijna na sa'a ri nava kuni maa Cristo, chi kancha ya jiin ri. Ti ni kancha ri nuu ñuyivi ja'a, kandixia ndaa ri nuu maa iin ni Se'e Yandios. Chi mani maa ya kuu ja ni kunda'u ini ya ru'u, chi maa iin ni ya ni ji'i ja kuu maa ri. <sup>21</sup> Ni tu kuu kasi kuiti ri jnu'un Yandios ja kunda'u ini ya yo'o naa yo. Yukan kuu ja ni taji ya se'e ya ja ni ji'i ya ja'a yo. Chi nu jandaa ndixia ja kendo ndaa yo nuu Yandios siki ja siuku yo maa ley Moisés, nusa ti tu ni jniñu kuiti ja ni ji'i Cristo ja'a yo naa yo nusa.

### *Jnu'un ley jiin jnu'un kandixia*

## 3

<sup>1</sup> Ñani ja tu ka ndo'o va'a ini ra naa ra, ¿ndoo ni ka sana xini ra? ¿Xi nau yivi ni xnda'u ro'o naa ra nu? ¿Nasa kuu ja tu ka jandatu ra nuu maa jnu'un ndaa Yandios, maa jnu'un ndaa ja ni ka ka'an ri nuu ra naa ra? Chi ni ka'an kají ri maa jnu'un Cristo ja ni ji'i ya nuu nda'a cruz ja kuu maa yo naa yo. <sup>2</sup> Vijna ti na kachi ri iin jnu'un nuu ra. Ni ka ni'in ra Espíritu Santo ja kuncha ya jiin ra siki ja ni ka kandixia ra maa Cristo Jesú, ti ansu ja kuandatu ra nuu ley Moisés. <sup>3</sup> Xaan ga ni ka sana inijnuni ra ja ni ka ndunii'n xaan ini ra vijna. ¿Xi ka ndo'o ini ra ja sa'a ra mani jniñu ja ta'u ley Moisés, ja sia'an na kendo ndaa ra nuu Yandios? Va tu chaku ini ra ja maa Espíritu Santo ni sama ya inijnuni ra, ti maa Espíritu ya kuu ja chindee yo'o ja na kundee yo siuku ndaa yo jnu'un ya, ansu ja siin yo jiin ley Moisés. <sup>4</sup> Xaan ga kua'a nundo'o ni ka jito ra ja ni ka sa'a yivi jiin ra, siki ja ni ka kandixia ra maa Cristo Jesú. ¿Ni ka ndo'o ka'a ra nundo'o un nusa? <sup>5</sup> Ko tuu, chi maa Yandios ni taji Espíritu Santo kuncha ya jiin ra. Ti maa ya kuu ja sa'a jniñu ña'nú un jiin ra naa ra. Chi na ni ka jiniso'o ra jnu'un Jesú, ya kuu Cristo, ti ni ka kandixia ra. Ko ni tu sa'a kuiti ya sia'an nu na siin ra jiin jniñu ta'u ley Moisés.

<sup>6</sup> Suni sia'an ni kandixia chaa ña'nú Abraham maa jnu'un ni chisojnu'un Yandios nuu da. Ja yukan ni janta'u Yandios maa da, ti ni kachi ya ja tukaa ga jna'nú ndatu da jiin kuachi, nava na kendo ndaa da nuu ya. <sup>7</sup> Ja yukan na chaku va'a inijnuni ra ja yivi kandixia ndaa kuiti jnu'un Yandios, ti janta'u Yandios maa i ti skonani ya maa i jna'an Abraham. <sup>8</sup> Sia'an yoso nuu tutu ii Yandios najana'an, ja ndumani ya jiin tendi'i yivi taká nación ja tu ja'i nakuni i jnu'un ya, ko ndumani ya jiin yi, ti tukaa ga jna'nú ndatu i jiin kuachi i nu na kandixia ndaa i jnu'un ya. Chi sia'an ni ka'an Yandios jnu'un va'a un jiin chaa ña'nú Abraham ja ni kachi ya: "Kandichi ri jiin yivi taká ga nación nu na kandixia i jnu'un ri nanu ni kandixia maa ra ti tukaa jna'nú ndatu i", kachi ya. <sup>9</sup> Ja yukan kancha Yandios jiin tendi'i yivi ka kandixia jnu'un ya, sia'an nanu ni kuncha ya jiin chaa ña'nú Abraham, chi ni kandixia ndaa da jnu'un ya.

<sup>10</sup> Ko yivi ja xndaku ja na siuku yo ley Moisés, na kachi ri ja ja ni jna'nú ndatu yivi un, ja sia'an ka'an i. Ni jna'nú ndatu i chi sia'an kachi nuu tutu ii Yandios: "Nu tu siuku ndi kuiti ra jnu'un yoso nuu tutu ley, ti nu tu sa'a ra taká jniñu ta'u ley un, ti na jna'nú ndatu ra", kachi nuu tutu Yandios. <sup>11</sup> Tu kachi kuiti Yandios nuu ni iin yivi ja kendo ndaa i nuu ya ja sa'a i taká jniñu ta'u ley Moisés. Sia'an ka'an ri chi kachi nuu tutu ii Yandios: "Tukaa ga jna'nú ndatu yivi siki kuachi i nu na kandixia ndaa i nuu ri. Ja yukan kendo ndaa i nuu

Yandios ti kuchaku i jiin ri ja kuu taka saa ni", kachi ya nuu tutu ii. <sup>12</sup> Ko nu nau yivi na kuandatu ni ley Moisés un, ti tukaa kandixia i Cristo, chi sia'an kachi tutu ii: "Nu sa'a ndi kuiti ra taka ja ka'an nuu ley ja'a, ti keta'u ra ja kuchaku ra ja kuu taka saa ni, chi ni kundee ra ni siuku ndi'i ra taka jnu'un un", kachi tutu ii.

<sup>13</sup> Ko ja ka jini yo nava ka'an maa ley un ja jna'nun ndatu yo nu tu kundee yo siuku ndi'i yo jnu'un ka'an. Ti ja yukan ni chaa Cristo ja ni chunaa ya yo'o nuu jnu'un un, ja ni ji'i ya ja kuu maa yo naa yo. Chi ja siki kuachi yo ti ni jna'nun ndatu ya ja ni ji'i ya nuu nda'a cruz sia'an nanu kachi nuu tutu Yandios: "Na jna'nun ndatu taka yivi ja kundaka nuu iin yujnu, ja na kuta'u i jnu'un kanuu siki kuachi ni'in ni sa'a i", kachi tutu. <sup>14</sup> Ni kandixia Abraham Yandios. Yukan ti kachi ya ja tukaa jna'nun ndatu Abraham ja kuu kuachi da. Sia'an ni chunaa ya maa da. Ti siki jniñu ña'nun ni sa'a Cristo, yukan ni chunaa Yandios sava'ni ga yivi inga nación nu na kandixia i jniñu Cristo. Ja yukan tendi'i yo'o ja ka kandixia jnu'un ya, ni taji ya Espíritu Santo na kuncha jiin yo nava ni chisojnu'un ya undi nuu.

### *Jnu'un siki ley jiin siki jnu'un ja ni chisojnu'un ya*

<sup>15</sup> Ñani, na kachi ri iin jnu'un nasa sa'a yo naa yo, chi nu sa'a yo iin tratu siki iin ndajniñu ti jakava iin tutu. Ti nuu tutu un kua'a yo firma yo xi kua'a yo xini nda'a yo, ti jiin yukan ni kukutu tratu ni ka sa'a yo. Ti ni iin yivi, tu kachi ja tu njiniñu kuiti tutu un, vasu na kachi i ja na chiso i uu uni ga jnu'un nuu. Ko ja siki jnu'un ni chisojnu'un Yandios, jandaa ga kuu. <sup>16</sup> Chi undi na jana'an ni chisojnu'un Yandios nuu Abraham. Ti jnu'un un ni kundaa ndixia nuu maa iin ni jna'an da. Ko tu kachi kuiti nuu tutu ii ja siki tendi'i jna'an da ja vekoyo. Chi su'va kachi nuu tutu ja nuu maa iin ni jna'an da ja kii ni chisojnu'un Yandios. Ti jna'an Abraham ja kii ni kuu maa Cristo. <sup>17</sup> Ja yukan kuu jnu'un ka'an ri ja xnakan ni sa'a Yandios iin tratu jiin Abraham na ni chisojnu'un ya ja na kii Cristo. Yukan ti ni ya'a kuun ciento oko uxi kuiya, ti sa ni ja'a ya ley nuu Moisés. Ko ley un tu jasi nuu jnu'un ja siki Cristo ja ni chisojnu'un ya undi nuu na ni ka'an ya jiin Abraham. <sup>18</sup> Ko nini nuu yivi ka jandatu ley Moisés na kua'a ya ta'u i ja na kendo ndaa i nuu ya, yukan ti tukaa na kua'a ya ta'u nuu yivi ja kandixia i maa jnu'un ni chisojnu'un ya. Ko ansu sia'an ni chisojnu'un ya nuu Abraham. Tu ni kuu ni iin jniñu ni sa'a Abraham ja ni ni'in da ta'u un, chi mani ja ni kunda'u ini ya maa da. Ja yukan ni ja'a ya iin ta'u nuu da jiin jnu'un ni chisojnu'un ya nuu da jiin nuu maa iin ni jna'an da.

<sup>19</sup> Nu sia'an, ¿ti nasa kuu ja ni ja'a Yandios ley nuu Moisés nu? Vijnai na kachi ri nuu ra nasa ni jajniñu ley ni ja'a Yandios nuu Moisés. Chi ni xnukoo ya iin ley nuu yivi naa i ja na nakuni i kuachi i. Ti sia'an ni iyo ley un undi kivi ni kenda Cristo, maa jna'an Abraham. Chi ja siki maa jna'an Abraham un ni chisojnu'un Yandios na ni ka'an ya jiin da undi najana'an. Ti ángel ka junukuchi nuu Yandios ni ka nakua'a ley ya nuu Moisés, ti Moisés ni nakua'a ley un nuu yivi nación Israel. <sup>20</sup> Ko nu ni ka'an Yandios jiin Abraham tu ni jajniñu ya inga ja kancha ma'ñu sava, chi maa iin ni Yandios ni chisojnu'un ya nuu da.

<sup>21</sup> ¿Va nu ka ndo'o ini ra ja ka'an Yandios jiin uu inijnuni xino? ¿Va nu chajijo ya jnu'un ni chisojnu'un ya nuu Abraham jiin jnu'un ley ni ja'a ya nuu Moisés xino? ¡Ko tu sa'a kuiti ya sia'an! Chi ndinduu jnu'un ni ka'an ya un kejna'an, vasu jnu'un ni chisojnu'un ya nuu Abraham xi jnu'un yoso nuu ley ja ni ja'a ya nuu Moisés. Ndinduu jnu'un un kejna'an. Ko vasu sia'an kuu, ko tu ni kachi Yandios ja tukaa iyo kuachi i nuu yivi ja nanduku ndee i ka jandatu i ley, chi tu iyo ni iin ley ja kuandatu i ti kendo ndaa i nuu ya, jiin ja

kuchaku i jiin ya. <sup>22</sup> Ko tu kundee i siuku i jnu'un un, chi nuu tutu Yandios ja xna'an ley, suni ka'an ja tendi'i yivi ñuyivi ja'a iyo kuachi siki i. Ko kendo ndaa yivi nuu Yandios jiin jnu'un ni chisojnu'un ya najana'an, ti jnu'un un ka'an ja na kandixia yo maa Jesús, ya kuu Cristo. Ti ansu ja kundio ini yo kendo ndaa yo nuu Yandios nu na siuku yo ley Moisés. <sup>23</sup> Undi nuu ley un ni kuu nanu chaa ndito veekaa, chi tu ni kuu nanu ja sia yo nuu kuachi. Ti sia'an ni ka siuku yo undi ni chaa maa Cristo. Undi yukan ti sa ni ja'a Yandios inijnuni yo ja na kandixia ndaa yo maa Cristo. <sup>24</sup> Ti nanu iin chaa ja sajniñu ka'a, ti ni jito va'a da nuu se'e chaa xiin ve'e un, suni sia'an ni yinda'a ley un yo'o naa yo undi kivi ni chaa Cristo, sa ni ka kandixia yo maa jniñu ña'nú ni sa'a ya ja ni ji'i ya ja kuu maa yo naa yo. Ti nu na kandixia ndaa yo maa ya, yukan ti tukaa yinda'a ley un yo'o naa yo. <sup>25</sup> Ko vijna chi ja ni kii Cristo, ti tukaa ga yinda'a ley un yo'o, chi ja ni ka kandixia ndaa yo maa Cristo. Tukaa yinda'a ley un yo'o naa yo.

<sup>26</sup> Yukan kuu ja tendi'i ra kuu Se'e Yandios, chi ni ka kandixia ra nuu maa Cristo Jesús. <sup>27</sup> Ti taka ro'o ja ja ni ka janducha ni xna'an ra ja jandaa ndixia kuu ja ni ka ndivi ra nuu nda'a Cristo. Vijna ti kuñukuu ini ra ja na nduu ra nava kuu maa ya. <sup>28</sup> Ti tukaa ga kondo'o ini ra naa ra nu ka kuu ra yivi ñuu hebreo xi kuu ra yivi inga nación. Tukaa ga kondo'o ini ra ja kuu ra muzu ni ka jaan yivi, xi ja sajniñu ra ja kuu maa ra. Suni tukaa ga kondo'o ini ra nu kuu ra chaa xi ñasi'i. Tukaa ga kondo'o ini ra siki yukan, chi vijna iin ni ga ni ka kuu ra siki ja tendi'i ra ni naki'i nuu nda'a Cristo Jesús. <sup>29</sup> Nu kandixia ra Cristo, ti ka yi'i ra jiin ya. Ja yukan ka kuu ra se'e nuu tata yo chaa ña'nu Abraham, ti jandaa ja na ni'in ra naa ra maa ta'u ni chisojnu'un Yandios nuu da.

## 4

<sup>1</sup> Suni na kachi ri iin jnu'un. Nu iin tata na chisojnu'un da nuu iin se'e da ja kua'a ndi'i da ta'u i, ko suchi un kuu i nanu iin muzu ja sajniñu ka'a, chi tu ja'i ndivi nda'a i ta'u ni ja'a tata i. Ti jaa kivi ja naki'i nda'a i ta'u un. Vasu changa ga kinda'a i ti siukan kuu ja kuu i nanu iin muzu ja sajniñu ka'a nuu tata i. <sup>2</sup> Chi yivi ka jito ve'e tata i, ka yinda'a da maa i ja koto da i undi na jinu kivi kachi tata i. <sup>3</sup> Ti nanu suchi un ni kuu yo na changa ga kandixia yo Cristo. Ti kuu yo nanu suchi kuachi ja tu ja'i nakuni yo naa ichi ki'in nuu ñuyivi ja'a. Ti ka jandatu yo nuu sava'ni ga ichi, vasu tu kuu un maa jniñu ña'nu ja ni sa'a Cristo Jesús. Ti ni'in xaan ni ka junukuachi yo nuu ichi un. <sup>4</sup> Ko nu ni jinu kivi ni jani Yandios, ti ni kundaa jnu'un ya nu ni taji ya maa Se'e ya nuu ñuyivi ja'a ja ni kii iin ñasi'i sia'an ni. Ti ni kii ya nuu nación chaa hebreo ja ni ka junukuachi da nuu ley Moisés. <sup>5</sup> Siukan ni kii kaku ya nuu ñuyivi ja'a, ja ni kii chunaya ka kuachi yivi naa i ja ni ka yi'i i jiin ley najana'an un, nava na xndoo i ja ka'nú nuu ley un ti tukaa ga siuku i. Vijna ti tukaa ga kundatu yo inga ta'u, chi ja ni nakinse'e Yandios yo'o naa yo, ti vijna ja ni ni'in ta'u yo nuu ya. <sup>6</sup> Ti siki ja ka kuu yo se'e ya ni taji ya Espíritu Santo ja na kuncha ya jiin yo, ti Espíritu un kanajaa nuu Yandios ja'a yo, ti kachi ya: "Tata ri", kachi ya. <sup>7</sup> Nusa ti vijna tukaa kuu ra nanu iin muzu ja sajniñu ka'a nuu ley najana'an un. Vijna ti ni nduu ra se'e Yandios. Ti yukan kundio ini ra ja ni ni'in ra ta'u ja siki jniñu ña'nu ni sa'a Cristo. Na ni'in ra ta'u nuu ya nava ni chisojnu'un ya undi najana'an.

*Ndi'i ini Pablo nasa ka kuu yivi ka kandixia ini ñuu Galacia*

<sup>8</sup> Ro'o chaa ñuu Galacia, na kachi ri ja najana'an na ti nakuni ga ra maa jnu'un Cristo, ti ni ka nchañu'un ra santu ja ni ka sa'a yivi jiin nda'a i, vasu

tu ni kuu maa Yandios ndixia. Nanu iin muzu ja sajniñu ka'a, suni sia'an ni ka junukuachi ra nuu santu un. <sup>9</sup> Ko vijna ti ja ni ka chaku ini ra nau kuu maa Yandios. Chi maa Yandios ni kunda'u ini ya, ti ni nakana ya ro'o naa ra ja ka nduu ra se'e ya. Nu sia'an kuu, nusa ti ndoo ka sana xini ra vijna ja kuni nduu tuku ra nanu suchi yíki ja tu ja'i nakuni i ichi Yandios. ¿Xi kuni ndeokava tuku ra ja sajniñu ka'a ra nuu ichi najana'an un, ti xndoo ra ichi Yandios nu? ¿Xi ka kuni nduu tuku ra muzu nanu iin muzu ja sajniñu ka'a ti ka junukuachi nuu ley jana'an un nu? <sup>10</sup> Xi ka jani ini ra ja nita'u ra nuu Yandios ja ka chiñu'un ra tijní kívi ii, jiin tijní viko ja suni ka chiñu'un ra taka kívi ja nukoso yo, jiin taka kívi ja nukuiñi kuiya, vasu tu ni jniñu kuiti jnu'un un. <sup>11</sup> Ja yukan ndi'i xaan ini ri ja so ni xna'an ka'a ri jnu'un Yandios nuu ra naa ra.

<sup>12</sup> Nani naa ra, kanda'u ri jiin ra ja koto ma na kakayata ra ti siuku ra jnu'un ley Moisés nanu ka sa'a yívi nación Israel. Chi ru'u Pablo, ni xndoo ri taka jnu'un un, ti ni nduu ri nanu ro'o naa ra ja tu ka yi'i ra nuu nda'a ley un.

Ti suni nuku'un ini ri ja na ni kuncha ri jiin ra naa ra yukan, maní ja ni ka sa'a va'a ra jiin ri, ti ja yukan tu nau inga jnu'un ja ka'an ri siki ra. <sup>13</sup> Ti ka jini va'a ra nasa ni nakani ri jnu'un Yandios siki Cristo Jesús nuu ra naa ra undi saa. Siki ja ni ku'u ri jiin kue'e kuu ja ni kendo ri yukan, ti ni nakani ri jnu'un va'a nuu ra naa ra. <sup>14</sup> Vasu ni jna'an ri nundo'o ja ni ku'u ri, ko tu ni ka skexiko ra ru'u, ni tu ni ka keni'in ra ru'u ja na ki'in ri. Chi su'va ni ka janta'u va'a ra ru'u nanu ja kuu ri iin ángel ja junukuachi nuu Yandios. Ni ka janta'u ra ru'u na kaa ja maa ri kuu Cristo Jesús. <sup>15</sup> Ti vijna va tukaa ga iyo sia'an nusa. Va skexiko ra ru'u naa ra nusa. ¿Nachi kua'an ja sii xaan ni ka kuu ini ra jiin ri? ¿Ti nachi kua'an jnu'un ja va'a xaan ni ka chindee ra ru'u nusa? Undi nuu tu ni iyo ni iin jniñu ja tu ni ka sa'a ra ja kuu ru'u, undi nakua'ra nduchi ra nuu ri niku. <sup>16</sup> ¿Vijna ti xi ka ndo'o ini ra ja ja ni sama ini ri ja jito u'u ri ro'o naa ra nu? Va sia'an ka ndo'o ini ra, chi ka'an ri mani jnu'un ndaa nuu ra naa ra.

<sup>17</sup> Iyo yívi ja kuni ndumani jiin ra, ko ka kuni sa'a mani i jiin ra siki ja kuni xnda'u iro'o. Ka kuni i sasiin iro'o ja tukaa ka siuku ra jnu'un ni xna'an ri un, nava na kandixia ra taka jnu'un ka xna'an maa i. <sup>18</sup> Ti vatú ni ka sa'a mani jna'an ra jiin inga yívi vají i xna'an i nuu ra. Ko niní na kundio ini ra ja siuku ra jnu'un ndaa nanu maa jnu'un ni xna'an ri nuu ra, chi maa iin ni jnu'un ndaa kuu. Ja yukan niní na nde'e va'a ra taka kívi, ansu nu kancha ri jiin ra naa ra.

<sup>19</sup> Ja yukan na'nú xaan ini ri chi ka kuu ra nanu se'e ri. Na'nú xaan ini ri nanu iin ñasi'i nu kaku se'e ña. Ja yukan ndi'i ini ri ja ka kuni kandixia ra iin jnu'un siin ja tu kejna'an jiin maa jnu'un ndaa. Sia'an siin ri kunda'u ini ri ro'o undi kívi nakuni ndaa kuiti ri ja tendi'i ra naa ra ka kandixia maa iin ni jniñu ni sa'a Cristo ja'a ra naa ra, ti ansu ja kandixia ra inga jnu'un.

<sup>20</sup> Vijna ti ñukuu ini ri jaa ri nuu kanchuku ra ti ndajnu'un mani yo naa yo, chi jitú ndi'i ini ri nasa ka kuu ra naa ra, nu ka ñukuu ini ra jnu'un ni xndaku ri xi tuu.

### Siki jnu'un Agar jiin Sara

<sup>21</sup> Na kachi ndaa ri ñani naa ra, ja nu ka kuni siuku ra ley Moisés un, ¿chi va tu ka chaku ini ra nasa ka'an ley un nusa? <sup>22</sup> Chi kachi nuu tutu ii Yandios ja chaa ña'nú Abraham ni iyo uu se'e da. Iin yíi kuu se'e Agar, ña'an sajniñu ka'a ve'e da, ti inga yíi kuu se'e da jiin maa ñasi'i da Sara. <sup>23</sup> Ti se'e ña'an ja sajniñu ka'a ve'e da un ni kaku i nanu nava ka kaku yo'o naa yo, ko se'e maa ñasi'i da un ni kaku i siki jnu'un ja ni chisojnu'un Yandios ja na koo iin se'e Abraham jiin ñasi'i da.

<sup>24</sup> Jnu'un ka'an ri ja'a kuu uu jnu'un ja siin siin kuni ka'an. Chi siki uu ñasi'i un kuu ja ka'an siki uu tratu ni chisojnu'un Yandios. ñin tratu un kuu ja ka'an siki yuku Sinaí, chi yukan ni ja'a Yandios ley nuu Moisés najana'an. Jnu'un un ndakuni'in siki Agar chi se'e ña kuu muzu ja ka sajniñu ka'a i. <sup>25</sup> Agar kuu ña nanu ley Moisés ja ni ja'a Yandios undi xini yuku Sinai ja kande ini ñuu Arabia. Yuku un kuu nanu yivi kanchuku ñuu Jerusalén vijna, chi ka kuu i nanu muzu siki ja ka junukuachi ti sajniñu ka'a i nuu ley ni ja'a ya un. Agar jiiñ se'e ña kuu nanu ley un, chi ni ka sajniñu ka'a ña ini ve'e Abraham.

<sup>26</sup> Ko ñuu Jerusalén ja kande andivi vijna yi'i jiin Yandios, ti yivi ñuu un tukaa kuu kuiti i muzu ja sajniñu ka'a nanu sa'a yivi ñuu Jerusalén ja kande nuu ñuyivi ja'a. Yivi ñuu Jerusalén ja kande andivi, ni ka kee i nuu nda'a ley ja yi'i jiin Jerusalén nuu ñuyivi ja'a. Ti nanu ni kaku se'e Sara nava ni chisojnu'un Yandios, suni sia'an koo jiin yivi ja ka yi'i i jiin Jerusalén andivi, chi na ni'in i ta'u ni chisojnu'un Yandios, ja na nduu i se'e ya. Yukan ti ka kee i nuu nda'a ley ja yi'i jiin Jerusalén kande ñuyivi ja'a. Yukan ti Jerusalén ja kande andivi kuu nanu nana yo, <sup>27</sup> chi sia'an kachi nuu tutu ii Yandios: Ro'o ña'an numa ja tu iyo ni ñin se'e ra, na kosii ini ra.

Chi ro'o ja tu ja'l kondo'o ini ja skaku ra se'e, ko kivi na koo ñin se'e ra, ti kusii xaan ini ra, ti kanajin ko'o ra ja kanajaa ra nuu Yandios.

Chi kua'a ga se'e ra koo ja ni kuu ra ña'an numa, ja ni xndoo yi' ra ro'o, ansu ña'an kancha nuu jiin ñin chaa.

Kachi tutu.

<sup>28</sup> Ti sia'an kuu ñani naa ra, chi ka kuu yo nanu se'e yi' Abraham ja ni nani Isaac. Chi ni kandixia Abraham jnu'un ni chisojnu'un Yandios. Ja yukan ni kaku Isaac. Ti suni sia'an ni ka kandixia yo jnu'un ya. Ja yukan ka kuu yo se'e Yandios. <sup>29</sup> Na jana'an ni iyo ñin se'e yi' Abraham jiin Agar, ko ni kaku suchi un nanu ka kaku sava'ni ga yivi. Ti ni ka jajna'an i jiin Isaac, chaa ni kaku ja ni sa'a Espíritu Santo nava ni chisojnu'un ya nuu Abraham. Ti suni sia'an ka jna'an yo naa yo vijna, chi yivi kuni ja na siuku yo nuu ley Moisés, ka kuni kanaa i jiin yo, vanuxia maa yo ka kuu maa se'e ndaa Yandios siki jniñ ni sa'a Espíritu Santo jiin yo. <sup>30</sup> Ti jandaa ndixia kuu yukan, chi sia'an kachi nuu tutu ii Yandios: "Keni'in ra ña'an kuu muzu ja sajniñu ka'a un na ki'in ña jiin se'e ña, chi so muzu kuu ña jiin se'e ña. Chi tu iyo ichi suchi un ja ni'in yi'ta'u nuu ra nanu se'e maa ñasi'i ra, chi se'e maa ñasi'i ra kuu suchi xiin ta'u un", ni kachi Yandios jiin Abraham. <sup>31</sup> Ja yukan ñani naa ra, tu kuu yo naa yo nanu se'e ña'an ni sajniñu ka'a un. Chi su'va ka kuu yo nanu se'e ñasi'i maa Abraham. Ti tukaa ga yi'i yo nuu nda'a ley najana'an un, chi su'va nuu maa Jito'yo Yandios ka yi'i yo vijna.

*Va'a ga na siuku yo jnu'un maa Cristo*

## 5

<sup>1</sup> Ja yukan na kundichi ni'in yo jiin jnu'un Yandios, chi ja ni nuña Cristo Jesús ñin ichi ja kinkoyo yo, ti ja ni keni'in ya yo'o naa yo nuu ley najana'an un, nava tukaa ga siin yo jiin. Ti koto nandeokuñi tuku ra kuandatu ra nuu ley un, chi nu sia'an ti nduu tuku ra nanu muzu ka sajniñu ka'a. <sup>2</sup> Ti chunso'o va'a ra jnu'un ka'an ri ja'a, ja nu na kuandatu ra navá ka'an ley un, ja na koo ñin seña nuu yiki kuñu ra, ti va tu njinjnu kuiti jnu'un ni kandixia ra, ja ja ni ji'i Cristo ja'a ra naa ra. <sup>3</sup> Ti ni'in ka'an tuku ri inga jnu'un nuu taká chaa ja ka janta'u da ñin seña nuu yiki kuñu da, ja ka ndo'o ini da ja kendo ndoo da nuu Yandios ja sia'an sa'a da. Ko na kachi ri ja nu sia'an na siuku da ñin jnu'un un, ti iyo ichi da ja na siuku da tendi kuiti ja ka'an nuu ley un. Chi nu na siuku

ndi'i da jnu'un ley Moisés, ti kendo ndaa da nuu Yandios. Ko nu tu siuku ndi'i da jnu'un un, ni tu kendo ndoo kuiti da nuu Yandios. <sup>4</sup> Ti taka yivi ja ka'an ja kendo ndoo nuu Yandios ja ka siuku i jniñu ta'u ley Moisés un, nusa ti ni ka xndoo i maa Cristo Jesú, chi ni ka skexiko i jnu'un ja kunda'u ini Yandios nuu i, ja ni taji ya Cristo ni kii ya, ti ni jii'ya ja kuu tendi'i yo naa yo. Ti ni tu kendo ndaa yivi un nuu Yandios nu na kandixia i inga jnu'un siin ja tu kejna'an jiin maa jnu'un Cristo Jesú. <sup>5</sup> Ko yo'o ja ka kandixia yo maa Cristo Jesú, ni sa'a Espíritu Santo ja na kandixia ndaa yo naa yo. Ti ka ñava'a yo jnu'un ndee ini ja kundatu yo iin kivi ka'nu ga un, ti kundichi yo nuu maa Yandios. Chi kandio ndaa ini yo ja kivi un kachi Yandios ja tu jna'nun ndatu yo jiin kuachi yo, chi ni ini yo ni ka kandixia yo maa jniñu ni sa'a Cristo Jesú ja'a yo naa yo. <sup>6</sup> Ka kandixia ndaa yo maa jniñu ni sa'a Cristo ja'a yo. Yukan ti nu ni'in yo seña nuu yiki kuñu yo, ko tu njniñu un. Chi va nü ja siuku yo jnu'un un ti kendo ndoo yo nuu Yandios, xi ja tu siuku yo jnu'un un, ti tu kendo ndoo yo nuu Yandios, ko ansu sia'an kuu. Chi nini ja na kandixia ndaa kuiti yo nuu maa Cristo ti kendo ndaa yo nuu Yandios. Ti jiin jnu'un ndaa un ka kunda'u ini nuu jna'an yo.

<sup>7</sup> Undi nuu, va'a ni ka jika ra nuu ichi Yandios, ko vijna tukaa. Nusa ti ¿nau ni xnda'u ro'o nu? Chi tukaa ka jandatu ra maa jnu'un ndaa Cristo. <sup>8</sup> Chi ansu sia'an ska'an Yandios ro'o naa ra. Chi su'va, maa ya ni nakaji ya ro'o ja ka kandixia mani jnu'un ndaa. <sup>9</sup> Xi tu ka jini ra iin jnu'un ja ka'an sia'an: "Ti'l ni levadura kuu ja keni'no ni tu'u chii yujñia iya", kachi tutu. Ko na kachi ndaa ri ja nanu iin ti'l levadura un kuu chaa ka xndoña'an un, ja ka kuni da ja na xnaa ndi'i maa ra naa ra, ja tukaa kandixia ra jnu'un ni ka kandixia ra undi nuu. <sup>10</sup> Ti siki ja ka yi'i yo jiin Jito'yo Jesú, ndixia ri ja tu sia ya ro'o naa ra ja kandixia ra inga jnu'un ja tu kejna'an jiin jnu'un maa ya. Chi tu jini ri naa chaa kuu ja sakanuu ini ra naa ra un, ko ja kuu maa da kua'a ndixia Yandios nundo'o nuu da. <sup>11</sup> Ñani naa ra, na kachi ri ndo ka jito u'u yivi hebreo ru'u, ti ka ndikun i ru'u. Ti nu siuku ri jnu'un najana'an ja ka ni'in yo seña nuu yiki kuñu yo, ya kusii ini yivi un nuu ri, sa ti sia'an ndixia na xndaku ri. Nu sia'an xndaku ri, tukaa kuiti ini yivi hebreo nu ka jiniñ'o i jnu'un siiki Cristo ja ni jii'ya nuu nda'a cruz. Tukaa ka kuiti ini i, chi vijna xndaku ri ja siin yo jiin jnu'un un niku. <sup>12</sup> Ko taka chaa ja ka xnda'u da ro'o naa ra jiin jnu'un ja ka ni'in yo seña yiki kuñu yo, ti va'a ga na sinu da jniñu un. Va'a ga ja na ka'ncha da yiki kuñu maa da undi tukaa kuu da tata niku.

<sup>13</sup> Jandaan ndixia kuu ja ni nakaji Yandios taka ro'o naa ra nava tukaa ga siuku ra jnu'un ni ka sajníñu ka'a ra undi nuu. Chi su'va ni ka keta'u ra nuu jnu'un un. Nu ja ni ka keta'u ra nuu jnu'un un, ti va kondo'o ini ra ja sa'a ra sava'ni ga kuachi ja kuni yiki kuñu ra ja kanchuku ra nuu ñuyivi ja'a. Ko tuu, chi su'va na koto va'a ra taka jniñu sa'a ra nava tu kinikava ra nuu kuachi. Va'a ga na ku'un nda'u ini ra, ti chindee jna'an ra naa ra ja na kunchuku mani ra. <sup>14</sup> Siukan na kunchuku ra nava na siuku ra iin jnu'un ni ta'u Yandios ja kuu iin ley kanuu ga ja ni kachi ya: "Na kuu ini ra nuu ñani jna'an ra nanu kuu ini ra nuu maa ra", kachi tutu. <sup>15</sup> Ko nu ka sa'a ra nanu ina ja ka yeyi'i jna'an, ti ka kuni kají jna'an ra ja ka kanaa ra naa ra, ti jnu'un kanuu kuu un. Ko koto ra maa ra ja koto ma kunchuku ra undi sia'an. Chi nu kunchuku ra sia'an, ti tukaa kunchuku mani jiin ñani jna'an ra. Chi kunda'u ini Yandios yo'o nava suni sia'an kunda'u ini yo ñani jna'an yo.

### Nasa kuni yo nau kuu yivi tu kandixia ti nau kuu yivi ka kandixia

<sup>16</sup> Na kachi ri ja na kani va'a ini ra ti na kuandatu ra jniñu ta'u maa Espíritu Santo, ti ansu ja kuandatu ra jniñu ndo'o ini añu ra. Chi nu kuandatu ra

Espíritu Santo, ti tukaa siin ra jiin kuachi. <sup>17</sup> Chi nini ka ndo'o ini yo ja sa'a yo iin kuachi. Ko nu na kuandatu yo nava ndo'o ini aña yo, ti yukan jasi ja kuni maa Espíritu jiin yo. Ko nu su'va na kuandatu yo nava kuni maa Espíritu, yukan na ti maa Espíritu kasi ja tukaa ga kundio ini yo sa'a yo kuachi. Chi tu mani Espíritu Yandios jiin kuachi, chi ndi nduu ka kanaa. Ja yukan tu kua'a Espíritu ya jnu'un ja kundio ini ra sa'a ra kuachi. <sup>18</sup> Ko nu na siuku ra nava kuni maa Espíritu, ti tukaa ga yi'i ra nuu nda'la ley najana'an un ja kankuachi siki ra.

<sup>19</sup> Ndijin ndaa ka jika yi'i ka jika jiin kuachi, chi ka siuku i nava ndo'o ini aña i. Mani jniñu kue'e ka sa'a i. Ka jika i jiin jnu'un siñ ini ti tu kanchuku na'iin yi, chi nini kaña ini ki'in yi ja siuku i nava ndo'o ini aña i. Ti ka yisikinchaa jna'an i, yisikinchaa i ñasi'i i xi ña'an un yisikinchaa ña yiñ ña. Ti sia'an ka sa'a i mani jniñu kue'e. <sup>20</sup> Ka nchañu'un i sava'ni ga santu. Ka sa'a tasi i siki ñani jna'an i. Ka jito u'u jna'an i ja ka kanaa i nanu ina. Kuu kuasun ini nuu jna'an i. Ni tu kuu ya'a iin jnu'un nuu i, chi yachi xaan kuiti ini i. Ti ka jitu ini i nduku i ja kuu maa i, ti tu jitu ini i ja kuu nuu ñani jna'an i. Ni tu kanchuku mani i jiin taka ñani jna'an i, chi su'va sasiñ i maa i ja tu kuni ka'an i jiin jna'an i. <sup>21</sup> Kuu kuasun ini i nuu ñani jna'an i nu ñava'a da taka ndajniñu ini ve'e da. Ka jajna'an ini i ka'nii i ndiyi. Ka ji'i yi ndixi, ti ka sa'a i sava'ni ga viko. Ti sia'an ka sa'a i kua'a xaan ga jniñu kue'e. Ja yukan ka'an ri nuu ra naa ra nanu ni xndaku ri undi nuu, ti na ch'uun ini ra nava na kukuee kunchuku ra. Ko na xndaku ni'in ri nava ni kachi ri undi nuu, ja nu na sa'a ra naa ra taka jnu'un ni ka'an ri ja'a, ni tu na nita'u kuiti ra ja najaa ra ñuu nuu ta'u Yandios jniñu.

<sup>22</sup> Ti suni ndijin ndaa jini yo yi'i va'a chi mani jniñu va'a ka sa'a i, vanuxia kancha Espíritu Yandios jiin yi. Ka ñunda'u ini i nuu ñani jna'an i. Siñ ka iyo ini i, ti kukuee kanchuku i jiin jna'an i. Ñukuu ndaa ini i jniñu sa'a i. Ti kanchuku mani i ja ka chindee jna'an i. Ti ka siuku i taka jniñu ka sa'a i. <sup>23</sup> Tu ka kuña'nu nuu jna'an i ja sa'a i nava kuni maa i, chi iin nuu ka iyo ini i. Ti ley Moisés un, tu kankuachi siki yi'i ja kanchuku sia'an, chi mani jniñu va'a ka sa'a i.

<sup>24</sup> Yukan kuu ja yi'i ka jika jiin jnu'un maa Cristo Jesú, tukaa ga kanuu ja ka jandatu i jnu'un ini yiki kuñu i ja ka sa'a i kuachi. Chi ka ñukuu ini i ja ni ji'i Cristo nuu nda'a cruz ja ni nama ya nuu kuachi un. Kuu nanu ja ni ka ji'i yiki kuñu i jiin Cristo, nava tukaa ga kanuu ja sa'a i kuachi naa i. <sup>25</sup> Ja yukan nu kancha maa Espíritu Santo jiin yo, ti na sa'a yo nava kuni maa ya.

<sup>26</sup> Koto ma kava vixi ini ra jiin jnu'un ka'an ra, chi jiin yukan skuiti ra ini ñani jna'an ra ja na kuu kuasun ini ra nuu i.

### Ja na kukutu iniy yo ja chindee jna'an yo

## 6

<sup>1</sup> Ñani, nu ni jini ra ja ni kinikava iin ñani jna'an ra nuu iin kuachi, ti koto nde'e ra nundo'o jna'an da. Su'va na najista ra da jiin jnu'un va'a ja xndaku ra nuu da, ja ka kuu ra ñani jna'an siki Cristo, ti jika ra jiin Espíritu Santo. Ko koto va'a ra maa ra ja tu kinikava ra nuu kuachi un. Ti sia'an na kuu xndaku ra nuu ñani jna'an ra, ko vii vii na xndaku ra nuu da ja nachun'un ichi ra da nuu ichi va'a. <sup>2</sup> Sia'an na chindee jna'an ra naa ra ja kuu nuu sava'ni ga nundo'o ja ka jna'an iin iin ra. Ti nu siukan na sa'a ra, ti ka siuku ndaa ra taka jnu'un kuu ley ni kachi Cristo. <sup>3</sup> Ko nu sandoo ra maa ra ti kava vixi ini ra ndo'o ini ra ja jankivi kinikava ra nuu kuachi, ti so xnda'u ra maa ra. Chi tundo kuu kuiti ra nu sia'an. <sup>4</sup> Yukan ti ndi iin ra na nde'e va'a nu iyo ndaa jniñu ka sa'a ra. Yukan na ti kuu kachi ra ja iyo ndaa ra nuu Yandios. Xnakan

va'a nde'e ra jniñu sa'a maa ra, ti ansu ja ka'an ra siki jniñu ka sa'a ñani jna'an ra. Chi nu jini ra ja iyo va'a jniñu sa'a ra, ti va'a sa'a ra nusa, ko tu kuu ichi ini ra siki jniñu ka sa'a ñani jna'an ra. <sup>5</sup> Suni na siuku ra maa jniñu ndiso iin ra nuu Yandios, ansu na nakua'a ra nuu inga.

<sup>6</sup> Ti suni chindee ra naa ra nuu yivi ka xna'an jnu'un Yandios nuu ra, nava na ni'in da taka ja va'a nava ni ka ni'in ra naa ra.

<sup>7</sup> Koto ma xnda'u ra maa ra, chi kuu nanu iin chaa saka triu, chi nastutu da nava ni saka da. Suni sia'an kuu nu kusikinchaa yo Yandios ti kachi yo ja tu jini yo jnu'un ya. Chi taka ja sa'a yo, ti ndi'i nani'in yo. Nu na sa'a yo mani jniñu va'a ti suni sia'an nani'in yo mani jniñu va'a. Ko nu na sa'a yo mani jniñu kuele, ti nani'in yo nundo'o. <sup>8</sup> Chi nu na sa'a yo nava kuu ini maa yo, ti nani'in yo nundo'o ja naa yo. Ko nu su'va na sa'a yo nava kuu ini maa Espíritu Santo, ti nani'in yo iin ta'u ja kuchaku yo ja kuu taka saa ni jiin Yandios.

<sup>9</sup> Koto ka'ncha ini yo jiin jniñu sa'a yo, chi su'va na kukutu ini yo jiin mani jniñu va'a. Chi nu na jaa kivi, ti nani'in ndixia yo ta'u nuu taka jniñu ni sa'a yo, chi ni ka jitu ndi'i ini yo nuu jniñu un. <sup>10</sup> Ja yukan ti taka jinu ja kuni yo sa'a yo jniñu va'a un, ja chindee yo nuu sava'ni ga yivi, ti na chindee va'a yo jiin ni ini ni aña yo nuu i. Ko na kukutu ga ini yo jiin jniñu va'a un ja kuu nuu maa yivi ka kandixia Cristo.

### *Sandi'i ni ga jnu'un ndee ini*

<sup>11</sup> Nde'e naa na'nun letra chaa ri jiin nda'a ri nuu ra naa ra ja'a.

<sup>12</sup> Iyo yivi ka ñukuu ini ja kendo va'a i nuu yivi. Ti yivi hebreo un kuu yivi ka chayika ro'o ja na ni'in ra iin seña nuu yiki kuñu ra. Ti siukan ka sa'a da nava tu koto u'u yivi nuu da siki ja ni kandixia da Cristo, ja ni ji'i ya nuu nda'a cruz ja kuu taka yo naa yo. <sup>13</sup> Ti yivi ka chiñu'un jnu'un jana'an un, ni tu ka siuku ndi'i i nava ka'an maa ley najana'an un. Ti kuni i ja na chiñu'un ra naa ra jnu'un ka'an ley un. Ko nu na kivi ra jiin jnu'un yivi un, yukan na ti nduvixi i ja ni ka skandixia i ro'o naa ra. <sup>14</sup> Ko ru'u chi jankiv i nduvixi ini ri, so nini kusii xaan ini ri nu ka'an ri jnu'un Jito'yo Jesús, ya kuu Cristo, chi ni nama ya yo'o naa yo ja ni ji'i ya nuu nda'a cruz. Ti ja siki ni ji'i ya nuu nda'a cruz kuu nanu ja ni ji'i jnu'un ñuyivi ja'a, chi tukaa yi'i ri jiin jnu'un un. Suni kuu nanu ni ji'i ri jiin Cristo, chi tukaa sajníñu ka'a ri jnu'un ja iyo ñuyivi ja'a. Ti kuu ri nanu chaa ñuu jika, chi tukaa ga nandeokuñi kuiti ri nuu ichi un ja siuku ri. <sup>15</sup> Chi nu ka yi'i yo nuu nda'a Cristo Jesús, ti ni tukaa ga njñiñu ja sa'a yo seña nuu yiki kuñu yo, xi vasu tu sa'a yo seña un. Chi jiin jniñu ña'nu ni sa'a Cristo Jesús ni ndujaa yo jiin aña yo nuu ya.

<sup>16</sup> Ti ru'u Pablo, jikanta'u ri nuu Yandios ja sa'a ya ja na kukuee kunchuku tendi'i yivi ja kandixia ndaa i jnu'un Cristo Jesús. Na kua'a ya jnu'un ndee ini, ti na kunda'u ini ya maa i naa i. Sia'an ñukuu ini ri ja kuu taka yivi ja kandixia ndaa jnu'un Cristo, chi maa iin ni yivi ja yi'i jiin Cristo kuu maa yivi ñuu Yandios.

<sup>17</sup> Ti undi vijnaljiin ja kuu taka saa ni nuu kua'an yo, koto ma skexiko yivi ru'u. Chi ndiso ri seña maa Jito'yo Jesús ja ni ndo'o ni nene ri siki jniñu ni tatu ya ja sa'a ri. <sup>18</sup> Ñani naa ra, ñukuu ini ri ja maa Jito'yo Jesús, ya kuu Cristo, na kunda'u ini ya ro'o naa ra. Ti na nakuni ra undi ini aña ra ja sia'an kuu. Ti sia'an na koo.

## Carta ja ni chaa Pablo nuu yiví ñuu Efeso

### *Kanxia'u Pablo jiin yiví ka kandixia ñuu Efeso*

<sup>1</sup> Ru'u Pablo, kanxia'u ri jiin yiví Yandios ja ka kandixia Cristo kanchuku ñuu Efeso. Maa ri kuu apóstol nuu Jesús, ya kuu Cristo ja ndiso ya jniñu ña'nu nuu Yandios, ti maa ya ni ja'a jniñu ja'a nuu ri ja na kuu ri apóstol nuu ya. Na chaa ri tutu ja'a nuu ra naa ra ja ni sasiñn ya ro'o ja na kunukuachi ra nuu ya naa ra. <sup>2</sup> Jikanta'u ri ja maa Tata yo Yandios jiin Jito'yo Cristo Jesús na kunda'u ini ya ro'o naa ra, ti na chindee ya nava sia'an na kunchuku mani ra.

### *Nu na kandixia yo Cristo ti nanita'u yo nuu Yandios*

<sup>3</sup> Na nakanajaa yo Yandios, ya kuu Tata maa Jito'yo Cristo Jesús. Maa iin ni maa ya kuu ja kuña'nu xaan. Maa iin ni maa ya kuu ja ni nakua'a taka ja va'a nuu yo ja ka yi'i yo nda'a Cristo. Undi andiví ni taji ya Espíritu ya kancha ya jiin yo. Sia'an ni ja'a ya jandaa ja na ni'in yo taka ja ni chisojnu'un ya. <sup>4</sup> Chi undi na ti jakoo ga ñuyiví ni nakaji ya yo'o ja na ki'i yo nda'a Cristo, ja sasiñn yo ja kuu maa ya, ja koo ndoo koo ii undi ini añu yo. <sup>5</sup> Undi sa ni nakaji Yandios yo'o, chi ni kunda'u ini ya yo'o. Ti ni kuu ini ya ja nakinse'e ya yo'o naa yo nava na kuu yo se'e ya. Yukan ni sa'a ya ja ni taji ya Jesús, ya kuu Cristo ja na kundiso jniñu ya ti nama ya yo'o. Taka un ni sa'a Yandios, chi maa iin ni maa ya ni kunda'u ini ya yo'o. Ja yukan ni nakaji ya yo'o, ansu ja siki jniñu va'a ni sa'a yo. <sup>6</sup> Ja yukan kuu ja na kachi yo ja Yandios kuu ja kuña'nu, chi maa iin ni maa ya ni sa'a ya ja na ki'i yo nda'a Cristo. Ti Cristo kuu maa Se'e Yandios ja ni kunda'u xaan ini ya. Ti nuu nda'a maa Se'e ya Jesús ni skivi Yandios yo'o. <sup>7</sup> Maa Yandios ni sa'a yukan ja ni taji ya Cristo ti ni ji'l ya ja siki yo'o. Ni jati ya niñi ya ja siki yo'o naa yo, ti yukan kuu ja ni chunaa ya nuu yo nuu Yandios. Sia'an ni ndunda'u ini ya yo'o ti ni janka'nu ini ya nuu kuachi yo. <sup>8</sup> Yukan ti ni ja'a ya ndi'i inijnuni yo ja na kuu sa'a yo ti kunukuachi yo nava kuni maa ya. <sup>9</sup> Taka un ni stuu ya, chi ni kunda'u ini ya yo'o ja ni taji ya Cristo nuu ñuyiví ja'a. Undi najana'an, tu ni ka jini yiví ndo ndo'o ini Yandios ja sa'a ya, ko vijna ti ni ka jini yo, chi ni chaa Cristo ja ni taji maa ya. <sup>10</sup> Nu ni jaa kivi ja ni kachi maa Yandios, ni taji ya Cristo ja na kuu nava ni ndo'o ini maa ya. Ti maa Cristo na sa'a ja taka ja iyo andiví jiin ñuyiví na najna'an ti na nduu iin ni ga, chi maa Yandios ni ja'a jniñu un nuu Cristo ja na kuña'nu ya nuu taka ja iyo andiví jiin ñuyiví, ti nava sia'an na koo jnu'un mani ini.

<sup>11</sup> Maa Yandios ni kachi ja na kinda'a Cristo yo'o, chi xnakan ni nakaji ya yo'o ja na nanita'u yo nuu ya sa ni sa'a ya ñuyiví, ti nava sia'an na kuu yo se'e ya. Taka un ni sa'a ya nava ni kuu ini maa ya, ti ni nakaji ya yo'o ja na kuu yo se'e ya. <sup>12</sup> Ja yukan kuu ja xnakan ru'u ni ka kandixia Cristo sa ni ka kandixia ro'o naa ra. Ni ka kandixia ri ja maa Yandios ni taji ya Cristo ja na kuña'nu ya. Ti suni maa ya ni kachi ja na ki'in ndaa ri jiin jniñu ya, ti na xna'an ri nuu yiví ja maa Yandios kuu ja kuña'nu. <sup>13</sup> Suni sia'an ro'o ja kanchuku ñuu Efeso, ni chi'i Yandios ro'o nda'a Cristo naa ra. Ni ka chunso'o ra jnu'un Cristo, chi maa iin ni jnu'un un kuu ja nama siki yo. Ti ni ka kandixia ndaa ra jnu'un Cristo naa ra. Ja yukan kuu ja ni ka ni'in ra Espíritu Santo nava ni chisojnu'un Yandios. Ni nchaa Espíritu ya ja na kuncha ya jiin ra, ti yukan kuu nanu iin sello ja xna'an ja ka kuu ra se'e Yandios naa ra. <sup>14</sup> Chi nu kancha Espíritu

Santo jiin yo, ti yukan kuu ja iyo ndaa ini yo ja kuu yo se'e Yandios. Kandixia ndaa ini yo ja ja ni chunaa Yandios yo'o, ti sia'an na nanita'u yo nuu ya. Ti Espíritu Santo, kuncha ya jiin yo undi na jaa kivi nakinse'e ya yo'o. Ja yukan kuu ja na nakanajaa yo maa ya, chi maa iin ni maa ya kuu ja kuña'nu.

**15-16** Ru'u Pablo, tu jakuiñi ri ja jikanta'u ri nuu Yandios ja kuu ro'o naa ra. Nakuanta'u ri nuu ya chi ni jini ri ja ka kandixia ndaa ra Jito'yo Cristo Jesú, ti ka kunda'u ini ra taka yivi ka kuu se'e ya. Nuku'un ini ri ro'o naa ra, ti jikanta'u ri nuu Yandios **17** Ja maa Tata yo Yandios na kua'a ya inijnuni ra. Na kua'a ya Espíritu ya kuncha ya jiin ra nava vi'i ga na kivi inijnuni ra ja kuña'nu xaan maa Yandios, ja kuu ya Tata Jito'yo Cristo Jesú. **18** Jikanta'u ri ja na kua'a kaji Yandios inijnuni ra naa ra, nava na kuni ra ja ja ni nakaji ya yo'o, ja nanita'u yo nuu ya. Nu ka ūkuuu ini ra naa ra, ti yukan kuu ja ka ndiyo ini ra ja taka yo na keta'u yo nuu ya jiin taka ga yivi ka kandixia Cristo. Chi yukan kuu ja va'a ja kuu yo naa yo. **19** Ti kuni ri ja na kivi inijnuni ra naa ra ja maa Yandios ndiso ya jniñu ña'nú xaan ga. Ja yukan ni sa'a ya ja ka kandixia yo vijnna, chi ni xna'an kaji ya jniñu un nuu yo. **20** Nu ni naxndoto ya Cristo nuu ūji'i, ti ni xnukoo ya Cristo nda'a kua'a ya nuu kancha maa ya andivi, ja ni nakua'a ya iin jniñu ña'nú nuu ya. **21** Taka ángel ka junukuachi nuu Yandios, jiin ja ka yijniñu, jiin taka ja ka kuña'nu, suni ka ndiso jniñu. Ko jniñu ndiso Cristo kuu ja kuña'nu nuu taka yivi ka iyo vijnna jiin yivi kikoyo inga kivi. **22** Ni kachi maa Yandios ja na ta'u Cristo jniñu nuu tendi'i yivi jiin ndaja'a ya (ja ka nani ángel), ti maa ya kuu ja koxnuu nuu taka yivi ka ūkuuu ini ya. **23** Ti yivi ka kandixia un ka kuu i nanu iin yiki kuñu, ti maa ya kuu nanu xini. Ti ta'u ya jniñu nuu yivi naa i, ti maa i ka sa'a jniñu un. Ti jiin jniñu un ka stuu i ja Cristo kuu Jito'o i, ti maa ya kuu ja kuña'nu nuu i. Ti maa ya chindee yivi ja na kuu taka jniñu un, chi maa iin ni ya kuu ja ta'u jniñu ja na ndi'i kundaa nava kuni maa ya.

### *Ja ni kunda'u ini Yandios kuu ja ni nama ya yo'o*

## 2

**1** Ro'o naa ra ja kanchuku ūuu Efeso, na ti kandixia ga ra Cristo naa ra, ni kunchuku ra nanu iin yivi ni ji'i ja tukaa chaku yiki kuñu i, chi tu ka nakuni ra Yandios. Ti ka sa'a ndeva'a ra naa ra **2** nanu ni ka sa'a yivi ni ka siuku i jnu'un iyo nuu ūyivi ja ni ka jandatu i ti ka ni siuku i jnu'un un. Ni ka jandatu i nuu ja'u'u, ti ja'u'u un kuu ja yinda'a taka espíritu ndeva'a ja ka jika nuu tachi. Ti skaka maa i ja na nduni'in ini i, ti tu kuandatu i nuu Yandios. **3** Ti suni sia'an ni ka sa'a yo undi nuu naa yo, chi ni ka sa'a ndeva'a yo nasa ni ka kuu ini maa yo ja iyo ndee ini yiki kuñu yo, jiin nasa ni kachi inijnuni yo ja sa'a yo taka ja kuu nuu ūyivi. Ja yukan kuu ja suni ni ka kuu yo yivi ni ka ndo'o nda'a Yandios nanu ka jna'an sava yivi. **4** Ko tu ni sa'a ya sia'an jiin yo naa yo. Ti ka'nú xaan ini Yandios chi ni kunda'u ini ya yo'o. **5** Ja ni sa'a ya ja na kandixia yo Cristo, chi undi nuu kanchuku yo nanu yivi ja tukaa ka chaku, chi ni ka sa'a yo taka jniñu kue'e ja tu va'a. Ko tu ni ja'a ya jnu'un ja kendo yo sia'an, chi ni ndunda'u ini ya yo'o ja ni nama ya yo'o, nanu ni sa'a ya ja ni naxndoto ya Cristo nuu ūji'i. **6** Ni nandoto tuku Cristo Jesú. Ti ja yukan kuu ja ni nama ya yo'o nava tukaa naa yo. Ni skejna'an Yandios yo'o jiin Cristo nanu ja ni nandoto yo jiin ya, ja tukaa kendo yo nanu ndiyi. Sia'an ni sa'a ya nava na no'on yo andivi nuu kuchaku yo jiin Cristo Jesú, ta'u yo jniñu jiin ya. **7** Ni nama ya yo'o nava taka ga kivi vají ti na xndaku yo nuu yivi ja ka'nú jniñu ni sa'a Yandios ja kuu yo'o naa yo. Yukan ti stuu Yandios ja ni ka ndumani yo nuu ya. **8** Ti ja ni kunda'u ini Yandios ro'o naa ra kuu ja ni sa'a ya

ja na kandixia ndaa ra taka jniñu ni sa'a ya. Chi ansu ja ni ka ndo'o ini maa ra kuu ja ni ka kandixia ra, chi maa Yandios ni kachi ja sia'an ti sa nanita'u ra naa ra.<sup>9</sup> Ansu ja ka sa'a yo ja va'a, chi maa iin ni ja ni kunda'u ini ya yo'o. Ja yukan kuu ja tu kani vixi ini yo ja mani maa yo ni ka nama yo maa yo.<sup>10</sup> Chi maa Yandios ni sa'a ya yo'o, ti ni nachi'i ya yo'o nda'a Cristo Jesús ja na kitu ya yo'o. Ni sa'a ya yo'o nava na siuku yo jiin jniñu ni satu'va ya ja kuu yo'o.

### *Ja Cristo kuu ja ni ka ndu iin nuu inyivi*

<sup>11</sup> Koto naa ini ra nava ni kuu jiin ra na ti kandixia ga ra Cristo. Siki ja ka kuu ra yivi inga nación ja tu ka yi'i jiin yivi ñuu Israel, ti yivi Israel ni ka ka'an ja tu ni ka jini jniñu kuiti ra, chi tu ni ka siuku ra jnu'un ja na koo iin jnuni nuu yiki kuuñu ra.<sup>12</sup> Koto naa ini ra ja tu ni ka jini kuiti ra siki Cristo. Ni tu ni ka kuu mani ra nuu yivi ñuu Israel. Tu ni ka jini kuiti ra iin tratu ni sa'a va'a Yandios, ja ni chisojnu'un ya undi nuu ja na ndumani ya jin yivi. Ni kunchuku ra nuu ñuyivi ja'a, ko tu ni ndiyo ini ra ja na ndumani Yandios jiin ra. Tu ni ka jini kuiti ra jnu'un Yandios.<sup>13</sup> Undi nuu ni ka kuu ra nanu yivi ñuu jika. Ko vijna ka kuu ra nanu yivi ñuu, chi ni ka kivi i nda'a Cristo. Sia'an kuu chi ni ka kandixia ra Cristo Jesús, ja ni ji'i ya nuu nda'a cruz, ti ni jati ya niñi ya ja siki ra naa ra.

<sup>14</sup> Sia'an ni sa'a Cristo ja na ndumani jna'an yo. Ni sa'a ya ja yivi hebreo jiin yivi inga nación, iin ni ga na nduu yo nuu ya. Ni ka jito u'u jna'an yivi hebreo jiin yivi inga nación, ti maa i ni ka jito u'u i yivi hebreo, ko ni sa'a Cristo ja ni ka ndumani jna'an i.<sup>15</sup> Ni soko ya maa ya, ni ji'i ya, ti sia'an ni xnaa ya ley najana'an ja ni ja'a Yandios nuu Moisés ja ni ta'u jniñu nuu yivi ñuu hebreo. Ley un ni sasiin yivi hebreo jiin yivi taka ga nación ja tu ni ka jini i ley. Ti ni na chajna'an ya ndi'i yo ja na nduu yo iin ni ga yivi jaa, ti na ki'i yo nda'a Cristo. Yukan ni sa'a ya ja ni ndumani jna'an yo.<sup>16</sup> Ni ji'i Cristo nuu nda'a cruz. Ti jiin yukan ni ka ndumani yivi inga nación jiin yivi hebreo nuu Yandios. Maa Cristo ni xnaa ya jnu'un ja ni ka iyo siin ini yivi hebreo jiin yivi inga nación.<sup>17</sup> Ni kii Cristo, ti ni ka'an ya ja iyo jnu'un mani ini nuu Yandios jiin tendi'i yivi, ti ansu maa iin ni yivi hebreo, chi suni yivi taka ga nación.

<sup>18</sup> Jandaa ndixia kuu yukan chi ni nuña Cristo iin ichi ja kivi tendi'i ndinduu yo nuu kancha Tata yo Yandios, ti kuu ka'an yo jiin ya. Ti ni sa'a ya ja iin ni Espíritu Yandios na kuncha jiin tendi'i yo naa yo, ti chindee Espíritu un ja tendi'i yo kakanta'u yo nuu ya.<sup>19</sup> Ja yukan kuu ja tukaa ga ka kuu ra yivi ñuu jika, chi ni ka ndumani ra nuu Yandios. Ti taka yivi Yandios ka kuu i jna'an ra, chi ja ka yi'i ra jiin maa Yandios.<sup>20</sup> Sa'a yo nanu. Tendi'i yo ja ka kandixia yo Cristo, ka kuu yo nanu iin ve'e. Ro'o naa ra ka kuu ra nanu maa ve'e un, ti ru'u ja ka kuu ri apóstol nuu Jesús naa ri, jiin chaa ka kuu profeta ja ka ka'an jnu'un Yandios, ka kuu ri nanu nama ja'a ve'e un, chi ru'u naa ri ni ka ka'an ri jnu'un Yandios nuu ra naa ra. Ti maa Cristo Jesús kuu ya yuu kanuu ga ja ndiso ni'in yituu jiki ve'e un.<sup>21</sup> Ti iin iin yo ja ka kandixia, ka kuu yo nanu iin iin yujnu ve'e un. Yukan kuu nanu ve'e sa'a Yandios ja kuu iin ve'e ii, ti taka yivi ka kandixia ka kuu i iin yujnu ve'e un, chi maa Yandios ni tatu ya jniñu un nuu iin iin yo ja ka ndiso jniñu yo nuu ya. Sia'an sa'a ya ve'e ii ga jiin yivi ja ni ka kivi i nda'a Jito'o Cristo Jesús.<sup>22</sup> Ti taka ro'o ja ka kandixia kanchuku ñuu Efeso, suni ka kuu ra iin iin nuu ve'e un, chi ni ka ndivi ra nda'a Jito'o Cristo Jesús. Ka kuu ra ve'e ii ja siin Yandios sa'a ya. Ti kancha ya ini ve'e ii un, chi kancha ya jiin ra naa ra ja taji ya Espíritu Santo ya ja na kuncha jiin ra.

### *Ndiso jniñu Pablo ja ka'an da jnu'un Cristo Jesús nuu yivi taka ga nación*

## 3

<sup>1</sup> Ru'u Pablo, kande ri vekaa siki ja ni ka'an ri jnu'un Cristo Jesús nuu ra naa ra, ja ka kuu ra yivi inga nación ja tu ni ka jini kuiti ra jnu'un ya. <sup>2</sup> Ka jini ra ja ni taji Yandios ru'u, ti ni tatu ya jniñu un nuu ri ja na ka'an ri jnu'un ya nuu ra naa ra. <sup>3</sup> Ja ka jini ra ja ni yisa'yí jnu'un Yandios, chi undi nuu tu ni ka jini yo ja jaa iin kivi nu nakuni yivi inga nación jnu'un Yandios. Ko ni jaa iin kivi nu ni xna'an ya jnu'un un nuu ri. Ti nuu tutu ja'a ja ni chaa ri ti'lí siki yukan nuu ra naa ra, ja ka kuu ra yivi inga nación. <sup>4</sup> Ti nu na ka'u ra un ti kuu chaku ini ra naa ra ja ni kivi va'a jnu'un Yandios inijnuni ri siki Cristo Jesús. <sup>5</sup> Na kivi jana'an ni ya'a tu ni stuu Yandios jnu'un un nuu ni iin yivi nanu ni xna'an ya vijna. Vijnna ti ni xna'an kaji ya jnu'un Cristo nuu chaa ka kuu apóstol jiin chaa ka kuu profeta ja ka ka'an da jnu'un ya. Ni sasiin ya maa ri naa ri ja na kendo ndoo ri nuu ya, ti ni kivi inijnuni ri NASA kuni ka'an jnu'un un, chi maa Espíritu Santo kuu ya kancha jiin ri naa ri. <sup>6</sup> Ti jnu'un Cristo ja ni yisa'yí undi nuu un, kuu ja yivi inga nación na ni'in ka'nu i ta'u i jiin yivi hebreo. Suni ka'an ja ka kuu yo iin ni ga yivi. Ti sa'a Yandios nuu i nanu ni kachi ya ja sa'a ya nuu yivi hebreo nava ni sa'a Cristo jniñu ña'nú ja'a i. Ti maa i suni na kandixia ndaa i jnu'un Cristo.

<sup>7</sup> Ti ru'u Pablo, ndisojniñu ri ja na ka'an ri jnu'un Cristo. Ni kuu ini Yandios ru'u ja ni ja'a ya iin jniñu un nuu ri. Ti maa ya kuu ja chindee ya ru'u ja na siuku ri jiin jniñu un. <sup>8</sup> Ti vasu ndo'o ini ri ja ña'nú ga kuu taka ga yivi ka junukuachi nuu Yandios, ko ni kuu ini maa ya ja ni ja'a ya jniñu ña'nú un nuu ri, ja na ka'an ri jnu'un ya nuu yivi taka ga nación. Ti so naa ini yo nu ka jiniso'o yo jnu'un un ja Cristo kuu ja kuña'nú xaan ga. <sup>9</sup> Ti ni jani ya ru'u ja na xna'an kaji ri nuu tendi'i yivi NASA nama ya siki i. Undi ni sa'a ya ñuyivi undi nuu vijnna, tu ni ja'a ya jnu'un un ja kuni yivi, ti maa ya kuu ja ni sa'a ndi'i ja ka iyo. <sup>10</sup> Vijnna na ti ni stuu kaji ya taka ja ni ndo'o ini ya ja sa'a ya, chi ja ni nakaji yukan ya taka yivi kuu se'e ya. Ti taka ga ndaja'a ya ja ka ndisojniñu ña'nú nuu andivi, na kuni da nava nama ya siki yivi, ja sia'an vii sa'a Yandios jiin yivi ya. <sup>11</sup> Chi na ti sa'a ga ya ñuyivi ja'a, ni ndo'o ini ya ja nama ya yivi. Vijnna ti jiin Jito'o Cristo Jesús ni kuu nava ni ndo'o ini Yandios undi nuu. <sup>12</sup> Ja ka yi'i yo jiin Cristo ti ja kandixia ndaa yo maa ya, yukan kuu ja kuñukuu ni ini yo najaa yo ti ka'an yo jiin maa Yandios. <sup>13</sup> Ja sia'an kuu ja ru'u Pablo, kanda'u ri jiin ra, ro'o ja ka kandixia kanchuku ra ñuu Efeso, ja koto kukui'ya ini ra siki ja jito ri nundo'o ja siki ro'o naa ra. Chi taka un jna'an ri, ko kuachi kuu ja ni ka'an ri jnu'un Cristo nuu ra naa ra. Ko yukan kuu iin ja va'a ja kuu maa ra naa ra, chi sia'an sa nakinse'e Yandios ro'o.

*Kunda'u ini Cristo yo'o*

<sup>14</sup> Ja siki jniñu ña'nú ni sa'a Yandios ja'a yo, kuu ja na jakunjiti ri nuu Tata Jito'o Cristo Jesús. <sup>15</sup> Chi maa ya ni kachi ja na konani yo se'e ya, vasu nanu na kuncha yo andivi xi ñuyivi. <sup>16</sup> Ti ja kuña'nú Yandios kuu ja sa'a ya taka jniñu ña'nú ja kuu ra naa ra. Ja yukan kuu ja ru'u Pablo, jikanta'u ri ja na kua'a ya jnu'un ndee ini ro'o naa ra. Ti nava na kundee ini ra naa ra, ti na chindee ya ro'o jiin Espíritu maa ya ja kancha ya jiin ra naa ra. <sup>17</sup> Ti nava na chaku inijnuni ra ja kancha Cristo jiin ra, chi jandaa kuu ja ka kandixia ra ya. Na siuku ndaa ra jiin jnu'un ja ka kuu ini ra Yandios jiin jnu'un ya, jiin ja na kunda'u ini ra ñani jna'an ra ja suni ka yi'i jiin Cristo. <sup>18</sup> Jikanta'u ri nuu Yandios ja kuu ro'o naa ra jiin taka ga yivi ka kandixia, ja na skivi ya undi inijnuni ra nasa ka'nu ni kunda'u ini ya ro'o naa ra. Ti nava sia'an na chaku ndaa ini ra ja vii ni sa'a Cristo ja ni kunda'u ini ya yivi naa i, vasu jankivi chaku ndi'i; ini yo nasa ni kuu ja ni kunda'u ini ya yo'o. <sup>19</sup> Ti jikanta'u xaan

ri ja iin kivi iin kivi su'va na chaku ga ini ra naa ra, nasa ni kuu ja ni kunda'u ini Cristo yo'o naa yo, vasu tu jaa ra ja kuni ndaa ra taka jniñu ni sa'a ya. Ti koto ka'ncha ini ra. Siin naa ra nava na kua'a ga Yandios inijnuni ra, ti nava na nduu iin nuu ini ra, ti kunda'u ini ra maa iin ni Yandios jiin ni ini ni aña ra naa ra.

<sup>20</sup> Na nakuanta'u yo nuu Yandios ja kuña'nú ya, chi iyo kivi tu ndoo ndo'o ini yo, ko maa ya skaya taka ja kuni yo, vasu tu jini yo nasa ja'a ya nuu yo. <sup>21</sup> Ti na nakuanta'u yo nuu ya nuu taka jniñu ni sa'a ya ja kuu yivi ni nakaji ya. Ti na nakanajaa yo maa ya, chi suni ni sa'a ya iin jniñu ka'nú ja ni taji ya Cristo Jesúz ja na kundisojniñu ya nuu yo naa yo. Na nakanajaa yo maa ya chi ka kuu yo yivi ya. Na nakanajaa yo chi ka yil'i yo jiin Cristo Jesúz. Na nakanajaa yo maa ya vijna, ijña, jiin undi taka ga kivi vajji. Sia'an na koo.

### *Iin ni ga ka nduu yo nuu Espíritu*

## 4

<sup>1</sup> Ru'u Pablo kande ri vekaa ja siki jnu'un Jito'yo. Ti kanda'u ri jiin ra ja na kaka ndaa ra ichi Yandios naa ra, chi ja yukan kuu ja ni nakaji ya ro'o ja na nduu ra yivi kunukuachi nuu ya. <sup>2</sup> Kava nda'u ini ti koto nda'u jna'an ra. Kuanka'nu ini nuu jna'an ra, ti ndajnu'un mani naa ra ja ka kuu iin nuu jna'an ra. <sup>3</sup> Ti maa Espíritu Santo na kuncha ya jiin ra, ti nava sia'an na nduu iin nuu ini ra naa ra, ja na kunchuku va'a kunchuku mani ra, ja ka yili' ra nda'a Cristo. Ti sia'an siuku naa ra. <sup>4</sup> Iin ni yivi ka kuu yo nuu Yandios, chi iin ni Espíritu Santo kancha jiin taka yo. Ja yukan kuu ja ni nakaji Yandios yo'o, ti ni chisojnu'un ya iin ta'u kanuu xaan nuu yo, ti na kundiyo ini yo ja na ni'in yo ta'u un. <sup>5</sup> Ti maa iin ni ya kuu Jito' o ja ta'u jniñu nuu yo vijna. Maa iin ni Cristo kuu ja ka kandixia yo, ti mani ja siki maa ya kuu ja kuanducha yo. <sup>6</sup> Ti iin ni Yandios iyo, ya kuu Tata tendi'l'i yivi. Maa iin ni ya kuña'nú ti sa'a ya jniñu ja kuu taka yivi, ti kancha maa ya jiin i.

<sup>7</sup> Iin ni ga ka kuu yo chi ka kandixia yo Cristo. Ko suni nuu iin iin yo ni ja'a siin siin ya iin ta'u, ti ta'u un kuu jniñu ja kuajniñu yo ja na kunukuachi yo nuu ñani jna'an yo ja suni ka kandixia i Cristo. <sup>8</sup> Ja yukan kuu ja ka'an nuu tutu ii Yandios siki Cristo:

Ja ni ndaa ya kuan no'on ya andivi, chi ni kundee ya jiin taka ja ni ka kinjna'an jiin ya.

Ti ni tejna'an ya jniñu sa'a iin iin yivi ya.

Kachi tutu. <sup>9</sup> Tutu yukan ka'an ja ni ndaa ya undi nuu andivi chi xnakan ni kii ya nuu ñuyivi ja'a. <sup>10</sup> Ni chaa ya nuu ñuyivi ja'a, ti ni ndaa ya kuano'on ya andivi nuu ni nduña'nú xaan ya. Ti yukan ta'u ya jniñu nuu tendi'l'i ja iyo nuu andivi jiin ñuyivi, nava na siuku ndaa taka ja iyo yukan. Ti jiin yukan ni stuu ya ja kuña'nú ga ya. <sup>11</sup> Ti ni tejna'an ya iin iin jniñu sa'a iin iin yivi yinda'a ya. Ni jani ya apóstol ja ka ndiso da jniñu ña'nú ga nuu Yandios. Suni ka iyo profeta ja na ka'an da jnu'un vajji nuu maa Yandios nuu yivi. Suni iyo yivi ka ka'an jnu'un Cristo nuu yivi ja maa ya nama maa i. Sava ga ka kuu pastor ja ka jito da yivi ka kandixia jiin ja ka xna'an da jnu'un Yandios nuu i naa i. <sup>12</sup> Taka un ni ja'a Yandios nuu yivi naa i nava na kendo tu'va i ja kunukuachi i nuu inga yivi kandixia. Ti sia'an kuan kuu ndee ga ini maa yivi ja ni ka ndivi i nda'a Cristo. <sup>13</sup> Kuan kuu ndee ga ini yo undi na nduu iin nuu ini yo jiin jnu'un ka kandixia yo ja kuu yo Se'e Yandios. Ti sia'an na kivi va'a inijnuni yo nasa vii ni kuña'nú Cristo, ti na siuku ndaa yo maa jnu'un Tata yo Yandios nanu ni siuku Cristo.

**14** Ti nu na chaku va'a ini yo jniñu ni sa'a Cristo, ti tukaa kuu yo nanu suchi kuachi ja ka ndo'o ja'a ja ka ndo'o yukan ini i. Ni tukaa kivi nduu yo jiin inga jnu'un ja xna'an chaa ka xnda'u, ja ka nduku da nasa na skivi da yo'o nuu jnu'un xndoña'an un. **15** Chi su'va na ka'an ndaa na ka'an mani yo jiin ñani jna'an yo ja suni kandixia i Cristo. Na ka'an yo sia'an nava jna'an ja ka kunda'u ini jna'an yo. Sia'an na ti tukaa ka kuu yo nanu suchi kuachi, chi kuan kua'nu yo jiin taka jniñu kuni maa Cristo, chi maa iin ni ya kuu ja kuña'nu nuu yivi ya, ti yivi un ka kuu i nanu yiki kuñu ya. Ti maa ya kuu xini yivi un naa i chi maa ya kuu ja yoxnuu. **16** Ti maa ya sa'a ja na nduu iin nuu ini yivi ya, ti na chindree jna'an i jiin taka jniñu, nanu ja ka iyo va'a nda'a yo, iyo va'a ja'a yo iyo va'a ni yiki kuñu yo. Sia'an kuu sa'a jniñu ni tu'u yiki kuñu yo. Ti kua'an sa'a jniñu tatu yo ja na chindree yo inga yivi. Ti sia'an na chindree jna'an yo jiin iin iin jniñu ni ka ni'in yo ja sa'a yo. Ti sia'an nava na kuu ndee ini yo jiin jnu'un Yandios, ti na kunda'u ini jna'an yo.

### Cristo sa'a ja na ndujaay o

**17** Ru'u Pablo, ja'a kuu jnu'un ka'an ri jiin ra naa ra, ti ja ni kachi maa Jito'o kuu ja ka'an ndaa ri jiin ra, ja tukaa sa'a ra nanu ka sa'a inga yivi ja tu ka nakuni i Yandios, ti tu nijniñu nava ka ndo'o ini i. **18** Chi ni ka kuñaa inijnuni i. Tu kancha Yandios jiin i. Sia'an kanchuku i chi tu ka jini jnu'un ya. Ni ka nduni'in ini i nuu jnu'un Yandios. **19** Tukaa kukanuu i chi ni ka kivi i jiin taka jniñu kue'e. Ti ni ka kusii ga ini i jiin jniñu kue'e un. **20** Ko ro'o naa ra, ansu ni ka kandixia ra Cristo ti kunchuku ra nanu kanchuku yivi un naa i. **21** Nu ni ka jiniso'o ra taka jniñu ni sa'a Cristo, ti ni kendo xini ra naa ra. Ti maa iin ni yukan kuu jnu'un ndaa. **22** Ja yukan kuu ja na nduu ra nanu iin yivi jaa, chi na xndoo ra taka jniñu kue'e ni ka sa'a ra undi nuu, chi vijna tukaa nijniñu yukan. **23** Ko vijna nasama ini, ti nakani jaa inijnuni ra. **24** Na nduu ra nanu iin yivi jaa nu tava i sa'ma tu'u ti na ku'un i sa'ma jaa un, chi vijna naki'in jaa taka jniñu va'a jiin ni ini ni añu ra. Ti va'a kani ini añu ra jiin inijnuni ra nava na sa'a ra nava kuni maa Yandios, ti na koo ndoo ra ti kaka ndaa ra ichi ya.

### Nasa kaka ndaa yivi ichi Yandios

**25** Yukan kuu ja koto ka'an ga ra jnu'un xndoña'an, ko na ka'an jnu'un ndaa nuu jna'an naa ra, chi iin ni yivi ka kuu ra. **26** Nu ni ka kuiti ini nuu jna'an ra, ti koto kanaa ra nava tu kuncha kuachi ra. Ti koto ma koto u'u jna'an ra ja kuu ni nchaka, ti kasí ra jnu'un kuiti ini ti sa na kee ndikandii. **27** Ti koto kua'a ra jnu'un ja kivi ja'u'u un ini ra ti chakuachi ra maa ra. **28** Ti yivi ni ka sakui'na, koto sakui'na ga i. Chi su'va na sajiniñu i, ti na kukutu ini i jiin jniñu va'a nava na ni'in ja kua'a i nuu inga yivi ka nandi'i. **29** Koto ka'an ga ra jnu'un kue'e, chi su'va ka'an ra jnu'un va'a nava na ni'in jna'an ra jnundee ini. Ti sa'a ja na kendo va'a yivi ka ñuso'o un. **30** Koto sa'a ra iin kuachi nava tu kendo kui'ya ini Espíritu Santo Yandios. Chi maa Espíritu un kuu nanu iin sello ja ka yi'i yo jiin Cristo, ti na koto ya ro'o undi na jaa kivi nu keta'u ra nuu ya. **31** Xndoo taka jnu'un ka ndo'o u'u ini nuu jna'an, taka jnu'un ndiyo ini jiin jnu'un kuiti ini, jiin jnu'un ka'an ndeva'a, jiin taka jnu'un kue'e. **32** Kava va'a ini ti koto nda'u jna'an naa ra, kuanka'nu ini nuu jna'an naa ra nanu ni sa'a Yandios jiin yo'o naa yo. Chi ni taji ya Cristo ni ji'i ya ja siki kuachi yo. Ja yukan ni janka'nu ini Yandios nuu kuachi yo.

## 5

**1** Ja sia'an kuu ja ndaku nanu kaa maa Yandios chi ka kuu ra se'e ya, ti jandaa kuu ja kunda'u ini ya ro'o naa ra. **2** Ti nini kunda'u ini jna'an naa ra nanu ni kunda'u ini Cristo yo'o. Ni soko ya maa ya ja'a yo nanu ni ka sa'a yivi

undi nuu, na ni ka yinda'a yivi un iin ja kuu iin ta'u nuu Yandios. Ti Cristo ni ja'a ya jnu'un ja ni ji'i ya ja'a yo, nanu ni iyo undi nuu ja ni ka ja'ni yivi kuiti i ja ni ka soko i nuu Yandios ja na kenchka kuachi i. Sia'an ni ji'i Cristo ja'a yo nava tukaa jna'nu ndatu yo nuu Yandios. Ti ni kusii ini Yandios jiiin jniñu na'nu ni sa'a Cristo. Sia'an nava ni kunda'u ini Cristo yo'o, ti suni sia'an na kunda'u ini jna'an ra naa ra. <sup>3</sup> Ti vijnal ka kuu ra se'e Yandios, koto sa'a ra ni iin jniñu ndeva'a. Koto kua'a ra ichi ka ka'an yivi ja yisikinchaa ra jna'an ra. Koto kundiyo ini ra sa'a ra jniñu kue'e, xi kundiyo ini ra ni'in kua'a ra ndajniñu. Koto sa'a ra jniñu un vasu ni ti'li. Sa'a taka ja va'a nava jna'an ja kuu ra yivi yi'i nda'a Yandios. <sup>4</sup> Koto ka'an ga ra jnu'un siki. Koto ka'an ga ra jnu'un kue'e. Koto kuu ichi ini ra ti sa'a ndeva'a ra. Chi taka un tu ni'in jniñu. Ti su'va nakuanta'u nuu Yandios naa ra. <sup>5</sup> Ja ka jini ra ja nu iin yivi jika jiiin jnu'un sii ini, siki ichi ñasi'i ja ka sa'a jniñu kue'e. Xi ja ndiyo ini i ja ni'in i kua'a ndajniñu, yivi un tu nanita'u i ja kivi i nuu nuu ta'u Cristo jniñu jiiin Yandios. Chi taka ja ndiyo ini yivi un kuu nanu iin santu ja chiñu'un i. <sup>6</sup> Koto ma xnda'u ni iin yivi un ro'o jiiin jnu'un ja tu ka'an ndaa i, chi siki jnu'un ndeva'a un kuu ja kii iin nundo'o ka'nun xaan ja kua'a Yandios nuu yivi ka kuni'in ini nuu ya.

<sup>7</sup> Ja sia'an kuu ja koto ma kivi nduu ra jiiin yivi un naa ra.

<sup>8</sup> Undi nuu ni ka jika ra nuu ñuñaa chi ni ka sa'a ra kuachi. Ko vijnal na ti kaka ra nuu ñundijin, chi ka kuu ra yivi Yandios. Ti Yandios kuu ñundijin, chi tu iyo ni iin kuachi nuu ya. <sup>9</sup> Nu kaka ndaa ra sia'an ti ka jini ndaa yivi ja ka jika ra ñundijin, ja ka sa'a ra mani jniñu va'a, ja koo ndoo koo ii ra nuu Yandios, jiiin ja ka'an ra mani jnu'un ndaa. <sup>10</sup> Sia'an ti nduku ndee ra jniñu va'a ja kuni maa Jito'o, ti yukan sa'a ra.

<sup>11</sup> Koto kivi nduu ra jiiin taka ja tu ni'in jniñu ja ka sa'a yivi ka sa'a ndeva'a. Chi su'va kankuachi ra siki jniñu kue'e un. <sup>12</sup> Kukanuu yo nuu ndakuni'in yo jniñu kue'e ja sa'a sa'y i yivi. <sup>13</sup> Ko kuni yivi taka jniñu un, chi na kenda ndijin na siki kuu. <sup>14</sup> Ja yukan kuu ja ka'an jnu'un ja'a:

Ro'o ja kixi kixi, ndoto ini.

Ti ka'ncha ini jiiin jniñu kue'e sa'a ra un, chi skivi Cristo ro'o nuu ichi ñundijin. Kachi jnu'un un.

<sup>15</sup> Yukan kuu ja koto va'a maa ra nava kanchuku ra nuu ñuyivi ja'a. Tu sa'a ra nanu ka sa'a yivi tu ka jini kuiti i jnu'un Yandios. Chi su'va na kivi undi inijnuni ra maa jnu'un xndichi ja siki nasa kunchuku ra nuu ñuyivi ja'a.

<sup>16</sup> Koto xnaa ra kivi ja ni ja'a ya nuu ra ja na sa'a ra jniñu va'a, chi vijnal ka iyo kua'a yivi ka sa'a mani jniñu kue'e un. <sup>17</sup> Ja sia'an kuu ja koto ma sana xini ra, chi su'va na kivi inijnuni ra taka jniñu kuni ya ja sa'a ra. <sup>18</sup> Koto ko'o ra ndixi chi xnaa ra maa ra. Ti su'va na kuncha Espíritu Santo jiiin ra, ti na xna'an ya nava sa'a ra. <sup>19</sup> Ja yukan kuu ja ka'an, ti kua'a jnundee ini jna'an ra jiiin salmo, jiiin himno, jiiin taka ga yaa ii ja ka'an jnu'un Yandios. Ti kata jiiin ni ini ni aña ra naa ra ja chiñu'un ra maa Jito'o. <sup>20</sup> Ti niní nakuanta'u naa ra nuu Tata yo Yandios siki taka ja ka jna'an ra. Ti taka kivi sa'a ra naa ra, ndakuni'in sivi maa Jito'yo Cristo Jesús.

### Nava kanchuku yivi ka kandixia Cristo

<sup>21</sup> Koto kava vixi ini ra, chi su'va kuandatu nuu jna'an naa ra ja ka chiñu'un ra Cristo, chi iin ni ka kuu tendi'i ro'o ja ka kandixia ra Cristo naa ra.

<sup>22</sup> Ro'o ja ka kuu ñasi'i naa ra, kuandatu ra nuu yi'i ra nanu ka jandatu ra nuu maa Jito'o. <sup>23</sup> Chi chaa un kuña'nu da nuu ñasi'i da nanu kuña'nu Cristo nuu taka yo'o, ja ka kuu yo yivi ka kandixia. Ti maa ya kuu xini ja nama ya yo'o, ja ka kuu yo nanu yiki kuñu ya, chi iin ni ka kuu yo jiiin ya. <sup>24</sup> Ti nanu ka

jandatu yivi ka yi'i nda'a Cristo nuu maa ya, suni sia'an kanuu ja na kuandatu ñasi'i un nuu jnu'un ka ka'an yi'i ña.

<sup>25</sup> Ro'o chaa ja ka kuu ra yi'i, kunda'u ini ñasi'i ra nanu ni kunda'u ini Cristo yivi ya, ti ni soko ya maa ya ja'a i. <sup>26</sup> Sia'an ni sa'a ya nava na koo ndoo koo ii yivi nuu ya. Ni sa'a ya un siki ja ni kandixia yo jnu'un ya ja kuu ya Cristo, ti ni ka janducha yo. <sup>27</sup> Ni soko Cristo maa ya ja'a yivi ya, nava nu na jaa kivi' nu nastutu ya yivi ya nuu maa ya, ti yukan ka ndundoo yo. Ti tukaa na kuachi kuncha jiin yo. Ni iin jniñu kue'e tukaa kendo jiin yo, chi yukan koo ndoo koo ii yo nuu ya, ti tukaa na kuachi kuncha siki yo nuu ya. <sup>28</sup> Ti nanu ni kunda'u ini Cristo yivi ya, suni sia'an kuni ja na kunda'u ini iin chaa nuu ñasi'i da nanu kunda'u ini da nuu maa da. <sup>29</sup> Chi ni iin chaa tu jito u'u da yiki kuñu da. Chi su'va, skaji da maa da ti jito va'a da maa da. Suni sia'an sa'a Cristo jiin yo'o, yivi ka kandixia ya. <sup>30</sup> Sia'an sa'a Cristo chi ka yi'i yo nda'a ya. Sa'a yo nanu ja ka kuu yo nanu yiki kuñu ya, ti maa ya kuu xini, ti iin iin yo kuu nanu iin iin nuu yiki kuñu ya. Ja yukan kuu ja jito va'a ya yo'o chi ka yi'i yo jiin ya. <sup>31</sup> Kachi tutu ii Yandios: "Ja yukan kuu ja iin chaa xndoo da tata da jiin nana da, ti kuncha da jiin ñasi'i da, ti iin ni ga ni ka kuu ndinduu da", kachi tutu.

<sup>32</sup> Ti nuu tutu ii Yandios un ka jini yo jnu'un kanuu ja undi nuu ni kuu jnu'un yisa'yí, ko tukaa vijnna. Chi ru'u Pablo, ka'an ri ja yukan kuni ka'an ja kancha Cristo jiin yivi ya. <sup>33</sup> Ja yukan kuu ja kuu ini ti kunda'u ini ra nuu ñasi'i ra naa ra nanu kunda'u ini ra maa ra. Ti ñasi'i un na kava yiñu'un ña jiin yi'i ña naa ña.

## 6

<sup>1</sup> Ro'o suchi kuachi, kuandatu nuu tata ra nuu nana ra, chi yukan kuu ja va'a ja sa'a ra nava kuni maa Jito'o. <sup>2-3</sup> Ja'a kuu iin jnu'un kanuu ga ja kuu suchi kuachi. Ti nu kuandatu ijniñu ja ta'u Yandios, ti chisojnu'un ya ja kua'a ya iin ta'u nuu i. Ja'a kuu jnu'un: "Kava yiñu'un nuu tata ra, nuu nana ra, nava sia'an na kundatu ra ti kuchaku na'an ra nuu fiuyivi ja'a", kachi ya. <sup>4</sup> Ti ro'o ja kuu tata naa ra, tu skuiti' ra ini se'e ra, chi su'va skua'nu ra i jiin jnu'un Yandios nava kuni maa Jito'o ja xna'an ra nuu i. Vii xndaku ra nuu i nava na kivi inijnuni i nasa kaka ndaa i nuu fiuyivi ja'a. Ti nu tu jandatu i, xndaku ni'in nuu i nava na nakani ichi ra i.

<sup>5</sup> Taka ro'o naa ra ja ka kuu muzu, ja ni ka jaan yivi jiin xu'un, na kachi ri nuu ra naa ra, kuandatu nuu yivi ka xiin ro'o nuu fiuyivi ja'a. Kava yiñu'un ti kukutu ini ti kua'a ja yiñu'un nuu maa da. Ti sa'a nanu ja nuu Cristo junukuachi ra. <sup>6</sup> Koto kunchuku ra nanu kanchuku inga yivi. Ka sa'a va'a da jniñu un nu kande yivi xiin maa da, chi kuni da ja na kusii ini da jiin da. Ko tukaa sa'a teyi' da jniñu nu tukaa kande jito'o da. Koto sa'a ra sia'an, chi su'va sajnihnu ti sa'a ra nanu ja nuu Cristo junukuachi ra. Sa'a jiin ni ini ni añu ra, chi sia'an kuni Yandios. <sup>7</sup> Sa'a jiin ni ini ni añu ra, chi sa'a ra jniñu ja kuu Jito'yo ansu sa'a ra ja kuu yivi naa i. <sup>8</sup> Chi ja ka jini ra ja taka jniñu va'a ka sa'a iin ra, suni sia'an ni'in ra ya'u ra nuu jniñu un nuu maa Jito'yo, vasu ka kuu ra muzu xi sa'a ra jniñu maa ra. <sup>9</sup> Ti ro'o ja ka nchaka muzu, suni sia'an sa'a ra ja koto va'a ra muzu ra. Tukaa siu'u ra da ja kuu da muzu ra, chi ja jini ra ja Jito'o ra kancha ya andivi. Ti suni maa ya kuu Jito'o maa da, ti tu sa'a ya nanu nasa kanda iin iin yivi, chi xndichi iin nuu ya tendi'i yivi.

### Nasa nama yo maa yo

<sup>10</sup> Ru'u Pablo, vijnna ti iyo inga jnu'un kanuu ga ja xndaku ri nuu ra naa ra, ja iin ni se'e ka kuu yo nuu Cristo. Koto xndili' ra ini ra, chi su'va kukutu ini siki ja ka yi'i ra jiin Jito'o, ti maa ya kuña'nu xaan ga. Yukan kuu ja na kua'a

ya jnundee ini ro'o naa ra. <sup>11</sup> Koto va'a maa ra nanu jito va'a iin soldado maa da, chi sia'an kuni Yandios chindee ya ro'o naa ra, ti nava na jakuiñi ni'in ra ti nama ra maa ra nuu ja'u'u un nu kuni xnd'a'u ro'o. <sup>12</sup> Sia'an kunchuku ra chi ka kinjna'an yo jiin taka tachi u'u ka jika nuu sukun un. Ti ansu jiin yivi kanaa yo, chi kanaa yo jiin taka tachi xaan un. Kanaa yo jiin ja'u'u ja ta'u jniñu nuu yivi ja'a nava na kaka i nuu ichi ñuñaa, ja ka sa'a ndevara'a i nuu ñuyivi ja'a. Ti jiin yukan kuu ja kanaa yo. <sup>13</sup> Ja yukan kuu ja koto va'a maa ra jiin taka ja ni ja'a Yandios nuu ra, nuu iin soldado nu jito va'a da maa da. Ti nava sia'an na ti kuu kinjna'an ra jiin ja'u'u un nu na jaa kivi kanaa ra jiin. Koto va'a maa ra nava undi sandi'i ni ga ti kundee ra jiin.

<sup>14</sup> Na kachi ri ja kundichi teyi ra ti kandixia ndaa ra jnu'un Yandios. Ti na koo ndee aña ra nanu iin soldado ja ju'ni da iin cinturón ñii chii da nu ñu'un ndajinuñu da, nu kua'an da nuu guerra. Ti suni jasi da iin sa'ma kaa jika da ja na nama da maa da. Ti yukan kuu ja sa'a ja na kundee ini da. Ti sia'an kundichi teyi ra nava ni kachi maa Yandios ja na koo ndaa ini ra nuu ya. <sup>15</sup> Ti ja iyo tu'va ra chi kandixia ndaa ra jnu'un Yandios nasa ni kii Cristo Jesú, ti ni ndumani ya jiin ra. Ja yukan kuu ja iyo tu'va ra ja kinjna'an ra jiin iin ja sa'a ndevara'a jiin ra, nuu nachi'i iin soldado ndijña da ja'a da ja satu'va da maa da ja kanaa da. <sup>16</sup> Ti kanuu ga ja na kandixia ndaa ra jnu'un Yandios nasa ni kii Cristo, chi nu na siuku ndaa ra jnu'un un ti kuu kundee ra jiin taka nundo'o kua'a ja'u'u un. Ti jnu'un Yandios un kuu nanu iin escudo ja nama soldado un maa da nuu vaji flecha jika da. <sup>17</sup> Suni sia'an kaku ra nuu ja'u'u un chi nama ya ro'o. Nanu ku'un iin soldado iin koko kaa xini da ja na nama da xini da. Ti nu na nakuni va'a ra jnu'un Yandios nava yoso nuu tutu ii ya, ja ni ja'a Espíritu Santo nuu ra. Yukan kuu nanu iin espada jajniñu iin soldado ja kanaa da jiin, ti suni sia'an sa kundee ra jiin jnu'un ya. <sup>18</sup> Suni kanuu ga ja taka kivi kanda'u ra jiin Yandios ja na chindee ya ro'o jiin taka un. Ti chindee maa Espíritu Santo ro'o jiin jnu'un jikanta'u ra nuu Yandios. Suni kanuu ja na koto va'a ra maa ra ja tu naa ini ra kanda'u ra jiin ya ja kuu inga yivi kandixia, ja suni na kundee i kivi kinjna'an i jiin ja xaan un.

<sup>19</sup> Ti ja kuu ru'u Pablo, suni kanda'u naa ra jiin Yandios ja kuu ri nava na ni'in ga ri jnu'un ka'an ri, ti na koo teyi ini ri ti ka'an kaji ri jnu'un Yandios siki Cristo. Najana'an tu ni ka jini va'a yivi yukan, ko vijnna ti ja ka jini va'a yo ja nama ya yivi. <sup>20</sup> Ti vasu ja kande ri vekaa vijnna, ko ni tatu Yandios ru'u jniñu un ja na ka'an ri jnu'un ya. Kakanta'u jiin maa ya ja na koo teyi ini ri ka'an ri jnu'un ya, nava tu kukanuu ri ka'an ri.

### *Jnu'un sandi'i ni ga*

<sup>21</sup> Ti ñani yo Tíquico, kuu da iin chaa junukuachi va'a nuu Yandios ja chindee da ru'u nuu jniñu maa Jito'o. Ti maa da kachi ndi'i nasa kua'an ri jiin jniñu ri, ti suni ja nasa kuu ri. <sup>22</sup> Ja yukan kuu ja taji ri da na jaa da nuu kanchuku ra, nava na kachi da nasa kuu ri. Ti na kua'a da jnundee ini nuu ra naa ra. <sup>23</sup> Ñukuu ini ri ja Tata yo Yandios jiin Jito'o Cristo Jesú na kachi ya ja na koo ndee koo siii ini taka ra jiin taka ñani jna'an yo. Ti na kunda'u ini ya ro'o, ti na kandixia ndaa ra jnu'un ya. <sup>24</sup> Chi ñukuu ini ri ja vi'i ga na kunda'u ini Yandios taka ro'o ja ni ka ndumani ra jiin Jito'o Cristo Jesú, ja kuu ini ndixia ra maa ya. Ti sia'an na koo.

Ti siukan na koo.

## Carta ni chaa Pablo ñuu yívi Filipo

*Pablo jiin Timoteo ka kanxia'u da jiin chaa ka kandixia ñuu Filipo*

<sup>1</sup> Ru'u Pablo jiin Timoteo ja ka junukuachi ri nuu Cristo Jesú. Na chaa ri tutu ja'a nuu taka ro'o ja ka kandixia ra Cristo Jesú, ja kanchuku ra ñuu Filipos, jiin chaa ka yinda'a ro'o, jiin yívi ka chindee ro'o. Chi ni sasiñ ya ro'o ja kunukuachi ra nuu ya naa ra. <sup>2</sup> Jikanta'u ri ja Tata yo Yandios jiin Jito'o Cristo Jesú, na koto nda'u ya ro'o naa ra. Ti na chindee ya ro'o ja na kukuee kunchuku ra nava kuni maa ya.

*Jikanta'u Pablo ja kuu yívi ka kandixia Cristo*

<sup>3</sup> Taka jinu ja nuku'un ini ri ro'o naa ra, ti nakuanta'u ri nuu Yandios. <sup>4</sup> Nini kusii ini ri nuu jikanta'u ri ja'a ra, <sup>5</sup> chi ni ka chindee ra ru'u ja ni ka skaka yo jnu'un ya, undi kívi ni ka kandixia ra ti undi vijná. <sup>6</sup> Suni nakuanta'u ri nuu Yandios ja kuu ro'o naa ra, chi jini ndaa ri ja maa Yandios ni skanda aña ra ja na kandixia ra Cristo. Ti ndo'o ini ri ja tu xndoo ra jniñu un naa ra undi na sinu ndi'i Yandios taka jniñu un sa na jaa kívi nchaa Cristo Jesú. <sup>7</sup> Vatuni nu sia'an ndo'o ini ri ja siki ro'o naa ra, chi ni kundaa ini ri ja iin ni ni chindee Yandios yo'o naa yo. Ti ka ñukuu ini ra ru'u ja ni ka chindee ra ru'u vasu kande ri vekaa, xi jikonuu ri ka'an ri jnu'un Cristo Jesú niku. Nama ri jnu'un Yandios ja siki Cristo Jesú, chi ka'an ri ja maa iin ni jnu'un Cristo kuu jnu'un ndaa kuiti. Yukan ti kankuachi yívi siki ri. Ti nini ni ka chindee ra jiin jniñu un. <sup>8</sup> Ja yukan ti jini Yandios ja mani xaan ri jiin ra naa ra, nanu mani Cristo Jesú jiin taka yo.

<sup>9</sup> Jikanta'u ri nuu Yandios ja vil'i ga na kuñukuu ini ra, ti siin ga ra jiin jniñu Cristo, ti kundio ini ra ja na kutu'va ga ra jnu'un ya nava na kívi inijnuni ra naa jniñu kuni ya ja sa'a ra naa ra. <sup>10</sup> Ti sia'an na kuu nakaji ra taka ja va'a nava na koo ndoo ra naa ra, ti koto kakayata ra nava tu kunchakuachi ra. Ti sia'an kaka ndaa ra nuu ichi Yandios undi na jaa kívi nchaa Cristo. <sup>11</sup> Kunukuachi ndaa naa ra nuu Yandios chi ni ka kívi ra nda'a Cristo Jesú, ti sa'a nava kuni maa ya. Ti na nde'e na kotonchaa yívi ja va'a ka sa'a jniñu ra chi ka jika ndaa ra. Ti na kua'a i ja yñu'un ro'o nuu Yandios, ti ka'an i ja maa iin ni Yandios kuña'nú.

*Na kuñukuu ini yo Cristo ti kuchaku yo*

<sup>12</sup> Taka ro'o ja ni ka kandixia Cristo naa ra, iin jnu'un va'a kuu ja ka'an ri ja'a. Vasu jna'an ri nundo'o, ko sia'an jichanuu ga jnu'un Yandios siki Cristo.

<sup>13</sup> Taka soldado ka'iin vestisia jiin taka ga yívi ñuu ja'a, ka jini i ja kande ri vekaa, ko siki ja ni ka'an ri jnu'un Cristo. <sup>14</sup> Siki ja kande ri vekaa, ti ñuu ja'a ka iyo kua'a ga ñani jna'an yo ja ka sa'a jniñu va'a, vasu ansu ndi'i. Ko chaa un ka ni'in ga da jnu'un ndee ini, ti tu ka yu'u da ja ka'an da jnu'un Cristo.

<sup>15</sup> Jandaaj kuu ja ka iyo sava chaa ka ka'an jnu'un Cristo, ko siki ja ka kukuasun ini da jiin ri, ti ka ka'an vixi da naa da. Sava ga da chi ka nukuun ini da ja kanuu ga ja na ka'an da jnu'un Cristo taka nuu. <sup>16</sup> Ka kunda'u ini chaa un ru'u ti ka kuni da ja na kuichanuu ga jnu'un Cristo. Ka jini da ja kande ri vekaa siki ja ka'an ri jnu'un Cristo, chi nama ri jnu'un un nu ka'an ri ja maa iin ni jnu'un Cristo kuu jnu'un ndaa kuiti. Ti maa iin ni ja kandixia yo Cristo kuu ja chunaa Yandios yo'o. Sia'an ka'an ri jnu'un. Ko ka jini da maa Yandios ja ni tatu Yandios jniñu ja'a nuu ri ja na ka'an ri jnu'un un, ti ka

ñukuu ini da chi ka chindee xaan da ru'u siki jniñu un. <sup>17</sup> Ko sava ga chaa un tu ka sa'a da sia'an, chi vasu ka kuni da ka'an da jnu'un Cristo, ko ka kuasun ini da nuu ri. Ka ndo'o ini da ja koo ri jnu'un kui'ya ini nu na ni'in ri jnu'un siki jniñu da. Ti yukan ka jani ini da ja koo ga ri nundo'o ja kande ri veakaa. <sup>18</sup> Ko su'va, kusii ga ini ri ja ka ka'an da jnu'un Cristo. Vasu tu ka sa'a va'a da jniñu da, ko kusii ini ri chi ka ka'an da jnu'un Cristo. Ja yukan kuu ja kusii ini ri, <sup>19</sup> chi maa Yandios kuu ya nama ru'u. Vasu ka iyo yivi tu mani jiin ri, ko jini ri ja ka jikanta'u ra ja'a ri naa ra. Ti jini ndaa ri ja Espíritu Cristo Jesús chindee ya ru'u.

<sup>20</sup> Ñu'un ini ri ti ñukuu ini ri ja tu kua'a ya jnu'un ja kendo ri nukanuu. Chi iyo ni ini ri ja nama ri jnu'un Cristo. Ja yukan kuu ja nini ka'an ri jnu'un un. Yukan ti na kuni yivi ja jajniñu Yandios ru'u ja sa'a ri jniñu ya, ti na kachi i ja maa iin ni ya kuña'nu. Ja yukan kuu ja ka'an ri jnu'un Cristo, ti tundo sa'a nu na kachi Yandios ja kuchaku ri nuu ñuyivi ja'a xi kuu ri. <sup>21</sup> Chi vijnal chaku ri kuu ja jika ri jiin maa Cristo, chi maa ya ni tatu ru'u ja na sa'a ri jniñu ya. Ti ja kuú ri kuu ja kuchaku ri jiin Cristo jiin ja kuichanuu jnu'un ya nuu ñuyivi ja'a. <sup>22</sup> Nu na kuchaku ga ri ti ni'in ga ri jniñu sa'a ri ja kuu Jito'o. Ko ja'a tu kojnnu nau ja va'a ga. Va'a ga ja kuchaku ri xi va'a ga ja kuú ri. <sup>23</sup> Ja uu jnu'un ja'a, tu kuu nasa nakaji ri, chi kuni ri ja na kuú ri nava na no'on ri kuncha ri jiin Cristo, chi yukan kuu ja va'a xaan ga. <sup>24</sup> Ko ja na chindee ri ro'o naa ra, ti va'a ga ja na kuchaku ga ri. <sup>25</sup> Yukan ti ja ni jini ri ja kuchaku ga ri ti kuncha ri jiin ra naa ra. Ti na xndaku ga ri jnu'un un nuu ra, chi kanuu ga ja na kandixia yo Cristo, ti sia'an na kaka ndaa ra nuu ichi Yandios, ti sia'an nava na kosii ga ini ra naa ra. <sup>26</sup> Yukan kuu ja nu na jaa tuku ri nuu kanchuku ra naa ra, ti kuni ri ja kusii ini ra ja ka yi'i ra jiin Cristo. Ti na nakanajaar ra nuu Yandios ja kuu ru'u, chi ndiso ri jniñu ja ka'an ri jnu'un Cristo Jesús.

<sup>27</sup> Nava ni ka kandixia ra Cristo, ti yukan kuu ja kanuu ga ja na kaka ndaa ra ichi Yandios, ti kuandatu ra nava jniñu ta'u ya ja kunchuku yo nuu ñuyivi ja'a. Nu sia'an na kunchuku ra, naa ra ti tundo sa'a nu na jaa tuku ri yukan xi tukaa. Ko kuni ri ja na ni'in ri jnu'un ja ka nakutu ini ra jiin jniñu un. Ti ka ndajnu'un ra siki jnu'un ja ka kandixia ra Cristo. Ti sia'an na nduu iin nuu ini ra, ti tu yu'u ra ja kachi ndaa ra ja ka kandixia ndaa ra jnu'un Cristo. <sup>28</sup> Ti koto ma yu'u ra yivi ka jito u'u ro'o naa ra, chi nu na koto u'u i ro'o, ti yukan kuu ja su'va ka xnaa i maa i. Ti maa ya nakinse'e ya ro'o, ti nanita'u ra nuu ya naa ra ja ni ka kandixia ra Cristo. <sup>29</sup> Ti ja siki jniñu ni sa'a Cristo, ansu nini ja na kandixia ra ya, chi suni ja na kondo'o ra ja siki ya naa ra. <sup>30</sup> Ti maa ri jiin maa ra naa ra, na kinyii yo jiin taka jnu'un ndeva'a un. Chi ni ka jini ra ja sia'an ni sa'a ri undi nuu, ti suni ka ni'in ra jnu'un ja siin ga ri undi vijnal.

### Nda'u ni kii Jesús ko ni nduña'nu ya vijnal

## 2

<sup>1</sup> Ja sia'an kuu ja Cristo ja'a jnundee ini, ti ka iyo sii ini ra. Ja kunda'u ini ya ro'o naa ra, ti ja'a ya Espíritu ya kancha jiin ra. Ti ka kuu mani nuu jna'an ra, ti ka jito nda'u jna'an ra. <sup>2</sup> Ti sia'an siuku ra taka jnu'un nava ka'an ru'u Pablo, nu na ni'in ri jnu'un taka jniñu ka sa'a ra, ti kusii kuva'a ini ri. Ti na koo iin nuu ini ra naa ra. Ti iin nuu na kunda'u ini nuu jna'an ra. Ti iin ni na koo injnuni ra. Ti iin nuu na kondo'o ini ra naa ra. <sup>3</sup> Koto ma sa'a ra nini ja kuu ja va'a maa ra, ni koto chundee ra jnu'un vixi yu'u ra. Chi su'va sa'a nda'u maa ra naa ra. Sa'a na kaa ja kuña'nu ga ñanijna'an ra ja kuu maa ra naa ra. <sup>4</sup> Koto nde'e ra nundo'o kaxndee nuu maa ni ra, chi suni nde'e ra nundo'o iyo nuu ñiani jna'an ra naa ra.

<sup>5</sup> Kani ini maa ra nanu ni jani ini Cristo Jesús. <sup>6</sup> Vasu iin nuu ya jiin maa Yandios, ko tu ni nduni'in ini ya ja kendo ya sia'an ni. <sup>7</sup> Chi ni xndoo ya jniñu un jiin Yandios ti ni nduu ya nanu iin yivi junukuachi, chi ni kaku ya nanu iin yivi sia'an ni. <sup>8</sup> Ti nu ni chaa ya, ni ndaku ya nanu iin chaa sia'an ni. Ni jika nda'u ya, ti ni jandatu ya vasu nda'u ni ji'i ya nuu nda'a cruz. <sup>9</sup> Yukan kuu ja ni sa'a Yandios ja na ndaa Jesús nuu andiví nuu ni nduña'nu ya. Ti yukan ni ja'a Yandios iin jniñu ña'nu nuu ya. <sup>10</sup> Ti vijnja ja ni nduña'nu ga Jesús, ti taka ja ka iyo andiví jiin fuyivi jiin ja ka'iin chiñu'un, na nakua'a i ja yiñu'un nuu ya, <sup>11</sup> ti nava na ka'an i ja Cristo Jesús kuu maa Jito'o i ti maa iin ni ya kuu ja ndiso jniñu ña'nu ga. Sia'an kuu ja na nakua'a i ja yiñu'un nuu Tata yo Yandios, chi maa ya ni ja'a jniñu ña'nu un nuu Jesús.

### *Yivi ka kandixia, ka kuu i nuu iin nduva ñu'un nuu yivi ka'iin ñuñaa*

<sup>12</sup> Taka ro'o ja kuu ñani jiin jna'an yo, ja ni ka jini ra jnu'un ja ni jandatu Cristo. Suni sia'an ni ka jandatu ra jnu'un Yandios ja ni xna'an ri nuu ra na ni kuncha ri jiin ra. Vijnja ti kuandatu ga jnu'un un naa ra vasu tukaa kancha ri jiin ra. Na nduku ndee ra kaka ndaa ra ichi Yandios. Chiñu'un jnu'un ya ti koto ma xnaa ra naa ra. Chiñu'un jnu'un ya ti koto ma xnaa ra naa ra. Ti nu chiñu'un jnu'un ya ti koto ma xnaa ra naa ra. Chi nu na kaka ndaa ra jiin jnu'un ya, ti ka ja'a ra jandaa ja ni nama ya ro'o. <sup>13</sup> Kusii ini ya nu na sa'a ra taka un naa ra, chi maa ya kuu ja chindee chituu ro'o, ja ka siuku ra jniñu ni tatu ya nuu ra naa ra.

<sup>14</sup> Sa'a ni ini jniñu un naa ra, ti koto ma jankuncha jna'an ra naa ra. <sup>15</sup> Chi ka kuu ra yivi ka junukuachi nuu Yandios, ti sia'an kaka ra nuu ñuyivi ja'a, nava tu naa kuachi koo siki ra, ti koto ma na kaka yata ra nu ka ni'in kuachi siki ra. Kaka ndaa jiin ichi Yandios, ti nava tu sana ra ichi yakua nuu ka jika yivi ñaa. Stuu jniñu va'ka sa'a ra nuu yivi ñaa un naa i, ti na kuu ra nanu nduva ñu'un ja ndinchaa. Ti nava na ndundijin ini yivi ka iyo ñaa ini, chi kanchuku i nuu ñuñaa kuiti nuu ñuyivi ja'a. <sup>16</sup> Ja sia'an ka jika ndaa ra nuu ichi Yandios, yukan ka ja'a ra jandaa ja ka kandixia ra jnu'un ya, ti jiin jnu'un un siin ra ja kuu taka kivi, ti nava sia'an na kunchuku ra jiin ya. Yukan na ti kusii ini ri ja kuu kivi nchaa Cristo, chi kuni ri ja tu ni sa'a jniñu ka'a ri ja ni xna'an ri jnu'un Yandios nuu ra naa ra. Vasu ni iyo ri nundo'o siki jniñu na ni kuncha ri jiin ra naa ra, ko tu ni sajniñu ka'a ri. <sup>17</sup> Ni ka kandixia ndaa ra jnu'un Yandios siki Cristo. Ti vijnja ka iyo ni ini ra ja kunukuachi ra nuu Yandios, ti yukan kuu nanu ja ka soko ra maa ra nuu ya. Ko ja siki ru'u, nanu ri nuu iin nuu jniñu un ja ka soko ra nuu ya. Chi nu ka'nii i ru'u, yukan kuu nanu iin jniñu ja suni ka soko ra nuu Yandios. Sia'an kuu chi ja siki jniñu ni sa'a ri un ni ka kandixia ra Cristo. Ti vasu na kuñri, ko kusii ini ri jiin ra naa ra ja sia'an siuku jniñu ni ja'a Yandios nuu ri. <sup>18</sup> Chi ja siki jichanuu jnu'un Cristo na koo jnu'un siini naa ra nava suni undi ru'u na kusii ini ri.

### *Timoteo jiin Epafroditu*

<sup>19</sup> Ru'u Pablo, ñukuu ini ri ja na kua'a maa Jito'o Jesús jnu'un, ti na taji yachi ri Timoteo jaa da nuu kanchuku ra naa ra. Ti nu nandeokuñi da ja'a ti kunda'a da jnu'un ja kukuee kanchuku ra naa ra. <sup>20</sup> Chi tukaa iyo inga chaa ndo'o ini nanu ndo'o ini maa ri, ti maa da suni ndi'i ini da nasa ka kuu ra naa ra. <sup>21</sup> Taka ga chaa ka nduku da ja kuu maa da, ko tu ka nduku da jniñu kuni Cristo Jesús. <sup>22</sup> Ti ja ka jini ra ja Timoteo kuu nanu iin se'e nuu tata da, chi sia'an ni sajniñu da jiin ri na ni ka'an da jnu'un Yandios siki Cristo. <sup>23</sup> Ja yukan kuu ja kuni ri taji ri da na jande'e da ro'o naa ra. Ko xnakan na kujnuni ini ri nasa kendo ri ja'a, ti sa na taji ri da. <sup>24</sup> Ko jinijnuni ri ja kua'a maa Jito'o jnu'un, ti jaa maa ri vasu ti jaku kivi nuu kanchuku ra naa ra.

<sup>25</sup> Ti Epafroditó, chaa ni ka taji ra ja na nduku da ja kumani nuu ri ja'a, ti va'a xaan chindée da ru'u. Nanu ja ka kanaa yo nuu guerra, suni sia'an ni chindée da ru'u, chi maa da kuu ja ka'an jnu'un Yandios nuu yivi ja'a. Ko va'a ga ja na nandeokuñi da nuu kanchuku ra naa ra. <sup>26</sup> Chi ndi'i xaan ini da, ti ndiyo ini da ja kuni tuku da nuu ra naa ra. Ti suni kukui'ya xaan ini da, chi ni ka ni'in ra jnu'un ja ni ku'u da. <sup>27</sup> Ti jandaa ndixia kuu ja ni ku'u da, chi ti'lí ni ga ti kuú da niku, ko ni kunda'u ini Yandios maa da ti ni nduva'a da. Ti ansu nini maa da, chi suni ni kunda'u ini ya ru'u nava tukaa koo ri jnu'un kui'ya ini ja'a da niku. <sup>28</sup> Ja yukan kuu ja ndi'i ga ini ri, ti kuni ri taji ri da jaa da nuu kanchuku ra, ti nde'e ra nuu da nava na kuva'a ini ra naa ra ja iyo sií ini da. Ti suni undi ru'u kuva'a ini ri, ti tukaa kukui'ya ini ri. <sup>29</sup> Nakinse'e da naa ra nu na najaa da nuu ra, chi iin ni se'e ka kuu ra nuu Jito'o. Ti sia'an na kusii ini ra naa ra ja ni chindée Yandios maa da ja ni nduva'a da. Ti sia'an na kava yiñu'un ra jiin taka chaa ka sa'a nanu sa'a chaa ja'a. <sup>30</sup> Chi siki jniñu Cristo kuu ja jaku ni ga, ti kuu da niku. Chi ni tava ini'da ja kuú da siki ja chindée da ru'u jiin jniñu ja tu kuu sa'a ra nuu ri ja'a naa ra.

### *Jnu'un ka'an ndaa siki Cristo Jesús*

## 3

<sup>1</sup> Ti vijna, taka ro'o ja ka kandixia Jito'o Cristo Jesús naa ra, kosii ini naa ra chi ka'nú iin jniñu ni sa'a ya ja ni ka ndiñi ra nda'a ya.

Ru'u Pablo, va tu naa kuachi kuu ja na chaa tuku ri tutu ja'a nuu ra naa ra, chi va kuajniñu ja kuu ijña isa nava tu kendo kui'ya ra naa ra. <sup>2</sup> Koto ra maa ra naa ra chi ka iyo chaa tu ka kandixia ja iin ni jnu'un Cristo iyo, chi ka sakanuu da jnu'un un jiin inga jnu'un. Ti chaa un ndé'é kanda da, chi yaa yukan kuankoyo da ka kivi nduu da nanu ina tu jito'o. Kuankoyo da ka sa'a ndeva'a da nava tukaa kandixia ra ni iin jnu'un Cristo Jesús. Ka kuni da ja na koo iin jnuni nuu yiki kuñu ra nava na kendo ndaa ra nuu Yandios, ko tu njniiñ un, chi tu kuajniñu kuiti. <sup>3</sup> Ko yo'o naa yo, ka kuu yo yivi ka junukuachi nuu maa Yandios, vasu tukaa ka'an vixi yo ja ni ka iyo iin jnuni yiki kuñu yo, ti ja siki jnuni un ni ka kivi yo nuu nda'a Yandios. Ko chaa un chi sia'an ka ka'an vixi da. Ko yo'o naa yo chi su've sa'a Espíritu Yandios ja na kunchañu'un yo maa ya jiin ni ini ni añu yo. Ka ka'an kaji yo ti ka kusii ini yo ja ka yi'i yo nuu nda'a Cristo Jesús, chi yukan kuu ja kuu nuu maa Yandios, ti ansu ja chiñu'un yo tijni ga nuu jniñu.

<sup>4</sup> Ti nu iyo ndaa jnu'un un ja sia'an iyo, ti va suni undi ru'u kuu kandixia ri jniñu un, sia'an nava ka'an ri niku. Ti nu ka iyo chaa ka jani ini ja ka kendo val'a da nuu Yandios jiin jnuni ja ka ni'in da nuu yiki kuñu da, ti ru'u suni vi'i ga kandixia ri taka jniñu ni sa'a maa ri naa jana'an. <sup>5</sup> Chi nu una kivi ni kaku ri, ti ni ka chaa da iin jnuni nuu yiki kuñu ri. Kuu ri chaa ñuu Israel, ti kuu ri jna'an chaa ni ka nakaya ja ni ka kuu se'e iin chaa ña'nú ni nani Benjamín undi na najana'an. Ni'in ga ni kuu ri se'e ñuu hebreo, ti ni yi'i ri jiin chaa fariseo, chaa ni ka siuku ndaa ley ni ja'a Yandios nuu Moisés, chaa ni kuu jna'an yo najana'an. <sup>6</sup> Ti sia'an ni sa'a ndeva'a ri jiin yivi ka kandixia, chi ni ndo'o ini ri ja tu kua'a kuiti ri jnu'un ja sama i jnu'un ley jana'an un. Ti tu ni iin yivi ni ka'an ja tu ni siuku ri ley un, chi ni siuku ndaa kuiti ri nava iyo. <sup>7</sup> Ti taka ja ni kandixia ri un, sa'a ri nanu ja tu ni ni'in jniñu kuiti, chi ni jasi ini ri ja tu kandixia ri Cristo niku. <sup>8</sup> Ko vijna ti sa'a ri nanu ja va'a ga ja na naa ndi'i ja ni kandixia ri yukan. Chi va'a xaan ga ja ni kivi inijnuni ri, ti ni nakuni ri nau kuu Cristo Jesús jiin taka jniñu ni sa'a ya, ti ni kandixia ndaa ri un. Ti jandaa ndixia kuu ja maa ya kuu Jito'o ri vijna. Chi ja maa ya ti ni xndoo ri ndi'i ja ni

kandixia ri undi nuu, ti vijnna sa'a ri nanu ja ni ndi'i kua'an nuu jayaka. Chi kanuu xaan ga ja ni kandixia ri ti ni ndivi ri nuu nda'a Cristo, ti vijnna na siin ri jiin yukan.<sup>9</sup> Chi ja sia'an na ti ni ndumani ri, ti ni ndivi ri nda'a ya. Tukaa nduku ri ja kendo va'a ri nuu Yandios jiin ley ni kandixia ri undi nuu, vasu ni siuku ndaa ri ley un. Ko ni kachi Yandios ja tukaa jna'nun datu ri, chi ja ni kandixia ri Cristo, ti ansu ja siuku ndaa ri ley ni ja'a Yandios nuu Moisés niku. Ko vijnna na ti ja ni kandixia ri Cristo, yukan tukaa ga jna'nun datu ri jiin kuachi ri.

<sup>10</sup> Ni xndoo ndi'i ri ja ni kandixia ri undi nuu nava na kivi inijnuni ri taka jniñu ña'nun sa'a Cristo ja kuu yo'o. Ndiyo iri ri ja na chaku ini ri ja ka'nun xaan iin jniñu ni sa'a Yandios ja ni naxndoto ya Cristo nuu ñuji'i. Ti nu na chaku ini ri yukan, suni kuu chaku ini ri ja ka'nun ga nundo'o ni jna'an Cristo ja ni ndo'o ya ja siki yo'o naa yo. Ti ja yi'i ri jiin ya kuu ja suni vatuni vasu na kondo'o ri nuu yivi ka jito u'u ya. Chi kuni ri sa'a ri nanu ni sa'a Cristo, ja tu ni nduku ya ja kuu maa ya, chi ni ji'i ya, ko ja ni nama ya siki yo niku.<sup>11</sup> Ti tu yu'u ri vasu sia'an na kondo'o ri, chi nanduku ri na nasa kuu ja najaa ri nuu ya, chi nandoto ri nuu ñuji'i nuu ka'línndiyi un.

<sup>12</sup> Ti tu kachi ri ja ja ni ndi'i yukan ni ni'in ri, chi ti kujnuni ndi'i ga ini ri taka jniñu ni sa'a Cristo ja kuu yo'o naa yo. Ko na kukutu ini ri chi sia'an kuni maa Cristo Jesú, chi ja yukan kuu ja ni nakana ya ru'u.<sup>13</sup> Ñani, ru'u Pablo, tu ka'an vixi ri ja ja ni chaku ndi'i ini ri nasa jniñu ni sa'a Cristo ja kuu yo'o naa yo. Ti tukaa kuni ri ndakuni'in ri taka jniñu ni sa'a ri ja kuu Cristo, ni tu ka'an vixi ri siki yukan. Chi kanuu ga ja na kukutu ini ri, ti na siuku ri taka jniñu ni tatu Yandios ru'u ja sa'a ri ja kuu kivi vajj ijña isa.<sup>14</sup> Ja ni kivi ri nda'a Cristo Jesú kuu ja ni nakaji Yandios ru'u nava nanita'u ri nuu ya. Yukan kuu ja ni ini ni aña ri siuku ri taka jniñu ni tatu ya nuu ri undi na ni'in ri iin ta'u ja kua'a ya nuu ri.<sup>15</sup> Ti taka yo'o ja ja ni ka kuñii yo naa yo jiin jniñu un. Yukan kuu ja ka siuku yo ichi Yandios. Na kuñukuu ini yo ti sia'an na siuku yo. Ti nu iin iin ra tu ka ndo'o ini sia'an ni, xi ka ndo'o ini ja ja ni ka ni'in ra inijnuni ra naa ra nava kuni Yandios, ti suni maa ya na kachi ja ansu sia'an ni kuu.

<sup>16</sup> Na kachi ndaa ri nuu ra naa ra ja ja ni ka jini yo nasa ka'nun kuu jniñu ni sa'a Cristo Jesú siki yo'o naa yo. Ja sia'an kuu ja na kaka ndaa yo nuu ichi ya ti ansu ja nandeokuñi yo siuku yo ley najana'an un.<sup>17</sup> Ñani, nu ka jika ra ichi Yandios ti nde'e naa ra nanu jika ru'u. Ti nava sia'an na kuu nde'e ra nasa ka jika yivi ka kandixia jnu'un Cristo Jesú, nde'e nu ka jika ndaa i nava ni xna'an ri nuu ra naa ra.<sup>18</sup> Yukan kuu ja ni'in xndaku ri nuu ra naa ra, chi tijni jinu ka'an ri ja ka iyo kua'a yivi tu ka kandixia ndaa i ja ni ji'i Jesú ja siki yo'o naa yo. Ka ka'an i ja ka kandixia i, ko jiin nava jika i ti ka jini yo ja ka jito u'u i jnu'un ja ni ji'i Cristo nuu nda'a cruz ja siki yo. Kui'ya xaan ini ri undi nde'e ri, ja nuu nuu xndaku ri, ko ka iyo ndixia yivi ja sia'an kanda i.<sup>19</sup> Ñin kivi ti jna'nun ndatu yivi un, ja so mani ka chiñu'un i ja kaji i. Chi ka ndo'o vixi ini i ja sia'an ka sa'a i jniñu kue'e, ni tu kukanuu i, ti kachi ja ka kendo va'a i nuu Yandios. Ko tuu, chi su'va ka ni'in i jnukanuu, chi ka jitu ga ini i jiin ja iyo nuu ñuyivi ja'a.<sup>20</sup> Ko yo'o chi su'va ka kandixia yo Cristo Jesú, ja na kuu ñuu yo andivi. Ja yukan na kundatu yo ja nchaa Jito'o Jesú, ya kuu maa Cristo ja nama ya yo'o.<sup>21</sup> Ti maa ya nasama yiki kuñu nda'u yo ja'a ja tu na ya'u nchaa. Chi ja kanchuku yo ñuyivi ja'a, nini ndo'o yiki kuñu yo jiin ja nini iyo iin jnu'un ja sanil'in ini yo, ti ka sa'a yo kuachi. Nasama ya yiki kuñu yo nava na nduu yo nanu kaa maa ya ja ni nduña'nun ya. Ti tukaa koo kui'ya yiki kuñu yo. Tukaa ga koo jnu'un ni'in ini ja kuncha kuachi ga yo. Taka yukan sa'a yo chi maa ya kuu ja kuñu'nun nuu ndi'i ja ka iyo nuu andivi jiin nuu ñuyivi.

**4**

<sup>1</sup> Nusa ñani, ja yukan kuu ja Jito'o ni sa'a ya iin jniñu ña'nu siki yo'o, ti na kachi ri ja ka siuku ndixia ra jiin jnu'un ya. Ti ñukuu ini ri yukan, chi mani xaan ri jiin ra naa ra, ti kuni ri ja na nakuni jna'an tuku yo. Yukan ti kusii xaan ini ri ja siki ro'o naa ra, chi ni ka janta'u ra jnu'un Cristo na ni ka'an ri jiin ra naa ra. Ti ka ja'a ra jandaa un, chi ka siuku ndaa ra jnu'un un undi vijnna.

**Xndaku Pablo nuuyivi ka kandixia**

<sup>2</sup> Ru'u Pablo, kanda'u ri jiin ra Evodia ro'o jiin Síntique, iin nuu koo ini ndinduu ra, chi ndinduu ra ni ka kandixia ra Jesús, ti maa ya yinda'a ro'o naa ra vijnna. <sup>3</sup> Ti suni kanda'u ri jiin ro'o ja ni chindee ru'u, ja na chindee ra ndinduu ñasi'i un naa ña, chi suni nde n'iin ni kuijin ña jiin ri na ni ka'an ri jnu'un Cristo. Ti suni Clemente jiin taka ga chaa ni ka yaku jiin ri. Chi Yandios ja jini ya ti ja ni naki'in ya sivi chaa un ja na kunchuku da nuu ya ja kuu taka saa ni.

<sup>4</sup> Taka ro'o ja ka kandixia Cristo Jesús naa ra, koo sii ini naa ra, koo ndendajnu naa ra, chi ni sa'a ya iin jniñu ka'nu ja ni nakinse'e ya ro'o naa ra. Ti nandeokuñi tuku ri ka'an ri ja na koo sii ini ra naa ra. <sup>5</sup> Na kukuee kunchuku ra jiin taka ni yivi. Ka'an mani ra jiin i nava na kuni i ja ka kuu ra yivi va'a ini. Chi kuan kuyajni kivi nchaa tuku Jito'o. <sup>6</sup> Ti tu xndi'i ra ini ra naa ra, nu nau iin nundo'o ka jna'an ra. Chi'i nda'a maa Yandios. Kakanta'u nuu ya, ko suni nakuanta'u nuu ya naa ra. <sup>7</sup> Ti sia'an na kukuee ti na kosii ini ra, chi ja kachi maa ya kuu, ti ansu ja kachi iin yivi ti kuu. Ti sia'an koto Yandios ro'o naa ra, ti koto kondo'o kui'ya ini ra, chi su'va kua'a ya jnu'un ndee ini ro'o, ti nava na kosii ini ra, ti sia'an ni'in jna'an ra jniñu sa'a ra. Taka un kua'a ya chi ni ka kandixia ra, ti ka yi'i ra nda'a Cristo. <sup>8</sup> Ja yukan kuu ja kuñukuu ini taka jnu'un ndaa, jiin taka ja na kua'a ja yiñu'un ro'o naa ra, kaka ndaa, sa'a ndoo maa ra, sa'a iin jniñu kuajnu'un yivi naa i, na natuu iin jniñu ka sa'a ra. Kuñukuu ini ti sa'a taka ja va'a naa ra, taka ja iyo va'a nuu Yandios. <sup>9</sup> Taka yukan ni xna'an ri nuu ra naa ra ti ni ka kutu'va ra na ni kuncha ri jiin ra. Ni ka jiniso'o ra taka jnu'un ni ka'an ri nuu ra naa ra, ti ni ka jini ra nasa ni kanda ri. Ti ro'o naa ra sa'a ra taka yukan nanu ni sa'a ri. Yukan ti Yandios na kua'a ya jnu'un mani ini, ti na kukuee kunchuku ra chi kancha maa ya jiin ra.

**Nakuanta'u Pablo**

<sup>10</sup> Iyo sii ini ri ja yi'i ri nda'a Jito'y. Ko ja ni ya'a kua'a kivi ja tu ni jini ri nu nuku'un ini ra ru'u naa ra xi tuu. Ko vijnna ti ni ka keja'a ra na nduku ra nasa chindee ra ru'u. Yukan ti kusii xaan ini ri. Vijnna ti jini ndaa ri ja ni ka ndi'i ini ra ja kuu ru'u niku, ko tu ni ka ni'in ra ja chindee ra ru'u naa ra. <sup>11</sup> Ko tu ka'an ri ja sia'an ja kumani ja kuu chaku ri, chi sia'an ni vaji ri. Ti kusii ini ri jiin jaku ja ñava'a ri. Ti tu ndi'i ini ri. <sup>12</sup> Jini ri jnu'un nda'u, ti va'a ni chaku ri. Suni jini ri kuñava'a ri, ti suni kuu kinyii ri jiin taka ni nundo'o, chi maa Yandios jito ru'u. Ni'in ri ja kají ri xi ji'i ri soko, nu ñava'a ri xi tu ñava'a ri. <sup>13</sup> Taka yukan ansu ja sa'a maa ri kuu, chi ja yi'i ri nda'a Cristo, ti maa ya kuu ja chindee chituu ru'u, ti kundee ini ri.

<sup>14</sup> Ti vasu taka yukan jna'an ri, ko va'a ni ka sa'a ra ja ni ka jito jna'an ra nundo'o un jiin ri. <sup>15</sup> Ti ro'o yivi ñuu Filipos, ja ni ka jini ra nasa ni kuu. Chi undi kivi na ni kee ri ndañuu Macedonia vaji ri, na ni keja'a ka'an ri jnu'un Yandios siki Cristo Jesús, ti ni chaa nava ja ni ka taji ra ja kuu chaku ri. Ti ni ñinga ñani ka kandixia tu ni sa'a nanu ni ka sa'a ro'o naa ra. <sup>16</sup> Ti na ni kunde ri ñuu Tesalónica, suni tijni jinu ni ka taji ra ja ni kumani nuu ri. <sup>17</sup> Ti ansu kuni

ri ja ndi'i kua'a ra nuu ri, chi su'va kuni ri ja na nakaya jniñu va'a ka sa'a ra, ti nava na koo ga ta'u ra nuu Yandios. <sup>18</sup> Ti ja ni ndi'i un ni naki'in ri, ti su'va ni kendoso ga, chi ni naki'in ndi'i ri ja ni ka taji ra vaji jiin Epafrodit. Ni kusii ini Yandios jiin yukan, nanu ni kusii ini ya jiin yivi Israel na ni ka soko i suxia kutu vixi ja ja'an xiko vixi. <sup>19</sup> Ti nu iyo ja kumani nuu ra naa ra, ti maa Yandios na kua'a ya, chi maa ya kuu ja kuña'nu. Ti tu kachi ra ja tundo na ni'in ra. Tuu, chi iyo ya ja kua'a ya, chi vanua ni ka kandixia ra Cristo Jesú. <sup>20</sup> Ja yukan kuu ja na nakanajaa yo Yandios, ti na ka'an yo ja maa ya kuña'nu ga vijna jiin ja kuu taka kivi. Ti sia'an na koo.

*Jnu'un sandi'i ni ga*

<sup>21</sup> Ka'an ra jiin taka yivi ka yi'i nuu nda'a Yandios ja na sa'a ndee ini i, ja kachi ru'u Pablo, chi ka kandixia i Cristo Jesú. Ti taka ñani yo ja kanchuku jiin ri ja'a, ka ka'an da ja na sa'a ndee ini ra naa ra. <sup>22</sup> Jiin taka ga yivi ka yi'i nuu nda'a Yandios ja kanchuku i ñuu ja'a, suni ka ka'an i ja na sa'a ndee ini ra. Ti yivi kanchuku ve'e rey, chaa kuña'nu ñuu Roma ja'a, kua'a ni kanda'u da, ti kachi da ja na sandee xaan ini ra naa ra. <sup>23</sup> Ti ñukuu ini ri ja maa Jito'o Jesú, ya kuu Cristo, na kuncha ya jiin ra naa ra, ti na chindee ya ro'o ja na kukuee kunchuku ra. Ti sia'an na koo.

## Carta ni chaa Pablo nuu yíví ka kandixia ñuu Colosas

**1-2** Ru'u Pablo jiin ñani yo Timoteo, ja'a ka kanxia'u ri jiin taka ro'o ja ka kandixia Cristo kanchuku ra ñuu Colosas. Maa ri kuu apóstol nuu Jesús, ti Jesús kuu Cristo, ya ndiso ya jniñu ña'nu nuu Yandios. Ti maa ya ni ja'a jniñu ja'a nuu ri ja na kuu ri apóstol nuu ya. Na taji ri tutu ja'a nuu ra naa ra ja ka kuu ra ñani ri, chi taka yo ka yi'i nda'a Cristo. Ti ni sasiñ ya ro'o ja ka kandixia ra Jesú, jiin ja na kunukuachi ra nuu ya naa ra. Ti kuni ri ja Tata yo Yandios, na kunda'u ini ya ro'o naa ra, ti sa'a ya ja kukuee kunchuku mani ra.

### *Jikanta'u Pablo ja kuu yíví ñuu Colosas*

**3** Nini ka nakuanta'u ri nuu Yandios, ja maa ya kuu Tata Jito'o Jesús, ya kuu Cristo. Nini nakuanta'u ri nuu ya ja kuu ro'o naa ra, ti jikanta'u ri ja'a ra naa ra, **4** chi ni ka ni'in ri jnu'un ja ka kandixia ndaa ra Cristo Jesús, jiin ja ka kunda'u ini ra taka ga yíví ja ni sasiñ Yandios ja na kunukuachi i nuu ya. **5** Ti kuñukuu ini maa ra ja na ni'in ra ja iyo nuu Yandios ja kuu maa ra naa ra. Ti ja ni ni'in ndaa ra jnu'un yukan na ni ka jiniso'o ra jnu'un Cristo Jesús. Ja yukan kuu ja vi'i ga ni ka kandixia ra jnu'un Cristo jiin ja ka kunda'u ga ini ra taka ga yíví ja suni ka yi'i i nda'a ya. **6** Jandaa kuu ja ni ka jiniso'o ra jnu'un Yandios siki Cristo Jesús, ti ni ka janta'u ra jnu'un un ja kunda'u ini Yandios yo'o naa yo. Undi kivi ni ka kandixia ra jnu'un un, ti undi vijna ka kuu ra nanu iin nde'e yujnu va'a, ja nini ja'a nde'e vixi, chi jnu'un un sa'a ja ka sa'a ra jniñu va'a, ti vi'i ga ka nakaya jniñu ka sa'a ra un. Ti suni sia'an kuu jiin jnu'un Cristo Jesús nu na kuichanuu ki'in taka nuu ñuyíví. **7** Epafras, chaa ni xna'an jnu'un un nuu ra naa ra, kuu da iin chaa junukuachi nuu Cristo jiin ri, ja ni ka kuu mani ri jiin da. Ni tatu Cristo jniñu un nuu da ja na xna'an da jnu'un Yandios nuu ra naa ra jiin ja na koto da ro'o naa ra. Ti va'a xaan sa'a da jniñu un. **8** Ti maa da ni jani jnu'un un nuu ri nava kanchuku ra naa ra jiin ja ni sa'a Espíritu Santo, ja vii ka kanda'u jiin jna'an ra naa ra.

**9** Ja yukan kuu ja tu ja'ncha ini ri ja jikanta'u ri ja'a ra naa ra, undi na kivi ni ni'in ri jnu'un ni ka'an Epafras ti undi vijna. Ti jikanta'u ri ja na sa'a Espíritu Yandios ja na kivi inijnuni ra taka ja kuni ya ja sa'a ra naa ra, jiin ja na koo ndichi ini ra jiin jnu'un ya. **10** Ti jikanta'u ri ja na kaka ndaa ra naa ra nava jna'an ja ka kuu ra yíví ka yi'i nda'a maa Jito'o, chi sia'an ti kusii ga ini Yandios. Nanu iin yujnu va'a ja ja'a nde'e vixi, suni sia'an sa'a ra jniñu va'a nava vi'i ga na kivi inijnuni ra nasa vii kuña'nu Yandios, ti nava na kuni ra na jniñu va'a ja ka sa'a ra ja kuu maa ya. **11** Jikanta'u ri ja na kua'a ya jnundee ini ro'o naa ra, chi jandaa ndixia kuu ja maa iin ni ya kuu ja kuña'nu. Yukan sa'a ya nava na kundee ini ra ti sa'a ra taka jniñu ni tatu Yandios nuu ra naa ra, ti nava tu kuiti ini ra koto ra taka nundo'o kondo'o ra naa ra. **12** Chi su've na kosii ini ra, ti nakuanta'u nuu Tata yo Yandios, chi maa ya kuu ja ni sa'a ya jiin ra ja na ni'in jna'an ra ta'u ra jiin taka ga yíví ka yi'i i jiin ya, ti kivi ra ñuu nuu ta'u Yandios jniñu jiin se'e ya Jesús, ja kunda'u ndixia ini ya. Ti yukan kuu nuu ndijin ga ja undi janducha, **13** chi maa Yandios ni nama ya yo'o na ni ka jika yo jiin kuachi yo, nanu ja ni ka jikonuu yo jiin nuu ñuñaa. Ko tukaa ga ka jika yo ichi yukan, chi ni sama ya yo'o ja ni skivi ya yo'o nuu nda'a Se'e ya. **14** Ti

maa Se'e ya kuu ja ni chunaa ya yo'o, chi ni ji'i ya ja siki yo'o. Ja yukan kuu ja ni janka'nu ini Yandios nuu kuachi yo.

### *Maa Cristo kuña'nu*

**15** Ti ja na kuu kuni ndijin yo Yandios, yukan kuu ja ni taji ya Se'e ya nava na kuni yo nasa kaa maa ya. Ti ja iyo Se'e ya undi nuu, sa ni jankoo taka ga ja iyo, ti kuña'nu ya nuu takä ja iyo. **16** Ni sa'a Yandios ndi'i ja iyo, ti yukan ni sa'a Cristo. Ni sa'a ya ndi'i ja iyo andiví jiin ja iyo nuu ñuyiví. Ni sa'a ya ndi'i ja jini yo jiin nuu yo, jiin ndi'i ja tu kuu kuni yo. Yinda'a ya taka chaa kuña'nu nuu ñuyiví ja'a. Suni ni sa'a ya taka ángel kanchuku andiví ja ka kuña'nu i ka ndisojniñu i. Ni sa'a Yandios ndi'i ja iyo, ti maa Cristo ni sa'a un, ko ja na nakua'a ja iya ñiyu'un Cristo kuu ja ni sa'a ya yukan, jiin ja na kuña'nu Cristo nuu taka ja iyo. **17** Ja iyo Cristo ti sa ni jankoo taka ga ja iyo. Nda'a maa ya yi'i, ti ja kachi maa ya kuu, ti kuuijiin taka yukan nava kuni maa ya. **18** Ti maa Cristo kuu xini nuu taka yivi ka kandixia, ti yivi un kuu i nanu yíki kuñu ya, chi ka yi'i i nda'a ya. Sa'a ya ja na kuchaku i ja kuu taka ni saa ni. Ti ja ni nandoto ya nuu ka'iin ndiyí un kuu ja ni stuu ya maa ya ja kuña'nu ya nuu ñuji'i un, jiin ja na naxndoto ya taka yivi ka kandixia i ya. Yukan ni sa'a Cristo nava na nduña'nu ya nuu taka un. **19** Ja yukan kuu ja ni kusii ini Yandios ja ni ndaku se'e ya Cristo nanu kaa maa ya. Taka jnu'un ka'an yo ja kuu Yandios, suni taka un kuu Se'e ya Cristo. **20** Yukan ti ni jini yo ja maa Cristo ni sa'a ja na koo jnu'un mani ini nuu ni ka'nú ñuyiví jiin andiví nuu Yandios. Ja yukan kuu ja ni jati Cristo niñu ya nuu ni ji'i ya nuu nda'a cruz. Yukan ni xndoo nuña ya ichi ja na ndumani taka ja iyo ñuyiví jiin taka ja iyo andiví nuu ya. Ti ja na ndumani taka un nuu ya, yukan kuu ja ni ji'i Cristo nuu nda'a cruz.

**21** Ti ro'o naa ra ja ka kandixia ra Cristo vijnna, ja ni ndumani Yandios jiin ra naa ra. Tu ni ka kandixia ra undi nuu, chi vanua jika ni ka iyo inijnuni ra nuu jnu'un ya. Ni ka jito u'u ra jnu'un un, chi ni'in xaan ni ka ndikun ra jniñu kue'e un. **22** Ko vijnna chi ja ni sa'a Yandios ja ni ka ki'in ra jnu'un ya, ti nava na ndumani ya jiin ra naa ra. Ja yukan kuu ja ni soko Cristo yíki kuñu maa ya ja ni ji'i ya, nava na koo ndoo ra koo ii ra kívi na najaa ra nuu ya, ti tukaa na kuachi koo siki ra. Tukaa kuu ja kankuachi yivi siki ra. **23** Jandaa ndixia kuu yukan, ko suni kanuu ja na siin ra kandixia ndaa ra jnu'un Cristo Jesú, ja ni ji'i ya nuu nda'a cruz ja siki yo'o naa yo. Ja yukan kuu ja kuñukuu ini ja nama ya ro'o naa ra. Ti na kachi ri ja koto ma xndoo ra jnu'un un. Chi jnu'un un ni ka jini ra, ti ni jichanuu jnu'un un kua'an taka ñuyiví yo. Ti suni yukan ni tatu Yandios ru'u ja na ka'an ri.

### *Ndisojniñu Pablo ja kunukuachi da nuu yivi ka kandixia*

**24** Vijnna ti riu' Pablo, iyo siii ini ri ja jna'an ri nundo'o ja kuu ro'o naa ra. Ni ja'a Cristo jniñu nuu ri ja ka'an ri jnu'un ya taka ñuu, ko suni ni kachi ya ja kondo'o ri nundo'o jiin jniñu un. Vijnna ti siíku ri nava ni kachi ya, ko siíku ri ja kuu yivi kandixia taka ñuu, ja ka kuu i nani yíki kuñu ya, chi ka yi'i i jiin ya. **25** Ti jniñu ri kuu ja xna'an ri jnu'un ya nuu yivi kandixia taka ñuu, chi sia'an ni tatu Yandios jniñu nuu ri. Ja yukan kuu ja siin ri xna'an ri jnu'un ya nuu ra naa ra nava na kívi inijnuni ra nasa kuni ka'an jnu'un un. **26** Chi undi na jana'an ti undi vijnna, tu ni ka jini ni iin yivi jnu'un ni yisa'yí nuu Yandios. Ko vijnna ti ni stuu ya jnu'un un nuu yivi ka yi'i jiin ya. **27** Ni kuni ya ja na xna'an ndijin ya nuu i nasa vii kaa jnu'un ni yisa'yí un, chi undi nuu yivi inga nación tu ni ka jini kuiti i siki jnu'un ya. Ko vijnna ti kachi jnu'un yisa'yí un ja na ni'in i iin ta'u ña'nú xaan. Ti jnu'un un kuu ja kancha Cristo jiin ra naa ra, vasu ka kuu ra yivi inga nación ja tu ka yi'i jiin nación Israel. Ko ka jini ra ja kancha Cristo jiin ra, ti ka ni'in ra jnundee ini jiin jnu'un un, ti ka ñukuu ni ini ra ja

nduña'nu ra nu na kivi ra ñuu nuu ta'u Yandios jniñu, chi kua'a ya ta'u un nuu ra naa ra.

<sup>28</sup> Maa iin ni jnu'un Cristo kuu jnu'un ka'an ri. Ti ndo'o va'a ini ri nasa xna'an ri jnu'un un. Ja yukan kuu ja nuu sava'ni ga inga yivi na ka'an ri jnu'un un nuu i, ti xndaku ni'in ri nuu i ja tu kivi nduu i jiin inga jnu'un. Ti na xna'an ri nuu i nava ka'an jnu'un un ja nasa kaka ndaa yo ichi ya nuu ñuyivi ja'a. Ti sia'an xndaku kaji ri nuu taka yivi nava na kendo ndaa i nuu Yandios. Ti kuu kendo ndaa i nuu ya ja ni ka kandixia ndaa i jnu'un ni xna'an ri, ti nava na kivi i nda'a Cristo. <sup>29</sup> Ni tatu Yandios ru'u jniñu un, ti sa'a ri jniñu un jiin ni ini ni aña ri nava na kundee ri jiin jniñu sa'a ri un. Ti maa Cristo chindee chituu ya ru'u nava na kundee ri siuku ri jniñu un.

## 2

<sup>1</sup> Na kachi ri nuu ra naa ra ja ni'in xaan nduku ndee ri, ja na chindee ri taka ro'o ja tu ja'i kuni ra nuu ri, ro'o ja kunchuku ñuu Colosas jiin taka ga yivi ka kandixia ñuu Laodicea. Ni'in xaan jikanta'u ri ja'a ra naa ra jiin ni ini ni aña ri. Nduku ndee xaan ri ja na xna'an kaji ri nuu ra naa ra. <sup>2</sup> Ti sia'an sa'a ri ja kuu taka yivi kandixia un, nava na ni'in i jnundee ini jiin jnu'un xna'an ri nuu i naa i. Ti iin nuu kuanta'u i jnu'un un, chi iin nuu ka kunda'u ini jna'an i. Sia'an ka sa'a i chi ka siuku i taka jnu'un ndaa siki Cristo. Ti nu na kuanta'u i jnu'un xna'an ri, ja sia'an ti kivi va'a inijnuni i nasa kuni ka'an jnu'un Yandios ja ni yisa'yí undi nuu. Ko vijna tukaa, chi vijna ja ka jini yo ja ka'an jnu'un siki Cristo. <sup>3</sup> Ti maa Cristo kuu ja skivi jnu'un ya undi inijnuni yivi, ti yukan kutu'va yo jnu'un ndichi xaan jiin jnu'un tu'va xaan, chi tendi'i jnu'un ni ka'an siki Yandios ka yi'i jiin Cristo.

<sup>4</sup> Yukan xndaku ri nuu ra naa ra nava tu xnda'u ni iin yivi ro'o naa ra, ja nu ka ka'an i jnu'un va'a xaan vasu mani jnu'un xndoña'an kuu. <sup>5</sup> Sia'an xndaku ri nuu ra naa ra vasu jika kanchuku yo. Ti vasu sia'an, ko ñukuu ini ri ro'o naa ra, ti kusii xaan ini ri nu ni jini ri nava ka jika ndaa ra, ti ka kandixia ni ini ra Cristo. <sup>6</sup> Ja sia'an kuu ja ka janta'u ra ja jito'o ra kuu Cristo Jesús. Yukan na ti kanuu ja kaka ndaa ra jiin ya, nava na kundaa ja ka yi'i ra jiin ya naa ra. <sup>7</sup> Ti sa'a ra taka yukan, chi jandaa ndixia kuu ja ni ka kivi ra nda'a ya. Ti nu na kaka ndaa ra ichi ya, ti kukutu ga ini ra ja na kuandatu ra nuu jnu'un ya. Ja sia'an ti vi'i ga ka kandixia ndaa ra Cristo. Ja ni ka kutu'va ra taka jnu'un un, ti vi'i ga nakuanta'u nuu Yandios ja kuu yukan naa ra.

### *Ni nasama Cristo yo'o*

<sup>8</sup> Koto ma kua'a ra jnu'un ja xnda'u iin yivi ro'o naa ra jiin iin jnu'un ndichi, chi mani jnu'un vixi jiin jnu'un xndoña'an kuu jnu'un un. Yukan kuu jun'un ja vají nuu yivi ñuyivi ja'a ti ansu jiin maa Cristo. Tu kuiti skejna'an yo jnu'un Cristo jiin jnu'un un. <sup>9</sup> Chi maa iin ni Cristo ni stuu ya nava kaa maa Yandios. Na ni kuncha Cristo nüu ñuyivi ja'a, ni kuu ya ndi'i taka nava kaa maa Yandios, ti sia'an kuu ya vijna. <sup>10</sup> Ti siki ja ka yi'i ra nda'a Cristo, tu kuiti iyo ja kumani nuu ra nu kanchuku ra nuu ñuyivi ja'a. Yukan sa'a Cristo jiin ra naa ra, chi maa ya kuña'nu nuu taka ga ja ka kuña'nu jiin taka ja ka ndisojniñu nuu ñuyivi ja'a jiin nuu taka tajnu Yandios ja ka jika i andivi.

<sup>11</sup> Sa'a yo nanu yivi hebreo ka chaa i iin jnuni nuu yiki kuñu se'e yi'i i, ti yukan kuni ka'an ja yi'i i nuu maa iin ni nación Israel. Suni yukan ni sa'a Yandios jiin yo'o ansu ni ja'a ya jnuni nuu yiki kuñu yo. Chi ni kenchaa ya kuachi yo, ti ni skivi ya yo'o nda'a Cristo. Jiin yukan ni sasiin ya yo'o ja kuu maa ya nu kunchuku yo nuu ñuyivi ja'a. Tukaa kivi nduu yo jiin kuachi. Chi nini ka iyo ini yo ja ka kivi nduu yo jiin kuachi, ko vijna tukaa kanuu ja sa'a yo yukan, chi maa Cristo ja ni nama ya yo'o. <sup>12</sup> Ja ni ka janducha ra, yukan

ni ka ja'a ra jandaa ja ka yi'i ra jiin Cristo, ja ni kuu nanu ja ni ka ñunduji ra jiin ya. Suni ni kuu nanu ja ni naxndoto Yandios ro'o naa ra jiin Cristo, chi ni sa'a Yandios jniñu ña'nu na ni naxndoto ya Cristo nuu ñuji'i, ti ni ka kandixia ndaa ra ja suri sia'an sa'a Yandios jniñu ña'nu ja kuu maa ra naa ra.

<sup>13</sup> Sa ti kandixia ga ra Cristo, ni ka kuu ra nanu ndiyi, chi tu ni ka jini kuiti ra jnu'un Yandios. Ni ka kuu ra yivi inga nación ja tu ni ka ñava'a ra ley Moisés. Ja yukan kuu ni ka sa'a ra sava'ni ga jniñu kue'e. Ko tukaa vijnna, chi sia'an nanu ni naxndoto Yandios Cristo nuu ñuji'i, suni sia'an ni kuu nanu ja ni naxndoto ya ro'o naa ra jiin Cristo. Ni ka kuu ra nanu ndiyi undi nuu, ko vijnna tukaa. Vijnna ti ni sa'a ya nanu ja kuchaku ra tuku, ja tukaa ka kuu ra nanu ndiyi. Ni ndunda'u ini ya, ti ni janka'nu ini ya nuu kuachi ra naa ra. Yukan na ti sa kuu kunchuku ra nuu ñuyivi ja'a nava kuni maa Yandios. <sup>14</sup> Ti yukan kuu iin ja iyo iin tutu ja kankuachi siki yo ja tu ni jandatu yo nuu ley Yandios. Ko ni nakuanka'nu ini ya, chi nanu ja ni nda'va ya tutu un kuu ja ni ji'i Cristo nuu nda'a cruz. Ni kuu nanu ja ni chuku ya kuachi yo jiin nduyu kaa nuu nda'a cruz. Yukan ni chunaa Cristo nuu kuachi yo iin jiin ni. <sup>15</sup> Ti ja ni ji'i Cristo nuu nda'a cruz, jiin yukan ni stuu Yandios ja ja ni kundee ya siki takaa ja kue'e ja ni ka ndisojniñu undi nuu. Nanu ku'ni yo iin presu ti ka jini yivi ja ki'in da vekaa, suni sia'an ni kundee Cristo na ni ji'i ya nuu nda'a cruz. Ti yukan ni stuu Yandios ja ja ni nduña'n Cristo nuu takaa ja ka ndisojniñu.

<sup>16</sup> Ja sia'an kuu ja koto kuanta'u ra nu kankuachi yivi siki ra, siki iin ja yaji ra xi ja ji'i ra, xi ja tu koñaa ii ra iin kivi viko, jiin kivi nukoso yoo, jiin kivi ndetatu. <sup>17</sup> Ley ni ja'a ya nuu Moisés ni jajniñu undi nuu na ti kii ga Cristo. Ko vijnna ti ja ni kii ndijin ya, ti yukan ni ka jini ndaa yo ja ja ni kii un ni kuu maa Cristo. <sup>18</sup> Ja yukan kuu ja koto kua'a ra jnu'un ja iin yivi na kankuachi i ja'a ra, ja tu nani'in ra iin ta'u nuu Yandios. Chi iyo yivi xna'an jnu'un xndoña'an. Ka ka'an i ja ka jini ndaa i jnu'un un, chi sia'an ni xna'an Yandios nuu i. Ka ka'an i ja nu tu kuandata ra jnu'un un, ti tu na ni'in ta'u ra nuu ya. Ko ru'u Pablo, na kachi ri ja tu kuajniñu jnu'un un. Mani ni ka nduvixi yivi un, chi nakani ini i jnu'un iyo nuu ñuyivi ja'a, ti ansu jnu'un vaji nuu Yandios. <sup>19</sup> Ti vasu ka ka'an i ja ka kandixia i Cristo, ko tuu, chi tu ka jandatu i maa jnu'un ndaa nava ka'an Cristo. Tu ka yi'i ja jiin maa Cristo, ja kuu ya xini nuu yivi ka kandixia. Maa Cristo kuña'n nuu yivi ka kandixia, ti yo'o ka kuu yo nanu yiki kuñu ya, chi iin ni ka kuu yo jiin ya. Ti sia'an nanu ka ni'in yo ja skua'nu yo yiki kuñu yo, suni sia'an kua'a Cristo nuu yivi ya takaa ja ka nandi'i i ja na kaka ndaa i nuu ñuyivi ja'a. Sa'a yo nanu ja ñujna'an yiki yo jiin tuchi, ti ka yijni nuu ñujna'an yiki un nava na koo va'a ti sajniñu ni tu'u yiki kuñu yo. Suni kuu nanu ja ñujna'an Cristo jiin yivi ya, chi kancha ya jiin i naa i. Sia'an kuu ja ja'a Yandios jnundee ini nava na kundee ini i jiin jniñu ni tatu ya nuu i naa 1.

<sup>20</sup> Ru'u Pablo, na kachi ri nuu ra naa ra, ja ka kuu ra yivi ka kandixia kanchuku ñuu Colosas, ja na ni ji'i Cristo nuu nda'a cruz, ni kuu nanu ja ni ka ji'i ra jiin ya, ni ji'i ya ja siki ro'o naa ra. Nu ni ji'i ya ja siki ro'o naa ra, ti jiin jniñu ña'nu un ni chunaa ya ro'o nuu sava'ni ga jnu'un ja iyo nuu ñuyivi ja'a. Tukaa kanuu ja na siuku ra jnu'un iyo nuu ñuyivi ja'a, chi ja ni chajijo Cristo ro'o naa ra. Ti nu jandaa kuu un, ¿xi ka kendo va'a ja ka sa'a ra nanu ka sa'a takaa ga yivi ñuyivi ja'a nu? <sup>21</sup> Chi jnu'un yukan ka'an ja kuandata ra takaa jnu'un ja'a: "Koto ma ke'e ra ja'a, koto ma kaji ra yukan, ni koto jniñu ra", kachi. <sup>22</sup> Ko ka'an jnu'un un siki ja kuajniñu yo iin jiin ni ti tukaa. Chi vaji jnu'un un nuu ichi ka sa'a yivi ñuyivi ja'a, ansu vaji nuu Yandios. Ti tu nijniñu ja kendo ndaa yo nuu Yandios. <sup>23</sup> Ka jani ndixia ini i ja jnu'un ndichi kuu yukan, chi ka chayika i maa i ti ni'l'in xaan ka chiñu'un i ángel Yandios, jiin ja sa'a nda'u i

maa i, jiin ja ka xndo'o i yiki kuñu i. Ko na kachi ri ja tu nijniñu kuiti jnu'un un, chi tu jasi jnu'un un nuu yo ja ka sa'a yo kuachi nu kanchuku yo nuu ñuyivi ja'a. Tu nijniñu jnu'un un ja ka chiñu'un yo Yandios.

### 3

<sup>1</sup> Ti nanu ja ni ka nandoto ra jiin Cristo nuu ñuji'i un, yukan ni sa'a Yandios iin jniñu ña'nun ja ka yi'i ra jiin Cristo. Yukan ti kundiyo ini ra ja na koo ra nava kuni maa ya, chi maa ya kancha andivi nda'a kua'a Yandios nuu kuña'nu ya nuu taka ja iyo nuu ñuyivi ja'a. Yukan na ti kundiyo ini ra ja na koo ra nava kuni maa ya. <sup>2</sup> Ti kuñukuu ini ja kuni ra maa Cristo ja kancha ya andivi, ti ansu ja kuñukuu ini ra taka ja iyo nuu ñuyivi ja'a. <sup>3</sup> Ni kuu un nanu ja ni ka ji'i ra nu ni ji'i Cristo, chi ni ji'i ya ja siki ro'o naa ra. Ti vasu kuña'nu ya nuu taka ja iyo vijnna, ko kuu nanu ja yisa'yí jniñu un ja sa'a ya nuu ñuyivi ja'a. Tu ka chaku ini yiivi. Suni sia'an yisa'yí nuu i nasa kuni ka'an nava kanchuku ra nuu ñuyivi ja'a. Tu ka chaku ini i nasa kuu ja ka yi'i ra nda'a Yandios, ti kundiyo ini ra ja ka sa'a ra maa iin ni jniñu ja kuni maa ya. <sup>4</sup> Ti siki ja ka yi'i ra jiin Cristo naa ra, yukan kundiyo ini ra ka sa'a ra nava kuni maa ya nu kanchuku ra nuu ñuyivi ja'a. Ti kivi' nu na nchaa ndijin Cristo nuu ñuyivi ja'a, ti nduña'nun ya nuu taka ja iyo. Suni ka nduña'nun ya jiin ya kivi' un naa ra.

<sup>5</sup> Ja sia'an kuu ja xndoo taka jnu'un ja kuni maa ra. Nu kanchuku ra nuu ñuyivi ja'a nini iyo iin jnu'un ni'l'in ini yiki kuñu ra ja ka sa'a ra iin jniñu kue'e. Koto sa'a ga ra ni iin yukan. Koto sa'a ra iin jniñu ka sa'a yiivi ka jika jiin jnu'un sih ini. Koto sa'a ra jniñu kue'e. Ti koto kundiyo ini ra ja ni'in kua'a ra ndajniñu. Chi taka un kuu ja chiñu'un yo iin santu. <sup>6</sup> Chi siki yukan kuu ja kii iin nundo'o ka'nun xaan ga ja kua'a Yandios nuu yivi ka kuni'in ini nuu ya. <sup>7</sup> Ti suni ni ka jandatu ra nuu jniñu kue'e ja ni ka sa'a ra na ti kandixia ga ra Cristo. <sup>8</sup> Ko na kachi ri ja vijnna na, ti xndoo ra taka ja'a: ja ka kuiti ini ra, ja ka sa'a ra jniñu kue'e siki jna'an ra, ja ka ka'an ndeva'a siki jna'an ra, jiin ja ka ka'an ndeva'a ra nuu i. <sup>9</sup> Koto xnda'u ra jna'an ra, chi yukan ni kuu ja ni ka sa'a ra undi na ti kandixia ga ra Cristo, ti ni xndoo ra jniñu kue'e un. Chi maa ya ni sama ya ro'o naa ra. <sup>10</sup> Ti vijnna ja ni nasama ra naa ra nava na ndujaa ra. Chi sia'an ni nasama Yandios ro'o ja na ndujaa ra. Nanu iin chaa ni naki'in da sa'ma jaa da, ti ni skaña da sa'ma tu'u un kua'an, suni sia'an ni nasama ya ro'o ja na nduu ra nanu kaa maa ya, ti nava na nakuni va'a ra ya, ti na chaku va'a ga ini ra nasa kaa maa Yandios. <sup>11</sup> Ja yukan kuu ja tukaa ka ndo'o ini ra ja ka kuu ra yiivi inga nación, xi ka kuu ra yiivi ja ni ka ni'in iin jnuni nuu yiki kuñu ra, xi ka kuu ra yiivi ja tu ni ka ni'in ra jnuni un, xi ka kuu ra yiivi ñuu jika, xi ka kuu ra yiivi ka iyo yuku, xi ka kuu ra muzu ja ni jaan yivi, xi ka kuu ra yiivi ka sajníñu jaku maa. Chi iin ni ka kuu yo nuu ya. Chi Cristo kuu Jito'o nuu tendi'i yo, ti kancha ya jiin tendi'i yo naa yo.

<sup>12</sup> Ka kuu ra yiivi Yandios. Ni kunda'u ini ya ro'o naa ra, ti ni nakaji ya ro'o naa ra ja ka kuu ra yiivi ya. Ja sia'an kuu ja kunda'u ini jna'an ra. Ti koto kukuasun ini ra siki jna'an ra. Koto nduvixi ini ra. Kava nda'u ini naa ra, ansu ja kuiti yachi ini ra jiin ñani jna'an ra. <sup>13</sup> Kava kuee ini ra jiin jna'an ra, ti kuanka'nun ini nuu jna'an ra, nu ka iyo ro'o ja ka ka'an siki jna'an ra. Chi nanu ni janka'nun ini Cristo nuu ro'o naa ra, ti suni sia'an sa'a ra naa ra. <sup>14</sup> Chi jnu'un kanuu ga kuu ja nu kunda'u ini nuu jna'an ra, chi yukan sa'a ja na nduu iin nuu ini jna'an ra, ti sia'an nakutu ini jna'an ra jiin taka jniñu va'a. <sup>15</sup> Ti maa iin ni Cristo kuu ja na kua'a jnu'un mani ini ja na kukuee kunchuku ra, ti kosii ini ra naa ra. Ti sia'an na kituu jna'an ra naa ra, ti kuu kachi ra: "Na sa'a yo ja'a naa yo", kachi ra naa ra. Yukan sa'a ra chi ni kachi ya ja na nduu ra iin ni ga yiivi. Ti kunchuku mani ra. Ti nini nakuanta'u ra nuu ya naa

ra. <sup>16</sup> Nakutu ini jiin jnu'un Cristo naa ra nava na kukutu va'a jnu'un ya ini aňu ra. Xndaku nuu jna'an naa ra jiin jnu'un ndichi. Ti skaka jna'an ra ichi ya naa ra. Ti xndaku ni'in nuu jna'an ra ja tu kivi nduu ra jiin inga jnu'un. Ja yukan kuu ja ka'an ri, ti kua'a jnu'un ndee ini jna'an naa ra jiin salmo, jiin himno, jiin taka ga yaa vîja ndakuni'in jnu'un Yandios. Kata jiin ni imi ni aňu ra, ti na kuanta'u ra nuu Yandios naa ra. <sup>17</sup> Koto va'a taka jniñu ka sa'a ra ti koto va'a taka jnu'un ka ka'an ra, chi yukan ja'a jandaa ja ka yi'i ra jiin Jito'o Jesú, ja junukuachi ra nuu ya. Ja yukan ti nakuanta'u nuu Tata yo Yandios ja sia'an ni jankuiñi ichi Jito'o Jesú, nava kunukuachi va'a yo nuu ya.

### *Nava kuandatu nuu jna'an yivi naa i*

<sup>18</sup> Ro'o ja ka kuu ra ñasi'i, kuandatu nuu yîi ra naa ra, chi yukan kuu ja kanuu ja sa'a ra siki ja ka kandixia ra Jito'o. <sup>19</sup> Ro'o ja ka kuu yîi naa ra, kunda'u ini nuu ñasi'i ra naa ra, ti koto sa'a ra jiin ña nanu ka sa'a ra jiin iin yivi junukuachi ini ve'e ra. <sup>20</sup> Ro'o ja ka kuu suchi kuachi, kuandatu nuu tata ra jiin nuu nana ra, chi yukan kuu ja va'a ja sa'a ra nava kuni maa Jito'o. <sup>21</sup> Ti ro'o ja ka kuu tata naa ra, koto skuiti ra ini se'e ra naa ra nava tu ndukui'ya ini i naa i.

<sup>22</sup> Taka ro'o ja ka junukuachi ja ni ka jaan yivi ro'o jiin xu'un, kuandatu nuu yivi xiin ro'o nuu ñuyivi ja'a. Koto kunchuku ra nanu kanchuku sava ga yivi, chi ka sa'a va'a i jniñu nuu kande yivi ndito maa i, chi kuni i ja na kusii ini yivi jiin i. Ko tukaa ka sa'a teyi i jiin nuu tu kande jito'o i. Koto sa'a ra sia'an naa ra, chi su've kava yiñu'un, ti kukutu ini ti kua'a ra ja yiñu'un maa ra nuu yivi xiin ro'o. Sa'a jniñu jiin ni ini ni aňu ra, chi sia'an kuni Jito'o, ti kuni ja na nakua'a ra ja yiñu'un maa ra nuu ya naa ra. <sup>23</sup> Nu nau iin jniñu ka sa'a ra, ti sa'a jiin ni ini ni aňu ra, chi ka sajniñu ra ja kuu nuu Jito'o, ansu ja kuu yivi naa i. <sup>24</sup> Ti ja ni ka jini ra ja taka jniñu va'a ka sa'a iin iin ra, suni sia'an na nita'u ra jiin jniñu un nuu maa Jito'o, chi nuu maa Jito'o Cristo ka junukuachi ra. <sup>25</sup> Ti yivi ka sa'a ndeva'a, suni na nita'u i siki ja ni ka sa'a i. Chi tu ka kunda'u ini ya siki nasa kanda iin iin yivi, chi xndichi iin nuu ya tendi'i yivi naa i.

## 4

<sup>1</sup> Ro'o ja ka nchaka muzu, kava va'a ini jiin muzu ra, ti koto xnda'u ra i. Nakani ini ja suni iyo iin Jito'o ra ja kuu Yandios, ya kancha ya andivi.

<sup>2</sup> Koto ka'ncha ini ra ja kakanta'u ra naa ra. Ti koo ndito ini ra siki jnu'un ka jikanta'u ra. Ti koto naa ini ra ja na nakuanta'u ra nuu Yandios. <sup>3</sup> Nu ka jikanta'u ra, suni kakanta'u ja kuu ri naa ra, ti nava na nakuiñi ya ichi ja na kuichanuu jnu'un Cristo. Chi undi nuu tu ni jini yivi jnu'un un, ko vijnna kuni Yandios ja na kuichanuu jnu'un un taka ñuu. Ti siki jnu'un un kuu ja kande ri vekaa. <sup>4</sup> Kakanta'u nuu maa ya ja na ka'an kaji ri jnu'un Cristo, chi ni tatu Yandios ru'u jniñu un. <sup>5</sup> Koto va'a nava ka jika ra ichi ya nuu ñuyivi ja'a, chi yivi ja tu kandixia Cristo ka jini nasa ka jika ra. Koto xnaa ra jnu'un nu ka'an ra jiin i, chi na ka'an ra jnu'un ya nuu i. <sup>6</sup> Nanu iin ndeyu yaji yo nu ni kuu asun jiin ñii, suni sia'an ka'an ra jnu'un va'a jin jnu'un ndaa ja kuu nuu yivi, nava na chaku va'a ini yivi ka ñuso'o. Kani' ini na jnu'un ka'an ra jiin yivi, nava nakuni ra nasa xndeokani ra iin jnu'un va'a nuu iin iin jnu'un ka ka'an yivi.

### *Jnu'un sandi'i ni ga*

<sup>7</sup> Ñani yo Tíquico kuu da iin chaa junukuachi va'a nuu Yandios. Ti chindee da ru'u nuu jniñu maa Jito'o. Ti maa da na kachi ndi'i nasa kua'an jniñu ri, ti suni ja nasa kuu maa ri. <sup>8</sup> Ja yukan kuu ja na taji ri da jaa da nuu kanchuku

ra, nava na kachi da nasa kuu ri. Ti na kua'a da jnundee ini ro'o naa ra. <sup>9</sup> Ti suni kee Onésimo jaa da jiin da. Ti Onésimo yi'i da jiin ñin ni ñuu jiin ra naa ra. Ka kunda'u ini ri maa da, ti kuu da ñin chaa siuku ndaa ichi Yandios. Ti ndinduu da jani jnu'un nuu ra naa ra taka ja kuu ichi cha'a.

<sup>10</sup> Na sa'a ndee ini ra naa ra, kachi Aristarco, chaa kande jiin ri vekaa ja'a. Suni sia'an ka'an Marcos, sajin Bernabé. Ti ja ni ka ni'in ra tutu nuu kachi ja ka janta'u ra Marcos, ti ka'an va'a jiin da naa ra. <sup>11</sup> Ti suni sia'an ka'an Jesús, chaa ja suni nami da Justo, ja na sa'a ndee ini ra naa ra. Ti taka chaa un ka kuu da chaa hebreo ja ka kandixia, ti ka chindee jna'an ri ka ka'an ri jiin da siki ñuu nuu ta'u Yandios jniñu. Yukan ti kua'a ga ja ni ka chindee da ru'u. <sup>12</sup> Na sa'a ndee ini ra naa ra, kachi Epafras, chaa kuu jna'an ra, ja junukuachi da nuu Cristo. Ti nu jikanta'u da ti nini jikanta'u xaan da ja'a ra naa ra, chi ndiyo xaan ini da ja na siin ndaa ra ichi Yandios, ti tu kivi nduu ra jiin inga jnu'un naa ra. Kuni da ja na kukutu ini ra ti kuandatu ra ndi'i jniñu ja kuni Yandios. <sup>13</sup> Ti ru'u Pablo, ka'an ndaa kuiti ri ja ndi'i xaan ini da ja kuu ro'o naa ra, jiin ja kuu yivi ñuu Laodicea jiin Hierápolis. <sup>14</sup> Lucas, chaa kuu médico ja mani jna'an yo jiin da, suni ka'an da ja na sa'a ndee ini ra naa ra. Ti suni sia'an ka'an Demas. <sup>15</sup> Kachi nuu ñani ñuu Laodicea ja na sa'a ndee ini i naa i, ja kachi ru'u. Ti suni sia'an ka'an ra jiin Ninfas, jiin taka yivi ka kandixia ja ka ndututu i ve'e ña.

<sup>16</sup> Nu ni ndi'i ni ka ka'u ra tutu ja'a, ti na sia'a nuu yivi ka kandixia ñuu Laodicea. Ti suni ka'u ra tutu ja ndiji ichi ñuu Laodicea nuu ra naa ra. <sup>17</sup> Ti kachi nuu Arquipo ja na kukutu ini da na siuku da jniñu ni tatu Jito'o maa da, ja kachi ru'u.

<sup>18</sup> Ti ru'u Pablo, chaa ri tutu ja'a jiin letra nda'a ri ja na sandee ini ra naa ra. Koto naa ini ra ja kande ri vekaa. Ñukuu ini ri ja na kunda'u ini Yandios, ti na chindee ya ro'o naa ra nava sia'an na koo. Sa'a ndee ini naa ra. Ti sia'an na koo.

## Tutu ni chaa Pablo undi nuu kuiti nuu yivi ka kandixia ñuu Teslonika

<sup>1</sup> Ru'u Pablo jiin Silvano jiin Timoteo, chaa ri tutu ja'a nuu taka ro'o, yivi ka kandixia Jesùs ka ndututu ñuu Tesalonica, vanuxia ja ka yi'i ra jiin Tata yo Yandios jiin Jito'o Jesùs. Ti Jesùs kuu Cristo, ya ndiso jniñu ña'nu nuu Yandios. Ti maa Tata yo Yandios jiin Jito'o Jesùs, na kunda'u ini ya ti na chindee ya ro'o naa ra, ti ja na kukuee kunchuku ra nava kuni maa ya.

*Na nde'e yo ti na kotonchaa yo nava ni ka kandixia yivi ñuu Tesalonica*

<sup>2</sup> Ru'u naa ri, nini ka jikanta'u ri nuu Yandios ja kuu ro'o naa ra, chi ni ka kandixia ndaa ra maa Jito'o Jesùs. Nini ka ndaku ni'in ri ro'o naa ra nuu Yandios, <sup>3</sup> chi ka jini va'a ri ja ka siuku ndaa ra naa ra. Ti ka kusii ini ra naa ra, ka janukuachi ra, chi ni ini ra ni ka kandixia ra maa Jito'o Jesùs, ya kuu Cristo, chi ka ndiyo ini ra ja na ni'in ra yaji ra nuu Yandios.

<sup>4</sup> Ka jini va'a ri ja Yandios ni nakaji ya ro'o naa ra nava na kandixia ndaa ra Jesùs. Ja yukan kuu ja iin ni ga ñani jna'an ka kuu yo, chi ni ka kandixia ndaa yo maa Jito'o Jesùs. <sup>5</sup> Sia'an kuu chi na ni ka ka'an ri jnu'un Yandios nuu ra naa ra, tu ni ka ka'an ri ja kuu ini maa ri, chi maa Yandios ni ja'a jnu'un un ja na ka'an ndaa kuiti ri naa ri, ti maa Espíritu Santo ni sa'a ja ni ka chaku ini ra jnu'un un, ti ni ka kandixia ndaa ra naa ra. Sia'an kuu chi ka jini va'a ri ja maa Yandios ni sa'a jniñu ña'nu un, ti yukan kuu ja ni ka keja'ka kandixia ndaa ra Jesùs. Ti maa ra naa ra, ja ka jini va'a ra nasa ni kunchuku ri jiin ra. Chi ka nduku ri ja va'a ja kuu ro'o naa ra ti ansu ja kuu maa ri naa ri. <sup>6</sup> Siki ja ni ka janta'u ndaa ra jnu'un Jesùs, yukan kuu ja ni ka jito ra kua'a nundo'o. Ni ka ndonda yivi siki ra naa ra. Ti vasu sia'an kuu, ko ka kusii ini ra, chi maa Espíritu Santo ni ja'a jnundee ini, ti ni ka natejna'an ra nava ni ka sa'a ru'u naa ri, chi suni sia'an ni ka ndonda yivi siki ri. <sup>7</sup> Ja sia'an ti suni ni ka kuu ndee ini yivi ka kandixia ndaa ñuu Macedonia jiin Acaya, chi ni ka jini i nava ni ka kundee ra vasu ni ka jito ra nundo'o. <sup>8</sup> Ko ansu nini yivi ndaa ñuu Macedonia jiin Acaya ni ka jini jnu'un ra naa ra ja ni ka kandixia ndaa ra Jito'o Jesùs, chi ni jichanuu jnu'un un kua'an taka ñuu. Ja yukan kuu ja tukaa nini kuu ja xndaku nuu jna'an yo, <sup>9</sup> chi taka ñuu iyo yivi ka jani jnu'un ra naa ra nava ni ka kusii ini ra na ni ka jakoyo ri nuu kanchuku ra, chi ni ka janta'u ra jnu'un ni ka ka'an ri.

Ti suni maa i ka jani i jnu'un nava ni ka sama ini ra, chi tukaa ka nchañu'un ra santu ni ka sa'a yivi, chi santu un tu ka chaku. Ko vijna ti ja ka nchañu'un ra iin ni ga maa Yandios chaku, ti ka janukuachi ra nuu maa ya. <sup>10</sup> Ti suni ka ka'an i ja ka ndatu ra kivi nchaa maa Se'e Yandios nuu andivi, ja ni naxndoto ya ma'ñu ndiyi. Ti Se'e ya un kuu Jesùs, ya nama yo'o nuu nundo'o ka'nu xaan ja kuu kivi na nchaa ya, ja na xndichi ya ñuyivi yo. Yukan kuu jnu'un ka ka'a yivi un taka ñuu naa i.

*Jniñu ni sa'a Pablo ñuu Tesalonica*

### 2

<sup>1</sup> Ñani, ro'o ja ka kandixia Jesùs, ja ka jini va'a ra nasa ni kuchuku ri jiin ra naa ra. Ka jini ra ja vii ni kunchuku ri jiin ra naa ra. Ka jini ra ja vii ni kunchuku yo. Tu kachi yo ja tu na jniñu ni ka sa'a ri, chi su'va ni ka chindee

xaan ri ro'o naa ra. <sup>2</sup> Ka jini ra nundo'o ni ka jito ri na ni kunchuku ri ñuu Filipos. Chi ni ka ka'an ndeva'a yivi siki ri, ko tu ni ka yu'u ri, chi vil'i ga ni ka siin ri ni ka ka'an ndaa ri jnu'un Yandios, chi maa ya ni chindee ru'u naa ri vasu ni ka jito xaan ri nundo'o. Suni sia'an ni ka jna'an ri na ni ka jakoyo ri ñuu ra naa ra. <sup>3</sup> Ko tu ni ka naxndii'ini ri jiin jnu'un ni ka ka'an ri, chi vanua ka xna'an ri maa jnu'un ndaa. Ni tu ka ndo'o ini ri ja kinya'u ri nuu jnu'un ka ka'an ri nuu ra naa ra.

Ti jnu'un ni ka ka'an ri tu ni ka xnda'u ri ro'o naa ra. <sup>4</sup> Chi su'va ka siin ri ka ka'an ri maa jnu'un Yandios, chi maa ya ni nakaji ru'u naa ri, ti ni tatu ya ru'u naa ri ja na xndaku ri nuu yivi nasa nanita'u yo. Yukan kuu jnu'un ka ka'an ri, ko ansu ja na kuu nava ka kuni yivi naa i, chi ja na kuu nava kuni maa Yandios. Chi maa Yandios kuu ja jini va'a taka jnu'un ka'an yo jiin ja ndo'o ini yo, chi yi:yo nde'e ya añu yo. <sup>5</sup> Ka jini va'a ra ja tu ni ka xnda'u ri ro'o naa ra jiin iin jnu'un vyi ja'a, ja na kin ya'u ri nuu ra naa ra, chi jini maa Yandios ja yukan kuu jnu'un ndaa. <sup>6</sup> Ti ka jini ra ja tu ka nduku ri ja yiñu'un nuu ra naa ra, ni nuu yivi inga ñuu.

<sup>7</sup> Vasu kuña'nu ri ja kuu ri apóstol nuu Cristo, ti vasu kuu sa'a ri jniñu ña'a'nu, ko tu ni kuni kinya'u ri nuu ra naa ra ja na ni'l'in ri xu'un. Chi su'va ni jito va'a ri ro'o naa ra nanu sa'a iin ñasi'i nu jito va'a ña se'e kuachi ña, chi kunda'u ini ña maa i. <sup>8</sup> Ni ka kunda'u ini ri ro'o naa ra, ti ansu nini ni ka kunda'u ini ri, chi su'va jiin ni ini ni añu ri ni ka xna'an ri jnu'un Yandios nuu ra. Ti ansu jnu'un un ni ka xna'an ri, chi ka iyo ri ja na kua'a ri undi maa ri ja na nama ri ro'o naa ra niku. Chi vanua ni ka kunda'u xaan ini ri ro'o naa ra. <sup>9</sup> Ñani, ka nuku'un va'a ini ra nava ni kunchuku yo. Ti ru'u, vasu iyo nasa kuita ri, ko ni ka sa'a ri jniñu nava tu xndii'ri ini ra naa ra nasa kuu ja kuchaku ri. Ti vasu kaku ri jiin jniñu, ko nini ka xna'an ri jnu'un Yandios nuu ra naa ra.

<sup>10</sup> Ka iyo ra ja kua'a ra jandaa chi ni ka jini va'a ra, ti suni maa Yandios jini va'a ga ya nasa ni ka kunchuku ri yukan. Ni ka jini ra nava ni ka jika ndaa ri ichi ya. Ja sia'an kuu ja ni iin yivi tu kuu kankuachi i siki ri. <sup>11</sup> Nanu xndaku iin tata nuu se'e da, suni sia'an ni ka ja'a ri jnundee ini ro'o naa ra, ti ka jini va'a ra yukan. <sup>12</sup> Ti sia'an vii vii ni ka xndaku ri nuu ra naa ra na ni ka ja'a ri jnundee ini ro'o. Ti ni xndaku xaan ri nuu ra naa ra ja na siin ra jiin jnu'un ya, chi maa ya kuu ja ni nakaji yo'o naa yo. Ni nakaji ya yo'o ja na kivi yo ñuu nuu ta'u ya jniñu, chi yukan kuu nuu vii kunchuku yo jiin ya. Ja'a kuu jnu'un ni ka xna'an ri nuu ra naa ra.

<sup>13</sup> Ja yukan kuu ja nini nakuanta'u ri nuu Yandios ja kuu ro'o naa ra. Na kuanta'u ri nuu Yandios chi va'a xaan ni ka ñuso'o ra jnu'un ya. Tu ni ka janta'u ra jnu'un ka ka'an yivi. Chi su'va, ni ka janta'u ra iin jnu'un ndaa kuiti, chi ni ka jini ra ja yukan kuu maa jnu'un Yandios. Sia'an ni ka janta'u ra jnu'un ya, chi vanua ni ka kandixia ra Jesús. Ti undi vijna kande jnu'un un ini añu ra nava na kaka ndaa ra ichi ya naa ra.

<sup>14</sup> Ti sia'an sa ni ka jini ri ja ni chindee jnu'un ya ro'o naa ra, chi suni ni ka jna'an ra nanu ni ka jna'an yivi ka kandixia ja kanchuku tijní nuu ndaañuu Judea, chi ni ka ndikun yivi ñuu da un maa da, ti ni ka jito u'u i da naa da. <sup>15</sup> Ti maa chaa hebreo un ka kuu ja ni ka ja'ní Jito'o Jesú. Ti jna'an da jana'an, suni sia'an ni ka ja'ní da proféta, chaa ni ka ka'an jnu'un Yandios na jana'an yukan. Suni sia'an ni ka sa'a jna'an ri hebreo jiin ri naa ri, chi ni ka keni'in da ru'u naa ri nuu ñuu da. Ti jiin taka jniñu kue'e ka sa'a da un tu janta'u Yandios da naa da, chi tukaa ga ka kuni kuandatu da Yandios. Ni ka nduu da chaa ndeva'a nuu yivi sava'ní ga nación. <sup>16</sup> Vijná ti nduku xaan da ja tukaa na ka'an ri jnu'un Jesú nuu yivi taka ga nación. Ka kuni da kasí da ichi i ja tukaa na kandixia i iin jnu'un ndaa ja ka'an siki Jesú, nuu ka'an nasa nanita'u i nuu

Yandios. Sia'an kanda yivi hebreo un, chi nini ka sa'a ndeva'a da. Taka kivi ka skaa da kuachi un siki da. Ti ja kuu yivi un kii iin nundo'o ka'nun xaan ga siki i, chi sia'an ni kachi Yandios.

### *Ndo'o ini Pablo ja ki'in tuku da nuu kanchuku yivi ka kandixia ūu Tosalónica*

<sup>17</sup> Nani naa ra, ja iyo ti'l'i kivi na ni ka kuxio ri nuu ra naa ra. Ti vasu tu ka jini nuu jna'an yo, ko nini ka ūukuu ini ri nuu ra naa ra. Ka ndiyo ini ri jaa ri ja na nakuni jna'an tuku yo naa yo. <sup>18</sup> Ru'u Pablo, nini ndiyo ini ri jaa ri, ko taka jinu ja kuni ri jaa ri, ti jasi chaa u'u un ini ri. <sup>19</sup> Ko tu xndi'i ini ri yukan, chi kundatu ri undi na nchaa tuku Jito'o Jesús nuu ūuyivi yo, ti kivi un ndixia na ti ndusii ini ri kundichi ri nuu ya. Ti jandaa ndixia kuu un, chi ni ka xna'an ri nuu ra nasa kaka ndaa ra ichi ya, ti ni ka kuu ndee ini ra jiin jniñu un. Ja yukan na ti koo si in i taka yo kivi nu na kujiin yo nuu ya. <sup>20</sup> Yukan kuu ja nakuanta'u ri nuu Yandios chi ka'nun xaan iin jniñu ni sa'a ya jiin ra naa ra, ti kusii xaan ini ri jiin jniñu un.

## 3

<sup>1</sup> Ja yukan kuu ja ka ndo'o xaan ini ri ja kuu ro'o naa ra. Ti tukaa ka kundee ini ri undi nu tu ni'in ri jnu'un nasa ka iyo ra naa ra. Ja yukan kuu ja va'a ga ja ni kendo maa iin ri ūuu Atenas, <sup>2</sup> ti ni taji ri nani yo Timoteo kuaja da nuu kanchuku ra ja na kua'a da jnundee ini ro'o naa ra. Maa Yandios ni taji ya maa da nuu yo ja na kunukuachi da nuu jniñu ya. Ti jniñu un kuu ja na kachanuu yo jnu'un Cristo ki'in taka ūuu. Kuaja da nuu kanchuku ra naa ra, ti na kua'a da jnundee ini ro'o nava na kandixia ndaa ga ra jnu'un Yandios siki Jesús naa ra. <sup>3</sup> Na kituu da ro'o nava tu xndi'i ri ini ra jiin nundo'o un, chi jandaa ni kachi Yandios ja koo ndo'o koo nene yo nundo'o un naa yo. <sup>4</sup> Ti jandaa ndixia kuu un, chi na ni ka kunchuku yo ni ka xndaku ri ja sia'an koto yo nundo'o un naa yo, ti ni kundaa un vijna. <sup>5</sup> Chi ru'u, tu kuu va'a ini ri, ti ndi'i xaan ini ri nasa ka kuu ra naa ra. Ja yukan kuu ja ni taji ri Timoteo ja na jande'e da nasa kanchuku ra, nu ka siin ra nava ku'a'an ra, chi sandau kue'e ja'u'u un ro'o naa ra, ti kinikava ra nuu kuachi. Chi nu sia'an na kuu, ti va so ni ka sa'a jniñu ka'a ri na ni xna'an ri nuu ra naa ra.

<sup>6</sup> Ko nu ni nandeokuñi Timoteo ja ni jaa da ūuu Tesalónica, ti ni nakani da jnu'un nuu ri naa ri nava kanchuku ra yukan. Kachi da ja ni ini ra ka kandixia ra Jesús, ti ka kunda'u ini nuu jna'an ra. Suni kachi da ja nini ka ūukuu ini ra ru'u naa ri, ti ka ndiyo ini ra naa ra ja na kuni tuku ra nuu ri. Suni ka ndiyo ini ri ja na nakuni jna'an yo. <sup>7</sup> Nani, nu ni ka jiniso'o ri nava kanchuku ra naa ra, ti ni ka kusii xaan ini ri naa ri ja ka siin ra nava ka kandixia ra. Ni ka kuu ndee ini ri, chi kivi un ka ndi'i xaan ini ri ja siki iin nundo'o ka jana'an ri. <sup>8</sup> Ni iyo jnu'un ndi'i ini, ko vijna tukaa. Ni kukuee kanchuku va'a ri vijna, chi ni ka jini ri ja ni ini ra ka kandixia ndaa ra jnu'un Jito'o Jesús. <sup>9</sup> Ka kusii ini ri yukan ja sia'an ni ka kandixia ndaa ra jnu'un Yandios, so ja tu ka jini ri nasa kakanta'u ri nuu Yandios ja kuu ro'o naa ra. Ti taka jinu nakuanta'u ri nuu Yandios ti ndakuni'in ri ro'o naa ra nuu ya. <sup>10</sup> Ti ka siin ri ka jikanta'u ri nuu ya taka kivi ja na chindree ya ru'u naa ri, ja na jaa ri nuu kanchuku ra. Ti nu ni ka jakoyo ri, ti yukan na xndaku ri tijni ga jnu'un ya, ja tu ja'i kuni ra naa ra. Ti sia'an na ni'in ra jnundee ini, ti na kuñii ini ra jiin jnu'un ya naa ra.

<sup>11</sup> Sia'an ka jikanta'u ri nuu Tata yo Yandios jiin nuu Jito'o Jesús, nava na chindree ya ru'u, ti na jakoyo ri nuu kanchuku ra naa ra. <sup>12</sup> Ti siin jikanta'u ri nuu ya, ti maa Jito'o na sa'a ya ja na kuñii ini ra. Ti na kunda'u ini nuu jna'an ra jiin nuu taka ga yivi naa i, sia'an nanu ka kunda'u ini ri ro'o naa ra.

<sup>13</sup> Siin ri jikanta'u ri nuu ya nava na kua'a ya jnundee ini, ja na kondoo aňu ra nuu Tata yo Yandios naa ra. Sia'an ti na kotu'va ra ja kuu kivi nchaa tuku Jito'o Jesús jiin tendi'i ga ñanijna'an yo, ja ni ka kandixia i undi na jana'an, ti kanchuku i jiin maa ya. Sia'an jikanta'u ri nuu ya, ja na kotu'va ra ja kuu kivi un.

### *Na kunchaa yo nava kuni maa Yandios*

## 4

<sup>1</sup> Ñani naa ra, ja ka jini va'a ra nava kunchuku ra ichi Yandios, chi sia'an ni ka xndaku ri nuu ra nava kunchuku ra, ti sia'an ka siuku ra vijnna. Vijnna ti ka kunda'u ini ro'o naa ra, jikanta'u ri ti tatu ri ro'o ja na siin ra kaka ndaa ra ichi Yandios. Ka kunda'u ini ri vanuxia iin ni ga ni ka kuu yo naa yo jiin Jito'o Jesús nava ka kandixia yo maa ya. Chi nava kanchuku yo vijnna, yukan kuu ja jajna'an ini Yandios. <sup>2</sup> Ro'o naa ra ja ka jini ra naa jnu'un ni ka xndaku ri. Ti takaa jnu'un un kuu mani jnu'un ndaa, chi ru'u Pablo, ndisojniňu ri nuu Jito'o Jesús ja sia'an na xndaku ri nuu ra naa ra.

<sup>3</sup> Kuni maa Yandios ja na koo ndoo koo ii ra naa ra. Ti koto ni iin ra kivi nduu jiin jnu'un sii ini ja kusikinchaa jna'an ra naa ra. <sup>4</sup> Kuni ya ja vii na sa'a ra nu na nduku ra iin ñasi'i kuncha ini ve'e ra, ti ansu ja kivi nduu ra jiin jnu'un sii ini. Kachi ya ja na kuncha va'a kuncha ndaa ra jiin ñasi'i ra nava na koo ndoo ra jiin ña, ti ansu ja kusikinchaa ra maa ña. <sup>5</sup> Koto kunchuku ra nanu kanchuku yivi tu ka nchaňu'un Yandios, chi yivi un, jña'an ka sa'a i, ti ka sa'a i nanu kuiti, chi tu ka jnuu ini i. <sup>6</sup> Ti kachi ya ja koto xndoňa'an ra nuu ñani jna'an ra, chi maa Jito'o, kua'a ya iin nundo'o ka'nu xaan. Ja ka jini va'a ra jnu'un yukan, chi undi nuu ja ni ka xndaku ni'in ri nuu ra naa ra. <sup>7</sup> Va'a kani ini ra naa ra, chi tu ni nakaji Yandios yo'o ja sa'a ndeva'a yo, chi su'va ja na kaka ndoo yo. <sup>8</sup> Ti nu ka iyo sava yivi ka skexiko jnu'un ni xna'an ri, ko ansu nuu jnu'un un ka skexiko i, chi su'va ka skexiko i maa jnu'un Yandios, ya ni ja'a Espíritu Santo nuu yo ja na koo ndoo yo nuu ya.

<sup>9</sup> Ñani naa ra ja ka kandixia Jesús, tu nini kuu ja undi chaa ri iin tutu nuu ra ja na kunda'u ini nuu jna'an ra naa ra, chi maa Yandios ni chu'un ini aňu ra ja sia'an na koo. <sup>10</sup> Ti sia'an ndixia kanchuku ra jiin ñani jna'an yo ja kanchuku ni ndaňuu Macedonia. Ko ka kanda'u ri jiin ra naa ra ñani, ja su'va vi'i ga na koo jnu'un mani ini, ti vi'i ga na kuñi jnunda'u ini jiin ra naa ra, siki ja ka yi'i takaa yo jiin Jesús.

<sup>11</sup> Suni ja na kukutu ini ra, ti na kukuee kunchuku ra jiin jniňu ka sa'a ra. Koto ka'ncha ini ra ja sa'a ra jniňu jiin nda'a ra nava ni ka xndaku ri nuu ra naa ra. <sup>12</sup> Yukan na nde'e takaa yivi tu ka kandixia un, ti na kua'a i ja yiňu'un ro'o naa ra, nava tu kakan ra ja kuchaku ra nuu sava'ni ga inga yivi ja na chindee i ro'o naa ra. Ti sia'an kunchuku ra nuu ñuyivi ja'a naa ra.

### *Nchaa tuku Jito'o Jesús nuu ñuyivi*

<sup>13</sup> Ñani naa ra, tukaa kuni ri ja kendo ra sia'an ni, chi kuni ri ja na kuni ra nasa ka jna'an takaa kuni jna'an yo ja ja ni ka ji'i. Ti sia'an nava tukaa koo jnu'un kui'ya ini nuu ra naa ra. Chi ka kukui'ya xaan ini yivi ja tu ka jini i nachi kuankoyo ndiyi un naa i. <sup>14</sup> Ko yo'o naa yo, tu ka ndi'i xaan ini yo, chi ka kandixia yo Jesús. Ti ka jini yo ja ni ji'i ya, ko ni nandoto ya. Ja yukan kuu ja ka ñukuu ini yo nava ni ka kandixia yo, chi jandaa kuu ja taji Yandios Jito'o Jesús ndii ya jiin takaa ñani jna'an yo ja ni ka ji'i un, chi ja ni kunchuku i nuu ñuyivi ti ni ka kandixia i ya.

<sup>15</sup> Ja yukan kuu ja ka xndaku ri iin jnu'un ndaa ni ja'a maa Jito'o nuu ri nuu ra naa ra. Ti sia'an ka xndaku ri nuu ra vijnna nasa koo kivi na nchaa tuku Jesùs nuu ñuyivi. Chi xnakan yivi ni ka ji'i un nandoto i ti nchakoyo i jiin ya. Ti yo' ja ka chaku kivi un, tu kuu kandu yo ki'in yo. <sup>16</sup> Chi na jaa kivi un, ti kuun maa Jito'o kii ya ichi andivi, ti kanajaa ya ja maa ya ta'u jniñu, ti suni kanajaa iin ángel kuña'nu ga, ti tivi iin ndiki Yandios. Ti kivi na tivi ndiki un, ndenda Jito'o Jesùs nuu ñuyivi yo. Ti yivi ni ka ji'i, ja ni ka kandixia i ya, xnakan yivi un, nandoto i. <sup>17</sup> Yukan na ti yo' ja ka chaku ja kanchuku yo, suni iin ni, ndakoyo undi nuu viko ichi andivi un, ti yukan kunchuku yo saa ni jiin ya ja kuu saa ni. <sup>18</sup> Yukan kuu ja koto xndi'i ra ini ra naa ra. Ka'an ndee jiin jna'an ra naa ra jiin taka jnu'un ja'a.

## 5

<sup>1</sup> Nde'e naa ra ñani, ja kuu maa ra naa ra tu kuu kachi ri na kivi ni na kuiya nchaa Jito'o Jesùs. <sup>2</sup> Chi ja ka jini va'a ra ja kinaa kivi un yo'o nanu sa'a iin ñakui'na ja yaku jakuaa. <sup>3</sup> Ko nu kuan kuyajni kivi un ti yivi naa i kachi i: "Ni kukuee kanchuku yo vijnna, tundo iyo kuiti", kachi i. Ko kivi un, chi sanaa ini i, ti chaa iin nundo'o xaan un nuu i. Vasu jatu yen'i'ni añu i naa i nanu jna'an iin ñasi'i'nu ni keja'a kue'e ña ja kaku se'e ña. Chi sia'an kii nundo'o xaan nuu yivi un naa i, tu tu kaku i.

<sup>4</sup> Ko ro'o naa ra, tu kanchuku ra nanu yivi un ja tu ka jnuu ini i. Ko maa ra chi ja ka jnuu va'a ini ra, ti ja kuu kivi na nchaa Jito'o, ti tu kinaa ya ro'o naa ra nanu kinaa iin ñakui'na. <sup>5</sup> Chi maa ra naa ra, ja ka jini ya'a ra jnu'un ya siki yukan. Chi tu ka kuu ra nanu iin chaa kuaa ja tu kuni da na ichi ki'in da, chi ka jnuu va'a ini ra nava ka'an jnu'un ya siki yukan. <sup>6-7</sup> Ja sia'an kuu ja na ku'un ini yo, ti tu kusu ini yo nanu ka sa'a inga yivi. Su'va na kundito ini yo nuu ichi Yandios. Na siuku ndaa yo ti tu kivi nduu yo inga ichi nanu chaa jini. Chi nu jakuaa na ki'in da ti nduva ndoko da, chi tu jini da nasa kaa ichi kua'an da. Sia'an vii ka sa'a yivi tu ka ñukuu ini jnu'un Yandios, chi tu ka jini da na ichi ki'in da.

<sup>8</sup> Ko yo'o naa yo tu kunchuku yo sia'an, chi ka iyo tu'va yo jiin jnu'un ya. Ka jika yo ñundijin, ti ka jini yo nanu ki'in yo, chi ka ndyo ini yo ichi Yandios. Ka jandatuo yo jnu'un ya, chi maa ya ja'a jnundee ini yo'o nava na kuu ga ini yo nuu ya. Ja sia'an na ti tukaa ga xnda'u yivi yo'o, chi ka kuu yo nanu soldado ja ka iyo tu'va da jiin sa'ma kaa ja nama maa da. Yukan kuu ja ka ñukuu ini yo ja nanita'u yo, chi jnu'un ni ka kandixia yo un kuu ja nama yo'o. Ja sia'an ti ka kuu yo nanu iin soldado ja nama da xini da jiin iin lelu kaa (ja ka'an yo tikoko). <sup>9</sup> Sia'an kin nama ya yo'o, chi tu ni nakaji ya yo'o naa yo ja na kuta'u yo nundo'o. Chi su'va ni nakauka ya yo'o ja na nanita'u yo jiin jniñu ni sa'a Jito'o Jesùs, ya kuu Cristo ja ndiso jniñu ña'nun nuu maa Yandios.

<sup>10</sup> Ti siki yukan kuu ja ni ji'l Cristo Jesùs ja kuu yo'o naa yo ja na nanita'u yo, ti kunchuku yo jiin ya. Vasu na kuú yo xi na kuchaku yo, ko tu xndi'i yo ini yo, chi ja jini yo ja no'on yo jiin ya. <sup>11</sup> Yukan kuu ja ka'an ndee jiin jna'an ra naa ra, ti chindetee nuu jna'an ra. Chi sia'an ka sa'a ra vijnna, ko kanda'u ri jiin ra ja na siin ra naa ra.

### *Jnu'un sandi'i ni ga ni xndaku Pablo nuu ñani jna'an da*

<sup>12</sup> Ti kanda'u ri jiin ra naa ra ja na kava yiñu'un ra nuu chaa ka kuña'nu nuu yivi ka kandixia yukan, chi ka sajñiñu xaan da ja kuu maa ra naa ra. Ti kuandato ra nuu taku jnu'un ka xndaku da, chi ka nachu'un ichi da ro'o naa ra. Kua'a ja yiñu'un nuu da naa da, chi maa Jito'o ni ja'a jniñu nuu da naa da. <sup>13</sup> Nini kuu ja na nakau'a ra ja yiñu'un nuu chaa ña'nu un naa da, ti kava

nda'u ini ra nuu da naa ra, chi iin jniñu ka'nu ka sa'a da. Ti sia'an na kukuee kunchuku ra naa ra ja ka iyo mani ra jiin jna'an ra.

<sup>14</sup> Ti suni tatu ri ro'o naa ra ja na xndaku ni'in ra nuu chaa kuxi un nu tu ka kuni sa'a da jniñu. Xndaku ni'in ra nuu da nava na kukui'ya ini da, ti na nakani ini da nuu kuachi un, ti na sa'a da jniñu. Ti chindee yivi ja tu ja'i kandixia ndaa i jnu'un Yandios. Suni nuu yivi vita ini, chi tu iyo ndee ini aña i jiin jnu'un ya ti sana i inga ichi. Ti kukutu ini chindee ra sava'ni ga yivi naa ra, ti na kukuee kunchuku ra. <sup>15</sup> Ni iin ra, koto sa'a ndeva'a ra jiin iin yivi ja ni sa'a ndeva'a jiin maa ra. Su'va ka'an va'a ra jiin yivi un. Kukutu ini naa ra, koto yuji ra sa'a ndeva'a ra jiin ñani jna'an ra. Chi su'va chindee jna'an jiin ñani jna'an ra. Ti suni sia'an sa'a ra jiin tendi'i yivi un. <sup>16</sup> Ti ja na koo siñini ra naa ra.

<sup>17</sup> Nini kakanta'u nuu Yandios ti koto ka'ncha ini ra naa ra. <sup>18</sup> Taka nau ja kuu, ti nini nakuanta'u ra nuu Yandios naa ra, chi sia'an kuni ya ja na kunchuku yo'o naa yo ja ka kandixia yo Cristo Jesùs, chi ja ka yi'i yo jiin ya.

<sup>19</sup> Koto kasí ra jniñu sa'a Espíritu Santo jiin ra.

<sup>20</sup> Koto kasí ra yu'u chaa ka ka'an jnu'un Yandios, ni tu skexiko ra jnu'un ka ka'an da, chi ka ka'an da jiin inijnuni maa Yandios.

<sup>21</sup> Ko vanuxia va'a nde'e ra ti kotonchaa ra naa ra nu iyo ndaa jnu'un ka ka'an chaa ka kuni xna'an ro'o naa ra. Kotonchaa ra nu iyo ndaa xi tuu. Ti nu tu kejna'an jnu'un un jiin jnu'un Yandios, ti koto kuanta'u ra. Ko maa ra kukutu ini ja na siin ra nava kuankoyo ra jiin jnu'un Yandios, chi iyo ndaa kuiti jnu'un ya. <sup>22</sup> Ja yukan kuu ja ka'an ri jiin ra naa ra ja na kuxio ra nuu taká jniñu kue'e un, chi tu va'a.

<sup>23</sup> Yukan ti ru'u Pablo, jikanta'u ri nuu maa Yandios, ja kuu ya maa Yandios ka'nu xaan ini, ti ja'a ya jnundee ini. Ñu'un ini ri ja na sa'a ndi'i ya ja na koo ndoo koo ii ra, chi kuni ya ja na kunukuachi ra jiin yikí kuñu ra, nava tu naa kuachi koo siki ra kivi nchaa tuku Jito'o Jesùs, ya kuu Cristo. <sup>24</sup> Ti jandaa kuiti kuu jnu'un ni chiso ya, chi maa ya ni nakaji ya yo'o, ti jandaa ndixia kuu ja siuku ya jnu'un un.

### *Jnu'un ndee ini sandi'i ni ga*

<sup>25</sup> Ru'u Pablo, kanda'u ri jiin ra naa ra ñani, ja na kakanta'u ra nuu Yandios ja kuu ru'u naa ri. <sup>26</sup> Kanxia'u jiin tako ñani jna'an yo, ti nanuu jna'an naa ra.

<sup>27</sup> Ru'u Pablo, ndiso jniñu ri nuu Jito'o Jesùs. Ti ta'u ri jniñu nuu ra naa ra ja na ka'u ra tutu ja'a nuu tendi'i ñani jna'an yo yukan.

<sup>28</sup> Yukan kuu jnu'un ka'an ri jiin ra naa ra. Ti ñu'un ini ri ja maa Jito'o Jesùs, ya kuu Cristo, na kunda'u ga ini ya, ti na chindee chituu ya ro'o naa ra. Ti sia'an na koo.

## Tutu kuu uu ni chaa Pablo nuu yivi ca kandixia ñuu Tesalónica

<sup>1</sup> Ru'u Pablo jiin Silvano jiin Timoteo, chaa ri tutu ja'a nuu tak a yivi ka kandixia Jesús ja ka ndututu ñuu Tesalónica, chi ka yi'i ra jiin Tata yo Yandios jiin Jito'o Jesús naa ra. Ti Jesús kuu Cristo, ya ndiso jniñu ña'nu nuu Yandios. <sup>2</sup> Ti maa Tata yo Yandios jiin Jito'o Cristo Jesús, na kunda'u ini ya ti na chindee chituu ya ro'o naa ra ja na kukuee kunchuku ra nava kuni maa ya.

### *Xndichi Yandios yivi ni ka sa'a kuachi kivi na nchaa Cristo*

<sup>3</sup> Ñani naa ra, nini kuu ja na nakuanta'u ri nuu Yandios ja kuu maa ra naa ra, chi vijn a ti ja kuan kuka'nu xaan ga jnu'un nda'u ini nuu jna'an ra naa ra. Chi ni ka siin ra nava ni ka kandixia ra, ti ka kusii ini ri, chi vi'i ga ni ka kuñii ini ra ja ka kandixia ra jnu'un Jesús. <sup>4</sup> Siki yukan kuu ja nini ka iyo siñi ri ka ka'an ri, ti ka ndaku ni'in ri ro'o naa ra nuu tak a ñani jna'an yo ja ka ndututu i ka skua'a i jnu'un Yandios. Ti ka ni'in ri jnu'un ja kukuee kanchuku ra, ti vii ni ka keja'a ka kandixia ra naa ra, ti ka siuku ra jnu'un un vasu ka ndo'o ka nene ra. Chi ka ndondaa yivi ti ka ka'an ndeva'a i siki ra naa ra. <sup>5</sup> Ko nundo'o un chi chaku ini yo ja jandaa ndixia kuu nava ni kachi Yandios ja na koo nundo'o un nuu ra naa ra. Ja ni kachi ya ja ka yi'i ra jiin ya, ti ja kuu kivi ka'nu un, yukan na ti stuu ndijin ya ja kivikoyo ra ñuu nuu ta'u ya jniñu. <sup>6</sup> Ko maa Yandios kuu ya xndichi va'a, ti chunaa ya jiin nundo'o nuu yivi ka ja'a nundo'o ro'o ja ka ndo'o ka nene ra.

<sup>7</sup> Ti maa ya na kua'a nuu ndetatu ra ja tukaa ga koo ra nundo'o, ti na kukuee kunchuku ra, ti suni sia'an ja kuu ru'u naa ri. Sia'an na koo jiin yo kivi na ndii Jito'o Jesús undi nuu andivi. Chi kivi na nchaa ya yukan na kuni ndaa yo ja ni nduña'nu xaan ga ya, ti kii ya jiin yañu'un jiin ángel ka kuña'nu nuu ya. <sup>8</sup> Sia'an ndii ya kivi un, ti kii xndichi ya yivi tu ni ka jandatu jnu'un Jito'o Jesús, ti kua'a ya nundo'o nuu yivi un, chi tu ni ka chunso'o i jnu'un Jito'o Jesús, nuu ka'an taka jniñu ña'nu ni sa'a ya ja kuu yo'o naa yo. <sup>9</sup> Ti yivi un kuta'u i ñin nundo'o ka'nu xaan ga, ti sia'an kondo'o konene i ja kuu saa ni, chi chajiy o ya i naa i ki'in i nuu tukaa ga nakuni i nuu Jito'o. Ti sia'an na kuxio yivi un, ti tukaa ga kivi i ñuu nuu ta'u Yandios jniñu. Ko yivi ni ka xnaa un ti kuxio i ñin jinu ni. Tu kuu kuiti kivi i nuu vii nuu va'a nuu kuña'nu ya.

<sup>10</sup> Ti sia'an koo kivi nchaa tuku Jito'o Jesús. Yukan na ti kachi yivi ya ja ka'nu xaan iñin jniñu ni sa'a ya ja kuu maa i naa i. Naa ini i nachiñu'un i ya jiin jniñu ni sa'a ya ja ni ka kandixia i naa i. Ti suni sia'an ro'o naa ra, chi ni ka kandixia ra jnu'un ni ka ka'an ri nuu ra naa ra.

<sup>11</sup> Sia'an iyo ñani, nini ka jikanta'u ri nuu Yandios ja kuu ro'o naa ra, ja na kaka ndaa ra ichi ya nuu ñuyivi ja'a. Chi sia'an kuni maa ya na ni nakaji ya ro'o ja na kivi ra jiin ya naa ra. Ka jikanta'u ri nuu ya ja na chindee chituu ya ro'o, ti na sa'a ra taka jniñu va'a, chi jini ri ja ñu'un ini ra ka sa'a ra jniñu va'a. Sia'an ka ñukuu ini ra chi ni ka kandixia ra Jesús, ti maa ya kuu ja ni chu'un ini ra ja na siuku ra taka jniñu va'a un naa ra. <sup>12</sup> Sia'an ka jikanta'u ri nuu ya, ti na kotonchaa yivi nava ka jika ndaa ra ichi ya. Ti na kachi i ja ka'nu xaan iñin jniñu ni sa'a Jito'o Jesús ja kuu ro'o naa ra. Ti nava sia'an na kuni i ja ka yi'i ndixia ra jiin ya naa ra. Sia'an koo chi maa Yandios ni kuu ini ya ja ni nakinse'e ya yo'o. Chi maa Jito'o Jesús kuu maa Cristo ja ni taji Yandios ja na kundiso ya iñin jniñu ña'nu un.

*Kii iin chaa jna'nu ndatu*

**2**

<sup>1</sup> Vijna na ñani naa ra, na kachi ri nasa koo kivi nchaa Jito'o Jesús, ya kuu Cristo, ja kin nustutu ya yo'o naa yo. <sup>2</sup> Ti kanda'u ri jiin ra ja na kani va'a ini ra naa ra, ti koto sama ra inijnunra siki taka jnu'un kuniso'o ra, ni koto xndi'i ini ra naa ra siki tijni jnu'un ka'an yivi yukan, chi undi nuu ni ka jnuu ini ra. Ko vanuxia iyo yivi un ja xnda'u i ti kachi i ja ni jaa kivi nchaa Jito'o Jesús tuku. Ti kachi yivi un ja maa Espíritu ni ja'a inijnuni da ja na xndaku da nuu ra naa ra. Xi kachi da ja sia'an ni ka xndaku ri nuu ra na ni kunchuku ri yukan. Xi suni taji da iin tutu ti kachi da ja ru'u ni ka taji naa ri. <sup>3</sup> Ko koto chunso'o ra jnu'un ka'an yivi un naa ra. Chi vii ka'an i, ko yukan kuu mani jnu'un xndoña'an.

Ko ru'u Pablo, na xndaku ri maa jnu'un ndaa nuu ra, ti na kachi ri nasa koo kivi nchaa tuku Jito'o. Chi xnakan kii iin kivi ja ndondaa yivi naa i, ti kanaa i nuu ni tu'u ñuyivi yo. Ti yivi ka ka'an sia'an un, vi'i ga sasiin da yivi un naa i nuu ichi Yandios, ti sa'a ndeva'a i siki jnu'un ya. Ja kuu kivi un kenda iin chaa kachi ja kuña'nu xaan da, vasu kuu da iin chaa ni nchakuachi xaan. Ti xna'an da iin kuachi ka'nu xaan ga, vasu undi vijna tu ka jini yo kuachi un. Ti sasiin da sava'ni ga ley ja iyo. Ko chaa un ja ni jna'nun datu ndixia da nuu Yandios, ti ni xnaa da maa da nuu ya ja kuu saa ni. <sup>4</sup> Nduu ña'nun chaa un nuu maa Yandios, ti ndondaa da siki ya, chi kachi da ja maa da kuña'nu xaan ga ja kuu maa Yandios. Ti na kunchaňu'un yivi maa da. Ti ta'u da jniňu taka nuu ñuyivi ja na kunchaňu'un yivi maa iin ni ga da naa i, chi tukaa ga kua'a da jnu'un ja kunchaňu'un yivi sava'ni ga santo. Ni tu kua'a da jnu'un ja na kunchaňu'un yivi maa Yandios chaku ya kancha andivi, chi kachi da ja maa da kuu Yandios. Nukoo da ini veňu'un Yandios, ti ta'u da jniňu nuu ni tu'u ñuyivi. Ti sia'an xnda'u da yivi naa i. <sup>5</sup> ¿Xi va nu ja ni ka naa ini ra ja sia'an ni xndaku ri na ni kuncha ri yukan nu?

<sup>6</sup> Ti vijna ka ndo'o ini ra ja ndoo tu ja'i kenda chaa un, ko changa ga jaa kivi ja kii da, chi tu ja'i jaa kivi da ja stuu da maa da nuu yivi jiin kuachi kin sa'a da. <sup>7</sup> Undi nuu tu ni ka jini yo jnu'un chaa un, ko vijna ja ni ka jini yo jnu'un chaa un, chi ja ni keja'a ka nduni'in ini yivi naa i, ti tukaa ga ka kuni kuandatu i nuu taka ga ley ja iyo. Ko vijna chi tu ja'i siuku ndi'i da taka jniňu kue'e un, chi ni yindi'yu da. Ko na jaa kivi na kenda da ti kivi un keja'a da jiin jniňu ndeva'a ja kin sa'a da. <sup>8</sup> Yukan na ti kenda ndijin chaa kue'e un ja na sa'a da jniňu sa'a da un. Undi kivi yukan na ti sa nakuni ndaa yo nau kuu chaa un. Yukan ti taja ii nduva Jito'o Jesús ja nchaa ya. Ti yachi ni ta'u ya jniňu, ti xnaa ya chaa un. Xnaa ya takaa jniňu u'u ti kenchaa ndi'i ya takaa jniňu ndiso da. Yukan kuu ja sa'a Jito'o Jesús kivi nchaa tuku ya.

<sup>9</sup> Ja kuu kivi na chaa chaa xaan un, ti sa'a da taka nuu kuachi xaan, nava ta'u maa ja'u'u kuña'nu un jniňu. Ti xnda'u ndi'i da yivi jiin taka jniňu sa'a da un, chi stuu da maa da ja kuña'nu xaan da. Ti kachi yivi ja sa'a da jniňu ña'nun xaan, ti kandixia yivi maa da vasu so xnda'u da yivi naa i. <sup>10</sup> Sia'an kuajniňu chaa un jnu'un xndoña'an nava na kundikun yivi maa da. Ti yivi un ni ka xnaa i maa i, chi ni ka kandixia i jniňu sa'a da. Sia'an xnaa yivi un maa i, chi tu ni ka chunso'o i maa jnu'un Yandios, ja kuu jnu'un ndaa ja ka'an siki Jito'o Jesús. Tu ni ka kandixia i jnu'un Jesús ja na nanita'u i. <sup>11</sup> Ti maa Yandios ta'u ya jniňu ja vi'i ga kundikun yivi jnu'un xndoña'an un. <sup>12</sup> Sia'an jna'nun datu yivi un, chi tu ni ka kandixia i maa jnu'un ndaa siki Jesús, ya kuu Cristo. Chi su'va ni ka jajna'an ga ini i, ti ni ka kusii ini i kuankoyo i ichi nundo'o un. Taka yukan kuu jniňu sa'a chaa xaan un.

### *Ni nakaji Yandios yo'o naa yo ja na nanita'u yo*

<sup>13</sup> Ko ru'u naa ri, nini ka nakuenta'u ri nuu Yandios ja kuu maa ra naa ra, chi ka kuu ra ñani ri ja ni kuu ga ini Jito'o Jesús. Chi undi nuu ni nakaji maa Yandios ro'o naa ra ja na nanita'u ra nuu ya, chi sia'an ni kunda'u ini ya yo'o undi nuu, ti sa ni xnukoo ya ñuyivi. Ni nama ya ro'o naa ra jiin Espíritu ya, chi ni sasiñn Espíritu ya ro'o ja na kunukuachi ra nuu maa ya. Ni nama ya ro'o vanua ni ka kandixia ndaa ra jnu'un Jesús. <sup>14</sup> Nakuenta'u ri nuu Yandios ja sia'an ni sa'a ya ja kuu ro'o naa ra, chi ni nakaji ya ro'o ja na chunso'o ra jnu'un ni ka ka'an ri, na ni ka xna'an ri jnu'un Jesús. Ti nava sia'an na kuu kivikoyo ra nuu kancha Jito'o Jesús, ya kuu Cristo, chi ja ni nduña'nu xaan ga ya vijna. Ti suni nduña'nu yo jiin ya kivi na najaa yo un, chi undi vijna ja ka yi'i yo jiin ya nava ni nakaji ya yo'o naa yo.

<sup>15</sup> Ja sia'an kuu ñani, na kachi ri ja ni'in kujiin ra jiin jnu'un ka kandixia ra, chi yukan kuu maa jnu'un ndaa ja ka'an Jesús, ja na kaka ndaa yo nuu ñuyivi ja'a. Ja ka jini ra ja taka jnu'un yukan ni ka xna'an ri nuu ra na ni kunchuku ri yukan. Ti suni sia'an ni chaa ri nuu tutu ni taji ri undi nuu.

<sup>16-17</sup> Ti vijna jikanta'u ri nuu maa Jito'o Jesús, ya kuu Cristo, jiin nuu maa Tata yo Yandios. Chi maa Jito'o Jesús ni kunda'u ini ro'o naa ra, ti ni ja'a yo jnundee ini ja sia'an na kaka ra ja kuu taka kivi. Ja yukan kuu ja na kuñukuu ini yo ni'in yo taka ja va'a nava ni chisojnu'un ya. Jandaa ndixia kuu yukan, chi ni chindhe chituu ya yo'o jiin jniñu ña'nu ni sa'a ya ja kuu yo'o naa yo. Ti maa Jesús ni kunda'u ini ya yo'o, vasu tu na iin jniñu va'a ni ka sa'a yo nuu ya undi nuu. Ka jikanta'u ri nuu ya ja kuu ro'o naa ra, ja na siin Jito'o Jesús na kua'a ga ya jnundee ini ro'o, nava na sa'a ra taka nuu jniñu va'a jiin ja na siin ra ka'an ra taka jnu'un ndaa. Yukan kuu ja ka jikanta'u ri nuu Jito'o Jesús ja kuu ro'o naa ra.

### *Na kakanta'u yivi nuu Yandios ja kuu Pablo*

## 3

<sup>1</sup> Ñani, iyo inga jnu'un kanuu. Xnakan na kachi ri ja kakanta'u naa ra nuu Yandios ja kuu ru'u naa ri, nava na kuichanuu yachi ga jnu'un Yandios ja ka'an siki Jito'o Jesús. Ti na chunso'o yivi naa i, na kandixia i, ti na kanajaa i Yandios, nava ni ka sa'a ra naa ra. Ti kuni yo ja na kuñii jnu'un Yandios ki'in nuu taka yivi, na chunso'o ti na ka kandixia ndaa i, nanu ni kivi jnu'un un ini maa ra naa ra. <sup>2</sup> Suni na kachi ri ja kakanta'u nuu Yandios naa ra ja na nama ya ru'u naa ri nuu chaa ka sa'a ndeva'a jiin ri, ja kanda kua'an kanda vaji da. Chi jandaa ndixia kuu ja tu ka kandixia tendi'i yivi. Yukan kuu ja na kakanta'u ra nuu ya ja kuu ru'u naa ri. <sup>3</sup> Ko maa Jito'o chi iyo ndaa ini ya, chi maa ya kuu ja kua'a jnundee ini ro'o naa ra, chi maa ya kuu ja kua'a jnundee ini ro'o naa ra, ti koto va'a ya ro'o nava tu nukoyo ra nuu kuachi. <sup>4</sup> Chi taka yo, ka yi'i jiin Jito'o Jesús. Yukan kuu ja ka ñukuu ini ri, ja na siuku ndaa ra taka jnu'un ndaa, nava ni ka xndaku ri nuu ra naa ra. Chi taka jnu'un un, ni tatu Yandios ru'u. <sup>5</sup> Ka jikanta'u ri nuu maa Jito'o, ja na xna'an ga ya nasa koo mani ya jiin ra naa ra, ti na kukuee kunchuku ra jiin Cristo. Ti jikanta'u ri ja na siuku ra naa ra, ti koto ndeokava ini ra. Siuku naa ra nanu ni siuku maa Jito'o Cristo undi ni sinu ya jniñu ni tatu Yandios nuu ya. Yukan kuu ja ka jikanta'u ri nuu Jito'o Jesús ja kuu ro'o naa ra.

### *Ja na nakutu ini yivi sa'a i jniñu*

<sup>6</sup> Ñani, ja'a na ta'u ri iin jniñu nuu ra naa ra. Maa Jito'o Jesús, ya kuu Cristo, ni ta'u jniñu un nuu ri, ja na kuxio ra nuu taka chaa ka kuu kuxi ja tuu ka kuni sal'a jniñu, ni tu ka kuni siuku da nava ni ka xndaku ri nuu da na ni kunchuku

ri yukan. <sup>7</sup>Ñani, ka jini va'a ra ja vii kanchuku ri na ni ka jakoyo ri yukan, ti sia'an kuni ri ja na kunchuku ra naa ra. Tu ni kunchuku kuxi ri jiin ra naa ri, chi ni ka sa'a xaan ri jniñu ni ka nduku ri ja kuchaku ri. <sup>8</sup>Ti ni ka jini ra ja kuu nduu kuu ñuu ni ka sa'a ri jniñu ti ni ka ni'in ri ja kuchaku ri. Tu ni skaya yu'u ri nuu ra naa ra ja na kua'a ra ja kaji ri, ti tu ni ka yaji ka'a ri taka ja ka ja'a ra nuu ri, chi ni ndenaa jiin jniñu ni ka sa'a ri. <sup>9</sup>Ni ka kuita ri nuu jniñu, ti vasu ka ndisojniiñu ri nuu Yandios, ti ka iyo ichi ri ja kakan ri ja kaji ri nuu ra naa ra. Ko tu ni ka sa'a ri sia'an. Sia'an ni ka sa'a ri ja na kotonchaa ra, ti nava suni sia'an na natejna'an ra naa ra.

<sup>10</sup>Sia'an ta'u ri jniñu ja'a nuu ra naa ra, chi suni sia'an ni ka xndaku ri na ni kunchuku ri undi ñuu ra, na ni ka kachi ri: "Nu ka iyo yivi kuxi nuu ra naa ra ja tu ka kuni sa'a jniñu, ti koto kua'a ra ja kaji. Chi nu nau ja tu sa'a jniñu ti tu ni'in ja kaji", ni ka kachi ri.

<sup>11</sup>Sia'an ka ta'u ri jniñu, chi ka ni'in ri jnu'un ja ka iyo yivi kuxi yukan ja tu ka kuni ka sa'a jniñu, chi so ka yaku kuxi. Ka ndi'i kuu ini ka yaku, ko so ka jikonuu kuxi. <sup>12</sup>Ja kuu yivi yukan kuu ja ta'u ri jniñu ja na chundee nda'a da ti na sa'a da jniñu, ti na nduku da ja kuchaku da. Sia'an xndaku ri ja kuu chaa un naa da, chi taka yo ka kandixia Jito'o Jesús, ya kuu Cristo. <sup>13</sup>Ko ro'o naa ra ñani, ja ka jika ndaa ra. Koto xndi'i ra ini ra naa ra, ti koto kuita ra jiin jniñu. Kukutu ini jiin taka jniñu va'a, chi yukan kuu jniñu ka ta'u ri nuu ra naa ra, ti sia'an koto nda'u nuu jna'an ra.

<sup>14</sup>Nu ka iyo yivi ja tu ka kuni chunso'o jnu'un ka'an ri nuu tutu ja'a, nde'e nau ja kuu, ti koto nde'e ra nuu. Ko nava sia'an na kukanuu ti na nakani ini. <sup>15</sup>Ko koto ka'an ndeva'a ra nuu yivi un ja koto u'u ra maa i, chi su'va xndaku vii ra nuu i nanu ja kuu i ñani maa ra. Ko xndaku nuu i ja na nakani ini i jiin jnu'un kuxi un, chi suni iin kuachi kuu. Ti sia'an ti nakani ichi ra ñani jna'an ra naa ra.

### *Jnu'un sandi'i ni ga*

<sup>16</sup>Ru'u Pablo, sandi'i ni ga ka'an ri ti jikanta'u ri nuu Yandios ja maa Jito'o Jesús, na sa'a ya ja na kukuee kunchuku ra naa ra. Ti sia'an na koo ni iin jniñu va'a sa'a ra ja kuu taka kivi. Ti ka jikanta'u ri ja maa Jito'o Jesús na kuncha ya jiin ra naa ra.

<sup>17</sup>Ru'u Pablo, chaa ri tutu ja'a jiin letra nda'a ri, suni jiin firma maa ri, ti kanxia'u ri jiin ra naa ra nava na kuni ra ja tu na ñinga yivi ni chaa tutu ja'a.

<sup>18</sup>Yukan kuu jnu'un ka'an ri jiin ra. Ti ñukuu ini ri ja maa Jito'o Jesús, ya kuu Cristo, na kunda'u ga ini ya ti na chindee chituu ya naa ra. Ti sia'an na koo.

## Tutu ni chaa Pablo nuu Timoteo undi nuu

<sup>1</sup> Ru'u Pablo, ka'an ri jiin ro'o Timoteo, ja na sandee ini ra. Kuu ri apóstol nuu Cristo Jesús, chi maa ya ni tatu jniñu ja'a nuu ri. Ti maa ya ni chisojnu'un ja nama ya yo'o nava na nanita'u yo. Yukan kuu ja maa Yandios jiin Se'e ya Cristo Jesús ni ja'a ya jniñu ja'a nuu ri ja na kuu ri iin apóstol nuu ya. <sup>2</sup> Ti chaa ri tutu ja'a nuu ra Timoteo, ti kuu ra nanu iin se'e ri, chi ni kandixia ndaa ra taka jniñu ni sa'a Cristo Jesús. Na chindee chituu Tata yo Yandios ro'o Timoteo, ti na kunda'u ga ini Jito'o Cristo Jesús maa ra. Ti na kukuee kuncha ra nuu ichi ya.

### *Xndaku xaan Pablo ja kuu jnu'un ja tu kejna'an*

<sup>3</sup> Ru'u Pablo, ja ni kachi ri ja ki'in ri ndaañuu Macedonia, ti ni tatu ri ro'o Timoteo ja na kendo ra ñuu Efeso yukan. Ti vijna kanda'u ri jiin ra ja na xna'an ndaa ra nuu taka yivi ka ndututu yukan. Ti nduxaan ra nuu taka chaa tu ka ka'an ndaa jnu'un Yandios. <sup>4</sup> Chaa un so ka ka'an da jnu'un nava ni ka sa'a chaa Israel jana'an, ti tu jini yo nu jandaa kuu xi tuu. Tu yoso jnu'un un nuu tutu Yandios, chi so jnu'un ka jani da ti ka xnda'u da yivi ka kandixia. Tu nijiñu jnu'un un, ni tu chindee jnu'un un yo'o ja kuu nuu jniñu Yandios. Ja yukan kuu ja ka'an ri ja na xndaku va'a ra nuu chaa un naa da.

<sup>5</sup> Sia'an xndaku ra nuu taka ga yivi ka kandixia jnu'un Yandios ka ndututu ñuu Efeso. Sia'an xndaku ra nuu yivi un nava na kondoo aña i na ka'an ndaa i, ti na nduu iin nuu ini i siki ja ni ka kandixia ndaa i jnu'un Yandios. Xna'an ra nuu i ja na kunda'u ini nuu jna'an i nanu kuu ini i nuu Yandios. Sia'an xndaku ra nuu yivi un, ro'o Timoteo. <sup>6</sup> Kanuu ja na xndaku ra sia'an, chi ka iyo tijni yivi ni ka sama i jnu'un ka ka'an i, vanuxia ni ka sana ini i. Ka ka'an xaan i ko so ka ka'an i, chi ni iin i tu ka chaku ini na jnu'un ka ka'an i. <sup>7</sup> Ka kuni kuña'nu chaa ka ka'an jnu'un un nanu ja ka kuu da chaa ja ka xna'an ley ja ni ja'a Yandios nuu tata yivi Israel jana'an ni nani Moisés. Ko vasu tu ka jini va'a da ley un, ko ka ka'an da nanu chaa ka jini ndi'i ley Moisés, vasu ni maa da tu ka chaku ini da na jnu'un ka ka'an da. Yukan kuu jnu'un xndaku ra nuu yivi un naa i, ro'o Timoteo.

<sup>8</sup> Vijnna ti na xndaku ri inga jniñu nuu ra, ro'o Timoteo. Nu ni ka ndututu yivi ka kandixia, vasu sava'ni ga ñuu nuu ka skua'a i. Ti taka chaa ka iyo ndoo un, na kakanta'u ndaa da nuu Yandios. Ti na kani'in da nda'a da ichi andivi, ko na kondoo undi ini aña da. Chi tu va'a nu ka iyo iin iin chaa ka kuiti ini nuu jna'an nuu ka jikanta'u da, ko tu va'a un. Ti sia'an kuu ja sa'a taka yivi ka kandixia un nuu ka ndututu i. <sup>9</sup> Na kuajniñu yo ley un nava iyo, ti tu xnda'u yo nanu ka xnda'u chaa un. Ja jini yo ja yivi va'a tu nandi'i i ja xndaku yo ley un nuu i, ko ja kuu yivi ni'in ini, yukan kuu nuu kankuachi ley un siki i. Ja kuu yivi tu ka nchañu'un Yandios, ti ka ka'an ndevel'a i siki jnu'un ya. Suni kankuachi ley un siki i ja sia'an. Suni nu iin yivi na ka'nii i jna'an i xi tata i xi nana i xi ñani jna'an i. Ti ja kuu siki yivi un, kuu nuu ni'in ga kankuachi ley un siki. <sup>10</sup> Suni ja kuu yivi ka yikinchaa jna'an ja ka kixi i jiin inga ñasi'i, xi iin ñasi'i jiin inga chaa. Suni ja kuu iin chaa kixi jiin inga chaa, xi iin ñasi'i ja kuu yivi un suni ni'in ga kankuachi ley un siki i. Suni ja kuu yivi ka xndoña'an ti tu ka siuku i jnu'un ka ka'an i. Suni kankuachi ley un siki yivi un. Sia'an ka sa'a yivi un tijni ga nuu jniñu kue'e, ti ka yisikinchaa i jnu'un Yandios ja sia'an. <sup>11</sup> Ko jnu'un Yandios chi ka'an ndaa kuiti nava iyo, ti

yivi un, chi su'va ka sama i jnu'un ka'an ley Moisés. Chi tu ka chaku ini i nava ka'an jnu'un ni ja'a Yandios nuu Moisés. Ja kuu yivi un chi kankuachi ley un ja'a i. Ti jnu'un ni ja'a Yandios nuu ru'u Pablo kuu iin jnu'un vii xaan ga siki jniñu ña'nú ni sa'a Cristo Jesús ja kuu yo'o naa yo. Maa Yandios kuña'nú ga kuu ja ni ja'a iin jnu'un va'a un nuu ri. Maa ya ni xna'an ru'u ja iyo ndaa ley Moisés, chi tu sa'a siin jnu'un ka'an siki Cristo Jesús, chi iin ni kuu. Ja sia'an kuu ja ka'an ndaa ley Moisés, chi tu kankuachi siki Cristo Jesús.

### *Na kuanta'u yo nuu Yandios ja ni kunda'u ini ya yo'o*

<sup>12</sup> Ru'u Pablo, nakuanta'u ri nuu Jito'o Cristo Jesús, chi ni ja'a ya jnundee ini ru'u, ti na siuku ri taka jniñu ni tatu ya ru'u. Ti nakuanta'u ri nuu Jito'o Cristo Jesús ja ni nakaji ya ru'u ja na kunukuachi ri nuu ya jiin nuu yivi naa i. <sup>13</sup> Undi nuu ni kuu ri iin chaa ni ka'an ndeva'a kuiti siki Cristo Jesús. Ti ni ndikun ri taka yivi ni ka kandixia jnu'un ya, ti ni sa'a kua'an ni sa'a vaji ri jniñu nda'u un. Ko vijnal tukaa ga sa'a ri sia'an, chi ni kunda'u ini ya ru'u, ti ni janka'nú ini ya nuu kuachi ri. Ni jini Yandios ja tu iyo va'a jniñu sa'a ri, vasu maa ri ndo'o ini ri ja iyo va'a iin jniñu ni sa'a ri, vasu kua'an ri nanu iin kuiti. <sup>14</sup> Undi nuu tu ni kandixia ri jnu'un Cristo Jesús, chi ni ka'an ndeva'a ri siki jnu'un un. Ko Jito'o Jesús, ni kunda'u ini ya ru'u, ti ni janka'nú ini ya nuu kuachi ri. Ni nasama ya ini ri ja na naki'in ri ichi maa ya, ti yukan ni kandixia ndaa ri jnu'un Cristo Jesús. Ti sia'an sa ni ndivi ri nuu nda'a maa ya.

<sup>15</sup> Na kachi ri iin jnu'un kanuu nuu ra Timoteo. Ja ni kii Cristo Jesús nuu ñuyivi, ni kii kenchaa ya kuachi yo naa yo, ti maa ri kuu iin chaa ni nchakuachi xaan ga ja kuu nuu ya. <sup>16</sup> Ti jandaa ndixia kuu ja ru'u ni kuu iin chaa ni nchakuachi xaan ga, ko ni ndunda'u ini Cristo Jesús ru'u, ti ni janka'nú ini ya nuu ri. Sia'an ni sa'a ya jniñu ri ja na kotonchaa taka yivi ka kuni kandixia, ti na kuni i ja iyo jnuka'nú ini nuu Cristo Jesús nuu i naa i. Ti yivi na kandixia un, nanita'u i ti kuncha i nuu andivi ja kuu saa ni. Yukan kuu ja ni sa'a ya jniñu ri. Ti vasu nasa ga ka'nú kuachi yo, ko iyo jnu'un ka'nú ini Yandios nuu yo.

<sup>17</sup> Ja yukan kuu ja na kakanta'u yo nuu Tata yo Yandios, chi nini maa iin ni ya kuu ja chaku ja kuu saa ni ti tu naa ya. Kuu ya iin Yandios ja tu kuni yo jniñu nduchi yo, Yaa un kuu ja na kuncha iun yo, chi maa ya kuu ja kuña'nú ga. Ti kancha ya andivi ja kuu tiempu, ti tu ji'i ya. Sia'an na koo.

<sup>18</sup> Ta'u ri jniñu nuu ra ro'o Timoteo, ja kuu ra nanu iin se'e ri. Ti kuni ri ja na xndaku ndaa ra nuu yivi naa i. Sia'an ta'u ri jniñu nuu ra, chi vanuxia ni ka nakaji ñani jna'an yo ro'o ja na sa'a ra jniñu un. Ti suni sia'an ni ka'an Espíritu Santo Yandios ini ñani jna'an yo ja na nakaji i ro'o ja na sa'a ra jniñu un. Ka iyo sava yivi ka xndoña'an, ti jniñu ra kuu ja na xndaku ni'in ra nuu i naa i. Nu sia'an na ki'in ndaa ra jniñu ra, ti kundee ra jniñu un ka ka'an yivi un.

<sup>19</sup> Kundee ra jniñu un chi kandixia ndaa ra jnu'un Cristo Jesús, ti kundee ndixia ra, chi sa'a ra niñu jniñu va'a ja kuni maa Yandios. Ka iyo sava yivi ni ka sana ini, ja ni ka xndoo i ichi Yandios, ti ni ka kandixia i jnu'un xndoña'an. Ka jna'an yivi un nanu iin barco ja nu ni jakunjna'an jniñu iin yuu ti kukue'e. Sia'an ni ka xndoo i ichi Yandios ja ni ka kandixia i undi nuu. <sup>20</sup> Sia'an ni ka jna'an chaa ni ka nani Himeneo jniñu Alejandro. Ko ru'u Pablo, ni sia ri da ja na kivi da nda'a ja'u'u un, ti na kendo ii da, nava jniñu nundo'o un ti na skua'a da ja tukaa ga ka'an ndeva'a da siki jnu'un Yandios. Ja'a ni kuu iin jniñu ta'u ri nuu ro'o Timoteo.

### *Xndaku Pablo ja na kakanta'u yivi naa i*

## 2

<sup>1</sup> Timoteo, na xndaku ri iin jnu'un kanuu ga nuu ra, ja nu ni ka ndututu ra ka skua'a ra jnu'un Yandios, ti kakanta'u nuu ya naa ra, ko ni ini ni añu ra kakanta'u ja na chindee Yandios taka chaa ka kuña'nu, chi maa ya kuu ja chindee taka chaa un naa da. <sup>2</sup> Nakuanta'u nuu Yandios naa ra, chi jandaan kuu ja chindee ndixia ya taka chaa ka kuña'nu un. Kakanta'u naa ra ja kuu taka chaa ka kuu rey jiin taka ga chaa ka ndiso jniñu un nava na kukuee kunchuku yo, ti tu kundikun chaa ka kuña'nu un yo'o, chi ka jika ndaa yo ichi Yandios. <sup>3</sup> Siin ti kundikun ra taka jnu'un xndaku ri nuu ra, chi yukan kuu ja iyo va'a ja kuu nuu maa Yandios. <sup>4</sup> Nini kuu ja na kakanta'u ra nuu Yandios ja kuu taka chaa ka kuña'nu un, chi suni kunda'u ini ya maa da naa da. Ti kuni ya ja na nakuni da jnu'un ya, chi jnu'un un kuu iin jnu'un ndaa nava na keta'u da nuu ya naa da. <sup>5</sup> Ti jnu'un un ka'an ndaa ja iin ni Yandios iyo, ti ja kuu nuu Yandios jiin yo'o naa yo, iyo iin chaa ka'an ja'a yo ja kandichi ma'ñu sava jiin yo nuu Yandios, ti chaa un kuu Cristo Jesú, chi maa ya kuu ja ndiso jniñu ña'nu nuu Yandios. <sup>6</sup> Ti maa iin ni Cristo kuu ja ni kenchaa kuachi yo, chi Yandios ni taji ya Se'e ya ni kii ja na kuū ya ja kuu yo'o naa yo. Sia'an ni sa'a Yandios jiin Se'e ya Cristo Jesú nu ni jaa kivi ni chisojnu'un ya. <sup>7</sup> Ti Yandios ni nakaji ya ru'u ja na stuu ri jnu'un un nuu yivi inga nación ja tu ka yi'i nuu nación Israel. Ni nakaji ya ru'u ja na kuu ri iin apóstol nuu ya. Ti ka'an ndaa ri ja kuu jniñu ndiso ri, ti tu xnda'u ri ro'o. Ni nakaji ndixia ya ru'u ja na kuu ri nanu iin chaa ndichi xini, ti na xna'an ndaa ri jnu'un ya nuu yivi inga nación. Jnu'un un kuu taka jniñu ña'nu ni sa'a Jesú na ni kenchaa ya kuachi yo.

<sup>8</sup> Vijná ti na xndaku ri inga jniñu nuu ra, ro'o Timoteo. Nu ni ka ndututu yivi ka kandixia, vasu sava'ni ga ñuu nuu ka skua'a i. Ti taka chaa ka iyo ndoo un, na kakanta'u ndaa da nuu Yandios. Ti na kani'in da nda'a da ichí andivi, ko na kondoo undi ini añu da. Chi tu va'a nu ka iyo iin iin chaa ka kuiti ini nuu jna'an nuu ka jikanta'u da, ko tu va'a un. Ti sia'an kuu ja sa'a taka yivi ka kandixia un nuu ka ndututu i.

<sup>9</sup> Suni na xndaku ri nuu ra, ro'o Timoteo, ja kuu taka ñasi'i ka kandixia. Na ku'un va'a ña sa'ma ña. Koto ku'un ña sa'ma va'a ja nchaa ya'u xaan. Ni tu naskutu ña ixi xini ña jiin ndajniñu oro xi plata, chi ansu ndututu ña un ja na kotonchaa ñani jna'an ña maa ña ja va'a sa'ma ka ñu'un ña, xi ja vii ka naskutu ña ixi xini ña. <sup>10</sup> Chi nu ka nchañu'un ña Yandios, ko na kava nda'u ini ña jiin taka yivi nda'u, ti ansu ja kondo'o vixi ini ña.

<sup>11</sup> Suni na kachi ri ja taka ñasi'i ka kandixia, nuu ka ndututu ra ja skua'a ra naa ra, ti ña'an un naa ña na kunchuku na'in ña, na kunso'o ña jnu'un Yandios. <sup>12</sup> Chi tu iyo ichi iin ñasi'i ja xndaku ña nuu ro'o chaa naa ra, ni tu ta'u ña jniñu nuu ra, chi na'in na koo ña naa ña. <sup>13</sup> Chi vanuxia undi nuu, xnakan ni sa'a Yandios Adán ti sa ni sa'a ya Eva. <sup>14</sup> Chi Adán tu ni kandixia da jnu'un xndoñia'an un, ko Eva chi ni kandixia ña jnu'un un, ti ni jakunchakuachi siki ña. <sup>15</sup> Ti vasu sia'an iyo, ko ka keta'u ña'an un nuu Yandios naa ña ja ka skaku ña se'e ña, ko nini kuu ja na siin ña jiin jnu'un ndaa nava iyo nuu Yandios. Ti na kava nda'u ini ña jiin taka ñani jna'an ña jiin ja na kondoo añu ña. Ti na sa'a va'a ña taka jniñu ña, chi nuu maa Yandios ka junukuachi ña.

Yukan kuu ja xndaku ra nuu taka yivi ka kandixia ja kuu nuu ka ndututu i, ro'o Timoteo.

**3**

<sup>1</sup> Ru'u Pablo, na xndaku ri inga jnu'un kanuu nuu ra, ro'o Timoteo. Nu iin chaa kuni da kundiso jniñu da ja na koto da yivi ka kandixia, ti va'a jniñu nduku da sa'a da. Ko na xndaku ri nasa koo jiin chaa un. <sup>2</sup> Kuu da iin chaa va'a, iin chaa yiñu'un nava sia'an, ti tu ka'an yivi siki da. Tu kuu kunchaka da uu ñasi'i. Chi su'va na kava yiñu'un da, ti na kaka ndaa da ichi Yandios. Na kuu da iin chaa yiñu'un ti nava na ka'an yiñu'un yivi jiin da. Na kava nda'u ini da jiin yivi ka kandixia ja ka jika ichi, ti na kua'a da ve'e nuu kendo yivi un naa i. Ti vii na xndaku da nuu yivi naa i. <sup>3</sup> Tu kuu da iin chaa ji'i ndixi, ni tu kanaa da jiin yivi. Chi su'va, kuee na kava ini da. Tu kondo'o ini da ja ni'in kua'a da xu'un, ni tu kuu xnda'u da yivi ja na ni'in da xu'un. <sup>4</sup> Na kuu da iin chaa ta'u vij jniñu ini ve'e da. Na xna'an da se'e da ja na kava yiñu'un i, nava vii na kuandatu i nuu da. <sup>5</sup> Chi nu tu jini da nasa ta'u va'a da jniñu ini ve'e da, ¿ti nasa kuu kundiso jniñu da nuu ñani jna'an da ka kandixia nusa? <sup>6</sup> Tu kuu da iin chaa skan kandixia, chi sandau keja'a kani vixi ini da ja sia'an yachi ni nduña'nu da, ti kanakava da nuu kuachi nanu ni jna'an ja'u'u un. <sup>7</sup> Ti suni na kava va'a ini da jiin yivi naa i, ti nava na ni'in da ja yiñu'un da nuu yivi un, nava tu kankuachi yivi un siki da. Sia'an ti tu yu'u da ja kanakava da nuu nda'a ja'u'u un. Yukan kuu jnu'un xndaku ri ja kuu chaa kundiso jniñu nuu yivi ka kandixia un.

*Nava koo chaa kuanukuachi nuu yivi ka kandixia*

<sup>8</sup> Yukan na ti ja kuu chaa kuanukuachi nuu yivi ka kandixia un, na kuu da iin chaa yiñu'un, ja tu yuji kuiti da jiin jnu'un ka'an da. Tu kuu da iin chaa ji'i ndixi, ni tu kondo'o ini da ja ni'in da xu'un jiin jniñu sa'a da un, chi tu va'a. <sup>9</sup> Na nakutu va'a ini da jiin jnu'un kandixia. Ti koto kuñukuu ini da ki'in da uu ichi, chi maa iin ni ichi maa Jesùs na ki'in da. <sup>10</sup> Na kotonchaa yivi maa da. Ti nu jika ndaa da taka nava xndaku ri, nu tu yuji da jiin jnu'un un, yukan na ti na ki'in da jniñu ja na kunukuachi da nuu ñani jna'an yo ka kandixia un. <sup>11</sup> Ti suni ñasi'i da, na kuu ña iin ña'an yiñu'un. Koto ma ka'an ndeva'a ña siki ñani jana'an ña. Su'va na sa'a si'i ña maa ña, ti na kaka ndaa ña jiin jniñu sa'a ña ja kuu nuu ñani jna'an ña. <sup>12</sup> Ti chaa kunukuachi nuu ñani jna'an da un, na kunchaka da iin ni ñasi'i. Ti vii na ta'u da jniñu ini ve'e da. Suni se'e da na kuandatu vii i nuu da. <sup>13</sup> Chi taka chaa ka junukuachi, nu ka jika ndaa da nuu jniñu ka sa'a da, ti yivi ka kandixia un na kua'a i ja yiñu'un maa da. Ti sia'an na kuu ja xndaku kaji ga da jnu'un Cristo Jesùs. Ja'a kuu jnu'un xndaku ri ja kuu chaa kunukuachi nuu yivi ka kandixia.

*Nava iyo jnu'un kandixia yo*

<sup>14</sup> Nd'o'o ini ri ja yachi ni kuaja ri nuu kancha ra, ro'o Timoteo, ko xnanan na chaa ri tutu ja'a nuu ra, <sup>15</sup> nava nu ni kukuee rijaar i, ko ja jini ra nasa kaka ndaa ra ichi Yandios nuu ñuyivi ja'a. Yo'o ja ka kuu yo yivi Yandios chaku, ka kuu yo nanu ve'e maa ya. Chi nanu kukutu ve'e jiin yuu un, suni sia'an kukutu yivi ya jiin jnu'un ndaa Yandios. <sup>16</sup> Ja sia'an na ti ni ka jini yo ja taka jnu'un ni ka kandixia yo un kuu maa jnu'un ndaa. Ka'an jnu'un un:  
Ja kii nuu ñuyivi nanu iin yivi sia'an ni.

Ti ni xna'an kaji Espíritu Santo ja kuu ya iin Yaa ii, chi tu ni iyo kuachi ya nanu yo'o naa yo.

Ti ni jichanuu jnu'un ya nuu taka nación, ti ni ka jini yivi jnu'un ya, ti sa ni ndaa ya kuano'on ya nuu andivi.

*Inga kivi ti kusiin yivi ichi Yandios*

## 4

<sup>1</sup> Ru'u Pablo, na xndaku ri nuu ra Timoteo nava ni kachi Espíritu nuu ri. Ni kachi kaji Espíritu un nuu ri ja jaa iin kivi ti kekoyo kua'a tachi xaan, ja ka kuu mani espíritu xaan, ti xnda'u yivi naa i. <sup>2</sup> Ti chunso'o i jnu'un ka'an chaa ka xndoña'an un, chi tukaa ga ka iyo kaji inijnuni chaa un naa da. Ni ka kusiin da ichi Yandios, chi ni ka nandeokava ini da. <sup>3</sup> Sia'an xnda'u da yivi ti kachi da ja tukaa ga kuu nanda'a yivi naa i. Ti suni kachi da ja tukaa kuu kaji yivi tijni nuu ndeyu. Ko tu ni kachi Yandios sia'an, chi maa ya ni sa'a taka un. Ti su'va ni kachi ya ja kuu nanda'a yo naa yo, ti suni kuu kaji yo taka nuu ndeyu nu na nakuanta'u yo nuu maa ya ja kuu nuu taka un. <sup>4</sup> Chi taka ni ja ni sa'a Yandios kuu ja va'a, ti tu kachi yo ja skexiko yo ni iin un. Chi su'va na nakuanta'u yo nuu ya nu ni ni'in yo. <sup>5</sup> Taka un ni ja'a ya nuu yo ja ka kuu yo se'e ya, ti ninii kuu ja na nakuanta'u yo nuu ya ja kuu nuu iin ja kaji yo, chi maa ya xiin.

*Na kuanukuachi ndaa yo nuu Cristo Jesús*

<sup>6</sup> Na siin ri xndaku ri nuu ra, Timoteo. Ti sia'an kuni ri ja na xndaku ra nuu ñani jna'an yo, yivi ka kandixia jnu'un Cristo Jesús, nava tu naa ini i taka jnu'un un. Nu sia'an na sa'a ra ti junukuachi ndaa ra nuu Jito'o Cristo Jesús. Sia'an ka'an ri jiin ra ti chaku ndi'i ini ra nava ka'an jnu'un un, chi undi nuu ni kandixia ndaa ra. <sup>7</sup> Ja sia'an kuu ja koto sa'a ra nava nuu jnu'un ka ka'an yivi ñuyivi ja'a, chi ka jani da jnu'un nava ni ka sa'a yivi Israel jana'an, ko tu yoso jnu'un un nuu tutu Yandios. Chi mani ka xnda'u da yivi naa i, ti ka kandixia i jnu'un ka ka'an da. Ko maa ra, koto sa'a ra jniñu yukan. Ro'o kuu ja kukutu ini ra ti kaka ndaa ra ichi Yandios. <sup>8</sup> Ti nava sia'an na koo jnu'un ndee ini yiki kuñu ra, ti na kuu ndee ini ra ti kuu kutu ini ra jiin jnu'un Yandios. Chi yukan kuu ja ja'a jnundee ini ro'o vijna ni chaku ra. Ko su'va ndusii ga ini ra nu na jaa kivi najaa ra nuu kancha maa ya. <sup>9</sup> Ti jandaa ndixia kuu jnu'un un chi sia'an sa kuanukuachi ndaa yo nuu Yandios jiin ni ini ni aña yo. <sup>10</sup> Vasu na kondo'o yo taka jnu'un ndeva'a ka'an yivi siki yo, vanuxia ni ka kandixia ndaa yo maa Yandios chaku. Ti maa Yandios chaku kuu ja nama siki yivi ñuyivi ja'a, ko ansu tendi'i, chi ninii yivi ni ka kandixia Cristo ni. Ti yivi yukan kuu ja keta'u i nuu ya naa i. <sup>11</sup> Yukan kuu jnu'un xndaku ri nuu ra, ro'o Timoteo, chi kanuu ja na xna'an ra yivi naa i.

<sup>12</sup> Koto kua'a ra jnu'un ja kuu ichi ini yivi nde'e i ro'o vasu kaa suchi ra. Chi maa ra kuu ja na kaka ndaa jiin jnu'un un. Ti sia'an na koo ndoo jnu'un ka'an ra, nava yukan na nde'e ti na kotonchaa yivi naa i ja kuu ra iin chaa yifi'un, ti ñu'un nda'u ini ra. Kava va'a ini ti kaka ndaa ra, ti koto ma kondo'o ini ra iin jniñu kue'e. Chi su'va kava yiñu'un jiin taka yivi ka kandixia un. <sup>13</sup> Kuni ri jaa ri, ko ni kuu kuee ri, ti ro'o sa'a taka jniñu kanuu ga ja iyo nuu kancha ra jña. Ti koto naa ini ra ka'u ra tutu Yandios nuu yivi ka kandixia un nu ni ka ndututu ra jiin i. Xndaku nuu i ja na siin i ichi Yandios, ti nava sia'an na chaku va'a ga ini i jnu'un Yandios. Yukan kuu ja sa'a ra jiin ñani jna'an yo, ti sa na jaa ri. <sup>14</sup> Koto ma naa ini ra sa'a jniñu nava ta'u ni ja'a Yandios nuu ra ja na ka'an ra jnu'un ya. Chi taka chaa ña'nua ka ndiso jniñu nuu yivi ka kandixia un ni ka chuxndee da nda'a da xini ra. Ti ni sa'a Yandios ja na kachi da ja sia'an kundiso jniñu ra. <sup>15</sup> Kukutu ini jiin taka jnu'un xndaku ri nuu ra ja'a, ti jiin inijnuni ra xndaku vii ra nuu yivi naa i. Nu sia'an ni'in na xndaku ra jnu'un un, ti yukan na kotonchaa yivi naa i ja ni'in kua'an ra jiin jniñu va'a un. Ti yukan kuu iin jnu'un kanuu ga ja xndaku ri nuu ra, Timoteo.

<sup>16</sup> Koto va'a ra maa ra nava kuncha ra. Kava yiñu'un ra ti xndaku vii ra nuu taka yivi ka kandixia un. Chi nu na sa'a ra taka un, ti keta'u ra nuu Yandios jiin taka yivi ni ka chunso'o jnu'un ka'an ra un.

## Nava koo jnu'un ka'an yo jiin yivi ka kandixia

### 5

<sup>1</sup> Ru'u Pablo, na kachi ri nuu ra Timoteo, nava xndaku ra nuu ñani jna'an yo naa i. Koto ma kanajjiin ra nuu iin chaa ña'nu iyo nuu yivi ka kandixia un, chi su'va xndaku vii ra nuu da nanu ja kuu da tata ra. Ti suni xndaku nuu chaa kuachi un nanu nuu iin ñani maa ra. <sup>2</sup> Suni sia'an xndaku ra nuu ña'an ña'nu un nanu nuu nana ra, ti suni sia'an nuu ña'an kuachi un. Xndaku nuu ña nanu nuu kua'a maa ra, ko na koo ndoo aña ra hora xndaku ra nuu ña naa ña.

<sup>3</sup> Ka'an yiñu'un ra jiin tak a ña'an ni ka kendo maa iin ña. Ti chindee ña'an un naa ña nu tu iin iin jna'an ña ja koto nda'u maa ña. <sup>4</sup> Ti nu iin ña na kendo maa iin ña, ko nu iyo se'e ña xi se'e chani ña, ti se'e ña un kuu ja na koto va'a maa ña. Chi nu na sa'a da sia'an naa da, ti yukan kuu ja ka nachunaa da ja ka tau da nuu tata da jiin nuu nana da, chi ni ka jito va'a yivi ña'nu un kivi ni ja'nlu lulu da ja ka kuu da se'e i. Nu tak a jniñu un na siuku yo, ti yukan kuu ja kanuu ja kuu nuu Yandios. <sup>5</sup> Ti nu iin ña'an ni kendo maa iin ña, ja ni kendo nda'u kuiti ña, ja tukaa ga ni iin jna'an ña ja koto maa ña. Ko nu iyo ndaa ini ña jiin jnu'un Yandios, ti siuku ndaa ña tak a jnu'un un, ti kuu nduu kuu ñuu jikanta'u ña nuu Yandios. Ti ja kuu ña'an un na chindee Yandios maa ña. <sup>6</sup> Ko nu ka iyo ña'an ja tu ka siuku va'a ña jnu'un Yandios, ti ñaa yukan jikonuu ña jiin jnu'un sii ini ja yisikinchaa ña maa ña jiin chaa. Ti ña'an un kuu ña nanu iin ndiyi ja tukaa chaku, chi ni naa ini ña Yandios. <sup>7</sup> Taka jniñu un xndaku ni'in ra nuu yivi, ro'o Timoteo, ti nava na kuandatu i tak a jnu'un ja'a. Ti sia'an tu ka'an yivi siki yo ja tu ka xndaku yo nuu ña'an ni ka kendo nda'u. Nu na kuandatu ña jnu'un un, ti tu nini kuu ja kani nduxaan yo nuu ña naa ña. <sup>8</sup> Ti nu iyo yivi kandixia ja tu jini da nasa koto va'a da maa da ini ve'e da jiin se'e da jiin ñasili da, ni tu jito nda'u da ñani jna'an da, ti yuji ga yivi un ja sa'a i sia'an ansu yivi tu ka kandixia.

<sup>9</sup> Sia'an na jankoso sivi ña'an ka kuu ña'an ni kendo maa iin un nuu tutu, ña'an ka'iin uni xiko kulya xi vi'ga. Ko nu iin ni yii ña ni iyo, ti tu ni jikonuu ña jiin inga chaa ja siki jnu'un sii ini un. <sup>10</sup> Nu ka ka'an va'a yivi siki ña ja kuu ña iin ña'an va'a jaan taka jniñu sa'a ña, nu ni skua'nu va'a se'e ña, suni nu ñunda'u ini ña jiin yivi ka jikonuu, nu ka junukuachi ni ini ni aña ña nuu taka ñani jna'an ña ja ka kandixia, ti suni nu ka chindee ña tak a yivi ka jna'an sava'ni ga nundo'o, xi sava'ni ga na inga ni jniñu ni ka sa'a ña, nu ka iyo ña'an maa iin ka ñunda'u ini ña sia'an, ti na jankoso sivi ña nuu tutu.

<sup>11</sup> Ko koto chiso ra tak a ña'an ni ka kendo suchi un nuu tutu, chi siki ja ni ka iyo suchi ini ña ti kondo'o ini ña nanda'a tuku ña, ti jiin yukan ti naa ini ña jnu'un ni chisojnu'un ña nuu Cristo, chi ñukuu ini ña ja nanda'a tuku ña. <sup>12</sup> Yukan na ti nchakuachi ña ja siki ja tu ni siuku ña jnu'un ni chisojnu'un ña. <sup>13</sup> Ko vi'i ga nu ka iyo ña'an ka jikonuu tak a ve'e, ti ka ndee kuxi ña. Ko ansu nini kuxi ña, chi jikonuu ña jiin jnu'un kue'e. Ka'an ña siki ñani jna'an ña tak a jnu'un ja tu nijníñu. <sup>14</sup> Yukan kuu ja na xndaku ri nasa kuu jiin tak a ña'an un naa ña. Va'a ga ja na nanda'a tuku ña ti na koo se'e ña naa ña, ti nava na kuu ña iin ña'an kinda'a va'a ve'e ña. Sia'an na kuu jiin ña'an un naa ña nava tu ka'an inga yivi siki ña naa ña. <sup>15</sup> Sia'an na kachi ri, chi ka iyo tijni ña'an ja ni ka nandeokava siki jnu'un Yandios, ti ka ndikun ña jniñu sa'a ja'u'un.

<sup>16</sup> Ja kuu nuu tak a yivi ka kandixia un, nu ka iyo iin ña'an ni kendo maa iin ini ve'e i, ti kanuu ja na koto i ña'an un, nava tu kua'a i nundo'o ñani jna'an i ja koto i ña'an un. Ti nava sia'an na kundee yivi un chindee i na'an ja ni ka kendo nda'u xaan ga. Chi nda'u xaan ga, yukan kuu ja ka nandi'i ga ja na chindee ga yo. Sia'an na xndaku ri nuu ra nava koo jiin tak a un naa ña.

<sup>17</sup> Inga jniñu xndaku ri nuu ra ja kuu chaa ka ndiso jniñu nuu yivi ka kandixia un, nava na ni'in ga da ja yiñu'un da, nu vii na xndaku da. Ti vii xna'an da jnu'un Yandios nuu ra naa ra, ti suni sia'an kua'a ra ja yiñu'un da chaa un naa ra. Ti chindee ra jiin ja kaji da naa da. <sup>18</sup> Chi sia'an ka'an jnu'un Yandios: "Tu chu'un yo ñunu yu'u xndiki yo nu kaa jitu ti." Ti suni kachi tutu Yandios: "Na cha'u yo nuu chaa sa'a jniñu", kachi. Ja sia'an kuu ja kua'a ja yiñu'un chaa ka ndiso jniñu nuu yivi ka kandixia un naa ra.

<sup>19</sup> Yukan ti koto sa'a ra nava jnu'un ka ka'an yivi nu ka kankuachi i siki in chaa ndiso jniñu un, nu tu ka iyo uu xi uni yivi kua'a jandaa siki da. <sup>20</sup> Ko ja kuu in chaa ndiso jniñu un, nu nau in kuachi na sa'a da, nduxaan nuu da. Kuni ja na nduxaan ra nuu chaa ña'nú un, nava na nakuni da kuachi da. Ko nduxaan ra nuu chaa un nuu ka ndututu taka chaa ka ndiso jniñu un nava sia'an ti na yu'u uu ga chaa un naa da, ti tukaa ga siin da sa'a da kuachi. <sup>21</sup> Sia'an na xndaku ri ja kuu chaa ka ndiso jniñu un, ti sia'an siku ra taka jnu'un xndaku ri ja'a, ro'o Timoteo. Chi yukan ti ja jini va'a maa Yandios jiin Cristo Jesúus jiin taka tajnu ya ja ka nani ángel, chi ka junukuachi tajnu un nuu ya. Ja yukan kuu ja suni kanuu ja na kuandatu ra nava ni xndaku ri ja kuu chaa ña'nú un naa da. Kava in nuu ini ra chi in ni ka kuu taka chaa ka ndiso jniñu un.

<sup>22</sup> Nu na nduku ra in chaa kundiso jniñu nuu yivi ka kandixia un, ko tu nakaji yachi ra chaa un. Chi nu na kuña'nú in chaa ja tu ja'i kujnuni va'a ini da jnu'un Yandios, ti yuji da sa'a da in kuachi. Ti suni undi ro'o ja ni ja'a jniñu nuu chaa un, kunchakuachi ra. Ja sia'an kuu ja koto va'a maa ra ja jiin jniñu un nava tu chakuachi ra maa ra.

<sup>23</sup> Ti siki ja nuu nuu ku'u ra, ti na xndaku ri nuu ra Timoteo. Tu kua'a ini ra ja ko'o ra nini nducha ni, chi suni kuu ko'o ra ti'lí vino ja na kuu tajna ini ra.

<sup>24</sup> Na xndaku ri nuu ra nasa kuu nakaji ra chaa kundiso jniñu nuu yivi ka kandixia un. Kuee ti'lí ki'in ra, chi ka iyo chaa ja tu jini yo nu iyo kuachi da xi tuu. Yo'o tu jini yo nau in kuachi da iyo, ko kuee ga ti sa kuni yo. Ja yukan kuu ja va'a nde'e ra nau in chaa nakaji ra ja na kundiso in jniñu ña'nú un.

<sup>25</sup> Ti chaa va'a un naa da, chi ndijin ni nde'e yo taka jniñu va'a ka sa'a da. Ti tu jini yo nau inga jniñu sa'a da, ko kuee ti'lí ga ti sa kuni yo. Chi taka jniñu va'a un tu kuu jankisa'yí, ti undi taka jniñu kue'e un kenda nuu ndijin. Yukan kuu ja xndaku ri nuu ra Timoteo, ja na nde'e va'a ra nau in chaa nakaji ra ja na kundiso jniñu ña'nú un.

## 6

<sup>1</sup> Inga jnu'un xndaku ri nuu ra Timoteo, ja na xndaku ra nuu chaa ka kuu muzu ja tu ka kinya'u. Na kava yiñu'un da jiin jito'o da nava tu ka'an ndeva'a yivi siki sivi Yandios jiin jnu'un Cristo Jesúus, chi yukan kuu jnu'un ka xna'an ru'u naa ri, ja ka kuu ri apóstol. <sup>2</sup> Muzu ja tu kinya'u un, ka junukuachi da nuu in chaa ja suni kandixia jnu'un Cristo Jesúus, ti koto ma sa'a ni'in ini da nuu chaa un vasu kuu da in chaa kandixia Cristo. Na kunukuachi yiñu'un da nuu jito'o da, ti su'va na sa'a yiñu'un ga da maa da. Ti sia'an na kunchuku mani da, chi in ni ka kuu da nuu Yandios.

Ja'a kuu ja xndaku ri, ti xna'an ra jnu'un ja'a nuu yivi naa i.

### *Jniñu sa'a yo ja na koo sh iniyó*

<sup>3</sup> Na xndaku ri nuu ra Timoteo, nu ka iyo inga yivi ka xna'an jnu'un xndoña'an ja tu kejna'an jiin jnu'un Jito'o Jesúus, ya kuu Cristo, nava ka kandixia yo, chi tu xndaku ndaa da jnu'un Jesúus ja maa ya kuu Cristo, nava ka'an Yandios. Ti va'a kotonchaa ra yivi un, chi su'va ndoo na kava ini yo jiin jnu'un Jesúus, ya kuu Cristo, ja ka iyo ndaa aña yo. <sup>4</sup> Ti chaa xndoña'an un,

chi kuu da iin chaa vixi ja tu chaku kuiti ini da. Yukan kuu nanu iin kue'e ja kande ini da, chi nin'i ka'an da jnu'un kue'e. Ti jajna'an ini da ka'an da jnu'un chaa hebreo jana'an, ka jankuncha da ka ka'an da, ti keja'a ka kuu kuasun ini nuu jna'an da, ti ka ka'anchaa jna'an da, ti tukaa iyo jnu'un mani ini nuu jna'an da. <sup>5</sup> Ti ka kanaa da jiin yivi tu ka iyo va'a inijnuni, yivi tu ka chaku ini jnu'un ndaa, chi undi nuu ni ka keja'a yakua da jiin jnu'un Jesú, ya kuu Cristo. Ti tu ka ndikun ndaa da jnu'un Yandios, chi ka nd'o'o ini da ja jiin jnu'un un ti tava da xu'un. Ti na kachi ri nuu ra ja koto ma kejna'an ra jiin yivi un naa ra. Kundikun ndaa ra jnu'un Yandios naa ra, ti ansu ja kondo'o ini ra ja ni'in ra xu'un.

<sup>6</sup> Jandaan ndixia kuu ja xu'un un kuu iin ya'u, ko va'a ga ja na kuandatu yo nuu Yandios ti ansu ja kuñukuu ini yo kuñava'a yo xu'un. <sup>7</sup> Chi vichi lii yo ni kaku yo nuu ñuyivi ja'a ti suni sia'an kivi kuū yo. Tu ndoo ki'in yo jiin chi nanunda'a ni yo ti kua'an yo. <sup>8</sup> Ko nu ni'in yo ti'l'i ja kuchaku yo jiin iin sa'ma kundii yo, ti jiin yukan na koo sii ini yo. <sup>9</sup> Ti tu kondo'o ini yo ja kuu riku yo nuu ka nd'o'o ini sava yivi ja kuu riku i. Ko tu ka ni'in jna'an i, chi jiin inijnuni ñaa un ti ka yuji i, ti ka kanakava i nuu nundo'o, ti vi'i ga ka jna'an i, ti ka xnaa i jniñu i. <sup>10</sup> Chi ja ka nd'o'o ini i ja na ni'in i xu'un, ti su'va ka xnaa i maa i jiin yukan, ti tukaa ga ka kuni i kundikun i ichi Yandios, ni tukaa ka kandixia ndaa i Jesú. Ja sia'an ti kii xaan nundo'o nuu i ja kuu taka ga kivi na kuchaku i ja sia'an ka nd'o'o xaan ini i kuñava'a i xu'un un.

### Taka jniñu sa'a yo ja ka ñukuu ini yo Cristo

<sup>11</sup> Ru'u Pablo, na xndaku ri nuu ra ro'o Timoteo, ja koto nde'e ra ti koto sa'a ra nava jniñu ka sa'a yivi un. Siin nava kua'an ra chi sia'an ni nakaji Yandios ro'o ja na kunukuachi ra iin jniñu ñ'a'nu un nuu ya, ti sa kundikun ndaa ra ichi ya, ti kuñukuu ini taka jnu'un ya. Kuandatu ti kandixia ndaa jnu'un ya, ti ni ini ni aña ru siuku taka jniñu ta'u ya nuu ra nava na kundee ini ra. Ko kava kuee ini ra jiin taka jniñu sa'a ra, chi vanuxia kandixia ndaa ra jnu'un Cristo Jesú. <sup>12</sup> Chi ja sia'an ti ja ñukuu ini ra nava ni ki'in ra ichi ya, ti yukan siin ra ko ni ini ni afu'ra raka ra ichi ya undi na jaa kivi kuū ra, ti no'on ra undi andivi nuu kuncha ra jiin Yandios, ti tukaa ga kuū ra. Chi siki yukan kuu ja ni nakaji ya ro'o ja ni kachi ra, ti ni stuu ra iin jnu'un nuu yivi kua'a ni ka ñuso'o. Chi ni kachi ra nuu yivi un ja ni kandixia ndaa ra jnu'un Cristo Jesú. Jiin taka jniñu ni sa'a ya, ni chisojnu'un ra ja siuku ndaa ra taka jnu'un un, ti yivi ni ka ñuso'o un, suni kua'a i jandaan. Naxndaku ri jnu'un ja'a nuu ra Timoteo nava kuni maa Yandios, chi maa ya sa'a ja ka chaku yo.

<sup>13</sup> Ti suni xndaku ri nuu ra nava kuni maa Cristo Jesú, chi ni kachi ndaa ya nuu chaa ni kuña'nu ni nani Poncio Pilato, ti tu ni yu'u ya ka'an ya, chi ni kachi ndaa ya jnu'un un. <sup>14</sup> Ja sia'an kuu ja kuandatu jniñu ta'u ri nuu ra, chi ka'an ndaa kuiti ri, ti tu kuu nasama ra jnu'un un, chi ka'an ndaa kuiti ri, ti tu kuu nasama ra jnu'un un, chi tu xnda'u ri. Ti sia'an kuandatu, ti siuku ra taka jnu'un un undi na jaa kivi nchaa maa Jito'o Jesú, ya kuu Cristo, ya ndiso jniñu ña'nu nuu Yandios. Sia'an na koo ti koto ma yuji ra, nava tu ka'an yivi siki ra. <sup>15</sup> Chi nu na jaa kivi un ti Yandios siuku ya jnu'un ja'a, ti taja ya Se'e ya Cristo Jesú, chi maa iin ni Tata yo Yandios kuu ya kuña'nu xaan nuu ni tu'u ñuyivi. Ti maa iin ni Yandios iyo ja kuu nuu taka ga chaa ka kuña'nu. Ti suni maa iin ni Yandios kuu ja ta'u jniñu nuu taka chaa ka ndiso jniñu nuu ñuyivi ja'a. <sup>16</sup> Maa iin ni Yandios kuu ja tu ji'i, chi chaku ya sia'an ni jakuu saa ni, ti taja ii nuu kancha ya ja ni tu kuu tu'va iin yivi nuu ya, ti ni iin yivi tu ka jini nuu ya. Ti yo'o na kunchañu'un yo ya taka kivi, chi maa ya kuu ja ta'u jniñu nuu ñuyivi ja kuu saa ni. Ti sia'an na koo.

<sup>17</sup> Ti ro'o Timoteo, xndaku ra nuu yivi riku kanchuku nuu ñuyivi ja'a. Kachi jiin da ja koto kava vixi ini da iin ndajniñu kua'a ka ñava'a da, ti ni koto kundiyo ini da nuu xu'un un, chi tu ni'in jniñu, ti ni tu nama un maa da. Xndaku nuu da ja na kuñukuu ini da Yandios, chi maa ya kuu ja kua'a ja kuchaku yo. Ja'a ya taka ja nandi'i yo, ti sia'an na koo siñ ini yo jiin taka ja ja'a ya nuu yo taka kivi. <sup>18</sup> Sia'an xndaku ra nuu yivi riku un, ti nava na sa'a i taka ja va'a, ti na nde'e i nasa chindee i ti'lí taka yivi nda'u un. Na tejna'an i jaku xu'un ka ñava'a i un nuu yivi nda'u. <sup>19</sup> Nu na sa'a i taka un ti sia'an ka nakaya i ta'u i nuu andivi, chi nde'e Yandios taka jniñu ka sa'a i nuu ñuyivi ja'a. Ti nu na jaa kivi ja najakoyo i nuu andivi, ti yukan nanita'u i nuu Yandios ja tukaa ga kuñ i.

*Jnu'un sandi'i ni ga ni tatu Pablo nuu Timoteo*

<sup>20</sup> Ro'o Timoteo, ja'a na xndaku xaan ri nuu ra ja na koto va'a ra taka jnu'un jini ra siki Jito'o Jesús, ya kuu Cristo, chi ndi'i jnu'un un chaku ini ra. Ti suni sia'an xndaku ra nuu yivi ka kandixia un ti nava tu kivi nduu i inga ichi ja tu kejna'an jiin jnu'un Yandios. Ti koto sa'a ra nanu sa'a yivi ka sakanuu jnu'un ndaa jiin jnu'un xndoña'an un, chi ka ka'an i nanu ja ka iyo xaan inijnuni i, ko tu ni'in jniñu un, chi so ka xnda'u i jiin jnu'un ka ka'an i un. <sup>21</sup> Chi ka ka'an i ja ka iyo tu'va inijnuni i, ko tu ka kandixia ndaa i jnu'un Yandios jiin taka jniñu ni sa'a Cristo Jesús, chi ni ka kivi nduu i ichi kuankoyo i.

Ka'an ri ja na sandee ini ra naa ra. Na chindee chituu Yandios ro'o ti na kunda'u ga ini ya maa ra naa ra. Ti sia'an na koo.

## Tutu kuu uu ni chaa Pablo nuu Timoteo

<sup>1</sup> Ru'u Pablo, kanxia'u ri jiin ra Timoteo, ja na sandee ini ra. Kuu ri apóstol nuu Cristo Jesú, chi sia'an ni tatu ya jniñu un nuu ri, nava ni kachi maa Yandios ja na kachanuu ri jnu'un Cristo Jesú. Ti ka'an ri iin jnu'un ndaa ja taka yivi ka yi'i nda'a Cristo Jesú, ti kuchaku i ja kuu saa ni, chi sia'an ni chisojnu'un Tata yo Yandios. <sup>2</sup> Ti chaa ri tutu ja'a nuu ra Timoteo, chi kuu ra nanu iin se'e ri. Na chindee chituu Tata yo Yandios ro'o. Maa Jito'o Jesú na kunda'u ga ini ya maa ra, ti nava sia'an na kukuee kuncha ra.

### *Ja na ka'an ndaa Timoteo jnu'un Cristo Jesú*

<sup>3</sup> Ru'u Pablo, nini nakuanta'u ri nuu Yandios ja kuu ro'o Timoteo, chi vanuxia kandixia ndaa ra Cristo Jesú. Nuu maa Yandios kuu nu nakuanta'u ri, chi suni nuu maa ya ni ka junkuachi chaa ni ka kuu jna'an ri undi na jana'an. Junukuachi ri nuu Yandios jiin ni ini ni añu ri. Ti taka kívi jikanta'u ri nuu ya, ti nini nuku'un ini ri ro'o Timoteo. Ti jikanta'u ri ja na kua'a ya taka ja na kumani nuu ra. <sup>4</sup> Kunda'u xaan ini ri ro'o, chi nini nuku'un ini ri na ni nde'e ra kívi kua'an ri. Ti kuni ri ja na nakuni jna'an tuku yo nava sia'an na ndusii xaan ini ri. <sup>5</sup> Nini nuku'un ini ri nava ni kandixia ndaa ra jnu'un Cristo Jesú. Xnakan ni keja'a kandixia vela ra Loida jiin nana ra Eunice, ti nd'o'o ndixia ini ri ja suni sia'an kandixia tu ro'o. Ja yukan kuu ja nini nakuanta'u ri nuu ya ja kuu maa ra.

<sup>6</sup> Ti ru'u Pablo, xndaku ri nuu ra Timoteo, ja na kuajniñu va'a ra iin ta'u ni ja'a Yandios nuu ra, ja na ka'an ra jnu'un ya. Ti ta'u yukan kuu ja ni ni'in ra na ni chuxndee ri nda'a ri xini ra. Ka'an ri ja na siuku ra jniñu ni ja'a Yandios nuu ra. <sup>7</sup> Koto yu'u ra, chi tu ni sa'a kui'ya Yandios ini yo ja na yu'u yo nde'e yo yivi. Chi su'va ni sa'a ya ja na kuu ndee ini yo. Ni ja'a ya Espíritu Santo ja na kuandatu yo na jniñu ta'u ya nuu yo, ti na kunda'u imi yo ñani jna'an yo. Ni ja'a ya Espíritu ja na kondo'o ndaa ini yo nava na kaka yo ichi ya. Yukan kuu iin ta'u ni ja'a ya nuu ro'o Timoteo.

<sup>8</sup> Koto kukanuu ra ka'an ra jnu'un Jito'o Cristo Jesú. Ni tu kukanuu ra ndakuni'in ra ru'u Pablo, vasu kande ri vekaa siki ja ni xna'an ri jnu'un Cristo. Su'va kuanta'u taka nundo'o un, chi suni sia'an ndo'o ri ja siki jniñu un, ti ndinduu yo ka ndiso jniñu ja na ka'an yo jnu'un Yandios ja kuu Cristo Jesú. Ni ini ra ka'an ra jnu'un Cristo, ti maa ya na kituu ro'o vasu na koo ndo'o koo nene ra. <sup>9</sup> Jandaa ndixia un chi maa Yandios ni nama ya yo'o, ti ni sasiin ya yo'o ja kuu maa ya. Ni sandoo ya yo'o nava na kandixia yo jiin ni ini ni añu yo. Chi kuni ya ja na kaka yo ichi ya nuu ñuyivi ja'a. Tu ni nama ya yo'o siki ja va'a ni ka sa'a yo, chi so ja ni kuu ini ga maa ya, ti ni ndunda'u ini ya yo'o undi na ti xnukoo ga ya ñuyivi, ti ja ni nakaji ya yo'o ja na nanita'u yo nuu ya. Ti ni suku ya nava kuni ya, chi ni taji ya Se'e ya Cristo Jesú ja ni sa'a ya iin jniñu ña'nua ja ni chunaa ya nuu kuachi yo. <sup>10</sup> Ni stuu ndijin Yandios ja mani ya jiin yo, chi ni kii Se'e ya Cristo Jesú ja ni kii nama ya yo'o. Ni ji'i Jesú ko ni nandoto tuku ya. Tu ni kendo ya ma'ñiu ndiyi un. Ti yukan chaku ini yo ja suni kundee yo ki'in yo andivi. Vasu na kuū yo ko nandoto tuku yo. Ti yukan kunchuku yo ja kuu saa ni ja tukaa kuū yo.

<sup>11</sup> Maa Yandios ni nakaji ya ru'u ja ka'an kají ri jnu'un un. Ni taji ya ru'u ja na kundiso ri jniñu apóstol, ti na sa'a ri jniñu un, ja xna'an ri jnu'un Cristo Jesú nuu yivi inga nación ja tu ka yi'i jiin nación Israel. <sup>12</sup> Sia'an ndo'o nene

ri. Ko tu kukanuu ri vasu kondo'o ri taka nundo'o un, chi ni ini ni aňu ri kandixia ri Cristo Jesú. Tu kukanuu ri vasu na koo ndo'o koo nene ri, chi ñukuu ini ri ja maa Yandios na koto va'a ya ru'u jiin jniňu ni ja'a ya nuu ri. Ñukuu ini ri ja sia'an koto va'a ya taka un undi vijna ti undi na jaa kiví nchaa tuku Cristo. Taka yukan sa'a Yandios nava na kuichanuu jnu'un Cristo Jesú.

<sup>13</sup> Ro'o Timoteo, siuku ndaa taka jnu'un ni xndaku ri nuu ra, ti taka jnu'un un xndaku ra nuu taka ñani jna'an yo yukan. Kundikun ndaa ra jnu'un un, ti kunda'u ini ri nuu ñani jna'an yo ja ka yi'i jiin Cristo Jesú, suni sia'an nanu ni kunda'u ini Jesú maa yo. <sup>14</sup> Koto va'a ra jnu'un Cristo Jesú nava tu sakanuu ñinga jnu'un ja tu kejna'an jiin jnu'un ndaa. Na chindee Espíritu Santo ro'o nava na kuu, chi kancha Espíritu Santo jiin yo.

<sup>15</sup> Ja jini ra Timoteo, ja iyo yivi ka kandixia Jesú kanchuku i ñuu Asia, ti yivi un tu ni ka ka'an va'a i siki ri. Ti ni ka xndoo i ru'u nanu ni ka sa'a Figelo jiin Hermógenes.

<sup>16</sup> Ko ja kuu Onesíforo, jikanta'u ri nuu Yandios ja na chindee ya yivi kanchuku ini ve'e da, ti na kunda'u ini ya maa da, chi tijní jinu ni kinde'e da ja kande ri presu, ti ni chindee da ru'u. Tu ni kukanuu da vasu kande ri vekaa. <sup>17</sup> Chi su'va ni nanduku ni ini da ru'u, na ni chaa da ñuu Roma ja'a, undi ni nani'in da nuu kande ri. <sup>18</sup> Jikanta'u ri nuu Yandios nava na kunda'u ini Jito'o Jesú maa da ja kuu kiví na nchaa tuku ya. Ti ro'o Timoteo, ja jini va'a ra nasa ni janukuachi da nuu yivi naa i ñuu Efeso. Yukan kuu iin jniňu va'a ni sa'a Onesíforo.

### *Ka kuu yo nanu soldado nuu Cristo Jesú*

## 2

<sup>1</sup> Ro'o Timoteo, chaa ri tutu ja'a nuu ra ja kuu ra nanu iin se'e ri. Ti ja'a na xndaku ri nuu ra ja kuu siki jniňu kundiso ra. Ka'an ri ja na chindee maa Yandios ro'o nava jiin ni ini ni aňu ra kaka ndaa ra nuu ichi maa ya. Jandaan dixia kuu un, chi maa se'e ya, ya kuu Cristo Jesú, ni jiňa ya ichi un. Ja ka yi'i yo nda'a ya ti maa ya na chindee chituu yo'o naa yo. <sup>2</sup> Ja ni xndaku xaan ri nuu ra undi nuu, ti nde kua'a yivi ni ka jiniso'o un, ka nakua'a i jandaa ja iyo va'a jnu'un Cristo Jesú un. Vijnna ti ro'o Timoteo, kuni ri ja na kua'a ra jnu'un Cristo Jesú un. Vijnna ti ro'o Timoteo, kuni ri ja na kua'a ra jniňu un nuu uu ga chaa va'a, ja ka jika ndaa ichi Yandios, nava na ni'in da jnu'un ka'an da, ti na xna'an da jnu'un Jesú nuu ñinga yivi.

<sup>3</sup> Vijnna ti na xndaku ri nuu ra Timoteo nasa kuu sa'a ra jniňu ja kuu nuu Jito'o Cristo Jesú. Sa'a ra jniňu un nanu iin soldado nu ja iyo tu'va da ja ki'in da nuu iyo iin nundo'o. Ti suni sia'an sa'a ra jniňu ja'a, chi ka kuu yo nanu soldado ja kuu nuu Cristo Jesú. <sup>4</sup> Nu iin soldado siuku va'a da iin jniňu nchaa da, ti tu kuu ki'in da ñinga jniňu sa'a da. Chi tu kuu kuandatu da nuu uu jito'o, chi kuni ja na kuandatu da nuu iin ni jito'o da. <sup>5</sup> Iin ni kuu jiin chaa ka yisiki, ja nu da ka jinu, ti tu kundee da nu tu sa'a da nava iyo jniňu ja kuu kunu da un. <sup>6</sup> Suni sia'an ja kuu iin chaa sa'a jniňu nuu ñu'un da, chi nu ni ini da na sa'a da jniňu, ti maa da kuu ja na ki'in va'a taka jniňu ni sa'a da un.

<sup>7</sup> Vijnna ti kani va'a ini nava iyo jnu'un ka'an ri ja'a, ti maa Jito'o na chindee ya ro'o ja na chaku ndi'i ini ra taka jnu'un ja'a. <sup>8</sup> Timoteo, ni ku'un ini ra ja ni nandoto Jito'o Jesú nuu ñuji'i un. Ti ni kuu ya iin jna'an David, chaa ni kuu rey na jana'an. Ti yukan kuu jnu'un ka'an ri taka ñuu, ti jnu'un un xndaku ja kuu kenchaa kuachi yo nu na kandixia yo jniňu ni sa'a Jesú, ya kuu Cristo, chi ndiso ya iin jniňu ña'nu un nuu Yandios. <sup>9</sup> Ti siki jnu'un un

kuu ja ndo'o nene ri kande ri vekaa nanu ja kuu ri iin chaa ni ja'ni ndiyi, ko jnu'un Yandios tu kuu jankindi'yu. <sup>10</sup> Ja sia'an kuu ja na siuku ndaa ri jniñu ndiso ri nuu Yandios vasu na koo ndo'o koo nene ri. Ti sia'an na kundee ri jniñu jniñu un nava takaa yivi ni nakaji maa Yandios ja na keta'u i, na kuni i jnu'un ya. Ti keta'u yivi un, chi ja ni kenchaa Cristo Jesùs kuachi i, ti kunchuku i jniñu ya undi andivi nuu vii kuña'nu i jniñu ya ja kuu saa ni.

<sup>11</sup> Timoteo, na kuu ndee ini ra jniñu ndiso ra nuu Jito'o Jesùs, chi ja siki jniñu un ti iyo iin jnu'un ndaa ja ka'an sia'an:

Vijna tukaa ka kuu yo nanu ni kanda yo na ti kandixia ga yo.

Vijna ti ka kuu yo nanu ja ja ni ka ji'i jniñu ya,  
chi ni ka kandixia yo iin jniñu ña'nu ni sa'a ya ja kuu yo'o naa yo.

Ti yukan kuu nuu kunchuku yo jniñu ya ja kuu saa ni.

<sup>12</sup> Nu na siuku yo vasu na koo ndo'o koo nene yo, ko sia'an ti sa kuu kivi yo  
nuu ya

ja na ta'u yo jniñu jniñu ya.

Chi nu na chisa'yí yo ti kachi yo ja tu jini yo Cristo,  
ti suni maa ya kachi ya ja tu nakuni ya nuu yo.

<sup>13</sup> Ti nu tu siuku ndaa yo takaa jnu'un chisojnu'un yo nuu ya,  
ko maa ya chi siuku ndi'lí ya jnu'un ni chisojnu'un ya,  
chi maa ya kuu Yandios, ti tu kuu na tu'u ini ya ja chisa'yí ya jnu'un  
ni chisojnu'un ya.

### *Chaa sajniñu va'a ja siuku jniñu ya*

<sup>14</sup> Na kachi ri nuu ra Timoteo, nuku'un ini tako jnu'un xndaku ri ja'a. Ti suni sia'an xndaku ra jnu'un ja'a nuu yivi ka kandixia yukan. Xndaku ra nuu yivi un ja tu ka'an i jnu'un xndoña'an nanu ni ka sa'a chaa hebreo na jana'an, chi tu nijnijnu kuiti jnu'un un. Sia'an ka ka'an yivi un, chi tukaa ka kandixia ndaa i jnu'un Yandios ja sia'an ka ka'an i, ti so ka xnda'u i yivi ka kandixia.

<sup>15</sup> Ko maa ra, ja ni ja'a Yandios inijnuni ra ja na sa'a ra jniñu ni ja'a ya nuu ra. Sia'an siin ra jniñu un jniñu ni ini ni aña'u ra nava tu kukanuu ra nu ni najaa ra nuu ya. Ti sia'an xna'an kaji ra jnu'un Yandios nuu yivi ka ñuso'o, chi yukan kuu iin maa jnu'un ndaa.

<sup>16</sup> Koto ma kivi nduu ra jniñu un kue'e ja ka ka'an yivi naa i, chi tu kejna'an jnu'un ka ka'an i nava ka'an maa Yandios. Tu chunso'o ra jnu'un kue'e un chi ni tu nijnijnu. Ti yivi ka ñuso'o jnu'un un tukaa ka kuni i siuku i jnu'un Yandios, chi su'va ni ka kuxio i, ti ni ka ndukue'e xini i ja sia'an ka ka'an i. <sup>17</sup> Nu tu kasí ra jnu'un kue'e ka ka'an chaa un, ti kuichanuu ki'in nanu iin kue'e xaan. Ti yukan ka iyo uu chaa ka ka'an jnu'un un, ti chaa un ka kuu Himeneo jniñu Fileto. <sup>18</sup> Chaa un tukaa ka siuku ndaa da ichi Yandios, chi ni ka sana da ichi kuankoyo da. Ka ka'an da ja tukaa nandoto ndiyi, chi ja ni ya'a kivi yukan. Ti jniñu un un ka sakuanu da ini yivi ka kandixia ndaa.

<sup>19</sup> Ko maa Yandios ni chisojnu'un ya iin maa jnu'un ndaa kuiti. Ti jnu'un un ka'an sia'an: "Jini maa Yandios takaa yivi ni nakaji ya ja na nanita'u i nuu ya", kachi. Suni iyo inga jnu'un ka'an sia'an: "Taka yivi ndakuni'in sivi Jito'o Jesùs, ti kuxio i nuu kuachi", kachi.

<sup>20</sup> Sa'a yo nava nuu ve'e iin chaa riku, ka ñava'a da tijni nuu ndajniñu oro jniñu plata va'a xaan, ko suni iyo ndajniñu ñu'un jniñu yujnu, iyo ja va'a ti iyo ja tu va'a. Ja va'a un kuajniñu da ja kuu nuu kanuu ga, ti ja tu va'a un kuajniñu da ja kuu takaa kivi. <sup>21</sup> Ko takaa ndajniñu tu va'a un nu ni ka kukue'e ni ti tukaa kuajniñu yo. Ti sia'an kuu jniñu yo'o naa yo, chi ni na nakani ini yo ti xndoo yo takaa jniñu kue'e un na kendo iin jnu. Yukan ti kuu yo nanu iin ndajniñu va'a. Nanu jajniñu ndajniñu va'a un ja kuu kanuu ga, suni sia'an kuajniñu Yandios

yo'o ja kuu nuu jniñu maa ya, ja na sa'a yo taka jniñu va'a ja kuu nuu Jito'o Cristo Jesús.

**22** Ja'a na xndaku ri nuu ra ro'o Timoteo. Sa'a sii taka jnu'un ñaa ka ndo'o ini chaa kuachi naa da. Va'a ro'o, chi ja ni jnuu ga ini ra nava kaka ndaa ra jiin jnu'un Yandios. Siuku ndaa taka jnu'un un ti sa kuee koo ini ra, ti kunda'u ini nuu taka ñani jna'an ra ka kandixia Jesús. Sia'an kava va'a ini ra jiin taka yivi ka kandixia, chi ka iyo ndoo añu i ka ndakuni'in i ti ka kanajaa i sivi Jito'o Jesús.

**23** Tu nde'e ra nuu chaa ka ndakuni'in jnu'un chaa Israel na jana'an, chi tu nijniñu kuiti jnu'un un. Nde'e ra ja sia'an ka ka'an ka ka'an da, ti ka keja'a ka kanaa da ja siki jnu'un un. **24** Ko maa ra Timoteo, kuanukuachi ndaa nuu Jito'o Jesús, ti tu kivi nduu ra jiin chaa ka ka'an ka ka'an ti ka keja'a kanaa un. Chi su've, kava va'a ini ra jiin tendi'i ñani jna'an ra ti va'a xndáku ra nuu i naa i. Ti ka'nu koo ini ra jiin i vasu na ka'an ndeva'a i siki ra. **25** Kava vita ini ti xndaku konu'un nuu yivi ka kuu ichi ini ka nde'e ro'o. Sia'an xndaku vii ra nuu i, ti nava na nakani ini i nuu kuachi i, ti na ni'in i jnu'un ka'nú ini nuu Yandios. Nu sia'an na kuandatu i, ti nakuni ndaa i nava kuni ka'an jnu'un Yandios ja siki Jesús, chi yaa yukan kuu ya ndiso jniñu ña'nu nuu maa Yandios. **26** Sia'an xndaku ra nuu i, ti nava na chakú ini i nava kuu jnu'un ndaa. Ti na kuxio i nuu jnu'un ka xna'an i siki jnu'un chaa Israel jana'an, chi jnu'un un mani jnu'un xndoña'an kuu. Ti jiin jnu'un xndoña'an un ni chindasi ja'u'u un maa i ja na sa'a i nava kuni maa.

Ja yukan kuu ja ro'o Timoteo, xna'an ndaa nuu yivi kandixia yukan.

### Nasa koo yivi ja kuu kivi sandi'i ni ga

## 3

**1** Kuñukuu ini ti kuni ra nava koo ja kuu kivi sandi'i ni ga, chi jaa kivi nu koo xaan nundo'o. **2** Ja kuu kivi yukan na ti nduvixi ini yivi naa i, ti kuu ini nuu maa i. Kondo'o xaan ini i nuu xu'un i, ti kuu ichi ini i jiin jnu'un nduvixi un. Ti ja kuu kivi un, ka'an ndeva'a xaan i siki Yandios. Tukaa kuandatu i nuu tata i, nuu nana i, chi nduu nde'e i nuu tata i. Nduu kua'an yivi ti tukaa ka'an yiñu'un i siki jnu'un Yandios. **3** Ni tukaa kava nda'u ini i, ni tu koo jnu'un mani ini jiin yivi. Ka'an ndeva'a i siki ñani jna'an i. Sia xaan i maa i ja na kondo'o ndeva'a ini i, nduu xaan ini i, ti nduu nde'e i, chi tukaa kuanta'u i taka ja va'a. **4** Nakua'a i ñani jna'an i nuu chaa ka jito u'u ña'an, ti tu yu'u i ja na kunchakuachi i. Nduvixi ini i ti skee ichi ña'an i. Nduku i taka ja kuu sii ini maa i ti tukaa nanduku i Yandios. **5** Kachi i ja ka kandixia ndaa i Jesús, ko ini i chi jika kuu, ti chisa'yí i taka jniñu ni sa'a ya, chi tu siuku i jnu'un ka'an i.

Tu kivi nduu ra jiin yivi yukan, chi mani jnu'un kue'e ka ka'an i. **6** Chi chaa un, kivikoyo da ve'e ñasi'i ti xnda'u da ña'an un, vasu yayukan ni ka yaku ña ni ka chakuachi ña maa ña ja siki jnu'un ñaa ini, chi tu ka jini kuiti ña jnu'un Yandios. **7** Nini ka skua'a ña ja ka nanduku ña iin jnu'un va'a, ko tu ka chuu'un ini ña vasu ka jini ña nava ka'an jnu'un Cristo Jesús. **8** Sia'an ni ka sa'a chaa ni ka sa'a tasi ja ni ka nani Janes jiin Jambres. Ni ka ka'an ndeva'a da siki jnu'un ni ka'an Moisés. Ti suni sia'an sa'a chaa tu ka kuni kandixia ndaa jnu'un Jesús. Chaa un ka ñava'a da inijnuni kue'e, chi ka ndo'o ini da ja ka ka'an va'a da jnu'un Yandios, vasu ni ka sana inijnuni da naa da. Chi ka ndo'o ini da ja iin nuu jnu'un un jiin jnu'un Yandios nava ka kandixia yo Jesús. **9** Ko tu kundee da chi tu ni jniñu nava ka ka'an da, chi ni ka nduñaai inijnuni da. Ti taka yivi ka jini i ja mani jnu'un xndoña'an ka ka'an da, nanu ni ka ka'an Janes jiin Jambres. Taka yukan kuu ja koo ja kuu undi sandi'i ni ga kivi.

<sup>10</sup> Ko ro'o Timoteo, ja jini va'a ra nava ni kuncha ri, ti jini ra nava ni xna'an ri jnu'un Yandios. Ni kuncha yiñu'un ri nava iyo ichi Yandios, ti ni ini ni añu ri ni nchañu'un ri ya. Ni sa'a konu'un ri ti ni siiku ndaa ri taka jniñu ni ta'u ya nuu ri, ni ñu'un nda'u ini ri nuu taka ga ñani jna'an yo, ti ni kundee ri jiin taka nundo'o ni jna'an ri. <sup>11</sup> Suni jini va'a ra Timoteo taka nundo'o ni jna'an ri na ni ka ndikun yivi ru'u ñuu Antioquia, Iconio jiin Listra. Yukan ni ka jito u'u yivi ru'u ja ni ndo'o ni nene ri. Ko maa Jito'o ni nama ya ru'u nuu taka nundo'o un. <sup>12</sup> Jandaa na kachi ri ja taka yivi ka kuni kaka ndaa jiin jnu'un Cristo Jesú, koto i nundo'o chi koto u'u yivi maa i. <sup>13</sup> Ko yivi kue'e ja ka xndoña'an un, siin i nava ka sa'a i ti vi'i ga ka jna'an i, chi ka xndoña'an i ja ni ka ndeokava ini i ni sa'a jnu'un ni ka kandixia i un.

<sup>14</sup> Ko maa ra Timoteo, koto kuncha ra sia'an, chi ansu sia'an ni ka xna'an yivi ro'o. Jini va'a ra nau yivi ni xna'an ro'o, ti ni xna'an ndaa yivi un. <sup>15</sup> Ja jini ra ja jnu'un ii kuu jnu'un Yandios, chi undi lulu ra ni kutu'va ra. Ti jiin jnu'un un ni chaku ini ra nava ni kencha kuachi ra ja na nita'u ra. Ti ni ka'u ra nuu tutu ii un taka jniñu ni sa'a Cristo Jesú ja ni nama ya yo'o naa yo, ti ni kandixia ndaa ra un. <sup>16</sup> Ja jini ra Timoteo, nasa ka'an tutu ii, chi maa Yandios ni ka'an inijnuni taka chaa ni ka chaa tutu ya. Ti jnu'un ja'a kuajñiñu yo ja xna'an yo nuu yivi naa i ja na xndaku yo nuu i. Ti tu nini kuu ja kuani nduxaan yo ja na najista yo i, ti na nachu'un ichi yo i. Sia'an sa'a yo nava na kava yiñu'un i, ti na kundandikun i ichi Yandios. <sup>17</sup> Ti Sia'an na chu'un ini taka yivi ka kandixia jnu'un ya, ti na sa'a i taka jniñu va'a. Chi sia'an na sa na chaku ini i nasa xndaku i nuu inga yivi naa i.

## 4

<sup>1</sup> Ru'u Pablo, vijna ka nde'e maa Yandios jiin Jito'o Cristo Jesú, ti na xndaku ri nuu ra. Sia'an ka'an ri chi ja nduña'nua xaan ya ja kuu kivi nchaa ya kii xndichi ya yivi ka chaku jiin yivi ni ka ji'i. Nduña'nua ya, ti ta'u ya jniñu nuu taka ñuyivi jiin andivi. <sup>2</sup> Kanda'u ri jiin ra ja na xndaku ndaa ra jnu'un Cristo Jesú nuu yivi chunso'o, xi vasu nuu yivi tu ka kuni kunso'o, ko sia'an xndaku ra. Sia'an xndaku ni'in ra vasu kuee ti sa na kivi jnu'un un ini i. Ti nu tuu, ti nini nduxaan ra nuu i. Ko va'a nakani ichi ra nava kaka i ichi ya, ti suni kua'a kava ini ra jiin taka yivi un naa i. <sup>3</sup> Kanu ja sia'an na xndaku ra jnu'un un nuu yivi vijna, chi jaa kivi ja tukaa ga kuanta'u i jnu'un Yandios. Chi su'va ki'in i nava ka kuu ini maa i, naska'an jna'an i, ti kejna'an i jiin taka chaa ka xna'an sava'ni ga jnu'un ja ka jajna'an ini i kunso'o i. <sup>4</sup> Chi yivi un nandeokava i siki jnu'un ndaa, ti kusii ga ini i kunso'o i jnu'un ka ka'an chaa ka xndoña'an jiin jnu'un. <sup>5</sup> Ko maa ra Timoteo, koto kivi nduu ra jiin yivi un. Chi su'va na kukutu ini ra koto va'a ra jniñu ni ja'a Yandios nuu ra. Kua'a ini ra kondo'o konene ra, chi jniñu ra kuu ja na kachanuu ra jnu'un Yandios nava ni kii Cristo Jesú. Ti sia'an siku ra jniñu ni ta'u Yandios nuu ra, chi nuu maa Yandios kuu nu junukuachi ra.

<sup>6</sup> Taka jnu'un ja'a kuu ja na xndaku xaan ri nuu ra Timoteo, chi ja kuan kuyajni kuü ri. Ti nasoko ri maa ri nuu Yandios, ko ja ni junukuachi ri nuu ya jiin ni ini ni añu ri, ti sa na kuü ri. <sup>7</sup> Iyo xaan kuiya ja ni ki'in ri ichi Yandios. Ni siin ri ichi yukan ti sia'an kua'an ri undi vijna. Vasu ni jito ri nundo'o ko ni kundee ri, chi ni ndikun ndaa ri ichi Jito'o Jesú, ti ni jito va'a ri jnu'un yukan. <sup>8</sup> Ja'a na ti maa Jito'o Jesú ja ni sa'a nakoo ya ja kuu ta'u nuu na jaa kivi nchaa tuku ya, chi ni kundee ri ni jika ndaa ri jiin jnu'un ya, ti maa ya kuu ja kii xndichi ndaa ñuyivi. Ti ansu nini nuu maa ni ri kua'a ya, chi suni kua'a ya nuu taka yivi ni ka siin ni ini jiin jnu'un ya. Ti ka kusii ini i kundatu i kivi nchaa tuku ya.

### Kana Pablo ja na kii Timoteo nuu kande da

<sup>9</sup> Kanda'u ri jiin ra Timoteo, kin yii ti kii yachi ra nuu kancha ri. <sup>10</sup> Chi ni kuxio Demas ti kua'an da ñuu Tesalónica siki ja ni kusií ga ini da jiin taka ja iyo nuu ñuyivi ja'a. Ja yukan kuu ja ni xndoo da ru'u ti kua'an da. Crescente kua'an da ichi ñuu Galacia, ti Tito kua'an da ichi Dalmacia. <sup>11</sup> Nini Lucas ni ga kancha jiin ri ja'a. Nanduku Marcos ti kii ra jiin da nu vaji ra, chi kuni ri ja na chindee da ru'u jiin jniñu nava ka junukuachi yo nuu Yandios. <sup>12</sup> Tíquico ni tají ri da kua'an da ñuu Efeso. <sup>13</sup> Nu vaji ra ti kunda'a ti'l'i manga ri ja ni xndoo ri ve'e Carpo undi ñuu Troas. Ti suni tutu ri, ti koto naa ini ra ja kunda'a ra taka tutu ri kanchuku yukan.

<sup>14</sup> Alejandro, chaa jini sa'a da jniñu jiin kaa un, ni sa'a ndevala'a da jiin ri, ko maa Jito'o Cristo Jesús na chunaa ya nuu da taka ja ni sa'a da jiin ri. <sup>15</sup> Ko ro'o Timoteo, koto ra maa ra jiin chaa un, chi ni'in xaan ni ndonda da siki jnu'un ka xna'an yo.

<sup>16</sup> Na ni ja'an ri undi nuu nuu chaa ka ndisojniñu ja ka kuu justicia un ja nama ri maa ri, ti ni ñin da tu ni ka ka'an kuiti ja'a ri, chi su'va ni ka xndoo da ru'u ti kuankoyo da. Ko ansu yukan ti ka'an ri, chi ñukuu ini ri ja maa Yandios na kuanka'nú ini ya nuu da. <sup>17</sup> Ti vasu sia'an ni ka xndoo da ru'u, ko maa Jito'o Jesús ni chindee ya maa ri, ti ni ja'a ga ya jnu'un ndee ini ru'u, ti vi'l'i ga ni kuu ndee ini ri, ti ni kundee ri ni ka'an ri jnu'un ya ja nasa sa'a yo ti nanita'u yo. Sia'an ni xndaku ri nuu taka chaa ña'nu un, ti suni nuu yivi inga nación ja tu ka yi'i jiin nación Israel. Sia'an ni nama ya ru'u nuu chaa kanda kua'an un. <sup>18</sup> Ti suni sia'an na nama ya ru'u nuu taka nundo'o undi na nakuaka ya ru'u no'on ri andivi nuu kancha maa ya ta'u ya jniñu ja kuu saa ni. Ti ni ini ni afu yo na kunchañu'un yo ya. Ti ii na koo sivi ya, chi maa ya kuu ja kuña'nu ja kuu saa ni. Ti sia'an na koo.

<sup>19</sup> Na kachi ri nuu ra Timoteo, ja na kaxnu'un ra nuu Prisca jiin Aquila ja na sandee ini ña naa ña. Suni na sandee ini yivi ve'e Onesíforo. <sup>20</sup> Ko kaxnu'un ri ja Erasto ni kendo da ñuu Corinto. Ti Trófimo ni kendo da ñuu Mileto chi ku'u da. <sup>21</sup> Nu vaji ra ko ndukundee ra nava ja chaa ra ja'a, ti sa na keja'a viko ñuu. Sandee ini ra, kachi Eubulo, jiin Pudente, jiin Lino, jiin Claudia, jiin taka ñani yo ka kandixia ja'a.

<sup>22</sup> Ñukuu ini ri ja maa Jito'o Jesús na kuncha ya jiin ra. Na chindee chituu ya ro'o, ti na kua'a ya ja va'a ja kuu taka ra naa ra. Ti sia'an na koo.

## Tutu ni chaa Pablo nuu Tito

<sup>1</sup> Ru'u Pablo, junukuachi ri nuu Yandios, chi maa ya kuu ja ta'u jniñu nuu ri. Ti Jesús, ya kuu Cristo, ni nakaji ya ru'u ja na kuu ri apóstol nuu ya. Sia'an ni tatu ya jniñu ja'a nuu ri, ja na stuu ri jnu'un ya nuu yivi ni nakaji ya ja na kandixia i Jesús, ti nava na nakuni yivi un nasa kuandatu i nuu jnu'un Yandios, ti nava sia'an na kaka ndaa i jin jnu'un ya nuu ñuyivi. <sup>2</sup> Na kandixia ndaa i jnu'un un chi sia'an ni chisojnu'un maa Yandios ja nu na nakuni i jnu'un ya, ti nukoyo i nuu andivi, ti yukan kunchuku i ja kuu taka kivi. Sia'an ni kachi ya undi na ti xnukoo ga ya ñuyivi. Chi Yandios kuu Yandios, ti tu xnda'u ya nava ni chisojnu'un ya nuu yo.

<sup>3</sup> Vijn ja ni kundaa kivi un nava ni kachi ya ja stuu ya jnu'un Jito'o Jesús, ya kuu Cristo, ya ndiso jniñu ña'nú nuu maa ya. Ti yukan kuu jnu'un ka'an ri taka fiuu vijn, chi sia'an ni tatu ya jniñu ja'a nuu ri. Ti maa Jito'o kuu ya kencha kuachi yo ti kaku yo nuu iin nundo'o kii nuu yo. <sup>4</sup> Ti chaa ri tutu ja'a nuu ra Tito, chi kuu ra nanu iin se'e ri siki ja iin nuu ni ka kandixia yo Cristo Jesús. Ti kuni ri ja Tata yo Yandios jin Jito'o Cristo Jesús, na chindee chituu ya ro'o, ti na kunda'u ini ya maa ra, nava na kukuee kuncha ra nava iyo ichi maa ya.

### *Nava koo jniñu sa'a Tito ñuu Creta*

<sup>5</sup> Ni xndoo ri ro'o nuu isla Creta yukan ja na sinu ndi'i ra taka ga jniñu kumanji ja na kundaa. Ti suni ja na nakaji ra taka chaa kundiso jniñu ña'nú nuu yivi ka kandixia kanchuku taka fiuu ka iyo nuu isla un. Chi sia'an ni tatu ri jniñu un nuu ra. <sup>6</sup> Ti taka chaa kundiso jniñu ña'nú nuu yivi ka kandixia un, na kaka ndaa da nava tu kankuachi yivi siki da. Ti na koo iin ni ñasi'i da. Ti taka se'e da na kuu i suchi kandixia, nava tu ka'an yivi siki i ja ka kuu i suchi ni'in ini, xi ja kanda kua'an kanda vaji i. <sup>7</sup> Ti taka chaa kuña'nu nuu yivi ka kandixia un, kuni ja na kaka ndaa da, chi kundiso jniñu da nuu maa Yandios. Koto kuu ichi ini da nuu taka jniñu, ni tu kuu da iin chaa ni'ní xini ja na kuiti yachi ini da, ni tu kuu da iin chaa ji'i ndixi, ni tu kuu kanaaa da jin yivi, ti koto kuñukuu ini da ja na xnda'u da yivi nava na ni'in da xu'un. <sup>8</sup> Su'va na kuu da iin chaa kava nda'u ini jin yivi ka kandixia, nu ka jikonuu yivi, ti na kua'a nuu da ve'e nuu kendo yivi un naa i. Suni na kuu da iin chaa va'a ja na kunda'u ini nuu inga yivi. Na kuu da iin chaa va'a, iin chaa yiñu'un ja na kundandikun da nuu ichi Yandios. Ti na kunchañu'un ndaa kuiti da maa Yandios, ti sia'an na kuu da iin chaa tu kinikava nuu kuachi. <sup>9</sup> Na kuu da chaa kandixia ndaa maa jnu'un Jesús jin ni ini ni añu da, chi yukan kuu maa jnu'un Yandios ja ka'an ndaa ti tu kuu xnda'u yo. Yukan kuu ja iin chaa sia'an, na xndaku da jnu'un un nuu sava'ni ga yivi. Mani jnu'un Yandios kuu ja ni'in ga na xndaku da nuu yivi ka ka'an ndeva'a, ti sia'an na sa'a da undi na kivi ini yivi un nasa kuni ka'an jnu'un Yandios, nava tukaa siin da nava ka ka'an da.

<sup>10</sup> Kuni ja na nduku ra chaa va'a ja na kundiso jniñu ña'nú un, chi ka iyo kua'a xaan yivi ni'in ini vijn, ti tu ka jandatu i nuu jnu'un Yandios. Suni ka iyo kua'a xaan yivi ka ka'an jnu'un ñaa ja tu nijniñu, ti ka xndoña'an i uu ga yivi. Ti chaa ni'in ga ini un ka kuu chaa Israel, chi ni ka kandixia da Jesús, ko siki ja ka kuu da chaa Israel, ti ni ka nduvixi ini da, ka ka'an ndeva'a da. <sup>11</sup> Ko chaa kundiso jniñu ña'nú nuu yivi ka kandixia un, na kasi da yu'u chaa ka ka'an sia'an un nava tukaa ga xnda'u da yivi nu ni ka ndututu i naa i. Iin

jniñu kanuu kuu ja kundiso chaa kuña'un un, chi chaa un kuu ja xndaku nuu yivi ka xndoña'an un, ja nanu ka xnda'u ndi'i da yivi ini ve'e da jiin jnu'un ka ka'an da un. Ti jiin jnu'un ka xnda'u da un ka kuni da ni'in ka'a da ru'u. Yukan kuu ja chaa kundiso jniñu un, na kasi da yu'u chaa ka xnda'u un naa da.

<sup>12</sup> Ti iyo iin maa chaa isla Creta un ja ka'an da jnu'un ii ja kuu santu ñuu da un (ti jnu'un ka'an da un tu kejna'an jiin maa jnu'un Yandios), ti ka'an da nasa kanchuku yivi ñuu da un, ti ni kachi da:

Yivi Creta, mani yivi ka xndoña'an ka kuu i.

Ka kuu i nanu yivi yuku, chi mani ka nduxaan da.

Tu ka sa'a da jniñu chi kuxi xaan da, ko ka jajna'an ini da kaji xaan da.

Ni kachi da.

<sup>13</sup> Ti jandaa ndixia kuu jnu'un ni ka'an chaa un. Ja yukan kuu ja siin xndaku ni'in ra nuu yivi ka kandixia ñuu Creta un, nava tukaa kandixia i jnu'un xndoña'an un naa i, ti na kandixia ndaa i jnu'un Yandios nava ka'an siki Jesùs. <sup>14</sup> Sia'an xndaku ra nuu i nava tu ka sa'a i nava nuu jnu'un ka ka'an chaa Israel un, chi ka ka'an da nava ka ndaku ini maa da siki taka jnu'un da ja na kendo ndoo da naa da, chi ni ka nandeokava ini da nuu ichi Yandios.

<sup>15</sup> Ko ja jiin jnu'un yukan, ti tu kuu kencha kuachi yo. Su'va na kondoo añu yo jiin jniñu ni sa'a Jesùs. Ko yivi ka kuni siin jiin jnu'un yukan, ka chakuachi ga i inijnuni i. Chi ja ndo'o ini añu i kuu ja na sa'a ga i kuachi. Ko yivi ka iyo ndoo inijnuni, ti ka iyo ndaa ini i kuanta'u i sava'n'i ga ja kii nuu maa Yandios. <sup>16</sup> Su'va ka ka'an yivi ka siuku jnu'un jana'an, ka ka'a i ja ka kandixia i Yandios, ko jiin jniñu kue'e ka sa'a i un, ti jini yo ja tu ka siuku ndaa i, chi ka jito u'u jna'an i, ti ni'in ini i, ti tu kaxaan ni iin jniñu ka sa'a i. Yukan kuu ja ni'in na xndaku ra nuu yivi un naa i.

## 2

<sup>1</sup> Su'va sa'a ra Tito, koto xna'an ra nava iyo jnu'un un, chi su'va xna'an ra iin jnu'un na kejna'an jiin maa jnu'un Yandios. <sup>2</sup> Ti sia'an xndaku ra nuu velu ña'nú naa da ja na kaka yiñu'un da jiin jnu'un ndaa, ti tu sa'a ndeva'a da ja ko'o da ndixi. Ndoo na koo ini da nava ni ka kandixia ndaa da jnu'un Yandios siki Jesùs. Na kuu ini da nuu Yandios jiin nuu ñani jna'an da, ti na kukee kaka da nuu ichi Yandios.

<sup>3</sup> Suni sia'an xndaku ra nuu vela ña'nú un naa ña nava na kava yiñu'un ña jiin jnu'un Yandios. Koto ka'an ña siki ñani jna'an ña. Tu ko'o ña ndixi. Na kuu ña iin ña'an nakani ichi yivi naa i ja ka sasi'i ña maa ña, <sup>4</sup> Ti nava yukan na nde'e ti na kotonchaa ña'an kuachi un naa ña. Na kuu ini ña nuu yii ña, ti na kunda'u ini ña ja tu sa'a ña ni iin jniñu kue'e. <sup>5</sup> Na koto va'a ja iyo ini ve'e ña, ti na kuandatu kuansu ña nuu yii ña. Nu sia'an na kuu taká yukan, ti ni iin yivi tu ka'an ndeva'a i siki jnu'un Yandios.

<sup>6</sup> Ti suni sia'an xndaku ra nuu taká chaa suchi naa da ja na kava yiñu'un da.

<sup>7</sup> Ti maa ra Tito, kaka yiñu'un ra nuu ichi Yandios, ti na nde'e na kotonchaa chaa kuachi un naa da nasa jika ndaa ra ichi Yandios. Ti kaji xaan xndaku ra jnu'un Yandios jiin ni ini ni añu ra, ti na chaku ini yivi ka ñuso'o nasa kuni ka'an jnu'un un. <sup>8</sup> Jnu'un Yandios kuu ja kanuu xaan ga ja na xndaku ra, chi yukan kuu maa jnu'un ndaa ja tu xnda'u. Nu sia'an na sa'a ra, ti tu kuu ka'an ndeva'a yivi siki jnu'un un. Ti nava sia'an na kukanuu yivi ka ka'an ndeva'a siki jnu'un un, chi tukaa kuu chakuachi i siki yo.

<sup>9</sup> Xndaku ra nuu taká muzu ka kandixia un (muzu ja tu ka kin ya'u) na kava yiñu'un da. Ti na kuandatu da nuu jito'o da sava'n'i ga jniñu na ta'u nuu da, chi tu va'a ja sani'in ini da. Ni tu kuu nachiso da iin jnu'un nuu chaa un, chi su'va na kava va'a ini da. <sup>10</sup> Koto sakui'na da ni iin ndajniñu nuu da. Chi

su'va na kava yiñu'un da naa da, ti vii na sajniñu da, konu'un na kava ini da, nava na kuni chaa un ja chaa ndaa ka kuu da, ti sia'an na kuni da ja vii xaan xndaku jnu'un Tata Yandios, chi maa ya kuu ja ni nama yo'o ti nanita'u yo nnu ya.

<sup>11</sup> Sia'an kunchuku ndaa ra nuu Yandios naa ra, chi maa Yandios ni kunda'u ini ya, ti ni taji ya Se'e ya Cristo Jesús nuu ñuyiví ja ni kii kencha ya kuachi yo nava na nita'u yo. Ti tu ni iin jniñu ni sa'a yo ja kencha yo kuachi yo, chi maa Yandios kuu ja ni kunda'u ini ya yo'o ti ni kencha ya kuachi yo ja na nita'u yo. <sup>12</sup> Ko jiin jniñu ni sa'a Yandios un chaku ini yo nasa kunchuku yo nuu ñuyiví ja'a. Chi nu na kandixia yo maa jniñu sa'a Yandios, ti tu ka yisikinchaa yo Yandios jiin jniñu kue'e ni ka sa'a yo undi nuu. Ko vijna na kava yiñu'un ini yo ti na sa'a yo nava kachi maa Yandios. Tukaa kundio ini yo ja sa'a yo sava'ni ga inga jniñu kue'e. Chi su'va ni'in na kundikun yo jiin jnu'un Yandios. Ti na kondo'o va'a ini yo nuu tako jniñu sa'a yo nuu ñuyiví ja'a, ti ansu ja kava nde'e yo. Undi nuu tu ni ka siuku ndaa yo nuu Yandios, ko vijna ti na chiñu'un yo jnu'un ya. <sup>13</sup> Na kundatu yo undi kivi na nchaa Jito'o Cristo Jesús tuku, chi ja kuu kivi na nchaa ya, ti nchaa ya jiin iin jniñu ña'nu xaan ga. Ti ni tu'u nuu ñuyiví stuu ya ja ni nduña'nu xaan ya. Ja yukan kuu ja jiin ni ini ni añu yo na kundatu yo. Ti kivi un kuu iin kivi ja koo sií ga ini yo, chi nchaa maa Jito'o Cristo Jesús, ja na nama ya yo'o, chi maa Jesús kuu Yandios ja kuña'nu ga. <sup>14</sup> Sia'an na koo sií ini yo kundatu yo, chi maa Cristo Jesús ja ni soko ya maa ya na ni nakua'a ya maa ya, ti ni jií ya nda'a cruz ja ni nama ya yo'o nuu kuachi yo. Ti undi kivi un tukaa saní'in ini yo nuu Yandios, ja ni nama ya yo'o nava na kondoo añu yo nuu ya. Chi nu na jaa kivi na ndivi yo nda'a ya, ti tukaa ga ki'in yo nava kuni maa yo, chi yukan na ti kuandatu yo nuu maa Jito'o Cristo Jesús, ti ni ini yo sa'a yo tako jniñu va'a ja kuu nuu ya.

<sup>15</sup> Ti yukan kuu jniñu ja xndaku ri nuu ra Tito, ti sia'an siin ra xna'an ra jnu'un un. Ko va'a xaan xndaku ra nava na kua'a ra jnundee ini sava yivi ka kandixia un. Ti nuu uu ga yivi ja tu ka kandixia un, kuni ja na xndaku ni'in ra nuu i undi na kivi inijnuni i nasa kuni ka'an jnu'un ya, nava tukaa siin i jiin jniñu kue'e un. Yukan kuu ja sa'a ra chi yukan kuu jniñu ndiso ra. Ti siki jniñu ra tu kua'a ra jnu'un ja na nduvixi ini yivi, ti kuña'nu i nuu ra.

### *Na kuandatu yivi ka kandixia*

## 3

<sup>1</sup> Tito, taka jnu'un ja'a ndakuni'in ra nuu chaa un, ti xndaku ra nuu da ja na kava yiñu'un da nuu chaa ka kuña'nu un jiin suni chaa ka ndiso jniñu ve'e stisia un. Ti na kuandatu va'a da vasu sava'ni ga jniñu na ta'u chaa ña'nu un nuu da. <sup>2</sup> Koto ka'an ndeva'a da siki iin iin chaa ña'nu ja ka kuu stisia un, jiin taka ga yivi, ni tu kanaa da naa da. Ti sia'an na kukuee kunchuku da. Kuee na koo ini da ti na kava nda'u ini da jiin taka ga yivi.

<sup>3</sup> Chi suni yo'o naa yo na undi nuu suni ni ka kuu yo yivi ni ka sa'a ndeva'a, ni ka sa'a yo sava'ni ga jniñu kue'e. Ko ni maa yo, tu ni chaku ini yo na jniñu ka sa'a yo, chi tu ni ka jandatu yo nuu ni iin jnu'un, ti ni nuu maa Yandios, ni nuu chaa ña'nu tu ni ka jandatu yo. Chi ni ka sana yo ni ka jikonuu yo, ti ni ka yi'i yo jiin tendi'i nuu kuachi ja ni ka kuu ini yo. Kue'e ni ka kunchuku yo, ti ni ka jajna'an ini yo jnu'un kuasun ini. Ni ka jito u'u yo Yandios, ti suni ni ka jito u'u jna'an yo jiin ñani jna'an yo.

<sup>4</sup> Sia'an ni kunchuku yo undi nuu, ko ni ndunda'u ini Yandios ti ni nama ya yo'o, chi sia'an ni kuu ini maa ya ja sa'a ya jiin yivi naa i. <sup>5</sup> Sia'an ni nama ya yo'o, ko ansu ja va'a ni ka sa'a yo, chi maa ya kuu ja ni ndunda'u ini ya yo'o. Ni nama ya yo'o ti ni nasandoo ya maa yo jiin Espíritu Santo ja na ndundoo

yo naa yo nanu ja ni ka nakaku jaa yo, nava tukaa kinda'a kuachi un yo'o.  
<sup>6</sup> Jito'o Jesús, ya kuu Cristo, kuu ya ni sa'a iin jniñu ña'nu ja kuu yo'o naa yo. Ti maa Yandios ni ja'a Espíritu Santo nuu yo ja na chindee chituu ya yo'o. Na ti sa'a ga Jesús iin jniñu ña'nu un, tuja'i ni'in yo Espíritu Santo naa yo, ko vijna na ti ja kancha ya jiin yo. <sup>7</sup> Sia'an na ti ja ni ja'a ya Espíritu Santo nuu yo nava tu naa ini yo ichi ya ti na ni'in yo yaji yo, ti kuncha yo jiin ya nuu andivi ja kuu taka saa ni. Ni'in yo yaji yo nuu ya chi ni ndunda'u ini ya yo'o. Ni kachi ndaa ya ja tukaa kankuachi ya siki yo. Sia'an ni kunda'u ini ya yo'o ko ansu ja va'a ni ka sa'a yo.

<sup>8</sup> Taka jnu'un un kuu maa jnu'un ndaa kuiti. Tijnu'un yukan kuu ja xndaku ra nuu yivi ka kandixia un. Ti koto ka'ncha ini ra ja xndaku ra jnu'un un, nava yivi ka kandixia Yandios, na kuanukuachi i jiin niña jniñu va'a ja kuu nuu inga yivi, chi jnu'un va'a un kuu ja kuu tendi'i yo. <sup>9</sup> Tito, sia'an xndaku vii ra nuu yivi ka kandixia un nava tu kivi nduu da jiin jnu'un ja tu nijniiñu un, chi tu kejna'an iin nuu jnu'un un jiin jnu'un Yandios. Ni tu chunso'o ra jnu'un chaa Israel jana'an un, chi chaa un ka ka'an da ti ka kanaa da jnu'un ina. Suni tu va'a nu na kivi nduu ra jiin yivi ka kanaa siki ley Moisés, chi ni tu nijniiñu kuiti un, so ka ka'an maa da. Ko ni maa da naa da tu ka chaku ini da na jnu'un kuu. <sup>10</sup> Tu ka'ncha ini ra ja xndaku ni'in ra nuu chaa ka ka'an ndeva'a un, chi jiin jnu'un ka xndoña'an da un ka sasiin da chaa ka kandixia. Ko xndaku ni'in ra iin xi uu jinu nuu da nava na kivi ini da nasa kuni ka'an jnu'un Yandios, nava tukaa siin da nava ka ka'an da. Ko nu tu ka chunso'o da, ti sia da na ki'in da, ti tukaa kua'a ra jnu'un ja najna'an da jiin ra naa ra. <sup>11</sup> Chi jiin jniñu sa'a da yukan ni ti kuni ra ja kuu da iin chaa ndava ini, chi tu kivi maa jnu'un ndaa un inijnuni da. Yukan ti jiin maa kuachi sa'a da un ni jna'nu ndatu da.

### *Jniñu xndaku Pablo nuu Tito*

<sup>12</sup> Nu na taji ri Artemas xi Tíquico jaa da, ndukundee ti kii ra undi Nicópolis ti yukan ndejna'an yo, chi ni ndo'o ini ri ja yukan kin sia'a ri viko ñuu. <sup>13</sup> Ko jikanta'u ri nuu ra ja na chindee ra Zenas, chaa ka'an ja'a yo yo jiin Apolos, jiin taka ja ka nandi'i da ja kuu ichi da nava tundo kumani nuu da. <sup>14</sup> Sia'an na kotu'va taka ñani jna'an yo yukan, ja na chindee nuu jna'an da naa da nu iyo ja ka nandi'i da, naya na kunukuachi va'a nuu jna'an da naa da, ti ansu ja na kunchuku da jiin jnu'un ja tu kuajniñu.

### *Sandi'i ni ga jnu'un ndee ini*

<sup>15</sup> Taka yivi kanchuku jiin ri ja'a ka kanxia'u i ja na sandee ini ra. Ti ro'o Tito, kanxia'u jiin taka ñani jna'an nda'u yo ja ka kandixia yukan. Na kuu ga ini maa Yandios, ti na chindee chituu ya ro'o naa ra. Sia'an na koo.

## Tutu ni chaa Pablo nuu Filemón

<sup>1</sup> Ru'u Pablo, kande ri vekaa vijna ja siki ja ni ka'an ri jnu'un Cristo Jesús. Ru'u jiiñ ñani yo Timoteo, ka chaa ri tutu ja'a nuu ra, Filemón. Ja kuu ra iin chaa mani jiiñ ri, ti ni chindee jna'an ra jiiñ ri. <sup>2</sup> Suni chaa ri tutu ja'a nuu kua'a yo Apia, jiiñ suni nuu Arquipo, chaa chindee jna'an jiiñ yo nuu jniñ ka nakutu ini yo. Suni sia'an taji ri tutu ja'a nuu yivi ka kandixia ja ka ndututu ve'e ra, Filemón. <sup>3</sup> Ti ñukuu ini ri ja Tata yo Yandios jiiñ Jito'o Jesús, ya kuu Cristo, na chindee chituu ya ro'o naa ra, ti na kunda'u ga ini ya ro'o naa ra, nava na kukuee kunchukú ra nuu ñuyivi ja'a.

### *Chaa ñunda'u ini ti kandixia va'a kuu Filemón*

<sup>4</sup> Taka hora jikanta'u ri nuu Yandios, ti tu naa ini ri jikanta'u ri ja kuu ro'o Filemón, ti nini nakuanta'u ri nuu ya ja kuu maa ra. <sup>5</sup> Chi ni ni'in ri jnu'un ja kandixia ndaa ra Jito'o Jesús, ti kuu ini ra nuu ya. Suni sia'an kunda'u ini ra taka yivi ka yi'i nda'ya. Yukan kuu ja nakuanta'u ri nuu Yandios ja kuu ro'o, Filemón.

<sup>6</sup> Ti jikanta'u ri nuu ya ja na nuku'un va'a ini ra taka jniñ ña'nú ni sa'a Cristo ja kuu yo'o. Kuñukuu ini ra ja ka yi'i yo nda'ya, ti ka ni'in yo taka ja va'a nuu ya. <sup>7</sup> Nakuanta'u ri nuu Yandios ja kuu ro'o Filemón, chi ni ni'in ri jnu'un ja kunda'u ndixia ini ra taka yivi ka kandixia, ti ja'a ra jnundee ini yivi un naa i. Jiiñ taka yukan ni ndusii ini ri, ti ni kuu ndee ga ini ri, ñani Filemón.

### *Kanda'u Pablo jiiñ Filemón*

<sup>8</sup> Vijnna ti kanda'u ri jiiñ ra Filemón, vasu iyo ichi ri ja ta'u ri jniñ nuu ra, chi kuu ri apóstol nuu Cristo. <sup>9</sup> Ko vijnna, chi so kanda'u ri jiiñ ra ja ka jini mani jna'an yo. Sia'an kanda'u ri ru'u Pablo. Vasu ja ña'nú ri, ti kande ri vekaa ja siki jnu'un Cristo Jesús. <sup>10</sup> Jikanta'u ri nuu ra ja kuu muzu ra Onésimo, chaa ni jaan ra jiiñ xu'un, ti ni jinu da. Ko vijnna ti kuu da nanu iin se'e ri, chi ni kandixia da jnu'un ni ka'an ri vasu kande ri vekaa ja'a. <sup>11</sup> Undi nuu, tu ni kuu da iin muzu ja kuajniñ nuu ra, ko vijnna na ti va'a ga kunukuachi da nuu yo naa yo.

<sup>12</sup> Vijnna na ti na nataji ri da na najaa da nuu ra. Nakuanta'u va'a maa da, ti sa'a ra ja maa ri ni jaa nuu ra, chi ja'a ni ka kuu mani xaan ri jiiñ da. <sup>13</sup> Kusii ini ri ti kuni ri ja na kuncha da jiiñ ri ja'a, nava na chindee da ru'u nuu jniñ sa'a ra vijnna ni kande ri vekaa ja siki jnu'un Cristo. <sup>14</sup> Ko tu kuni ri ja xndoori da undi nuu tu kua'a maa ra jnu'un. Ti ansu chayika ri ro'o, chi yukan kuu ja kachi maa ra. <sup>15</sup> Ti tu jini ri xi so ni kuxio da ja kuu taká kivi. <sup>16</sup> Vijnna na ti tukaa sa'a ra nava ja kuu da muzu ra, chi su'va sa'a nanu ja kuu da iin ñani ra ni kaku ji'in ra jiiñ. Ti suni sia'an sa'a maa ri ja kuu da jiiñ ri. Ko vi'i ga kuu da ja kuu nuu ro'o, chi vijnna na ti kunukuachi da nuu ra ja kuu da iin chaa ni kivi nda'a Jito'o.

<sup>17</sup> Ja sia'an kuu ja nu ñukuu ini ra ja ka jini mani jna'an yo siki jnu'un kandixia, ti ka'an va'a jiiñ chaa ja'a nu na jaa da nuu ra, sia'an nanu ka ka'an maa yo naa yo. <sup>18</sup> Ti nu nau iin kuachi ni sa'a da nuu ra, xi tau da xu'un, ti na chunaa maa ri. <sup>19</sup> Jandaa ndixia kuu ja chunaa ri, chi ru'u Pablo, chaa ri tutu ja'a jiiñ nda'a maa ri. Sia'an na kachi ri, ti suni kuu kachi ri ja suni tau maa ra nuu ri siki ja ni skua'a ri ro'o, ti ni kaku aña ra. <sup>20</sup> Sia'an ndixia ñani,

kuni ri ja na kua'a ra iin jnundee ini ru'u, chi ndinduu yo ka yi'i nda'a Jito'o. Ñani Filemón, ja ka yi'i yo nda'a Cristo, ti ja yukan kuu ja jikanta'u ri nuu ra ti nava na ndusii ga ini ri.

<sup>21</sup> Chaa ri tutu ja'a nuu ra, chi jinijnuni ri ja kuandatu va'a ra, ti su'va vi'i ga sa'a ra ansu nini ja ni jikan ri. <sup>22</sup> Ti suni jikan ri ja na nduku ra nuu kuncha ri, chi ñukuu ini ri ja kee ri ja'a ti jaa ri nuu kanchuku ra, na sa'a Yandios nava ka jikanta'u ra ja kuu ru'u.

<sup>23</sup> Epafras, chaa kande jiin ri vekaa ja'a ja siki jnu'un Cristo Jesús, ka'an da ja na sandee ini ra. <sup>24</sup> Ti Marcos, Aristarco, Demas, jiin Lucas, chaa ka sajniñu jna'an jiin ri, suni sia'an ka ka'an da.

<sup>25</sup> Ti ru'u Pablo, ñukuu ini ri ja maa Jito'o Jesús, ya kuu Cristo, na chindee chituu ya ro'o Filemón, ti na kunda'u ga ini ya ro'o. Sia'an na koo.

## Carta kua'an nuu yivi Hebreo

*Ndaku ni'in Yandios siki jniñu ña'nu nija'a ya jiin Se'e ya*

**1** Undi na jana'an xaan, tijni jinu ni ka'an Yandios, ko ndi siin ndi siin jnu'un ja ni xna'an ya jnu'un ya nuu chaa ni ka kuu profeta ya. Ti maa da ni ka nakachi da jnu'un un nuu chaa ni ka kuu tata yo jana'an ja kuu nación Israel vijnna. Sia'an ni sa'a ya undi na jana'an. **2** Ko kivi ja kuan ya'a vijnna, chi sa su'va vi'i ga ni chindee Yandios yo'o, chi ni taji ya Se'e ya ni kii xndaku ya jnu'un ya nuu yo. Undi saa ni ja'a ya jniñu nuu Se'e ya nava maa Se'e ya un na xnukoo ñuyivi jiin taka ja iyo. Ti ndi'i vii ja iyo ni xndoo ya nuu nda'a Se'e ya. **3** Ti iiñ ni kuu Se'e ya jiin maa ya chi ni ndaku ya nanu kaa maa Yandios. Ti kandichi ya jiin maa Yandios, chi iiñ ni ka kuña'nu ya. Ti jiin maa jniñu ña'nu xaan ja ndiso Se'e ya, so nini ka'an ni ya, ti taka ja iyo jiin taka yivi ka siuku i taka ja kuni maa Yandios. Ti iiñ jniñu ña'nu ga kuu ja ni sandoo ya yo'o nuu kuachi yo. Ti nu ni ndi'i ni sa'a ya jniñu ña'nu un, ni ndaa ya kuano'on ya andivi nuu ni ni'in ya jniñu ña'nu xaan ga ja nchaa ya nuu Yandios.

*Kuña'nu xaan ga Se'e Yandios ja kuu taka ángel*

**4** Ti jiin taka jniñu un ni jini yo ja ni nduña'nu ga Se'e Yandios ja kuu taka ga ángel ja ka junukuachi nuu Yandios. Sia'an kuu chi ni ni'in ya ta'u ja ni ni'in ya iiñ jniñu ña'nu xaan ga ja kuu taka ga ángel ka junukuachi nuu Yandios.

**5** Jandaa ndixia kuu yukan chi tu ni ka'an Yandios jiin iiñ ánge sia'an nanu yoso nuu tutu ii:

Maa ra kuu Se'e ri, ti vijnna ni sa'a ri ja na nduña'nu ra,  
chi maa ri kuu Tata ra.

Ni tu ni kachi ya jiin iiñ ángel:

Maa ri kuu Tata nuu ra, ti maa ra konani ra Se'e ri.

**6** Ko nu ni taji Yandios maa Se'e ya ni kiji ya ini ñuyivi ja'a, ti ni kachi ya:  
Ndi'i ángel ka junukuachi nuu ri, na nachifun i Se'e ri.

**7** Ti siki ángel ka junukuachi nuu ya un ni kachi ya:

Nanu kee ni'in tachi, suni sia'an ka sa'a ángel taka jniñu ta'u Yandios.

Ti nanu kundee yañu'un un ja'ma taka ja kayu nuu, suni sia'an ka kundee taka ángel un jiin taka jniñu ta'u Yandios.

**8** Ko siki Se'e ya ni ka'an ya:

Maa ra kuu Yandios, ti ta'u ra jniñu ja kuu saa ni.  
Ti taka jniñu ta'u ra, kuu mani jniñu ndaa.

**9** Nini ñukuu ini ra ja sa'a ra niña jniñu va'a ja kuni maa Yandios.  
Ti jito u'u ra taka jniñu kue'e.

Ti ru'u, ja kuu ri Yandios ra, ni tatu ri ro'o iiñ jniñu ña'nu ga ja kuu taka ga ja ka junukuachi nuu ri.

Ti jiin jniñu ña'nu ga un ni sa'a ri ja vi'i ga na kusii xaan ini ra ja kuu taka ga ja ka junukuachi nuu ri.

**10** Ti suni kachi Yandios jiin Se'e ya:

Maa ra kuu ja ndisojniñu ña'nu, ti undi nuu kuiti ni xnukoo ra ñuyivi ja'a.  
Ti suni maa ra ni sa'a andivi.

**11** Ti taka yukan chi ndi'i naa.

Ko maa ra chi kuchaku ra ja kuu saa ni.

Ti taka ja iyo un chi ndi'i kuu ava, ti kutu'u nanu iiñ sa'ma.

**12** Ti maa ra nachijna'nu ra yukan nanu iin sa'ma, ti ndi'i nasama ra. Ko maa ra chi jankivi nasama ra. Ti tu ndi'i kuiti kivi kuchaku ra.

**13** Ni tu ni kachi ya jiin iin ángel:

Kuncha ra nda'a kua'a ri ti kuña'nu ra. Ti na chindee ri ro'o ja na kundee ndi'i kuiti ra jiin taka ja ka jito u'u ro'o.

Ni kachi ya.

**14** Ti taka ángel un vasu tu ka iyo yiki kuñu, ko jini va'a nava ta'u Yandios jniñu, ti yachi ka jandatu nuu ya. Ti taji ya kuankoyo ja na chindee taka yivi ka yi'i jiin maa Yandios, ja na ni'in i ta'u i nuu ya.

### *Koto ma xnaay yo ta'u yo nuu Yandios*

## 2

**1** Ti ja kuña'nu xaan ga maa Yandios, yukan kuu ja va'a na chu'un ini yo taka jnu'un ya ja ni jiniso'o yo sik Se'e ya. Chi nu tuu, ti sanaa ti naa ini yo jnu'un un. **2** Chi undi jana'an ni jajniñu Yandios ángel ya ja ni ka ka'an i jnu'un ya, ti ni ka jini yivi ja iyo ndaa jnu'un un. Ti taka yivi ni ka sanj'in ini jiin yivi ja tu ni ka kandixia jnu'un ni ka'an ángel un, ti ni ja'a xaan ya nundo'o ni ka ndo'o i. **3** Nu sia'an ni kuu undi nuu, nusa ti ja kuu vijn, ¿nanu kin nama yo maa yo nuu nundo'o un nu na kusiñn yo nuu ichi Yandios, ti xndoo yo jnu'un kanuu xaan ga un nu? Ti xnakan maa Jito'o ni stuu ya jnu'un ja'a, ti sa ni ka ka'an tuku taka chaa ni ka ñuso'o un, chi ni ka jini da ja iyo ndaa. Ja yukan kuu ja ni ka nakachi tuku da nuu yo. **4** Ti Yandios suni ni chindee ya taka chaa ni ka nakani jnu'un ya. Chi ni sa'a ya jiin da ja na sa'a da ndi siin ndi siin jniñu nava na nakuni yo ja kuña'nu xaan ndixia ya. Ti suni ni ja'a ya Espíritu Santo nuu iin iin da. Ti ni sa'a Espíritu un jiin da ja ni ka sa'a da tijní nuu jniñu ña'nu, sia'an nava kuni maa Yandios.

### *Ni kii Jesúz nanu yiki kuñu yivi naa i*

**5** Ti Yandios ansu nuu taka ángel ya ni ja'a ya jnu'un ja na kundisojniñu i nuu ñuyivi ja kii inga kivi, chi sa nuu Se'e ya ni ja'a ya jniñu un. Ti sik ñuyivi kii un kuu ja ka'an ri ja'a. **6** Chi su'va yoso nuu tutu ii ja ni ka'an rey David najana'an jiin Yandios:

¿Nau kuu yivi ñuyivi ja'a ja ñukuu ini ni nuu i nu?

¿Xi nau ja kuu yivi kanchuku nuu ñuyivi ja'a ja nakutu ini ni ja kuu i nu?

**7** Tu ni sa'a ni i ja na kundisojniñu i nuu ni nanu ka kandiso jniñu taka ángel ka junukuachi nuu ni.

Chi jaku ni kivi vekoyo i ja na kundisojniñu i nuu ni.

Ko ni sa'a ña'nu ndixia ni yivi ni chiñu'un maa ni.

Ti ni ja'a jniñu nuu i ja na kuña'nu i sik taka ja ni sa'a ni.

**8** Ti tendi'i ja iyo nuu ñuyivi ja'a, ni sa'a ni ja na kuña'nu i nuu.

Kachi tutu.

Ti vasu ni sa'a Yandios ja na kuña'nu i nuu tendi'i ja ni sa'a ya, ko tu ni kendo ni iin ndajniñu ja tu ni kuña'nu i nuu. Ti vasu jandaa kuu yukan, ko changa ga kuni yo ja kuña'nu i nuu tendi'i ja iyo. **9** Ko vijn na ti ni chaku ndaa ini yo ja Jesúz, ja ni xnukuu ga ya ja kuu jaku ni kivi nuu taka ángel Yandios ja na ko ndo'o konene ya ti na kuñu ya. Ko chaku ini yo ja jiin jniñu ña'nu ni sa'a Jesúz, nu ni ji'i ya ja kuu tendi'i yivi, ti vijn vñi xaan ni nduña'nu ga ya. Ti tendi'i ni ja ka iyo vijn ka ja'a ja yifi'un nuu ya. Yukan kundaa ja ni kunda'u ini Yandios nuu yivi naa i, chi ni taji ya Jesúz ja ni ji'i ya nuu tendi'i yivi naa i.

**10** Ti taka ja iyo ja kuu maa Yandios kuu. Ni sa'a ya chi ni kusii ini ya. Ti kuni Yandios ja kua'a xaan se'e ya na kinkoyo i nuu ta'u ya jniñu, nuu vñi xaan na

nduña'nu i jiin ya. Ti ja yukan ni choxnuu ya Jesús ja na koo ndo'o koo nene ya nava na kundaa jniñu ni ja'a ya nuu Se'e ya. Sia'an ni sasiñ ya Jesús ja na koo ndo'o koo nene ya nundo'o un nava na kotu'va ya jiin jniñu kanuu ga un. Chi mani maa Jesús ni sa'a jniñu ña'nun, ja'a yivi naa i ja ni nama ya i nuu Yandios. <sup>11</sup> Chi maa iin ni Jesús sa'a ya ja na kuxio yivi naa i nuu jniñu kue'e ti na nduu i se'e Yandios. Ja yukan kuu ja maa Se'e Yandios, ya kuu Cristo Jesús, tu kukanuu ya ka'an ya ñanijna'an ya ka kuu yo, <sup>12</sup> chi yoso nuu tutu ii Yandios ja ni ka'an Jesús jiin Tata ya:

Na xndaku ndaa na jnu'un ni nuu tako ñanijna'an na.

Tí ma'ñu nuu ka ndututu i jiin na, na kata kuaka na himno jiin i ja kuu i chaa ña'nun.

<sup>13</sup> Ti suni ka'an ya tuku ja iin nuu ya jiin taka yivi ja ka kuu i ñani ya:

Ru'u chi ñukuu ndaa ini ri maa Yandios.

Tí kachi tuku ya:

Ja'a kancha ri jiin taka se'e Yandios ja ni ja'a ya nuu ri ja na kunchuku i jiin ri.

Ni kachi Jesús.

<sup>14</sup> Ti siki taka yivi ñuyivi ja'a ja ja ni ka nduu se'e Yandios, suni ka chaku i kanchuku i jiin yiki kuñu i, ti suni sia'an ni chaku Jesús nuu ñuyivi ja'a nanu yiki kuñu iin yivi nava na kuñu ya ja'a yo. Ti jiin jniñu ña'nun, ja ni ji'i ya ja kuu yo'o. Yukan ni xnaa ya jniñu ni sa'a ja'l'u un ja ni skivi yivi naa i nuu kuachi i ti naa i. <sup>15</sup> Ti suni jiin jniñu ña'nun ja ni ji'i ya ja'a yo, ti ni chajyo ya taka yivi nuu jnu'un yu'u ja ka yu'u i kuu i, chi ka yu'u i ja jaa kivi kuñu i. <sup>16</sup> Chi jandaa ndixia kuu ja tu ni kii Jesús nuu ñuyivi yo ja nama ya taka ángel ya jiin jniñu ña'nun. Chi su'va ni kii nama ya yivi ka kuu jna'an tata yo Abraham najana'an. <sup>17</sup> Ti siki ja ni nama ya yivi naa i, nusa ti iin ni kuu ja jiin yivi, siki taka ja ka ndo'o i nuu ñuyivi ja'a. Tí sia'an kundaa ja kuu ya iin sutu kuña'nu nuu Yandios, ja ni kunda'u ini ya yo'o, ti ni siuku ndaa ya jiin taka jniñu ni tatu Yandios nuu ya. Ja yukan kuu ni soko ya maa ya ja kuu yivi ja na kenchaa kuachi i, nava tukaa kuiti ini Yandios nuu i. <sup>18</sup> Chi suni undi maa ya ni ndo'o ya ja ni jito nchaa ya nundo'o un. Ti ja yukan kuu ja chindee chituu ya yivi jitonchaa nundo'o un nuu i.

### Kuña'nu ga Jesús ja kuu Moisés

## 3

<sup>1</sup> Nde'e naa ra ñani, ja ka jini yo taka jniñu ña'nun ni sa'a Jesús ja kuu yo'o, ja jiin jniñu un ni ka kusiñ yo, ti ni ka ndivi yo nuu Yandios. Sia'an ni sa'a Yandios chi ni kunda'u ini ya taka ro'o ja na nita'u ra ti kinkoyo ra nuu ta'u ya jniñu. Ti vijnal kuni ri ja na ku'un ini ra Jesús, chi siki jnu'un ka kandixia yo un ti ka'an ndaa yo ja Jesús kuu maa apóstol kuña'nu ga ja ja ni stuu ya jnu'un Yandios, ti maa ya kuu sutu kuña'nu ga nuu Yandios. <sup>2</sup> Ka jini va'a ra ja ni siuku va'a Jesús taka jniñu ni tatu Yandios nuu ya, nu ni taji ya na sa'a ya jniñu apóstol kuña'nu, ja kuu ya iin sutu kuña'nu ga. Ni siuku ndaa kuiti ya jniñu un nanu ni siuku ndaa iin chaa Israel jana'an ja ni nani Moisés, na ni siuku ndaa da taka jniñu ni tatu Yandios nuu da, na ni janukuachi da nuu ñuu ya, ja undi jana'an un ni kachi Yandios ja ka kuu i maa yivi nación ya, ti sia'an va'a ni junukuachi Moisés nuu i. <sup>3</sup> Tí kuña'nu xaan ga Cristo ja kuu Moisés, chi ni ni'in ga ya ja yíñu'un nuu yivi sia'an nanu ka ka'an va'a yivi siki iin chaa sa'a iin ve'e ti ansu maa ve'e un. <sup>4</sup> Chi taka ve'e un ka iyo yivi ni ka sa'a. Suni sia'an taka ja iyo ni kuu jiin nda'a maa Yandios.

<sup>5</sup> Ti Moisés ni siuku va'a da jiin jniñu da ja ni junukuachi da ve'e Yandios undi naa jana'an. Ti taka jnu'un ni ka'an da, ja ni ja'a Yandios nuu da. Jiin jnu'un un ni xna'an ndaa da ti ni ja'a da jandaa siki iin kivi ja kii. <sup>6</sup> Ti vijnä ndiso jniñu maa Cristo nuu ve'e Yandios, chi kuu ya maa Se'e Yandios ja ndiso ya jniñu ve'e maa Tata ya. Ti ja kuu ve'e ya yukan ka kuu yo'o naa yo siki ja ka yi'i yo jiin ya. Ti yukan kuu jandaa nu ni ini yo na kandixia yo Cristo, ya ndiso jniñu ña'nu ja ni taji Yandios. Ti jiin yukan kusii ini yo ka ñukuu ini yo ja ni'in ta'u yo nuu Yandios.

### *Yivi ka kandixia ndetatu i nuu kancha Yandios*

<sup>7</sup> Ja yukan na chu'un ini ra jnu'un ka'an Espíritu Santo nuu tutu ii Yandios: Vijnä ti nu na chunso'o ra naa ra jnu'un ka'an Yandios naa ra.

<sup>8</sup> Ti koto kuni'in ini ra nanu ni ka kuni'in ini yivi Israel na jana'an. Ti ni ka ndonda i siki jnu'un Yandios, chi tu ni ka jandatu i nuu Yandios na ni ka jikonuu i nuu ñu'un te'e un.

<sup>9</sup> Yukan ni ka skexiko velu ra ru'u na jana'an, kachi Yandios, vasu ni ka jini da taka jniñu ña'nu ni sa'a ri nu uu xiko kuiya.

<sup>10</sup> Ja yukan kuu ja ni kuiti ini ri nuu yivi jana'an un. Ti ni kachi ri: Nini ka kuu jika ini ra nuu ja kuu iin ichi va'a. Ti tukaa ka kuni kundikun ra ichi va'a un nasa xndaku ri.

<sup>11</sup> Ti siki yukan kuu ja ni kuiti ini ri, ti ni chisojnu'un ndaa kuiti ri nuu i, ja tukaa kuu nanita'u i ja na kivi i ndetatu i jiin ri nuu kancha ri. Kachi tutu.

<sup>12</sup> Koto maa ra naa ra ñani. Koto ma kuni'in ini ra ja nakaka yata ra jiin jnu'un ni ka kandixia ra ti tukaa kuandatu ra nuu jnu'un ya, chi maa ya kuu Yandios chaku. <sup>13</sup> Ja yukan kuu ja kanuu ja na xndaku ni'in nuu jna'an ra naa ra ti kua'a jnundee ini jna'an ra. Ti sia'an sa'a ra taka kivi vijnä naa ra, chi yi'i xaan kuan kuu kivi ja'a, ti tu jini yo nasa ga iyo ja na chindree jna'an yo, ti na xndaku ni'in nuu jna'an yo. Ko kanuu ja na xndaku ni'in nuu jna'an ra vijnä nava ni iin ra tu nduni'in ini siki jnu'un ya, ja xnda'u kuachi un ro'o. <sup>14</sup> Ko nu na siuku ndaa yo jnu'un ya nava ni keja'a yo, na ni keja'a kandixia yo jnu'un Yandios siki Jesús, ti sia'an na siin yo undi kivi sandi'i ni ga. Ti kivi un kuñukuu ini yo ja nduña'nú yo jiin Cristo nuu ta'u ya jniñu. <sup>15</sup> Chi ka'an tutu ii Yandios:

Vijnä ti nu na chunso'o ra jnu'un ka'an Yandios, ti tu kuni'in ini ra naa ra nanu ni ka nduni'in ini yivi Israel najana'an, na ni ka ndonda i siki jnu'un Yandios.

<sup>16</sup> ¿Ka jini ra nau yivi ka kuu ja ni ka ñuso'o jnu'un Yandios ti ni ka nduni'in ini un nu? Suu tendi'i yivi ni yinda'a Moisés ja ni keni'in da ñuu Egipto.

<sup>17</sup> ¿Nusa ti ka na'an ra nau nuu yivi ni kuiti ini Yandios ja ni kuu uu xiko kuiya nu? Suu nuu yivi ni ka sa'a kuachi ja tu ni ka kandixia jnu'un Yandios, ti tendi'i ni ka jil'i undi nuu ñu'un te'e un. <sup>18</sup> ¿Ti nau nuu yivi ni chisojnu'un Yandios ja tukaa kivi kuiti i ndetatu ri jiin ya nusa? Suu taka yivi ni ka nduni'in ini nuu jnu'un ya yukan. <sup>19</sup> Ja sia'an ti ni jini ndaa yo ja tu ni kuu kivikoyo i nuu ñu'un ni chisojnu'un Yandios nuu i, siki ja tu ni ka kandixia i maa ya.

## 4

<sup>1</sup> Ti ni kee ndixia yu'u Yandios ja kivikoyo yivi nuu kancha ya ja na ndetatu i, ti tu kuu kenchaa Yandios jnu'un un. Ko siki maa yo ja kanchuku yo kivi vijnä, na kukutu ini yo koto yo jnu'un un, nava ni iin yo tu kendo ja tu ni'in yo nuu kivi yo, ja na ndetatu yo nuu kancha ya. <sup>2</sup> Chi suni ni ka jini yo jnu'un va'a ya nanu ni ka jini yivi Israel najana'an. So ja nuu maa i, chi tu ni jañiñu

jnu'un ni ka jiniso'o i un, chi tu ni ka kandixia i. <sup>3</sup> Ko yo'o ja ka kandixia yo jnu'un Yandios, ti jandaa ndixia kuu ja kivi yo nuu kancha ya ja na ndetatu yo jiin ya. Ti siki yivi ja tu ka kandixia un ni kachi ya:

Siki ja ni kuiti ini ri nuu i, ti ni chisojnu'un teyii ri,  
ja tu kivikoyo kuiti i nuu kancha ri ja na ndetatu i jiin ri.

Siukan ni ka'an Yandios vasu ja ni satu'va ya nuu ndetatu i undi na ni xnukoo ya fiuyivi. <sup>4</sup> Chi siukan yoso jnu'un un nuu tutu ii Yandios siki kivi kuu uxia:  
Nu ni jinu taka jniinu ja ni sa'a ya, ti ni ndetatu ya kivi kuu uxia.

<sup>5</sup> Ti suni sia'an yoso tuku nuu tutu ii Yandios:

Tu kivikoyo kuiti i nuu kancha ri, ja ndetatu i jiin ri.  
Ni kachi ya.

<sup>6</sup> Nusa ti inga yivi kuu ja kivi nuu kancha Yandios ja na ndetatu i jiin ya. Chi yivi Israel najana'an ja ni ka jiniso'o i jnu'un ya, tu ni ka kivi i nuu ndetatu i jiin ya, chi tu ni ka kandixia i jnu'un un. <sup>7</sup> Ja yukan kuu ja ni ndaku ni'in tuku ya undi inga jinu na ni chaku chaa ni kuu rey nación Israel najana'an ja ni nani David, chi suni ni kachi ya nuu David nanu ka'an ya undi vijna, ti ni chiso David:

Vijna ti nu ka jiniso'o ra jnu'un ka'an Yandios, ti koto kuni'in ini ra nusa.

<sup>8</sup> Chi Josué ni kuu chaa ni skivi yivi Israel jana'an fiu'un nuu kunchuku i, vasu tu ni kuu maa fiu'un nuu ni chisojnu'un ya undi vijna. <sup>9</sup> Vijna iyo tu'va iin fiu'un kanuu ga nuu kivikoyo yivi ka yi'i jiin Yandios, ti yukan ka ndetatu ndixia i jiin ya. <sup>10</sup> Chi yivi ja kivi nuu ndetatu Yandios ti ndetatu i, ko ja ni ka sa'a i jniinu va'a nuu fiuyivi ja'a. Ndetatu i sia'an nanu ni ndetatu Yandios kivi ni sinu ya na ni sa'a ya fiuyivi. <sup>11</sup> Nusa ti na koto yo maa yo ja na kivi yo nuu kancha Yandios ti na ndetatu yo. Ti koto nandeokava ini yo nanu ni ka sa'a yivi Israel jana'an ja tu ni ka kandixia i jnu'un ya.

<sup>12</sup> Chi jnu'un Yandios kuu ja chaku, ti siuku jnu'un ya nava kuni maa ya, chi kuu jnu'un un nanu iin yuchi ja xaan ndinduu yu'u, chi yeni'no undi ini yo, ti sa'a ja na jnuu kajji injinuni yo. Jnu'un ya kuu nanu iin yuchi ja sasiin yiki yo jiin kuñu yo, chi jnu'un un stuu kajji tendii ja ndo'o ini yo jiin tendii ja kuni sa'a yo. <sup>13</sup> Ti jandaa ndixia kuu yukan chi tu iyo ni iin yivi, ni tu ni iin ndajniinu ja chisa'yii ja tu kuni ndijin Yandios, Ti maa ya naki'in ya jnu'un siki taka jniinu un, chi ndii vii ni jini va'a ya, ti ni iin tu kendo sa'yii ja kuu nuu Yandios.

### *Jesús kuu sutu kuña'nu ga*

<sup>14</sup> Jesú, Se'e Yandios kuu ya, ti jiin maa ya ka yi'i yo, ja kuu ya sutu kuña'nu ga, ti ja ni ndaa ya andivi nuu kancha Yandios. Ti yukan na kukutu ini yo jiin jnu'un ya ja na kachi nadaa yo ja ni ka kandixia yo ya. <sup>15</sup> Chi maa ya kuu sutu kuña'nu ga ja kunda'u ini ya yo'o, ja so sa'u ini yo jiin jnu'un ka siuku yo. Ti taka ja ndo'o yo ja skanda ini yo, suni siukan ni ndo'o maa ya, vasu tu kuiti naa kuachi ya. <sup>16</sup> Nusa ti na kotu'va yo nava tu yu'u yo kin tu'va yo nuu Yandios, chi maa ya ta'u jniinu nuu yo, ti nuu maa ya na kakanta'u yo. Chi mani ya jiin yo, ti maa ya kunda'u ini ya yo'o. Ti siki yukan iyo ndaa ini ya, ti chindee ya yo'o taka jinu ja nandi'i yo jnu'un ndee ini.

## 5

<sup>1</sup> Ti taka sutu nación Israel ja ni ka kuña'nu na undi jana'an, maa Yandios ni nakaji chaa un nuu yivi, ti ni janji ya da ja na kuncha da ma'ñu sava jiin yivi ja kuu nuu Yandios. Ti jniinu da kuu ja soko da tijnii nuu ndajniinu jiin kuiti ja kuu nuu Yandios ja kuu nuu kuachi ni ka sa'a yivi naa i. <sup>2</sup> Ti xndaku vita da nuu yivi nu tu ka chaku va'a ini i jnu'un Yandios ja tu ka siuku va'a i jnu'un un. Kuu sa'a vita ini da jiin yivi un, chi suni maa da kuu iin yivi, ti suni ndo'o

da taka nundo'o ja ka ndo'o yivi un. <sup>3</sup> Ja siki yukan suni kanuu ja na soko da kuiti nuu Yandios ja siki kuachi maa da, ti ansu nini ja kuu kuachi yivi naa i. <sup>4</sup> Ti ni iin chaa tu ni kuu saña'nu da maa da ja nduu da iin sutu kuña'nu ga, chi mari maa Yandios kuu ja ni nakaji chaa un, nanu ni nakaji ya Aarón undi najana'an. <sup>5</sup> Suni sia'an ni kuu jiin Cristo, ansu maa ya ni saña'nu ya maa ya ja nduu ya maa sutu kuña'nu ga, chi su'va maa Yandios ni ja'a ya jniñu ña'nu nuu ya ja ni ka'an ya sia'an:

Maa ra kuu Se'e ri. Vijnna ti sa'a ri ja na nduña'nu ra, chi maa ri kuu Tata ra.

<sup>6</sup> Ti suni ka'an tuku ya nuu tutu ii:

Kuu ra sutu ja kuu saa ni, sia'an nanu ni kuu Melquisedec.

Kachi tutu.

<sup>7</sup> Ti Cristo, nu ni kuncha ya nuu ñuyivi ja'a, vasu ni jikanta'u ya, ni nde'e ya, ti ni kana jiin ko'o ya ja ni ka'an nda'u ya jiin Yandios, ja na nama ya Se'e ya nava tu kuu ya. Ti jandaa kuu ja kuu chajyo ya Jesúus nuu nundo'o un niku, ko ni siuku ya nava ni kachi ya ja na kondo'o Cristo. <sup>8</sup> Chi vasu maa ya kuu Se'e Yandios, ko jiin taka nundo'o ni jito ya, yukan ni stuu ndijin ya nuu yo ja yñiu'un ni jandatu ya nuu Yandios. <sup>9</sup> Ti nu ni siuku ndaa kuiti ya taka jniñu un, ti yukan ni kundaa kuiti ja maa ya kin nama ya yivi naa i nu na kandixia ndaa i jnu'un ya, ti sa'a ya ja na kuchaku i naa i ja kuu saa ni. <sup>10</sup> Siki yukan ni nakani Yandios maa ya ja na kuu ya maa sutu kuña'nu ga, sia'an nanu ni kuu Melquisedec.

### *Na koto yo maa yo ja tu xndoo yo jnu'un ni kandixia yo*

<sup>11</sup> Ti sia'an iyo kua'a jnu'un ja kuni xndaku ri nuu ra, ko yii ja xndaku ndi'i ri jnu'un un, chi ro'o naa ra ndee uun ini ra ja tu ka chu'un ini ra. <sup>12</sup> Chi ja ni kuna'an ni ka kandixia ri jnu'un un, ti ja kuu xndaku ra jnu'un Yandios nuu yivi, ko siki ja ndee uun ini ra yukan kuu ja tu ka jitu ini ra, chi sa su'va ka kuni ra ja na xndaku tuku yo nuu ra nava ni ka keja'a ra undi nuu. Chi ka kuu ra nanu suchi yikin ja ka jii i niñia lechu ja tuja'i kuu kaji yi staa. Sia'an ka kuu ra chi tu ka chaku ini ra ja na kutu'va ra uu ga jnu'un Yandios. <sup>13</sup> Ti sia'an ka kuu ra nanu suchi yikin, chi tu ka chaku va'a ini ra jnu'un Yandios nava ni ka keja'a ka kandixia ra Cristo. Chi tu ka chaku ini ra jnu'un kachi Yandios ja tukaa jna'nu ndatu yo siki kuachi yo, ti vijnna na kaka ndaa yo nava iyo maa ichi ya. Tu ka chaku ini ra jnu'un un. <sup>14</sup> Ko taka ga yivi ni ka kandixia jnu'un Yandios, chi ka iyo tu'va inijnuni i, chi ka jitu ini i ti ka skua'a i jnu'un ya. Ti siki un ni ka jnuu ini i ja sasiñ i nau kuu ja va'a ti nau kuu ja kue'e.

## 6

<sup>1</sup> Ja yukan kuu ja tukaa kanuu ja xndaku tuku ri jnu'un Yandios ja ni ka kutu'va ra undi nuu na ni ka keja'a ka kandixia ra Cristo. Ti vijnna kanuu ja na kutu'va ra inga jnu'un siki Cristo. Tukaa nandi'i ja na xndaku ri ja na nakani ini ra nuu kuachi ra nava tu naa ra. Tukaa ga kanuu xndaku ri ja na kandixia ra jnu'un Yandios siki Cristo. <sup>2</sup> Tukaa ga nandi'i ja na xndaku ri jnu'un un nuu ra naa ra, xi siki jnu'un skuanducha, xi jnu'un ja chaa yo nda'a yo xini yivi, xi jnu'un siki ja nandoto ndiyi, xi jnu'un siki ja jna'nu ndatu yivi ja kuu. Tukaa ga kanuu kuu ja na xndaku ri jnu'un un nuu ra. <sup>3</sup> Ko vijnna ti va'a ga ja na xndaku ri tijni ga jnu'un kanuu ja kuu siki Cristo. Ti sa'a yo yukan nu na kua'a ya jnu'un kuchaku nuu yo ti'lí ga.

<sup>4</sup> Chi ka iyo yivi ja ni ka jiniso'o i jnu'un Yandios siki Cristo. Ti ni ka xndoo ndixia i ichi kue'e ni ka jika i un nu ni ka jiniso'o i jnu'un Yandios siki Cristo, chi ni ka nakuni i ja Yandios, Ya kancha andivi, ni kunda'u ini ya maa i. Ti suni ja ni ka ni'in i Espíritu Santo. <sup>5</sup> Ti jnu'un Yandios ja ka'an siki Cristo, ja ni ka nakuni va'a i jnu'un un, ti ni ka jini i jniñu ña'nu ga ja ni ka jna'an i naa

ni ka keja'a ka kandixia i. Ti taka jniñu ña'nu un na koo kua'a ga ja kuu inga kivi kii. <sup>6</sup> Ti siki yivi un, nu na nakaka yata i ja tukaa ga kandixia i jnu'un Yandios siki Cristo, yukan ti tukaa ga kuu nandeokuñi i nuu jnu'un Yandios ja na nakani ini i nuu kuachi ka'nu un, chi kuu un nanu ja Kankuachi tuku i ja'a Cristo ja tu kuu ya maa Se'e Yandios, nanu ja iin ni kuu i jiin yivi ja ni ka jatakaa ya nuu nda cruz. Ti siki kuachi ka'nu un ni ka naa ini i ti tukaa ga ka ñukuu ini i Cristo, ti yukan kuu ja ka yisikinchaa i Yandios nuu taka ga yivi, chi skata i maa i yaku i nuu chitu un jiin jnu'un un. <sup>7</sup> Ti yivi un kuu i nanu ñu'un ja nu kuun sau nuu ti ndi'i ni nducha un ji'i. Ko nu ni kuva'a itu nuu, ti va'a koo jiin taka chaa ka sajniñu nuu ñu'un un. Nu sia'an ti kusii ini Yandios jiin chaa un. <sup>8</sup> Ko nu nakua'a mani iñu jiin inga nuu yuku ndeva'a, yukan ti kachi chaa xiin ñu'un un ja va'a ga na kayu jiin ndi'i ja iyo nuu. Ti suni siukan jna'nu ndatu yivi nu na nakaka yata i.

### *Jiin jnu'un ndee ini ti kundee yo*

<sup>9</sup> Ti siki taka ro'o ñani, vasu ka'an ri taka jnu'un un jiin ra, ko ñukuu ndaa ini ri ja tu jna'nu ndatu ra. Chi su'va ni chindree ya ro'o jiin taka jniñu ni sa'a ya ja kuu ra naa ra, ti jiin yukan keta'u ra nuu ya. <sup>10</sup> Chi jini va'a yo ja iyo ndaa kuiti ini Yandios. Ja yukan kuu ja tu naa ini ya taka jniñu va'a ka sa'a ra, nanu kunda'u ini ra ñani jna'an ra, ja suni ka yi'i da jiin Cristo, jiin ja ni ka junukuachi ra nuu da, ti sia'an siin ra jiin jniñu va'a un. <sup>11</sup> Ko ndiyo ini ri ja na chu'un ini ra ti siin ra jiin jniñu va'a un undi kivi na nakuaka Yandios ro'o, ti sa kuñukuu ini ra ja ni'in ra ta'u ra nuu ya. <sup>12</sup> Ko tu ka'ncha ini ra nanu ka sa'a chaa kuxi un. Su'va kukutu ini naa ra ti siin jiin jnu'un ndaa Yandios sia'an nava ni ka kandixia ndaa sava yivi, ti ka siuku ndaa i, ti keta'u i nuu Yandios nava ni chiso jnu'un ya.

<sup>13</sup> Na ni chisojnu'un Yandios nuu tata yo Abraham jana'an, ti ni ndakuni'in ya maa ya ja ni ka'an ndaa ya, chi tukaa ga nau inga ndakuni'in ya ja kuña'nu ga, chi maa iin ni ya kuu ja ja'a jandaa ya. <sup>14</sup> Ti ni ka'an ya: "Jandaan ndixia ja va'a xaan na sa'a ri ro'o, ti sa'a ri ja na ndukua'a xaan jna'an ra", ni kachi Yandios jiin Abraham. <sup>15</sup> Ti ni ndatu kuee Abraham kua'a kuiya undi ni ni'in da nava ni chisojnu'un Yandios nuu da. <sup>16</sup> Ti nu na chisojnu'un taka yivi, ti ndakuni'in i sivi iin chaa kuña'nu ga ja kuu maa i. Nu iyo iin jnu'un ndajnu'un i, ti nu iin chaa ka'an chisojnu'un da jiin sivi Yandios, yukan ti kukuee ni, ti tukaa ga ndajnu'un da.

<sup>17</sup> Ti yukan maa Yandios, vi'i ga kuni ya ja na kenda ndijin ga taka jnu'un ni chiso ya, ja tu kuiti nakani yata ini ya siki taka ja ni keyu'u ya ja kua'a ya nuu i. Yukan ti ni chisojnu'un ya jiin i. <sup>18</sup> Jiin yukan chaku va'a ini yo ja tu kuiti nakani yata ini ya. Ti jandaa kuu yukan chi ni chisojnu'un ndaa ya ja siuku ya jnu'un ya. Ja yukan kuu ja ni nama ya yo'o kivi na ni ka nakani ini yo, ti ni ka xndoo yo taka jnu'un ndeva'a nava ni kunchuku yo. Yukan kuu ja ka iyo jnu'un ndee ini yo. Ti ka ñukuu ndaa ini yo ja na siuku ya jnu'un ya nuu yo, ti na ni'in yo ta'u kua'a ya nuu yo. <sup>19</sup> Ti ka ñukuu ini yo ni'in yo ta'u ja kua'a ya nuu yo. Chi jandaa ndixia kuu ja ni ja'a ya jnu'un un nava tu na tu'u ini yo, nanu tu kanda iin barco nu na chi'i kunu yo ancla chii nducha, ti tu skanda barco un nu yi'i ancla un. Ti sia'an kuu jnu'un ni chisojnu'un Yandios nuu yo. Chi nu na kukutu ini yo ti kuñukuu ini yo ja kivi yo nuu kancha ya, nanu ni kivi sutu kuña'nu un ichi jata sa'ma yindaka ini ve'e ii Yandios. Chi vijnai ti yo'o ja ka ñukuu ndaa ini yo ya, ti kuu kivi yo nuu kancha maa ya vijnai. <sup>20</sup> Ti kivi ndixia yo, chi xnakan ni kivi Jesúس ja ka'an ya ja'a yo. Ti sia'an ka'an ya, chi ja kuu saa ni ni nduu ya iin sutu kuña'nu ga, nau ni kuu sutu Melquisedec najana'an.

## Kuu Jesús sutu nanu ni kuu Melquisedec

### 7

<sup>1</sup> Ti maa Melquisedec ni kuu da rey ñuu Salem, ti ni kuu da sutu nuu Yandios kuña'nú xaan. Ti ni jan nujna'an da Abraham na vendii da nu ni kundee da ni ka kanaa da jiin taka ga rey un, ti jnu'un ni jikanta'u da nuu Yandios kuu ja na chindee ya Abraham. <sup>2</sup> Ti taka uxi ndajniñu ja ni skenchaan Abraham nuu taka rey un, ni ja'a da iin iin taka yukan nuu sutu Melquisedec. Ti sivi Melquisedec kuni ka'an "Rey ja sa'a niña jniñu ndaa." Ti suni nani da rey ñuu Salem, ti jnu'un Salem kuni ka'an "Rey sa'a ja na kukuee." Ti jiin yukan suni nani da: "Rey ni sa'a ja ni iyo ndee, ni iyo sih ini yivi." <sup>3</sup> Ti tu ka'an tutu ii Yandios jnu'un siki Melquisedec ja ni iyo tata da, ni iyo nana da, ni tu ndenda ni iin jna'an da jana'an. Ti suni tu ka'an nuu tutu ii nama ni kaku da, ni nama ni ji'i da. Chi ni kuu da sutu nanu kuu Jesús, Se'e Yandios, chi ja kuu saa ni ni siin jniñu da ja kuu da sutu.

<sup>4</sup> Ti kani ini taka ra naa ra nasa ni kuña'nu Melquisedec, ja undi tata yo Abraham najana'an. Suni ni kuña'nu da, ko ni ja'a da iin iin ndajniñu nuu taka uxi ja ni kenchaan da nuu taka ga rey un. <sup>5</sup> Ti ja ka jini yo ja taka uxi ndajniñu ja ka ni'in yivi, na kua'a i iin iin nuu taka chaa ka kuu sutu, chaa ni ka kuu jna'an Leví najana'an. Ti sia'an ni kuu nava ka'an ley Moisés. Ti ni ka ki'in da nuu yivi vasu ka kuu i jna'an da, vasu maa iin ni Abraham ni kuu tata da naa da. <sup>6</sup> Ti Melquisedec vasu tu ni kuu da jna'an Leví jana'an, ti vasu sia'an, ko ni ki'in da iin iin nuu siki taka uxi ja ni ja'a Abraham nuu da. Ti suni ni jikanta'u da nuu Yandios ja na chindee ya Abraham, vasu Abraham ni kuu maa chaa ni chisojnu'un ya nuu.

<sup>7</sup> Ti jini va'a yo ja chaa kuña'nu ga kuu ja ni jikanta'u nuu Yandios ja kuu iin chaa nukuu. <sup>8</sup> Ti vijnna chi taka sutu ka ki'in da iin iin nuu siki taka uxi ja ka ñava'a yivi naa i, vasu taka sutu un suni kuū da, ti nasia'a da jniñu da nuu inga chaa. Ti Melquisedec suni ni ki'in da, ko ja siki maa da chi ka'an tutu ii Yandios ja siin jniñu da nanu ja chaku da undi vijnna. <sup>9</sup> Ti suni kuu ka'an yo ja Leví, chaa ni ki'in iin iin nuu taka uxi ndajniñu ka ñava'a yivi, ti suni sa'a yo ja nuu maa da ni ki'in Melquisedec iin iin nuu siki taka uxii un. Chi ja ni ja'a Abraham nuu Melquisedec, ti yukan kuu ja suni ja ni ja'a da nuu maa Leví jiin tendi'i jna'an da ja kii. <sup>10</sup> Chi nuu jna'an da ja ni xnukoo tata yo Abraham jana'an ni kuu Leví, ti vasu changa ga kaku da kivi ni ka ndejna'an Melquisedec jiin Abraham. Ti nanu ja ni ja'a Leví uxi nuu iin iin un kuu ja ni ja'a Abraham.

<sup>11</sup> Ti nuu jna'an Leví jana'an ni kii sutu Aarón jiin taka sutu ni kikoyo ga. Ti taka da ni ka xna'an ley Yandios nuu yivi Israel jana'an. Sa ti ni kuu sa'a ndixia da ja kendo ndaa yivi jiin ley un niku, ti va tukaa kanuu ja na nukuiñi inga nuu sutu ja kuu Aarón jiin taka ga jna'an da. Ti inga nuu sutu un kuu Cristo ja kuu nanu ni kuu Melquisedec. Chi sa ti ni ka siuku ndaa ndi kuiti da jiin taka jnu'un un, va ja ni ka kundaa taka yivi Israel niku. Va tu kanuu ja kii nukuiñi inga sutu nuu jna'an Aarón, ko ja yukan su'va ni kii inga sutu nanu ni kii sutu Melquisedec. <sup>12</sup> Ko nu na nasama inga sutu, ti suni nasama da ley xndaku da. <sup>13</sup> Nusa ti ni sama ndixia ley yukan, chi ka'an nuu tutu ii Yandios ja Jito'o Jesús ni kuu inga nuu sutu, ti ni kaku ya nuu inga jna'an da jana'an, ti nuu jna'an da un ni kaku ya un, ni iin kuiti inga sutu tukaa ni ka kenda un. <sup>14</sup> Chi jini va'a yo ja nuu jna'an Judá ni kaku Jito'o. Ti siki jna'an un tu ni ka'an kuiti Moisés ja ni ka kuu i sutu.

**15** Ti siki yukan jini va'a yo ja Cristo ni nukuiñi ya ja kuu ya inga nuu sutu nanu ni kuu Melquisedec. **16** Ti tu ni kuu ya sutu ja ni ka kaku nuu jna'an Leví nava ni ka'an ley jana'an, chi maa ya kuu sutu siki ja ndiso ya iin jniñu na'nu ja na kuchaku ya ja kuu saa ni, ti tu naa kuiti ya. **17** Chi siki maa Jesús ka'an Yandios nuu tutu ii ya:

Kuu ra sutu ja kuu saa ni, nanu sutu Melquisedec.

Ni kachi tutu.

**18** Ti jniñu ni ta'u ley jana'an ja kuu taka sutu, chi ni naa vijnna, chi tu ni ni'in jniñu ja kendo ja kuu saa ni. **19** Chi ley ni ja'a ya nuu Moisés, tu ni siuku ndaa kuiti un ja kendo ndaa yivi nuu Yandios. Ko vijnna iyo iin jnu'un ndee ini jiin jnu'un ka'an inga sutu un, chi jiin jnu'un un kuyajni yo nuu maa Yandios.

**20** Ja yukan ni ka'an ndaa Yandios ja Jesús kuu sutu yo. **21** Chi taka chaa un, tu ni kachi maa Yandios ja na kuu da sutu. Chi niñi ja kuu maa Jesús ni ka'an kaji Yandios ja na kuu ya sutu, chi ka'an nuu tutu ii:

Ni chisojnu'un teyii Jito'o Yandios, ti tu nakaka yata kuiti ini ya.

Kuu ra sutu ja kuu saa ni, nanu ni kuu sutu Melquisedec.

Ni kachi tutu.

**22** Ti siki jnu'un ni ka'an Yandios un, ni kenda iin jniñu va'a ga ti ansu maa ley jana'an, chi maa Jesús ni siuku ndaa kuiti ya jnu'un teyii ni ka'an Yandios.

**23** Ti taka ga sutu un, chi ni ka iyo kua'a da, ko taka da ni ka jii'i, ti tu ni kuu kuñii da ja kuu saa ni. **24** Ja yukan kuu ja taka sutu un ni ka jii'i da, ko vijnna maa Jesús tu kuú kuiti ya, ti kuñii ya ja kuu saa ni. Ti taka jniñu sa'a ya tu naa, vanuxia chaku ya sia'an ni.

**25** Ja yukan kuu ja ndiso jniñu ya ja na nama ya yivi ja na kuchaku i ja kuu saa ni nu na natu'va i nuu Yandios siki jniñu ni sa'a Cristo. Chi chaku ya sia'an ni ti ka'an nda'u ya ja'a i nuu Yandios.

**26** Ja sia'an kuu ja iin sutu kuña'nu xaan kuu Jesús ja ndiso jniñu ya nuu yo. Chi sutu ii kuu ya, ti tu iyo ni iin kuachi nuu ya, iyo ndoo kuiti ya, ti tu yi'i ya jiin yivi ka sa'a kuachi, chi kuña'nu xaan ga ya ja kuu taka ga jniñu ña'nú, undi nuu maa andivi kuña'nu ya. **27** Ti maa ya tu nandi'i ya ja sa'a ya nanu ni ka sa'a taka sutu ni ka kuña'nu Israel jana'an, ja ni ka kivi da ni ka soko da kuiti ja kuu nuu kuachi maa da xnakan, ti ni ka soko da kuiti nuu kuachi yivi naa i. Chi iin jinu ni soko ya maa ya ja'a yo ja kuu saa ni. **28** Chi jiin ley ni ja'a Yandios nuu Moisés, ni ka nukuiñi taka sutu ka kuña'nu nuu yivi vasu ni ka sa'a da kuachi, ti siki un tu ni kuu ja siuku ndaa kuiti da. Yukan ti kuee ga ti ni ka'an Yandios. Ti jiin jnu'un ni ka'an ya yukan, ni jani ya Se'e ya ja na kuu ya sutu kuña'nu ga, chi maa iin ni ya ni siuku ndaa kuiti ja kuu saa ni.

### *Ka'an Jesús ja'a yo nuu Yandios ja iyo iin jniñu jaa*

## 8

**1** Iin ti jnu'un kanuu ga ja ni ka'an ri un kuu ja'a: ka ñava'a yo iin sutu kuña'nu nanu ni ka'an ri, ti kuña'nu ya nuu andivi, chi kancha ya xiin Yandios nuu ta'u maa Yandios jniñu kuña'nu ga undi andivi. **2** Ti vijnna kuu ya sutu undi andivi nuu junukuachi ya ja'a yo nuu maa ve'e ii nuu Yandios. Ti maa Jito'o Yandios ni sa'a ve'e ii un, ansu iin iin yivi, chi tu kaa un nanu kaa ve'e ii jana'an ja ni ka sa'a yivi. **3** Ti taka sutu ka kuña'nu un ni jani Yandios ja na soko da ndajniñu jiin kuiti ja kuu ta'u nuu Yandios. Ja sia'an kuu ja Cristo Jesús suni iyo na'lín ja ni soko ya nuu Yandios, chi maa ya kuu sutu. **4** Ko sa ti ni kuncha ga Jesús nuu ñuyivi ja'a niku, ti va tuja'i kuu ya sutu, chi ni ka iyo ga sutu ja ka soko da kuiti naya ka'an ley Moisés. **5** Ti jniñu ja ka sa'a sutu Israel un, tu kejna'an iin nuu jiin jniñu ña'nú ga ja sa'a maa Yandios, Ya kancha andivi. Yukan so ka natejna'an da ja ka ndaku ini maa da nasa kuu nava ni

xndaku Yandios nuu da. Ti sia'an kuu chi jini ndaa yo ja Yandios ni xndaku nuu Moisés na kivi ni keja'a sa'a da ve'e ii najana'an xaan, ti ni kachi ya: "Va'a koto nchaa ra nasa sa'a ra taka jniñu nava kaa taka ja ni xna'an ri nuu ra undi xini yuku un", ni kachi Yandios jiin da. <sup>6</sup> Ko vijna chi sa'a Cristo jniñu ñña'nu xaan ga ansu ja ni ka sa'a taka sutu un, chi ndiso ya jniñu nava iyo iiñ jniñu jaa ja va'a xaan ga, chi jniñu un kuu jnu'un ka'nun ga ja ni chisojnu'un Yandios ja sa'a ya.

<sup>7</sup> Chi ley ja kuu jniñu ni ja'a Yandios nuu Moisés, nu ni siuku ndaa kuiti ni kuu, ti tukaa kanuu ja koo inga jniñu, ko tu ni kuu siukan, <sup>8</sup> chi yivi Israel un tu ni ka siuku ndaa kuiti i jiin jniñu yoso nuu ley un. Chi ni ka'an Yandios jiin i nanu kachi tutu ii ya:

Kii kivi ja na nasa'a ri iiñ tratu jaa jiin yivi ñuu Israel jiin yivi ñuu Judá, kachi Jito'yo Yandios.

<sup>9</sup> Ti tukaa koo nanu ni iyo jniñu ja ni sa'a ri jiin taka tata i jana'an Israel na jana'an na ni keni'in ri yivi un nuu nación Egipto.

Ko tu ni ka siuku va'a taka i jiin jniñu yoso nuu ley ni ja'a ri.

<sup>10</sup> Nusa ti su'va na koo jniñu nasa'a ri jiin yivi Israel vijna, undi na jaa kivi un. Ti ja'a kuu jniñu, kachi Jito'yo Yandios.

Sa'a ri ja na nuku'un inijnuni i ley ri, ti na sa'a ri ja na kuñukuu ini i ti na kuandatu i nuu.

Yukan na ti kuu ri Yandios nuu taka i, ti maa i nduu yivi maa ri.

<sup>11</sup> Ti yivi un tukaa nini kuu ja na xndaku nuu jna'an i ja nau kuu maa Jito'o Yandios.

Chi tendi'i yivi un kuni ndaa i ja kuu ri Jito'o, vasu kuu yivi kuachi xi yivi ña'nuga.

<sup>12</sup> Ti siki jniñu jaa un kuu ja kuan ka'nu ini ri nuu kuachi i, ti tukaa ga ndaku ni'in ri kuachi un, chi maa ri kuu Jito'o Yandios.

Ti tukaa kankuachi ri ri siki i ja siki jniñu ndeva'a un.

Ni kachi Yandios.

<sup>13</sup> Ti ja ni ka'an ya ja kua'a ya iiñ jniñu jaa, kuni ka'an un ja tukaa kuajniñu jnu'un ja ni ja'a ya undi najana'an. Ja yukan na ti jini yo ja iiñ ja ni ku tu'u, tukaa kuaníñu. Yukan chaku ini yo ja kuan kuyajni naa.

### *Nasa ni ka chiñu'un yivi Yandios jana'an*

## 9

<sup>1</sup> Ti jnu'un najana'an un ni ta'u ndaa jniñu nasa chiñu'un yivi Yandios, jiin nasa koo se'e ii nuu ñuyivi ja'a. <sup>2</sup> Ti ni ka sa'a i iiñ ve'e ii ja ni ka sa'a i jiin ñii, ti ni iyo uu ve'e. Ti ini iiñ ve'e ja nani ve'e ii, ni kundichi iiñ candelero oro, jiin mesa oro ni kunchuku staa stila ii nuu. <sup>3</sup> Ti ni iyo iiñ sa'ma ndita ja sasiin inga ve'e ja nani ve'e ii xaan ga. <sup>4</sup> Ti ini yukan ni iyo iiñ altar niña oro, nuu kayu sxuxia kutu vixi. Ti suni ni iyo iiñ jajnu nuu kañu'un ley ni ja'a Yandios nuu Moisés, ti ni tu'u siki jajnu un ni ka nakuaka i niña oro, ti ini jajnu un kande iiñ tindo'ja ñu'un iiñ nuu staa ii nani maná ja kuni ka'an staa ni kii undi nuu andivi. Ti suni yukan kande yujnu sutu ni kuñu'nun ni nani Aarón ja ni nenenduu yuku i, jiin laja yuu nuu yoso ley ni ja'a Yandios nuu Moisés. <sup>5</sup> Ti siki jajnu un kanchuku uu nuu ángel ka iyo ndijin ja ka xna'an ja yukan kancha maa Yandios kuñu'nun. Ti jiin ndijin i un ka jasi i nuu niñi kuiti kanchuku yuyu siki jajnu un, ja yukan ni kuu nuu ni iyo jnu'un ka'nun ini Yandios nuu yivi. Sia'an ni kuu ko vijna tukaa ka'an yo jnu'un un.

<sup>6</sup> Ti na ni jinu taka un, ti nuu nuu ni ka kivi taka sutu ini ve'e un ja ka sa'a jniñu da ja ka kuu da sutu. <sup>7</sup> Ko inga ve'e ii xaan ga un, tu kuu kivi sava'a ni

ga sutu xi sava'a ni ga yivi. Chi maa iin ni sutu kuñanu ga un kuu ja kivi iin vanuxi ni jinu ja kuu ni kuiya. Ti suni tu kuu kivi da nu tu iyo niñi kuiti ja soko ja nuu Yandios ja kuu nuu kuachi maa da jiin nuu kuachi yivi ni ka sa'a naa i, ja tu ni ka jini i ja ni kuu iin kuachi. <sup>8</sup> Ti jiin jnu'un un ni xna'an Espíritu Santo ja na ni iyo ga ve'e ii nuu ñuyivi jana'an, ti tu iyo jnu'un ja kivikoyo yivi nuu ii xaan ga un. <sup>9</sup> Chi taka yukan kuu ja xna'an nuu yo nasa kuu kivi vijna. Chi taka i ni ka soko ndajniñu ja kuu ta'u jiin kuiti nuu Yandios, vasu tu ni kuu sandoo iin jinu ni injijnuni i. <sup>10</sup> Chi taka ja ni ka sa'a i ini ve'e ii jana'an un, ni kuu ja siki yiki kuñu yo, nasa kaji yo, nasa ko'o yo, nasa ndundoo yo. Ti ni jajniñu yukan undi ni kii Cristo jiin iin jniñu ña'nun ga, ja undi sa ti tukaa ga ni siin.

<sup>11</sup> Ti vijna chi ja ni kii Cristo, ti maa ya kuu sutu kuñanu xaan ga, chi ndiso ya iin jniñu ña'nun, ti ni ni'in ya ja taka ja kuni kua'a Yandios nuu yo. Ti maa ya kuu sutu nuu ve'e ii ga undi andivi ja kuñanu ga ti va'a ga, ansu ve'e ii jana'an, chi ansu jiin nda'a yivi ni kuu ja kachi yo ja nanu ñuyivi ja'a kuu. <sup>12</sup> Ti ja ni kivi ya nuu andivi nuu kancha Yandios nuu ii xaan ga, tu ni soko ya niñi ndixi'yu xi niñi chelu, chi ni jati ya niñi maa ya na ni ji'i ya. Ti jniñu ña'nun ni sa'a ya un ni kuu iin jinu ni ja kuu saa ni, ja ni soko ya maa ya nuu Yandios ja siki yo, ti sa ni kivi ya andivi. Ti sia'an ni nama ya yo'o ja na kuchaku yo ja kuu saa ni. <sup>13</sup> Ti ja na nundoo yivi un ni ka soko da niñi xndikí jiin niñi ndixi'yu, jiin chelu kuachi ja na kayu nuu altar un, ki'in da yaa un ti joso da siki yivi ja na ndundoo i. Yukan na ti ndundoo tuku i ja chiñu'un i Yandios. Chi nava na ndundoo yivi un ti ka soko da niñi xndikí jiin niñi ndixi'yu, ti yaa chelu kuachi ja ni kayu nuu altar kuu ja joso da nuu taka yivi ja na ndundoo i, ti siukan ndundoo tuku i ja chiñu'un i Yandios. <sup>14</sup> Nu sia'an ni iyo, ti ansu ii ga niñi Cristo nu? Jandaa kuu ja ii ga, ko maa Espíritu ni chindee ja na siuku ndaa kuiti ya jniñu un, ti sia'an ni sa'a Espíritu, chi iin ni kuu Espíritu jiin Cristo ja kuu saa ni. Ti jnu'un jana'an un ni jajniñu niñi taka kuiti. Ko kuñanu xaan ga jniñu ni sa'a maa Cristo jiin niñi ya ja ni jati ya na ni ji'i ya, chi jiin jniñu ña'nun un ni sandoo Cristo yo'o naa yo nava tukaa kuncha kuachi yo jiin injijnuni yo, nava yukan na ti tukaa kundiyo ini yo ja sa'a yo jniñu kue'e, ja sasiin yo maa yo nuu Yandios, ti naa yo. Chi su'va iin jniñu ña'nun ni sa'a Cristo. Yukan sa'a ja niñi na kundiyo ini yo sa'a yo mani jniñu ja kuu nuu maa Yandios, chi maa ni ya kuu Ya chaku.

<sup>15</sup> Ti siki jniñu ña'nun ni sa'a Cristo ja ni ji'i ya, yukan kuu ja ndisojniñu ya nava ni iyo jnu'un jaa ja kancha ya ma'ñu sava jiin yo ja kuu nuu Yandios. Chi na ni ji'i ya ni chunaya ta kuchi yivi nava ni iyo jnu'un jana'an ja ni ja'a Yandios nuu Moisés. Ti jiin jniñu ña'nun ni sa'a Cristo na ni ji'i ya ni ja'a ya jandaa ja ni siuku ndaa kuiti ya jnu'un Yandios yukan nuu taka yivi ja kana ya, ti jnu'un un kuu ja kua'a ya ta'u nuu yivi un ja kuu saa ni.

<sup>16</sup> Chi jini yo ja ka iyo yivi ka sa'a iin jniñu ja ka ka'an siki yaji ja kuu se'e i, ti njiniñu un undi nu ni ji'i yivi xiin ñu'un un. Ti nu iyo iin jnu'un, jini yo ja nu iin chaa na sa'a da iin tutu ja ka'an ja kua'a da ta'u se'e da, ti undi nuu ni ji'i da, sa ni'in jniñu tutu un. <sup>17</sup> Ko nu ni chaku ga yivi xiin tutu un, ti changa ga kuajniñu, chi undi nu ja ni ji'i da, ti sa kuajniñu. <sup>18</sup> Ti ja siki jnu'un jana'an un, suni ni ka ji'i kuiti, ti ni ka jati ti niñi ti, ja jiin yukan ni kundaa nava ka'an jnu'un jana'an un. <sup>19</sup> Chi na ni ka'an Moisés nava ni iyo jnu'un yoso nuu ley un nuu ndi'i nación Israel, ti ni ki'in da niñi chelu un jiin niñi ndixi'yu, sakantu da jiin nducha, ti ki'in da ixi kua'a, jiin yuku hisopo ti joso yuyu da niñi un siki tutu ley Yandios jiin siki tendi'i yivi naa i. <sup>20</sup> Ti ni kachi Moisés: "Ja'a kuu niñi ja kua'a jandaa siki jniñu ni sa'a Yandios jiin yo", ni kachi da. <sup>21</sup> Ti suni ni joso Moisés niñi un ini ve'e ii ja ni kuu jiin ñii, jiin siki

taka ndajniñu ja ka jajniñu da ja ni ka chiñu'un da Yandios. <sup>22</sup> Ti ja siki jnu'un jana'an un, ja yajni ndi'i, chi ka'an ndaa ley Yandios ja na ndundoo jiin niñi kuiti. Chi nu tu kat iñi kuiti un, ti tu kuu kuanka'nu ini Yandios nuu kuachi yivi un.

### *Ni nasoko Cristo maa ya ja ni kenchaaya kuachiyo*

<sup>23</sup> Ti ja nava ni iyo jnu'un jana'an un, ti taka ndajniñu ni ka jajniñu da ini ve'e ii, ja ni ndundoo jiin niñi kuiti un, tu ni ka nduu nava kaa nuu maa andivi. Chi ja na nduu nava kaa nuu andivi, ti nandi'i un iñi jniñu kanuu ga ja kuu taka jniñu ni kuu un. <sup>24</sup> Ti Cristo chi tu ni kivi ya nuu iñin ve'e ii ja ni sa'a yivi, ja na sa'a ya iñin jniñu nanu ka sa'a da ini ve'e ii un najana'an un. Chi jniñu jana'an un ni stuu ndaa inga jniñu ña'nun ga ja ni sa'a Cristo, ti jiin yukan ni ka kendo ndaa yo nuu Yandios. Ti siki jniñu ña'nun un, ja ni kivi Cristo andivi nuu kancha Yandios, ti yukan kancha ya ka'an ya ja'a yo naa yo. <sup>25</sup> Ti maa sutu Israel ka kuña'nu ga un ni ka kivi da naa kuiya ini ve'e ii ja soko da niñi kuiti. Ko Cristo tu ni sa'a ya siukan, ja soko ya maa ya tijni jinu, chi iñin jinu ni ni soko ya maa ya ja kuu tendi'i yo. <sup>26</sup> Chi nu ni sa'a Cristo sia'an nanu ni ka sa'a sutu ni ka kuña'nu ga nuu nación Israel un, ti va taka kuiya soko ya maa ya ja na kuü ya, undi na ni jankoo ñuyivi ti undi vijna ja kenchaaya kuachi. Ti tuu, chi kivi ja kuan ndi'i ja'a ni kenda ndijin ya iñin jinu ni ja kuu saa ni, ti ni soko ya maa ya ja ni kenchaaya kuachi yo, ja tukaa ga kuña'nu kuachi un siki yo. <sup>27</sup> Ti sia'an nanu ka ji'i yivi iñin jinu ni, ti suni sia'an kii juicio ja xndichi Yandios i, ja na sa'a ndaa ya taka jniñu ni ka sa'a i nuu ñuyivi ja'a, <sup>28</sup> ti suni siukan ni ji'i Cristo iñin jinu ni ja ni soko ya maa ya ja ni naki'in ya kuachi yivi naa i na ni ndo'o ya nundo'o. Yukan ti jaa iñin kivi nu nchaa ndijin tuku ya inga jinu, ko ansu ja soko ya maa ya ja na kenchaaya kuachi, chi sa su'va kii nakinse'e ya yivi ka ndatu ja nchaa ya.

## 10

<sup>1</sup> Ti ja siki ley ni ja'a Yandios nuu Moisés, so ni natejna'an ja kuu inga kivi kii, nu na siuku ndaa kuiti taka ja ka'an nuu ley un, ko maa ley un tu ni siuku ndaa kuiti. Ja sia'an kuu ja tu ni kuu ja sa'a ndaa kuiti ley un ja taka yivi ka chiñu'un Yandios, na kendo ndaa i nuu ya iñin jinu ni. Tu ni kuu siukan, chi taka yivi Israel un ni kuu ja ni ka soko i kuiti ja kuu kuachi i ndi kuiya ndi kuiya. <sup>2</sup> Chi tu ni kuu sa'a ley un iñin jinu ni ja na kendo ndaa i nuu Yandios. Chi nu ni ka siuku ndaa kuiti i ley un, ti va tukaa kuiti siin i ja soko i kuiti ja kuu nuu kuachi i ja kuu iñin jinu ni ja na kendo ndaa i nuu Yandios, ti taka yivi ja kuni chiñu'un Yandios tukaa kankuachi kuachi un siki i jiin inijnuni i. Ko nu tu ni kuu sia'an jiin ley jana'an un, <sup>3</sup> chi taka i ni ka soko kuiti ja taka kuiya, ja ka nuku'un ini kuachi i. <sup>4</sup> Chi niñi xndiki un jiin niñi ndixi'yu un, tu kuu kuiti kenchaaya kuachi yo. <sup>5</sup> Ja yukan kuu ja na ni kii Cristo nuu ñuyivi, ti ni ka'an ya jiin Yandios:

Ja ni ka soko yivi kuiti, jiin ja ni ka soko i ndajniñu ja kuu ta'u nuu ni.

Ko ansu nini taka ndajniñu ja ni ka soko i un kuni ni.

Chi ni ja'a ni yiki kuñu maa na ja na soko na nuu ni.

<sup>6</sup> Chi tu ni jajna'an ini ni ja ni ka ja'ma i kuiti ja soko i ti, xi ja soko i sava'ni ga inga ndajniñu ja na kenchaaya kuachi i.

<sup>7</sup> Ja yukan kuu ja ni kachi na jiin ni: "Ko nde'e ni, ja'a kancha na, ti iyo na ja na siuku ndaa kuiti na jniñu ja kusii ini maa ni, Tata na Yandios.

Chi sia'an ja yoso jnu'un un siki na nuu tutu ii."

Ni kachi Jesús.

<sup>8</sup> Ti xnakan ni ka'an ya ja ansu nini ni jajna'an ini Yandios ja ni ka soko i kuiti, jiin na ni ka soko i ndajniñu ja kuu nuu ya, ni ja ka'ma i kuiti ja soko i

ja na kenchaa kuachi i, vasu siukan ni ta'u ley jniñu. <sup>9</sup> Yukan ti ni ka'an tuku ya: "Ko nde'e ni, ja'a kancha na, ti iyo na ja na siuku ndaa kuiti na jniñu ja jajna'an ini maa ni, Tata na Yandios." Ti ja ni ka'an ya siukan ni sa'a ya ja na jankuiñi ja ka soko i taka kuiti, chi ni kachi ya ja soko ya maa ya. <sup>10</sup> Ti siki yukan ni siuku ndaa kuiti Cristo Jesúus jniñu ni tatu Yandios nuu ya nava na ndivikoyo yo jiin Yandios. Ti jniñu ja ni sa'a Cristo Jesúus kuu ja ni soko ya yiki kuñu maa ya iin ni jinu ja kuu saa ni. Ti jiin jniñu ña'nun ni ka kendo ndoo yo ja nduu yo yivi Yandios.

<sup>11</sup> Ti taka sutu yukan, chi ndi kivi ni ka sajniñu da nuu Yandios, ti taka ni jinu ni ka ja'ni da kuiti ka soko da. Ti taka un tu kuu kuiti kenchaa kuachi yo. <sup>12</sup> Ko sutu jaa ja kuu maa Cristo Jesúus, chi iin jinu ni ni soko ya maa ya nuu kuachi yo ja kuu saa ni. Ni sino ndi'i ya jniñu un, ti sa ni ndaa ya nu andivi nuu kancha ya nda'a kua'a Yandios ja kuña'nun ya. <sup>13</sup> Ti yukan kundatu ya vijnal, undi kivi na kundee ya jiin taka ja ka jito u'u ya. <sup>14</sup> Chi ja ni soko ya maa ya iin jinu ni, ti jiin yukan ni siuku ndaa kuiti ya ja kuu saa ni ja na kendo ndaa yivi nuu Yandios. <sup>15</sup> Ti maa Espíritu Santo, suni ni ka'an kaji ya jnu'un un, chi xnakan ni kachi ya:

<sup>16</sup> Su've koo jniñu jaa ja sa'a ri jiin yivi undi na jaa kivi un, kachi Jito'o. Na sa'a ri ja na nuku'un inijnuni i ley ri. Ti na sa'a ri ja na kundio ini i kuandatu i nuu jnu'un yoso nuu ley ri.

<sup>17</sup> Yukan ti ka'an tuku ya: Ru'u kuu ja kunda'u ini nuu i, ti kuanka'nun ini ri nuu taka kuachi i jiin taka jniñu kue'e ni ka sa'a i. Ni kachi ya.

<sup>18</sup> Nusa ti nu ja ni janka'nun ini Yandios nuu kuachi yo, ti tukaa ga iyo ni iin ja soko ga yo nuu Yandios ja kuu nuu kuachi yo.

### Ni nuña ichi kivi yo nuu Yandios

<sup>19</sup> Ja yukan ñani, ka iyo tu'va yo jiin jnu'un ndee ini, chi kuu kivi yo nuu ii xaan nuu kancha maa Yandios. Ti kuu kivi yo siki ja ni jati ñiñi Jesúus ja'a yo.

<sup>20</sup> Ja yukan ni jiñña ya iin ichi jaa, iin ichi va'a ga ja na jaa yo ti kuncha yo ja kuu saa ni, chi na ni ji'i ya ti ni te'nde sa'ma yindaka ja jasi ve'e ii xaan ga imi ve'e ii un, nuu ni kivi maa iin ni sutu kuña'nun nación Israel. Ko vijnal siki ja ni ji'i Jesúus, ti ni jiñña ya ichi ja na kivi yo nuu ii xaan ga nuu kancha maa Yandios. Chi jandaa ndixia kuu ja kivikoyo yo ka'an yo jiin ya, ti ansu nini maa iin ni sutu ni ka kuña'nun najana'an kivikoyo. <sup>21</sup> Ti Jesúus kuu sutu kuña'nun xaan ga ja jito va'a ya yo'o, ja ka kuu yo se'e Yandios. <sup>22</sup> Ti siki jniñu ña'nun ja ni sa'a Jesúus ja ni ji'i ya ja'a yo, ti ni nduu ya sutu kuña'nun yo, ti na ko ndo'o ndaa ini yo maa ya ja nuu kancha Yandios ka'an yo jiin ya, chi ñukuu ndaa ini yo ja kuanta'u ya yo'o. Chi ni sandoo Jesúus inijnuni yo nava tukaa kuñukuu ini yo ja jna'nun ndatu yo jiin kuachi yo. Ti suni siki jniñu ni sa'a Jesúus ni sandoo ya yo'o, ti ni ka ja'a yo jandaa yukan nu ni ka janducha yo.

<sup>23</sup> Ja yukan kuu ja na ni'in ndaa yo jnu'un ka'an yo, ja ka ndiyo ini yo ni'in yo ta'u nuu Yandios. Ti tu nakaka yata yo, chi su've na siuku ndaa kuiti yo taka jnu'un ni chisojnu'un ya nuu yo. <sup>24</sup> Ti na nakani ini yo nasa kua'a yo jnundee ini nuu ñani jna'an yo ja ka kunda'u ini jna'an yo, ja suni kandixia i Jesúus, ti na sa'a yo niña jniñu va'a. <sup>25</sup> Ti nini na ndututu yo naa yo ja na chiñu'un yo ya, ti koto kaka yata yo nanu ka sa'a sava i. Su've vi'i ga na kua'a jnundee ini nuu jna'an yo, ti siukan sa'a yo, chi ja ka jini yo ja kuan kuyajni kivi ka'nun ga nuu ndenda ya.

<sup>26</sup> Chi ja ni chaku ini yo jnu'un va'a Cristo Jesúus. Ni kandixia ndaa yo jnu'un ya chi ni janta'u yo, ko nu nini ndo'o ini yo ja sa'a yo kuachi ti xndoo yo jnu'un ya, ti tukaa ga inga iyo ja kenchaa kuachi yo. <sup>27</sup> Ti tukaa ndo iyo ja nama siki

yo chi ni kuiti ini ya nuu yo, ti vijna so kundatu ka'nu yo iin nundo'o ka'nu xaan ga ja kii nuu yo kivi na chaa juicio, chi kii ñu'un ti kayu taka yivi ka jito u'Yandios.<sup>28</sup> Chi undi jana'an nu ni ka sani'in ini yivi nuu ley Moisés, ti nu ka iyo uu xi uni yivi ka kankuachi siki i, ti iyo ja na kuu i, ti tundo kunda'u kuiti ini nuu i.

<sup>29</sup> Nu sia'an ni kuu un, ti ¿nasa ndo'o ini ra siki yivi ja ni ka kuxio nuu ichi Yandios? Na kondo'o xaan yivi un, chi ka jañu ni'no i Se'e Yandios, ti ka skexiko i niñi ya ja ni jati ya, ti jiin jniñu ña'nun un ni kundaa kuiti jnu'un jaa un ja ni nakinse'e ya i. Ti nu na kuxio i nuu ichi ya, ti sa'a ndeva'a i siki Espíritu Yandios, ya sa'a ja ka ni'l'in yo jnu'un ya ja ni ka kandixia yo Cristo Jesú. <sup>30</sup> Chi ja ka jini yo ja maa Yandios ni kachi: "Maa ri na kua'a ja kondo'o yivi nava kuu ya'u nu ja ni sa'a i", ni kachi ya. Suni ni kachi ya: "Maa Jito'o na xndichi ndaa ya siki kuachi yivi ni ka kachi ja ka y'i i jiin ya." <sup>31</sup> Na nda'u yivi tu kandixia ndaa, chi iyo xaan ga nundo'o kondo'o i nuu nda'a Yandios, yaa chaku.

<sup>32</sup> Ko nuku'un ini naa ra nasa ni kuu na ni nuña ndijin inijnuni ra ja ni ka kandixia ndaa ra jnu'un Cristo, ti ni ka jito ra nundo'o, ko ni ka kundee ra ti tu ni ka jika yata ra jiin jnu'un un. <sup>33</sup> Vasu ni ka ka'an ndeva'a yivi siki ra ti ni ka ndo'o ra nuu chitu un jiin, ko sava ra tu ni ka yu'u ja kuijin jiin ra naa ra kivi ni ka jna'an ra nundo'o. <sup>34</sup> Ti suni ni ka kunda'u ini ra nuu yivi ni ka iin vekaa ja siki jnu'un Cristo. Ti ni ka iyo sih ini ra, tu ni ka ndi'i ini ra ja ni ka kenchaa yivi taka ja ni ka ñava'a ra. Ko tu ni ka nandi'i ini da un chi vi'i ga ni ka kusii ini ra ja ka jini ndaa ra ja vi'i ga ka ñava'a ra nuu Yandios, ti yukan tu naa kuiti, ti ansu ja ni ka kenchaa yivi un nuu ra naa ra. <sup>35</sup> Nusa ti koto sia ra jnu'un Jesú nava ni kandixia ndaa ra, chi ka'nu xaan iin ta'u ni'in ra ja siki un. <sup>36</sup> Ti koto xndi'i ra ini ra, ti sikuu ndaa jniñu ni ta'u Yandios nuu ra, chi ni'in ra ta'u ja ni chisojnu'un ya. <sup>37</sup> Chi sia'an ka'an tutu ii Yandios: Ja ni kuyajni ndaa kuiti ndenda Cristo ja ndiji ya, ti tukaa kukuee ya.

<sup>38</sup> Taka yivi ni ka kandixia ja ni ji'i Cristo ja'a i, nuu yivi un kachi Yandios ja iyo jnu'un ka'nu ini ya nuu kuachi i.

Ti yivi un keta'u i nuu ya, ti kuchaku i ja kuu saa ni.

Ko nu na kaka yata i, ti tukaa ga kusii ini ri jiin i.

Ni kachi Yandios.

<sup>39</sup> Ko yo'o chi tu ka kuu yo nanu yivi ja ka jika yata, ti ka jna'nu ndatu i. Chi ka kandixia ndaa yo jnu'un Cristo Jesú, ti ni'in ta'u yo ja kuchaku ja kuu saa ni.

### *Jnu'un kandixia ndaa yo*

## 11

<sup>1</sup> Ti ja kandixia yo iin jnu'un kuu ja ñukuu ini yo ni'in yo taka ja ndiyo ini yo. Suni ja kandixia yo jnu'un Yandios iyo ndaa jnu'un un ini yo ja iyo ndixia taka ja tu ja'i kuni yo vijna. <sup>2</sup> Ti tijní yivi jana'an, ni jajnu'un Yandios maa i chi ni ka kandixia ndaa kuiti i.

<sup>3</sup> Siki ja kandixia yo jnu'un Yandios kuu ja ka ñukuu ini yo ja ni sa'a ya ñuyivi jiin andivi, jiin nini jnu'un ni ka'an ya. Ti jiin jniñu ña'nun ndiso Yandios ja tu ni jini yo, ni jankoo taka ja jini yo vijna.

<sup>4</sup> Ti iin chaa ni nani Abel najana'an siki ja ni kandixia da jnu'un Yandios, ni kuu ja ni soko da iin ja va'a ga nuu ya ti ansu Caín. Ja yukan kuu ja ni ja'a Yandios jandaa ja iyo ndaa ini da, chi ni janta'u ya ja ni soko da kuiti nuu ya. Ti vasu ja ni ji'i da, ko ka ndakuni'in ga ya jnu'un da jiin yo undi vijna, chi chaa ni kandixia ndaa ni kuu da.

<sup>5</sup> Ti suni Enoc ni kandixia da jnu'un Yandios, ti ja yukan kuu ja ni naki'in ya maa da kuano'on da andivi, ti tu ni ji'i da. Tu ni ka jini yivi nachi kua'an da chi so ni ndoñu'un ii da kua'an da, chi kachi tutu ii ya ja undi na ti kua'in ga Yandios maa da ni kusii ini ya jiin taka ja ni sa'a da. <sup>6</sup> Ko nu tu kandixia yo jnu'un ya, ti tu kuu ja kusii ini ya jiin yo. Chi yivi ndiyo ini ja kotu'va i nuu Yandios, kanuu ja na kandixia ndaa kuiti i ja kusii ini ya jiin taka yivi ka nanduku ya. Ja yukan chi jandaa ndixia kuu ja kua'a ya ta'u nuu i ja kunda'u ini ya maa i.

<sup>7</sup> Ti suni Noé, ni kandixia da jnu'un ya na ni kachi ya ja koo nundo'o xaan vasu ti kuni ga da jiin nduchi da. Ja yukan kuu ja ni jandatu da ti ni sa'a da iin barco ka'nun ja nani arca, ja na nama da nii jna'an da ini ve'e ja tu naa i. Ni kandixia da ti ni siuku da jniñu ni ta'u Yandios. Jiin jniñu un ni kankuachi da siki yivi ja na jna'nun ndatu i. Ko maa Noé, ni ni'in da ta'u da chi ni kendo ndaa da nuu Yandios, chi ni kandixia da jniñu ja ni ta'u ya nuu da.

<sup>8</sup> Ti suni Abraham, ni kandixia da jnu'un ni ka'an ya, ti ja yukan kuu ja ni janta'u da na ni ka'an ya jiin da ja ki'in da iin ñu'un nuu kua'a ya ja kuu ta'u maa da jiin taka jna'an da kikoyo yukan. Ti ni kee da kua'an da vasu tu kujnuni ini da naa ichi kua'an da. <sup>9</sup> Suni ja ni kandixia Abraham jnu'un ni chiso ya nuu da, ti yukan ni kuncha da nuu iin ñu'un ja ni chisojnu'un ya ja kua'a ya nuu da, ko ni kuncha da un nanu chaa ñuu jika ja ni ti'li ñu'un da tu ni iyo. Ti ni kuncha da ini iin ve'e ñii, suni se'e da Isaac jiin Jacob, chi iin nuu ni ka ni'in da ta'u ja ni chisojnu'un ya. <sup>10</sup> Chi ni ndiyo ini Abraham ja ni'in da ta'u da ja na kuncha da ñuu ja tukaa naa kuiti un, iin ñuu ja kutu ni jani maa Yandios na kivi ni sa'a ya.

<sup>11</sup> Ja yukan, vasu ja ni kuña'nun xaan Abraham, ko ñukuu ini da ja siuku Yandios jnu'un ni kachi ya. Ti ni iyo jnu'un ndee ini jiin da ja koo iin se'e da jiin ñasi'i da Sara, vasu ja ni nchii xaan ña, ti ni iin se'e ña tu ni iyo na ni kunchuku kuachi ña. <sup>12</sup> Ti siukan ni kuu ja ni nakaya kua'a xaan jna'an Abraham vasu jaku ni ga na da niku. Ti jna'an da ni ka ndukua'a xaan nanu chuxini iin nuu andivi, xi nanu ndi iin ndi iin ñiti ndi'i ja kaa yu'u mar ja tu kundee kuiti yo ka'u yo.

<sup>13</sup> Ti taka yivi un ni ka ji'i yi, vasu tu ni ka ni'in i ja ni chisojnu'un Yandios, ko ni ka kandixia ndaa i maa ta'u ka'nun ga ja ni chisojnu'un ya, ti ni ka chaku ndaa ini i ja kii iin kivi nuu kuu ndaa kuiti ga taka jnu'un un. Ti ni ka kusii ini i ni ka jito nhcaa i ja ni chisojnu'un ya un. Chi ka jini va'a i ja na ni kunchuku i nuu ñuyivi ja'a, ti changa ga ni'in i ta'u ka'nun ga un. Ja yukan ni ka ka'an i ja ka kuu i nanu yivi ñuu jika ka jikounu nuu ñuyivi ja'a. <sup>14</sup> Ti taka yivi ja ka'an siukan, chi kachi ndaa i ja tu ñu'un ini i ja ñuyivi ja'a kuu ñuu i ja kuu saa ni. Chi su'va ka ndatu i iin ñuu vii ga ja kuu ñuu maa i. <sup>15</sup> Chi sa ti ni ka nakani ini i siki ñuu nuu ni ka kee undi nuu, ti va nandeokuñi tuku i niku. <sup>16</sup> Ko tuu, chi ka ñukuu ini i ja ni'in i ta'u nuu kuncha i inga ñuu va'a ga undi maa ñuu kande andivi. Ja yukan ni ka jandatu i jnu'un Yandios, ti tu kukanuu ya ja kuu ya maa Yandios nuu i, ti maa i ka kuu se'e ya, chi ja ni satu'va ya iin ñuu vii xaan nuu kunchuku i.

<sup>17</sup> Ni kandixia ndaa Abraham jnu'un Yandios. Ja yukan kuu ja ni ja'an da jiin Isaac ja na kin soko da yi, ti ni jito jnuni Yandios maa da. Ti ja iyo tu'va da ja soko da se'e da, vasu maa iin ni i kuu se'e yii da. <sup>18</sup> Ti ni kachi Yandios jiin da ja jiin maa iin ni Isaac, ti nakaya jana'an da. <sup>19</sup> Ti Abraham, ja ñukuu ini da ja maa Yandios suni kuu naxndoto ya vasu yivi ni ka ji'i, (ti ja'a kuu kachi yo ja ni natava jaa da se'e nuu ñuji'i un.)

<sup>20</sup> Ti Isaac, suni ni kandixia ndaa da Yandios. Ja yukan kuu ja ni kachi da jini se'e yii da Jacob jiin Esaú ja nakaya xaan jna'an da ja kuu kivi. <sup>21</sup> Ti Jacob,

suni sia'an ñukuu ini da ja siuku Yandios jnu'un ni ka'an ya. Ja yukan kuu ja vasu yituu da yujnu da ni ka chiñu'un da Yandios siki ja ni siuku ya jnu'un ya nuu da.

**22** Ti suni José, na jana'an ni kandixia da jnu'un ni kachi Yandios. Ja yukan kuu ja nu kuan kuyajni kuü da, ti ni kachi da ja taka jna'an Israel, jaa iin kivi ti kekoyo i nuu nación Egipto. Ti ni tatu da ja na kunda'a i yikí da undi ñuu nuu kivikoyo i kunchuku i.

**23** Ti na ni kaku Moisés, ti tata yi jiin nana yi ni ka kandixia da ja ndito Yandios maa i. Ti ja yukan ni kuu ja ni ka jito sa'yi tata i maa i nuu uni yoo, chi ni ka jini da ja ni kuu yi iin suchi va'a xaan. Ti tu ni ka yu'u da jniñu ni ta'u rey Egipto un ja na kuü taka suchi yi kuachi nación Israel. **24** Ti maa Moisés ni kandixia da jnu'un ni kachi Yandios nuu yivi ya. Ti ja yukan kuu ja nu ni ja'nua da, ti tu ni ja'a da jnu'un ja kuu da se'e ñi'an kuu se'e si'i rey Egipto.

**25** Chi ni kuu ini da ja ki'i da jiin yivi ñuu Yandios ja na kondo'o da jiin taka jna'an da un, ja ka kuu yivi Israel ja ni nakaji ya ja na kendo kuu maa yivi ya. Ti yivi ñuu Egipto ni ka jito u'u nuu yivi Israel, ko ni kuu ini Moisés ja na kondo'o da jiin i, ti ansu ja na sa'a da kuachi. Ti kuxio da nuu i ja kusii ini da ja kuu nu na kivi da jiin yivi rey Egipto. **26** Chi ni sa'a da nanu ja kanuu ga ja na kondo'o da, ja na ka'an ndeva'a yivi siki da, nanu ka'an ndeva'a yivi siki Cristo ja taji Yandios iinga kivi ja na sa'a ya jniñu ña'nú. Chi ni ndo'o ini da ja kanuu ga ja na kondo'o da, ti ansu ja ni'l'in da taka nuu ja iyo nuu nación Egipto ti kuu riku da. Chi ñu'un ini da ja maa Yandios kua'a ta'u da ja iyo andivi. **27** Ti sia'an ni kandixia da jnu'un ni kachi ya nuu yivi ya, ti ja yukan ni kuu ja ni kee da nación Egipto ti kua'an da. Ko tu ni yu'u da ja kuiti ini rey Egipto un nuu da. Chi su'va ni kundee da jiin taka jniñu da, chi ni chaku inijnun'i da nau kuu maa Yandios vasu tu ni jini da ya.

**28** Ti siukan ni kandixia da jnu'un ni ka'an Yandios. Ja yukan na ti ni kachi da ja na ka'ní yivi Israel iin lelu, ja ni nani lelu pascua. Ti jiin yukan ni xnukoo da viko pascua ja kuu nación Israel. Ti ni ta'u da jniñu ja na koso yuyu i niñu ti jika si'ñi yux'e jiin yujnu xini si'ñi un, nava nu ni ya'a ángel Yandios ja ka'ní ya taka se'e yivi ñuu Egipto, ti tu ka'ní ya se'e ñi'an nuu yivi Israel. Ti yukan ni keja'a viko pascua un nuu nación Israel. **29** Ti siki ja ni ka kandixia yivi Israel jnu'un Yandios ni kuu ja ni ka ya'a da nuu nducha mar, chi ni jiña ya iin ichi ma'ñu nducha Mar Kua'a un, ti yukan ni ka ya'a da, ti ni ka kejiyo da nuu ñu'un ichi. Ti suni siukan ni ka ndo'o ini chaa Egipto un ja ya'a da niku. Ko ni nasia ya nducha mar un siki da, ti tendi'i da ni ka ji'i.

**30** Ti ni kandixia yivi Israel jniñu ni sa'a ya. Ja yukan kuu ja ni nduva nama ndi'yu yu'u ñuu Jericó, na ni ka jikonduu da uxia kivi jata nama un.

**31** Ti Rahab, vasu ni kuu ña iin ñi'an sii ini, ko ni kandixia ña jnu'un ni ka'an ya nuu yivi Israel. Ti ja yukan kuu ja ni chinddee ña taka chaa Israel ja ni ka jito yu'u nasa iyo ñuu ña. Ti sia'an tu ni ji'i ña jiin yivi ñuu ña un, ja ni ka kuu ni'l'in ini i nuu jnu'un ya.

**32** ¿Ti ndo ka'an ga ri nusa? Chi tu kundee kuja ri ja kani ri jnu'un siki chaa ñi'an jana'an nanu Gedeón, Barac, Sansón, Jefté, David, Samuel jiin taka ga chaa ni ka ka'an jnu'un Yandios undi najana'an. **33** Ti taka da ni ka kandixia ja sa'a ya ja'a da. Ja yukan kuu ja ni ka kundee da ni ka kanaa da jiin taka ñuu ka kuña'nú, ti va'a ni ka ta'u da jniñu nuu ñuu un. Ti ni ka kuu ndee ini nu ni chiso ya ja chinddee ya maa da naa da. Ti nuu sava ga da, ni jasi ya yu'u ndika'a un ja tu ni ka yaji ti da. **34** Ti sava ga da, ni ka jito u'u yivi da, ti ni ka ja'a i iin nundo'o kuu da ja na kayu da, ko tu ni ka kayu kuiti da nuu ñu'un un vasu kanda kua'an, ti sava da ni ka kaku ja tu ni ka ji'i da jiin yuchi. Ti sava ga da ni ka nani'in ndee ini da ja tukaa ga naa da ja ni'l'in teyii ni iyo nuu

guerra un, ti ni ka kundee da jiin soldado taka ñuu jika un ja ni ka jito u'u maa da. <sup>35</sup> Ti sava ñasi'i un, ni ka nandoto se'e ña na ni ka ji'i i. Ti sava ga yivi ni ka kandixia jnu'un ya, ni ka ndo'o xaan i sa ni ka ji'i i, chi tu ni ka ja'a i jnu'un ja kuxio i nuu ichi Yandios ti kaku i, chi ni ka ñukuu ini i ja kanuu ga ja na naxndoto ya i ti na ni'in i ta'u va'a xaan ga ja na kuchaku i ja kuu saa ni.

<sup>36</sup> Ti sava ga i ni ka sa'a kata yivi nuu i ja ni ka kuu ichi ini nuu i, ni ka ja'a tau i. Ti undi jiin cadena ni ka ju'n i nda'a i, ti ni ka chondee i vekaa. <sup>37</sup> Ni ka ja'a yivi yuu xini i, ti ni ka ja'nchaa sava maa i jiin sierra, ni ka jito xaan i nundo'o un. Ti ni ka ja'n i maa i jiin yuchi. Ni ka jikonuu i yayukan, ti ni ka ñu'un i mani ñii rii ñii ndixi'yu. Ni ka yaku nda'u i siki nundo'o un ja ni ka ndo'o ka nene i. Ni ka ndi'i'xaan ini i jiin taka jniñu kue'e. <sup>38</sup> Ti va'a xaan ga yivi ni ka kuu i ansu taka ga yivi ñuyivi ja'a. Ti vasu siukan ko ni ka ndikun yivi jata i ja ni ka jikonuu nda'u i undi nuu ñu'un te'e. Ti ni ka nchaa i chii yuku. Ni ka nchaa i yau kava jiin yau chii ñu'un.

<sup>39</sup> Ti taka yivi ja'a, vasu ni janta'u Yandios maa i ja ni kandixia ni ini i jnu'un ni kachi ja ya sa'a ya ja'a i. Ko tu ni ka ni'in i in ta'u ka'n u un. <sup>40</sup> Chi ni satu'va ya in jniñu ña'nu xaan ga, ti yukan ni sa'a Cristo jiin yo, nava in jinu ni ni'in i in ta'u ka'n u ga jiin yo naa yo.

## Na kuñukuu ini yo maa Jesú

### 12

<sup>1</sup> Yukan kuu ja ka iyo kua'a yivi ni ka ñukuu ndaa kuiti ini nuu jnu'un ni kachi Yandios, ti yukan na nde'e na koto nchaa yo nasa ni ka kandixia ndaa chaa jana'an un naa da. Ti na sandee ini yo kundandikun yo maa ichi ja ni ja'a Yandios ja na kunchuku yo nuu ñuyivi ja'a. Ti na xndoo yo taka kuachi ja sakantu ini yo, chi yukan kuu ja xnaña'an nuu yo ti jasi ichi ki'in yo. <sup>2</sup> Ko nu ñukuu ini yo ja siuku ndaa yo ichi un, ti kuni ja na kandixia ndaa kuiti yo maa Jesú ti na kuandatu yo jnu'un ya. Chi maa in ni Jesú ni sa'a jniñu ña'nu un ja na keta'u yo nuu ya nu na kandixia yo maa ya, ti maa ya na sa'a ja na siuku ndaa kuiti yo jnu'un kandixia yo. Ti na kundandikun yo Jesú. Na ni kee ya vaji ya andiví, ni kusii xaan ini ya, chi ni ndiyo ini ya ja kondo'o konene ya ti kuu ya nuu nda'a cruz nava na sinu ya jniñu vaji ya ti nduña'nu ya jiin Yandios. Ja yukan tu ni kukanuu kuiti ya ja sia'an kuu ya, vasu un nu sia'an na kuu in yivi ti kuta'u i jnu'un kanuu. Ti yukan ni nukoo ya nda'a kua'a Yandios ti ni nduña'nu ga ya yukan.

<sup>3</sup> Ti kani ini naa ra nasa ni tava xaan ini Jesú ja ni ndo'o ni nene ya nuu nda'a yivi ndevara'a ja ndevara'a kuiti ni ka sa'a i jiin ya. Ja yukan na ti koto kuita ini ra ja nandi'i in i ra. Ti tu kaka yata ra nuu ichi ya siki nundo'o. <sup>4</sup> Chi changa ga kondo'o ra ja kuu ra ja siki kuachi. <sup>5</sup> Ti xi ja ni ka naa ini ra naa ra ja ka'an tutu ii Yandios ja ja'a ya jnu'un ndee ini, ja ka kuu ra se'e ya, ti kachi ya: Se'e, koto skexiko ra nundo'o ja'a Jito'o ro'o, ja na najista ya ro'o. Ti koto kukui'ya ini ra nu na ka'an ya nuu ra, chi sia'an ti kuu ndee ini ra kundikun ra ichi ya.

<sup>6</sup> Chi kunda'u ini Jito'o taka yivi mani ya jiin, ja yukan kuu ja najista ya i. Ti ja'a ya nundo'o nuu taka yivi naki'in ya ja kuu se'e ya.

<sup>7</sup> Nusa ti sandee ini ra naa ra nu na kua'a Yandios nundo'o ro'o, chi sa'a ya jiin ra nanu sa'a in tata jiin se'e da. Chi tu ni in se'e iyo ja tu kua'a tata i yujnu xii maa i. <sup>8</sup> Chi nu tu kua'a ya jaa kondo'o ra, nusa ti kuu ra nanu in se'e nda'u, ti va ansu se'e maa ya kuu ndixia ra nu sia'an. Chi taka ja kuu se'e ya yukan ja'a ya ja na kondo'o i. <sup>9</sup> Ti suni tata yo ñuyivi ja'a, suni ni ka ja'a da nundo'o yo'o, ti sa ni ka jandatu yo nuu da. Ti ansu kanuu ga maa Tata yo Yandios ja na kuanta'u yo nuu ya ja ja'a ya nundo'o yo'o, ja maa ya

kuu ja ni ja'a inijnuni yo. Ti suni maa ya sa'a ja na kuchaku yo ja kuu saa ni. <sup>10</sup> Ti tata yo ñuyivi ja'a, ni ja'a da nundo'o yo'o ja kuu jaku ni kivi, nasa ni kuu ini maa da. Ko maa Yandios chi ja'a ya iin nundo'o nuu yo nanu kuu un ja va'a ga ja na kendo va'a ga yo nuu ya, chi jiin yukan kuñukuu iri yo ja ndundoo yo nanu iyo ndoo kuiti maa ya. <sup>11</sup> Ti jandaa ndixia kuu ja tu kusii ini yo nundo'o xaan yo un, chi su'va kukui'ya ini yo nuu jna'an yo nundo'o un. Ko jiin jnu'un kui'ya ini un ti kutu'va yo ja na kaka ndaa yo ichi maa Yandios, ti kukuee kaka sii yo ichi ya.

### *Koto ma skexiko yo jnu'un Yandios*

<sup>12</sup> Ti ro'o naa ra, koto sa'a ra nanu ka sa'a chaa ja ka kuita ii nda'a da ti yijin xini jití da, ja tu ka kundee da jiin nundo'o un. <sup>13</sup> Ti kukutu ini ra kaka ndaa ra nuu ichi Yandios nava na kuñii ra ichi un, ti tukaa kivi nduu ra jiin kuachi.

<sup>14</sup> Ti kukutu ini ja na kunchuku mani ra jiin taka yivi, ja na koo ndoo koo ini ra nuu Yandios. Chi tu kuu kuiti kivi iin yivi nuu maa Jito'o nu tu xndoo i jniñu kue'e sa'a i. <sup>15</sup> Koto jna'an naa ra nava tu yuji ra ti xndoo ra jnu'un va'a ja ja'a Yandios. Su'va vii vii xndaku nuu jna'an ra nava na kendaijiyo ndaa na jiin jnu'un Yandios. Ti koto ni iin ra naa ra nandeokava ini ti stivi ra nuu jniñu va'a un nanu sa'a yuku jatu un ja tu ja'a jnu'un kua'nu itu yo. <sup>16</sup> Ti koto kusikinchaa jna'an ra ja ki'in ra siki jnu'un sii ini. Koto kusikinchaa ra sia'an ti skexiko ra jnu'un Yandios jiin jniñu kue'e un, nanu ni skexiko chaa Israel jana'an ja nani Esaú. Chi ja siki iin ko'o ndeyu ni jikan da nuu fiani da, ti ni sama da yaji da ja ni kuu da chaa nuu nuu tata da, chi Esaú ni kuu chaa nuu. Chi siki ja kuu da chaa nuu, ni ni'in ga da ichi niku. Ko siki iin ko'o ndeyu ti ni xiko da ndi'i un. <sup>17</sup> Ti taka ra ka jini ja kuee ga, sa ni jini da ja kua'a tata da yaji kuta'u da ja kuu da chaa nuu. Ti tukaa ni kuu yukan, chi ni kendo kui'ya da ti tukaa ni ja'a tata da yaji nuu da. Chi tu ni nijnii ja ni nakani ini da, vasu ni nde'da.

<sup>18</sup> Ko maa ra naa ra ja ka kandixia ra Cristo, koto jna'an ra nanu ni jna'an yivi Israel jana'an na ni kunchuku i nuu yuku Sinaí. Ti ni ka jini ndijin i ja ni kayu ñu'un nuu yuku Sinaí un, ti nuu i ni kuñaa kuiti, ti ni kee tachi sau xaan. <sup>19</sup> Ni'in xaan ni tivi iin ndiki, ti ni ka'an Yandios jiin ndusu ya. Ti yivi Israel jana'an un ja ni ka jini so'o i ja ka'an ya, ni ka kanda'u i ja tukaa ka'an ga ya jiin i. <sup>20</sup> Ti ni ka yu'u xaan i jiin jnu'un ni ta'u ya jniñu nuu i, chi ni ka'an ya: "Vasu iin kuiti nu na kivi ti yuku ja'a, ti ka'nii ra ti jiin yuu", ni kachi ya. <sup>21</sup> Ti siki ja iyo xaan kuu taka ja ni ka jini i, ti undi Moisés suni ni ka'an da: "Ni'in ri ja yu'u ri", ni kachi da.

<sup>22</sup> Yukan ni ka jna'an yivi Israel jana'an na ni ja'a Yandios ley ya nuu i nuu yuku Sinaí. Ko maa ra naa ra, siki ja ka kandixia ra Cristo, kuu kivikoyo ra nuu maa Yandios ja nani yuku Sión jiin ja nani ñuu nuu kancha maa Yandios chaku jiin ja nani ñuu Jerusalén kande andivi, nuu kanchuku kua'a xaan mil ángel ti ka kusii xaan ini i ka kanajaa i Yandios. <sup>23</sup> Kuu kivikoyo ra jiin taka yivi ka kandixia ja ni ka kivi i nuu ka kututu yivi ka kandixia ja ka kuu i se'e Yandios, chi iyo lista i nuu andivi. Ti kivi ra nuu Yandios, ya nasa'a ndaa kuachi tendi'i yivi, nuu kanchuku yivi ni ka jika ndaa ichi Yandios nuu ñuyivi ja'a, chi vijnja ja ni ka ndundoo kuiti i nuu ya. <sup>24</sup> Ti ja ni ka kivi ra nuu Jesús, ja maa ya kuu ja ndiso jniñu iin jnu'un jaa un, chi kancha ya ma'ñuu sava jiin yo ja kuu nuu Yandios. Ti ka'nu ga iin jniñu ni sa'a niñi Jesús ja ni jati ya ja'a yo, ansu niñi chaa jana'an ni nani Abel ja ni ka'an kuachi nuu Yandios.

<sup>25</sup> Nusa ti koto ma skexiko ra jnu'un ka'an ya jiin ra naa ra, chi yivi tu ni ka jandatu na ni ka'an ya jiin i nuu ñuyivi ja'a, tu ni ka kaku i, chi ni ja'a ya nundo'o nuu i. Ti xaan ga ko ndo'o yo nu tu kuandatu yo nuu ya ja ni taji ya

jnu'un ya nuu yo undi andivi. <sup>26</sup> Chi na ni ka'an Yandios undi nuu yuku Sinai un, ni ni'l'in ñuyivi. Ko vijna chi kachi ya: "In ni ga jinu na kisi ri ñuyivi ko ansu maa ni ñuyivi, chi suni taka ja iyo andivi", kachi ya. <sup>27</sup> Ti ja ni kachi ya ja "in ni ga jinu un", ni chaku irii yo ja chajijo ya taka ja tu iyo kutu, ti kendo taka ja iyo kutu ja kuu saa ni, chi ja kachi maa ya kuu.

<sup>28</sup> Ti ta'u kua'a ya nuu yo ja na ta'u yo jniñu jiin ya ja kuu saa ni, ja iyo kutu un. Ja yukan ti na nakuanta'u yo nuu ya, na chiñu'un yo maa ya, na kua'a yo ja yiñu'un ya, naya na kusii ini ya jiin yo. <sup>29</sup> Siukan na chiñu'un yo Yandios naa yo, chi xaan ini ya jiin taka jniñu ndeva'a, ti kuu ya nanu iñin ñu'un ja xnaa ndikuiti ja tu va'a un.

### Nasa kendo va'a yo nuu Yandios

## 13

<sup>1</sup> Xndaku ri nuu taka ro'o ja ka kandixia Cristo ja na siin ra kunda'u ini jna'an ra. <sup>2</sup> Koto naa ini ra ja kanuu ja na kuanuu ra ve'e nuu yivi jikonuu, chi iyo jinu ja sia'an ni ka ja'a nuu yivi ve'e i, ti tu ka jini i ja maa tajnu Yandios ka kuu ja ni ka ja'a nuu i ve'e nuu un.

<sup>3</sup> Koto naa ini ra ja chindree ra yivi ka'iin vekaa, chi sa'a ra ja suni yindi'yu ra jiin i ini vekaa un. Suni koto naa ini ra taka jna'an ra ja ka ndo'o i nda'a yivi, ja suni siukan ndo'o maa ra nundo'o un.

<sup>4</sup> Ti tendi'i yivi ni ka nanda'a, na kua'a ja yiñu'un nuu jna'an i siki ja iñin ni ka kuu i, ti koto ma kusikinchaa jna'an ra. Chi maa Yandios sa'a ndaa ya kuachi taka yivi ka sa'a sava'ni ga jniñu kue'e un jiin yiki kuñu i, yivi ja ka yisikinchaa jna'an jiin inga ñasi'i xi jiin inga chaa.

<sup>5</sup> Koto kundiyo ini ra xu'un, chi na kuu siñi ini ra jiin nini ja ñava'a ni ra. Chi maa Yandios ni chisojnu'un ya ja chindree ya na ni ka'an ya: "Tu sia kuiti ri ro'o, ni tu xndoo kuiti ri ro'o", ni kachi ya. <sup>6</sup> Ja sia'an kuu ja iyo jnu'un ndee ini jiin yo. Ja yukan kuu kachi yo:

Maa Jito'o kuu ya chindree ru'u, ti tu koyu'u ri sava'ni ga jniñu ndeva'a na sa'a yivi siki ri.

Kachi yo.

<sup>7</sup> Ti chu'un va'a ini naa ra siki chaa ni ka xndaku jnu'un Yandios nuu ra, chi vii xaan ka jika da nuu ichi Yandios nuu ñuyivi ja'a. Ti sia'an sa'a ra naa ra nanu ni ka sa'a chaa un ja ni ka kandixia ndaa kuiti da jnu'un Yandios.

<sup>8</sup> Ti na kukutu jniñu ña'nú ni sa'a Jesúsj a yo, ti ni kendo ndaa kuiti ja kuu kivi vijna, ti ja kuu saa ni, chi undi na jana'an ja iyo ya, ti iñin ni kuu maa ya vijna. Ti sia'an koo ya ja kuu ni kivi vaji, ti tu naa ya. <sup>9</sup> Ti koto kandixia ra iñin jnu'un ja tu kejña'an jiin maa jnu'un Yandios siki Cristo. Chi su'va na kukutu ini ra jiin mani jnu'un ndaa kuiti ja ka kandixia ra, chi jnu'un un kuu ja ni kunda'u ini Yandios yo'o, siki jniñu ni sa'a Cristo Jesúsj. Ti jiin jnundee ini Yandios kunchuku ra ñuyivi ja'a, ko ansu jnundee ini Yandios kuu nu na siuku ra jnu'un ka'an ja iyo iñin nuu ni ndeyu kaji ra naa ra. Ti koto chunso'o ra jnu'un un, chi tu chindree un yivi ja na kunchuku va'a i nuu ñuyivi ja'a.

<sup>10</sup> Ko maa yo, chi ka yi'i yo jiin Cristo ja ni soko ya maa ya ja'a yo. Ti taka sutu ka soko nanu jnu'un ley jana'an un, ka soko da ndajniñu ini ve'e ñii Israel. Ti tundo kuiti ja ni'l'in da nuu Yandios, chi Cristo kuu ja ni soko ya maa ya ja kuu yo'o.

<sup>11</sup> Ti maa sutu kuñánu ga nuu nación Israel, ni ka soko da niñi kuiti ini ve'e ii ga un ja na kenchaan kuachi da, ti yiki kuñu ti ni ka ja'ma da ichi jata ñuu. <sup>12</sup> Ti suni siukan ni ndo'o nene maa Jesúsj ichi jata ñuu un nava jiin niñi maa ya ni sandoo ya yivi ja ka kuni ndivi nuu Yandios. <sup>13</sup> Nusa ti tukaa ga

kejna'an yo jiin yi'vi ka siuku jnu'un jana'an un, ja tu ni ka kandixia i Cristo. Chi ja no'on yo jiin ya ichi jata ñuu un, ti na kondo'o yo siki ja ni kandixia yo ya sia'an nanu ni ka skexiko i ya. <sup>14</sup> Chi ñuyivi ja'a tu kuu ñuu nuu kunchuku yo ja kuu saa ni. Chi su've na kundio ini yo ja kii ñin kivi, ti ndenda ñin ñuu ka'nu ga nuu kuncha yo ja kuu saa ni.

<sup>15</sup> Ti ja kuu siki jniñu ña'nú ni sa'a Cristo Jesúus ja kuu yo, nini na ndakuni'in in yo ja kuña'nú ga maa Yandios, chi yukan kuu nanu ja soko yo maa yo nuu ya. Yukan kua'a yo jandaa ja ka yi'i yo jiin ya. <sup>16</sup> Ti koto naa ini ra ja chindee nuu jna'an ra. Na kua'a nuu i sava'ní ga ja ka nandi'i yi'vi. Chi nanu ja ka soko ra nuu Yandios kuu taka jniñu ja'a. Ti yukan kuu ja kusii ini Yandios jiin.

<sup>17</sup> Na xndaku ri nuu ra naa ra ja na kua'a ra ja yiñu'un nuu chaa ka ta'u jniñu nuu ra. Ti kuandatu ra nuu da, ti koto sani'in ini ra nuu jnu'un ka xndaku da un. Sia'an sa'a ra naa ra, chi ka ndiso jniñu da ja koto va'a da NASA kunchuku ra. Chi nu vii ka jandatu ra, ti tu ka kukui'ya ini da. Chi su've ka kusii ini da ja nakua'a da jnu'un un nuu Yandios siki jniñu ka ndiso da. Chi nu na sani'in ini ra nuu da, ti va tundo kutu'va kuiti ra jiin jnu'un ka xndaku da un.

<sup>18</sup> Ti kakanta'u naa ra ja kuu ru'u naa ri, chi jini inijnuni ri ja tu ka yuji ri jiin jniñu ka ndiso ri. Chi ka kuni kua'a ri ja yiñu'un nuu taka jniñu ka ndiso ri. <sup>19</sup> Ti suni ka'an nda'u ri jiin ra ja na kakanta'u xaan ra ja kuu ri, nava na kua'a ya jnu'un ja yachi na jaa ri nuu kanchuku ra naa ra.

### *Jnu'un sandee ini ja kanxia'u da sandi'i ni ga*

<sup>20</sup> Ti maa Yandios ja ja'a ya jnu'un ndee ini jiin jnu'un sií ini yo'o, ja ni naxndoto ya Jito'o Cristo Jesúus nuu ñuji'i. Ti ni nduu Jesúus nanu ñin pastor kuña'nú ga ja ndito ya yi'vi ja ka kuu i nanu rii ya. Chi jiin niñi ya ja ni jati ya na ni ji'i ya, jiin yukan ni sa'a kutu ya tratu jaa ja kuu saa ni. <sup>21</sup> Ti ñu'un ini ri ja Yandios na sa'a ya ja ñin ni na koo ini ra naa ra ja ka sa'a ra taka jniñu va'a nava jajna'an ini maa ya. Ti suni ñukuu ini ri ja na sa'a Yandios ja na kivikoyo yo jiin mani maa jniñu kusii ini ya jiin. Ti kuu siuku yo jiin jniñu un, chi maa Cristo Jesúus ni ka'an ya ja'a yo nava na kivi yo nuu Yandios. Ti na kachi yo ja vii xaan kuña'nú Cristo Jesúus ja kuu ni kivi vaji. Ti sia'an na koo.

<sup>22</sup> Ti ka'an nda'u ri jiin ra ñani, ja na saka'nú ini ra naa ra siki jnu'un ni xndaku ri vasu jaku ni jnu'un ni chaa ri nuu tutu lulu ja'a. <sup>23</sup> Ti kaxnu'un ri ja ñani yo Timoteo, ja ni kee da veekaa. Ti nu na chaa yachi da, ti kuajakoyo ndinduu ri nuu kanchuku ra ja na nakuni jna'an yo.

<sup>24</sup> Ti kanxia'u ja kuu maa ri nuu taka chaa ka ta'u jniñu nuu ra, jiin taka ñani ri ja ka kandixia un, ja na sandee ini da naa da. Suni kachi ri ja yi'vi ka kandixia ñuu Italia, kachi i ja na sandee ini ra naa ra. <sup>25</sup> Ti maa Yandios na chindee chituu ya ro'o, ti na kua'a ya ja va'a ja kuu ra.

Siukan na koo.

## Carta ni chaa Santiago nuu taka yívì ka kandixia

<sup>1</sup> Maa ri kuu Santiago, ti junukuach ri nuu Jito'o Jesúś, ya kuu maa Cristo. Ti chaa ri tutu ja'a nuu ra naa ra, ro'o yívì ka kandixia, ja ka kuu ra jna'an ka yíl'i jiin ndi uxi uu jana'an chaa ni kuu tata nación Israel, ja ni ka jichanuu ra ni tu'u ñuyívì.

### *Na kandixia ndaa yo ja kua'a Yandios ndo kakan yo nuu ya*

<sup>2</sup> Ñani, nu na chaa tijni nuu nundo'o nuu ra naa ra, koto xndi'i ini ra. Chi su'va sa'a ra ja ndatu xaan ka kuu ra, ti na kusii ini ra naa ra, <sup>3</sup> chi ja ni ka jna'an ra nundo'o siki ja ka kandixia ra Cristo Jesúś, ti ja ni ka jini ra ja yukan sa'a ja ka kundee ga ini ra ka jika ra nuu ichi Yandios. <sup>4</sup> Koto nduni'in ini ra siki nundo'o un, chi yukan sa'a ja na kundee ra jiin taka jniñu va'a ja kuni Yandios, ti tu kumaní ni iin ja siuku ndaa ra nuu ya. <sup>5</sup> Ko nu tu kujnuni ini ra siki yukan, ti kakan ra nuu Yandios, ti maa ya na sa'a ja na nuku'un ini ra. Chi kunda'u xaan ini ya, ti tu nduxaan ya nuu ra ja ka jikan ra nuu ya. <sup>6</sup> Ti nu na kakan ra, ko kanuu ja na kandixia ndaa kuiti ra ja kua'a ya nava jikan ra, ti koto ndo'o iin ndo'o uu ini ra. Chi yívì ka sa'a sia'an, ka kuu i nanu nducha mar ja ka ndondaa jiin tachi sau, ti ka ya'a kua'an. <sup>7</sup> Yívì yukan koto kani ini i ja kua'a Jito'o ja jikan i. <sup>8</sup> Chi yívì ja ka ndo'o iin ka ndo'o uu ini i, suni sia'an ka ndo'o ini i jiin jniñu ka sa'a i.

### *Yívì nda'u jiin yívì riku*

<sup>9</sup> Taka ñani ka kandixia ja ka jito da nundo'o, vasu na kendo nda'u da, ko na koo sii ini da chi ka kuña'nu da jiin Yandios. <sup>10</sup> Ti taka ñani ka kandixia ja ka kuu da chaa riku, nu ka jito da nundo'o ti ka ndunda'u da, ti vatuni iyo un, chi vanuxia jaa iin kivi ja kee da nuu ñuyívì ja'a, ti naa ndajniñu da un nanu naa iin ita yuku. <sup>11</sup> Chi nu na kaña ndikandii, ti kuni'ní, ti ichi yuku un, ti kanakava ita un, vasu vii xaan ni kaa. Suni sia'an jna'an iin chaa riku nuu ñuyívì ja'a, chi jaa kivi nuu tukaa kuchaku da nuu ñuyívì, ti naa taka ndajniñu ni ñava'a da un.

### *Nundo'o ka jna'an yívì ka kandixia*

<sup>12</sup> Kandichi Yandios jiin chaa kandixia, chaa ni yixia ini jiin jnu'un ya, chi vasu ni ka jito u'u yívì maa da, ti ni ka ja'a i nundo'o nuu da. Ko siki ja ni kundee da jiin nundo'o un, ti nani'in ta'u da ja nduña'nu da, ti kuchaku da ja kuu saa ni. <sup>13</sup> Ko nu tu kundee da jiin nundo'o un, ti kuñukuu ini da ja sa'a da kuachi, ti koto ka'an da ja ni ska'an Yandios maa da ja na sa'a da kuachi un. Chi tu kuanta'u Yandios kuachi da. Chi maa ya tu ska'an ya ni iin yívì ja na kinikava i nuu kuachi. <sup>14</sup> Chi ja ka ndiyo ini i, yukan sa'a ja ka kuu ini i ti ka sa'a i kuachi. Ti yukan kuu jnu'un xndoña'an. <sup>15</sup> Ti ja ndiyo ini i un, yukan sa'a ja keja'a kuachi un jiin yi. Ti nu ja ni kukutu kuachi un, yukan na ti sa'a ja jna'nú ndatu yívì un. <sup>16</sup> Ro'o ñani, koto xnda'u ra maa ra naa ra jiin kuachi ja ka jani ini ra un.

<sup>17</sup> Taka ja kuta'u yo, ja va'a ja vii iyo, chi vaji andivì nuu maa Yandios, ya ni sa'a taka ja ja'a nduva ja ka iyo andivi. Ti jandaa ndixia kuu un, chi maa ya tu nasama kuiti ini ya nanu nasama nduva un. <sup>18</sup> Ni nakaji ya yo'o ja na nduu yo se'e ya, chi ni ka kandixia ndaa yo jnu'un ndaa ya. Ti ni ka nduu yo

nanu suchi ña'nu ga nuu taka ga se'e ya ja kiji, chi sia'an ni jajna'an ini ya ja sa'a ya.

### *Nava kaka ndaa yo ichi Yandios*

**19** Ñani, chunso'o jnu'un ya naa ra. Nu ka'an ra, ti koto ma ka'an ra vijnal vijnal, ni koto ma kuiti yachi ini ra. **20** Chi yivi kuiti ini, tu sa'a i jniñu kuni maa Yandios. **21** Ja sia'an kuu ja xndoo taka jniñu kue'e jiin, jniñu ndeva'a ja ka ñukuu ini ra un. Ti na koo vita ini ra nava na kuanta'u ra jnu'un ya ja ja ni kivi ini ra. Chi jnu'un un sa'a iin jniñu ña'nu ja nama ya ro'o naa ra. **22** Ti siuku ra nava xndaku jnu'un ya, ti ansu so ja kuniso'o ra, chi yukan kuu ja xnda'u ra maa ra, chi tu ni'in jniñu, nu tu siuku ra. **23** Chi chaa chunso'o jnu'un Yandios, ti tu siuku da, kuu da nanu iin chaa jitonchaa da maa da nuu iin espejo ja nasa kaa nuu da. **24** Ni nde'e va'a da nuu da, ti kua'an da, ko yukan ti ni naa ni ini da nasa jito da. **25** Ko su'va, ndatu xaan kendo iin chaa ja tu naa ini da jnu'un ya ja ni jiniso'o da, chi su'va chunso'o va'a da ja ka'an ndaa jnu'un Jesùs. Chi jnu'un un kuu nanu iin ley ja sa'a ja tukaa kunukuachi da nuu kuachi. Ti nu na nakutu imi da jiin, ti siuku ndaa da jnu'un un, yukan na ti chindlee chituu Yandios maa da jiin jniñu sa'a da. **26** Ti nu iin iin ra ka jani ini ja ka chiñu'un va'a ra Yandios, ko tu jito ra jnu'un ka'an yu'u ra, ja sia'an ti xnda'u ra maa ra, chi tu njniñu kuiti ja chiñu'un ra ya. **27** Sa'a yo nanu ja nu iin yivi chiñu'un ndaa kuiti i jnu'un ya, ti chiñu'un ndaa i maa Tata yo Yandios, ti ja'a kuu jniñu sa'a i: Ja na chindlee i suchi ni ka kendo nda'u, jiin ña'an ka kendo nda'u maa iin, nu iyo nundo'o ka jna'an i. Ti na koto va'a i maa i ja tu kinikava i nuu jniñu kue'e ja iyo nuu ñuyiví ja'a.

### *In ni ka kuu yivi nda'u jiin yivi riku nuu Yandios*

## 2

**1** Ñani, ro'o ja ka kandixia maa Jito'o Jesùs, ya kuu Cristo, ya vii xaan kuña'nu. Koto ma skexiko ra yivi nda'u naa i, chi su'va iin nuu koto ra tendili'i yivi. **2** Sa'a yo nanu. Nu iyo jinu ja kivi iin chaa ini ve'e nuu ka ndututu ra, ti yi'i iin xe'e oro xini nda'a da, ti ñu'un da sa'ma va'a. Ti suni kivi iin chaa nda'u, ti ñu'un da iin sa'ma te'nde xaan. **3** Ti tu va'a ja kua'a ra ja yiñu'un chaa ñu'un sa'ma va'a un, ti kachi ra jiin da: "Nukoo ja'a chi iyo va'a." Ti kachi ra jiin chaa nda'u un: "Yukan ni kuncha ra, xi nuu ñu'un ja'a ni kuncha ra", kachi ra. **4** Ti nu sia'an na sa'a ra, ti va tu jani va'a ini ra siki ñani jna'an ra, chi ni sasiin ra chaa riku un jiin chaa nda'u un ja sia'an.

**5** Ñani, kunso'o iin jnu'un na ka'an ri: Ni nakaji Yandios yivi nda'u nuu ñuyiví ja'a ja na nduña'nu i nuu na kandixia ndaa i jnu'un ya, ti ni'in ta'u i ñuu nuu ta'u ya jniñu. Ti jandaa ndixia kuu un, chi ni chisojnu'un ya ja kua'a ya yukan nuu yivi mani i jiin ya. **6** Ko ro'o naa ra, ja ka skexiko ra yivi nda'u, ¿xi iyo va'a ja kua'a ga ra ja yiñu'un nuu yivi riku nu? Chi chaa riku un, xnda'u da ro'o siki ja na ni'in da xu'un ra, **7** ti nava na kankuachi da siki sivi Jito'o, ya yinda'a ro'o naa ra.

**8** Va'a ka sa'a ra nu ka siuku ndaa ra jnu'un ña'nu ga ja ka'an ley Yandios, ja yoso nuu tutu ii ya: "Kunda'u ini ra nuu ñani jna'an ra nanu kunda'u ini ra nuu maa ra", kachi. **9** Ti nu ka sasiin ra yivi riku jiin yivi nda'u, yukan na ti nchaa kuachi ra siki ja ni stivi ra ley Yandios. **10** Chi yasu ka siuku ra jaku ga ley un, ko ni stivi ra iin jnu'un un. Ja yukan ti ndondaa ndi'i ley un siki ra, chi maa ley Yandios kuu ja ni stivi ra. **11** Sa'a yo nanu ja nu tu ka yisikinchaa jna'an ra siki ichi siñi ini, ko ni ja'nii ra iin ndiyi, yukan na ti ja ni stivi ndi'i ra ley Yandios. Chi maa Yandios ni ja'a ndinduu ley un. Ni ka'an ya ja tu

kusikinchaa jna'an ra, ni tu ka'ni ra ndiyi. Chi yukan nchakuachi siki ra. <sup>12</sup> Ko vijna ti ka siuku yo jnu'un Jesúś, ti yukan kuu nanu iin ley ja ni nama ya yo'o ja tukaa ga kuanukuachi yo nuu kuachi un. Yukan kuu ja na koto va'a yo jnu'un ka'an yo jiin ja sa'a yo, chi sa'a ndaa ya ndi'i yukan jiin maa ley ya, ti xndichi ya yo'o nu ni siuku ndaa yo jnu'un ya xi tuu. <sup>13</sup> Chi kivi kin sa'a ndaa ya jniñu un, yukan na ti yivi tu ni kunda'u ini jna'an un, suni tu ni'in i jnu'un nda'u ini. Ko yivi ja ni kunda'u ini jna'an, ti ja kuu maa kivi juicio ja sa'a ndaa ya jniñu un, ti kusii ini i ja tukaa jna'nun ndatu i siki kuachi i.

### *Ja na siuku yo nava kandixia yo*

<sup>14</sup> Ñani, nu iyo iin chaa ka'an ja kandixia da Jesúś, ko nu tu sa'a da jniñu va'a, ¿va nu jani ini ra ja ni'in jniñu yukan xino? ¿Va nu nama da maa da nuu Yandios ja sia'an kandixia da nu? <sup>15</sup> Sa'a yo nanu ja iin ñani xi iin kua'a jika te'nde i, ti kumaní ja kají i taka kivi. <sup>16</sup> Ti nu iin ra na ka'an jiin i taki chia: "Sa'a ndee ini. Koto kukui'ya ini ra, chi ni'in ra ja ku'un ra, ti ni'in ra ja kají va'a ra", kachí ra jiin i. Ti nu tu ni ja'a ra ja kuchaku i, ¿va nu jani ini ra ja ni'in jniñu ja ni kachí ra un xino? <sup>17</sup> Suni sia'an kuu nu ka'an ra ja kandixia ra Jesúś, ti nu tu sa'a ra iin jniñu va'a, yukan ti tu ni'in jniñu kuiti jnu'un ka'an ra ja kandixia ra ya.

<sup>18</sup> Ko sanaa ti ka'an iin yivi ti kachí: "Ro'o chi kandixia ra Jesúś, ko ru'u, chi sa'a ri jniñu va'a", kachí i.

Vatuni iyo un, chi ka'an i ja xna'an i ja kandixia i, ko nu ndixia i ja sa'a i jniñu va'a, ti yukan stuu i ja kandixia ndaa i Jesúś.

<sup>19</sup> Ti nu ka'an ra ja kandixia ra ja maa iin ni Yandios iyo, ti vatuni, ko tu njniñu un, chi suni sia'an ka kandixia taka tachi xaan un, ti ka kisi i maa i ja ka yu'u i. <sup>20</sup> Ti ro'o chaa fiaa xini kuu ra, ja tu chaku ini ra, ¿va nu jani ini ra ja kuu kandixia ka'a ra xino? Ko tuu, chi nu tu sa'a ra jniñu va'a, ni tu ni'in jniñu kuiti ja ka'an ra ja kandixia ra Jesúś. <sup>21</sup> Sa'a yo ja tata yo Abraham na jana'an, ni kendo ndaa da nuu Yandios jiin jniñu ni sa'a da, chi iin jniñu va'a ni kuu ja ni jandatu da jnu'un ni kachí Yandios ja ka'ní da se'e da Isaac ja na soko da yi nuu altar, vasu tu ni ji'i yi. <sup>22</sup> Yukan nuku'un ini ra naa ra ja ni siuku ndaa Abraham nava ni kandixia da, chi tu ni kandixia ka'a da, chi ni kandixia da jnu'un Yandios, ti ni jandatu da jniñu ni ta'u ya nuu da. <sup>23</sup> Ja yukan ni kuu ndaa jnu'un ja ka'an tutu ii Yandios: "Ni kandixia Abraham jnu'un Yandios, ti ja yukan ni kachí ya ja tukaa jna'nun ndatu da ja kuu siki kuachi da, chi ni kendo ndaa da nuu Yandios", kachí tutu. Ti ni ka skonani da chaa: chaa kunda'u ini, chaa mani jiin Yandios. <sup>24</sup> Jiin yukan ti ni ka jini ra ja kendo ndaa yivi nuu Yandios siki ja ka sa'a i jniñu va'a, ti ansu ja mani ka ka'an i ja ka kandixia i. Nu ka sa'a i jniñu va'a, ti yukan kuni ka'an ja ka kandixia ndaa i. <sup>25</sup> Suni sia'an iin ña'an ni nani Rahab na jana'an, vasu ni kuu ña iin ña'an ni jika jiin jnu'un si iní, ko ni kendo ndaa ña nuu Yandios siki ja ni sa'a ña iin jniñu ndaa. Chi ni ja'a nuu ña ve'e nuu chaa ni taji Josué, ti suni ni nachu'un ichí ña da inga ichí ja ni nama ña maa da nuu chaa ka jito yu'u ja ka nduku ka'ni da. Ti ja yukan ni kachí Yandios ja tukaa jna'nun ndatu ña jiin kuachi ña, chi ni kendo ndaa ña nuu Yandios.

<sup>26</sup> Ti iin yivi ja tukaa chaku añu i jiin yiki kuñu i, ni tukaa jista i tachi, ti ndiyi kuu i. Suni sia'an, nu na kandixia ka'a yo ti tu sa'a yo jniñu va'a, yukan ti tu ni'in jniñu kuiti ja ka'an yo ja kandixia yo Jesúś, chi ka kuu yo nanu ndiyi.

### *Ja na koto yo yaa yo*

**3**

<sup>1</sup> Ñani, koto ma kani ini ra ja ra maa ni ra kuu chaa kundiso jniñu ja xna'an ra jnu'un Yandios naa ra. Chi ka jini va'a ra ja maa yo ja ka xna'an jnu'un ya, kua'a ga jnu'un ndakuni'in ya siki yo kivi na chaa juicio. Ja yukan kuu ja tu va'a ja kua'a ra kundiyo ini ja kundiso ra jniñu un. <sup>2</sup> Chi tend'i yo ka yuji jiin jniñu ka ndiso yo. Ti nu iin chaa ja jankivi yuji da jiin jnu'un ka'an da, yukan na ti kuu iin chaa va'a xaan. Ti suni kuu koto da maa da ja tu yuji da.

<sup>3</sup> Sa'a yo nanu ja nu na chu'un yo iin kaa yu'u kuayu, ti yukan ja'nu yo ti ja na ki'in ti ichi nanu kuni yo. <sup>4</sup> Suni sia'an taka barco, vasu na'nu xaan, ti vasu ni'in xaan chinda'a tachi, ko jiin iin timón lulu ni ti kuu kunda'a chaa skaka un, ti ki'in nanu kuni maa da ja ki'in da jiin. <sup>5</sup> Suni sia'an kuu jiin yaa yo, chi vasu lulu ni, ko kua'a xaan jniñu sa'a ja skinikava yo'o nuu kuachi. Ti suni jini yo ja iin ñu'un lulu ni, ti kuu skuikun ja ka'ma iin yuku ka'nú xaan. Ti yukan ja ka jini yo. <sup>6</sup> Ti suni sia'an kuu yaa yo, chi sa'a nanu iin ñu'un, chi skuikun kua'a xaan jniñu kue'e. Yaa yo kuu iin nuu lulu ga ja kuu nuu yiki kuñu yo, ti sa'a ja ni tu'u yo na kivi yo jiin kuachi. Chi undi nuu yaa ñu'un nuu kancha ja'u'u un vajji taka jnu'un kue'e ka'an yo, ti skuikun ñu'un siki jniñu kue'e ja kuu ni kivi kanchuku yo nuu ñuyivi ja'a.

<sup>7</sup> Ti yivi chi kuu samasu i taka nuu kuiti ñu'un nuu nducha mar, jiin kuiti iyo nuu ñu'un ichi, <sup>8</sup> ko ni iin yivi tu kuu ka'nú kuiti i yaa i jiin ini jnuni maa i. Chi kuu iin nuu ja tu yi'i kuiti yiki, ko yi'i xaan ja ka'nú yo. Ti nanu kuu yu'u koo ja ka yi'i jaa xaan yu'u ti ja ja'ní ña'an ti, siukan kuu yaa yo.

<sup>9</sup> Jiin yaa yo chiñu'un yo Tata yo Yandios, ti suni jiin yaa yo ka'an ndeva'a kuiti yo siki yivi, vasu ni sa'a Yandios yivi nanu kaa maa ya. <sup>10</sup> Iin ni yu'u yo kee jnu'un chiñu'un yo ya jiin jnu'un ka'an ndeva'a yo. Ñani, tu iyo va'a kuiti ja siukan sa'a yo. <sup>11</sup> ¿Va nu iin ni soko kuu kaña nducha vixi jiin nducha ugua nu? <sup>12</sup> Ñani, ¿va nu jani ini ra ja kee nde'e oliva xini yujnu tichi vixi, xi kuu kee tichi vixi nda'a nuu tika'ya nu? Ti suni sia'an iin soko tu kuu kaña nducha ugua jiin nducha vixi.

*Jnu'un ndichi ja vaji nuu Yandios*

<sup>13</sup> Va nu iyo chaa jani ini ja kuu da chaa tu'va xaan, chi chaku va'a ini da jnu'un Yandios. Vatuni un, ko kanuu ja na kaka ndaa da nuu ichi Yandios. Chi kanuu xaan ja na sa'a da jniñu va'a. Ti na kivi inijnuni da ja koto ma nduvixi ini da. <sup>14</sup> Chi nu xna'an da jnu'un Yandios nanu jani ini maa da ja kuña'nu da, xi ja ni nduvixi ini da jiin jniñu ndiso da, ko na kachi ri ja tu iyo kuiti ichi da ja sia'an sa'a da. Chi so ñii yu'u da kaxndee jnu'un ka'an da, ti tu sa'a da nanu xndaku maa jnu'un Yandios. <sup>15</sup> Yivi sa'a siukan, ansu nuu Yandios vajji ja ndichi i. Chi kanda i nanu kanda sava'ní ga yivi ñuyivi ja'a. Ka siuku i jnu'un ka nduvixi ini sia'an nanu ka sa'a yivi ja tu ja'i nakuni i jnu'un Yandios. Nanu sa'a ja'u'u un, sia'an ka xnda'u i jiin jnu'un ka ka'an i. <sup>16</sup> Chi nu iyo yivi kuasun ini jiin yivi ka nduku i ja nduña'nu i, yukan sa'a ja tu kanchuku mani i, chi mani jniñu kue'e ka sa'a i.

<sup>17</sup> Nu sa'a Yandios ja na ka'an yo jnu'un ndichi, ko na ka'an yo mani jnu'un iyo ndoo. Chi nini sa'a jnu'un ndichi un ja na kunchuku mani yo jiin jna'an yo, ti na koo vita ini yo, ti tu nduni'in ini yo siki jnu'un ya. Ti na kunda'u ini yo jna'an yo, ti na sa'a yo mani jniñu va'a. Ti na ka'an ndaa kuiti yo, ansu ja ka'an yo jnu'un xndoña'an. <sup>18</sup> Ti yivi kanchuku mani jiin ñani jna'an i, jiin jniñu ka sa'a i un ka nde'e ka jito nchaa yivi naa i, ti vii ndaa vii nene ka natejna'an i jniñu un.

*Jnu'un ja tu yi'i yo jiin taka ja iyo nuu ñuyivi*

**4**

<sup>1</sup> ¿Ndo kanda ra sia'an ja nanu ka kuni keyi'i jna'an ra nanu ina nusa? Ko jandaa ndixia kuu yukan, ko siki ja nini ka iyo iin jnu'un ini ra ja sa'a ra nava kuni maa ra, ti ansu ja sa'a ra iin jniñu va'a. <sup>2</sup> Ni'in xaan ka ndiyi ini ra iin ndajniñu, ko nu tu ka ni'in ra, ti ka kuni ra ka'nii ra ndiyi. Ka kuu kuasun ini ra, ko tu ni'in ra ja ka ñava'a ñani jna'an ra. Yukan ka kanaa ra jiin jna'an ra nanu ina nuu ka yeyi'i jna'an ti. Tu ka ni'in ra chi tu ka jikanta'u ra nuu Yandios. <sup>3</sup> Ka jikanta'u ra nuu Yandios ja kuu ndajniñu, ti tu ka ni'in ra, chi tu ka jikan va'a ra, chi so ja kusii ini maa ra kuu ja ka jikan ra nuu ya.

<sup>4</sup> Nanu chaa ni xndoo ñiasi'i da, siukan ka xndoo ra Yandios. ¿Va nu ka jini ra ja nu na kundiyo ni'in ini ra ja ni'in ra taka ja iyo nuu ñuyivi ja'a, yukan kuu ja ka jito u'u ra Yandios xino? Chi yivi sa'a mani jiin taka ja iyo ñuyivi ja'a, kuu i yivi ka jito u'u Yandios. <sup>5</sup> Ti tu ka'an ka'a jnu'un yoso nuu tutu ii Yandios: "Nini iyo jnu'un ini añu ra ja sa kuasun ini ra nuu jna'an ra", kachi. <sup>6</sup> Ko siki ja kunda'u ini Yandios yo'o, ti kuu ja kua'a ya jnu'un ndee ini nuu yo. Chi ka'an jnu'un ii ya: "Jito u'u Yandios nuu yivi sa'a vixi maa, ti su'va kunda'u ini ya ti chindree ya nuu yivi ka sa'a nda'u i maa i", kachi.

<sup>7</sup> Nu na kuandatu ra taka jnu'un Yandios, ti kuijin ni'in ra siki jnu'un xnda'u ja'u un, ti kuu kundee ra jiin ja na kuxio ki'in. <sup>8</sup> Su'va na kundiyo ini ra ja ndumani ga ra jiin Yandios, nava vi'i ga na xna'an ya ja mani ya jiin ra. Taka ro'o ja ka sa'a kuachi, na nakani ini ra ti na sa'a ndoo ra maa ra nava na kencha kuachi un. Ro'o ja tu jini ra nu ki'in ra ichi Yandios xi ki'in ra ichi kue'e iyo nuu ñuyivi ja'a, xndoo ichi kue'e un, ti na ndundoo undi ini añu ra jiin jnu'un ya. <sup>9</sup> Ti nu na nakani ini ra nuu kuachi ra, ndunda'u ini, ti na koo kui'ya ini ra, ti kanajiiñ ko'o ra, nde'e ra ja iyo kuachi ra. Ti vasu ni jaku ra, ko vijna ti su'va na nde'e xaan ra. Ti vasu ni kusii ini ra, ko vijna ti na ndukui'ya ini ra. <sup>10</sup> Koto nduni'in ini ra nuu Yandios, chi su'va na ndunda'u ini ra. Nu sia'an na sa'a ra, ti jandaa ndixia kuu ja maa ya na saña'nu ro'o.

<sup>11</sup> Ñani, tukaa ga ka'an ndeva'a ra siki ñani jna'an ra. Chi chaa ka'an ndeva'a siki kuachi ñani jna'an da, yukan kuu nanu ja siki ley Yandios ka'an ndeva'a da. Chi tu siuku da ley ja ka'an ja na kunda'u ini yo jna'an yo, ti jiin jnu'un kue'e sa'a da un kuu nanu ja tu iyo ndaa ley Yandios. Ti nu ka'an ra ja tu iyo ndaa ley Yandios, nusa ti va tu siuku ra, chi su'va ka'an ra siki. <sup>12</sup> Iyo iin ni Yandios ja ni ja'a ley, ti maa iin ni maa ya kuu ja sa'a ndaa siki kuachi. Ti maa iin ni maa ya kuu ja nama yo'o xi xnaa ya yo'o. Ti ro'o, ¿va nu kuña'nu ga ra ja xndichi ra kuachi siki ñani jna'an ra xino?

*Jnu'un ja tu nduvixi ini yo*

<sup>13</sup> Chunso'o ro'o ja ka'an nanu kachi ja'a: "Vijna ijña ti kinkoyo yo ñuu yukan, ti ku'iin yo iin kuiya, ti kuaan yo ja xiko yo, ti na ni'in yo xu'un siki", kachi ra. <sup>14</sup> Ko sañaa xini ra, chi tu jini kuiti ra nasa kuu kivi ijña. ¿Ka jani ini ra ja kuchaku ra ja kuu taka kivi nuu ñuyivi ja'a xino? ¿Va nu tu jini ra ja maa yo kuu nanu iin viko nu'un ja iin nundaa ni vaji, yukan ti nda'va ni ki'in xino? <sup>15</sup> Ko va'a ga na ka'an ra: "Nu kuni maa Jito'o ti kuchaku yo ti sa'a yo ja'a xi sa'a yo yukan", kachi ra. <sup>16</sup> Ko vijna, chi mani ka savixi ra maa ra ja ka ka'an teyii ra. Ko tu va'a ja sia'an ka ka'an teyii ra. <sup>17</sup> Ti nu iin yivi kuni i sa'a i jniñu va'a ja kuni Yandios, ko nu tu sa'a i, ti iin kuachi kuu yukan.

*Jnu'un ja ka'an nuu yivi riku***5**

<sup>1</sup> Taka ro'o yivi riku, kunso'o va'a jnu'un ka'an ru'u Santiago, na xndaku ri nuu ra naa ra vijna. Koto nduvixi ini ra. <sup>2</sup> Ro'o yivi riku, ja ka ñava'a ra kua'a

ndajniñu, vasu ka kuu vixi ini ra siki un, ko ja kuan naa taka un, chi tu kuñi ja kuu taka kivi. Ti vasu ñava'a ra kua'a sa'ma vii, ko ja kuan ndi'i yaji tikixin, chi tu kuñi ja kuu taka kivi. <sup>3</sup> Ti vasu ñava'a ra kua'a oro jiin plato, ko ja kuan ta'u ska'va, chi tu cuñi ja kuu taka kivi. Ti jiin ska'va un kuñi ra ja tu ni sa'a va'a ra jiin xu'un ra. Ni ndiyo xaan ini ra ja nakaya ra xu'un un, ti jiin yukan ni kukutu kuachi siki ra. Ti nanu kanda'a ñu'un ja xnaa yiki kuñu yo, suni sia'an ro'o yivi riku, ja kuan naa ra jiin xu'un ra. Jandaa ndixia kuu un vasu ni ni'in ra kua'a ndajniñu ja ni ndiyo ini ra. Yukan ni sa'a ra ja chaku ra kivi ja kuandi'i vijnal, ko na jaa maa kivi ti naa ra jiin taka un.

<sup>4</sup> Na kachi ri nuu ra, ro'o yivi riku, siki chaa ni ja'ncha triu ra, tu ni cha'u va'a ra ya'u da. Ti kuachi un kana nuu Yandios. Ti jandaa ndixia kuu ja jiniso'o ya un, chi maa ya kuu Tata yo Yandios ja ta'u ya jniñu nuu ni tu'u. <sup>5</sup> Ti na kachi ri nuu ro'o yivi riku ja tu ñukoo ini ra nuu Yandios. Chaku va'a ra nuu ñuyivi ja'a, ti sa'a ra taka ja kusii ini maa ra. Ko tu chaku ini ra ja su'va satu'va ra maa ra ja kuu kivi naa ra. Kuu ra nanu iin kuiti neñu ja ndetatu ti undi na jaa kivi kuu ti, sia'an ka kuu ro'o yivi riku. <sup>6</sup> Ni'in xaan ga iyo kuachi maa ra ansu ja ni kankuachi ra siki yivi va'a, ti undi ni ka ja'ni ra i, vasu tu ni iyo nau siki kuu ja ni ka ja'ni ra i.

### *Jnu'un ja ni'in yo jnundee ini*

<sup>7</sup> Ñani, nusa ti na ni'in ra jnu'un ndee ini ja kundatu ra undi kivi na ndenda maa Jito'o. Sa'a yo nanu ja yukan kuu nanu ka sa'a taka chaa ka sajniñu da nuu ñu'un da, chi kundatu kuee da undi na chaa sau ña'an xi sau kuee, ti sa naki'in da nuni va'a ja kaña nuu itu da. <sup>8</sup> Ti ro'o ñani, suni sia'an kundatu kuee ra undi na jaa kivi ndenda maa Jito'o. Koto xndi'i ra ini ra, chi su'va na ni'in ra jnu'un ndee ini ja kundatu ra ja taji Yandios. Yukan na sa'a ra ja kundatu kuee ra undi na ndenda maa Jito'o. <sup>9</sup> Koto ka'an ra siki jniñu ja sa'a inga ñani jna'an ra kandixia, nava tu kuncha kuachi siki ra ja sia'an ka kanaa ra jiin ñani jna'an ra. Chi maa ya kuu ja xndichi siki kuachi un, chi ja ni kuyajni ndenda ya.

<sup>10</sup> Ñani, na kotonchaa yo nasa ni ka sa'a profeta un, chaa ni ka ka'an jnu'un vajji nuu Yandios nuu yivi. Ni ka ni'in da jnu'un ndee ini, ti ni ka kundee da vasu ni ka ndo'o xaan da. <sup>11</sup> Ti na kua'a yo ja yiñu'un nuu yivi ni ka kundee i jiin nundo'o un. Nanu yukan ni ka jini ra nasa ni kundee i jiin nundo'o un. Chi ni ka jini yo nasa ni ka kundee ini chaa ni nani Job jiin nundo'o ni jna'an da na jana'an. Ni ka jini ra nasa ni kuu un, chi ni kendo va'a xaan da nu ni ndi'i nundo'o un ni jna'an da. Ti nava ni sa'a Jito'o jiin Job, suni sia'an kunda'u xaan ini ya yo'o, ti va'a xaan ini ya jiin yo.

<sup>12</sup> Ñani, ja kanuu ga kuu ja koto ka'an ra iin jnu'un ja chisojnu'un ra nuu yivi. Koto chisojnu'un ra ja andivi kuu ja kua'a jandaa ja'a ra, chi jini va'a yo ja Yandios kancha andivi un. Ni tu chisojnu'un teyii ra nuu yivi iin jnu'un ja ñuyivi ja'a kuu ja kua'a jandaa ja'a ra. Koto ma ka'an ra ni iin jnu'un ja chisojnu'un ra ja kanuu ga kuu jnu'un ni chisojnu'un ra un. Chi nu ka'an ra ja kuu, ti yukan ni ka'an ra. Ti nu ka'an ra ja tuu, ti yukan ni ka'an ra. Chi nu na ka'an ra jnu'un un ja chisojnu'un ra, yukan ti nchakuachi siki ra kivi na kundaa kuachi un nuu maa Jito'o.

<sup>13</sup> Nu iyo iin ro'o ja ndo'o nundo'o, ti kakanta'u ra. Ti nu iyo iin ra ja kusii xaan ini, ti na kata ra himno ja na chiñu'un ra Yandios. <sup>14</sup> Ti nu iyo iin ra ku'u, ti na kana chaa ka ndiso jniñu ja ka yinda'a da yivi ka kandixia. Na chii'da aceite siki yivi ku'u un, ti nu ka sa'a da un na ndakuni'in da sivi maa Jito'o, ja maa ya kuu ja ta'u ya jniñu un. Ti na kakanta'u da ja'a yivi ku'u un ja na nduva'a i. <sup>15</sup> Ti nu kandixia i ja sa'a Jito'o nava jikanta'u i, yukan ti nduva'a yivi ku'u un, chi maa Jito'o, nasava'a ya i. Ti nu ndiso i kuachi, ti koo jnuka'n'u

ini Jito'o nuu i. <sup>16</sup>Nu siukan kuu ti nakachi ndaa nuu ñani jna'an ra, ja ni sa'a ra kuachi siki da, ti kakanta'u ja'a ñani jna'an ra, nava na nduva'a ra siki ja ni nchakuachi ra. Chi nu ndi'i imi <sup>17</sup>iin yivi iyo ndaa ini ja jikanta'u i, ti va'a xaan nil'in jniñu, chi siuku Yandios nava jikanta'u i.

<sup>17</sup>Ti siki ja kakanta'u yo, jini yo ja Elías, vasu ni kuña'nu da ja ni kuu da profeta na jana'an, ja ni ka'an da jnu'un vaji nuu Yandios nuu yivi. Ko suni ni kuu da <sup>18</sup>iin chaa nanu maa yo. Ti ni jikanta'u xaan da ja tu kuun sau, ti tu ni kuun sau uni kuiya jiin iñu yoo. <sup>19</sup>Yukan ti ni jikanta'u tuku da, ti ni nchaa sau, ti ni nakua'nu tuku taka ja iyo nuu ñu'un.

<sup>19</sup>Ñani, nu <sup>20</sup>iin ra ni xndoo ichi ndaa Yandios, ti nu inga ra nachu'un ichi jna'an ra, yukan ti kuni ra ja nachu'un ichi va'a ra chaa ni kivi nduu nuu kuachi, chi ni nama ra da ja ni jna'nú ndatu da nikú. Ti yukan iyo jnu'un ka'nu ini Yandios nuu kuachi ni sa'a da. Ti sia'an na koo.

## Carta ni chaa Pedro Apóstol undi nuu nuu yiví ka kandixia

*Kanxia'u Pedro jiinyivi ka kandixia*

<sup>1</sup> Maa ri kuu Pedro, kuu ri apóstol ni taji Jesúś, ti Jesúś kuu Cristo, ja ndiso ya jniñu ña'nu nuu Yandios, ti maa ya ni ja'a jniñu ja'a nuu ri ja na kuu ri apóstol nuu ya. Chaa ri tutu ja'a kuaja nuu ra naa ra, ro'o yiví kanchuku jika, ja ni ka jichanuu ra ni ndañuu Ponto, Galacia, Capadocia, Asia jiin Bitinia. <sup>2</sup> Ti maa Tata yo Yandios ni nakaji ya ro'o naa ra, chi sia'an ni kuni maa ya undi na ti jankoo ga ñuyiví yo. Ti jiin Espíritu ya ni sasiin ya ro'o naa ra ja kuu maa ya. Vijna ti ka iyo ndoo ka iyo ii ra naa ra. Ja yukan kuu ja ka jandatu ra nuu ya, chi ni sandoo ya ro'o naa ra na ni ji'l Jesúś nuu nda'a cruz, ti ni jati ya niñi ya ja siki ro'o naa ra. Ti vi'i ga na kunda'u ini ya, ti na chindee ya ro'o vijna, ti na kukuee kunchuku ra nava kuni maa ya.

*Jnu'un kufukuu ini yo*

<sup>3</sup> Na kachi yo ja kuña'nu xaan maa Yandios, Ya kuu Tata maa Jito'o Jesúś, ya kuu Cristo. Sia'an na ka'an yo, chi ni kunda'u ini ya yo'o, ti ni nasama ya yo'o ja na nduu yo se'e ya. Vijna ti nu kanchuku yo nuu ñuyiví ja'a, ka ñukuu ini yo ja jaa ñin kivi nu ni'in yo taka ja va'a ja kua'a Yandios nuu yo. Siki yukan ni ja'a ya jandaa ja ni naxndoto ya Jesúś nuu ñuji'i. <sup>4</sup> Ti siki ja ni nasama ya ro'o naa ra, yukan na ti nu na jaa kivi ja ni'in ndi'i ra ta'u ra, ti tukaa naa kuiti ta'u un, ti tukaa na kuachi koo nuu ta'u un, ti ni tu naa kuiti. Ti jandaa ndixia kuu un, chi undi andivi jito va'a Yandios ta'u un, undi na jaa kivi ti ni'in ra naa ra. <sup>5</sup> Ni tu ka ja'ncha ini ra chi ni ka kivi ra nda'a Yandios, ti ka kandixia ndaa ra ja jito va'a ya ro'o naa ra jiinjnu'un maa ya undi na jaa kivi sandi'i ni ga. Ti ja kuu kivi yukan, na ti stuu ndijin ya maa ta'u ni sava'a ya ja kuu ro'o naa ra. Ni nama ya ro'o nava na ni'in ra ja ni sava'a ya ja kuu ra naa ra, nu na jaa kivi un.

<sup>6</sup> Ja yukan kuu ja ka iyo si'i ini ra vijna vasu kua'a nundo'o ka jito ra, ko ja kuu jaku ni kivi kuu un. <sup>7</sup> Ti nanu ka naka'ma yiví oro nuu ñu'un nava na kundoo, suni sia'an kuu ja ka jna'an ra nundo'o. Chi nu ka jito ra nundo'o siki ja ka kandixia ra Cristo, ti yukan ja ka ja'a ra jandaa ja ka kandixia ndaa ra. Ti nu na jaa kivi chaa ndijin Cristo, ti xndichi ya ro'o naa ra ti kusii ini ya jiin ya. Nakúa'a ya ja ñiñu'un nuu ra siki ja ni ka kandixia ndaa ra ya, ti ni'in ra, ta'u ra ti nduña'nu ra ñuu nuu ta'u ya jniñu.

<sup>8</sup> Ti vasu tu ni ka jini ra Jesúś na ni jikonuu ya nuu ñuyiví ja'a, ko ni ka ndumani ra nuu ya. Ti vasu tu ja'i kuni ra nuu ya vijna, ko ka kandixia ni ini ra ya naa ra. Ja yukan kuu ja ka kusii xaan ini ra naa ra. Ko tu kuu nasa ndakuni'in ra jiin ndusu yu'u ra naa ra ja ja kuan kuyajni kivi nduña'nu yo jiin ya naa yo. <sup>9</sup> Nu kanchuku ra nuu ñuyiví ja'a vijna, ka iyo ndaa ini ra ja ni'in ra ta'u un, ti kivi ra ñuu nuu ta'u ya jniñu. Yukan ka ndiyo ini ra, chi ja ni ka kandixia ndaa ra jniñu ña'nu ni sa'a Jesúś ja siki ra naa ra.

<sup>10</sup> Chaa ni ka kuu profeta, ja ni ka ka'an jnu'un Yandios undi jana'an, ni ka nanduku ndaa da, ni ka jikajnu'un da siki ja nasa nama Yandios yo'o vijna. Ti ni ka kachi da nasa vii ni kunda'u ini Yandios yo'o ja nama ya yo'o vijna. <sup>11</sup> Chi undi na ti koo ga, ti ni xna'an Espíritu Cristo nuu da naa da nasa nundo'o kii nuu maa ya, jiin ja nasa nduña'nu tuku ya nu na ya'a nundo'o

un nuu ya. Ti ni ka nakutu ini da ni ka nduku jnu'un da na kivi kuu ja kii Cristo, ti nasa koo jiin taka jnu'un ni ka'an maa Espíritu ja ni kuncha ya jiin da naa da. <sup>12</sup> Chi ni kachi maa Yandios ja ansu ja kuu maa da kuu jniñu ka sa'a da un. Chi su'va ja kuu yo'o kuu jnu'un ni ka ka'an da un. Ti vijná ja ni ka jini ra jnu'un un, chi taka yiví ka ka'an i jnu'un un ja nama Yandios yo'o. Ni ka ka'an da jnu'un un, chi maa Yandios ni taji Espíritu Santo ja ni kii ya ichi andívì, ti ni xna'an ya jnu'un ni ka ka'an chaa un. Ti suni taka ángel ka junukuachi nuu Yandios ni ka nakutu ini ja na kujnuni un.

### *Ja kuni yaya ja na koo ndoo yo*

<sup>13</sup> Ja yukan kuu ja koo ndito ini naa ra, ti koto kundiyo ini ra nau ndajniñu iyo nuu ñuyiví ja'a. Chi su'va kundiyo ini ja ni'in ra ta'u ja kua'a Yandios kivi na chaa ndijin Cristo Jesú. Ti kua'a ya nuu ra, chi ni kunda'u xaan ini ya ro'o naa ra. <sup>14</sup> Yukan kuu ja kundio ini ra, chi ka kuu ra se'e ya ja ka jandatu va'a. Chi vijná tukaa ka sa'a ra taka jniñu ja ka kusii ini maa ra, nanu ni ka sa'a ra undi na ti kujnuni ga ini ra jnu'un Yandios. <sup>15</sup> Ko vijná na ti tukaa, chi su'va kundiyo ini ja na koo ndoo na koo ii ra naa ra, nanu kaa maa Yandios, chi maa ya kuu ja ni nakaji ro'o naa ra nava na nduu ra se'e ya. Ja sia'an kuu ja kundiyo ini ja na koo ndoo, koo ii aňu ra jiin taka jniñu ka sa'a ra. <sup>16</sup> Chi sia'an ka'an nuu tutu ii Yandios: "Koo ndoo naa ra, chi maa ri iyo ndoo ri", kachi ya.

<sup>17</sup> Nu na kachi ra "Tata na" nuu ka jikanta'u ra nuu Yandios, ti yukan kuni ka'an ja ka kuu ra se'e ya. Ti nu sia'an na kachi ra, ti kanuu ja na kujnuni ini ra ja maa ya kuu ja sa'a ndaa nasa ka sa'a iin iin yo. Ti tu sa'a siin ya nasa kanda iin iin yo. Chi iin nuu ni sa'a ndaa ya jiin tendi'i yo. Yukan kuu ja kanuu na kaka ndaa ra nuu ya taka kivi kunchuku ra nuu ñuyiví ja'a. <sup>18</sup> Chi ja ni ka jini ra ja maa Yandios kuu ya ni chunaa yo'o nuu taka ichi ni ja'a tata ra nuu ra ja ni jikonuu nuu tachi. Ya'u xaan nhcaa jniñu ña'nú ni sa'a ya ja ni chunaa ya ro'o naa ra, chi tu ni chunaa ya ro'o jiin iin ndajniñu ja naa nanu kuu jiuñu oro xi plata. <sup>19</sup> Chi su'va ni sa'a Cristo iin jniñu ka'nu ga ja siki ro'o naa ra, ti ni tu naa kuiti jniñu un. Ni chunaa ya yo'o na ni jati ya niñi ya ja siki yo naa yo. Ni soko ya maa ya nanu ka soko yivi iin lelu, iin kuiti iyo va'a, iyo ndoo. <sup>20</sup> Chi undi na ti jankoo ga ñuyiví ja ni jani Yandios maa Cristo, ti ni kenda ndijin ya nuu kivi ja kuandi'i vijná. Sia'an ni sa'a Yandios siki ja ni kunda'u ini ya ro'o naa ra. <sup>21</sup> Yukan kuu ja ni ka kandixia ra Yandios, chi ni ka kujnuni va'a ini ra jniñu ña'nú ni sa'a ya jiin Cristo, na ni naxndoto ya maa ya nuu ñuji'i un, ti ni jani ya Cristo ja na nduña'nu ya andívì. Sia'an kuu ja ni ka kandixia ndaa ra Yandios jiin ja ni sa'a ya ja kuu ra naa ra. Yukan kuu ja ka ñukuu xaan ini ra ni'in ra taka ja kua'a ya nuu ra naa ra.

<sup>22</sup> Vijná ti ja ni ka ndundoo ini ra chi ni ka janta'u ra jnu'un ndaa siki Cristo. Yukan kuu ja ka kunda'u ni ini ra nuu ñani jna'an ra ka kandixia. Sia'an kuu ja kunda'u ini jna'an naa ra jniñu ni ini ni aňu ra. <sup>23</sup> Sa'a yo nanu jnu'un iin chaa chi'i tata, va'a va'a ki'in da xndee da nuni un nava tu te'yu, ti sia'an kaña va'a itu da. Suni sia'an ni sa'a Yandios iin jniñu va'a jiin yo ja tukaa naa kuiti yo. Ti ja ni ka ni'in ra jniñu un na ni ka kandixia ra jnu'un ya siki Cristo. Chi jnu'un un sa'a ja na kuchaku yo jiin Yandios. Ti nini na ka'an ndaa yo jnu'un ya, chi tu naa kuiti. <sup>24</sup> Chi sia'an ka'an nuu tutu ii Yandios:

Nanu kuu iin yuku, sia'an kuu taka yiví.

Ti ja na nduña'nu i kuu ja kuu i nanu ita yuku un.

Chi ichi yuku un. Ti ita un, ichi ti kenchaa.

<sup>25</sup> Ko jnu'un Jito'o Yandios, chi kendo ja kuu saa ni.  
Kachi tutu.

Ti jnu'un un kuu jnu'un va'a ja ni jaa nuu ra naa ra.

## 2

<sup>1</sup> Yukan kuu ja kanuu ja tukaa sa'a kuiti ra ni iin jniñu kue'e, ni ka ska'an ra jna'an ra, ni ka ka'an ra jiin yu'u ra nanu yivi ñaa xini, ni ka kuu kuasun ini ra naa ra, ni ka ka'an ndeva'a ra siki jna'an ra. <sup>2</sup> Ko ja ni ka nasama ra. Vijnatini ka nduu ra se'e Yandios, chi tu xnd'a'u jnu'un un yo'o naa yo. Ka'an ndaa kuiti jnu'un un. Nu na siin ra skua'a ra jnu'un ya, ti iin kivi iin kivi su'va ni'in ga ra jnundee ini, undi na jaa iin kivi ja ni'in ra ta'u nuu Yandios. <sup>3</sup> Jandaan dixia kuu yukan, chi ja ni ka kandixia ra jnu'un vaji nuu maa ya. Ti jnu'un un kuu ja vii xaan ga, chi ni kunda'u ini Jito'o nuu yo naa yo.

### Cristo kuu nanu yuu ja ndiso ja'a ve'e

<sup>4</sup> Kundikun ni'in ga Jesús naa ra, chi ndisojniñu ya nuu Yandios. Maa Yandios ni jani Jesús ja na sa'a ya jniñu ña'nun, ti ni ja'a ya ja yiñu'un vasu ndee kua'yivi tu ni ka janta'u i ya. Nanu iin yuu ka'nun ja ndiso iin ve'e, suni sia'an kuu jniñu ndiso Jesús nuu Yandios.

<sup>5</sup> Suni maa yo naa yo ka kuu yo nanu yuu un, chi nanu jajniñu yo yuu ja ka sa'a yo ja'a ve'e yo, suni sia'an jajniñu Yandios yo'o ja ka sa'a yo jniñu ya. Ti kancha ya jiin yo, chi ni taji ya Espíritu ya kancha ya jiin yo. Ka kuu yo nanu sutu ja ni sasiin ya ja kuu maa ya. Sutu iyo nuyivi ja'a ka soko da ndajniñu nuu áltar, ko yo'o chi su'va ka soko yo maa yo nu na sa'a yo iin jniñu ja'kusii ini maa Yandios. <sup>6</sup> Ti tutu ii Yandios ka'an ja Jesús kuu nanu iin yuu ka'nun, ti kanuu ga yuu un chi ndiso ve'e un. Ti ka'an ja sa'a Yandios iin jniñu ña'nun ga nuu ka'an:

Nde'e naa ra. Na kani ri iin yuu kanuu ga ja kuu Jerusalén.

Ni nakaji ri yuu un nanu nakaji yo yuu na'nun ja kundiso ja'a ve'e.

Chi taka yivi ka kandixia i maa ya, ti na kua'a Yandios ja yiñu'un nuu i.

Ni kachi tutu ii Yandios.

<sup>7</sup> Yukan ti ro'o ja ka kandixia Jesús, ka chiñu'un ra maa ya. Ko ja kuu yivi tu ka kandixia i maa ya, ka'an tutu ii Yandios sia'an:

Maa ya kuu nanu yuu ja ni ka skaña chaa ni ka sa'a ve'e un.

Vasu iin yuu va'a ga niku, ko ni ka yuji chaa un naa da,

chi maa ya ni nduu nanu iin yuu kanuu xaan ga ja ndiso ja'a ve'e un.

<sup>8</sup> Nuu yivi ja tu kandixia i ya, kuu ya nanu iin yuu ja ka kachi'i i xini ja'a i jiin, ti xnaa i maa i, chi tu kandixia i jnu'un ya.

Ka naa i chi sia'an ni kachi Yandios ja jna'nun ndatu taka yivi tu kandixia i ya. Ni kachi tutu.

<sup>9</sup> Ko ro'o naa ra, ru'u Pedro, na kachi ri ja ni nakaji Yandios ro'o ja na kuxio ra, ti na ndivi ra nuu nda'a ya. Ni ka yinda'a ra jniñu ta'u Yandios nuu fuyivi ja'a, chi sia'an ni tatu ya ro'o naa ra. Ka kuu ra nanu sutu nuu Yandios, chi nu ka sa'a ra jniñu ya, kuu nanu ja ka soko ra jniñu un nuu Yandios. Ni nakaji ya ro'o naa ra ja na kunukuachi ra nuu maa iin ni ya. Ti ka yi'i ra jiin maa iin ni ya. Taka un ni sa'a ya nava na ka'an ndaa ra taka nuu siki jniñu ña'nun ni sa'a ya ja kuu ro'o naa ra. Na ka'an ra ja ni nakaji ya ro'o, ja tukaa kaka ra nuu nuuñaan naa ni ka sa'a ndeva'a ra. Ja na ka'an ra ja ni nakaji ya ro'o, ja na kaka ra nuu ndijin, nuu na sa'a ra jniñu kuni maa Yandios. <sup>10</sup> Na ka'an ra ja undi nuu tu ni ka kuu ra yivi Yandios ja tu ni ka yi'i ra nda'a ya, chi tu ja'i xna'a'an ya jnu'un ya ja ni kunda'u ini ya nuu ra naa ra. Ko vijnatini chi jandaa ndixia kuu ja ka kuu ra yivi ya, chi ni kunda'u ini ya ro'o, ti ni xna'an ya jnu'un ya nuu ra naa ra.

*Na sa'a yo nava kuni maa Yandios.*

<sup>11</sup> Ñani, ru'u Pedro, kunda'u ini ri ro'o naa ra, ti siki yukan kuu ja kanda'u ri jiin ra ja tukaa ga kivi nduu ra jiin jniñu ndevel'a ja ka sa'a yivi ñuyivi ja'a. Sia'an kanda'u ri jiin ra naa ra, chi tukaa ka yi'i ra jiin yivi ñuyivi ja'a. Vijna ti ja ka yi'i ra jiin Yandios. Yukan kuu ja ka kuu ra nanu yivi ñuu jika ja kanchuku ra nuu ñuyivi ja'a, ti kanuu ja tukaa kivi nduu ra jiin jnu'un kue'e naa ra. <sup>12</sup> Su'va kaka ndaa nuu yivi ja tu ja'i nakuni i Yandios. Ka'an ndevel'a siki ra, chi tu ka kivi nduu ra jiin jniñu kue'e ka sa'a i. Ko jaa iin kivi na xna'an ndijin Yandios ja kunda'u ini ya nuu i naa i. Nu na kuanta'u i jnu'un un, ti ka'an i ja vii xaan kuña'nu Yandios, chi maa iin ni ya ni sa'a ja ni'ka jika ndaa ra nuu i naa i, vasu ni ka ka'an ndevel'a i siki ra naa ra.

<sup>13</sup> Kuandatu ra nuu taka chaa ña'nú ja ka ndisojniñu nuu ra naa ra, chi sia'an kuni maa Jito'o Cristo. Kuandatu nuu chaa kuu rey, ja kuu da chaa ña'nú ja ndisojniñu nuu ni tu'u nación ra naa ra. <sup>14</sup> Suni kuandatu nuu taka gobernador ja ni taji rey un, ja na kua'a da nundo'o nuu taka yivi ka sa'a ndevel'a. Ti su'va na kua'a da ja yiñu'un nuu taka yivi ka sa'a i ja va'a. <sup>15</sup> Ti sia'an ni kachi Yandios ja na sa'a ra niña jniñu va'a. Nu kaka ndaa ra sia'an, yukan ti tu iyo ni iin jnu'un ja kankuachi yivi siki ra, vasu ka kuu i yivi ka jito u'u jnu'un Yandios. <sup>16</sup> Ni sasiin ya ro'o naa ra ja tukaa siin ra jiin jniñu ni ka sa'a ra undi nuu, chi ja ka yi'i ra jiin maa Yandios vijnna. Ti vasu sia'an, ko tu kua'a ya jnu'un ja sa'a ndevel'a ra nuu ley iyo ñuu ra. Ti su'va sa'a ra nava kuni Yandios, chi ka junukuachi ra nuu maa ya. <sup>17</sup> Kua'a ra ja yiñu'un nuu taka ga yivi. Kava nda'u ini jiin taka ñani jna'an ra ja suni ka kandixia i Cristo. Chiñu'un ga Yandios ti kuandatu jnu'un ya naa ra. Kua'a ja yiñu'un nuu chaa kuu rey, chi kuña'nu ga da ja ta'u da jniñu nuu ra naa ra.

### *Jnu'un nundo'o ni jna'an Cristo*

<sup>18</sup> Ro'o ja ka kuu ra muzu ni ka jaan yivi, kuandatu nuu jito'o ra, chi kanuu ja na kua'a ra ja yiñu'un nuu da naa da. Kuandatu nuu da vasu kuu da chaa va'a xi kuu da chaa kaa kua'an kaa vají ja ka sa'a ndevel'a da jiin ra. <sup>19</sup> Chi chindee Yandios yivi ka jito nundo'o, vasu tundo ni ka sa'a i ja koto i nundo'o un. Kua'a ya ja yiñu'un nuu yivi un, chi ka jini va'a inijnuni i jnu'un ya, ti ka ndiyo ini i ja siuki i jnu'un un, vasu ka jito i nundo'o. <sup>20</sup> Sa'a yo nanu ja tu va'a nu ka jito ra nundo'o siki jniñu kue'e ni ka sa'a ra. Chi tu kua'a Yandios ja yiñu'un siki yukan. Ko nu ka ja'a yivi tau ra ja siki jniñu va'a, ti yukan kuu ja va'a nuu Yandios. Kua'a ya ja yiñu'un ro'o, chi tu ka kuiti ini ra vasu ni ka sa'a ndevel'a yivi jiin ra. <sup>21</sup> Ti jandaa ndixia kuu yukan, chi ni nakaji Yandios ro'o naa ra ja na kundee ini ra, vasu na kua'a yivi nundo'o ro'o. Yukan kuu ja ni jna'an maa Cristo nundo'o ja siki ro'o naa ra. Ti nanu ni kundee Cristo jiin nundo'o un, suni sia'an na kundee ra jiin taka nundo'o kondo'o ra nu kanchuku ra nuu ñuyivi ja'a. <sup>22</sup> Chi sia'an ka'an nuu tutu ii Yandios siki Cristo nuu ka'an:

Tu kuiti ni sa'a ya iin kuachi, ni tu ni ka'an ya ni iin jnu'un xndoña'an.  
Kachi tutu.

<sup>23</sup> Ti vasu ni ka ka'an ndevel'a yivi siki Cristo, ko tu ni kuiti ini ya, ja ka'an ya siki i. Ti vasu ni ka ja'a i nundo'o ya, ko tu ni ndondaa ya siki i. Chi su'va ni nakua'a ya maa ya nuu Tata ya Yandios ja na xndichi ndaa ya siki taka ja ni ndo'o ya. <sup>24</sup> Ja siki kuachi yo, ti ni jna'an ya nundo'o jiin yiki kuñu ya nu ni ji'i ya nuu nda'a cruz. Ti ni sa'a ya jniñu ña'nu un nava na sasiin ya maa yo nuu kuachi ja ni ka ndiyo ini yo undi nuu. Chi su'va vijnna na kundiyo ini yo ja na kaka ndaa yo nuu Yandios, chi ni ji'i Cristo ja siki yo'o naa yo. Ni ndo'o ya ja siki yo'o nava tukaa kondo'o yo jiin kuachi yo, chi vijnna ja ni ka ndundoo yo nuu Yandios.

**25** Na ti sa'a ga Cristo yukan, ni ka kuu ra nanu rii ja ni ka kee siin nuu chaa ndito ti, chi ni ka kuu siin ra nuu Cristo. Ko vijna ja ni ka ndeokuñi ra, ti ka siuku ra nuu Cristo. Ti maa ya kuu ja ndito ro'o naa ra vijna.

### Nava koto va'a iin chaa ñasi'i da

## 3

**1** Ja sia'an kuu ja ro'o ja ka kuu ñasi'i naa ra, kuandatu ra nuu yií ra naa ra. Nu kuu da iin chaa tu kandixia jnu'un Cristo, ko kundee ra ja na kandixia da. Chi vasu tu ka'an ra jnu'un un nuu da, ko jini da nasa kancha ra. **2** Taka kivi nde'e da nasa jika yiñu'un ra nuu ichi Yandios jiin ja sa'a ndaa ra taka jniñu ra. **3** Ti koto sa'a vixi ra maa ra, ja ku'un ra sa'ma vii xaan, ti va'a na sa'a ra xini ra, kuu siki sukun ra, kuu siki so'o ra, ja nanu oro ki'lí so'o ra. Ko so nini siki ra naskutu ra, ti tu kendo va'a ra nuu Yandios. **4** Chi su'va, kanuu xaan ga ja na koo ndaa ini aña ra. Ti na kukutu ini ra jiin jnu'un ndaa, jiin jnu'un vita ini ja tu naa kuiti. Chi taka un sa'a ja na kusii xaan ini Yandios.

**5** Yukan ni ka sa'a ñia'an jana'an ja ni ka jika ndaa ñia ichi Yandios. Ni ka ñukuu ini ñia Yandios, ti ni ka jandatu ñia nuu yií ñia. **6** Sia'an ni sa'a Sara ja ni jandatu ñia nuu yií ñia Abraham, ti nini ni ka'an yiñu'un ñia jiin da. Ti ro'o naa ra, ka kuu ra nanu se'E Sara nu na sa'a ra nanu ni sa'a maa ñia, ka ñukuu ini ra Yandios, ti ansu ja yu'u ra nu ka ka'an yií siki ra.

**7** Ti ro'o ja ka kuu ra yií, kanchuku ra jiin ñasi'i ra, ja ka jini va'a ra nasa xndaku Yandios siki yukan. Ti yukan ka'an ja na koo vita ini ra jiin ñasi'i ra. Ti kava yiñu'un ra jiin ñia, vanuxia tu kejna'an ñia jiin ro'o chaa naa ra. Ti kuñukuu ini ra maa ñia, ja suni nanita'u ñia ti kunchuku ra ja kuu saa ni jiin Yandios, siki ja kunda'u ini Yandios nuu ndinduu ra naa ra. Ti kuanta'u ya nuu ra naa ra. Nu sia'an na kunchuku ra jiin ñasi'i ra, chi nu tu sa'a ra sia'an ti tu iyo ini ra ja kakanta'u ra nuu ya.

### Nundo'o kajna'an yivi ka sa'a ja va'a

**8** Ti ja'a kuu iin jnu'un xnadaku ri sandi'i ni ga. Unuu kani ini ra naa ra. Koto nda'u jna'an ra siki ja iyo nundo'o. Kava ida'u ini ra jiin jna'an ra. Ti koto kachi ra ja kuña'nru ra nuu ñani jna'an ra, chi su'va nda'u na sa'a ra maa ra. **9** Nu ka sa'a ndeva'a yivi jiin ra, ti koto sa'a ndeva'a ra jiin yivi un. Nu ka'an ndeva'a yivi siki ra, ti koto ka'an ndeva'a ra siki i. Chi su'va kakanta'u nuu ya ja kuu yivi un. Sia'an sa'a ra, chi ni nakaji Yandios ro'o ja sia'an ti na kendo va'a ra. **10** Chi yukan ka'an jnu'un ii Yandios: Yivi kuni kuchaku va'a ti na koo sii ini taka kivi.

Na koto i yu'u i ja tu ka'an ndeva'a, ti ni tu ka'an i jnu'un un xndoña'an.

**11** Na kuxio i nuu jniñu kue'e, ti na sa'a i iin jniñu va'a.

Ti na kundio ini i ja kunchuku mani i jiin jna'an i.

**12** Ni kachi Yandios ja iyo yivi va'a, ti maa Jito'o jito va'a ya yivi un.

Ti jini va'a ya jnu'un ka jikanta'u i.

Ti nde'e ndii nde'e kaji ya siki yivi ja ka sa'a ndeva'a.

Kachi tutu.

**13** Ti tu nau iin ja sa'a ndeva'a jiin ra nu ka ndiyo ini ra sa'a ra ja va'a.

**14** Ndatu xaan kuu ra, chi kancha Yandios jiin taka ro'o ja ka ndo'o siki ja ka jika ndaa ra ichi ya. Ja sia'an kuu ja koto yu'u ra nde'e ra iin yivi, ti koto kukui'ya ini ra. **15** Chi su'va jiin ni ini ni aña ra chiñu'un ra maa Jito'o Cristo. Ti nu iin yivi na xndichi i ro'o siki ja ka kandixia ra jnu'un Cristo, ti nini na kotu'va ini ra ja xndeokani ra jnu'un nuu yivi un. **16** Ka'an yiñu'un ra jiin i, ti koto kuiti ini ra nuu i ja ka chakuachi i ro'o siki jnu'un Cristo, ja ka ñukuu ini ra naa ra. Ko nu ka'an i sia'an jiin ra, ti nakani inijnuni ra nu ndaa ja iyo iin kuachi ja ka'an i siki ra xi tuu. Nu iyo iin yivi ka'an siki ra, ko nu tu iyo ni

iiñ kuachi ni'in yi siki ra, sa ni ti kukanuu i ja ka'an i, chi ka jika ndaa ra, ti ka kandixia ra Cristo. <sup>17</sup> Chi nu kuni maa Yandios, ti va'a ga ja na kondo'o ra siki jñinu va'a ka sa'a ra, ti ansu ja sa'a ra jñinu kue'e. <sup>18</sup> Chi maa Cristo suni ni ndo'o ya, ti iiñ jinu ni ni ndo'o ya ja siki kuachi yo. Yukan ni ji'i iiñ chaa ni iyo ndaa kuiti ja siki yo'o, yivi ka sa'a ndeva'a, nava na ndivi yo jiin Yandios ti kivi yo nuu kancha ya. Ni sa'a ya jñinu ña'nu un na ni ji'i yiki kuñu ya, ko ni nandoto tuku ya ni sa'a Espíritu.

<sup>19</sup> Ti maa Cristo jiin Espíritu un ni ka ja'an ti ni ka xndaku ya nuu yivi ka yindasi vijna. <sup>20</sup> Ko na jana'an na ni ka chaku yivi un ni ka nduni'in ini i nuu Yandios. Ti kivi un ni kuu na ni sa'a Noé iiñ barco ni nani arca. Ti ni kivi un ni ndatu Yandios na nde nu kandixia yivi un xi tuu. Ti una vii ni jna'an yivi ni ka kivi i nuu arca un. Ti nini una yivi un ni ka kaku i na ni ndaa nducha nuu ni tu'u ñuyivi. <sup>21</sup> Ti nanu ni ka nama i maa i nuu nducha un, suni sia'an kuu ja ka janducha yo vijna ja nama yo maa yo. Ti ka janducha yo, ko ansu ja na ndundoo yiki kuñu yo, chi ja na ndundoo inijnuni yo nuu Yandios. Yukan kuu ja ka janducha yo. <sup>22</sup> Ti ni ja'a Yandios jandaanu takaa un na ni xndoto ya Cristo Jesús nuu ñuji'i. <sup>22</sup> Yukan ti ni ndaa ya nuu andivi, ti kancha ya nuu nda'a kua'a Yandios nuu kuña'nu ya. Ti takaa ángel Yandios ja kanchuku andivi, jiin takaa ja yinda'a ja jñinu un, ka jandatu i nuu ya.

### *Na kunukuachi yo nava kuni maa Yandios*

## 4

<sup>1</sup> Ni kuu ini maa Cristo ja kondo'o ya ja siki yo'o jiin yiki kuñu ya. Ti ro'o naa ra, suni sia'an koo ra nundo'o nu na kua'a yivi nundo'o ro'o. Chi yivi ka ndo'o jiin yiki kuñu i, tukaa kundee kuachi un jiin yiki kuñu i. <sup>2</sup> Nu sia'an na sa'a ra, ti ka sa'a ra jniñu kuni maa Yandios ja kuu takaa kivi kuchaku ra, ti ansu ja sa'a ndeva'a ra nava ka ndiyo ini maa ra. <sup>3</sup> Chi ni kani kivi vekeyo ra, na tu ja'i nakuni ra jnu'un Yandios, ni ka sa'a ra kua'a kuachi ja ka jajna'an ini yivi ja tu ja'i nakuni i Yandios. Ni'iñ xaan ni ka sa'a ra jniñu kue'e. Ni ka jika ra jiin jnu'un siñ ini. Ni'iñ xaan ni iyo ini añu ra ja sa'a ra iiñ kuachi. Ni ka ji'i xaan ra ndixi. Ni ka jika ra sava'nii ga viko. Ti yukan ni ka jajna'an ini ra ja ko'o ra ndixi. Ti ni ka chiñu'un ra santu ja ni kachi Yandios ja tu chiñu'un ra.

<sup>4</sup> Ti yivi ja tu ja'i nakuni jnu'un Yandios, ka kuiti ini i siki ja tukaa ka jika ra jiin i, chi ka siñ i jiin mani jniñu kue'e un. Ja yukan kuu ja ka ka'an ndeva'a i siki ra naa ra. <sup>5</sup> Ko yivi un jaa iiñ kivi ja nakua'a i nuu maa Yandios siki jniñu ni ka sa'a i. Ti ja ko tu'va maa ya ja nanduku ndaa ya jniñu ni ka sa'a yivi ka chaku, jiin yivi ni ka ji'i. <sup>6</sup> Ja yukan kuu ja ni chaa jnu'un Cristo nuu takaa yivi ja na kandixia i na ni ka chaku i. Ti kuu ndaa siki kuachi i nanu kundaa siki kuachi takaa yivi ka chaku nuu ñuyivi ja'a, chi suni ni ka ji'i i. Ko yivi kandixia ti kuchaku añu i ja kuu saa ni nanu chaku maa Yandios.

<sup>7</sup> Ti ja kuan kuyajni kivi ja naa takaa ja iyo. Ja sia'an kuu ja kondito ini naa ra. Ti kundiyo ini kakanta'u ra. <sup>8</sup> Ti iiñ jnu'un kanuu ga kuu ja na kunda'u ini ra nuu jna'an ra. Chi nu na kunda'u ini yo jna'an yo, ti iyo jnu'un ka'nu ini nuu ndi'i kuachi yo. <sup>9</sup> Koto nda'u ra yivi jaa ve'e ra. Kua'a nuu ve'e ra, ti koto ma iiñ ja ndo'o ini ra nde'e ra yivi un. <sup>10</sup> Siñ siñ ta'u ni ja'a ya nuu iiñ iiñ ra ja ka sa'a ra jniñu ja kuni maa ya. Ti jiin ta'u un chindée ra jna'an ra. <sup>11</sup> Nu ni ni'in ra iiñ ta'u ja ka'an ra jnu'un Yandios nuu inga yivi, ti kani ini ja maa jnu'un Yandios ka'an ra. Nu ni ni'in ra ta'u ja chindée jna'an ra, ti kani ini ja maa Yandios kuu ya ja'a ndee ini ra ja sa'a ra jniñu un. Ti nu na kuni yivi takaa un, ti ka ka'an i ja kuña'nu xaan Yandios siki takaa ja ni sa'a ya jiin

Jesús, ya kuu Cristo. Ti na ka'an yo ja vii xaan kuña'nu Cristo, ti ta'u ya jniñu ja kuu saa ni. Sia'an na koo.

### *Na kondo'o yo ja ka kandixia yo Cristo*

<sup>12</sup> Ñani, nu vaji iin nundo'o xaan ja kondo'o ra, koto kachi ra ja maa iin ra kuu ja iyo nundo'o. <sup>13</sup> Chi su'va, ko siñ ini naa ra nu ka ndo'o ra nanu ni ndo'o Cristo, chi jandaa kuu ja kondo'o ra siki ja ka yi'i ra jiin ya. Yukan na ti koo siñ ini ra naa ra ja kuu kivi na ndenda ndijin ya, ti xna'an kají ya ja vii xaan kuña'nu ya. Sia'an kuu ra ja kuu kivi un naa ra vasu ka jna'an xaan ra nundo'o vijná. <sup>14</sup> Ti xaan ndatu ra vijná ja ka ka'an ndeva'a yivi siki ra ja ka kandixia ra Cristo. Chi jiin yukan ka stuu ndijin ra maa ra ja kancha Espíritu Yandios jiin ra, ja kuña'nu xaan ya. Vasu ka ka'an ndeva'a yivi siki ra, ko kancha Espíritu Santo jiin yo, ti chindee ya ro'o ja na kundee ra jiin nundo'o un. <sup>15</sup> Ti nu ka ndo'o ra, ti ka ndo'o ra, ko siki ja ka kandixia ra Cristo, ansu siki ja ka sa'a ra iin kuachi nanu ka ndo'o yivi ka ja'ni ndiyi, xi yivi sakui'na, xi yivi ka sa'a jniñu kue'e, xi yivi kivi nduu nuu jniñu tatu. <sup>16</sup> Ko nu ka ndo'o ra siki ja ka kandixia Cristo, ti tu kukanuu ra. Chi su'va, nakuanta'u nuu Yandios ja ka ndo'o ra siki ja ka yi'i ra jiin Cristo. <sup>17</sup> Ti jiin nundo'o ka jna'an ra vijná, yukan jini ini yo ja ja ni keja'a nanduku ndaa Yandios kuachi yo. Kuni yo yukan, chi xnakan sa'a ya ja na koto ra nundo'o. Ti na kuni ya na ndenu ka kandixia ndaa ra Cristo xi tuu. Ti nu sia'an na sa'a ya jiin se'e ya, ¿ti ndee ga sa'a ya jiin yivi ja tu ka jandatu i jnu'un ka'an ya siki Cristo nusa? <sup>18</sup> Ti nu u'u xaan ti ka ya'a yivi va'a nuu nundo'o, ¿Ndoo ka jani ini ra ja jna'an yivi kua'an kanda ja ka sa'a i kuachi nusa? ¿Ka jani ini ra ja ka kendo va'a i nuu Yandios nu? <sup>19</sup> Ko ro'o ja ka jna'an ra nundo'o nava kuni maa Yandios, vasu sia'an ka jna'an ra, ko koto ka'ncha ini ra ja sa'a ra jniñu va'a. Nakua'a maa ra nda'a maa Yandios, ya ni sa'a ro'o, chi siuku ndaa ya taka ja ni chisojnu'un ya.

### *Xndaku Pedro nuu chaa ka ndiso jniñu jiin chaa kuachi*

## 5

<sup>1</sup> Vijná ti ru'u Pedro, na kanda'u ri nuu ra naa ra, ro'o ja ka kuu ra chaa ña'nu ja ka jito ra yivi ka kandixia, chi suni chaa ña'nu kuu ri, ti jito ri yivi ka kandixia. Ti kuu ri iin chaa ni jini ri jiin nuu ri nasa ni ndo'o Cristo. Ko jaa iin kivi ja chaa ndijin ya, ti ru'u jiin ro'o naa ra na nduña'nu yo jiin ya. <sup>2</sup> Ko ja kuu vijná, kanuu ja koto va'a ra yivi Yandios. Nanu iin pastor ja jito va'a da riñ da, ti sia'an koto va'a ra yivi, chi ndiso jniñu ra ja koto ra yi ja ka kuu i se'e maa Yandios. Ko siñ ini ra ja koto ra i, chi yukon kuni Yandios. Ti ansu chayika ya ro'o, ti ni ansu ja kundiyo ini ra ja ni'in ra xu'un jiin jniñu sa'a ra un. Chi su'va kusii ini, ti sa'a ra jniñu un. <sup>3</sup> Koto nduvixi ini ra, ti kachi ra ja maa ra kuu ja ta'u jniñu nuu i, chi su'va na koo ndaa ini ra nava na kuni yivi naa i nasa kuu va'a ga kaka ndaa i nuu ichi Yandios. <sup>4</sup> Sa'a va'a jniñu ka ndiso ra ja ka jito ra yivi a ga kaka ndaa i nuu ichi Yandios. Jito u'u Yandios yivi ka sa'a vixi maa, ti su'va kunda'u ini ya ti chindee ya yivi sa'a nda'u i maa i.

Kachi tutu ii.

<sup>5</sup> Ti ro'o ja ka kuu ra chaa kuachi, suni sia'an kuandatu ra nuu chaa ka jito ro'o, chi ka ndiso da jniñu ja kuña'nu da nuu ra naa ra. Tendi'i ro'o ja ka kandixia, kava nda'u ini ra jiin jna'an ra, sa'a nda'u maa ra nuu ñani jna'an ra, chi sia'an ka'an nuu tutu ii Yandios:

Jito u'u Yandios yivi ka sa'a vixi maa, ti su'va kunda'u ini ya ti chindee ya yivi sa'a nda'u i maa i.

<sup>6</sup> Tendi'i ro'o yivi ka kandixia, koto nduni'in ini ra nuu Yandios, chi su'va sa'a nda'u maa ra, ti nava na nakuni ra ja ka yi'i ra nda'a Yandios, ya ta'u jniñu nuu taka ja iyo. Nu sia'an na sa'a ra, ti jandaa kuu ja nduña'nu ra na jaa kivi nchaa Cristo Jesú. <sup>7</sup> Koto xndi'i ini ra nu nau iin ja ka jna'an ra, su'va va'a ga ja na nakua'a ra maa ra nuu nda'a Yandios, chi maa ya ndito ro'o, chi kunda'u ini ya ro'o.

<sup>8</sup> Jandaa ndixia kuu ja na koo ndito ini ra naa ra ti kaji na koo xini ra, chi ja'u'u un jito yu'u ro'o ti nduku nasa sa'a ja kanakava ra nuu iin kuachi. Ti xaan ga chaa un ansu iin ndika'a nu nduxaan ti. <sup>9</sup> Yukan kuu ja kuni ja kundichi ni'in ra siki ja'u'u un, ti kuu kundee ra jiin nu fu'un teyii ini ra jiin jnu'un kandixia ra Cristo. Chi suni sia'an ka ndo'o ñani jna'an ra kanchuku ni tu'u nuyivi. <sup>10</sup> Ti vasu sia'an kuu, ko jandaa ndixia ja kunda'u ini Yandios ro'o naa ra, chi ni nakaji ya ro'o naa ra ja na nduña'nu ra jiin ya ja kuu saa ni. Ti jandaa ndixia kuu jnu'un yukan, chi iin jniñu ña'nu ni sa'a Cristo ja kuu yo'o naa yo. Ko xnakan na kondo'o ra ja kanchuku ra nuu nuyivi ja'a, chi kua'a yivi nundo'o ro'o siki ja ka kandixia ra jnu'un Cristo, ko tu yu'u ra. Ti vasu sia'an kuu, ko jaa iin kivi ja sa'a ndaa Yandios ndi'i un. Kua'a ya jnundee ini ro'o nava na jakuiñi ni'in ga ra nuu nundo'o jna'an ra. Sa'a ya ja na ku'un teyii ini ra jiin jnu'un ka kandixia ra, ti kukutu ini ra jiin jnu'un un. <sup>11</sup> Ti na ka'an yo ja vii xaan kuña'nu Cristo, ja ta'u ya jniñu ja kuu saa ni. Ti sia'an na koo.

### *Jnu'un sandi'i ni ga*

<sup>12</sup> Ti ru'u Pedro, na kachi ri ja, ja ka jini ra ja Silvano kuu da iin ñani ja siuku ndaa da nuu Cristo. Ti ni chindee da ru'u na ni chaa ri tutu ja'a kuaja nuu ra naa ra. Ti kanda'u ri jiin ra ja na kuanta'u ra jnu'un ja'a, chi ka'an ndaa ri ja iyo tijni ja sa'a Yandios jiin yo siki ja kunda'u ini ya yo'o. Kukutu ini jiin jnu'un ja'a ja kanchuku ra nuu ñuyivi ja'a. <sup>13</sup> Yivi ka kandixia kanchuku ñuu Babilonia, ja suni ni nakaji Yandios nanu ni nakaji ya ro'o naa ra, ja ka kandixia ra, ka ka'an i ja na sandee ini ra. Ti Marcos, chaa kuu nanu se'e ri, suni sia'an ka'an da ja na sa'a ndee ini ra naa ra.

<sup>14</sup> Kanxia'u jiin jna'an naa ra, ti yiñu'un teyu'u nuu jna'an ra.  
Ti ru'u Pedro, ñukuu ini ri ja na ko sii ini taka ro'o ja ka yi'i ra nda'a Cristo. Ti sia'an na koo.

## Carta kuu uu ni chaa Pedro Apóstol nuu yivi ka kandixia

### *Kanxia'u Pedro jiin yivi ka kandixia*

<sup>1</sup> Maa ri kuu Simón Pedro ti junukuachi ri nuu Jesú, ya kuu Cristo. Junukuachi ri chi ni nakaji ya ru'u ja na kuu ri apóstol nuu ya. Ti chaa ri tutu ja'a nuu ra nraa ra, ja suni ka kandixia ra ya, chi ni kachi Yandios ja tukaa ga jna'nu ndatu ra jiin kuachi ra. Tukaa jna'nu ndatu ra, chi ni ka kandixia ra jniñu ña'nu ni sa'a Cristo Jesú ja kuu yo'o naa yo. <sup>2</sup> Ti vijna vi'i ga na kunda'u ini Yandios ro'o naa ra, ti na chindee ga ya ro'o ja na kukuee kunchuku ra. Sia'an nava na kivi inijnuni ra nasa kuni ka'an jnu'un Yandios ja ka'an ndaa siki Jito'o Jesú.

### *Nava ni nakaji Yandios yivi ka kandixia*

<sup>3</sup> Iyo ii ya ti vee xaan kuña'nu ya, ti kuu sa'a ya taka jniñu kuu ini maa ya. Ja yukan ni kachi ya ja yo'o, yivi ka kandixia, na ni'in yo jnundee ini nu kanchuku yo nuu ñuyivi ja'a. Ti yukan ka ñukuu ini yo ja ka nchañu'un yo maa iin ni ya, ti na kaka ndaa yo nuu ichi ya. Jandaad ndixia kuu ja ni'in yo un nu na kivi inijnuni yo maa jnu'un Yandios jiin maa jnu'un ndaa siki Jito'o Jesú, jiin ja na kandixia ndaa yo jnu'un un. Ti kaka ndaa yo nuu ya nu na chaku ini yo maa jnu'un Yandios jiin maa jnu'un ndaa ja ka'an siki Jito'o Jesú. Suni sa'a yo ja vee xaan kuña'nu ya, chi tu iyo ni iin jniñu ja tu kuu sa'a ndaa kuiti ya. Ti siki yukan ni nakaji ya yo'o ja na kaka ndaa yo nuu ya nuu ñuyivi ja'a. <sup>4</sup> Yukan ni kee yu'u maa ya iin jnu'un kanuu xaan ga ja ka'an ndaa kuiti nuu yo naa yo. Chi ka'an ja ka nduu jna'an yo jiin ya, chi skivi ya iin jnu'un ini yo ja na kundiyo ini yo sa'a yo niña jniñu ndaa. Ti jandaad ndixia kuu un chi ni nama ya yo'o ja tukaa kivi nduu yo jiin jniñu kue'e ka ndiyo ini yivi ja sa'a i nuu ñuyivi ja'a.

<sup>5</sup> Ti ro'o naa ra, na kachi ri ja ka nakutu ini ra jiin jnu'un ja'a, ti tu ka ndukuxi ra. Ja ni ka kandixia ra jnu'un ndaa Cristo Jesú. Ti ja ka kandixia ra vijna, ti kanuu xaan ga ja na kundiyo ini ra sa'a ra niña jniñu va'a, ansu iin jniñu kue'e. Suni kanuu ja na kujnuni ini ra na jniñu va'a ga ja kuni Yandios ja sa'a ra. <sup>6</sup> Ti siki ja nini ka iyo iin jnu'un kue'e ini yo ja sa'a yo iin kuachi, ja yukan kuu ja kanuu ja na kutu'va ini ra kasi ra jnu'un un. Suni kanuu ja na koo ndee ini ra, ti siin ra jiin jniñu kua'a Yandios nuu ra vasu na koo ndo'o koo nene ra. Ko nu ka kuni siuku ra jiin yukan, ti kanuu ga xaan ja na kundiyo ini ra kunchañu'un ra maa Yandios, ti kaka ndaa ra nuu ya nu kunchuku ra nuu ñuyivi ja'a. <sup>7</sup> Ti suni iin jnu'un kanuu kuu ja na koo mani ini ra jiin jna'an ra. Ko suni ja na kunda'u ini ra nuu tendi'i yivi. <sup>8</sup> Nu na nakutu ini ra ja na nakaya jniñu un sa'a ra, yukan na ti tu ka sa'a ka'a ra jniñu. Chi su'va kee va'a jniñu ka sa'a ra, ti sia'an kivi va'a inijnuni ra maa jnu'un ndaa ja ka'an siki Jito'o Jesú, ya kuu maa Cristo. <sup>9</sup> Ko yivi tu ka ndiyo ini i ja sa'a i jniñu ndaa un nava kuni maa Yandios, ka kuu i nanu yivi kuaa ja tu ka ni'in i ichi ki'in i. Chi yivi tu sa'a ndaa jniñu un, ja ni nduni'in ini añu i, ti tukaa ni'in i ichi Yandios. Ni naa ini i nasq ni keja'a jika i nuu ichi ya, ti ni naa ini i ja ni sandoo ya i siki taka kuachi ni sa'a i undi nuu.

<sup>10</sup> Ro'o ñani jna'an ri naa ra, ru'u Pedro, na kachi ri ja na kukutu ini ra jiin jnu'un ni xndaku ri un. Chi sia'an na ti kua'a ra jandaad ja maa Yandios ni

nakaji ro'o ja ka kandixia ra Jito'o Cristo Jesú. Chi nu na sa'a ndaa ra jniñu un, ti tu naa ra naa ra. <sup>11</sup> Chi nu sia'an na sa'a ra, yukan na ti kachi Yandios iin jnu'un vpii xaan nuu ra ja jandaa ndixia kuu ja kivi ra nuu maa Jito'o Jesú, ya kuu Cristo ja ni taji Yandios ja nama ya yo'o, chi yukan ta'u ya jniñu ja kuu ssa ni.

<sup>12</sup> Yukan kuu ja tu ja'ncha ini ri ja xndaku ri jnu'un ja'a nuu ra naa ra, vasu ja ni ka jini ra un, ti vasu ja kajiiñ ni'in ra jiin jnu'un Yandios ja ka kandixia ndaa ra. <sup>13</sup> Chi jani ini ri ja va'a ga ja na xndaku ri nuu ra ni chaku ga ri, nava na nuku'un ini ra naa ra. <sup>14</sup> Chi maa Jito'o Cristo Jesú ni kachi ya jnu'un un nuu ri ja tukaa kuchaku na'an ri nuu ñuyivi ja'a. <sup>15</sup> Yukan kuu ja nakutu ini ri ja xndaku ri nuu ra naa ra, nava nu ni ji'l ri, ti nuku'un ini ra tako jnu'un ka'an ri ja'a.

### *Nava ni kundaa jnu'un Yandios*

<sup>16</sup> Kanuu ja na nuku'un ini ra tako jnu'un ja'a, chi tu ni ka xna'an ri iin jnu'un xndoña'an nuu ra naa ra. Ja ni xndaku yukun ri ro'o nuu ra naa ra na ni ka xna'an ri nasa jniñu ñia'nu ni sa'a Jesú, jiin ja nasa vpii xaan ndenda ya kivi nduña'nu ya ja nchaa tuku ya. Jandaa ndixia kuu jnu'un un, chi ni ka jini ri jiin nuu ri xini yuku un. Ni ka jini ri ja ni nasama ya, ti vpii xaan ni nduu ya ja kuña'nu ya. <sup>17</sup> Ni ka jini ri ja Tata yo Yandios ni ka'an yiñu'un ya jiin Jesú, ni ja'a ya jandaa ja vpii xaan kuña'nu Jesú. Chi ichi andivi ni ka jiniso'o ri ndusu yu'u maa Yandios, ja maa ya kuu ja vpii xaan kuña'nu, ti ni kachi ya: "Ja'a kuu Se'e ri ja kunda'u ini ri, ti kusii ini ri jiin", ni kachi ya. <sup>18</sup> Ti ru'u, ni ka jiniso'o ri jnu'un un ja ni ka'an ichi andivi, chi ni ka'iin tutu ri jiin maa Jito'o xini yuku ii yukan.

<sup>19</sup> Suni sia'an ka jini yo ja iyo ndaa tako jnu'un ni ka chaa tako profeta, ja ni ka ka'an da jnu'un vaji nuu Yandios undi jana'an. Yukan kuu ja kanuu ga ja na nakutu va'a ini ra jiin jnu'un un, chi jnu'un un kuu nanu iin nduva ñu'un ja ndinchaa nuu ñuñaa. Jnu'un un kuu nanu ka nde'e yo luceru ka'nun un, chi yukan ti ja ni ka jini yo ja kuan kundijin, ti ja vee kaña ndikandii. Suni sia'an kuu nu na nakutu va'a ini yo jiin jnu'un ni ka chaa tako chaa un, ti kivi va'a inijnuni yo, chi tukaa ka jika yo ichi ñuñaa, chi ja ka jini va'a yo ichi Yandios, ti ka jika ndaa yo. <sup>20</sup> Ko xnakan na kujnuni va'a ini ra ja ni iin jnu'un ja ka'an tutu ii, ansu so ja ni ka jani ini maa chaa kuu profeta un ni sa'a da. <sup>21</sup> Chi tako chaa ni kuu profeta ja ni ka ka'an da jnu'un Yandios undi jana'an, tu ni ka ka'an kuiti da jnu'un un ja kuu ini maa da. Chi su'va maa Espíritu Santo ni xna'an ya nuu da da maa jnu'un Yandios, ansu jnu'un ja ni ka ndo'o ini maa da niku.

### *Siki chaa xna'an jnu'un xnda'u*

## 2

<sup>1</sup> Ti nuu yiñi nación Israel ni ka iyo sava chaa ni ka ka'an da ja ka kuu da profeta ni taji Yandios ja na ka'an da jnu'un vaji nuu ya. Ko tuu, chi ni ka ka'an da jnu'un xndoña'an. Ti ru'u Pedro, na kachi ri ja suni sia'an koo sava chaa un nuu ra naa ra ja xna'an da jnu'un xndoña'an. Xnda'u xe'e da yiñi jiin jnu'un un, ti kandixia i, ka nduni'in ini da, ti ka ka'an da ja Jesú tu ni kuu Jito'o Cristo ja ni nama ya yo'o. Ko siki chaa un jaa iin kivi ja yachi ni naa da naa da. <sup>2</sup> Ka nduni'in ini da jiin jnu'un sii ini, ti kua'a yiñi kundikun i ichi kue'e un. Ja siki chaa un ti kuni'in ini yiñi, ti skexiko i jnu'un ndaa siki Cristo Jesú. <sup>3</sup> Ti chaa ka xndoña'an un, ka ndiyo ini da ja ni'in da xu'un, jiin ja na kua'a ra ja ja yiñu'un nuu da naa da. Ti ka xna'an da niña jnu'un xndoña'an

nava na kandixia ra da. Ko ni tu kixi ini nundo'o, chi kuu ja jna'nu ndatu da, chi undi jana'an iyo jnu'un ja ndenda ya ti sa'a ndaa ya siki kuachi da.

<sup>4</sup> Jandaa ndixia kuu jnu'un un, chi nu tu ni janka'nu ini Yandios nuu tajnu ya ja ni ka sa'a kuachi, chi su'va ni taji ya kua'an nuu infiernu nuu ka yindasi nuu ñaa kuiti. Ti ni jasi ya undi na jaa kivi ka'nu ja sa'a ndaa ya siki kuachi. <sup>5</sup> Suni tu ni janka'nu ini ya nuu yivi jana'an, chi su'va ni skuun ya iin sau xaan siki yivi kue'e un. Maa iin ni Noé, chaa ni ka'an ndaa jnu'un Yandios, ni nama ya maa da jiin uxia ga yivi.

<sup>6</sup> Suni sia'an ni kuu jiin kuachi yivi ñuu Sodoma jiin ñuu Gomorra, chi ni ja'ma ya ñuu i, ti ni ka nduu yaa ni ga. Jiin yukan ni stuu Yandios nava sa'a ya jiin yivi ja ka nduni'in ini i siki jnu'un ya. <sup>7</sup> Ko ni nama ya Lot nuu ñuu un, chi ni ndiyo ini da ja kaka ndaa da nuu Yandios. Ti ni kukui'ya ini da nu ni jini da ja ni ka nduni'in ini yivi un nuu Yandios, chi mani jniñu kue'e ni ka sa'a i. <sup>8</sup> Ti chaa va'a un ni kuncha da jiin yivi kue'e un naa i, ti ndi kivi ni kukui'ya ini da ja ni jini da taka jniñu kue'e ka sa'a i. <sup>9</sup> Ti sia'an ni iyo yukan, ko maa Jito'o ni nama ya yivi ni ka jika ndaa i nuu ya, ja tu kii nundo'o siki i. Ti ni kendo yindasi yivi kue'e un nava na nundo'o i nundo'o kivi ka'nu ga ja sa'a ndaa ya kuachi i. <sup>10</sup> Ti vi'i ga kua'a ya nundo'o kuu chaa ka ndiyo ini ja sa'a ndeava'a da, ti ka skexiko da taka ja kuña'nu iyo undi andivi jiin nuu ñuyivi.

Ni ka nduni'in ini da, ti ka ndiyo ini da ja sa'a da nasa kuu ini maa da, ti tu ka yu'u da ka'an ndeava'a da siki ja kuña'nu iyo undi nuu sukun un, <sup>11</sup> vasu taka ángel Yandios, ja ka kuu ndaja'a ya, ti vasu ka kuña'nu jiin jniñu ka ndiso. Ko tu ka ka'an ndeava'a da siki ja kuña'nu yukan nu kandichi da nuu Jito'o. <sup>12</sup> Ti chaa yukan chi ka kuu da nanu kuiti yuku ja ni ka kaku ti ja na kunu'ni ti ti kuu ti. Chi ka ka'an kue'e kuiti da siki taka un ja tu chaku kuiti ini da. Ti nanu ka ji'i taka kuiti un, suni sia'an kuu da.

<sup>13</sup> Ti ja ni ka xndo'o da yivi, suni sia'an na na chunaa da ja kondo'o da. Siki ja ndiyo ini da ja sa'a da sava'ni ga jniñu kue'e kuiti, chi ndikivi ka sa'a ndeava'a da. Kanchuku da nanu kini, chi kue'e xaan ka sa'a da ja so jnu'un kanuu ja'a nuu yivi. Ti ka ndututu da jiin ra viko ra, ti si ka iyo ini da jiin jnu'un kue'e un, ja ka xnda'u da. <sup>14</sup> Ka kusii xaan ini da jiin jnu'un yisikinchaa jna'an, ti tu ka jankuiñi da vasu ti'li ja ka sa'a da kuachi un. Ti ka xnda'u da yivi kui'ya ini ja tu ja'i kandixia va'a i jnu'un Yandios. Ti tu'va xaan da jiin jnu'un ja kandiyo ini da ni'in da sava'ni ga ndajniñu tatu ja ka ji'yo da kuñava'a da ndajniñu un. Chi chaa ni ka jna'nu ndatu ka kuu da naa da. <sup>15</sup> Ni ka sanaa injnuni da chi ni ka xndoo da ichi ndaa Yandios. Ti ni ka siin da nava ni sa'a Balaam, se'e Beor, iin profeta xndoña'an ja ni ka'an undi jana'an. Chi chaa un ni kusii ini maa da ja na ni'in da xu'un siki jnu'un ni xndoña'an da un. <sup>16</sup> Ti iin burru ni ka'an ti jiin da nanu ka'an iin yivi, vasu tu kuu ka'an kuiti un. Ti ni ka'an ti nuu chaa un, ti yukan ni jasi ti ja tukaa ka'an da taka jnu'un kue'e.

<sup>17</sup> Ti chaa ka xna'an jnu'un xndoña'an un, ka kuu da nanu iin soko ichi ja tu ñu'un nducha. Suni ka jika da nanu kua'an iin viko jiin tachi. Ti ja kuu chaa un naa da ja iyo tu'va iin nuu ñuñaa kuiti kindi'yu da ja kuu saa ni. <sup>18</sup> Chi ka sa'a vixi da maa da jiin jnu'un ka ka'an ka'a da, ti ka ka'an da ja vatuni kundikun yo jiin jnu'un ni'n ini ja sa'a yo na jniñu jajna'an ini maa yo, vasu iin jniñu kue'e xaan kuiti kuu. Sia'an ka xnda'u da yivi ja ni ka kuxio i nuu jniñu kue'e ni ka sa'a i undi nuu, nanu ni ka sa'a jna'an i. <sup>19</sup> Chaa xnda'u un, ka ka'an da ja iyo nuña nuu yo, ti kuu sa'a yo sava'ni ga ja kuni maa yo, vasu ka jini da ja jniñu kue'e kuu. Sia'an chi iyo nuña yo ja sa'a yo nasa kuni maa yo kachi da. Ko tuu, chi maa da su'va ni ka nduu da muzu nuu kuachi un. Sa'a yo nanu. Nu na kundee kuachi un jiin iin yivi ti sa'a i nasa kuni maa,

yukan ti ni nduu i muzu nuu kuachi un. <sup>20</sup> Ko ja kuu chaa kandixia, va ja ni ka kuxio da nuu jniñu kue'e ja ka iyo nuu ñuyivi ja'a, chi ni ka nama da maa da siki ja ni kivi inijnuni da maa jnu'un ndaa kuiti siki Jito'o Jesús, ya kuu Cristo ja ni taji Yandios ja nama ya yo'o. Ti vasu ni ka kujnuni va'a teyii ini da jiin jnu'un un, ko ni ka nandeokuñi tuku da nuu jniñu kue'e kuiti un, ja sia'an kuu ja vi'ga kendo da chi ni sana ndi'i kuiti da, ansu nava ni iyo undi nuu. <sup>21</sup> Chi va va'a ga nu tu ni jini da maa jnu'un ndaa siki Cristo Jesús, ansu ja ni ka jini va'a da, ti ni ka xndoo da iin jniñu ndoo ja ni ta'u ya nuu da. <sup>22</sup> Ni kundaa siki da nava kachi iin jnu'un na jana'an: "Ina un ni nakaji tuku ti ja ni ndujña ti. Ti kini ja ni ndundoo un, ni nakuchi tuku ti nde'yu", kachi.

### *Nava ndenda Jito'o*

## 3

<sup>1</sup> Ñani mani, ja'a kuu tutu kuu uu ja chaa ru'u Pedro, nuu ra naa ra. Ti jiin uu tutu ja'a kuni ri ja na kani va'a ini ra siki ndi'i ja iyo va'a jnu'un ndaa ni ka kutu'va ra undi nuu. <sup>2</sup> Kuni ri ja na nuku'un ini ra taka jnu'un ni ka ka'an chaa ni sasiin Yandios ja ni ka ka'an da jnu'un ya undi nuu. Ti suni nuku'un ini naa ra jniñu ni ta'u Jito'o, ja nama ya yo'o, ja ni ta'u ya jniñu un ru'u, chaa ka kuu apóstol nuu ra naa ra.

<sup>3</sup> Xnakan jnu'un ja'a kuu ja na nakuni ra naa ra: Ja nu kuan ndi'i kivi ti kikoyo chaa ka'an kata siki jnu'un ndaa Yandios, chi ka sa'a da jniñu kue'e kuiti ja ka ndiyo ini maa da. <sup>4</sup> Ti kachi da: "¿Ndoo tu ja'i nchaa Cristo nava ni chisojnu'un ya nusa? Ja undi kivi na ni ka jil'i ndiyi tata yo ti undi vijna, ti tu ja'l' nasama kuiti ndi'i ja iyo undi na ni jankoo ñuyivi", kachi da. <sup>5</sup> Sia'an ka ka'an da chi maa da ni ka jasi irijnuni da, nava tu nakuni da ja undi na jana'an ni jankoo andivi jiin ñuyivi, ja so jiin ndusu yu'u Yandios ni ka'an ya ti ni kuu ni un. Ti ni ta'u ya jniñu ja ni kusiin ñuyivi jiin nducha, ti ma'ñu nducha un ni kenda ñu'un ichi. <sup>6</sup> Ti suni jiin nducha ni ka naa yivi na jana'an, chi ni ndaa nducha un ja ni kuun sau xaan. <sup>7</sup> Sia'an ni ka'an Yandios, chi jiin jnu'un ni ka'an ya ni ta'u ya jniñu ja ja iyo tu'va ja kayu andivi jiin ñuyivi ja iyo vijna. Chi kiji iin maa kivi juicio ja kayu ndi'i kuiti. Ti kivi un naa taka yivi tu ka chiñu'un Yandios.

<sup>8</sup> Ko ro'o ñani mani, koto naa ini ra iin jnu'un kanuu ja'a: Ja nuu maa Jito'o, chi iin kivi kuu nanu iin mil kuiya, ti mil kuiya un kuu nanu iin kivi. <sup>9</sup> Ti vasu ka iyo sava yivi ka ka'an ja tu ndenda tuku Jito'o. Ko tuu, chi tukaa kukuee ti kundaa jnu'un ni chisojnu'un ya. Yukan ndatu kuu ya chi tu kuni ya ja jna'nun ndatu ni iin yo. Chi su'va ñukuu ini ya ja tendi'i yo na nakani ini, ti na xndoo yo kuachi yo. <sup>10</sup> Ti kivi ka'nu ja nchaa maa Jito'o, sanaa ini yo ti nchaa ni ya, nanu kuu ja iin sanaa ini yo ti kenda ni iin ñakui'na iin jakuaa. Ti iyo xaan kuu kivi un chi ni'in, ti naa andivi. Taka ja iyo andivi ndi'i kayu ti nducha ki'in. Ti ñuyivi jiin taka ja iyo nuu, ndi'i kuiti kayu.

<sup>11</sup> Ja sia'an kiji iin kivi ka'nun un, ti kanuu xaan ja kuu vijna ja na kaka ndaa ra ichi Yandios ja kanchuku ra nuu ñuyivi ja'a. Chi ni sasiin Yandios ro'o naa ra ja na kuandatu ra jnu'un ya ja kanchuku ra nuu ñuyivi ja'a. <sup>12</sup> Sia'an kunchuku ra, ti kundatu ra, ti na nakutu ini ra ja kuan kuyajni kiji kivi ndenda Yandios. Ti kivi un kayu andivi ti naa. Ti naa taka ja iyo nuu andivi, ti nducha jiin ñu'un. <sup>13</sup> Ko yo'o chi kundatu yo ja kuu kivi un ja na koo inga andivi jaa jiin ñuyivi jaa, chi sia'an ni chisojnu'un Yandios. Ja koo ndoo koo ii ni tu'u yukan, chi sia'an ni kachi ya. <sup>14</sup> Ñani, kundatu naa ra ja na kundaa taka jnu'un ja'a. Yukan kuu ja na nakutu ini ra ja na koo ndoo koo ii ra ja tu na kuachi koo siki ra ja kanchuku ra ñuyivi ja'a. Nu sia'an na sa'a ra, ti

koo mani ya jiin ra kivi ndenda ya tuku. <sup>15</sup> Ko na kani ini ra naa ra siki ja tu chaa yachi kivi un, chi kundatu kuee ini Jito'o yo'o. Yukan kuu ja kukuee kivi un, nava iyo ga kivi ja na nakani ini tendili'i yivi ti nama ya maa i naa i. Nani yo Pablo ja iyo mani yo jiin da, suni sia'an ni chaa da tutu nuu ra naa ra, chi yukan ni xna'an Yandios jnu'un ndichi ya nuu da. <sup>16</sup> Suni sia'an yoso jnu'un ja'a nuu tako tutu ni chaa da. Ti nuu tako tutu da un iyo sava jnu'un yii ja kuee ga chaku ini yo. Ti yivi ja tu chaku ini jiin yivi ja tu kivi ini jiin jnu'un kandixia i, chi ka nduku i nasa, ja nasama i nasa kuni ka'an jnu'un yii un, nanu ka nasama i nasa kuni ka'an sava ga jnu'un nuu tutu ii Yandios. Ti yukan ka sa'a i ko ja na jna'nun datu maa i naa i.

<sup>17</sup> Ti ro'o nani, ru'u Pedro, na kachi ri ja vijna ti ja ni ka jini ra tako jnu'un ja'a, ja ni xna'an ri nuu ra naa ra. Yukan kuu ja koto va'a ra maa ra, ti tukaa siin ra jiin jnu'un xndoñia'an ja ka xna'an chaa kue'e un, ja tu ka jandatu da nuu jnu'un ndaa Yandios. Chi nu na kandixia ra jnu'un ka xnda'u da un, yukan na ti tukaa ga nakutu ini ra jiin jnu'un ndaa Yandios. <sup>18</sup> Ko su'va, ndiyo ini ri ja vi'i ga na kuñukuu ini ra ja kunda'u ini Yandios ro'o naa ra, ti na chindee ga ya ro'o nava na kivi inijnuni ra nasa kuni ka'an ga jnu'un ya, ja ka'an ndaa kuiti siki Jito'o Jesús, ya kuu maa Cristo ja ni taji Yandios ja nama ya yo'o.

Ti sia'an na koo.

## Tutu ni chaa apóstol Juan undi nuu

### *Jnu'un sa'a ja ka chakuyo*

<sup>1</sup> Ru'u Juan, jiin taka ga apóstol, ja ka kuu ri ndaja'a Jesús, na chaa ri tutu ja'a nuu ra naa ra. Ti na kachi ri ja iyo *iin* Jnu'un kanuu ga, ti Jnu'un un kuu maa Jnu'un chaku, chi undi nuu ja iyo Jnu'un un, ti sa ni keja'a *ñuyivi*. Ni ka jiniso'o ri Jnu'un un. Ni ka nde'e ri, ti ni ka jini ri jiin nduchi ri. Ni ka jini ri nuu, ti ni ka kue'e ri jiin nda'a ri. Ti yukan kuu *iin* Jnu'un chaku ja sa'a ja ka chaku yo. <sup>2</sup> Ti Jnu'un un ni kenda nundijin nuu *ñuyivi* nava na kuni yo nau ja kuu. Ti ru'u naa ri ni ka jini ri nuu. Ti ka ja'a ri jandaa siki Jnu'un un, chi jandaa kuiti kuu ja ni kenda Jnu'un un. Ti yukan ka xndaku ri nuu ra naa ra ja Jnu'un un sa'a ja ka kuchaku yo ja kuu saa ni. Jnu'un un kancha jiin Tata yo Yandios, ko ni kenda nuu yo naa yo ja na kuni ndaa yo nau ja kuu. <sup>3</sup> Ti ka ja'a ri jandaa nuu ra naa ra chi ni ka jini ri nuu, ti ni ka jiniso'o ri Jnu'un ka'an un. Yukan kuu jnu'un ka xndaku ri nuu ra naa ra nava na nduu *iin* nuu ini ra jiin ri naa ra. Nanu ru'u naa ri, *nini* ka iyo *iin* nuu ndixia ini ri naa ri jiin Tata yo Yandios jiin Se'e ya Cristo Jesús. <sup>4</sup> Sia'an ka chiso ri tutu ja'a nuu ra naa ra nava na kendo kají, ti na kusii *irii* ra jiin taka jnu'un ja'a naa ra.

<sup>5</sup> Ja'a kuu jnu'un ni xna'an Jito'o Cristo Jesús nuu ri naa ri, ti suni ja'a kuu ja ka xndaku ri nuu ra naa ra ja Yandios kuu *ñundijin* chi tu iyo ni *iin* kuachi nuu ya, iyo ndoo ya, ti tu iyo ni *ti'lí* *ñuñaa* nuu ya, chi *ñuñaa* un kuu kuachi. <sup>6</sup> Yukan kuu ja nu na kachi yo ja *yí'i* yo jiin Yandios, ko siin yo kua'an yo ichi *ñuñaa* un, ti xnda'u yo jiin jnu'un ka ka'an yo, jiin *jiniñu* ka sa'a yo ja sia'an. <sup>7</sup> Ko nu ka jika ndaa yo ichi Yandios, ti kua'an yo ichi *ñundijin* nuu kancha maa ya, ti ka iyo ndoo yo nanu iyo ndoo maa ya. Ja sia'an na ti ni ka nduu *iin* nuu ini yo jiin taka *ñani* jna'an yo ja suni ka kandixia i. Yukan kuu ja ka iyo ndoo ini yo nuu Yandios, chi ni taji ya Se'e ya Jesús ja ni *jí'i* ya nda'a cruz, ti ni jati ya *nini* ya ja ni kenchaa ya kuachi yo nuu ya, ti sia'an ni sandoo ya kuachi yo jiin *nini* ya.

<sup>8</sup> Ti nu ka ka'an yo ja tu iyo kuachi yo ti ka xnda'u yo maa yo, chi tu iyo jnu'un ndaa ini yo. <sup>9</sup> Ko nu na kachi ndaa yo nuu Yandios ja ka iyo kuachi yo, ti jandaa kuu ja kuanka'nú ini ya nuu kuachi yo, ti sandoo ya *añu* yo, chi *nini* siuku ya taka jnu'un ni kachi ya. <sup>10</sup> Ti nu ka ka'an yo ja tu ka sa'a yo ni *iin* kuachi, ti ka xndoo kui'ya yo jnu'un Yandios ja sia'an, chi ka ka'an yo ja xnda'u ya, ko ja kuu nuu maa ya chi yo'o kuu ja ka xndoña'an. Ti nu ka ka'an yo sia'an, mani jnu'un maa yo ka ka'an yo, chi tu ka jandatu yo jnu'un ya, vasu sia'an iyo jnu'un Yandios.

### *Ka'an Cristo Jesús ja'a yo*

## 2

<sup>1</sup> Ro'o ja ka kuu ra nanu se'e ri, ja ni ka kandixia ra jnu'un Jesús, na chaa ri jnu'un ja'a nuu ra naa ra nava tu nukoyo ra nuu kuachi. Ko nu na sa'a ra *iin* kuachi naa ra, ti iyo *iin* ya *ii* ja ka'an ja'a yo, ti kancha ya ma'ñu sava jiin yo ja kuu nuu Yandios. Ti maa ya kuu Cristo Jesús, ti maa *iin* ni ya kuu ja iyo ndoo. <sup>2</sup> Undi nuu tu ni kuva'a ini Yandios nuu yo ja siki kuachi yo, ko ni ndunda'u ini ya yo'o nu ni *jí'i* Se'e ya Cristo Jesús nuu nda'a cruz, ja ni nama ya yo'o nuu kuachi yo. Ti ansu *nini* nuu kuachi yo'o naa yo, chi suni nuu kuachi tendi'i yivi kanchuku nuu ni tu'u *ñuyivi*. <sup>3</sup> Ti kuni ndaa yo ja *yí'i*

ndixia yo jiin Yandios nu na siuku ndaa yo tako jniñu ni ta'u ya. Sia'an na kuni ndaa yo ja ni ka nakuni yo ya. <sup>4</sup> Ko nu iin yivi na kachi: "Ru'u ja jini ndaa ri jnu'un Yandios, chi yi'i ndixia ri jiin ya", kachi. Vasu sia'an na ka'an, ko nu tu jandatu jniñu ni ta'u ya, yukan ti kuu i iin yivi ni kendo kui'ya chi ni xndoña'an i, ti tu iyo ndaa ini i. <sup>5</sup> Ti ndijin ndaa nde'e yo yivi ka siuku ti ka jandatu i jniñu ni ta'u ya, chi ni yixia ini i jiin jnu'un ya. Yukan kuu ja ka kuu ini i nuu Yandios. Ti nu sia'an na sa'a yo, ti ka iyo ndaa ini yo ja ka yi'i yo jiin ya. <sup>6</sup> Nu iin yivi na kachi ja yi'i ndixia i jiin Yandios, ti kuni ja na kaka ndaa i ja iyo ndoo i nanu ni iyo ndoo maa Jesùs.

<sup>7</sup> Ru'u Juan, kunda'u ini ri ro'o naa ra, chi ka kuu ra ñani ri. Nuu tutu ja'a na ta'u ri iin iin jniñu jaa nuu ra, vasu ansu vinañu'ni ni kenda jnu'un ja'a, chi ro'o naa ra ja ka jini ra jnu'un ja'a undi na ni ka keja'ka kandixia ra Jesùs. Ti jnu'un un ja ni ka jiniso'ra. <sup>8</sup> Ko nuu tutu ja'a suni na ta'u ri iin jniñu jaa. Ti jandaa ndixia kuu jnu'un un, chi ni siuku Jesùs jnu'un un na ni kii ya nuu ñuyivi. Ti suni sia'an kuni ja na siuku ra jnu'un un naa ra nanu ni siuku maa Jesùs. Tukaa na nde'e yo ja iyo nuu ñuyivi, chi yivi ka jika ichi ñuyivi ja'a, ichi ñuñaa kuankoyo i, ti tu ka jini i na ichi kuankoyo i. Ko yo'o naa yo ja ka jini yo ja kua'an yo ichi ndaa, chi maa Jesùs ni kachi ya sia'an, ti ja ka jini yo ja kua'an yo ichi ñundijin.

<sup>9</sup> Iyo yivi ka ka'an ja ka jika i nuu ñundijin nava ni kachi Jesùs, ko mani ka xndoña'an yivi un ja ka ka'an i sia'an. Ti jito u'u i ñani jna'an i ja suni kandixia da Jesùs. Ti xnda'u i ja jika i ñundijin, chi su'va ñuñaa kua'an i. <sup>10</sup> Ko yivi jika ichi ñundijin, kunda'u ini i nuu ñani jna'an i, ti yivi un chi jika ndaa i, ti tu iyo ni iin ja skandava i nuu kuachi i. <sup>11</sup> Ko nu jito u'u i ñani i, nanu ja ti kuni ga i jniñu ni ta'u Jesùs, ti ñuñaa kancha yivi un, chi tu jini i nanu kua'an i. Ti kuu i nanu chaa kuaa, chi ni kukuaa nduchi i ni sa'a ñuñaa un.

<sup>12</sup> Ro'o ja ka kuu ra se'e ri, chaa ri tutu ja'a nuu ra naa ra nava na kuni ra ja iyo jnu'un ka'nun i Yandios nuu ra naa ra, chi ja ni kenchaa ya kuachi ra jiin jniñu ni sa'a Cristo Jesùs.

<sup>13</sup> Ro'o chaa ña'nun naa ra, chaa ri tutu ja'a nuu ra, chi ja ni ka kandixia ndaa ra Jesùs, ja maa ya ja iyo jiin maa Yandios sa ni xnukoo ya ñuyivi. Suni chaa ri tutu ja'a nuu tako ro'o chaa kuachi, chi kuan kundee ra jiin jniñu kue'e ja kuni chayika ja'u'u un ro'o naa ra. Se'e ri naa ra, sia'an ni chaa ri tutu ja'a nuu ra, chi ja ni ka kandixia ndaa ra Tata yo Yandios. <sup>14</sup> Suni sia'an ni chaa ri tutu ja'a nuu ro'o, chaa ña'nun naa ra, chi ni ka kandixia ndaa ra Jesùs, ja maa ya ni iyo jiin maa Yandios sa ni xnukoo ya ñuyivi. Suni sia'an chaa ri tutu ja'a nuu ro'o, ña'an kuachi naa ra, chi ka iyo ni'in ini ra jiin jnu'un Yandios, ti ka ñukuu ini ra jnu'un ya tako ni kivi, ti jiin yukan ja ni ka kundee ra jiin ja'u'u un.

<sup>15</sup> Ko kanuu iin jnu'un na kachi ri nuu ra naa ra, ja koto kuñukuu ini ra ñuyivi ja'a, ni tu kundio ini ra ja ni'in ra tako ja iyo nuu. Chi nu na kin yi'i ra ñuyivi ja'a, ti naa ini ra Tata yo Yandios, ti tukaa ga kuñukuu ini ra maa ya.

<sup>16</sup> Chi tako ndajniñu ja iyo nuu ñuyivi ja'a, tu jajna'an ini Yandios ja na kundio ini yo. Ti tu kuva'a ini ya ja kuñukuu ini yo ja ni'in ga yo. Ni tu jajna'an ini ya ja ni'in ga yo sava'ni ga ja jajna'an ini yi'ki kuñu yo, chi mani maa ñuyivi ja'a xiin un. Ni tu jajna'an ini ya ja kava vixi ini yo jiin ja ñava'a yo, ni tu kin yi'i yo un, chi tako un ja'a ñuyivi ja'a, ko tu va'a, chi ansu sia'an kuni Tata yo Yandios. <sup>17</sup> Ti sia'an kuan ndi'i ñuyivi jiin tako ndajniñu un, ko ja iyo nuu ñuyivi ja'a tu kuñii. Ti yivi kuandatu tako jniñu ta'u Yandios, yivi yukan kuu ja kuchaku ja kuu saa ni jiin Yandios.

### *Chaa jito u'u Cristo*

<sup>18</sup> Se'e ri naa ra, na xndaku ri nuu ra ja ja ni jaa kivi kuan ndi'i ñuyivi yo. Ti siki kivi vijna ja ni ka jiniso'o ra ja kii chaa koto u'u Cristo, vasu undi vijna ja ni ka kenda tijn'i yivi ka jito u'u Cristo. Ti jiin yukan jini yo ja ja ni kuyajni ndaa kivi ja naa ñuyivi. <sup>19</sup> Ti yivi ka jito u'u Cristo un, xnaka ni ka yi'i i jiin yo, ko ni ka kuxio i inga ichi, chi tu ni ka kejna'an ndaa ini i jiin yo. Ni ka yi'i ndaa ndixia i jiin yo, ti ja ni ka kuñii i jiin yo niku, ko tu ni kuu sia'an. Chi su'va, ni ka kee i kua'an i, ko nu kuankoyo i, yukan na ti ni ka jini ndaa yo ja tu ni ka kejna'an ini i jiin yo.

<sup>20</sup> Ko ja kuu ro'o naa ra, ni ja'a Cristo Espíritu Santo nuu ra. Ti jiin yukan ja ka jini ndaa ra ja sia'an kuu. <sup>21</sup> Sia'an chaa ri tutu ja'a nuu ra naa ra vanuxia ja ka jini ndaa ra jniñu ni ta'u Yandios ansu ja tu ka jini ra, chi ka jini va'a jniñu ni ta'u Yandios ansu ja tu ka jini ra, chi ka jini va'a ra ja tu kuu kenda iin jnu'un xndoña'an nuu iin jnu'un iyo ndaa. <sup>22</sup> ¿Ti nau ka kuu yivi ka xndoña'an un nusa? Kuu yivi ka'an ja Jesú斯 tu kuu ya Cristo, ya ni taji Yandios ja ndiso ya jniñu ña'nua. Ti yivi yukan kuu ja jito u'u Cristo, chi chisa'yí i Tata yo Yandios jiin Se'e ya Cristo Jesú斯. <sup>23</sup> Yivi chisa'yí ja ansu Se'e Yandios kuu Cristo, ti yivi un tu yi'i i jiin Yandios. Ko tako yivi na kua'a jandaa ja Cristo, kuu ya Se'e Yandios ya ndiso ya jniñu ña'nua, ti jandaa ndixia kuu ja yivi un yi'i i suni jiin maa Tata yo Yandios.

<sup>24</sup> Ja yukan kuu ja ka'an ri ja na chu'un ini chu'un aña ra jnu'un ni ka jini ra naa ra, ti ni ka kandixia ra undi nuu na ni ka keja'a ra. Ti nu na kendo taka jnu'un ni ka kandixia ra undi nuu yukan ini aña ra, yukan na ti ni kuu ndaa ndixia ja ka yi'i ra jiin Tata yo Yandios jiin Se'e ya Cristo Jesú斯. <sup>25</sup> Ti ja'a kuu jnu'un ña'nua ni chisognu'un Cristo Jesú斯 nuu yo, ja kuchaku yo sia'an ni ga jiin ya.

<sup>26</sup> Ni chaa ri jnu'un ja'a nuu ra naa ra ja na kaxnu'un ri siki yivi ka nduku xnda'u ro'o naa ra. <sup>27</sup> Ko ro'o naa ra, chi maa Yandios ni ja'a ya Espíritu Santo kancha ya jiin ra. Ti tukaa ka nandi'i ra ja xndaku inga yivi nuu ra, chi maa Espíritu Santo yinda'a ro'o naa ra. Ti jnu'un Espíritu Santo un iyo ndaa ti jañkivi xndoña'an. Yukan kuu ja ka'an ri, chi ka yi'i ra jiin ya. Tí siin nava kanchuku ra ja ka yi'i ra jiin Jito'o Cristo Jesú斯, nava xndaku maa Espíritu Santo nuu ra naa ra.

<sup>28</sup> Ko vijna na kachi tuku ri, ro'o se'e ri naa ra. Siin ni ini jiin jnu'un Cristo Jesú斯, ti nava sia'an taka yo na natu'va yo nuu ya naa yo, nava nu ni ndenda ndijin ya, ti tu yu'u yo, ni tu kukanuu yo kujiin yo nuu ya kivi nchaa ya.

<sup>29</sup> Ja ka jini ndaa ra ja iyo ndoo Cristo Jesú斯. Ti suni sia'an nu ni ka jini ra taka yivi ka jika ndaa, ti yivi yukan ndixia kuu ja ka kuu se'e Yandios, chi ka siuku ndaa i taka jniñu va'a ni ta'u maa ya.

### *Nau kuu se'e Yandios ja yi'i jiin ya*

## 3

<sup>1</sup> Nde'e naa ra, na xaan ga ni kunda'u ini Yandios yo'o ja na konani yo se'e ya, ti suu ndixia ka kuu yo. Ja yukan kuu ja yivi ka jika ichi ñuyivi ja'a, tu ka nakuni i yo'o, chi ni nuu maa Jito'o Jesú斯, tu ni ka nakuni i. <sup>2</sup> Ñani naa ra, vijna ti ja ka kuu yo se'e Yandios, ko changa ga kuni yo nasa koo yo kivi na nchaa Jesú斯 tuku. Ko ja ka jini yo ja kivi na nchaa Cristo Jesú斯, ti nduu yo nanu kaa maa ya, chi kuni yo nuu ya nasa kaa maa ya. <sup>3</sup> Ti nu ka ñukuu ini yo ja na kuni yo nuu Jesú斯, ko na sandoo yo maa yo nanu iyo ndoo maa ya.

<sup>4</sup> Ko yivi ja tu ka chu'un ini, ti ka stivi i ley Yandios ja sia'an ka sa'a i kuachi. Chi kuachi un kuu ja sa'a ja tu ka chiñu'un i ley un. <sup>5</sup> Chi ka jini ra ja ni kii

indjin Cristo Jesús nuu ñuyivi ja ni kii kenchaaya kuachi yo, vasu tu ni iin kuachi ni iyo nuu ya. <sup>6</sup> Yukan kuu ja taka yivi ja ka yi'i jiin Cristo, tukaa ga siin yi ja sa'a i kuachi. Ko yivi ni ka jajna'an ini ti ka siin i ka sa'a i kuachi, ti va jankiv'i ni ka jini yivi un nuu Jesús, ni tu ka yi'i i jiin ya. <sup>7</sup> Ro'o, se'e ri naa ra, na kachi ri ja tu kuandatu ra nuu ni iin yivi ja ka kuni'xnda'u ro'o naa ra. Chi taka yivi ka jika ichi Yandios, ka jandatu i jnu'un ya, chi ka iyo ndaa ini i. <sup>8</sup> Ti taka yivi ka sa'a kuachi un, mani se'e kui'na ka kuu i, chi kui'na un sia'an ni vajjiin kuachi undi na ni keja'a ñuyivi. Ti siiki yukan kuu ja ni kii Se'e Yandios ja ni kii xnaa ya taka jniñu sa'a kui'na un. <sup>9</sup> Ti yivi ka yi'i jiin Yandios ja ka kuu i se'e maa ya, ti tukaa ka siin i sa'a i kuachi, chi kancha jnu'un maa ya jiin yi. Tukaa ga ka siin i jiin kuachi, chi ja ni ka kuu i se'e Yandios. <sup>10</sup> Yukan jini yo nau ja kuu se'e Yandios ti nau ja kuu se'e kui'na, chi taka yivi ka siin jiin kuachi xi ja tu ka kunda'u ini ñani jna'an i ja ka yi'i jiin Cristo Jesús, ansu se'e Yandios ka kuu yivi un.

### *Na kunda'u ini yo ñani jna'an yo*

<sup>11</sup> Ja'a kuu jnu'un ja ni ka jiniso'o ra undi na ni ka keja'a ka kandixia ra Cristo Jesús naa ra, ja na kunda'u ini yo ñani jna'an yo ka kandixia. <sup>12</sup> Tu sa'a yo nanu ni sa'a Cain, ja ni kue'e kui'na kuu un maa da, ti ni ja'n'i da ñani da. ¿Ti na siiki kuu ja ni ja'n'i da ñani da nusa? Kuachi kuu ja tu ni iyo va'a jniñu sa'a da. Ti ñani da, ni sa'a tu chaa un mani jniñu ndaa, iin jniñu ja iyo va'a. <sup>13</sup> Ñani ri naa ra, koto sa'a kui'ya ini ra, nu ka jito u'u yivi ñuyivi ja'a ro'o naa ra, ti koto xndi'i ini ra naa ra. <sup>14</sup> Yo'o naa yo tu kanchuku yo nanu kunchuku yivi un, chi yivi un kanchuku i nanu ndiyi ja tu ka nakuni jnu'un Yandios. Ko yo'o naa yo, ja ni ya'a kivi ja ni kunchuku yo nanu ndiyi un, ti vijna ni ka nachaku ini yo ja na kuchaku yo nanu ndiyi ja tu ka nakuni jnu'un ya, chi vijna ja ni ka nakuni yo jnu'un un. Yukan kuu ja ka kunda'u ini nuu ñani jna'an yo, chi ja kandixia yo Cristo Jesús. Ko yivi ja tu ka kunda'u ini nuu ñani jna'an un, ka siin i kanchuku i nanu ndiyi. Sia'an kuu chi tu ka nakuni i jnu'un Yandios. <sup>15</sup> Ñani naa ra ja ka kandixia yo Cristo Jesús, na kachi ri ja nu nau iin yivi na koto u'u i ñani jna'an i, yivi un kuu i nanu iin chaa ja'n'i ndiyi, chi iin ni kuu ja ka'n'i yo ndiyi jiin ja koto u'u yo ñani jna'an yo. Ti ka jini ra naa ra ja iin chaa ja'n'i ndiyi tu ni'in ta'u da nuu Yandios ja na kuchaku da nuu ya, chi tu ni kivi iin jnu'un va'a un ini da. Yukan kuu ja jito u'u da ñani da. <sup>16</sup> Yukan na ti sa kuni yo nasa sa'a jnu'un nda'u ini, chi Cristo Jesús ni ji'i ya ja kuu yo'o naa yo. Ti suni sia'an yo'o naa yo vasu na kuü yo ja kuu ñani jna'an yo, chi vanua ka kunda'u ini jna'an yo.

<sup>17</sup> Nu yo'o ñava'a yo ja nandi'i yo ja kuchaku yo, ti nde'e yo nundo'o jna'an ñani jna'an yo, ja nandi'i da ja kuchaku da, ti yo'o saxii yo ja ñava'a yo, ti tu kunda'u ini yo ñani yo, ¿nasa kuu ja ka'an yo ja jandatu yo jnu'un Yandios, ti nu sia'an na sa'a yo nusa? <sup>18</sup> Se'e ri naa ra, nu kuni yo ja na kunda'u ini yo ñani jna'an yo, ko ansu jiin jnu'un ka'an yo ti kuni yivi ja kunda'u ini yo, chi na kua'a yo ja ñava'a yo nava na kuni ndaa yivi ja ñunda'u ndixia ini yo jiin ñani jna'an yo, ja sia'an ka chindee jna'an yo.

### *Iyo jnu'un ndee ini nuu Yandios*

<sup>19</sup> Nu sia'an na kunchuku yo, ti jandaa ndixia kuu ka kuu yo se'e Yandios, chi jini ndaa yo ja jnu'un un kuu ja yinda'a yo'o, ti kukuee jika yo nuu ya, <sup>20</sup> vasu ñu'un kuachi un ini yo siki taka jniñu kue'e ni ka sa'a yo. Ko tu kuña'nu ini yo, chi kuña'nu ga maa Yandios, ti jini ndi'i ya taka jniñu kue'e ni ka sa'a yo. <sup>21</sup> Ko nu tu na kuachi ñu'un ini aña yo, yukan ti ja iyo jnu'un ndee ini nuu Yandios. <sup>22</sup> Ti taka nau ja na kakan yo nuu ya, ti kua'a ya nuu yo, chi vanua ka jandatu yo jniñu ta'u ya nuu yo, ti ka sa'a yo taka jniñu va'a ja na kusii ini

ya. <sup>23</sup> Ti ja'a kuu jniñu ta'u ya nuu yo, ja na kandixia yo Se'e ya Cristo Jesú, ti suni ja na kunda'u ini nuu jna'an yo, chi sia'an ni ta'u maa ya jniñu nuu yo. <sup>24</sup> Ti taka yivi ka siuku jniñu ni ta'u ya, ti ka yi'i ndixia i jiin ya, ti maa ya kancha jiin yi. Sia'an ka jini ndaa yo ja kancha ya jiin yo, chi ni ja'a ya Espíritu ya ja na kuncha ya jiin yo.

### *Nasa nakuni yo nau kuu Espíritu Yandios ti nau kuu espíritu xndoña'an*

## 4

<sup>1</sup> Ñani naa ra, tu kandixia ra jnu'un ka xna'an yivi ka ka'an ja ka xna'an jnu'un Yandios. Xnaka xndichi yivi un, ti nava na kuni ndaa ra nu ka ka'an ndaa i jnu'un Yandios xi tuu, chi kua'a yivi ka xndoña'an kuan kenda nuu ñuyivi. <sup>2</sup> Sia'an sa'a ra ti sa kuni ra naa ra nu nau ja ka'an ndaa nava ta'u maa Espíritu Yandios jniñu. Chi taka yivi ka'an ja Jesú kuu Cristo ni taji Yandios, ja ndiso jniñu ña'nú ya, ti ka ka'an ja ni kii Cristo Jesú jiin yiki kuñu ya nanu iin yivi, ti yivi un kuu ja ka'an ndaa nava ni ta'u Espíritu Yandios jniñu. <sup>3</sup> Ti taka yivi ja ka'an ja Jesú tu ni kii ya jiin yiki kuñu ya, ti tu ni ta'u Espíritu Yandios jniñu nuu yivi un. Ti yivi un kuu ja jito u'u Cristo. Ti ja ni ka jiniso'o ra ja kii yivi un, ti vijnja ja ni ka kenda ndixia nuu ñuyivi.

<sup>4</sup> Se'e ri naa ra, ro'o ka kuu se'e Yandios ti ni ka kundee ra jiin yivi ka xndoña'an un. Ti tu ni ka xnda'u i ro'o naa ra, chi vanua kuña'nu ga Espíritu Yandios, ya kancha jiin ra, ti Espíritu Yandios kuu ja kuña'nu ga nuu espíritu kancha nuu ñuyivi ja'a. <sup>5</sup> Ti yivi ka xndoña'an un, iin nuu kanda i jiin yivi ñuyivi ja'a. Ja yukan kuu ja ka ka'an i mani jnu'un iyo nuu ñuyivi ja'a, ti yivi ñuyivi ja'a chi ka chunso'o jnu'un ka ka'an i. <sup>6</sup> Ko ru'u naa ri, ja ni tatu Yandios iin jniñu nuu ri ja na ka'an ri jnu'un ya. Ti taka se'e ya ja ka yi'i jiin ya, ka chunso'o i jnu'un ka ka'an ri. Ti yivi ja tu ka yi'i jiin ya, tu ka kuu se'e ya, ni tu ka chunso'o jnu'un ka ka'an ri. Ti sia'an nakuni yo nau kuu ja ka ka'an nava ka'an Espíritu Yandios, ti nau kuu ja ka ka'an nava ka'an espíritu xndoña'an.

### *Maa Yandios kuu jnu'un nda'u ini*

<sup>7</sup> Ñani naa ra, na kunda'u ini nuu jna'an yo, chi jnu'un un vaji nuu maa Yandios. Ti taka ja ka kunda'u ini nuu jna'an un, ka kuu se'e Yandios. Ti ka chaku ini nau kuu Yandios, jiin nava ka'an maa jnu'un ya. <sup>8</sup> Ti yivi ja tu ñuñda'u ini tu jini jnu'un Yandios, ja Yandios kuu maa jnu'un nda'u ini. <sup>9</sup> Vijnja ti ni ka chaku ini yo ja ni kenda ndijin nasa ni kunda'u ini Yandios yo'o, chi ja ni taji ya Se'e ya vasu vajnu'un ni se'e ya iyo, ja ni kii ya un nuu ñuyivi, ti ya yukan sa'a ja na kuchaku yo sia'an ni ga. <sup>10</sup> Ti sia'an chaku ini yo nava kuu maa jnu'un nda'u ini. Chi vasu tu ni ka kunda'u ini yo Yandios, ko maa ya, chi ni kunda'u ini ya yo'o ja ni taji ya Se'e ya ni kii ya, ja na kuu ya nava na kenchaa ya kuachi yo. Ti yukan ni ndumani ya jiin yo nava tukaa kuiti ini ya nuu yo sikí kuachi yo. <sup>11</sup> Ñani naa ra, nu siukan ni kunda'u ini Yandios yo'o, ti suni siukan na kunda'u ini nuu ñani jna'an yo naa yo. <sup>12</sup> Ni iin yivi tu ni jini kuiti i nuu Yandios, ko nu ka kunda'u ini jna'an yo, yukan stuu yo maa yo ja kancha Yandios jiin yo. Ti jiin jnu'un kunda'u ini un ni ka kuñi ini yo jiin jnu'un ya. <sup>13</sup> Sia'an na ti sa ni jini ndaa yo ja kancha Yandios jiin yo, ti ka yi'i yo jiin ya, chi maa ya ja ni ja'a ya Espíritu ya nuu yo. <sup>14</sup> Ti maa ri, ja ni ka jini ndixia ri, ti ka ja'a ri jandaa ja maa Tata yo Yandios ni taji ya Se'e ya ni kii ya, ja ni kii nama ya yivi nuu ñuyivi naa i. <sup>15</sup> Nu nau iin yivi na kee yu'u i ja Jesú kuu maa Se'e Yandios, ti yivi un yi'i ndixia i jiin Yandios, ti suni kancha maa ya jiin i. <sup>16</sup> Nu ndi'i yukan ni ka kandixia yo, ti ni ka jini ndaa yo ja kunda'u ini Yandios yo'o, chi maa ya kuu jnu'un nda'u ini. Taka

yivi ka kunda'u ini jna'an, ka yi'i i nda'a maa Yandios, ti suni maa ya kancha yajiiyi. <sup>17</sup> Nu sia'an ja ni kukutu jnunda'u ini un jiin yo, ti ja iyo jnu'un ndee ini yo nuu Yandios, ti tukaa yu'u yo ja kuu kivi na chaa juicio ñuyivi. Ti vasu kancha yo nuu ñuyivi ja'a, ko tu yu'u yo ja kii juicio un, chi ka jika yo nava ni xna'an maa Jesùs yo'o. <sup>18</sup> Nu sia'an ja iyo jnundee ini ja kunda'u ini Yandios yo'o, ti tukaa yu'u yo, chi maa jnunda'u ini un chajiyo jnuyu'u un kua'an. Chi nu yu'u ini yo, ti yukan sa'a ja vajji nundo'o nuu yo. Ja yukan kuu ja nu nau yivi ka yu'u ini i, yivi un ti kukutu ga ini i jiin jnunda'u, ja na kunda'u ini nuu jna'an i.

<sup>19</sup> Ti yo'o ka kuu ini yo nuu Yandios, chi xnaka maa ya ni kunda'u ini ya yo'o. <sup>20</sup> Ko nu *iin* yivi kandixia Jesùs na kachi i: "Ru'u, chi kuu ini ri nuu Yandios", kachi i. Ko jito u'u i ñani jna'an i, ti so xndoña'an i ja sia'an. Chi vasu nde'e i nuu ñani jna'an, ko tu kunda'u ini i, ¿Ti NASA kuu kachi i ja kuu ini i nuu Yandios ja sia'an nu tuja'i kuni i nuu ya nusa? <sup>21</sup> Ti maa Yandios ni ta'u *iin* jniñu ja'a nuu yo: Nu *iin* yivi na kuu ini nuu Yandios, ti suni sia'an na kunda'u ini i nuu ñani jna'an i.

### *Jinjnu'un kandixia ti kundee yo*

## 5

<sup>1</sup> Taka yivi ka kandixia ja Jesùs kuu Cristo, ja ni taji Yandios ja ndiso ya jniñu ña'nú, ni nduu i se'e Yandios. Chi nu kuu ini yo nuu *iin* chaa kuu tata, ti suni na kuu ini yo nuu se'e da. <sup>2</sup> Chi nu kuu ini yo nuu maa Yandios, ti jandatu yo jniñu ta'u ya. Ti suni sia'an na kunda'u ini yo nuu yivi ka kuu se'e ya, chi ja ka yi'i i jiin ya. <sup>3</sup> Chi ja kuandatu yo jniñu ni ta'u ya, yukan kuu ja kuu ini yo nuu maa ya, ti jniñu ni ta'u ya ansu kundiso yo ja kachi yo ja vee. <sup>4</sup> Ti taka yivi ja ka kuu se'e Yandios ja ni ka kundee i jiin taka jniñu kue'e iyo nuu ñuyivi, ti jnu'un ni ka kandixia yo un kuu jnu'un ja ni ka kundee yo siki ñuyivi. <sup>5</sup> ¿Ti nau kuu ja kundee jiin taka jniñu kue'e ka iyo nuu ñuyivi nusa? Suu yivi kandixia ja Cristo Jesùs kuu maa Se'e Yandios.

### *Jnu'un kua'a jandaa siki Se'e Yandios*

<sup>6</sup> Ti Jesùs kuu Cristo ja ni taji Yandios ja na kundiso ya *iin* jniñu ña'nú, ti ni kundaa ja kundiso ya jniñu ña'nú un nuu ni janducha ya *jiiñ* nducha *jiin* kivi ni jati ya niñi ya nuu nda'a cruz. Ansu *jiin* niñi nducha, chi ni kuu nducha *jiin* niñi ja ni ka ja'a jandaa. Ti suni maa Espíritu kuu ja kua'a jandaa siki jniñu ya, chi Espíritu yukan kuu ja ja'a jandaa ndixia. <sup>7</sup> Ti siki jniñu ña'nú un iyo uni testigo ja ka ja'a jandaa undi nuu andivi. Ti yukan kuu maa Tata yo Yandios, Se'e ya ja kuu jnu'un un, *jiin* Espíritu Santo. Ti ndi uni jnu'un ja'a kuu *iin* ni ga. <sup>8</sup> Ti suni iyo uni siki jniñu ja'a nuu ñuyivi. Yukan ka kuu maa Espíritu, *jiin* nducha na ni janducha Jesùs, *jiin* niñi na ni ji'i ya. Ti ndi uni un, *iin* ni ka ka'an. <sup>9</sup> Nu ka janta'u yo nuu yivi ka ja'a jandaa, ti ndoo tu kuanta'u yo suni nuu jnu'un maa Yandios ja kuña'nú ga, ti yukan kuu ja kanuu ga. Yukan kuu *iin* maa jnu'un ndaa ja ka'an maa Yandios ja kuu Se'e ya. <sup>10</sup> Yivi kandixia ndaa se'e Yandios, iyo jnu'un ndaa ja'a ini añu i. Ti nau ja tu kandixia jnu'un ndaa ka'an Yandios, ti chaa xnda'u ña'an skonani i ya, chi tu kandixia i jnu'un ni ka'an ya ja siki Se'e ya. <sup>11</sup> Ti ja'a kuu jnu'un ndaa ni ja'a ya nuu yo ja na kuchaku yo sia'an ni ga jiin ya. Chi ja ni siuku Se'e ya jniñu un na ni ji'i ya ja kuu yo ja na kuchaku yo jiin ya. <sup>12</sup> Ti yivi kandixia ndaa Se'e Yandios, ja ni nita'u i ja na kuchaku i jiin ya, ko yivi tu kandixia ndaa Se'e ya, tu ni nita'u i ja na kuchaku i jiin ya.

### *Jnu'un sandii ni ga*

<sup>13</sup> Chaa ri tutu ja'a nuu ro'o ja kandixia ndaa ra Se'e Yandios, nava na kuni ndaa ra ja iyo ta'u ra ja na kuchaku ra sia'an ni ga jiin ya.

<sup>14</sup> Ni ka iyo jnundee ini yo nuu Yandios, chi ka jini yo ja nu na kakanta'u yo nuu maa ya ja na kua'a ya nau ja kuni yo, ti nu jini maa ya ja nandi'i yo, ti chunso'o jnu'un jikanta'u yo. <sup>15</sup> Ti nu ni jini yo ja chunso'o ya jnu'un ka jikanta'u yo nuu ya, ti kuni ndaa yo ja ni'in yo taka ja ni ka jikan yo nuu ya.

<sup>16</sup> Nu nau ro'o ni ka jini <sup>16</sup> ñani jna'an ra, ja ka sa'a da <sup>16</sup> in kuachi, ko nu ansu <sup>16</sup> in kuachi ni'in ja na kuū da kuu, ti kuni ja na kakanta'u ra nuu Yandios ja kuu maa da, ti maa ya na nakua'a ya ja na kuchaku da, nu ansu <sup>16</sup> in kuachi ni'in ja kuū da kuu. Yukan kuu ja nu iyo <sup>16</sup> in kuachi ni'in ja na kuū yivi un, chi iyo <sup>16</sup> in kuachi ja na xnaa yivi un <sup>16</sup> in jinu ni, ko yukan na ti tukaa ka'an ri ja na kakanta'u ja kuu kuachi un. <sup>17</sup> Taka jniñu ja tu <sup>16</sup> in nuu jiin jniñu ni ta'u maa Yandios kuu kuachi, ko iyo kuachi ja ti xnaa yo'o <sup>16</sup> in jinu ni.

<sup>18</sup> Ka jini yo ja yivi ka yi'i nda'a Yandios ja kuu ya Tata i, yivi un tu ka sa'a i kuachi, chi maa Se'e Yandios jito yivi un nava tu kuu kue'e ndeva'a kui'na un maa i. <sup>19</sup> Ja ka jini yo ja Yandios yinda'a yo'o ja ka kuu yo se'e ya, ti kui'na un kuu ja yinda'a ni ñuyivi. <sup>20</sup> Suni ka jini yo ja ni kii Se'e Yandios, ti ni ja'a ya inijnuni yo ja na kuni ndaa yo nau kuu maa Se'e Yandios. Ti ka yi'i yo jiin maa ya, ka'an ndaa yukan, ti yaa yukan kuu Cristo Jesú, maa Se'e Yandios. Chi yaa yukan kuu maa Yandios chaku, ti maa ya kuu ja sa'a ja na kuchaku yo sa ni.

<sup>21</sup> Ro'o, se'e ri naa ra, xnaa jnu'un ka kandixia taka santu ja ni ka sa'a yivi jiin nda'a i un.

Ti sia'an na koo.

## Tutu kuu uu ni chaa apóstol Juan

### *Jnu'un ndaa jiin jnu'un kuu ini*

<sup>1</sup> Ru'u Juan, kuu ri iin chaa kuña'nu, chaa ri tutu ja'a nuu ña'an ni nakaji Yandios ja na kuu ña kua'a yo, ti suni nuu se'e ña, ja kunda'u xaan ini ri. Ti ansu nini ru'u, chi kuni taka yivi ni ka nakuni jnu'un Cristo Jesús. <sup>2</sup> Ti kunda'u ini ri ro'o naa ra, chi ni nduu iin nuu ini yo jiin jnu'un Jesús, ti jnu'un un kancha jiin yo vijna, ti kuncha jiin yo ja kuu saa ni. <sup>3</sup> Chi jandaa ndixia kuu ja kunda'u ini Tata yo Yandios yo'o jiin Se'e ya Cristo Jesús. Ti sia'an na kunda'u ini ya yo'o ti na kukuee kunchuku yo. Nava na kunchuku ndaa yo, ti na kunda'u ini jna'an yo.

<sup>4</sup> Kusii xaan ini ri chi ni ka ndejna'an ri jiin sava se'e ra, ti ni jini ri ja ka siinda nava ni ta'u maa Tata yo Yandios jniñu. <sup>5</sup> Vijnna ti ro'o, ja kuu ra kua'a ri, kanda'u ri jiin ra ja na kava nda'u ini ra jiin ñani jna'an yo, ti jnu'un ka'an ri ja'a, ansu iin jniñu jaa kuu, chi ja ni ka jini yo jnu'un ja'a undi na ni ka keja'a kandixia yo. Ti yukan kuu ja ka'an ri ja'a. <sup>6</sup> Ti jnu'un kunda'u ini, jna'an un kuu ja na kunchuku yo nava ni ta'u maa ya jniñu nuu yo. Ti jniñu ta'u ya un ja ni ka jini ra undi na ni ka keja'a ka kandixia ra. Ti ja na siuku ra, yukan kuu ja na kunchuku mani ra naa ra.

### *Siki ja xndoña'an*

<sup>7</sup> Na kachi ndaa ri vijna ja ni tu'u nuu ñuyivi ni ka kenda yivi ka xndoña'an, ti ka ka'an i ja Cristo Jesús tu ni kii ndixia ya jiin yiki kuñu ya nanu iin yivi. Ti yivi ka'an sia'an kuu i iin ja xndoña'an, ti kuu i iin yivi jito u'u Cristo Jesús.

<sup>8</sup> Yukan kuu ja koto va'a maa ra naa ra nava tu xnaa ra jniñu ni ka sa'a ra, ti na ni'in ndi'i ra ya'u ra ja kuu nuu jniñu un. <sup>9</sup> Chi nu iin yivi na ka'an kani'no i nuu jnu'un ni xna'an Cristo Jesús, tu yi'i yivi un nda'a Yandios. Ko yivi na chu'un ini chun añu jnu'un ni xna'an Cristo Jesús, ti yivi un yi'i i jiin Tata yo Yandios, ti suni jiin Se'e ya. <sup>10</sup> Yukan na kachi ri nuu ra, ja nu na jaa iin yivi ve'e ra, ti nu tu xna'an i maa jnu'un ni xna'an Cristo Jesús, koto kuanta'u ra yivi un ve'e ra, ni koto kanxia'u ra jiin nava na ki'in. <sup>11</sup> Chi nu na kanxia'u ra jiin yivi un, ti kuanta'u ra jnu'un ka'an i, ti iin ni kuu ra jiin yivi un ja sia'an.

### *Jnu'un sandi'i ni ga*

<sup>12</sup> Ti sia'an iyo kua'a ga jnu'un kuni xndaku ri nuu ra naa ra, ko tu kuni ri chaa ri jnu'un ja'a nuu iin tutu, chi kuni ri jaa maa ri ja nde'e ri ro'o naa ra, ti nava yukan na ndajnu'un va'a yo naa yo, ti nava sia'an na kusii kuu va'a ini yo.

<sup>13</sup> Suni sia'an, taka se'e ku'u ra kanchuku ja'a, ja ni nakaji Yandios ja na kunukuachi nuu ya, kachi i ja na sandee ini ra. Ti sia'an na koo.

## Tutu kuu uni ni chaa apóstol Juan

### *Ka ka'an va'a yivi siki chaa nani Gayo*

<sup>1</sup> Ru'u Juan, kuu ri iin chaa kuña'nu, chaa ri tutu ja'a nuu chaa ka jini mani ri jiin ja nani Gayo, ti kunda'u ndixia ini ri da. <sup>2</sup> Kunda'u ini ri ro'o ñani Gayo, ti jikanta'u ri nuu Yandios ja va'a na ki'in taka jniñu sa'a ra, ti na koo ndendajnu va'a ini ra. <sup>3</sup> Ni kusii xaan ini ri na ni kikoyo sava ñani jna'an yo naa da, ti ni ka jani da jnu'un nuu ri, ja ndaa iyo kuiti ini ra siuku ndaa ra jnu'un Cristo Jesú, ti va'a kancha ra jiin jnu'un ndaa un. <sup>4</sup> Ti jiin jnu'un yukan na ti ni kusii xaan ga ini ri, chi ni jini ndaa ri ja kanchuku ndaa nava iyo maa jnu'un Cristo Jesú. Sia'an na kachi ri, chi sa'a ri nanu ja se'e ri ka kuu ra.

<sup>5</sup> Kunda'u ini ri ro'o ñani, chi iyo kuiti ini ra kunukuachi ra nuu ñani jna'an yo naa da, chi chindee xaan ra maa da naa da, ti ni'in ga chindee ra chaa vekoyo inga ñuu. <sup>6</sup> Ti chaa un ni ka nakani jnu'un nuu ñani jna'an yo ka ndututu ka skua'a i ja'a, ja sia'an ñunda'u xaan ini ra ñani jna'an yo naa da. Ti va'a sa'a ra ja sia'an ñani. Ti siin koto va'a ra chaa un jiin sava'ni ga ja ka nandi'i da ja kuu ichi, ti chindee chituu ra maa da naa da nava kuni maa Yandios. <sup>7</sup> Chi chaa un, ni ini ni aña da ni ka kivi da ichi Yandios ja na junukuachi da nuu Jito'o Cristo Jesú, ti tu ni ka janta'u da ja kaji da nuu yivi tu ka kandixia Cristo Jesú. <sup>8</sup> Ja yukan kuu ja ka'an ri, ja na chindee yo chaa un naa yo. Ti sia'an na chindejna'an yo jiin chaa un nuu jniñu Cristo Jesú.

### *Sa'a ndeva'a Diótrefes*

<sup>9</sup> Ni chaa ri iin tutu nuu yivi ka skua'a un, ko Diótrefes tu janta'u da jniñu ta'u ri, chi kuña'nu maa da nuu yivi un kuni da. <sup>10</sup> Ko nu na ki'in maa ri nuu kancha da un, ti yukan na kajnu'un ri da ndoo kuu ja ka'an da siki yo jiin jnu'un xndoña'an. Ti tu kuva'a ini da jiin un, chi su'va vi'ga sa'a da. Nù ni ka jakoyo sava chaa ka kandixia yukan, ti tu janta'u da chaa, ti jasi da ja ni iin yivi tu kuanta'u chaa un naa da, chi nu nau chaa na kuanta'u chaa un naa da, ti keni'in da chaa ja na ki'in da, ti tukaa ja'a da jnu'un ja najna'an chaa un jiin da.

<sup>11</sup> Ñani, koto sa'a ra nanu sa'a chaa un. Su'va na chu'un ini ti kukutu ini jiin iin jniñu va'a, chi na kachi ri: Yivi jitu ndi'i ini jiin jniñu va'a un, kuu i se'e Yandios, ko yivi sa'a ndeva'a va tu nakuni kuiti i nau kuu Yandios.

### *Jniñu va'a ni sa'a Demetrio*

<sup>12</sup> Tendi'i ñani jna'an yo ka janjnu'un i jniñu sa'a Demetrio, chi jandaan ndixia kuu ja iyo ndaa jniñu sa'a da. Yukan kuu ja na ka'an va'a yo siki da, chi ka nde'e yo ja iyo va'a jniñu sa'a da, ti maa ra ja ka jini ra ja ka ka'an ndaa ri.

### *Jnu'un sandi'i ni ga*

<sup>13</sup> Ti sia'an iyo kua'a ga jnu'un kuni kachi ri nuu ra, ko tu kuni ri chaa ri jnu'un ja'a nuu iin tutu, <sup>14</sup> chi yachi ni kuaja ri nuu kancha ra, ti sa na ndajnu'un yo jiin ndusu yu'u yo.

<sup>15</sup> Ti na kukuee kuncha ra. Ti "sandee ini ra", kachi taka ñani jna'an yo kanchuku ja'a. Kava va'a ini ti kanxia'u ra jiin ndi iin ndi iin ñani jna'an yo kanchuku yukan, ja kachi ru'u. Ti sia'an na koo.

## Carta ni chaa Judas

<sup>1</sup> Ru'u kuu Judas, ñani Jacobo, ti junukuachi ri nuu Jesú, ya kuu maa Cristo. Ti chaa ri tutu ja'a nuu ra naa ra, ro'o ja ni nakaji maa Tata yo Yandios, ro'o ja ni kunda'u ini ya. Ti Cristo Jesú, jito va'a ya ro'o naa ra, chi vanua nda'a maa ya ka yi'i ra. <sup>2</sup>Ti ñukuu ini ri ja na kunda'u ga ini ya ro'o, nava na kukuee kunchuku ra. Na koo jnu'un mani ini ra jiin ya naa ra, ti nava sia'an na ndumani xaan ga ya jiin ra. Ti na nakaya jnumani ini yukan nuu ra naa ra.

### *Siki chaa ka ka'an jnu'un xndoña'an*

<sup>3</sup> Ñani, ja ni kuu na'an ndo'o xaan ini ri ja chaa ri iin tutu nuu ra naa ra, siki ja ni nakaji Yandios yo'o ja ka kandixia ndaa yo jnu'un Jesú, ya ni kii nama yo'o. Ko vijna ti ni nakani ini ri ja kanuu kuu ja na chaa ri iin tutu ja'a nuu ra naa ra. Ti ja'a na xndaku ri ja na nakutu ini ra ti koto kasi yivi ja ka kandixia yo jnu'un Jesú, chi yukan kuu maa jnu'un ndaa. Ti iin jinu ni ni stuu maa Yandios jnu'un ndaa un nuu yivi ya. <sup>4</sup>Ko vijna, ti sava chaa ka najna'an jiin ra un, ka ka'an da ja ka kandixia da Jesú, ko tuu. Chi ka kuni da xnda'u da ro'o naa ra. Ka yisikinchaa da Yandios jiin jniñu kue'e ka sa'a da un. Chaa ndeva'a kuiti ka kuu da, chi ka ka'an da ja kunda'u ini Yandios yo'o, ti tu kua'a ya nundo'o kondo'o yo, kachi da naa da. Ti ka ka'an ndeva'a da siki yo ja sia'an, chi tu ka janta'u da ja Jito'o Jesú kuu Cristo, ya kuña'nu nuu yo. Ko siki chaa un, undi jana'an ja ka'an tutu ii ja jna'nun datu da ja siki jniñu kue'e ka sa'a da.

<sup>5</sup> Ti vijna, vasu ja ka jini va'a ra, ko na naxndaku tuku ri nava ni sa'a Yandios. Chi ni nama ya yivi ñuu Israel najana'an. Ni chindee ya i na ni ka kee i ñuu Egipto kuankoyo i. Ti vasu siukan ni kuu, ko kuee ga ti ni xnaa ya sava yivi un ja tu ni ka kandixia i jnu'un ya. <sup>6</sup>Ti suni ka jini ra nava ni sa'a Yandios jiin ángel ya ja ni ka xndoo i jniñu ni ka ndiso i andiví un. Ni chindasi ya ángel un, ti yukan kundatu da undi na jaa kivi ka'nun ga ja xndichi ya maa da naa da. Ti ni ju'ni ya chaa un jiin cadena ka'l'in undi nuu kunu ga ñuñaa ja kuu saa ni. <sup>7</sup>Ti suni ni ja'a Yandios nundo'o ni ka ndo'o yivi ñuu Sodoma jiin ñuu Gomorra jiin sava ga ñuu ka'iin yajni. Chi suni ni ka sa'a ndeva'a da nanu ni sa'a ángel un undi na jana'an ga. Chi ni ka jika xaan i jiin jnu'un sii ini, ti ni ka sa'a i taka nuu kuachi ndeva'a xaan. Ti ni ka ni'in i iin nundo'o ja ni taji ya ñu'un ti ni ka kayu i, ti yukan na nde'e yo ja sia'an kondo'o yivi nundo'o, ti kayu i ja kuu saa ni.

<sup>8</sup> Ti chaa ka xnda'u ja ni ka kivi da jiin ra naa ra un, vasu ja ka jini da ja yukan kuu nundo'o ja'a Yandios, ko tu ka yu'u da, chi ka ka'an da ja iin jani ni xna'an nuu da. Ka ka'an da ja ka ndiso jniñu da ja na sa'a da sava'nii ga ja kuu ini maa da. Ti ka jañu ni'n'o da yiki kuñu da jiin jnu'un sii ini, ka skeixiko da taka ja ka ndiso jniñu, vasu ja ka'iin nuu sukun xi ja iyo nuu ñuyivi. Ti ka ka'an ndeva'a kuiti da siki ángel ja ka kuña'nu nuu sukun un. <sup>9</sup>Vasu ansu sia'an ni sa'a ángel kuña'nu ga Miguel kivi ni ka kanaa sa jiin ja'u'u un siki yiki kuñu Moisés na ni ji'i da. Chi tu ni ka'an ndeva'a da, ni tu ni chundee ini da ja ka'an ndeva'a da siki ja'u'u un, ja kankuachi ya siki. Chi su'va ni kachi da: "Maa Jito'o, na nduxaan da nuu ra", ni kachi Miguel. <sup>10</sup>Ko chaa ka xndoña'an un chi ka ka'an ndeva'a da siki taka ja tu ka jini da. Ti taka nuu ja ka ñava'a da siki ja sia'an kanda da, nanu kuiti yuku ka kuu da. Ti ja yukan kuu ja na jna'nun datu da, ti naa da ja kuu saa ni.

**11** Xaan ga nda'u maa da ja sia'an, chi tu ka jandatu da nuu Yandios nanu ni sa'a Caín. Ti siki ja ka ndiyo ini da ni'in da xu'un, nanu ni sa'a Balaam. Ti ka xna'an da jnu'un jna'nua ndatu, nanu ni ndo'o Coré, chi ni ji'i da, ko kuachi ja ni nduni'in iri da siki jnu'un Yandios.

**12** Taka chaa ka xnda'u ja'a, ja ka xna'an da jnu'un xndoña'an, nu ni ka ndututu da jiin ra nuu ka yaji ra staa naa ra. Ti ka sa'a kata da maa da ja na kukanuu ra naa ra. Chi nanu ka yaji da ti ka ji'i da, ko tu ka ndo'o ini da nasa kajji inga yivi, chi nini ja kuu maa ni kuu ja ka ndi'i ini da ja na kaji va'a da. Ti jnu'un ka xna'an da un, tu nijniñu kuiti, chi kuu nanu iin viko nu ni nukuita, ko chaa iin tachi ti kua'an ni jiin, ti tukaa ni kuun sau. Ti suni ka kuu da nanu iin yujnu ja tu ja'a nde'e, ti ni ichi undi yo'o, ti tukaa na kuu ja nene numa.

**13** Sa'a yo nanu sa'a. Nu kee iin tachi sau xaan nuu nducha mar, ti ndokuiñi nducha nuu mar un, ti keni'in taka ja jñia'an ñu'un nuu mar un. Suni sia'an kuu jnu'un ka ka'an chaa ka xndoña'an un, chi mani jniñu ja'a jnukanuu ka sa'a da. Ti ka kuu da nanu chuxinia ja ni sana ichi ki'in, chi ni tu jini yo nanu ki'in. Ti ja iyo tu'va iin nuu ñaa kuiti nuu kinkoyo chaa ka xndoña'an un ja kuu saa ni.

**14** Sa'a yo nanu. Undi na ni kaku Enoc, chaa kuu iñiu ja ka ndikun jata Adán, ni kuu da iin profeta ja ni ka'an jnu'un vaji nuu maa Yandios nuu yivi naa i. Suni ni ka'an da siki chaa ka xnda'u un, ti ni kachi da: "Maa Jito'o ni naxna'an nuu ri, ti ni jini ri ja vaji ya jiin tijni mil tajnu ya. **15** Xndichi ya tendi'i yivi, ti ka'nua ndatu ya yivi kanda kua'an kanda vaji. Chi tu ni ka jandatu i nuu Yandios ja ni ka nduni'in ini i nuu ya. Chi ni ka ka'an xaan i jnu'un ndeva'a siki ya", ni kachi Enoc. **16** Taka chaa ka xnda'u ja'a, chi mani ka ka'an da ja kuu taka ja ka kuña'nuu maa da. Ka ka'an da siki Yandios, ti ka ka'an da siki chaa ka ndiso jniñu nuu ñuyivi ja'a. Ka kuu ichi ini da jnu'un Yandios jiin chaa ka ndiso jniñu nuu ñuyivi ja'a. Nini ka siin da jiin jnu'un kuachi ini. Ka ka'an vixi xaan da ja mani jnu'un ndaa ka xna'an da, vasu mani jnu'un xndoña'an kuu. Ka ka'an yiñu'un da jiin yivi nava na ni'in da jaku ja ka ñava'a yivi naa i.

### *Xndaku Judas ja tu nukoyo yivi nuu kuachi*

**17** Ko ro'o naa ra ñani, nuku'un ini taka jnu'un ni ka xna'an chaa ni ka kuu apóstol nuu maa Jito'o Cristo Jesús. **18** Chi ni ka ka'an da: "Ja nu kuan ndi'i kivi, ti kikoyo chaa ka'an kata siki jnu'un Yandios, ti sa'a da jniñu ndeva'a kuiti ja ka ndiyo ini maa da, ti ansu jniñu ja kuni maa Yandios." Sia'an ni ka kachi apóstol. **19** Ti chaa ka xnda'u ja'a jiin jnu'un vixi nduxii, ka sa'a yu'u da ja ka kuni da ja na kusiñ ra naa ra, ti na koo siin siin yivi ka kandixia jiin ra naa ra. Ko mani ka siin da jiin jnu'un kuachi ini, chi tu kancha Espíritu Yandios jiin da naa da.

**20** Ko ro'o ñani, vi'i ga na kukutu ini ra jiin jnu'un kuandatu nuu jnu'un iyo ndaa nava ka kandixia ra, chi maa Yandios ni ja'a jnu'un un nuu ra naa ra. Ti va'a chi kancha Espíritu Santo jiin ra, ti kakanta'u naa ra nava kuni maa Espíritu ya. **21** Kukutu ini, nuku'un ini ja siki ni kunda'u ini Yandios ro'o naa ra. Koto naa ini ra jnu'un un ja kundatu ra undi na jaa kivi ja kivi ra nuu kuchaku ra jiin Jito'o Jesús, ya kuu Cristo, ti kunchuku ra jiin ya ja kuu saa ni. Chi yukon sa'a maa ya siki ja ni kunda'u ini ya yo'o.

**22** Siki jnu'un xndoña'an ja ka xna'an chaa un, ti ka iyo sava yivi ja so ka skuiko xini i, chi ka ndo'o ini i ja nau ichi va'a ga ja ki'in i. Ko ro'o, nduku nasa xndaku vii ra jnu'un ya nuu yivi ja tuja'i kujnuni va'a ini. Nduku nasa kandixia i sa'a ra naa ra. **23** Kukutu ini ti nduku nasa nama ra sava ga yivi nuu kuachi i, nanu ja keni'in ra i nuu ñu'un. Ti kunda'u ini sava ga yivi un ti chindee ra i. Koto kivi nduu kuiti ra jiin kuachi i, chi nanu kuu iin sa'ma

jñā'an xaan, sia'an kuu yivi yi'i jiin kuachi i. Yukan kuu ja kani ini, ti koto kiví nduu ra jiin kuachi i nu kuni nama ra yivi un.

*Jnu'un sandi'i ni ga*

<sup>24</sup> Vijna ti na ka'an yo ja maa iin ni Yandios kuu ya koto va'a ro'o naa ra nava tu nukoyo ra nuu kuachi. Chi maa ya nakana ro'o ja na jakuiñi ra nuu ya, ansu ja jna'nu ndatu ra. Na jakuiñi ra nuu ya, nuu vii xaan kuña'nu ya. Ti kiví yukan, na ti ndusii xaan ini ra jiin ya. <sup>25</sup> Ti na ka'an yo ja maa iin ni maa ya kuu Yandios ndichi, ja vii xaan kuña'nu ya siki ja ni sa'a ya iin jniñu ña'nu jiin Jito'o Jesús, ya kuu Cristo ja ni kii nama ya yo'o. Ti ta'u yo jniñu nuu ni tu'u ñuyivi undi na jana'an xaan, ti undi vijna, jiin undi ja kuu saa ni. Ti sia'an na koo.

## Jniñu ja koo ja ni jini ndijin Juan

### *Jniñu ja koo*

<sup>1</sup> Jnu'un ja'a kuu ja ni kachi Yandios nuu Jesús, ja maa ya kuu Cristo. Ti ni nakachi ya jnu'un un nuu yivi kandixia, yivi ja ka junukuachi i nuu ya. Ti jnu'un ja'a xna'an nasa koo taka jniñu ja kuan kuyajni. Chi jandaa ndixia ja kuan kuyajni kivi ja jinu taka jniñu un.

Ru'u Juan, junukuachi ri nuu ya, chi ja yukan ni nakaji ya ru'u. Ti ni taji Yandios iin ángel ja junukuachi nuu ya, ja na xna'an ya ru'u nasa koo taka jniñu yukan. <sup>2</sup> Vijnal ti ja'a ri jandaa siki taka jniñu ja ni jini ndijin ri un, ja jandaa ndixia kuu. Ni jini ri jnu'un Yandios jiin taka jnu'un ni ka'an Jesús, ja maa ya kuu Cristo. Sia'an ja'a ri jandaa siki taka ja ni jini ri.

<sup>3</sup> Ti ru'u Juan, kachi ri ja kancha Yandios jiin yivi ja ka'u i tutu ja'a nuu yivi ka ndututu. Ti kancha ya jiin taka yivi ja ka fuso'o i jnu'un ja'a ja ni ka'an Yandios, ti chu'un ini i. Chi ja kuan kuyajni kivi ja koo taka jniñu ja yoso nuu tutu ja'a.

### *Chaa Juan tutu nuu ndi uxia tiku'ni yivi kandixia*

<sup>4</sup> Ru'u Juan, chaa ri jnu'un ja'a nuu ra naa ra, nuu taka tiku'ni yivi ka kandixia ja iyo ini taka ñuu ja ka yi'i jiin ñuu Asia. Ñukuu ini ri ja vi'ga na kunda'u ini maa Yandios ro'o naa ra, ti na kondee kosii ini ra nu kunchuku ra ini ñuyivi ja'a. Maa iin ni maa ya kuu sa'a yukan chi maa iin ni maa ya kuu Yandios ja iyo vijnal, ti ni iyo ya undi na jan'an ni ya'a, ti koo ya ja kuu saa ni. Ti ñukuu ini ri ja suni sia'an sa'a ndi uxia Espíritu ja kajin jiin ya yu'u mesa nuu ta'u Yandios jniñu. <sup>5</sup> Ti ñukuu ini ri ja suni sia'an sa'a Jesús, ja maa ya kuu Cristo, ja ka'an ndaa kuuti ya. Xnakan maa ya ni nandoto nuu ñuji'i, ti kuña'nu ga maa ya nuu taka ga chaa ña'nú ja iyo nuu ñuyivi.

Maa ya kuu ja kunda'u ini yo'o, chi ni jati ya niñi ya ja ni chunaa ya yo'o nuu kuachi yo. Maa ya ni sa'a ja ni nduu yo yivi ya ja ta'u yo jniñu jiin ya. <sup>6</sup> Ni sa'a ya ja taka yo ni nduu sutu ja sajniñu nuu Tata ya Yandios. Yukan kuu ja na ka'an yo ja vii xaan kuña'nu ya, ti na ta'u ya jniñu nuu ni tu'u ja kuu saa ni. Sia'an na koo.

<sup>7</sup> Chuno'o va'a ra nuu jnu'un ja'a chi nchaa Cristo nuu viko, ti ndi'i yivi kuni i nuu ya, ti undi yivi ni ka ja'ní ya kuni i nuu ya. Yukan ti taka yivi ni ka'nu ñuyivi, ndukui'ya ini i ti nakani xaan ini i ja tu ni kandixia i ya. ¡Yukan kuu ja koo! <sup>8</sup> Yandios ja vii xaan kuña'nu ya nuu ni tu'u ja iyo kachi ya: "Ta'u ri jniñu nuu ni tu'u ja iyo, undi nuu ni keja'a ñuyivi ti undi nuu xndi'i. Ja yukan kuu ri nanu letra A jiin Z, nuu keja'a ti nuu xndi'i, chi maa ri ni keja'a ndi'i ti maa ri sinu." Sia'an ka'an maa Jito'o Yandios ja maa iin ni maa ya kuu Yandios ja iyo vijnal, ti ni iyo ya ja kuu saa ni ya'a, ti koo ya ja kuu saa ni.

### *Ni jini Juan ja vii kuña'nu Cristo*

<sup>9</sup> Maa ri kuu Juan ti chaa ri jnu'un ja'a nuu ra naa ra. Ru'u kuu ñani ra ja suni yi'i ri nda'a Jesús, ya kuu Cristo. Suni sia'an nanu ka ndo'o ro'o naa ra sia'an ni ndo'o ri nundo'o siki ja ka kandixia yo Jesús. Ñin nuu ta'u jniñu Yandios nuu yo vijnal, ti iin nuu ja'a Jesús jnundee ini yo nava na kundee yo ni kanchuku yo nuu ñuyivi ja'a, undi kivi kivikoyo yo ñuu nuu ta'u Yandios jniñu. Ni ka'an kaji ri jnu'un Yandios siki Jesús. Ja yukan ni ka jniñi da ru'u ja kuu ri presu, ti ni chu'un da ru'u undi nuu isla ja nani Patmos.

<sup>10</sup> Ni kuncha ri yukan kivi domingo, maa kivi ja nani kivi Jito'o. Ti ni jini ri ja ni ta'u jniñu maa Espíritu nuu ri, ti ni jiniso'o ri iin ja ni kana ko'o ichi jata ri nanu nu tivi iin ndiki, <sup>11</sup> ti ni kachi:

—Chaa ra nuu tutu taka ja kuni ra. Ti taji ra ki'in nuu ndi uxia tiku'ni yivi ka kandixia ja ka iyo ini taka ñuu ja ka yi'i jiin ñuu Asia, ini ñuu Efeso, jiin Esmirna, Pergamo, Tiatira, Sardis, Filadelfia, jiin Laodicea —ni kachi.

<sup>12</sup> Yukan ti ni ndeokoto ri ja kuni ri nau ja ka'an jiin ri. Ti ja ni ndeokoto ri, ni jini ri uxia candelero mani maa oro. <sup>13</sup> Ti ma'ñu uxia candelero oro yukan kande iin ja kaa nanu maa Se'e Yivi Ñuyivi. Ñu'un ya iin sa'ma kani ja jinu undi nuu ja'a ya. Ti nuu'ni jika ya jiin iin cinturón oro.

<sup>14</sup> Xini ya jiin ixi ya skuiyi la'lì nanu ixi ri, xi nanu yu'va. Nduchi ya kaa nanu yaa ñu'un. <sup>15</sup> Ti ja'a ya kaa nanu kaa kuaan ja ni ndu'va nuu horno. Ti ni'in xaan ka'an ya nanu nu ni'in kua'a xaan yucha na'nu. <sup>16</sup> Ti yiñi ya uxia chuxini ini nda'a kua'a ya. Ti nuu yu'u ya kenda iin espada xaan ja iyo uu yu'u. Ti nuu ya kaa nanu nuu ndikandii nuu nandincha kua'a.

<sup>17</sup> Ru'u Juan, nu ni jini ri maa ya, ti ni nduva ri nuu ja'a ya nanu ndiyi. Ti ni chaa ya nda'a kua'a ya siki ri, ti ni ka'an ya:

—Koto yu'u ra. Maa ri kuu Yandios ja iyo undi na ti keja'a ga ñuyivi, ti koo ri ja kuu saa ni vasu na ndi'i taka ga ja iyo. <sup>18</sup> Yandios chaku kuu ri. Ni ji'i ri ko ni nandoto ri, ti vijnal kuchaku ri ja kuu saa ni. Ja yukan ndiso ri jniñu siki taka nuu kue'e ja ka ji'lì yivi naa i. Ti ndiso ri jniñu nuu ñuji'i ja nava kivikoyoi ti nava kekoyo i.

<sup>19</sup> Nusa ti chaa ra nuu tutu taka ja ni jini ra, jiin taka ja iyo vijnal, jiin taka ja koo ichi nuu. <sup>20</sup> Xna'an ri vijnal nasa kuni ka'an uxia chuxini ni jini ra ini nda'a kua'a ri, jiin nasa kuni ka'an uxia candelero un. Uxia chuxini un kuu uxia ángel ja yi'i jiin uxia tiku'ni yivi ka kandixia. Ti uxia candelero un kuu uxia tiku'ni yivi ka kandixia —ni kachi ya.

### *Junu'un ja kua'a nuu uxia tiku'ni yivi kandixia Jnu'un ja kua'a ñuu Efeso*

## 2

<sup>1</sup> Ni ka'an maa ya nuu ru'u Juan, ti ni kachi ya:

—Chaa ra jnu'un ja'a na ki'in nuu ángel tiku'ni yivi kandixia ja kanchuku ñuu Efeso. Ti chaa ra jnu'un ka'an ri ja'a, chi ru'u kuu maa ya ja yiñi ndi uxia chuxini nuu nda'a kua'a ri, ti jikonuu ri ma'ñu uxia candelero oro. <sup>2</sup> Sia'an chiso ra: "Ja jini ri taka jniñu va'a ka sa'a ra, chi ka jitu ndi'i ini ra jiin jniñu ra, jiin ja ka sino ra taka jniñu ka sa'a ra. Ti jini ri ja tu ka ja'a ra jnu'un ja kivi yivi ndevara'a ma'ñu ra. Suni jini ri ja tu ka janta'u ra chaa ka xndoña'u ja ka ka'an da ja kuu da apóstol, ti ka jini ndaa ra ja mani chaa xndoña'an ka kuu da. <sup>3</sup> Ni kundee ra ni ka ndo'o ra nundo'o ja ru'u, jiin ja tu ni ka kuita ini ra jiin jniñu ra.

<sup>4</sup> Ti vasu yukan, ko iyo jaku ja ka'an ri jiin ra, chi tukaa ga ka iyo mani va'a ra jiin ri ni jiin ñani ra nanu ni iyo kivi ni ka keja'a ra. <sup>5</sup> Yukan kanuu ja nuku'un ini ra nasa ni kuu ja ni ka xndoo ra jnu'un mani ini un jiin ri. Ni ka xndoo ra jnu'un un, ko vijnal ti nakani ini naa ra ti sa'a nava ni ka keja'a ra undi nuu. Chi nu tu nakani ini ra, ti chaa yachi ri nuu ra ti kankuachi ri siki ra, ti chajijo ri candelero ra ki'in, ti kenchaa ri jniñu ndiso ra nuu ri vijnal.

<sup>6</sup> Va jnu'un iin jniñu ja kuajnu'un ri ro'o kuu ja ka jito u'u ra jniñu ndevara'a ka sa'a yivi nicolaítas, chi suni sia'an jito u'u ri jniñu un.

<sup>7</sup> Ko na kachi ri nuu ra naa ra, ro'o yivi ka kandixia ja ndiyo ini ra kuni ra jnu'un ndaa. Ti chunso'o va'a nuu taka jnu'un ja'a, chi sia'an ka'an

maa Espíritu nuu taka tiku'ni yivi ka kandixia. Kachi Espíritu ja taka ro'o ja ka kandixia Cristo, nu kuandatu ndaa ra jnu'un ya ti kundee ra siki jniñu ndeva'a, yukan ti kua'a ya jnu'un ja kaji ra nde'e vixi ja kuun nuu iin yujnu siin, iin yujnu ja sa'a ja kuchaku ra ja kuu saa ni. Ti kande yujnu un nuu kancha Yandios nuu vii xaan kaa. Na chunso'o va'a ra nuu jnu'un un", kachi jnu'un —ni kachi ya.

### *Jnu'un ja kua'an ñuu Esmirna*

<sup>8</sup> Ni ka'an tuku maa ya nuu ru'u Juan, ti ni kachi ya:

—Chaa ra jnu'un ja'a na ki'in nuu ángel tiku'ni yivi ka kandixia ja kanchuku i ñuu Esmirna. Ti sia'an chiso ra: "Ru'u ja iyo ri ti sa ni keja'a ñuyivi, ti koo ri ja kuu saa ni ni ji'i ri ko ni nandoto ri. <sup>9</sup> Ti jini ri taka jniñu va'a ka sa'a ra, jiin taka nundo'o ni ka ndo'o ra, jiin ja ka kunda'u ndixia ra. Ti vasu sia'an ko ansu nda'u ndixia ra, chi su'va ka naskaya ra ja kuñava'a ra nuu Yandios ja ka kandixia ra jnu'un ri. Ti jini ri taka jnu'un ndeva'a ka ka'an yivi siki ra, yivi ka ka'an ja ka kuu i yivi ndaa, vasu tundo kuu kuiti i, chi so mani yivi ka xndoña'an ka kuu i, chi ka jandatu i nuu maa ja'u'u.

<sup>10</sup> Ko koto yu'u ra jiin taka ja kondo'o ra, vasu na sa'a ja'u'u un ja kivi sava ra veckaa. Chi koto jnuni yivi ro'o, ti koo ndo'o koo nene ra ti jaku kivi, vasu uxi kivi. Ti vasu sia'an, yukan ko na siuku ndaa ra vasu undi na kuú ra. Ti nuu sia'an na sa'a ra, yukan na ti kua'a ri iin ta'u ja kuchaku ra jiin Yandios ja kuu saa ni.

<sup>11</sup> Na kachi ri nuu ro'o naa ra taka yivi kandixia, ja ka ndiyo ini ra kuni ra jnu'un ndaa, vasu na kondo'o ra nundo'o. Chunso'o va'a naa ra jnu'un ka'an maa Espíritu nuu taka tiku'ni yivi ka kandixia. Kachi Espíritu ja taka ro'o ja kandixia Cristo, nu kuandatu ra nuu jnu'un ya, ti siuku ndaa ra naa ra, vasu na kuú ra. Yukan na ti tu ni'in ra nundo'o ja jna'nun datu ra ja kuú ra uu jinu. Na chunso'o va'a ra nuu jnu'un un", —ni kachi ya.

### *Jnu'un ja kua'an ñuu Pergamo*

<sup>12</sup> Ni ka'an tuku maa ya nuu ru'u Juan, ti ni kachi ya:

—Na chaa ra jnu'un ja'a na ki'in nuu ángel tiku'ni yivi ka kandixia ja kanchuku i ñuu Pérgamo. Ti sia'an chiso ra: "Ru'u kuu ja ndiso jniñu ña'nuga, ja ñava'a ri espada ja xaan ndinduu yu'u. <sup>13</sup> Jini va'a ri ja kanchuku ra nuu kuña'nu maa ja'u'u un ma'ñu yivi naa i, ja ka sa'a i jniñu ndeva'a. Ti vasu yukan ko ni'in ka yijní ra jiin jnu'un ri, jnu'un ja kuni ka'an sivi ri. Tu ni skexiko kuiti ra ja siki ni ka kandixia ra ru'u. Nda'u xaan ni kuu kivi na ni ka ja'ni yivi Antipas, chaa ni siuku va'a ja ni ka'an ndaa da jnu'un ri. Ti vasu sia'an ko tu ni ka yu'u ra ja kandixia ra ru'u. Va'a ni ka kundee ra vasu ni'in in kunuu maa ja'u'u un kande ma'ñu yivi ñuu ra.

<sup>14</sup> Ti vasu sia'an ko iyo jaku ja kuni ka'an ri nuu ra. Chi ma'ñu ra naa ra ka iyo yivi ja kandixia i jnu'un ni xna'an Balaam. Undi na jana'an chaa yukan ni xna'an da nuu Balac nasa skivi da yivi Israel nuu kuachi, ja kaji i ndeyu ni soko nuu santu ndeva'a jiin ja ka jika i jiin jnu'un siñini. <sup>15</sup> Suni janta'u ra yivi ka kandixia jnu'un ja xna'an Nicolás, vasu so xnda'u da, chi iin ni kua'an da jiin jnu'un xndoña'an Balac.

<sup>16</sup> Nusa ti nakani ini ti xndoo ra kuachi ra. Chi nu tuu, ti yachi na ka'an ri jnu'un kii kua'a nundo'o, ja xndo'o ri yivi ka kandixia jnu'un ndeva'a yukan. Nanu espada kaña jnu'un un yu'u ri, ti kua'a ri nundo'o kii siki i.

<sup>17</sup> Na kachi ri nuu ro'o naa ra, taka yivi ka kandixia ja ka ndiyo ini ra kuni ra jnu'un ndaa, vasu na kondo'o ra nundo'o. Na chunso'o va'a ra nuu taka jnu'un ja'a, chi sia'an ka'an maa Espíritu nuu taka tiku'ni yivi ka kandixia. Kachi Espíritu ja taka ro'o ja ka kandixia Cristo, na kuandatu ndaa ra jnu'un

ya, vasu na kondo'o ra nundo'o, chi kachi ya ja nakua'a ya iin nuu ta'u kuu ra, ti ta'u un kuu iin nuu ndeyu ja tu jini kuiti inga yivi. Nakua'a ya iin nuu yuu, iin yuu kuijin, ti nuu yuu un yoso iin sivi jaa, ja ni iin yivi tu jini nasa kuni ka'an sivi un, chi maa iin ni yivi ja ni'in", jinu jnu'un —ni kachi ya.

### *Jnu'un ja kua'an ñuu Tiatira*

<sup>18</sup> Ni ka'an tuku maa ya nuu ru'u Juan, ti ni kachi ya:

—Chaa ra jnu'un ja'a na ki'in nuu ángel tiku'ni yivi ka kandixia ja kanchuku i ñuu Tiatira. Ti sia'an chiso ra: "Ru'u ja kuu ri maa Se'e Yandios, ka'an ri jnu'un ja'a. Nduchi ri kanda'a nanu yaa ñu'un. Ti ja'a ri kaa nanu kaa kuaan ja ni ndu'va nuu horno. <sup>19</sup> Jini va'a ri taka jniñu va'a ja ka sa'a ra. Ka kunda'u ini ra nuu jna'an ra. Kandixia ndaa ra ru'u. Ka junukuachi va'a ra nuu ri. Va'a ka kundee ra jin taká jniñu ka sa'a ra. Ti jini ri ja yi'i ga ka sa'a ra taka jniñu va'a un vijna ansu kivi undi nuu. Yukan kuu ja jini ri ja va'a xaan ka sa'a ra vijna.

<sup>20</sup> Ti vasu yukan ko iyo iin ja kankuachi ri siki ra. Chi iyo iin ña'an ma'ñu ra naa ra ja nani Jezabel. Ti ni ja'a ra jnu'un ja xna'an ña un nuu ra naa ra. Chi kachi ña ja xna'an ña mani jnu'un Yandios. Ko so ja tu ka'an ña jnu'un ndaa, chi ka'an ña mani jnu'un xndoña'an nuu yivi ri ja ka junukuachi i nuu ri. Ti kachi ña ja vatuni nu sa'a ra sava'ni ga jniñu ndeva'a ja kuni yikí kuñu ra. Suni kachi ña ja tundo sa'a nu kají ra kuñu ja ni soko nuu santu ndeva'a un. <sup>21</sup> Ko ja ni ya'a kua'a kivi ni ja'a ri ja na nakani ini ña, ko tu nakani kuiti ini ña ja xndoo ña jnu'un xndoña'an un.

<sup>22</sup> Nusa ti na sa'a ri ja na koku'u ña. Ti nakua'a ri nundo'o xaan nuu taka ro'o ja ka siuku jniñu ndeva'a ja xndaku ña. Sia'an sa'a ri nu tu nakani yachi ini taka ro'o ja ka siuku ra jnu'un xnda'u ña un. <sup>23</sup> Kua'a ri nundo'o kuu taka ro'o ja ni ka kivi nduu jin ña, ja kuu ra nanu se'e ña. Yukan ti nakuni taka tiku'ni yivi ka kandixia ja ru'u kuu Yandios ja jini ndikuiti ri undi inijnuni jin ini añu yivi naa i. Chi ru'u kuu ja kua'a ta'u nuu iin iin ra nasa kaa maa jniñu ni ka sa'a ra.

<sup>24</sup> Ko tu ka'an ri sia'an nuu sava ga ro'o yivi ñuu Tiatira, chi tu ni ka janta'u ra jnu'un xndoña'an ja xna'an ña'an un, vasu ka iyo yivi yi'i jin ña ja ka ka'an ja vatuni ja sa'a i jniñu ndeva'a ja kuni maa ja'u'u. Tu ni ka jandatu ra nuu jnu'un xndoña'an un. Chi su'va ka siuku ra mani jnu'un ndaa. Nusa ti tu chayika ri ro'o naa ra ja kundikun ra inga jniñu. <sup>25</sup> Maa iin ni jnu'un ja ni ka tava ini ra ja siuku ndaa ra, ti jnu'un yukan na siuku ndaa ra undi kivi ndenda ri.

<sup>26</sup> Ka'an ri ja na siuku ndaa ra jnu'un ri nava na kundee ra siki jniñu ndeva'a, ti kuandatu ra nuu taka jniñu ta'u ri undi kivi sandi'i ni ga, vasu na kuu ra. Kivi yukan na ti tatu ri iin jniñu nuu ra ja ta'u ra jniñu nuu taka nación, <sup>27</sup> Suni sia'an nanu ni ni'in ri jniñu nuu Tata ri ja kuñu'nu ri, ti ta'u ri jniñu nuu taka nación. Sia'an kuñu'nu ra jin ri nanu iin pastor ri ja jajniñu da iin bastón kaa. Ti ni iin tu kuu ndonda siki ra, chi nanu ta'u yachi ra iin kisi, suni sia'an kundee ra siki i. <sup>28</sup> Ti sa'a ri ja vii na kuñu'nu ra nanu vii ndinchaa chuxini ja ndenda taka jañaa'an.

<sup>29</sup> Na kachi ri nuu ro'o naa ra, taka yivi ka kandixia ja ka ndiyo ini ra kuni ra jnu'un ndaa. Na chunso'o va'a ra nuu taka jnu'un ja'a, chi sia'an ka'an maa Espíritu nuu taka tiku'ni yivi ka kandixia", kachi jnu'un —ni kachi ya.

### *Jnu'un ja kua'an ñuu Sardis*

—Na chaa ra jnu'un ja'a na ki'in nuu ángel tiku'ni yivi ka kandixia ja kanchuku i ñuu Sardis. Sia'an chiso ra: “Ru'u kuu maa ya ja ñava'a uxia espíritu Yandios jiin uxia chuxini. Ka ka'an yivi ja ka junukuachi ra nuu ri nu kanchuku ra nuu ñuyivi ja'a, ko vanuxia jini ndaa ri nasa kuu jiin jniñu ra, ti jini ri ja tu nijniñu un, chi ka kuu ra nanu ndiyi.<sup>2</sup> Ni ka keja'a junukuachi ra nuu Yandios, ti ni kendo va'a jniñu ra nuu yivi naa i, ko jini va'a maa ya nasa kaa jniñu un, chi tu nijniñu. Ja yukan ti xnaa ya ro'o nu tu nachu'un ini ra. Chi ka kuni yuji ra vijnna.

<sup>3</sup> Yukan nuku'un ini naa ra taka jnu'un ndaa ni ka kutu'va ra. Ti kuandatu nuu jnu'un un, nakani ini naa ra ti xndoo ra kuachi un. Chi nu na nduni'in ini ra ti tu nakani ini ra, nusa ti sanaa ini ra na kua'a ri nundo'o nuu ra, ti ni tu kuni kuiti ra na kivi sa'a ri un.

<sup>4</sup> Ti vasu sia'an ko iyo jaku yivi un ja tu ja'i kinikava i nuu kuachi. Chi saa ja su'va ka nakacha i sa'ma i. Maa iin ni maa i kuu yivi va'a nuu ri. Ti nuu maa iin ni maa i nakua'a ri ta'u ja kunchuku i jiin ri. Su'va nduña'nu i, ti nasama i jiin iin sa'ma skiyi la'l, chi ni ka kundee i, ti tu ni ka kivi nduu i siki jniñu ndeva'a. Mani maa i kuu yivi va'a nuu ri, ja tukaa ga jna'nu ndatu i jiin kuachi i. <sup>5</sup> Sia'an ka'an ri jiin taka ro'o ja ka siuku ndaa ra jnu'un ri nava na kundee ra siki jniñu ndeva'a un, ti na nduña'nu ra ja nasama ra jiin iin sa'ma kuijin. Ti tu nda'va kuiti ri sivi ra nuu libro nuu yoso sivi taka yivi ja kunchuku i jiin ri ja kuu saa ni. Chi su'va na stuu ri ja ka yi'i ndixia ra jiin ri. Sia'an stuu ri nuu Tata ri jiin nuu ángel ja ka junukuachi nuu ya.

<sup>6</sup> Na kachi ri nuu ro'o naa ra, yivi ka kandixia ja ka ndijo ini ra kuni ra jnu'un ndaa. Na chunso'o va'a ra nuu taka jnu'un ja'a, chi sia'an ka'an maa Espíritu nuu taka tiku'ni yivi ka kandixia", kachi jnu'un —ni kachi ya.

### *Jnu'un ja kua'an ñuu Filadelfia*

<sup>7</sup> Ni ka'an maa ya nuu ru'u Juan tuku, ti ni kachi ya:

—Chaa ra jnu'un ja'a na ki'in nuu ángel tiku'ni yivi ka kandixia ja kanchuku i ñuu Filadelfia. Sia'an chaa ra jnu'un un: “Ru'u kuu Yandios ndoo, Yandios ndaa. Maa iin ni ru'u kuu ja ñava'a ndakaajna'an rey David ja ni ta'u da jniñu nuu nación Israel, ja maa iin ni ru'u kuu ja ndiso jniñu vijnna, chi maa iin ni ru'u kuu ja ka'an nau kuu ja kivi ñuu nuu ta'u ri jniñu. Nu na kachi ri ja kivi i, ti tu iyo ni iin ja kasi ichi i. Ko nu su'va ru'u na kasi ri, ti tu iyo ni iin ja nakuiña ichi un.

<sup>8</sup> Ti ru'u ja ndiso ri jniñu un, jini ri taka jniñu va'a ja ka sa'a ra ja kuu ru'u. Ja yukan na kachi ri ja iyo nuña iin yux'e ja kivikoyo ra ñuu nuu ta'u ri jniñu, ti yukan ni tu iyo ni iin ja kasi i ichi un. Ti tukaa iyo kua'a ro'o ja ka kandixia yukan. Ti vasu sia'an ko ni ka jandatu ra jnu'un ri, ti tu ni ka skexiko ra ja kandixia ra ru'u.

<sup>9</sup> Ti iyo yivi hebreo ini ñuu Filadelfia yukan ja ka'an i ja ka kuu i maa yivi Yandios, ko ka ka'an i mani jnu'un xndoña'an, chi ka kuu i mani yivi ka yi'i nda'a ja'u'u. Ko jaa kivi ti sa'a ri ja na jakuiñijiti i nuu ra naa ra. Sia'an na kuajnu'un i ja mani ndixia ri jiin ra naa ra.

<sup>10</sup> Kii kivi ja koo kua'a nundo'o siki yivi nuu ni tu'u ñuyivi, chi nanduku ndaa ri nasa ni ka jika i ti xndichi ri i nasa kaa jniñu ni ka sa'a i. Ko nama ri ro'o naa ra nuu nundo'o un, chi vanuxia ni ka jandatu ra jnu'un ri ja ni kachi ri, ti ni ka kundee ra ni ka junukuachi ra nuu ri, vasu koo ndo'o koo nene ra.

<sup>11</sup> Ko sanaa ini ra ti ndenda ri nuu ra naa ra. Yukan kuu ja kanuu kundichi ni'in ra jiin jnu'un ni kandixia ra, jiin jniñu ni tatu ri nuu ra naa ra. Chi nu tuu, ti tukaa kundiso ra jniñu un ti kenchaa ri nuu ra, ti tukaa kua'a ri ta'u ra. <sup>12</sup> Sia'an ka'an ri jiin taka ro'o ja ka siuku ndaa ra jnu'un ri, ja ka kundee ra siki ja ndeva'a un. Ti na sa'a ri ja nduña'nu ra ini ñuu nuu ta'u

Yandios jniñu. Kanuu ga nduu ra sia'an nanu kanuu ga iin si'ni ini veñu'un nuu kancha Yandios. Ti kivi ra yukan, ti ni iin tu kuu chajiyo ro'o nuu kancha ya un. Chaa ri sivi Tata ri Yandios nuu ra ja na nakuni ri ja ka yi'i ra nda'a ya. Chi na kii'in ri iin sivi jaa, ti suni kua'a ri sivi un nuu ra naa ra jiin sivi maa Tata ri Yandios, ja nakuni ri ja ka yi'i ra jiin ñuu un. Ti ñuu yukan kuu Jerusalén jaa, chi ndujaa ñuu un ti kuun kiji ichi andivi undi nuu kancha Tata ri Yandios.

<sup>13</sup> Sia'an ka'an ri jiin taka ro'o, yivi kandixia ja ndiyo ini ra kuni ra jnu'un ndaa. Na chunso'o va'a ra nuu taka jnu'un ja'a, chi sia'an ka'an maa Espíritu nuu taka tiku'ni yivi ka kandixia", kachi jnu'un —ni kachi ya.

### *Jnu'un ja kua'an ñuu Laodicea*

<sup>14</sup> Ni ka'an maa ya nuu ru'u Juan tuku, ti ni kachi ya:

—Chaa ra jnu'un ja'a nuu ángel tiku'ni yivi ka kandixia ja kanchuku i ñuu Laodicea. Chaa ra jnu'un sia'an: "Ru'u kuu Yandios ndaa kuiti, ti yukan ja'a ri jandaa jiin taka jnu'un ka'an ri ja mani jnu'un ndaa kuu. Maa ri ni sa'a ndi'i ja ni kachi Yandios ja na jankoo. <sup>15</sup> Yukan kuu ja jini ri taka jniñu ka sa'a ra, ja ni tu va'a ti ndeva'a, nanu nducha ja tu vijin ti ni tu ni'n'i. Va'a ga ja na nduu ra nanu nducha vijin ndixia xi iin jinu ni nduu ra nanu nducha ni'n'i ndixia, ansu ja kuu ra nanu nducha ja tu jini yo nu vijin xi ni'n'i.

<sup>16</sup> Ko so ja ka kuu ra nanu nducha vixin, chi ni tu nakani ini ra, ti ni tu ndi'i ini ra siki nasa kaa ra. Ja yukan kuan kuyajni kivi ja chajiyo yachi ri ro'o naa ra, nanu ja nandujña yo iin ja sa'a dañu ini yo. <sup>17</sup> Ka ka'an ra ja va'a xaan kanchuku ra, ja ka kuu ra yivi riku, ja tu iyo ni iin ja nandi'i ra nuu Yandios. Ko ansu sia'an kuu, chi na kachi ri ja ka kunda'u ndixia ra. Tu nijniñu kuiti jniñu ka sa'a ra. Ka kuu ra nanu yivi nda'u ndixia, xi nanu yivi kuaa, ja kumani xaan nuu i, nanu yivi ja tu iyo sa'ma ku'un i. Tu kivi kuiti ini ra nasa kaa jniñu ka sa'a ra, ja tu nijniñu kuiti.

<sup>18</sup> Nusa ti na xndaku ri nuu ra ja tukaa ga kundiyo ini ra ni'in ra ndajniñu ja yachi ni naa, chi ka jitu ndi'i ini ra nanu ka sa'a yivi ka nakutu xaan ini ja ni'in i oro va'a, xi oro ni kayu nuu ñu'un ja ndundoo. Chi su'va na kundiyo ini ra ni'in ra maa iin ni ta'u ja kua'a maa ri nuu ra naa ra. Yukan na naskaya ra ja kuñava'a ra nuu ri. Na kundiyo ini ra ja nduña'nu ra ti nakui'na ra iin sa'ma skiyi la'li. Ti yukan tukaa ga kukanuu ra nanu ja vichi lii ra. Ti nava sa'a yivi kuaa ja nduku i tajna kuu nduchi i, suni sia'an na kuñukuu ini ra ni'in ra ja kua'a ri nuu ra. Sia'an ti na nakuni ra nasa kaa ra jiin undi inijnuni ra.

<sup>19</sup> Sia'an xndaku ri nanu ja nduxaan ri jiin ra naa ra. Ko ansu ja tu kunda'u ini ri nuu ra, chi su'va kunda'u ndixia ini ri ro'o naa ra. Yukan kuu ja nakani ichi ri ro'o.

<sup>20</sup> Chunso'o va'a ra jnu'un un, chi nanu ja kandichi ri yux'e're ta ka'an ri, vanuxia ñukuu ini ri ja na kivi jnu'un ri undi inijnuni ra. Ti yivi na kuniso'o jnu'un ri ti kuanta'u i ru'u, yukan na ti kivi ri kunchaa ri jiin yi ti kajj nduu ri staa jiin i. <sup>21</sup> Sia'an ka'an ri jiin taka ro'o ja na siuku ndaa ra jnu'un ri nava na kundee ra siki jniñu ndeva'a un. Chi ru'u, ni kundee ri siki jniñu ndeva'a ja iyo ñuyivi ja'a. Ja yukan ni sa'a Tata ri ja na kuña'nu ri jiin ya, ti ta'u ri jniñu jiin ya. Suni sia'an sa'a ri jiin taka ro'o nu na kundee ra siki jniñu ndeva'a un, chi nduña'nu ra jiin ri in ñuu nuu ta'u ri jniñu.

<sup>22</sup> Sia'an kachi ri nuu taka ro'o, yivi ka kandixia ja ka ndiyo ini ra kuni ra jnu'un ndaa. Chunso'o va'a naa ra taka jnu'un ja'a, chi sia'an ka'an maa Espíritu nuu taka tiku'ni yivi ka kandixia", kachi jnu'un —ni kachi ya.

### *Taka ja kanchuku nuu andivi ka chiñu'un nuu Yandios*

**4**

<sup>1</sup> Yukan na ti ru'u Juan, ni nde'e ri, ti ichi andivi ni jini ri nuña iin yux'e. Ti ni jiniso'o ri iin ndusu nanu ja tivi iin ndiki, ti ni kachi:

—Ichi ja'a ndaa ra, ti na xna'an ri nuu ra taka jniñu ja koo ijña isa —kachi ndusu.

<sup>2</sup> Yukan ni maa Espíritu ni yinda'a ya ru'u kua'an ri nuu andivi. Yukan ni jini ri iin mesa nuu nukoo maa ya ja ta'u ya jniñu.

<sup>3</sup> Ti ndinchaa ya nanu iin yuu xiñu ja taja ii jiin iin yuu kua'a ja xiñu ii. Ti ni jikonduu yu'u mesa un iin koo kiji, ja kaá nanu kaa iin yuu kuii ja ndinchaa ii.

<sup>4</sup> Xiin mesa un ni jini ri ja ni jikonduu oko kuun ga mesa nuu ta'u jniñu. Ti nuu mesa un nukoo oko kuun chaa ña'nu naa da ja ka ndiso jniñu da. Ti ka ñu'un da sa'ma skiyi la'lli. Ti ñu'un xini da naa da corona oro. <sup>5</sup> Undi nuu mesa nuu ta'u ya jniñu kendakoyo taja, ti ni'in ii ja ka'an taja un. Ti nuu mesa ya ka'iin uxia Espíritu Yandios ja kajin nanu uxia yiti na'nú ja kanda'a.

<sup>6</sup> Ti nuu mesa ya suni kaa nanu iin mar ja ndinchaa ii ti skiyi la'lli nanu vidrio.

Ti xiin mesa ya ni jikonduu kuun ja chaku. Ti iyo kua'a nduchi ni tu'u ichi nuu jiin ichi jata.

<sup>7</sup> Iin ja chaku yukan kaa nanu iin ndika'a. Ti inga kaa nanu iin xndiki. Ti ja kuu uni chi ñava'a nuu nanu iin chaa. Ti ja kuu kuun chi kaa nanu iin ya'a ja jiko nuu tachi.

<sup>8</sup> Ndi kuun ja chaku yukan ka iyo iñu ndijin ndi iin ndi iin. Ti ka iyo kua'a nduchi ni tu'u undi jiin ni chii ndijin. Ti kuu nduu kuu ñuu tu jakuiñi ja ka'an sia'an:

Yandios ii, Yandios ndoo xaan kuu maa Jito'o Yandios, ja vii xaan kuña'nu ya nuu ni tu'u ja iyo.

Maa iin ni maa ya kuu Yandios ni iyo na jana'an ni ya'a, ti iyo ya vijnal, ti koo ya ja kuu saa ni —kachi.

<sup>9</sup> Ndi kuun ja chaku yukan siin ka kanajaa nuu maa ya. Ti tu ka jakuiñi ja kua'a ja yiñu'un nuu ya. Tu ka jakuiñi ja ka nakuanta'u nuu ya, nuu maa ya ja kancha nuu mesa un, maa ya ja chaku ja kuu taka saa ni.

<sup>10</sup> Ti ja kanajaa ja chaku yukan, ti ka jakunjiti ndi oko kuun chaa ña'nu un nuu maa ya kancha mesa. Sia'an ka chiñu'un da maa ya ja chaku ja kuu saa ni. Ti ka chuku da corona da nuu mesa ya, ti ka ka'an da:

<sup>11</sup> Maa iin ni maa ni kuña'nu ga, Jito'o Yandios.

Ja yukan nuu maa iin ni maa ni nakua'a yo ja yiñu'un.

Nuu maa iin ni maa ni ka ka'an yo ja vii xaan kuña'nu ni.

Maa iin ni maa ni kuu ja ndisojniñu ña'nu ga, chi maa ni ni sa'a ni tu'u ja iyo. Chi sia'an ni ndiyo ini maa ni ja sa'a ni, ti ni jakoo ndi'i un.

Ni ka kachi da.

### *Ja ni nuña tutu ja yijni Yandios*

**5**

<sup>1</sup> Yukan ti ru'u Juan, ni jini ri ja maa ya ja kancha mesa, ni jniñi ya jiin nda'a kua'a ya iin tutu kani ja ni nastuu. Ti yoso ndinduu nuu tutu un, ti ndasi jiin uxia sello, iin sello ja kuu taka nuu.

<sup>2</sup> Ni jini ri iin ángel ja ndisojniñu nuu ya, ti ni ka'an jaa iin jnu'un:

—¿Nau kuu ja kuña'nu ga, ja ndisojniñu ña'nu ga ja ka'ncha sello nava na kuiña tutu ja'a? —ni kachi ángel un.

<sup>3</sup> Ti ni andivi, ni ñuyivi, ni ja iyo chii ñuyivi, tu ni iyo ni iin ja ndisojniñu ja kuiña tutu yukan, ni ja nde'e i nuu.

<sup>4</sup> Yukan ni nde'e xaan ri chi tu ni iyo ni iin ja kundisojniñu ja kuiña ti ka'u tutu yukan, ti ni ja nde'e nuu.

<sup>5</sup> Sa ti ni ka'an iin chaa ña'nú un jiin ri, ti ni kachi da:

—Koto nde'e ra. Iyo iin ja ndisojniñu nanu iin ndíka'a ja kuña'nú ga ti nuu taka ga kuiti yuku. Kii ya nuu jna'an Israel ja ni xnukoo tata najana'an Judá. Yukan skonani yo maa ya iin chaa kuña'nú ga nuu jna'an Judá. Chi suni maa rey David ni kii da nuu jna'an un, ti maa ya vají nuu jna'an rey David. Yukan kuu ja skonani yo maa ya yo'o rey David. Maa iin ni maa ya kuu ja ni xnaa taka jniñu ndeva'a. Nusa ti maa ni maa ya kuu ja kuiña tutu un ti ka'ncha ya ndí uxia sello un —ni kachi da.

<sup>6</sup> Ti sava ma'ñú mesa jiin ndí uxia ja chaku un, nuu kancha chaa ña'nú un, ni jini ri ja kandichi iin ja kaa nanu iin lelu. Ti jito Lelu un nanu kuiti ni ji'i ja ni ka sa'a yivi naa i. Ti iyo uxia ndíki jiin uxia nduchi Lelu yukan, ja kuu ndí uxia Espíritu Yandios ja ni taji ya ka ja'an nuu ni tu'u ñuyivi.

<sup>7</sup> Ni jaa maa Lelu un ti ni ki'in tutu yijní maa ya kancha nuu mesa un. <sup>8</sup> Ti nu ni jnii ya tutu un, ti ndí kuun ja chaku un jiin oko kuun chaa ña'nú ja ndisojniñu un ni ka jakunjiti da nuu ya. Ti iin iin da ni ka yinda'a yaa ja nani arpa, jiin ko'o kuu oro, ja ñú'un chitu suxia kutu. Ti stuu suxia kutu yukan nasa kuu yivi ja yi'i nda'a Yandios, ja ka jikanta'u i nuu ya.

<sup>9</sup> Ni ka jita i iin yaa jaa, ti sia'an ka'an:

Maa iin ni maa ni kuña'nú ga ja ki'in ni tutu  
ti ka'ncha ni sello ja ndasi.

Chi ni ka ja'ní i ni'lín, ti jiin niñi ni ni chunaa ni kua'a yivi nuu taka yivi ja  
kanchuku nuu taka ñuyivi ja'a, taka yu'u, taka ñuu jiin taka nación.

Ni chunaa ni nuu yivi un, chi sia'an ti sa nduu i yivi Yandios.

<sup>10</sup> Ni sa'a ni ja ni ka nduu i yivi Yandios ja ta'u i jniñu jiin maa ya.

Ni sa'a ni ja na nduu i nanu sutu ja kunukuachi nuu ya.

Nusa ti ta'u i jniñu ini ñuyivi ja'a—kachi da ka jita da.

<sup>11</sup> Maa ri Juan, ni nde'e ga ri, ti ni jini ri ja ka'an kua'a xaan ángel Yandios. Ni ka jikonduu xiin mesa ya jiin ndí kuun ja chaku un, jiin chaa ña'nú ka ndisojniñu un. Ti iyo kua'a xaan ángel yukan. <sup>12</sup> Ti ni ka ka'an jaa da sia'an: Xaan ga va'a kuu maa Lelu Yandios ja ni ka ja'ní i ya.

Ja yukan ndiso ya jniñu ña'nú.

Ni tu iyo ni iin ja tu yi'i nda'a ya. Ti siuku ya jiin sava'a ni ga ja sa'a ya. Ja siki jniñu ña'nú ja ndiso ya, ti chíñu'un yivi maa ya.

Ti ka'an i ja vii xaan kuña'nú ya. Suni ka'an i ja va'a xaan ga kuu ya.

Ni ka kachi ángel un.

<sup>13</sup> Sa ti ru'u Juan, ni jini ri ja ni ka'an tendi'i ja ni sa'a Yandios ja iyo ini andivi, jiin imi ñuyivi, jiin chii ñuyivi, jiin ini mar. Ti ndí'i yukan ni ka ka'an: Kusii xaan ini yo ja ka'an yo ja va'a xaan kuu Yandios ja kancha ya nuu mesa ja ta'u ya jniñu.

Kusii xaan ini yo ja ka'an yo ja va'a xaan kuu Lelu Yandios ja kancha nuu mesa nuu ta'u ya jniñu.

Ti na koo yo ja yiñu'un nuu ya, chi vii xaan kuña'nú ya undi vijna ti undi ni kani ni kuiya.

Ni ka kachi i.

<sup>14</sup> Yukan na sa ni ka ka'an ndí kuun ja chaku un, ti ni ka kachi:

—¡Sia'an na koo! —ni ka kachi.

Ti ndí oko kuun chaa ña'nú ja ka ndisojniñu ni ka jakunjiti da, ti ni ka chíñu'un da nuu ya —ni ka kachi.

*Ndi uxia sello*

## 6

<sup>1</sup> Yukan ti ru'u Juan, ni jini ri ja maa Lelu Yandios ni ja'ncha ya iin ja uxia sello un. Ti ni jiniso'o ri ja ka'an iin jna'an ndi kuun ja chaku un. Ni ka'an nanu kana iin taja, ti ni kachi:

—¡Ña'an ti nde'e ra! —kachi.

<sup>2</sup> Yukan ti ni jini ri iin kuayu kujin, ti yoso siki ti iin ja yinda'a iin kuji ja ski'in nduva. Ti yukan ni ni'in iin corona ja ku'un xini. Ti ni kee ja kanaa, ti ni kundee ni siki tendi'i. <sup>3</sup> Yukan ti Lelu ni ja'ncha ya sello kuu uu. Ti ru'u Juan, ni jiniso'o ri ja ka'an inga jna'an ndi kuun ja chaku un, ti ni kachi:

—¡Ña'an ti nde'e ra! —kachi.

<sup>4</sup> Ti ni jini ri ja ni kee iin kuayu kua'a, ti ja yoso siki ti un ndisojniñu ja xnaa jnu'un siki ja ka iyo mani ini yivi ñuyivi. So ja na ka'ni jna'an i. Ti suni ni ni'in da iin espada kani. <sup>5</sup> Yukan ti Lelu ni ja'ncha ya sello kuu uni, ti ru'u Juan ni jiniso'o ri ja ka'an inga jna'an ndi kuun ja chaku un, ti ni kachi:

—¡Ña'an ti nde'e ra! —ni kachi.

Ti nu ni nde'e ri ti ni jini ri iin kuayu jnuu. Ti ja yoso siki ti un yinda'a iin balanza ja chikua'a ndeyu. <sup>6</sup> Ti mañuu ndi kuun ja chaku un ni jiniso'o ri iin jnu'un ja ka'an:

—In kilo ni triu na kinya'u ja sajniñu i iin kivi. Ti uni ni kilo cebada na ni'l'in i ja kinya'u i ja sajniñu i. Ko sa tu kumani aceite jiin vino nuu i —ni kachi jnu'un un. <sup>7</sup> Yukan ti Lelu ni ja'ncha ya sello kuu kuun. Ti ru'u Juan, ni jiniso'o ri ja ka'an inga jna'an ndi kuun ja chaku un, ti ni kachi:

—¡Ña'an ti nde'e ra! —ni kachi.

<sup>8</sup> Ti ni nde'e ri ti ni jini ri iin kuayu kuaan. Ti yoso siki ti iin ja ndisojniñu ja ka'ni yivi. Ti ichi jata ndikun inga ja ndiso jniñu ja skivi yivi naa i nuu ñuji'i. Ko ni sasiñn Yandios ñuyivi ja kuu kuun nuu, ti ni ja'a ya jniñu nuu iin chaa un ja na ka'ni da yivi. Ti sa'a da ja na kuu yivi naa i jiin kue'e xaan. Sa'a da ja koo jnama xaan. Ti suni sa'a da ja na kaji kuiti xaan ja ka iyo nuu ñuyivi ja'a taká yivi naa i. Sia'an kin xnaa chaa un yivi.

<sup>9</sup> Ti Lelu yukan ni ja'ncha ya sello kuu u'un. Ti nu ni ja'ncha ya, ti ru'u Juan, ni jini ri ja iyo iin mesa nuu ka chiñu'un i Yandios. Ti chii mesa un ka'iin yivi ni ka ji'l'i siki ja ka yi'i i jiin ya. Chi ni ka kandixia ndaa i jnu'un ya, ti ni ka siuki ni ini i jnu'un un na ni kunchuku i nuu ñuyivi ja'a. Ja siki yukan ti ni ka ja'ni yivi maa i. Ti ru'u ni nakuni ri yivi un. <sup>10</sup> Chi ka kanajaa i sia'an:

—Jito'o Yandios! Maa ni kuu Yandios ndoo. Va'a siuku ni tako jnu'un ja ni kee yu'u ni. Ko NASA ga kivi ti sa'a ndaa ni ja'a saña naa na, ti nakua'a ni ja na jna'nu ndatu yivi ni ka ja'ni saña naa na —ni ka kachi i.

<sup>11</sup> Yukan ti ni jini ri ja ni ja'a ya sa'ma kujin ja na ku'un i, ti ni kachi ya nuu i:

—Kundatu naa ra ti jaku ga kivi, chi ka iyo ga ñani jna'an ra ja ka junukuachi i nuu Cristo, ja suni kuū i siki ja ka kandixia i ya. Chi kumani ja ka'ni yivi sava ga ñani jna'an ra ja suni ka junukuachi i nuu ya —ni kachi ya.

<sup>12</sup> Ti ru'u Juan, ni jini ri ja Lelu un, ni ja'ncha ya sello kuu iñu. Ti ni kii iin ñujnaa xaan. Ti ni kuñaa nuu ndikandii nanu iin sa'ma jnuu. Ti ni nduu yoo nanu niñi.

<sup>13</sup> Ni jini ri ja ni kuun chuxini ichi andivi undi nuu ñu'un. Ni ka nukoyo nanu tichi víxi yi'i ja nu kee tachi ni'l'in xaan.

<sup>14</sup> Ni kuxio andivi ti ni nastuu kua'an nanu iin vigin tutu ka'nu. Taka yuku jiin ñu'un ka'iin mañuu nducha, ni ka kuxio kua'an.

<sup>15</sup> Ti ja yukan ni ka yu'u xaan taka yivi kanchuku nuu ñuyivi. Ni ka yu'u taka rey, jiin taka ja ka kuñalnu, jiin ja riku, jiin taka capitán, jiin ja ka

ndisojniñu ña'nu, jiin muzu ja ni ka jaan yivi, jiin chaa ka sa'a jniñu ja kuu ja kuu maa da. Taka un ni ka jankisa'yí chii yau kava jiin yau kava ja iyo chii yuku. <sup>16</sup> Ti ni jiniso'o ri ja ka kana i yuku un jiin kava un, ti ni ka kachi i:

—Na ndeokava naa ra siki ri. Na kasí nuu ka yisa'yí ri, nava tu kuni maa ya ja kancha nuu mesa nuu ta'u ya jniñu, nava ni maa Lelu un tu kuni ya yo'o noa yo, chi kuiti ini ya ti vi'ga kua'a ya nundo'o kondo'o yo.

<sup>17</sup> Vijná ndixia ti ni jaa kivi ka'nú ja kua'a ya nundo'o kondo'o yo. Ti tu ni iiñ ja kundee jiin jnu'un ja kuiti ini ya —ni ka kachi i.

### *Yivi ja kuu maa yivi ndaa ñuu Israel*

## 7

<sup>1</sup> Yukan ti ru'u Juan, ni jini ri ja kajin kuun ángel Yandios. Ti kajin da ndi kuun jiki ñuyivi. Ti tu ni ja'a ya jnu'un ja ya'a tachi. Ja yukan tukaa ni kee tachi nuu ñu'un ñuyivi. Ni tukaa ni kee tachi nuu nducha mar. Ni tukaa ni kee chii yujnu un. Sia'an ni ka sa'a ndi kuun ángel un.

<sup>2</sup> Yukan ti ni jini ri inga ángel Yandios. Vaji ya ichi nuu kaña ndikandii. Ti yinda'a ya sello maa Yandios, ya chaku. Ni'in ni kana ya xini ndi kuun ángel ja kajin ndi kuun jiki ñuyivi. Vanuxia ndi kuun ángel yukan ka ndisojniñu ja xnaa ñuyivi, ñu'un jiin nducha mar. <sup>3</sup> Ti ni kachi ya nuu i naa i:

—Kundatu ti'lí naa ra. Xnakan na chaa ri sello Yandios jña taká yivi ja ka junukuachi i nuu Yandios, yukan na ti sa stivi ra ñuyivi. Ti stivi ra nducha mar. Ti xnaa ra taká yujnu un —ni kachi ya.

<sup>4</sup> Yukan ti ni jini ri ja kachi ya nasa yivi ni jinu ja ni chaa ya sello jña. Ni jini ri ja iyo ciento uu xiko kuun mil yivi, ja kuu maa ni maa yivi Israel. Ti yukan ka kuu yivi ni ka yi'i nuu ndi uxi uu tata najana'an, chaa ni ka xnukoo nación Israel.

<sup>5</sup> Uxi uu mil yivi ni ka kuu jna'an tata Judá ja ni ka ni'in sello un, jiin uxi uu mil yivi ja ni ka kuu jna'an tata Rubén, jiin uxi uu mil yivi ja ni kuu jna'an tata Gad, <sup>6</sup> jiin uxi uu mil yivi ja ni ka kuu jna'an tata Aser, jiin uxi uu mil yivi ja ni ka kuu jna'an tata Neftalí, jiin uxi uu mil yivi ni ka kuu jna'an tata Manasés, <sup>7</sup> jiin uxi uu mil yivi ja ni ka kuu jna'an tata Simeón, jiin uxi uu mil yivi ja ni ka kuu jna'an tata Levi, jiin uxi uu mil yivi ja ni ka kuu jna'an tata Isakar, <sup>8</sup> jiin uxi uu mil yivi ja ni ka kuu jna'an tata Zabulón, jiin uxi uu mil yivi ja ni ka kuu jna'an tata José, jiin uxi uu mil yivi ja ni ka kuu jna'an tata Benjamín. Yukan ti ru'u Juan ni jini ri ja ni chaa ya sello nuu tendi'i yivi ja'a.

### *Yivi kua'aja ka ñu'un sa'ma kuijin*

<sup>9</sup> Ti ru'u Juan ni nde'e tuku ri, ti ni jini ri ja ni ka ndututu kua'a xaan yivi, ja tu ni kuu ka'u ri nasa i ni iyo, chi yivi kua'a xaan ni kuu, ja vekoyo i nuu ni tu'u ñuyivi. Ti ka ka'an i tendi'i nuu yu'u ja ka ka'an yivi ñuyivi. Ti kajin i yu'u mesa nuu ta'u Yandios jniñu. Kajin i nuu maa Lelu Yandios. Ti ka ñu'un sa'ma skiyí la'lí, ti ka yinda'a i nda'a ñuu yukuñuu.

<sup>10</sup> Ni ka keja'a ka kanajaa i, ti ni ka kachi i:

Yandios maa yo kuu ya ni nama saña.

Ti maa Lelu Yandios kuu ya ni sa'a ja ni ka nita'u na.

Ni ka kachi i.

<sup>11</sup> Suni ni kujin taká ángel Yandios nuu mesa un, nuu ka'iin chaa ña'nu ja ka ndisojniñu, jiin ndi kuun ja chaku un. Ti ni ka jakunjiti da, ti ni ka sino da nuu da undi nuu ñu'un, ja ka chifñu'un da Yandios.

<sup>12</sup> Ti ni ka ka'an da jiin ya:

¡Ni'l'in, Jito'o Yandios! Na ka'an yivi naa i ja kuña'nu xaan ga ni, chi jandaa ndixia ja vii xaan kuña'nu ni.

Vi'i ga ndichi ni.

Na kakanta'u na nuu ni.

Ja siki jniñu ña'nu ni, na kua'a na ja yiñu'un nuu ni.

Na ni'in kua'a xaan ga jniñu. Na kundee ni jiin taka ja sa'a ni.

Sia'an na kuu ja kuu saa ni, ti sia'an na koo.

Ni ka kachi ángel ya.

**13** Yukan ti ni ka'an iin chaa ña'nu un jiin ri:

—Juan, ¿Nasa jani ini ra siki yivi ka ñu'un sa'ma xkiyi la'li un? ¿Nau ja ka kuu nu? ¿Nanu vaji i nusa? —ni kachi da.

**14** Ti ni ka'an ri jiin da:

—Maa ni jini ni, taa —ni kachi ri.

Ti ni ka'an da jiin ri:

—Vekoyo i nuu iyo nundo'o xaan. Ka kuu i yivi ja ni ka nakacha i sa'ma i. Ni ka ndundoo undi ini añu i, chi ni ji'i maa Lelu Yandios ja siki maa i naa i. Ni jati ya niñi ya na ni ji'i ya. Ti jiin yukan ni ka ndundoo añu yivi un naa i.

**15** Yukan kuu ja ka'iin yu'u mesa nuu ta'u Yandios jniñu, nava kunukuachi i nuu ya ja kuu nduu kuu ñuu. Ti sajniñu i nuu ve'e ya, ti koto va'a ya maa i chi kuncha ya jiin i. **16** Tukaa ga kuu i soko, ni tukaa ga ichi i nducha, ti ni tukaa ga kondo'o i jiin kiji ndikandii. **17** Chi maa Lelu Yandios kuncha ya jiin, kuncha ya mesa nuu ta'u ya jniñu, ti koto va'a ya i. Kunchaka ya i ki'in ya jiin i nuu kaña nducha skiyi xaan ja kunchuku i jiin ya ja kuu saa ni. Ti sa'a ya ja tukaa koo kuiti jnu'un kui'ya ini i naa i —ni kachi chaa ña'nu un.

### *Siki sello kuu uxia jiin ko'o kuu oro*

## 8

**1** Yukan ti maa Lelu Yandios ni ja'ncha ya sello kuu uxia ja jasi tutu un. Ti nu ni te'nde sello un, ni kuna'in kuiti nuu andivi. Ni kuna'in ja kuu sava hora.

**2** Ti ru'u Juan ni jini ri uxia ángel ja ka'iin nuu Yandios, ti ni ka ni'in uxia ndiki.

**3** Ti ni chaa inga ángel Yandios. Ni chaa da ti ni jakundichi da nuu altar nuu ka'iin ja ka chiñu'un Yandios. Yinda'a da iin ko'o oro nuu kayu suxia kutu. Ni ni'in kua'a da suxia kutu chi kayu nuu ka jikanta'u yivi maa Yandios. Ni ja'ma ya suxia kutu un nuu ka chiñu'un i Yandios, ja na kayu nuu maa ya. **4** Sia'an ni kaa ñu'ma suxia kutu un ja ni ja'ma ángel Yandios. Ni kaa ñu'ma un jiin jnu'un ka jikanta'u yivi ya. Ni kaa kua'an undi nuu maa Yandios.

**5** Yukan ti ángel un ni ki'in ya ko'o un, ti ni chu'un chitu da tikuañu'un ja kayu nuu altar un, ti ni jacha da siki ñuyivi. Ti ni kanajiiin iin taja. Ni'in, ti janducha, ti ni jnaa. Sia'an ni kuu na ni te'nde sello kuu uxia.

### *Jnu'un siki ndiki*

**6** Yukan ti ndi uxia ángel Yandios ni ka ni'in ya ndiki ja tivi da. **7** Ti ni tivi ndiki ángel undi nuu kuiti. Ti ni kuun ñiñi jiin ñu'un nuu ñuyivi ja sakanaa jiin niñi. Ti yukan ni kayu iin ja uni nuu ñuyivi. Suni sia'an ni kayu iin ja uni nuu yujnu. Ti suni ni kayu iin ja uni nuu icha kuii. Sia'an ni kuu na ni tivi ndiki undi nuu kuiti.

**8** Yukan ti ni tivi inga ndiki. Ti ni jini ri iin ja kaa nanu iin yuku ka'nu ni nduva kua'an nuu nducha mar, ti kanda'a kua'an nuu mar un. Ti iin ja kuu uni nuu nducha mar un ni nduu niñi. **9** Ti ni ka ji'i iin ja kuu uni nuu taka nuu kuiti ka'iin chii nducha un. Ti suni ni naa iin ja kuu uni nuu taka barco. Sia'an ni kuu na ni tivi ndiki kuu uu.

**10** Yukan ti inga ángel ja kuu uni ni tivi ya ndiki. Ti ichi andivi ni kanakava iin chuxini ka'nu xaan. Ti ndinchaa kua'a nanu iin ñu'un yiti na ni jinu vají. Ni jinu siki nuu uni nuu taka yucha jiin siki taka soko nducha. **11** Chuxini un ni nani iin ja u'gua, chi tendi'i nducha nuu ni jinu ni ka nduu u'gua. Ti yivi ni ka jí'i nducha un, kua'a i ni ka jí'i, chi ni nduu ugua xaan nducha un. Sia'an ni kuu na ni tivi ndiki kuu uni.

**12** Yukan ti inga ángel ja kuu kuun ni tivi da ndiki. Ti iin nuu ndikandii jiin iin nuu yoo jiin kua'a chuxini ni ka nativi. Sava ni ka nda'va. Ti tukaa ni ndii va'a chi ni kuñaa nuu iin iin nuu taka un. Sia'an ni kuu na ni tivi ndiki kuu kuun.

**13** Yukan ti ru'u Juan, ni jiniso'o ri ja kana iin ya'a ja jiko ti undi sava andivi un, ti kachi ti:

—Ro'o yivi ñuyivi, xaan ga nda'u koo ra naa ra, chi nda'u xaan kondo'o ra, chi kuan kuyajni ja tivi uni ga ndiki ndi uni ga ángel ya —ni kachi ti.

## 9

**1** Yukan ti inga ángel kuu u'un ni tivi da ndiki. Ti ni jini ri ja ni kanakava iin chaa, ti kaa da nanu chuxini. Ni kanakava da nuu ñuyivi, ti yinda'a da iin ndakaa ja kuiña da iin soko kunu xaan.

**2** Ni jiña da yu'u soko un, ti ni kaña kua'a xaan ñu'ma, nanu iin horno ka'nu xaan. Ti ndii ndikandii. Ko nu ni kaña kua'a xaan ñu'ma un, ti ni kuñaa ni tu'u nuu andivi jiin ndikandii.

**3** Ti nuu ñu'ma un ni ka kenda ndikua'yí, ti ni ka jichanuu ti nuu ni ka'nu ñuyivi. Ti ka ndisojniñu ti ja sa'a ti nanu ka sa'a ndisu'ma xaan un. **4** Ni ka ndisojniñu ti ja sa'a ti nundo'o nuu taka yivi, ja tu ka ndiso sella ja kuu yivi Yandios. Chi vanuxia tu ni ka ndiso ti jniñu ja stivi ti icha, ni ja stivi ti yuku, ni ja stivi ti taka yujnu.

**5** Ni ka ndiso ti jniñu ja kua'a ti nundo'o nuu yivi un ja kuu u'un yoo, ko tu ni ndisojniñu ti ja ka'ni ti ndiyi. Chi so ja kua'a ti nundo'o nanu ka tuu ndisu'ma un. **6** Kivi un kundio ini yivi naa i ja na kuü i, ko tu kuu kuu nduku xaan i nasa a kuü i, ko tu ni'in i nasa.

**7** Ti ndikua'yí un, kanda ti nanu kanda kayu ja ka iyo tu'va ja kin kanaa. Xini ti ñu'un iin corona oro. Ti kanda nuu ti nanu yivi. **8** Iyo ixí ti ti kaa nanu ñasi'i. Ti jnu'un ti kaa nanu'un ndika'a. **9** Ti ñii ti kaa nanua kaa. Ti ni'in ndijin ti nanu ni'in nuu kuankoyo kua'a kayu nuu guerra ja ka jista ti carreta. **10** Su'ma ti kaa na nuna su'ma ndisu'ma, chi iyo iin ñuu su'ma ti. Yukan ni ka ja'a ti nundo'o nuu yivi jiin su'ma ti un. Sia'an ni ka stuij ti yivi ja kuu u'un yoo.

**11** Ti iyo iin ja kuña'nu nuu ti. Maa iin yukan ni kuu ja ndito yu'u soko nuu ka'iin yivi ndeva'a un. Ti yukan kuu iin ángel ndeva'a ja nani Abadón nuu yu'u hebreo, ti nuu yu'u griego nani Apolión. Sia'an ni kuu sivi ángel un, chi ni xnaa yivi naa i. **12** Sia'an ni iyo iin nundo'o un, ko iyo uu ga nundo'o ja kii.

**13** Yukan ti inga ángel kuu iñu ni tivi da ndiki. Ti ru'u Juan, ni jiniso'o ri ja ka'an iin jnu'un. Ni ka'an undi ma'ñu ndi kuun xini altar oro ja kande nuu Yandios. **14** Ti ni kachi jini ángel Yandios ja kuu iñu:

—Nu iyo yucha ja nani yucha Eufrates, iyo kuun ángel ja ka nu'ni da. Kuan ndaji da —ni kachi.

**15** Yukan ti ndi kuun ángel un ni ka ndaji. Ti ka iyo tu'va ja kuu maa hora, jiin kivi, jiin yoo, jiin kuiya, chi ka'ni da sava yivi ñuyivi. **16** Ti ru'u Juan, ni jiniso'o ri nasa koso soldado kuayu nu na ki'in da. Ti kua'a xaan da ka iyo, chi ka iyo undi uu ciento millón da naa da.

<sup>17</sup> Ja'a kuu ja ni jini ri na ni xna'an ga da nuu ri. Ni jini ri kuayu un, ti ni jini ri chaa ka yoso. Ti ka ñu'un da su'u nuu ja kua'a, ja nchaa, jiin ja kuaan. Ti xini kayu un ka nanuu xini ndika'a. Ti kaña ñu'un yu'u ti. Ti suni kaña ñu'ma yu'u ti. Ti suni ni kaña azufre yu'u ti. Taka un ni kaña yu'u ti.

<sup>18</sup> Yukan ti ni ka ja'n'i tì sava yiví ñuyiví. Ti kua'a xaan yiví ni ka ji'i vanuxia uni nuu ka ja'n'i ti yiví un, ja ni kaña ñu'un yu'u ti, ni kaña ñu'a, ti ni kaña azufre yu'u ti. <sup>19</sup> Sia'an ni kuu chi ni'in xaan yu'u ti. Suni ni'in xaan undi nuu su'ma ti, chi xaan su'ma ti un nanu yu'u koo, ti jiin yukan ni ka stuji ti yiví. Yukan ni kuu na ni ka ji'i iin ja kuu uni nuu yiví ñuyiví.

<sup>20</sup> Ko sava ga yiví ñuyiví, vasu tu ni ka ji'i i jiin nundo'o un. Ko ni tu ni ka nakani kuiti ini i ja xndoo i jniñu ndeva'a. Chi tu ni ka xndoo i ja chiñu'un i ndaja'a ja yinda'a maa ja'u'u un. Tu ni ka xndoo i ja chiñu'un i santu ja ni ka sa'a i jiin oro. Ni tu ni ka xndoo i ja chiñu'un i santu ja ni ka sa'a i jiin plata. Ni tu ni ka xndoo i ja chiñu'un i santu ja ni ka sa'a i jiin yuu. Ni tu ni ka xndoo i ja chiñu'un i santu ja ni ka sa'a i jiin yujnu. Tu kuiti ni ka xndoo i ja chiñu'un i taká yukan, vasu tu kuiti chaku ini santu un, ni tu jiniso'o, ti ni nu tu kuu kaka. <sup>21</sup> Suni sia'an tu ni ka xndoo i ja ka jajna'an ini i ka'n'i i ndiyi. Suni tu ni ka xndoo i jniñu ja ka sa'a tasí i. Tu ni ka xndoo i ja ka jika i jiin jnu'un sih ini. Ni tu ni ka xndoo i jnu'un ja ka sakui'na i. Tu kuiti ni ka xndoo i tako jniñu ndeva'a un. Sia'an ni kuu na ni tiví trompeta kuu iñu.

### Jnu'un ángel ja yinda'a tutu lulu

## 10

<sup>1</sup> Suni ru'u Juan, ni jini ri inga ángel Yandios vee kuun da ichi andivi. Ti kuu ya iin ángel kuña'nú ga. Chi suku ya iin tiku'lú viko, ti xini ya kaxndee iin koo kiji. Nuu da kaa nanu nuu ndikandii. Ti si'in ya kanda nanu uu si'ñi yux'e, ti kanda'a.

<sup>2</sup> Ti yinda'a da iin tutu lulu ini nda'a da ja nuña. Ni jani da si'in kua'a da nuu nducha mar ti ni jani da inga si'in da nuu ñu'un ichi. Sia'an ni jakuiñi ángel un. <sup>3</sup> Yukan ti ni kanako'o da. Ni kanako'o da nanu kuu nu nde'e iin ndika'a. Ti nu ni kanako'o da, ni keja'a ka'an taja. <sup>4</sup> Undi uxia jinu ni ka'an taja un. Ti ru'u Juan, kuni chiso ri jnu'un un nuu tutu, ko tu ni kuu, chi ni jiniso'o tuku ri ichi andivi ja ka'an iin jnu'un jiin ri, ti ni kachi:

—Koto chaa ra jnu'un ni ka'an uxia taja un. Chi su'va sava'a va'a ra jnu'un un —ni kachi.

<sup>5</sup> Yukan ti ángel un ni kani'in da nda'a kua'a da ichi andivi, <sup>6</sup> ti ni keja'a ka'an ni'in teyii da. Ni ka'an teyii da jandaa siki maa ja chaku ja kuu saa ni, ja kuu ni kani, ja ni sa'a andivi jiin ñuyiví jiin taka ja iyo nuu, ti ni kachi da:

—Tukaa ga kukuee ti jinu taka ja ni chisojnu'un Yandios. <sup>7</sup> Chi jaa kiví ja jinu jniñu Yandios. Yiví na tiví sandil'i ni ga ndiki, ti kundaa taka jnu'un ni chisojnu'un da. Sia'an nanu ni chisojnu'un da nuu chaa ni ka kuu profeta, ja ni ka ka'an da jnu'un ya undi najana'an —ni kachi ángel kuña'nú un.

<sup>8</sup> Yukan ti ni jiniso'o tuku ri ichi andivi ja ka'an inga jnu'un, ti ni kachi:

—Kuan ki'in tutu lulu ja nuña ini nda'a ángel ja kandichi nuu nducha jiin nuu ñu'un un —ni kachi jiin ri.

<sup>9</sup> Sa ni ti ni tu'va ri nuu kandichi ángel un, ti ni kachi ri:

—Kua'a nuu ni tutu lulu ni nuu na —ni kachi ri.

Ti ni kachi da:

—Ki'in ti kají ra. Ti kuu ugua chii ra sa'a. Ko yu'u ra, chi nduu vixi nanu nduxi ñuñu —ni kachi da.

**10** Yukan ti ni ki'in ri tutu lulu un, ti ni yaji ri. Ti vixi ni kuu ini yu'u ri nanu nduxi ñuuñu. Ko nu ni koko ri ti ni kuu ugua ndixia chii ri ni sa'a.

**11** Yukan ti ni kachi da jiin ri:

—Kanuu ja kin nakachí ra jnu'un Yandios. Ti ka'an ra jnu'un da nuu kua'a xaan yivi naa i siki nasa koo ijña isa, nuu tijni ñuu jiin nuu tijni nación ja siin siin yu'u ka ka'an i, jiin nuu tijni chaa kuña'nu —ni kachi da.

### Siki uu chaa ka ja'a jandaa

## 11

**1** Yukan ti ni ja'a ya iin ku'va nuu ri ja na chikua'a ri, ti ni kachi ya:

—Kuan chikua'a veñu'un ka'nú Yandios. Ti chikua'a ra altar. Ti suni ka'u ra nasa yivi ka'iin ja ka chiñu'un i Yandios. **2** Ko tu chikua'a ra yux'e veñu'un un. Koto chikua'a ra, chi kendo ja kuu yivi inga nación. Chi na kua'a i nundo'o nuu yivi ja kanchuku ini ñuu ii ja'a. Undi uu xiko uu yoo kuu ja kua'a i nundo'o nuu yivi ñuu ja'a —ni kachi ya.

**3** Chi kua'a ri jniñu ña'nu nuu ndinduu chaa un ja na kua'a da jandaa siki ru'u. Ja kuu iin mil uu ciento uni xiko kivi kuu ja kua'a da jandaa. Ko ku'un da sa'ma ndayi siki ja kukui'ya ini da jiin kuachi ja ka sa'a yivi naa i —ni kachi ya.

**4** Ti uu yujnu olivo un jiin uu candelero oro un kandichi nuu Yandios. Ti stuu ja maa ya kuu ja xiin ñuyivi. Ndinduu chaa un ka kuu da nanu uu yujnu Olivo jiin uu candelero oro, chi ka'iin da nuu Yandios ja kotu'va da ka'an da jnu'un ya, jiin ja ka sa'a da jniñu ña'nu ya. **5** Ti nu iyo yivi ka kuni kua'a nundo'o nuu chaa ña'nu un, ti kaña ñu'un yu'u ndinduu da ti kayu ndi'i yivi ja ka jito u'u nuu da. Undi siukan kin sa'a da jiin taká yivi ja ka kuni kua'a nundo'o nuu da. Ti maa yivi un kuü i. **6** Chi ka ndiso da jniñu ka kasi da, ti tukaa kuun sau ja kuu ni kuiya ja nakachi da jnu'un Yandios. Kuu sa'a da ja na nduu niñi taká nducha. Ti suni kuu stivi da ñuyivi jiin taká nundo'o. Nu kuni da ti kuu sa'a da un nuu nuu ni, nasa kuu ini maa da.

**7** Yukan ti ja ni jinu ja ka nakachi da jnu'un Yandios, ti kenda iin ja kaa nanu iin kuuti xaan, kaña nuu soko kunu xaan un. Kenda ti kanaa jiin da naa da, ti kundee ka'ní maa da. **8** Ti kundatu yiki kuñu da ini ichi ka'nú maa ñuu un. Ti ñuu un kuu nuu ni ka ja'ní yivi maa Jito'yo, nuu ni ka jatakaa i ya nuu nda'a cruz. Yukan kundatu yiki kuñu da. Ti kachi yivi naa i ja ñuu un kuu nanu Sodoma jiin Egipto.

**9** Undi uni kivi sava nde'e tendi'i yivi naa i nuu ka ndatu ndiyi un. Yivi ñuu jika jiin yivi inga nación jiin yivi ka ka'an inga yu'u, yukan kuu yivi ja nde'e i nuu ka ndatu ndiyi un. Ko tu kua'a i jnu'un ja jakunduji ndiyi un. **10** Ko vanuxia ka kusii xaan ini yivi ñuyivi ja ka jitonchaa i nasa ni ka jna'an chaa un naa da. Ti na sa'a i viko ja na tejna'an nuu jna'an i iin iin ta'u ja ka kusii ini i, ja ni ka kundee i ni ka ja'a i nundo'o nuu da naa da, ti ni ka ji'i da.

**11** Yukan ni ya'a tuku uni kivi sava, ti ni na kua'a tuku Yandios tachi ya ini chaa un, ti su'va ni ka nandoto tuku da, ti ni ka ndokuiñi da kajin da, ti ni ka yu'u xaan yivi nu ni ka jini i nuu da kajin da. **12** Yukan ti ni ka jiniso'o da iin ndusu ja kana ichi andivi, ti kachi:

—Kaa ti kikoyo ra undi ja'a—kachi.

Ti yivi ja ka jito u'u maa da, ni ka jini i ni ka ndaa da kuankoyo da ichi andivi jiin iin tiku'lú viko.

**13** Ru'u Juan, ni ndakoto ga ri yukan, ti hora un ni chaa iin ñujnaa xaan. Ti iin ja kuu uxi nuu ñuu un ni naa. Ti ni ka ji'i uxia mil yivi naa i ja ni sa'a ñujnaa un. Sia'an ni kuu ti sava ga i ni ka yu'u xaan. Ti ni ka ndakuni'in i sivi maa Yandios kuña'nu ya kancha andivi.

**14** Sia'an ni ya'a nundo'o kuu uu, ko yukan ti vaji tuku inga nundo'o.  
**15** Yukan ti inga ángel ja kuu uxia, ni tivi da ndikii. Ti ru'u Juan, ni jini ri ja ka'an jaa iin ndusu ichi andivi, ti ni kachi:

Jito'yo Yandios jiin Cristo, kuu ya ka ta'u jniñu vijna.

Maa ya ka ta'u jniñu nuu ni ñuu, nuu ni ka yinda'a yiví ñuyiví ja'a.

Ti ta'u ya jniñu ja kuu saa ni undi ja kuu ni kani.

Kachi ndusu un.

**16** Yukan ti ndi oko kuun chaa ña'nua ja kanchuku yu'u mesa nuu kancha Yandios, ni ka jakunjiti da nuu Yandios, ti ni ka sino da nuu da undi nuu ñu'un ja ka nachiñu'un da ya, **17** ti ni ka kachi da:

Na kuta'u na nuu ni, Jito'yo Yandios, chi kuña'nua ni nuu ni tu'u ja iyo.

Maa iin ni maa ni kuu Yandios ja ni iyo ja kuu na jana'an ja ni ya'a, ti iyo ni undi vijna.

Chi jandaa ndixia ja kuña'nua xaan ni ja ta'u ni jniñu nuu ni tu'u ja iyo.

**18** Ni ka jito u'u yiví ñuyiví maa ni, ko su'va ni jaa kivi ja koto u'u ni maa yiví un naa i.

Ti sa'a ndaa ni kuachi siki taka yiví ni ka ji'i.

Ko na kua'a ni ta'u nuu maa yiví ni ka nakani jnu'un ni, vasu kuña'nua xi nda'u. Ko nuu maa i na kua'a ni ta'u.

Ti xnaa ndi'i ni yiví ja ni ka stiví maa jiin jna'an.

Ni ka kachi da.

**19** Yukan ti ru'u Juan, ni jini ri ja nuña veñu'un Yandios ja iyo andivi. Ini yukan ni jini ri iin jajnu ja ñu'un yuu, ti nuu yuu yukan yoso jnu'un ni chisojnu'un Yandios nuu yiví Israel. Yukan ti ni keja'a ka'an taja, ti ni'in, ti jnaa, ti ni keja'a kuun ñiñi xaan, vanuxia ña'nua xaan maa Yandios.

### *In ja so naa ini yo nde'eyo*

## 12

**1** Yukan ti ru'u Juan, ni jini ri ichi andivi iin ja so naa ini yo nde'eyo. Ni jini ri iin ña'an, ti suku ña ndikandii nanu iin sa'ma, ti kandichi ña siki yoo. Ti ñu'un corona xini ña ja ka ndeñña uxi uu chuxini. **2** Ñu'un se'e ña, ti kanajiiñ ko'o ña ja ja'ncha i chii ña, ja kaku se'e ña, ti jatu ña ja skaku ña i.

**3** Yukan ti ni kenda ichi andivi inga ja so sa'u ii ini nde'eyo nuu. Ni kenda iin koo kua'ak a'na xaan. Ti iyo uxia xini ti jiin uxi ndiki ti, ti ndi uxia xini ti un ka ñu'un corona. **4** Ni jini ri ja jista ti iin ja uni nuu chuxini ja iyo nuu andivi, ti ni siukoyo ti kua'an nuu ñuyiví. Yukan ti ni jakuiñi ti nuu ña'an un. Ni jakuiñi ti nuu ña chi vanuxia ja kuan kuyajni skaku ña iin suchi lulu, ti kuni koko ti suchi lulu un. **5** Yukan ti ni skaku ña iin se'e yii. Ko suchi un ndisojniñ i ja ta'u i jniñu nuu ni tu'u ñuyiví. Ta'u i jniñu nuu vají ga kivi, ti vasu na koo yiví ni'l'in ini, ko ta'u i jniñu nuu ni tu'u yiví ñuyiví. Yukan ti ndaa i no'on i undi nuu kancha mesa Yandios nuu ta'u ya jniñu.

**6** Ko ña'an un ni jinu ña kua'an ña undi nuu ñu'un te'e. Ti yukan iyo tu'va iin ja ni satu'va Yandios ja ni'in ña ja kaji ña, chi kuncha ña yukan ja kuu iin mil uu ciento uni xiko kivi.

**7** Yukan ti ni iyo iin jnu'un kanaa nuu andivi. Ni kenda ángel Miguel jiin ndaja'a ya, ti ni ka kanaa da jiin koo ka'nua un jiin ndaja'a maa. **8** Ti Miguel jiin ndaja'a ya, ni ka kanaa da jiin un. Ni kundee da jiin kuiti un. Ja yukan tukaa ni iyo nuu ja kunchaa kuiti un nuu andivi.

**9** Siukan ni kuxio kuiti un kua'an ti. Ti yukan kuu maa koo ka'nua ja ni iyo undi najana'an xaan. Yukan kuu maa ja'u'ja suni nani Satanás. Yukan kuu maa ja ni xnda'u ndi'i yiví ñuyiví naa i. Ni keni'in da kuiti un kua'an ti jiin tendi'i ndaja'a ti. Ti ni chaa ti jiin ndaja'a ti un undi nuu ñuyiví ja'a.

**10** Yukan ti ru'u Juan, ni jiniso'o ri iin ndusu ja kana ichi andivi, ti kachi: Vijna ti stuu Yandios ja ndiso ya jniñu ña'nu ga.  
Chi ta'u ya jniñu, ti ni ja'a ya jniñu nuu Cristo ja na nama ya ñani yo jiin kua'a yo.

Chi ni keni'in ya maa iin ja kuni kankuachi siki maa i naa i.

Chi kuu nduu kuu ñuu kuni kankuachi siki i nuu Yandios.

**11** Ni ka kundee i siki ja'u'u un, chi maa Lelu Yandios ni jati ya niñi ya ja kuu maa i naa i.

Ti ni tukaa yu'u i kuū i ja siki maa ja'u'u un.

**12** Taka ra ja kanchuku andivi, na koo sihxaan ini ra naa ra.

Ko taka ra ja kanchuku nuu ñuyivi, chi koo ra jnukui'ya ini, chi ni chaa ja'u'u un nuu kanchuku ra naa ra.

Ti kuiti xaan ini i, chi jini ja tukaa ga koo kua'a ga kivi ja xnda'u nuu yivi naa i.

Ni kachi ndusu un.

**13** Yukan ti ni jini kuiti un ja ni keni'in Yandios ti kua'an ti nuu ñuyivi. Ti tukaa kuu ndivi ti andivi. Ni jini ti ja sia'an iyo, ti ni keja'a ndikun ti jata ña'an ni skaku se'e un, chi kuni ka'ni ti suchi lulu un. **14** Ti ni ja'a Yandios uu ndijin na'nú nanu ndijin ya'a nuu ña'an un, ti ni ndava ña kua'an ña undi nuu ñu'un te'e un, ja nama ña maa ña nuu koo yukan. Ni kuncha ña yukan ja kuu uni kuiya sava, ti ni iyo ja kajji ña, sia'an nava tu kuni koo un nuu kande ña.

**15** Yukan ti ini yu'u koo un ni kaña nducha. Ti ni joso ti nducha un nuu kua'an ña. Nanu iin yucha ka'nú ni kaña yu'u ti ti ni joso ti nuu kua'an ña, chi kuni ti ka'ni ti ña'an un niku. **16** Ko ni chindlee chituu ñu'un un maa ña, chi ni nuña ñu'un un, ti yayukan ni kaan yau nanu xnduchi, ti yukan ni yijin nducha un kua'an. Ti koo un tukaa ni kujunji ja sa'a ti.

**17** Yukan na ti ni kuiti xaan ini koo un siki ña'an un. Ti ni kee ti kua'an ti, ja kanaa ti jiin taka ga yivi ja ka kuu i se'e ña, maa yivi ja ka jandatu i jnu'un ni ta'u Yandios, ja ni ka kandixia ni ini i jnu'un Jesús. Ti ja sia'an ni ka kanaa koo un jiin ña'an un.

Yukan ti ni kendo ti kandichi ti nuu ñiti yu'u mar un.

### *Kuiti ni kaña nuu nducha mar*

## 13

**1** Yukan ti ru'u Juan, ni jini ri ja ni kaña nuu nducha mar un iin kuiti. Ti iyo uxia xini ti jiin uxi ndiki ti. Ti ndi uxi xini ndiki ti un ka ñu'un corona. Ti nuu ndi uxia xini ti un yoso iin sivi ja kanchaña'an siki sivi Yandios, chi ka'an ja kuiti xaan un kuu maa Yandios. **2** Ti kaa kuiti xaan un nanu kaa iin kuíñi.

Tija'a ti kaa nanu ja'a oso, ti yu'u ti kaa nanu kaa yu'u ndika'a. Yukan ti koo ka'nú un ni ja'a ndi'i ti jniñu ña'nu kundiso kuiti un, jiin iin mesa nuu ta'u ti jniñu.

**3** Ni tuji iin xini ti. Nanu ja kuni kuu ti jiin. Ko nuu ni tuji ti un ni nduva'a a tuku ni. Ti so ni naa ini tendi'i yivi, chi ni nduva'a a ni xini ti un, ti ja yukan ni ka chindikun i jata kuiti un ja kunchañu'un i ti.

**4** Ni ka chiñu'un i koo ka'nu un, chi ni ja'a ti jniñu ña'nu nuu inga kuiti un, ti suni ni ka chiñu'un i maa. Ti ni ka keja'a ka ka'an i:

—Tu iyo inga nanu iin kuiti ja'a. Ni iin tu kuu kanaa jiin maa ti —kachi yivi un naa i.

**5** Ni ja'a Yandios jnu'un ja na sa'a kuiti un nasa kuu ini maa ti. Vanuxia ni ka'an ndeva'a ti siki ya, so ja na kunchañu'un yivi ti ti ansu maa Yandios. Ja kuu uu xiko uu yoo ni ja'a ya jnu'un ja sia'an na sa'a kuiti un. **6** Ti ni ka'an ndeva'a ti siki Yandios, chi ni kachi ti ja na kunchañu'un yivi maa ti ti ansu

maa Yandios. Sia'an ni ka'an ndeva'a ti siki ya, ti suni ni ka'an ndeva'a ti siki yivi ya, siki yivi ja ni ka ni ta'u i kanchuku i jiin Yandios undi andivi.

**7** Suni ni ja'a Yandios jnu'un ja na kanaa ti jiin yivi ya ja kanchuku i nuu ñuyivi ti na kundee ti. Suni ni ja'a ya jnu'un ja na ta'u ti jniñu nuu yivi ñuyivi, vasu nuu yivi ñuu jika, xi yivi taka ga nación, xi yivi ka ka'an taka nuu yu'u, ko sia'an ta'u ti jniñu siki i naa i.

**8** Yukan kuu maa yivi ja tu kunchuku kuiti i jiin Yandios, chi tu ni kandixia i nuu maa Lelu ya.

Ja ni nakaji ya ya kuu Lulu un, ja na katí ya niñi ya, ti na kuú ya nuu nda'a cruz. Sia'an ni nakaji ya ya un undi na sa ti koo ga ñuyivi ja'a. Ti tu ni chiso kuiti ya sivi yivi un nuu tutu ya, chi tu ni ka kandixia i maa Lelu un.

**9** Ru'u Juan, na kachi ri nuu taka ro'o yivi ka kandixia, ja ka ndiyo ini ra kuni ra jnu'un ndaa. Ti chunso'o va'a naa ra nuu taka jnu'un ja'a. **10** Nusa ti nu na chondee yivi naa i ro'o vecaa, ti jandaa ni kuu ja ki'in ra vecaa. Nu na kua'a i tau ra jiin machete ja ka'nii i ro'o, ti jandaa ni kuu ja sia'an kuu ra. Yukan kuu ja kanuu ja koto sakui'ya ra ini ra ja kaka ra nuu ichi Yandios. Chi yo'o ja ni nakaji ya maa yo ja na kuú yo yivi ya, ti na kaka ndaa yo nuu ichi ya, vasu na kachi yivi ja ka'nii i yo'o.

### Kuiti ni kaña ichi chii ñu'un

**11** Yukan ti ru'u Juan, ni jini ri ja ni kaña inga kuiti ichi chii ñu'un. Ti iyo uu ndiki ti ja ni nakava nuu nanu ndiki ri. Ti ni ka'an ti suni sia'an nanu ni ka'an koo ka'nu un. **12** Ni ndiso ndi'i ti jniñu ja ndiso maa inga kuiti ka'nu un. Yukan ti ni sa'a ti ja na chiñu'un yivi ñuyivi inga kuiti un, maa kuiti ja ni tuji xini un, ko ni nduva'a ti.

**13** Ti kuiti ni kaña chii ñu'un un ni sa'a ti jniñu ña'nu, ja so ni ka naa ini yivi naa i. Ti ni ka jini tendi'i yivi un ja kayu ñu'un ichi andivi, ti ni skuun ti ñu'un un vaji ichi nuu ñuyivi. **14** Sia'an ni xnda'u kuiti un yivi ñuyivi naa i, ja ni sa'a ti jniñu ña'nu un siki ja ni kachi jna'an ti un.

Suni ni kachi ti ja na sa'a yivi iin santu ja kaa nanu maa kuiti ni tuji xini un jiin machete, ko tu ni ji'i ti. Sia'an ni kuña'nu xaan kuiti un. **15** Ti sa'a ti ja santu kuiti un na jista tachi nanu kuiti chaku nava na kuu ka'an ti, ti na ka'nii ti taka yivi ja tu jandatu i ja chiñu'un i maa ti.

**16** Ti kuiti ni kaña chii ñu'un un ni chayika ti ja na ni'in yivi naa i iin jnuni maa xini nda'a kua'a i xi yujiña i. Ni chaa ti jnuni un nuu tendi'i yivi naa i, vasu yivi nda'u xi yivi kuná'nu, vasu yivi ñava'a xu'un xi yivi ti ñava'a xu'un, vasu kuu i muzu ja ni ka jaan yivi xi yivi ja ka sajniñu ja kuu maa. Ni ta'u ti jniñu ja tendi'i kuiti yivi na ni'in jnuni un. **17** Chi vanuxia nu tu kundiso i jnuni un, ti tu kuu xiko i ni tu kuu kuan i. Sia'an kuu nu tu kundiso i jnuni ja kuu sivi kuiti xiin número ja kuu sivi ti.

**18** Ja'a na nanduku yo nasa kuni ka'an un. Yivi chaku ini ti na nanduku i nasa kuni ka'an maa número kuiti un, chi kuu nanu número ja ka ka'u yivi ñuyivi ja'a. Ti número kuiti un kuu iñu ciento uni xiko iñu.

### Yivi Lelu Yandios ja ka jita iyaa

## 14

**1** Yukan na ti ru'u Juan, ni nde'e ri, ti ni jini ri ja kandichi maa Lelu Yandios xini yuku Sión. Suni iyo ciento uu xiko kuun mil yivi jiin ya. Ti yujiña i ka yoso sivi maa ya jiin sivi Tata ya Yandios.

**2** Yukan ti ichi andivi ni jiniso'o ri ja ka'an, ti ni'in xaan ka'an nanu nuu jika kua'a xaan nducha xi nanu ni'in ka'an iin taja. Ni jiniso'o ri ja ka'an nanu nuu ka'iin kua'a yivi ka chaa yaa nani arpa. **3** Ni ka ndututu i nuu ya ja nukoo

xiin mesa nuu ta'u ya jniñu, nuu ka'iin kuun ja chaku jiin chaa ka kuña'nu un. Yukan ti ni ka keja'a ka jita i yaa. Ni ka jita i iin yaa jaa. Ti yivi un ka kuu yivi ja ni nama ya nuu ñuyivi ja'a. Ti yukan ka'iin ciento uu xiko kuun mil yivi naa i. Yivi yukan kuu ja ni ka kutu'va yaa un. Chi vanuxia tu kuiti inga ja kutu'va yaa un.

<sup>4</sup> Yivi un tu ni ka jika i ichi ndeva'a, ja kusikinchaa jna'an i. Tu ni ka ndiyo ini i jniñu ndeva'a, chi su'va ni ka sandoo i maa i jiin undi ini aña i. Yivi un ni ka chiñu'un ndaa i maa Lelu Yandios. Ni ka siuku i nava ni ka'an ya. Chi ni nama ya i ma'ñu yivi ñuyivi, ti ka kuu i nanu iin ta'u ja ka ja'a yivi nuu Yandios jiin nuu maa Lelu ya. <sup>5</sup> Tu ni ka ka'an kuiti i jnu'un xndoña'an. Chi ni ka iyo ndoo ini i, ti ni ka iyo ndoo aña i nuu Yandios.

### *Jnu'un ni ka ka'an ángel iin ichi andivi*

<sup>6</sup> Yukan ti ru'u Juan, ni jini ri iinga ángel Yandios ja ndava kua'an ichi andivi. Ti yinda'a ya iin jnu'un Yandios ja tu naa kuiti. Ni kachi da ja xndichi Yandios yivi ñuyivi. Ni nakani da jnu'un un nuu yivi ñuyivi naa i, nuu yivi taka nación, nuu yivi taka ñuu, nuu yivi taka jna'an, nuu yivi ka ka'an inga yu'u, nuu tendi'i yivi un ni ka'an ángel un.

<sup>7</sup> Ni kanako'o ya xini i naa i:

—Kuandatu naa ra nuu Yandios. Na kani ini ja maa iin ni maa ya kuu Yandios. Ti chiñu'un maa ya naa ra, chi ja kuan kuyajni kivi ja na nduku jnu'un ya siki yivi ka sa'a ndeva'a un. Na chiñu'un maa ya, chi vanuxia maa ya kuu ja ni sa'a andivi. Ti maa ya ni xnukoo ñuyivi. Maa ya ni sa'a nducha mar, ti maa ya ni sa'a soko nducha —ni kachi ángel un.

<sup>8</sup> Yukan na ti ni chaa iinga ángel Yandios, ti ni kachi da:

—Ni kuu na'in ñuu ka'nú, ñuu Babilonia. Ni naa ñuu un chi ni sa'a yivi ñuu yukan ja na naa yivi ñuyivi, ja ni ka sa'a i jniñu ndeva'a sia'an nanu ni ka sa'a yivi ñuu yukan —ni kachi da.

<sup>9</sup> Yukan ti ni chaa iinga ángel ti ni ka'an jaa nuu yivi naa i:

—Nu chiñu'un ra kuiti ndeva'a un, xi chiñu'un ra santu ti, nu ni'in ra jnuni ti ja kuncha yujiña ra, nuu chu'un ra jnuni un ja kuncha xini nda'a kua'a ra.

<sup>10</sup> Nusa ti kuiti xaan ini Yandios siki ra. Ti na kua'a ya nundo'o kondo'o xaan ra. Tukaa kuanka'nú ini Yandios nuu ra, chi kayu ra nuu ñu'un jiin azufre, ti koto nchaa taka ángel Yandios jiin maa Lelu ya nundo'o jna'an ra. <sup>11</sup> Ti jandaa ndixia ja kondo'o ra nuu kayu ñu'un un chi koo ñu'ma, ti kayu ra ja kuu saa ni, nu na chiñu'un ra kuiti un xi suntu ti xi ja kuncha jnuni ti yujiña ra. Ko na kachi ri ja tukaa kaña kuiti ra nuu nundo'o un. Kuu nduu kuu ñuu koo ndo'o koo nene ra nundo'o un —ni kachi ángel un.

<sup>12</sup> Nusa ti kanuu ja kuu yivi Yandios ja koto ma xndi'i ra ini i ja kaka ndaa i nuu ichi Yandios, maa yivi ja ka yi'i nuu nda'a ya, chi ka ndiyo ini i ja kuandatu i nuu jnu'un ya.

<sup>13</sup> Yukan ti ru'u Juan, ni jiniso'o ri iin jnu'un ja ka'an ichi andivi ti ni kachi jiin ri:

—Chiso ra jnu'un ja'a: “Na koo sií ini yivi ja ka kandixia i Jito'yo. Na koo sií ini i undi kivi na jaa kivi kuú i. Sia'an na koo undi vijná ti undi ja kuu taka ga kivi vaji”, kachi. Sia'an kachi Espíritu Yandios ja na koo sií ndixia ini i, chi ndetatu i ja ni ka sajñiu i. Ti jandaa ndixia ja tu naa ini Yandios jniñu ni ka sa'a i, chi ni ka kundee i jiin jniñu ni ja'a ya nuu i naa i —ni kachi.

<sup>14</sup> Yukan ti ru'u Juan, ni nde'e ri ti ni jini ri iin viko xkiyi la'lí nuu andivi. Ti nuu viko un kancha iin ja kuu maa Se'e Yivi Ñuyivi. Ñu'un iin corona oro xini ya. Ti yinda'a ya iin vusu kuañi ii yu'u. <sup>15</sup> Ti ni kenda inga ángel Yandios.

Ni kee da nuu maa veñu'un Yandios ichi andivi, ti ni kanako'o da xini da ja kancha nuu viko un, ti ni kachi da:

—Ka'ncha ni jiin vusu ni, chi ja ni jaa kivi ja nastutu ndi'i ni, nanu ka'ncha yo triu ja ja ni kuaan —ni kachi ángel un.

<sup>16</sup> Nusa ti maa ya ja kancha nuu viko un ni chu'un ya vusu ya ini ñuyivi, ti ni ja'ncha ya ja nastutu ya taka nuu ñuyivi. <sup>17</sup> Yukan ti ni kenda inga ángel Yandios. Suni ni kee ya veñu'un Yandios ichi andivi ti suni yinda'a da iin vusu kuañi ii. <sup>18</sup> Ti undi nuu altar ichi andivi ni kee inga ángel ja ndisojniñi siki ñu'un ja kayu nuu altar un. Ti maa da un ni kanako'o da xini ángel ja yinda'a vusu un, ti ni kachi da:

—Ka'ncha jiin vusu ra, ti nastutu ra nde'e tika'ya un, chi ja ni jichi —ni kachi ya.

<sup>19</sup> Yukan ti ángel un ni ja'ncha da jiin vusu da, ti ni nastutu da nde'e tika'ya ja kaa nuu ñu'un un. Ti ni chu'un da nde'e tika'ya un nuu taxin nava na kaña nducha tika'ya un, chi yukan kuu nuu kuiti xaan ini Yandios jiin yivi naa i.

<sup>20</sup> Undi yu'u ñuu un ni jaxin da nde'e tika'ya un. Ti ini nuu taxin un ni jika kua'an nanu iin yucha niñi. Ti ni ndaa ja ni kaña undi nuu yoyu'u kuayu un, ti ni jika undi uni ciento kilómetro.

### Siki ndi uxia nundo'o ja koo

## 15

<sup>1</sup> Yukan ti ru'u Juan, ni jini ri inga jniñu ña'nú ichi andivi ja so naa ini yo. Ni jini ri ka'iin uxia ángel Yandios, ti ka ndiso ya jniñu ja kin kua'a ya siin siin nundo'o nuu yivi naa ti, ti nu na jinu nundo'o un, yukan na ti kuu va'a ini Yandios, chi kuiti xaan ini ya nuu yivi ndeva'a un.

<sup>2</sup> Suni ni jini ri iin ja kaa nanu kaa nducha mar, ja ndinchaa ii katuu nanu vidrio. Ti sakanuu nducha un jiin ñu'un chi kanda'a. Ti yunducha mar un kajin yivi ka yinda'a arpa chi kin kata i yaa nuu Yandios. Yivi un kuu ja ni ka kundee siki kuiti un jiin santu ti, jiin ja tu ni ni'in i jnuni número ja kuu sivi ti un. <sup>3</sup> Yukan ti ni jini ri ja ka chiñu'un i Yandios ti ka jita i iin yaa nanu ni xna'an tata yo Moisés nuu yivi Israel, ja ni sa'a da jniñu Yandios najana'an. Ti suni ni ka jita i yaa ja kuu maa Lelu Yandios, ti sia'an ka'an:

Tata yo Yandios, so naa ini yo ja nde'e yo jniñu ña'nú sa'a ni, chi ndiso ni ndikuiti jniñu.

Mani jniñu ndaa, mani jniñu va'a sa'a ni. Chi ndiso ndikuiti ni jniñu.

Mani jniñu ndaa, mani jniñu va'a sa'a ni, chi maa iin ni maa ni kuu ja ta'u jniñu nuu ni tu'u ni kaa taka nación ka iyo ini ñuyivi.

<sup>4</sup> Tu iyo ni iin ja tu kua'a ja yiñu'un nuu ni, Tata yo Yandios.

Chi tendi'i i ka ka'an ja kuñu'nú xaan ni.

Chi maa iin ni maa ni kuu Yandios ndoo, Yandios ii xaan.

Ti kinkoyo yivi taka nación ja chiñu'un i ni'in.

Chi ja ni ka jini i ja va'a sa'a ndaa ni taka jniñu.

Kachi i ka jita i.

<sup>5</sup> Yukan ti ni nde'e ri, ti ni jini ri ini andivi ja nuña maa ve'e ii ini veñu'un nuu iyo laja yuu ja yoso maa ley Yandios. <sup>6</sup> Ti ichi ini ve'e un ni ka kekoyo uxia ángel Yandios ja ka ndiso da jniñu ja kua'a da nundo'o. Ti ka ñu'un da sa'ma va'a xkiyí la'lí ja xiñu ii, ti ka nu'ni iin cinturón oro jika da. <sup>7</sup> Yukan ti iin jna'an ndi kuun ja chaku un ni ja'a iin iin ko'o nuu ndi uxia ángel yukan. Ti ini ko'o un ka ñu'un chitu ndi nundo'o ja kin kua'a Yandios, maa Yandios ya chaku ja kuu saa ni.

<sup>8</sup> Ti ní kuiya ja ni ja'a Yandios ndo'o un, ni ñu'un chitu ndi ñu'ma ni ka'nu ini veñu'un andívì, chi vanuxia kuña'nu xaan maa ya kuu Yandios ja ndisojniñu ña'nu. Nusa ti ni iin yivi tu kuu kiví i ini veñu'un Yandios nuu kancha ya undi na ndi'i kua'a ángel un ndi uxia nundo'o un. Chi iin iin ángel un kin kua'a da siin siin nundo'o.

### Siki ndi uxia ko'o ja ñu'un chitu nundo'o

## 16

<sup>1</sup> Yukan ti ru'u Juan ni jiniso'o ri ja ka'an iin ndusu ini veñu'un ichi andívì, ti kanako'o sia'an nuu ndi uxia ángel Yandios ja kachi:

—Kua'an ti koyo ra ja ñu'un ko'o ka yinda'a ra jña. Kacha ra na ki'in siki ñuyivi, chi kin kua'a Yandios nundo'o —kachi.

<sup>2</sup> Yukan ti kua'an ángel undi nuu kuiti un. Ni koyo da ja ñu'un ini ko'o da. Ni koyo da nuu ñuyivi. Ti tendi'i yivi ka ndiso jnuni kuiti ndeva'a un jiin yivi ni ka chiñu'un santu ti, ni ka kaña ndi'yí xaan siki i, ti ka ndo'o xaan i. Sia'an ni kuu jiin nundo'o ni kii undi nuu kuiti un.

<sup>3</sup> Yukan ti inga ángel un ni koyo da ja ñu'un ko'o yinda'a da. Ni koyo da nuu nducha mar, ti nducha un ni nduu nanu niñi nanu niñi ndiyi. Ti sia'an ni ka ji'i taka kuiti ka ñu'un nuu nducha mar un. Sia'an ni kuu jiin nundo'o kuu uu yukan. <sup>4</sup> Yukan ti inga ángel Yandios ni koyo da ja ñu'un ko'o yinda'a da. Ni koyo da ini taka yucha jiin taka soko, ti taka nducha un ni ka nduu niñi. Sia'an ni kuu jiin nundo'o kuu uni yukan.

<sup>5</sup> Yukan ti ru'u Juan, ni jiniso'o ri ja ka'an ángel ja ndisojniñu siki taka nuu nducha, ti ni kachi da:

—Ni'in Jito'yo Yandios. Maa iin ni maa ni iyo na ni ya'a, ti maa iin ni maa ni kuu Yandios undi vijna. Maa ni kuu Yandios ndoo, Yandios ii xaan. Ndaa ni sa'a ni ja sia'an ni ndonda ni siki kuachi yivi un maa i. <sup>6</sup> Chi ni ka jati i niñi yivi ndoo ni, yivi ja ni ka ka'an jnu'un ni. Ti vijna sa'a ni ja na katni niñi maa i. Yukan kuu ja va'a xaan ni sa'a ni —ni kachi ángel un.

<sup>7</sup> Yukan ti ru'u Juan, ni jiniso'o ri ja ka'an iin ndusu nuu altar nuu kancha Yandios, ti ni kachi:

—Jito'yo Yandios. Ndiso ni jniñu ña'nu ga. Ti jniñu va'a, jniñu ndaa ni sa'a ni ja ni ndonda ni siki kuachi yivi ndeva'a un naa i —ni kachi ndusu un.

<sup>8</sup> Yukan ti inga ángel Yandios ni koyo da ja ñu'un ko'o yinda'a da, ni koyo da nuu ndikandii. Ti ni nduu ni'ni xaan ndikandii, ti yukan ni keja'a ka kayu yivi naa i. <sup>9</sup> Ti ja xaan ni'l'i, ni ka kayu taka yivi. Ti vasu sia'an ko tu ni ka nakani ini yivi un ja xndoo i kuachi i, ti ni tu ni ka ka'an i ja kuña'nu maa Yandios. Chi su'va ni ka ka'an ndeva'a i siki ya ja ni ja'a ya taka nuu nundo'o un nuu i. Sia'an ni ya'a nundo'o kuu kuun.

<sup>10</sup> Yukan ti inga ángel Yandios ni koyo da ja ñu'un ko'o yinda'a da. Ni koyo da nuu mesa nuu ta'u jniñu kuiti ndeva'a un. Ti su'va ni kuñaa nuu ta'u ti jniñu. Ti ni ka keja'a ka yeyi'i ti yaa ti, chi tukaa ka kundee ti ja jatu xaan ti.

<sup>11</sup> Ti vasu sia'an ko tu ni ka nakani ini ti ja xndoo ti jniñu ndeva'a un. Chi su'va ni ka ka'an ndeva'a i siki Yandios kancha andívì siki ja ka jatu xaan ti. Ti siukan ni ya'a nundo'o kuu u'un.

<sup>12</sup> Yukan ti inga ángel Yandios ni koyo da ja ñu'un ko'o da. Ni koyo da nuu nducha ka'nu nani Eufrates. Ti ni ichi nducha un. Ti sia'an ni nuña iin ichi ja kikoyo taka rey ichi nuu kaña ndikandii.

<sup>13</sup> Yukan ti ni jini ri ja kekoyo tachi xaan ini yu'u koo ka'nu un. Ni kekoyo tachi xaan ini yu'u kuiti xaan un. Ni kekoyo tachi xaan ini yu'u maa chaa ja ni ka'an jnu'un xndoñan un. Undi tachi u'u un ni ka kee yu'u i, ti kanda

nanu kanda sa'va un. <sup>14</sup> Yukan ka kuu tachi u'u tachi kini, ti ni ka sa'a jniñu ñ'a'nu ja so naa ini yivi ka nde'e i nuu. Ti ni kenda tachi u'u un kua'an aka nuu ñuyivi nuu kanchuku rey ja ka ta'u jniñu, ja skejna'an jnu'un jiin da naa da, ti na ndututu taka rey un ja kanaaa da jiin Yandios ja kuu kivi ka'nu un, kivi ja kuiti xaan ini Yandios, chi vanuxia maa ya kuu ya ndisojniñu ñ'a'nu ga.

**15** Ti ni kachi Jito'yo:

—Chunso'o va'a naa ra nuu jnu'un un, chi sanaa ini ra ti ndenda ri, sia'an nanu ka iyo naa ini ra ti chaa ñakui'na. Sia'an ndenda ri, chi tu ka jini ra na kivi nchaa ri. Ti nuu ka iyo ndito ini yivi ja ka ndatu nakoo i ru'u, ti kusii xaan ini i kivi ndenda ri. Chi tu koo kuiti jnu'un kanuu nuu i hora ndenda ri —ni kachi ya.

**16** Yukan ti ni jini tuku ri ja ni nastutu tachi xaan un tendi'i kuiti chaa ka ta'u jniñu nuu ñuyivi, ti ni ka ndututu da nuu nani Armagedón nuu yu'u hebreo. Sia'an ni ya'a nundo'o kuu iñu.

**17** Yukan ti ni jini ri ni jaa inga ángel ti ni koyo da ja ñu'un ko'o yinda'a da. Ni koyo da kua'an nuu tachi. Ti ni keja'a ka'an iin ndusu nuu veñu'un nuu ka chifñu'un i Yandios. Ti undi ini veñu'un un ni ka'an ya nukoo mesa, ya ta'u jniñu ñ'a'nu un, ti ni kanako'o ya:

—Ja ni jaa kivi ka'nu ja sino ri jniñu ñ'a'nu ri —ni kachi ya.

**18** Ti yukan ni keja'a janducha, ti ni keja'a ka'an taja, ti ni jnaa xaan. Undi ni kani ja ni ka iyo yivi ñuyivi, tu ni kii iin ñujnaa xaan nanu ja ni jnaa vijna ja ni jini ri.

**19** Ti ñuu ka'nu ja kuña'nu ga un, ni kusiiñ undi uni nuu. Ti ni tu'u ñuyivi ni ka jiokava ve'e taka ñuu. Chi ni nuku'un ini Yandios nasa kanda yivi ñuu Babilonia, vanuxia kuiti xaan ini ya, yukan kuu ja ni ja'a ya nundo'o ka'nu xaan un nuu yivi ñuu un. **20** Taka ñu'un ketuu ma'ñu nducha mar ni ka keka'nu kua'an na ni jnaa kivi un, ti taka yuku tukaa ni kendo ndijin ni iin. **21** Ni kuun ñiñi xaan ichi andivi. Ñiñi na'nu ja vee xaan vee uu xiko uxi kilo, ni kuun siki yivi naa i. Ja yukan ni ka ka'an ndeva'a i siki Yandios, ja ni skuun ya ñiñi na'nu xaan un siki i. Ja'a ni ya'a nundo'o kuu uxia. Ti siukan ni ka ya'a ndi uxia nundo'o iyo xaan ja ni ja'a Yandios siki ñuyivi.

### *Jnu'un siki ña'an sii ini*

## 17

**1** Yukan ti iin ángel ja ni yinda'a iin ko'o un ni ka'an ya jiin ri, ti ni kachi ya: —Ña'an, ti na stuu ri nuu ra nasa koo nundo'o siki iin ña'an sii ini, iin ña'an ja kancha ña nuu jika kua'a nducha.

**2** Chaa ja ka ta'u jniñu taka ñuyivi ja'a, ni ka nchaka da ña ja ni ka yisikinchaa da jiin ña'an un. Suni ni ka nchaka yivi taka ñuyivi maa ña. Nanu ni ka najini i ja ka sa'a i sava'ni ga ja kuni i, nanu chaa ni ji'i ndixi, ti suni sia'an ni yinda'a tu maa ña'an un maa da naa da, ja ka sa'a ndeva'a da nasa kuni maa ña —ni kachi ya.

**3** Yukan ti ni xna'an ga maa Espíritu Santu taka ja ni jini ri, ti ángel yukan ni yinda'a ya ru'u undi nuu ñu'un te'e. Ti yukan ni jini ri iin ña'an ja yoso ña iin kuiti kua'a, ti kuiti un iyo uxia xini ti jiin uxi ndiki ti. Ti ni tu'u ni kaa siki ti yoso jnu'un ndeva'a ja kancha ña'an siki sivi Yandios. **4** Ti ña'an ni jini ri un, ñu'un ña iin sa'ma kua'a ndi'i ja sakauu color kua'a jiin.

Ti so ni nakutu ii ña jiin oro jiin yuu vii xaan, jiin perla nchaa ya'u xaan. Ti yijni ña jiin nda'a kua'a ña iin vaso niña oro ja nanu ñuchitu ndii jiin jnu'un ndeva'a, chi ni sa'a xaan ña kuachi ja ndeva'a xaan ni jikonuu ña jiin jnu'un sii ini. **5** Ti yoso iin jnu'un yujiñña ña'an un, ja tu chaku ini ni iin yivi nasa kuni

ka'an jnu'un un. Ko sia'an ka'an jnu'un un: "Ña'an ja'a kuu maa Babilonia. Maa ña kuu ja kuña'nu nuu tendi'i ga ña'an ja ka jika jiin jnu'un sii ini. Maa ña kuña'nu nuu tendi'i yivi ja ka sa'a ndeva'a ini ñuyivi ja'a", kachi.

**6** Yukan ti ru'u Juan, ni jini ri ja ña'an un jika ña nanu ña'an jini. Nanu ña'an jini sia'an kaa ña, chi vanuxia ni ndusii xaan ini ña ja ni ja'ní ña yivi Yandios, ti ni jati ña niñi i. Kaa ña nanu iin ja jini, chi vanuxia ni ndusii ini ña ja ni ja'ní ña yivi ja ni ka nakani i jnu'un Jesús.

Ti so ni sa'u ii ini ri ni jini ri nuu ña'an un.

**7** Yukan ti ángel Yandios ni ka'an ya jiin ri ti ni kachi ya:

—Koto naa ini ra ja nde'e ra ña'an un. Chi na kani ri nau kuu ña'an. Suni na xna'an ri nuu ra nau kuu ja yinda'a maa ña'an un. Chi iyo uxia xini kuiti un ti iyo uxi ndiki ti. **8** Ni tuji kuiti un ti kaa ti nanu kuiti ni ji'i. Ko su'va nene ndaa tuku ti nuu soko kunu xaan un. Yukan na ti ki'in ti nuu jna'nu ndatu ti. Ti yivi ñuyivi so naa ini i nu na kuni i ja nandoto tuku ti. Ti yivi yukan ka kuu yivi ja tu ni chiso Yandios sivi i nuu tutu ya undi na ti jakoo ga ñuyivi ja'a. Vanuxia tu ni nakaji ya i ja kunchuku i jiin ya.

**9** Taka yivi ja chaku va'a injnuni i na kujnuni va'a ini i nasa kuni ka'an jnu'un ja'a. Na kujnuni va'a ini i ja uxia xini kuiti un kuu uxia yuku nuu nukoo ña'an un. **10** Suni kuni ka'an un ja iyo uxia rey ja ta'u jniñu. Ti u'un da ni naa ja tukaa ta'u da jniñu vijnna. Ti iin da chaku ja ta'u jniñu vijnna. Ti inga da chi changa ga kii. Ti chaa kii un, chi jaku ni kivi kin kuña'nu da. **11** Ja siki kuiti xaan un ja ni chaku ti ti ni ji'i ti, maa ti ni kuu rey kuu una. Ti iin jna'an ndi una rey un kuû ti. Ko kivi na ya'a ja ta'u ti jniñu, ti suni ki'in ti nuu jna'nu ndatu ti —ni kachi ya.

**12** Siin ka'an ángel Yandios un, ti ni kachi da:

—Ja ni jini ra ja iyo uxi ndiki ti. Ti yukan kuni ka'an ja iyo uxi rey. Ko tu ja'i ta'u da jniñu vijnna, ko ja kuan kuyajni kivi ja ta'u da jniñu. Ti kuiti xaan un kin ta'u ti jniñu jiin da naa da, vasu ja kuu jaku ni kivi ni. **13** Ti nduu iin nuu ini da naa da chi kin ndajnu'un da, ti nakua'a da jniñu ndiso da nuu kuiti xaan un. Nakua'a da jniñu nuu kuiti un nava na ta'u ti jniñu.

**14** Yukan na ti kanaa da jiin maa Lelu Yandios, ko kundee maa Lelu un. Chi maa ya kuña'nu ga nuu taka ga rey ja ka ta'u jniñu. Ti maa ya kuu Jito'yo ja ta'u ya jniñu nuu taka ga jito'o. Ti ku'iin jiin maa Lelu un maa yivi ya, yivi ni nakaji ya ja ki'i nuu nda'a ya. Chi ka kandixia ndaa i maa ya ti ka siuku ndaa i jnu'un ya —ni kachi ángel un.

**15** Siin ka'an ángel Yandios ti ni kachi da jiin ri:

—Ja ni jini ra ja ña'an ndeva'a un kancha ña nuu jika kua'a nducha. Ti ja kua'a nducha un kuni ka'an ja sia'an kua'a yivi ka iyo nuu ni ñuyivi yo.

**16** Suni ni jini ra kuiti xaan un, ja iyo uxi ndiki ti. Yukan ka'an ja suni ka iyo kua'a yivi ja ka jito u'u i ña'an un, ja xnaa i ña jiin taka ja yi'i jiin ña, ka'ma i ña'an un ti na kayu ña. **17** Sia'an kin sa'a i, chi ni stuu Yandios nuu i ja na sa'a i naa jniñu kuni maa ya. Ti nduu iin nuu ini chaa un naa da ja nakua'a da jniñu ka ndiso da nuu kuiti xaan un. Sia'an kin sa'a da undi na siuku ndaa sia'an nava ni kachi Yandios. **18** Ña'an ni jini ra un, yukan kuni ka'an siki maa ñuu ña'nu ja kuña'nu nuu sava'ni ga yivi ndisojníñu nuu taka ñuyivi —ni kachi ángel un.

**18**

<sup>1</sup> Yukan ti ru'u Juan, ni jini ri ja ni kuun inga ángel Yandios ichi andivi. Kuña'nu xaan da, ti janducha da ja so ni ndinchaa ii nuu ni tu'u ñuyivi. <sup>2</sup> Ni kana ko'o da ti ni kachi da:

Ni jaa kivi ja naa ñuu ña'nua Babilonia.

Ti jandaa kuu un vasu vijnna ka kuña'nu maa ndaja'a ja'u'u un jiin taka nuu tachi xaan ja kanchuku ini ñuu un.

Ti suni kanchuku tiji jiin taka ga nuu kuiti jña'an ja ka jika ti nuu tachi, ja nanu kukini ini yo.

<sup>3</sup> Ti jandaa kuu ndixia un chi ñuu un kuu nanu iiñ ña'an ndeva'a.

Ti ni sa'a ña ja yivi taka nación nanu ni ka najini i jiin jnu'un ja kaa yisikinchaa i Yandios.

Ni ka xndoo i Yandios ti ka sa'a ndeva'a xaan i.

Suni sia'an ka sa'a taka yivi ja ka kuña'nu nuu inga yivi kanchuku ini ñuyivi ja'a.

Ti yivi ja ka xiko i nuu yivi ñuu un, ni ka ni'in kua'a xaan i ndajniñu.

Chi vanuxia ni ka nduvixi ini yivi ñuu un. Ni ka nduvixi ini i jiin ndajniñu kua'a ja ka ni'in yi un.

Nusa ti ni tu ka sa'a i nanu ja ka xnaa i xu'un i.

Ni kachi ángel un.

<sup>4</sup> Yukan ti ni jiniso'o ri ja ka'an inga ndusu ichi andivi, ti ni kachi:  
Ro'o naa ra, ja ka kuu ra yivi Yandios.

Na xndoo ra ñuu ndeva'a un, nava tu sa'a ndeva'a ra nanu ka sa'a yivi un.

Na xndoo ra ñuu un nava tu ni'in ra nundo'o ja kii siki yivi un naa i.

<sup>5</sup> Ko kondo'o xaan i. Vanuxia jini Yandios ja ka'nú xaan ni kuu kuachi i nanu iiñ yuku ka'nú sukun xaan ja ni ja'nú kua'an undi nuu andivi.

Ko tu naa kuiti ini Yandios taka jniñu ndeva'a ka sa'a i.

<sup>6</sup> Va'a ga ja na kondo'o yivi ñuu un suni sia'an nanu ni ka ja'a i nundo'o nuu inga yivi.

Ko vi'ga na kondo'o i ansu ja ni ka ja'a i nuu inga yivi.

Na ni'in yí uu jinu ansu ja ni ka sa'a i jiin inga yivi.

<sup>7</sup> Ni ka nduvixi xaan ini i ja siki kua'a xaan ndajniñu ni ka ni'in i jiin xu'un kua'a ja ni ka xnaa i.

Nusa ti na kondo'o i sia'an nanu ni ka nduvixi ini i.

Suni ndukui'ya ini i, chi ka jani ini i nanu jani ini iiñ ña'an, ti kachi ña:  
"Kancha va'a ri vijnna, ti jankivi kendo nda'u ri", kachi ña.

<sup>8</sup> Ja yukan kondo'o xaan i nundo'o,  
chi sanaa ni ti chaa iiñ nundo'o siki yivi ñuu un.

Koo jnukui'ya xaan ini i. Koo jnama xaan.

Kii ñu'un siki i, kayu i jiin ñu'un un ti kuu i.

Sia'an koo siki yivi un naa i,

chi kuña'nu xaan ga maa Yandios siki i.

Ti na sa'a ya ja jna'nú ndatu i naa i.

Ni kachi ndusu ja ni ka'an ichi andivi un.

<sup>9</sup> Yukan ti nde'e xaan taka chaa ña'nú ja kanchuku taka ñuyivi nu na kuni da ja kanda'a kua'a ñuu un. Chi ni ka sama da xu'un kua'a jiin yivi ñuu un. Ko nu na jaa kivi un ti tukaa koo sia'an. Chi ndi jna'an da ni ka sa'a ndeva'a jiin yivi ñuu un, ko so ja kukui'ya xaan ini da naa da kivi na chaa kivi nda'u un.

<sup>10</sup> Ti kundichi jika chaa un naa da chi yu'u xaan da. Yu'u xaan da chi kondo'o

xaan yivi ñuu un. Ti ka'an da:

—¡Xaan nda'u! ¡Xaan ga nda'u ni nduu ñuu kuña'nu Babilonia! ¡Kuña'nu

xaan Babilonia niku, ko iiñ jinu ni ti ni nchaa nundo'o siki! —kachi da.

**11** Taka chaa ka janxiko ini ñuu yukan, kukui'ya xaan ini da. Kukui'ya xaan ini da chi tukaa ni iin ja kuaan ndajniñu ka xiko da. **12** Ti ndajniñu ka xiko da un kuu oro, plata, yuu vii xaan, jiin perla ja nchaa ya'u, jiin sa'ma va'a, jiin sa'ma seda ja kua'a ndi'i. Ti suni taka yujnu ja ja'an xiko asun, jiin taka ndajniñu vii ja ni ka sa'a jiin yuu marfil, jiin yujnu vii ja nchaa ya'u, jiin kaa kuaan, jiin kaa ndava, jiin yuu xkiyì la'li. **13** Ti suni ka xiko da canela jiin taka ja ja'an xiko asun, suxia kutu jiin suxia uguia, taka nuu perfume jiin vino, jiin aceite, jiin yuchi triu. Ti suni ka xiko da kuiti kundiso ndajniñu, jiin riì, jiin kuayu, jiin carreta, ti suni undi yivi ka xiko da, yivi ja tu kinya'u ja so sajniñu ka'a.

**14** Ka ndo'o ini da naa da siki, ja vasu ni ndiyo ini yivi ñuu un ja ni'in i ndajniñu va'a xaan, ko vijna ti tukaa kuiti ni'in i un. Chi ja ni naa ndi'i. Taka ja vii xaan ni iyo ñuu un ni naa ii kuiti, ti tukaa kuiti nani'in.

**15** Yukan ti chaa ka janxiko ini ñuu un, kundichi jika da, chi yu'u xaan da ja kuni da nundo'o kii siki ñuu yukan. Kukui'ya xaan ini da ja nukoo da ti nde'e xaan da. **16** Ti kachi da:

—¡Xaan nda'u! ¡Xaan ga nda'u ñuu ña'nu un! Chi ni kuu nanu iin ña'an ja ñu'un ña'sa'ma va'a xaan, sa'ma nchaa ndi'i jiin ja kua'a. Ti ñu'un ña siki skunk oro jiin yuu vii xaan, jiin perla ja nchaa ya'u. **17** Xaan ga nda'u kendo ñuu un, chi vijna ti iin nundaa ni, ti ni naa ndi'i taka ndajniñu va'a yukan —kachi da.

Suni sia'an ka'an tendi'i chaa ja ka skaka barco, jiin yivi ka jika jiin barco un, jiin chaa ka sajniñu ini barco un, jiin taka ga chaa ja ka sajniñu nuu mar un. **18** Yukan ti koto nchaa da ja kanda'a kua'a ñuu un, ti jakunchaa da nde'e da, ti kachi da:

—¡Ni tukaa ni iyo inga ñuu ja kuña'nu ga nanu ñuu ja'a! —kachi da.

**19** Yukan ti ru'u Juan, ni jini ri ja chaa un, ni joso da tikacha ñu'un xini da ja kukui'ya ini da. Ni ka nde'e xaan da, ti ni ka kanako'o da, ti ni ka kachi da:

—¡Xaan nda'u! ¡Xaan ga nda'u kuu ñuu kuña'nu Babilonia vijna! Chi undi yukan ni ka ndututu taka chaa ni ka skaka barco ja ka janxiko da ti ka ni'in da xu'un kua'a. Xaan nda'u kuu ñuu un chi iin nundaa ni ti ni naa ndi'i ni —kachi da, ti ni ka jakunchaa da ka nde'e da.

**20** Saña Juan, na kachi na ja taka ni'in ja kanchuku nuu andivi, na kusii xaan ini ni vijna. Maa ni'in ja sa'a ndaa siki yivi naa i, maa ni'in ja ka kuu ni yivi Yandios, maa ni'in ja ka kuu ni apóstol ja ni ka nakani ni jnu'un ya, maa ni'in ja ka kuu ni profeta ja suni ni ka nakani jnu'un ya, tendi'i ni naa ni na koo sii xaan ini ni, chi ja ni naa ndi'i kuiti ñuu un. Na koo sii ini ni, chi ni sa'a ndaa ni siki yivi ñuu un. Ni sa'a ndaa ni, chi ni ka xndoo i maa ni naa ni. Na kusii ini ni naa ni, chi ja ni sa'a ndaa Yandios siki ñuu Babilonia un.

**21** Yukan ti ru'u Juan, ni jini ri iin ángel ja ni'in teyi ni ki'in ya iin yoso molino ti ni skanda ya kua'an, ti ni'in kua'an yoso molino un undi nuu mar, ti ni kachi ángel un:

—Suni sia'an na naa ñuu Babilonia ja tukaa ga kuiti kuni yo nuu. **22** Tukaa kuiti na koo música ya ini ñuu un. Tukaa kuiti kata i yaa. Tukaa ga tivi i ndiki. Tukaa ga sa'a i ni iin nuu jniñu. Ni ñasi'i tukaa ga ndiko ña nuni ja'a.

**23** Tukaa ga ndinchaa ni iin ñu'un ini ñuu un. Ni tukaa kuiti kosii ini yivi jiin viko nanda'a. Chaa ni ka xiko ini ñuu un ni ka kuu maa ni chaa kuña'nu. Ti vasu sia'an, ko ni naa ii kuiti ñuu un. Ni naa ii kuiti ñuu un, chi vanuxia maa yivi ñuu un ni ka xndau'i yivi taka ga nación jiin jniñu tasi, jiin jniñu ndeva'a ja ka sa'a. **24** Ti yivi ñuu un ni ka ja'n'i i taka yivi Yandios. Ni ka ja'n'i da chaa ni ka nakani jnu'un ya. Ti ni ka ska'an da yivi taka ga ñuyivi ja suni na ka'n'i

da yivi Yandios. Sia'an ni ka sa'a ndeva'a xaan yivi ñuu un. Yukan kuu ja iin jinu ni ni naa ndi'i kuiti ñuu Babilonia.

## 19

**1** Yukan ti ru'u Juan, ni jiniso'o ri ja ka'an iin ndusu ichi andivi, ti ni ka'an jaa nuu ka ka'an yivi kua'a, ti ni kachi:

—¡Na nakanajaa yo Yandios! Maa ni maa ya kuu ja ni nama saña naa na.  
Ti maa ya kuña'nu xaan, chi maa ya kuu ja ndisojniñu ña'nun ga.

**2** Ti jandaa chi va'a sa'a ya taka jniñu, chi ni ndonda ya siki kuachi ña'an ndeva'a un, ña'an sii ini ja ni xnaa ña yivi ñuyivi jiin jniñu ndeva'a xaan ni sa'a ña.

Ni ja'a ya nundo'o siki ña, chi ni ja'ni ña yivi ni ka junukuachi nuu ya.

Ni kachi ángel un.

**3** Ti ni siin ka'an ndusu un:

—¡Na nakanajaa yo Yandios! Chi ja kuu saa ni kaña ñu'un ñuu yukan —ni kachi.

**4** Yukan ti ni ka jakunjiti ndi oko kuun chaa ña'nu ja ka ndisojniñu, jiin ndi kuun ja chaku un. Ni ka jakunjiti da nuu Yandios, ja nukoo ya nuu mesa nuu ta'u ya jniñu. Ni ka chiñu'un da maa ya, ti ni kachi da:

—¡Na nakanajaa yo Yandios! ¡Chi maa iin ni maa ya kuña'nu! Ti sia'an na koo —ni ka kachi da.

**5** Yukan ti ni jiniso'o ri ja undi nuu mesa nuu ta'u ya jniñu un ni ka'an iin ndusu:

Ro'o ja ka junukuachi nuu Yandios, ro'o ja ka jika yiñu'un nuu ya, ña'nun xi kuachi,

na chiñu'un nuu maa ya.

Ni kachi ndusu un.

**6** Yukan ti ni jiniso'o ri ja ka'an inga ndusu nanu nuu ka ka'an yivi kua'a. Ni'in xaan ni ka'an nanu nuu ni'in kua'a xaan yucha na'nun. Ni ka'an nava kanajiji iin taja, ti ni kachi:

—¡Na nakanajaa yo Yandios! Chi maa ya ta'u jniñu nuu yo.  
Maa iin ni maa ya kuña'nu siki ni tu'u ja iyo.

**7** Ti vijnna na kusii ini yo naa yo.

Na kusii ini yo ja chiñu'un yo maa ya.

Chi ja ni jaa kivi ja nanda'a maa Lelu Yandios.

Ti yivi ja ka kuu i nanu iin ña'an suchi, ja ka iyo tu'va i ja nanda'a i jiin ya.

**8** Chi ni kachi Yandios ja nakui'nai iin sa'ma va'a xaan, ja iyo ndoo kuiti ti xkiyi la'li.

Ni kachi ndusu un.

Ti sa'ma xkiyi la'li un xna'an nasa kanda maa yivi Yandios, yivi ja ni kachi ya ja tukaa jna'nu ndatu i, chi ni ka kivi i ini nda'a maa ya. Xna'an nau ka kuu maa yivi ka iyo ndoo kuiti, ja ka iyo ndoo ini i, ti ka iyo ndoo aña i nuu ya.

**9** Yukan ti ru'u Juan, ni jiniso'o ri ja ka'an ángel ya jiin ri, ti ni kachi da:

—Chiso ra jnu'un ja'a: “Ja'a kuu yivi ja ni kana Yandios ja ki'in yi nuu viko nanda'a maa Lelu Yandios. Na koo sii xaan ini i ja sia'an ni kana Yandios maa i naa i.”

Yukan ti ni kachi ángel un jiin ri:

—Yukan kuu iin jnu'un ndaa kuiti, chi maa Yandios ni kachi —ni kachi da.

**10** Yukan ti ru'u Juan, ni jakunjiti ri nuu ángel un ja na chiñu'un ri da niku. Ko ni kachi da jiin ri:

—Koto sa'a ra sia'an. Koto chiñu'un ra ru'u, chi suni kaa ri nanu kaa maa ra. Ja suni junukuachi ri nuu Yandios. Mani ñani ka kuu yo naa yo, chi suni nakani ri jnu'un ya. Yukan kuu ja na chiñu'un ra maa ni maa Yandios. Chi

maa Espíritu ya kuu ja xna'an jnu'un Jesús nuu tendi'i yo ja ka nakani yo jnu'un ya —ni kachi ángel un jiin ri.

<sup>11</sup> Yukan ti ru'u Juan, ni jini ri ja nuña nuu kancha Yandios andivi. Ti yukan ni kenda iin kuayu kuijin vaji ti. Ti ja yoso siki ti un nani Chaa Ndaa, Chaa va'a. Chi sa'a ndaa ya taka jniñu ya. Ndonda ndaa ya siki taka ja ndeva'a un.

<sup>12</sup> Ti nduchi ya kanda'a nanu yañu'un. Ti ñu'un kua'a corona xini ya. Ti suni ndiso ya sivi ya, ko ni iin yivi tu jini na sivi ndiso ya, chi maa iin ni maa ya jini.

<sup>13</sup> Ti ñu'un ya sa'ma ni ñutoo jin niñi, ti nani ya Jnu'un Yandios.

<sup>14</sup> Ni jini ri kua'a yivi ja ka kuu i soldado maa ya, ja ka yoso kuayu kuijin ti ka ñu'un sa'ma xkiyi la'li. <sup>15</sup> Ti ini yu'u maa ya ja yoso kuayu un ni kee iin ja kaa nanu espada ja xaan ndinduu yu'u, ti kin stuji ya yivi ñuyivi naa i. Vasu tu kuanta'u i, ko chayika ya i, chi ni'in ta'u ya jniñu nuu taka nación ñuyivi ja'a. Ti sa'a ndaa ya siki kuachi i nanu nuu jañu yo siki nde'e tika'ya ja taxin. Ti kua'a xaan ya nundo'o kondo'o i, chi kuiti xaan ini ya siki kuachi i. Sia'an kin sa'a ya chi kivi un ti maa ya nakituu ja kundiso ya ni tu'u jniñu nuu taka ñuyivi. <sup>16</sup> Ti sa'ma nu'un ya jin sa'ma suku si'in ya, ni jini ri ja yoso jnu'un ja'a: "Maa Chaa Kuña'nu Ndaa, Maa Chaa Kuu Jito'yo Nuu Ñuyivi", kachi.

<sup>17</sup> Yukan ti ru'u Juan, ni jini ri iin ángel Yandios ja kundichi ya nuu ndikandii, ti ni kanakolo da xini taka kuiti ndava nuu tachi, ti ni kachi da:

—¡Ña'an! Ndututu naa ra nuu sa'a Yandios iin viko ka'nun. <sup>18</sup> Ña'an, chi kajíra kuñu taka rey ja ni ka ta'u da jniñu. Kajíra kuña maa capitán kuña'nú ja ni yinda'a soldado. Kajíra kuñu taka chaa ña'nú. Kajíra kuñu taka kuayu. Ti kajíra kuñu maa chaa ka yoso ti un. Sia'an kajíra kuñu yivi naa i, vasu ni ka sajniñu ka'a i, vasu tu ni ka sajniñu ka'a i, vasu ka kuu i yivi ña'nú, vasu ka kuu i yivi nda'u. Ko ndivii yivi un kajíra kuñu i —ni kachi ángel un.

<sup>19</sup> Yukan ti ru'u Juan, ni jini ri ja ni ka ndututu maa kuiti kuña'nú xaan un jin taká rey ñuyivi jiin tendi'i soldado da. Ni ka ndututu da, chi kin kanaa da jiin maa iin ja yoso kuayu kuijin un jiin maa soldado ya.

<sup>20</sup> Yukan ti soldado maa iin ja yoso kuayu un, ni ka jnií da maa kuiti kuña'nú xaan un. Ti suni sia'an ni ka jnií da inga kuiti xaan un, kuiti ja ni ka'an ti ja'a maa kuiti kuña'nú xaan un, maa kuiti ni sa'a jniñu ña'nú ja so ni xnda'u ti yivi naa i. Ti yivi un kuu ja ni ka ni'in i jnuni maa kuiti xaan un jiin ja ni ka chiuñu'i i santu ti. Ni ka jnií soldado ya kuiti xaan un jiin kuiti ja ni ka'an ti ja'a maa ti un, ti ni ski'in da kuankoyo nuu mini ja kayu jiin azufre. Ti ka chaku ti ni ka skuiko da ti yukan.

<sup>21</sup> Ti uu ga yivi ni ka yi'i jiin kuiti un, maa iin ya yoso kuayu un ni ja'ní ya i naa i. Ni ja'ní ya i jiin espada ni kee yu'u ya. Yukan ti taka kuiti ja ka ndava nuu tachi, ni ka yaji ti kuñu yivi ni ka jí'i un, undi ni ka chitu chii ti. Siukan ni sa'a ndaa Yandios jniñu ya.

### Siki iin mil kuiya

## 20

<sup>1</sup> Yukan ti ru'u Juan, ni jini ri ja ni kuun iin ángel Yandios ichi andivi. Ti yijni da ndakaa ja kuiña da maa soko kunu xaan un. Suni yijni da iin cadena ka'nun.

<sup>2</sup> Yukan ti ni jnií da maa koo ka'nú ja iyo undi najana'an xaan. Ti yukan kuu ma ja'u'u ja nani Satanás. Yukan ti ni ju'ni ángel Yandios maa ja'u'u un ja kuu iin mil kuiya. <sup>3</sup> Yukan ti ni ski'in da ja'u'u un ini iin soko kunu xaan. Ti ni jasi va'a da, ti ni sa'a kutu da yu'u soko nuu ni kivi ja'u'u un, nava tukaa ga xnda'u yivi taka nación, chi undi na jinu iin mil kuiya. Ti nu na ya'a mil kuiya, yukan na ti kachi Yandios ja na ndaji ja'u'u un, ti jaku ga kivi.

<sup>4</sup> Yukan ti ru'u Juan, ni jini ri taka mesa nuu ta'u jniñu. Ti yukan ka nukoo taka yivi ja ni ni'in i jniñu ja xndichi ndaa i siki taka ga jniñu. Suni ni jini ri yivi ja ni ka ja'ncha yivi xini i siki ja ni ka kandixia i Jesús, ti ni ka nakani i jnu'un Yandios. Yukan kuu yivi ja tu ni ka chiñu'un kuiti i kuiti xaan un. Ti ni tu ni ka chiñu'un i santu ti. Ni tu ni ka ja'a i jnu'un ja kuncha jnuni ti yujína i xi xini nda'a i. Ni ka nandoto tuku i, ti ni ka ta'u i jniñu jiin Cristo. Ni ka ta'u i jniñu jiin ya ja kuu iin mil kuiya.

<sup>5</sup> Ko inga yivi ni ka ji'i un, tu ni ka nachaku kuiti i undi ni jinu iin mil kuiya un. Ti yivi nachaku tuku nuu changa ga na jinu iin mil kuiya un, yivi un kuu ja nandoto undi nuu kuiti. <sup>6</sup> Ndatu na koo ini yivi un, chi tukaa kuiti koo kuachi siki i. Chi yivi un nandoto i undi nuu kuiti, ti tukaa ni'in i nundo'o ka'nu xaan ja ki'in yi nuu kayu ñu'un un. Chi ka kuu i nanu sutu nuu Yandios jiin Cristo. Ti ta'u i jniñu jiin ya ja kuu iin mil kuiya.

<sup>7</sup> Yukan ti nu ni jinu mil kuiya un, ti ndají ja'u'u un nuu yindasi. <sup>8</sup> Kaña yukan ti xnda'u tuku nuu yivi taka nación nuu ni ka'nu ñuyivi. Kenda ti xnda'u yivi ñuu Gog jiin yivi ñuu Magog. Ti sa'a ja'u'u un ja na ndututu yivi naa i nava na kanaa i jin yivi Yandios. Kua'a xaan yivi ndututu nanu kaa kua'a xaan ñiti yu'u mar. <sup>9</sup> Yukan ti kinkoyo yivi un ni ndu'va ka'nu un, ti kuikonduu i nuu kanchuku yivi Yandios, nuu kancha ñuu ja mani ya jiin, chi kundio ini i ja kanaa i jin yivi ñuu un jiin maa ya. Yukan ti skuun Yandios ñu'un ichi andivi, ti kayu tendi'i kuiti yivi un.

<sup>10</sup> Yukan ti ski'in Yandios ja'u'u un ki'in nuu kayu ñu'un jiin azufre, chi vanuxia maa kuu ja ni xnda'u yivi naa i. Yukan kande ja'u'u un nuu ka'iin kuiti xaan un jiin chaa ni ka kuu profeta xndoña'an. Yukan kondo'o ja'u'u un jiin kuiti xaan un jiin taka ga ja ku'iin jiin un ja kuu ni kani, kuu nduu kuu ñuu ja kuu saa ni. <sup>11</sup> Yukan ti ru'u Juan, ni jini ri iin mesa kuijin nuu kuña'nu, ja kancha maa ñin ya ta'u jniñu. Ti nuu maa ya ni kuxio ñuyivi jiin andivi kua'an, chi tukaa iyo nuu kunchuku. <sup>12</sup> Yukan ti ni jini ri taka yivi ja ni ka ji'i, ni ka ndututu i yukan. Ni ka ndututu yivi ja ni ka kuña'nu. Ni ka ndututu yivi ja ni ka kunda'u i. Tendi'i ni ka ndututu nuu maa ya. Ti ni nuña iin tutu nuu ka yoso nasa ni ka sa'a yivi naa i. Ti ni nuña iinga tutu nuu ka yoso sivi yivi ja kin kunchuku i jiin Yandios. Ti nasa yoso nuu maa tutu un, nasa kuu maa jniñu ni ka sa'a yivi naa i, ja siki yukan na ti xndichi ndaa ya taka jniñu ni ka sa'a i.

<sup>13</sup> Yivi ja ni ka ji'i chii nducha mar, ni ka nandoto i. Yivi ni ka ñunduji chii ñu'un, suni ni ka nandoto i. Ti sava'ni ga nuu ni ka'iin ndiyi un, tendi'i kuiti i ni ka nandoto tuku. Ti ni xndichi Yandios siki taka iin iin nasa kaa maa jniñu ni ka sa'a i. <sup>14</sup> Yukan na ti tukaa kuū kuiti yivi un, ni tukaa ga ka ki'in i nuu ñuji'i. Ko koo ndo'o koo nene i ku'iin iin mini nuu kanda'a kua'a yaa ñu'un ja kayu i. Siukan kondo'o i nundo'o, ti yukan kuu ja kuū i jinu kuu uu. <sup>15</sup> Chi vanuxia tu yoso sivi i nuu tutu Yandios, ti tu kunchuku kuiti i jiin ya. Ja yukan keni'in ya i ki'in yi nuu kanda'a kua'a ñu'un un.

### Andivi jaa jiin ñuyivi jaa

## 21

<sup>1</sup> Yukan ti ru'u Juan, ni jini ri ja iyo andivi jaa jiin ñuyivi jaa. Chi andivi jiin ñuyivi ava un, ja ni iyo undi nuu kuiti ja ni naa. Ti tukaa ni iyo nducha mar.

<sup>2</sup> Yukan ti ru'u Juan, ni jini ri maa ñuu ii ja kuu Jerusalén jaa. Ni kuun vaji ichi andivi nuu kancha Yandios. Ti vii xaan kaa nanu kaa iin ña'an ni ndukutu ii ja nanda'a ña jiin yi ña. <sup>3</sup> Ti ni jiniso'o ri iin ndusu ja ni ka'an jaa ichi andivi. Ni ka'an nuu mesa nuu ta'u jniñu, ti ni kachi:

—¡Nde'e! Vijnal ti kancha Yandios ma'ñuu yivi naa i. Ti kanchuku yivi jiin maa ya. Maa i ka kuu yivi ya, ti maa ya kancha jiin yivi naa i. <sup>4</sup> Ni kenchaa ya taka ja ja'a jnukui'ya ini, ti tukaa ga kondo'o i kue'e ja kuü i. Tukaa ga kukui'ya ini i, ni tukaa ga kat i nducha nuu i ja nde'e i. Ni tukaa kondo'o i, chi ja ni ya'a taka nundo'o ja ni iyo un kua'an —ni kachi ndusu un.

<sup>5</sup> Yukan ti ni ka'an maa ya ja kancha nuu mesa un, ti ni kachi ya:

—Ndixia ja nasa'a jaa ri taka ja iyo —ni kachi ya.

Ti suni ni kachi ya:

—Chiso ra jnu'un ja'a, chi taka jnu'un ja'a kuu ja jini ndixia ra ti jandaan kuu un —ni kachi ya.

<sup>6</sup> Siin ka'an ya, ti ni kachi ya:

—Ja ni jinu taka jnu'un ni kee yu'u ri. Chi vanuxia kuu ri letra A jiin Z nuu keja'a ti nuu xndii'. Yukan kuu ja sa'a ri sava'ni ga jniñu ña'nu. Ti jandaan ndixia kuu yukan, chi jnu'un ri kuu nanu iiñ nuu nducha ja sa'a ja tukaa ga ichi kuiti i nducha. Chi nu kundiyo ini yivi ja kuchaku i jiin ri, ti na kua'a ri nducha ja'a ja ko'o i, ko ansu ja kuaan i kuu yukan, chi kua'a ri sia'an ni nuu i.

<sup>7</sup> Ko na kachi ri nuu ro'o naa ra ja na kuandatu ra nuu jnu'un ri, chi sia'an ti kundee ra siki taka jniñu ndeva'a un. Nusa ti kua'a ri jnu'un ja ni'in ra ta'u ja kuncha ra jiin ri. Ti maa ri kuu Yandios ja chiñu'un ra, ti maa ra kuu ndixia se'e ri. <sup>8</sup> Ko su'va inga yivi ja tu kandixia, na naa kuiti i. Yivi ja yu'u i kondo'o i siki jnu'un ri, jiin yivi ni'ñ ini ja tu kuni kandixia, jiin yivi ka sa'a jniñu ja jito u'u ri, jiin yivi ja'ni ndiyi, jiin yivi ja ka jika jiin jnu'un sii ini, jiin yivi ja ka sa'a tasi, jiin yivi ka chiñu'un santu, jiin taka yivi ka xndoña'an, tendi'i yivi yukan kinkoylo i nuu kayu ñu'un jiin azufre. Nusa ti yukan na naa i, ja kuü i jinu kuu uu.

<sup>9</sup> Yukan ti ni chaa iiñ ángel Yandios nuu ri, ja ni jniñ undi nuu kuiti iiñ ko'o ja ni koyo da nuu ñuyivi, ti ni ka ndo'o yivi un nundo'o sandi'i ni ga. Ni kii da ti ni kachi da:

—¡Cho'o! Ti na xna'an ri nuu ra iiñ ña'an ja ni nanda'a, ja kuu ña ñasi'i maa Lelu Yandios —ni kachi da.

<sup>10</sup> Yukan ti ni xna'an ga Espíritu Santo ja ni jini ri, ti ángel yukan ni yinda'a ya ru'u xini iiñ yuku sukun. Ti ni xna'an ya nuu ri maa ñuu ii ja kuña'nu ja nani Jerusalén. Ti ni kuun vají undi andiví nuu kancha Yandios. <sup>11</sup> Ti ndinchaa iiñ ñuu yukan, chi maa Yandios kancha nuu. Ndinchaa ñuu un nanu iiñ yuu ja taja ii ja nchaa ya'u xaan. Ndinchaa nanu iiñ yuu kua'a ja xiñu ii. Sia'an ndinchaa ñuu un chi maa Yandios kancha nuu.

<sup>12</sup> Ti yu'u ñuu un ni jikonduu iiñ nama sukun ja jicha xaan, ti ndi'yu yu'u ñuu un. Ti iyo uxi uu yux'e nuu ka kivi yivi naa i. Ti nuu taka yux'e un kandichi iiñ ángel Yandios. Ti ichi xini taka yux'e un ka yoso sivi taka tata ña'an ja ni ka xnukoo nación Israel. <sup>13</sup> Ti ichi nuu kaña ndikandii iyo uni yux'e. Ti ichi ichi ni nuu suni iyo uni yux'e. Ichi ichi vee suni iyo uni yux'e. Ti ichi nuu kee ndikandii suni iyo uni yux'e. <sup>14</sup> Suni ka iyo uxi uu yuu na'nu ja ka ndiso nama ñuu un. Ti nuu yuu na'nu un ka yoso sivi ndi uxi uu apóstol maa Lelu Yandios. Sia'an ni jini ri ñuu un.

<sup>15</sup> Yukan ti ángel yukan, ni jniñ da iiñ ku'va oro ja kin chikua'a da ñuu yukan. Kin chikua'a da yuu ja kuu nama ñuu un. Ti chikua'a da ndi uxi uu yux'e un.

<sup>16</sup> Ni iyo kuun jiki yu'u ñuu un, ti iiñ ni ku'va ni kuu ndi kuun jiki. Ni chikua'a ángel un, ti ni kuu uu mil uu ciento kilómetro ja iiñ iiñ jiki. Ti iiñ nuu ni ku'va ja kani, ja jicha, jiin ja sukun.

<sup>17</sup> Ti suni ni chikua'a da nama ñuu un. Ti ni jinu iiñ ciento uu xiko kuun yiki nda'a iiñ chaa. Ti ku'va ja ka jajniñu yivi naa i, suni sia'an ni jajniñu ángel

un. <sup>18</sup> Ti nama ñuu un ni kuva'a jiin yuu xiñu ja ndinchaa ii. Ti mani maa niña oro ni kuu ni ñuu un, ti ndinchaa ii katuu nanu iin vidrio xiñu ii ja yijiyo nde'le yo.

<sup>19</sup> Taka yuu na'nú ja ka ndiso nama ñuu un, ni nakutu ii jiin taka nuu yuu vii xaan. Taka nuu ni kuu yuu un, ko ndinchaa ii. Yuu undi nuu kuiti ni kuu maa yuu jaspe, ja kuu iin yuu xiñu. Ti ja kuu uu ni kuu yuu zafiro, ja kuu iin yuu nchaa ii. Ja kuu uni ni kuu yuu ágata. Ti ja kuu kuun ni kuu yuu esmeralda, ja kuu iin yuu xati ii. <sup>20</sup> Ti ja kuu u'un ni kuu yuu ónica. Ti ja kuu iñu ni kuu cornalina, ja kuu iin yuu kua'a ii. Ti ja kuu uxia ni kuu crisólico, ja kuu iin yuu kuaan ii. Ti ja kuu una ni kuu berilo, ja kuu iin yuu kuii ndi'i. Ti ja kuu iin ni kuu topacio, ja kuu iin yuu kuaan ndi'i. Ti ja kuu uxi ni kuu yuu crisoprasa. Ti ja kuu uxi iin ni kuu jacinto, ja kuu iin yuu nchaa ii. Ti ja kuu uxi uu ni kuu iin yuu amatista.

<sup>21</sup> Ti ndi uxi uu yux'e un kuu uxi uu perla. Ti iin iin yux'e un kuu iin iin perla. Mani niña maa oro kuu ni calle ka'nú ja ya'a sava ini ñuu un. Ti ndinchaa ii katuu ja janducha nuu nanu nuu iin vidrio xiñu ii.

<sup>22</sup> Ru' Juan, tu ni jini ri iin veñu'un iní ñuu un, chi ni ka'nú ñuu un iyo maa Jito'yo Yandios ja ndiso ni tu'u jniñu ja iyo. Ti kancha ya jiin yivi naa i. Ti suni sia'an kancha maa Lelu ya. Ti tendi'i yivi ñuu un ka chiñu'un i ya. <sup>23</sup> Ni tu nandi'i yivi un naa i ja ndinchaa nduva ndikandii ni ja ndinchaa nduva yoo, chi maa Yandios jiin maa Lelu ya kuu ja xndinchaa ni tu'u nuu yivi ñuu un.

<sup>24</sup> Ti nuu ndinchaa ii yukan kuikonuu yivi taka nación. Ti chaa ja ka ndisojniñu ña'nú kivi da ja chiñu'un da maa ya yukan. <sup>25</sup> Ti yux'e ñuu un tukaa kundi'yu kuiti, ni tukaa koo jakuaa. <sup>26</sup> Taka ja iyo va'a, taka ja kuña'nu ja ka yi'i jiin yivi taka nación, nakua'a i ja yiñu'un nuu Yandios nuu na kivi i ñuu yukan.

<sup>27</sup> Ko tu kuu kuiti kivi iin yivi ja ni kanda nanu ina ini ñuyivi ja'a. Ni tu kivi kuiti yivi ni ka sa'a jniñu ndeva'a, ni yivi ja ni xnda'u jna'an. Tu kuu kuiti kunchuku yivi un ini ñuu yukan. Chi maa iin maa yivi ja yoso sivi i nuu tutu maa Lelu Yandios, maa iin maa i kuu ja kivi ini ñuu yukan. Yukan kuu maa yivi ja kunchuku ini ñuu ii, ñuu Jerusalén jaa un.

## 22

<sup>1</sup> Yukan ti ángel un ni xna'an ya nuu ri iin yucha ini ñuu un. Ti yucha un iyo ndoo ii kuiti ja ndinchaa ii nuu. Ti yucha un ni kaña chii mesa nuu ta'u Yandios jniñu jiin maa Lelu ya. Ti jika nducha un ja kuu maa yivi kanchuku ja kuu taka saa ni yukan. <sup>2</sup> Ti jika nducha un sava ma'ñu ichi ka'nú ja ya'a sava ñuu un. Ti ndinduu yu'u yucha un ka'iin yujnu vixi ja kuu maa yivi kanchuku ini ñuu un. Ti yujnu vixi yukan ja'a nde'e uxi uu jinu ja kuu iin kuiya, chi na yoo kuun nde'e xini yujnu un. Ti nda'a yujnu un kuajniñu ja kuu tajna, ti jiin yukan ni kuu tajna yivi taka nación.

<sup>3</sup> Ti taka ja ka jito u'u Yandios tukaa kuu kuiti kivi ini ñuu yukan. Maa Yandios kancha ya nuu mesa ja ta'u ya jniñu jiin Lelu ya. Yukan kanchuku yivi ya, yivi ja nuu maa iin ni maa ya ka junukuachi i. Ti ka chiñu'un i maa ya.

<sup>4</sup> Ti kuni i nuu ya kuu nduu kuu ñuu, ti kuncha sivi ya yujiña i. <sup>5</sup> Yukan tukaa koo jakuaa ini ñuu un. Tukaa nandi'i i ja ndinchaa ndikandii, chi kuncha maa Jito'yo Yandios ja janducha ii maa ya nuu i. Sia'an koo ja kuu yivi ñuu un, ti ta'u i jniñu jiin maa Yandios ja kuu saa ni.

### Sanaa ni ti ndenda Cristo

<sup>6</sup> Yukan ti ni kachi ángel un nuu ri:

—Jandaa ndixia kuu takaa jnu'un ja'a, chi maa Jito'yo Yandios kuu ya nakaji nau kuu maa chaa ni kuu profeta ja ni nakachi da jnu'un ya. Undi najana'an ni ka nakachi da maa iin ni jnu'un ja ni xna'an ya nuu da naa da, chi nuu maa iin ni maa ya ni ka junukuachi da. Ni taji ya tajnu un ni ka ndiso da jniñu, nava na xna'an ya takaa jniñu ja kuan kuyajni koo —ni kachi ángel un.

<sup>7</sup> Yukan ti ni kachi Jito'yo:

—Jandaa ndixia ja kuan kuyajni ndenda tuku ri. Ti na kachi ri ja na koo sii ini takaa yivi ja kuandatu i jnu'un Yandios, jnu'un ja yoso nuu tutu ja'a —ni kachi maa Jito'yo.

<sup>8</sup> Maa ri kuu Juan, ti ni jini ri takaa jnu'un ja ni chiso ri nuu tutu ja'a. Ti na ni jini ri takaa ja ni xna'an ya nuu ri, ti ni jiniso'o ri takaa jnu'un un, ni jakunjiti ri nuu maa ángel ja ni xna'an takaa jniñu ja'a nuu ri, chi kuni chifñu'un ri ya niku. <sup>9</sup> Ko su'va ni kachi ya jiin ri:

—Koto sa'a ra sia'an, chi suni junukuachi jna'an ri jiin ra nuu Yandios, jiin taka ñani ra ja suni ka nakani da jnu'un da, jiin tendi'i yivi ja ka janta'u jnu'un yoso nuu tutu ja'a. Yukan kuu ja nuu maa Yandios na chifñu'un ra —kachi da.

<sup>10</sup> Yukan ti ni kachi ángel un nuu ri:

—Koto chisa'yí ra jnu'un Yandios ja yoso nuu tutu ja'a, chi ja kuan kuyajni kivi ja keja'a kuu ndaa. <sup>11</sup> Nusa ti yivi ja ka sa'a jniñu ndeva'a, ti na siin sa'a ndeva'a i nusa. Ti yivi ka sa'a jniñu ja tu ka jini jnukanuu, ti va'ga na siin sandee nuu i nusa. Chi tu nakani kuiti ini yivi un vasu nasa ga na ka'an yo. Ko vanuxii yivi ja ka nakutu ini jiin jniñu ndaa, ti na kachi ri ja na siin nakutu ini i ja sa'a i mani ja va'a. Ti yivi ja ni nakaji Yandios ja kivi i nuu nda'a ya, ti na kachi ri ja yukan na kendo i —ni kachi ya.

<sup>12</sup> Yukan ti ni kachi maa Jito'yo:

—Jandaa ni kuu ja yachi ni ndenda tuku ri, ti xndichi ndaa ri siki yivi naa i. Kivi jña na ti nakua'a ri ta'u nuu iin iin yivi naa i siki nasa kaa maa jniñu ni ka sa'a i. Kivi yukan kuu ja tejna'an ri ta'u i. <sup>13</sup> Ti ndiso ri jniñu ja sa'a ri un, chi kuu ri nanu letra A jiin Z nuu keja'a ti nuu xndi'i, chi maa ri ni skeja'a ndi'i, ti suni maa ri kin sino. Maa ri kuu Yandios ja iyo undi na sa ti keja'a ga ñuyivi, ti koo ri ja kuu saa ni vasu naa ndi'i takaa ga ja iyo.

<sup>14</sup> Ja yukan ka'an ri ja na koo sii ini yivi, ti na siin sandoo i undi ini añu i. Chi ka kuu i nanu yivi ja ni ka nakacha i sa'ma i, ti tendi'i i nakui'na sa'ma ndoo ii, chi ni ka ndundoo undi ini añu i. Ti yivi un kuu ja kivikoyo yux'e ñuu maa Yandios, ti kuu kaji i nde'e yujnu ja ka yaji maa yivi Yandios, yivi kanchuku jiin ya ja kuu saa ni yukan, ja tu kuú kuiti i. <sup>15</sup> Ko na kachi ri ja yukan tu kuu kuiti kivikoyo yivi ja ka sa'a jniñu ndeva'a, ja kanda nanu ina. Ni tu kuu kivi ja sa'a tasi. Ni tu kuu kivi ja ka jika jiin jnu'un sii ini, ni yivi ja ka ja'n'i ndiyi, ni yivi ja ka chifñu'un santu, ni yivi ja ka xndoña'an, tu kuu kuiti kivi i ñuu yukan —ni kachi maa Jito'yo.

<sup>16</sup> Yukan ti ni siin ka'an maa Jito'yo, ti ni kachi ya:

—Maa ri kuu Jesús. Ti maa ri ni taji ángel un ja ka ndiso da jniñu ja xna'an da jnu'un ja'a nuu ra. Nusa ti nakachi jnu'un ja'a nuu takaa yivi ka kandixia. Ti maa ri kuu ja vaji nuu jna'an rey David, tata yo najana'an ja ni kuña'nu da nuu nación Israel. Yukan vaji ri ti vii kuña'nu ri nanu vii ndinchaa chuxini ja ndenda takaa jaña'an —ni kachi ya.

<sup>17</sup> Ti ndiyo ini maa Espíritu Yandios ja nchaa yachi Jito'yo Jesús. Ti suni sia'an ka ndiyo ini yo, chi nuu maa ya ka kuu yo nanu iin ñasi'i ja ni nanda'a ña jiin yiñña. Ja yukan na kachi yo ja nchaa yachi Jito'yo. Ti suni sia'an na kachi takaa ga yivi ja kuniso'o i jnu'un ya.

Ti nu iyo yivi ja ndiyo xaan ini i ni'in i jnu'un ndaa Yandios, ti kundiyo ini i ja kuncha i jiin ya, ti na kakanta'u i nuu ya ti na kua'a ya nuu i, ko kua'a ya

sia'an ni ta'u un kuta'u i, ansu xiko ya. Nanu kua'a yo nducha nuu iin yivi nuu ichi i, suni sia'an kua'a Yandios nuu yo nu na kakanta'u yo nuu ya. Ti tu chikua'a ya ja kua'a ya nuu yo, chi uuni kua'a ya. Yukan ti ni'in yo ta'u ja kuchaku yo jiin ya ja kuu saa ni.

**18** Ru'u Juan, na xndaku ni'in ri siki jnu'un Yandios ja yoso nuu tutu ja'a. Xndaku ni'in ri ja koto ma ni iin yivi na nachiso i vi'ga ja ka'an nuu tutu ja'a, chi nu tuu, ti maa Yandios nakua'a ya taka nundo'o ja yoso nuu tutu ja'a siki i. Ti kuncha kuachi siki taka nuu nundo'o ja ka'an nuu tutu ja'a.

**19** Xndaku ni'in ri chi nu ka iyo yivi ja ka kuni kenchaa i in jnu'un ja ka'an nuu tutu ja'a, nusa ti na nda'va Yandios sivi i nuu tutu ya nuu ka yoso sivi taka yivi ja kuncha jiin ya. Ti tu kua'a ya jnu'un ja kivi i nuu ya. Ni tu ni'in kuiti i nde'e yujnu vixi ja ka yaji yivi kanchuku jiin ya ja kuu saa ni.

**20** Yukan na ti maa Jesús, ja ni xna'an ya taka jnu'un ni chiso ri ja'a, maa ya ni kachi:

—Jandaa ndixia ja yachi ni nchaa ri —ni kachi ya.

Ti ni kachi ri jiin ya:

—Jito'yo Jesús, sia'an na koo nusa. Na nchaa yachi ni. Ti sia'an na koo —ni kachi ri.

**21** Ti ru'u Juan, ñu'un ini ri ja kuu taka ro'o naa ra, ja na chindee chituu maa Jito'yo nuu in in ra naa ra. Ti vi'i ga na kunda'u ini ya nuu ra naa ra. Ti sia'an na koo.